

Buka Helaga



The Holy Bible in the Hiri Motu language of Papua New Guinea

Buka Helaga

The Holy Bible in the Hiri Motu language of Papua New Guinea Nupela Testamen long tokples Hiri Motu long Niugini

Copyright © 1964, 1982, 1994 The Bible Society of Papua New Guinea

Language: Hiri Motu (Motu, Hiri)

Translation by: The Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files dated 9 Oct 2020
a2c3805d-63d1-5cb3-b80b-d668617d4202

Contents

MATAIO	1
MAREKO	59
LUKA	92
IOANE	152
APOSETOLO EDIA KARA	197
ROMA	252
1 KORINTO	279
2 KORINTO	304
GALATIA	321
EFESO	330
FILIPI	339
KOLOSE	346
1 TESALONIKA	353
2 TESALONIKA	359
1 TIMOTEO	362
2 TIMOTEO	370
TITO	376
FILEMONA	380
HEBERU	382
IAMESI	405
1 PETERO	412
2 PETERO	420
1 IOANE	425
2 IOANE	432
3 IOANE	433
IUDA	434
APOKALUPO	437
SALAMO	468

SIVARAI NAMONA MATAIO IA TOREA

Iesu ena tubuna edia ladana

¹ Iesu Keriso ia vara ena sivarai be inai: Ia be Davida ena natuna, bona Aberahamo ena natuna.

² Aberahamo ese Isako ia havaraia. Isako ese Iakobo ia havaraia. Iakobo ese Iuda mai ena tadina danu ia havaraia. ³ Iuda ese Perese bona Sera ia havaraia, Tamara ena bogana dekenai. Perese ese Hesarona ia havaraia. Hesarona ese Rama ia havaraia. ⁴ Rama ese Aminadaba ia havaraia. Aminadaba ese Nasona ia havaraia. Nasona ese Salamona ia havaraia. ⁵ Salamona ese Boasi ia havaraia, Rahaba ena bogana dekenai. Boasi ese Obeda ia havaraia, Ruta ena bogana dekenai. Obeda ese Iese ia havaraia. ⁶ Iese ese Davida, Israela taudia edia king, ia havaraia.

King Davida ese Solomona ia havaraia, Uria ena adavana ena bogana dekenai. ⁷ Solomona ese Rehoboama ia havaraia. Rehoboama ese Abaisa ia havaraia. Abaisa ese Asa ia havaraia. ⁸ Asa ese Iehosapata ia havaraia. Iehosapata ese Iehorama ia havaraia. Iehorama ese Usaia ia havaraia. ⁹ Usaia ese Iotama ia havaraia. Iotama ese Ahasa ia havaraia. Ahasa ese Heseakaia ia havaraia. ¹⁰ Heseakaia ese Manase ia havaraia. Manase ese Amona ia havaraia. Amona ese Iosaia ia havaraia. ¹¹ Iosaia ese Iehoiakini mai ena tadina danu ia havaradia, Babulonia taudia ese Israela taudia idia abidia lao Babulonia neganai.

¹² Idia noho Babulonia neganai, Iehoiakini ese Sealetiele ia havaraia. Sealetiele ese Serubabele ia havaraia. ¹³ Serubabele ese Abiuda ia havaraia. Abiuda ese Eliakimi ia havaraia. Eliakimi ese Asora ia havaraia. ¹⁴ Asora ese Sadoka ia havaraia. Sadoka ese Akimi ia havaraia. Akimi ese Eliuda ia havaraia. ¹⁵ Eliuda ese Eleasara ia havaraia. Eleasara ese Matana ia havaraia. Matana ese Iakobo ia havaraia.

¹⁶ Iakobo ese Iosepa, Maria ena adavana, ia havaraia. Maria dekena amo Iesu, idia gwauraia Keriso, ia vara.

¹⁷ Unai dainai, uru ibounai Aberahamo ena nega dekena amo ia mai bona Davida be uru 14. Bona Davida ena nega dekena amo ia mai bona Babulonia dekenai, mai guia danu idia laohaia neganai, be uru 14. Bona Babulonia dekenai idia laohaia negana dekena amo ia mai bona Keriso, be uru 14.

Iesu ia vara

¹⁸ Iesu Keriso be inai bamona ia vara. Iena sinana Maria be Iosepa ena maoheni, to idia ruaosi nega ta do idia mahuta hebou lasi, Lauma Helaga ese Maria ia harogorogoa. ¹⁹ Maria ena maoheni Iosepa be kara maoromaoro tauna, bona hahine dekenai hemarai henia karana ia ura lasi, unai dainai hunia dala dekenai ia negea gwauraia.

²⁰ Unai bamona ia laloa noho neganai, Lohiabada ena aneru ta ese nihi dekenai ia hedinarai henia, ia gwau, "Iosepa Davida e, oiemu adavana Maria abia totona oi gari lasi, badina be inai mero, Maria ena bogana dekenai ia noho be, Lauma Helaga ese ia henia vadaeni. ²¹ Ia be mero ta do ia abia. Ena ladana be do umui atoa Iesu, badina be ia ese iena bese taudia edia kara dika dekena amo do ia hamauridia."

²² Inai kara ibounai idia vara, Lohiabada ese peroveta tauna ena uduna dekena amo ia gwauraia herevana hamomokania totona. Ia gwau,

²³ “Umui kamoni, tau ia diba lasi kekeni ese ena natuna do ia abia, mero ta.

Iena ladana do idia atoa, Emanuela.”

Emanuela ena anina be, “Dirava ita dekenai ia noho.”

²⁴ Iosepa be mahuta dekenai ia noga, vadaeni Lohiabada ena aneru ese ia hamaoroa hegeregereña ia karaia. Iena adavana Maria ia abia dae. ²⁵ To Iosepa be Maria danu nega tamona idia mahuta lasi, ela bona Maria ese iena natuna ia abia. Vadaeni mero ena ladana be Iosepa ese ia atoa, Iesu.

2

Aonega taudia dina ia daekau ena kahana dekena amo idia mai

¹ Iesu be Betelehema, Iudea dekenai ia vara, king Heroda ese Iudea dekenai ia lohia neganai. Unai neganai aonega taudia be dina daekau kahana dekena amo Ierusalem dekenai idia ginidae. ² Idia henanadaia, idia gwau, “Iuda taudia edia king harihari ia vara be edeseni? Badina be iena hisiu be dina daekau kahana dekenai ai itaia vadaeni, bona ia dekenai tomadiho henia totona ai mai inai.”

³ King Heroda ese unai hereva ia kamoni neganai, iena kudouna dekenai ia gari dikadika, Ierusalem taudia ibounai danu. ⁴ Vadaeni ia ese dubu biagudia bona taravatu hadibaia taudia ibounai ia haboua, ia nanadaia, ia gwau, “Keriso be edena gabu dekenai do ia vara?”

⁵ Idia ese idia haere henia, idia gwau, “Betelehema, Iudea dekenai. Badina be peroveta tauna ese inai bamona ia torea:

⁶ “‘Oi danu Betelehema e, Iuda tano dekenai,
Iuda lohia taudia edia huanai oi be gabeai tauna lasi,
badina be hakaua tauna ta oi dekena amo do ia mai,
ia ese egu bese Israela do ia naria.’”

⁷ Vadaeni Heroda ese aonega taudia dekenai ia boiboi, hunia dala dekenai, hisiu ia hedinarai ena nega idia dekenai ia nanadaia namonamo. ⁸ Vadaeni ia siaidia lao, Betelehema do idia lao. Ia gwau, “Umui lao, mero maragina umui tahua goadagoada, bona do umui davarua neganai, umui mai, hadibaia lau, vadaeni lau danu do lau mai, lau tomadiho henia.”

⁹ Idia be unai king ena hereva idia kamoni, vadaeni idia lao. Inai hisiu, dina daekau kahana dekenai idia itaia gauna, inai ese ia hakaudia, ia lao bona mero maragina ia noho gabuna ena atai ia gini. ¹⁰ Idia be hisiu idia itaia neganai idia moale bada herea. ¹¹ Vadaeni ruma dekenai idia raka vareai, mero maragina ena sinana Maria danu idia itaia, vadaeni edia kwarana idia atoa diho, idia tomadiho henia. Edia koku idia kehoa, vadaeni harihari gaudia idia henia, golo bona mai bonana namo muramura, bona dahua muramura.

¹² To Dirava ese nihi dekenai idia dekenai ia hamaoroa, ia gwau, “Heroda dekenai do umui giroa lou lasi.” Unai dainai dala idauna dekenai edia hanua dekenai idia giroa lou.

Maria bona Iosepa ese Iesu idia abia lao Aigupito dekenai

¹³ Aonega taudia idia giroa lou murinai, Lohiabada ena aneru ese nihi dekenai Iosepa ma ia hedinarai henia, ia gwau, “Oi toreisi, mero maragina, iena sinana danu oi abia, Aigupito dekenai umui heau lao, unuseni do umui noho ela bona do lau hereva lou oi dekenai. Badina be Heroda ese mero maragina ia tahua noho, ia alaia mase gwauraia.”

¹⁴ Vadaeni Iosepa ia noga, mero maragina, iena sinana danu, unai hanuaboi ia abidia, Aigupito dekenai idia lao. ¹⁵ Unuseni idia noho, ela bona Heroda ia mase.

Unai dainai Lohiabada ese peroveta tauna ena uduna dekena amo ia gwauraia herevana ia momokani vadaeni. Ia gwau, “Aigupito dekena amo lauegu Natuna lau boiria.”

Heroda ena oda dainai maragi momo idia alaia mase

¹⁶ Heroda be ia diba aonega taudia ese idia koia, vadaeni ia badu dikadika. Vadaeni tuari taudia ia siaia, lagani rua idia do abia lasi memero ibounai Betelehema dekenai, bona Betelehema ena badibadina tano dekenai, idia alaia mase. Badina be aonega taudia be guna idia hamaoroa, lagani rua ia lao vadaeni hisiu ia hedinarai.

¹⁷ Unai neganai Ieremia, peroveta tauna ena hereva ia momokani vadaeni, ia gwau:

¹⁸ “Gado ta Rama hanua dekenai idia kamoni,
tai mai boiboi bada, bona mai lalohisihisi bada,
Rahela be ena natuna dainai ia tai noho.
Ia tai dikadika, bona ta ese iena lalona ia hanamoia diba lasi,
badina be iena natuna ibounai idia mase vadaeni.”

Nasareta dekenai idia giroa lou

¹⁹ Heroda ia mase murinai, Lohiabada ena aneru ese nihi dekenai Iosepa ma ia hedinarai henia lou, Aigupito dekenai. ²⁰ Ia gwau, “Oi toreisi, mero maragina, ena sinana danu oi abia, Israela tano dekenai umui lao, badina be mero maragi alaia mase totona idia tahua taudia be idia mase vadaeni.” ²¹ Vadaeni ia toreisi, mero maragi bona ena sinana ia abia, Israela tano dekenai idia lao.

²² To sivarai idia kamoni, Akelao ese Iudea tano dekenai ia king, ena tamana Heroda ena gabu dekenai. Vadaeni unai gabu dekenai lao be Iosepa ia gari. To Dirava ese nihi dekenai ia hamaoroa dainai ia raka hanaia, Galilea ena kahana dekenai ia lao. ²³ Hanua ta dekenai, ena ladana be Nasareta, unuseni ia noho. Unai dainai peroveta taudia edia hereva ia momokani vadaeni, ia gwau, “Ia be Nasareta tauna do idia gwauraia.”

3

Ioane Bapatiso ia haroro

¹ Unai neganai Ioane Bapatiso ia hedinarai, taunimanima idia noho lasi gabuna, Iudea tano dekenai ia haroro, ia gwau, ² “Emui lalona umui giroa, badina be Dirava ena Basileia be kahirakahira ia mai.” ³ Badina Ioane, be peroveta tauna Isaia ese ia herevalaia guna, ia gwau:

“Gado ta taunimanima idia noho lasi tano dekenai, ia boiboi badabada,
ia gwau,
‘Lohiabada ena dala umui kehoa,
iena dala umui karaia maoromaoro.’”

⁴ Ioane ena dabua be kamelo ena huina, iena gaba gauna be boromakau ena kopina, iena aniani be kwadi bona uda ena hani. ⁵ Ierusalem bona Iudea taudia ibounai, bona Ioridane Sinavai kahana hanua taudia ibounai, be Ioane dekenai idia lao. ⁶ Edia dika idia gwaurai hedinarai. Vadaeni Ioane ese Ioridane Sinavai dekenai bapatiso ia henidia.

⁷ To Farisea taudia bona Sadukea taudia momo herea bapatiso totona idia lao, bona Ioane ese idia ia itaia neganai ia gwau henidia, ia gwau, “Gaigai edia natudia e, daika ese umui ia hamaoroa, gabeai do ia vara badu dekena amo do umui heau mauri? ⁸ Emui lalona umui giroa, vadaeni lalona giroa ena anina umui hedinarai! ⁹ Bona emui lalona dekenai umui hereva lasi, ‘Aiema tamana be Aberahamo,’ badina be umui lau hamaoroa, Dirava be mai ena siahu inai nadi dekena amo ena natudia do ia havaraia Aberahamo ena. ¹⁰ Harihari ira be au edia ramuna dekenai idia atoa hegaegae. Unai dainai huahua namodia idia atoa lasi au ibounai be do idia utua, lahi dekenai do idia negea.

¹¹ “Lau be ranu dekenai lau bapatisoa umui, lalona giroa ena toana. To laegu murina dekenai do ia mai tauna be laegu siahu do ia hanai. Lau be namo lasi iena tamaka do lau abia loaloa. Ia ese Lauma Helaga bona lahi dekenai do ia bapatisoa umui. ¹² Iena itapo be iena imana dekenai, iena uiti botai gabuna dekenai uiti do ia hagoevaia namonamo. Iena uiti be sitoa dekenai do ia haboua, to ena momoru be lahi ia bodo lasi dekenai do ia gabua momokani.”

Ioane ese Iesu ia bapatiso henia

¹³ Unai neganai Iesu ese Galilea ia rakatania, ia lao Ioridane Sinavai dekenai. Ioane dekenai ia lao, ia ura Ioane ese do ia bapatiso henia. ¹⁴ To Ioane ia ura lasi, ia gwau, “Lasi, bema oi ese lau oi bapatiso henia be namo. Badina dahaka lau dekenai oi mai?”

¹⁵ To Iesu ia haere, ia gwau, “Mani oi karaia, badina be inai bamona dala dekenai Dirava ena ura gauna be do ita karaia.” Unai dainai Ioane ese Iesu ena bapatiso ia karaia.

¹⁶ Iesu ia bapatisoa, vadaeni maoromaoro, ranu dekena amo ia daekau neganai, guba be ia kehoa vadaeni, bona Iesu ese Dirava ena Lauma ia itaia, pune manu bamona ia diho, ia dekenai ia helai. ¹⁷ Bona gado ta guba dekena amo ia boibo, ia gwau, “Inai be laegu Natuna, egu lalokau, lau moale bada ia dekenai.”

4

Satani ese Iesu ia dibagania

¹ Vadaeni Lauma Helaga ese taunimanima idia noho lasi gabuna dekenai Iesu ia hakaua lao, Satani ese do ia dibagania totona. ² Dina 40, hanuaboi 40, Iesu be aniani ia ania lasi, vadaeni ia hitolo mase. ³ Vadaeni Satani be ia dekenai ia lao, ia gwau, “Bema oi be Dirava ena Natuna neganai, inai nadi dekenai oi oda henia, vadaeni aniani gaudia dekenai do oi halaoa.”

⁴ To Iesu ia haere, ia gwau, “Buka Helaga lalonai ia torea vadaeni, ‘Aniani sibona dekena amo taunimanima do idia mauri lasi, to Dirava ena uduna dekena amo idia mai hereva ibounai ese mauri ia henia.’”

⁵ Vadaeni Satani ese Hanua Helaga dekenai Iesu ia hakaua lao, Dubu Helaga ena atai dekenai ia haginia. ⁶ Vadaeni ia gwau, “Bema oi be

Dirava ena Natuna neganai, inai gabu dekenai amo oi roho diho, badina be Buka Helaga ia gwau:

“Dirava ese iena aneru dekenai do ia hereva henidia, vadaeni edia imana dekenai do idia abia isi oi, oiemu aena be nadi dekenai do oi botaiia garina.’”

⁷ Iesu ia haere, ia gwau, “Inai hereva danu Buka Helaga dekenai ia torea, ia gwau, ‘Lohiabada oiemu Dirava dekenai do oi dibaganai lasi.’”

⁸ Vadaeni Satani ese ororo bada herea ta ena atai dekenai ia hakaua daekau, tanobada edia basileia ibounai mai edia hairaina danu ia itaia, ⁹ ia gwau, “Bema oiemu kwarana oi atoa diho, bona bema lau dekenai oi tomadiho, vadaeni inai ibounai be oi dekenai do lau henia.”

¹⁰ Iesu ma ia haere henia, ia gwau, “Satani e, idau gabu dekenai oi lao, badina be Buka Helaga lalonai ia torea, ia gwau, ‘Lohiabada oiemu Dirava do oi tomadiho henia, ia sibona dekenai hesiai gaukara do ia karaia.’”

¹¹ Vadaeni Satani ese ia rakatania. Aneru haida Iesu dekenai idia lao, ia dekenai idia durua.

Iesu be Galilea dekenai ia lao

¹² Iesu ia kamoni Ioane be dibura ruma lalonai idia koua, vadaeni ia giroa lao Galilea dekenai. ¹³ Nasareta ia rakatania, ia lao, Kaperanauma dekenai ia noho, unai hanua be gohu kone dekenai ia noho, Sebuluno bona Napatali tano dekenai. ¹⁴ Unai dekena amo Isaia, peroveta tauna, ena hereva ia momokani vadaeni, ia gwau:

¹⁵ “Sebuluno tano bona Napatali tano, gohu ena dalana, Ioridane Sinavai unai kahana dekenai, Galilea, bese idauidau edia tano.

¹⁶ Dibura dekenai idia noho taudia be, diari badana idia itaia vadaeni.

Bona mase laulauna ena dibura dekenai idia helai noho taudia edia latanai, diari ia hedinarai vadaeni.”

¹⁷ Unai negana ia lao, Iesu ese ia haroro hamatamaia, ia gwau, “Emui lalona umui giroa, badina Guba Basileia be kahirakahira ia mai vadaeni.”

Haoda taudia 4 be Iesu ia boiria

¹⁸ Iesu be Galilea Gohu ena kone dekenai ia raka noho neganai, tadikaka rua, Simona, ena ladana ta Petero, mai ena tadina Andrea, ia itadia, edia reke gohu dekenai idia atoa, badina idia be haoda taudia. ¹⁹ Vadaeni idia dekenai ia hereva henia, ia gwau, “Lauegu murinai umui raka, lau be taunimanima haoda henia totona taudia do lau halaoa umui.” ²⁰ Vadaeni nega tamona idia ese edia reke idia rakatania, iena murinai idia raka.

²¹ Unai gabu dekena amo ma ia raka lao noho neganai, tadikaka rua ma ia itaia, Iamesi Sebedeo, iena tadina Ioane danu, edia vanagi dekenai edia tamana Sebedeo danu edia reke idia karaia hegaegea noho. ²² Vadaeni Iesu ia boiridia. Vadaeni nega tamona idia ese vanagi bona edia tamana idia rakatania, iena murina dekenai idia raka.

Iesu ese iena gaukara ia hamatamaia

²³ Iesu be Galilea kahana ibounai dekenai ia loaloa, edia dubu lalonai ia hadibaia, bona Basileia ena Sivarai Namona ia harorolaia. Bona taunimanima edia gorere bona edia hisihisi idauidau dekena amo ia hamauridia. ²⁴ Unai dainai, iena sivarai Suria tano ibounai dekenai idia gwauraia loaloa, vadaeni edia gorere taudia ibounai ia dekenai idia abia lao. Mai edia hisihisi idauidau taudia, mai edia lauma dika taudia, kavakava taudia, idia raka diba lasi taudia Iesu dekenai idia abia lao, vadaeni ia ese ibounai ia hanamoa. ²⁵ Taunimanima momo herea be iena murina dekenai idia raka, Galilea dekena amo, Hanua 10 gabuna dekena amo, Ierusalema dekena amo, Iudea dekena amo, bona Ioridane Sinavai unai kahana dekena amo.

5

Iesu ia haroro ororo dekenai

¹ Iesu ese taunimanima momo ia itaia neganai, ororo ta dekenai ia daekau, unuseni ia helai diho. Iena diba tahua taudia ese ia dekenai idia haboua mai. ² Vadaeni ia hadibaia hamatamaia, ia gwau:

Kara namodia momokani, Iesu ia herevalaia

³ “Hekokoruku lasi momokani taudia be idia namo, badina Guba Basileia be idia edia.

⁴ “Tai noho taudia be idia namo, badina Dirava ese do ia hanamodia.

⁵ “Dagedage lasi taudia be idia namo, badina tanobada do idia abia.

⁶ “Dirava ena kara maoromaoro idia ura dikadika idia karaia taudia be idia namo, badina be Dirava ese boga kunu do ia henidia.

⁷ “Bogahisihisi henia taudia be idia namo, Dirava ena bogahisihisi do idia davaria.

⁸ “Edia lalona goevagoeva taudia be idia namo, badina idia ese Dirava do idia itaia.

⁹ “Taunimanima huanai maino idia karaia taudia be idia namo, badina be Dirava ese do ia gwauraia idia be iena natuna.

¹⁰ “Dirava ena kara maoromaoro idia karaia dekena amo hisihisi idia abia taudia be idia namo, Guba Basileia be idia edia.

¹¹ “Bema egu murinai umui raka dainai idia hadikaia umui, bona idia hisihisi henia umui, bona hereva dika mai koikoi danu idia gwauraia loaloa umui totona lau dainai, umui danu namo. ¹² Umui moale bada momokani, badina emui davana guba dekenai ia bada, badina be unai bamona danu, peroveta taudia gunadia be taunimanima ese idia dagedage henia.

Damena bona diari

¹³ “Umui be tanobada taunimanima edia damena. Bema damena ena mamina ia ore, dahaka ese iena mamina do ia havaraia lou? Ia be namo lasi gauna, vadaeni taunimanima ese dohore idia negea, bona edia aena dekenai do idia moia loaloa.

¹⁴ “Umui be tanobada taudia ibounai edia diari. Ororo dekenai ia noho hanua be ia hunia diba lasi. ¹⁵ Lamepa idia gabua neganai, maua ena henunai do idia atoa lasi, to lamepa gabuna dekenai do idia atoa, vadaeni ena diari be ruma taudia ibounai do idia itaia. ¹⁶ Umui emui diari taunimanima edia vairana dekenai unai bamona do umui hedinarai, vadaeni umui emui kara namodia do idia itaia neganai, umui emui Tamana guba dekenai do idia hanamoa.

Dirava ena Taravatu Iesu ia herevalaia

¹⁷ “Umui lalola lasi lau be Mose ena taravatu bona peroveta herevadia hadikaia totona lau mai. Hadikaia lasi, to hamomokania totona lau

mai. ¹⁸ Kamonai namonamo, harihari ela bona guba bona tanobada do idia noho lasi neganai, taravatu ena leta ta o ena koma ta do ia boio lasi, ela bona gau ibounai do idia hamomokania. ¹⁹ Unai dainai, tau ta ese taravatu maragimaragi ta bema ia makohia, bona taunimanima ia hadibaia unai bamona do idia karaia, ia be Guba Basileia lalonai do ia maragimaragi. To bema tau ta ese taravatu ia dogoatao noho, bona unai bamona ia hadibaia taunimanima dekenai, ia be Guba Basileia lalonai do ia bada. ²⁰ Umui lau hamaoroa, umui emui kara maoromaoro ese taravatu hadibaia taudia bona Farisea taudia edia kara bema ia hereaia lasi, umui be Guba Basileia lalonai do umui raka vareai diba lasi, lasi bona lasi momokani.

Badu kara dekenai

²¹ “Umui kamona vadaeni, sene taudia dekenai idia hamaoroa, idia gwau, ‘Umui alaia lasi, bona alaia tauna be kota biaguna ese do ia kota henia.’ ²² To lau ese lau hamaoroa umui, iena tadikakana do ia badu henia tauna be dohore kota biaguna ese do ia kota henia, bona iena tadikakana do ia hereva dika henia tauna be Kaunsolo taudia edia vairana dekenai do ia lao. Bona iena tadikakana be kavakava anina lasi do ia gwauraia tauna, be lahi ia araia gabuna dekenai do ia lao.

²³ “Unai dainai, oiemu harihari gauna pata helaga dekenai oi atoa gwauraia neganai be do oi laloa guna, oiemu tadikakana dekenai mai emu kerere. ²⁴ Bema unai bamona, oiemu harihari gauna pata helaga ena vairana dekenai do oi rakatania, oi lao, oiemu tadikakana danu maino do umui ruaosi karaia guna, gabeai oi giroa lou, oiemu harihari gauna Dirava dekenai do oi henia.

²⁵ “Oi dekenai ia samani henia tauna danu maino do umui karaia haraga, kota henia totona dala dekenai umui ruaosi do raka lao neganai, badina be inai tauna ese kota biaguna ena imana dekenai oi do ia atoa garina. Kota biaguna ese dibura ruma naria tauna ena imana dekenai oi do ia atoa garina, dibura ruma naria tauna ese dibura ruma lalonai oi do ia koua garina. ²⁶ Lau hamaoroa momokani oi, unai gabu dekena amo do oi raka siri lasi, ela bona ena davana do oi haorea momokani.

Headava hadikaia karana

²⁷ “Umui kamona vadaeni, sene taudia dekenai idia hamaoroa, idia gwau, ‘Umui heudahanai lasi.’ ²⁸ To lau ese umui lau hamaoroa, bema tau ta ese hahine ta do ia itaia noho matana dekenai, ela bona iena lalona dekenai do ia ura dikadika, iena kudouna dekenai unai tau be ia heudahanai vadaeni.

²⁹ “Oiemu matana idiba kahana ese bema kerere ia havaraia oi dekenai, oiemu imana dekenai oi kokia, oi negea momokani, badina oiemu tauanina ena kahana ta bema ia boio be ia dika sisina, to oiemu tauanina ibounai lahi ia araia gabuna dekenai do idia negea vareai, be ia dika herea momokani. ³⁰ O oiemu imana idiba kahana ese bema kerere do ia havaraia oi dekenai, oi utua, oi negea momokani, badina be oiemu tauanina ena kahana ta do ia boio be dika sisina, to oiemu tauanina ibounai lahi ia araia gabuna dekenai do idia negea vareai, be ia dika herea momokani.

Adavana negea karana

³¹ “Bona sene taudia ma idia gwau, ‘Ena adavana do ia negea tauna ese hadokoa pepana do ia henia ia rakatania totona.’ ³² To lau hereva umui dekenai, bema tau ta ena adavana ia heudahanai lasi, to unai tau ese ia negea, bona iena negea kara dainai hahine be ia headava lou neganai,

hahine be ia heudahanai, bona unai hahine do ia adavaia lou tauna be ia danu ia heudahanai.

Gwauhamata dekenai

³³ “Umui kamonai vadaeni, sene taudia dekenai idia hamaoroa, idia gwau, ‘Umui gwauhamata koikoi lasi, to umui emui gwauhamata Lohi-abada dekenai umui hamomokania.’ ³⁴ To lau ese umui lau hamaoroa, umui gwauhamata neganai, hereva auka do umui gwauraia lasi, Guba ena ladanai lasi, badina unai be Dirava ena helai gabuna. ³⁵ Tanobada ena ladanai lasi, badina ia be Dirava ena aena edia moia gauna. Ierusalem ena ladanai lasi, badina ia be King badana ena hanua. ³⁶ Oiemu kwarana dekenai danu oi gwauhamata henia lasi, badina be oiemu huina tamona hakurokuroa totona o hakoremaia totona be oi karaia diba lasi. ³⁷ Unai dainai inai bamona oiemu hereva do oi gwauraia, ‘Oibe’ sibona, o ‘Lasi’ sibona. Hereva haida ma oi gwauraia be Satani dekena amo idia mai.

Oi dekenai ia hadikaia tauna ena davana karaia lasi

³⁸ “Umui kamonai vadaeni, idia hamaoroa, idia gwau, ‘Matana ena davana be matana, isena ena davana be isena.’ ³⁹ To lau ese umui lau hamaoroa, umui dekenai dika ia karaia tauna ena dika davana umui henia lasi. Bema oiemu vairana idiba kahana be tau ta ese ia botai neganai, oiemu vairana lauri kahana danu oi henia ia botai be ia namo. ⁴⁰ Bema tau ta do ia kota henia oi dekenai, oiemu dabua abia totona, oiemu rami danu do oi henia. ⁴¹ Sedira tuari tauna ta ese oi do ia hamaoroa, ‘Kilomita ta dekenai lauegu kohu do oi huaia,’ vadaeni, kilomita rua do oi huaia. ⁴² Ia noinoi tauna be do umui henia, bona umui dekenai ia abiatorehai gwauraia tauna ena ura gauna do umui henia.

Badu henia taudia dekenai lalokau henia

⁴³ “Umui kamonai vadaeni, guna idia gwau, ‘Emui turadia dekenai umui lalokau henia, to badu henia taudia dekenai do umui badu henia.’ ⁴⁴ To lau ese umui lau hamaoroa, umui dekenai idia badu henia taudia do umui lalokau henia, bona umui dekenai idia dagedage henia taudia dainai do umui guriguri. ⁴⁵ Unai dekena amo emui Tamana guba dekenai ia noho ese iena natuna do ia halaoa umui. Badina be ia ese kara dika taudia bona kara namo taudia edia latanai dina ena diari ia henia noho. Medu danu kara maoro taudia bona kara kerere taudia edia latanai ia siaia diho. ⁴⁶ Bema umui idia lalokau henia taudia sibona dekenai do umui lalokau henia, dahaka dainai umui laloa Dirava be umui do ia hanamoa? Kara dika taudia ese danu unai bamona idia karaia noho. ⁴⁷ Bema emui turana sibona do umui hanamoa, emui namo be edena bamona do ia bada? Dika taudia danu unai bamona idia karaia noho. ⁴⁸ Unai dainai umui be do umui maoromaoro momokani, umui emui Tamana guba dekenai ia noho ia maoromaoro momokani bamona.

6

Taunimanima do umui durua dalana

¹ “Umui naria namonamo, umui emui bogahisihisi karadia be taunimanima edia vairanai umui karaia lasi, idia itaia totona. Bema unai bamona do umui karaia, emui Tamana guba dekenai ia noho dekena amo umui be davana lasi.

² “Unai dainai, harihari gauna ologami taudia dekenai umui henia neganai, umui emui toana umui hedinarai lasi mai hekokoroku danu, guriguri koikoi taudia ese dubu dekenai bona hanua ena huanai idia karaia bamona, taunimanima ese idia hanamodia totona. Umui lau

hamaoroa momokani, edia davana ibounai idia abia vadaeni. ³ To harihari gauna oi henia neganai, oi sibona mo oi karaia hunia dala bamona, vadaeni oiemu turana momokani ese danu oiemu henia gauna do ia diba lasi. ⁴ Vadaeni oiemu Tamana ese oiemu henia karadia, hunia dekenai oi karaia gaudia ia itaia dainai, edia davana do ia henia oi dekenai.

Iesu ese guriguri dalana ia hadibaia

⁵ “Umui guriguri neganai, koikoi taudia bamona umui karaia lasi, badina be idia ura dubu dekenai bona dala edia huanai idia gini, vadaeni idia guriguri, taunimanima ese idia itaia totona. Umui lau hamaoroa momokani, edia davana ibounai idia abia vadaeni. ⁶ To oi guriguri neganai oiemu ruma dekenai oi vareai, iduara oi koua, oiemu Tamana, hunia gabuna ia noho dekenai do oi guriguri henia. Vadaeni oiemu Tamana ese hunia gabuna dekenai oi sibona oi karaia gauna ia itaia noho, bona ena davana do ia henia oi dekenai.

⁷ “Umui guriguri neganai, hereva kava momo do umui gwauraia lou, gwauraia lou lasi, Dirava diba lasi taudia bamona, badina be idia laloa edia hereva momo dainai, Dirava ese idia do ia kamona. ⁸ Idia danu do umui hegeregere lasi, badina be emui Tamana guba dekenai ia noho, be umui ura gaudia ia diba vadaeni, do umui noinoi henia lasi neganai.

⁹ “Unai dainai, inai bamona do umui guriguri:

“Aiema Tamana e, guba dekenai oi noho, oiemu ladana do ai hahelagaia.

¹⁰ Oiemu Basileia do ia mai, oiemu ura gauna tanobada dekenai do ai karaia, guba dekenai idia karaia bamona.

¹¹ Hari dina aiema aniani mani oi henia ai dekenai.

¹² Aiema dika mani oi gwauatao, badina be ai dekenai idia hadikaia taudia edia dika ai gwauatao.

¹³ Dibagani dika gabuna dekenai ai do oi hakaua vareai lasi, to Satani ena imana dekena amo do oi hamauria ai.’

¹⁴ “Badina be bema taunimanima edia dika umui gwauatao neganai, emui Tamana, guba dekenai ia noho ese emui dika danu do ia gwauatao.

¹⁵ To bema taunimanima edia dika umui gwauatao lasi, emui Tamana ese emui dika danu do ia gwauatao lasi.

Aniani ania lasi ena taravatu

¹⁶ “Aniani lasi taravatu umui karaia neganai, umui emui vairana dekenai lalohisihisi toana umui hedinaraia lasi, guriguri koikoi taudia bamona. Badina be edia vairana dekenai lalohisihisi toana idia atoa, idia hitolo bamona, taunimanima do idia itaia totona. Umui lau hamaoroa momokani, edia davana idia abia vadaeni. ¹⁷ To oi be aniani oi ania lasi neganai, oiemu kwarana dekenai dehoru do oi atoa, oiemu vairana danu do oi huria. ¹⁸ Vadaeni taunimanima be do idia diba lasi oi be aniani oi ania lasi noho, to oiemu Tamana ese hunia gabuna dekenai ia noho, be do ia diba. Vadaeni oiemu Tamana ese hunia gabuna dekenai oi sibona oi karaia gauna ia itaia noho, bona ena davana do ia henia oi dekenai.

Emui kohu umui haboua guba dekenai

¹⁹ “Inai tanobada dekenai kuhu do umui haboua lasi, iniseni be manumanu ese dabua idia ania ore, bona raraka ese auri ia hadikaia, iniseni danu henaoo taudia ese ruma idia makohia bona gau idia henaoo. ²⁰ To umui emui kuhu be guba dekenai do umui haboua, unuseni be manumanu bona raraka ese gau idia hadikaia lasi, unuseni danu henaoo taudia ese ruma idia makohia diba lasi, bona gau idia henaoo diba lasi. ²¹ Badina be umui emui kuhu idia noho gabuna dekenai, umui emui kudouna danu unuseni ia noho.

Tauanina ena diari

²² “Tauanina ena lamepa be matana, unai dainai bema oiemu matana ia namo, oiemu tauanina ibounai do ia mai diari danu. ²³ To bema oiemu matana ia dika, oiemu tauanina ibounai do ia dibura. Unai dainai, bema diari oiemu lalona dekenai ia noho gauna do ia dibura, inai dibura be do ia bada momokani.

Taunimanima be biaguna rua dekenai gaukara diba lasi

²⁴ “Tau ta ese biaguna rua edia hesiai gaukara ia karaia diba lasi. Badina be ta do ia badu henia, to ta be do ia lalokau henia, o ta be do ia abia dae, ma ta be do ia abia dae lasi. Dirava bona kuhu momo danu nega tamona edia hesiai gaukara do oi karaia diba lasi.

Laloo hekwarahi bona laloo momo kara

²⁵ “Unai dainai umui lau hamaoroa, mai gari danu umui laloo momo lasi emui noho mauri dekenai, dahaka do umui ania, o dahaka do umui inua, o tauanina ena dabua dekenai. Mauri be gau badana, to aniani be gau maragi, ani? Tauanina ese be dabua ia hanaia, ani? ²⁶ Atai ai manu mani umui itaia. Idia be hadoa lasi, idia geia lasi, naria gabuna dekenai aniani idia haboua lasi. To emui Tamana guba dekenai noho ese unai manu ia naria namonamo. Umui ese manu umui hereaia, ani? ²⁷ Umui daika be ena laloo hekwarahi dekeni amo iena mauri ena nega sisina do ia halataia diba, a?

²⁸ “Bona dahaka dainai dabua totona umui laloo momo? Tano ena herahera edia tubu dalana mani umui itaia, idia gaukara lasi, dabua idia turia lasi. ²⁹ To umui lau hamaoroa, Solomona be mai ena kuhu momo, to iena dabua be herahera ta ena hairai hegeregerena lasi. ³⁰ Oibe, tano ena avadia, hari idia noho, bona kerukeru lahi dekenai do idia negea, to Dirava ese unai gaudia edia hairai ia henia. Be, ia ese umui dekenai danu dabua do ia henia namonamo lasi, a? Umui abidadama maragimaragi taudia e! ³¹ Unai dainai, emui lalona idia hekwarahi lasi. Umui hereva lasi, ‘Dahaka do ai ania?’ O, ‘Dahaka do ai inua?’ O, ‘Dahaka dabua do ai atoa?’ ³² Bese idaidau taudia ese unai gau ibounai idia tahua noho. To emui Tamana guba dekenai ia noho be ia diba, umui ura gaudia ibounai be unai. ³³ To umui ese Dirava ena Basileia bona iena kara maoromaoro do umui tahua guna, vadaeni unai gau ibounai danu umui dekenai dohore ia henia. ³⁴ Umui emui lalona do idia hekwarahi lasi kerukeru totona. Badina be kerukeru ese sibona ena metau do ia huaia. Bema umui laloo momo vaira dinadia totona, unai dina edia hekwarahi do umui habadaia sibona.”

7

Taunimanima gwauraia kerere karana

¹ “Umui emui lalona dekenai taunimanima umui gwauraia kerere lasi, vadaeni Dirava ese umui do ia gwauraia kerere lasi. ² Badina be umui

gwauraiā kerere karana hegeregerena Dirava ese umui do ia gwauraiā kerere. Taunimanima dekenai umui kara henia hegeregerena be Dirava ese danu umui dekenai do ia kara henia. ³ Badina be dahaka au ena momoru oiemu tadikakana ena matana lalonai oi itaia, to au badana oiemu matana lalonai ia noho be oi laloā lasi? ⁴ Badina be dahaka oiemu tadikakana oi hamaoroa, oi gwau, ‘Mani au ena momoru oiemu matana dekena amo lau kokia,’ to au badana be oiemu matana dekenai ia do noho? ⁵ Koikoi tauna e, au badana oiemu matana dekena amo do oi kokia guna, oi itaia namonamo totona. Unai murinai au ena momoru oiemu tadikakana ena matana dekena amo do oi kokia diba.

⁶ ‘Helaga gaudia sisia dekenai do umui henia lasi, idia giroa bona umui idia koria garina, bona emui kavabukavabu be boroma edia vairana dekenai do umui negea lasi. Badina be edia aena dekenai do idia moia garina.

Noinoi, tahua, pidipidi

⁷ ‘Umui noinoi, vadaeni Dirava ese do ia henia umui dekenai. Umui tahua, vadaeni do umui davaria. Umui pidipidi, vadaeni iduara do ia kehoa umui dekenai. ⁸ Badina be noinoi taudia ibounai ese do idia abia, tahua tauna ese do ia davaria, bona pidipidi tauna dekenai be iduara do ia kehoa.

⁹ ‘Tamana taudia e, umui daika ena natuna paraoa ia noia neganai be nadi do ia henia? ¹⁰ O bema gwarume ia noia neganai be gaigai do ia henia? ¹¹ Umui be dika taudia, to umui emui natudia dekenai gau namodia umui henia diba, unai dainai emui Tamana guba dekenai ia noho, be gau namodia idia noia taudia do ia henidia momokani, ani?

¹² ‘Unai dainai, gau ibounai umui ura taunimanima ese do idia karaia umui dekenai, umui ese unai bamona do umui karaia idia dekenai. Badina be Mose ena taravatu bona peroveta taudia edia hereva anina korikori be unai.

Mauri ena iduara maragina

¹³ ‘Iduara maragina dekenai do umui raka vareai. Badina be lahi gabuna, hel, ia lao dalana ena iduara ia bada, bona ena dala danu lababa herea. Bona ia auka lasi dainai, taunimanima momo herea be unai dala dekenai idia raka vareai. ¹⁴ To mauri gabuna ia lao dalana ena iduara ia maragimaragi, bona ena dala be ia auka. Unai dala idia davaria taudia be momo lasi.

Au mai ena huahua

¹⁵ ‘Umui naria namonamo, peroveta koikoi taudia garina. Idia mai noho, edia toana be mamoe bamona, to edia lalona be uda sisia dagedage bamona. ¹⁶ Edia huahua dekena amo do umui diba idia be namo o dika. Au ginigini ese vain ena anina ia atoa lasi, bona ava ginigini be fig huahua ena anina ia atoa lasi. ¹⁷ Oibe, bona au namona ena huahua be ia namo, to au dikana ena huahua be ia dika. ¹⁸ Au namona ese huahua dika ia havaraia diba lasi, bona au dikana ese huahua namo ia havaraia diba lasi. ¹⁹ Au ibounai huahua namona idia havaraia lasi gaudia be do idia utua, lahi dekenai do idia negea. ²⁰ Unai dainai peroveta koikoi taudia edia kara dekena amo idia do umui diba.

Lau diba lasi umui

²¹ ‘Guba Basileia do idia vareai taudia be daika? ‘Lohiabada e, Lohiabada e,’ idia gwau taudia ibounai, a? Lasi momokani. Idia gwau, ‘Lohiabada e, Lohiabada e,’ taudia momo be Guba Basileia lalonai do

idia raka vareai lasi. To lauegu Tamana, guba dekenai ia noho ena ura idia karaia taudia, idia sibona do idia vareai. ²² Unai Dirava ena Kota Dina ia ginidae neganai, taunimanima momo do idia hereva lau dekenai, do idia gwau, ‘Lohiabada e, Lohiabada e, oiemu ladana dekenai guna ai haroro, ani? Oiemu ladana dekenai lauma dika ai lulua, bona oiemu ladana dekenai hoa kara momo ai karaia, ani?’ ²³ Vadaeni lau ese do lau haere idia dekenai, do lau gwau, ‘Umui be lau diba lasi momokani. Idu gabuna dekenai umui lao, umui dika karaia taudia.’

Tau rua ta ta edia ruma idia karaia

²⁴ “Unai dainai, lauegu hereva inai ia kamoni, bona ia karaia tauna be aonega tauna ta bamona, ia ese iena ruma nadi latanai ia haginia. ²⁵ Vadaeni medu bada ia diho, sinavai ia abata, lai bada ia botai unai ruma dekenai. To unai ruma be ia moru lasi, badina ia be nadi latanai tau ese ia haginia.

²⁶ “Ma danu, egu hereva ia kamoni, to ia karaia lasi tauna be kavakava tauna ta bamona. Inai tau ena ruma be miri latanai ia haginia. ²⁷ Vadaeni medu bada ia diho, sinavai be ia abata, lai bada ia botai unai ruma dekenai. Vadaeni, ia moru. Ia moru neganai be ia dika momokani.”

Iesu ena siahu

²⁸ Iesu ena haroro ia hadokoa, bona taunimanima ese iena hadibaia hereva dekenai idia hoa bada, ²⁹ badina iena hadibaia hereva be edia taravatu hadibaia taudia bamona lasi. Ia ese taunimanima ia hadibaia mai siahu danu.

8

Iesu ese lepera tauna ia hanamoa

¹ Iesu ese ororo dekena amo ia diho, vadaeni taunimanima momo iena murinai idia raka. ² Vadaeni lepera tauna ta ia dekenai ia lao, ia toma diho henia, ia gwau, “Lohiabada e, bema oi ura, oi hagoevaia diba lau.”

³ Iesu ese iena imana ia dekenai ia atoa, ia gwau, “Lau ura, hari oi goeva.” Vadaeni nega tamona lepera tauna ia goeva. ⁴ Iesu ese ia hamaoroa, ia gwau, “Tau ta oi hamaoroa lasi, to oi lao, hahelagaia tauna ese do ia itaia oi, bona hagoevaia ena boubou gauna, Mose ese ia gwauraia hegeregere do oi henia, bona taunimanima ibounai do idia diba oi goeva vadaeni.”

Iesu ese tuari lohia ta ena hesiai tauna ia hanamoa

⁵ Iesu be Kaperanauma dekenai ia ginidae, vadaeni Roma tuari lohia ta ia dekenai ia lao, ia noinoi, ⁶ ia gwau, “Lohiabada e, lauegu hesiai tauna be ruma dekenai ia hekure noho mai ena gorere bada. Ia marere diba lasi, bona ia hisihisi bada.”

⁷ Iesu ia hamaoroa, ia gwau, “Do lau mai, do lau hanamoa.”

⁸ To tuari lohia tauna ia haere, ia gwau, “Lohiabada e, lau be namo lasi, vadaeni lauegu ruma dekenai do oi daekau lasi. Mani oi hereva sibona, vadaeni egu hesiai tauna do ia namo lou. ⁹ Badina be lau danu tau badadia haida edia henunai lau noho, bona tuari taudia be lauegu henunai idia noho. Ta do lau hamaoroa, lau gwau, ‘Oi lao,’ vadaeni do ia lao. Ma ta do lau hamaoroa, lau gwau, ‘Oi mai’ vadaeni do ia mai. Ma egu hesiai tauna do lau hamaoroa, lau gwau, ‘Inai oi karaia,’ vadaeni do ia karaia.”

¹⁰ Iesu ese unai hereva ia kamonai, vadaeni ia hoa dikadika. Vadaeni iena murinai raka taudia ia hamaorodia, ia gwau, “Umui lau hamaoroa momokani, abidadama inai bamona be Israela dekenai lau davaria lasi, lasi bona lasi momokani. ¹¹ Danu lau hamaoroa umui, idau tano taudia momo be dina daekau kahana dekena amo bona dina diho kahana dekena amo do idia mai, Aberahamo bona Isako bona Iakobo danu aniani totona do idia helai diho, Guba Basileia lalonai. ¹² To Basileia ena taudia korikori be do idia negea lao murimuri dekenai mai dibura masemase danu, unuseni be do idia tai, edia isena do idia koria auka masemase.”

¹³ Vadaeni Iesu ese tuari lohia tauna ia hamaoroa, ia gwau, “Oi lao, oiemu abidadama hegeregere do oi abia.”

Unai nega korikori lalonai unai lohia ena hesiai tauna ia namo.

Iesu ese Petero ena sinana ia hanamoa

¹⁴ Iesu ese Petero ena ruma dekenai ia daekau, unuseni Petero ena hahine ena sinana ia davaria, iena tauanina ia sياهو, ia hekure mai gorere danu. ¹⁵ Iesu ese hahine ena imana ia dogoatao, vadaeni ena tauanina ena sياهو ia ore. Vadaeni hahine be ia toresi, iena hesiai gaukara ia karaia.

Iesu ese taunimanima momo ia hanamoa

¹⁶ Adorahi neganai mai lauma dika taudia momo herea Iesu dekenai idia hakaua lao. Vadaeni iena hereva tamona dekenai ia ese inai lauma dikadia ia lulua lao, bona gorere taudia idau idau ibounai danu ia hanamoa. ¹⁷ Unai dekena amo Isaia, peroveta tauna, ese ia gwauraia herevana ia momokani vadaeni. Ia gwau: “Ia ese iseda hisihisi ia kokia, bona iseda gorere ia hanamoa.”

Iesu ena murinai idia raka gwauraia taudia

¹⁸ Iesu ese taunimanima momo ia itaia, ia dekenai idia gini hagegea. Vadaeni iena diba tahua taudia dekenai ia hereva, ia gwau, “Do ita hanaia lao gohu kahana dekenai.” ¹⁹ Vadaeni taravatu hadibaia tauna ta ia raka kahirakahira lao, ia hamaoroa, ia gwau, “Hadibaia tauna e, do oi lao gabu ibounai dekenai lau danu ita lao.”

²⁰ Iesu ia haere, ia gwau, “Uda sisia be mai edia nadi matuna, bona ataiai manudia danu mai edia ruma, to Taunimanima ena Natuna be mai ena mahuta gabuna lasi.”

²¹ Ena diba tahua tauna ta danu ia hereva Iesu dekenai, ia gwau, “Lohiabada e, namona be egu tamana do lau guria guna.”

²² Iesu ia gwau, “Lauegu murinai oi raka, mase taudia ese edia mase taudia do idia guria.”

Iesu ese hurehure ia hadokoa

²³ Iesu be vanagi ta dekenai ia guia, bona iena diba tahua taudia ia danu idia lao. ²⁴ Gohu dekenai lai badana bona medu badana ia ginidae, vadaeni hurehure ese vanagi ia koua. To Iesu be ia mahuta. ²⁵ Vadaeni idia lao, idia hanogaia, idia gwau, “Lohiabada e, oi hamauria ai! Ita mase inai!”

²⁶ Iesu ese ia gwau henidia, ia gwau, “Dahaka dainai umui gari, abidadama maragimaragi taudia?” Vadaeni ia toresi, lai bona hurehure dekenai ia hereva goada. Vadaeni lai ia doko, bona hurehure idia diho, ia ore momokani.

²⁷ Vadaeni idia be idia hoa, idia gwau, “Inai tau be edena bamona? Be, lai bona hurehure ese iena hereva idia kamonai noho!”

Iesu ese lauma dikadia ia lulua tau rua dekena amo

²⁸ Gohu unai kahana dekenai Gadara tano dekenai idia ginidae. Vadaeni mai lauma dika taudia rua be Iesu danu idia hedavari, idia be mase guria gabuna dekena amo idia mai, bona idia dagedage bada. Unai dainai taunimanima be unai dala dekena amo do idia raka hanaia diba lasi. ²⁹ Idia ruaosi be idia boiboi bada, idia gwau, “Dirava ena Natuna e, ai dekenai be dahaka do oi karaia? Aiema nega be dohore, ai dekenai hisihisi henia totona oi mai vadaeni, a?”

³⁰ Unai gabu dekenai, sisina daudau dekenai, boroma orea badana ta tano dekenai idia aniani noho. ³¹ Vadaeni lauma dikadia ese idia noia, idia gwau, “Bema oi lulua ai, be mani unai boroma edia lalonai oi siaia ai.”

³² Vadaeni Iesu ese idia ia hamaoroa, ia gwau, “Umui lao.” Unai dainai, idia lao murimuri dekenai, boroma edia lalona dekenai idia vareai, vadaeni boroma orea ibounai be ororo dekena amo idia heau diho gohu dekenai, unuseni idia mase ranu lalonai.

³³ Boroma naria taudia be idia heau, hanua dekenai idia vareai, lauma dikadia ese idia abia taudia edia sivarai ibounai idia gwauria hedinarai. ³⁴ Unai dainai hanua taudia ibounai idia lao, Iesu danu idia hedavari. Idia noia, edia tano dekena amo do ia raka siri.

9

Iesu ese dika ia gwauatao

¹ Iesu ese vanagi ta dekenai ia guia, ia hanaia gohu unai kahana dekenai, iena hanua korikori dekenai ia ginidae. ² Gorere tauna ta ia marere diba lasi, geda dekenai ia hekure, be Iesu dekenai idia huaia lao. Iesu ese idia edia abidadama ia itaia, vadaeni gorere tauna ia hamaoroa, ia gwau, “Natuna e, oi goada, oiemu karadika be lau gwauatao vadaeni.”

³ Vadaeni taravatu hadibaia taudia haida sibona dekenai idia lalao, idia gwau, “Inai tau ese Dirava ia hadikaia.”

⁴ Iesu be edia lalao ia diba, vadaeni ia gwau, “Badina be dahaka umui lalao kerere? ⁵ Edena be ia haraga, lau gwau, ‘Emu dika lau gwauatao vadaeni,’ o bema lau gwau, ‘Oi toreisi, emu geda oi lokua, oi raka?’ ⁶ To do umui diba Taunimanima ena Natuna be mai sياهو danu tanobada dekenai, dika do ia gwauatao.” Vadaeni ia ese gorere tauna ia hamaoroa, ia gwau, “Oi toreisi, oiemu geda oi lokua, oiemu ruma dekenai oi lao.”

⁷ Vadaeni ia toreisi, iena ruma dekenai ia lao. ⁸ Taunimanima momo ese idia itaia, vadaeni idia hoa, bona Dirava idia hanamo, ia ese sياهو unai bamona taunimanima dekenai ia henia dainai.

Iesu ese Mataio ia boiria

⁹ Iesu ia raka lao neganai, tau ta ia itaia takisi ruma dekenai ia helai noho, iena ladana be Mataio. Vadaeni ia dekenai Iesu ia gwau, “Laegu murinai oi raka.” Vadaeni Mataio ia toreisi, Iesu ena murinai ia raka lao.

¹⁰ Iesu be Mataio ena ruma dekenai ia aniani, vadaeni takisi gogoa taudia bona kara dika taudia momo idia lao, Iesu bona iena diba tahua taudia danu idia aniani hebou. ¹¹ Farisea taudia idia itaia, vadaeni Iesu ena diba tahua taudia dekenai idia nanadaia, idia gwau, “Umui emui hadibaia tauna be dahaka dainai takisi gogoa taudia bona dika taudia danu gabu tamona dekenai idia aniani hebou?”

¹² To Iesu ia kamonai, vadaeni idia ia hamaoroa, ia gwau, “Goada taudia ese be dogeta do idia tahua lasi, to gorere taudia sibona. ¹³ Umui lao, inai Buka Helaga hereva ena anina do umui lalao, inai bamona ia

torea: 'Lau be bogahisihisi lau ura, to boubou gauna be lau ura lasi.' Badina be kara maoromaoro taudia boiria totona lau mai lasi, to kara dika taudia boiria totona lau mai."

Aniani ania lasi taravatuna

¹⁴ Vadaeni Ioane ena diba tahua taudia be Iesu dekenai idia lao, idia gwau, "Dahaka dainai ai bona Farisea taudia be aniani ania lasi taravatu nega ai badinaia, to oiemu diba tahua taudia be aniani ania lasi taravatu nega idia badinaia lasi?"

¹⁵ Iesu ia haere idia dekenai, ia gwau, "Headava matamata tauna be iena turana danu ia noho neganai be do idia taitai, a? To nega ta headava matamata tauna be idia dekena amo do ia abia siri, unai neganai aniani ania lasi ena taravatu nega do idia badinaia.

¹⁶ "Dabua matamata sisina maragina dekena amo dabua gunana ena darea gabuna do idia koua diba lasi. Bema unai bamona idia karaia be dabua matamata sisina maragina be, dabua gunana dekena amo do ia darea, vadaeni do ia kokia, bona ena darea gabuna do ia bada. ¹⁷ Uaina matamata be kopina gunana dekenai do idia udaia lasi. Bema unai bamona idia karaia, uaina matamata ese kopina do ia hapoua, vadaeni uaina bona kopina do idia dika nega tamona. To uaina matamata be kopina matamata dekenai idia udaia, vadaeni idia ruaosi do idia namo."

Iesu ese lohia ena kekeni ia hamauria, bona hahine ta ese Iesu ena dabua ia dogoatao

¹⁸ Iesu ese idia dekenai ia hereva noho neganai, lohia ta ia ginidae, ia tomadiho henia, ia gwau, "Egu natuna kekeni be harihari ia mase vadaeni. Mani ita lao, iena kopina dekenai do oi dogoatao, vadaeni do ia mauri."

¹⁹ Iesu ia toreisi, iena murinai ia raka, mai ena diba tahua taudia danu.

²⁰ Hahine ta, ena gorere be rara ia diho, lagani 12 unai bamona ia gorere, Iesu ena murinai ia raka, iena dabua duduna dekenai ia dogoatao. ²¹ Badina be iena lalona ia gwau, "Bema iena dabua lau dogoatao sibona be do lau namo."

²² Iesu ese iena vairana ia giroa, ia itaia, ia gwau, "Egu natuna e, oi goada, oiemu abidadama ese ia hanamoa vadaeni oi." Unai dainai unai negana ia lao, hahine be ia namo vadaeni.

²³ Iesu be inai lohia tauna ena ruma dekenai ia daekau, vadaeni miusiki taudia bona taitai taudia ese regena bada idia karaia, ia itaia. ²⁴ Vadaeni ia hamaorodia, ia gwau, "Ibounai umui raka siri murimuri dekenai, kekeni be ia mase lasi, inai be ia mahuta."

To idia ese idia kiri Iesu dekenai. ²⁵ To ia ese taunimanima ia doridia murimuri dekenai. Vadaeni Iesu ia raka vareai, kekeni ena imana ia abia, ia veria isi, vadaeni kekeni ese ia toreisi. ²⁶ Inai sivarai be unai tano ibounai dekenai idia gwauraia loaloa.

Iesu ese matakepulu taudia rua ia hanamoa

²⁷ Iesu be unai dala dekena amo ia raka lao neganai, matakepulu taudia rua be iena murina dekenai idia raka, mai boiboi bada danu, idia gwau, "Davida ena natuna e, oi bogahisihisi ai dekenai."

²⁸ Iesu be ruma dekenai ia raka vareai, vadaeni inai matakepulu taudia ruaosi danu ma idia daekau. Vadaeni ia ese ia nanadaia idia dekenai, ia gwau, "Lau dekenai umui abidadama henia, inai bamona kara lau karaia diba?"

Idia gwau, "Lohiabada e, oibe."

²⁹ Vadaeni Iesu ese edia matana ia dogoatao, ia gwau, “Umui emui abidadama hegeregere, unai bamona lau karaia umui dekenai.”
³⁰ Vadaeni edia matana idia kehoa. Vadaeni Iesu ia hereva goada idia dekenai, ia gwau, “Inai kara be tau ta dekenai do umui hamaoroa lasi.”

³¹ To idia be idia raka murimuri dekenai, bona Iesu ena sivarai be unai tano ibounai dekenai idia gwauraia loaloa.

Iesu ese hereva diba lasi tauna ta ia hanamoa

³² Unai taudia idia rakatania lao neganai, taunimanima haida ese tau ta idia abia lao Iesu dekenai. Unai tau ena lalona dekenai be lauma dika ia noho dainai, ia hereva diba lasi. ³³ Iesu ese lauma dikana ia lulua murimuri dekenai, vadaeni hereva diba lasi tauna be ia hereva. Taunimanima ibounai idia hoa, idia gwau, “Kara inai bamona nega ta idia hedinarai lasi Israela dekenai!”

³⁴ To Farisea taudia idia gwau, “Lauma dikadia edia lohia ena siahu dekenai ia ese lauma dikadia ia lulua.”

Iesu ese taunimanima dekenai ia bogahisihisi

³⁵ Iesu be hanua badadia bona hanua maragidia dekenai ia loaloa, edia dubu lalonai ia hadibaia karaia, Basileia ena Sivarai Namona ia harorolaia, gorere taudia bona hisihisi taudia ibounai ia hanamoa.

³⁶ Taunimanima momo Iesu ese ia itaia, vadaeni ia bogahisihisi idia dekenai, badina be edia tauanina idia manokamanoka, bona idia lao idau gabu idau gabu dekenai, mamoe idia naria lasi bamona. ³⁷ Vadaeni Iesu ese iena diba tahua taudia dekenai ia hamaoroa, ia gwau, “Uiti ena anina abia negana ia ginidae vadaeni, to utua taudia be momo lasi.

³⁸ Uma ena biaguna dekenai umui noinoi, ia ese utua taudia ma haida do ia siaia, iena uiti do idia utua.”

10

Iesu ese iena aposetolo taudia 12 ia abia hidi

¹ Iesu ese iena diba tahua taudia 12 ia boiridia. Vadaeni siahu ia henidia, lauma dikadia do idia lulua, bona gorere idau idau bona hisihisi idau idau ibounai do idia hanamoa.

² Aposetolo taudia 12 edia ladadia be inai, ginigunana be Simona, ena ladana ta Petero, bona ena tadina Andrea, Iamesi Sebedeo bona ena tadina Ioane, ³ Filipo bona Batolomeo, Toma bona takisi gogoa tauna Mataio, Iamesi Alepeo bona Tadeo, ⁴ Simona, Roma taudia lulua totona orea tauna ta, bona Iuda Iskariote, ia be Iesu ia samania tauna.

Iesu ese aposetolo taudia dekenai edia gaukara ia henia

⁵ Inai taudia 12 be Iesu ia siaia, bona ia hamaorodia, ia gwau, “Bese idau idau taudia dekenai do umui lao lasi, bona Samaria taudia edia hanua ta dekenai do umui raka vareai lasi. ⁶ To Israela besena dekenai umui lao, idia be idia boio vadaeni mamoe bamona. ⁷ Umui raka noho neganai do umui haroro, umui gwau, ‘Guba Basileia be kahirakahira ia mai vadaeni.’ ⁸ Gorere taudia do umui hanamoa, mase taudia do umui hatorea isi, lepera taudia do umui hagoevaia, lauma dikadia do umui lulua murimuri dekenai. Gau momo umui abia vadaeni, davana lasi. Unai dainai gau momo do umui henia, davana lasi.

⁹ “Umui emui pusepuse lalonai moni badadia o maragidia do umui udaia lasi. ¹⁰ Dala dekenai laolao pusena, dabua rua, tamaka, raka au, do umui abia lao lasi. Badina be gaukara tauna dekenai iena aniani idia henia be maoro.

11 “Hanua maragina ta dekenai o hanua badana ta dekenai do umui ginidae neganai, kara namona tauna ta do umui tahu. Vadaeni ia dekenai do umui noho, ela bona unai gabu umui rakatania. 12 Ruma dekenai umui raka vareai neganai be do umui hanamoa. 13 Bona bema ruma taudia idia namo, umui emui hanamoa be idia latanai do umui atoa. To bema idia dika, umui emui hanamoa do umui abia lou. 14 To bema ruma taudia o hanua taudia idia abia dae lasi umui, bona emui hereva idia kamoni lasi, unai gabu do umui rakatania, bona emui aena dekenai ia noho momoru umui negea oho unuseni. 15 Umui lau hamaoroa momokani, Dirava ena Kota henia Dinana neganai, Sodoma bona Gomora edia dika davana be maragi, to unai hanua ena dika davana be do ia bada.”

Nega dika bona metau do idia vara

16 “Lau ese lau siaia umui, mamoe, uda sisia edia huanai bamona. Unai dainai, do umui aonega, gaigai bamona, bona do umui dagedage lasi, pune manu bamona. 17 To taunimanima dekenai do umui naria namonamo. Badina be idia ese kaunsolo edia vairana dekenai do idia hakaua umui, bona idia edia dubu lalonai do idia botai umui. 18 Lohia bona king edia vairana dekenai do idia hakaua umui, lau dainai. Inai dala dekenai umui ese lau do umui gwaurai hedinarai idia dekenai, bona bese idauidau ibounai dekenai. 19 Umui idia kota henia neganai umui emui lalona do idia hekwarahi lasi, do umui gwaurai herevadia totona. Badina be unai neganai do umui gwaurai herevadia be Dirava ese do ia henia umui dekenai. 20 Badina be gwaurai tauna be umui lasi, to umui emui Tamana ena Lauma be umui emui lalona dekenai do ia hereva.

21 “Kakana ese iena tadina do ia samania, do ia mase totona. Tamana ese iena natuna do ia samania, do ia mase totona. Memero do idia toreisi, edia tamana bona sinana do idia alaia mase. 22 Lauegu ladana dainai taunimanima ibounai ese do idia badu henia umui dekenai. To do ia haheauka lao ela bona dokona tauna be do ia mauri. 23 Hanua ta dekenai umui do idia dagedage henia neganai be idau hanua dekenai do umui heau lao. Badina be umui lau hamaoroa momokani, Israela edia hanua ibounai dekenai emui gaukara do umui haorea lasi neganai, Taunimanima ena Natuna do ia giroa mai.

24 “Diba tahu tauna ese iena hadibaia tauna do ia hereaia diba lasi. Hesiai tauna ese iena biaguna be do ia hereaia diba lasi. 25 Diba tahu tauna be iena hadibaia tauna danu do idia hegeregere, o hesiai tauna be iena biaguna danu do idia hegeregere, unai be namo. Vadaeni umui lalao, taunimanima haida ese lau idia hadikaia, idia gwau lau be Belesebulo, lau be ore a ta ena biaguna. Idia ese biaguna inai bamona idia hadikaia dainai, umui danu, egu ore a taudia, be do idia hadikaia, ani?

Taunimanima ese Dirava sibona do idia gari henia be namo

26 “Unai dainai, taunimanima dekenai do umui gari lasi. Badina be koua gaudia ibounai be do idia hedinarai, bona hunia gaudia be ibounai do idia diba. 27 Dibura lalonai umui lau hamaoroa herevadia be diari dekenai do umui gwaurai. Bona emui taiana dekenai umui kamoni herevadia be ruma ena atai ai dekena amo do umui harorolai diho. 28 Tauanina be do idia alaia diba, to lauma be do idia alaia diba lasi taudia dekenai do umui gari lasi. To lauma bona tauanina ruaosi lahi ia araia

gabuna dekenai do ia alaia mase diba Diravana dekenai be do umui gari, be namo.

²⁹ “Manu maragidia rua be moni maragimaragi tamona dekenai do idia hoia, ani? To idia ta be tano dekenai do ia moru lasi, emui Tamana bema ia ura lasi neganai. ³⁰ To umui emui kwarana huina ibounai be Dirava ese ia duahia haorea momokani. ³¹ Do umui gari lasi, badina umui ese manu maragi momo umui hereaia.

Iesu ena ladana do ita hunia lasi

³² “Unai dainai, taunimanima edia vairana dekenai lau do ia gwauraia hedinarai tauna be lau ese egu Tamana, guba dekenai ia noho, ena vairana dekenai, ia do lau gwauraia hedinarai. ³³ To taunimanima edia vairana dekenai lau do ia gwauraia hedinarai lasi tauna be lauegu Tamana, guba dekenai ia noho, ena vairana dekenai, ia do lau gwauraia hedinarai lasi.

Iesu ia mai, be heai havaraia totona

³⁴ “Umui emui lalona dekenai umui gwau lasi, maino lau mailaia tanobada dekenai totona lau mai. Maino lau mailaia lasi, to tuari kaia sibona. ³⁵ Badina lau mai, be heai do lau havaraia totona. Tau ta ese iena tamana do ia badu henia, bona kekeni ta ese iena sinana do ia badu henia, bona hahine matamata ese iena ravana hahine do ia badu henia. ³⁶ Bona ruma taudia ese ruma ena biaguna do idia badu henia.

³⁷ “Bema tau ta ese iena tamana o iena sinana ia ura henia bada, to lau dekenai ia ura henia maragi, ia be lau dekenai do ia hegeregere lasi. O bema tau ta ese iena natuna mero o iena natuna kekeni ia ura henia bada, to lau be ia ura henia maragi, ia be lau dekenai do ia hegeregere lasi. ³⁸ Bona bema tau ta ese iena satauro do ia abia isi lasi, lauegu murina dekenai do ia raka lasi, ia be lau dekenai do ia hegeregere lasi. ³⁹ Iena mauri ia dogoatao tauna ese iena mauri do ia halusia, to lau dainai iena mauri ia halusia tauna ese iena mauri do ia davaria.

Davana namona idia abia taudia

⁴⁰ “Umui ia abia dae tauna ese lau danu ia abia dae, bona lau ia abia dae tauna ese lau ia siaia Diravana danu ia abia dae. ⁴¹ Bema peroveta tauna umui abia dae badina be ia be Dirava ena tauna ta dainai, umui be peroveta tauna ena davana do umui abia. Bema tau namona umui abia dae badina be ia be tau namona momokani dainai, umui be tau namona ena davana danu do umui abia. ⁴² Bema tau ta ese ranu keruma kapusi tamona sibona ia henia egu murinai ia raka tau maragina ta dekenai, umui lau hamaoroa momokani, ia be davana do ia abia momokani.”

11

Ioane ese iena diba tahua taudia haida ia siaia Iesu dekenai

¹ Iesu be iena diba tahua taudia 12 dekenai ia hereva ore neganai, unai gabu ia rakatania. Hanua haida unai kahana dekenai ia lao, do ia hadibaia, bona do ia haroro henia totona.

² Ioane ese dibura ruma dekenai Keriso ena kara sivaraina ia kamoni, vadaeni iena diba tahua taudia haida Iesu dekenai ia siaidia. ³ Idia ese Iesu idia nanadaia, idia gwau, “Ioane ia gwau, ‘Do ia mai Tauna be oi, o idau tauna ta do ai naria?’”

⁴ Vadaeni Iesu ia haere, ia gwau, “Umui lao, umui kamoni, umui itaia karadia be Ioane dekenai do umui hamaoroa. ⁵ Matakepulu taudia edia matana idia kehoa, aena dika taudia idia raka, lepera taudia idia

goeva, taia kudima taudia idia kamonai, mase taudia idia torei lou, bona ogogami taudia ese Sivarai Namona idia abia dae. ⁶ Bema tau ta be lau dekenai ia daradara sisina lasi, unai tau be do ia maole bada.”

⁷ Ioane ena diba tahua taudia idia raka siri neganai, Iesu ese taunimanima momo dekenai Ioane ia herevalaia, ia gwau, “Umui be dahaka itaia totona, taunimanima idia noho lasi gabuna dekenai umui lao? Siriho, lai ese ia hamarerea gauna, a? ⁸ To dahaka itaia totona umui lao? Dabua manadamanada ia karaia tauna, a? Dabua manadamanada idia karaia taudia be king edia ruma lalonai idia noho. ⁹ To dahaka itaia totona umui lao? Peroveta tauna, a? Oibe, umui lau hamaoroa, peroveta taudia ibounai be Ioane ese ia hereaia. ¹⁰ Badina be Buka Helaga ese Ioane ia herevalaia, ia torea, ia gwau:

“‘Oi itaia, lau Dirava ese, lauegu hereva siaia tauna oiemu vairana dekenai lau siaia, oiemu dala kehoa totona.’

Ioane Bapatiso

¹¹ “Umui lau hamaoroa momokani, hahine edia bogana dekena amo idia vara taudia ibounai be ta ese Ioane ia hereaia lasi, to Guba Basileia lalonai, tau maragina sibona ese Ioane ia hereaia. ¹² Ioane Bapatiso ese iena haroro ia hamatamaia ia mai bona harihari, Guba Basileia abia totona be taunimanima ese idia heatu henia noho, bona heatu taudia ese idia ura dogoatao momokani. ¹³ Badina be peroveta taudia ibounai bona Mose ena taravatu ese Basileia idia herevalaia, ia mai bona Ioane. ¹⁴ Bema emui lalona idia hegeregere, inai hereva do umui abia dae: Ioane be Elia, peroveta taudia idia gwauraia do ia mai tauna. ¹⁵ Mai ena taiana tauna be do ia kamonai.

¹⁶ “Inai nega taudia be daika danu idia hegeregere, do lau gwauraia? Idia be memero maragimaragi bamona, hanua lalonai idia helai, edia turadia dekenai idia boiboi. ¹⁷ Idia gwau,

“‘Ai be gita ai gadaralaia, to umui be umui mavaru lasi. Ai be mase guria ane ai abia, to umui be umui taitai lasi.’

¹⁸ “Badina be Ioane Bapatiso ia mai, ia aniani lasi, ia inuinu lasi. To idia gwau, ‘Ia be kavakava,’ ¹⁹ To Taunimanima ena Natuna be ia mai vadaeni. Ia aniani bona ia inuinu. Vadaeni idia gwau, ‘Inai be aniani momo bona uaina ia inua momo tauna. Ia be takisi gogoa taudia bona kara dika taudia edia turana.’ Io, inai bamona idia hereva, to Dirava ena gaukara badadia ese iena aonega idia hamomokania noho, ani?”

Hanua haida idia dika vadaeni abidadama lasi dainai

²⁰ Hanua momo dekenai Iesu ese hoa kara momo ia karaia, to inai hanua taudia edia lalona idia giroa lasi. Unai dainai Iesu mai ena lalona sياهو danu ia gwau henidia. ²¹ Ia gwau, “Korasina e, oi dika vadaeni! Betesaida e, oi danu dika vadaeni! Badina be hoa kara emui lalona dekenai lau karaia be, Turo bona Sidono edia lalonai bema lau karaia, idia be idaunegai edia lalona do idia giroa momokani, mai puse dabua, bona lahi kahu danu edia tauanina dekenai. ²² Lau hamaoroa umui, Dirava ena Kota Badana dinana dekenai, Turo bona Sidono edia dika be maragi, to umui be do umui dika bada. ²³ Oi danu, Kaperanauma e!

Oi ura be guba dekenai sibona do oi abia isi, a? Lasi, mase gabuna, hel dekenai do idia doria diho oi. Badina be, hoa kara oiemu lalona dekenai lau karaia gauna be bema Sodoma ena lalona dekenai lau karaia, ia be do ia noho namo ia mai bona hari. ²⁴Lau hamaoroa oi, Dirava ena Kota Badana dinana neganai, Sodoma be do ia dika maragi, to oi be do oi dika bada.”

Lau dekenai umui mai do umui laga-ani totona

²⁵ Unai neganai Iesu ia gwau, “Egu Tamana e, guba bona tanobada ena Lohia, lau hanamoa oi, badina be inai gaudia aonega taudia bona diba momo taudia dekena amo oi hunia vadaeni, to natudia matamata dekenai oi hedinarai vadaeni. ²⁶ Momokani, egu Tamana e, badina be emu laloa namona be unai.”

²⁷ Ma Iesu ia gwau, “Gau ibounai be lauegu Tamana ese lau dekenai ia henia vadaeni. Tau ta lasi ese Natuna ia diba. Tamana sibona ese Natuna ia diba. Bona tau ta lasi ese Tamana ia diba. Natuna sibona ese Tamana ia diba. To bema Natuna ia ura tau ta dekenai Tamana ia hedinarai henia, be unai tau ese Tamana do ia diba.

²⁸ “Tauanina manokamanoka bona gaukara metau taudia ibounai, lau dekenai umui mai, lau ese laga-ani do lau henia umui dekenai. ²⁹ Egu huaia auna be emui pagana dekenai do umui atoa, lau dekenai diba do umui tahua, badina lau be dagedage lasi bona manau tauna. Vadaeni emui laumana be do idia laga-ani. ³⁰ Badina be lauegu huaia auna be ia metau lasi, bona huaia neganai danu hekwarahi lasi.”

12

Sabati Dina ena taravatu

¹ Unai neganai Iesu be Sabati Dina dekenai uiti uma dekenai ia raka hanaia. Ena diba tahua taudia be idia hitolo, vadaeni uiti ena anina idia kokia, idia ania. ² Farisea taudia idia itaia, vadaeni idia ese Iesu idia hamaoroa, idia gwau, “Itaia, oiemu diba tahua taudia be karaia lasi gaukara Sabati Dina dekenai idia karaia.”

³ Ia haere idia dekenai, ia gwau, “Nega ta umui duahia lasi, a, Davida ena kara ta, ia hitolo neganai, ia mai iena orea taudia danu? ⁴ Dirava ena Ruma dekenai idia daekau, pata helaga ena aniani idia ania. To unai aniani be ia helaga momokani, Davida dekenai, bona iena turadia dekenai. Hahelagaia taudia sibona do idia ania diba. ⁵ O taravatu dekenai umui duahia lasi, a, Sabati Dina dekenai hahelagaia taudia ese Sabati Dina ena taravatu idia makohia, to idia be kerere lasi? ⁶ Umui lau hamaoroa, iniseni be tau ta ese Dubu Helaga ia hereaia. ⁷ Inai hereva umui laloa, ‘Lau be bogahisihisi henia kara lau ura, boubou gauna be lau laloa lasi.’ Bema inai hereva ena anina umui diba, umui be kerere lasi taudia do umui gwaurai kerere diba lasi. ⁸ Badina be Taunimanima ena Natuna be Sabati ena biaguna.”

Iesu ese imana ia dika tauna ta ia hanamoa

⁹ Iesu ese unai gabu ia rakatania, vadaeni edia dubu ta dekenai ia raka vareai. ¹⁰ Tau ta unuseni be iena imana ia dika. Vadaeni Iesu dekenai idia henanadaia, idia gwau, “Sabati Dina dekenai gorere hanamoa be ia maoro?” Idia ura be kerere do idia doria Iesu dekenai.

¹¹ Vadaeni Iesu ia haere idia dekenai, ia gwau, “Umui daika ena mamoe bema tamona sibona, vadaeni bema Sabati Dina dekenai guri lalonai ia moru diho, do umui veria daekau lasi, a? ¹² Be, taunimanima

ese mamoe idia hereaia lasi, a? Unai dainai, Sabati Dina dekenai kara namo karaia be ia maoro.”¹³ Vadaeni Iesu ese unai tau ia hereva henia, ia gwau, “Oiemu imana oi atoa maoromaoro.”

Iena imana ia atoa maoromaoro, be ia namo vadaeni, iena imana kahana hegeregereana.¹⁴ Vadaeni Farisea taudia idia raka murimuri dekenai, idia hereva hebou, Iesu do idia alaia dalana idia tahua.

Iesu be Dirava ena abia hidi Tauna korikori

¹⁵ Iesu be edia laloe ia diba dainai, idau gabu dekenai ia lao. Tau-nimanima momo be iena murina dekenai idia raka, vadaeni ia ese ibounai ia hanamoa.¹⁶ To idia dekenai ia hamaoroa, iena sivarai do idia herevalaia lasi.¹⁷ Unai dekena amo, Isaia peroveta tauna ena hereva ia momokani vadaeni, ia gwau:

¹⁸ “Itaia, lauegu Hesiai Tauna be inai,
lau abia hidi vadaeni,
egu lalokau, lau moale ia dekenai.
Egu Lauma be iena latanai do lau atoa.
Ia ese kota maoromaoro karaia dalana,
be bese ibounai dekenai do ia gwauraia.

¹⁹ Do ia heai lasi, do ia boiboi lasi.

Hanua edia huanai iena boiboi do idia kamoni lasi.

²⁰ Ia ese manoka taudia dekenai manada kara do ia karaia,

bona sibodia idia durua dalana be lasi taudia,
be ia ese do ia bogahisihisi henidia,

ela bona kota maoromaoro dekenai kwalimu do ia henia momokani.

²¹ Iena ladana dainai,

be bese ibounai ese ia do idia naria,

mai laloe namona bona abidadama danu.”

Farisea taudia idia gwau Belesebulo ena siahu dekena amo Iesu ia gaukara

²² Unai neganai tau ta be mai lauma dika danu, Iesu dekenai idia abia lao. Unai tau be matakepulu, bona ia hereva diba lasi danu. Iesu ese ia hanamoa, vadaeni ia hereva diba, bona gau ia itaia diba.²³ Vadaeni taunimanima momo idia hoa, idia gwau, “Sedira, inai Iesu be Davida ena natuna, a?”

²⁴ Inai hereva Farisea taudia idia kamoni neganai idia gwau, “Lauma dika edia lohia tauna, Belesebulo, ese siahu ia henia dainai, inai tau ese lauma dika ia lulua diba.”

²⁵ Iesu be idia edia laloe ia diba, vadaeni ia gwau, “Basileia ta sibona bema ia hapararaia, ore ta ese ore ta idia heatu henia dainai, unai basileia do ia dika. Unai bamona danu hanua ta o iduhu ta sibona bema ia hapararaia, ia be do ia gini diba lasi.²⁶ Bona bema Satani ese Satani ia lulua murimuri dekenai, unai be ia parara, ma sibona ia heatu henia, vadaeni iena basileia be edena bamona do ia gini diba?²⁷ Umui gwau lau be Belesebulo ena siahu dekenai lauma dika lau lulua. To umui emui ore taudia be daika ena siahu dekenai lauma dika idia lulua? Unai dainai, umui emui ore taudia sibodia ese idia hedinararaia umui be kerere momokani.²⁸ To, bema lau be Dirava ena Lauma dainai lauma dika lau luludia, Dirava ena Basileia be umui dekenai ia ginidae vadaeni.

²⁹ “Tau ta ese edena bamona goada tauna ena ruma dekenai do ia raka vareai, vadaeni ena kohu do ia henaoo? Ia ese goada tauna do ia kwatua guna, vadaeni ena ruma kohu do ia henaoo diba.

³⁰ “Lau dekenai ia laloa momo lasi tauna be lau dekenai ia heatu noho, bona mamoe haboua totona lau ia durua lasi tauna, be ia ese mamoe ia negedia kava, idia boio.

Lauma Helaga hadikaia lasi

³¹ “Unai dainai, umui lau hamaoroa, taunimanima edia kara dika bona edia hereva dika ibounai be do ia gwauatao. To Lauma Helaga dekenai ia hereva dika tauna be iena dika do ia gwauatao lasi. ³² Taunimanima ena Natuna dekenai do ia hereva dika tauna be iena dika do ia gwauatao. To Lauma Helaga dekenai ia hereva dika tauna be iena dika do ia gwauatao lasi, hari inai mauri lalonai, bona mauri gabeai danu.

Au dikana ese huahua dikana ia atoa

³³ “Bema au be ia namo, ena huahua danu be do ia namo. Bema au be ia dika, ena huahua danu be do ia dika. Badina be ena huahua dekena amo au do umui diba. ³⁴ Gaigai edia natudia e! Umui be mai emui dika dainai, edena bamona hereva namodia do umui gwauraia diba? Tau ena lalona ia honu momokani gaudia dekena amo iena uduna ia hereva. ³⁵ Tau namona be mai ena laloa namodia momo ena lalona dekenai. Unai dainai kara namodia do ia karaia. Tau dikana be mai ena laloa dikadia momo ena lalona dekenai. Unai dainai kara dikadia do ia karaia. ³⁶ “Umui lau hamaoroa, hereva kava ibounai taunimanima ese do idia gwauraia, be Dirava ena Kota Badana dina dekenai, edia davana do idia abia. ³⁷ Badina be emu hereva ese oi do idia hanamoa, bona emu hereva ese oi do idia hadikaia.”

Farisea taudia ese toa idia tahua

³⁸ Vadaeni taravatu hadibaia taudia bona Farisea taudia haida ese Iesu idia hereva henia, idia gwau, “Hadibaia tauna e, ai ura be oi dekena amo toa ta do ai itaia.”

³⁹ Iesu ia haere idia dekenai, ia gwau, “Inai nega noho Dirava laloa lasi taudia be dika momokani! Umui ese toa ta umui tahua, a? Lasi, toa ta do lau hedinarai lasi umui dekenai. Toa be tamona sibona, Iona, peroveta tauna ena toa. ⁴⁰ Badina be Iona bamona, dina toi hanuaboi toi gwarume badana ena bogana lalonai ia noho, unai bamona Taunimanima ena Natuna danu dina toi hanuaboi toi tano lalonai do ia noho. ⁴¹ Dirava ena Kota Badana dinana neganai, Nineva taudia ese do idia samani henia umui, badina be idia ese Iona ena haroro dainai edia lalona idia giroa, to iniseni, emui huana dekenai, be tau ta ese Iona ia hereaia. ⁴² Dirava ena Kota Badana neganai danu, diho kahana dekena amo kwini ese umui do ia samania, badina ia be tanobada ena dokona dekena amo Solomona ena aonega kamonaia totona ia mai. To iniseni be tau ta ese Solomona ia hereaia.

Lauma dika ia giroa mai

⁴³ “Lauma dikana ta ese tau ta ia rakatania, vadaeni gabu kaukaudia ia raka hanaia, ia laga-ani totona, to laga-ani gabuna ta ia davaria lasi. ⁴⁴ Vadaeni ia gwau, ‘Lau rakatania rumana dekenai do lau giroa lou.’ Ia giroa lao neganai ruma ia davaria be ia noho kava, tau ta ia noho lasi, ia goevagoeva. ⁴⁵ Vadaeni ia ese lauma idia dika momokani 7 ma ia hakaua lao, ibounai idia raka vareai, ruma lalonai idia noho. Unai dainai, unai tau be hamatamaia neganai ena dika be sisina ia maragi, to dokona dekenai iena dika be ia bada herea.”

Iesu ena sinana bona Iesu ena tadina

⁴⁶ Iesu be taunimanima dekenai ia hereva noho neganai, iena sinana bona iena tadina be murimuri dekenai idia gini, Iesu dekenai idia hereva gwaurai. ⁴⁷ Vadaeni tau ta ese ia hamaoroa, ia gwau, “Oiemu sinana bona oiemu tadina be unai, murimuri dekenai idia gini noho, oi dekenai idia hereva gwaurai.”

⁴⁸ To Iesu ia haere, ia gwau, “Lauegu sinana bona lauegu tadina be daika?” ⁴⁹ Vadaeni iena diba tahua taudia dekenai imana ia duduia, ia gwau, “Lauegu sinana bona lauegu tadina be inai. ⁵⁰ Badina be lauegu Tamana, guba dekenai ia noho, ena ura idia karaia taudia, idia sibona be lauegu tadina, bona lauegu taihuna, bona lauegu sinana.”

13

Uiti uhenā negea idau gabu, idau gabu dekenai

¹ Unai dina lalonai, Iesu be ruma dekena amo ia diho, kone dekenai ia helai, hadibaia totona. ² Vadaeni taunimanima momo herea be ia dekenai idia haboua. Vadaeni ia be vanagi ta dekenai ia guia, ia helai diho. Taunimanima momo herea be kone dekenai idia gini. ³ Ia ese parabole momo idia dekenai ia hadibaia, ia gwau, “Umui kamona:

“Uhe hadoa tauna ta ese hadohado totona uma dekenai ia lao. ⁴ Uiti uhenā ia negea lao negea mai neganai, haida be dala dekenai idia moru, vadaeni manu idia roho mai, idia ania ore. ⁵ Vadaeni haida be nadi dekenai idia moru, tano sisina dekenai, nega sisina lalonai idia tubu haraga, badina tano be ia bada lasi. ⁶ To dina ia daekau, vadaeni idia mase, idia kakoro, badina edia ramuna be lasi dainai. ⁷ Ma haida be ava ginigini lalonai idia moru, ava ginigini ese idia tubu bada, bona uhe ena tubu gauna idia koua. ⁸ To haida be tano namona dekenai idia moru, anina idia atoa, haida be 100, haida be 60, haida be 30.”

⁹ Vadaeni Iesu ia gwau, “Mai ena taiana tauna be do ia kamona.”

Parabole dekenai Iesu ia hadibaia ena badina

¹⁰ Iesu ena diba tahua taudia be ia dekenai idia lao, idia nanadaia, idia gwau, “Badina be dahaka taunimanima dekenai parabole dekena amo oi hadibaia noho?”

¹¹ Idia dekenai ia haere, ia gwau, “Guba Basileia ena hunia hereva umui dekenai be idia hedinarai, to haida dekenai be lasi. ¹² Badina be mai ena gau tauna, ia dekenai be ma haida do idia henia, gau momo do ia abia. To mai ena gau lasi tauna dekena amo ia noho gauna be do idia kokia. ¹³ Inai dainai parabole dekena amo lau hereva idia dekenai, vadaeni edia matana idia negea, to do idia itaia diba lasi. Bona idia kamona gwaurai, to do idia kamona diba lasi, bona edia lalona be do ia kehoa diba lasi. ¹⁴ Idia dekenai Isaia ena peroveta hereva ia momokani vadaeni, ia gwau:

“Kamona be do umui kamona,
to emui lalona do idia kehoa diba lasi.
Itaia be do umui itaia,
to diba do umui davarai lasi.

¹⁵ Badina be inai bese taudia edia lalona idia dibura,
edia taiana idia kuduma,
bona edia matana idia koua.
Unai be edia matana dekena amo do idia itaia garina,
bona edia taiana dekena amo do idia kamona garina,
edia lalona do idia kehoa garina,

edia lalona do idia giroa,
bona lau ese do lau hamauridia garina.’

¹⁶ “To umui be emui matana idia namo vadaeni, badina umui itaia diba. Umui emui taiana danu idia namo, badina be umui kamonaia diba. ¹⁷ Umui lau hamaoroa momokani, peroveta taudia bona kara maoromaoro taudia momo idia ura be umui itaia gaudia do idia itaia, to idia itaia diba lasi, bona umui kamonaia herevadia idia ura kamonaia, to idia kamonaia diba lasi.

Iesu ese uiti hadoa tauna ena sivarai anina ia hedinaraia

¹⁸ “Inai dainai uiti negea lao negea mai tauna ena parabole ena anina do umui kamonaia: ¹⁹ Tau ta ese Basileia ena sivarai ia kamonaia, to ena anina ia diba lasi, vadaeni Satani ia mai, unai tau ena lalona dekenai ia hadoa gauna be ia kokia. Dala dekenai ia moru gauna be unai. ²⁰ Nadi dekenai ia moru gauna be tau ta ese Dirava ena hereva ia kamonaia, bona nega tamona ia abia dae mai moale danu. ²¹ To ia be ramuna lasi, ia noho nega sisina sibona, badina be gabeai haida ese Dirava ena hereva idia hadikaia, bona idia ese unai tau idia hisihisi henia, o idia dagedage henia neganai, iena abidadama be do ia ore haraga. ²² Ava ginigini dekenai ia moru gauna be tau ta ese hereva ia kamonaia, to tanobada ena lalona metau idauidau bona kohu ura henia dikadika ese Dirava ena hereva idia koua. Unai dainai ia be anina lasi. ²³ To tano namona dekenai ia moru gauna be tau ta ese Dirava ena hereva ia kamonaia, bona iena lalona ia kehoa momokani. Unai bamona taudia be edia anina idia atoa, ta 100, ta 60, ta 30.”

Parabole: Uiti bona ava

²⁴ Parabole ta ma ia hamaorodia, ia gwau, “Guba Basileia be uma tauna ta bamona, ena uma dekenai uiti uhena namodia ia negea lao negea mai. ²⁵ To taunimanima idia mahuta neganai badu tauna ia mai, ava dikadia uiti edia huanai ia hadoa, vadaeni ia raka siri. ²⁶ Vadaeni uiti be ia tubu bona ena anina ia atoa neganai, ava dikadia danu idia hedinaraia. ²⁷ Vadaeni uma biaguna ena gaukara taudia ia dekenai idia lao, idia gwau, ‘Aiemaia biaguna e, uhe namodia oiemu uma dekenai oi hadoa, ani? To harihari ava dikadia be edeseni dekenai amo idia mai?’

²⁸ “Ia haere, ia gwau, ‘Inai be badu tauna ta ena gaukara.’ Ena gaukara taudia ese idia nanadaia, idia gwau, ‘Oi ura ai ragaia, o?’ ²⁹ Ia gwau, ‘Lasi, ava dikadia umui ragaia neganai uiti danu umui ragaia nega tamona garina. ³⁰ Do idia noho, do idia tubu nega tamona, ia lao bona uiti utua neganai. Vadaeni lau ese utua taudia do lau hamaorodia, lau gwau, “Ava dikadia umui haboua guna, umui kwatua, lahi dekenai gabua totona, to uiti be egu aniani rumana dekenai do umui haboua.”’ ”

Parabole: Mastadi uhena

³¹ Parabole ta ma Iesu ia hamaorodia, ia gwau, “Guba Basileia be mastadi uhena bamona, tau ta ese ia abia, iena uma dekenai ia hadoa. ³² Au uhedia ibounai huanai ia sibona be maragimaragi momokani. To ia tubu neganai, au maragidia ibounai ia hanaia, au badana dekenai ia lao, vadaeni atai ai manu ibounai be iena rigi dekenai edia ruma idia karaia.”

Parabole: Paraoa hatubua ena muramura

³³ Parabole ta ma ia hamaorodia, ia gwau, “Guba Basileia be hatubua ena muramura bamona, hahine ta ese ia abia, paraoa momo, hegeregere

disi toi danu ia mikisi karaia, ia lao bona inai muramura ese paraoa ibounai ia hatubua, ia bada vadaeni.”

Iesu be parabole sibona dekena amo ia hadibaia

³⁴ Iesu ese inai hereva ibounai parabole dekena amo ia gwauraidia unai taunimanima momo dekenai. Nega ibounai ia hadibaia parabole sibona dekena amo. ³⁵ Inai bamona ia karaia, peroveta tauna ena hereva hamomokania totona, ia gwau:

“Lau hadibaia neganai parabole do lau gwauraia.
Tanobada matamaia nega dekena amo ia mai bona hari,
hunia gaudia do lau gwauraia hedinarai.”

Iesu ese uiti bona ava parabole ena anina ia hadibaia

³⁶ Iesu ese unai taunimanima momo ia rakatania, vadaeni ruma dekenai ia daekau. Vadaeni iena diba tahua taudia ia dekenai idia mai, idia gwau, “Ava dikadia uma lalonai edia parabole ena anina mani oi hadibaia ai dekenai.”

³⁷ Iesu ia haere, ia gwau, “Uiti uhena namodia ia negea lao negea mai tauna be Taunimanima ena Natuna. ³⁸ Uma be tanobada. Uhe namodia be Basileia ena taunimanima. Ava dikadia be Satani ena taunimanima. ³⁹ Badu tauna, ava uhena ia negea lao negea mai be Satani. Uiti utua negana be tanobada ena dokona. Utua taudia be aneru. ⁴⁰ Unai dainai, ava dikadia idia haboua, lahi dekenai idia gabua ore, tanobada ena dokona neganai danu unai bamona. ⁴¹ Taunimanima ena Natuna ese iena aneru do ia siaia, vadaeni taunimanima idia hakererea taudia, bona kara dika taudia ibounai, ena Basileia dekena amo do idia abia siri. ⁴² Lahi badana dekenai do idia negedia vareai, unuseni do idia tai, edia isena do idia koria auka masemase. ⁴³ Unai neganai Dirava ena kara maoromaoro taudia be edia Tamana ena Basileia lalonai do idia diaridiari, dina bamona. Mai ena taiana tauna be do ia kamoni.

Parabole: Kohu namona ta ia hunia

⁴⁴ “Guba Basileia be kohu namona ta, tano dekenai ia hunia noho bamona. Tau ta ese ia davaria, vadaeni tano dekena amo ia koua, ia lao, mai moale danu iena gau ibounai ia hoia lao, vadaeni unai tano ia hoia.

Parabole: Davana bada nadi namona

⁴⁵ “Guba Basileia be hoihoi tauna ta bamona, davana bada nadi namodia ia tahua. ⁴⁶ Nadi namo herea ta ia davaria, vadaeni ia lao, iena gau ibounai ia hoia lao, unai nadi namo herea ia hoia.

Parabole: Reke davara dekenai

⁴⁷ “Guba Basileia be reke bamona, davara dekenai idia atoa, gwarume idaidau momo idia vareai. ⁴⁸ Ia honu neganai, reke be kone dekenai idia veria lao, gwarume namodia idia haboua baketi dekenai, to gwarume dikadia idia negea. ⁴⁹ Tanobada dokona neganai be unai bamona. Aneru ese kara dika taudia bona kara maoromaoro taudia do idia hapararaia. ⁵⁰ Kara dika taudia be lahi badana dekenai do idia negea vareai, unuseni do idia tai, edia isena do idia koria auka masemase.”

Diba gunana bona diba matamata

⁵¹ Iesu ese ia nanadaia idia dekenai, ia gwau, “Inai hereva ibounai dekenai umui emui lalona idia kehoa vadaeni, a?”
Idia gwau, “Io.”

⁵² Vadaeni Iesu ia hamaorodia, ia gwau, “Unai dainai bema taravatu hadibaia tauna ta be Guba Basileia ena diba tahua tauna do ia halaoa neganai, ia be ruma badana ena biaguna ta bamona. Ia ese kohu matamata bona kohu gunana danu edia haboua gabuna dekena amo do ia kokia, vadaeni idia do ia hedinaraiia.”

Nasareta taudia idia ura lasi Iesu

⁵³ Iesu ese inai parabole ia gwaureia ore, vadaeni unai gabu dekena amo ia raka siri. ⁵⁴ Iena hanua korikori dekenai ia ginidae, bona hanua taudia edia dubu dekenai ia hadibaia. Vadaeni idia be idia hoa, idia gwau, “Inai tau ena aonega bona iena siahu kara be edeseni ia abia? ⁵⁵ Inai be kamuta tauna ena natuna lasi, a? Iena sinana ena ladana be Maria, ani? Iena tadina be Iamesi bona Iose, bona Simona bona Iuda, ani? ⁵⁶ Iena taihuna be ita dekenai idia noho, ani? Unai dainai inai siahu ibounai be edeseni ia abia?” ⁵⁷ Vadaeni idia ura lasi Iesu.

To Iesu ia hamaorodia, ia gwau, “Peroveta tauna be do idia matauraia, to ena hanua korikori dekenai, bona ena ruma dekenai be do idia matauraia lasi.” ⁵⁸ Unuseni be siahu karadia momo lasi ia karaia, badina idia be abidadama lasi dainai.

14

Ioane Bapatiso ia mase

¹ Unai neganai king Heroda ese Iesu ena sivarai ia kamoni. ² Vadaeni ia ese iena hesiai taudia ia hamaorodia, ia gwau, “Inai be Ioane Bapatiso. Ia be mase dekena amo ia toreisi vadaeni, inai dekenai unai siahu karadia ia karaia.”

³ Badina be Heroda ese Ioane ia dogoatao vadaeni, ia guia, dibura ruma dekenai ia koua, Herodia, iena kakana Filipino ena adavana totona. ⁴ Badina be Ioane ese ia hamaoroa, ia gwau, “Inai hahine oi abia be oi kerere.” ⁵ Heroda ia ura be Ioane ia alaia, to Iuda taudia dekenai ia gari, badina be idia ibounai idia laloa Ioane be peroveta tauna.

⁶ To dina ta Heroda ese ia vara dinana laloatao totona, aria ta ia karaia, vadaeni Herodia ena natuna kekeni be edia vairana dekenai ia mavaru, Heroda ia hamoalea. ⁷ Unai dainai mai hereva metau danu Heroda ese kekeni dekenai ia gwauhamata, ia gwau, “Bema gau ta oi noinoi lau dekenai, do lau henia diba.”

⁸ Kekeni ena sinana ese ia hereva henia guna dainai, ia be ia gwau, “Ioane Bapatiso ena kwarana be mereki dekenai oi mailaia, iniseni oi henia lau dekenai.”

⁹ King ena lalona ia hisihisi vadaeni, to iena gwauhamata dainai, bona iena vadvadi taudia dainai, king ese idia ia hamaoroa, kekeni ena ura gauna do idia henia. ¹⁰ Tau haida ia siaia, Ioane ena kwarana, dibura ruma dekenai idia utua oho. ¹¹ Kwarana be mereki dekenai idia atoa, idia mailaia, kekeni dekenai idia henia. Vadaeni ia ese iena sinana dekenai ia mailaia. ¹² Vadaeni Ioane ena diba tahua taudia idia lao, Ioane ena tauanina idia guria. Vadaeni idia lao, Iesu idia hamaoroa.

Iesu ese tatau 5000 dekenai aniani ia henia

¹³ Iesu be Ioane ena sivarai ia kamoni. Vadaeni vanagi ta dekenai unai gabu ia rakatania, taunimanima idia noho lasi gabuna dekenai ia lao. To taunimanima momo be idia kamoni, vadaeni aena dekenai idia raka lao ia dekenai, edia hanua dekena amo. ¹⁴ Kone dekenai ia diho neganai, Iesu ese taunimanima momo herea ia itaia, ia bogahisihisi idia dekenai, bona edia gorere taudia ia hanamoa.

¹⁵ Adorahi neganai iena diba tahua taudia Iesu dekenai idia lao, idia gwau, “Inai be taunimanima idia noho lasi gabuna, bona dina be ia diho vadaeni. Taunimanima oi siaia be namo, hanua maragidia dekenai edia aniani do idia hoia.”

¹⁶ To Iesu ia gwau, “Badina dahaka do idia lao? Umui sibona ese aniani umui henidia be namo.” ¹⁷ To idia haere ia dekenai, idia gwau, “Iseda aniani gaudia be paraoa 5 sibona, bona gwarume maragi rua.”

¹⁸ Iesu ia gwau, “Umui mailaia lau dekenai.” ¹⁹ Vadaeni unai taunimanima momo dekenai Iesu ia hereva, rei dekenai do idia helai diho. Vadaeni Iesu ese aniani gaudia 5 sibona, bona gwarume rua sibona ia abia, guba dekenai ia itaia, bona aniani ia hanamoa. Vadaeni aniani ia makohia sisina sisina, diba tahua taudia dekenai ia henia. Vadaeni idia ese unai taunimanima momo dekenai idia henia. ²⁰ Ibounai idia aniani, idia boga kunu. Gabeai aniani orena idia haboua, bosea 12 idia honu. ²¹ Idia aniani tatau be 5000 bamona, to hahine mai edia natudia be idia duahia lasi.

Iesu be davara ena kopina dekenai ia raka

²² Iesu ese iena diba tahua taudia dekenai ia hereva, vanagi dekenai do idia guia, do idia lao guna, gohu ena kahana dekenai do idia heau hanaia. To ia be taunimanima do ia siaia lao idau gabu idau gabu dekenai. ²³ Taunimanima ia siaia ore, vadaeni Iesu sibona ororo ta dekenai ia daekau, ia guriguri. Hanuaboi ia ginidae, Iesu sibona ia noho unuseni. ²⁴ To unai vanagi be gohu ena huana dekenai, bona hurehure ese ia hamarerea momo, badina lai be edia vairana dekena amo ia mai. ²⁵ Vadaeni daba rere kahirakahira, dibura neganai, Iesu be idia dekenai ia lao, davara ena kopina dekenai ia raka. ²⁶ Diba tahua taudia ese davara kopina dekenai ia raka noho neganai idia itaia, vadaeni idia gari dikadika, idia gwau, “Unai be lauma ta.” Idia gari bada dainai idia boiboi dikadika.

²⁷ To Iesu ia hereva idia dekenai, ia gwau, “Umui goada abia, inai be lau, umui gari lasi.”

²⁸ Vadaeni Petero ia hereva Iesu dekenai, ia gwau, “Lohiabada e, bema inai be oi momokani, oi hereva lau dekenai, vadaeni davara ena kopina dekenai do lau raka mai.”

²⁹ Iesu ia gwau, “Oi mai.” Petero be vanagi dekena amo ia diho, davara ena kopina latanai ia raka hamatamaia, Iesu dekenai ia lao gwauriaia. ³⁰ To lai ia itaia, vadaeni ia gari, davara lalonai ia diho hamatamaia, vadaeni ia boiboi, ia gwau, “Lohiabada e, oi hamauria lau.”

³¹ Vadaeni Iesu ese nega tamona iena imana dekenai Petero ia dogoatao, ia veria daekau. Ia gwau, “Abidadama maragimaragi tauna, dahaka totona oi daradara?”

³² Idia ruaosi vanagi dekenai idia guia, vadaeni lai ia doko. ³³ Vanagi taudia be Iesu ena vairana dekenai idia tomadiho, idia gwau, “Momokani, oi be Dirava ena Natuna.”

Iesu ese gorere taudia ia hanamoa Genesareta dekenai

³⁴ Gohu idia hanaia, Genesareta kone dekenai idia kamokau. ³⁵ Unai gabu taudia idia diba vadaeni inai be Iesu, vadaeni hereva idia siaia, unai tano taudia ibounai idia hadibaia. Vadaeni gorere taudia ibounai Iesu dekenai idia abia lao. ³⁶ Idia noia, iena dabua sibona dekenai do idia dogoatao. Vadaeni idia dogoatao taudia ibounai be idia namo lou.

15

Dirava ena taravatu ese sene taravatu ia hereaia

¹ Farisea taudia bona taravatu hadibaia taudia haida Ierusalem dekenamo idia lao Iesu dekenai, idia gwau, ²“Badina be dahaka oiemu diba tahua taudia ese sene taudia edia taravatu idia makohia, edia imana idia huria lasi, idia aniani?”

³ Iesu ia haere idia dekenai, ia gwau, “Badina be dahaka umui ese Dirava ena taravatu umui makohia, umui emui sene taudia edia taravatu karaia totona? ⁴ Badina be Dirava ia hereva vadaeni iena taravatu dekenai, ia gwau, ‘Oiemu tamana, oiemu sinana oi matauraia, bona, sinana o tamana do ia hereva dika henia tauna do umui alaia mase.’ ⁵ To umui be umui gwau, ‘Tau ta ese iena tamana, o iena sinana dekenai do ia hamaoroa, do ia gwau: Lau ura be lau hanamoa oi, kohu dekenamo, to dala lasi, badina inai kohu be lau gwauhamata vadaeni Dirava do lau henia. ⁶ Unai dainai egu tamana bona egu sinana do lau durua lasi.’ ⁷ Umui koikoi taudia e, momokani Isaia ese umui ia herevalaia, ia gwau:

⁸ “Inai bese taudia edia uduna sibona idia hanamoa lau, to edia kudouna be daudau masemase.

⁹ Idia tomadiho lau dekenai, to anina lasi.

Idia edia hadibaia hereva be taunimanima edia taravatu sibona.’”

Gau haida ese taunimanima idia hamiroa

¹⁰ Vadaeni Iesu ese taunimanima momo ia boiridia lou ia dekenai, ia gwau, “Egu hereva mani umui kamoni, vadaeni do umui diba: ¹¹ Uduna dekenai idia vareai gaudia be tau ta idia hamiroa lasi, to iena uduna dekenamo idia mai murimuri gaudia ese do idia hamiroa.”

¹² Iena diba tahua taudia be Iesu dekenai idia lao, idia gwau, “Oi diba Farisea taudia be oiemu hereva idia kamoni, vadaeni edia lalona idia hisihisi, a?”

¹³ To Iesu ia haere, ia gwau, “Lauegu Tamana guba dekenai ia noho, be mai ena uma. Ia ese ia hadoa lasi audia ibounai be do ia kokia. ¹⁴ Unai Farisea taudia do umui lalao lasi! Idia be matakepulu taudia, bona matakepulu taudia idia hakaua lao noho. Bema matakepulu tauna ese matakepulu tauna do ia hakaua, idia ruaosi guri dekenai do idia moru.”

¹⁵ Petero ia hereva henia, ia gwau, “Inai parable ena anina oi hadibaia ai dekenai.”

¹⁶ Iesu ia gwau, “Umui danu umui diba lasi, a? ¹⁷ Umui diba lasi tau ena uduna dekenamo ia ania gauna be iena bogana dekenai sibona ia vareai, bona bogana dekenamo ia lao murimuri dekenai. ¹⁸ To iena uduna dekenamo idia mai gaudia be iena lalona dekenamo idia mai, unai gaudia ese taunimanima idia hamiroa. ¹⁹ Badina be tau ena lalona dekenamo idia mai gaudia be inai: Lalao dikadia, taunimanima alaia, heudahanai, matabodaga, hena, samania koikoi, hereva dikadia. ²⁰ Inai be taunimanima idia hadikaia gaudia. To edia imana idia huria lasi, ma idia aniani, unai be taunimanima idia hamiroa lasi.”

Kanana hahine ta ena abidadama

²¹ Iesu be unai gabu ia rakatania, Turo bona Sidono edia kahana dekenai ia lao. ²² Vadaeni unai gabu hahinena ta, Kanana besena ena hahine, be ia dekenai ia lao. Ia gwau, “Lohiabada e, Davida ena Natuna

e, oi bogahisihisi lau dekenai, egu natuna kekeni be lauma dikana ese ia abia momokani.”

²³ To Iesu be hereva ta ia haere lasi ia dekenai. Vadaeni iena diba taudia ese idia noinoi Iesu dekenai, idia gwau, “Mani oi lulua, badina be iseda murina dekenai ia boiboi noho.”

²⁴ Iesu ia haere, ia gwau, “Dirava ese lau ia siaia, Israela besena ena mamoe idia boio sibona dekenai.”

²⁵ Vadaeni inai hahine ese ia tomadiho Iesu dekenai, ia gwau, “Lohiabada e, oi durua lau.”

²⁶ Iesu ia haere, ia gwau, “Ia namo lasi memero edia aniani do idia abia, sisia dekenai do idia negea lao.”

²⁷ Hahine ma ia gwau, “Lohiabada e, momokani, to sisia be biaguna ena pata dekena amo idia moru momorudia be idia ania diba.”

²⁸ Vadaeni Iesu ia haere ia dekenai, ia gwau, “Hahine e, oiemu abidadama be ia bada herea, oiemu ura gauna do oi abia.” Unai neganai hahine ena natuna kekeni ia namo vadaeni.

Iesu ese taunimanima momo ia hanamoa

²⁹ Iesu ese unai gabu ia rakatania, Galilea Gohu ena kone dekenai ia ginidae. Vadaeni ororo ta dekenai ia daekau, unuseni ia helai diho.

³⁰ Taunimanima momo ia dekenai idia lao. Aena idia dika taudia, matakepulu taudia, idia hereva diba lasi taudia, edia imana idia dika taudia, bona gorere idauidau taudia momo herea idia abia lao, Iesu ena aena badinai idia atoa. Vadaeni Iesu ese idia ia hanamoa. ³¹ Unai dainai, taunimanima momo idia hoa, badina be idia itaia, hereva diba lasi taudia idia hereva, imana dika taudia idia goada, aena dika taudia idia raka, matakepulu taudia idia itaia diba. Vadaeni Israela edia Dirava idia hanamoa.

Iesu ese tatau 4000 dekenai aniani ia henia

³² Unai neganai Iesu ese iena diba taudia ia boiridia, ia gwau, “Taunimanima momo dekenai lau bogahisihisi, badina idia be dina toi lau dekenai idia noho, bona idia be aniani lasi. Lau ura lasi mai hitolo danu lau siaidia, dala dekenai do idia manokamanoka garina.”

³³ Iena diba taudia idia gwau, “Be, taunimanima idia noho lasi gabuna dekenai ita noho inai, taunimanima momo herea edia aniani be edeseni do ita abia?”

³⁴ Iesu ia nanadaia idia dekenai, ia gwau, “Umui emui aniani gaudia be hida?” Idia gwau, “Paraoa 7, bona gwarume maragi haida danu.”

³⁵ Vadaeni Iesu ese unai taunimanima momo dekenai ia hereva, tano dekenai do idia helai diho. ³⁶ Vadaeni paraoa 7 bona gwarume danu ia abia, ia hanamoa. Vadaeni ia makohia sisina sisina, iena diba taudia dekenai ia henia, bona iena diba taudia taudia ese unai taunimanima momo dekenai idia henia. ³⁷ Ibounai idia aniani, idia boga kunu. Vadaeni aniani orena be idia gogoa, bosea 7 idia hahonua. ³⁸ Idia aniani tatau be 4000. To hahine mai edia natudia be idia duahia lasi.

³⁹ Vadaeni Iesu ese taunimanima ia siaidia idau gabu idau gabu dekenai, vanagi dekenai ia guia, ia heau, Magadana tano dekenai ia lao.

16

Farisea bona Sadukea taudia ese toa idia taudia lou

¹ Farisea taudia bona Sadukea taudia koikoi dala dekenai Iesu hakererea totona ia dekenai idia noia, toa ta guba dekena amo do ia hedinarai idia dekenai. ² Vadaeni ia ese ia haere idia dekenai, ia gwau, “Adorahi

neganai umui gwau, ‘Kerukeru be nega do ia namo, badina be guba ia kakakaka vadaeni.’³ Ma dabai umui gwau, ‘Hari dina be medu do ia diho, badina be guba be kakakaka bona ia korema danu.’ Be, guba ena toana umui diba, to hari nega ena toana be umui diba lasi, a?⁴ Umui be oreka dikana, ma Dirava umui laloa lasi danu. Toa umui noinoi lau dekenai, to toa ta do lau hedinarai lasi umui dekenai. Iona, peroveta tauna ena toa sibona do umui itaia.”

Vadaeni Iesu ese ia rakatanidia, ia raka siri.

Parabole: Farisea bona Sadukea taudia edia kara

⁵ Iena diba tahua taudia ese gohu unai kahanai idia hanaia neganai, aniani idia rakatania, idia laloaboio dainai. ⁶ Vadaeni Iesu ia sisiba henidia, ia gwau, “Umui emui matana umui kehoa, Farisea taudia bona Sadukea taudia edia hatubua muramura dekenai umui naria namonamo.”

⁷ Diba tahua taudia be sibodia ta ta dekenai idia hereva, idia gwau, “Inai bamona ia hereva badina be aniani ita mailaia lasi.”

⁸ Iesu be edia hereva ia diba, vadaeni ia hamaorodia, ia gwau, “Abidadama maragimaragi taudia e, badina dahaka umui herevahereva noho, aniani umui abia mai lasi dainai?” ⁹ Umui emui lalona do idia kehoa lasi, a? Tatau 5000 lau ubua paraoa 5 dekena amo, bona bosea hida umui hahonua, be umui laloatao lasi, a? ¹⁰ Bona tatau 4000 lau ubua paraoa 7 dekena amo, bona bosea hida umui hahonua, be umui laloatao lasi, a? ¹¹ Edena bamona emui lalona be idia kehoa lasi? Lau be aniani totona umui dekenai lau hereva lasi, to lau hereva be inai Farisea taudia bona Sadukea taudia edia hatubua muramura do umui naria namonamo.”

¹² Vadaeni edia lalona idia kehoa, ia be hatubua muramura dekenai ia hereva lasi, to Farisea taudia bona Sadukea taudia edia hadibaia dala dekenai ia hereva.

Petero ese Iesu ia gwauraia Keriso

¹³ Iesu be Kaisarea Filipi tano dekenai ia ginidae. Vadaeni ia ese iena diba tahua taudia dekenai ia nanadaia, ia gwau, “Taunimanima be dahaka idia gwau Taunimanima ena Natuna be daika?” ¹⁴ Idia gwau, “Haida be Ioane Bapatiso idia gwau, haida be Elia, haida be Ieremia, ma haida idia gwau oi be peroveta tauna ta.”

¹⁵ Ma ia nanadaia idia dekenai, ia gwau, “To umui be dahaka umui gwau, lau be daika?”

¹⁶ Simona Petero ia haere, ia gwau, “Oi be Keriso, Mauri Diravana ena Natuna.”

¹⁷ Iesu ia haere, ia gwau, “Simona, Iona ena natuna, oi be namo, badina be taunimanima ese oi dekenai idia hadibaia lasi, to lauegu Tamana guba dekenai ia noho ese. ¹⁸ Lau hamaoroa oi, oi be Petero, nadi ta. Inai nadi latanai lauegu ekalesia do lau haginia, bona hel ena sياهو danu ese ekalesia do ia halusia diba lasi. ¹⁹ Guba Basileia ena ki do lau henia oi, vadaeni tanobada dekenai do oi koua gaudia be guba dekenai danu do idia koua, bona tanobada dekenai do oi kehoa gaudia be guba dekenai danu do idia kehoa.”

²⁰ Vadaeni Iesu ese iena diba tahua taudia dekenai ia hereva goada, taunimanima do idia hadibaia lasi ia be Keriso.

Iesu ia gwau do ia mase bona do ia toreisi lou

²¹ Unai nega dekena amo, Iesu ese iena diba tahua taudia dekenai ia hadibaia hamatamaia, ia be Ierusalem dekenai do ia lao, vadaeni

hanua tau badadia bona dubu biagudia bona taravatu hadibaia taudia ese hisihisi momo do idia henia, bona do idia alaia mase. To dina toi murinai be do ia toreisi lou.

²² Vadaeni Petero ese Iesu ia hakaua siri, ia sisiba henia hamatamaia, ia gwau, “Lohiabada e, unai bamona lasi. Unai bamona do idia karaia lasi oi dekenai.”

²³ Iesu ena vairana be ia giroa, Petero dekenai ia gwau henia, ia gwau, “Satani e, lauegu murina kahana oi lao. Lau hamorua totona oi hereva, badina oiemu laloka be Dirava ena lasi, to taunimanima edia.”

²⁴ Vadaeni Iesu ese iena diba tahua taudia ia hamaorodia, ia gwau, “Tau ta bema ia ura lauegu murina dekenai do ia raka, ia sibona ena ura do ia laloka lasi, to iena satauro do ia huaia, lauegu murina dekenai do ia raka. ²⁵ Badina be sibona ena mauri do ia dogoatao noho tauna be iena mauri do ia halusia, to sibona ena mauri do ia halusia lau totona tauna, be iena mauri do ia davaria. ²⁶ Bema tau ta ese tanobada ibounai ia abia, to iena mauri ia halusia, be edena bamona namo do ia abia? Tau ta be dahaka davana do ia henia iena mauri do ia davaria lou totona? ²⁷ Badina be Taunimanima ena Natuna be iena Tamana ena diaridiari dekenai do ia mai, mai ena aneru momo danu, unai neganai taunimanima ta ta ibounai edia kara hegeregereana edia davana do ia henidia. ²⁸ Umui lau hamaoroa momokani, haida idia gini inai, be do idia mase lasi, ela bona Taunimanima ena Natuna do idia itaia, mai ena Basileia danu do ia mai.”

17

Iesu idia itaia, iena toana be ia idau

¹ Dina 6 murinai, Iesu ese Petero bona Iamesi bona ena tadina Ioane ia abia lao, ororo badana ta dekenai idia daekau. ² Vadaeni idia edia vairana dekenai Iesu ena toana ia idau, iena vairana be ia diaridiari dina bamona, iena dabua ia kurokuro momokani, diari bada bamona. ³ Vadaeni Mose bona Elia be idia edia vairana dekenai idia hedinarai, Iesu danu idia herevahereva. ⁴ Petero ia hereva Iesu dekenai, ia gwau, “Lohiabada e, iniseni ita noho be namo herea. Bema oi ura, palai ruma toi do ai karaia, ta oiemu, ta Mose ena, ta Elia ena.”

⁵ Ia be do ia hereva noho neganai, ori mai diaridiari danu ese idia ia koua, bona gado ta ori lalona dekena amo ia mai, ia gwau, “Egu Natuna be inai, lauegu laloka Tauna. Lauegu lalona ia moale ia dekenai. Iena hereva do umui kamona henia.”

⁶ Diba tahua taudia idia kamona, vadaeni edia vairana idia atoa diho, idia gari dikadika dainai. ⁷ To Iesu be ia lao idia dekenai, edia kopina dekenai ena imana ia atoa, ia gwau, “Umui toreisi, umui gari lasi.” ⁸ Vadaeni edia kwarana idia abia isi, to tau ta idia itaia lasi, Iesu sibona ia noho.

⁹ Ororo dekenai idia diho neganai Iesu ese ia hamaorodia, ia gwau, “Umui itaia gaudia be tau ta dekenai do umui hamaoroa lasi ela bona Taunimanima ena Natuna be mase dekena amo do ia toreisi lou.”

¹⁰ Iesu ena diba tahua taudia ese idia nanadaia ia dekenai, idia gwau, “Badina be dahaka taravatu hadibaia taudia idia gwau Elia be do ia mai guna?”

¹¹ Iesu be ia haere, ia gwau, “Inai be momokani, Elia be do ia mai guna, gau ibounai do ia karaia hegaegae totona. ¹² To umui lau hamaoroa, Elia be ia mai vadaeni, to idia be idia diba lasi ia, vadaeni edia ura kara

ibounai be ia dekenai idia karaia vadaeni. Taunimanima ena Natuna dekenai danu, unai bamona hisihisi do idia henia.”

¹³ Iesu be unai bamona ia hereva, vadaeni iena diba tahua taudia edia lalona idia kehoa, ia ese Ioane Bapatiso herevana ia gwauraia.

Iesu ese mai lauma dika merona ia hanamoa

¹⁴ Idia giroa lou unai taunimanima momo dekenai, vadaeni tau ta Iesu dekenai ia lao, iena vairanai ia tui diho, ia gwau, ¹⁵ “Lohiabada e, lauegu natuna dekenai oi bogahisihisi, badina be ena lalona ia kavakava, bona ena gorere ia bada. Nega momo lahi dekenai ia moru, bona nega momo ranu dekenai ia moru. ¹⁶ Oiemu diba tahua taudia dekenai lau mailaia, to idia be hanamoa dalana idia diba lasi.”

¹⁷ Iesu ia haere, ia gwau, “Abidadama lasi bona lalona auka taudia e! Lau be umui dekenai do lau noho ela bona edena negai? Do lau haheauka henia umui dekenai ia lao bona edena negai? Lau dekenai umui mailaia.” ¹⁸ Iesu ese lauma dika ia gwau henia. Vadaeni lauma dika ese mero ia rakatania, vadaeni nega tamona mero ia namo vadaeni.

¹⁹ Gabeai diba tahua taudia be Iesu dekenai idia lao, idia nanadaia hunia dala dekenai, idia gwau, “Badina dahaka ai be hegeregere lasi lauma dika ai lulua lao?”

²⁰ Iesu ia gwau, “Umui emui abidadama be maragimaragi dainai. Umui lau hamaoroa momokani, bema umui emui abidadama ena bada be mastadi uhena sibona bamona, inai ororo bema umui hereva henia, bema umui gwau, ‘Iniseni dekena amo oi lao unuseni,’ be do ia lao. Kara ibounai danu do umui karaia diba. ²¹ To gau inai bamona lulua lao, be dala ta lasi, guriguri bona aniani ania lasi ena kara sibona dekena amo.”

Iesu ese nega iharuana ia gwau do ia mase bona do ia toreisi lou

²² Idia be Galilea dekenai idia mai haboua neganai, Iesu ese ia hamaorodia, ia gwau, “Taunimanima ena Natuna be taunimanima ese do idia henia alaia taudia dekenai. ²³ Do idia alaia mase, to dina toi murinai do ia toreisi lou.”

Vadaeni diba tahua taudia edia lalona idia hisihisi bada.

Dubu Helaga dekenai takisi moni henia

²⁴ Idia be Kaperanauma dekenai idia ginidae, vadaeni Dubu Helaga ena moni gogoa taudia Petero dekenai idia lao, idia nanadaia, idia gwau, “Umui emui hadibaia tauna be Dubu Helaga ena moni ia henia o lasi?”

²⁵ Petero ese ia haere, ia gwau, “Ia henia.” Ruma dekenai idia daekau, vadaeni Iesu ese Petero ia nanadaia, ia gwau, “Simona e, oi be edena bamona oi laloe? Tanobada edia king ese takisi moni edia taunimanima korikori dekena amo do idia abia, o idau taudia dekena amo?”

²⁶ Petero ia gwau, “Idau taudia dekena amo.” Iesu ma ia gwau, “Unai dainai, king edia taunimanima korikori be do idia noho kava, takisi idia henia lasi. ²⁷ To edia lalona ita hametaua garina, gohu dekenai do oi lao, kimai ta oi negea diho. Kimai ia abia guna gwarume be do oi veria daekau. Iena uduna oi kehoa, bona lalonai siliva moni ta do oi davaria. Oi abia, vadaeni do oi henia idia dekenai, ita ruaosi totona.”

18

Guba ena Basileia lalonai daika do ia bada?

¹ Diba tahua taudia be Iesu dekenai idia lao, idia gwau, “Daika be Guba Basileia lalonai do ia bada herea?”

² Vadaeni Iesu ese mero maragi ta ia boiria, edia huanai ia haginia. ³ Ia gwau, “Umui lau hamaoroa momokani, bema umui emui lalona umui giroa lasi, bona memero maragi bamona do umui halaoa lasi, umui be Guba Basileia lalonai do umui raka vareai diba lasi. ⁴ Unai dainai, inai mero maragi bamona do ia manau tauna be Guba Basileia lalonai do ia bada herea. ⁵ Bona mero maragi inai bamona ta lauegu ladanai do ia abia dae tauna ese lau danu do ia abia dae.

Kara dikadia ese taunimanima edia abidadama idia hadikaia diba

⁶ “To inai bamona mero ta, lau dekenai ia abidadama, do ia hakererea tauna be, nadi badana ta iena aiona dekenai bema idia kwatua bona davara dekenai bema idia negea diho, vadaeni ia mase be namo. ⁷ Tanobada madi ia dika, kerere gaudia dainai! Badina be kerere do idia vara, to kerere ia havaraia tauna, madi do ia dika!

⁸ “Bema oiemu imana o oiemu aena ta oi dekenai kerere ia havaraia neganai, oi utua, oi negea momokani. Ia namo mai emu imana tamona, o mai emu aena tamona, mauri dekenai do oi vareai, ia namo lasi mai emu imana ruaosi, o mai emu aena ruaosi, do ia bodo lasi hanaihanai lahi dekenai oi do idia negea diho. ⁹ Oiemu matana ta oi dekenai kerere ia havaraia neganai, oi kokia, oi negea momokani. Ia namo, mai emu matana tamona mauri dekenai do oi vareai, ia namo lasi mai emu matana ruaosi danu, hel ena lahi dekenai oi do idia negea diho.

Parabole: Mamoe ia boio

¹⁰ “Umui naria namonamo, inai bamona mero maragi ta do umui ura lasi, o lulua garina. Badina be umui lau hamaoroa, guba dekenai inai maragidia idia naria anerudia be hanaihanai lauegu Tamana ena vairana idia itaia noho. ¹¹ Badina be Taunimanima ena Natuna be idia boio taudia hamauria totona ia mai.

¹² “Umui be dahaka umui laloo? Bema tau ta ena mamoe be 100, to tamona bema ia boio neganai, ia be 99 do ia rakatania lasi, ia boio gauna ororo dekenai do ia tahua lasi, a? ¹³ Do ia davaria neganai, umui lau hamaoroa momokani, do ia moale bada ia dekenai. To 99 idia boio lasi gaudia dekenai do ia moale bada lasi. ¹⁴ Unai bamona, emui Tamana guba dekenai ia noho, be ia ura lasi inai bamona maragina ta do ia mase.

Oiemu tadikaka ia kara dika neganai

¹⁵ “Oiemu tadikakana ese kara dikana bema ia karaia oi dekenai, do oi lao ia dekenai, iena kerere do oi hedinarai, umui ruaosi sibona do umui herevalaia. Bema oiemu hereva ia kamoni henia neganai, oi be oiemu tadikakana ena lalona oi hamaoromaoroa vadaeni. ¹⁶ To bema oiemu hereva ia kamoni lasi, tau ta, o tau rua danu do umui lao, vadaeni oiemu samani hereva do oi hamomokania inai taudia edia vairana dekenai. ¹⁷ To umui rua o umui toi emui hereva bema ia kamoni lasi neganai, ekalesia ena hebou dekenai do umui hamaoroa. Ekalesia hebou danu ena hereva bema ia kamoni lasi, oi dekenai idau bese tauna o takisi gogo tauna hegeregere do oi halaoa.

¹⁸ “Umui lau hamaoroa momokani, tanobada dekenai do umui taravatua gaudia ibounai be guba dekenai danu do idia taravatua, bona tanobada dekenai maoro do umui henia gaudia ibounai be guba dekenai danu maoro do idia henia.

¹⁹ “Umui lau hamaoroa momokani, bema tanobada dekenai umui rua emui laloo do idia tamona, vadaeni mai emui laloo tamona gau ta totona do umui noinoi hebou, egu Tamana guba dekenai ia noho ese unai bamona do ia karaia umui dekenai. ²⁰ Badina be bema lauegu ladanai

tau rua o toi idia hebou gabu ta dekenai, lau danu be idia dekenai lau noho.”

Parabole: Hesiai tauna ta ese abiatorehai ia gwauatao lasi

²¹ Petero be Iesu dekenai ia lao, ia gwau, “Lohiabada e, lauegu tadikakana do ia hadikaia lau dekenai, bona iena dika do lau gwauatao ela bona nega hida? Nega 7, o?”

²² Iesu ia gwau, “Umui lau hamaoroa, nega 7 sibona lasi, to nega 70 x 7.

²³ “Unai dainai Guba Basileia be hanua ta ena king bamona, iena hesiai taudia edia abiatorehai ia nanadaia idia dekenai. ²⁴ Iena henanadai ia hamatamaia neganai, tau ta idia hakaua vareai, iena abiatorehai be 1,000,000 kina. ²⁵ Iena moni ia hegeregere lasi dainai, iena biaguna ese ia hereva, ia bona iena adavana bona iena natuna do idia hoia, iena abiatorehai ena davana totona. ²⁶ Vadaeni unai hesiai tauna be biaguna ena vairanai iena kwarana ia atoa diho, ia noinoi mai goada danu, ia gwau, ‘Nega sisina do oi henia lau dekenai, vadaeni abiatorehai ena davana ibounai do lau henia lou oi dekenai.’ ²⁷ Vadaeni iena biaguna ese ia bogahisihisi ia dekenai, ia ruhaia, bona ena abiatorehai danu ia gwauatao.

²⁸ “To unai hesiai tauna ia raka murimuri dekenai, iena bamona hesiai tauna ta ia davaria, ia dekena amo guna, 5 kina ia abiatorehai. Vadaeni ia dogoatao, iena aiona dekenai ia gigia, ia gwau, ‘Lau dekenai moni oi abiatorehai ena davana oi henia lou lau dekenai.’

²⁹ “Vadaeni iena bamona be iena vairana dekenai ena kwarana ia atoa diho, ia noinoi, ia gwau, ‘Nega sisina do oi henia lau dekenai, vadaeni abiatorehai ena davana ibounai do lau henia lou oi dekenai.’ ³⁰ To ia be ia ura lasi, vadaeni dibura ruma dekenai ia doria vareai, unuseni do ia noho ela bona iena abiatorehai davana ibounai do ia haorea.

³¹ “Vadaeni unai hesiai tauna danu nega tamona idia gaukara taudia haida ese unai kara idia itaia neganai, edia lalona idia hisihisi bada, vadaeni edia biaguna dekenai idia lao, sivarai ibounai idia hamaoroa ia dekenai. ³² Vadaeni iena biaguna ese ia boiria, ia gwau, ‘Oi be hesiai tauna dikana, oi noinoi dainai oiemu abiatorehai ena davana ibounai lau gwauatao. ³³ Ia maoro lasi, a, bema oi bogahisihisi oiemu bamona dekenai, oi dekenai lau bogahisihisi bamona?’ ³⁴ Ena biaguna ia badu dikadika. Ia ese iena hesiai tauna dibura dekenai ia atoa vareai, do idia panisia ela bona iena abiatorehai davana do ia haorea.

³⁵ “Unai dainai, egu Tamana guba dekenai ia noho be unai bamona do ia karaia umui dekenai, bema umui ta ta emui kudouna dekenai emui tadikakana edia dika do umui gwauatao lasi neganai.”

19

Iesu ese hahine negea kara ia herevalaia

¹ Unai hereva ibounai ia hadokoa neganai Iesu ese Galilea ia rakatania, Iudea kahana dekenai ia lao, Ioridane Sinavai unai kahana dekenai. ² Taunimanima momo herea iena murina dekenai idia lao, vadaeni ia ese edia gorere ia hanamoia unuseni.

³ Vadaeni Farisea taudia haida ia dekenai idia lao, idia nanadaia koikoi dala dekenai, iena laloa tahua totona, idia gwau, “Tau ta ese iena adavana ia negea diba bema ia ura neganai, o bema mai badina?”

⁴ Iesu ia haere idia dekenai, ia gwau, “Be, Buka Helaga umui duahia lasi, a? Ia torea, ‘Hamatamaia nega ia karaia neganai, Dirava ese tau

bona hahine ia karaia, ⁵ bona ia gwau: Inai dainai tau be iena tamana sinana do ia rakatania, iena adavana dekenai do ia hakapua, vadaeni idia ruaosi be tamona idia noho.’ ⁶ Unai dainai idia be rua lasi, edia anina be tamona. Dirava ese ia hakapua taudia, be taunimanima ese do idia hapararaia lasi.”

⁷ Idia ma idia gwau, “Badina be dahaka Mose ena taravatu ia hereva, ia gwau, ‘Negea totona pepa do ia torea, hahine do ia henia, vadaeni do ia rakatania?’”

⁸ Iesu ia gwau, “Umui emui lalona idia auka dainai Mose ia hereva umui dekenai, ia gwau, ‘Umui emui adavana do umui rakatania.’ To hamatamaia neganai be unai bamona lasi. ⁹ To lau ese umui lau hamaoroa, bema iena adavana ia heudahanai lasi, to tau ta ese iena adavana ia rakatania, vadaeni hahine ta ma ia adavaia, unai tau be heudahanai tauna.”

¹⁰ Iesu ena diba tahua taudia ese idia hereva henia, idia gwau, “Bema headava ena dala be unai bamona, taunimanima idia headava lasi be namo.”

¹¹ Ia gwau, “Taunimanima ibounai ese inai hereva do idia abia dae diba lasi, Dirava ese ia durudia taudia sibona mo. ¹² Badina haida be edia sinana bogana dekena amo idia vara neganai idia headava hegeregere lasi. To haida be taunimanima ese idia ivaia dainai idia headava diba lasi. Bona haida be Guba Basileia totona idia sibona idia helaga, be do idia headava lasi. Inai hereva do ia abia dae diba tauna ese do ia abia dae.”

Iesu ese maragidia ia hanamoa

¹³ Haida ese edia natudia Iesu dekenai idia abia lao, iena imana edia kwarana latanai do ia atoa gwauraia, bona do ia guriguri idia dainai totona. To diba tahua taudia ese maragidia idia mailaia taudia idia gwau henidia. ¹⁴ To Iesu ia gwau, “Maragi ibounai lau dekenai idia mai be namo, umui lulua lasi. Badina be unai bamona maragidia be Guba Basileia taudia.”

¹⁵ Vadaeni iena imana idia edia kwarana dekenai ia atoa. Vadaeni unai gabu dekena amo ia raka siri.

Uhau tauna mai kohu momo danu

¹⁶ Tau ta Iesu dekenai ia lao, ia gwau, “Hadibaia tauna e, dahaka kara namona do lau karaia, mauri hanaihanai abia totona?”

¹⁷ Iesu ia haere, ia gwau, “Badina dahaka kara namo totona oi nanadaia lau dekenai? Tamona sibona ia namo vadaeni. Bema mauri oi ura neganai, taravatu do oi badinaia.”

¹⁸ Ia gwau, “Edena taravatu?” Iesu ia gwau, “Gaudia be inai: Oi alaia lasi, oi heudahanai lasi, oi henaia lasi, oi samania koikoi lasi. ¹⁹ Oiemu tamana oiemu sinana dekenai oi matauraia. Bona, oiemu badibadinai tauna dekenai oi lalokau henia, oi sibona dekenai oi lalokau henia bamona.”

²⁰ Unai uhau tauna ia gwau, “Unai ibounai be lau badinaia namonamo vadaeni, ma dahaka dohore lau karaia?”

²¹ Iesu ia haere, ia gwau, “Bema oi ura oi namo herea momokani, oiemu kohu oi lao hoia, ogoami taudia dekenai oi henia, guba ena kohu oi abia. Vadaeni lauegu murina dekenai oi raka mai.”

²² To unai uhau tauna be unai hereva ia kamoni, vadaeni mai lalohisihisi danu ia raka siri, badina ia be kohu momo tauna.

²³Vadaeni Iesu ese iena diba tahua taudia dekenai ia hereva, ia gwau, “Umui lau hamaoroa momokani, kohu momo tauna be Guba Basileia ena iduara dekenai vareai be do ia auka. ²⁴Ma umui lau hamaoroa, kamelo be nila ena matuna dekenai do ia vareai haraga, to kohu momo tauna be Dirava ena Basileia do ia vareai be mai hekwarahi danu.”

²⁵Iesu ena diba tahua taudia ese unai hereva idia kamona neganai, idia hoa dikadika, idia gwau, “Be, daika be mauri do ia davarua?”

²⁶Iesu ese idia dekenai ia itaia, ia gwau, “Taunimanima ese do idia karaia diba lasi, to Dirava ese gau ibounai be ia karaia diba.”

²⁷Vadaeni Petero ese ia hereva henia, ia gwau, “Ai be gau ibounai ai rakatania, vadaeni oiemu murina dekenai ai raka. Unai dainai ai be dahaka do ai abia?”

²⁸Iesu ese ia hamaorodia, ia gwau, “Umui lau hamaoroa momokani, lauegu murina dekenai umui raka taudia, be gau ibounai karaia mata-mata ena neganai, Taunimanima ena Natuna ena terona diaridiari dekenai do ia helai neganai, terona 12 dekenai do umui helai, Israela edia iduhu 12 dekenai dohore umui kota henia. ²⁹Ruma, o iena tadikakana, o iena taihuna, o iena tamana, o iena sinana, o iena adavana, o iena natuna, o tano, lau totona ia rakatanidia tauna ese unai do ia abia lou, ma momo herea momokani danu. Bona mauri hanaihanai danu do ia abia. ³⁰To idia guna taudia momo be do idia gabeai, bona idia gabeai taudia momo be do idia guna.

20

Gaukara taudia vain uma gabuna dekenai

¹“Badina be Guba Basileia be ruma biaguna ta bamona, dabai ia raka lao, gaukara taudia ia tahua, iena vain uma gabu dekenai idia gaukara totona. ²Vadaeni biaguna be idia danu idia hereva hebou, vadaeni ia ese idia dekenai ia gwauhamata, edia davana be dina ta kina tamona do ia henidia ia gwau. Vadaeni iena vain uma gabu dekenai idia ia siaia lao. ³Dabai 9 okaloka bamona ma ia raka murimuri dekenai, vadaeni tau ma haida be hoihoi gabu dekenai idia gini kava ia itadia. ⁴Vadaeni idia dekenai ia hereva, ia gwau, ‘Umui danu egu vain uma gabu dekenai umui lao, umui gaukara, vadaeni emui davana hegeregere do lau karaia.’ Vadaeni idia danu idia lao. ⁵Dina tubua kahana bona adorahi kahana ma ia raka murimuri dekenai, haida ma ia davarua, ia siaidia. ⁶Adorahi kahana ma 5 okaloka bamona ia raka murimuri dekenai, ma haida idia gini kava neganai, ia itadia. Vadaeni ia nanadaia idia dekenai, ia gwau, ‘Badina be dahaka iniseni umui gini kava ia mai bona dina be kahirakahira ia diho?’ ⁷Idia haere, idia gwau, ‘Badina be tau ta ese ia boiria lasi ai dekenai.’ Vadaeni ia hamaorodia, ia gwau, ‘Umui danu lauegu vain uma gabu dekenai umui lao.’

⁸“Dina ia diho, vadaeni uma gabu ena biaguna ese iena gaukara naria tauna dekenai ia hamaoroa, ia gwau, ‘Gaukara taudia dekenai oi boibo, gabeai taudia edia davana oi henia guna, to guna taudia be gabeai.’

⁹“Vadaeni adorahi 5 okaloka ia siaidia taudia idia daekau guna, kina ta ta idia abia. ¹⁰Vadaeni gaukara idia hamatamaia guna taudia idia daekau, idia laloe be idia edia davana do ia habadaia, to idia danu kina ta ta idia abia. ¹¹Edia davana idia abia neganai, idia ese uma gabu ena biaguna dekenai idia badu, ¹²idia gwau, ‘Gabeai taudia be inai, hora tamona sibona idia gaukara, to ai be dina ena siahu lalonai ai hekwarahi bada. Edena bamona idia edia davana bona aiemai davana be tamona?’

13 “To ia ese idia ta dekenai ia haere, ia gwau, “Turagu e, lau be lau hadikaia lasi oi. Ita ruaosi ita hereva oiemu davana be kina ta do oi abia, ani? 14 Oiemu davana oi abia, vadaeni oi lao. Lau ura be inai gabeai tauna do lau henia, oi dekenai lau henia hegeregerena. 15 Be, lauegu gau, vadaeni lauegu ura hegeregere do lau karaia lasi, a? Lau be mai hariharibada tauna, inai dainai oi badu, a?”

16 Ma Iesu ia gwau, “Inai dainai, gabeai taudia be do idia guna, to guna taudia be do idia gabeai.”

Iesu ese nega ihatoina iena mase ia herevalaia

17 Iesu be Ierusalema dala dekenai ia lao neganai, ia ese iena diba tahua taudia 12 ia hakaudia siri, ia hamaorodia, ia gwau, 18 “Ita be Ierusalema ita daekau inai. Taunimanima ena Natuna be do idia samania, dubu biagudia bona taravatu hadibaia taudia dekenai do idia henia. Vadaeni do idia kota henia, do idia gwau ia mase. 19 Idau bese taudia dekenai do idia henia, do idia kirikirilaia, do idia botai, do idia hasatauroa, to dina toi murinai do ia toreisi lou.”

Sinana ta ena noinoi

20 Vadaeni Sebedeo ena natuna edia sinana mai ena natuna danu, Iesu dekenai idia lao. Hahine ese ia tomadiho ia dekenai, gau ta ia noia.

21 Vadaeni Iesu ese ia nanadaia, ia gwau, “Dahaka oi ura?” Hahine ia gwau, “Mani oi hereva, lauegu natuna ruaosi inai, ta oiemu idiba kahanai, ta oiemu lauri kahanai do idia helai oiemu Basileia lalonai.”

22 To Iesu ia haere, ia gwau, “Umui noinoi gauna be umui diba lasi. Do lau inua kapusi be do umui inua diba, a?”

Idia ruaosi idia gwau, “Do ai inua diba.”

23 Iesu ma ia gwau, “Lauegu kapusi be do umui inua. To lauegu idiba kahanai bona lauegu lauri kahanai do idia helai taudia be lau ese do lau abia hidi lasi. Egu Tamana ese ia diba taudia dekenai do ia henidia.”

24 Diba tahua taudia haida idia kamoni, vadaeni tadikaka ruaosi dekenai idia badu. 25 To unai tau rua Iesu ia boiria mai ia dekenai, ia gwau, “Umui diba lohia taudia be mai sialu danu edia taunimanima idia biagua karaia, bona gunalaia taudia be do idia lohia edia taunimanima dekenai. 26 To umui be unai bamona do umui lalao lasi. Bema ta ia ura be do ia lohia gwauraia, ia be umui emui hesiai gaukara do ia karaia. 27 Bona bema ta ia ura be guna tauna, ia be umui emui hesiai tauna do umui halaoa. 28 Taunimanima ena Natuna bamona, ia mai lasi taunimanima ese iena hesiai gaukara do idia karaia totona, to ia be taunimanima edia hesiai gaukara karaia totona ia mai, bona iena mauri do ia atoa diho, taunimanima momo edia dika davana karaia totona.”

Matakepulu taudia rua Iesu ia hamauridia

29 Idia be Ieriko idia rakatania neganai, taunimanima momo be Iesu ena murina dekenai idia lao. 30 Matakepulu taudia rua be dala badinai idia helai, vadaeni Iesu ia raka hanaia ena sivarai idia kamonaia. Vadaeni idia boiboi, idia gwau, “Lohiabada e, Davida ena natuna e, oi bogahisihisi ai dekenai!”

31 Taunimanima momo ese idia gwau henia idia dekenai, do idia hereva lasi idia gwau. To idia be idia boiboi lou, idia gwau, “Lohiabada e, Davida ena natuna e, oi bogahisihisi ai dekenai!”

32 Iesu ia gini, vadaeni ia boiboi idia dekenai, ia gwau, “Dahaka umui ura lau karaia umui dekenai?”

³³ Idia gwau, “Lohiabada e, ai ura aiemai matana oi kehoa.”

³⁴ Vadaeni Iesu ese idia dekenai ia bogahisihisi, edia matana dekenai iena imana ia atoa, vadaeni nega tamona gau idia itaia diba. Vadaeni Iesu ena murina dekenai idia raka.

21

Ierusalem dekenai king bamona Iesu ia raka vareai

¹ Idia raka lao, Ierusalem idia kahirakahira, Betepage dekenai idia ginidae, Olive Ororo badibadinai. Vadaeni Iesu ese iena diba taudia rua ia siaia guna, ² idia ia hamaoroa, ia gwau, “Iseda vairana dekenai hanua ta ia noho. Umui lao unuseni, doniki ta au ta dekenai idia kwatua, mai ena natuna danu, do umui davaria, vadaeni idia umui ruhaia, umui mailaia iniseni. ³ To bema tau ta do ia nanadaia umui dekenai, do umui gwau, ‘Inai doniki be Lohiabada ia ura.’ Vadaeni do ia siaidia.”

⁴ Inai gauna be ia vara vadaeni, peroveta tauna ena hereva hamomokania totona, ia gwau:

⁵ “Siona ena natuna kekeni dekenai oi hamaoroa, ‘Oi itaia, oiemu Lohiabada be oi dekenai ia mai noho, dagedage lasi tauna, doniki ena doruna dekenai ia helai, doniki natuna ena latanai ia helai.’”

⁶ Idia ruaosi idia lao, Iesu ia hereva hegeregerena idia karaia. ⁷ Doniki mai ena natuna danu idia hakaua lao. Edia dabua doniki latanai idia atoa. Vadaeni, Iesu ia helai ia dekenai.

⁸ Vadaeni taunimanima momo herea ese edia dabua dala dekenai idia atoa, ma haida ese au rigidia idia utua, dala dekenai idia atoa. ⁹ Vadaeni taunimanima momo, Iesu vairanai idia raka taudia bona iena murinai idia raka taudia danu idia boiboi, idia gwau,

“Hosana, Davida ena natuna e!
Lohiabada ena ladanai ia mai noho tauna ita hanamoa.
Ataia momokani ia noho Dirava dekenai, hosana!”

¹⁰ Iesu be Ierusalem dekenai ia ginidae, vadaeni hanua taudia ibounai idia herevahereva momo, idia gwau, “Inai be daika?”

¹¹ Taunimanima idia haere, idia gwau, “Inai be Iesu, peroveta tauna, Nasareta Galilea dekena amo ia mai.”

Iesu ese hoihoi taudia ia luludia Dubu Helaga dekena amo

¹² Iesu ese Dubu Helaga ia raka vareai, vadaeni unuseni idia hoihoi taudia ibounai ia luludia murimuri dekenai. Moni idia senisia taudia edia pata, bona pune manu idia hoia taudia edia helai gaudia ia bubua. ¹³ Ia gwau henia idia dekenai, ia gwau, “Buka Helaga lalonai ia torea vadaeni, ‘Lauegu Ruma be guriguri Rumana do idia gwauraia.’ To umui ese henaia taudia edia ruma dekenai umui halaoa.”

¹⁴ Vadaeni matakepulu taudia bona aena dika taudia Dubu Helaga dekenai idia lao, Iesu dekenai, vadaeni ia ese idia ia hanamoa. ¹⁵ Dubu biagudia bona taravatu hadibaia taudia ese Iesu ena hoa karadia idia itaia, memero bona kekeni danu edia hereva idia kamoni, Dubu Helaga lalonai idia boiboi, idia gwau, “Hosana, Davida ena natuna ita hanamoa!” Vadaeni idia be badu dikadika.

16 Idia nanadaia Iesu dekenai, idia gwau, “Inai maragidia edia hereva oi kamonai, a?” Iesu ia gwau, “Oibe. Umui be nega ta Buka Helaga umui duahia lasi, a? ‘Natudia maragidia, rata idia inua memero, edia uduna dekenai Dirava idia hanamoamo namonamo.’”

17 Vadaeni Iesu ese idia ia rakatania, hanua badana dekena amo ia raka murimuri dekenai, Betania dekenai ia lao, unuseni ia noho unai hanuaboi lalonai.

Iesu ia hereva, vadaeni fig auna ia kakoro

18 Dabai, Iesu be Ierusalem dekenai ma ia giroa lou mai hitolo danu. 19 Ia ese fig auna ta dala badinai ia itaia, vadaeni au dekenai ia lao, to huahua ta ia davaria lasi, ena rauna sibona. Vadaeni Iesu ia gwau henia, ia gwau, “Huahua do oi atoa lasi, harihari ia lao bona hanaihanai.” Vadaeni nega tamona fig auna ia kakoro momokani.

20 Diba tahua taudia ese idia itaia, idia hoa dikadika, idia gwau, “Edena bamona inai fig auna be haraga momokani ia kakoro vadaeni?”

21 Iesu ia gwau, “Umui lau hamaoroa momokani, bema umui be mai abidadama, bona bema umui laloa daradara lasi, inai fig auna dekenai ia vara hegeregerena sibona do umui karaia lasi, to inai ororo danu bema umui hereva henia, bema umui gwau, ‘Do oi kokia. Davara dekenai do oi negea diho.’ Vadaeni unai bamona do ia karaia. 22 Gau ibounai guriguri dekenai do umui noinoi, mai emui abidadama danu, vadaeni do umui abia.”

Iesu ena siahu be daika ese ia henia?

23 Iesu be Dubu Helaga dekenai ma ia raka vareai, taunimanima ia hadibadia. Vadaeni dubu biagudia bona hanua tau badadia ia dekenai idia lao, idia nanadaia, idia gwau, “Edena siahu dekenai inai kara oi karaia, bona inai siahu be daika ia henia oi dekenai, a?”

24 Iesu ia haere idia dekenai ia gwau, “Lau danu lau nanadaia umui dekenai, do umui haere henia lau dekenai, vadaeni inai kara lau karaia ena siahu be do lau hamaoroa umui dekenai. 25 Ioane ena bapatiso be edeseni dekena amo? Guba dekena amo, o taunimanima dekena amo?”

Idia ese ta ta sibona dekenai idia hereva, idia gwau, “Bema ita gwau, ‘Guba dekena amo,’ do ia gwau, ‘To edena bamona umui kamoni lasi ia dekenai.’ 26 Bema ita gwau, ‘Taunimanima dekena amo,’ inai taunimanima momo dekenai do ita gari, badina be idia ibounai idia laloa Ioane be peroveta tauna?” 27 Unai dainai, Iesu dekenai idia haere, idia gwau, “Ai diba lasi.”

Vadaeni Iesu ia gwau, “Lau danu inai kara lau karaia ena siahu be do lau hamaoroa lasi umui dekenai.”

Tau ta mai ena natuna rua

28 “Dahaka umui laloa? Tau ta be mai ena natuna rua. Vadaeni ia ese iena vara guna natuna dekenai ia lao, ia gwau, ‘Egu natuna e, hari dina mani oi lao, lauegu vain uma gabu dekenai do oi gaukara.’ 29 Iena natuna ia haere, ia gwau, ‘Do lau lao lasi.’ To gabeai iena lalona ia giroa, vadaeni ia lao. 30 Gabeai ia vara tauna danu dekenai ia lao, unai bamona ma ia hamaoroa. Vadaeni mero ia haere, ia gwau, ‘Lohia e, do lau lao.’ To ia lao lasi. 31 Idia ruaosi, daika be edia tamana ena ura ia karaia?”

Idia gwau, “Guna ia vara natuna ese.”

Vadaeni Iesu ese idia ia hamaoroa, ia gwau, “Umui lau hamaoroa momokani, takisi gogoa taudia bona sihari kava hahine ese umui idia gungalai, Dirava ena Basileia do idia vareai guna. 32 Badina be Ioane

ia mai neganai dala maoromaoro ia hedinarai henia umui dekenai, to umui be umui kamonaia lasi ia dekenai. To takisi gogoia taudia bona sihari kava hahine ese idia kamonaia henia ia dekenai. Bona umui ese edia kamonaia umui itaia, to, emui lalona umui giroa lasi, umui kamonaia lasi Ioane dekenai.

Parabole: Uma gabu naria taudia dikadia

³³ “Parabole ma ta mani umui kamonaia: Uma biaguna ta ese vain uma gabu ia hadoa, ena magu ia karaia, vain huahua moia totona guri ia geia, bona kohoro rumana ia haginia, gima taudia edia. Unai murinaia biaguna ese iena uma gabu ia atoa vain bisinesia idia karaia taudia edia imana dekenai, vadaeni ia be hanua daudau dekenai ia lao. ³⁴ Vain uma ena huahua atoa nega ia kahirakahira neganai, biaguna ese iena hesiaia taudia uma gabu naria taudia dekenai ia siaidia lao, vain ena anina abia totona. ³⁵ To uma gabu naria taudia ese iena hesiaia taudia idia dogoatao, ta idia botaia, ma ta idia alaia mase, ma ta nadi dekenai idia hodoa. ³⁶ Ma idau hesiaia taudia momo ia ese ia siaidia lao, to inai kara hegeregere sibona idia karaia idia dekenai. ³⁷ Gabeai uma biaguna ese iena natuna ia siaia lao idia dekenai. Biaguna ia gwau, ‘Lauegu natuna do idia kamonaia henia.’ ³⁸ To uma gabu naria taudia ese idia itaia, vadaeni idia sibona dekenai idia hereva, idia gwau, ‘Iena natuna korikori be inai, do ita alaia mase, vadaeni uma gabu be do ita abia iseda.’ ³⁹ Vadaeni idia dogoatao, uma gabu murimuri dekenai idia veria lao, idia alaia mase.

⁴⁰ “To edena bamona? Unai uma gabu biaguna do ia mai neganai, uma gabu naria taudia dekenai be edena bamona do ia karaia?”

⁴¹ Idia haere, idia gwau, “Uma gabu naria taudia dikadia do ia alaia ore, uma gabu be idau taudia ma haida do ia henia, idia naria totona, vadaeni huahua atoa neganai, idia ese vain ena anina do idia henia ia dekenai.”

⁴² Iesu ma ia gwau, “Inai Buka Helaga ena revareva umui duahia lasi, a?”

“Ruma haginia taudia ese idia ura henia lasi nadi be, ruma ena kona nadi ia halaoa vadaeni. Inai be Lohiabada ena kara. Ita itaia, ita hoa.”

⁴³ “Unai dainai umui lau hamaoroa, Dirava ena Basileia be Dirava ese umui dekena amo do ia abia siri, bona Basileia ena huahua do ia havaraia besena dekenai do ia henia. ⁴⁴ Unai nadi ena latanaia do ia moru tauna, be do ia makohia maragimaragi. Bona unai nadi ese bema tau ta ena latanaia do ia moru, unai tau be do ia patapata momokani, kahu bamona.”

⁴⁵ Dubu biagudia bona Farisea taudia ese Iesu ena parabole idia kamonaia, vadaeni idia diba iena hereva be idia edia kara ia ese ia hedinarai. ⁴⁶ Vadaeni idia ura be idia dogoatao, to unai taunimanima momo dekenai idia gari, badina be taunimanima idia lalao Iesu be peroveta tauna ta.

22

Parabole: Headava aria

¹ Iesu ese parabole dekena amo ma ia hereva lou idia dekenai, ia gwau,

² “Guba Basileia be king ta ena kara bamona, iena natuna ena headava aria ia karaia. ³ Taunimanima momo ia boiridia do idia mai headava

aria dekenai. Aria ia hegaegae neganai, king ese hesiai taudia ia siaidia, ia boiria taudia do idia hakaua mai totona. To idia ura lasi, vadaeni aria dekenai idia mai lasi. ⁴ Vadaeni iena hesiai taudia haida ma ia siaidia lou, ia gwau, ‘Lauegu boiboio dekenai do idia mai taudia umui hamaoroa: Aniani lau atoa hegaegae vadaeni, egu boromakau bona egu ubua gaudia lau alaia vadaeni. Gau ibounai idia hegaegae vadaeni. Headava ena aria totona umui mai.’

⁵ “To ma idia be idia ura lasi, ta be iena uma gabu dekenai ia lao, ta be ia lao hoihoi. ⁶ To haida ese hesiai taudia idia dogoatao, idia botai kava, vadaeni idia aladia mase. ⁷ King ia kamoni, vadaeni ia badu dikadika. Iena tuari taudia ia siaidia lao, unai ala-ala taudia idia hamasea ore, bona edia hanua danu idia gabua ore. ⁸ Vadaeni ia ese iena hesiai taudia dekenai ia hamaoroa, ia gwau, ‘Headava aria ena aniani idia hegaegae vadaeni, to lau boiria taudia be idia hegeregere lasi. ⁹ Unai dainai, dala badadia dekenai umui lao, umui davarua taudia do umui hamaoroa, headava aria totona do idia mai.’ ¹⁰ Vadaeni iena hesiai taudia be dala badadia dekenai idia lao, idia davarua taudia ibounai, dikadia bona namodia, idia haboua, vadaeni idia hakaua lao, aria gabuna be ia honu.

¹¹ “King ese vadivadi taudia itaia totona ia raka vareai, bona headava dabua ia karaia lasi tauna ta unuseni ia itaia. ¹² Ia nanadaia, ia gwau, ‘Turagu e, edena bamona oi raka vareai iniseni, oi be headava dabua lasi?’ To unai tau be ia hereva lasi. ¹³ Vadaeni king ese iena hesiai taudia dekenai ia hamaoroa, ia gwau, ‘Unai tau ena aena bona iena imana umui kwatua, bona umui doria lao murimuri dekenai mai dibura danu, unuseni do ia tai, bona iena isena do ia koria auka masemase.’

¹⁴ “Badina be taunimanima momo be Dirava ese ia boiria, to momo lasi sibona ia abia hidi.”

Iesu idia nanadaia, takisi idia henia Kaisara dekenai, o lasi

¹⁵ Vadaeni Farisea taudia be idia sibona idia herevahereva, Iesu ena hereva dekena amo edena bamona do idia hakerere, vadaeni do idia guia. ¹⁶ Vadaeni edia diba tahua taudia, Heroda ena ore taudia danu, Iesu dekenai idia siaidia lao, idia gwau, “Hadibaia tauna e, ai diba oi be momokani tauna, Dirava ena dala oi hadibaia mai momokani danu, tau ta dekenai oi gari lasi, badina be taunimanima edia lalao dekenai oi lalao momo lasi. ¹⁷ Inai dainai, mani oi hamaoroa ai dekenai, edena bamona oi lalao? Kaisara dekenai takisi moni henia be ia maoro o lasi?”

¹⁸ To Iesu be edia dika ia diba, vadaeni ia gwau, “Koikoi taudia e, dahaka dainai umui hereva lau dekenai mai lalao koikoi danu? ¹⁹ Takisi monina ta umui mailaia, lau itaia.”

Vadaeni Roma edia moni ta idia henia. ²⁰ Ia nanadaia idia dekenai, ia gwau, “Inai be daika ena laulau bona daika ena revareva?” Idia gwau, “Kaisara.”

²¹ Vadaeni idia dekenai ia hamaoroa, ia gwau, “Kaisara ena gau, Kaisara dekenai umui henia, to Dirava ena gau be Dirava dekenai umui henia.”

²² Inai hereva idia kamoni neganai idia hoa, vadaeni idia rakatania, idau gabu dekenai idia lao.

Toreisi lou ena hereva

²³ Unai dina dekenai danu, Sadukea taudia haida Iesu dekenai idia lao, unai ore taudia idia lalao be mase taudia do idia toreisi lou lasi. Vadaeni idia ese Iesu dekenai idia nanadaia, idia gwau, ²⁴ “Hadibaia tauna e, Mose ia gwau, ‘Tau ta bema ia mase, to mai ena natuna lasi, iena vabu be

iena nakimi ese do ia adavaia, natuna do ia havaraia, mase tauna ena.’
²⁵ Guna, aiemai huana dekenai, tadikaka ibounai be 7, vara guna tauna ia headava, vadaeni ia mase. Ia be natuna lasi dainai, inai vabu be mase tauna ena tadina ese ma ia adavaia. ²⁶ Ma namba 2 ia lao bona namba 7 ese unai bamona sibona idia karaia. ²⁷ Idia ibounai idia mase. Dokona neganai hahine danu ia mase. ²⁸ To, toreisi lou neganai, inai hahine be daika ena adavana? Badina be tatau 7 idia adavaia.”

²⁹ Iesu ia haere idia dekenai, ia gwau, “Umui be umui lalao kererekerere, badina be Buka Helaga umui diba lasi, bona Dirava ena siahu umui diba lasi. ³⁰ Badina be toreisi lou neganai headava be lasi. Idia be Dirava ena aneru guba dekenai bamona.

³¹ “To mase dekena amo toreisi lou herevana be Dirava ese ia hereva umui dekenai be umui duahia lasi, a? Ia gwau, ³² ‘Lau be Aberahamo ena Dirava, Isako ena Dirava, Iakobo ena Dirava.’ Ia be mase taudia edia Dirava lasi, to mauri taudia edia.”

³³ Taunimanima momo idia kamoni, vadaeni idia hoa Iesu ena hadibaia hereva dekenai.

Taravatu badana be lalokau

³⁴ Farisea taudia idia kamoni Iesu ese Sadukea taudia edia hereva ia koua vadaeni, vadaeni idia haboua, ia dekenai nanadaia totona. ³⁵ Idia edia huanai be taravatu hadibaia tauna ta, vadaeni ia ese Iesu dekenai koikoi dala dekenai ia nanadaia, hakererea totona, ia gwau, ³⁶ “Hadibaia tauna e, taravatu dekenai, edena hereva be ia bada herea momokani?”

³⁷ Iesu ia haere henia, ia gwau, “‘Lohiabada oiemu Dirava dekenai do oi lalokau henia mai emu lalona ibounai, mai emu lauma ibounai, mai emu kudouna ibounai.’ ³⁸ Inai be taravatu bada herea momokani. Ia be ginigunana. ³⁹ Iharuana be inai, ginigunana hegeregere, ‘Oiemu badibadinai tauna dekenai oi lalokau henia, oi sibona oi lalokau henia bamona.’ ⁴⁰ Inai hereva ruaosi be taravatu bona peroveta taudia edia hereva ibounai edia anina idia haboua.”

Iesu ese Farisea taudia edia hereva ia koua

⁴¹ Farisea taudia ma idia haboua, vadaeni Iesu ese ia nanadaia idia dekenai, ⁴² ia gwau, “Umui ese Keriso be edena bamona umui lalao, ia be daika ena natuna?”

Idia gwau, “Davida ena natuna.”

⁴³ Ma Iesu ia gwau, “Edena bamona Davida be Lauma ese ia abia neganai, ‘Lohiabada’ ia gwauraia, badina Davida ia gwau,

⁴⁴ “‘Lohiabada ese egu Lohiabada dekenai ia hamaoroa, ia gwau: Lauegu imana idiba kahana dekenai do oi helai, ela bona oi dekenai idia tuari henia taudia ibounai, be oiemu aena henunai gaudia dekenai do lau halaoa.’

⁴⁵ “To bema Davida ese Keriso ia gwauraia ‘Lohiabada,’ edena bamona Keriso be Davida ena natuna sibona?”

⁴⁶ Idia ibounai be ta ese ia haere diba lasi Iesu dekenai. Unai dainai, unai dina murinai, Iesu dekenai nanadaia be idia gari, bona idia nanadaia lou lasi.

23

Taravatu hadibaia taudia bona Farisea taudia Iesu ese ia gwau henidia

¹ Iesu ese taunimanima momo bona iena diba tahua taudia dekenai ia hereva henia, ² ia gwau, “Taravatu hadibaia taudia bona Farisea taudia

be Mose ena taravatu anina idia gwauraia noho. ³ Unai dainai, do idia hereva henia gaudia be do umui badinaia, bona do umui karaia. To idia karaia bamona do umui karaia lasi. Badina be idia hereva, to idia karaia lasi. ⁴ Badina be idia ese huaia gaudia mai metau danu idia kwatua, taunimanima edia latanai idia atoa, to edia imana kwakikwakina sibona dekenai amo durua sisina idia henia lasi. ⁵ Edia kara idia karaia, be taunimanima ese do idia itaia totona. Edia kwarana bona imana dekenai idia kwatua taravatu helaga ena guriguri pepadia idia habadaia, edia dabua danu idia halataia. ⁶ Idia ura aria neganai be gabu namo herea dekenai idia helai, bona dubu dekenai helai gaudia namodia sibona dekenai do idia helai. ⁷ Idia ura danu hoihoi gabu dekenai taunimanima ese do idia hanamodia, idia be ‘Hadibaia Taudia’ do idia gwauraia.

⁸ “To taunimanima ese umui do idia gwauraia lasi ‘Hadibaia Tauna.’ Badina be umui emui Hadibaia Tauna be tamona sibona, bona umui ibounai be tadikaka. ⁹ Bona tanobada dekenai tau ta do umui gwauraia lasi emui ‘Tamana,’ badina be emui Tamana be tamona sibona, ia be guba dekenai ia noho. ¹⁰ Bona umui be ‘Hakaua Taudia’ do idia gwauraia lasi, badina be emui Hakaua Tauna be tamona sibona, Keriso inai. ¹¹ Umui emui huanai bema tau ta ia ura ia be badana, ia be umui emui hesiai gaukara do ia karaia. ¹² Sibona ena ladana ia habadaia tauna ese ladana maragina do ia abia. To sibona ia hamanaua tauna ese ladana badana do ia abia.”

Iesu ese Farisea bona taravatu hadibaia taudia edia koikoi ia gwauraia

¹³ “Taravatu hadibaia taudia bona Farisea taudia, kara koikoi taudia, dika do umui davarua momokani! Badina Guba Basileia ena iduara be taunimanima edia vairana dekenai umui koua. Umui be do umui raka vareai diba lasi, bona do idia raka vareai gwauraia taudia be umui ese umui koua.

¹⁴ “Taravatu hadibaia taudia bona Farisea taudia, kara koikoi taudia, dika do umui davarua momokani! Badina be vabu taudia edia ruma dekenai amo kohu umui henaia haorea. Vadaeni emui dika hunia totona, umui ese guriguri latadia umui gwauraia. Unai dainai emui davana be do ia metau.

¹⁵ “Taravatu hadibaia taudia bona Farisea taudia, kara koikoi taudia, dika do umui davarua momokani! Badina be davara bona tanobada umui hanaia, lalona giroa tauna tamona sibona do umui abia totona. Umui abia, vadaeni ia be hel ena natuna umui halaoa, vadaeni ia ese umui emui dika ia hanaia momokani.

¹⁶ “Hakaua taudia emui matana idia kepulu, dika do umui davarua momokani! Umui gwau Dubu Helaga ena ladanai do ia gwauhamata tauna ena gwauhamata be anina lasi, to Dubu Helaga ena golo ena ladanai do ia gwauhamata tauna ese iena gwauhamata do ia badinaia.

¹⁷ Kavakava bona matakepulu taudia e, edena be ia bada? Golo ia bada, a? O sedira Dubu Helaga, ia ese golo ia hahelagaia be ia bada?

¹⁸ Ma umui gwau pata helaga ena ladanai ia gwauhamata tauna ena gwauhamata be anina lasi, to pata latanai boubou gauna ia noho ena ladanai ia gwauhamata tauna ese ena gwauhamata do ia badinaia.

¹⁹ Matakepulu taudia e, edena be ia bada? Boubou gauna ia bada, a? O sedira pata helaga, ia ese boubou gauna ia hahelagaia be ia bada?

²⁰ Unai dainai, pata helaga ena ladanai ia gwauhamata tauna ese pata helaga bona pata helaga latanai idia noho gaudia ibounai edia ladanai ia gwauhamata. ²¹ Bona Dubu Helaga ena ladanai ia gwauhamata

tauna ese Dubu Helaga bona Dubu Helaga lalonai ia noho Diravana edia ladanai ia gwauhamata. ²² Bona guba ena ladanai ia gwauhamata tauna ese Dirava ena terona bona terona latanai ia helai Diravana edia ladanai ia gwauhamata.

²³ “Taravatu hadibaia taudia bona Farisea taudia, kara koikoi taudia, dika do umui davaria momokani! Badina be aniani edia ava maragimaragi ibounai dekenai umui haria be kahana 10 umui karaia, kahana ta be boubou gauna dekenai umui halaoa. To taravatu ena hereva badadia, kota henia, bona bogahisihisi, bona abidadama, umui negea. Bema umui badinaia, bona kara namodia haida danu bema umui badinaia be ia namo. ²⁴ Hakaua taudia e, emui matadia idia kepulu! Vasiahu dekena amo dimairi umui negea, to kamelo be umui hadonoa noho!

²⁵ “Taravatu hadibaia taudia bona Farisea taudia, kara koikoi taudia, dika do umui davaria momokani! Badina be umui ese kapusi bona mereki edia murina kahana sibona umui huria goevagoeva, to edia lalona kahana be dadia kara bona lebulebu kara dekenai idia honu momokani. ²⁶ Farisea taudia e, emui matana idia kepulu! Kapusi ena lalona kahana do umui hagevaia guna, vadaeni ena murina kahana danu do ia goeva.

²⁷ “Taravatu hadibaia taudia bona Farisea taudia, kara koikoi taudia, dika do umui davaria momokani! Badina umui be mase guria gabudia, peni dekena amo idia hakurokuroa bamona, edia murimuri kahana itaia neganai be idia namo, to edia lalonai be mase edia turiana bona miro ibounai idia honu momokani. ²⁸ Unai bamona danu taunimanima ese umui idia itaia be kara maoromaoro taudia bamona, to emui lalona be koikoi bona kerere idia honu momokani vadaeni.”

Iesu ese Farisea taudia edia kerere davana ia gwauraia

²⁹ “Taravatu hadibaia taudia bona Farisea taudia, kara koikoi taudia, dika do umui davaria momokani! Badina be peroveta taudia idia guria gabudia dekenai umui laloa momo, bona kara maoromaoro taudia dekenai laloatao nadi mai hairai danu umui karaia. ³⁰ Umui gwau, ‘Aiemai sene taudia edia nega dekenai bema ai vara, peroveta taudia idia alaia dekenai durua do ai henia lasi.’ ³¹ Unai hereva dekena amo, umui sibona umui gwau, umui be peroveta taudia idia alaia taudia edia natuna. ³² Umui emui sene taudia edia dika umui karaia haorea noho inai. ³³ Gaigai e! Korua gaigai edia natuna! Dirava ena Kota Badana dekena amo hel ena panisi edena bamona do umui heau mauri diba?

³⁴ “Inai dainai lau ese peroveta taudia bona aonega taudia bona Buka Helaga hadibaia taudia do lau siaia umui dekenai. Vadaeni haida be do umui alaia mase, oibe, haida do umui hasatauroa. Ma haida be dubu lalonai do umui botai, bona do umui lulua, hanua ta dekena amo ia lao ma hanua ta. ³⁵ Unai dainai, kara maoromaoro taudia edia rarana ibounai, tanobada dekenai idia habubua, ena davana be umui emui latanai. Abela, kara maoromaoro tauna ena rarana, ia mai bona Sekaraia Berakaia ena rarana, ia be Dubu Helaga bona pata helaga edia huanai umui alaia mase. ³⁶ Umui lau hamaoroa momokani, inai kerere ibounai edia davana be inai nega ena taunimanima ese do idia davaria!

Iesu ese Ierusalem totona ia tai

³⁷ “Ierusalem e! Ierusalem e! Peroveta taudia oi alaia mase, bona oi dekenai Dirava ese ia siaia taudia be nadi dekenai oi hodoa. Nega momo lau ura oiemu natuna lau haboua, kokoroku hahine ese iena natuna iena

hanina dekenai ia koua bamona, to oi ura lasi! ³⁸ Inai, umui emui ruma be do ia noho kava anina lasi. ³⁹ Badina be umui lau hamaoroa, lau do umui itaia lou lasi, ela bona do umui gwau, 'Lohiabada ena ladana dekenai ia mai noho tauna ita hanamoa.'"

24

Iesu ia gwau Dubu Helaga do idia hadikaia ore

¹ Iesu be Dubu Helaga dekenai amo ia raka murimuri dekenai. Vadaeni iena diba tahua taudia ia dekenai idia lao. Idia ura be Iesu idia hakaua lao, Dubu Helaga ena ruma idauidau idia hedinarai henia totona. ² Iesu ia hereva idia dekenai, ia gwau, "Inai hairai gaudia umui itaia, a? Umui lau hamaoroa momokani, nadi ta be nadi ta latanai do ia noho lasi, ibounai do idia moru diho."

Iesu ese do idia vara nega dikadia ia gwauraia

³ Iesu be Olive Ororo dekenai ia helai, vadaeni iena diba tahua taudia ia dekenai idia lao, hunia dala dekenai idia hereva henia, idia gwau, "Mani oi hamaoroa ai dekenai, oiemu hereva gauna edena negai do idia vara? Do oi giroa mai, bona tanobada dokona danu, ena toana be dahaka?"

⁴ Iesu ia haere idia dekenai, ia gwau, "Umui naria namonamo, tau ta ese umui do ia hakaua kerere garina. ⁵ Badina be taunimanima momo lauegu ladanai do idia mai, do idia gwau, 'Lau inai Keriso,' vadaeni taunimanima momo do idia hakaua kerere. ⁶ To umui be tuari ena regena, bona tuari ena sivarai do umui kamonai neganai, do umui lalao daradara lasi. Inai gaudia be do idia vara guna, to dokona be do vaira neganai. ⁷ Badina be bese ta ese do ia toreisi, bese ta do ia tuari henia. Bona basileia ta ese do ia toreisi, basileia ta do ia tuari henia. Gabu idauidau dekenai hitolo bada do ia vara, tano danu do ia mareremarere. ⁸ To unai be hisihisi nega ena hamatamaia sibona, natuna havaraia ena hisihisi bamona.

⁹ "Unai neganai umui emui mase totona hereva do idia atoa, do idia hadikaia umui, do idia alai mase umui. Lauegu ladana dainai bese ibounai ese umui do idia badu henia. ¹⁰ Vadaeni taunimanima momo edia abidadama do idia rakatania, vadaeni idia ta ta ese ta ta do idia samania, bona idia ta ta ese ta ta do idia badu henia. ¹¹ Peroveta koikoi taudia momo danu do idia toreisi, taunimanima momo do idia hakaua kerere. ¹² Kara dikadia danu do idia vara gabu idauidau dekenai, vadaeni taunimanima momo edia lalokau be do ia keru. ¹³ To iena lalona do ia goada noho ela bona dokona, unai tauna be do ia mauri. ¹⁴ Basileia ena Sivarai Namona be tanobada ibounai dekenai do idia harorolaia. Vadaeni unai murinai, dokona be do ia ginidae."

Gau dika rohorohona do ia vara

¹⁵ Ma Iesu ia hereva, ia gwau, "Peroveta tauna Daniela ese guna ia gwauraia, gau dika rohorohona, gabu ia hadikaia gauna, Dubu Helaga ena lalonai ia gini dohore umui itaia." (Duahia taudia e, inai hereva ena anina do umui lalao namonamo.) ¹⁶ "Unai neganai Iudea dekenai idia noho taudia be ororo dekenai do idia heau lao. ¹⁷ Bona ruma ena atai dekenai ia helai noho tauna be ruma lalonai do ia raka vareai lasi iena kohu abia totona. ¹⁸ Bona uma dekenai ia gaukara noho tauna danu ese iena dabua abia totona do ia giroa lao lasi. ¹⁹ Unai neganai rogorogo hahine bona natuna maragi idia rata henia hahine be madi do idia dika. ²⁰ Do umui guriguri, keru neganai, o Sabati Dina neganai be do

umui heau lasi. ²¹ Badina be unai dinadia lalonai hisihisi bada herea do idia vara, Dirava ese tanobada ia karaia nega dekena amo hisihisi unai bamona idia vara lasi ia mai bona harihari, gabeai danu unai bamona ta do ia vara lou lasi. ²² Bema Dirava ese unai nega do ia hakwadogia lasi, taunimanima ta be do ia mauri diba lasi. To ia abia hidi taudia dekenai ia laloa dainai, unai nega do ia hakwadogia.

²³ “Unai neganai tau ta do ia gwau, ‘Oi itaia, Keriso be inai,’ o, ‘Keriso be unai.’ To do umui kamona henia lasi. ²⁴ Badina be Keriso koikoi taudia bona peroveta koikoi taudia do idia toreisi, toa bona hoa gaudia do idia hedinarai. Inai bamona do idia karaia, Dirava ia abia hidi taudia do idia hakaua kerere totona, bema mai dalana. ²⁵ Do umui laloaboio lasi, umui lau hamaoroa guna inai.

²⁶ “Unai dainai, bema umui dekenai do idia hamaoroa, do idia gwau, ‘Umui itaia, ia be taunimanima idia noho lasi tano dekenai ia noho,’ to do umui lao lasi. O do idia gwau, ‘Umui itaia, ia be ruma lalonai ia noho,’ to do umui kamona lasi. ²⁷ Kevaru bamona, guba dekenai ia diari haraga bamona, guba ena dina daekau kahana ia lao bona dina diho kahana, unai bamona danu Taunimanima ena Natuna be do ia mai.

²⁸ “Mase edia taunina idia noho gabuna dekenai, ugava manudia do idia haboua unuseni.

Taunimanima ena Natuna do ia mai

²⁹ “Unai nega dikana do ia ore, vadaeni maoromaoro dina be do ia dibura, hua danu do ia diari lasi, hisiu guba dekena amo do idia moru, bona guba dekenai idia noho siahu gaudia do idia mareremarere. ³⁰ Vadaeni Taunimanima ena Natuna ena toana guba dekenai do ia hedinarai. Unai neganai tanobada ena bese ibounai do idia tai, badina be Taunimanima ena Natuna do idia itaia, guba ena ori latana do ia mai, mai ena siahu bada, bona mai ena hairai danu. ³¹ Vadaeni ia ese iena aneru do ia siaia lao, mai kibi ena regena bada danu, iena abia hidi taudia do ia haboua mai totona. Aneru ese unai taudia do idia abia mai, lai edia gabu 4 dekena amo, tanobada ena kahana ibounai dekena amo.”

Fig auna ena toana amo nega do umui diba

³² “Fig auna dekena amo inai parabole do umui diba: Au ena riginia ese ranu ia abia, bona ena raurau matamata idia kehoa neganai, umui diba vadaeni lai be dina diho kahana dekena amo kahirakahira do ia mai. ³³ Inai dainai, umui danu ese inai gau ibounai idia vara do umui itaia neganai, do umui diba Taunimanima ena Natuna be ia kahirakahira vadaeni, iduara dekenai ia noho. ³⁴ Umui lau hamaoroa momokani, inai nega idia noho taudia do idia mase ore lasi neganai, be inai gaudia ibounai do idia vara momokani. ³⁵ Guba bona tanobada do idia boio, to lauegu hereva be do ia boio lasi.”

Dina bona hora be tau ta ia diba lasi

³⁶ “Unai dina, unai hora gauna, ta ia diba lasi, guba aneru danu idia diba lasi, Taunimanima ena Natuna ia diba lasi, to Tamana sibona ia diba. ³⁷ Noa ena nega bamona, Taunimanima ena Natuna do ia mai neganai, be unai bamona gaudia do idia vara. ³⁸ Badina be unai neganai, abata badana do ia ginidae lasi neganai, idia aniani noho, idia inuino noho, idia headava noho, ia mai bona Noa be lagatoi dekenai ia guia dinana. ³⁹ Taunimanima ese idia laloa lasi dahaka do ia vara, idia kara dika noho, ia mai bona abata badana ia ginidae, vadaeni abata ranu ese ibounai ia abia lao. Taunimanima ena Natuna do ia mai neganai danu

unai bamona do ia vara. ⁴⁰ Unai neganai tau rua uma dekenai do idia noho, ta be do ia kokia, ta be do ia noho. ⁴¹ Hahine rua ese uiti do idia gaukaralaia noho, paraoa karaia totona. Ta be do ia kokia, ta be do ia noho. ⁴² Unai dainai do umui naria, badina be umui emui Lohiabada do ia mai negana be umui diba lasi. ⁴³ Inai do umui laloatao! Ruma biaguna bema ia diba guna edena hora dekenai henaoga tauna do ia mai, ia be do ia naria, iena ruma do ia makohia lasi. ⁴⁴ Unai dainai, do umui hegaegae, badina be Taunimanima ena Natuna do ia mai ena hora be umui diba lasi.

Hesiai tauna namona bona hesiai tauna dikana

⁴⁵ “Hesiai tauna mai ena kamona, bona mai ena kara maoromaoro, iena biaguna ese ia abia hidi, iena ruma do ia naria, bona biaguna ena natuna edia aniani neganai edia aniani do ia henia, tauna be daika? ⁴⁶ Iena biaguna do ia mai neganai do ia davaria, unai bamona ia karaia noho tauna be ia namo. ⁴⁷ Umui lau hamaoroa momokani, iena kuhu ibounai naria tauna iena biaguna ese do ia halaoa. ⁴⁸ To hesiai tauna dikana ena lalona dekenai do ia lalao, do ia gwau, ‘Lauegu biaguna be do ia giroa mai haraga lasi.’ ⁴⁹ Vadaeni ia ese iena hesiai taudia haida do ia botaia, muramura inua kekeru taudia danu do ia aniani noho, do ia inuino noho. ⁵⁰ Unai hesiai tauna be ia lalao lasi dinana dekenai, bona hora ta ia diba lasi neganai, iena biaguna do ia ginidae. ⁵¹ Biaguna ese kaia dekena amo unai tau do ia utua kahana maragimaragi, bona koikoi taudia danu, edia panisia gabu dekenai do ia siaia, vadaeni unuseni do idia tai, edia isena do idia koria auka masemase.

25

Parabole: Kekenai mai aonega, bona kekenai mai kavakava

¹ “Unai neganai Guba Basileia be kekeni 10 bamona, edia lamepa idia abia lao, headava matamata tauna danu idia hedavari gwaurai. ² Kekeni 5 be mai kavakava, to kekeni 5 be mai aonega. ³ Badina be kekeni mai kavakava ese edia lamepa idia abia neganai, be oela idia abia lao lasi. ⁴ To kekeni mai aonega ese edia lamepa idia abia lao mai oela danu. ⁵ Headava matamata tauna ia mai haraga lasi dainai, edia matana idia metau, vadaeni ibounai idia mahuta.

⁶ “Hanuaboi huanai tau ta ia boiboi, ia gwau, ‘Headava matamata tauna ia mai inai, umui raka mai, ia danu umui hedavari.’ ⁷ Vadaeni inai kekeni ibounai idia toresi, edia lamepa idia karaia hegaegae. ⁸ Kekeni mai kavakava ese kekeni mai aonega dekenai idia noinoi henia, idia gwau, ‘Emui oela haida umui henia ai dekenai, badina aiemai lamepa be kahirakahira idia bodo.’ ⁹ To aonega kekeni idia haere, idia gwau, ‘Lasi, ai bona umui be do ita hegeregere lasi garina. Namona be inai, sitoa dekenai umui lao, umui sibona emui oela do umui hoia.’ ¹⁰ Hoihoi totona idia lao noho neganai, headava matamata tauna ia ginidae, vadaeni idia hegaegae noho kekeni be ia danu headava ena aria dekenai idia raka vareai, vadaeni iduara idia koua.

¹¹ “Gabeai kekeni haida idia mai, idia gwau, ‘Lohia e, lohia e, ai dekenai iduara oi kehoa.’ ¹² To ia haere idia dekenai, ia gwau, ‘Umui lau hamaoroa momokani, lau be lau diba lasi umui.’

¹³ “Unai dainai, do umui naria namonamo noho. Badina dina bona hora be umui diba lasi.”

Parabole: Hesiai taudia toiosi ese moni idia naria karaia

¹⁴ “Inai bamona: Tau ta gabu daudau dekenai ia lao gwaauraia, vadaeni iena hesiai taudia ia dekenai ia boiria, iena kohu ia henia idia dekenai. ¹⁵ Vadaeni ia ese ta dekenai 5000 kina ia henia, ma ta dekenai 2000 kina ia henia, ma ta dekenai 1000 kina ia henia, idia ta ta edia diba hegeregereana. Vadaeni ia lao gabu daudau dekenai. ¹⁶ Vadaeni 5000 kina ia abia tauna be ia lao, ia hoihoilaia, 5000 kina ma ia abia. ¹⁷ Inai bamona danu, 2000 kina ia abia tauna be ia lao, 2000 kina ma ia abia. ¹⁸ To 1000 kina ia abia tauna be ia lao, tano ia geia, biaguna ena moni ia guria.

¹⁹ “Nega daudau ia lao, vadaeni unai hesiai taudia edia biaguna ia giroa mai, bona idia dekenai ia nanadaia edena bamona ena moni idia naria. ²⁰ Vadaeni 5000 kina ia abia tauna ia mai, 5000 kina ma ia mailaia, ia gwau, ‘Lohia e, 5000 kina oi henia lau dekenai. Oi itaia, inai 5000 kina haida ma lau davarua.’ ²¹ Iena biaguna ia haere, ia gwau, ‘Namo herea! Oi be hesiai tauna namona, kara maoromaoro tauna. Gau momo lasi oi naria namonamo dainai, gau momo edia biaguna do lau halaoa oi. Oi mai, oiemu biaguna danu do ita moale hebou.’

²² “Vadaeni 2000 kina ia abia tauna danu ma ia mai, ia gwau, ‘Lohia e, 2000 kina oi henia lau dekenai. Oi itaia, inai 2000 kina haida ma lau davarua.’ ²³ Biaguna ia haere, ia gwau, ‘Namo herea! Oi be hesiai tauna namona, kara maoromaoro tauna. Gau momo lasi oi naria namonamo dainai, gau momo edia biaguna do lau halaoa oi. Oiemu biaguna danu do ita moale hebou.’

²⁴ “Vadaeni 1000 kina ia abia tauna ia mai, ia gwau, ‘Lohia e, lau diba vadaeni oi be auka momo tauna. Oi hadoa lasi gauna be oi utua, bona oi negea lao, negea mai lasi gauna, be oi haboua. ²⁵ Unai dainai lau gari, lau lao, oiemu 1000 kina tano dekenai lau guria. Oi itaia, vadaeni oiemu oi abia.’

²⁶ “Iena biaguna ia haere, ia gwau, ‘Oi be hesiai tauna dikana, lahedo tauna. Oi diba vadaeni lau hadoa lasi gauna be lau utua, bona lau negea lao, negea mai lasi gauna, be lau haboua. ²⁷ To edena bamona lauegu moni be banika taudia dekenai oi atoa lasi? Vadaeni lau giroa mai neganai, do lau abia lou, mai ena atoa kau monina danu?’ ²⁸ Unai dainai, iena 1000 kina be ia dekena amo umui kokia, 10000 kina ia abia tauna dekenai do umui henia. ²⁹ Badina be mai ena gau tauna, be gau momo do ia abia. To gau lasi tauna, be ia dekenai ia noho gauna do idia kokia. ³⁰ Hesiai tauna dikana be do umui negea murimuri dekenai mai dibura danu. Unuseni do idia tai, edia isena do idia koria auka masemase.

Keriso ese taunimanima ibounai do ia kota henidia

³¹ “Taunimanima ena Natuna be mai ena hairai danu do ia mai, mai ena aneru helagadia danu, ena terona namo herea momokani latanai do ia helai. ³² Vadaeni bese ibounai be iena vairana dekenai do idia haboua. Vadaeni ia ese idia do ia hapararaia, mamoe naria tauna ese mamoe bona nanigosi ia hapararaia bamona. ³³ Mamoe be iena idiba kahana dekenai do ia atoa, nanigosi be iena lauri kahana dekenai do ia atoa. ³⁴ Vadaeni Lohiabada ese iena idiba kahana taudia dekenai do ia hamaoroa, do ia gwau, ‘Umui mai, egu Tamana ese ia hanamoa taudia e, Basileia umui abia, tanobada ia karaia neganai, ia ese ia karaia hegaegae umui emui. ³⁵ Badina be lau hitolo neganai, umui ubua lau. Lau ranu mase, ranu umui henia lau dekenai. Lau be idau tauna, to umui abia dae lau. ³⁶ Lau be dabua lasi, dabua umui atoa lau dekenai. Lau gorere

neganai, egu lalona umui hanamoa. Dibura ruma dekenai lau noho neganai, lau dekenai umui vadivadi.’

³⁷ “Vadaeni kara maoromaoro taudia ese do idia haere henia ia dekenai, do idia gwau, ‘Lohiabada e, edena negai ai itaia oi, oi hitolo, ai ubua oi, o oi ranu mase, ranu ai henia oi dekenai?’ ³⁸ Edena negai ai itaia oi, oi be idau tauna, vadaeni aniani ai henia oi dekenai? O dabua lasi, vadaeni dabua ai atoa oi dekenai?’ ³⁹ Edena negai ai itaia oi, oi gorere, o dibura ruma dekenai oi noho, ai vadivadi henia oi?’

⁴⁰ “Vadaeni Lohiabada ese idia dekenai do ia haere, do ia gwau, ‘Umui lau hamaoroa momokani, inai lauegu tadikakana ogogami herea taudia dekenai unai bamona umui karaia neganai, be lau dekenai umui karaia vadaeni danu.’

⁴¹ “Vadaeni iena lauri kahana taudia dekenai do ia hamaoroa, do ia gwau, ‘Dika bada taudia, lau dekena amo umui raka siri, lahi do ia bodo lasi lalonai do umui lao, ia gabua hegaegae vadaeni, Satani danu mai ena aneru danu edia. ⁴² Badina be lau hitolo, umui ubua lasi lau. Lau ranu mase, ranu umui henia lasi lau dekenai. ⁴³ Lau be idau tauna, lau umui abia dae lasi. Lau be dabua lasi, dabua umui atoa lasi lau dekenai. Lau gorere, bona dibura ruma dekenai lau noho neganai, umui vadivadi henia lasi lau dekenai.’

⁴⁴ “Vadaeni idia danu do idia haere henia ia dekenai, do idia gwau, ‘Lohiabada e, edena negai ai itaia oi, oi hitolo, o oi ranu mase, o oi be idau tauna, o oi be dabua lasi, o oi gorere, o oi be dibura ruma dekenai oi noho, vadaeni oi dekenai durua ai henia lasi?’

⁴⁵ “Vadaeni ia ese do ia haere idia dekenai, do ia gwau, ‘Umui lau hamaoroa momokani, inai ogogami taudia dekenai durua umui henia lasi neganai, lau danu umui durua lasi inai.’ ⁴⁶ Unai dainai, idia be davana ia dika hanaihanai gabuna dekenai do idia lao. To kara maoromaoro taudia be mauri hanaihanai gabuna dekenai do idia lao.”

26

Iesu alaia totona dala idia tahua

¹ Iesu be unai hereva ibounai ia hadokoa, vadaeni ia ese iena diba tahua taudia dekenai ia hamaoroa, ia gwau, ² “Umui diba, dina rua do idia ore, Pasova ena aria do idia karaia. Unai neganai Taunimanima ena Natuna ena mase dala do idia karaia, do idia hasatauroa.”

³ Vadaeni dubu biagudia bona hanua tau badadia ese Hahelagaia Tauna Badana, ena ladana be Kaiapa, ena ruma dekenai idia haboua. ⁴ Idia hereva hebou, Iesu do idia dogoatao hunia dala dekenai, do idia alaia mase idia gwau. ⁵ To idia gwau, “Aria dina dekenai be lasi, taunimanima ese heatu do idia havaraia garina.”

Hahine ta ese Iesu ia dahua dehoro namo herea dekenai

⁶ Iesu be Betania dekenai ia noho, Simona, lepera tauna, ena ruma dekenai. ⁷ Vadaeni hahine ta Iesu dekenai ia lao, nadi kavabu ta ia abia lao, ena lalonai be dehoro namo herea, ena davana be ia bada, vadaeni ia helai noho aniani totona neganai, hahine ese Iesu ena kwarana dekenai dehoro ia bubua. ⁸ Iesu ena diba tahua taudia ese idia itaia, idia badu, idia gwau, “Dahaka totona inai dehoro ia negea kava? ⁹ Inai dehoro ia hoia, moni momo do ia abia, vadaeni ogogami taudia dekenai ia henia be namo.”

¹⁰ Iesu be ia diba, vadaeni ia hamaoroa idia dekenai, ia gwau, “Dahaka dainai umui gwau ia kerere? Kara namo herea ia karaia vadaeni lau

dekenai. ¹¹ Ogogami taudia be nega ibounai idia noho umui dekenai, vadaeni umui ura neganai, do umui hanamoa idia dekenai. To lau be nega ibounai do lau noho lasi umui dekenai. ¹² Inai dehoru dekenai lauegu tauanina ia dahua hegaegae vadaeni, lau do idia guria totona. ¹³ Umui lau hamaoroa momokani, inai Sivarai Namona do idia harorolaia gabudia ibounai, tanobada ena kahana kahana ibounai dekenai, inai hahine ese ia karaia gauna be do idia gwauraia, ia dekenai do idia lalao totona.”

Iuda ese Iesu ia samania

¹⁴ Unai neganai, diba tahua tauna ta, iena ladana Iuda Iskariote, be dubu biagudia dekenai ia lao. ¹⁵ Ia gwau, “Bema Iesu ena mase dala lau karaia, dahaka do umui henia lau dekenai?” Vadaeni idia ese siliva moni 30 idia henia. ¹⁶ Unai negana ia lao, Iuda ese Iesu do ia samania ena nega namona ia tahua noho.

Iesu ese Pasova ia ania, ena diba tahua taudia danu

¹⁷ Paraoa idia hatubua lasi ena aria dina ginigunana dekenai, diba tahua taudia be Iesu dekenai idia lao, idia nanadaia, idia gwau, “Edeseni Pasova do ai karaia hegaegae, vadaeni do oi ania?” ¹⁸ Iesu ia haere, ia gwau, “Hanua dekenai umui lao, tau ta dekenai do umui hamaoroa, umui gwau, ‘Hadibaia tauna ia gwau: Egu nega ia kahirakahira vadaeni, egu diba tahua taudia danu Pasova be oiemu ruma dekenai do ai ania.’” ¹⁹ Vadaeni diba tahua taudia be Iesu ese ia hereva henidia hegeregereana idia karaia vadaeni, Pasova ena aria idia karaia hegaegae vadaeni.

²⁰ Adorahi neganai, Iesu be iena diba tahua taudia danu idia helai diho, idia aniani totona. ²¹ Vadaeni idia aniani noho neganai ia gwau, “Umui lau hamaoroa momokani, umui ta ese lauegu mase dala do ia karaia.”

²² Idia edia lalona idia hisihisi, idia ta ta idia nanadaia, idia gwau, “Lohiabada e, inai be lau, a?”

²³ Ia haere, ia gwau, “Lau danu disi tamona dekenai imana ia atoa tauna ese lauegu mase dalana do ia karaia. ²⁴ Taunimanima ena Natuna be do ia lao, Buka Helaga dekenai ia torea hegeregereana. To Taunimanima ena Natuna ena mase dala do ia karaia tauna be madi, ia be dika! Unai tau bema ia vara lasi be ia namo!”

²⁵ Vadaeni Iuda, ia samania koikoi tauna, ese ia nanadaia, ia gwau, “Hadibaia tauna, inai be lau, a?” Iesu ia gwau, “Oi gwauraia unai.”

Lohiabada ena anibou

²⁶ Idia aniani lalonai, Iesu ese paraoa ia abia, ia hanamoa, ia makohia, ena diba tahua taudia dekenai ia henia, ia gwau, “Umui abia, umui ania, lauegu tauanina be inai.”

²⁷ Ma kapusi ta ia abia, ia hanamoa, ia henia idia dekenai, ia gwau, “Umui ibounai umui inua. ²⁸ Inai be lauegu rarana, maino karaia ena rara, taunimanima momo totona do ia bubua, dika gwauatao totona. ²⁹ Umui lau hamaoroa, inai uaina do lau inua lou lasi, ela bona dina do ia ginidae lau bona umui uaina matamatana do ita inua Dirava ena Basileia lalonai.”

³⁰ Ane idia abia ore murinai, idia raka murimuri dekenai, Olive Ororo dekenai idia lao.

Iesu ese Petero ia hamaoroa do ia gwau, “Lau diba lasi Iesu”

³¹ Vadaeni Iesu ese ia hamaoroa idia dekenai, ia gwau, “Hari hanuaboi umui ibounai ese lau do umui rakatania, badina inai bamona ia torea vadaeni:

“Mamoe naria tauna do lau alaia,
vadaeni mamoe ibounai do idia heau siri,
idou gabu idau gabu dekenai.’

³² To do lau toreisi lou murinai, be do lau gunalaia umui, Galilea dekenai.”

³³ Petero ese ia haere Iesu dekenai, ia gwau, “Taunimanima ibounai ese oi do idia rakatania, to lau be lasi.”

³⁴ Iesu ese ia hamaoroa ia dekenai, ia gwau, “Momokani lau hamaoroa oi dekenai, hari inai hanuaboi, kokoroku do ia boiboi lasi, oi ese nega toi do oi hereva, ‘Lau diba lasi Iesu.’”

³⁵ To Petero ia gwau, “Oi danu do ita mase nega tamona, to do lau hereva lasi inai bamona, ‘Lau diba lasi Iesu.’” Diba tahua taudia ibounai danu unai bamona sibona idia hereva.

Iesu ese Getesemane dekenai ia guriguri

³⁶ Iesu be idia danu gabu ta dekenai idia ginidae, ena ladana be Getesemane. Vadaeni ia ese iena diba tahua taudia dekenai ia hamaoroa, ia gwau, “Iniseni do umui helai, lau be do lau lao unusen, guriguri totona.”

³⁷ Vadaeni ia ese Petero, bona Sebedeo ena natuna ruaosi ia hakaudia siri. Iesu ena lalona ia metau bada herea, iena kudouna danu ia hisihisi bada. ³⁸ Idia dekenai ia hamaoroa, ia gwau, “Lau be egu lalona ia hisihisi bada, kahirakahira lau mase. Iniseni do umui noho, do umui naria lau danu.”

³⁹ Sisina ma ia raka lao, vadaeni tano dekenai iena vairana ia atoa diho, ia guriguri, ia gwau, “Egu Tamana e, bema mai dala, inai kapusi lau dekena amo do oi kokia. To lauegu ura lasi, oiemu ura sibona.”

⁴⁰ Iena diba tahua taudia dekenai ia giroa lao, ia davaria idia mahuta. Vadaeni Petero dekenai ia gwau henia, ia gwau, “Be, umui goada lasi, hora tamona sibona lau danu do umui naria?” ⁴¹ Do umui naria, bona umui guriguri, Satani ena lalona dekenai do umui vareai garina. Emui lauma be ia ura, to emui tauanina be ia manoka vadaeni.”

⁴² Nega iharuana ma ia raka lao, ia guriguri, ia gwau, “Egu Tamana e, inai kapusi lau dekena amo kokia be dala lasi sedira, ela bona do lau inua, oiemu ura sibona do oi karaia.” ⁴³ Ma Iesu ia giroa lou idia dekenai, ma ia davaria idia mahuta noho, badina edia matana idia metau.

⁴⁴ Ia rakatanidia, ia giroa lao, nega ihatoina ma ia guriguri, iena guriguri herevadia be guna ia gwaauraia gaudia ma ia gwaauraia lou.

⁴⁵ Ma ia giroa lou iena diba tahua taudia dekenai, ia gwau, “Madi, umui mahuta. Umui laga-ani, a? Vadaeni, nega ia ginidae vadaeni. Taunimanima ena Natuna be dika taudia edia imadia dekenai do idia atoa. ⁴⁶ Umui toreisi, ita lao, lauegu mase dala ia karaia tauna ia mai inai.”

Iesu idia dogoatao

⁴⁷ Iesu do ia hereva noho neganai, Iuda, iena diba tahua tauna ta, ia ginidae, taunimanima momo danu, mai edia tuari kaia, bona mai edia heatu audia, dubu biagudia bona hanua tau badadia ese idia siaia taudia be unai. ⁴⁸ Mase dalana ia karaia tauna ese toa ta ia henia guna idia

dekenai, ia gwau, “Do lau kisi henia tauna, gauna be unai, do umui dogoatao.”

⁴⁹ Unai dainai, Iuda be Iesu dekenai ia raka kahirakahira lao, ia gwau, “Hadibaia tauna e, oi namo?” Vadaeni ia kisi henia.

⁵⁰ Iesu ese ia hereva ia dekenai, ia gwau, “Egu turana e, oi karaia totona oi mai gauna be vadaeni do oi karaia haraga.” Vadaeni idia ese edia imana dekenai Iesu idia dogoatao.

⁵¹ Iesu ena orea tauna ta ese iena tuari kaia ia veria, Hahelagaia Tauna Badana ena hesiai tauna ta, ena taiana ia utua oho. ⁵² Vadaeni Iesu ese ia gwau henia, ia gwau, “Emu tuari kaia be ena gabu dekenai oi ato lou, badina be tuari kaia idia iusilaia taudia ibounai, be tuari kaia dekenai do idia mase. ⁵³ Oi laloa lau be siahui lasi a, lauegu Tamana bema lau noia, be ia ese aneru orea 12, bona ma haida danu do ia siaia, lau dekenai durua henia totona? ⁵⁴ To bema unai bamona, Buka Helaga be edena bamona do ia momokani? Badina ia torea vadaeni, inai kara be do ia vara lau dekenai.”

⁵⁵ Unai neganai Iesu ese unai taudia dekenai ia gwau henia, ia gwau, “Umui be mai tuari kaia bona mai heatu audia danu lau dogoatao totona umui mai, dadia tauna do umui dogoatao bamona. Dina ibounai lau be umui emui badibadinai lau helai noho, bona lau hadibaia noho, Dubu Helaga lalonai, to lau umui dogoatao lasi. ⁵⁶ To inai gaudia ibounai idia vara vadaeni, peroveta taudia ese idia torea herevadia hamomokania totona.”

Vadaeni iena diba tahua taudia ibounai idia heau, ia sibona idia rakatania.

Kaunsolo edia vairanai Iesu ia kota

⁵⁷ Vadaeni ia idia dogoatao taudia ese Hahelagaia Tauna Badana, Kaiapa dekenai Iesu idia abia lao. Unuseni taravatu hadibaia taudia bona hanua tau badadia idia haboua vadaeni. ⁵⁸ Petero ese Iesu ena murinai ia lao, to ia raka kahirakahira momokani lasi, ia lao, bona Hahelagaia Tauna Badana ena ruma ariara lalonai ia raka vareai. Hesiai taudia danu ia helai, gabu tamona dekenai, dahaka do ia vara do ia itaia gwaurai.

⁵⁹ Vadaeni dubu biagudia bona kaunsolo taudia ibounai ese Iesu dekenai samania koikoi idia gwaurai taudia idia tahua mai hekwarahi danu, alaia totona ena badina idia davarua gwaurai. ⁶⁰ Iesu dekenai samania koikoi gwaurai taudia momo herea idia toresi, to alaia totona ena badina ta idia davarua lasi. To gabei koikoi taudia rua ma idia toresi, idia gwau, ⁶¹ “Inai tau ia hereva, ia gwau, ‘Lau be mai egu siahui Dirava ena Dubu Helaga do lau kokia, bona dina toi sibona lalonai ma do lau haginia lou.’”

⁶² Vadaeni Hahelagaia Tauna Badana ese ia toresi, Iesu ia nanadaia, ia gwau, “Oi be hereva ta lasi, a? Inai idia edia hereva oi dekenai be edena bamona?” ⁶³ To Iesu be ia hereva lasi. Vadaeni Hahelagaia Tauna Badana ese ma ia hereva Iesu dekenai, ia gwau, “Mauri Dirava ena ladana dekenai lau hereva oi dekenai, oi hamaoroa ai dekenai, oi be Keriso, Dirava ena Natuna, o?”

⁶⁴ Iesu ia haere ia dekenai, ia gwau, “Oi hereva unai. To umui ibounai dekenai lau hereva, Taunimanima ena Natuna do umui itaia, Siahui Ibounai Dirava ena imana idibana kahana dekenai do ia helai, bona guba ena ori edia latanai do ia mai.”

⁶⁵ Vadaeni Hahelagaia Tauna Badana ese sibona ena dabua ia darea, ia gwau, “Dirava dekenai hadikaia hereva ia gwauraia vadaeni, ma dahaka hereva ita tahua? Dirava dekenai hadikaia hereva ia gwauraia, be umui kamonai vadaeni. ⁶⁶ Umui be dahaka umui gwau?” Idia haere, idia gwau, “Do ia mase be namo.”

⁶⁷ Vadaeni Iesu ena vairana latanai idia kanudi, edia imana dekenai idia botaia, idia gwau, ⁶⁸ “Keriso e, bema oi be peroveta tauna, oi hamaoroa ai dekenai, daika ese ia botaia oi?”

Petero nega toi ia hereva, “Lau diba lasi Iesu”

⁶⁹ Petero be ruma murimuri dekenai, ariara ena kahanai ia helai noho, vadaeni hesiai kekeni ta ia dekenai ia lao, ia gwau, “Inai, oi danu be Iesu, Galilea tauna, ena durua tauna ta, ani?”

⁷⁰ To Petero be idia ibounai edia vairana dekenai ia hereva, ia gwau, “Oiemu hereva be lau diba lasi momokani.” ⁷¹ Ia be ia raka siri, ia lao magu ena iduara badibadinai. To kekeni ta ese ia itaia, vadaeni iena badibadinai taudia dekenai ia hamaoroa, ia gwau, “Inai tau danu be Iesu, Nasareta tauna, ena durua tauna ta.”

⁷² Vadaeni mai hereva dika danu, Petero ese ia hereva lou, ia gwau, “Unai tau be lau diba lasi momokani!”

⁷³ Nega sisina murinai, unai gabu dekenai idia gini taudia be Petero dekenai idia lao, idia gwau, “Momokani, oi be idia edia turana ta, badina be oiemu gado ese ia hedinarai.”

⁷⁴ Vadaeni Petero ese ma ia hereva dika lou, ia gwau, “Momokani, unai tau be lau diba lasi!”

Vadaeni kokoroku ta ia boiboi. ⁷⁵ Vadaeni Iesu ia gwauraia hereva be Petero ia laloe, gauna inai, “Kokoroku do ia boiboi lasi neganai, oi ese nega toi do oi hereva, ‘Lau diba lasi Iesu.’” Vadaeni ia raka murimuri dekenai, ia tai dikadika.

27

Pilato dekenai Iesu idia abia lao

¹ Daba ia rere, dubu biagudia ibounai bona hanua tau badadia idia hereva hebou, Iesu alaia totona. ² Vadaeni idia guia, idia hakaua lao, Pilato, gavana tauna, dekenai idia henia.

Juda Iskariote ia mase vadaeni

³ Iuda, Iesu ia samania tauna ese ia itaia, kota dekenai Iesu hamasea herevana idia gwauraia. Vadaeni ia sibona ena lalona ia giroa, vadaeni unai siliva moni 30 ia abia, ia giroa lou, dubu biagudia bona hanua tau badadia dekenai ia henia lou gwauraia. ⁴ Ia gwau, “Kara dikana lau karaia vadaeni, badina be kerere lasi tauna ena mase dala lau karaia vadaeni.”

Idia gwau, “Ai ese, a? Oi sibona emu kerere.”

⁵ Iuda ese siliva moni Dubu Helaga lalonai ia negea vareai, vadaeni ia raka siri, ia lao, ena aiona be varo dekenai ia kwatua, au dekenai ia taua dae, ia sibona ia alaia mase.

⁶ Vadaeni dubu biagudia ese inai siliva moni idia abia, idia gwau, “Ia namo lasi boubou ena maua dekenai do ita udaia, badina inai be rara ena davana.” ⁷ Idia herevalaia, vadaeni uro karaia tauna ena tano idia hoia, idau bese taudia edia mase guria gabuna dekenai idia halaoa. ⁸ Unai dainai, unai tano ena ladana idia atoa “Rara Tanona” ia mai bona harihari.

9 Unai dainai Ieremia, peroveta tauna, ena hereva ia momokani vadaeni, ia gwau,

“Siliva moni 30 idia abia,
Israela taudia ese inai Tau ena davana idia gwaurai gauna.

10 Vadaeni inai moni dekenamo,
uro karaia tauna, ena tano idia hoia,
Lohiabada ese lau ia hamaoroa hegeregere.”

Pilato ese Iesu ia nanadaia

11 Iesu be gavana ena vairana dekenai ia gini, vadaeni gavana ese ia nanadaia ia dekenai, ia gwau, “Oi be Iuda taudia edia king, a?” Iesu ia gwau, “Oi hereva unai.” 12 Vadaeni dubu biagudia bona hanua tau badadia ese Iesu dekenai hereva koikoi ma idia gwaurai, to Iesu be ia haere lasi.

13 Vadaeni Pilato ia gwau, “Hereva momo oi dekenai idia gwaurai be oi kamoni lasi, a?”

14 To Iesu be ia haere lasi, hereva ta ia gwaurai lasi. Unai dainai gavana be ia hoa.

Pilato ia gwau Iesu do idia hasatauroa

15 Unai aria neganai gavana ena kara be nega ibounai dibura ruma dekenai ia noho tauna ta, taunimanima ese do idia gwaurai tauna, do ia ruhaia murimuri dekenai. 16 Unai neganai tau ta dibura ruma dekenai ia noho, ena ladana be Baraba, unai tau ena kerere sivarai be ibounai idia diba. 17 Unai dainai, idia haboua vadaeni neganai, Pilato ese ia nanadaia idia dekenai, ia gwau, “Edena tauna umui ura do lau ruhaia, Baraba o Iesu, iena ladana ta idia gwaurai Keriso?” 18 Badina be Pilato ia diba Iuda tau badadia idia mama dainai Iesu idia samania bona idia kota henia.

19 Pilato be kota henia gabuna dekenai, iena helai gauna latanai ia helai noho neganai, iena adavana ese hereva ta ia siaia lao ia dekenai, ia gwau, “Unai kara maoromaoro tauna dekenai gau ta do oi karaia lasi, badina be hari dina lau nihi vadaeni, egu nihi dekenai hisihisi badana ia hadikaia lau, unai tau totona.”

20 To dubu biagudia bona hanua tau badadia ese taunimanima dekenai idia hereva, Baraba do ia ruhaia, bona Iesu do ia alaia mase herevana do idia gwaurai totona. 21 Vadaeni gavana ese ma ia nanadaia idia dekenai, ia gwau, “Inai Iesu bona Baraba ruaosi, be daika do lau ruhaia umui emui?”

Idia gwau, “Baraba!”

22 Vadaeni Pilato ese ma ia nanadaia idia dekenai, ia gwau, “To Iesu, idia gwaurai Keriso dekenai be dahaka do lau karaia?” Idia ibounai idia haere nega tamona, idia gwau, “Do oi hasatauroa!”

23 Pilato ia gwau, “Be, iena dika be dahaka?” To idia boiboi momo mai goada danu, idia gwau, “Do oi hasatauroa.”

24 Unai dainai Pilato ena lalona ia diba, iena hereva be do idia goada lasi, bona idia be do idia heatu garina, vadaeni ranu ia abia, taunimanima edia vairanai iena imana ia huria, ia gwau, “Inai kara maoromaoro tauna ena rarana be egu latanai do ia noho lasi, to umui sibona.”

25 Idia ibounai idia haere, idia gwau, “Inai tau ena rarana be aiemai latanai bona aiemai natudia edia latanai do ia noho.”

²⁶ Vadaeni Pilato ese Baraba ia ruhaia. To oda ia atoa, vadaeni Iesu idia kwadia. Unai murinai Pilato ese tuari taudia dekenai Iesu ia henia, do idia hasatauroa totona.

Iesu dekenai idia kirikirilaia

²⁷ Vadaeni gavana ena tuari taudia ese Iesu idia hakaua lao gavana ena ruma badana lalonai, vadaeni idia edia ore a taudia ibounai idia haboua lao ia dekenai. ²⁸ Idia ese iena dabua idia kokia, bona dabua kakakaka ia dekenai idia atoa. ²⁹ Bona kwara gauna au ginigini dekena amo idia turia, iena kwarana dekenai idia atoa. Bona au ta danu iena imana idiba kahana dekenai idia atoa, ia dogoatao. Edia tuina idia atoa diho, idia tomadiho henia koikoi ia dekenai, idia gwau, “Tuda edia king e, do oi mauri.” ³⁰ Vadaeni ia dekenai idia kanudi, bona unai au iena imana dekena amo idia kokia, au dekena amo iena kwarana idia botai. ³¹ Iesu idia kirikirilaia ia ore murinai, dabua kakakaka iena tauanina dekena amo idia kokia, iena dabua korikori ma idia atoa lou. Vadaeni idia hakaua lao, idia hasatauroa totona.

Iesu idia hasatauroa

³² Idia raka murimuri dekenai neganai, Kurene tauna ta idia davaria, ena ladana be Simona, idia oda henia Iesu ena satauro do ia huaia.

³³ Gabu ta dekenai idia ginidae, ena ladana be Gologota, ena anina be Kwara Koukouna Gabuna. ³⁴ Unuseni uaina, muramura danu idia mikisi gauna Iesu dekenai idia henia, ia inua totona. To sisina ia mamia murinai ia ura lasi inua.

³⁵ Vadaeni idia hasatauroa, bona laki dekena amo iena dabua idia haria karaia. ³⁶ Bona idia helai diho, idia itaia noho. ³⁷ Iena kwarana ena atai dekenai idia ese Iesu dekenai idia samania ena hereva gauna idia atoa. Inai bamona idia torea, “Inai be Iesu, Iuda taudia edia King.”

³⁸ Unai neganai Iesu danu be henaoa taudia rua idia hasatauroa, ta be iena imana idiba kahana dekenai, ta be iena imana lauri kahana dekenai.

³⁹ Idia raka hanaia taudia ese idia hereva dika henia ia dekenai, edia kwarana idia giroagiroya, ⁴⁰ idia gwau, “Io! Dubu Helaga do oi kokia, ma dina toi ia ore do oi haginia lou tauna oi, oi be Dirava ena Natuna oi gwau, satauro dekena amo mani oi diho mai!”

⁴¹ Dubu biagudia bona taravatu hadibaia taudia bona hanua tau badadia danu Iesu idia kirikirilaia, idia gwau, ⁴² “Ia be idau taudia ia hamauria, to edena bamona ia sibona ia hamauria diba lasi? Ia be Israela ena King, harihari satauro dekena amo mani ia diho, vadaeni do ita abidadama henia ia dekenai. ⁴³ Ia ese Dirava ia abidadama henia. Bema Dirava ia lalokau henia ia dekenai, be do ia hamauria, badina be ia gwau, ‘Lau be Dirava ena Natuna.’”

⁴⁴ Henaoa taudia ruaosi danu, ia danu idia hasatauroa taudia, be unai bamona idia kirikirilaia.

Iesu ia mase vadaeni

⁴⁵ Dina tubua dekena amo dibura ese tanobada ibounai ia koua, ela bona adorahi. ⁴⁶ Vadaeni adorahi neganai Iesu ia boiboi mai goada danu, ia gwau, “Eloi, Eloi, lama sabakatani?” ena anina be, “Egu Dirava e, egu Dirava e, dahaka dainai lau oi rakatania?”

⁴⁷ Unuseni idia gini taudia haida be idia kamoni, vadaeni idia gwau, “Inai be Elia dekenai ia boiboi.” ⁴⁸ Tau ta ia heau lao, sipanisi ia abia, mamina ia namo lasi uaina dekena amo ia hahonua, bona au latana ta

ena duduna dekenai ia atoa, vadaeni ia abia isi, ia henia Iesu dekenai, ia inua totona.

⁴⁹ To haida be idia gwau, “Dohore, mani ita itaia, Elia do ia mai, do ia hamauria, o?”

⁵⁰ To Iesu ma ia boiboi bada, vadaeni ia mase.

⁵¹ Unai neganai Dubu Helaga ena koua dabua helagana badana be ia darea, atai ai dekena amo ia diho mai bona henuna dekenai, kahana rua ia lao. Tano danu ia mareremarere, nadi badadia danu idia makohia, ⁵² bona mase guria gabudia danu idia kehoa, helaga taudia momo be mase dekena amo idia toreisi lou. ⁵³ Edia guria gabudia idia rakatania, bona Iesu ena toreisi lou murinai idia be Hanua Helaga dekenai idia lao, unuseni taunimanima momo ese idia itadia.

⁵⁴ Tuari biaguna mai ena tuari taudia danu, Iesu dekenai idia naria noho taudia, ese tano mareremarere, bona idia vara gaudia idia itaia, vadaeni idia gari bada, idia gwau, “Momokani, inai be Dirava ena Natuna.”

⁵⁵ Idia itaia noho hahine momo danu sisina daudau dekenai idia gini, Galilea dekena amo Iesu ena murinai idia raka, bona iena hesiai gaukara idia karaia hahinedia be unai. ⁵⁶ Haida be inai: Maria, Magadala hahinena, bona Maria, Iamesi bona Iosepa edia sinana, bona Sebedeo ena natuna edia sinana.

Iesu idia guria

⁵⁷ Adorahi neganai, kohu momo tauna ta, ena ladana be Iosepa, Arimatea hanua dekena amo ia ginidae. Ia danu be Iesu ena diba tahua tauna ta. ⁵⁸ Ia be Pilato dekenai ia lao, ia noia, Iesu ena tauanina ia abia gwauria. Vadaeni Pilato ese oda ia atoa do idia henia. ⁵⁹ Unai dainai, Iosepa ese Iesu ena tauanina ia abia diho, dabua ia miro lasi dekenai ia kumia. ⁶⁰ Iosepa be sibona mai ena guria gabu matamatana ta, nadi gabuna dekena amo ia geia vadaeni gauna. Unai guria gabuna lalonai Iosepa ese Iesu ena tauanina ia atoa. Nadi badana ia keia lao, guria gabuna ena iduara ia koua, vadaeni ia raka siri. ⁶¹ To hahine ruaosi, Maria, Magadala hahinena, bona Maria ta, be guria gabuna ena vairana dekenai idia helai noho.

Tuari taudia ese guria gabuna idia naria

⁶² Kerukeru dabai, Sabati Dina neganai, dubu biagudia bona Farisea taudia be Pilato ena vairanai idia haboua. ⁶³ Idia gwau, “Ai be inai bamona ai lalao. Unai koikoi tauna ia mauri noho neganai ia hereva, ia gwau, ‘Dina toi do idia ore, do lau toreisi lou.’” ⁶⁴ Unai dainai, mani do oi hereva, guria gabuna do idia naria namonamo, ela bona dina toi ia ore. Badina be iena diba tahua taudia be sedira do idia mai, iena tauanina do idia henaoo, vadaeni taunimanima do idia koia, do idia gwau, ‘Ia be mase dekena amo ia toreisi lou vadaeni,’ unai do idia karaia garina. Bema unai bamona, gabeai koikoi hereva ese guna koikoi hereva do ia hanaia.”

⁶⁵ Pilato ia gwau, “Be, umui be mai emui tuari taudia, vadaeni umui lao, guria gabuna do umui koua, umui emui goada hegeregerena.”

⁶⁶ Vadaeni idia lao, guria gabuna idia koua auka masemase, bona koua nadina idia taravatua maka ta dekena amo, vadaeni tuari taudia idia atoa unuseni, Iesu do idia naria namonamo totona.

28

Iesu be mase dekena amo ia toresi lou

¹ Sabati ia ore murinai, daba ia rere neganai, pura ena dina ginigunana, Maria, Magadala hahinena, Maria ta danu, guria gabuna itaia totona idia lao. ² Unai neganai tano mareremarere bada herea ia vara. Badina be Lohiabada ena aneru ese guba dekena amo ia diho, nadi badana be guria gabuna ena iduara dekena amo ia keia siri, vadaeni unai nadi ena latanai ia helai. ³ Aneru ena vairana ia diari momokani, kevaru bamona, iena dabua danu ia kurokuro momokani, sinou bamona. ⁴ Ia dekenai idia gari dainai, tuari taudia be idia heudeheude, bona mase taudia hegeregere na idia lao.

⁵ To aneru ese hahine dekenai ia hereva, ia gwau, “Umui gari lasi, badina lau diba umui be Iesu, idia hasatauroa tauna, umui tahua noho. ⁶ Ia be ia noho lasi iniseni. Ia toresi lou vadaeni, ia hamaoroa umui dekenai hegeregere na. Vadaeni, umui mai, idia atoa gabuna mani umui itaia. ⁷ Vadaeni do umui lao haragaharaga, iena diba tahua taudia dekenai do umui hamaoroa ia be mase dekena amo ia toresi vadaeni. Kamonai, ia be Galilea dekenai ia lao noho, umui do ia itaia totona. Egu hereva be unai, umui kamonai.”

⁸ Vadaeni idia ruaosi ese guria gabuna idia rakatania haragaharaga, mai gari bona mai moale bada danu, Iesu ena diba tahua taudia dekenai hadibaia totona idia heau lao.

⁹ To dala dekenai Iesu danu idia hedavari, ia hereva idia dekenai, ia gwau, “Do umui mauri!” Vadaeni idia ruaosi idia raka kahirakahira ia dekenai, ena aena dekenai idia rosia, idia tomadiho henia ia dekenai. ¹⁰ Vadaeni Iesu ia gwau, “Umui gari lasi. Umui lao, lauegu varavara taudia do umui hamaoroa, do idia lao Galilea. Unai kahana dekenai do idia itaia lau.”

Tuari taudia edia ripoti hereva

¹¹ Idia ruaosi be idia lao neganai, tuari taudia haida danu hanua badana dekenai idia lao, inai idia vara gaudia ibounai dubu biagudia dekenai idia hamaoroa. ¹² Vadaeni inai dubu biagudia be hanua tau badadia danu idia hereva hebou. Gabeai tuari taudia dekenai moni momo herea idia henia, ¹³ idia gwau, “Do umui gwau, ‘Iena diba tahua taudia be hanuaboi idia mai, ai mahuta neganai iena tauanina idia henaoa.’ ¹⁴ Bema gavana ese inai sivarai do ia kamonai, ai ese do ai hereva henia, ena lalona do ai hanamoa, kerere ta do umui davarua lasi.”

¹⁵ Unai dainai, tuari taudia ese moni idia abia, vadaeni idia dekenai idia hadibaia hegeregere na idia hereva. Inai sivarai be Iuda taudia ese idia gwauraia loloa ia mai bona harihari danu.

Iesu ese diba tahua taudia dekenai ia hedinarai

¹⁶ Diba tahua taudia ¹¹ be idia lao Galilea dekenai, ororo ta, Iesu ese ia gwauraia guna do idia hedavari gabuna dekenai. ¹⁷ Unusenai idia ese Iesu idia itaia, vadaeni idia tomadiho ia dekenai. To haida be idia lalao daradara. ¹⁸ Vadaeni Iesu ia raka kahirakahira idia dekenai, ia hereva henia idia dekenai, ia gwau, “Siahu ibounai guba dekenai bona tanobada dekenai be lau dekenai ia henia vadaeni. ¹⁹ Unai dainai do umui lao, bese ibounai be diba tahua taudia do umui halaoa, bona Tamana, Natuna, bona Lauma Helaga ena ladanai do umui bapatiso henia idia dekenai. ²⁰ Bona idia dekenai do umui hadibaia, umui dekenai lau henia hereva ibounai be do idia badinaia. Bona do umui

kamonai bona laloa noho, lau be hanaihanai umui danu ita noho ela
bona tanobada dokona.”

SIVARAI NAMONA MAREKO IA TOREA

Ioane Baptiso ia haroro

¹ Dirava ena Natuna Iesu Keriso ena Sivarai Namona ia matamaia inai bamona. ² Peroveta tauna ladana Isaia ia torea,

“Dirava ia hereva, ia gwau:

‘Oiemu vairana dekenai lauegu hesiai tauna lau siaia.

Oiemu dala do ia karaia hegaegae.’

³ Ta ia boiboio taunimanima idia noho lasi gabuna dekenai inai bamona, ‘Lohiabada ena dala umui karaia hegaegae, iena dala umui hamaoromaoroa.’”

⁴ Unai dainai Ioane Baptiso ia mai, taunimanima idia noho lasi gabuna dekenai ia haroro. Iena haroro be, taunimanima edia lalona idia giroa, bona baptiso idia abia, kara dika gwauatao ena toana. ⁵ Iudea kahana taudia bona Ierusalem hana taudia ibounai idia lao Ioane dekenai. Idia gwau, “Ai be kara dika taudia.” Vadaeni Ioane ese idia ia baptiso henia Ioridane Sinavai lalonai.

⁶ Ioane ena dabua be kamelo huina bona iena gaba gauna be boromakau kopina. Iena aniani be kwadi bona hani. ⁷ Ia haroro, ia gwau, “Tau ta lauegu murinai dohore ia mai, iena siahua ia bada, lauegu siahua ia maragi. Inai tau ena tamaka varona, lau be hegeregere lasi lau ruhaia. ⁸ Lau ese umui lau baptisoa ranu dekenai, to dohore inai tau ese umui do ia baptisoa Lauma Helaga dekenai.”

Ioane ese Iesu ia baptisoa

⁹ Unai neganai, Iesu be Nasareta hanua, Galilea kahana dekena amo ia mai, bona Ioane ese Iesu ia baptisoa Ioridane Sinavai lalonai. ¹⁰ Iesu ese ranu ia rakatania neganai, nega tamona ia itaia guba ia kehoa, bona Lauma Helaga ia diho ia dekenai pune manu bamona. ¹¹ Bona guba dekena amo gado ta ia hereva, ia gwau, “Oi be lauegu Natuna. Lau lalokau henia oi. Lau moale bada oi dekenai.”

Satani ese Iesu ia dibaganian

¹² Vadaeni nega tamona Lauma Helaga ese Iesu ia siaia taunimanima idia noho lasi gabuna dekenai. ¹³ Dina 40 ia noho taunimanima idia noho lasi gabunai, unuseri Satani ese ia dibaganian. Dagedage boromadia be Iesu danu idia noho, to aneru ese ia idia naria.

Iesu ena gaukara ia matamaia Galilea dekenai

¹⁴ Ioane Baptiso idia atoa dibura ruma dekenai murinai, Iesu ia lao Galilea dekenai, Dirava ena Sivarai Namona ia harorolaia. ¹⁵ Ia haroro, ia gwau, “Harihari be Dirava ena nega, bona Dirava ena Basileia be kahirakahira ia ginidae. Umui emui lalona umui giroa, Sivarai Namona umui abidadama henia.”

Iesu ese tau 4 ia boiria, ia murinai idia raka

¹⁶ Iesu ia raka Galilea Gohu kone dekenai, Simona mai ena tadina Andrea danu ia itaia. Idia ruaosi be davara dekenai reke idia negea, badina

idia be haoda taudia. ¹⁷ Iesu ia gwau, “Umui mai lauegu murinai, dohore siahu lau henia umui dekenai, do umui haoda karaia, taunimanima umui abia.” ¹⁸ Nega tamona edia reke idia rakatania, Iesu ena murinai idia raka.

¹⁹ Sisina ia raka, vadaeni Iamesi, Sebedeo ena natuna, mai ena tadina Ioane danu ia itaia. Vanagi dekenai idia edia reke idia hanamoa noho. ²⁰ Iesu ia gwau, “Lauegu murinai umui raka mai.” Vadaeni, ruaosi ese edia tamana Sebedeo mai ena gaukara taudia danu vanagi dekenai idia rakatania, Iesu ena murinai idia raka lao.

Mai lauma dika tauna Iesu ese ia hanamoa

²¹ Idia lao Kaperanauma hanua dekenai, unuseni Sabati Dina neganai, dubu lalonai Iesu ese ia hadibaia. ²² Taunimanima idia hoa bada iena hadibaia hereva dekenai, badina mai siahu danu ia hereva, taravatu hadibaia taudia bamona lasi.

²³ Inai edia dubu dekenai be tau ta mai lauma dikana ia raka vareai, ia boibo, ia gwau, ²⁴ “Iesu, Nasareta hanua tauna, badina dahaka oi mai ai dekenai? Ai haorea totona oi mai, a? Lau diba oi. Oi be Dirava ena Helaga Tauna.”

²⁵ Iesu ese lauma ia gwau henia, ia gwau, “Hereva lasi, inai tau oi rakatania lao.”

²⁶ Lauma dikana ese inai tau ia hamarerea bada herea, bona mai boibo bada danu ia murimuri lao. ²⁷ Itaia taudia ibounai idia hoa bada, idia herevahereva sibodia dekenai, “Inai be dahaka? Hadibaia gauna matamata? Inai tau ena siahu dekenai lauma dikadia danu ia gwau henia, bona iena hereva gauna idia karaia.”

²⁸ Vadaeni haraga momokani, Iesu ena kara sivarai, be Galilea kahana dekenai noho taudia ibounai idia kamoni.

Iesu ese Petero adavana ena sinana ia hanamoa

²⁹ Dubu ia rakatania neganai, Iesu be Simona bona Andrea edia ruma dekenai ia raka vareai, Iamesi bona Ioane danu. ³⁰ Simona adavana ena sinana ia gorere dainai, ia hekure noho, mai kopina siahu bada. Nega tamona idia ese Iesu idia hamaoroa. ³¹ Ia lao, hahine ena imana ia abia, bona ia ese hahine ia abia isi. Vadaeni, inai hahine ena gorere be nega tamona ia doko, ia toreisi, bona aniani ia henia idia dekenai.

Iesu ese taunimanima momo edia gorere ia hanamoa

³² Adorahi, dina ia diho neganai, gorere taudia bona mai lauma dikadia taudia ibounai idia mailaia Iesu dekenai. ³³ Hanua taudia ibounai idia lao, idia hebou ruma ena iduara dekenai. ³⁴ Gorere idauidau taudia momo Iesu ese ia hanamoa. Bona lauma dikadia momo ia lulua, bona lauma dikadia edia hereva dala ia koua, badina idia diba ia.

Galilea hanuadia dekenai Iesu ia haroro

³⁵ Daba maragi, dina ena diari ia mai lasi neganai, Iesu ia toreisi, taunimanima lasi gabuna dekenai ia lao, unuseni ia guriguri. ³⁶ Simona mai ena bamona taudia danu ese Iesu idia tahua lao. ³⁷ Idia davaria neganai, idia gwau, “Taunimanima ibounai idia tahua oi.”

³⁸ Ia hereva, ia gwau, “Namo ita lao hanua haida, unuseni lau ura haroro karaia, badina inai totona lau mai.” ³⁹ Vadaeni Iesu ia lao Galilea hanua ibounai dekenai. Unuseni edia dubu lalonai ia haroro, bona lauma dikadia ia lulua.

Lepera tauna Iesu ese ia hanamoa

⁴⁰ Lepera tauna ta ia mai Iesu dekenai, ia tui diho bona ia noia, ia gwau, “Bema oi ura, mani oi hanamoa lau, badina oiemu siahu be ia hegeregere.”

⁴¹ Iesu ese mai bogahisihisi danu, iena imana ia atoa lepera tauna ena kopina dekenai. Ia gwau, “Lau ura. Hari oi goeva.” ⁴² Nega tamona, lepera gorere ia ore, unai tau ia goeva vadaeni. ⁴³ Vadaeni Iesu ese ia siaia, to ia sisiba henia guna, ⁴⁴ ia gwau, “Tau ta do oi hamaoroa lasi, to oi lao hahelagaia tauna dekenai, oiemu kopina goeva ia itaia totona. Bona Mose ena taravatu hegeregere, oi goeva dainai, harihari gauna Dirava dekenai oi henia. Inai oi karaia neganai, oiemu goeva be momokani vadaeni idia dekenai.”

⁴⁵ To unai tau ia lao gabu idauidau dekenai, unai kara ena sivarai taunimanima ibounai dekenai ia haroro hedinarai, unai dainai Iesu ia lou mai lasi hanua dekenai, to taunimanima lasi gabudia dekenai ia noho. To unuseni danu kahana ibounai dekenai amo, taunimanima idia mai ia dekenai.

2

Iesu ese kara dika ia gwauatao

¹ Dina haida murinai Iesu ia lou lao Kaperanauma hanua dekenai, bona haida idia gwau ia noho ruma dekenai. ² Taunimanima momo ese idia vareai hebou, ela bona ruma ia honu momokani, bona iduara vairanai danu be gabu lasi. Iesu ese ia haroro, idia kamona. ³ Tau ⁴ ese marere diba lasi gorere tauna ta geda latanai idia huaia lao, Iesu ese do ia hanamoa totona. ⁴ Idia ura vareai, to dala lasi, taunimanima momo dainai. Idia daekau guhi dekenai, guhi kahana idia kokia. Guhi matu ia noho gabuna dekenai amo, marere diba lasi gorere tauna mai geda danu, idia atoa diho lao, Iesu ia gini gabuna dekenai. ⁵ Iesu ese edia abidadama kara ia itaia. Vadaeni gorere tauna ia hamaoroa, ia gwau, “Natugu, oiemu kara dika be lau gwauatao vadaeni.”

⁶ Taravatu hadibaia taudia haida idia helai unuseni, bona sibodia dekenai idia laloo momo. ⁷ Idia gwau, “Badina dahaka inai tau ia hereva unai bamona? Inai be Dirava ena ladana ia hadikaia. Daika ese Dirava hegeregere kara dika ia gwauatao diba? Dirava sibona mo.”

⁸ Nega tamona Iesu sibona ena lalona ia diba idia laloo unai bamona. Ia gwau, “Badina dahaka umui emui lalona dekenai lauegu kara umui gwau henia? ⁹ Edena hereva be ia haraga, gorere tauna lau hamaoroa, ‘Oiemu kara dika be lau gwauatao vadaeni,’ o, ‘Toreisi, oiemu geda oi abia isi, oi raka lao ruma dekenai?’ ¹⁰ Lau ura umui diba namonamo Taunimanima ena Natuna ena siahu be ia hegeregere tanobada dekenai kara dika ia gwauatao.” Unai dainai ia ese marere diba lasi gorere tauna ia hamaoroa, ia gwau, ¹¹ “Lau hamaoroa oi, oi toreisi, oiemu geda oi abia isi, bona oi lao ruma dekenai.”

¹² Nega tamona ia toreisi, iena geda ia abia isi, bona murimuri dekenai ia raka. Ibounai idia itaia, idia hoa bada herea. Dirava dekenai idia hanamoa henia. Idia gwau, “Guna inai bamona ita itaia lasi!”

Iesu ese takisi abia tauna Levi, ia boiria

¹³ Iesu ia giroa lou kone dekenai, vadaeni taunimanima ibounai ia dekenai idia haboua, bona ia ese idia ia hadibaia. ¹⁴ Iena dala ma ia raka lao neganai, Iesu ese Alepeo ena natuna ladana Levi ia itaia, ia helai

takisi moni abia gabuna dekenai. Iesu ia gwau, “Oi mai lauegu murinai.” Ia toreisi, Iesu ena murinai ia raka.

¹⁵ Iesu mai ena diba tahua taudia be idia aniani ruma lalonai. Vadaeni takisi abia taudia momo, bona kara dika taudia momo idia mai, idia helai unuseni, Iesu mai ena diba tahua taudia danu. Badina be idia momo Iesu ena murinai idia raka noho. ¹⁶ Farisea orea edia taravatu hadibaia taudia ese Iesu idia itaia, ia aniani takisi abia taudia, bona kara dika taudia danu, vadaeni idia ese iena diba tahua taudia idia nanadaia, idia gwau, “Badina dahaka ia be takisi abia taudia bona kara dika taudia nega tamona idia aniani?”

¹⁷ Edia hereva Iesu ia kamoni, ia gwau, “Dogeta ia mai lasi goada taudia dainai, to gorere taudia dainai ia mai. Lau mai lasi kara maoromaoro taudia boiria totona, to lau mai be kara dika taudia boiria totona.”

Iesu ena diba tahua taudia ese aniani lasi taravatu idia badinaia lasi

¹⁸ Nega ta Ioane Bapatiso ena diba tahua taudia bona Farisea taudia ese aniani lasi taravatu idia karaia neganai, taunimanima haida idia mai, Iesu dekenai idia nanadaia, idia gwau, “Badina dahaka Ioane Bapatiso bona Farisea orea edia diba tahua taudia ese aniani ania lasi taravatu nega idia badinaia noho, to oiemu diba tahua taudia ese idia badinaia lasi?”

¹⁹ Iesu ia hereva, ia gwau, “Umui laloa, headava matamata tauna ena turadia danu ia noho neganai, idia aniani lasi, a? Ia noho idia danu neganai, aniani lasi taravatu idia laloa diba lasi. ²⁰ To dina ta dika taudia ese headava matamata tauna do idia abia lao. Unai dina dekenai, be iena turadia ese aniani lasi ena taravatu do idia karaia.

²¹ “Daika tauna be, dabua gunana dekenai, dabua matamata sisina maragina ia turia, hanamoa totona? Bema unai bamona, matamata gauna do ia veria, ia darea, bona matu dikana ia vara. ²² Daika tauna be, kopina gunana lalonai uaina matamata do ia bubua? Bema unai bamona, uaina ese kopina do ia darea, uaina ia bubua kava, bona kopina do ia dika vadaeni. To namo be uaina matamata, kopina matamata lalonai do idia atoa.”

Diba tahua taudia ese Sabati ena taravatu ta idia naria lasi

²³ Sabati Dina ta, koni ia tubu gabuna dekenai Iesu ia raka neganai, iena diba tahua taudia ese koni huahua haida idia kokia. ²⁴ Farisea taudia ese ia dekenai idia nanadaia, idia gwau, “Badina dahaka idia ese mai taravatu kara idia karaia, Sabati Dina neganai?”

²⁵ Iesu ia haere henia, “Umui duahia lasi Davida ena kara, ia bona iena taudia idia hitolo mase, aniani be lasi neganai? ²⁶ Abiatara ia Hahelagaia Tauna Badana neganai, Davida ese Dirava ena dubu ia raka vareai, idia atoa Dirava ena vairanai paraoa ia ania, iena taudia dekenai ia henia danu. Unai paraoa be helaga momokani, hahelagaia taudia sibona idia ania diba.”

²⁷ Idia dekenai Iesu ia hamaoroa, ia gwau “Dirava ese Sabati ia karaia taunimanima totona, Dirava ese taunimanima ia karaia lasi Sabati totona. ²⁸ Unai dainai Taunimanima ena Natuna be Sabati ena biaguna.”

3

Imana ia dika tauna Iesu ese ia hanamoa

¹ Iesu dubu lalonai ia raka vareai lou, unuseni be imana ia dika tauna ta ia noho. ² Vadaeni, tau haida ese Iesu idia itaia namonamo. Bema hanamoa kara ia karaia Sabati Dina neganai, idia ese ia do idia samania.

³ Iesu ese unai imana ia dika tauna ia hamaoroa, ia gwau, “Oi toreisi, oi mai.” ⁴ Iesu ia nanadaia idia dekenai, ia gwau, “Taravatu be dahaka? Kara namo ita karaia Sabati Dina neganai, o, kara dika ita karaia? Ta ita hamauria o ita hamasea?”

To idia be hereva lasi. ⁵ Mai badu bona lalohisihisi danu ia itadia, badina edia lalona be auka. Ia ese gorere tauna ia hamaoroa, ia gwau, “Oiemu imana oi abia isi.” Ia abia isi, vadaeni iena imana ia namo lou, imana kahana bamona. ⁶ Nega tamona Farisea taudia be murimuri dekenai idia lao, bona Heroda ena kahana taudia danu idia herevahereva, Iesu idia alaia mase dalana idia tahua.

Gorere taudia haida ma Iesu ese ia hanamoa

⁷ Iesu mai ena diba tahua taudia danu Galilea kone dekenai idia lao, vadaeni Galilea bona Iudea taudia momo herea be iena murinai idia raka. ⁸ Momo herea Iesu ena kara sivarai idia kamonai, bona idia mai ia dekenai. Idia mai Ieruselema, Idumea, Ioridane unai kahana, Turo bona Sidono kahana dekena amo. ⁹ Iesu ese iena diba tahua taudia ia hamaoroa vanagi ta idia abia mai, inai taunimanima momo ese iena gaukara dalana idia koua garina. ¹⁰ Badina be guna, gorere taudia momo ia hanamoa dainai, hari gorere taudia idau dau momo idia mai ia kahirakahira, ia dekenai idia kamokau totona. ¹¹ Lauma dikadia ese Iesu idia itaia neganai, idia moru diho, idia boiboi, idia gwau, “Oi be Dirava ena Natuna.”

¹² Bona Iesu ese idia ia gwau henia, iena ladana idia hedinarai lasi.

Diba tahua taudia 12 Iesu ese ia abia hidi

¹³ Iesu ia daekau ororo dekenai. Unuseni, ia ura henia taudia ia boiria, bona idia mai ia dekenai. ¹⁴ Bona taudia 12 ia abia hidi, ia dekenai dohore idia noho totona. Ia ese idia do ia siaia, haroro idia karaia totona. ¹⁵ Bona lauma dikadia lulua siahua ia henia idia dekenai.

¹⁶ Taudia be inai: Simona dekenai ladana matamata ia henia, Petero, ¹⁷ Iamesi, Sebedeo ena natuna, bona iena tadina Ioane dekenai ladana matamata ia henia, ladana be Boanere, anina be, “Guba boiboi natudia,” ¹⁸ Andrea, bona Filipo, bona Batolomeo, bona Mataio, bona Toma, bona Iamesi, Alepeo ena natuna, bona Tadeo, bona Roma taudia lulua gwauraia orea ena tauna ta ladana Simona, ¹⁹ bona Iuda Iskariote, Iesu ia samania tauna.

Taravatu hadibaia taudia idia badu Iesu dekenai

²⁰ Iesu ia lao ruma dekenai. Ia bona iena diba tahua taudia idia ura aniani, to taunimanima momo idia haboua lou dainai, idia be aniani dala lasi. ²¹ Iesu ena varavara ese Iesu ena kara sivarai idia kamonai neganai, idia lao, ia abia bona naria totona, badina haida idia gwau ia kavakava.

²² Taravatu hadibaia taudia idia mai Ieruselema dekena amo, idia gwau, “Belesebulo ia noho ia lalonai,” bona, “Lauma dikadia edia biaguna ena siahua dekenai ia ese lauma dikadia taunimanima dekena amo ia lulua.”

²³ Vadaeni Iesu ese taunimanima ia boiridia idia mai ia dekenai, bona parabole dekenai ia hereva idia dekenai. Ia gwau, “Edena bamona Satani sibona ese Satani do ia lulua? ²⁴ Bema gavamani ta taudia idia parara bona heai momo, dohore unai gavamani ia gini diba lasi. ²⁵ Bema iduhu ta taudia idia parara bona heai momo, unai iduhu ia gini diba lasi. ²⁶ Bema Satani sibona ena lalona dekenai ia heai, bona sibona ia parara, dohore ia noho diba lasi, ena dokona be kahirakahira.

²⁷ “Henaoa tauna be ia hegeregere lasi goada tauna ena ruma ia vareai. To bema goada tauna ia kwatua guna, vadaeni, unai neganai ia hegeregere kohu henaosa.

²⁸ “Momokani lau hamaoroa umui dekenai, Dirava ese taunimanima edia kara dika ibounai ia gwauatao diba, bona Dirava ena ladana hadikaia hereva danu. ²⁹ To, bema tau ta ese Lauma Helaga ena ladana ia hadikaia, Dirava ese unai dika be do ia gwauatao lasi. Iena dika be ia noho hanaihanai, kokia dalana be lasi.” ³⁰ Iesu ese inai bamona ia hereva, badina be idia gwau lauma dikana ia noho ia lalonai.

Iesu ena varavara korikori

³¹ Iesu ena tadina bona iena sinana idia mai, murimuri dekenai idia gini. Hereva idia siaia, idia ura itaia. ³² Taunimanima momo be Iesu kahirakahira idia helai, idia gwau, “Oiemu sinana bona tadina bona taihuna idia noho murimuri dekenai, idia tahua oi.”

³³ Iesu ia haere henai, “Lauegu sinana bona tadina be daika?” ³⁴ Iena matana ia negea unuseni helai taudia dekenai, ia gwau: “Lauegu sinana bona lauegu tadina be inai. ³⁵ Dirava ena ura idia karaia taudia, unai taudia be lauegu tadina, bona lauegu taihuna, bona lauegu sinana.”

4

Parabole: Uiti hadoa

¹ Iesu ia hadibaia lou kone dekenai. Bona taunimanima momo idia haboua ia dekenai. Idia be momo herea dainai, Iesu be vanagi ta dekenai ia guia, davara latanai. Vanagi latanai ia helai, bona taunimanima idia noho kone dekenai. ² Gau momo ia hadibaia parabole dekenai. Iena hadibaia hereva lalonai ia gwau,

³ “Umui kamoni. Tau ta ena uhe ia hadoa tano dekenai. ⁴ Ia hadoa neganai, uhe haida idia moru dala dekenai, bona manu idia mai idia ania. ⁵ Uhe haida idia moru nadi gabuna dekenai, unuseni be tano momo lasi dainai, idia tubu haraga, badina be tano ia dobu lasi. ⁶ Dina ia daekau neganai, iena siahua ese unai uhe matamata ia hamasea, badina idia be ramudia lasi. ⁷ Uhe haida be idia moru ava ginigini lalonai, bona uhe edia tubu dala be ava ginigini ese idia koua, bona au huahua ia atoa lasi. ⁸ To uhe haida idia moru tano namona dekenai, idia tubu namo herea, huahua idia atoa, haida 30, haida 60, haida 100.”

⁹ Vadaeni Iesu ia gwau, “Mai taiana tauna, namo ia kamoni.”

Badina dahaka Iesu ese parabole ia gwauraia?

¹⁰ Gabeai, Iesu sibona ia noho neganai, ia kamoni henai taudia bona iena diba tahua taudia 12 ese unai parabole ena anina idia tahua. ¹¹ Ia hereva idia dekenai, ia gwau, “Dirava ena Basileia hereva ia hunia lasi umui dekenai, to murimuri taudia dekenai, gau ibounai lau hadibaia parabole dekenai. ¹² Buka Helaga ia gwauraia inai:

“Idia itaia, to anina idia diba lasi,
bona idia kamoni, to hereva ena anina idia davaria lasi,
edia lalona idia giroa garina,
bona edia dika be do ia gwauatao garina.”

Uiti uhena parabole ena anina

¹³ Iesu ia hamaoroa idia dekenai, “Bema inai parabole ena anina umui diba lasi, edena bamona parabole haida edia anina dohore umui diba?

14 Uhe hadoa tauna ese Dirava ena hereva ia hadoa, 15 Taunimanima haida be unai hereva ia moru dala dekenai tano bamona. Hereva idia kamona, to nega tamona Satani ia mai, idia lalonai hadoa hereva gauna ia abia lao. 16 Hegeregere, uhe haida idia moru nadi dekenai, be taunimanima haida bamona. Hereva idia kamona neganai, idia abia dae haraga, mai moale danu. 17 To idia be ramu lasi dainai, nega sisina mo idia goada. Gabeai inai hadibaia hereva dainai, nega dika bona dagedage idia mai neganai, idia moru haraga. 18 Bona haida be uhe ia moru ava ginigini lalonai hegeregere. Inai taudia be hereva idia kamona vadaeni. 19 To tanobada gaudia dekenai lalao momo, bona koku ura henia bada, bona ura dika idauidau dainai, hereva ena tubu dala idia koua. Bona au huahua idia atoa lasi. 20 To haida be uhe ia moru tano namona dekenai hegeregere. Hereva idia kamona, idia abia dae goada, au huahua idia abia. Haida 30, haida 60, haida 100.”

Diari herevadia

21 Iesu ma idia dekenai ia hereva, ia gwau, “Lamepa ita abia neganai, ita atoa uro lalonai, o mahuta patana henunai, a? Lasi, to lamepa ena gini gabuna dekenai ita atoa. 22 Hunia gaudia ibounai dohore idia hedinarai, koua gaudia ibounai dohore idia kehoa. 23 Mai taiana tauna, namo ia kamona.”

24 Bona ia gwau, “Umui kamona gaudia umui lalao namonamo. Umui henia hegeregere, dohore unai bamona idia henia lou umui dekenai, bona gau haida danu. 25 Mai ena gau tauna, gau haida danu do ia abia, to gau lasi tauna, ena gau abia dala do ia koua.”

Parabole: Uhe sibona ia tubu

26 Ma Iesu ia gwau, “Dirava ena Basileia be inai bamona: Tau ta tano latanai uhe ia negea. 27 Hanuaboi ia mahuta, dina neganai ia toreisi, vadaeni uhe hadoa gauna ia tubu bona ia vara, to hadoa tauna ia diba lasi edena bamona uhe ia tubu. 28 Tano sibona ese huahua ia havaraia, rau ia tubu guna, gabeai kwarana, inai murinai be anina ia vara. 29 To anina ia mage neganai, karaharaga ia utua kaia dekenai, badina huahua gogoa negana ia ginidae.”

Parabole: Mastadi au ena uhena

30 Iesu ia gwau, “Dirava ena Basileia be dahaka bamona? Edena parabole dekenai anina ita hedinarai? 31 Ia hegeregere mastadi au ena uhena bamona, tano dekenai hadoa neganai be ia maragimaragi, tanobada ena uhe idauidau edia bada ia be henunai. 32 To idia hadoa, bona ia tubu neganai, ia bada herea, aniani ava ibounai edia bada ia hanaia, iena rigi danu be bada herea, bona atai ai manudia idia helai unuseni, iena keruma dekenai.”

33 Bona parabole unai bamona momo dekenai Iesu ia hadibaia, idia kamona diba hegeregere. 34 Ia hadibaia parabole dekenai sibona. To gabeai, ia bona iena diba tahua taudia sibona idia noho neganai, anina ibounai ia hadibaia idia dekenai.

Iesu ese lai bona hurehure ia hadokoa

35 Unai dina, adorahi neganai, Iesu ese diba tahua taudia dekenai ia hamaoroa, ia gwau, “Davara unai kahanai ita hanaia lao.” 36 Vadaeni, idia ese unai taunimanima momo idia rakatania, Iesu danu vanagi dekenai idia gua, idia heau. Vanagi haida danu idia lao. 37 Lai bada herea ia mai, bona hurehure bada idia daekau, ela bona vanagi kahirakahira ia

honu. ³⁸ Iesu ia mahuta vanagi duduna dekenai, geda manokamanoka latanai. Idia lao ia dekenai, idia hanogaia. Idia gwau, “Hadibaia tauna e, oi lalao lasi, kahirakahira ita mase?”

³⁹ Vadaeni Iesu ia toreisi, lai dekenai ia gwau henia, bona davara dekenai ia hereva, ia gwau, “Umui doko, umui maino noho.” Vadaeni, nega tamona lai ia doko, bona hurehure be lasi. ⁴⁰ Iena diba tahua taudia dekenai Iesu ia gwau, “Umui dahaka gari momo? Edena bamona umui be abidadama lasi?”

⁴¹ Idia hoa bona gari bada, idia hereva, “Inai tau be daika? Lai bona davara ese iena hereva idia kamonai henia!”

5

Iesu ese kavakava tauna ia hanamoa

¹ Davara unai kahanai kone dekenai idia kamokau, tano ladana Gerasa. ² Iesu ese vanagi ia rakatania neganai, mase guria gabuna dekenai noho tauna ta karaharaga ia mai ia dekenai. Lauma dikana ia noho inai tau lalonai. ³ Taunimanima be hegeregere lasi idia dogoatao, bona idia kwatua diba lasi. Auri kwatua gaudia danu be hegeregere lasi. ⁴ Nega momo auri kwatua gaudia dekenai iena imana bona iena aena idia guia, to imana bona aena kwatua gaudia ia makohia ore. Tau ta ese ia hamanadaia hegeregere lasi. ⁵ Dina ibounai, hanuaboi danu, mase guria gabuna dekenai bona ororo dekenai, ia tai bona boiboi, bona iena kopina ia utua nadi dekenai.

⁶ Daudau dekenai ia ese Iesu ia itaia, vadaeni ia heau Iesu dekenai bona ia tomadiho henia. ⁷ Ia boiboi goada, “Dahaka oi ura karaia lau dekenai, Iesu, Dirava Atai ai Momokani ena Natuna? Dirava ena ladana dainai lau noinoi, lau oi hahisia lasi.” ⁸ Badina Iesu ia hereva guna, ia gwau, “Vadaeni, lauma dikana e, inai tau oi rakatania, oi lao!”

⁹ Bona Iesu ia gwau, “Oiemu ladana be daika?”

Ia haere henia, “Lauegu ladana be Hutuma, badina ai be momo herea.” ¹⁰ Ia noinoi goada Iesu dekenai, “Mani ai do oi lulua daudau lasi. Ai ura noho inai tano dekenai.”

¹¹ Unuseni ororo ta dekenai boroma momo herea idia aniani noho. ¹² Lauma dikadia ese Iesu idia noia, idia gwau, “Oi siaia ai boroma dekenai, bona boroma lalonai ai vareai.” ¹³ Vadaeni Iesu ese idia ia siaia, bona lauma dikadia ese unai tau idia rakatania, idia lao vareai boroma lalonai. Nega tamona ororo dekenai amo boroma idia heau diho lao, idia moru davara dekenai. Ibounai idia maloa, idia mase. Idia be 2000 bamona.

¹⁴ Boroma naria taudia idia heau lao hanua, bona uma gabudia dekenai, unai sivarai idia gwauraia loaloa. Vadaeni taunimanima idia lao, dahaka ia vara gauna idia itaia. ¹⁵ Idia mai Iesu dekenai, bona guna mai ena lauma dika momo tauna idia itaia, ia helai diho, mai dabua, bona iena lalona be namo lou. Vadaeni ibounai idia gari. ¹⁶ Unai kara idia itaia taudia ese boroma bona lauma dikadia lulua sivarai idia hamaoroa hanua taudia dekenai. ¹⁷ Vadaeni idia ese Iesu dekenai idia noinoi, edia tano do ia rakatania.

¹⁸ Vanagi dekenai Iesu ia guia neganai, unai guna mai lauma dikadia tauna ese ia noinoi ia dekenai, ia gwau, “Lau ura loaloa oi danu.”

¹⁹ Iesu ia gwau, “Lasi, oi lao oiemu varavara bona turana dekenai, Lohiabada ia bogahishihisi oi dekenai, bona oi ia hamauria sivarai do oi hamaoroa.”

²⁰ Vadaeni ia lao Hanua 10, unuseni ia ese Iesu ena kara ia dekenai ena sivarai ia harorolaia, taunimanima ibounai idia hoa bada.

Iairo ena natuna kekeni bona rara gorere hahine Iesu ese ia hanamoa

²¹ Iesu ese vanagi dekenai ia hanaia lou davara unai kahanai, vadaeni taunimanima momo idia haboua ia dekenai, ia be kone dekenai ia noho. ²² Dubu ena lohia ta, iena ladana be Iairo, ese Iesu ia itaia neganai ia mai, ia tui diho Iesu ena aena badinai. ²³ Ia noinoi goada, ia gwau, “Egu natuna kekeni maragina be kahirakahira ia mase, lau noinoi, mani oi mai, oiemu imana oi atoa iena latanai, oi hamauria.”

²⁴ Iesu be dubu lohia tauna danu ia lao, taunimanima momo ese idia hagegea, bona momo be iena murinai idia raka.

²⁵ Taunimanima edia huanai be hahine ta. Inai hahine ia gorere lagani 12, iena gorere be rara moru. ²⁶ Muramura taudia momo ese iena gorere idia hanamoa gwaurai, to idia be hegeregere lasi. Iena moni bona kohu ia negea ore, to iena gorere be ia bada noho. ²⁷ Iesu ena kara sivarai ia kamoni. Unai dainai ia mai, taunimanima edia huanai ia vareai, Iesu ena dabua ia dogoatao. ²⁸ Badina be ia gwau, “Bema iena dabua sibona lau dogoatao, mauri do lau davaria.”

²⁹ Nega tamona rara gorere ia doko, hahine sibona ena lalona dekenai ia diba iena gorere ia ore. ³⁰ Iesu ia diba iena lalona dekena amo hamauria sياهو ia lao murimuri dekenai, unai dainai ia giroa, taunimanima dekenai ia nanadaia, “Lauegu dabua daika ese ia dogoatao?”

³¹ Iena diba tahua taudia idia gwau, “Taunimanima momo herea oi kahirakahira idia gini, idia dogoatao oi, badina dahaka oi gwau, ‘Daika ia dogoatao lau?’”

³² To Iesu ia giroa, ia dogoatao tauna ia tahua. ³³ Unai hahine ia heudeheude mai gari danu, ia diba dahaka ia vara ia dekenai. Ia mai, ia tui diho Iesu ena vairanai, dahaka ia vara gauna ia hamaoroa ia dekenai. ³⁴ Iesu ia gwau, “Lauegu natuna, oiemu abidadama dainai, mauri oi davaria vadaeni, oi lao mai maino danu, bona oiemu gorere do oi davaria lou lasi.”

³⁵ Ia hereva noho neganai, dubu lohia tauna ena taudia haida be iena ruma dekena amo idia mai. Dubu lohia dekenai idia hamaoroa, idia gwau, “Oiemu natuna ia mase vadaeni. Badina dahaka hadibaia tauna dekenai oi noinoi noho?”

³⁶ To edia hereva Iesu ia kamoni neganai, ia hereva dubu lohia dekenai, ia gwau, “Oi gari lasi, oi abidadama henia sibona.” ³⁷ Taunimanima dekenai ia gwau, “Umui noho, Petero bona Iamesi bona iena tadina Ioane sibona mo idia mai lau danu.” ³⁸ Idia lao, dubu lohia ena ruma dekenai idia ginidae, unuseni Iesu ese ia itaia, taunimanima momo idia taitai bada bona lalohisihisi regena idia karaia noho. ³⁹ Ia raka vareai, ia nanadaia, “Badina dahaka umui boibo bona tai momo? Kekeni ia mase lasi, ia mahuta.”

⁴⁰ Idia kiri ia dekenai, to Iesu ese idia ibounai ia lulua murimuri dekenai. Unai kekeni ena tamana bona sinana, bona iena bamona taudia sibona, ia hakaua lao kekeni ia hekure gabunai. ⁴¹ Iesu ese kekeni ena imana ia abia, ia hereva henia, ia gwau, “Talita kumi,” (anina be, “Kekeni e, oi toreisi”).

⁴² Nega tamona unai mase kekeni ese mauri ia davaria lou, ia toreisi bona ia raka. Iena laganai be 12. Ibounai idia hoa dikadika. ⁴³ Iesu ese sisiba goada ia henia idia dekenai, inai kara be taunimanima dekenai

do idia hamaoroa lasi. Bona ia hereva, aniani sisina kekeni dekenai idia henia, ia ania.

6

Iesu ia lao Nasareta hanua dekenai

¹ Iesu ese unai gabu ia rakatania, vadaeni ia lao iena hanua korikori dekenai. Iena diba tahua taudia ia danu idia lao. ² Sabati Dina neganai dubu lalonai ia hadibaia. Taunimanima momo ese Iesu ena hereva idia kamoni, bona idia hoa bada, idia gwau, “Inai tau ese inai gau edeseni ia davaria? Inai be dahaka aonega ia abia? Daika ese ia henia ia dekenai? Bona inai siahu karadia be edena bamona ia karaia?” ³ Inai be kamuta tauna, a? Maria ena natuna, Iamesi bona Iose bona Iuda bona Simona edia kakana, a? Iena taihuna idia danu ita dekenai idia noho, a?” Edia lalao be sisina dika Iesu dekenai.

⁴ Iesu ia hereva idia dekenai, ia gwau, “Taunimanima haida idia lalao peroveta tauna be tau badana, to iena hanua korikori, iena iduhu, bona iena ruma taudia idia lalao ia be tau badana lasi.”

⁵ Unai gabu dekenai siahu karadia ia karaia diba lasi, to gorere taudia tamona tamona sibona edia latanai iena imana ia atoa, edia gorere ia hanamo. ⁶ Iesu ia hoa bada, edia abidadama lasi dainai.

Iesu ese iena aposetolo ia siaia

Gabei ia lao hanua maragi ibounai dekenai, ia hadibaia karaia. ⁷ Bona iena taudia 12 ia boiria, idia mai ia dekenai, bona rua rua dekena amo idia ia siaia lao. Lauma dikadia lulua siahu ia henia idia dekenai. ⁸ Ia hadibaia, ia gwau, “Laolao gaudia umui abia lao lasi, raka durua au sibona, puse lasi, aniani lasi, moni lasi. ⁹ Tamaka umui atoa, to dabua rua umui atoa lasi.” ¹⁰ Ia hamaoroa, “Ruma ta dekenai umui daekau neganai, unuseni umui noho ela bona unai hanua umui rakatania. ¹¹ Bema gabu haida dekenai idia ura lasi umui, bona emui hereva idia kamoni lasi, umui rakatania neganai, emui aena kahu do umui negea oho, edia kara dika hedinarai totona.”

¹² Vadaeni, idia lao, idia haroro, edia haroro anina be, taunimanima edia lalona idia giroa. ¹³ Idia ese danu lauma dikadia momo idia lulua murimuri dekenai, bona gorere taudia momo edia latanai dehoru idia atoa, idia namo lou.

Ioane Bapatiso ia mase

¹⁴ King Heroda ese inai kara ena kiki ia kamoni, badina be Iesu ena kara namo sivarai taunimanima momo idia diba. Haida idia gwau, “Inai be Ioane Bapatiso, mase dekena amo ia toreisi, bona siahu karadia idia vara iena lalonai.”

¹⁵ To haida idia gwau, “Inai be Elia,” Haida idia gwau, “Inai be peroveta tauna ta, peroveta gunadia bamona.”

¹⁶ To Heroda ia kamoni neganai, ia gwau, “Inai be Ioane, guna iena kwarana lau utua oho, to hari mase dekena amo ia toreisi.” ¹⁷ Heroda be unai bamona ia hereva, badina be guna ia ese iena taudia haida ia siaia lao, Ioane idia dogoatao, dibura ruma lalonai idia atoa. Inai be Herodia ena ura. Herodia be Heroda ena kakana Filipino ena adavana, to Heroda ese ia adavaia. ¹⁸ Guna Ioane ese Heroda ia gwau henia, ia gwau, “Taravatu be, oiemu kakana ena adavana oi headava lasi.”

¹⁹ Unai dainai Herodia ia badu Ioane dekenai, ia ura ia alaia mase, to dala be lasi, ²⁰ badina be Heroda ia gari Ioane dekenai. Ia gari, badina

be ia diba Ioane be kara maoromaoro tauna, bona helaga tauna, bona Heroda ese Ioane ia naria namonamo. Nega momo Ioane ena hereva be Heroda ia kamonaia, bona ia daradara momo, to ia ura dikadika ia kamonaia.

²¹ Heroda ena vara laloatao dinana ia ginidae neganai, aria badana ia karaia, hanua lohiadia bona tuari lohiadia bona Galilea kahana tau badadia ia boiria, idia mai. Vadaeni, inai be Herodia ena nega namona.

²² Herodia ena natuna kekeni ia raka vareai, ia mavaru, Heroda mai ena vadivadi taudia danu idia moale bada. Heroda ese kekeni dekenai ia hereva, ia gwau, "Oiemu ura oi gwauraia, dohore lau henia oi dekenai."

²³ Ia gwauhamata metauna karaia, ia gwau, "Dahaka gau oi noinoi lau dekenai, dohore lau henia oi dekenai. Bema lauegu basileia kahana oi noia danu, do lau henia oi dekenai."

²⁴ Kekeni ia lao murimuri dekenai, iena sinana ia nanadaia, ia gwau, "Dahaka lau noinoi?" Ia gwau, "Ioane Bapatiso ena kwarana."

²⁵ Karaharaga ia raka vareai lou king dekenai, ia noia, ia gwau, "Lauegu ura be harihari Ioane Bapatiso ena kwarana oi henia lau dekenai, mereki latanai."

²⁶ Heroda ena lalona ia hisihisi bada, to iena gwauhamata dainai, bona iena vadivadi taudia dainai, inai noinoi koua dala ia diba lasi. ²⁷ Heroda ese karaharaga iena tuari tauna ta ia siaia, ia hamaoroa Ioane Bapatiso ena kwarana ia utua oho, ia mailaia. Ia lao dibura ruma lalonai, Ioane Bapatiso ena kwarana ia utua oho. ²⁸ Ioane ena kwarana mereki latanai ia mailaia, kekeni dekenai ia henia. Gabeai kekeni ese sinana dekenai ia henia.

²⁹ Ioane ena diba tahua taudia ese inai sivarai idia kamonaia neganai, idia lao, iena tauanina idia loahaia, guria gabuna lalonai idia atoa.

Aposetolo taudia idia mai lou

³⁰ Aposetolo taudia idia haboua lou Iesu dekenai, idia karaia gaudia, bona hadibaia gaudia idia hamaoroa totona. ³¹ Taunimanima momo idia mai idia lao dainai, Iesu bona iena diba tahua taudia edia aniani nega be lasi. Unai dainai idia ia hamaoroa, ia gwau, "Umui mai, taunimanima noho lasi gabuna dekenai ita lao, ita laga-ani sisina." ³² Idia gua vanagi dekenai, taunimanima noho lasi gabuna dekenai idia lao.

³³ To idia lao neganai, taunimanima momo ese idia itaia. Vadaeni hanua ibounai dekena amo, aena dekenai idia heau lao, idia ginidae guna. ³⁴ Iesu ia ginidae, taunimanima momo ia itaia neganai ia bogahisihisi idia dekenai, badina idia be mamoe hegeregere, bona naria tauna lasi. Vadaeni, ia ese mauri sivarai momo ia hadibaia.

Iesu ese taunimanima 5000 mai kahana ia ubua

³⁵ Kahirakahira dina ia diho, iena diba tahua taudia idia lao Iesu dekenai, idia gwau, "Inai be aniani lasi gabuna, hanuaboi be kahirakahira ia mai. ³⁶ Taunimanima oi siaia lao namo, idia lao uma, bona hanua maragidia, aniani haida idia hoia, idia ania."

³⁷ Iesu ia haere, ia gwau, "Umui sibona ese aniani umui henia idia dekenai." Idia gwau, "Be, edena bamona? 200 kina ai abia, paraoa ai hoia, bona ai henia idia dekenai, idia ania, a?"

³⁸ Iesu ia nanadaia, ia gwau, "Umui emui aniani gaudia hida? Umui lao itaia."

Idia tahua, gabeai idia gwau, "Paraoa 5, bona gwarume rua sibona."

³⁹ Iesu ese taunimanima ibounai ia hamaoroa rei matamata gabuna idia helai diho. ⁴⁰ Idia helai diho, haida 100 dekena amo, haida 50 dekena amo. ⁴¹ Aniani gaudia paraoa 5 bona gwarume rua Iesu ese ia abia, iena matana ia negea gubai, ia guriguri, Dirava dekenai ia tanikiu, gabeai paraoa ia makohia, diba tahua taudia dekenai ia henia, idia henia taunimanima dekenai. Gwarume danu ia makohia, bona ia henia taunimanima ta ta dekenai. ⁴² Idia ibounai idia aniani, idia boga kunu. ⁴³ Gabeai idia ania lasi paraoa bona gwarume idia haboua, bosea 12 idia hahonua. ⁴⁴ Paraoa ania tatau be 5000.

Iesu davara kopina latanai ia raka

⁴⁵ Vadaeni nega tamona Iesu ese iena diba tahua taudia ia hamaoroa, vanagi dekenai idia guia, idia hanaia lao guna Betesaida hanua kahanai, to ia sibona do ia noho, taunimanima do ia siaia lao. ⁴⁶ Ia siadia lao murinai, ia daekau ororo dekenai, ia guriguri. ⁴⁷ Adorahi neganai vanagi be davara huanai, to ia sibona tano dekenai ia noho. ⁴⁸ Ia itaia, idia bara hekwarahi bada, badina lai be edia vaira dekenai ia mai. Bona hanuaboi lalonai, daba kahanai, idia dekenai davara ena kopina latanai Iesu ia raka lao. Ia ura vanagi ia hanaia. ⁴⁹ Idia itaia, davara kopina latanai ia raka neganai, idia laloa ia be lauma ta, bona idia boiboi dikadika. ⁵⁰ Badina be ibounai idia itaia, bona idia gari dikadika.

To karaharaga Iesu ia hereva idia dekenai, ia gwau, “Umui goada abia, umui gari lasi, inai be lau.” ⁵¹ Ia lao idia dekenai, vanagi dekenai ia guia, bona nega tamona lai ia doko. Vadaeni, idia hoa bada. ⁵² Badina be paraoa hoa kara idia itaia, to ena anina idia diba namonamo lasi, edia laloa be koua.

Genesareta dekenai

⁵³ Davara idia hanaia, vadaeni Iesu bona iena diba tahua taudia idia kamokau Genesareta kone dekenai. ⁵⁴ Vanagi dekena amo idia diho neganai, nega tamona taunimanima idia itaia ia be Iesu. ⁵⁵ Vadaeni unai kahana taudia ibounai idia heau lao, idia ese gorere taudia edia geda latanai idia abia lao Iesu ena noho gabunai. ⁵⁶ Bona edena gabu ia lao, hanua maragidia, hanua badadia, bona uma gabudia, ariara bona hoihoi gabudia dekenai, gorere taudia idia atoa. Gorere taudia idia noinoi Iesu dekenai, iena dabua ena duduna sibona do idia dogoatao, bona dogoatao taudia ibounai ese mauri idia davaria.

7

Iesu ese Farisea edia anina lasi taravatudia ia herevalaia

¹ Farisea taudia bona taravatu hadibaia taudia haida Ierusalem dekena amo idia mai, Iesu dekenai idia haboua. ² Idia ese iena diba tahua taudia haida idia itaia, imadia mai miro danu aniani idia ania, edia imadia idia huria lasi. ³ Badina be Farisea bona Iuda taudia aniani idia ania neganai, imadia idia huria namonamo guna. Inai be edia sene taudia edia taravatu. ⁴ Hoihoi gabuna dekena amo idia mai, bema idia digu lasi guna, idia aniani lasi. Taravatu momo inai bamona idia naria, kapusi, sosipani, aniani udaia gaudia huria taravatu.

⁵ Farisea taudia bona taravatu hadibaia taudia ese Iesu idia nanadaia, idia gwau, “Badina dahaka oiemu diba tahua taudia ese sene taudia edia taravatu idia naria lasi, aniani idia ania imadia mai miro danu?” ⁶ Ia hereva idia dekenai, ia gwau, “Umui be koikoi taudia, Isaia ese emui kara ia hedinaraiia vadaeni. Ia torea inai bamona, ia gwau:

“Inai bese taudia edia ududia sibona idia hanamoa lau, to edia kudoudia be daudau masemase lau dekena amo.
⁷Idia tomadiho lau dekenai, to anina lasi.
 Idia edia hadibaia hereva be taunimanima edia taravatu sibona.’

⁸“Umui ese Dirava ena taravatu umui rakatania vadaeni, bona taunimanima edia taravatu sibona umui dogoatao noho.”

⁹Ia gwau henia, ia gwau, “Momokani umui ese Dirava ena taravatu umui negea, emui sene taravatu umui dogoatao totona. ¹⁰Mose ia gwau, ‘Oiemu tamana bona sinana oi hanamoa,’ inai danu, ‘Tamana o sinana ia hadikaia tauna, umui alaia mase.’ ¹¹To umui gwau tau ta ese iena tamana o sinana dekenai ia hamaoroa, ‘Lauegu hanamoa gauna umui dekenai lau henia lasi, badina ia be Kobana.’ (Kobana ena anina be, Dirava dekenai ia atoa vadaeni.) ¹²Inai dala dekenai umui gwau iena tamana bona sinana ia durua lasi be namo. ¹³Inai bamona dala umui emui taravatu dekenai Dirava ena hereva umui hadikaia, taunimanima danu umui hadibaia inai bamona. Kara momo unai bamona umui karaia danu.”

Taunimanima hadikaia gaudia

¹⁴Iesu ese taunimanima momo ia boiria, idia mai lou ia dekenai, ia hereva henidia, ia gwau, “Umui ibounai lauegu hereva kamoni namonamo, bona diba. ¹⁵Murimuri dekenai noho gauna ia vareai tau lalonai ese unai tau ia hadikaia lasi, to lalona dekena amo mai gauna ese ia hadikaia. ¹⁶Mai taiana tauna, namo ia kamoni.”

¹⁷Iesu ese taunimanima ia rakatania, bona ruma dekenai ia raka vareai neganai, iena diba tahua taudia ese iena parabole ena anina idia nanadaia. ¹⁸Ia hereva idia dekenai, ia gwau, “Umui danu inai hereva anina umui diba lasi, a? Murimuri dekenai noho gauna ia vareai tau lalonai ese unai tau ia hadikaia lasi. Inai umui diba lasi, a? ¹⁹Badina be unai tau ena lalona ia vareai lasi, to ia lao bogana lalonai sibona, bona inai murinai ia lao negea gabuna, ani?” Unai hereva dekenai aniani gaudia ibounai ia gwauraia idia goeva.

²⁰Ia hereva lou, ia gwau, “Taunimanima edia lalona dekena amo daekau gaudia ese taunimanima idia hadikaia. ²¹Badina be taunimanima edia lalona dekena amo daekau gaudia be, laloa dikadia, sihari kava karadia, henaoka kara, taunimanima alaia kara, heudahanai kara, ²²tanobada gaudia ura dikadika kara, kerere idauidau, koikoi kara, lebulebu mai matabodaga kara, mata dika kara, tau ta ena ladana hadikaia kava kara, hekokoroku kara, bona Dirava ura lasi kara. ²³Inai gau dikadia ibounai lalona dekena amo idia mai neganai, taunimanima idia hamiroa bona hadikaia.”

Hahine ta ena abidadama

²⁴Unai gabu Iesu ia rakatania, ia lao Turo bona Sidono kahanai. Ia vareai ruma ta dekenai, ia ura taunimanima ta ia diba lasi, to ena hunia dala be lasi. ²⁵Hahine ta ena natuna kekeni maragina be mai lauma dikana danu. Iesu ena kara sivarai ia kamoni, maoromaoro ia mai, ia tui diho Iesu ena aena badinai. ²⁶Inai hahine be Iuda lasi hahinena, iena bese be Suro Penise. Ia noinoi Iesu dekenai, natuna lalonai noho lauma dikana ia lulua oho.

²⁷Iesu ia gwau, “Maragidia idia boga kunu guna be namo, edia aniani henia sisia dekenai be dika.”

²⁸ Hahine ia haere henia, ia gwau, “Lohiabada e, momokani, to sisia be pata henunai maragidia edia aniani momoru idia ania.”

²⁹ Hahine dekenai Iesu ia hereva henia, ia gwau, “Inai hereva dainai oi lao, lauma dikana ese oiemu natuna ia rakatania vadaeni.”

³⁰ Ia giroa lou iena ruma dekenai, kekeni ia davarua, mahuta patana dekenai ia hekure, lauma dikana ia rakatania vadaeni.

Hanua 10 kahana dekenai

³¹ Turo tanona Iesu ia rakatania, Sidono tanona bona Hanua 10 tanona ia raka hanaia, Galilea Gohu dekenai ia ginidae. ³² Idia ese taia kudima bona hereva diba lasi tauna idia hakaua lao ia dekenai. Idia noia iena imana ia atoa ia latana. ³³ Taunimanima dekenai amo Iesu ese ia hakaua siri idau gabu dekenai, vadaeni iena ima kwakikwakina unai tau ena taiana lalonai ia atoa. Unai murinai Iesu ia kanudi, bona tau ena malana dekenai iena ima kwakikwakina mai kanudi danu ia atoa. ³⁴ Iesu ese iena matana ia negea gubai, ia noinoi, gabeai ia gwau, “Epata,” hereva anina be, “Oi kehoa.”

³⁵ Vadaeni unai tau ena taiana ia kehoa vadaeni, ena malana ia ruhaia, bona ia hereva namonamo. ³⁶ Iesu ese idia ia hamaoroa, tau ta idia hamaoroa lasi, to idia kamona lasi, idia lao, sivarai idia kiki loaloa momo. ³⁷ Idia hoa bada, idia gwau, “Gau ibounai ia karaia namo herea, taia kudima tauna ena taiana ia kehoa, hereva diba lasi tauna ena malana ia hanamoa.”

8

Iesu ese taunimanima 4000 mai kahana ia ubua

¹ Unai neganai taunimanima momo idia hebou lou, edia aniani be lasi. Iesu ese iena diba tahua taudia ia boiria, idia dekenai ia hereva, ia gwau, ² “Lau bogahisihisi taunimanima dekenai, badina dina toi lau dekenai idia noho, idia be aniani lasi. ³ Bema idia lau siaia lao, idia lao mai hitolo danu, sedira dala dekenai idia moru, hitolo dainai, badina haida be daudau gabuna dekenai amo idia mai.”

⁴ Iena diba tahua taudia idia haere henia, idia gwau, “Inai be aniani lasi gabuna, bona hoihoi lasi gabuna, edena bamona aniani ita henia idia dekenai?”

⁵ Iesu ia nanadaia idia dekenai, ia gwau, “Umui emui aniani gaudia be hida?”

Idia gwau, “Paraoa 7.”

⁶ Vadaeni taunimanima dekenai Iesu ia hamaoroa, tano dekenai idia helai diho. Bona paraoa 7 ia abia, ia tanikiu henia, bona ia makohia, iena diba tahua taudia dekenai ia henia, idia henia taunimanima dekenai.

⁷ Edia gwarume maragidia haida idia noho, vadaeni Dirava dekenai Iesu ese ia tanikiu henia, gabeai ia gwau, idia danu taunimanima dekenai idia henia. ⁸ Ibounai idia ania, idia boga kunu. Gabeai idia ania lasi gaudia idia haboua. Bosea 7 idia hahonua. ⁹ Aniani idia ania tatau be 4000 bamona. Iesu ese idia ia siaia lao. ¹⁰ Unai murinai ia bona iena diba tahua taudia ese vanagi dekenai idia guia, idia lao Dalamana kahana dekenai.

Taunimanima haida ese toa idia ura

¹¹ Farisea taudia idia mai, Iesu danu idia herevahereva, idia ura toa ta guba dekenai amo ia hedinarai. Idia ura diba, iena siahua be ia bada o lasi. ¹² Iesu ena lalona ia hisihisi, ia gwau, “Inai nega taudia be dahaka

dainai toa ta idia tahua? Momokani lau hamaoroa umui, toa ta inai taudia do idia itaia lasi.”

¹³ Ia rakatania, vanagi dekenai ia guia lou, idau kahana dekenai ia heau lao.

Parabole: Farisea bona Heroda edia kara

¹⁴ Diba tahua taudia ese aniani idia mailaia lasi, idia laloaboio, vanagi dekenai paraoa tamona sibona ia noho. ¹⁵ Ia sisiba goada henia idia dekenai, ia gwau, “Umui naria namonamo, Farisea taudia bona Heroda edia paraoa hatubua gauna umui abia garina.”

¹⁶ Idia sibona idia herevahereva, “Aniani ita mailaia lasi dainai inai bamona ia hereva.”

¹⁷ Iesu ese idia edia laloa ia diba, vadaeni idia ia gwau henia, ia gwau, “Badina dahaka umui herevahereva aniani lasi dainai? Umui diba lasi bona laloa namonamo lasi, a? Umui emui lalona be ia koua noho, a?

¹⁸ Mai matana rua umui noho, to umui itaia lasi, a? Mai taiana rua umui noho, to umui kamonai lasi, a? Umui laloatao lasi, a? ¹⁹ Paraoa 5 lau makohia bona 5000 dekenai lau henia neganai, ania lasi gaudia dekenai bosea hida umui hahonua?”

Idia gwau, “12.”

²⁰ “Paraoa 7 lau makohia bona 4000 dekenai lau henia neganai, ania lasi gaudia dekenai bosea hida umui hahonua?”

Idia gwau, “7.”

²¹ Ia hereva idia dekenai, ia gwau, “Anina umui do diba lasi, a?”

Betesaida dekenai

²² Betesaida hanua dekenai idia ginida. Taunimanima ese matakepulu tauna ta idia hakaua lao Iesu dekenai, idia noia iena imana ia atoa iena latanai. ²³ Ia ese matakepulu tauna ena imana ia abia, ia hakaua lao hanua murimuri dekenai. Unuseni Iesu ese tau ena matana dekenai ia kanudi, bona iena imana be tau ena latanai ia atoa, ia nanadaia, ia gwau, “Oi itaia dahaka?”

²⁴ Matakepulu tauna ese iena matana ia negea, bona ia gwau, “Lau itaia taunimanima, idia be au bamona, idia loaloa.”

²⁵ Iesu ese iena imana ia atoa lou tau ena matana dekenai. Iena matana ia negea lou namonamo, vadaeni ia namo lou, bona gau ibounai ia itaia namonamo. ²⁶ Iesu ese tau ia siaia lao ena ruma dekenai, ia gwau, “Hanua taudia ta oi hamaoroa lasi.”

Petero ese Iesu ena ladana ia gwauraia Keriso

²⁷ Iesu mai ena diba tahua taudia danu idia lao Kaisarea Filipi kahana hanuadia dekenai. Dala dekenai idia raka neganai, iena diba tahua taudia dekenai ia nanadaia, ia gwau, “Taunimanima idia gwau lau be daika?”

²⁸ Idia haere henia, idia gwau, “Taunimanima haida idia gwau oi be Ioane Bapatiso, to haida idia gwau Elia, bona haida idia gwau peroveta tauna ta.”

²⁹ Ia nanadaia lou, ia gwau, “Umui laloa, lau be daika?”

Petero ia haere henia, ia gwau, “Oi be Keriso.”

³⁰ Iesu ese idia ia hamaoroa inai hereva idia gwauraia lasi, bona tau ta do idia hamaoroa lasi.

Iesu ia gwau ia be do ia mase, bona toreisi lou

³¹ Iesu ese diba tahua taudia ia hadibaia, ia gwau, “Taunimanima ena Natuna ese hisihisi momo do ia abia, hanua tau badadia, dubu

biagudia, bona taravatu hadibaia taudia ese dohore idia hadikaia, do idia alaia mase, bona dina toi murinai do ia toreisi lou.”³² Inai hereva ia hedinarai namonamo. Vadaeni, Petero ese ia hakaua siri, ia gwau henia hamatamaia.³³ To Iesu ia giroa, iena diba tahua taudia ia itaia, bona ia ese Petero dekenai ia gwau henia, ia gwau, “Satani e, oi lao, Dirava bamona oi laloa lasi, taunimanima bamona sibona oi laloa!”

Mauri davarua dalana

³⁴ Iesu ese taunimanima ia boiria, bona ena diba tahua taudia danu, vadaeni ia hereva henia, ia gwau, “Bema tau ta ia ura lauegu murinai ia raka, ia sibona kopina ena namo do ia laloa lasi, to iena satauro do ia abia isi, bona lauegu murinai do ia mai.”³⁵ Badina be ia sibona ena mauri dogoatao tauna ese iena mauri dohore ia halusia, to iena mauri ia halusia lau dainai, bona Sivarai Namona dainai tauna ese iena mauri do ia davarua.³⁶ Tau ta bema tanobada ibounai ia abia, to iena mauri ena lauma ia halusia, dahaka namo dohore ia abia?³⁷ Tau ta be dahaka davana do ia henia iena mauri ena lauma hoia totona?³⁸ Bema tau ta lau dainai ia hemarai, o lauegu hereva dainai ia hemarai, inai Dirava ura lasi bona kara dika taunimanima edia vairanai, Taunimanima ena Natuna danu be unai tau dekenai do ia hemarai, iena giroa mai neganai, iena Tamana ena siahua, mai aneru helagadia danu.”

9

¹ Ia hereva henia, ia gwau, “Momokani lau hamaoroa umui, haida idia gini iniseni, do idia mase lasi ela bona Dirava ena Basileia idia itaia guna, mai siahua danu ia mai.”

Iesu idia itaia, iena toana be idau

² Dina 6 ia ore neganai, Iesu ese Petero bona Iamesi bona Ioane ia hakaua, idia daekau ororo badana dekenai, bona Iesu ena tauanina idia itaia be ia idau.³ Iena dabua ia diaridiari kurokuro bada herea, tanobada dabua huria tauna ta ese ia hakurokuroa diba lasi unai bamona.⁴ Idia itaia, Elia bona Mose idia hedinarai, Iesu danu idia herevahereva.⁵ Petero ese Iesu dekenai ia hereva, ia gwau, “Hadibaia tauna e, namo ita noho iniseni, oi ura palai ruma toi ai haginia, oiemu ta, Mose ena ta, bona Elia ena ta?”⁶ Ia hereva namonamo diba lasi, badina idia gari dikadika.

⁷ Ori ta ia koua idia dekenai, bona gado ta ori lalona dekena amo ia mai, ia gwau, “Inai be lauegu Natuna. Lau lalokau henia, umui kamoni henia.”⁸ Karaharaga unai gabu ibounai idia itaia namonamo, to tau ta idia itaia lasi, Iesu sibona mo idia danu.

⁹ Ororo dekena amo idia diho mai neganai, Iesu ese idia ia hamaoroa, inai idia itaia gaudia idia gwaurai lasi, ela bona Taunimanima ena Natuna be mase dekena amo ia toreisi lou.

¹⁰ Inai hereva idia sibona idia laloa, idia sibona idia herevahereva, “Inai mase dekena amo toreisi lou herevana be dahaka?”¹¹ Idia nanadaia Iesu dekenai, idia gwau, “Badina dahaka taravatu hadibaia taudia idia gwau, Elia do ia mai guna?”

¹² Iesu ia haere henia, ia gwau, “Momokani Elia ia mai guna, gau ibounai do ia hamaoroa guna totona, bona Buka Helaga edena bamona Taunimanima ena Natuna herevana ia torea, ‘Hisihisi momo do ia abia, bona do idia hahemaraia?’¹³ To lau hamaoroa umui, Elia ia mai vadaeni, bona dahaka idia ura gaudia idia karaia vadaeni ia dekenai, Buka Helaga ia torea bamona.”

Iesu ese gorere merona ta ia hanamoa

¹⁴ Iesu bona idia toiوسي be diba tahua taudia haida dekenai idia ginidae neganai, idia itaia, idia be taunimanima momo edia huanai. Taravatu hadibaia taudia danu idia hepapahuahu noho. ¹⁵ Taunimanima ibounai ese Iesu idia itaia, vadaeni idia hoa bada, idia heau lao ia dekenai, idia hanamoa. ¹⁶ Ia nanadaia, “Umui dahaka dekenai umui herevahereva noho idia danu?”

¹⁷ Taunimanima edia huanai tau ta ia haere henia, ia gwau, “Hadibaia tauna e, oi dekenai lauegu natuna lau mailaia, ia be hereva diba lasi lauma ese ia abia. ¹⁸ Ia dogoatao gabuna dekenai ia negea diho, uduna ranu kurokuro ia diho mai, isena sibona ia koria dikadika, bona iena kopina ia maragi vadaeni. Oiemu diba tahua taudia lau noia lauma dika idia lulua, to idia hegeregere lasi.”

¹⁹ Iesu ia haere henia, ia gwau, “O, abidadama lasi taudia, dina hida umui dekenai dohore lau noho? Dina hida lau gaukara umui danu? Mailaia lau dekenai.” ²⁰ Idia ese mero idia abia lao ia dekenai.

Lauma dika ese Iesu ia itaia neganai, nega tamona ia dagedage herea, bona mero ia hamorua diho tano dekenai, tano ia botai, uduna ranu kurokuro ia diho lao. ²¹ Iesu ese mero ena tamana dekenai ia nanadaia, ia gwau, “Edena negai inai gorere ia davaria?”

Ia gwau, “Ia maragina neganai. ²² Nega momo ia negea lahi lalonai, ranu lalonai danu, hadikaia totona, to bema oi karaia diba, mani oi bogahisihisi ai dekenai, bona oi durua ai.”

²³ Iesu ia gwau, “Dahaka dainai oi gwau, ‘Bema oi karaia diba?’ Abidadama tauna ese gau ibounai ia karaia diba.”

²⁴ Bona karaharaga momokani mero ena tamana be ia boiboi, ia noia, “Lau abidadama henia, lauegu abidadama maragimaragi mani oi durua.”

²⁵ Iesu ese taunimanima momo ia itaia, idia heau mai ia dekenai, vadaeni unai lauma dikana dekenai ia gwau henia, ia gwau, “Oi hereva diba lasi bona taia koua lauma, oi lao murimuri, mero lalonai oi vareai lou lasi.”

²⁶ Vadaeni, lauma ia boiboi goada, bona ia ese mero ia hamarerea dikadika, bona ia lao murimuri dekenai. Mero be mase tauna bamona, taunimanima idia gwau ia mase momokani. ²⁷ To Iesu ese iena imana ia dogoatao, ia abia isi, ia toreisi vadaeni.

²⁸ Ruma lalonai Iesu ia raka vareai neganai, iena diba tahua taudia ese idia nanadaia, idia gwau, “Badina dahaka aiemai lulua siahu be hegeregere lasi?”

²⁹ Idia dekenai Iesu ia gwau, “Inai bamona gauna lulua dala ta be lasi, guriguri sibona mo be hegeregere.”

Nega iharuana Iesu ia gwau do ia mase, bona toreisi lou

³⁰ Unai gabu Iesu ia rakatania, Galilea tano ia raka hanaia, ia ura taunimanima idia diba lasi ia lao, ³¹ badina be iena diba tahua taudia dekenai ia hadibaia, ia gwau, “Taunimanima ena Natuna be taunimanima ese dohore idia dogoatao, idia alaia mase, bona dina toi murinai do ia toreisi lou.”

³² Unai hereva ena anina idia diba lasi, to idia gari dekenai, idia nanadaia lasi.

Kaperanauma hanua dekenai

³³ Idia ginidae Kaperanauma hanua dekenai, ruma lalonai idia dekenai Iesu ia nanadaia, ia gwau, “Dala dekenai dahaka umui hereva hereva?”

³⁴ Idia hereva lasi, badina dala dekenai idia sibona idia herevahereva, daika be dohore ia tau bada herea. ³⁵ Ia helai diho, iena taudia 12 ia boiria, ia gwau, “Bema tau ta ena ura be ia gini, gunalaia tauna o biaguna, unai tau dohore ia lao gabeai, bona ia be dohore taunimanima ibounai edia hesiai tauna.” ³⁶ Ia ese mero maragi ta ia abia, edia huanai ia haginia, bona ia rosia. Ia hereva, ³⁷ “Daika ese natuna maragi inai bamona ia abia dae lauegu ladana dainai, be lau danu ia abia dae. Bema tau ta ese lau ia abia dae, lau sibona ia abia dae lasi, to lau ia siaia Dirava danu ia abia dae.”

³⁸ Ioane ese ia hamaoroa, “Hadibaia tauna e, tau ta ai itaia, oiemu ladana dekenai lauma dikadia ia lulua, to ia be iseda kahana tauna lasi. Unai dainai iena gaukara ai hadokoa, badina be ia be iseda kahana tauna lasi.”

³⁹ To Iesu ia gwau, “Hadokoa lasi, badina bema tau ta ese siahu kara egu ladana dekenai ia karaia, be nega sisina murinai hereva dika dekenai egu ladana ia hadikaia diba lasi. ⁴⁰ Daika ia ura lasi hadikaia ita, ia be iseda kahana durua tauna. ⁴¹ Daika ese ranu sisina ia henia umui dekenai lau dainai, badina umui be Keriso ena, momokani lau hamaoroa umui, unai tau ese davana namona do ia halusia lasi.

Kara dika ese taunimanima edia abidadama ia hadikaia

⁴² “Bema tau ta ese, lau dekenai ia abidadama henia mero maragina ta ia hakererea, unai tau ena aiona dekenai nadi badana idia kwatua, bona unai tau idia negea diho davara dekenai be ia namo. ⁴³ Bema oiemu imana ese kara dika ia karaia, oi utua negea, namo oi be imana tamona tauna bona mauri oi davaria. Badina ia namo lasi oiemu imana rua idia noho, to oi vareai lao hel dekenai, lahi habodoa diba lasi gabuna. ⁴⁴ Unai gabuna dekenai gaigai maragi idia mase lasi, lahi danu ia bodo lasi. ⁴⁵ Bema oiemu aena ese karadika ia karaia, oi utua negea, namo oi be aena tamona tauna, bona mauri oi davaria. Badina ia namo lasi oiemu aena rua idia noho, to oi vareai lao hel dekenai. ⁴⁶ Unai gabuna dekenai gaigai maragi idia mase lasi, lahi danu ia bodo lasi. ⁴⁷ Bema oiemu matana ese kara dika ia karaia, oi kokia, namo oi be matana tamona tauna, bona oi vareai lao Dirava ena Basileia dekenai. Badina ia namo lasi oiemu matana rua idia noho, to oi vareai lao hel dekenai. ⁴⁸ Unai gabuna dekenai, ‘gaigai maragi idia mase lasi, lahi danu ia bodo lasi.’

⁴⁹ “Lahi ese taunimanima ibounai do ia hagoevaia. ⁵⁰ Damena be gau namona, to bema damena be mamina lasi, edena bamona ena mamina oi abia lou? Umui emui lalona dekenai damena ena mamina namona umui abia, bona maino dekenai umui noho hebou.”

10

Iesu ese hahine negea kara ia herevalaia

¹ Iesu ia toreisi, ia lao Iudea kahanai, bona Ioridane Sinavai unai kahanai, taunimanima momo idia haboua lou ia dekenai, ia hadibaia lou, nega ibounai ia karaia bamona.

² Farisea taudia idia mai ia dekenai, idia ura koia, idia nanadaia, “Tau ta ena adavana ia negea kara be ia maoro o maoro lasi?”

³ Iesu ia haere henia, ia gwau, “Dahaka taravatu Mose ia henia umui dekenai?”

⁴ Idia gwau, “Mose ena taravatu be, headava hadokoa pepana tau ta ese ia torea, iena hahine dekenai ia henia, vadaeni ia negea.”

⁵ To Iesu ia hereva idia dekenai, ia gwau, “Umui emui lalona auka dainai Mose ese inai taravatu ia henia umui dekenai. ⁶ To gunaguna Dirava ese tanobada ia karaia neganai, ia ese taunimanima ia karaia, tau bona hahine. ⁷ Unai dainai tau ta ese iena tamana bona sinana ia rakatania, ia lao, adavana danu idia noho hebou. ⁸ Hari idia ruaosi tauanina be tamona. Unai dainai idia be rua lasi, to tamona sibona. ⁹ Dirava ese idia ia haboua vadaeni. Unai dainai taunimanima ese idia hamakohia, be mai taravatu.”

¹⁰ Idia mai lou ruma lalonai neganai, Iesu ena diba tahua taudia ese unai hereva ena anina idia tahua. ¹¹ Iesu ese idia ia hamaoroa, “Tau ta ese iena adavana ia negea, bona hahine ta ia adavaia, unai be ia heudahanai karaia. ¹² Hahine danu ese bema iena adavana ia negea, bona tau ta ia adavaia, unai be ia heudahanai karaia.”

Iesu ese maragidia ia hanamoa

¹³ Natudia maragi idia mailaia Iesu dekenai, idia ura iena imana idia edia latanai ia atoa, to diba tahua taudia ese idia lulua gwauria. ¹⁴ To Iesu ia itaia, ia badu, ia gwau henia, ia gwau, “Lau ura maragi idia mai lau dekenai, umui lulua lasi, badina idia bamona be Dirava ena Basileia taudia. ¹⁵ Momokani lau hamaoroa umui, daika ese Dirava ena Basileia be natuna maragina bamona ia abia dae lasi, ia be do ia vareai lasi unuseni.” ¹⁶ Vadaeni maragidia ia rosia, bona iena imana ia atoa edia latanai, ia hanamoa.

Mauri hanaihanai hereva

¹⁷ Dala dekenai Iesu ia raka neganai, tau ta ia heau mai, ia tui diho Iesu vairanai, ia nanadaia, “Hadibaia tauna namona e, dahaka lau karaia, lau mauri hanaihanai abia totona?”

¹⁸ Iesu ia haere henia, ia gwau, “Badina dahaka oi hereva lau be namo? Tau ta ia namo lasi, Dirava sibona mo. ¹⁹ Taravatu oi diba, ‘Oi tau ta alaia lasi. Oi heudahanai lasi. Oi henaaoa lasi. Oi samania koikoi lasi. Oi koikoi lasi. Oiemu tamana bona sinana oi hanamoa.’”

²⁰ Inai tau ia haere henia, “Hadibaia tauna e, lau mero neganai ia mai bona harihari, inai taravatu ibounai lau makohia lasi.”

²¹ Iesu ia itaia mai moale danu, ia ura henia, ia gwau, “Gau tamona dekenai oi hegeregere lasi, oi lao, oiemu koku oi hoia, ogogami taudia dekenai oi henia, gabeai koku namona do oi davaria guba dekenai, bona oi mai, laegu murinai oi raka.” ²² Unai hereva ia kamonai neganai, unai tau ena vairana ia metau, bona ia raka siri, mai lalohisihisi danu, badina ia be koku momo tauna.

²³ Iesu ia giroa, iena diba tahua taudia dekenai ia hereva, ia gwau, “Koku momo taudia Dirava ena Basileia idia vareai dala be mai hek-warahi bada!”

²⁴ Unai hereva dekenai diba tahua taudia idia hoa. Iesu ia hereva lou, “Laegu natudia e, Dirava ena Basileia vareai dala be auka! ²⁵ Kamelo ese nila matuna dekenai ia vareai lao be haraga, to koku momo tauna ese Dirava ena Basileia dekenai ia vareai dala be auka.”

²⁶ Idia hoa bada inai hereva dekenai. Bona idia sibona dekenai idia herevahereva, “Be! Daika ese mauri ia davaria diba?”

²⁷ Iesu ia itadia lou, ia gwau, “Taunimanima idia karaia diba lasi, to Dirava be ia diba, badina be Dirava ese gau ibounai ia karaia diba.”

²⁸ Petero ia laloa namonamo, ia gwau, “Aiemaï gau ibounai ai rakatania vadaeni, bona oiemu murinai ai raka.”

²⁹ Iesu ia gwau, “Momokani lau hamaoroa umui, bema tau ta ese iena ruma ia rakatania, o iena tadikakana, o taihuna, o sinana, o tamana, o natuna, o tano, bema lau dainai bona Sivarai Namona dainai inai gaudia ia rakatania, ³⁰ hari inai mauri neganai, iena gau do ia habadaia nega 100 bamona, ruma, tadikakana, taihuna, sinana, natuna, bona tano. Momokani taunimanima ese unai tau do idia hisihisi henia, to gabeai, vaira neganai, mauri hanaihanai do ia abia. ³¹ Taunimanima momo be tau badadia, to gabeai idia be tau maragidia, bona taunimanima momo be hari idia tau maragidia, gabeai be do idia tau badadia.”

Nega ihatoina Iesu ia gwau do ia mase, bona toresi lou

³² Ierusalemia ia lao dala dekenai idia raka. Iesu ia raka lao guna, unai dainai iena taudia idia hoa, bona iena murinai idia raka, mai edia gari bada. Ia ese iena taudia 12 ia hakaua siri, gabeai ia dekenai do idia vara gaudia ibounai ia hamaorodia lou. ³³ Ia gwau, “Ita lao Ierusalemia, unuseni tau ta ese Taunimanima ena Natuna do ia henia dubu biagudia bona taravatu hadibaia taudia dekenai. Do idia gwau ia be do ia mase, bona do idia henia idau bese taudia dekenai, alaia mase gwauria. ³⁴ Do idia hevaseha ia dekenai, do idia dadabaia, do idia kanudi henia, bona do idia alaia mase. Dina toi murinai do ia toresi lou.”

Iamesi bona Ioane idia ura dagi bada

³⁵ Sebedeo ena natudia, Iamesi mai Ioane danu idia lao, Iesu dekenai idia hereva henia, idia gwau, “Hadibaia tauna e, ai ura aiemaï noinoi gauna oi henia ai dekenai.”

³⁶ Ia gwau, “Umui ura dahaka lau karaia umui dekenai?”

³⁷ Idia gwau, “Oiemu Basileia oi abia neganai, ai ura oiemu badibadinai do ai helai, ta idiba kahanai, ta lauri kahanai.”

³⁸ Iesu ia hereva idia dekenai, ia gwau, “Umui diba lasi dahaka umui noinoi. Lau inua gauna umui danu inua diba, a? Idia henia lau dekenai bapatiso, umui danu abia hegeregere?”

³⁹ Idia gwau, “Ai abia diba.”

Iesu ia hereva idia dekenai, “Dahaka lau inua be umui danu do umui inua, bapatiso idia henia lau dekenai, be do idia henia umui dekenai danu. ⁴⁰ To lauegu idiba kahanai bona lauri kahanai helai gabudia be lau sibona lau atoa lasi. Unai helai gabudia Dirava ese ia atoa hegaegae, bona ia sibona ia diba daika dekenai dohore ia henia.”

⁴¹ Taudia 10 idia kamoni, vadaeni idia badu Iamesi bona Ioane dekenai. ⁴² Iesu ese ibounai ia boiria, idia mai ia dekenai, ia hereva henia, ia gwau, “Umui diba, idau bese taudia edia lohia taudia ese hesiai gaukara idia karaia lasi, to idia hereva sibona, bona edia hereva gauna be edia hesiai taudia idia kamoni, bona karaia. ⁴³ To umui be unai kara bamona do umui karaia lasi, umui ta ia ura be tau bada herea gwauria, be hesiai gaukara do ia karaia umui dekenai. ⁴⁴ Umui ta, ia ura be lohia tauna gwauria, ia be umui ibounai dekenai hesiai gaukara do ia karaia. ⁴⁵ Badina Taunimanima ena Natuna ia mai lasi, hesiai taudia ese iena gaukara idia karaia totona, to ia mai be hesiai gaukara ia karaia totona, bona iena mauri do ia atoa diho, taunimanima momo edia dika davana karaia totona.”

Ieriko hanua dekenai: Matakepulu tauna

⁴⁶ Idia ginidae Ieriko hanua dekenai. Iesu, mai ena diba taudia taudia, bona taunimanima momo Ieriko hanua idia rakatania neganai, matakepulu tauna ladana Batimeo, Timeo ena natuna, noinoi tauna, ia helai dala badinai. ⁴⁷ Ia kamoni Iesu, Nasareta tauna, be ia raka kahira, vadaeni ia boiboi goada, ia gwau, “Iesu e, Davida ena natuna, mani oi bogahisihisi lau dekenai.”

⁴⁸ Taunimanima idia badu ia boiboi dainai. Idia hamaoroa ia hereva lasi, to ia boiboi goada, ia gwau, “Davida ena natuna e, oi bogahisihisi lau dekenai.”

⁴⁹ Iesu ia gini noho, ia gwau, “Umui boiria, ia mai.”

Idia ese matakepulu tauna idia boiria, idia hamaoroa, “Oi gari lasi, oi toreisi, ia boiboi oi dekenai.”

⁵⁰ Ia ese iena dabua ia negea oho, ia toreisi haraga, ia lao Iesu dekenai.

⁵¹ Iesu ese ia nanadaia, “Oi ura dahaka lau karaia oi dekenai?”

Matakepulu tauna ia gwau, “Hadibaia tauna e, lau ura lauegu matana oi kehoa.”

⁵² Iesu ese ia hereva henia, ia gwau, “Oi lao, oiemu abidadama dainai mauri oi davaria vadaeni.” Nega tamona iena matana idia kehoa vadaeni, bona Iesu ena murinai ia raka lao.

11

Iesu be Ierusalemah hanua dekenai ia lao

¹ Idia mai Ierusalemah kahirakahira neganai, hanua maragi rua Betepage bona Betania dekenai idia ginidae, Olive Ororo ena badinai. Iesu ese iena diba taudia rua ia siaia. ² Idia dekenai ia hereva, “Umui lao vairana hanua dekenai, umui raka vareai, kwatua doniki natuna ta do umui itaia, tau ta iena latanai helai lasi guna, umui ruhaia, umui mailaia. ³ Bema tau ta ia hereva umui dekenai, ia gwau, ‘Dahaka umui karaia?’ umui gwau, ‘Lohiabada ese ia ura abia, bona nega sisina ia be do ia siaia lou oi dekenai.’”

⁴ Idia lao neganai, doniki natuna idia davaria kwatua gabuna dekenai, vadaeni idia ruhaia. ⁵ Unuseni gini taudia idia hereva, idia gwau, “Badina dahaka doniki natuna umui ruhaia?”

⁶ Iesu ena hereva gauna idia dekenai idia hamaoroa, vadaeni unuseni gini taudia idia hereva, “Ia namo.” ⁷ Idia ese doniki natuna idia hakaua lao Iesu dekenai. Idia edia dabua be doniki ena doruna dekenai idia atoa, vadaeni Iesu be doniki latanai ia helai. ⁸ Taunimanima momo ese edia dabua idia atoa dala latanai, bona haida be au raurau idia utua, dala latanai idia atoa. ⁹ Idia raka dala dekenai, Iesu ena vairanai bona ena murinai, idia boiboi goada, idia gwau,

“Hosana!

Lohiabada ena ladana dekenai ia mai noho tauna ita hanamoa!

¹⁰ Iseda tamana Davida ena basileia ia mai, ita hanamoa!

Hosana ia lao atai dekenai momokani!”

¹¹ Iesu be Ierusalemah hanua dekenai ia ginidae, Dubu Helaga lalonai ia raka vareai. Dubu lalonai gau ibounai ia itaia. Gabei, hanuaboi be kahirakahira dainai, ia bona iena diba taudia 12 danu idia lao lou Betania dekenai.

Iena hereva dekena amo Iesu ese au ta ia hamasea

¹² Kerukeru, Betania idia rakatania neganai, Iesu ia hitolo. ¹³ Fig au ta sisina daudau ia itaia, mai raurau. Vadaeni Iesu ia lao, anina abia totona,

to anina ia davarua lasi, raurau sibona mo, badina inai au ena huahua ato negana be do lasi. ¹⁴ Iesu ese inai au dekenai ia gwau henia, ia gwau, “Oiemu huahua tau ta do ia ania lasi ela bona hanaihanai.”

Inai hereva be iena diba taudia idia kamona vadaeni.

Iesu ese hoihoi taudia Dubu Helaga dekena amo ia lulua

¹⁵ Idia mai Ierusalem dekenai, vadaeni Iesu ia raka vareai Dubu Helaga lalonai, hoihoi taudia ia lulua murimuri dekenai. Moni idia senisi taudia edia pata ia negea diho, bona pune manu idia hoia taudia edia helai gaudia ia bubua. ¹⁶ Dubu Helaga lalonai idia hanaia lao kohu huaia taudia edia kara ia koua. ¹⁷ Idia dekenai ia hadibaia, ia gwau, “Buka Helaga lalonai inai bamona ia torea vadaeni: ‘Lauegu Ruma be bese ibounai edia guriguri Rumana gwauraia?’ To umui be henaoo taudia edia noho ruma umui halaoa vadaeni.”

¹⁸ Dubu biagudia bona taravatu hadibaia taudia ese inai hereva idia kamona neganai, Iesu alaia mase dala idia taudia hadibaia namonamo, badina ia dekenai idia gari. Idia edia gari ena badina be, taunimanima ibounai ese idia hoa bada, bona idia ura bada Iesu ena hadibaia hereva dekenai.

¹⁹ Hanuabo kahirakahira Iesu ese hanua badana ia rakatania.

Iesu ia gwau henia fig auna ia kakoro

²⁰ Dabai, dala dekenai idia raka lou, guna Iesu ia gwau henia fig au idia itaia, ibounai mai ramuna danu ia kakoro vadaeni. ²¹ Petero ia lalao noho, vadaeni ia hereva Iesu dekenai, “Hadibaia tauna e, oi itaia, oiemu hereva dekenai oi hadikaia fig au ia kakoro vadaeni.”

²² Iesu ia haere henia, ia gwau, “Dirava umui abidadama henia. ²³ Momokani lau hamaoroa umui, tau ta ese inai ororo ia hamaoroa, ia gwau, ‘Oi toresi, oi moru davara lalonai.’ Bema ia daradara lasi iena lalona dekenai, to ia abidadama henia iena gwauraia gauna do ia vara, iena hereva gauna do ia davarua momokani. ²⁴ Unai dainai lau hamaoroa umui, dahaka gau umui ura, guriguri dekenai umui noia neganai, bema umui abidadama henia momokani be do umui abia, vadaeni, umui ese do umui abia. ²⁵ Umui guriguri gwauraia neganai, idia hadikaia umui taudia edia dika do umui gwauatao. Unai neganai umui emui gubai ia noho Tamana ese umui emui dika do ia gwauatao. ²⁶ To bema umui gwauatao lasi, umui emui gubai noho Tamana ese danu emui dika do ia gwauatao lasi.”

Lohia taudia ese Iesu idia nanadaia, iena siahu be daika ese ia henia

²⁷ Idia mai lou Ierusalem dekenai. Iesu be Dubu Helaga lalonai ia raka neganai, dubu biagudia bona taravatu hadibaia taudia bona hanua tau badadia idia mai ia dekenai. ²⁸ Idia nanadaia, “Dahaka siahu dekenai inai kara oi karaia? Daika ese inai siahu ia henia oi dekenai, inai gaudia oi karaia gwauraia?”

²⁹ Iesu ia hereva idia dekenai, ia gwau, “Lau danu hereva tamona lau nanadaia umui dekenai, bema umui haere lau dekenai, lau danu do lau hamaoroa daika ena siahu dekenai inai kara lau karaia. ³⁰ Ioane ena bapatiso kara be guba dekena amo ia mai gauna, o taunimanima dekena amo ia mai?”

³¹ Idia sibona idia herevahereva, “Dahaka ita gwau? Bema ita hereva, ‘Guba dekena amo ia mai,’ ia be do ia gwau, ‘Badina dahaka umui abidadama henia lasi?’ ³² Sedira ita gwau, ‘Taunimanima dekena amo ia mai,’” — to idia gari bada taunimanima dekenai, badina ibounai

idia gwau Ioane ia peroveta tauna momokani. ³³ Idia haere henia Iesu dekenai, idia gwau, “Ai diba lasi.”

Vadaeni Iesu ia hereva, “Lau ese danu lau hamaoroa lasi daika ena siahu dekenai inai kara lau karaia.”

12

Parabole: Uma naria taudia dikadia

¹ Parabole ta Iesu ia hamaoroa idia dekenai, ia gwau, “Tau ta vain uma ia hadoa, ara ia karaia, vain huahua moia gabuna ia geia, uma naria ruma ia karaia. Unai murinai uma ia henia naria taudia dekenai, vadaeni ia lao hanua daudau dekenai. ² Huahua idia mage neganai, hesiai tauna ta ia siaia uma naria taudia dekenai, vain anina abia totona. ³ To idia ese hesiai tauna idia dogoatao, idia botaiia, gabeai idia siaia lou imana kavakava. ⁴ Hesiai tauna ta ma ia siaia, to idia haberoa kwarana dekenai, bona idia hahemaraia dikadika. ⁵ Ta ma ia siaia, to idia alaia mase, momo danu ia siaia, to idia ese haida idia botaiia, haida idia alaia mase. ⁶ Gabeai tamona sibona ia noho, uma biaguna ena natuna, ia lalokau henia. Dokona neganai ia siaia lao idia dekenai, ia gwau, ‘Ia be lauegu natuna dainai be do idia kamoni henia.’ ⁷ To uma naria taudia idia herevahereva, idia gwau, ‘Inai be dohore uma gabuna ia abia tauna, umui mai, ita alaia mase, dohore ita sibona uma gabuna ita abia.’ ⁸ Idia dogoatao, idia alaia mase, uma ena murimuri dekenai idia negea.

⁹ “Vain uma biaguna dahaka do ia karaia? Ia be do ia mai, uma naria taudia do ia alaia ore, vain uma gabuna be idau taudia dekenai do ia henia. ¹⁰ Inai Buka Helaga hereva umui duahia lasi guna, a? Ia torea:

“‘Ruma haginia taudia ese idia ura henia lasi nadi be, ruma ena kona nadi ia halaoa vadaeni.

¹¹ Inai be Lohiabada ena kara. Ita itaia, ita hoa.’”

¹² Vadaeni, dubu biagudia idia ura Iesu idia dogoatao, to idia gari taunimanima dekenai, badina be idia diba, unai uma parabole ia gwauraia idia dainai. Idia rakatania, idia raka siri.

Kaisara ena takisi moni

¹³ Farisea taudia, bona Heroda ena kahana taudia haida idia siaia Iesu dekenai, idia ura koia, iena hereva dekenai idia samania totona. ¹⁴ Idia mai, idia hereva henia, “Hadibaia tauna e, ai diba oi hereva maoromaoro, oi gari lasi taunimanima dekenai. Oi lalao lasi daika tauna dekenai oi hereva, tau badana o tau maragina, to Dirava ena dala oi hadibaia hereva momokani dekenai. Takisi moni ai henia Kaisara dekenai, ia namo o lasi? ¹⁵ Ai henia, o ai henia lasi?”

Iesu ia diba edia koikoi, ia gwau, “Badina dahaka lau samania dala umui tahua? Siliva moni ta umui mailaia, lau itaia.”

¹⁶ Idia mailaia. Ia nanadaia, ia gwau, “Inai be daika ena laulau bona ladana?” Idia gwau, “Kaisara ena.”

¹⁷ Iesu ia hereva idia dekenai, ia gwau, “Kaisara ena gaudia umui henia Kaisara dekenai, Dirava ena gaudia umui henia Dirava dekenai.”

Iena hereva dekenai idia hoa bada.

Toreisi lou hereva

¹⁸ Sadukea taudia idia lao Iesu dekenai, idia lalao mase taudia do idia toreisi lou lasi.

¹⁹ Idia nanadaia, “Hadibaia tauna e, Mose ese inai taravatu ia henia ai dekenai, ‘Tau ta ena kakana ia mase neganai, bema iena adavana ia mauri noho, to natuna be lasi, vadaeni mase tauna ena tadina ese vabu do ia adavaia, bona natuna do ia havaraia, idia be iena kakana ena gwauraia.’ ²⁰ Tadikaka be 7, vara guna tauna ese hahine ta ia adavaia, gabei ia mase, natuna be lasi. ²¹ Tau namba 2 ese vabu ia adavaia, ia danu mase, natuna lasi, tau namba 3 danu unai bamona. ²² Tadikaka 7 unai bamona, ibounai inai hahine tamona idia adavaia, idia mase, natudia be lasi. Gabei hahine danu ia mase. ²³ Toreisi lou neganai, ia be daika ena adavana, badina be tau 7 ese idia adavaia vadaeni?”

²⁴ Iesu ia hereva idia dekenai, ia gwau, “Umui emui kerere be inai, Buka Helaga umui diba lasi, bona Dirava ena siahu umui diba lasi. ²⁵ Badina mase dekena amo toreisi lou taudia idia headava lasi, idia be guba dekenai noho aneru bamona.

²⁶ “To mase taudia toreisi lou hereva Mose ena Buka lalonai umui duahia lasi, a? Au ginigini sivaraina lalonai, Dirava ese Mose dekenai ia hamaoroa, ia gwau, ‘Lau be Aberahamo ena Dirava, Isako ena Dirava, Iakobo ena Dirava.’ ²⁷ Ia be mase taudia edia Dirava lasi, ia be mauri taudia edia. Unai dainai, umui be kerere bada.”

Taravatu badana momokani be lalokau

²⁸ Taravatu hadibaia tauna ta ia mai, idia edia herevahereva ia kamona, ia diba Iesu ia hereva maoromaoro idia dekenai, ia nanadaia, ia gwau, “Taravatu ibounai dekenai, edena be taravatu badana?”

²⁹ Iesu ia haere henia, ia gwau, “Ginigunana be inai, ‘Israela taudia e, umui kamona, Lohiabada iseda Dirava be Lohiabada tamona. ³⁰ Lohiabada oiemu Dirava oi ura henia, mai oiemu kudouna ibounai, mai oiemu lauma ibounai, mai oiemu lalona ibounai, bona mai oiemu goada ibounai.’ ³¹ Namba 2 be inai, ‘Oiemu dekena tauna do oi ura henia, oi sibona oi ura henia bamona.’ Taravatu haida ese inai rua idia hereaia diba lasi.”

³² Taravatu hadibaia tauna ia hereva henia, ia gwau, “Hadibaia tauna e, oi hereva momokani, oiemu hereva be maoromaoro. Dirava ia tamona, ta lasi, ia sibona. ³³ Tau ta ese Dirava dekenai do ia ura henia mai ena kudouna ibounai, mai ena lalona ibounai, mai ena goada ibounai, iena badibadinai tauna danu do ia ura henia, ia sibona ia ura henia bamona, unai kara ese boubou karadia ibounai ia hereaia.”

³⁴ Iesu ia diba ia hereva mai aonega danu, vadaeni ia hamaoroa, ia gwau, “Oi bona Dirava ena Basileia be daudau lasi.” Unai murinai idia be hegeregere lasi hereva ta idia nanadaia lou.

Iesu ese Farisea taudia edia hereva ia koua

³⁵ Dubu Helaga lalonai Iesu ia hadibaia neganai, ia gwau, “Taravatu hadibaia taudia be edena bamona idia gwauraia, Keriso be Davida ena natuna? ³⁶ Lauma Helaga ena aonega dekenai Davida ia gwau:

“‘Lohiabada ese egu Lohiabada dekenai ia hamaoroa, ia gwau: Lauegu imana idiba kahana dekenai do oi helai, ela bona oi dekenai idia tuari henia taudia ibounai, be oiemu aena henunai gaudia idia do lau halaoa.’

³⁷ “Bema Davida ese Keriso ia gwauraia, ‘Lohiabada,’ edena bamona Keriso be Davida ena natuna sibona?”

Taunimanima momo ese Iesu ena hereva idia kamona mai moale danu.

Iesu ese taravatu hadibaia taudia edia kara ia hedinaia

³⁸ Iena hadibaia hereva lalonai Iesu ia gwau, “Taravatu hadibaia taudia umui naria namonamo, idia ura bada dabua lata, bona idia ura hoihoi gabudia dekenai taunimanima ese idia hanamo bona saluti idia dekenai, ³⁹ bona dubu lalonai idia ura helai gaudia namodia dekenai idia helai, aria neganai danu inai bamona. ⁴⁰ Idia ese vabu edia rumadia idia hena, bona guriguri lata herea idia gwauraia koiko. Inai taudia edia dika davana bada herea do idia davaria.”

Vabu ese iena moni ia henia Dirava dekenai

⁴¹ Iesu ia helai moni udaia maua badina, ia itaia taunimanima ese moni idia udaia, moni bada taudia momo idia mai, moni bada idia udaia. ⁴² Vabu ogogamina ta ia mai, moni maragimaragi rua ia udaia, hegeregere toea rua bamona. ⁴³ Iesu ese iena diba taudia idia boiria, ia hamaoroa, “Momokani lau hamaoroa umui, unai vabu ogogamina ese ia udaia moni be bada, idia ibounai udaia moni be maragi. ⁴⁴ Badina be idia edia moni bada dekena amo sisina sibona idia udaia. To inai vabu ese iena moni ibounai ia henia vadaeni, iena aniani hoia moni danu.”

13

Iesu ese gabei do idia vara gaudia ia gwauraia guna

¹ Dubu Helaga Iesu ia rakatania neganai, iena diba taudia tauna ta ese ia hereva henia, ia gwau, “Hadibaia tauna e, oi itaia, inai nadi badadia bona ruma badadia be namo herea.”

² Iesu ia hereva ia dekenai, ia gwau, “Inai ruma badadia oi itaia, a? Nadi ta, nadi ta latana do ia noho lasi, ibounai do idia hamorua diho.”

Nega dikadia do idia vara

³ Iesu ia helai Olive Ororo dekenai, Dubu Helaga kahanai neganai, Petero, Jamesi, Ioane bona Andrea sibona ese idia nanadaia, idia gwau, ⁴ “Mani oi hamaoroa ai dekenai, inai gau ibounai edena negai do idia vara? Do idia mai kahirakahira toana be dahaka?”

⁵ Iesu ia haere henia, ia gwau, “Umui naria, tau ta ese umui ia hakaua kerere garina. ⁶ Badina taunimanima momo lauegu ladana dekenai do idia mai, do idia gwau, ‘Lau be Keriso.’ Taunimanima momo do idia hakaua kerere.

⁷ “Tuari sivarai do umui kamona, bona tuari idia gwauraia loaloa hereva kava do umui kamona neganai, umui gari lasi. Badina inai gaudia do idia vara, to dokona be gabei. ⁸ Badina bese do idia tuari bese dekenai, bona gavamani do idia tuari gavamani dekenai. Gabu momo dekenai tano do ia marere bada, hitolo bada negana danu do ia vara. Inai gaudia dekenai, nega dikana do ia matamaia.

⁹ “To umui sibona dekenai do umui naria namonamo, badina be idia ese umui do idia hakaua lao kaunsolo edia vairanai, bona dubu edia lalonai do idia dadabaia umui. Lau daina do umui gini gavana bona king taudia edia vairanai, idia dekenai hereva momokani do umui hedinaia totona. ¹⁰ To Sivarai Namona bese ibounai dekenai be do idia haroro henia guna. ¹¹ Idia ese umui idia hakaua kota taudia vairanai neganai, umui laloa guna lasi dahaka do umui gwauraia, hereva inai neganai do lau henia umui dekenai, badina be umui sibona do umui gwauraia lasi, to Lauma Helaga ese do ia hereva. ¹² Kakana ese tadina

do ia samania, ia mase, tamana danu natuna dekenai unai bamona do ia karaia, natudia danu ese tamadia sinadia do idia samania, idia mase. ¹³Lauegu ladana dainai, taunimanima ibounai do idia badu henia umui dekenai, to ia gini auka ela bona dokona tauna, be mauri do ia davaria.

Dika rohoroho gauna do ia hedinarai

¹⁴“To umui ese dika rohoroho gauna umui itaia neganai, iena gabu lasi dekenai ia gini — namo duahia tauna ese inai hereva anina ia diba namonamo — unai neganai ludea noho taudia namo idia heau lao ororo dekenai. ¹⁵Ruma ena guhi latanai noho tauna, be namo ia diho lasi ruma lalonai, iena gau abia totona. ¹⁶Uma lalonai noho tauna, namo ia giroa lou lasi, iena dabua abia totona. ¹⁷Unai neganai rogorogo hahine taudia bona hahine taudia, mai rata inua natudia, madi nega dika do idia davaria! ¹⁸Umui guriguri, inai nega dika do ia mai lasi keru neganai. ¹⁹Badina unai neganai be nega dika bada, idaunegai Dirava ese tanobada ia karaia ia mai bona harihari, dika unai bamona be lasi, gabeai danu dika unai bamona do ia vara lou lasi. ²⁰Bema unai nega dikadia Lohiabada ese ia hakwadogia lasi, taunimanima ta ia mauri lasi, to ia abia hidi taudia ia laloa dainai, do ia hakwadogia.

²¹“Bema tau ta ia hamaoroa umui, ‘Umui itaia, Keriso be iniseni,’ o, ‘Umui itaia, ia be unuseni,’ umui abidadama henia lasi. ²²Badina be Keriso koikoidia bona peroveta koikoidia do idia vara, toa karadia bona hoa karadia do idia hedinarai, kahirakahira Dirava ena abia hidi taudia do idia hakaua kerere. ²³Umui naria namonamo. Inai gabeai do idia vara gaudia ibounai, be hari lau hedinarai vadaeni umui dekenai.

Taunimanima ena Natuna do ia mai

²⁴“Unai neganai, nega dikana ia ore murinai, dina do ia dibura, hua danu do ia diari lasi. ²⁵Hisiu guba dekena amo do idia moru, bona guba dekenai idia noho siahu gaudia do idia mareremarere. ²⁶Unai neganai Taunimanima ena Natuna do idia itaia, ori latanai do ia mai, mai siahu bada, mai hairai bada danu. ²⁷Ia ese iena aneru do ia siaia, lai 4 gabudia dekena amo, iena abia hidi taudia do idia haboua, tanobada gabudia ibounai, bona guba gabudia ibounai dekena amo.

Parabole: Lohiabada ena mai do umui naria namonamo

²⁸“Umui ese fig au parabole ta, do umui laloa, fig ena rigi maragina ia tubu, bona iena rau toana ia hedinarai neganai, umui diba lahara negana ia kahirakahira. ²⁹Unai dainai, inai gaudia idia vara umui itaia neganai, umui diba nega be ia kahirakahira, ia ginidae vadaeni iduara dekenai. ³⁰Momokani lau hamaoroa umui, inai nega noho taunimanima idia do mase ore lasi, ela bona inai gaudia ibounai do idia vara vadaeni. ³¹Guba bona tanobada do idia ore, to lauegu hereva do idia ore lasi.

Dina o hora be tau ta ia diba lasi

³²“To unai dina bona dina gauna, tau ta ia diba lasi, aneru guba dekenai idia diba lasi, Natuna danu ia diba lasi, to Tamana sibona ia diba.

³³“Umui naria namonamo, umui noga noho, badina be inai gaudia idia mai nega umui diba lasi. ³⁴Ia be tau ta hanua daudau dekenai ia lao bamona, iena ruma ia rakatania, iena hesiai taudia dekenai siahu ia henia, idia ta ta mai edia gaukara. Bona ruma biaguna ese iduara naria tauna dekenai ia hamaoroa, ia naria namonamo. ³⁵Unai dainai,

umui naria noho, badina umui diba lasi edena negai ruma biaguna do ia mai, adorahi, o hanuaboi momokani, o kokoroku boiboi negana, o dabai. ³⁶ Ia mai haraga garina, bona umui mahuta neganai ia ese umui ia davaria garina. ³⁷ Inai hereva lau hamaoroa umui, taunimanima ibounai dekenai danu lau hamaoroa, lau gwau, ‘Umui naria noho.’”

14

Iesu alaia dalana idia tahua

¹ Pasova bona mai hatubua gauna lasi paroa ariana, be dina rua gabeai do idia karaia. Dubu biagudia bona taravatu hadibaia taudia danu ese dala idia tahua, Iesu do idia dogoatao koikoi dala dekenai, bona alaia mase gwauraia. ² Idia hereva, “Aria neganai ita guia lasi, badina aria dekenai haboua taudia idia badu, bona heatu ia vara garina.”

Hahine ta ena kara namona

³ Iesu ia noho Betania hanua maragi neganai, Simona, lepera tauna ena ruma dekenai ia aniani. Hahine ta ia mai, bonana namo herea muramura, nadi kavabu lalonai, davana bada gauna ia mailaia. Inai kavabu ia makohia, bona muramura ia bubua Iesu ena kwarana dekenai. ⁴ Unuseni noho taudia haida idia badu, idia gwau, “Dahaka badina inai davana moni bada gauna ia negea kava inai bamona? ⁵ Bema unai bonana namo muramura ia hoia, 300 kina ia abia, ogegami taudia dekenai ia henia, be namo.” Hahine dekenai idia badu sisina.

⁶ To Iesu ia gwau, “Umui rakatania. Iena kara umui koua lasi. Ia be kara namona lau dekenai ia karaia. ⁷ Ogegami taudia be nega ibounai idia noho umui dekenai, bona umui ura neganai, kara namo umui karaia diba idia dekenai, to lau be nega ibounai umui dekenai lau noho lasi. ⁸ Ia diba gauna ia karaia, lauegu tauanina ia dahua, idia be do idia guria lau totona. ⁹ Momokani lau hamaoroa umui, tanobada ena kahana ibounai dekenai inai Sivarai Namona do idia haroro karaia, bona inai hahine ena kara danu do idia gwauraia, bona iena kara do idia laloatao.”

Iuda ese Iesu ia samania

¹⁰ Iuda Iskariote, diba tahua taudia 12 tauna ta, ia lao dubu biagudia dekenai, Iesu ia samania hereva ia gwauraia. ¹¹ Dubu biagudia idia kamoni, idia moale, idia gwauhamata moni do idia henia. Inai dainai Iuda ese dala ia tahua, edena bamona koikoi dekenai edia imadia dekenai Iesu do ia atoa.

Dokona anibouna

¹² Mai hatubua gauna lasi paroa ariana dina ginigunana, Pasova mamoe natuna alaia dinana, iena diba tahua taudia ese Iesu idia nanadaia, “Edeseni oi ura Pasova aria ai karaia hegaegae, oi ania?”

¹³ Iena diba tahua taudia rua Iesu ese ia siaia, ia gwau, “Umui lao, hanua badana dekenai umui raka vareai, unuseni ranu daramu huaia lao tauna do umui davaria. Iena murinai umui raka. ¹⁴ Ia raka vareai gabuna, inai ruma ena biaguna dekenai do umui hereva, umui gwau, ‘Hadibaia tauna ia gwau: Edeseni lau bona lauegu diba tahua taudia Pasova aria do ai ania?’ ¹⁵ Ruma ena daiutu badana ta atai ai do ia hedinarai, ia hagoevaia vadaeni. Unuseni iseda aria do umui karaia hegaegae.”

¹⁶ Unai diba tahua taudia ruaosi idia lao, hanua badana lalonai idia raka vareai, Iesu ia hamaoroa bamona idia davaria, bona unai gabu dekenai Pasova aria idia karaia hegaegae.

¹⁷ Adorahi, Iesu bona iena diba tahua taudia 12 idia mai. ¹⁸ Idia helai, aniani ania, vadaeni Iesu ia gwau, “Momokani lau hamaoroa umui, hari nega tamona ita aniani hebou tauna ta ese do ia samania lau.”

¹⁹ Idia herevahereva mai lalohisihisi bada danu, idia ta ta ese idia hereva, “Lau be lasi, a? Lau be lasi, a?”

²⁰ Iesu ese idia ia hamaoroa, ia gwau, “Taudia 12 tauna ta, ia ese lau danu disi tamona lalonai imana ia atoa. ²¹ Taunimanima ena Natuna ia lao, Buka Helaga ia torea bamona, to Taunimanima ena Natuna samania tauna, madi! Bema ia vara lasi be namo!”

Iesu ese Pasova ia henia diba tahua taudia dekenai

²² Aniani idia ania neganai, Iesu ese paraoa ia abia, ia guriguri, Dirava dekenai ia tanikiu henia, ia makohia, idia dekenai ia henia, ia gwau, “Umui abia, lauegu tauanina be inai.” ²³ Kapusi ia abia, ia tanikiu henia, ia henia idia dekenai, idia ibounai idia inua. ²⁴ Idia dekenai ia hamaoroa, ia gwau, “Lauegu rarana be inai, taravatu matamata ena rarana, ia bubua taunimanima momo dainai. ²⁵ Momokani lau hamaoroa umui, lau ese uaina do lau inua lou lasi, ela bona Dirava ena Basileia lalonai uaina matamata do lau inua.”

²⁶ Idia ese ane idia abia murinai, Olive Ororo dekenai idia raka lao.

Iesu ese Petero ia hamaoroa do ia gwau, “Lau diba lasi Iesu”

²⁷ Iesu ese idia dekenai ia hereva henia, ia gwau, “Umui ibounai, emui abidadama lau dekenai do umui rakatania, badina inai bamona Buka Helaga ia torea vadaeni: ‘Mamoe naria tauna lau alaia neganai, mamoe do idia heau kava.’ ²⁸ To gau tamona do umui lalao, lau toreiis lou murinai do lau lao Galilea dekenai, unai neganai egu murinai do umui mai.”

²⁹ Petero ese Iesu ia hereva henia, ia gwau, “Taunimanima ibounai do idia rakatania oi, to oi do lau rakatania lasi momokani.”

³⁰ Iesu ia haere henia, “Momokani lau hamaoroa oi, hari hanuaboi, kokoroku nega rua ia do boiboi lasi, nega toi do oi hereva, oi diba lasi lau.”

³¹ Petero ia hereva goada, ia gwau, “Bema oi mase neganai lau danu mase, lau be do lau hunia lasi oi, egu hereva dekenai. Lau be do lau hunia lasi oi, lasi momokani.” Ibounai idia hereva inai bamona.

Iesu Getesemane dekenai ia guriguri

³² Gabu ta ladana Getesemane dekenai idia ginidae, iena diba tahua taudia dekenai Iesu ia gwau, “Iniseni umui helai, lau lao guriguri gwauraia.”

³³ Petero bona Iamesi bona Ioane ia hakaua lao neganai, Iesu ena lalona be ia hisihisi bada. ³⁴ Ia hereva idia dekenai, “Lauegu lauma be ia hisihisi bada, mase bamona, umui noho iniseni, bona naria noho.”

³⁵ Ia raka lao sisina, tano dekenai ia moru diho, ia guriguri, iena guriguri hereva be, do ia abia nega dika ia ura lasi abia, bema dala ia noho. ³⁶ Ia gwau, “Aba, Tamagu, gau ibounai oi karaia diba, inai kapusi lau dekena amo oi abia lao, to egu ura oi karaia lasi, oiemu ura sibona mo do oi karaia.”

³⁷ Ia mai lou, ia ese idia ia davaria, idia mahuta noho. Petero dekenai ia gwau, “Simona e, oi mahuta noho, a? Oi goada lasi hora gauna tamona oi naria, a? ³⁸ Umui naria, umui guriguri, dika ese umui ia abia garina. Lauma ia ura goada, to tauanina ia manokamanoka.”

³⁹ Ia lao, ia guriguri lou. ⁴⁰ Ia mai lou, ia davaria idia mahuta lou, badina matadia idia metau, idia haere henia diba lasi.

⁴¹ Nega namba 3 ia mai lou, idia dekenai ia hereva, “Umui mahuta? Umui laga-ani noho? Vadaeni! Negana ia ginidae. Hari Taunimanima ena Natuna be ia henia vadaeni kara dika taudia dekenai. ⁴² Umui toreisi, ita lao, ia ese lau ia samania tauna be kahirakahira!”

Idia dogoatao Iesu

⁴³ Iesu ia hereva noho neganai, nega tamona Iuda, taudia 12 tauna ta ia mai. Iuda danu be tau momo, imadia dekenai be edia kaia bona au idia dogoatao. Idia be dubu biagudia bona taravatu hadibaia taudia bona hanua tau badadia ese idia siaia taudia. ⁴⁴ Iesu ia samania tauna ese toana ta ia henia idia dekenai, ia gwau, “Do lau kisi henia tauna, umui dogoatao, umui hakaua lao namonamo.”

⁴⁵ Vadaeni Iuda ia mai, bona maoromaoro ia lao Iesu dekenai, ia gwau, “Hadibaia tauna e!” Bona ia ese Iesu dekenai ia kisi. ⁴⁶ Idia dogoatao Iesu, idia abia.

⁴⁷ Gini kahirakahira tauna ta ese iena kaia ia veria daekau, Hahelagaia Tauna Badana ena hesiai tauna ena taiana ia utua oho. ⁴⁸ Iesu ese idia dekenai ia hereva, ia gwau, “Mai emui kaia bona au danu umui mai lau abia gwauria, henaoa tauna umui gua bamona, a? ⁴⁹ Dina ibounai umui danu lau noho Dubu Helaga lalonai, lau hadibaia umui, to umui dogoatao lasi lau. To hari inai kara ia vara be Buka Helaga hamomokania totota.”

⁵⁰ Diba tahua taudia ibounai idia rakatania, idia heau.

⁵¹ Uhau tauna ta Iesu ena murinai ia lao, rami sibona mo ia kwatua, ia danu idia dogoatao. ⁵² To ia ese iena rami ia rakatania, kopina kavakava ia heau.

Iesu, Hahelagaia Tauna Badana ena vairanai

⁵³ Iesu idia hakaua lao Hahelagaia Tauna Badana ena ruma dekenai. Dubu biagudia, bona hanua tau badadia, bona taravatu hadibaia taudia ibounai danu, be unuseni idia haboua. ⁵⁴ Iesu ena murinai be Petero ia raka, to sisina daudau ia noho. Petero ese Hahelagaia Tauna Badana ena ruma ena ariara lalonai ia raka vareai, hesiai taudia danu ia helai, lahi siahuna dekenai.

⁵⁵ Dubu biagudia bona kaunsolo taudia ibounai ese Iesu hamasea ena badina idia tahua, to ta idia davaria lasi. ⁵⁶ Badina be tau momo ese samani hereva koikoi sibona idia henia, to edia samani hereva be tamona lasi.

⁵⁷ Haida idia toreisi, idia samania koikoi, idia gwau, ⁵⁸ “Ai kamona ia gwau inai bamona, ‘Inai taunimanima edia imadia dekenai karaia Dubu Helaga, lau ese do lau hamakohia, bona dina toi murinai, imana dekenai karaia lasi gauna ta do lau haginia.’” ⁵⁹ To idia edia samani hereva danu be hegeregere lasi.

⁶⁰ Hahelagaia Tauna Badana ia toreisi, Iesu ia nanadaia, ia gwau, “Oi hereva lasi, a? Inai taunimanima idia samania oi. Edena kerere oi karaia?”

⁶¹ Ia hereva lasi, ia haere henia lasi.

Gabei Hahelagaia Tauna Badana ese ia nanadaia lou, ia gwau, “Oi be Keriso, a? Oi be Ladana Bada ena Natuna, a?”

⁶² Iesu ia gwau, “Lau inai, bona gabei Taunimanima ena Natuna do umui itaia, Siahu Ibounai Dirava ena idiba kahanai ia helai, guba ena ori lalonai do ia diho mai.”

⁶³ Hahelagaia Tauna Badana ese sibona ena dabua ia darea, ia gwau, “Badina dahaka ita ese ia samania daladia ita tahua noho? ⁶⁴ Dirava ena ladana hadikaia herevana umui kamonai vadaeni, umui laloe dahaka?”

Ibounai idia gwau ia mase be namo.

⁶⁵ Haida ese Iesu dekenai idia kanudi, haida ese iena matana idia koua, idia botai, idia gwau, “Peroveta hereva gwauraia!” Hesiai taudia haida ese edia imadia dekenai idia botai.

Petero ese Iesu ena ladana ia hunia

⁶⁶ Petero ia noho ariara dekenai, be Hahelagaia Tauna Badana ena hesiai kekeni ta ia mai. ⁶⁷ Petero be lahi ena siahu ia abia neganai, hesiai kekeni ese ia itaia, ia gwau, “Oi danu be Iesu, Nasareta tauna ena turana?”

⁶⁸ To ia gwau, “Lasi, inai tau lau diba lasi, bona oiemu hereva ena anina lau diba lasi.” Murimuri dekenai ia raka lao, iduara kahirakahira, unai neganai kokoroku ia boiboi.

⁶⁹ Gabeai hesiai kekeni ese ia itaia, bona gini noho taudia dekenai ia hereva lou, ia gwau, “Iesu ena turana ta be inai.” ⁷⁰ Petero ia gwau lou, “Lasi.”

Nega sisina Petero badinai gini taudia idia hereva lou, “Momokani, oi be idia ta, badina oi be Galilea tauna.”

⁷¹ Hereva dika siahu bada ia gwauraia, ia gwau, “Hari oi hereva tau lau diba lasi, lasi momokani.”

⁷² Kokoroku ia boiboi lou, vadaeni, Petero ese Iesu ena hereva ia laloe. Guna Iesu ia gwau, “Kokoroku nega rua ia do boiboi lasi, nega toi do oi hereva, oi diba lasi lau.” Vadaeni, Petero ia laloe momo, ia tai.

15

Iesu, Pilato ena vairanai

¹ Daba maragi neganai, dubu biagudia bona hanua tau badadia bona taravatu hadibaia taudia bona kaunsolo taudia ibounai idia hereva-hereva, vadaeni gabeai Iesu idia guaia, idia hakaua lao, Pilato dekenai idia henia. ² Pilato ese Iesu ia nanadaia, ia gwau, “Oi be Iuda taudia edia King, a?” Ia haere henia, “Gauna be, oi gwauraia hegeregere.”

³ Dubu biagudia be koikoi hereva momo idia gwauraia, hakererea totona. ⁴ Pilato ese ia nanadaia lou, ia gwau, “Oi haere henia lasi, a? Hereva momo dekenai idia samania oi, oi kamonai?”

⁵ Iesu ia haere henia lasi, hereva ta ia gwauraia lasi, unai dekenai Pilato ia hoa.

Iesu ia mase herevana Pilato ese ia gwauraia

⁶ Unai aria neganai, Pilato ena kara ta be, ia ese dibura tauna ta, edena tauna taunimanima ese idia gwauraia, be do ia kokia dibura dekena amo. ⁷ Dibura lalonai tau ta ladana Baraba ia noho, guna heatu neganai ia ese taunimanima ia alaia vadaeni. ⁸ Taunimanima ese Pilato idia noia, iena hanaihanai kara ia karaia lou. ⁹ Vadaeni Pilato ese idia dekenai ia nanadaia, “Umui ura Iuda edia King do lau ruhaia?” ¹⁰ Badina ia diba dubu biagudia sibodia edia mama dainai, Iesu idia abia lao kota dekenai.

¹¹ To dubu biagudia idia hereva goada taunimanima momo dekenai, idia gwau, “Pilato dekenai umui noia, Baraba do ia ruhaia.”

¹² Pilato be idia dekenai ia hereva, ia gwau, “Dahaka lau karaia inai umui gwauraia Iuda taudia edia King dekenai?”

¹³ Idia boiboi goada, idia gwau, “Kokoa satauro dekenai!”

¹⁴ Pilato ia gwau, “Badina dahaka, iena dika be dahaka?” To idia boiboi lou dikadika, “Kokoa satauro dekenai!”

¹⁵ Pilato ia ura unai taunimanima momo edia ura ia karaia dainai, ia ese Baraba ia ruhaia. To Iesu be tuari taudia edia imadia dekenai ia atoa, idia dadabaia, gabeai satauro dekenai do idia kokoa totona.

Iesu idia hadikaia

¹⁶ Tuari taudia ese Iesu idia hakaua lao gavana ena ruma lalonai, bona edia ore a taudia idia haboua. ¹⁷ Iena kopina dekenai dabua kakakaka idia atoa, bona au ginigini dekenai kwarana gauna idia karaia, iena kwarana latanai idia atoa. ¹⁸ Bona idia hevaseha henia, idia hanamoa koikoi. Idia gwau, “Oi namo? Iuda taudia edia King!” ¹⁹ Bona au dekenai iena kwarana idia botai, idia kanudi henia, gabeai idia tui diho, idia tomadiho koikoi. ²⁰ Inai hadikaia kara idia haorea murinai, unai dabua kakakaka idia kokia oho, bona iena dabua korikori ma idia atoa lou. Gabeai Iesu idia abia lao, idia kokoa satauro dekenai totona.

Iesu idia hamasea satauro dekenai

²¹ Kurene tauna ta, ladana Simona, Alesana bona Rufo edia tamana, gunika dekena amo ia mai, idia hamaoroa Iesu ena satauro ia huaia.

²² Idia ese Iesu idia hakaua lao gabu ta ladana Gologota dekenai, ladana ena anina be, Kwara Koukouna Gabuna. ²³ Uaina bona muro idia mikisi, bona Iesu dekenai idia henia, to ia inua lasi. ²⁴ Iesu idia kokoa satauro dekenai. Bona kasi idia gadara, iena dabua idia haria karaia taunimanima ta ta dekenai.

²⁵ Dabai dina gauna 9 neganai idia kokoa satauro dekenai. ²⁶ Satauro latanai inai samania hereva ia noho, torea hereva be, “Iuda taudia edia King.” ²⁷ Henaoa taudia rua ia danu nega tamona idia kokoa satauro dekenai, ta ena idiba kahanai, ta ena lauri kahanai. ²⁸ Unai dainai Buka Helaga hereva ia momokani vadaeni, torea hereva be, “Ia be kerere karaia taudia danu idia duahia nega tamona.”

²⁹ Raka hanaia taudia ese iena ladana idia hadikaia, bona idia hevaseha henia, idia gwau, “Oi be Dubu Helaga oi ura makohia ore, bona dina toi murinai haginia lou tauna, a? ³⁰ Oi sibona oiemu mauri dala oi karaia, bona satauro dekena amo oi diho mai!”

³¹ Dubu biagudia bona taravatu hadibaia taudia danu idia kiri, bona idia hereva, idia gwau, “Idau taudia ia hamauria, to ia sibona ia hamauria diba lasi! ³² Keriso, Israela taudia edia King, mani satauro dekena amo oi diho mai, ai itaia oi, bona ai be do ai abidadama henia oi!”

Iesu danu nega tamona idia atoa satauro dekenai taudia ruaosi danu ese idia hereva dika henia.

Iesu ia mase vadaeni

³³ Dina gauna 12 neganai ela bona dina gauna 3, unai tano ibounai be ia koua dibura dekenai, hanuaboi bamona. ³⁴ Dina gauna 3 neganai Iesu ia boiboi bada, “Eloi, Eloi, lama sabakatani?” Hereva ena anina be, “Lauegu Dirava e, lauegu Dirava e, dahaka dainai oi rakatania lau?”

³⁵ Ia kahirakahira gini noho taudia haida idia kamoni, idia gwau, “Ia be Elia dekenai ia boiboi.” ³⁶ Tau ta ia heau, sipanisi ta vinega dekena amo ia hahonua, bona au latana ta ena duduna dekenai ia atoa, bona Iesu dekenai ia henia, ia inua totona. Ia gwau, “Mani ita naria, bona ita itaia, bema Elia dohore ia mai bona abia diho, o lasi.”

³⁷ Iesu ia boiboi bada, bona ia mase vadaeni.

³⁸ Dubu Helaga ena koua dabua helagana badana ia darea, atai ai dekenai amo ia lao bona henunai, kahana rua ia lao. ³⁹ Tuari taudia edia biaguna be ia gini kahirakahira, ia itaia inai bamona Iesu ia mase neganai, ia gwau, “Momokani, inai tau be Dirava ena Natuna!”

⁴⁰ Hahine taudia haida danu idia itaia noho, sisina daudau idia gini. Idia haida be Maria Magadala, bona Maria, Iamesi maragina bona Iose edia sinana, bona Salome. ⁴¹ Inai hahine taudia ese Iesu ia noho Galilea neganai iena murinai idia raka, bona idia durua. Bona Iesu danu Ieruselema dekenai idia daekau mai hahine taudia momo danu be unuseni.

Iesu idia guria

⁴²⁻⁴³ Adorahi neganai, Iosepa, Arimatea hanua tauna, ia mai. Ia be kara maoromaoro kaunsolo tauna ta, ia danu Dirava ena Basileia ia mai dinana ia naria noho. Kerukeru be Sabati Dina, bona hari be Sabati totona karaia hegaegae dinana. Vadaeni Iosepa ese, mai gari lasi danu, ia raka lao Pilato ena vairanai, ia noia, Iesu ena tauanina do ia henia. ⁴⁴ Iesu ia mase vadaeni herevana Pilato ia kamona neganai ia hoa. Ia ese tuari taudia edia biaguna ia boiria. Ia nanadaia edena negai Iesu ia mase. ⁴⁵ Tuari biaguna ese Iesu ena mase ia hamomokania murinai, Pilato ese Iesu ena tauanina ia henia Iosepa dekenai.

⁴⁶ Iosepa ese dabua namona ia hoia, bona Iesu ena tauanina ia abia diho, ia kumia dabua dekenai, bona ia atoa guria gabuna lalonai. Inai guria gabuna be matu, nadi badana dekenai amo idia geia gauna. Vadaeni Iosepa ese nadi badana ia keia lao, guria gabuna ena iduara ia koua. ⁴⁷ Maria Magadala, bona Maria, Iose ena sinana, ese Iesu ena tauanina atoa gabuna idia itaia.

16

Iesu ia toreisi lou

¹ Sabati Dina ia ore murinai, Maria Magadala bona Maria, Iamesi ena sinana, bona Salome ese bonana namo muramura idia hoia, Iesu ena tauanina dekenai idia atoa totona. ² Pura ena dina ginigunana, dina ia daekau, daba maragi neganai, idia lao guria gabuna dekenai. ³ Idia sibona idia herevahereva, “Daika ese inai guria gabuna koua nadi do ia kokia?” ⁴ Matadia idia negea atai dekenai, idia itaia, koua nadi badana be ena gabu dekenai ia noho lasi. ⁵ Guria gabuna idia raka vareai neganai, uhu tauna ta ia helai idiba kahanai, idia itaia. Iena dabua be lata bona kurokuro. Idia gari bada.

⁶ To ia ese idia dekenai ia hereva, ia gwau, “Umui gari lasi, umui ese Iesu, Nasareta tauna, idia alaia mase satauro dekenai, umui tahua noho, to ia toreisi lou vadaeni, iniseni ia noho lasi. Guna iena tauanina idia atoa gabuna mani umui itaia. ⁷ Umui lao, iena diba tahua taudia bona Petero dekenai umui hamaoroa, Iesu ia lao umui vairanai, Galilea dekenai. Unuseni do umui itaia, umui dekenai ia hamaoroa guna bamona.”

⁸ Karaharaga idia raka lao murimuri dekenai, guria gabuna idia rakatania, idia heau, badina idia hoa bada, bona idia heudeheude. Tau ta dekenai idia hamaoroa lasi, badina idia gari.

Maria Magadala ese Iesu ia itaia

⁹ Iesu ia toreisi murinai, pura ena dina ginigunana daba maragi neganai, kara ginigunana ia karaia be ia gini Maria Magadala ena vairanai,

Maria ese Iesu ia itaia. Guna Maria dekena amo lauma dikadia 7 ia lulua oho. ¹⁰ Maria ia lao, guna idia noho Iesu danu taudia dekenai ia hamaoroa, idia tai noho neganai. ¹¹ Iesu ia mauri sivaraina, bona Maria ese ia itaia herevana idia kamonai neganai idia abidadama henia lasi.

Dala dekenai diba tahua taudia rua ese Iesu idia itaia

¹² Gabeai, diba tahua taudia rua be gunika dekenai idia raka lao gwau-raia. Iesu, idau tauna bamona, ia sibona ia hedinarai idia dekenai. ¹³ Idia ruaosi idia lao, diba tahua taudia haida dekenai idia hamaoroa, to idia abidadama henia lasi.

Iesu ese siahua ia henia diba tahua taudia dekenai

¹⁴ Gabeai diba tahua taudia 11 idia aniani neganai, Iesu ia hedinarai mai, idia itaia. Idia dekenai ia gwau henia, edia abidadama lasi dainai, bona edia lalo auka dainai. Badina Iesu ese mase dekena amo ia toreisi lou idia itaia taudia edia hereva idia abidadama henia lasi. ¹⁵ Idia dekenai ia hamaoroa, ia gwau, “Umui lao tanobada kahana ibounai dekenai, Sivarai Namona umui haroro henia taunimanima ibounai dekenai. ¹⁶ Daika daika idia abidadama henia, bona bapatiso idia abia, be mauri do idia davaria, to abidadama henia lasi taudia be Dirava ena Kota Badana dekenai do idia lusi momokani. ¹⁷ Abidadama taudia ese inai hoa karadia do idia karaia: Lauegu ladana dekenai lauma dikadia do idia lulua lao, gado matamata idauidau do idia hereva, ¹⁸ gaigai do idia abia isi, bema mase muramura idia inua kerere neganai, do ia hadikadia lasi, bona edia imadia gorere taudia edia latanai idia atoa neganai, gorere do ia ore.”

Dirava ese Iesu ia abia daekau guba dekenai

¹⁹ Lohiabada Iesu ese idia dekenai ia hereva henia ore, vadaeni guba ese Iesu ia abia daekau, bona Dirava ena idiba kahanai ia helai diho. ²⁰ Vadaeni diba tahua taudia idia lao, gabu ibounai dekenai idia haroro. Lohiabada be idia danu nega tamona ia gaukara, bona ia ese hoa karadia dekena amo, idia edia hereva ia hamomokania vadaeni.

SIVARAI NAMONA LUKA IA TOREA

Luka ese inai sivarai ia torea, ia siaia Teopilo dekenai

¹ Lohia tauna Teopilo e, taunimanima momo ese ita dekenai Dirava ia karaia gaudia ena sivarai idia torea vadaeni. ² Idia vara hamatamaia dekena amo, inai taudia ese edia matana dekenai inai kara idia itaia. Vadaeni edia sivarai idia harorolaia, bona idia herevalaia ita dekenai. ³ Unai dainai, Teopilo e, lau ura be inai sivarai lau torea namonamo lou, bona lau siaia oi dekenai, badina be inai idia vara gaudia lau tahu namonamo vadaeni, edia hamatamaia nega dekena amo. ⁴ Inai bamonamo lau karaia dainai do oi diba namonamo, oi dekenai idia hadibaia vadaeni gaudia, be momokani idia vara.

Ioane Bapatiso ena vara

⁵ Iudea tano dekenai Heroda ia king neganai, hahelagaia tauna ta ladana Sekaraia ia noho. Ia be Abia ena helaga oreo tauna ta. Ena adavana ladana be Elisabeta. Ia danu be oreo helagana dekena amo, Arona ena iduhu hahinena. ⁶ Idia ruaosi be kara maoromaoro taudia Dirava ena vairana dekenai, Lohiabada ena taravatu bona ena hereva ibounai idia badinaia momokani. ⁷ To idia ruaosi be natuna lasi, Elisabeta be natuna ia havaraia diba lasi dainai, bona idia ruaosi be idia buruka vadaeni.

⁸ Dina ta Sekaraia ese hahelagaia tauna ena gaukara ia karaia noho Dirava ena vairana dekenai, badina be unai dina be iena oreo taudia edia nega. ⁹ Vadaeni hahelagaia taudia edia kara hegeregerena, idia ese laki gadara dekena amo, Sekaraia idia abia hidi, pata helagana ena latanai muramura mai bonana namona do ia gabua, Helaga Gabuna lalonai. Vadaeni Sekaraia ia raka vareai Lohiabada ena Dubu Helaga lalonai. ¹⁰ To taunimanima momo be murimuri dekenai idia gini noho, idia guriguri, edia kara hegeregerena, muramura be Dubu Helaga lalonai idia gabua neganai.

¹¹ Unai neganai Sekaraia ese Lohiabada ena aneru ta ia itaia, muramura mai bonana ena pata ena idiba kahana dekenai ia gini. ¹² Sekaraia ese ia itaia neganai, iena kudouna dekenai ia gari dikadika. ¹³ To aneru ese ia dekenai ia hereva, ia gwau, "Sekaraia, oi gari lasi, Dirava ese oiemu guriguri ia kamona vadaeni. Oiemu adavana Elisabeta ese oiemu natuna ta do ia abia, iena ladana do oi ato Ioane. ¹⁴ Do umui moale bada herea, bona taunimanima momo danu, be Ioane ia vara dainai, do idia moale. ¹⁵ Badina be Lohiabada ena vairana dekenai ia be do tau badana ta. Ia be uaina o kekeru muramura do ia inua lasi, bona iena sinana ena bogana dekenai ia noho neganai Lauma Helaga ese do ia abia. ¹⁶ Ia ese Israela taudia momo do ia hakaudia lou Lohiabada edia Dirava dekenai. ¹⁷ Ia be Dirava ena hesiai tauna do ia lao, mai goadana bona mai siahuna, Elia peroveta tauna ena kara hegeregerena. Ia ese tamadia edia lalona do ia hagihoa, vadaeni edia natudia danu do idia noho hebou mai lalona tamona. Kamona lasi taudia dekenai aonega do ia henidia, abidadama taudia do idia lao. Lohiabada ena bese taudia do ia abidia hegaega, Lohiabada ena mai do idia naria totona."

¹⁸ Inai aneru dekenai Sekaraia ese ia hereva, ia gwau, “Inai be edena bamona do lau diba? Lau be buruka tauna, egu adavana danu ia buruka vadaeni.”

¹⁹ Aneru ia haere, ia gwau, “Lau be Gabriela, lau be Dirava ena vairana dekenai lau gini. Dirava ese lau ia siaia, oi dekenai lau hereva, bona oi dekenai inai sivarai namona lau hamaoroa totona. ²⁰ To egu hereva namona oi hamomokania lasi. Unai dainai oiemu uduna do ia koua, oi be do oi hereva diba lasi, ela bona lauegu hereva gaudia ibounai do idia vara. Lauegu hereva gaudia be edia nega korikori dekenai do idia vara momokani.”

²¹ Taunimanima ese Sekaraia dekenai idia naria mase, idia laloo momo, badina be nega daudau Dubu Helaga dekenai ia noho. ²² Ia raka murimuri dekenai neganai, be idia ta dekenai ia hereva diba lasi. Vadaeni idia diba ia ese Dubu Helaga dekenai gau idauna ta ia itaia vadaeni. Ia ese toa dekena amo idia dekenai ia hadibaia, badina iena uduna be ia koua momokani.

²³ Sekaraia ena gaukara negana Dubu Helaga dekenai ia ore neganai, iena ruma korikori dekenai ia lou lao. ²⁴ Nega sisina gabeai, iena adavana Elisabeta ia rogorogo momokani, bona hua 5 hunia dekenai ia noho. ²⁵ Ia gwau, “Lohiabada ese ia bogahisihisi lau dekenai, inai bamona lau ia durua vadaeni. Ia ese egu hemarai taunimanima edia vairana dekenai be ia kokia vadaeni.”

Iesu ena vara be aneru ese ia gwauraia

²⁶ Elisabeta ena rogorogo hua namba 6, Dirava ese aneru ladana Gabriela ia siaia, Galilea ena hanua ta ladana Nasareta dekenai ia lao. ²⁷ Tau ia do diba lasi kekeni unuseni ia noho, ia be King Davida ena iduhu tauna ta ladana Iosepa ena maoheni. Unai kekeni ena ladana be Maria. ²⁸ Unai aneru be Maria dekenai ia lao, ia gwau, “Kekeni e, namo do oi davaria, badina Lohiabada be oi danu ia noho, bona oi ia hanamoada bada herea vadaeni.”

²⁹ Maria ese inai hereva ia kamoni neganai ia gari bada herea, bona ia laloo momo unai hereva ena anina be dahaka.

³⁰ To aneru ese ia hamaoroa, ia gwau, “Maria e, oi gari lasi, badina be oi dekenai Dirava ia moale vadaeni. ³¹ Oi be do oi rogorogo, mero ta do oi abia, iena ladana do oi atoa Iesu.

³² “Ia be do ia tau bada herea momokani, ia be Dirava Ataii Momokani ena Natuna do idia gwauraia. Lohiabada Dirava ese iena tamana Davida ena King dagina do ia henia.

³³ Bona ia be Iakobo ena bese edia King do ia lao, ela bona hanaihanai. Iena basileia be do ia doko lasi.”

³⁴ Maria ese aneru dekenai ia nanadaia, ia gwau, “Lau be tau lau diba lasi, inai be edena bamona do ia vara?”

³⁵ Aneru ia haere, ia gwau, “Lauma Helaga be oi dekenai do ia diho, bona Dirava ena sياهو oi dekenai do ia atoa. Vadaeni, oi dekena amo do ia vara, inai mero helagana, be Dirava ena Natuna do idia gwauraia. ³⁶ Bona ma oi laloo, oiemu varavara hahine Elisabeta. Ia be buruka neganai ia rogorogo vadaeni. Ibounai idia gwau ia be natuna ia havaraia diba lasi, to iena hua namba 6 be inai. ³⁷ Badina be Dirava ese gau ibounai ia karaia diba.”

³⁸ Maria ia gwau, “Lau be Lohiabada ena hesiai hahine. Oiemu hereva hegeregerena lau dekenai do ia vara, be namo.” Vadaeni aneru be ia dekena amo ia raka siri.

Maria ese Elisabeta ia vadivadi henia

³⁹ Nega sisina murinai, Maria ia toreisi, karaharaga ia raka lao Iudea ororo hanua ta dekenai. ⁴⁰ Sekaraia ena ruma dekenai ia daekau, Elisabeta dekenai ia hanamoa. ⁴¹ Elisabeta ese Maria ena hanamoa hereva ia kamoni neganai, iena natuna be iena bogana lalonai ia roho, vadaeni Elisabeta ena lalona be Lauma Helaga ese ia hahonua. ⁴² Vadaeni ia hereva badabada, ia gwau, “Hahine ibounai edia huanai oi sibona be namo herea! Oi ese do oi havaraia merona danu be do ia namo bada herea! ⁴³ Lauegu namo be dahaka, be lauegu Lohiabada ena sinana ese lau dekenai ia vadivadi inai? ⁴⁴ Be, oiemu hanamoa ena mamina lauegu taiana dekenai ia vareai neganai, lauegu natuna be egu bogana dekenai ia roho, mai moale danu. ⁴⁵ Abidadama hahinena e, oi namo vadaeni. Badina be Lohiabada dekena amo oi kamoni herevadia be do idia momokani.”

Maria ena moale anena

⁴⁶ Vadaeni Maria ia gwau:

“Lauegu lalona ese Lohiabada ia hanamoa noho.

⁴⁷ Lauegu laumana danu be Dirava, egu Hamauria Tauna dainai ia moale bada noho.

⁴⁸ Badina be lau, iena hesiai hahine ogogamina, ia lalona vadaeni, bona unai dainai, hari ela bona hanaihanai, taunimanima ibounai ese lau do idia hanamoa bada.

⁴⁹ Badina be Sياهو Diravana ese hoa kara lau dekenai ia havaraia vadaeni.

Iena ladana be ia helaga.

⁵⁰ Iena bogahisihisi be ia dekenai idia gari taudia ibounai edia latanai ia noho,

bona edia natudia latanai danu nega hanaihanai.

⁵¹ Iena imana ese iena goada ia hedinarai vadaeni,

bona hekokoroku taudia ia ese ia luludia idau gabu dekenai.

⁵² “Ia ese lohia taudia edia helai gabudia dekena amo ia doridia diho, to ogogami taudia be ia ese ia abidia isi vadaeni.

⁵³ Hitolo taudia, ia ese gau namodia dekenai edia bogana ia hahonua vadaeni,

to koku momo taudia be ia ese imadia kavakava ia siaidia lao.

⁵⁴ Iena hesiai besena Israela dekenai ia ese durua ia henia vadaeni, bona iseda sene taudia dekenai ia henia gwauhamata ia badinaia vadaeni.

⁵⁵ Iena bogahisihisi ia henia noho Aberahamo bona iena bese taudia dekenai.

Inai iena bogahisihisi kara do ia laloaboio lasi ela bona hanaihanai.”

⁵⁶ Vadaeni Maria be Elisabeta danu hua toi idia noho, gabeai iena ruma dekenai ia giroa lou.

Elisabeta ese Ioane ia havaraia

⁵⁷ Elisabeta ena natuna havaraia nega ia ginidae, vadaeni mero ta ia abia. ⁵⁸ Vadaeni iena badibadinai taudia, bona iena varavara taudia ese

Lohiabada ena hariharibada ia dekenai ia vara vadaeni sivaraina idia kamoni, bona idia be ia danu idia moale nega tamona.

⁵⁹ Dina namba 8 lalonai, idia be mero ena kopina utua totona idia haboua, vadaeni iena ladana be Sekaraia, iena tamana ena ladana, do idia atoa gwauraia. ⁶⁰ To iena sinana ia haere, ia gwau, “Lasi, iena ladana be Ioane.”

⁶¹ Idia gwau, “Be, unai be oiemu iduhu tauna ta ena ladana, a?” ⁶² Vadaeni idia ese edia imana dekena amo mero ena tamana dekenai toana idia henia, idia nanadaia mero ena ladana be edena bamona do ia atoa.

⁶³ Sekaraia ese torea gauna ta ia gwauraia, vadaeni inai bamona ia torea: “Iena ladana be Ioane.” Ibounai idia hoa bada. ⁶⁴ Unai neganai, Sekaraia ena uduna ia kehoa, iena malana danu ia maoro, vadaeni ia hereva, Dirava dekenai ia hanamoa.

⁶⁵ Unai dainai, edia badibadinai taudia ibounai be idia gari dikadika, bona unai kara ena sivarai be Iudea ororo hanua ibounai dekenai idia gwauraia loaloa. ⁶⁶ Sivarai idia kamoni taudia ibounai ese idia laloatao, idia gwau, “Inai mero ese edena bamona kara do ia karaia?” Lohiabada ena siahua be ia dekenai momokani.

Sekaraia ena peroveta hereva

⁶⁷ Lauma Helaga ese mero ena tamana Sekaraia ena lalona ia hanoua, vadaeni ia haroro, ia gwau:

⁶⁸ “Lohiabada, Israela ena Dirava, ita hanamoa, badina be ia ese iena bese taudia ia durua vadaeni, bona idia dekenai ia hamauria vadaeni.

⁶⁹ Hamauria Tauna ia ese ia haginia vadaeni ita totona.

Ia be iena hesiai tauna Davida ena iduhu dekena amo.

⁷⁰ Dirava ena peroveta taudia helagadia ese idaunegai inai Tau idia gwauraia.

Bona inai kara do idia vara:

⁷¹ Ita dekenai idia tuari henia,

bona ita dekenai idia badu henia taudia,

edia siahua dekena amo ia ese ita do ia hamauria.

⁷² Dirava ese iseda sene taudia ia bogahisihisi henia.

Iena gwauhamata taravatuna mai helaga danu ia laloatao.

⁷³ Iseda sene tauna Aberahamo dekenai ia gwauhamata henia,

⁷⁴ ita dekenai idia tuari henia taudia dekena amo,

ia ese ita do ia hamauria.

Ia gwau, iena hesiai gaukara do ita karaia,

bona do ita gari lasi.

⁷⁵ Mai helaga danu, bona mai maoromaoro danu,

iena vairana dekenai do ita raka, iseda mauri dina ibounai lalonai.

⁷⁶ “Bona oi, egu natuna e,

Ataia Momokani Diravana ena peroveta tauna do idia gwauraia oi,

badina oi be Lohiabada ena vairana dekenai do oi raka.

Lohiabada ena dala do oi kehoa.

⁷⁷ Mauri dalana oi ese iena bese taudia dekenai do oi hadibaia, edia dika Dirava ese do ia gwauatao totona.

⁷⁸ Badina be iseda Dirava ena bogahisihisi ia bada ita dekenai.

Iena hamauria do ia siaia mai ita dekenai,

guba ena Diari matamata ia siaia bamona.

⁷⁹ Dibura lalonai, bona kahirakahira idia mase taudia dekenai, unai diari do ia henia. Bona ia ese maino ena dala namona dekenai ita do ia hakaua.”

⁸⁰ Vadaeni inai mero be ia tubu daekau, iena tauanina bona ena lauma danu ia goada. Ia be taunimanima idia noho lasi tano dekenai ia noho, ia mai bona Israela taudia dekenai do ia hedinarai dinana.

2

Iesu ia vara

¹ Unai nega lalonai Kaisara Augusto ese taravatu herevana ta ia siaia lao, tanobada taudia ibounai edia ladana do idia torea. ² Ladana torea ena nega ginigunana be inai, Kurenio ese Suria dekenai ia gavana neganai. ³ Unai taravatu dainai, taunimanima ibounai edia ladana torea totona, ta ta edia hanua korikori dekenai idia giroa lou.

⁴ Iosepa danu Nasareta, Galilea kahana ena hanua ta, dekena amo ia lao, Davida ena hanua ladana Betelehema, Iudea kahana dekenai ia ginidae, badina ia be Davida ena iduhu tauna ta. ⁵ Unai Betelehema hanua dekenai Iosepa ese iena ladana do ia torea gwauria. Iena maoheni danu, Maria, ia danu idia lao, ia be ia rogorogo vadaeni. ⁶ Vadaeni idia ruaosi unusenai idia noho neganai, Maria ena natuna havaraia negana ia ginidae. ⁷ Ia ese iena vara guna merona ia havaraia. Dabua dekenai ia kumia, vadaeni boromakau edia aniani maua dekenai ia hahekurea, badina be laolao taudia edia ruma dekenai be gabu lasi.

Aneru ese mamoe naria taudia idia hadibaia

⁸ Mamoe naria taudia haida be uda dekenai idia noho, hanuaboi neganai edia mamoe orea idia naria noho. ⁹ Vadaeni Lohiabada ena aneru ta ia lao, edia badibadinai ia gini, bona Lohiabada ena diaridiari ese idia ia hagegea, vadaeni idia gari bada herea. ¹⁰ To aneru ese ia hamaoroa idia dekenai, ia gwau, “Umui gari lasi, hereva namona lau mailaia vadaeni, taunimanima ibounai idia moale totona. ¹¹ Badina be hari, inai dina, Davida ena hanua dekenai, umui emui Hamauria Tauna ia vara vadaeni, Keriso Lohiabada unai. ¹² Iena toana umui dekenai be inai. Mero maragina do umui davaria, boromakau edia aniani maua dekenai ia hekure, dabua dekenai idia kumia.”

¹³ Vadaeni nega tamona guba aneru taudia momo herea be inai aneru danu idia hedinarai, Dirava dekenai idia hanamoa, idia gwau:

¹⁴ “Ataia momokani guba dekenai Dirava do ita hanamoa, bona tanobada dekenai be maino, Dirava idia hamoalea taudia ese inai maino do idia abia.”

Mamoe naria taudia ese Iesu idia itaia

¹⁵ Inai aneru taudia ese unai gabu idia rakatania, guba dekenai idia giroa lou. Unai neganai mamoe naria taudia ese sibona ta ta dekenai idia hereva henia, idia gwau, “Ita lao Betelehema dekenai, Lohiabada ese ita dekenai ia hadibaia gauna do ita itaia.”

¹⁶ Vadaeni idia raka haraga, idia lao, Maria bona Iosepa idia davaria, bona mero maragi, boromakau edia aniani maua dekenai ia hekure. ¹⁷ Mero idia itaia, vadaeni mamoe naria taudia idia toreisi, aneru ese idia hadibaia hereva inai natuna totona, idia gwauria hedinarai. ¹⁸ Vadaeni idia kamonai taudia ibounai ese mamoe naria taudia edia hereva dekenai idia hoa. ¹⁹ To Maria be unai hereva ibounai dekenai ia lalao

bada, bona ia laloatao. ²⁰ Vadaeni mamoe naria taudia idia giroa lou, Dirava dekenai idia hanamoa, iena ladana idia abia isi. Badina be idia kamonai, bona idia itaia gaudia be momokani, aneru ese ia hadibaia hegeregereana.

Iesu ena ladana idia atoa

²¹ Dina namba 8 lalonai, mero ena kopina utua kara neganai, idia ese iena ladana idia atoa Iesu. Sinana ena bogana dekenai do ia hedinarai lasi neganai, aneru ese inai ladana ia atoa. ²² Sinana bona natuna hagoevaia ena nega ia ginidae. Vadaeni Mose ena taravatu hegeregereana, Iosepa bona Maria ese Ierusalem dekenai edia natuna Iesu idia abia lao, Lohiabada dekenai do idia henia totona. ²³ Lohiabada ena taravatu dekenai ia torea hegeregereana, ia gwau, “Vara guna mero ibounai be idia helaga, Lohiabada ena.”

²⁴ Idia lao badina ta danu be, edia boubou gauna do idia henia gwaurai, Lohiabada ena taravatu hegeregereana, manu rua, o pune manu ena natuna rua.

Simeona ena peroveta hereva Iesu totona

²⁵ Tau ta Ierusalem dekenai ia noho, iena ladana be Simeona. Ia be kara maoromaoro tauna bona Dirava dekenai ia gari tauna. Ia be Israela dekenai Hamauria Tauna ia naria noho, bona ia be Lauma Helaga ese ia hahonua. ²⁶ Lauma Helaga ese danu ia dekenai ia hamaoroa, ia be do ia mase lasi ela bona Lohiabada ena Keriso do ia itaia guna. ²⁷ Lauma Helaga ese Dubu Helaga lalonai Simeona ia hakaua vareai. Mero maragi Iesu be iena tamana bona ena sinana ese idia abia vareai, taravatu ena kara do idia karaia totona. ²⁸ Vadaeni Simeona ese ia abia, ia rosia, Dirava dekenai ia hanamoa, ia gwau:

²⁹ “Lohiabada e,
oiemu hesiai tauna harihari mase dekenai mai maino danu do lau lao,
oiemu gwauhamata hegeregereana.

³⁰ Badina be egu matana ese oiemu Hamauria Kara ia itaia vadaeni.

³¹ Oi ese inai mauri dala oi karaia hegaegae vadaeni,
taunimanima ibounai edia vairana dekenai.

³² Diari ta oi havaraia vadaeni inai,
bese idauidau dekenai diari do ia henia totona,

bona ia ese hairai bada,
be oiemu bese Israela taudia dekenai do ia henia.”

³³ Mero ena tamana bona sinana ese Simeona ena hereva idia kamonai, idia hoa. ³⁴ Vadaeni Simeona ese idia ruaosi ia hanamodia, bona Maria dekenai ia hamaoroa, ia gwau:

“Inai mero Iesu ese Israela taudia momo do ia hamorua,
bona momo do ia hatorea isi.
Ia be toa bamona do ia lao,
bona taunimanima momo ese ia do idia herevalaia,
mai edia laloa dika danu.

³⁵ Unai dekena amo, ia ese edia laloa hunia gaudia do ia hedinarai.
To lalohisihisi ese, kaia bamona oiemu lalona do ia gwadaia.”

Ana ena peroveta hereva Iesu totona

³⁶ Peroveta hahinena ta danu ia noho, iena ladana be Ana, Panuela ena natuna, Asere ena iduhu hahinena. Ia be hahine buruka, ia headava, to

lagani 7 sibona iena adavana danu idia noho nega tamona. ³⁷ Iena tau ia mase murinai, ia vabu noho, bona hari iena lagani be 84. Ia be Dubu Helaga ia rakatania lasi, Dirava dekenai ia tomadiho henia, ia guriguri noho, bona aniani ania lasi ena taravatu ia badinaia noho. ³⁸ Unai nega korikori dekenai, ia danu ese mero maragina ia itaia, vadaeni Dirava dekenai ia hanamoa, bona Ierusalemama hamauria totona idia naria noho taudia dekenai, inai mero ena sivarai be ia ese ia hamaoroa.

Iesu Nasareta dekenai ia tubu daekau

³⁹ Lohiabada ena taravatu kara ibounai be Iesu ena tamana bona sinana ese idia badinaia haorea momokani, vadaeni Galilea dekenai idia giroa lou, edia hanua korikori Nasareta dekenai idia lao. ⁴⁰ Vadaeni mero be ia tubu, ia bada lao, mai goada, bona mai aonega danu, bona Dirava ese iena hariharibada ia dekenai ia henia.

Mero Iesu be Dubu Helaga ia lao

⁴¹ Lagani ibounai Iesu ena tamana bona sinana danu Ierusalemama dekenai idia lao, Pasova ena aria neganai. ⁴² Vadaeni Iesu ena mauri lagani 12 neganai, idia toiosi be unai aria karaia totona Ierusalemama dekenai idia daekau. ⁴³ Aria dinana idia ore neganai idia giroa lou, to Iesu be Ierusalemama dekenai ia noho. Iena tamana bona sinana be idia diba lasi. ⁴⁴ Idia lalao ia be taunimanima edia huanai ia raka noho. Dina tamona dala dekenai idia raka lao, unai murinai edia varavara taudia dekenai bona edia turana dekenai Iesu idia tahua. ⁴⁵ Idia davaria lasi, unai dainai Ierusalemama dekenai idia giroa lou, ma idia tahua. ⁴⁶ Dina toi murinai idia ese Dubu Helaga lalonai idia davaria, hadibaia taudia edia huanai ia helai, edia hereva ia kamonai, bona ia henanadaia danu, idia dekenai. ⁴⁷ Iena hereva idia kamonai taudia ibounai be iena diba bona iena haere dekenai idia hoa bada. ⁴⁸ Idia ruaosi idia itaia, idia hoa, vadaeni iena sinana ese ia dekenai ia hereva henia, ia gwau, “Egu natuna e, dahaka dainai inai bamona oi karaia ai dekenai? Lau bona emu tamana be mai tai danu, oi ai tahua noho.”

⁴⁹ To Iesu ia gwau, “Dahaka dainai lau umui tahua? Umui diba lasi egu Tamana ena ruma be lauegu noho ruma, a?” ⁵⁰ Iena hereva idia kamonai, to anina idia diba lasi.

⁵¹ Ia be idia danu Nasareta dekenai idia lao, bona ia kamonai henia idia dekenai. To iena sinana ese inai hereva ibounai ia laloatao. ⁵² Vadaeni Iesu ia tubu daekau noho, mai aonega danu, Dirava bona taunimanima danu ese idia ura henia.

3

Ioane Bapatiso ia haroro

¹ Tiberio Kaisara be lagani 15 ia lohia neganai, Pontio Pilato be Iudea edia gavana, bona Heroda be Galilea dekenai ia lohia. Heroda ena kakana Filipino be Iturea bona Trakonido edia lohia, bona Lusania be Abilene ena lohia. ² Bona Ana bona Kaiapa be Hahelagaia Taudia Badadia. Unai neganai Dirava ese Ioane Sekaraia dekenai ia hereva, taunimanima idia noho lasi tanona dekenai. ³ Unai dainai Ioane ese Ioridane Sinavai kahana ena tano ibounai dekenai ia loaloa. Ia haroro, ia gwau, “Umui emui lalona umui giroa, bapatiso umui abia, bona Dirava ese emui kara dika do ia gwauatao.” ⁴ Isaia, peroveta tauna, ena buka dekenai ia torea hegeregerena, ia gwau:

“Gado ta taunimanima idia noho lasi tano dekenai ia boiboi, ia gwau,

‘Lohiabada ena dala do umui karaia hegaegae.

Iena dala umui hamaoromaoroa.

⁵ Koura gabudia ibounai be do idia hahonua,
ororo maragidia bona ororo badadia ibounai be palaka do idia halaoa.
Dala gagevadia ibounai be do idia hamaoromaoroa,
bona gudu isi tanodia be do idia hamanadaia.

⁶ Vadaeni, taunimanima ibounai ese Dirava ena hamauria kara do idia itaia.’”

Ioane ese ranu dekenai ia bapatisoa

⁷ Taunimanima momo Ioane dekenai idia lao, do ia bapatiso henidia totona. Vadaeni ia ese ia gwau henidia, ia gwau, “Gaigai natuna e, daika ese umui ia hamaoroa, Dirava ena badu, do ia mai gauna, dekena amo do umui heau mauri? ⁸ Umui emui lalona umui giroa, bona lalona giroa ena anina korikori do umui hedinaraia. Bona inai bamona do umui hereva lasi, ‘Aberahamo be aiemai tamana.’ Badina be umui dekenai lau hamaoroa, Dirava be inai nadi dekena amo natuna do ia havaraia diba Aberahamo ena. ⁹ Ira be idia atoa hegaegae vadaeni, bona huahua namona idia havaraia lasi gaudia be do idia utua momokani, bona lahi dekenai do idia negea daekau.”

¹⁰ Taunimanima idia nanadaia, idia gwau, “Dahaka do ai karaia?”

¹¹ Ioane ia haere, ia gwau, “Mai ena dabua rua tauna ese dabua lasi tauna dekenai ta do ia henia, bona mai ena aniani tauna ese do ia haria.”

¹² Takisi gogo a taudia haida danu bapatiso abia totona idia lao, idia gwau, “Hadibaia tauna e, ai be edena bamona do ai karaia?”

¹³ Ia ese ia haere, ia gwau, “Taravatu ese ia gwauraia gauna sibona do umui abia, do umui habadaia lasi.”

¹⁴ Tuari taudia haida danu ia dekenai idia nanadaia, idia gwau, “Ai danu edena bamona do ai karaia?”

Ia gwau, “Taunimanima dekena amo moni umui abia kava lasi, dagedage dekena amo, o samani koikoi dekena amo. Bona emui gaukara davana dekenai umui maumau lasi.”

¹⁵ Taunimanima idia lalao daradara, bona idia lalao momo, idia gwau, “Sedira Ioane be Keriso o?” ¹⁶ Vadaeni ia ese ibounai dekenai ia hereva henia, ia gwau, “Lau be ranu dekena amo umui lau bapatiso henia. To tau ta be ia mai noho, iena sياهو ese egu sياهو ia hanaia, lau be namo lasi iena tamaka varona do lau ruhaia. Inai tau ese Lauma Helaga bona lahi dekenai umui do ia bapatiso henia. ¹⁷ Iena itapo be iena imana dekenai ia hegaegae noho, iena uiti do ia hagoevaia totona. Gabeai uiti haboua rumana lalonai uiti do ia haboua. To uiti ena momoru, be bodo lasi lahi dekenai do ia gabua ore.”

¹⁸ Iena hereva be unai, ma sisiba hereva momo ia ese taunimanima dekenai ia haroro henia. ¹⁹ To Ioane ese Heroda, Galilea ena gavana, ia gwau henia, badina be iena kakana Filipino ena adavana Herodia be Heroda ese ia adavaia, bona ma kerere momo ia karaia dainai. ²⁰ Unai dainai Heroda ese Ioane ia atoa dibura ruma dekenai. Unai kara dekenai Heroda ese dika ta ma ia karaia, iena dika ma ia habadaia lou.

Ioane ese Iesu ia bapatiso henia

²¹ Taunimanima ibounai Ioane ese ia bapatiso henia neganai, Iesu danu ia bapatiso henia. Vadaeni ia guriguri noho neganai, guba ia kehoa. ²² Bona Lauma Helaga ia diho, pune manu bamona, Iesu ena kwarana dekenai ia kamokau. Bona gado ta guba dekena amo ia boiboi

diho, ia gwau, “Oi be lauegu Natuna, lauegu lalokau, lau be lau moale oi dekenai.”

Iesu ena tubuna edia ladana

²³ Iena gaukara ia hamatamaia neganai, Iesu ena vara lagani be 30 bamona. Taunimanima idia laloa Iesu be Iosepa ena natuna.

Iosepa be Heli ena natuna.

²⁴ Heli be Matata ena natuna.

Matata be Levi ena natuna.

Levi be Meleki ena natuna.

Meleki be Ianai ena natuna.

Ianai be Iosepa ena natuna.

²⁵ Iosepa be Matataia ena natuna.

Matataia be Amosa ena natuna.

Amosa be Nahumu ena natuna.

Nahumu be Eseli ena natuna.

Eseli be Nagai ena natuna.

²⁶ Nagai be Mahata ena natuna.

Mahata be Matataia ena natuna.

Matataia be Semeina ena natuna.

Semeina be Ioseka ena natuna.

Ioseka be Ioda ena natuna.

²⁷ Ioda be Ioanana ena natuna.

Ioanana be Resa ena natuna.

Resa be Serubabele ena natuna.

Serubabele be Sealetiele ena natuna.

Sealetiele be Neri ena natuna.

²⁸ Neri be Meleki ena natuna.

Meleki be Adi ena natuna.

Adi be Kosama ena natuna.

Kosama be Elamadama ena natuna.

Elamadama be Ere ena natuna.

²⁹ Ere be Iosua ena natuna.

Iosua be Eliesere ena natuna.

Eliesere be Iorima ena natuna.

Iorima be Matata ena natuna.

Matata be Levi ena natuna.

³⁰ Levi be Simeona ena natuna.

Simeona be Iuda ena natuna.

Iuda be Iosepa ena natuna.

Iosepa be Ionama ena natuna.

Ionama be Eliakimi ena natuna.

³¹ Eliakimi be Melea ena natuna.

Melea be Mena ena natuna.

Mena be Matata ena natuna.

Matata be Natana ena natuna.

Natana be Davida ena natuna.

³² Davida be Iese ena natuna.

Iese be Obeda ena natuna.

Obeda be Boasi ena natuna.

Boasi be Salamona ena natuna.

Salamona be Nasona ena natuna.

³³ Nasona be Aminadaba ena natuna.

Aminadaba be Adamina ena natuna.

Adamina be Areni ena natuna.

Areni be Hesarona ena natuna.

Hesarona be Perese ena natuna.

Perese be Iuda ena natuna.

³⁴ Iuda be Iakobo ena natuna.

Iakobo be Isako ena natuna.

Isako be Aberahamo ena natuna.

Aberahamo be Tera ena natuna.

Tera be Nahoro ena natuna.

³⁵ Nahoro be Seruga ena natuna.

Seruga be Reu ena natuna.

Reu be Pelega ena natuna.

Pelega be Ebere ena natuna.

Ebere be Sela ena natuna.

³⁶ Sela be Kenana ena natuna.

Kenana be Apasada ena natuna.

Apasada be Sema ena natuna.

Sema be Noa ena natuna.

Noa be Lameka ena natuna.

³⁷ Lameka be Metusela ena natuna.

Metusela be Enoka ena natuna.

Enoka be Iareda ena natuna.

Iareda be Mahalalela ena natuna.

Mahalalela be Kenana ena natuna.

Kenana be Enosi ena natuna.

³⁸ Enosi be Seta ena natuna.

Seta be Adamu ena natuna.

Adamu be Dirava ena natuna.

4

Satani ese Iesu ia dibagania

¹ Iesu Ioridane Sinavai dekena amo ia giroa lou neganai, Lauma Helaga ese ia hahonua, vadaeni Lauma Helaga ese taunimanima idia noho lasi tano dekenai ia hakaua lao, ² Unuseni dina 40 lalonai Satani ese Iesu ia dibagania. Unai dina ibounai Iesu be ia aniani lasi, vadaeni ia hitolo.

³ Vadaeni Satani ese ia dekenai ia hereva, ia gwau, “Oi be Dirava ena Natuna sedira, inai nadi dekenai oi hereva henia, aniani gauna dekenai oi halaoa.”

⁴ To Iesu ia haere, ia gwau, “Buka Helaga lalonai ia torea vadaeni, ‘Aniani sibona dekena amo taunimanima do idia mauri lasi.’”

⁵ Vadaeni Satani ese Iesu ia hakaua daekau, bona nega sisina lalonai tanobada ena basileia ibounai Iesu dekenai ia hedinarai. ⁶ Satani ia gwau, “Oi dekenai siahua do lau henia, inai gau ibounai do oi naria, vadaeni ladana bada do oi abia. Inai gau ibounai be lauegu, bona lau ura henia tauna dekenai do lau henia diba. ⁷ Unai dainai, bema oi tomadiho henia lau dekenai, inai gau ibounai be do oi abia oiemu.”

⁸ Iesu ia haere, ia gwau, “Buka Helaga ia torea vadaeni inai bamona, ‘Lohiabada oiemu Dirava dekenai do oi tomadiho henia, ia sibona ena ura do oi karaia.’”

⁹ Vadaeni Satani ese Ierusalem dekenai Iesu ia hakaua lao, Dubu Helaga ena atai dekenai ia haginia, ia gwau, “Oi be Dirava ena Natuna sedira, inai Dubu dekena amo do oi paudobi. ¹⁰ Badina be Buka Helaga ia torea vadaeni, ia gwau:

‘Dirava ese iena aneru do ia hamaorodia, oi do idia naria.’

¹¹ Ma Buka Helaga ia gwau:

‘Aneru ese edia imana dekenai oi do idia abia isi, oiemu aena nadi dekenai do oi botaia garina.’”

¹² Iesu ia haere, ia gwau, “Danu Buka Helaga ia torea vadaeni, ia gwau: ‘Lohiabada oiemu Dirava dekenai oi dibagania lasi.’”

¹³ Satani ena dibagani ibounai ia haorea, vadaeni ia rakatania, ela bona ma nega ta.

Iesu ena gaukara ia hamatamaia

¹⁴ Iesu be Lauma Helaga ena siahu dekenai ia giroa lou Galilea dekenai, vadaeni iena kara sivaraina be unai tano kahana ibounai dekenai idia gwaurai loaloa. ¹⁵ Idia edia dubu lalonai ia hadibaia karaia, bona idia ibounai ese Iesu idia hanamoa.

Nasareta taudia idia ura lasi Iesu

¹⁶ Vadaeni Iesu be Nasareta, ia tubu daekau gabuna, dekenai ia lao, bona hanaihanai iena kara, Sabati Dina dekenai dubu lalonai ia raka vareai. Vadaeni Buka Helaga duahia totona ia toresi. ¹⁷ Idia ese Isaia, peroveta tauna, ena Buka idia henia. Vadaeni ia kehoa, inai bamona ia torea gabuna dekena amo ia duahia, ia gwau:

¹⁸ “Lohiabada ena Lauma ese lau ia hahonua.
Ia ese lau ia abia hidi vadaeni,
Sivarai Namona ogogami taudia dekenai do lau haroro henia.
Lau ia siaia vadaeni,
idia guia taudia do lau ruhaia totona,
bona matakepulu taudia edia matana kehoa hereva do lau gwaurai,
bona mai edia bero taudia dekenai mauri do lau henia.
¹⁹ Ma danu Lohiabada ese iena taunimanima do ia hamauria,
ena nega do lau harorolaia.”

²⁰ Vadaeni Iesu ese Buka ia koua, ia naria tauna dekenai ia henia lou, vadaeni ia helai diho. Taunimanima ibounai dubu lalonai Iesu dekenai idia itaia noho. ²¹ Ia ese ia haroro hamatamaia, ia gwau, “Inai umui kamonaia herevana, be hari dina ia momokani vadaeni.”

²² Vadaeni ibounai ese ia dekenai idia hanamoa, hereva namodia iena uduna dekena amo idia kamona dainai, bona idia hoa, idia gwau, “Inai be Iosepa ena natuna lasi, a?”

²³ Vadaeni Iesu ese idia ia hamaoroa, ia gwau, “Inai hereva be momokani lau dekenai do umui gwaurai, do umui gwau, ‘Dogeta tauna e, oi sibona do oi hamauria, Kaperanauma dekenai oi karaia edia sivaraina ai kamona, be iniseni, oiemu hanua korikori dekenai danu do oi karaia.’” ²⁴ Ma Iesu ia gwau, “Momokani lau hamaoroa umui dekenai, peroveta tauna be iena hanua korikori taudia ese do idia abia dae lasi. ²⁵ Danu lau hamaoroa umui dekenai, Elia ena nega dekenai, vabu momo herea Israela dekenai idia noho, unai neganai lagani toi bona hua 6 medu ia diho lasi, tanobada ibounai hitolo ena nega be ia bada. ²⁶ To Dirava ese Elia ia siaia lao lasi Israela ena vabu ta dekenai. Idau tano hanua, ladana Sarepata, Sidono ena kahana hanua, ena vabu ta dekenai ia siaia lao. ²⁷ Bona Elisaia, peroveta tauna, ena neganai, lepera taudia momo Israela dekenai idia noho, to ta ia hanamoa lasi, Namana, Suria tauna sibona.”

²⁸ Dubu dekenai idia haboua taudia ibounai ese inai hereva idia kamona, idia badu dikadika. ²⁹ Idia toresi, hanua dekena amo Iesu idia doria murimuri dekenai, edia hanua idia haginia ororo dekenai idia veria lao, ororo dekena amo do idia negea diho gwaurai. ³⁰ To ia be edia huana dekena amo ia raka siri.

Iesu ese lauma dikadia ia lulua murimuri dekenai

³¹ Iesu be Kaperanauma, Galilea ena hanua ta, dekenai ia ginidae, vadaeni Sabati Dina neganai ia hadibaia karaia. ³² Idia be iena hadibaia hereva dekenai idia hoa, badina be ia hereva mai siahu danu. ³³ Dubu lalonai lauma dika ese ia abia tauna ta ia noho. Ia be ia boiboi bada herea, ia gwau, ³⁴ “Iesu Nasareta tauna e, ai dekenai dahaka oi karaia? Ai do oi alaia totona oi mai, a? Lau diba oi be Dirava ena Helaga Tauna.”

³⁵ Vadaeni Iesu ese ia gwau henia, ia gwau, “Oi hereva lasi, ia dekena amo oi lao murimuri dekenai.” Vadaeni lauma dika ese unai tau tano dekenai ia negea diho idia edia vairanai, vadaeni ia dekena amo ia rakatania lao. Unai tau be bero ta ia davaria lasi.

³⁶ Vadaeni ibounai idia hoa, idia ta ta dekenai idia hereva, idia gwau, “Inai be dahaka hereva? Ia be mai siahu, bona mai goada danu lauma dikadia ia hereva henia, bona idia rakatania lao.” ³⁷ Unai tano ena kahana ibounai dekenai Iesu ena sivarai idia gwaurai laoloa.

Iesu ese Petero adavana ena sinana ia hanamoa

³⁸ Dubu dekena amo idia diho, vadaeni Simona ena ruma dekenai idia daekau. Simona ena adavana ena sinana ia gorere, iena tauanina ia siahu, vadaeni idia ese Iesu idia hamaoroa. ³⁹ Ia be ia lao, hahine ena badibadinai ia gini, gorere dekenai ia gwau henia, vadaeni gorere ia doko, hahine be maoromaoro ia toreisi, idia edia hesiai gaukara ia karaia.

Gorere taudia momo Iesu ese ia hanamoa

⁴⁰ Dina be kahirakahira ia diho neganai, idia ese gorere idauidau taudia ibounai Iesu dekenai idia abia lao. Vadaeni iena imana idia ta ta edia latanai ia atoa, ibounai ia hamauridia. ⁴¹ Lauma dikadia danu taunimanima momo dekena amo ia lulua murimuri dekenai, vadaeni lauma dikadia idia boiboi, idia gwau, “Oi be Dirava ena Natuna.”

To Iesu ia gwau henia idia dekenai, bona ia hamaorodia, do idia hereva lasi, badina be idia diba ia be Keriso.

Iesu ese dubu edia lalonai ia haroro

⁴² Daba ia rere neganai, Iesu ia toreisi, taunimanima idia noho lasi gabuna dekenai ia lao, to taunimanima ese idia tahua, idia davaria, vadaeni idia ura dogoatao, idia do ia rakatania lasi idia gwau. ⁴³ To ia hereva henia idia dekenai, ia gwau, “Lau be Dirava ena Basileia ena Sivarai Namona hanua idauidau dekenai do lau harorolaia, Dirava ese lau ia siaia ena badina be unai.” ⁴⁴ Vadaeni Iudea dubu edia lalonai ia haroro.

5

Iesu ia hereva, vadaeni Petero ese gwarume momo ia abia

¹ Dina ta Genesareta gohu kone dekenai Iesu ia gini neganai taunimanima momo ia dekenai idia gini hagegea, Dirava ena hereva kamona totota. ² Ia ese vanagi rua ia itaia, kone ena badinai idia gini noho. Vanagi taudia be kone dekenai edia reke idia hanamoa. ³ Vadaeni Iesu ese Simona ena vanagi dekenai ia guia. Ia ese Simona ia hamaoroa vanagi be sisina do ia doria lao kone dekena amo. Vadaeni vanagi dekenai ia helai diho, taunimanima momo dekenai ia hadibaia.

⁴ Iena hereva ia hadokoa, vadaeni ia ese Simona dekenai ia hamaoroa, ia gwau, “Dobu kahana dekenai ita lao, emui reke do umui atoa diho, gwarume do umui abia totota.”

⁵ To Simona ia haere, ia gwau, “Egu biaguna e, ai be hanuaboi lalonai ai hekwarahi mase ia mai daba ia rere, gwarume ta ai abia lasi, to oiemu hereva dainai reke be do ai atoa diho.” ⁶ Vadaeni idia atoa diho, gwarume momo herea idia abia. Edia reke be kahirakahira ia darea. ⁷ Vadaeni idia boiboi, edia turana vanagi ta dekena amo do idia mai durua henia totona. Idia mai, vadaeni vanagi ruaosi idia honu, kahirakahira idia mutu. ⁸ Simona Petero ese unai kara ia itaia, vadaeni Iesu ena aena badinai ia tui diho, ia gwau, “Lohiabada e, lau dekena amo do oi raka siri, badina lau be dika tauna.”

⁹ Badina be ia bona iena turana ibounai idia hoa dikadika, unai gwarume idia abia dainai. ¹⁰ Simona bona idia haoda hebou taudia danu, Jamesi bona Ioane, Sebedeo ena natuna, idia hoa. Vadaeni Iesu ese Simona dekenai ia hamaoroa, ia gwau, “Oi gari lasi, inai murinai be do oi haoda, taunimanima do oi abia.”

¹¹ Unai haoda taudia ese vanagi ruaosi be kone badinai idia atoa, vadaeni gau ibounai idia rakatania, Iesu ena murina dekenai idia raka.

Iesu ese lepera tauna ia hanamoa

¹² Nega ta Iesu be hanua ta lalonai ia noho, bona unuseni be tau ta, iena kopina ibounai be lepera sibona. Ia ese Iesu ia itaia neganai, iena kwarana ia atoa diho Iesu ena vairanai, ia noinoi, ia gwau, “Lohiabada e, bema oi ura, lau do oi hagoevaia diba.”

¹³ Iesu ese iena imana ia atoa, iena kopina dekenai ia dogoatao, ia gwau, “Lau ura, harihari oi goeva.” Vadaeni nega tamona lepera tauna ia goeva. ¹⁴ Vadaeni Iesu ese taravatu ia henia, tau ta do ia hamaoroa lasi. Ma ia gwau, “Oi lao, dubu ena hahelagaia tauna ese oi do ia itaia, bona hagoevaia gaudia, Mose ese ia gwauraia hegeregerena, do oi henia. Vadaeni taunimanima do idia diba oiemu lepera gorere ia ore.”

¹⁵ To Iesu ena kara sivaraina idia gwauraia lolao, vadaeni taunimanima momo herea idia haboua, Iesu ena hereva kamonaia totona, bona edia gorere do ia hanamoa totona. ¹⁶ To ia be ia raka siri, taunimanima idia noho lasi tano dekenai ia lao guriguri.

Raka diba lasi tauna Iesu ese ia hanamoa

¹⁷ Dina ta, Iesu ia hadibaia karaia neganai, Farisea taudia bona taravatu hadibaia taudia be Iesu kahirakahira idia helai. Idia be Galilea ena hanua ibounai, Iudea bona Ierusalem dekena amo. Vadaeni Iesu ese Lohiabada ena sialu dekenai gorere taudia ia hanamoa. ¹⁸ Tau haida ese raka diba lasi tauna geda dekenai ia hekure noho neganai, idia huaia lao, ruma dekenai vareai dalana idia tahua, Iesu ena vairana dekenai gorere tauna idia atoa gwauraia. ¹⁹ To taunimanima momo herea dainai, vareai dalana ta idia davaria lasi, vadaeni raka diba lasi tauna mai geda danu idia abia daekau, ruma ena guhi dekenai matu idia karaia, vadaeni idia atoa diho Iesu ena vairana dekenai, taunimanima momo edia huanai. ²⁰ Ia ese edia abidadama ia itaia, vadaeni ia gwau, “Tau e, oiemu dika lau gwauatao vadaeni.”

²¹ Taravatu hadibaia taudia bona Farisea taudia be sibona ta ta idia hereva, idia gwau, “Inai Dirava ia hadikaia tauna be daika? Daika be dika ia gwauatao diba? Dirava sibona.”

²² To Iesu be edia lalao ia diba, vadaeni ia gwau, “Badina be dahaka emui lalona dekenai unai bamona umui lalao?” ²³ Edena be ia haraga, do lau gwau, ‘Oiemu dika ia gwauatao vadaeni,’ o do lau gwau, ‘Oi toreisi, oi raka?’ ²⁴ To umui do lau hadibaia Taunimanima ena Natuna be mai

ena sialu, dika do ia gwauatao tanobada dekenai.” Vadaeni ia ese raka diba lasi tauna ia hamaoroa, ia gwau, “Lau hereva henia oi dekenai, oi toreisi, oiemu geda oi lokua, oiemu ruma dekenai oi lao.” ²⁵ Vadaeni nega tamona ia be idia edia vairana dekenai ia toreisi, iena geda ia lokua, iena ruma dekenai ia raka lao, Dirava dekenai ia hanamoa. ²⁶ Vadaeni ibounai idia hoa bada, bona mai gari danu Dirava dekenai idia hanamoa, idia gwau, “Hoa karadia hari dina ita itaia momokani.”

Iesu ese Levi ia boiria

²⁷ Iesu be ia raka murimuri dekenai, vadaeni takisi gogoa tauna ta, ena ladana be Levi, takisi ruma dekenai ia helai neganai Iesu ese ia itaia. Vadaeni Iesu ia boiria, ia gwau, “Lauegu murina dekenai oi raka.” ²⁸ Vadaeni iena gau ibounai ia rakatania, ia toreisi, Iesu ena murinai ia raka.

²⁹ Vadaeni Levi ese aria badana ta iena ruma dekenai ia karaia Iesu ena. Takisi gogoa taudia momo mai edia turana, idia danu idia helai aniani totona. ³⁰ To Farisea taudia bona taravatu hadibaia taudia ese idia dekenai idia maumau, Iesu ena diba tahua taudia dekenai idia nanadaia, idia gwau, “Dahaka dainai takisi gogoa taudia bona kara dika taudia danu umui aniani hebou?”

³¹ Iesu ese ia haere idia dekenai, ia gwau, “Goada taudia be dogeta tauna do idia tahua lasi, to gorere taudia sibona. ³² Lau danu kara maoromaoro taudia boiria totona lau mai lasi, to kara dika taudia edia lalona do idia giroa totona lau mai.”

Aniani ania lasi taravatu

³³ Taunimanima haida ese Iesu idia nanadaia, idia gwau, “Badina be dahaka Ioane ena diba tahua taudia ese aniani lasi taravatu idia badinaia momo, idia guriguri nega momo danu, bona Farisea taudia edia diba tahua taudia danu, to oiemu diba tahua taudia be idia aniani bona idia inuinu noho?”

³⁴ Vadaeni Iesu ese ia haere henia idia dekenai, ia gwau, “Headava matamata tauna be iena turana dekenai ia noho neganai, bema umui hamaorodia aniani lasi taravatu do idia badinaia, do idia kamoni o? ³⁵ To negana do ia ginidae, headava matamata tauna be idia dekena amo do ia raka siri, unai neganai aniani lasi ena taravatu do idia badinaia.”

³⁶ Inai parabole danu ia hamaorodia, ia gwau, “Dabua matamata ena kahana sisina do idia makohia lasi, dabua gunana ena matuna do idia koua totona. Unai bamona bema idia karaia, matamatana do ia makohia, bona ena kahana sisina gunana danu do idia hegeregere lasi. ³⁷ Bona tau ta ese uaina matamata be kopina gunana dekenai do ia udaia lasi. Unai bamona bema ia karaia, uaina ese kopina do ia makohia, vadaeni uaina do ia bubua negea bona kopina danu do ia dika. ³⁸ To uaina matamata be kopina matamata dekenai do idia udaia, vadaeni ruaosi do idia namo. ³⁹ To uaina gunana ia inua manada tauna be matamatana do ia ura henia lasi, badina be ia ese do ia gwau, ‘Gunana be ia namo herea.’”

6

Sabati Dina ena taravatu

¹ Sabati Dina ta dekenai, Iesu be uiti uma ta dekenai ia raka hanaia, vadaeni ena diba tahua taudia ese uiti kwarana idia kokia, edia imana dekenai idia dahua sisina, bona idia raka noho neganai idia ania noho. ² To Farisea taudia haida ese idia nanadaia idia dekenai, idia gwau,

“Umui be dahaka dainai mai taravatu karana Sabati Dina dekenai umui karaia?”

³ Iesu ese ia haere henia idia dekenai, ia gwau, “Davida ena sivaraina umui duahia lasi, a? Ia bona iena turana danu idia hitolo neganai, edena bamona idia karaia? ⁴ Ia ese Dirava ena Ruma dekenai ia raka vareai, aniani helagana ia abia, ia ania, bona iena turana dekenai danu ia henia. To unai aniani be ia helaga momokani, hahelagaia taudia sibona edia.”

⁵ Ma ia hamaoroa idia dekenai, ia gwau, “Taunimanima ena Natuna be Sabati Dina ena biaguna.”

Sabati Dina neganai Iesu ese tau ta ia hanamoa

⁶ Ma Sabati Dina ta neganai, Iesu be dubu dekenai ia vareai, ia hadibaia. Unuseni be tau ta, iena imana idibana kahana ia dika. ⁷ Vadaeni taravatu hadibaia taudia bona Farisea taudia ese idia itaia noho Iesu dekenai, Sabati Dina dekenai do ia hanamoa o, vadaeni do idia samania gwauraia. ⁸ Ia be edia laloa ia diba, vadaeni imana dika tauna dekenai ia hamaoroa, ia gwau, “Oi toreisi, edia huanai oi gini.” Vadaeni ia toreisi. ⁹ Iesu ese ia nanadaia idia dekenai, ia gwau, “Lau nanadaia umui dekenai, iseda taravatu dekenai, edena be ia namo, Sabati Dina dekenai taunimanima do ita hanamoa, o do ita hadikaia? Do ita hamauria, o do ita alaia?” ¹⁰ Iesu ese idia ta ta ibounai dekenai ia itaia, vadaeni inai tau dekenai ia hereva henia, ia gwau, “Oiemu imana oi atoa maoromaoro.” Ia atoa maoromaoro, vadaeni iena imana ia namo, ena imana lauri kahana hegeregere.

¹¹ To idia be idia badu dikadika, idia hereva hebou, dahaka do idia karaia Iesu dekenai.

Aposetolo 12 Iesu ese ia abia hidi

¹² Unai neganai, Iesu be ororo dekenai ia daekau, ia guriguri totona. Hanuaboi ia ese Dirava dekenai ia guriguri ia lao daba rere. ¹³ Dabai ia ese iena diba tahua taudia ia boiria, ibounai 12 ia abia hidi, idia dekenai ia gwauraia, Aposetolo. Edia ladana be inai: ¹⁴ Simona, ena ladana ta Iesu ia atoa Petero, mai ena tadina Andrea danu, bona Ioane, Iamesi, Filipino bona Batolomeo, ¹⁵ Mataio bona Toma, Iamesi Alepeo bona Simona, Roma taudia idia lulua gwauraia ore a tauna ta, ¹⁶ Iuda Iamesi, bona Iuda Iskariote, ia be Iesu ena mase dala ia karaia tauna.

Iesu ese ia hadibaia, bona gorere ia hanamoa

¹⁷ Idia danu Iesu ia raka diho, bona palaka gabuna dekenai Iesu ia gini, mai ena diba tahua taudia danu, bona taunimanima momo herea, Iudea dekena amo bona Ierusalem dekena amo bona Turo bona Sidono edia kone gabu dekena amo, Iesu ena hereva kamonai totona bona edia gorere do ia hamauria totona idia lao. ¹⁸ Bona lauma dikadia ese idia abia taudia danu be Iesu ese ia hanamoa lou. ¹⁹ Vadaeni taunimanima ibounai idia ura Iesu dekenai edia imana idia atoa, badina siahu be ia dekena amo ia mai, bona ibounai be ia ese ia hanamoa.

Daika idia namo?

²⁰ Vadaeni Iesu ese iena diba tahua taudia dekenai ia itaia, ia gwau:

“Ogogami taudia be umui namo,
badina Dirava ena Basileia be umui emui.
²¹ Harihari umui hitolo taudia be umui namo,
badina be emui bogana do idia kunu.
Harihari umui taitai taudia be umui namo,

badina umui be do umui kiri.

²² “Taunimanima ese do idia badu henia umui dekenai, do idia ura henia lasi umui dekenai, edia uduna dekenai umui do idia hadikaia, emui ladana do idia hadikaia, Taunimanima ena Natuna dainai, neganai be do umui namo. ²³ Unai kara ia vara neganai do umui moale, do umui mavaru mai moale bada herea, emui davana guba dekenai do ia bada, badina edia sene taudia ese peroveta taudia dekenai unai bamona idia karaia.

²⁴ “To kohu momo taudia madi umui be dika, badina emui hanamoa be umui abia vadaeni.

²⁵ Emui bogana idia kunu taudia madi umui be dika, badina do umui hitolo. Harihari umui kiri taudia madi umui be dika, badina be emui lalona do idia metau, do umui taitai.

²⁶ “Taunimanima ibounai ese umui do idia hanamoa neganai, madi umui be dika, badina be edia sene taudia ese peroveta koikoi taudia dekenai unai bamona idia hanamoa.

Lalokau momokani

²⁷ “Lau dekenai umui kamoni henia taudia, lau hamaoroa umui dekenai, umui dekenai idia badu taudia do umui lalokau henia, bona umui dekenai idia hadikaia taudia be do umui kara namo henia. ²⁸ Edia hereva dekenai umui idia hadikaia taudia be do umui hanamoa, bona umui dekenai idia dagedage taudia be idia totona do umui guriguri. ²⁹ Tau ta ese emu vairana idiba kahana bema ia botai, emu lauri kahana danu do oi henia, ia botai. Bona bema tau ta ese emu dabua do ia kokia, emu rami danu do oi dogoatao lasi. ³⁰ Oi dekenai idia noinoi taudia do oi henia, bona emu gau ia abia kava tauna dekena amo abia lou totona herevana oi karaia lasi. ³¹ Umui be umui ura taunimanima ese umui dekenai idia karaia hegeregerena, umui danu inai bamona do umui karaia idia dekenai.

³² “Bema umui idia lalokau henia taudia sibona do umui lalokau henia, umui emui namo be dahaka? Kara dika taudia ese idia dekenai idia lalokau henia taudia be idia lalokau henia danu. ³³ Bona umui dekenai idia hanamoa taudia sibona bema umui hanamoa, umui emui namo be dahaka? Kara dika taudia danu unai bamona idia karaia. ³⁴ Bema davana do idia karaia taudia sibona dekenai umui henia, umui emui namo be dahaka? Kara dika taudia danu edia turana dekenai idia henia, edia davana do idia abia totona. ³⁵ To umui dekenai idia badu taudia do umui lalokau henia, bona idia dekenai durua do umui henia, bona do umui henia kava, ena davana do umui tahua lasi, vadaeni emui davana do ia bada, umui be Dirava Ataii Momokani ese iena natuna do ia halaoa umui. Badina be Dirava ese ia dekenai idia tanikiu henia lasi taudia bona kerere taudia danu ia bogahisihisi henidia. ³⁶ Bogahisihisi kara sibona do umui karaia, emui Tamana bamona, ia be mai ena bogahisihisi.

Dika davana henia lasi

³⁷ “Emui lalona dekenai taunimanima do umui gwauraidia kerere lasi, vadaeni Dirava ese umui do ia gwaurai kerere lasi. Dika ena davana do umui gwaurai lasi, vadaeni Dirava ese emui dika ena davana do ia gwaurai lasi. Dika do umui gwauatao, vadaeni emui dika be Dirava ese do ia gwauatao. ³⁸ Taunimanima dekenai do umui henia lao, vadaeni

Dirava ese do ia henia umui dekenai. Taunimanima ese emui puse do idia hahonua ela bona do ia bubua danu. Oibe, umui dekenai idia haria gauna be do ia hegeregere momokani, bona do ia hanaia danu. Badina be umui henia lao ena maka hegeregere, Dirava ese umui dekenai do ia henia lao.”

³⁹ Ma Iesu ese parable ta ia henia idia dekenai, ia gwau, “Matakepulu tauna ta ese matakepulu tauna ma ta do ia hakaua diba o? Idia ruaosi guri dekenai do idia moru lasi, a? ⁴⁰ Diba tahua tauna ese ia hadibaia tauna do ia hanaia lasi, to iena sikuli ia karaia haorea murinai, ia be iena hadibaia tauna danu do idia hegeregere diba.

⁴¹ “Badina be dahaka au ena momoru emu tadikakana ena matana dekenai oi itaia, to au badana oiemu matana dekenai ia noho, be oi lalao lasi? ⁴² Badina be dahaka oiemu tadikakana oi hamaoroa, oi gwau, ‘Egu turana e, mani au ena momoru oiemu matana dekena amo do lau kokia,’ to au badana oiemu matana dekenai be oi itaia lasi. Koikoi tauna e, au badana oiemu matana dekena amo do oi kokia guna, murinai au ena momoru oiemu tadikakana ena matana dekenai do oi itaia namonamo, vadaeni do oi kokia.

Au dikana ese huahua dikadia do ia atoa

⁴³ “Au namona ese huahua dikana do ia havaraia lasi, bona au dikana ese huahua namona do ia havaraia lasi. ⁴⁴ Badina be au ta ta edia huahua ese edia toana idia hedinarai. Au ginigini dekena amo fig idia abia lasi. Ava ginigini dekena amo vain ena huahua idia abia lasi. ⁴⁵ Tau namona ena lalona dekenai ia lalao gaudia be namo dainai, kara namodia do ia havaraia. Tau dikana ena lalona dekenai ia lalao gaudia be dika dainai, kara dikadia do ia havaraia. Taunimanima ese edia lalona dekenai idia honu gaudia, be do idia gwauraia, edia uduna dekenai.

Ruma haginia daladia rua

⁴⁶ “Umui be badina dahaka umui gwauraia lau dekenai, umui gwau, ‘Lohiabada e, Lohiabada e,’ to egu hereva umui karaia lasi? ⁴⁷ Lau dekenai do ia mai, egu hereva do ia kamoni, bona karana do ia karaia, tauna ena toana do lau hedinarai. ⁴⁸ Ia be tau ta bamona, iena ruma do ia karaia gwauraia, vadaeni guri ia geia dobu, nadi ena latanai ruma ia haginia. Vadaeni abata ia ginidae neganai, ranu ese ruma ia doria, to ia marere lasi, badina be nadi ena latanai ia haginia. ⁴⁹ To egu hereva ia kamoni to karana ia karaia lasi tauna be tau ta bamona, iena ruma be tano kopina dekenai ia haginia, guri ia geia dobu lasi, vadaeni abata ese unai ruma ia doria neganai, ia moru haraga, iena moru be ia dika momokani.”

7

Tuari biaguna ena hesiai tauna

¹ Iesu ena hereva ibounai taunimanima edia vairana dekenai ia gwauraia ore, vadaeni Kaperanauma hanua dekenai ia raka vareai. ² Tuari biaguna ta ese iena hesiai tauna ia lalokau henia bada. Unai tau be ia gorere dikadika, kahirakahira ia mase. ³ Unai tuari biaguna ese Iesu ena sivarai ia kamoni, vadaeni Iuda tau badadia haida ia siaia lao, do idia noia, iena hesiai tauna do ia hanamo. ⁴ Vadaeni idia be Iesu dekenai idia lao, idia noinoi mai edia lalona ibounai, idia gwau, “Ia be tau namona, unai bamona bema oi karaia be ia namo, ⁵ badina be ia ese

iseda bese dekenai ia ura henia, bona aiemai dubu be ia sibona ese ia haginia.”

⁶ Unai dainai, Iesu be idia danu ia lao. To ruma dekenai idia raka kahirakahira neganai be unai tuari biaguna ese iena turana haida ma ia siaia, Iesu ena vairana dekenai idia lao, edia biaguna ena hereva idia gwauraia, idia gwau, “Lohiabada e, oi hekwarahi lasi, lau be namo lasi egu ruma dekenai do oi daekau, ⁷ unai dainai do lau mai lasi oi dekenai be ia namo. To mani oi hereva sibona, vadaeni egu hesiai tauna be do ia mauri. ⁸ Badina lau danu be haida edia henuna dekenai, bona tuari taudia be lauegu henuna dekenai. Ta do lau hamaoroa, ‘Oi lao,’ vadaeni ia lao. Ma ta do lau hamaoroa, ‘Oi mai,’ vadaeni ia mai. Ma lauegu hesiai tauna do lau hamaoroa, ‘Inai oi karaia,’ vadaeni do ia karaia.”

⁹ Iesu ese unai hereva ia kamoni, ia hoa dikadika, iena vairana ia giroa, iena murina dekenai idia raka taudia dekenai ia hereva, ia gwau, “Abidadama inai bamona Israela dekenai lau davarua lasi, lasi bona lasi momokani.”

¹⁰ Vadaeni tuari biaguna ese ia siaia taudia be idia giroa lou ruma dekenai, gorere tauna idia davarua, ia namo vadaeni.

Iesu ese mase tauna ia hatorea isi

¹¹ Dabai, Iesu be hanua ta dekenai ia lao, ena ladana be Naina. Iena diba tahua taudia bona taunimanima momo herea ia danu idia lao. ¹² Hanua maguna ena iduara badana dekenai idia raka kahirakahira lao neganai, haida ese mase tauna ta idia huaia murimuri dekenai, vabu ta ena natuna tamona sibona ia vara. Hanua taudia momo herea ese inai vabu danu idia lao. ¹³ Lohiabada ese vabu ia itaia, vadaeni ia bogahisihisi henia, ia hereva henia, ia gwau, “Oi tai lasi.” ¹⁴ Vadaeni Iesu ia raka kahirakahira lao, mase patana dekenai ia dogoatao. Idia huaia taudia be idia gini. Vadaeni ia hereva, ia gwau, “Uhou tauna e, lau hereva henia oi dekenai, oi toreisi.” ¹⁵ Vadaeni mase tauna ia helai, ia hereva. Vadaeni Iesu ese iena sinana dekenai ia henia.

¹⁶ Ibounai idia gari dikadika, vadaeni Dirava dekenai idia hanamoa, idia gwau, “Peroveta tauna badana ta iseda huanai ia hedinarai vadaeni!” Ma idia gwau, “Dirava ese iena bese taudia hamauria totona ia mai vadaeni!”

¹⁷ Vadaeni unai kara ena sivaraina be Iudea ibounai, bona ena badibadinai tano ibounai dekenai idia gwauraia loaloa.

Ioane Baptiso ia daradara

¹⁸ Ioane ena diba tahua taudia ese inai hereva ibounai ia dekenai idia hamaoroa. ¹⁹ Vadaeni Ioane ese iena diba tahua taudia rua ia boiridia, ia siaidia, Lohiabada dekenai do idia nanadaia, do idia gwau, “Do ia mai tauna be oi, o idau tauna ta do ita naria?”

²⁰ Idia ruaosi be Iesu dekenai idia ginidae, idia gwau, “Ai be Ioane Baptiso ese ia siaia, ia gwau, ‘Do ia mai tauna be oi, o idau tauna ta do ita naria?’”

²¹ Unai neganai Iesu ese taunimanima momo ia hanamodia, gorere taudia, hisihisi taudia, lauma dika ese idia abia taudia, bona matakepulu taudia momo edia matana ia kehoa. ²² Vadaeni ia ese inai taudia ruaosi dekenai ia haere henia, ia gwau, “Umui lao, umui itaia, bona umui kamoni karadia Ioane dekenai do umui hamaoroa. Matakepulu taudia edia matana idia kehoa, aena dika taudia idia raka namonamo, lepera taudia idia goeva, taia kudima taudia idia kamoni, mase taudia idia

toreisi, bona ogogami taudia ese Sivarai Namona idia kamoni henia.
 23 Lau dekenai ia laloa daradara lasi tauna be do ia namo.”

Iesu ese Ioane ia hanamoa

24 Ioane ena hesiai taudia idia raka siri, vadaeni Iesu ese taunimanima momo herea dekenai ia hereva henia hamatamaia, Ioane herevana ia gwaurai, ia gwau, “Umui be dahaka itaia totona taunimanima idia noho lasi tano dekenai umui lao? Siriho, lai ese ia doria gauna, a? 25 To dahaka itaia totona umui lao? Dabua mai hairai danu ia karaia tauna, a? Dabua mai hairai danu idia karaia bona aniani namodia idia ania taudia be king edia ruma dekenai idia noho. 26 To dahaka itaia totona umui lao? Peroveta tauna, a? Io, lau hamaoroa umui dekenai, peroveta taudia be momo herea, to ibounai be Ioane ese ia hereaia. 27 Ioane ena sivarai Buka Helaga ese ia torea, ia gwau:

“‘Oi itaia, lau Dirava ese,
 lauegu hereva siaia tauna oiemu vairana dekenai lau siaia,
 oiemu dala kehoa totona.’

28 Lau hamaoroa umui dekenai, hahine edia bogana dekenai idia vara taudia ibounai be ta ese Ioane ia hereaia lasi, to Dirava ena Basilea lalonai tau maragimaragi ese Ioane ia hereaia.”

29 Taunimanima bounai, bona takisi gogoa taudia danu unai hereva idia kamoni neganai, idia ese Dirava dekenai idia hanamoa, badina be Ioane ese bapatiso ia henia idia dekenai. 30 To Farisea taudia bona taravatu hadibaia taudia ese Ioane ena bapatiso idia ura henia lasi, unai dekena amo idia ese Dirava ena laloa idia totona idia negea.

31 Iesu ma ia gwau, “Inai nega taudia be dahaka hegeregere do lau gwauraidia? Idia be edena bamona? 32 Idia be memero maragi bamona, hanua ena ariara dekenai idia helai, edia turana dekenai idia boibo, idia gwau:

“‘Ai be gita ai gadaralala,
 to umui be umui mavaru lasi.
 Ai be mase guria ane ai abia,
 to umui be umui taitai lasi.’

33 Badina be Ioane Bapatiso ia mai, paraoa ia ania lasi, uaina ia inua lasi, vadaeni umui gwau ia be mai lauma dika danu. 34 To Taunimanima ena Natuna ia mai, ia aniani, ia inuinu, vadaeni umui gwau ia be aniani momo tauna bona uaina inua momo tauna, takisi gogoa taudia bona kara dika taudia edia turana. 35 To Dirava ena aonega idia abia dae taudia ese Dirava ena aonega idia hamomokania vadaeni.”

Hahine ta ese dehoru dekena amo Iesu ia dahua

36 Farisea tauna ta ese Iesu dekenai ia boibo, do idia aniani hebou gwaurai. Vadaeni Iesu ese inai Farisea tauna ena ruma dekenai ia raka vareai, aniani gabuna dekenai ia helai diho. 37 Unai hanua ena hahine ta, ariara hahine, ia diba Iesu be Farisea tauna ena ruma dekenai ia aniani, vadaeni nadi kavabuna ta ia abia lao, unai kavabu lalonai be dehoru mai bonana namo herea. 38 Ia lao, Iesu ena murina dekenai ia gini, iena aena badibadinai, bona ia tai, bona iena matana ranu dekena amo Iesu ena aena ia hapariparia, vadaeni iena huina dekena amo ia dahua kaukau.

Vadaeni Iesu ena aena ia kisi henia, bona dehero ia bubua ena aena dekenai.

³⁹ Farisea tauna, Iesu dekenai ia boiboi tauna, ese unai kara ia itaia, vadaeni ena lalona dekenai ia laloa, ia gwau, “Inai tau bema ia peroveta tauna, do ia diba inai ia dekenai ia kamokau hahinena be ariara hahinena.”

⁴⁰ Vadaeni Iesu ese ia hereva henia, ia gwau, “Simona e, lau be mai egu hereva sisina.” Ia gwau, “Hadibaia tauna e, mani oi hereva.”

⁴¹ Iesu ia gwau, “Tau ta mai ena abiatorehai taudia rua, ta ena abiatorehai be 100 kina, ma ta ena abiatorehai be 10 kina. ⁴² Idia ruaosi be hegeregere lasi, edia abiatorehai davana do idia karaia, vadaeni ia ese idia ruaosi edia abiatorehai ia gwauatao. Idia ruaosi huanai be daika ese heniatoreshai tauna do ia lalokau henia bada?”

⁴³ Simona ia haere, ia gwau, “Sedira iena abiatorehai badana ia gwauatao tauna.” Iesu ia gwau, “Oibe, momokani.”

⁴⁴ Iesu ese inai hahine dekenai ia giroa, ia itaia, vadaeni Simona dekenai ia gwau henia, ia gwau, “Inai hahine oi itaia, a? Lau be emu ruma dekenai lau daekau, egu aena huria totona ranu oi mailaia lasi, to ia be iena matana ranu dekena amo egu aena ia hapariparia bona iena huina dekena amo ia dahua kaukau. ⁴⁵ Oi be oi kisi henia lasi lau dekenai, to lau be oiemu ruma dekenai lau daekau neganai ia mai bona hari, lauegu aena dekenai ia kisi henia noho. ⁴⁶ Oi be egu kwarana dehero dekena amo oi dahua lasi, to ia be egu aena dehero dekena amo ia hapariparia vadaeni. ⁴⁷ Unai dainai, lau hamaoroa oi dekenai, inai hahine ena dika idia bada, to unai dika lau gwauatao vadaeni, badina be iena lalokau be ia bada. To iena dika idia maragi sibona ia gwauatao tauna be, iena lalokau danu ia maragi.”

⁴⁸ Vadaeni Iesu ese inai hahine dekenai ia hamaoroa, ia gwau, “Oiemu dika be lau gwauatao vadaeni.” ⁴⁹ Ia danu idia aniani hebou taudia be idia sibona dekenai idia nanadaia, ia gwau, “Inai be daika, dika ia gwauatao?” ⁵⁰ To Iesu ese hahine dekenai ma ia hamaoroa, ia gwau, “Oiemu abidadama ese ia hamauria oi. Mai maino danu oi lao.”

8

Iesu ese Sivarai Namona ia haroro lolao

¹ Unai murinai Iesu ese hanua badadia bona hanua maragidia edia lalonai ia haroro lolao, Dirava ena Basileia ena Sivarai Namona ia harorolaia. Iena diba tahua taudia 12 ia danu idia lao. ² Bona hahine haida danu, Iesu ese lauma dikadia idia dekena amo ia lulua hahine taudia, bona edia gorere dekena amo ia hanamodia hahine danu. Ta be Maria, Magadala hahine. Ia dekena amo lauma dikadia 7 Iesu ese ia lulua murimuri dekenai. ³ Ma ta be Ioana, Kusa, Heroda ena kohu ia naria tauna, ena adavana. Ta be Susana. Bona hahine momo danu, idia ese edia gau dekena amo Iesu idia ubua.

Parabole: Uiti negea lao, negea mai

⁴ Taunimanima momo herea idia lao, hanua ibounai dekena amo Iesu dekenai idia haboua. Vadaeni ia ese parabole ta ia gwauraia, ia gwau:

⁵ “Uhe hadoa tauna ta ese uma dekenai ia lao, uiti negea lao, negea mai totona. Vadaeni ia negea lao negea mai neganai, uhe haida be dala dekenai idia moru, vadaeni taunimanima ese idia moia aena dekenai, bona manu ese idia ania ore. ⁶ Uhe haida be tano mai nadi momo danu dekenai idia moru, idia tubu, to idia kakoro, badina tano be ia paripari

lasi. ⁷ Ma uhe haida be ava ginigini dekenai idia moru, vadaeni ginigini danu idia tubu nega tamona, bona ginigini ese uiti idia koua. ⁸ To uhe haida be tano namona dekenai idia moru, vadaeni idia tubu namonamo, edia anina idia atoa, ta ta edia anina be 100.” Unai bamona ia hereva, vadaeni ia hereva badabada, ia gwau, “Mai ena taiana tauna be do ia kamona.”

Parabole edia badina be dahaka

⁹ Vadaeni Iesu ena diba tahua taudia ese idia nanadaia, idia gwau, “Inai parabole ena anina be dahaka?” ¹⁰ Ia gwau, “Umui be lalona kehoa Dirava ese ia henia umui dekenai vadaeni, Dirava ena Basileia ena hunia herevadia do umui diba totona. To haida sibona be parabole dekenamo amo lau hadibaia, unai dainai edia matana do idia negea, to do idia itaia lasi, bona do idia kamona gwauraia, to do idia kamona lasi.

Uhe parabole ena anina

¹¹ “Parabole ena anina be inai: Uhe be Dirava ena hereva. ¹² Dala dekenai idia moru uhe be taunimanima ese hereva idia kamona, to Satani be ia mai, edia lalona dekenamo hereva be ia abia siri, do idia abia dae bona do idia mauri garina. ¹³ Tano mai nadi momo dekenai idia moru gaudia be taunimanima ese hereva idia kamona, bona idia abia dae, mai moale danu, to mai edia ramuna lasi. Momokani hereva idia abia dae, to nega daudau lasi dibagani ese ia abidia, vadaeni kerere ia vara idia dekenai. ¹⁴ Ava ginigini dekenai idia moru gaudia be taunimanima ese hereva idia kamona, to dala dekenai idia lao neganai, be tanobada ena lalao, bona ena gau momo, bona ena moale ese idia koua, unai dainai idia be mai edia huahua lasi. ¹⁵ To tano namona dekenai idia moru gaudia, be taunimanima ese hereva idia kamona mai edia lalona maoromaoro bona goevagoeva danu, bona idia dogoatao auka momokani, idia hesiku lasi, ela bona edia huahuana idia havaraia.

Diari ena hereva

¹⁶ “Tau ta lasi ese lamepa do ia gabua, vadaeni disi dekenai do ia koua, o mahuta pata ena henunai do ia atoa. Ia be lamepa ena pata dekenai do ia atoa, vadaeni do idia raka vareai taudia ibounai ese iena diari do idia itaia. ¹⁷ Hunia gaudia ibounai dohore idia hedinarai, bona idia hunia herevadia ibounai be do idia gwauraia hedinarai, vadaeni taunimanima ibounai do idia diba.

¹⁸ “Unai dainai, umui emui kamona do umui naria namonamo, badina be mai ena gau tauna dekenai, ma do idia henia, to ena gau be lasi tauna, be ia lalao ia abia vadaeni gauna, ia dekenamo do idia kokia.”

Iesu ena varavara korikori

¹⁹ Iesu ena sinana bona ena tadina ia dekenai idia lao, to taunimanima momo herea dainai, idia be dala lasi ia dekenai do idia raka kahirakahira lao. ²⁰ Unai dainai haida ese idia hamaoroa, idia gwau, “Oiemu sinana bona oiemu tadina be murimuri dekenai idia gini, idia ura oi do idia itaia.” ²¹ Vadaeni ia ese ia haere idia dekenai, ia gwau, “Egu sinana bona egu tadina be inai: Dirava ena hereva idia kamona bona karana idia karaia taudia.”

Iesu ese lai bona hurehure ia gwauatao

²² Dina ta, Iesu be iena diba tahua taudia danu vanagi ta dekenai idia gua, vadaeni ia ese ia hamaorodia, ia gwau, “Gohu unai kahana dekenai do ita hanaia.” Vadaeni idia heau hamatamaia. ²³ Idia heau neganai, ia

be ia mahuta. Vadaeni lai badana ta gohu dekenai ia ginidae, hurehure be vanagi ena lalona dekenai idia daekau, vadaeni kahirakahira vanagi ia mutu. ²⁴ Vadaeni idia be ia dekenai idia lao, idia hanogaia, idia gwau, “Aiemei biaguna e, aiemei biaguna e, ita mase inai!”

Vadaeni Iesu ia toresi, lai bona hurehure ia gwauatao, vadaeni idia doko, bona davara ia namo lou. ²⁵ Ia ese ia gwau henia idia dekenai, ia gwau, “Umui emui abidadama be edeseni?” To idia be idia gari, bona idia hoa dikadika, bona idia sibona ta ta dekenai idia hereva henia, idia gwau, “Inai tau be daika? Ia ese lai bona hurehure dekenai ia hereva henia, vadaeni iena hereva idia kamoni!”

Iesu ese kava tauna ia hamauria

²⁶ Iesu bona iena diba tahua taudia ese vanagi dekenai Galilea gohu idia hanaia lao, Gerasa tano dekenai idia ginidae. ²⁷ Iesu vanagi dekena amo ia diho neganai, tau ta Gerasa hanua dekena amo ia danu idia hedavari. Unai tau be mai lauma dika danu, bona nega daudau ia be kopina kavakava ia loaloa vadaeni. Ruma dekenai ia noho lasi, to mase guria gabu dekenai sibona ia noho. ²⁸ Unai tau ese Iesu ia itaia, vadaeni ia boiboi, iena vairana ia atoa diho tano dekenai, ia hereva badabada, ia gwau, “Iesu e, Dirava Ataii Herea Momokani ena Natuna e, lau dekenai dahaka oi karaia? Lau noinoi oi dekenai, hisihisi do oi henia lasi lau!”

²⁹ Inai bamona ia gwau, badina be Iesu ese guna inai lauma dika dekenai ia hereva henia vadaeni, unai tau dekena amo do ia raka murimuri dekenai. Nega momo lauma dika ese ia abia neganai, varo badana bona auri dekena amo idia kwatua, to inai idia kwatua varona bona auri ia makohia, vadaeni lauma dika ese taunimanima idia noho lasi tano dekenai ia doria lao.

³⁰ Vadaeni Iesu ese ia nanadaia, ia gwau, “Oiemu ladana be daika?” Ia gwau, “Hutuma,” badina be lauma dika momo ese idia abia. ³¹ Vadaeni lauma dikadia ese Iesu idia noia, mase gabuna dekenai do ia siaidia lasi.

³² Unai ororo dekenai be boroma momo herea idia aniani noho, vadaeni lauma dikadia ese Iesu idia noia, boroma edia lalonai do idia vareai. Vadaeni ia ese ia siaidia lao. ³³ Lauma dikadia be inai tau dekena amo idia lao, unai boroma edia lalonai idia vareai. Vadaeni inai boroma ibounai idia heau diho gohu dekenai, ranu lalonai idia mase.

³⁴ To boroma naria taudia ese unai kara idia itaia, vadaeni idia heau, hanua lalonai bona uma gabu dekenai iena sivarai idia gwauraia loaloa.

³⁵ Vadaeni taunimanima idia lao, ia vara gauna do idia itaia gwauraia. Vadaeni Iesu dekenai idia ginidae, lauma dika ese idia rakatania tauna idia itaia, Iesu ena aena badinai ia helai, mai ena dabua, bona mai ena lalona maoromaoro danu. Vadaeni idia be idia gari. ³⁶ To inai kara idia itaia taudia ese kava tauna edena bamona Iesu ia hanamoia dalana idia hamaoroa idia dekenai. ³⁷ Vadaeni Gerasa tano taudia ibounai ese Iesu idia noia, idia dekena amo do ia raka siri idia gwau, badina be gari ese ia abidia. Vadaeni ia be vanagi dekenai ma ia guia, ia giroa lou. ³⁸ Unai lauma dika idia rakatania tauna ese Iesu dekenai ia noia, Iesu danu do idia lao.

To Iesu ese ia siaia lou, ³⁹ ia gwau, “Oiemu ruma dekenai oi giroa lou, Dirava ese oi dekenai ia karaia karadia ibounai do oi harorolaia.” Unai dainai, ia be ia giroa lou, iena hanua taudia ibounai dekenai, Iesu ena kara ia dekenai sivaraina ia harorolaia.

Iairo ena natuna sivaraina

⁴⁰ Gohu unai kahana dekenai Iesu ia giroa lou neganai, be taunimanima momo ese ia idia abia dae, mai moale danu, badina be ibounai ese idia naria noho ia dekenai. ⁴¹ Vadaeni tau ta, ena ladana be Iairo, dubu ena biaguna ta, ia lao, Iesu ena aena badinai iena vairana ia atoa diho, ia noia, iena ruma dekenai do idia lao ia gwau. ⁴² Badina be iena natuna kekeni, tamona sibona ia vara, ena lagani be 12, ena mase be ia kahirakahira vadaeni.

Vadaeni Iesu be ia dekenai ia lao noho neganai, taunimanima momo herea ia danu idia raka hebou. ⁴³ Hahine ta, iena gorere be rara ia moru, lagani 12 unai bamona ia gorere. Ia ese iena moni bona kohu ia haorea vadaeni muramura taudia ese iena gorere hanamoa totona, to ta ese ia hanamoa diba lasi. ⁴⁴ Ia be Iesu ena murina dekenai ia lao, Iesu ena dabua duduna dekenai ia dogoatao sisina, vadaeni nega tamona iena rara gorere ia doko. ⁴⁵ Iesu ia gwau, “Daika ese ia dogoatao lau?” Ibounai idia hunia, idia gwau, “Lau be lasi.” Vadaeni Petero mai ena turana danu idia hereva Iesu dekenai, idia gwau, “Aiemei biaguna e, taunimanima momo herea oi danu idia raka hebou, oi dekenai danu idia kamokau.”

⁴⁶ To Iesu ia gwau, “Ta ese ia dogoatao lau dekenai, badina be lau diba sياهو lau dekena amo ia lao vadaeni murimuri dekenai.” ⁴⁷ Hahine be ia itaia do ia hunia diba lasi, vadaeni mai gari bona mai heudeheude danu ia lao, Iesu ena vairana dekenai iena kwarana ia atoa diho, dahaka totona Iesu dekenai ia dogoatao, bona edena bamona ia namo lou haraga ena sivaraina ia gwauraia hedinarai, taunimanima ibounai edia vairanai. ⁴⁸ Vadaeni Iesu ese ia hamaoroa, ia gwau, “Egu natuna e, oiemu abidadama ese oi ia hanamoa vadaeni, mai maino danu oi lao.”

⁴⁹ Ia be do ia hereva noho neganai, tau ta dubu biaguna ena ruma dekena amo ia mai, ia gwau, “Oiemu natuna be ia mase vadaeni. Hadibaia tauna dekenai hekwarahi ma oi henia lasi.” ⁵⁰ To Iesu ia kamoni, vadaeni ia ese Iairo dekenai ia hamaoroa, ia gwau, “Oi gari lasi, oi abidadama sibona lau dekenai, vadaeni ia be do ia namo lou.”

⁵¹ Ruma dekenai idia ginidae, vadaeni Iesu ese taunimanima ia koua, do idia raka vareai lasi, Petero bona Iamesi bona Ioane sibona mo, kekeni ena tamana ena sinana danu. ⁵² Ibounai idia taitai, kekeni totona idia taitai. To Iesu ia gwau, “Umui tai lasi, ia be ia mase lasi, ia mahuta noho.” ⁵³ Idia be idia kirikiri Iesu dekenai, idia diba kekeni be ia mase momokani. ⁵⁴ Vadaeni Iesu ese kekeni ena imana dekenai ia abia, ia boiboi ia dekenai, ia gwau, “Kekeni e, oi toreisi.” ⁵⁵ Vadaeni iena laumana ia giroa lou, kekeni be nega tamona ia toreisi. Vadaeni Iesu ese ia hereva henia idia dekenai, aniani do idia henia. ⁵⁶ Kekeni ena tamana bona iena sinana idia hoa dikadika, to Iesu ese ia hamaorodia, ia gwau, “Tau ta do umui hamaoroa lasi.”

9

Iesu ese ena aposetolo ia siaidia

¹ Iesu ese iena diba tahua taudia ia boiridia, bona sياهو ia henia, lauma dika lulua oho bona gorere taudia hanamoa ena siahuna. ² Vadaeni ia siaidia, Dirava ena Basileia do idia harorolaia, bona gorere taudia do idia hanamodia. ³ Bona ia hamaorodia, ia gwau, “Laolao ena kohu umui abia lao lasi, itotohi lasi, pusepuse lasi, aniani lasi, moni lasi. Bona dabua danu rua umui abia lao lasi. ⁴ Umui daekau ruma dekenai do umui noho, ia lao bona do umui raka siri negana. ⁵ To umui do idia abia dae lasi taudia, be edia hanua do umui rakatania neganai, emui aena dekena

amo kahu do umui kokia negea, idia dekenai sisiba goada henia totona.”
 6 Unai dainai, idia be idia raka lao, hanua momo edia lalonai Sivarai Namona idia harorolaia, bona gorere taudia idia hanamoa.

Heroda ena kudouna dekenai ia gari

7 Heroda tau badana ese Iesu ena kara sivaraina ia kamona, vadaeni iena kudouna dekenai ia gari, badina be taunimanima haida idia gwau Ioane be mase dekena amo ia toreisi lou vadaeni. 8 Ma haida idia gwau Elia ia hedinarai vadaeni. Ma haida idia gwau peroveta tauna gunana ta ia toreisi lou vadaeni. 9 To Heroda ia gwau, “Ioane ena kwarana lau utua oho, to inai iena sivarai lau kamonaia tauna be daika?” Bona ia ura bada Iesu ia itaia.

Iesu ese tatau 5000 ia ubua

10 Aposetolo taudia idia giroa lou, edia gaukara ibounai Iesu dekenai idia hamaoroa. Vadaeni ia ese ia hakaudia siri, taunimanima idia noho lasi gabuna ta, Betesaida ena kahana dekenai, unuseni idia lao. 11 To taunimanima momo ese idia diba, vadaeni Iesu ena murina dekenai idia raka lao. Vadaeni ia ese idia ia abia dae, Dirava ena Basileia herevana ia haroro henia idia dekenai, bona gorere hanamoa ura taudia ia hanamoa.

12 Adorahi neganai, diba tahua taudia 12 Iesu dekenai idia lao, idia gwau, “Inai taunimanima momo oi siaia, hanua edia lalonai bona uma gabu kahana kahana dekenai edia aniani do idia tahua, bona unuseni do idia mahuta, badina ita be taunimanima idia noho lasi tano dekenai.” 13 To Iesu ese ia hamaorodia, ia gwau, “Umui ese edia aniani do umui henia.” Idia gwau, “Iseda aniani gaudia be 5 sibona, bona gwarume rua. Oi ura aniani do ai hoia inai taunimanima momo edia?” 14 Badina tatau be 5000 bamona.

Vadaeni Iesu ese iena diba tahua taudia dekenai ia hamaoroa, ia gwau, “Do umui hereva henia idia dekenai, 50, 50 dekena amo orea ta ta dekenai do idia helai diho.” 15 Unai bamona idia karaia, vadaeni ibounai idia helai diho. 16 Vadaeni Iesu ese aniani gaudia 5 bona gwarume rua ia abia, guba dekenai iena matana ia negea, unai aniani ia hanamoa. Vadaeni ia makohia sisina sisina, diba tahua taudia dekenai ia henia, do idia henia unai taunimanima ta ta dekenai. 17 Ibounai idia aniani, edia bogana idia kunu. Vadaeni aniani ena orena idia haboua, bosea 12 idia hahonua.

Petero ese Iesu ia gwauraia Keriso

18 Nega ta Iesu sibona ia guriguri, iena diba tahua taudia be ia danu idia noho. Vadaeni idia dekenai ia nanadaia, ia gwau, “Taunimanima be dahaka idia gwau, lau be daika?” 19 Idia haere, idia gwau, “Haida idia gwau, oi be Ioane Bapatiso, to haida idia gwau oi be Elia, ma haida idia gwau peroveta tauna gunana ta ia toreisi lou vadaeni.” 20 Ma ia nanadaia idia dekenai, ia gwau, “To umui be dahaka umui gwau, lau be daika?” Petero ese ia haere henia, ia gwau, “Oi be Dirava ena Keriso.”

Iesu ese iena mase bona toreisi lou ia gwauraia

21 Vadaeni taravatu ia henia idia dekenai, ia gwau, “Tau ta dekenai inai hereva do umui hamaoroa lasi, 22 hereva be inai: Taunimanima ena Natuna be hisihisi momo do ia abia, hanua tau badadia, bona dubu biagudia bona taravatu hadibaia taudia ese do idia ura henia lasi, bona do idia alaia mase. To dina toi murina ma do ia toreisi lou.”

Mauri herevadia

²³ Iesu ese idia ibounai dekenai ia hereva henia, ia gwau, “Tau ta bema ia ura lauegu murina dekenai do ia mai, ia ese sibona dekenai do ia lalao lasi, dina ibounai iena satauro do ia abia isi, lauegu murina dekenai do ia raka. ²⁴ Badina be iena mauri ia dogoatao tauna, be iena mauri do ia abia lasi, to lau totona iena mauri do ia negea tauna, be iena mauri do ia abia. ²⁵ Tau ta tanobada ibounai do ia abia, to sibona ena mauri do ia halusia, iena namo be dahaka? ²⁶ Tau ta ese bema lau totona, o egu hereva totona do ia hemarai, Taunimanima ena Natuna ese ia totona do ia hemarai, ia be iena hairaina dekenai, bona iena Tamana ena hairaina dekenai, bona aneru helagadia edia hairaina dekenai do ia mai neganai. ²⁷ Momokani lau hamaoroa umui dekenai, haida iniseni idia gini noho, be do idia mase lasi ia lao bona Dirava Basileia do idia itaia.”

Iesu ese iena toana ia haidaua

²⁸ Inai hereva idia ore murinai, dina 8 idia lao vadaeni, Iesu ese Petero bona Ioane bona Iamesi ia abia hidi, ororo dekenai idia ia hakaua daekau, guriguri totona. ²⁹ Ia guriguri noho neganai, iena vairana ia idau vadaeni, bona iena dabua ia diaridiari, ia kurokuro momokani. ³⁰ Vadaeni tatau rua ia danu idia herevahereva, Mose bona Elia. ³¹ Mai edia hairaina danu idia hedinarai, bona Iesu be Ierusalem dekenai do ia mase, Dirava ena ura hegeregere sivaraina idia herevalaia. ³² Petero bona iena turana idia mahuta mase, vadaeni mahuta dekena amo edia matana idia kehoa neganai, Iesu ena hairaina idia itaia, bona ia danu idia gini hebou tatau ruaosi idia itaia. ³³ Idia ruaosi Iesu dekena amo idia raka siri hamatamaia, vadaeni Petero ese Iesu dekenai ia hereva, ia gwau, “Aiema biaguna e, namo herea ita be iniseni ita noho, mani palai ruma toi do ai karaia, ta oiemu, ta Mose ena, ta Elia ena.” Ia hereva kava, edena bamona do ia hereva, be ia diba lasi.

³⁴ Ia do ia hereva noho neganai, ori ta ese idia ia koua, vadaeni idia be ori ena lalonai idia vareai, bona idia gari dikadika. ³⁵ Vadaeni gado ta ori ena lalona dekena amo ia mai, ia gwau, “Inai be lauegu Natuna, lau abia hidi tauna, iena hereva do umui kamonaia.” ³⁶ Inai hereva ia doko neganai, Iesu sibona idia itaia. To unai idia itaia gaudia, be idia herevalaia lasi, bona tau ta dekenai idia hamaoroa lasi.

Iesu ese gorere merona ia hanamoa

³⁷ Dina ta murinai, idia be ororo dekena amo idia diho neganai, taunimanima momo danu idia hedavari. ³⁸ Vadaeni taunimanima momo edia huanai dekena amo tau ta ia boiboi, ia gwau, “Hadibaia tauna e, lau noinoi oi dekenai, mani oi mai, lauegu natuna oi itaia. Inai be egu natuna tamona sibona ia vara. ³⁹ Nega haida lauma dikana ese ia abia, vadaeni ia boiboi kava, bona iena tauanina ia auka masemase, vadaeni iena uduna dekena amo kanudi momo ia diho. Inai gorere ia rakatania lasi, ela bona iena kopina ia bero momo. ⁴⁰ Emu diba tahua taudia dekenai lau noinoi, lauma dikana do idia lulua murimuri dekenai, to idia be hegeregere lasi.”

⁴¹ Iesu ia haere, ia gwau, “Inai nega noho taudia be dahaka abidadama lasi taudia! Inai nega noho taudia be dahaka kamonaia lasi taudia! Lau be umui dekenai do lau noho ela bona edena neganai? Lau naria ela bona edena negai umui ese diba abia totona? Oiemu natuna oi mailaia.” ⁴² Mero ia raka kahirakahira neganai, lauma dikana ese tano dekenai ia hamorua, vadaeni iena tauanina ia auka masemase. Iesu ese lauma

dikana ia gwau henia, bona mero ia hanamoa, vadaeni iena tamana dekenai ia henia lou. ⁴³ Ibounai be Dirava ena siahua dekenai idia hoa bada herea.

Nega iharuana Iesu ia gwau do ia mase

Idia ibounai Iesu ena kara dekenai idia hoa noho neganai, Iesu ese iena diba tahua taudia dekenai ia hamaoroa, ia gwau, ⁴⁴ “Inai hereva emui taiana dekenai do idia vareai, be do umui lalao noho: Taunimanima ena Natuna be do idia samania, bona taunimanima edia imana dekenai do idia henia.” ⁴⁵ To unai hereva gauna idia diba namonamo lasi, idia dekenai be ia hunia, ena anina idia davaria lasi. Bona Iesu dekenai nanadaia be idia gari.

Manau herevadia

⁴⁶ Idia sibona idia hepapahuahu, daika be do ia bada. ⁴⁷ To Iesu be edia lalao ia diba, vadaeni mero maragi ta ia boiria ia dekenai. ⁴⁸ Vadaeni ia hamaoroa idia dekenai, ia gwau, “Lauegu ladana dainai, inai mero maragi ia abia dae tauna ese lau danu ia abia dae. Bona lau ia abia dae tauna ese lau ia siaia Diravana danu ia abia dae. Badina be umui emui huana dekenai ia maragi momokani tauna, ia be badana.”

⁴⁹ Ioane ese ia hamaoroa ia dekenai, ia gwau, “Aiemai biaguna e, ai be tau ta ai itaia, oiemu ladana dekenai lauma dikadia ia lulua murimuri dekenai, vadaeni ai koua, badina ia be iseda orea tauna lasi.” ⁵⁰ Iesu ia gwau, “Do umui koua lasi, badina be umui dekenai ia hadikaia lasi tauna, be ia durua henia umui dekenai.”

Samaria taudia haida ese Iesu idia abia dae lasi

⁵¹ Iesu do ia abia isi guba dekenai ena dina ia kahirakahira neganai, ia be Ierusalem dekenai ia raka lao, mai haheauka danu. ⁵² Vadaeni ia ese iena hesiai taudia ia siaia guna. Idia ese Samaria hanua dekenai idia ginidae, iena gabu do idia karaia hegaegae gwauraia. ⁵³ To Iesu be Ierusalem dekenai ia raka lao dainai, idia abia dae lasi edia ruma dekenai. ⁵⁴ Iena diba tahua taudia, Iamesi bona Ioane, unai kara idia itaia, vadaeni idia gwau, “Lohiabada e, oi ura lahi guba dekena amo do ai gwauraia, do ia diho, idia do ia hadikaia ore, a?” ⁵⁵ To Iesu ese iena vairana ia giroa, idia ruaosi ia gwau henia. ⁵⁶ Vadaeni hanua idauna ta dekenai idia lao.

Iesu ena murinai raka totona

⁵⁷ Idia be dala dekenai idia lao noho neganai, tau ta ese Iesu ia hereva henia, ia gwau, “Lau be emu laolao ibounai do ita lao.” ⁵⁸ To Iesu ia gwau, “Uda sisia be mai edia nadi matuna, bona atai ai manu be mai edia ruma, to Taunimanima ena Natuna be iena kwarana atoa gabuna lasi.” ⁵⁹ Ma ta danu ia hamaoroa, ia gwau, “Lauegu murinai oi raka.” To unai tau ia gwau, “Lohiabada e, mani emu kara egu tamana do lau lao guria guna.” ⁶⁰ To Iesu ia gwau, “Mase taudia sibona edia mase do idia guria, to oi be oi lao, Dirava ena Basileia do oi harorolaia.”

⁶¹ Ma ta ia gwau, “Lohiabada e, lau be oiemu murinai do lau raka, to mani egu ruma taudia dekenai do lau lao, bamahuta karaia guna.” ⁶² To Iesu ia gwau, “Tau ta ese tano makohia gauna iena imana dekenai bema ia dogoatao vadaeni, to iena matana do ia negea murina kahana dekenai, ia be Dirava ena Basileia do ia abia diba lasi.”

10

Iesu ese hadibaia taudia 70 ia siaia

¹Unai murinai Lohiabada ese tatau 70 ia abia hidi, rua rua dekena amo ia siaia guna, do idia lao, ia be idia edia murina dekenai do ia mai. Ia ese do ia lao hanuadia bona gabudia ibounai dekenai be idia ese do idia lao hedinarai guna. ²Ia hamaoroa idia dekenai, ia gwau, “Uiti anina be ia momo herea vadaeni, to utua taudia be momo lasi. Unai dainai uma biaguna dekenai do umui noinoi, ia ese utua taudia haida do ia siaia, iena uiti do idia utua.

³“Vadaeni umui lao, lau ese lau siaia umui, mamoe edia natuna uda sisia edia huanai bamona. ⁴Moni ena pusepuse bona dabua udaia ena pusepuse bona tamaka danu be do umui abia lao lasi. Dala dekenai danu tau ta do umui hereva henia lasi. ⁵Do umui daekau rumana dekenai do umui hereva, do umui gwau, ‘Maino inai ruma dekenai do ia noho.’ ⁶Unai ruma dekenai bema maino tauna ta ia noho, emui maino be iena latanai do ia noho, to bema lasi, oiemu maino hereva do ia giroa lou oi dekenai. ⁷Unai ruma tamona dekenai do umui noho, emui aniani do idia henia gaudia do umui ania, bona do umui inua, badina be gaukara tauna ese davana ia abia be namo. Ruma idauidau dekenai do umui lao lasi.

⁸“Hanua ta dekenai umui ginidae, bona umui do idia abia dae neganai, emui aniani do idia karaia gauna be do umui ania. ⁹Edia gorere taudia do umui hanamo, bona do umui hadibaia idia dekenai, do umui gwau, ‘Dirava ena Basileia be umui dekenai kahirakahira ia ginidae.’ ¹⁰To do umui ginidae neganai bema umui do idia abia dae lasi neganai, hanua ena ariara dekenai do umui gini, do umui gwau, ¹¹‘Umui emui hanua ena kahuna, aiemai aena dekenai ia kamokau gauna be ai kokia inai, umui dekenai samania gauna do ia lao. To umui laloa namonamo, Dirava ena Basileia be kahirakahira do ia ginidae.’ ¹²Lau hamaoroa umui dekenai, Dirava ena Kota henia Dina dekenai, Sodoma ena dika be do ia maragi, to unai hanua be do ia dika bada.”

Edia lalona idia giroa lasi hanuadia

¹³“Korasina bona Betesaida, madi umui be dika! Badina be siahu karadia umui emui lalona dekenai lau karaia be Turo bona Sidono edia lalonai bema lau karaia, idia be haraga edia lalona be do idia giroa. Mai edia puse dabua, bona edia kopina dekenai mai kahu danu be do idia helai, edia lalona idia giroa toana hedinarai totona. ¹⁴Dirava ena Kota henia Dina dekenai, Turo bona Sidono be do idia dika maragi, to umui be do umui dika bada. ¹⁵Oi danu Kaperanauma e, oi sibona be guba dekenai do oi abia isi gwauraia, a? Lasi, oi be mase gabuna dekenai oi do idia doria diho.”

¹⁶Ma Iesu ese iena diba tahua taudia ia hamaoroa, ia gwau, “Umui dekenai ia kamoni henia tauna be lau dekenai ia kamoni henia, bona umui dekenai ia ura henia lasi tauna be lau dekenai ia ura henia lasi. Bona lau dekenai ia ura henia lasi tauna be lau ia siaia Diravana dekenai ia ura henia lasi.”

Tatau 70 idia giroa lou

¹⁷Unai tatau 70 idia giroa mai lou, mai moale danu, idia gwau, “Lohiabada e, lauma dikadia ese aiemai hereva idia kamoni, oiemu ladana dainai.” ¹⁸Vadaeni Iesu ese ia hamaoroa idia dekenai, ia gwau, “Lau be Satani lau itaia, kevaru bamona guba dekena amo ia moru. ¹⁹Lau ese

siahu lau henia umui dekenai, gaigai bona doadoa do umui moia, bona umui dekenai ia heatu henia tauna ena siahu ibounai danu do umui moia, bona gau ta ese do ia hadikaia lasi umui. ²⁰ Gau tamona, lauma dikadia ese umui dekenai idia kamonaia henia, be do umui moalelaia lasi, to inai sibona mo do umui moalelaia: Umui emui ladana be guba dekenai ia torea vadaeni.”

Iesu ese mai moale bada Dirava ia hanamoa

²¹ Unai neganai Iesu be Lauma Helaga ese ia abia dainai ia moale bada, ia gwau, “Egu Tamana e, guba bona tanobada ena lohia, lau hanamoa oi dekenai, badina be inai gaudia aonega taudia bona diba taudia dekenai amo oi hunia vadaeni, to memero maragidia dekenai oi hedinarai vadaeni. Egu Tamana e, oiemu laloa namona dainai unai bamona oi karaia. ²² Gau ibounai be egu Tamana ese ia henia vadaeni lau dekenai. Tau ta be Natuna ia diba lasi, iena Tamana sibona. Bona tau ta be Tamana ia diba lasi, iena Natuna sibona. To bema Natuna ia ura tau ta dekenai Tamana ia hedinarai henia, be unai tau ese Tamana do ia diba.”

²³ Vadaeni Iesu ese iena matana ia giroa, iena diba tahua taudia sibona dekenai ia hereva henia, ia gwau, “Inai gaudia umui itaia taudia emui matana be idia namo vadaeni. ²⁴ Badina be peroveta taudia bona king momo herea idia ura umui ese umui itaia gaudia do idia itaia, to idia itaia lasi, bona umui ese umui kamonaia herevadia do idia kamonaia, to idia kamonaia lasi.”

Taravatu ena hereva badana be lalokau

²⁵ Vadaeni taravatu hadibaia tauna ta ia torei, Iesu dekenai ia dibagania gwauraia, ia gwau, “Hadibaia tauna e, lau be edena bamona do lau karaia mauri hanaihanai abia totona?”

²⁶ Iesu ia gwau, “Taravatu ena buka lalonai edena bamona ia torea? Edena bamona oi duahia?” ²⁷ Tau ese ia haere, ia gwau, “Lohiabada oiemu Dirava dekenai do oi lalokau henia mai emu kudouna ibounai, mai emu lauma ibounai, mai emu goada ibounai, bona mai emu lalona ibounai. Bona, oiemu badibadinai tauna dekenai oi lalokau henia, oi sibona dekenai oi lalokau henia hegeregerena.” ²⁸ Iesu ia gwau, “Oiemu haere be ia maoro. Unai bamona do oi karaia, be do oi mauri.”

²⁹ To ia be sibona ia ura maoro gwauraia, vadaeni ma ia nanadaia, ia gwau, “Lauegu badibadinai tauna be daika?”

³⁰ Iesu ma ia haere, ia gwau, “Tau ta Ierusalem dekenai amo Ieriko dekenai ia lao neganai henaoa taudia haida ese idia davaria. Vadaeni iena dabua idia dadia, idia botia, kahirakahira ia mase, vadaeni idia rakatania. ³¹ Dubu ena hahelagaia tauna ta be unai dala dekenai ia raka lao, unai bero tauna ia itaia, to kahana dekenai ia raka hanaia. ³² Levi ena orea tauna ta danu unai bamona, unai gabu dekenai ia ginidae, ia itaia, to ma kahana dekenai ia raka hanaia.

³³ “To Samaria tauna be unai dala dekenai ia raka, bona unai gabu dekenai ia ginidae, bero tauna ia itaia. Vadaeni ia bogahisihisi henia. ³⁴ Ia dekenai ia lao, dehero bona uaina dekenai amo iena bero ia huria, ia kumia. Vadaeni ena doniki dekenai ia atoa, laolao taudia edia ruma dekenai ia abia lao, bona unai gabu dekenai ia naria. ³⁵ Dabai ia torei, siliva moni rua ia abia, ruma biaguna dekenai ia henia, ia gwau, ‘Do oi naria namonamo, bema dahaka dahaka do oi henia davana lasi, do lau giroa mai neganai, edia davana do lau henia oi dekenai.’ ”

³⁶ Iesu ia gwau, “Oi be dahaka oi gwau? Idia toiosi daika be dadia taudia ese idia haberoa tauna ena badibadinai tauna do ita gwauraia?”

³⁷ Idia gwau, “Ia bogahisihisi henia tauna.” Vadaeni Iesu ia gwau, “Oi lao, oi danu unai bamona do oi karaia.”

Mareta bona Maria

³⁸ Edia laolao neganai, hanua ta dekenai idia ginidae, unuseni hahine ta, iena ladana be Mareta, ese Iesu ia abia dae iena ruma dekenai. ³⁹ Ia be mai ena tadina, iena ladana be Maria. Vadaeni inai Maria ia lao, Lohiabada ena aena badinai ia helai, iena hadibaia hereva ia kamonaia. ⁴⁰ To Mareta be vadivadi taudia abia dae karadia dekenai ia hekwarahi. Vadaeni ia be Iesu dekenai ia lao, ia gwau, “Lohiabada e, oi be lalao lasi, egu tadina ese lau ia rakatania, vadaeni lau sibona lau hekwarahi, a? Mani oi hamaoroa, do ia durua lau.” ⁴¹ To Iesu ese ia haere henia, ia gwau, “Mareta e, Mareta e, gau momo totona oi lalao momo bona oi hekwarahi, ⁴² to gau tamona sibona be ia bada herea. Maria ese inai gau namona ia abia hidi, bona ia dekena amo do ita kokia lasi.”

11

Lohiabada ena guriguri

¹ Iesu be gabu ta dekenai ia guriguri, vadaeni iena guriguri ia hadokoa neganai, iena diba tahua tauna ta ese ia noia, ia gwau, “Lohiabada e, guriguri oi hadibaia ai dekenai, Ioane ese iena diba tahua taudia ia hadibaia bamona.” ² Vadaeni ia ese ia hamaoroa idia dekenai, ia gwau, “Umui guriguri neganai be umui gwau:

“Aiemai Tamana e, oiemu ladana do ai hahelagaia.

Oiemu Basileia do ia mai.

³ Dina ta ta ibounai aiemai aniani do oi henia ai dekenai.

⁴ Aiemai dika do oi gwauatao,

badina be ai danu ese ai dekenai idia hadikaia taudia edia dika ai gwauatao.

Bona dibagani dekenai ai do oi hakaua vareai lasi.’”

⁵ Iesu ese ma ia hereva henia idia dekenai, ia gwau, “Umui ta hanuaboi huanai momokani dekenai bema oi lao, oiemu turana dekenai bema oi noinoi, do oi gwau, ‘Egu turana e, aniani gaudia toi mani oi henia, lau abiatorehai, ⁶ badina be egu turana ta ena laolao dekena amo ia mai vadaeni, to lau dekenai ia lau ubua gauna ta ia noho lasi.’ ⁷ To ia be ruma ena lalona dekena amo do ia haere, do ia gwau, ‘Oi hekwarahi henia lasi lau, iduara lau koua vadaeni, bona lau be egu natuna danu ai hekure. Lau be do lau toreisi lasi, do lau henia lasi oi dekenai.’ ⁸ Lau hamaoroa umui dekenai, do ia toreisi lasi, ena turana durua totona. To bema oi noia lou, noia lou neganai, ia be do ia toreisi, vadaeni oiemu ura gaudia ibounai do ia henia.

⁹ “Lau hamaoroa umui dekenai, do umui noinoi, do ia henia umui dekenai. Do umui tahua, do umui davaria. Do umui pidipidi, iduara do ia kehoa umui emui. ¹⁰ Badina be idia noinoi taudia ibounai idia abia, idia tahua taudia ese idia davaria, pidipidi tauna dekenai iduara do idia kehoa.

¹¹ “Umui daika emu natuna aniani bema ia noia neganai, nadi do oi henia? O gwarume do ia noia neganai, gaigai do oi henia? ¹² O gatoi do ia noia neganai, doadoa do oi henia? ¹³ Umui lalao, umui be dika taudia, gau namodia emui natuna dekenai henia be umui diba, to emui Tamana

guba dekenai ia noho ese Lauma Helaga be idia noinoi taudia dekenai do ia henidia lasi, a?”

Haida ese Iesu dekenai idia maumau

¹⁴ Iesu ese hereva lasi lauma dikana ta ia lulua murimuri dekenai, vadaeni inai hereva lasi tauna ia hereva diba. Vadaeni taunimanima ibounai be idia hoa. ¹⁵ To haida idia gwau, “Belesebulo, lauma dikadia edia biaguna, ena siahu dekenai ia ese lauma dikadia ia lulua murimuri dekenai.”

¹⁶ To haida ese idia dibagani henia, idia gwau idia ura Iesu ese toa ta guba dekena amo do ia henia idia dekenai. ¹⁷ To Iesu be edia laloa ia diba, vadaeni ia hereva henia idia dekenai, ia gwau, “Basileia ta sibona bema ia hapararaia, ia be do ia dika, bona iduhu ta sibona bema ia hapararaia, ia be do ia makohia sisina sisina. ¹⁸ Bona Satani sibona bema ia hapararaia, iena basileia be edena bamona do ia gini? ¹⁹ Umui gwau lau be Belesebulo ena siahu dekenai lauma dikadia lau lulua murimuri dekenai. To umui emui orea taudia ese lauma dika idia luludia neganai, daika ena siahu dekena amo idia karaia? Unai dainai, emui orea taudia sibodia ese idia gwau emui hereva be kerere. ²⁰ To, bema lau ese Dirava ena Laumana dainai lauma dikadia lau lulua murimuri dekenai, Dirava ena Basileia be umui dekenai ia ginidae vadaeni.

²¹ “Goada tauna ena imana mai io danu ena ruma do ia naria neganai, iena kohu do ia noho namonamo. ²² To nega ta, goada herea tauna ta do ia mai, do ia tuari henia. Vadaeni do ia halusia, iena tuari gaudia, ia ese ia abidadama henia gaudia, be do ia dadia. Vadaeni unai iena kohu ibounai do ia haria idau gabu taudia dekenai. ²³ Lau danu ia hakapua lasi tauna ese lauegu dala ia koua gwauraraia, bona lau danu ia gaukara lasi tauna ese lau hadikaia totona ia gaukara noho.”

Lauma dikana ese ia rakatania tauna

²⁴ “Lauma dikana ta, tau ta ia rakatania, vadaeni gabu kaukau dekenai ia raka hanaia, ia laga-ani totona, to laga-ani gabuna ta ia davaria lasi. Vadaeni ia gwau, ‘Lau rakatania rumana dekenai do lau giroa lou.’ ²⁵ Ia giroa lao, ia davaria ruma be ia goevagoeva, ia namo vadaeni. ²⁶ Vadaeni ia ese lauma idia dika momokani 7 ma ia hakaudia lao, ibounai idia raka vareai, ruma lalonai idia noho. Unai dainai, unai tau be hamatamaia neganai ena dika be sisina ia maragi, to dokona neganai ena dika be ia bada herea.”

²⁷ Unai hereva ia gwauraraia neganai, hahine ta taunimanima momo edia huanai Iesu dekenai ia hereva, ia hereva badabada, ia gwau, “Oi ia havaraia, bona oi dekenai rata ia henia hahine be mai moale bada.” ²⁸ To Iesu ia gwau, “Gau badana momokani be inai, Dirava ena hereva idia kamonaia bona idia badinaia taudia be idia moale bada.”

Toa idia tahua

²⁹ Taunimanima momo ma Iesu dekenai idia haboua, vadaeni idia dekenai ia hereva, ia gwau, “Inai nega taunimanima be dikadia, toa idia tahua, to toa ta idia dekenai do ia hedinararaia lasi, Iona, peroveta tauna, ena toana sibona vadaeni. ³⁰ Iona be toa ta Nineva taudia edia vairana dekenai, vadaeni unai bamona dala hegeregereana, Taunimanima ena Natuna be toa dekenai do ia lao, inai nega taudia edia vairana dekenai. ³¹ Dirava ena Kota Badana neganai, diho kahana dekena amo kwini ese inai nega taudia danu do idia gini hebou, do ia samania idia dekenai. Badina ia be tanobada ena dokona dekena amo Solomona ena aonega

hereva dekenai kamonaia totona ia mai. To iniseni tau ta ese Solomona ia hereaia. ³² Dirava ena Kota Badana dinana dekenai danu Nineva taudia be inai nega taudia danu do idia gini hebou, do idia samania idia dekenai. Badina be Iona ena haroro dainai, idia edia lalona idia giroa, to iniseni tau ta ese Iona ia hereaia momokani!”

Diari herevadia

³³ “Tau ta ese lamepa ia gabua neganai, ruma henunai do ia atoa lasi, o disi dekenai amo do ia koua lasi, to lamepa ena pata dekenai do ia atoa, vadaeni do idia raka vareai taudia ese ena diari do idia itaia. ³⁴ Tauanina ena lamepa be matana. Unai dainai bema emu matana do ia namo, emu tauanina ibounai do ia diari. To emu matana bema ia dika, emu tauanina ibounai do ia dibura. ³⁵ Unai dainai, do oi naria namonamo, diari oiemu lalona dekenai ia noho be do ia dibura garina. ³⁶ Bema oiemu tauanina ibounai ia diari, bona dibura sisina be kahana ta dekenai ia noho lasi neganai, oiemu tauanina bona lalona ibounai be do ia diari momokani, lamepa ena diari diari ese oi ia hadiaria hegeregerena.”

Iesu ese Farisea taudia bona taravatu hadibaia taudia dekenai ia gwau henia

³⁷ Iesu ena hereva ia ore, vadaeni Farisea tauna ta ese ia boiboi ia dekenai, ia danu do idia aniani hebou. Vadaeni ena ruma dekenai ia daekau, aniani gabuna dekenai ia helai diho. ³⁸ To Farisea tauna ese Iesu ia itaia, bona ia hoa, badina ia be iena imana ia huria guna lasi. ³⁹ Vadaeni Lohiabada ese ia hereva henia, ia gwau, “Umui Farisea taudia be kapusi bona disi edia murina kahana sibona umui huria namonamo, to emui lalona dekenai be dadia kara bona kerere havaraia kara ia honu momokani. ⁴⁰ Kavakava taudia e, Dirava ese murina kahana ia karaia be ia ese lalona kahana ia karaia lasi, a? ⁴¹ To emui kapusi bona mereki lalonai gaudia be ogogami taudia dekenai do umui harihari henia, vadaeni gau ibounai umui dekenai be do idia goeva.

⁴² “To Farisea taudia e, madi umui be dika. Badina be aniani ava maragimaragi ibounai dekenai amo karoa be 10 umui karaia, karoa ta be harihari gauna dekenai umui halaoa, to kara namo bona Dirava dekenai ura henia be umui badinaia lasi. Unai karoa ta, karoa 10 dekenai amo, ena taravatu umui badinaia be namo, to namo lasi maoro karadia bona lalokau karadia umui rakatania.

⁴³ “Farisea taudia e, madi umui be dika. Badina be umui ura dubu dekenai helai gaudia namo herea dekenai umui helai, umui ura danu taunimanima haboua gabudia dekenai taunimanima ese do idia hanamo umui. ⁴⁴ Madi umui be dika. Umui be mase guria gabu gunadia, hunia gaudia bamona, taunimanima ese edia latanai idia raka, bona miro idia abia, idia diba lasi inai be guria gabudia dainai.”

⁴⁵ Taravatu hadibaia tauna ta ese ia haere ia dekenai, ia gwau, “Hadibaia tauna e, oi ese unai bamona oi hereva, be ai dekenai danu oi hadikaia inai.”

⁴⁶ Iesu ia gwau, “Umui danu, taravatu taudia, madi umui be dika. Badina umui ese gau metauna taunimanima edia latanai umui atoa, to emui imana kwakikwakina ta dekenai amo unai gau metauna dekenai durua umui henia lasi. ⁴⁷ Madi umui be dika. Badina be emui sene taudia ese peroveta taudia idia alaia mase, to umui ese edia guria gabuna umui haginia. ⁴⁸ Unai umui karaia dainai, umui ese emui sene taudia edia kara dika umui gwauraia hedinarai, bona inai kara umui abia dae

danu. Badina be idia ese peroveta taudia idia alaia, bona umui ese edia guria gabudia umui haginia.

⁴⁹ “Unai dainai Dirava ese iena aonega dekenai ia hereva vadaeni, ia gwau, ‘Lau ese peroveta taudia bona aposetolo taudia do lau siaia lao, vadaeni haida do idia alaia mase, ma haida do idia dagedage henia.’ ⁵⁰ Unai dainai peroveta taudia ibounai edia rarana idia habubua vadaeni, tanobada hamatamaia dekena amo, unai kerere be inai hari nega taudia edia latanai. ⁵¹ Oibe, lau hamaoroa umui dekenai, Abela ena rarana ia bubua ia mai bona Sekaraia ena rarana idia bubua, ia be pata helagana bona Dubu Helaga edia huanai idia alaia mase, inai ibounai ena kerere be inai nega taudia edia latanai.

⁵² “Taravatu hadibaia taudia, madi umui be dika. Badina be aonega ena ki umui abia siri vadaeni. Umui be umui raka vareai lasi, bona raka vareai ura taudia edia dala umui koua.”

⁵³ Iesu be ruma dekena amo ia diho neganai, taravatu hadibaia taudia bona Farisea taudia ese ia dekenai hereva auka idia henia, bona idia koia gwauraia, idia ura hereva idauidau momo do ia gwauraia. ⁵⁴ Vadaeni bema hereva kererena ta ia gwauraia neganai, do idia kota henia gwauraia.

12

Farisea taudia edia koikoi kara

¹ Unai neganai taunimanima momo herea idia haboua, hegeregere aena dekenai idia ta ta dekenai moia tao moia tao. Vadaeni Iesu ese iena diba tahua taudia dekenai ia hereva henia guna, ia gwau, “Umui naria namonamo Farisea taudia edia koikoi kara dekenai. ² Koua gaudia ibounai do idia hedinarai, bona hunia gaudia ibounai be do idia diba. ³ Unai dainai, dibura lalonai umui gwauraia herevadia be diari dekenai do idia kamoni. Bona ruma lalonai umui hereva metairametaira gaudia, be ruma ena ataiiai dekena amo do idia harorolaia.

Taunimanima ese Tamona sibona idia gari henia be namo

⁴ “Egu turadia e, lau hamaoroa umui dekenai, tauanina do idia alaia diba, to mase murinai gau ta do idia karaia diba lasi taudia dekenai do umui gari lasi. ⁵ To lau hamaoroa umui dekenai, daika dekenai do umui gari: Umui do ia alaia mase murinai, ia be mai siahu, mase gabuna dekenai umui do ia negea diho Diravana, ia dekenai do umui gari!

⁶ “Manu maragidia 5 edia davana be toea rua sibona, ani? To Dirava ese idia ta ia laloaboio lasi. ⁷ Umui emui kwarana huina ibounai ia ese ia duahia ore. Unai dainai, do umui gari lasi, umui ese manu maragidia momo edia davana umui hanaia.

Iesu ena ladana gwauraia hedinarai

⁸ “Lau hamaoroa umui dekenai, taunimanima edia vairana dekenai lau do idia gwauraia hedinarai taudia ibounai be, Taunimanima ena Natuna ese Dirava ena aneru edia vairana dekenai, idia do ia gwauraia hedinarai. ⁹ To taunimanima edia vairana dekenai lau do ia hunia tauna, be lau ese Dirava ena aneru edia vairana dekenai do lau hunia.

¹⁰ “Taunimanima ena Natuna idia hereva dika henia taudia ibounai edia dika do ia gwauatao. To Lauma Helaga dekenai ia hereva dika henia tauna ena dika do ia gwauatao lasi.

¹¹ “Dubu edia biaguna, bona hanua edia lohia bona siahu taudia edia vairana dekenai umui do idia hakaua neganai, emui lalona do idia

hekwarahi lasi, edena bamona do umui haere, o edena bamona do umui hereva. ¹² Badina be, unai neganai do umui gwauraia herevadia, be Lauma Helaga ese do ia hadibaia umui dekenai.”

Kohu momo herevadia

¹³ Taunimanima edia huanai, tau ta ese Iesu dekenai ia noia, ia gwau, “Hadibaia tauna e, mani emu kara lauegu kakana dekenai do oi hereva henia, do oi hamaoroa, aiemai tamana ena kohu haria dekena amo lauegu kahana do ia henia.”

¹⁴ To Iesu ese ia haere henia ia dekenai, ia gwau, “Tau e, daika ia gwau lau be kota biaguna, o umui ruaosi emui kohu haria tauna?” ¹⁵ Vadaeni Iesu ia hamaoroa idia dekenai, ia gwau, “Do umui naria namonamo, kohu dekenai do umui ura henia dikadika garina. Badina taunimanima edia mauri badina be kohu momo dekena amo lasi, lasi momokani.”

¹⁶ Vadaeni Iesu ese parabole ta ia henia idia dekenai, ia gwau, “Kohu momo tauna ena uma aniani be momo herea. ¹⁷ Vadaeni inai bamona ia lalao, ia gwau, ‘Lau be edena bamona do lau karaia? Badina be egu uma aniani ibounai be haboua gabuna lasi.’ ¹⁸ Ma ia gwau, ‘Inai bamona do lau karaia, egu aniani haboua ruma do lau kokia, badadia haida do lau haginia, vadaeni egu uma aniani bona egu kohu ibounai unuseni do lau haboua. ¹⁹ Vadaeni egu laumana dekenai do lau hamaoroa, do lau gwau: Egu laumana e, oiemu kohu be momo herea, lagani momo ena hegeregerena. Do oi laga-ani, do oi aniani, do oi inuinu, do oi moale.’ ²⁰ To Dirava ese ia hereva henia ia dekenai, ia gwau, ‘Kavakava tauna! Hari hanuaboi oiemu laumana oi dekena amo do lau kokia, vadaeni inai oi haboua kohudia be daika ese do ia abia?’

²¹ “Iena kohu sibona dekenai ia haboua, to Dirava dekenai ia be gau momo ia henia lasi tauna be unai bamona.”

Dirava dekenai umui abidadama henia

²² Iesu ese iena diba tahua taudia dekenai ma ia hamaoroa, ia gwau, “Unai dainai lau hamaoroa umui dekenai, emui lalona idia hekwarahi lasi emui mauri totona, dahaka do umui ania. O emui tauanina totona, dahaka dabua do umui karaia. ²³ Mauri ese aniani ia hereaia, bona tauanina ese danu dabua ia hereaia. ²⁴ Manu, ena ladana galo mani umui lalao, aniani gaudia idia hadoa lasi, idia geia lasi, idia be gau ta lasi, haboua gabuna lasi. To Dirava ese idia ia ubua noho. Umui ese manu umui hereaia lasi, a? ²⁵ Umui daika ena lalao hekwarahi dekena amo iena tauanina sisina sibona do ia halataia diba? ²⁶ Unai dainai, inai gau maragina bema umui karaia diba lasi, ma gau haida dekenai umui lalao momo ena anina be dahaka? ²⁷ Herahera mani do umui lalao, edena bamona idia vara. Idia gaukara lasi, dabua idia turia lasi. To umui lau hamaoroa, Solomona be mai ena dabua namodia ibounai, to iena hairaina be idia ta hegeregere lasi. ²⁸ Unai dainai, tano ena avadia, hari be idia noho, kerukeru lahi dekenai do idia negea daekau, to Dirava ese idia dekenai dabua ia henia, be, ia ese umui danu dekenai dabua do ia henia lasi, a? Abidadama maragimaragi taudia! ²⁹ Unai dainai, aniani gaudia bona inuinu gaudia do umui tahua momo lasi, bona emui lalona do idia hekwarahi lasi. ³⁰ Badina unai gaudia be tanobada bese ibounai ese idia tahua. Bona emui Tamana be ia diba umui ura gaudia be unai. ³¹ To Dirava ena Basileia do umui tahua, vadaeni unai gaudia ibounai danu be do ia henia umui dekenai.

Kohu umui haboua guba dekenai

32 “Orea maragi e, umui gari lasi, badina emui Tamana ese ia hereva vadaeni Basileia do ia henia umui dekenai. 33 Emui kohu do umui hoihoilaia, ogoami taudia dekenai do umui henia. Do ia dika lasi moni pusepusena do umui abia. Bona emui kohu guba dekenai do umui haboua noho, badina unuseri ia be do ia ore diba lasi. Unuseri henaoa tauna ia raka vareai lasi, bona manumanu ese idia ania ore lasi. 34 Badina be emui kohu idia noho gabuna dekenai, emui lalona danu be unuseri.

Hesiai taudia namodia idia noho hegaegae

35 “Emui rami do umui kwatua, bona emui lamepa do umui gabua, umui noho hegaegae. 36 Edia biaguna dekenai idia naria noho taudia bamona do umui noho hegaegae. Edia biaguna be headava aria dekena amo do ia giroa mai, do ia pidipidi, vadaeni iduara do idia kehoa haragaharaga. 37 Bema biaguna do ia mai neganai, do ia davaria iena hesiai taudia idia mahuta lasi, unai hesiai taudia do idia moale. Momokani lau hamaoroa umui dekenai, biaguna ese iena rami do ia kwatua, do ia hamaordia aniani gabuna dekenai do idia helai, vadaeni edia hesiai gaukara ia ese do ia karaia. 38 Hanuaboi ena huanai, o daba kahirakahira neganai do ia mai, vadaeni ia davaridia idia noho hegaegae taudia be do idia namo. 39 Inai hereva umui lalona namonamo: Ruma biaguna be henaoa tauna ena mai neganai bema ia diba guna, ia be do ia naria namonamo noho, vadaeni iena ruma do ia makohia lasi. 40 Umui danu do umui noho hegaegae, badina be umui diba lasi negana dekenai, Taunimanima ena Natuna do ia mai.”

Hesiai tauna ese biaguna ena ura do ia karaia

41 Petero ese Iesu dekenai ia nanadaia, ia gwau, “Lohiabada e, inai parable be ai sibona dekenai oi henia, o taunimanima ibounai danu?”

42 Lohiabada ia gwau, “Kohu naria tauna mai ena kamona, bona mai ena kara maoromaoro, iena biaguna ese ia abia hidi, iena ruma do ia naria, bona aniani neganai, iena hesiai taudia edia aniani do ia henia, tauna be daika? 43 Iena biaguna do ia mai, do ia davaria unai bamona ia karaia tauna be do ia moale. 44 Momokani lau hamaoroa umui dekenai, iena kohu ibounai dekenai naria tauna, unai biaguna ese do ia halaoa. 45 To bema unai kohu naria tauna ese inai bamona do ia lalona, do ia gwau, ‘Lauegu biaguna be do ia mai haraga lasi,’ vadaeni hesiai taudia bona hahine do ia botai, do ia aniani noho, do ia inuino noho, bona do ia kekeri, 46 unai tau be ia lalona lasi dina dekenai, bona ia hegaegae lasi neganai, iena biaguna do ia ginidae. Biaguna ese do ia utua maragimaragi, bona kamona lasi taudia edia davana hegeregerena do ia henia.

47 “Hesiai tauna ta, bema iena biaguna ena ura ia diba, to ia hegaegae lasi, vadaeni biaguna ena ura ia karaia lasi, unai tauna be biaguna ese do ia panisia bada. 48 To biaguna ena ura ia diba lasi tauna, ena kara ena davana momokani be panisia, to biaguna ese do ia panisia bada lasi. Gau momo ia dekenai do idia henia tauna dekena amo, be gau momo do idia tahua. Bona gau momo ia dekenai idia henia do ia naria totona tauna, be henia lou neganai, unai tau dekena amo gau momo do idia tahua.

Iesu ese heai do ia havaraia

49 “Lau be tanobada dekenai lahi arai totona lau mai. To lau ura be ia arai hamatamaia guna. 50 Lau be mai egu bapatiso, inai bapatiso do idia henia lau, bona lauegu lalona do ia laga-ani diba lasi ela bona lau

abia momokani. ⁵¹ Umui laloa lau be tanobada dekenai maino havaraia totona lau mai, a? Lau hamaoroa umui dekenai, lasi! Heai havaraia totona lau mai. ⁵² Badina be hari inai nega dekena amo, ruma tamona dekenai taudia 5 do idia hapararaia, taudia toi ese taudia rua dekenai do idia badu henia, bona taudia rua ese taudia toi dekenai do idia badu henia. ⁵³ Idia sibona dekenai do idia parara karaia, tamana bona mero, mero bona tamana, sinana bona kekeni, kekeni bona sinana, ravana bada hahine bona ravana maragi hahine, ravana maragi hahine bona ravana bada hahine.”

Nega do ia ginidae ena toana

⁵⁴ Iesu ese taunimanima momo dekenai ia hamaoroa, ia gwau, “Umui be dina ia diho ena kahana dekenai ori korema umui itaia, bona umui gwau medu do ia diho, vadaeni ia diho. ⁵⁵ O laurabada kahana dekena amo lai ia mai neganai, umui gwau dina do ia siahu, vadaeni ia siahu. ⁵⁶ Koikoi taudia, umui be guba bona tanobada edia toana umui diba. To edena bamona, hari inai nega ena toana be umui diba lasi, a?”

Oi dekenai samania tauna danu maino umui karaia

⁵⁷ “Badina dahaka laloa maoromaoro dalana umui abia hidi lasi emui mauri lalonai? ⁵⁸ Oi dekenai ia samani henia tauna danu maino do umui karaia haraga, kota gabuna ena dala dekenai umui ruaosi umui raka hebou neganai, badina be ia ese kota henia tauna ena imana dekenai oi do ia atoa garina. Kota henia tauna ese dibura naria tauna ena imana dekenai oi do ia atoa garina, dibura ruma lalonai oi do idia koua garina. ⁵⁹ Lau hamaoroa oi dekenai, unai gabu dekena amo do oi raka siri lasi, ela bona ena davana do oi haorea momokani.”

13

Emui lalona umui giroa, umui mase garina

¹ Unai neganai taunimanima haida ese Galilea taudia haida edia sivarai Iesu dekenai idia hamaoroa, Pilato ese Galilea taudia haida ia aladia boubou patana dekenai, boubou idia henia neganai. ² Vadaeni Iesu ese ia haere henia idia dekenai, ia gwau, “Umui gwau be unai Galilea taudia haida sibona edia dika ese Galilea taudia oredia edia dika ia hanaia, unai dainai unai bamona idia mase haraga? ³ Lau hamaoroa umui dekenai, lasi momokani! To umui emui lalona bema umui giroa lasi, umui ibounai unai bamona do umui mase. ⁴ Bona Siloama kohoro ese taudia 18 edia latanai ia moru, vadaeni idia mase. Inai taudia 18, umui be umui gwau, idia edia dika be Ierusalem taudia oredia edia dika ia hanaia? ⁵ Lau hamaoroa umui dekenai, lasi momokani! To umui emui lalona bema umui giroa lasi, umui ibounai unai bamona do umui mase.”

Parabole: Au ese huahua ia atoa lasi

⁶ Inai parabole Iesu ese ia henia idia dekenai, ia gwau, “Tau ta ena vain uma gabu dekenai fig auna ta ia hadoa. Gabeai ena huahua tahua totona ia lao, to ia davaria lasi. ⁷ Vadaeni ia ese uma gabu naria tauna dekenai ia hamaoroa, ia gwau, ‘Lagani toi be inai fig auna ena huahua lau tahua, to lau davaria lasi. Do oi utua, ia ese tano ia gaukaralaia kava be anina lasi.’ ⁸ To ia ese ia haere, ia gwau, ‘Egu biaguna e, hari inai lagani tamona sibona do ia noho, tano do lau makohia maragimaragi, ena badina dekenai muramura do lau atoa. ⁹ Vadaeni bema huahua ia havaraia, be do ia namo, to bema lasi, do oi utua.’”

Iesu ese Sabati Dina dekenai ia hamauria karaia

¹⁰ Sabati Dina ta dekenai, Iesu be dubu lalonai ia hadibaia karaia. ¹¹ Unuseni be hahine ta, lauma dika ese ia abia lagani 18, iena doruna be ia maoromaoro lasi, do ia toreisi ia gini diba lasi. ¹² Iesu ese ia itaia, vadaeni ia hamaoroa, ia gwau, “Hahine e, oiemu gorere be ia ore vadaeni.” ¹³ Iesu ese iena imana danu hahine ena latanai ia atoa, vadaeni nega tamona iena doruna ia maoromaoro. Vadaeni inai hahine ese Dirava ia hanamoa.

¹⁴ To dubu ena biaguna be ia badu, Iesu ese Sabati Dina dekenai hanamoa kara ia karaia dainai. Vadaeni inai biaguna ese taunimanima ibounai dekenai ia gwau henia, ia gwau, “Dina be 6 idia noho, taunimanima edia gaukara dinadia. Unai dina lalonai hanamoa totona do umui mai, to Sabati Dina neganai do umui mai lasi.”

¹⁵ To Lohiabada ese ia haere henia ia dekenai, ia gwau, “Koikoi tauna e, Sabati Dina dekenai emui boromakau o emui doniki umui ruhaia lasi, ranu henia totona umui hakaua lao lasi, a? ¹⁶ To inai hahine, Aberahamo ena bese hahinena, lagani 18 Satani ese ia guia, be Sabati Dina dekenai do lau ruhaia lasi, a?” ¹⁷ Unai bamona ia hereva, vadaeni Iesu dekenai idia badu henia taudia be idia hemarai. To taunimanima momo herea ese Iesu ena kara namo herea momokani dekenai idia moale bada.

Parabole: Mastadi ena uhena

¹⁸ Vadaeni Iesu ia gwau, “Dirava ena Basileia be edena bamona? Dahaka dekenai do lau hahegeregerea? ¹⁹ Ia be mastadi ena uhena ta bamona, tau ta ese ia abia, iena uma gabu dekenai ia hadoa. Vadaeni ia tubu, au badana ia lao, bona atai ai manu be iena rigina dekenai edia ruma idia karaia.”

Parabole: Paraoa ena hatubua muramura

²⁰ Ma Iesu ia gwau, “Dirava ena Basileia be dahaka dekenai do lau hahegeregere karaia? ²¹ Ia be hatubua ena muramura bamona, hahine ta ese ia abia, paraoa momo, hegeregere disi toi danu ia mikisi karaia, ela bona inai muramura ese paraoa ibounai ia hatubua, ia bada vadaeni.”

Dirava ena Basileia dekenai vareai totona iduara maragina

²² Iesu be Ierusalem dala dekenai ia lao neganai, be hanua badadia bona hanua maragidia lalonai ia hadibaia karaia. ²³ Vadaeni tau ta ese ia hereva henia ia dekenai, ia gwau, “Lohiabada e, mauri do idia abia taudia be momo, o haida sibona, a?”

Iesu ia haere, ia gwau, ²⁴ “Do umui raka goada, iduara maragimaragi dekena amo do umui raka vareai. Badina be lau hamaoroa umui dekenai, taunimanima momo do idia ura raka vareai, to idia be hegeregere lasi. ²⁵ Ruma ena biaguna do ia toreisi, iduara do ia koua. Gabeai umui be murimuri dekenai do umui gini, iduara dekenai do umui pidipidi, do umui gwau, ‘Lohiabada e, mani oi kehoa.’ To ia be do ia haere henia umui dekenai, do ia gwau, ‘Umui be edeseni dekena amo lau diba lasi.’ ²⁶ Vadaeni umui be do umui gwau, ‘Ai be oiemu vairana dekenai ai aniani, ai inuinu, bona aiemai hanua dekenai oi hadibaia karaia.’ ²⁷ To ia be do ia gwau, ‘Lau hamaoroa umui dekenai, edeseni dekena amo umui mai lau diba lasi, umui dika karaia noho taudia, umui ibounai umui siri.’ ²⁸ Vadaeni Aberahamo bona Isako bona Iakobo bona peroveta taudia ibounai do umui itaia, Dirava ena Basileia lalonai. To umui be do idia doria murimuri dekenai. Unai neganai do umui tai, umui emui isena do umui koria auka masemase. ²⁹ Vadaeni dina ia daekau ena kahana dekena amo bona dina ia diho ena kahana dekena amo, mirigini ena

kahana dekena amo bona diho ena kahana dekena amo, idia be do idia mai, Dirava ena Basileia lalonai aniani pata dekenai do idia helai. ³⁰ To unai neganai gabeai taudia haida be do idia guna, bona guna taudia haida be do idia gabeai.”

Iesu be Ierusalemata totona ia tai

³¹ Unai neganai Farisea taudia haida Iesu dekenai idia lao, idia hamaoroa, idia gwau, “Idau gabu dekenai oi lao, badina be Heroda ese oi ia tahua, oi do ia alaia mase gwauraia.”

³² Vadaeni ia haere henia idia dekenai, ia gwau, “Umui lao, unai uda sisia dekenai umui hamaoroa, lau be harihari bona kerukeru lauma dikadia do lau lulua murimuri dekenai, bona gorere taudia do lau hanamoa, bona dina ihatoina dekenai egu gaukara do lau haorea momokani. ³³ To harihari, kerukeru, vanegai, egu laolao do lau lao, badina peroveta tauna be idau gabu dekenai do ia mase lasi, Ierusalemata dekenai sibona.

³⁴ “Ierusalemata e, Ierusalemata e, oi ese peroveta taudia oi alaia, bona Dirava ese ia siaia oi dekenai taudia be nadi dekenai oi alaia. Nega momo oiemu natuna do lau haboua gwauraia, kokoroku hahine ese natuna ena huina dekena amo ia koua bamona, to umui be umui ura lasi. ³⁵ Unai dainai, emui ruma be do ia noho kava. Momokani umui lau hamaoroa, lau do umui itaia lou lasi, ela bona nega ta do ia ginidae, vadaeni do umui gwau, ‘Lohiabada ena ladana dekenai ia mai tauna ita hanamoa.’”

14

Iesu ese Sabati Dina dekenai gorere tauna ia hanamoa

¹ Sabati Dina ta dekenai, Iesu ese Farisea edia biaguna ta ena ruma dekenai ia daekau, do idia aniani totona. Vadaeni idia ese iena kara idia itaia namonamo noho. ² Rara gorere ese ia abia tauna ta Iesu ena vairana dekenai ia helai. ³ Vadaeni Iesu ese taravatu taudia bona Farisea taudia dekenai ia nanadaia, ia gwau, “Gorere taudia Sabati Dina dekenai do ita hanamoa be mai taravatu o?”

⁴ To idia hereva lasi. Vadaeni Iesu ese inai gorere tauna ia abia, ia hanamoa, vadaeni ia siaia. ⁵ Vadaeni idia dekenai ia hamaoroa, ia gwau, “Umui daika ese iena doniki o iena boromakau guri dekenai bema ia moru diho, be Sabati Dina dekenai do idia veria daekau lasi, a?”

⁶ Idia ese ia dekenai idia haere lasi.

Manau herevadia

⁷ Iesu ese vadivadi taudia ia itaia, helai gabudia namo momokani dekenai idia helai, vadaeni parabole ta ia hamaoroa idia dekenai, ia gwau, ⁸ “Bema tau ta do ia boiboi umui dekenai, headava aria totona do umui lao, gabu namo herea momokani do umui helai diho lasi, aria ena biaguna ese oi ia hereaia tauna ta dekenai do ia boiboi garina. ⁹ Vadaeni do ia mai oi dekenai do ia hamaoroa, do ia gwau, ‘Oi siri, unai helai gabu be inai tau ena.’ Unai neganai oi be mai hemarai danu henunai gabu dekenai do oi helai diho. ¹⁰ To oi dekenai bema ia boiboi neganai, be henunai gabu dekenai do oi helai diho, vadaeni oi dekenai ia boiboi tauna do ia mai hamaoroa oi dekenai, do ia gwau, ‘Egu turana e, oi be ataia do oi daekau, vadaeni idia helai diho taudia ibounai ese oi do idia hanamoa.’ ¹¹ Badina be sibona ia habadaia tauna be Dirava ese do ia hamaragia, to sibona ia hamaragia tauna be Dirava ese do ia habadaia.”

¹² Vadaeni Iesu ese ia dekenai ia boiboi tauna ia hamaoroa, ia gwau, “Dina tubua aniani o adorahi aniani do oi karaia neganai, emu turana, o emu varavarana, o kohu momo herea taudia, oiemu badibadinai idia noho taudia, dekenai do oi boiboi lasi, kerukeru vanegai ena davana do idia karaia totona, oi dekenai do ma idia boiboi garina. ¹³ To aniani do oi karaia neganai, ologami taudia bona edia tauanina kahana idia dika taudia, bona aena dika taudia, bona matakepulu taudia dekenai do oi boiboi. ¹⁴ Unai dekena amo do oi namo, badina idia be kohu lasi, vadaeni kara maoromaoro taudia edia toreisi neganai oiemu davana do oi abia.”

Parabole: Aria badana

¹⁵ Iesu danu idia aniani hebou tauna ta ese unai hereva ia kamonaia, vadaeni ia hereva, ia gwau, “Dirava ena Basileia aria dekenai do ia helai diho tauna be do ia moale.”

¹⁶ To Iesu ia gwau, “Tau ta ese aria badana ta ia karaia, bona taunimanima momo herea dekenai ia boiboi. ¹⁷ Aria ia karaia hegaegae neganai, ia ese iena hesiai tauna ta ia siaia, iena boiboi totona do idia mai taudia dekenai do ia hamaoroa, do ia gwau, ‘Vadaeni umui mai, gau ibounai ia atoa hegaegae vadaeni.’ ¹⁸ To idia ibounai idia ura lasi dekenai, idia koia gwauraia. Ta ia gwau, ‘Lau be tano ta lau hoia vadaeni, vadaeni itaia totona lau lao, mani emu biaguna do oi hamaoroa.’ ¹⁹ Ma ta ia gwau, ‘Lau be boromakau 10 lau hoia vadaeni, vadaeni idia do lau itaia namonamo totona do lau lao, mani emu biaguna do oi hamaoroa.’ ²⁰ Ma ta ia gwau, ‘Lau be inai harihari lau headava, unai dainai do lau mai lasi.’

²¹ “Hesiai tauna ia giroa lao, unai hereva iena biaguna dekenai ia hamaoroa. Iena biaguna be ia badu dikadika, vadaeni iena hesiai tauna ia hereva henia, ia gwau, ‘Oi lao haraga, hanua edia huana dekenai, bona dala idauidau dekenai, ologami taudia, bona edia tauanina idia dika taudia, bona matakepulu taudia, bona edia aena idia dika taudia do oi hakaua mai.’ ²² Hesiai tauna ma ia mai, ia gwau, ‘Lohia tauna e, oi hereva hegeregere lau karaia vadaeni, to ruma be do ia honu lasi.’

²³ “Vadaeni iena biaguna ese hesiai tauna dekenai ma ia hereva henia goada, ia gwau, ‘Do oi lao, uma dala dekenai bona ara ibounai dekenai noho taunimanima haida ma do oi haboua, mai hereva goada, egu ruma do idia hahonua. ²⁴ Badina be lau hamaoroa oi dekenai, lauegu boiboi ginigunana dekenai idia mai lasi taudia ese egu aria sisina do idia ania diba lasi momokani.’”

Oi ura Iesu ena murinai do oi raka, be do oi laloa namonamo guna

²⁵ Taunimanima momo Iesu danu idia raka lao, vadaeni ia ese iena vairana ia giroa idia dekenai, ia hamaorodia, ia gwau, ²⁶ “Bema tau ta lau dekenai do ia mai, to iena tamana, iena sinana, iena adavana, iena natuna, iena tadikakana, bona iena mauri danu, bema ia laloaboio lasi, ia be hegeregere lasi lauegu diba tahua tauna do ia lao. ²⁷ Bona iena satauro bema ia huaia lasi, bona lauegu murina dekenai bema ia raka lasi tauna, be lauegu diba tahua tauna lasi. ²⁸ Bema tau ta ia ura kohoro ruma do ia haginia, ia be guna do ia helai diho, bona haginia ena davana do ia laloa, bema ia be ruma do ia karaia haorea diba, o lasi? ²⁹ Ia be ruma ena badina bema ia hamatamaia, to bema ia haorea lasi, vadaeni do idia itaia taudia ibounai ese do idia kirikirilaia, ³⁰ do idia gwau, ‘Inai tau ese kohoro ruma haginia totona ia hamatamaia, to ia goada lasi, ia haorea lasi.’ ³¹ O, edena hanua ena king, idau hanua king dekenai do ia tuari henia gwauraia, do ia helai diho guna lasi, do ia

laloa karaia lasi, iena tuari taudia 10,000 do idia hegeregere, ia mai noho tauna ena tuari taudia 20,000 dekenai do ia kwalimu diba o? ³² Bema lasi, edia padana be do ia daudau dekenai, ia ese iena hesiai taudia maino gwaauria totona do ia siaia. ³³ Unai dainai, umui be emui gau ibounai bema umui rakatania lasi, umui be lauegu diba tahua taudia lasi.

Damena, mamina lasi gauna

³⁴ “Damena be gau namona. To bema damena be mamina lasi, edena bamona ena mamina do ia abia lou? ³⁵ Ia be tano ena hanamoa mura-mura gauna lasi, hadoa gaudia dekenai hanamoa lasi gauna, vadaeni ia be negea gauna sibona. Mai ena taiana tauna be do ia kamona.”

15

Parabole: Mamoe ia boio

¹ Takisi gooa taudia bona kara dika taudia momo be Iesu ena hereva kamonaia totona idia raka kahirakahira lao. ² To Farisea taudia bona taravatu hadibaia taudia be idia hereva mai badu danu, idia gwau, “Unai tau ese dika taudia ia abia dae, bona idia danu ia aniani hebou.” ³ Vadaeni Iesu ese inai parabole ia henia idia dekenai, ia gwau:

⁴ “Umui daika ena mamoe bema 100, to tamona bema ia boio, ia be 99 taunimanima idia noho lasi tano dekenai do ia rakatania, ia boio mamoe do ia tahua, ia lao bona do ia davaria? ⁵ Do ia davaria neganai, ia ese mamoe be iena pagana dekenai do ia huaia, mai moale danu. ⁶ Iena ruma dekenai do ia ginidae, vadaeni iena turana bona iena badibadinai taudia do ia haboua, do ia gwau, ‘Ita moale hebou, badina be lauegu mamoe, ia boio gauna, lau davaria vadaeni.’ ⁷ Lau hamaoroa umui dekenai, inai bamona dika tauna ta ena lalona ia giroa dainai, guba dekenai moale do ia bada. To kara maoromaoro taudia 99, edia lalona idia giroa lasi dainai, guba dekenai moale do ia maragi.

Parabole: Moni ia boio

⁸ “Edena hahine, bema iena siliva moni be 10, to tamona bema ia boio, ia be lamepa do ia gabua, ruma do ia daroa, do ia tahua namonamo, ela bona do ia davaria, a? ⁹ Do ia davaria neganai, ia ese iena turana bona ena badibadinai hahine taudia do ia haboua, do ia gwau, ‘Ita moale hebou, badina be lauegu moni, ia boio gauna, lau davaria vadaeni.’ ¹⁰ Lau hamaoroa umui dekenai, dika tauna ta ena lalona ia giroa dainai, Dirava ena aneru be unai bamona do idia moale.”

Parabole: Tamana ena natuna ta ia boio

¹¹ Ma Iesu ia gwau, “Tau ta be mai ena natuna tau rua. ¹² Murinai ia vara tauna ese iena tamana dekenai ia hereva henia, ia gwau, ‘Lauegu tamana e, iseda koku mani oi haria, lauegu kahana lau dekenai oi henia.’ Vadaeni tamana ese iena koku ibounai iena natuna ruaosi dekenai ia haria karaia. ¹³ Dina momo lasi idia ore, murinai ia vara tauna ese iena koku ibounai ia haboua, vadaeni ia lao ena laolao dekenai, tano daudau dekenai ia lao, unuseni kara idauidau dekenai iena koku ia halusia kava. ¹⁴ Iena koku idia ore neganai, unai tano dekenai hitolo bada ia vara. Ia be ia ogogami vadaeni. ¹⁵ Vadaeni ia lao, unai tano tauna ta dekenai ia gaukara. Unai tau ese ia siaia, iena tano dekenai boroma do ia naria karaia. ¹⁶ Vadaeni boroma edia aniani ia ura ania, ia boga kunu totona, badina be tau ta ese aniani sisina ia henia lasi. ¹⁷ Vadaeni iena lalona ia kehoa, ia gwau, ‘Egu tamana be mai ena hesiai taudia momo herea, mai edia davana, bona edia aniani momo idia noho. To lau be lau hitolo mase

vadaeni. ¹⁸ Lau toreisi, egu tamana dekenai do lau lao, do lau gwau: Egu tamana e, lau be guba biaguna ena vairana dekenai, bona oiemu vairana dekenai, kerere lau karaia vadaeni. ¹⁹ Lau be hegeregere lasi oiemu natuna do oi gwaurai, lau be emu hesiai tauna do oi halaoa, mai egu davana.’ ²⁰ Vadaeni ia toreisi, iena tamana dekenai ia lao.

“Ia be dala dekenai ia lao noho, ruma dekenai ia raka lao neganai, daudau dekenai iena tamana ese ia itaia, vadaeni ia bogahisihisi henia, ia heau lao, iena natuna ena aiona dekenai ia rosia, ia kisi henia. ²¹ To iena natuna ese ia hamaoroa, ia gwau, ‘Egu tamana e, lau be guba biaguna ena vairana dekenai, bona oiemu vairana dekenai, kerere lau karaia vadaeni, lau be hegeregere lasi oiemu natuna do oi gwaurai.’ ²² To iena tamana ese iena hesiai taudia dekenai ia hamaoroa, ia gwau, ‘Dabua namo herea ta umui mailaia, iena tauanina dekenai umui atoa. Iena imana kwakikwaki gauna bona tamaka danu umui mailaia. ²³ Boromakau ena natuna, ubua gauna, umui mailaia, do umui alaia. Do ita aniani, do ita moale hebou. ²⁴ Badina be inai egu natuna ia mase, to ia mauri lou vadaeni, ia boio, to lau davaria vadaeni.’ Vadaeni idia be idia moale hebou.

²⁵ “To iena vara guna natuna tau be uma dekenai, vadaeni ruma dekenai ia raka lao neganai, gita bona mavaru edia regena ia kamoni. ²⁶ Hesiai tauna ta ia boiria, unai regena ena badina ia nanadaia. ²⁷ Ia gwau, ‘Oiemu tadina ia giroa mai, vadaeni emu tamana ese boromakau iena natuna, ubua gauna, ia alaia vadaeni, badina iena natuna be mai mauri danu, bona mai namo danu ia davaria lou dainai.’ ²⁸ To vara guna natuna tau be ia badu, ruma dekenai ia raka vareai lasi. Iena tamana ia raka murimuri dekenai, iena lalona ia hanamoa gwaurai. ²⁹ To ia ese iena tamana dekenai ia haere henia, ia gwau, ‘Lau be lagani momo oiemu hesiai gaukara lau karaia vadaeni, bona emu hereva ta lau utua lasi, to nega ta nani ena natuna ta oi henia lasi lau dekenai, nega ta lauegu turana danu inai bamona ai moale lasi. ³⁰ To inai emu natuna be idia loa kava hahine dekenai emu kohu ia haorea kava vadaeni, vadaeni ia giroa mai, oi ese boromakau ena natuna, ubua gauna, oi alaia vadaeni ia totona.’

³¹ “To iena tamana ia gwau, ‘Egu natuna e, oi be lau dekenai oi noho, lau dekenai gau ibounai be oiemu. ³² To namo do ita moale, do ita moale bada herea. Badina be inai oiemu tadina ia mase, to ia mauri lou vadaeni, ia boio, to ita davaria vadaeni.’”

16

Parabole: Kohu naria tauna mai koikoi danu

¹ Iesu ese iena diba tahua taudia dekenai ma ia hereva henia, ia gwau, “Kohu momo tauna ta be mai ena kohu naria tauna. Vadaeni haida ese ia dekenai iena kohu naria tauna idia samania karaia, idia gwau, ‘Emu kohu ia ese ia henia kava, henia kava.’ ² Vadaeni kohu momo tauna ese ia boiria, ia gwau, ‘Oiemu kara be dahaka lau kamoni vadaeni? Oiemu kohu naria karaia herevadia do oi hamaoroa lau dekenai, badina be do oi doko.’

³ “Vadaeni inai kohu naria tauna be sibona ia lalao, ia gwau, ‘Lau be edena bamona do lau karaia? Egu biaguna ese egu dagi do ia kokia. Tano makohia gaukara dekenai be lau goada lasi, noinoi dekenai be lau hemarai. ⁴ To dala ta lau diba, vadaeni egu dagi do ia kokia neganai, lau be do mai egu turana, idia ese edia ruma dekenai lau do idia abia

dae.’ ⁵ Vadaeni iena biaguna dekenai idia abiatorehai taudia ia boiria, ta dekenai ia nanadaia, ia gwau, ‘Emu abiatorehai be hida?’ ⁶ Ia gwau, ‘Dehoro kavabu 100.’ Vadaeni ia hamaoroa, ia gwau, ‘Emu abiatorehai pepana be inai oi abia, oi helai diho, 50 oi torea.’ ⁷ Ma ta ia nanadaia, ia gwau, ‘Oiemu abiatorehai be hida?’ Ia gwau, ‘Uiti puse 100.’ Vadaeni ia hamaoroa, ia gwau, ‘Emu abiatorehai pepana be inai oi abia, 80 oi torea.’

⁸ “Vadaeni iena biaguna ese unai kohu naria tauna mai ena koikoi ia hanamoa, badina be iena kara ia karaia be mai ena aonega. Badina be kara koikoi dekenai inai tanobada taudia edia aonega be ia bada, to diari taudia edia aonega be ia maragi.

⁹ “Lau hamaoroa umui dekenai, emui moni bona kohu dikadia dekena amo taunimanima do umui durua, bona idia danu do umui turana karaia, vadaeni emui kohu idia ore neganai, Dirava ena noho hanaihanai rumana dekenai umui do idia abia vareai.

¹⁰ “Gau maragina ia karaia maoro tauna ese gau badadia do ia karaia maoro, to gau maragina ia karaia kerere tauna ese gau badadia do ia karaia kerere danu. ¹¹ Bema inai tanobada ena kohu umui naria namonamo lasi neganai, daika ese mauri ena kohu momokani do ia henia umui dekenai? ¹² Bona bema tau idauna ena kohu do umui naria namonamo lasi, daika ese umui sibona emui kohu do ia henia umui dekenai.

Dirava bona kohu momo

¹³ “Hesiai tauna ta ese iena biaguna rua edia hesiai gaukara ia karaia diba lasi. Badina be ta dekenai do ia badu henia, ta dekenai be do ia lalokau henia, o ta dekenai do ia ura henia, ta dekenai be do ia ura henia lasi. Dirava bona kohu danu nega tamona, edia hesiai gaukara do umui karaia diba lasi.”

Iesu ena hereva haida

¹⁴ Farisea taudia ese unai hereva idia kamona neganai, Iesu dekenai idia kirikiri, badina idia be moni dekenai idia laloa bada. ¹⁵ Vadaeni ia gwau henia idia dekenai, ia gwau, “Umui be taunimanima edia vairana dekenai umui sibona dekenai umui hanamoa, to Dirava be emui lalona ia diba. Badina be taunimanima ese idia hanamoa gaudia be Dirava ese ia ura henia lasi.

¹⁶ “Mose ena taravatu bona peroveta taudia edia hereva ese umui idia hakaua ia mai bona Ioane ena nega. Ioane ena nega ia mai bona hari, Dirava ena Basileia ena Sivarai Namona be idia harorolaia noho, bona taunimanima ibounai be mai edia goada ibounai idia vareai noho.

¹⁷ “Guba bona tanobada do idia boio be mai ena dala, to Taravatu ena koma ta do ia boio be dala lasi.

Hahine negea kara Iesu ia herevalaia

¹⁸ “Iena adavana ia negea, vadaeni hahine ta ma ia adavaia tauna be heudahanai tauna, bona ia negea hahinena ia adavaia tauna ese danu be heudahanai tauna.

Parabole: Kohu momo tauna bona noinoi tauna

¹⁹ “Kohu momo tauna ta ia noho, dabua kakakaka bona namo herea danu ia karaia noho, bona dina ibounai ia moale, bona aniani namodia sibona ia ania. ²⁰ Iena ruma iduara dekenai noinoi tauna ta, iena ladana be Lasaro, ia hekure noho, iena tauanina ibounai be toto ese ia koua. ²¹ Iena ura be kohu momo tauna ena aniani momoru do ia ania. Sisia danu idia lao, iena toto idia demaria noho.

22 “Noinoi tauna ia mase, vadaeni aneru ese idia abia, Aberahamo ena kemena dekenai idia abia lao. Kohu momo tauna danu ia mase, vadaeni idia guria. 23 Mase gabuna dekenai ia hisihisi noho neganai, iena matana ia negea daekau, daudau dekenai Aberahamo ia itaia, Lasaro danu be iena kemena dekenai. 24 Vadaeni ia boiboi, ia gwau, ‘Aberahamo e, egu tamana e, oi bogahisihisi lau dekenai. Mani Lasaro oi siaia, iena imana kwakikwakina ranu dekenai ia atoa diho, egu malana sibona do ia hapariparia. Badina lau be inai lahi ena sياهو dekenai hisihisi lau abia noho!’

25 “Aberahamo ia gwau, ‘Egu natuna e, oi lalao, oiemu mauri nega lalonai, gau namodia oi abia, bona Lasaro be gau dikadia ia abia. Harihari ia be moale ia abia, to oi be unai hisihisi oi abia. 26 Bona inai danu, iseda huana dekenai be guri badana ta ia noho, vadaeni inai gabu dekena amo ta ese unuseni do ia hanaia diba lasi, bona unai gabu dekena amo ta ese iniseni do ia mai diba lasi.’

27 “Vadaeni ia gwau, ‘Egu tamana e, lau noinoini oi dekenai, Lasaro do oi siaia egu tamana ena ruma dekenai do ia lao, 28 badina egu tadikakana be 5. Ia ese do ia hadibaia idia dekenai, inai hisihisi gabuna dekenai do idia mai garina.’

29 “To Aberahamo ia gwau, ‘Mose bona peroveta taudia edia hereva be idia dekenai, idia sibona dekenai do idia kamonaia henia.’ 30 Ia gwau, ‘Lasi, Aberahamo, egu tamana e, bema tau ta mase dekena amo ia lao idia dekenai, be do idia lalao namonamo.’ 31 To Aberahamo ia gwau, ‘Idia be Mose bona peroveta taudia dekenai bema idia kamonaia henia lasi, mase dekena amo ta bema ia toreisi danu do idia kamonaia henia lasi.’”

17

Dika gwauatao

1 Iesu ese iena diba tahua taudia dekenai ia hamaoroa, ia gwau, “Dibagani be hanaihanai do ia vara noho, to dibagani ia havaraia tauna be madi ia dika bada herea. 2 Ia namo lasi bema tau ta ese mero maragi ta ia hakau kerere. Tau unai bamona dekenai, be namo iena aiona dekenai nadi badana idia kwatua, idia negea davara lalonai, badina iena panisi be do ia bada herea.

3 “Oi naria namonamo, oiemu tadikaka ese oi bema ia hadikaia, do oi sisiba henia, vadaeni iena lalona bema ia giroa neganai, be iena dika do oi gwauatao. 4 Dina tamona dekenai nega 7 bema ia hadikaia oi dekenai, vadaeni nega 7 bema ia giroa mai oi dekenai, do ia gwau, ‘Lau be, egu lalona lau giroa inai,’ vadaeni iena dika do oi gwauatao.”

Iesu ese iena aposetolo taudia dekenai goada ia henia

5 Aposetolo taudia ese Lohiabada dekenai idia noia, idia gwau, “Aiemaia abidadama oi habadaia.” 6 Lohiabada ese ia haere henia idia dekenai, ia gwau, “Emui abidadama bema ia maragi herea, mastadi ena uhena bamona, umui ese au badana umui hereva henia diba, umui gwau, ‘Oi sibona do oi abia isi, davara dekenai oi sibona do oi gini,’ vadaeni ia be do ia kamonaia henia umui dekenai.

Hesia tauna ena kara

7 “To umui daika, bema oiemu hesiai tauna tano makohia gaukara, o mamoe naria gaukara dekena amo hanua dekenai do ia ginidaia neganai, do oi hamaoroa, do oi gwau, ‘Oi mai helai diho haraga, oi aniani?’ 8 Lasi,

oi be do oi gwau, 'Egu aniani oi nadua, emu rami do oi kwatua, egu hesiai gaukara do oi karaia, ia lao bona do lau aniani ore bona do lau inuinu ore, unai murinai oi be do oi aniani bona do oi inuinu,' ani? ⁹ Oi be hesiai tauna dekenai oi hanamoa, oi hereva henia gaukaradia ia karaia dainai, a? Lasi. ¹⁰ Unai dainai, umui danu, umui dekenai Dirava ia hereva karadia ibounai do umui karaia, vadaeni do umui gwau, 'Ai be hesiai taudia namodia lasi, badina be ai ese aiemai gaukara sibona ai karaia vadaeni.'"

Iesu ese lepera taudia 10 ia hanamoa

¹¹ Iesu be Ierusalem dekenai ia lao neganai, Samaria bona Galilea tano dekena amo ia raka hanaia. ¹² Hanua maragina ta dekenai ia ginidae, vadaeni lepera taudia 10 ia danu idia hedavari, to sisina daudau dekenai idia gini. ¹³ Iesu dekenai idia boiboi, idia gwau, "Iesu, aiemai biaguna e, oi bogahisihisi ai dekenai." ¹⁴ Ia ese ia itaia noho idia dekenai, vadaeni ia hereva idia dekenai, ia gwau, "Dubu ena hahelagaia taudia dekenai umui lao, do idia itaia umui." Vadaeni idia lao. Dala dekena amo idia lao neganai, edia kopina idia namo vadaeni. ¹⁵ Vadaeni tamona sibona ese iena kopina ia itaia ia namo vadaeni, ia giroa lao, mai moale bada danu Dirava dekenai ia hanamoa, ¹⁶ bona Iesu ena aena badinai iena kwarana ia atoa diho, ia hanamoa. To ia be Samaria tauna. ¹⁷ Vadaeni Iesu ia gwau, "Ibounai 10 idia namo, ani? Taudia 9 be edeseni? ¹⁸ Haida be idia giroa lou lasi, Dirava dekenai hanamoa totona, inai idau bese tauna sibona, a?" ¹⁹ Vadaeni Iesu ia hamaoroa ia dekenai, ia gwau, "Oi toreisi, vadaeni oi lao, oiemu abidadama ese oi ia hanamoa vadaeni."

Dirava ena Basileia do ia mai

²⁰ Farisea taudia ese Iesu idia nanadaia, idia gwau, "Dirava ena Basileia be edena negai do ia mai?" Idia dekenai ia haere, ia gwau, "Dirava ena Basileia ena mai, be iena toana do ita itaia lasi guna. ²¹ Bona ta do ia gwau lasi, 'Gauna inai,' o, 'Gauna unai,' badina Dirava ena Basileia be umui emui lalona dekenai ia noho."

²² Vadaeni Iesu ese iena diba tahua taudia dekenai ia hamaoroa, ia gwau, "Nega ta do ia ginidae, umui be do umui ura bada Taunimanima ena Natuna ena dina tamona sibona do umui itaia, to do umui itaia lasi. ²³ Haida be do idia gwau, 'Tauna inai,' o, 'Tauna unai.' To umui be do umui lao lasi, edia murinai do umui raka lasi. ²⁴ Badina be kevaru guba ena kahana dekenai ia abia isi ia lao bona guba ena kahana dekenai bamona, Taunimanima ena Natuna ese iena mai neganai be unai bamona do ia karaia. ²⁵ To ia be hisihisi momo do ia abia guna, bona inai nega taudia ese do idia ura henia lasi.

²⁶ "Noa ena nega dekenai idia karaia bamona, Taunimanima ena Natuna ena nega be unai bamona danu do idia karaia. ²⁷ Idia be idia aniani, idia inuinu, idia headava, ia mai bona Noa lagatoi dekenai ia guia dinana. Vadaeni abata ese idia ia koua, ranu ese ibounai ia hamasea. ²⁸ Lota ena nega dekenai danu, unai bamona sibona ia karaia. Idia aniani, idia inuinu, idia hoihoi, idia hadohado, ruma idia karaia. ²⁹ To Lota be Sodoma dekena amo ia raka siri dina dekenai, lahi bona nadi sياهو, guba dekena amo idia moru, ibounai ia alaia ore. ³⁰ Taunimanima ena Natuna do ia hedinarai dina dekenai danu, unai bamona kara do ia vara.

³¹ “Unai dina dekenai, bema tau ta ruma ena atai dekenai ia noho, ia be ruma ena lalona dekenai do ia raka vareai lasi, iena kohu abia totona. Bona tau ta bema uma dekenai, ia be hanua dekenai do ia giroa lou lasi. ³² Lota ena adavana umui lalao. ³³ Iena mauri ia dogoatao auka masemase tauna ese iena mauri do ia halusia, to iena mauri ia halusia tauna ese iena mauri do ia davaria.

³⁴ “Lau hamaoroa umui dekenai, unai hanuaboi dekenai, tatau rua geda tamona dekenai do idia hekure. Ta do ia abia siri, ta be do ia noho. ³⁵ Hahine rua ese uiti makohia maragimaragi nadina do idia giroa, be ta do ia abia siri, ta be do ia noho. ³⁶ Tatau rua uma gabu dekenai do idia gaukara, be ta do ia abia siri, ta be do ia noho.”

³⁷ Idia ese idia nanadaia ia dekenai, idia gwau, “Lohiabada e, inai kara be edeseni do ia vara?” Ia gwau, “Mase tauanina ia noho gabuna dekenai galo manudia do idia haboua.”

18

Parabole: Hahine ese kota biaguna ia noia, do ia durua

¹ Iesu ese parabole ta idia dekenai ia hamaoroa, nega ibounai do idia guriguri, do idia hesiku lasi totona. ² Ia gwau, “Hanua ta dekenai kota biaguna ta ia noho. Ia be Dirava dekenai ia gari lasi, bona taunimanima danu ia matauraia lasi. ³ Unai hanua ena vabu ta be nega ibounai inai kota biaguna dekenai ia lao, ia gwau, ‘Lau dekenai ia badu henia tauna ena davana do oi henia.’ ⁴ Dina haida inai kota biaguna be ia kamoni lasi, to gabeai sibona ia lalao, ia gwau, ‘Lau be Dirava dekenai lau gari lasi bona taunimanima dekenai lau matauraia lasi. ⁵ To inai vabu ese ia hereva momo dainai, iena kota do lau karaia, do ia giroa mai, lau dekenai hekwarahi do ia henia garina.’”

⁶ Lohiabada ia gwau, “Unai kota biaguna dikana ena hereva do umui lalao. ⁷ Unai dainai, Dirava ese ia abia hidi taudia, dina bona hanuaboi ia dekenai idia taitai taudia, be idia dekenai idia badu taudia edia davana do ia henia lasi, a? Dirava ese iena taudia do ia durudia haraga lasi, a? ⁸ Lau hamaoroa umui dekenai, kota maoromaoro bona durua do ia henia haraga idia dekenai, to Taunimanima ena Natuna do ia mai neganai, tanobada dekenai abidadama do ia davaria o?”

Parabole: Farisea tauna bona takisi gogoa tauna

⁹ Haida idia lalao idia be kara maoromaoro taudia momokani, bona idau taudia dekenai idia ura henia lasi, inai taudia dekenai Iesu ese inai parabole ia henia: ¹⁰ “Tatau rua Dubu Helaga dekenai idia raka vareai, idia guriguri totona. Ta be Farisea tauna, ta be takisi gogoa tauna. ¹¹ Farisea tauna ia gini siri, sibona dekenai ia guriguri, ia gwau, ‘Dirava e, tanikiu, lau be haida bamona lasi, henaao taudia, kara gagevageva taudia, heudahanai taudia. Oibe, lau be inai takisi gogoa tauna bamona lasi. ¹² Lau be pura ta lalonai nega rua aniani ania lasi ena taravatu lau badinaia, kohu lau davaria gaudia ibounai, karoa be 10 lau karaia, karoa ta be harihari gauna dekenai lau halaoa.’ ¹³ To takisi gogoa tauna be idau gabu dekenai ia gini, iena kwarana ia atoa diho, iena kemena ia botai, ia gwau, ‘Dirava e, lau be dika tauna, oi bogahisihisi lau dekenai.’

¹⁴ “Lau hamaoroa umui dekenai, unai tau be iena ruma dekenai ia giroa lou, mai ena lalona maoro Dirava ena vairana dekenai, to inai Farisea tauna be lasi. Badina be sibona ia hekokoroku tauna be henunai do ia noho, to sibona ia manau tauna be do idia hanamoa.”

Iesu ese maragidia ia hanamoa

¹⁵ Haida ese edia natuna maragidia Iesu dekenai idia abia lao, idia edia latanai iena imana do ia atoa totona. To diba tahua taudia ese idia itaia, vadaeni idia hereva auka idia dekenai. ¹⁶ To Iesu ese ia boiria idia dekenai, ia gwau, “Natudia maragidia be lau dekenai do idia mai, umui lulua lasi, badina be Dirava ena Basileia taudia be unai bamodia. ¹⁷ Momokani lau hamaoroa umui dekenai, bema tau ta ese Dirava ena Basileia do ia abia dae lasi mero maragi bamona, ia be do ia raka vareai lasi unuseni, lasi momokani.”

Mauri herevadia

¹⁸ Lohia tauna ta ese Iesu ia nanadaia, ia gwau, “Hadibaia tauna namona e, lau be mauri hanaihanai abia totona edena bamona do lau karaia?” ¹⁹ Iesu ia gwau, “Badina dahaka oi gwau lau be namo? Ta ia namo lasi, Dirava sibona. ²⁰ Taravatu be oi diba. Oi heudahanai lasi, oi alaia lasi, oi henaia lasi, oi samania koikoi lasi, oiemu tamana, oiemu sinana dekenai do oi matauraia.”

²¹ Ia gwau, “Lau be maragi negana dekena amo unai ibounai lau badinaia vadaeni.”

²² Iesu ese unai hereva ia kamonaia, vadaeni ia hamaoroa, ia gwau, “Oi be inai gau tamona sibona do oi karaia: Emu kohu ibounai do oi hoihoilaia, ogogami taudia dekenai do oi harihari henia, guba ena kohu do oi abia. Vadaeni do oi mai, egu murina dekenai do oi raka.” ²³ Ia be unai hereva ia kamonaia, vadaeni iena lalona ia hisihisi bada, badina ia be kohu momo tauna.

²⁴ Iesu ese ia itaia noho ia dekenai, ia gwau, “Kohu momo taudia Dirava ena Basileia iduara dekenai vareai totona, be do ia auka. ²⁵ Kamelo be nila ena matuna dekenai ia vareai be haraga, to kohu momo tauna, Dirava ena Basileia iduara dekenai vareai totona, be ia auka.” ²⁶ Idia kamonaia taudia idia gwau, “Be? Mauri be daika do ia davaria diba?” ²⁷ To Iesu ia gwau, “Taunimanima ese do idia karaia diba lasi gaudia, be Dirava ese do ia karaia diba.”

²⁸ Petero ia gwau, “Ai be emai gau ibounai ai rakatania vadaeni, oiemu murina dekenai ai raka vadaeni.” ²⁹ Iesu ese ia hamaoroa idia dekenai, ia gwau, “Momokani umui lau hamaoroa, tau ta ese ruma, o iena adavana, o iena tadikakana, o iena tamana, o iena sinana, o iena natuna Dirava ena Basileia totona ia rakatania vadaeni, ³⁰ ia be inai mauri neganaia, ma gau momo do ia abia, bona nega gabeai danu, mauri hanaihanai do ia abia.”

Nega ihatoina Iesu ese iena mase bona iena toresi lou ia gwauraia

³¹ Iesu ese iena diba tahua taudia 12 ia hakaua siri, ia hamaoroa idia dekenai, ia gwau, “Ita be Ierusalem dekenai ita daekau, unuseni peroveta taudia ese Taunimanima ena Natuna ena sivaraina idia torea guna herevadia be edia anina do idia vara. ³² Badina ia be idau bese taudia edia imana dekenai do idia atoa. Do idia hevaseha henia, hemarai do idia henia, ia dekenai do idia kanudi. ³³ Do idia botai, do idia alaia mase, to dina toi murina do ia toresi lou.” ³⁴ Unai hereva ibounai ena anina be idia diba lasi. Idia kamonaia, to edia lalona be idia kehoa lasi. Iesu ese ia gwauraia herevadia edia anina, be idia davaria lasi.

Iesu ese matakepulu tauna ia hanamoa

³⁵ Iesu be Ieriko dekenai ia raka kahirakahira lao. Matakepulu tauna ta be dala badinaia ia helai, ia noinoi totona. ³⁶ Taunimanima momo dala dekenai idia raka lao, bona inai tau be edia regena ia kamonaia, vadaeni

ia henenadaia, “Unai regena ena anina be dahaka?” ³⁷ Idia hamaoroa ia dekenai, idia gwau, “Iesu, Nasareta tauna, ia raka hanaia.” ³⁸ Vadaeni ia be ia boiboi, ia gwau, “Iesu, Davida ena natuna e! Oi bogahisihisi lau dekenai!” ³⁹ Idia raka guna taudia ese idia gwau henia ia dekenai, do ia hereva lasi idia gwau, to ia be ia boiboi mai goada danu, ia gwau, “Davida ena natuna e! Oi bogahisihisi lau dekenai!” ⁴⁰ Vadaeni Iesu be ia gini, ia gwau, “Umui hakaua mai.” Ia raka kahirakahira lao, vadaeni Iesu ese ia nanadaia ia dekenai, ia gwau, ⁴¹ “Oi dekenai be dahaka do lau karaia?” Ia gwau, “Lohiabada e, egu matana do oi kehoa.” ⁴² Iesu ia gwau, “Emu matana do idia kehoa. Emu abidadama ese ia hanamoa oi.” ⁴³ Iena matana idia kehoa nega tamona, vadaeni Iesu ena murina dekenai ia raka, Dirava dekenai ia hanamoa. Unai kara idia itaia taudia ibounai ese Dirava dekenai idia hanamoa.

19

Sakaio ena sivarai

¹ Iesu be Ieriko dekena amo ia raka hanaia. ² Unuseni be tau ta, iena ladana Sakaio, takisi gogoa taudia edia biaguna ta, ia danu be kohu momo tauna. ³ Ia ura dikadika Iesu do ia itaia. To taunimanima be momo dainai ia itaia lasi, badina ia be tau kwadogi. ⁴ Vadaeni ia heau guna ia lao, sikamoa au badana ta dekenai ia daekau, Iesu ia raka hanaia neganai do ia itaia gwauraia. ⁵ Iesu be unai gabu dekenai ia ginidae, iena matana ia negea daekau, Sakaio ia itaia, vadaeni ia hamaoroa, ia gwau, “Sakaio e, oi diho haraga, badina be hari dina oiemu ruma dekenai do lau noho.”

⁶ Vadaeni kara haraga ia diho, iena ruma dekenai Iesu ia abia dae, mai moale danu. ⁷ Idia itaia taudia ibounai ese idia hereva maumau, idia gwau, “Iesu be dika tauna dekenai ia vadvadi henia!” ⁸ To Sakaio ia toreisi, ia gini, Lohiabada dekenai ia hereva, ia gwau, “Egu kohu haida be ogogami taudia dekenai do lau henia. Bona ena kohu lau abia kava tauna, be nega 4 do lau henia lou.” ⁹ Iesu ia gwau, “Harihari hamauria be inai ruma dekenai ia ginidae vadaeni, badina ia danu be Aberahamo ena natuna. ¹⁰ Badina Taunimanima ena Natuna ese idia boio taudia do ia tahua, bona idia do ia hamauria totona ia mai.”

Parabole: Hesiai taudia ese moni idia naria

¹¹ Taunimanima ese unai hereva idia kamonai, vadaeni Iesu ese parabole ma ta ia hamaoroa idia dekenai, badina be Ierusema ia kahirakahira vadaeni, bona idia laloa Dirava ena Basileia be unai nega dekenai do ia hedinarai. ¹² Ia gwau, “Lohia ta hanua daudau dekenai ia lao, iena basileia dekenai king dagina do ia abia, vadaeni inai murinai do ia giroa mai. ¹³ Unai dainai iena hesiai taudia 10 ia boiria guna, 20 kina idia ta ta dekenai ia henia, ia gwau, ‘Do umui hoihoilaia ela bona do lau giroa mai.’

¹⁴ “To inai lohia ena hanua taudia ese idia badu dikadika henia, vadaeni hesiai taudia haida iena murina dekenai idia siaia, do idia gwau, ‘Ai be ai ura lasi unai tau be aiemai basileia ena king dagina do ia abia.’

¹⁵ “To herevana, basileia ia abia, vadaeni ia giroa lou, moni ia henia taudia dekenai ia boiria, edia hoihoi dekenai idia davaria gaudia do ia diba gwauraia.

¹⁶ “Ginigunana ia mai, ia gwau, ‘Lohiabada e, oiemu 20 kina dekena amo 200 kina lau davaria vadaeni.’ ¹⁷ Ia hanamoa ia dekenai, ia

gwau, 'Namo herea, oi be hesiai tauna namona. Gau maragina oi naria namonamo dainai, hanua 10 edia lohia tauna do oi lao.'

¹⁸ "Iharuana danu ia mai, ia gwau, 'Lohiabada e, oiemu 20 kina dekenamo 100 kina lau davaria vadaeni.' ¹⁹ Vadaeni ia gwau, 'Hanua 5 edia lohia tauna do oi lao.'

²⁰ "Ta ma ia mai, ia gwau, 'Lohiabada e, oiemu 20 kina be inai, dabua dekenai lau kumia, lau naria. ²¹ Badina be oi dekenai lau gari, oi be hereva auka tauna, oi atoa diho lasi gauna oi abia isi, oi hadoa lasi gauna oi utua.'

²² "To lohia ia gwau, 'Oi be hesiai tauna dikana. Oi sibona emu hereva dekenamo do lau kota heniamoi. Oi be oi diba lau be hereva auka tauna, lau atoa diho lasi gauna lau abia isi, bona lau hadoa lasi gauna lau utua. ²³ Unai dainai edena bamona egu moni be banika taudia dekenai oi abia lao lasi, vadaeni do lau giroa mai neganai, do lau abia lou, mai ena atoa kau moni sisina danu?' ²⁴ Vadaeni iena badibadinai idia gini taudia dekenai ia hereva heniamoi, ia gwau, 'Ia dekenamo iena 20 kina umui kokia, 200 kina ia abia tauna dekenai do umui heniamoi.'

²⁵ "Idia gwau, 'Lohiabada e, ia be mai ena 200 kina vadaeni.'

²⁶ "Ia ma ia gwau, 'Lau hamaoroa umui dekenai, mai ena gau tauna be gau momo do idia heniamoi, to iena gau be lasi tauna, be ia dekenai sisina ia noho gauna, be do idia abiamoi. ²⁷ To lau dekenai idia badu heniamoi taudia, be idia ura lasi do lau lohia idia dekenai taudia, be umui mailaia, egu vairana dekenai idia do umui alaiamase.'

Iesu ia daekau Ierusalema dekenai

²⁸ Unai hereva murinai Iesu esedia vairana dekenai ia raka guna, Ierusalema dekenai idia daekau. ²⁹ Ia be ia raka lao, Betepage bona Betania, Olive Ororo ena hanuadia, idia kahirakahira vadaeni. Vadaeni iena diba taudia rua ia siaia guna, ³⁰ ia gwau, "Hanua ta, iseda vairana dekenai umui lao, vadaeni do umui raka vareai gabuna dekenai be doniki ena natuna ta au dekenai idia kwatua do umui itaia, iena latanai tau ta do ia helai lasi. Do umui ruhaia, do umui mailaia. ³¹ To tau ta do ia nanadaia umui dekenai, do ia gwau, 'Dahaka totona unai doniki ena natuna umui ruhaia?' Do umui gwau, 'Lohiabada ia ura heniamoi dainai.'

³² Ia siaia taudia idia lao vadaeni, idia dekenai ia hamaoroa hegeregere-ena idia davaria vadaeni. ³³ Doniki ena natuna idia ruhaia neganai, doniki ena biaguna esedia nanadaia idia dekenai, ia gwau, "Dahaka totona doniki ena natuna umui ruhaia?" ³⁴ Idia gwau, "Lohiabada esedia ura heniamoi."

³⁵ Idia esedia doniki ena natuna Iesu dekenai idia hakaua lao, bona edia dabua be doniki natuna ena doruna dekenai idia atoa. Vadaeni latanai Iesu ia helai. ³⁶ Iesu ia lao neganai, taunimanima momo esedia dabua dala dekenai idia atoa.

³⁷ Ierusalema hanua idia kahirakahira, Olive Ororo dekenamo idia diho, vadaeni iena diba tahua taudia momo idia moale bada herea, Dirava dekenai idia hanamoa, idia itaia vadaeni siahukaradia ibounai dainai. ³⁸ Idia gwau, "Lohiabada ena ladana dekenai ia mai King ita hanamoa inai! Maino guba dekenai do ia noho, bona hanamoa bada Ataiamoi Momokani Diravana dekenai!"

³⁹ Vadaeni Farisea taudia haidia esedia unai taunimanima momo edia huanai dekenamo Iesu dekenai idia hamaoroa, idia gwau, "Hadibaia tauna e, emu diba tahua taudia dekenai oi gwau heniamoi."

⁴⁰ To Iesu ese ia haere idia dekenai, ia gwau, “Lau hamaoroa umui dekenai, bema idia be mai regerege lasi, inai nadi do idia boiboi.”

Jerusalema totona Iesu ia tai

⁴¹ Iesu be ia raka kahirakahira, Jerusalema hanua ia itaia, vadaeni ia tai. ⁴² Ia gwau, “Madi, hari dina bema oiemu maino do oi davarua dalana oi diba, be oi namo, to emu matana dekena amo ia hunia vadaeni. ⁴³ Badina be negana do ia ginidae, oi dekenai idia tuari henia taudia ese tano do idia haboua bada, tuari ena magu do idia karaia, oi do idia koua hagegea, oiemu taudia idia raka murimuri dekenai be dala lasi. ⁴⁴ Vadaeni idia ese oi do idia hadikaia ore momokani, oiemu taudia danu oiemu magu lalonai be do idia mase ore, bona nadi ta nadi ta latanai do idia noho lasi. Badina be oi hamauria totona, Dirava ese oi dekenai ia vadivadi henia ena nega be oi diba lasi.”

Hoihoi taudia Dubu Helaga dekena amo Iesu ia lulua murimuri dekenai

⁴⁵ Vadaeni Dubu Helaga dekenai Iesu ia raka vareai, hoihoi taudia ia lulua murimuri dekenai. ⁴⁶ Ia gwau henia idia dekenai, ia gwau, “Buka Helaga lalonai ia torea vadaeni, ‘Egu Ruma be guriguri Rumana, to umui ese henaoa taudia edia ruma dekenai umui halao.’”

⁴⁷ Dina ibounai Dubu Helaga lalonai Iesu ese ia hadibaia karaia. To dubu biagudia bona taravatu hadibaia taudia bona hanua tau badadia ese ia do idia alaia dalana idia tahua. ⁴⁸ To dala ta idia davarua lasi, badina be taunimanima ibounai idia ura Iesu ena hereva idia kamoni.

20

Iesu idia nanadaia, iena siahu be daika ese ia henia

¹ Dina ta, Iesu be Dubu Helaga lalonai ia hadibaia karaia, bona Sivarai Namona ia harorolaia. Vadaeni dubu biagudia bona taravatu hadibaia taudia bona hanua tau badadia ia dekenai idia lao, ² idia nanadaia, idia gwau, “Edena siahu dekena amo inai gaudia oi karaia?”

³ Iesu ia haere, ia gwau, “Lau danu hereva tamona lau nanadaia umui dekenai, lau umui hamaoroa, ⁴ Ioane ena bapatiso siahuna be guba dekena amo, o taunimanima dekena amo?”

⁵ Idia sibona idia hereva henia, idia gwau, “Bema ita gwau guba dekena amo, ia be do ia gwau, ‘To edena bamona umui kamoni henia lasi?’ ⁶ To bema ita gwau, ‘Taunimanima dekena amo,’ taunimanima ibounai ese nadi dekena amo ita do idia hodoa, badina be idia gwau Ioane be peroveta tauna.” ⁷ Unai dainai idia haere henia, idia gwau, “Ia be edeseni dekena amo ai diba lasi.”

⁸ Vadaeni Iesu ia gwau, “Lau danu inai gaudia lau karaia ena siahu be do lau hamaoroa lasi umui dekenai.”

Parable: Vain ena uma gabu naria taudia dikadia

⁹ Vadaeni Iesu ese taunimanima dekenai ia hereva henia lou, inai parable ia hamaoroa idia dekenai, ia gwau, “Tau ta vain ena uma gabu ia hadoa, vadaeni vain ena uma gabu be naria taudia dekenai ia henia, do idia naria. Gabeai idau hanua dekenai ia lao, nega daudau unuseni ia noho. ¹⁰ Uma gabu ena huahua neganai, ia ese iena hesiai tauna ta ia siaia lao, uma gabu naria taudia dekena amo vain ena anina do ia abia. To uma gabu naria taudia ese idia botai, iena imana anina lasi idia siaia lou. ¹¹ Vadaeni hesiai tauna ma ta ia siaia, to idia ese idia botai, idia hadikaia, iena imana anina lasi ma idia siaia lou. ¹² Hesiai tauna

namba 3 danu ia siaia, to bero idia henia ia dekenai, bona idia negea lao murimuri dekenai. ¹³ Vadaeni uma gabu biaguna ia gwau. ‘Lau be edena bamona do lau karaia? Lauegu natuna, egu lalokau, do lau siaia, do idia itaia, sedira do idia matauraia ia dekenai.’ ¹⁴ To uma gabu naria taudia ese idia itaia, bona idia sibona idia herevahereva, idia gwau, ‘Iena natuna korikori be inai. Do ita alaia mase, vadaeni uma gabu be do ita abia iseda.’ ¹⁵ Vadaeni idia veria lao uma gabu murimuri dekenai, idia alaia mase.

“Uma gabu ena biaguna be edena bamona do ia karaia idia dekenai? ¹⁶ Ia be do ia mai, uma gabu naria taudia do ia alaia ore, uma gabu be idau taudia haida dekenai do ia henia.”

Inai hereva idia kamonai neganai, haida idia gwau, “Ia! Lasi! Unai bamona do ia vara lasi!”

¹⁷ Iesu ese iena matana dekenai ia itadia noho, ia gwau, “Buka Helaga dekenai ia torea herevana ena anina be dahaka? Buka Helaga ia gwau:

“Ruma haginia taudia ese idia ura henia lasi nadi be, ruma ena kona nadi ia halaoa vadaeni.’

¹⁸ Unai nadi latanai do idia moru taudia be do ia makohia momokani, bona bema unai nadi be tau ta ena latanai ia moru neganai, unai tau be do ia patapata momokani, kahu bamona.”

¹⁹ Taravatu hadibaia taudia bona dubu biagudia ese idia diba unai sivarai be idia edia kara. Unai dainai unai nega korikori dekenai, idia ura Iesu idia dogoatao. To idia gari bada unai taunimanima momo dekenai.

Kaisara ena takisi

²⁰ Vadaeni taravatu hadibaia taudia bona dubu biagudia ese Iesu idia itaia noho, bona dika taudia ia dekenai idia siaia. Edia dika idia hunia, edia toana Iesu vairanai be tau namodia bamona. Idia ura Iesu idia koia, vadaeni hereva ta do ia gwauraia, bona unai hereva dainai, Iesu do idia samania diba, gavana dekenai.

²¹ Idia ese Iesu idia nanadaia, idia gwau, “Hadibaia tauna e, ai diba oiemu hereva bona oiemu hadibaia be idia maoromaoro, bona taunimanima edia hereva dekenai oi lalao lasi, to Dirava ena dala sibona oi hadibaia namonamo. ²² Kaisara ena takisi moni do ita henia be ia maoro o?”

²³ To ia be edia koikoi ia diba, vadaeni ia haere, ia gwau, ²⁴ “Moni ta umui mailaia, lau itaia. Daika ena laulau bona daika ena revareva be inai?”

Idia gwau, “Kaisara ena.”

²⁵ Vadaeni Iesu ia gwau, “Kaisara ena, Kaisara dekenai do umui henia, to Dirava ena, Dirava dekenai do umui henia.”

²⁶ Vadaeni unai taunimanima momo edia vairana dekenai, inai dubu biagudia ese be dala lasi Iesu idia dogoatao, badina iena hereva be kerere lasi. Iena haere dekenai idia hoa bada, idia be mai edia hereva ta lasi.

Toreisi lou herevadia

²⁷ Unai murinai Sadukea taudia haida Iesu dekenai idia lao. Unai ore a idia gwau be taunimanima idia mase neganai, do idia toreisi lou lasi. Vadaeni idia nanadaia, idia gwau, ²⁸ “Hadibaia tauna e, Mose ese taravatu ia henia ai dekenai, ia gwau, ‘Tau ta do ia mase, bona iena vabu do ia noho mai ena natuna lasi, vabu be unai mase tauna ena tadina ese

do ia adavaia, iena natuna do ia havaraia, mase tauna ena.’²⁹ Guna, aiemai huana dekenai tadikaka be 7 idia noho, ia vara guna tauna ese hahine ta ia adavaia, to natuna lasi ia mase vadaeni.³⁰ Iharuana bona ihatoina ese unai hahine idia adavaia,³¹ ia lao bona taudia 7 ese idia abia vadaeni. To ibounai idia mase, mai edia natuna lasi.³² Gabeai hahine danu ia mase vadaeni.³³ Toreisi lou neganai, unai hahine be daika ena adavana? Badina be taudia 7 ese idia adavaia.”

³⁴ Iesu ia haere, ia gwau, “Inai tanobada taudia be hahine idia abia bona idia headava.³⁵ To do idia toreisi lou, bona edia namo hegeregere mauri gabeai lalonai do idia vareai taudia be do idia headava lasi.³⁶ Bona do idia mase lou lasi, idia be aneru danu do idia hegeregere, bona Dirava ena natuna do idia lao, badina idia be toreisi lou taudia.³⁷ To mase dekena amo idia toreisi lou herevana be Mose ese ia hamomokania vadaeni au ginigini ia arai ena sivarai lalonai. Inai bamona ia gwau, ‘Lohiabada be Aberahamo ena Dirava, Isako ena Dirava, Iakobo ena Dirava.’³⁸ Unai dainai, ia be mase taudia edia Dirava lasi, to mauri taudia edia, badina taunimanima ibounai be ia dainai idia mauri.”³⁹ Taravatu hadibaia taudia haida idia gwau, “Hadibaia tauna e, hereva maorona be unai.”⁴⁰ Unai dekena amo idia nanadaia lou lasi, idia gari vadaeni.

Davida totona hereva

⁴¹ To Iesu ese ia nanadaia idia dekenai, ia gwau, “Badina be dahaka taunimanima be idia gwau Keriso be Davida ena natuna, a? ⁴² Davida be Salamo dekenai ia gwau:

“‘Lohiabada ese egu Lohiabada dekenai ia hamaoroa, ia gwau:
Lauegu imana idiba kahana dekenai do oi helai,
⁴³ ela bona oi dekenai idia tuari henia taudia ibounai,
be oiemu aena henunai gaudia dekenai do lau halaoa.’

⁴⁴ Bema Davida ese Keriso ia gwauraia ‘Lohiabada’, edena bamona Keriso be Davida ena natuna sibona?”

Taravatu hadibaia taudia edia kara

⁴⁵ Vadaeni taunimanima ibounai edia vairana dekenai Iesu ese iena diba tahua taudia ia hamaoroa, ia gwau,⁴⁶ “Taravatu hadibaia taudia do umui naria namonamo. Idia be idia ura dabua lata herea karaia, vadaeni do idia loaloa gabudia dekenai taunimanima ese idia dekenai do idia hanamo, bona dubu dekenai, bona aria neganai, gabu namo herea dekenai do idia helai.⁴⁷ To idia ese vabu edia ruma dekenai gau idia abia haorea, bona taunimanima koia totona, guriguri lata herea idia gwauraia. Idia be edia davana metau do idia abia.”

21

Vabu ena boubou monina

¹ Iesu ese iena matana ia abia isi, kohu momo taudia ia itaia, boubou moni be maua ena lalonai idia udaia.² Ma vabu ogogamina ta ia itaia, iena moni maragimaragi rua ia udaia.³ Vadaeni Iesu ia gwau, “Momokani umui lau hamaoroa, inai vabu mai ogogami danu ia udaia moni ese idia ibounai edia moni ia hanai. ⁴ Badina be idia ese edia moni bada herea dekena amo sisina sibona boubou maua dekenai idia udaia, to inai vabu be mai ogogami danu, to ia ese iena moni ibounai, iena mauri dekenai durua gauna ia udaia.”

Dubu Helaga do idia hadikaia

⁵ Tau haida ese Dubu Helaga idia herevalaia, Dubu dekenai herahera karaia nadi namodia bona harihari gaudia mai helaga danu idia herevalaia. To Iesu ia gwau, ⁶ “Hari umui itaia gaudia ibounai be nega gabei do idia moru diho, nadi ta nadi ta latanai do ia noho lasi.”

Iesu ese gabei do idia vara gaudia ia gwauraia guna

⁷ Vadaeni Iesu idia nanadaia, idia gwau, “Hadibaia tauna e, edena negai inai gaudia do idia vara? Bona do idia vara negana ena toana be dahaka?” ⁸ Ia gwau, “Do umui naria namonamo, umui dekenai do idia koia garina. Badina be taunimanima momo lauegu ladana dekenai do idia mai, do idia gwau, ‘Tauna be lau inai,’ bona, ‘Negana ia kahirakahira vadaeni.’ To idia edia murina dekenai do umui lao lasi. ⁹ To tuari bona heatu bada edia sivarai do umui kamoni, do umui gari lasi, badina be inai gaudia do idia vara guna, to dokona be gabei.”

¹⁰ Ma Iesu ia gwau, “Bese ta bese ta danu do idia alaia ta ta dekenai, bona basileia ta be basileia ta danu do idia tuari. ¹¹ Gabu ibounai dekenai tano do idia mareremarere, hitolo bada, bona ta ta dekenai do ia hanaia gorere do idia vara, ma gari bada gaudia danu, bona guba dekena amo toana badadia do idia hedinarai.”

¹² “To unai gaudia do idia vara lasi neganai, idia ese umui do idia guia, hisihisi do idia henia umui dekenai, dubu dekenai bona dibura ruma dekenai umui do idia doria vareai, king bona gavana edia vairana dekenai umui do idia hakaua lao, lauegu ladana dainai. ¹³ To unai neganai umui be mai emui dala Sivarai Namona do umui gwauraia hedinarai. ¹⁴ Umui laloa guna lasi edena bamona edia samania do umui haere henia. ¹⁵ Badina be lau ese hereva bona aonega do lau henia umui dekenai. Vadaeni umui dekenai badu henia taudia ibounai be do idia hegeregere lasi emui hereva do idia koua.

¹⁶ “To emui tamana, emui sinana, emui tadikakana, emui varavarana, emui turana, ese umui do idia samania, bona idia ese umui haida danu do idia alaia mase. ¹⁷ Taunimanima ibounai ese do idia badu henia umui dekenai lau dainai. ¹⁸ To emui kwarana huina tamona do ia dika lasi. ¹⁹ Do umui gini auka dainai, emui laumana do idia mauri.

Ierusalem do idia hadikaia

²⁰ “Tuari ore ese Ierusalem do idia koua hagegea do umui itaia, vadaeni do umui diba, iena dokona ia kahirakahira vadaeni. ²¹ Unai neganai Iudea dekenai idia noho taudia be ororo dekenai do idia heau lao, bona hanua lalonai idia noho taudia be do idia heau murimuri dekenai, bona gunika dekenai idia noho taudia be hanua dekenai do idia raka vareai lasi. ²² Badina be davana karaia negana be unai. Ia torea guna herevadia hamomokania dinana be unai. ²³ Unai neganai rogorogo hahine bona natuna matamata havaraia hahine be madi idia dika! Badina be hisihisi badana inai tano dekenai do ia vara, bona inai bese taudia edia latanai badu do ia ginidae. ²⁴ Haida be kaia edia matana dekenai do idia mase, haida be do idia abia mauri, idau hanua idau hanua dekenai do idia abia lao. Idau bese taudia ese aena dekenai Ierusalem do idia moia tao, ia lao bona unai idau bese edia nega do ia ore.

Taunimanima ena Natuna do ia mai

²⁵ “Dina, hua, hisiu dekenai toa do idia vara, bona tanobada besedia be do idia hisihisi, bona edia kudouna dekenai do idia gari dikadika.

Davara ena regena bona hurehure danu do idia bada. ²⁶ Taunimanima edia kudouna dekenai do idia gari momokani, edia laloe danu do idia doko, unai idia vara gaudia dainai. Badina be guba ena siahu gaudia do idia mareremare, edia heau ena dala be do idia idau momokani. ²⁷ Vadaeni tanobada taudia idia ese Taunimanima ena Natuna do idia itaia, ori ena latanai do ia mai, mai ena siahu bada, bona mai ena hairaina danu. ²⁸ To inai gaudia do idia vara hamatamaia neganai, be emui kwarana do umui abia isi. Badina be umui emui hamauria be ia kahirakahira vadaeni.”

Parabole: Fig auna

²⁹ Iesu ese parabole ta ia henia idia dekenai, ia gwau, “Fig auna bona au ibounai do umui itaia. ³⁰ Edia rauna matamata idia tubu daekau umui itaia, vadaeni umui diba lahara ia kahirakahira vadaeni. ³¹ Unai dainai, umui danu ese inai gaudia do idia vara do umui itaia, vadaeni do umui diba Dirava ena Basileia ia kahirakahira vadaeni.

³² “Momokani umui lau hamaoroa, inai nega do ia ore lasi, inai gaudia ibounai do idia vara momokani. ³³ Guba bona tanobada do idia boio, to lauegu hereva be do ia boio lasi.

Do umui naria

³⁴ “Do umui naria namonamo, aniani bona kekero muramura bona tanobada ena laloe metau momo gaudia ese emui lalona do idia gua garina, vadaeni Lohiabada ena Dina do ia mai haraga, umui hegaegae lasi garina. ³⁵ Badina be unai Dina be tanobada latanai idia noho taunimanima ibounai dekenai do ia ginidae. ³⁶ Unai dainai, do umui naria, bona nega ibounai do umui guriguri, vadaeni inai dika ibounai dekena amo do umui heau mauri, vadaeni Taunimanima ena Natuna ena vairana dekenai do umui gini.”

³⁷ Dina ibounai Iesu ena kara be Dubu Helaga dekenai ia hadibaia karaia. To hanuaboi ibounai neganai be ia raka murimuri dekenai, Olive Ororo dekenai ia lao noho. ³⁸ Daba ia rere neganai taunimanima ibounai be Dubu Helaga dekenai idia haboua, iena hereva kamoni totona.

22

Iuda Iskariote ese Iesu ena mase dala ia karaia

¹ Idia hatubua lasi paraoa ena aria ladana Pasova, ia kahirakahira vadaeni. ² Vadaeni dubu biagudia bona taravatu hadibaia taudia ese Iesu alaia totona dala idia tahua, hunia dekenai, badina be idia ese unai taunimanima momo dekenai idia gari.

³ Unai neganai Satani ese Iuda Iskariote, idia 12 tauna ta, ena lalona dekenai ia vareai. ⁴ Vadaeni ia be ia lao, dubu biagudia bona Dubu Helaga ena gima taudia danu idia hereva hebou, Iesu be edena bamona do ia henia idia dekenai. ⁵ Idia be idia moale, vadaeni idia gwauhamata ia dekenai, moni do idia henia idia gwau. ⁶ Iuda ia gwau, “Namo.” Vadaeni nega ia naria, taunimanima idia noho lasi neganai, ia ese Iesu do ia henia idia dekenai.

Aria idia karaia hegaegae

⁷ Idia hatubua lasi paraoa ena aria dinana, Pasova ena mamoe alaia dinana, ia ginidae. ⁸ Vadaeni Iesu ese Petero bona Ioane ia siaia, ia gwau, “Umui lao, Pasova do umui karaia hegaegae, vadaeni do ita ania.”

⁹ Idia ruaosi idia gwau, “Edeseni do ai karaia hegaegae?”

¹⁰ Vadaeni Iesu ese ia hamaorodia, ia gwau, “Hanua badana dekenai do umui raka vareai, tau ta hodu ta ia huaia noho do umui itaia, vadaeni ia ese do ia daekau rumana dekenai do umui daekau. ¹¹ Vadaeni unai ruma ena biaguna do umui hereva henia, do umui gwau, ‘Hadibaia tauna ia gwau, vadivadi daiutu be edeseni, egu diba tahua taudia danu Pasova do ai ania?’ ¹² Vadaeni ia ese atai ai daiutu badana ta do ia hadibaia umui dekenai, ia hegaegae vadaeni. Unuseni Pasova do umui karaia hegaegae.”

¹³ Vadaeni idia ruaosi idia lao, ia ese ia gwauraia guna gaudia idia davaria, vadaeni Pasova idia karaia hegaegae.

Anibou Helaga

¹⁴ Negana ia ginidae neganai, Iesu be iena aposetolo taudia danu idia helai diho. ¹⁵ Vadaeni idia dekenai ia hereva, ia gwau, “Lau ura bada hari inai Pasova do ita ania hebou guna, gabeai hisihisi do lau davaria. ¹⁶ Badina be umui lau hamaoroa, lau be Pasova do lau ania lou lasi, ela bona iena anina korikori do ia hedinarai Dirava ena Basileia lalonai.”

¹⁷ Vadaeni kapusi ta ia abia, ia hanamoa, ia gwau, “Inai be umui abia, umui ibounai do umui inua. ¹⁸ Badina be lau hamaoroa umui dekenai, lau be uaina do lau inua lou lasi, ela bona Dirava ena Basileia do ia ginidae.”

¹⁹ Vadaeni paroa ia abia, ia hanamoa, ia makohia, ia henia idia dekenai, ia gwau, “Lauegu tauanina be inai, umui totona ia henia vadaeni. Inai bamona do umui karaia, lau dekenai do umui laloa totona.” ²⁰ Idia ania ore, vadaeni ia ese kapusi ma ia abia, ia gwau, “Inai kapusi be maino karaia gwauhamata matamatana lauegu rarana dekenai, umui totona do ia bubua.

²¹ “Lauegu mase dala do ia karaia tauna ena imana be pata latanai, inai lauegu badibadinai. ²² Momokani, Taunimanima ena Natuna be do ia lao, ia gwauraia guna hegeregerena, to iena mase dala ia karaia tauna madi ia dika momokani.”

²³ Vadaeni idia sibona ta ta dekenai idia nanadaia, idia gwau, “Inai be daika ese unai bamona do ia karaia?”

Daika do ia bada

²⁴ Vadaeni idia sibona idia hepapahuahu, idia be daika do ia herea. ²⁵ Vadaeni ia hamaoroa idia dekenai, ia gwau, “Bese idau dau edia king ese idia lohia idia dekenai, bona hanua idau dau taudia ese edia lohia dekenai idia hanamoa. ²⁶ To umui be unai bamona lasi. Umui emui huanai guna ia vara tauna be gabeai vara tauna bamona do ia lao, bona hakaua tauna danu be hesiai tauna bamona do ia lao. ²⁷ Badana be daika, aniani gabuna dekenai do ia helai diho tauna, o hesiai tauna? Aniani gabuna dekenai ia helai diho tauna, ani? To lau be umui emui huanai lau noho, emui hesiai tauna bamona.

²⁸ Metau bona dibagani be lau dekenai idia ginidae negadia lalonai, umui ese lau umui badinaia noho, lau umui rakatania lasi. ²⁹ Unai dainai, egu Tamana ese Basileia ta ia henia lau dekenai hegeregerena, lau danu Basileia ta lau henia inai, umui dekenai. ³⁰ Vadaeni lauegu Basileia lalonai, egu pata dekenai do umui aniani, bona do umui inuinu, bona terona ena latanai do umui helai, vadaeni Israela iduhu 12 dekenai do umui kota henia.

Iesu ia gwau Petero ese do ia hunia ena hereva dekenai

31 “Simona e, Simona e, oi kamonai. Satani ese gwaumaoro ia abia vadaeni, emui abidadama do ia tohoa, hegeregere uiti idia botai, iena momoru kokia totona. 32 To lau be lau guriguri vadaeni oi dainai, oiemu abidadama do ia moru lasi totona. Vadaeni lau dekenai do oi giroa mai neganai, be oiemu tadikaka dekenai goada do oi henia.” 33 Petero ia gwau, “Lohiabada e, lau be oi danu do ita lao, ela bona dibura ruma, ela bona mase.” 34 To Iesu ia gwau, “Petero e, oi lau hamaoroa inai, kokoroku do ia boiboi lasi, oiemu hereva dekenai nega toi do oi hunia lau, do oi gwau, ‘Lau be lau diba lasi Iesu.’”

Puse, tamaka bona tuari kaia

35 Ma Iesu ia gwau, “Guna lau ese umui lau siaia neganai, mai emui pusepuse lasi, mai emui dabua udaia gauna lasi, mai emui tamaka lasi, umui raka, be umui ese gau ta dekenai umui hegeregere lasi, a?”

Idia gwau, “Lasi.”

36 Vadaeni ia gwau, “To harihari, ta mai ena pusepuse, do ia abia, ta mai ena dabua udaia gauna, danu do ia abia, ta mai ena tuari kaia lasi, iena dabua dekena amo kaia ta do ia hoia. 37 Badina Dirava ena Buka Helaga lalonai inai hereva ia noho:

‘Taunimanima ese idia laloa vadaeni, ia be dika karaia tauna hegeregere.’

Umui lau hamaoroa inai: Unai kara be momokani lau dekenai do ia vara. Badina Buka Helaga ena hereva ibounai lau totona, be do idia vara momokani.” 38 Idia gwau, “Lohiabada e, tuari kaia rua be inai.” Ia gwau, “Ia hegeregere vadaeni.”

Olive Ororo dekenai Iesu ia guriguri

39 Vadaeni idia raka murimuri dekenai, ma nega ibounai ia karaia bamona, Iesu ia lao Olive Ororo dekenai, iena diba tahua taudia danu iena murina dekenai idia raka. 40 Unai gabu dekenai idia ginidae, vadaeni idia dekenai ia hamaoroa, ia gwau, “Do umui guriguri, dibagani ese umui do ia abia garina.”

41 Vadaeni ia sibona ia raka siri, nadi ta bema idia negea ena daudau hegeregere, vadaeni iena tuina ia atoa diho, ia guriguri, 42 ia gwau, “Egu Tamana e, oiemu lalona bema ia hegeregere, inai kapusi be lau dekena amo do oi kokia, to lauegu ura lasi, oiemu ura sibona.” 43 Vadaeni aneru ta guba dekena amo ia dekenai ia ginidae, ia dekenai goada henia totona. 44 To hisihisi bada ese Iesu ena lalona ia abia, ia guriguri goadagoada, ela bona iena kopina ia siahu ranuna be rara bamona ia moru tano dekenai.

45 Guriguri dekena amo ia toreisi, diba tahua taudia dekenai ia giroa lao, to idia be idia mahuta noho, edia laloa idia doko dainai. 46 Vadaeni ia ese ia hereva idia dekenai, ia gwau, “Badina dahaka umui mahuta? Umui toreisi, umui guriguri, dibagani ese umui do ia abia garina.”

Iesu idia dogoatao

47 Iesu ia hereva noho neganai, taunimanima momo idia ginidae vadaeni. Iuda, diba tahua tauna ta, ese ia hakaudia, vadaeni Iesu dekenai kisi henia totona ia raka kahirakahira lao. 48 To Iesu ia gwau, “Iuda e, Taunimanima ena Natuna be kisi dekena amo iena mase dala do oi karaia, a?”

49 Iesu ena diba tahua taudia ese idia itaia dahaka do ia vara, vadaeni idia nanadaia ia dekenai, idia gwau, “Lohiabada e, tuari kaia dekena

amo idia dekenai do ai heatu, a?" ⁵⁰ Vadaeni idia ta ese Hahelagaia Tauna Badana ena hesiai tauna ena taiana idiba kahana ia utua oho.

⁵¹ To Iesu ia gwau, "Dohore." Vadaeni unai tau ena taiana dekenai Iesu ese iena imana ia atoa, ia hanamoa lou.

⁵² Vadaeni Iesu ese ia do idia dogoatao totona idia lao taudia, dubu biagudia bona Dubu Helaga ena gima taudia bona hanua tau badadia, dekenai ia hereva henia, ia gwau, "Umui be henaoa tauna ta do umui dogoatao totona bamona umui mai, mai emui kaia, bona mai emui io, a?" ⁵³ Dina ibounai ita be Dubu Helaga lalonai ita gini hebou, to edena bamona lau umui dogoatao lasi? To inai be umui emui nega, dibura ena siahu negana."

Petero ese iena hereva dekenai amo Iesu ia hunia

⁵⁴ Vadaeni idia ese Iesu idia dogoatao, Hahelagaia Tauna Badana ena ruma dekenai idia hakaua vareai. Petero danu Iesu ena murina dekenai ia raka, to sisina ia daudau. ⁵⁵ Haida ese magu lalonai lahi idia karaia, vadaeni idia helai hagegea. Petero danu idia edia badinai ia helai. ⁵⁶ Vadaeni hesiai hahine ta ese lahi ena diari dekenai Petero ia itaia, vadaeni ia gwau, "Inai tau be Iesu ena turana ta."

⁵⁷ To Petero ese iena hereva dekenai Iesu ia hunia, ia gwau, "Hahine e, lau be lau diba lasi ia."

⁵⁸ Nega ia daudau lasi, tau ta ese ma Petero ia itaia, ia gwau, "Oi danu idia edia turana ta."

To Petero ia gwau, "Tau e, lau be lasi."

⁵⁹ Hora ta ia lao, vadaeni ta ma ia hereva goadagoada, ia gwau, "Momokani, inai tau be Iesu ena turana ta, badina be ia danu Galilea tauna."

⁶⁰ To Petero ia gwau, "Tau e, oiemu hereva ena anina lau diba lasi."

Vadaeni ia hereva neganai, maoromaoro kokoroku ia boiboi. ⁶¹ Vadaeni Lohiabada ese iena matana ia giroa Petero dekenai, ia itaia noho. Unai neganai, Petero ese Lohiabada ena hereva ia lalao, ia gwau, "Kokoroku do ia boiboi lasi, nega toi oiemu hereva dekenai do oi hunia lau." ⁶² Vadaeni Petero ia raka murimuri dekenai, ia tai dikadika.

Iesu idia hevaseha henia, bona idia botaita

⁶³ Iesu idia dogoatao taudia ese idia kirikirilaia, bona idia botaita. ⁶⁴ Iena matana danu dabua dekenai idia koua, iena vairana idia botaita, idia nanadaia, idia gwau, "Oi ia botaita tauna be daika?" ⁶⁵ Bona hereva dika momo idia gwauraia ia dekenai.

Kaunsolo taudia edia vairana dekenai Iesu idia kota henia

⁶⁶ Daba rere neganai, hanua tau badadia idia haboua, dubu biagudia bona taravatu hadibaia taudia danu, vadaeni kaunsolo taudia edia vairana dekenai Iesu idia hakaua lao. Idia gwau, ⁶⁷ "Oi hamaoroa ai dekenai, oi be Keriso o?"

Iesu ia gwau, "Bema umui lau hamaoroa, umui be do umui kamoni lasi. ⁶⁸ Bona bema umui lau nanadaia, umui be do umui haere lasi. ⁶⁹ To harihari ia lao, Taunimanima ena Natuna be Dirava ena siahu idibana kahana dekenai do ia helai."

⁷⁰ Vadaeni ibounai idia gwau, "Be, oi be Dirava ena Natuna, a?" Ia gwau, "Umui gwauraia maoro unai."

⁷¹ Idia gwau, "Dahaka dainai samania hereva ma ita tahua? Ia sibona ena uduna dekenai ia hereva gauna ita kamoni vadaeni!"

23

Iesu be Pilato ena vairana dekenai

¹ Vadaeni hebou taudia ibounai idia toreisi, Pilato dekenai Iesu idia hakaua lao. ² Ia dekenai idia samania hamatamaia, idia gwau, “Inai tau ai davaria, aiemai bese taudia dekenai ia hereva henia mai goada danu, Kaisara ena takisi moni henia totona ia gwauatao, bona sibona ia gwauraia ia be Keriso, king ta.”

³ Vadaeni Pilato ese ia nanadaia, ia gwau, “Oi be Iuda taudia edia King, a?”

Iesu ia haere, ia gwau, “Oi hereva maoro unai.”

⁴ Pilato ese dubu biagudia bona unai taunimanima momo dekenai ia hamaoroa, ia gwau, “Kerere ta lau davaria lasi inai tau dekenai.”

⁵ To idia be idia hereva goadagoada, idia gwau, “Ia ese iena hadibaia herevadia dekenai Iudea noho taudia ibounai ia hadikadia, Galilea dekena amo ia hamatamaia, ia mai bona inai hanua dekenai.”

⁶ Pilato ese inai hereva ia kamonaia, vadaeni ia henanadaia, ia gwau, “Inai Iesu be Galilea tauna, a?” ⁷ Vadaeni ia diba ia be Heroda ena kahana tauna dainai, ia ese Heroda dekenai ia siaia lao, badina unai neganai Heroda be Ierusalem dekenai ia noho.

Iesu be Heroda ena vairana dekenai

⁸ Heroda ese Iesu ia itaia, vadaeni ia moale bada, badina be nega daudau Iesu ena sivarai ia kamonaia, vadaeni ia ura be do ia itaia, bona Iesu ese toa ta do ia karaia, vadaeni do ia itaia. ⁹ Vadaeni ia dekenai hereva momo ia nanadaia, to Iesu be ia haere lasi. ¹⁰ Dubu biagudia bona taravatu hadibaia taudia be unuseni idia gini, idia ese Iesu idia samania mai goada danu. ¹¹ Vadaeni Heroda mai ena tuari taudia danu ese Iesu idia kirikirilaia, idia hevaseha henia, dabua namo herea ta iena tauanina dekenai idia atoa, vadaeni Pilato dekenai idia siaia lou. ¹² Unai neganai Pilato bona Heroda be idia maino karaia vadaeni, badina be guna idia ruaosi ta ta dekenai idia badu henia.

Iesu nega iharuana Pilato ena vairana dekenai

¹³ Vadaeni Pilato ese dubu biagudia bona hanua lohia taudia ia boiridia, ¹⁴ ia hamaorodia, ia gwau, “Inai tau umui mailaia, umui gwau hanua dekenai ia ese taunimanima ia hakaua kerere, be lau ese umui emui samania hereva lau tahua, to iena kerere ta lau davaria lasi. ¹⁵ Heroda danu ese Iesu ena kerere ta ia davaria lasi, unai dainai ia siaia lou ita dekenai. Inai dainai, ia ese ena davana be mase kererena ta ia karaia lasi. ¹⁶ Namu, lau botaia, vadaeni do lau ruhaia ia lao.” ¹⁷ Badina be nega ibounai, Pilato ena kara be unai aria neganai, dibura ruma dekenai idia noho tauna ta do ia ruhaia murimuri dekenai.

¹⁸ To taunimanima ibounai idia boiboi, idia gwau, “Inai tau alaia. To Baraba be do oi ruhaia, bona henia ai dekenai.” ¹⁹ Baraba be hanua badana lalonai heatu ia havaraia, bona taunimanima ia alaia dainai, dibura ruma dekenai idia koua.

²⁰ Pilato ese ma ia hereva henia lou idia dekenai, ia gwau ia ura be Iesu do ia ruhaia ia lao. ²¹ To idia ma idia boiboi, idia gwau, “Oi hasatauroa, oi hasatauroa!”

²² Nega ihatoina ma ia hereva lou idia dekenai, ia gwau, “Inai tau ena dika be dahaka? Lau be mase ena badina ta ia dekenai lau davaria lasi. Lau ese do lau botaia, vadaeni do lau ruhaia.”

²³ To idia be mai goada danu idia boiboi, idia gwau, “Oi hasatauroa!” Vadaeni idia edia hereva ia kwalimu. ²⁴ Vadaeni Pilato ese idia edia ura

hegeregerena ia karaia. ²⁵ Inai Baraba, heatu bona alaia dainai dibura ruma dekenai ia noho tauna, be ia siaia murimuri dekenai, idia edia noinoi hegeregerena. To Iesu be ia henia idia dekenai, edia ura do idia karaia.

Iesu idia hasatauroa

²⁶ Idia ese Iesu idia hakaua murimuri dekenai, vadaeni Simona, Kurene tauna ta, gunika dekena amo ia mai neganai idia dogoatao, satauro be iena pagana dekenai idia atoa, Iesu ena murinai do ia huaia.

²⁷ Taunimanima momo herea be Iesu ena murinai idia raka, bona hahine haida idia raka lao neganai, idia taitai noho. ²⁸ Vadaeni Iesu ese iena vairana ia giroa, idia dekenai ia hereva, ia gwau, “Jerusalema hahine e, lau dekenai do umui taitai lasi, to umui sibona dekenai umui taitai, bona emui natuna dekenai do umui taitai. ²⁹ Badina be negana do ia mai, taunimanima do idia gwau, natuna lasi hahine bona natuna maragi havaraia diba lasi hahine be idia namo! ³⁰ Unai neganai ororo badadia dekenai do idia hereva henia, do idia gwau, ‘Aiema latanai umui moru!’ bona ororo maragidia dekenai do idia hamaoroa, do idia gwau, ‘Ai do umui hunia!’ ³¹ Badina bema au be mai mauri danu neganai inai bamona kara idia karaia, be au mai kakoro danu neganai be edena bamona do idia karaia?”

³² Dika karaia taudia rua be Iesu danu idia hakaua murimuri dekenai, do idia hasatauroa nega tamona. ³³ Gabu ta dekenai idia ginidae, ena ladana be Kwara Koukouna. Unuseni Iesu idia hasatauroa. Inai dika karaia taudia danu, ta Iesu ena idiba kahana dekenai, ma ta ena lauri kahana dekenai, idia hasatauroa. ³⁴ Vadaeni Iesu ia guriguri, ia gwau, “Egu Tamana e, inai taudia edia dika mani oi gwauatao, badina idia diba lasi dekenai inai bamona idia karaia noho.”

Vadaeni iena dabua idia haria karaia, laki gadara dekena amo edia ahuna ta ta idia abia. ³⁵ Hanua taudia be idia gini, Iesu idia itaia noho. Bona hanua lohia taudia ese idia kirikirilaia ia dekenai, idia gwau, “Ia be idau taudia ia hamauria, bema ia be Dirava ena Keriso, Dirava ena abia hidi tauna, ia be sibona do ia hamauria!”

³⁶ Tuari taudia ese Iesu idia hevaseha henia, idia raka kahirakahira, uaina ena mamina ia namo lasi idia henia daekau ia dekenai, idia gwau, ³⁷ “Bema inai be momokani oi be Iuda taudia edia king, oi sibona do oi hamauria be namo!”

³⁸ Revareva ta danu idia torea, iena atai dekenai idia atoa, idia torea, “Iuda taudia edia King.”

³⁹ Vadaeni ia danu idia hasatauroa tauna ta ese ia dekenai ia hevaseha, ia gwau, “Oi be Keriso, a? Oi sibona oi hamauria, bona ai danu oi hamauria!”

⁴⁰ To iena turana ese ia gwau henia, ia gwau, “Dirava dekenai oi gari lasi, a? Oi be do oi mase, ia hegeregerena. ⁴¹ Gau tamona, ita ruaosi do ita mase iseda kara dika davana, to inai tau be mai ena kerere lasi.” ⁴² Vadaeni ia gwau, “Iesu e, oiemu Basileia do oi abia neganai, do oi lalao lau!”

⁴³ Iesu ia gwau, “Momokani lau hamaoroa oi dekenai, hari dina ita ruaosi Paradaiso dekenai do ita ginidae.”

Iesu ia mase

⁴⁴ Unai be dina tubua neganai, vadaeni unai nega dekena amo ia lao adorahi neganai, tano ibounai ia dibura. ⁴⁵ Dibura ese dina ia koua, vadaeni Dubu Helaga ena iduara koua dabua helagana badana be huana

dekena amo sibona ia darea kahana rua. ⁴⁶ Vadaeni Iesu ia boiboi, ia gwau, “Egu Tamana e, egu lauma be oiemu imana dekenai lau atoa inai.” Unai bamona ia hereva, vadaeni ia mase.

⁴⁷ Tuari biaguna ese unai kara ia itaia, vadaeni ia ese Dirava ia hanamo, ia gwau, “Inai tau be kara maoromaoro tauna!”

⁴⁸ Idia itaia noho taudia momo herea ese unai gaudia idia vara idia itaia, vadaeni lalohisihisi dainai, edia kemena idia botiaia, bona hanua dekenai idia giroa lou. ⁴⁹ Iesu ena turana, bona Galilea dekena amo iena murinai idia raka hahinedia be idau gabu dekenai idia gini, idia itaia noho.

Iesu idia guria

⁵⁰ Kaunsolo tauna ta, ena ladana be Iosepa, kara maoromaoro tauna, ia noho. ⁵¹ Ia be kaunsolo edia hereva hebou dekenai bona edia kara dekenai ia vareai lasi. Ia be Iudea ena hanua ta, ena ladana be Arimatea, tauna. Ia danu Dirava ena Basilea ia naria noho. ⁵² Vadaeni ia lao Pilato dekenai, Iesu ena tauanina ia noia. ⁵³ Vadaeni Iosepa ese Iesu ena tauanina ia abia diho, dabua aukana dekenai ia kumia, nadi gabuna idia geia ena matuna lalonai idia atoa. Unai nadi ena matuna be matamata, ena lalona dekenai tau ta idia do guria lasi. ⁵⁴ Unai be Paraide, Sabati totona karaia hegaegae ena dina bona Sabati Dina be kahirakahira vadaeni.

⁵⁵ Vadaeni Galilea dekena amo Iesu ena murinai idia raka hahinedia be Iosepa ena murinai idia lao, nadi ena matuna idia itaia, bona Iesu ena tauanina unuseni idia guria, be idia itaia danu. ⁵⁶ Vadaeni idia giroa lao, muramura mai bonana, bona dahua muramura idia abia hegaegae.

To Sabati neganai idia laga-ani, taravatu ena hereva hegeregere.

24

Iesu ia toreisi lou

¹ Pura ena dina ginigunana, hahine taudia be daba maragimaragi neganai guria gabuna dekenai idia lao, muramura mai bonana namo, idia abia hegaegae gaudia, be idia abia lao. ² Vadaeni guria gabuna ena koua nadina be idau gabu dekenai ia noho, unuseni idia davaria. ³ Vadaeni nadi ena matuna dekenai idia raka vareai, to Lohiabada Iesu ena tauanina be idia davaria lasi. ⁴ Unai dainai idia laloo daradara. Vadaeni tatau rua idia edia badibadinai idia gini, mai dabua diaridiari danu. ⁵ Hahine idia gari, tano dekenai edia kwarana idia atoa diho. To unai tau ruaosi ese idia dekenai idia hereva henia, idia gwau, “Badina dahaka mauri tauna be mase gabuna dekenai umui tahua noho? ⁶ Ia be iniseni ia noho lasi, ia toreisi vadaeni. Galilea dekenai ia noho neganai, umui dekenai ia hamaoroa herevana be do umui laloo, ⁷ ia gwau, ‘Taanimanima ena Natuna be dika taudia ese iena mase dala do idia karaia, do idia hasatauroa, to dina ihatoina dekenai be do ia toreisi lou.’”

⁸ Vadaeni idia ese iena hereva idia laloo. ⁹ Vadaeni nadi ena matuna idia rakatania, idia giroa lou, unai gaudia ibounai be taudia 11, bona edia turana dekenai idia hamaoroa. ¹⁰ Hahine taudia be inai: Maria, Magadala hahinena, Ioana, Maria, Iamesi ena sinana, bona edia turana haida. Idia ese inai kara aposetolo taudia dekenai idia hamaoroa. ¹¹ To edia hereva be gori ena mamina bamona, vadaeni idia abia dae lasi. ¹² To Petero ia toreisi, ia heau lao, guria gabuna ena lalona ia itaia, dabua

sibona ia noho. Vadaeni iena ruma dekenai ia giroa lou, idia vara gaudia dekenai ia hoa.

Iesu be Emausa dala dekenai ia hedinarai

¹³ Unai dina dekenai, tau rua be hanua maragina ta, ena ladana be Emausa, dekenai idia lao, Ieruselema bona unai hanua edia huanai be 12 kilomita hegeregerena. ¹⁴ Dala dekenai inai idia vara gaudia idia herevalaia idia sibona dekenai. ¹⁵ Vadaeni idia herevahereva neganai, Iesu be idia dekenai ia raka kahirakahira lao, idia danu ia raka hebou. ¹⁶ Tauna idia itaia, to idia diba lasi ia be Iesu. ¹⁷ Iesu ia gwau, “Umui be dala dekenai dahaka umui herevalaia?”

Vadaeni idia ruaosi idia gini, edia vairana be mai metau danu. ¹⁸ Vadaeni idia ta, ena ladana be Kleopa, ese ia haere henia, ia gwau, “Oi be Ieruselema dekenai sibona oi noho, unai dainai inai gaudia idia vara be oi diba lasi, a?”

¹⁹ Ia gwau, “Dahaka gau?”

Idia gwau, “Iesu, Nasareta tauna, ena sivarai. Ia be peroveta tauna, Dirava ena vairana dekenai, bona taunimanima ibounai edia vairana dekenai, iena kara bona iena hereva be mai siahu danu. ²⁰ To dubu biagudia bona hanua lohia taudia ese iena mase dala idia karaia, idia hasatauroa. ²¹ To ai laloa bona ai gwau ia be Israela edia hamauria tauna. Dina toi idia ore vadaeni unai gaudia idia vara. ²² Harihari aiemai hahine haida edia hereva dekenai ai hoa. Idia be daba maragi guria gabuna dekenai idia lao. ²³ To iena tauanina idia davaria lasi, vadaeni idia giroa mai, idia gwau aneru haida idia itaia, bona unai aneru ese idia hamaoroa idia dekenai, idia gwau ia be ia mauri lou vadaeni. ²⁴ Bona aiemai turana haida danu guria gabuna dekenai idia lao, hahine edia hereva hegeregerena idia davaria, to Iesu be idia itaia lasi.”

²⁵ Vadaeni Iesu ese idia ia gwau henia, ia gwau, “Kavakava taudia, emui lalona be dibura, peroveta taudia edia hereva umui abia dae lasi! ²⁶ Ia maoro lasi a, Keriso ese unai bamona do ia hisihisi, bona iena hairaina do ia abia?” ²⁷ Vadaeni Mose bona peroveta taudia edia buka dekenai, iena sivarai herevadia ibounai edia anina, be Iesu ese idia dekenai ia hadibaia.

²⁸ Idia lao henia hanua be ia kahirakahira, vadaeni Iesu be ia raka hanaia gwauria. ²⁹ To idia ruaosi ese idia dogoatao, idia gwau, “Do ita noho, badina be ia adorahi vadaeni, dina be kahirakahira do ia diho.” Vadaeni idia danu ruma dekenai idia daekau. ³⁰ Idia tojosi aniani gabuna dekenai idia helai diho, vadaeni Iesu ese paraoa ia abia, ia hanamoa, ia makohia, idia ruaosi dekenai ia henia. ³¹ Vadaeni edia matana idia kehoa, idia diba ia. Vadaeni edia vairana dekena amo ia boio. ³² Vadaeni idia ruaosi sibona idia herevahereva, idia gwau, “Dala dekenai ia hereva ita dekenai, bona Buka Helaga ena anina ita dekenai ia hadibaia neganai, iseda lalona be idia siahu, ani?”

³³ Vadaeni idia toreisi, Ieruselema dekenai idia giroa lou, taudia 11 mai edia turana danu idia hebou noho neganai idia davaria. ³⁴ Idia ese idia ruaosi dekenai idia hamaoroa, idia gwau, “Momokani, Lohiabada be ia toreisi vadaeni! Simona ese ia itaia vadaeni!”

³⁵ Vadaeni idia ruaosi ese dala dekenai idia vara gaudia idia hamaoroa idia dekenai, bona paraoa ia makohia neganai edia lalona idia kehoa herevana danu.

Iesu be idia edia huanai ia hedinarai lou

³⁶ Idia hereva noho neganai, Iesu be edia huanai ia gini, ia gwau, “Maino umui abia.”

³⁷ Idia be edia kudouna dekenai idia hoa, idia gari dikadika, idia laloa ia be lauma ta. ³⁸ To Iesu ia gwau, “Badina dahaka umui emui kudouna idia hoa? Badina dahaka umui laloa daradara? ³⁹ Egu imana bona egu aena umui itaia, lau inai. Egu kopina dekenai do umui dogoatao, vadaeni do umui diba, badina be lauma be tauanina lasi bona turiana lasi, inai lau umui itaia hegeregerena.”

⁴⁰ Inai bamona ia hereva, vadaeni iena imana bona ena aena ia hedinarai idia dekenai. ⁴¹ To idia moale bona idia hoa dainai, do idia laloa daradara noho. Vadaeni Iesu ese ia nanadaia idia dekenai, ia gwau, “Emui aniani sisina ia noho, o?” ⁴² Idia ese gwarume sisina, idia gabua gauna, idia henia. ⁴³ Vadaeni ia ese ia abia, edia vairana dekenai ia ania.

⁴⁴ Ia ese ia hereva henia idia dekenai, ia gwau, “Ita noho hebou neganai umui lau hamaoroa, Mose bona peroveta taudia edia Buka dekenai, bona Salamo Buka dekenai, lauegu sivarai idia torea herevadia ibounai, be do idia momokani.”

⁴⁵ Vadaeni ia ese Buka Helaga ena anina ia hadibaia idia dekenai, ela bona edia lalona idia kehoa. ⁴⁶ Ma ia hamaoroa idia dekenai, ia gwau, “Inai bamona ia torea vadaeni: Keriso ese unai bamona hisihisi do ia abia, bona dina toi murinai mase dekena amo do ia toreisi lou. ⁴⁷ Vadaeni Keriso ena ladana dainai, lalona giroa bona dika gwauatao do idia harorolaia gabu ibounai dekenai. Ierusalem dekenai inai gaukara do umui hamatamaia, ia lao bona tanobada besedia ibounai dekenai do idia harorolaia. ⁴⁸ Umui ese inai gaudia ibounai emui matana dekenai umui itaia vadaeni, unai dainai do umui gwaurai hedinarai. ⁴⁹ Bona Harihari Gauna, egu Tamana ese umui dekenai ia gwauhamata do ia henia, be lau ese emui latanai do lau siaia diho. Umui be Ierusalem dekenai do umui noho, ia lao bona atai ai dekena amo do ia diho siahuna do umui abia.”

Iesu guba dekenai ia abia daekau

⁵⁰ Vadaeni Iesu ese idia ia hakaua murimuri dekenai, ela bona Betania idia kahirakahira vadaeni. Vadaeni iena imana ia abia isi, ia hanamoa idia dekenai. ⁵¹ Idia dekenai ia hanamoa noho neganai, ia be idia dekena amo ia abia siri, ia abia daekau guba dekenai. ⁵² Idia ese idia tomadiho henia ia dekenai, vadaeni mai moale danu Ierusalem dekenai idia giroa lou. ⁵³ Vadaeni Dubu Helaga dekenai idia giroa lou, bona unuseri nega ibounai Dirava idia hanamoa.

SIVARAI NAMONA IOANE IA TOREA

Mauri ena Hereva ese gau ibounai ia havaraia

¹ Matamaia neganai Hereva ia noho. Hereva be Dirava danu ia noho, bona unai Hereva be Dirava. ² Hereva be matamaia neganai Dirava danu ia noho. ³ Gau ibounai be Dirava ese ia karaia inai Hereva dekena amo. Gau ta be idau dala dekenai ia vara lasi, badina idia karaia gaudia ibounai be unai Hereva ese ia karaia. ⁴ Mauri be Hereva ena lalona dekenai ia noho, bona unai mauri ese diari ia mailaia taunimanima dekenai. ⁵ Diari be dibura lalonai ia hedinarai, bona dibura ese ia habodoa diba lasi.

⁶ Tau ta ia vara, Dirava ese ia siaia, iena ladana be Ioane. ⁷ Ia be hereva momokani do ia gwauraia, bona Diari do ia hedinarai totona ia mai, taunimanima ibounai ese iena hereva do idia kamoni, bona Diari do idia abidadama henia totona. ⁸ Ia be unai Diari lasi, to Diari herevalaia totona ia mai. ⁹ Inai be Diari momokani, taunimanima ibounai hadiaria totona ia mai tanobada dekenai.

¹⁰ Hereva be tanobada dekenai ia noho, bona inai Hereva dekena amo Dirava ese tanobada ia karaia. To tanobada be ia diba lasi ia. ¹¹ Iena tano korikori dekenai ia mai, to iena bese taudia ese idia abia dae lasi ia. ¹² To taunimanima haida ese ia dekenai idia abidadama henia. Vadaeni inai ia dekenai idia abia dae taudia dekenai siahua ia henia, idia be Dirava ena natudia idia lao totona. ¹³ Dirava ena natuna idia vara, be headava ena kara dekena amo idia vara bamona lasi, idia be tanobada tamana dekena amo idia vara lasi. Dirava sibona be idia edia Tamana.

¹⁴ Inai Hereva be taunimanima ena tauanina dekenai ia halaoa, bona iseda huanai ia noho. Iena hairai danu ita itaia. Inai hairai be Dirava ese ia henia, badina ia be Dirava ena Natuna tamona sibona. Bogahisihisi kara bona hereva momokani dekenai ia honu momokani.

¹⁵ Ioane ese inai Hereva ia herevalaia, ia boibo, ia gwau, “Lau herevalaia tauna be inai, lau gwau, ‘Lauegu murina dekenai do ia mai tauna be ia bada, to lau be maragi. Badina lau be do lau vara lasi neganai, ia be guna ia noho vadaeni.’”

¹⁶ Inai Hereva ese iena bogahisihisi dekena amo, ita ibounai ia hanamoa vadaeni. Ia ese hariharibada, bona ma hariharibada ia henia vadaeni ita dekenai. ¹⁷ Badina be Dirava ese Mose dekena amo taravatu ia henia, to hariharibada bona kara momokani be Iesu Keriso ese ia mailaia vadaeni. ¹⁸ Matamaia neganai ia mai bona harihari tau ta ese Dirava ia itaia lasi. To iena Natuna tamona sibona, Tamana dekenai momokani ia noho Tauna, ia ese Dirava ena toana ita dekenai ia hedinarai vadaeni.

Ioane Bapatiso ia haroro

¹⁹ Iuda taudia ese hahelagaia taudia bona Levi ore a taudia haida Ierusalem dekena amo idia siaia, Ioane do idia nanadaia totona. Idia nanadaia, idia gwau, “Oi be daika?”

²⁰ Vadaeni Ioane ese hereva ia hunia lasi, ia haere momokani, ia gwau, “Lau be Keriso lasi.”

²¹ Ma idia nanadaia, idia gwau, “Sedira, oi be Elia, a?”
Ia gwau, “Lau be Elia lasi.”

Ma idia gwau, “Ai naria noho Peroveta Tauna be oi, a?”

Ia haere, ia gwau, “Lasi.”

²² Vadaeni idia ese idia nanadaia lou, idia gwau, “Oi be daika? Oiemu haere be ai idia siaia mai taudia dekenai do ai hamaoroa. Oi sibona oiemu sivarai be mani oi gwauraia.”

²³ Vadaeni Ioane ese sibona ena sivarai ia gwauraia, ia gwau, “Lau be, Gado ta taunimanima idia noho lasi tano dekenai ia boiboi noho, ia gwau:

Lohiabada ena dala umui karaia hegaegae.”

Inai be Isaia, peroveta tauna, ena hereva hegeregerena.

²⁴ Inai Farisea idia siaidia taudia ese ma idia nanadaia lou. ²⁵ Idia gwau, “Bema oi be Keriso lasi, Elia lasi, bona unai ai naria noho Peroveta Tauna lasi, badina dahaka bapatiso oi karaia noho?”

²⁶ Ioane ia haere, ia gwau, “Lau be ranu dekenai bapatiso lau henia, to umui emui huanai, umui diba lasi tauna ta ia gini noho. ²⁷ Ia be lauegu murinai do ia mai, bona lau be hegeregere lasi iena tamaka varona do lau ruhaia.”

²⁸ Inai kara be Betania, Ioridane Sinavai unai kahana dekenai ia vara. Ioane be unuseni ia bapatiso karaia.

Iesu be Dirava ena Mamoe Natuna

²⁹ Kerukeru dabai Ioane ese Iesu ia itaia, ia dekenai ia raka mai, vadaeni ia gwau, “Itaia, Dirava ena Mamoe Natuna ia mai inai, ia be tanobada ena dika kokia tauna. ³⁰ Guna lau gwauraia tauna be inai. Lau gwau, “Tau ta be lauegu murinai do ia mai, lau be maragi, to ia be bada, badina lau do lau vara lasi neganai, ia be ia mauri noho.’ ³¹ Lau be lau diba lasi ia, to inai tau Israela dekenai do ia hedinaraiia totona, taunimanima lau bapatiso henidia ranu dekenai.”

³² Ioane ese iena hereva ma ia gwauraia hedinarai, ia gwau, “Lauma Helaga lau itaia vadaeni, guba dekena amo ia diho, pune manu bamona, ia latanai ia kamokau. ³³ Lau be lau diba lasi ia, to Dirava ese ranu dekenai bapatiso karaia totona lau ia siaia. Unai neganai Dirava ese lau ia hadibaia, ia gwau, “Tauna be oi ese do oi itaia, Lauma Helaga be do ia diho, bona iena latanai do ia kamokau. Inai tauna ese Lauma Helaga dekena amo taunimanima do ia bapatiso henidia.’” ³⁴ Ma Ioane ia gwau, “Lau ese lau itaia vadaeni, bona umui dekenai lau gwauraia hedinaraiia inai, ia be Dirava ena Natuna.”

Ioane ena diba tahua taudia Iesu ena murinai idia raka

³⁵ Kerukeru dabai Ioane mai ena diba tahua taudia rua danu unuseni idia gini lou. ³⁶ Iesu ia raka hanaia neganai idia itaia, vadaeni Ioane ia gwau, “Umui itaia, Dirava ena Mamoe Natuna be inai.”

³⁷ Inai diba tahua taudia ruaosi ese iena hereva idia kamonai, vadaeni Iesu ena murinai idia lao. ³⁸ Iesu ese iena vairana ia giroa, iena murinai idia raka taudia ruaosi ia itaia, vadaeni idia ia nanadaia, ia gwau, “Dahaka umui tahua?”

Idia haere, idia gwau, “Rabi e, oi be edeseni oi noho?” Rabi ena anina be “Hadibaia Tauna.”

³⁹ Ia gwau, “Umui mai itaia.” Vadaeni idia lao, iena noho gabuna idia itaia, bona unai dina ia dekenai idia noho. Unai nega be adorahi, 4 okaloka bamona.

⁴⁰ Unai tau ruaosi, Ioane ena hereva dainai, Iesu ena murinai idia raka lao, edia tau ta be Andrea. Ia be Simona Petero ena tadina. ⁴¹ Andrea ese karaharaga iena kakana korikori Simona ia davarai, vadaeni ia

hamaoroa, ia gwau, “Ai be Mesia ai davaria vadaeni.” Mesia ena anina be Keriso. ⁴² Vadaeni ia ese Simona ia hakaua lao Iesu dekenai.

Iesu ese ia itaia, vadaeni ia gwau, “Oi be Simona, Iona ena natuna. To oiemu ladana be do idia gwauria Kepa.” Kepa be Petero hegeregrena, anina be “nadi.”

Filipo bona Natanaela be Iesu ena murinai idia raka

⁴³ Kerukeru dabai, Iesu ia ura Galilea dekenai ia lao gwauria, vadaeni Filipino ia davaria, ia dekenai ia hereva, ia gwau, “Lauegu murinai oi raka mai.” ⁴⁴ Filipino be Betesaida tauna, Andrea bona Petero edia hanua tauna. ⁴⁵ Filipino ia lao, Natanaela ia davaria, ia hamaoroa, ia gwau, “Mose ena taravatu lalonai bona peroveta taudia edia buka lalonai idia herevalaia tauna ai davaria vadaeni. Ia be Iesu, Nasareta tauna, Iosepa ena natuna.”

⁴⁶ Natanaela ia gwau, “Nasareta dekena amo gau namona ta do ia mai diba, a?”

Filipo ia gwau, “Oi mai itaia.”

⁴⁷ Iesu ese Natanaela ia itaia, ia dekenai ia mai noho, vadaeni ia herevalaia, ia gwau, “Israela tauna korikori be inai, ia be koikoi diba lasi momokani tauna!”

⁴⁸ Natanaela ese ia dekenai ia hereva, ia gwau, “Edena bamona oi diba lau?”

Iesu ia haere, ia gwau, “Filipo ese oi do ia boiria lasi, fig au henunai oi noho neganai, lau itaia oi.”

⁴⁹ Natanaela ia haere, ia gwau, “Rabi e, oi be Dirava ena Natuna, oi be Israela ena King!”

⁵⁰ Iesu ma ia hereva ia dekenai, ia gwau, “Oi lau hamaoroa vadaeni, lau gwau, ‘Fig au henunai oi lau itaia,’ dainai lau oi abidadama henia, a? Inai kara idia hereaia karadia be do oi itaia.” ⁵¹ Ma idia ia hamaoroa, ia gwau, “Momokani umui lau hamaoroa, guba do umui itaia, do ia kehoa, bona Dirava ena aneru do umui itaia, Taunimanima ena Natuna ena latanai do idia daekau, do idia diho.”

2

Iesu ena hoa kara ginigunana

¹ Dina rua murinai headava aria ta idia karaia Kana, Galilea ena hanua ta dekenai. Iesu ena sinana danu unuseni ia lao. ² Iesu, mai ena diba tahua taudia danu idia boiria, vadaeni inai headava aria dekenai idia hedinarai. ³ Uaina ibounai ia ore neganai, Iesu ena sinana ese Iesu dekenai ia hereva, ia gwau, “Edia uaina ia ore vadaeni.”

⁴ To Iesu ia haere henia, ia gwau, “Hahine e, lau dekenai be dahaka oi karaia? Lauegu nega be dohore.”

⁵ Vadaeni iena sinana ese hesiai gaukara taudia dekenai ia hamaoroa, ia gwau, “Umui dekenai ia hamaoroa gauna be do umui karaia.”

⁶ Unuseni be daramu 6 idia helai noho, Iuda taudia edia huria gaukara karaia totona, idia ta ta edia anina be hegeregere lita 100 mai kahana bamona. ⁷ Iesu ia hereva hesiai gaukara taudia dekenai, ia gwau, “Daramu be ranu dekenai umui hahonua.” Vadaeni idia hahonua momokani. ⁸ Ma idia ia hamaoroa, ia gwau, “Harihari ranu haida umui bubua, bona do umui abia lao aria biaguna dekenai.” Vadaeni idia ese idia abia lao. ⁹ Aria biaguna ese uaina dekenai ia halao ranua ia inua, to ia be ia diba lasi edeseni dekena amo ia mai, ranu idia bubua taudia

sibona idia diba. Vadaeni aria biaguna ese headava tauna ia boiria, ia hereva henia, ia gwau, ¹⁰ “Taunimanima ibounai ese uaina namo herea idia atoa diho guna, vadaeni vadivadi taudia ese momo idia inua murinai, be uaina sisina ia namo idia atoa diho. To oi be uaina namo herea oi dogoatao vadaeni, ia mai bona harihari!”

¹¹ Iesu ese inai hoa kara ginigunana ia karaia Kana hanua, Galilea kahana dekenai. Unuseni iena siahu ia hedinarai, bona iena diba tahua taudia idia abidadama henia ia dekenai.

¹² Unai murinai, Iesu mai ena sinana danu, bona iena tadina bona iena diba tahua taudia danu, idia diho lao Kaperanauma dekenai, unuseni dina momo lasi idia noho.

Iesu ese hoihoi taudia Dubu Helaga dekena amo ia lulua

¹³ Iuda taudia edia Pasova aria dinana ia kahirakahira neganai, Iesu be Ierusema dekenai ia daekau. ¹⁴ Dubu Helaga lalonai Iesu ese boromakau bona mamoe bona pune manu idia hoihoilaia taudia ia itaia. Moni idia senisia taudia danu ia itaia, idia helai noho edia pata dekenai. ¹⁵ Vadaeni varo dekena amo botai gauna ia karaia, bona Dubu Helaga dekena amo ibounai ia luludia, mamoe bona boromakau danu. Moni idia senisia taudia danu edia moni ia bubua negea, bona edia pata ia bubua. ¹⁶ Vadaeni pune manu hoia taudia dekenai ia gwau henia, ia gwau, “Unai be umui kokia lao, egu Tamana ena Ruma be hoihoi Rumana dekenai umui halaoa lasi.” ¹⁷ Iena diba tahua taudia ese Buka Helaga ena hereva idia lalao, inai bamona ia torea, ia gwau: “Dirava e, oiemu Ruma lau lalokau henia bada, inai lalokau be egu lalona dekenai ia siahu, lahi bamona.”

¹⁸ Iuda taudia ese Iesu idia nanadaia, idia gwau, “Inai bamona oi karaia ena anina be dahaka? Dahaka hoa kara do oi hedinarai ai dekenai, vadaeni do ai diba oi be mai emu siahu inai bamona kara do oi karaia diba?”

¹⁹ Iesu ia haere, ia gwau, “Inai Dubu Helaga do umui kokia, vadaeni lau ese dina toi lalonai do lau haginia lou.”

²⁰ Iuda taudia idia gwau, “Inai Dubu Helaga be lagani 46 lalonai idia gaunkara, haginia totona. To oi ese dina toi lalonai ma do oi haginia lou, oi gwau, a?”

²¹ To Iesu ia herevalaia Dubu Helaga gauna be iena tauanina. ²² Unai dainai, ia be mase dekena amo ia toreisi lou neganai, iena diba tahua taudia ese unai Iesu ena hereva idia lalao lou. Vadaeni idia ese Buka Helaga bona Iesu ena hereva danu idia hamomokania.

Iesu ese taunimanima ibounai edia lalao ia diba

²³ Iesu be Pasova aria ena nega Ierusema dekenai ia noho neganai, taunimanima momo ese ia dekenai idia abidadama henia, ia ese ia karaia hoa karadia idia itaia dainai. ²⁴ To Iesu ese inai taunimanima dekenai ia abidadama henia lasi, badina be ia ese taunimanima ibounai edia lalao ia diba. ²⁵ Bona tau ta ese taunimanima edia kara Iesu dekenai ia hamaoroa gwauraia be anina lasi, badina taunimanima edia lalao, be ia diba momokani vadaeni.

3

Nikodemo

¹ Farisea tauna ta ena ladana be Nikodemo, ia be Iuda taudia edia lohia ta. ² Hanuaboi ta Iesu dekenai ia lao, ia hereva henia, ia gwau, “Rabi e, ai diba oi be hadibaia tauna, Dirava dekena amo oi mai vadaeni, badina oi

karaia toadia be tau ta ia karaia diba lasi, bema Dirava ese ia durua lasi neganai.”

³ Iesu ia haere henia, ia gwau, “Momokani, momokani lau hamaoroa oi dekenai, bema taunimanima ta be ia vara lou lasi, ia be Dirava ena Basileia do ia itaia diba lasi.”

⁴ Vadaeni Nikodemo ese ia nanadaia, ia gwau, “Taunimanima be ia tau badana neganai, edena bamona do ia vara lou diba? Iena sinana ena bogana dekenai do ia vareai lou diba, vadaeni do ia vara lou, a?”

⁵ Iesu ia haere, ia gwau, “Momokani, momokani lau hamaoroa oi dekenai, taunimanima be ranu dekena amo bona Lauma Helaga dekena amo bema ia vara lasi, ia be Dirava ena Basileia lalonai do ia vareai diba lasi. ⁶ Tauanina dekena amo ia vara gauna be tauanina, Lauma Helaga dekena amo ia vara gauna be lauma. ⁷ Lauegu hereva dekenai oi hoa lasi, lau gwau do oi vara lou. ⁸ Lai be ena ura gabuna dekena amo ia toa, bona ena regena oi kamonai, to oi diba lasi edeseni dekena amo ia mai, bona edeseni ia lao. Lauma Helaga dekena amo idia vara taudia ibounai danu unai bamona.”

⁹ Nikodemo ma ia gwau, “Inai gaudia be edena bamona do idia vara?”

¹⁰ Iesu ma ia haere, ia gwau, “Oi be Israela taudia edia hadibaia tauna, to inai gaudia be oi diba lasi, a? ¹¹ Momokani, momokani lau hamaoroa oi dekenai, ai be ai diba gauna ai herevalaia, bona ai itaia gauna ai gwauraia, to aiemai hereva be umui ta umui abia dae lasi. ¹² Tanobada gaudia lau herevalaia oi dekenai to oi abia dae lasi, to bema guba gaudia do lau herevalaia oi dekenai, be edena bamona do oi abia dae diba? ¹³ Tau ta lasi guba dekenai ia daekau vadaeni, guba dekena amo ia diho Tauna sibona, Taunimanima ena Natuna unai, iena noho gabuna be guba.”

Dirava ena Natuna

¹⁴ “Mose ese taunimanima idia noho lasi tano dekenai gaigai ia abia isi bamona, Taunimanima ena Natuna danu unai bamona do idia abia isi. ¹⁵ Vadaeni do idia abidadama henia taudia ibounai ese mauri hanaihanai do idia abia.

¹⁶ “Badina be Dirava ese inai tanobada ia lalokau henia bada dainai, iena Natuna tamona sibona ia vara, ia henia vadaeni ita dekenai, do idia abidadama henia taudia ibounai be do idia mase lasi, to mauri hanaihanai do idia abia. ¹⁷ Badina be Dirava ese iena Natuna tanobada dekenai ia siaia mai, be tanobada ia kota henia totona ia mai lasi, to tanobada be ia dainai mauri do ia abia.

¹⁸ “Dirava ena Natuna ia abidadama henia tauna be do ia kota henia lasi, to ia abidadama henia lasi tauna be ia kota henia vadaeni, badina be ia ese Dirava ena Natuna tamona sibona ia vara, ena ladana ia abidadama henia lasi dainai. ¹⁹ Kota henia ena badina be inai, diari be tanobada dekenai ia mai vadaeni, to taunimanima ese dibura idia ura henia bada, diari be idia ura henia maragi, badina edia kara be ia dika. ²⁰ Badina be kara dika taudia ibounai ese diari idia ura lasi, diari gabuna dekenai idia lao lasi, edia kara do idia hedinarai garina. ²¹ To kara momokani idia badinaia taudia ese diari dekenai idia lao, vadaeni diari ese ia hedinarai, idia ese kara namodia idia karaia, Dirava idia kamonai henia dainai.”

Iesu bona Ioane

²² Unai gaudia murinai, Iesu mai ena diba tahua taudia danu Iudea tano dekenai idia lao, unuseni ia be idia danu idia noho, bona ia bapatiso

henia. ²³Ioane danu Aenona dekenai, Salima ena kahana dekenai, ia baptiso henia, badina ranu be ia bada unai gabu dekenai. Taunimanima be unuseni idia lao, vadaeni ia baptiso henia idia dekenai. ²⁴Unai be Ioane dibura ruma dekenai do idia koua lasi neganai.

²⁵Unai neganai Ioane ena diba tahua taudia be Iuda tauna ta danu goeva bona helaga dalana idia hepapahuahu. ²⁶Vadaeni, idia be Ioane dekenai idia lao, idia gwau, “Rabi e, Ioridane Sinavai unai kahana dekenai oi danu ia noho, bona oi ese oi herevalaia tauna be hari ia baptiso karaia noho. Bona taunimanima ibounai ia dekenai idia lao noho.”

²⁷Ioane ia haere, ia gwau, “Bema Dirava ese ia henia lasi neganai, tau ta be gau ta do ia abia diba lasi. ²⁸Umui danu umui diba lau gwau lau be Keriso lasi, to iena vairana dekenai lau mai guna totona Dirava ese lau ia siaia vadaeni. ²⁹Headava matamata hahine be headava matamata tauna ese ia biagua. To headava matamata tauna ena turana be ia gini noho, ia kamoni noho, vadaeni headava matamata tauna ena gadona ia kamoni neganai ia moale bada. Unai dainai, lauegu moale be ia momokani vadaeni. ³⁰Ia be do ia bada lao, lau be do lau maragi lao.”

Iesu be guba dekena amo ia mai

³¹Ataiai dekena amo ia mai tauna be ibounai edia biaguna, tano dekena amo tauna be tano tauna, bona tano hereva danu ia gwaurai. Guba dekena amo ia mai tauna be ibounai edia biaguna. ³²Ia ese ia itaia, bona ia kamoni gaudia ia gwaurai hedinarai, to iena hereva be tau ta ia abia dae lasi. ³³To iena hereva ia abia dae tauna ese ia hamomokania vadaeni, Dirava be momokani. ³⁴Badina be Dirava ese ia siaia tauna ese Dirava ena hereva ia gwaurai, bona Dirava ese iena Lauma ibounai do ia henia, sisina sibona do ia henia lasi. ³⁵Tamana ese iena Natuna ia lalokau henia, bona gau ibounai iena Natuna ena imana dekenai ia atoa vadaeni. ³⁶Dirava ena Natuna ia abidadama henia tauna ese mauri hanaihanai do ia abia, to iena Natuna ia kamoni henia lasi tauna be mauri do ia itaia lasi, badina Dirava ena badu be iena latanai do ia noho.

4

Iesu ese Samaria hahine dekenai ia hereva henia

¹Farisea taudia idia kamoni Iesu ese taunimanima momo ia abidia, bona ia baptiso henidia, iena diba tahua taudia ia halaoa, to Ioane ese momo lasi ia abia. ²To Iesu ese ia baptiso karaia lasi. Iena diba tahua taudia sibona ese idia baptiso karaia. ³Iesu ia diba Farisea taudia ese inai hereva idia kamoni neganai, ia ese Iudea ia rakatania, Galilea dekenai ia lao gwaurai. ⁴Iena dala be Samaria tano dekena amo ia raka hanai.

⁵Vadaeni Samaria hanua ta dekenai ia ginidae, ladana be Sukara. Unai hanua be Iakobo ese iena natuna Iosepa dekenai ia henia tano kahirakahira. ⁶Iakobo ena ranu guri be ia noho unuseni. Iesu be iena tauanina ia manoka, ia laolao dainai, vadaeni dina tubua neganai, ranu guri ena badibadinai ia helai diho.

⁷Samaria hahine ta ranu utua totona ia lao. Vadaeni Iesu ese ia noinoi ia dekenai, ia gwau, “Ranu sisina oi henia lau dekenai.” ⁸Unai bamona ia gwau badina iena diba tahua taudia be hanua dekenai idia lao vadaeni, aniani idia hoia totona.

⁹Inai Samaria hahine ia haere Iesu dekenai, ia gwau, “Badina be dahaka? Oi be Iuda tauna, lau be Samaria hahine, ma lau dekenai ranu

oi noia, a?" Unai bamona ia hereva badina be Iuda taudia bona Samaria taudia be idia turana karaia lasi.

¹⁰ Vadaeni Iesu ia haere ia dekenai, ia gwau, "Dirava ena harihari gauna bema oi diba, bona bema oi diba danu ranu sisina oi dekenai ia noinoi tauna be daika, oi ese do oi noia, vadaeni ia ese mauri ranuna do ia henia oi dekenai."

¹¹ Hahine ia gwau, "Tau badana e, oi be mai emu ranu utua gauna lasi, bona guri be ia dobu. Inai mauri ranuna be edeseni dekena amo do oi abia? ¹² Oi ese aiemai sene tauna Iakobo oi hereaia, a? Ia ese inai ranu guri ia henia ai dekenai, ia ese ena ranu ia inua, iena natuna ibounai bona iena boromakau orea danu idia inua."

¹³ Iesu ma ia haere, ia gwau, "Inai ranu do idia inua taudia ibounai be do idia ranu mase lou. ¹⁴ To lau ese do lau henia ranuna do ia inua tauna be do ia ranu mase lasi ia lao bona hanaihanai. Lau ese do lau henia ranuna be inai tau lalonai, sinavai bamona do ia heau noho, bona mauri ranuna do ia henia. Ma mauri hanaihanai danu do ia henia."

¹⁵ Inai hahine ese ia noinoi Iesu dekenai, ia gwau, "Tau badana e, mani unai ranu oi henia lau dekenai, vadaeni do lau ranu mase lou lasi, bona ranu utua totona danu iniseni do lau mai lasi."

¹⁶ Vadaeni Iesu ese ia hamaoroa, ia gwau, "Oi lao, oiemu adavana oi boiria, umui ruaosi do umui mai."

¹⁷ Hahine ia gwau, "Lau be mai egu adavana lasi."

¹⁸ Iesu ia gwau, "Oiemu hereva ia maoro vadaeni, oi gwau, 'Lau be adavana lasi,' badina oiemu adavana be 5 oi abia vadaeni, bona harihari oi abia tauna be oiemu adavana lasi. Oiemu hereva be ia momokani."

¹⁹ Inai hahine ia gwau, "Tau badana e, harihari lau diba vadaeni oi be peroveta tauna. ²⁰ Aiemai tubuna be inai ororo dekenai Dirava idia tomadiho henia, to umui gwau tomadiho gabuna momokani be Ierusalem dekenai sibona."

²¹ Iesu ia gwau, "Lauegu hereva oi abia dae: Gabeai nega ta do ia mai, inai ororo dekenai, bona Ierusalem dekenai danu, taunimanima be do idia tomadiho henia lasi. ²² Umui Samaria taudia ese dahaka umui tomadiho henia be umui diba lasi. Ai Iuda taudia ese dahaka ai tomadiho henia be ai diba. Badina Dirava ese taunimanima ia hamauria kara, be ai Iuda taudia dekena amo ia mai. ²³ To nega ta do ia mai, bona harihari ia ginidae vadaeni, tomadiho taudia momokani ese mai Lauma bona mai momokani danu Tamana do idia tomadiho henia, badina be Tamana ese unai bamona idia tomadiho henia taudia ia tahua noho. ²⁴ Dirava be Lauma, bona do idia tomadiho henia taudia ese, lauma bona momokani dekena amo do idia tomadiho henia."

²⁵ Hahine ia gwau, "Lau diba Mesia, Keriso idia gwauraia tauna, be do ia mai, bona do ia mai neganai, ia ese gau ibounai do ia gwauraia hedinarai."

²⁶ Iesu ia haere, ia gwau, "Tauna be lau inai, lau hereva noho oi dekenai."

²⁷ Unai neganai Iesu ena diba tahua taudia idia giroa mai, ia dekenai idia ginidae, vadaeni idia hoa, badina ia be hahine ta danu ia hereva hereva. To ta ese ia nanadaia lasi, "Dahaka oi tahua?" o, "Dahaka dainai ia danu oi herevahereva?"

²⁸ Vadaeni unai hahine be iena ranu utua gauna ia rakatania, hanua dekenai ia lao. Ia ese hanua taudia dekenai ia hamaoroa, ia gwau, ²⁹ "Umui mai, tau ta umui itaia, egu kara ibounai ia ese ia gwauraia hedinarai. Dahaka umui gwau, ia be Keriso o?" ³⁰ Vadaeni idia be hanua idia rakatania, Iesu dekenai idia lao.

31 Unai neganai ena diba tahua taudia ese Iesu idia hamaoroa, idia gwau, “Rabi e, oi aniani.”

32 To ia haere, ia gwau, “Lau be mai egu aniani, umui diba lasi gauna.”

33 Vadaeni iena diba tahua taudia be idia sibona dekenai idia nanadaia, idia gwau, “Tau ta ese iena aniani ia mailaia vadaeni o?”

34 To Iesu ese ia hereva, ia gwau, “Egu aniani be inai: Lau ia siaia Diravana ena ura do lau karaia, iena gaukara do lau karaia haorea momokani. 35 Umui be mai emui hereva ta, ani, umui gwau, ‘Hua 4 do idia ore murinai, uiti utua negana do ia ginidae.’ To umui lau hamaoroa, emui matana umui abia isi, uma gabu umui itaia, anina be idia auka bona mage vadaeni, utua nega danu ia hegeregere. 36 Utua tauna ese ena davana ia abia noho, vadaeni anina ia haboua, mauri hanaihanai henia gauna. Unai dainai, hadoa tauna bona utua tauna be do idia moale hebou. 37 Badina inai hereva danu be ia momokani, ani, ia gwau, ‘Hadoa tauna ia hadoa gauna be utua tauna ese anina ia abia.’ 38 Lau ese umui lau siaia, umui hekwarahi lasi gauna do umui utua totona. Haida be idia hekwarahi vadaeni, umui ese edia hekwarahi anina umui abia noho.”

39 Samaria taudia momo herea unai hanua lalonai ese Iesu idia abidadama henia, unai hahine ena hereva dainai. Hahine ia gwau, “Lauegu kara ibounai ia ese ia gwauraia lau dekenai.” 40 Unai dainai, inai Samaria taudia be Iesu dekenai idia lao, idia noinoi ia dekenai, idia dekenai do ia noho. Vadaeni Iesu be dina rua unuseni ia noho.

41 Vadaeni Iesu ena hereva dainai, taunimanima momo ese idia abidadama henia. 42 Idia ese unai hahine idia hamaoroa, idia gwau, “Ai be oiemu hereva dainai ai abidadama lasi ia dekenai, to badina ai sibona ese iena hereva ai kamoni, bona hari ai diba ia be momokani tanobada ena Hamauria Tauna.”

Lohia ta ena natuna Iesu ese ia hamauria

43 Unai dina rua idia ore, vadaeni Iesu ia toreisi, Galilea dekenai ia lao. 44 Inai hereva be Iesu ia gwauraia guna vadaeni, ia gwau, “Peroveta tauna be iena hanua momokani taudia ese do idia matauraia lasi.” 45 To Galilea dekenai ia ginidae neganai be Galilea taudia ese Iesu idia abia dae, Ierusalem dekenai Pasova aria neganai ia karaia gaudia ibounai edia matana dekena amo idia itaia dainai, badina be idia danu unai aria totona idia lao.

46 Galilea ena hanua ta, ena ladana be Kana, dekenai ia ginidae. Unai be vanegai, ranu be uaina dekenai ia halaoa gabuna. Lohia ta Kaperanauma dekenai ia noho, iena natuna mero ese gorere ia davaria.

47 Inai lohia tauna ia kamoni Iesu be Iudea dekena amo ia mai vadaeni, Galilea dekenai ia ginidae, vadaeni Iesu dekenai ia lao, ia noinoi, do ia lao, iena natuna do ia hamauria, badina mero be kahirakahira ia mase.

48 Iesu ia gwau, “Umui be toa bona hoa kara bema umui itaia lasi, umui be do umui abidadama diba lasi.”

49 Inai lohia tauna ia gwau, “Lohiabada e, mani ita lao, egu natuna be kahirakahira ia mase.”

50 Vadaeni Iesu ese ia hamaoroa, ia gwau, “Oi lao, oiemu natuna ia mauri vadaeni.”

Unai tau ese Iesu ena hereva ia hamomokania, vadaeni ia lao. 51 Dala dekenai ia lao noho neganai, iena hesiai taudia idia mai vadaeni, ia danu idia hedavari. Vadaeni idia gwau, “Mero be ia mauri vadaeni.”

52 Vadaeni ia ese idia ia nanadaia, ia gwau, “Edena dina gauna dekenai iena tauanina ia namo?” Hesiai taudia idia gwau, “Varani dina tubua

neganai, gorere ena siahu ia doko.” ⁵³ Vadaeni mero ena tamana be ia lalao, Iesu dekenai ia hereva hora gauna be unai, Iesu ese ia hamaoroo ia dekenai, ia gwau, “Oiemu natuna be ia mauri vadaeni.” Vadaeni ia bona iena ruma taudia ibounai ese Iesu idia abidadama henia.

⁵⁴ Toa badana iharuana be inai, Iesu ese ia karaia, Iudea ia rakatania, Galilea dekenai ia lao neganai.

5

Betesata gohu dekenai Iesu ese tau ta ia hanamoa

¹ Unai murinai Iuda taudia ese edia aria ta idia karaia. Vadaeni Iesu be Ierusalem dekenai ia daekau. ² Ierusalem dekenai be iduara badana ladana Mamoe Iduarana. Inai gabu kahirakahira be digudigu gohu maragina ta, ena ruma be mai ena dehe 5. Heberu gado dekenai unai gabu ena ladana be Betesata. ³ Dina ibounai, unuseni idia gorere taudia momo idia hekure noho, matakepulu taudia, aena dika taudia, imana dika taudia, aena mase taudia. Idia be ranu ia marere idia naria noho. ⁴ Badina be nega ta ta Lohiabada ena aneru ia diho, gohu ia hamarerea noho. Vadaeni ranu ia marere neganai ia diho guna tauna ena gorere be ia namo. Gorere idauidau unai bamona dekenai idia namo. ⁵ Unuseni tau ta ia hekure noho, ena gorere lagani be 38. ⁶ Vadaeni ia hekure noho neganai, Iesu ese ia itaia, bona ia diba nega daudau unai bamona ia hekure noho. Vadaeni ia nanadaia, ia gwau, “Oi be mauri oi ura, a?”

⁷ Gorere tauna ia haere, ia gwau, “Lohiabada e, ranu ia marere neganai, ranu dekenai lau ia atoa diho tauna be lasi, gohu dekenai lau diho gwauraia neganai tau ta ia guna vadaeni.”

⁸ Iesu ese ia hereva henia, ia gwau, “Oi toreisi, oiemu geda oi lokua, oi raka.” ⁹ Vadaeni nega tamona iena tauanina ia namo vadaeni, ia toreisi, iena geda ia lokua, ia raka hamatamaia.

Unai dina be Sabati. ¹⁰ Unai dainai, Iuda taudia ese mauri ia davaria tauna dekenai idia gwau henia, idia gwau, “Inai be Sabati. Oiemu geda oi abia loaloo be mai taravatu.”

¹¹ Ia haere, ia gwau, “Lau ia hanamoa tauna ese ia hereva henia lau dekenai, ia gwau, ‘Oiemu geda oi lokua, oi raka.’”

¹² Vadaeni idia ese idia nanadaia, idia gwau, “Daika ese ia hanamoa oi, ia gwau, ‘Oiemu geda oi lokua, oi raka.’”

¹³ To mauri ia davaria tauna be ia diba lasi daika ese ia hanamoa, badina Iesu be ia raka siri vadaeni, bona taunimanima momo herea be unai gabu dekenai idia haboua noho.

¹⁴ Gabeai Iesu ese unai tau ia davaria Dubu Helaga lalona dekenai, vadaeni ia sisiba henia, ia gwau, “Oi be oi namo vadaeni, kara dika do oi karaia lou lasi, dika bada herea ta ese oi do ia hadikaia garina.”

¹⁵ Vadaeni inai tau be ia lao, Iuda taudia dekenai ia hamaorodia, ia gwau, “Lau ia hamauria tauna be Iesu.” ¹⁶ Unai dainai Iuda taudia ese Iesu idia dagedage henia, badina ia be Sabati Dina dekenai unai bamona ia karaia. ¹⁷ Iesu ese ia haere idia dekenai, ia gwau, “Egu Tamana be ia gaukara noho ia mai bona hari, lau danu lau gaukara noho.”

¹⁸ Unai hereva dainai Iuda taudia idia ura be Iesu idia alaia mase, badina ia be Sabati ia hadikaia. Unai sibona lasi, ia danu ia gwau Dirava be iena Tamana momokani, ia sibona Dirava danu ia hegeregere ia gwauraia.

Dirava ena Natuna ese iena siahu ia hedinarai

¹⁹ Unai dainai, Iesu ese ia haere idia dekenai, ia gwau, “Momokani, momokani umui lau hamaoroa, Natuna be sibona kara ta ia karaia diba lasi, to ia ese iena Tamana ena kara ia itaia noho, vadaeni unai kara sibona ia karaia. Tamana ese ia karaia noho karadia be Natuna ese danu ia karaia noho. ²⁰ Badina be Tamana ese iena Natuna ia lalokau henia, bona iena kara ibounai ia hedinarai henia ia dekenai, bona inai hari kara do idia hereaia karadia danu ma do ia hedinarai henia. Inai kara dekenai do umui hoa bada. ²¹ Tamana ese mase taudia ia hatorea isi, bona ia hamauridia hegeregerena, Natuna danu ese ia lalokau henia taudia be ia hamauridia lou diba. ²² Iena Tamana ese tau ta ia kota henia lasi, to kota henia ena siahu ibounai iena Natuna dekenai ia henia vadaeni. ²³ Unai dainai taunimanima ibounai ese Natuna do idia matauraia, Tamana idia matauraia hegeregerena. Natuna ia matauraia lasi tauna ese Tamana danu ia matauraia lasi, badina be Dirava sibona ese Natuna ia siaia vadaeni.

²⁴ “Momokani, momokani umui lau hamaoroa, egu hereva ia kamoni, bona lau ia siaia Dirava dekenai ia abidadama henia, tauna ese mauri hanaihanai ia abia vadaeni. Ia be kota henia dekenai do ia vareai lasi, badina be mase ia rakatania vadaeni, mauri dekenai ia ginidae vadaeni. ²⁵ Momokani, momokani umui lau hamaoroa, nega ta do ia mai, bona unai nega ia ginidae vadaeni, mase taudia ese Dirava ena Natuna ena gadona do idia kamoni, vadaeni kamoni taudia be do idia mauri. ²⁶ Badina Tamana lalonai mauri ia noho hegeregerena, ia ese iena Natuna danu unai bamona siahu ia henia, iena lalonai danu mauri be ia noho. ²⁷ Bona siahu danu ia henia vadaeni, kota henia gaukara do ia karaia, badina ia be Taunimanima ena Natuna. ²⁸ Inai kara dekenai do umui hoa lasi. Badina be nega ta do ia mai, mase guria gabu dekenai idia noho taudia ibounai ese iena gadona do idia kamoni. ²⁹ Vadaeni guria gabu dekena amo do idia toreisi, kara namo taudia ese do idia toreisi mauri hanaihanai totona, to kara dika taudia do idia toreisi kota henia totona.

Iesu ena ladana gwauraia hedinarai

³⁰ “Lau be sibona gau ta do lau karaia kava lasi. Dirava ese lau ia hamaoroa hegeregerena kota henia gaukara lau karaia, bona egu kota henia gaukara be maoromaoro, badina lau sibona egu ura lau karaia lasi, to Dirava ena ura sibona lau karaia. Ia ese lau ia siaia.

³¹ “Bema lau sibona egu siahu lau gwauraia, egu hereva be do idia momokani lasi. ³² To ma ta ia noho, ia ese lau ia gwauraia hedinarai, bona lau diba inai ia gwauraia hedinarai gauna be momokani.

³³ “Umui be Ioane ena haroro ena anina do umui diba totona, emui taudia haida umui siaia vadaeni, bona umui lau hamaoroa momokani, Ioane ena hereva lauegu kara dekenai be ia maoro. ³⁴ To lau idia gwauraia hedinarai hereva badadia momokani be taunimanima dekena amo lasi. Umui ese mauri davaria totona, inai bamona lau hereva noho. ³⁵ Ioane be lamepa bamona ia araia, bona ia diari noho, bona umui ese nega sisina iena diari dekenai umui moale noho.

³⁶ “To gau ta ese Ioane ena hereva lau totona ia hereaia momokani. Inai be lauegu gaukara, Dirava ese lau ia hamaoroa do lau karaia gaukaradia. Inai gaukara ese idia hedinarai momokani, lauegu Tamana ese lau ia siaia vadaeni. ³⁷ Egu Tamana ese lau ia siaia vadaeni, bona ia ese lau ia gwauraia hedinarai vadaeni. Iena gadona nega ta umui kamoni lasi, bona iena tauanina nega ta umui itaia lasi, lasi

momokani. ³⁸Iena hereva danu emui lalona dekenai ia noho lasi, badina be ia siaia tauna be umui abia dae lasi. ³⁹Umui ese Buka Helaga dekenai umui tahua, badina be umui lalona inai hereva lalonai mauri hanaihanai do umui davaria. To gauna be, inai hereva ese lau idia gwaurai noho! ⁴⁰To umui be umui ura lasi lau dekenai do umui mai, mauri abia totona.

⁴¹“Lau be taunimanima edia hanamoa hereva lau tahua lasi. ⁴²To umui be lau diba, umui emui lalona dekenai Dirava ena lalokau be ia noho lasi. ⁴³Lau be egu Tamana ena ladana dekenai lau mai inai, to umui ese lau umui abia dae lasi. To bema tau ta sibona ena ladana dekenai ia mai, be unai tau do umui abia dae. ⁴⁴Umui be edena bamona lau do umui abia dae? Umui ta ta dekena amo, hanamoa hereva do umui abia dae, to Dirava momokani dekena amo ia mai hanamoa hereva, be umui tahua lasi. ⁴⁵Umui lalona lasi inai be lau ese egu Tamana dekenai umui lau samania. Lasi, inai be Mose ese umui do ia samania, umui abidadama henia tauna unai. ⁴⁶Badina be bema Mose umui abidadama henia momokani, be lau danu do umui abidadama henia. Badina be ia ese lauegu sivarai ia torea. ⁴⁷To Mose ese ia torea herevana bema umui abia dae lasi, be lauegu hereva edena bamona umui abia dae diba?”

6

Galilea dekenai: Mauri ena aniani

¹Unai hereva murinai Iesu ia toreisi, Galilea ena gohu unai kahana dekenai ia giroa lou. Unai gohu ena ladana ta be Tiberia. ²Vadaeni taunimanima momo herea iena murina dekenai idia lao, badina be gorere hanamoa karadia ia karaia toana idia itaia dainai. ³Iesu be ororo dekenai ia daekau, unuseni iena diba tahua taudia danu ia helai diho. ⁴Iuda taudia edia Pasova aria dinana be ia kahirakahira. ⁵Iesu ese iena matana ia abia isi, taunimanima momo herea ia dekenai idia mai noho ia itaia, vadaeni Filipino dekenai ia hereva henia, ia gwau, “Ita be edeseni aniani gaudia do ita hoia, inai taunimanima do ita ubua totona?” ⁶Unai bamona ia hereva, Filipino ena lalona ia ura diba gwaurai, badina be ia diba dahaka do ia karaia.

⁷Filipo ese ia haere henia ia dekenai, ia gwau, “200 kina dekenai aniani gaudia do ita hoia, to do ia hegeregere lasi, sisina sisina sibona do idia ania.”

⁸Iena diba tahua tauna ta, ena ladana be Andrea, Simona Petero ena tadina, ese Iesu ia hereva henia, ia gwau, ⁹“Mero maragi ta be iniseni, ia be mai ena paraoa maragidia 5 bona gwarume maragi rua, to unai be edena bamona do ita karaia, taunimanima be momo herea?”

¹⁰Vadaeni Iesu ia gwau, “Taunimanima dekenai do umui hereva henia, do idia helai diho.” Unai gabu dekenai be rei momo ia noho. Vadaeni idia helai diho taudia be 5000 bamona. ¹¹Iesu ese inai aniani gaudia ia abia, ia hanamoa, vadaeni idia helai diho taudia ta ta ibounai dekenai ia henia. Gwarume danu unai bamona ia henia, taunimanima edia ura hegeregere. ¹²Idia boga kunu, vadaeni Iesu ese iena diba tahua taudia dekenai ia hereva henia, ia gwau, “Aniani orena do umui haboua, kahana maragimaragi ta do ia boio lasi.” ¹³Unai dainai idia ese aniani orena idia haboua, vadaeni bosea 12 idia hahonua, unai paraoa maragi 5 sibona, taunimanima ese idia ania haorea lasi gaudia, idia rakatania dekena amo.

¹⁴Taunimanima be unai toa Iesu ese ia karaia gauna idia itaia, vadaeni idia gwau, “Momokani, tanobada dekenai do ia mai peroveta tauna be inai.” ¹⁵To Iesu ia diba idia be do idia mai, do idia dogoatao, edia king

dekenai do idia halaoa gwaurai. Unai dainai ia be sibona ororo dekenai ma ia daekau lou.

Iesu ranu ena kopina dekenai ia raka

¹⁶ Adorahi neganai, Iesu ena diba tahua taudia be idia diho kone dekenai. ¹⁷ Vanagi ta dekenai idia guia, gohu dekenai idia heau hamatamaia, Kaperanauma hanua dekenai do idia lao gwaurai. Hanuaboi dibura ia mai vadaeni, to Iesu be do ia ginidae lasi idia dekenai. ¹⁸ Vadaeni lai goada ia toreisi dainai, gohu be ia hurehure bada. ¹⁹ Kilomita 5 o 6 bamona idia bara karaia, vadaeni Iesu idia itaia, gohu ena kopina dekenai ia raka lao vanagi dekenai, vadaeni idia gari dikadika. ²⁰ To Iesu ia gwau, “Inai be lau! Umui gari lasi!” ²¹ Vadaeni mai edia moale danu, vanagi dekenai Iesu idia abia daekau, vadaeni nega tamona idia lao gwaurai tano dekenai idia ginidae.

Taunimanima momo ese Iesu idia tahua

²² Kerukeru dabai, taunimanima momo be gohu unai kahana dekenai idia gini noho, idia diba vanagi ta be lasi, Iesu ena diba tahua taudia ese idia abia lao gauna sibona. Idia diba danu Iesu be iena diba tahua taudia danu ia guia lasi, to diba tahua taudia sibona. ²³ To vanagi haida be Tiberia dekenai amo idia heau hanaia, inai Lohiabada ese Dirava ia hanamoa bona aniani ia henidia gabuna badibadina dekenai idia ginidae. ²⁴ Unai dainai, taunimanima idia diba vadaeni, Iesu bona iena diba tahua taudia be idia noho lasi, vadaeni idia ese inai vanagi haida dekenai ma idia guia, Kaperanauma dekenai idia lao, Iesu idia tahua.

Iesu be mauri ena aniani

²⁵ Gohu ena kahana dekenai Iesu idia davaria, vadaeni idia nanadaia, idia gwau, “Rabi e, edena negai oi mai?”

²⁶ Iesu ia haere idia dekenai, ia gwau, “Momokani, momokani umui lau hamaoroa, umui ese lau umui tahua noho, toa umui itaia dainai lasi, to aniani gaudia umui ania, vadaeni umui boga kunu dainai. ²⁷ Umui gaukara lasi aniani ia ore gauna abia totona, to do ia noho, ia lao bona mauri hanaihanai, ena aniani abia totona do umui gaukara. Unai be Taunimanima ena Natuna ese do ia henia umui dekenai, badina be iena Tamana Dirava ese, ia hamomokania ena toa be ia dekenai ia henia vadaeni.”

²⁸ Vadaeni idia nanadaia ia dekenai, idia gwau, “Ai be edena bamona do ai karaia, Dirava ena gaukara karaia totona?”

²⁹ Iesu ia haere, ia gwau, “Dirava ena gaukara be inai: Ia siaia tauna dekenai do umui abidadama henia.”

³⁰ Ma Iesu idia nanadaia, idia gwau, “Toana be dahaka do oi karaia, do ai itaia, vadaeni do ai abidadama henia oi dekenai? Oi be dahaka do oi karaia? ³¹ Aiemai sene taudia ese mana idia ania noho taunimanima idia noho lasi tano dekenai, Buka Helaga dekenai ia torea hegeregere, ia gwau, ‘Edia aniani be ia ese guba dekenai amo ia henia diho.’”

³² Iesu ia haere idia dekenai, ia gwau, “Momokani, momokani umui lau hamaoroa, Mose ese aniani be guba dekenai amo ia henia diho lasi umui dekenai. To egu Tamana ese aniani guba dekenai amo ia siaia diho noho umui dekenai, aniani momokani be inai. ³³ Badina Dirava ena aniani, be guba dekenai amo ia diho mai Tauna, bona ia ese mauri be tanobada dekenai ia henia noho.”

³⁴ Vadaeni idia noinoi ia dekenai, idia gwau, “Lohiabada e, inai aniani be dina ibounai do oi henia ai dekenai.”

³⁵ Iesu ia gwau, “Mauri ena aniani be lau inai. Lau dekenai ia mai tauna be do ia hitolo lasi, bona lau dekenai do ia abidadama henia tauna be do ia ranu mase lasi, lasi bona lasi momokani. ³⁶ To umui lau hamaoroa vadaeni, ani, umui itaia lau, to umui abia dae lasi lau. ³⁷ Lauegu Tamana ese lau dekenai ia henia taudia ibounai be lau dekenai do idia mai, bona lau dekenai do ia mai tauna be do lau lulua lasi, lasi bona lasi momokani. ³⁸ Badina be guba dekena amo lau diho mai vadaeni, lauegu ura karaia totona lasi, to lau ia siaia Diravana ena ura karaia totona. ³⁹ Bona lau ia siaia Diravana ena ura be inai: Lau dekenai ia henia taudia ibounai be ta do ia boio lasi lau dekena amo, to inai taudia do lau hatorea isi, dokona dina dekenai. ⁴⁰ Badina be egu Tamana ena ura be inai: Iena Natuna do idia itaia noho, bona do idia abidadama henia taudia ibounai be mauri hanaihanai do idia abia, bona lau ese dokona dina dekenai idia do lau hatorea isi.”

⁴¹ Vadaeni Iuda taudia idia maumau Iesu dekenai, badina be ia gwau, “Lau be guba dekena amo ia diho anianina.” ⁴² Idia gwau, “Be! Inai be Iesu lasi, a? Iosepa ena natuna lasi, a? Iena tamana bona iena sinana be ita diba vadaeni. Edena bamona ia be ia gwau, ‘Lau be guba dekena amo lau diho?’”

⁴³ Iesu ia haere idia dekenai, ia gwau, “Unai bamona umui maumau lasi. ⁴⁴ Lauegu Tamana, lau ia siaia Diravana, ese do ia veria mai tauna sibona lau dekenai do ia mai diba, vadaeni dokona dina dekenai unai tauna do lau hatorea isi. ⁴⁵ Peroveta taudia ese inai bamona idia torea, idia gwau, ‘Idia ibounai Dirava ese do ia hadibaia.’ Egu Tamana dekenai idia kamoni henia, bona iena hadibaia hereva idia abia dae taudia ibounai be lau dekenai idia mai.

⁴⁶ “Tau ta ese Tamana ia itaia lasi, Dirava dekena amo ia mai tauna sibona ese ia itaia vadaeni. ⁴⁷ Momokani, momokani umui lau hamaoroa, abidadama tauna ese mauri hanaihanai ia abia. ⁴⁸ Mauri ena aniani be lau inai. ⁴⁹ Emui tubudia ese mana idia ania taunimanima idia noho lasi tano dekenai, bona idia mase vadaeni. ⁵⁰ To guba dekena amo ia diho noho anianina be inai, bona bema tau ta ese inai aniani do ia ania, do ia mase lasi. ⁵¹ Lau be mauri ena aniani, guba dekena amo lau diho, bema tau ta ese inai aniani ia ania, ia be do ia mauri hanaihanai. Lau ese do lau henia aniani be egu tauanina, inai dekena amo tanobada ese mauri do ia abia.”

⁵² Vadaeni Iuda taudia be idia hepapahuahu, idia gwau, “Inai tau ese iena tauanina be edena bamona do ia henia ita dekenai, vadaeni do ita ania?”

⁵³ Iesu ma ia haere, ia gwau, “Momokani, momokani umui lau hamaoroa, Taunimanima ena Natuna iena tauanina bema umui ania lasi, bona iena rarana danu bema umui inua lasi, mauri be umui emui lalona dekenai do ia noho lasi. ⁵⁴ To lauegu tauanina do ia ania, bona lauegu rarana do ia inua tauna ese mauri hanaihanai do ia abia, bona dokona dina dekenai lau ese do lau hatorea isi. ⁵⁵ Badina be lauegu tauanina be aniani momokani, bona lauegu rarana be inuinu gauna momokani. ⁵⁶ Egu tauanina do ia ania, bona egu rarana do ia inua tauna be lauegu lalona dekenai do ia noho, lau danu iena lalona dekenai do lau noho. ⁵⁷ Ia mauri Tamana ese lau ia siaia vadaeni, bona Tamana dainai lau mauri hegeregerena, lau do ia ania tauna danu do ia mauri lau dainai. ⁵⁸ Guba dekena amo ia diho aniani be inai. Emui sene taudia ese idia ania gauna bamona lasi. Idia ania, to idia mase vadaeni. To inai aniani do ia ania tauna be do ia mauri hanaihanai.”

⁵⁹ Inai hereva be dubu dekenai Iesu ia gwaurai, Kaperanauma dekenai ia hadibaia neganai.

Taunimanimomo ese Iesu idia rakatania

⁶⁰ Iesu ena diba tahua taudia momo ese inai hereva idia kamoni, vadaeni idia gwau, “Unai hereva be ia metau, daika ese do ia abia dae diba?”

⁶¹ Tau ta ia hamaoroa lasi, to Iesu ia diba iena diba tahua taudia be unai hereva dekenai idia maumau, vadaeni ia hereva idia dekenai, ia gwau, “Inai hereva dekenai umui emui lalona ia metau, a? ⁶² To Taunimanimomo ena Natuna bema umui itaia, ia daekau, guna ia noho gabuna dekenai bema ia giroa lou, be edena bamona? ⁶³ Lauma ese mauri ia havaraia, taunina ese namo ta ia havaraia lasi. Lau ese umui lau hamaoroa herevadia be lauma bona mauri. ⁶⁴ To umui haida be umui abidadama henia lasi.” Inai bamona ia hereva badina hamatamaia nega dekenamo Iesu be ia diba vadaeni idia abidadama henia lasi taudia be daika, bona ia do ia samania ia mase tauna danu Iesu ia diba vadaeni. ⁶⁵ Ma ia gwau, “Unai dainai umui lau hamaoroa vadaeni, egu Tamana ese bema ia durua lasi tauna, be lau dekenai do ia mai diba lasi.”

⁶⁶ Unai neganai iena diba tahua taudia momo ese Iesu idia rakatania, bona ia danu idia raka hebou lou lasi.

Diba tahua taudia 12 ese Iesu idia durua

⁶⁷ Vadaeni Iesu ese iena diba tahua taudia 12 dekenai ia nanadaia, ia gwau, “Umui danu do umui raka siri, a?”

⁶⁸ Simona Petero ia haere ia dekenai, ia gwau, “Lohiabada e, ai be daika dekenai do ai lao? Mauri hanaihanai herevadia be oi dekenai idia noho. ⁶⁹ Ai be ai abidadama henia, bona ai diba vadaeni, oi be Dirava ena Helaga Tauna.”

⁷⁰ Iesu ia gwau, “Lau be umui 12 lau abia hidi, ani? Gau tamona, umui ta be ia Satani vadaeni.” ⁷¹ Ia ese Iuda, Simona Iskariote ena natuna ia gwaurai, badina ia ese Iesu do ia samania, ia mase. Ia danu idia 12 tauna ta.

7

Iesu bona iena tadina

¹ Unai murinai Iesu be Galilea dekenai ia lao loaloa. Ia ura lasi Iudea dekenai ia lao, badina Iuda taudia ese ia idia alaia mase dalana idia tahua noho. ² Iuda taudia edia Au Raurau Ruma Maragidia aria dinana be ia kahirakahira. ³ Vadaeni Iesu be iena tadina ese idia hereva henia, idia gwau, “Inai gabu do oi rakatania, Iudea dekenai do oi lao, vadaeni oiemu diba tahua taudia ese oi karaia hoa gaudia do idia itaia, ⁴ badina bema tau ta be sibona ia ura hedinarai neganai, ia be gau ta lasi hunia dalana dekenai do ia karaia. Unai kara oi karaia dainai, namona be oi sibona tanobada ibounai dekenai do oi hedinarai henia.” ⁵ Inai bamona idia hereva badina be Iesu ena tadina danu ese idia abidadama henia lasi ia dekenai.

⁶ Vadaeni Iesu ia haere idia dekenai, ia gwau, “Lauegu nega be dohore, to umui dekenai nega ibounai be ia hegeregere. ⁷ Tanobada be do ia badu henia diba lasi umui dekenai, to lau dekenai be ia badu henia, badina be tanobada ena kara lau ese lau hedinarai vadaeni ia be dika. ⁸ Umui be do umui daekau, unai aria dekenai do umui vareai, to lau be do lau daekau lasi, badina lauegu nega be do ia ginidae lasi.” ⁹ Ia ese unai bamona ia hereva idia dekenai, vadaeni Galilea dekenai ia do noho.

Ierusalemadekenai: Au Raurau Ruma Maragidia ena aria

¹⁰ Iesu ena tadina sibona idia daekau, aria totona idia lao. Gabeai Iesu danu ia daekau hunia dekenai. ¹¹ Vadaeni unai aria lalonai Iuda taudia ese idia tahua, idia gwau, “Iesu be edeseni?”

¹² Taunimanima be Iesu totona idia hepapahuahu bada. Haida idia gwau, “Ia be tau namona.” Ma haida idia gwau. “Lasi, ia ese taunimanima ia hakaudia kerere.” ¹³ To tau ta ese ia hereva hedinaraia lasi Iesu totona, Iuda taudia dekenai idia gari dainai.

¹⁴ Aria ena dina haida be idia ore, to haida be do idia noho, Iesu be Dubu Helaga dekenai ia daekau, ia hadibaia hamatamaia. ¹⁵ Vadaeni Iuda taudia idia hoa, idia gwau, “Inai tau be ia sikuli lasi, to edena bamona ia diba momo?”

¹⁶ Iesu ia haere idia dekenai, ia gwau, “Lauegu hadibaia herevadia be lauegu lasi, to lau ia siaia Diravana ena. ¹⁷ Tau ta bema ia ura Dirava ena ura ia karaia neganai, ia ese lauegu hadibaia herevadia do ia diba, Dirava dekena amo idia mai, o lau sibona dekena amo. ¹⁸ Sibona ena ura herevadia ia gwauraia tauna be sibona dekenai hanamoa dala ia tahua, to ia siaia Diravana dekenai hanamoa dala ia tahua tauna be momokani tauna, bona iena lalona dekenai koikoi ia noho lasi. ¹⁹ Mose ese taravatu ia henia umui dekenai, ani? To edena bamona umui be taravatu umui badinaia lasi? Dahaka dainai lau umui alaia dalana umui tahua?”

²⁰ Taunimanima idia haere ia dekenai, idia gwau, “Oi be oi kavakava, a? Daika ia ura oi do ia alaia?”

²¹ Iesu ia gwau, “Lau be kara tamona sibona lau karaia, vadaeni umui ibounai umui hoa, bona umui laloa momo. ²² Mose ese kopina utua ena taravatu ia henia vadaeni umui dekenai. Gau tamona Mose ese unai kara ia hamatamaia lasi, to iseda guna sene taudia ese. Unai dainai, umui be Sabati Dina dekenai memero edia kopina umui utua. ²³ Sabati Dina dekenai mero ta ena usina kopina do umui utua, Mose ena taravatu do umui makohia garina, to edena bamona lau be umui badu henia, Sabati Dina dekenai tau ta lau hanamoa momokani dainai? ²⁴ Gau edia toana sibona dekena amo do umui kota henia lasi, to do umui kota henia mai maoromaoro danu.”

Idia henanadai, “Inai tau be Keriso, a?”

²⁵ Vadaeni Ierusalem taudia haida idia gwau, “Do idia alaia gwauraia tauna be inai, ani? ²⁶ To ia be iniseni ia haroro, bona hereva ta idia gwau henia lasi ia dekenai. Sedira hanua lohia taudia edia lalona dekenai idia diba vadaeni ia be Keriso? ²⁷ Gau tamona, inai tau ena mai gabuna be ita diba, to Keriso do ia mai neganai, be tau ta do ia diba lasi ia be edena gabu dekena amo ia mai.”

²⁸ Vadaeni Iesu be Dubu Helaga lalonai ma ia hadibaia karaia, ia boiboi, ia gwau, “Umui be umui diba lau, bona lau mai gabuna danu umui diba, a? Lau be lau sibona egu ura dekenai lau mai lasi. Lau ia siaia Diravana be momokani, to umui be umui diba lasi ia. ²⁹ Lau be lau diba ia, badina be ia dekena amo lau mai, bona ia ese lau ia siaia.”

³⁰ Vadaeni ia idia dogoatao gwauraia, to tau ta ena imana ia kamokau lasi ia dekenai, badina be iena nega be do ia ginidae lasi. ³¹ To taunimanima momo herea ese Iesu dekenai idia abidama henia. Idia gwau, “Keriso do ia mai neganai, ia ese toa do ia karaia neganai, inai tau do ia hereaia, a?”

Farisea taudia bona dubu biagudia ese Iesu idia guia gwauraia

³² Farisea taudia idia kamonai, taunimanima be unai bamona idia hereva Iesu totona, vadaeni dubu biagudia bona Farisea taudia ese edia

hesiai taudia idia siaia, Iesu idia dogoatao totona. ³³ Vadaeni Iesu ia gwau, “Nega sisina lau be umui dekenai do lau noho, vadaeni lau ia siaia Dirava dekenai do lau giroa lou. ³⁴ Vadaeni lau do umui tahua, to lau be do umui davarua lasi, badina be lau noho gabuna dekenai danu do umui lao diba lasi.”

³⁵ Vadaeni Iuda taudia sibona dekenai idia nanadaia, idia gwau, “Inai tau be edeseni do ia lao, vadaeni do ita davarua lasi ia gwau? Sedira Helene taudia edia hanua momo dekenai do ia lao, Iuda taudia haida idia noho gabudia, unuseni Helene taudia dekenai do ia hadibaia karaia, a? ³⁶ Inai be dahaka hereva inai tau ese ia gwauraia, ia gwau, ‘Lau do umui tahua, to lau be do umui davarua lasi, bona do lau noho gabuna dekenai danu do umui lao diba lasi?’ ”

Mauri ranuna

³⁷ Aria ena dina orena be dina badana. Unai dina dekenai Iesu ia toreisi, ia gini, ia boiboi, ia gwau, “Ranu mase tauna be lau dekenai ia mai, ranu do ia inua. ³⁸ Buka Helaga dekenai ia torea bamona, ‘Lau dekenai do ia abidadama henia tauna be, iena kudouna dekena amo mauri ranuna be sinavai bamona do ia heau lao.’” ³⁹ Ia ese Lauma Helaga dekenai unai bamona ia herevalaia, ia idia abidadama taudia ese do idia abia ia gwau. Badina unai neganai Lauma Helaga be do ia henia lasi, Iesu ese Dirava ena hairaina do ia abia lasi dainai.

Taunimanima idia parara

⁴⁰ Taunimanima haida ese inai hereva idia kamona, vadaeni idia gwau, “Momokani, ita naria noho Peroveta Tauna be inai.”

⁴¹ Ma haida idia gwau, “Inai be Keriso.”

Ma haida idia gwau, “Keriso be Galilea dekena amo do ia mai, a? ⁴² Buka Helaga dekenai ia torea, ani, Keriso be Davida ena bese dekena amo do ia vara, Betelehem, Davida ena hanua lalonai.”

⁴³ Unai dainai, taunimanima be idia hapararaia Iesu totona. ⁴⁴ Haida ese ia idia dogoatao gwauraia, to tau ta ese iena imana ia kamokau lasi Iesu dekenai.

Iuda edia tau badadia ese Iesu idia abia dae lasi

⁴⁵ Dubu biagudia bona Farisea taudia edia hesiai taudia be idia giroa lao, vadaeni dubu biagudia bona Farisea taudia ese idia nanadaia idia dekenai, idia gwau, “Badina be dahaka umui hakaua mai lasi?”

⁴⁶ Hesiai taudia idia haere, idia gwau, “Hamatamaia nega dekena amo ia mai bona hari, tau ta ia hereva lasi inai tau ia hereva bamona.”

⁴⁷ Farisea taudia idia gwau, “Be, umui danu ia ese ia koia vadaeni? ⁴⁸ Sedira hanua edia lohia ta, o Farisea taudia ta ese ia dekenai idia abidadama vadaeni, a? Lasi momokani. ⁴⁹ To inai ariara taunimanima be Mose ena taravatu idia diba lasi. Idia be Dirava dekena amo dika davana do idia davarua.”

⁵⁰ Vadaeni Nikodemo ese ia hereva henia idia dekenai, ia be hanuaboi Iesu dekenai ia lao tauna, ia danu idia edia orea tauna ta. ⁵¹ Ia gwau, “Iseda taravatu ese tau ta do ia kota henia neganai, be iena hereva do idia kamona guna, ani, bona iena kara do idia diba guna, ani?”

⁵² Vadaeni idia ese idia gwau henia, idia gwau, “Oi danu Galilea tauna, a? Do oi tahua, bona do oi diba, peroveta tauna ta Galilea dekenai do ia vara lasi.” ⁵³ Vadaeni taunimanima ibounai idia toreisi, idia ta ta edia ruma, edia ruma dekenai idia lao.

8

Heudahanai hahinena

¹ Iesu be Olive Ororo dekenai ia lao. ² To daba maragi neganai, ia be Dubu Helaga dekenai ia giroa lou, vadaeni taunimanima ibounai ia dekenai idia haboua. Ia be ia helai diho, ia hadibaia karaia. ³ Vadaeni taravatu hadibaia taudia bona Farisea taudia ese hahine ta ia dekenai idia hakaua lao, unai hahine be heudahanai ia karaia noho neganai idia davaria. Idia ese inai hahine idia edia huana dekenai idia haginia. ⁴ Vadaeni Iesu dekenai idia nanadaia, idia gwau, “Hadibaia tauna e, inai hahine be ia heudahanai noho neganai ai davaria vadaeni. ⁵ Mose ese taravatu dekena amo ia hamaoroa ita dekenai, unai bamona do idia karaia hahinedia be nadi dekenai do ita hodoa mase. To oi be dahaka oi gwau?” ⁶ Unai bamona idia hereva be Iesu dekenai idia koikoi totona, samania ena badina ta idia tahua. To Iesu ese iena kwarana ia atoa diho, iena imana kwakikwaki dekena amo revareva ia torea tano dekenai.

⁷ Idia ese nega momo idia nanadaia, ia lao bona ia toresi, idia ia hamaoroa, ia gwau, “Umui daika be mai ena kara dika lasi, unai tau ese nadi ta ia abia, inai hahine do ia hodoa guna.” ⁸ Vadaeni ena kwarana ma ia atoa diho lou, tano dekenai revareva ma ia torea. ⁹ Idia ese Iesu ena hereva idia kamonai, vadaeni ta ta idia raka lao murimuri dekenai, vara guna tauna ia hamatamaia, ia lao bona gabeai ia vara tauna. Vadaeni Iesu sibona ia noho, bona unai hahine sibona ia gini noho unuseni. ¹⁰ Iesu ma ia toresi, hahine dekenai ia nanadaia, ia gwau, “Hahine e, oi dekenai idia samania taudia be edeseni? Ta ese oi ia hadikaia lasi, a?”

¹¹ Hahine ia gwau, “Lohiabada e, tau ta lasi.”

Vadaeni Iesu ia gwau, “Lau danu lau kota henia lasi oi dekenai. Vadaeni oi lao, kara dika do oi karaia lou lasi.”

Tanobada ena diari

¹² Vadaeni Iesu ia haroro lou idia dekenai, ia gwau, “Lau be tanobada ena diari. Lauegu murina dekenai do ia raka tauna be dibura lalonai do ia loaloa lasi, to mauri ena diari do ia abia.”

¹³ Farisea taudia ese idia gwau henia, idia gwau, “Oi be oi sibona totona oi hereva, oiemu hereva be momokani lasi.”

¹⁴ Iesu ia haere idia dekenai, ia gwau, “Lau be lau sibona totona lau hereva, to egu hereva be ia momokani, badina be lau diba edena gabu dekena amo lau mai, bona edeseni do lau lao danu lau diba. Lau mai gabuna bona lau lao gwaurai gabuna be umui diba lasi. ¹⁵ Umui be taunimanima edia toana hegeregerena umui kota henia, lau be tau ta lau kota henia lasi. ¹⁶ To bema lau kota henia neganai, lauegu kota henia be do ia momokani, badina lau be sibona lasi, to lauegu Tamana, lau ia siaia Diravana, be lau danu ia noho. ¹⁷ Emui taravatu dekenai inai bamona ia torea. ‘Taunimanima rua bema hereva tamona do idia gwaurai hebou, unai hereva be momokani.’ ¹⁸ Inai dainai, lau be lau sibona lau hereva, bona lauegu Tamana, lau ia siaia Diravana, ia ese lau totona ia hereva.”

¹⁹ Vadaeni idia nanadaia ia dekenai, idia gwau, “Oiemu Tamana be edeseni?”

Iesu ia haere idia dekenai, ia gwau, “Umui be diba lasi lau, egu Tamana danu umui diba lasi, bema umui diba lau, be lauegu Tamana danu do umui diba.”

²⁰ Unai hereva be Iesu ese moni haboua gabuna dekenai ia gwaurai, Dubu Helaga lalonai ia hadibaia neganai. Bona tau ta ese ia dogoatao lasi, badina iena nega be ia do ginidae lasi.

“Lau lao gabuna umui lao diba lasi”

²¹ Idia dekenai Iesu ma ia hereva lou, ia gwau, “Lau be idau gabu dekenai do lau lao. Umui ese lau do umui tahua, to emui kara dika dekenai do umui mase. Do lau lao gabuna dekenai do umui lao diba lasi.”

²² Vadaeni Iuda taudia be sibona dekenai idia nanadaia, idia gwau, “Inai tau be sibona do ia hamasea, a? Inai dainai ia gwau, ‘Do lau lao gabuna dekenai be do umui lao diba lasi,’ a?”

²³ Ma Iesu ia gwau, “Umui be henunai dekena amo, lau be atai ai dekena amo, umui be tanobada taudia, to lau be tanobada tauna lasi.

²⁴ Unai dainai umui lau hamaoroa, lau gwau, ‘Emui kara dika dekenai do umui mase.’ Badina bema umui abidadama lasi, ‘Lau inai Lau noho’ dekenai, emui kara dika dekenai do umui mase.”

²⁵ Vadaeni idia ese idia nanadaia, idia gwau, “Oi be daika?”

Iesu ia gwau, “Umui lau hamaoroa guna vadaeni lau be daika. ²⁶ Umui emui kara totona hereva momo do lau gwauraia, bona umui do lau kota henia danu. Gau tamona, lau ia siaia Tauna be momokani, bona ia dekena amo lau abia herevadia be taunimanima dekenai lau hamaoroa.”

²⁷ Idia edia lalona idia kehoa lasi unai be Tamana ia herevalaia idia dekenai. ²⁸ Vadaeni Iesu ma ia gwau, “Umui be Taunimanima ena Natuna do umui abia isi neganai, unai dekena amo do umui diba, ‘Lau inai Lau noho.’ Ma do umui diba, kara ta danu lau sibona lau karaia lasi, to Tamana ese lau dekenai ia hadibaia hegeregerena lau hereva. ²⁹ Lau ia siaia Diravana ese lau ia durua, ia ese ia rakatania lasi lau, lau sibona lau noho lasi, badina be iena ura be nega ibounai lau karaia.”

³⁰ Inai hereva ia gwauraia neganai taunimanima momo ese Iesu idia abidadama henia.

Aberahamo ena bese

³¹ Vadaeni Iesu ese ia dekenai idia abidadama Iuda taudia dekenai ia hamaoroa, ia gwau, “Bema lauegu hadibaia hereva umui badinaia neganai, umui be lauegu diba tahua taudia momokani. ³² Hereva momokani be do umui diba, bona hereva momokani ese umui do ia ruhaia.”

³³ Idia haere, idia gwau, “Ai be Aberahamo ena besena, ai be nega ta tau ta ia guia lasi ai, lasi bona lasi momokani. Dahaka dainai oi gwau, ‘Umui do ia ruhaia?’”

³⁴ Iesu ia haere henia, ia gwau, “Momokani, momokani umui lau hamaoroa, kara dika taudia be dika ese ia guia, vadaeni idia be dika ena hesiai gaukara idia karaia. ³⁵ Hesiai tauna be ruma dekenai ia noho hanaihanai lasi, to ruma biaguna ena natuna ese ruma dekenai ia noho hanaihanai. ³⁶ Unai dainai, bema Natuna ese umui do ia ruhaia neganai, umui be do ia ruhaia momokani. ³⁷ Lau diba umui be Aberahamo ena besena, to umui ura be lau umui alaia, badina lauegu hereva be umui abia dae lasi. ³⁸ Lauegu Tamana ese lau dekenai ia hedinarai gaudia lau herevalaia, to umui be emui tamana ese umui ia hamaoroa gaudia umui karaia.”

Umui emui tamana be Satani

³⁹ Idia haere ia dekenai, idia gwau, “Aiemai tamana be Aberahamo.”

Iesu ia gwau, “Bema umui be Aberahamo ena natuna, umui ese Aberahamo ena kara do umui karaia. ⁴⁰ Lau be Dirava dekena amo lau kamonai hereva sibona lau gwauraia umui dekenai. To hari umui

ura lau do umui alaia mase. Aberahamo be unai bamona ia karaia lasi.
⁴¹ Umui ese emui tamana ena kara umui karaia.”

Idia gwau, “Ai be ariara natuna lasi. Aiema tamana be tamona, Dirava unai.”

⁴² Iesu ma ia gwau, “Bema Dirava be umui emui Tamana, be lau do umui lalokau henia, badina be Dirava dekena amo lau mai, bona hari lau noho inai. Lau be sibona lau mai lasi, ia ese lau ia siaia. ⁴³ Edena bamona lauegu hereva anina umui diba lasi? Badina korikori be, lauegu hereva umui abia dae diba lasi.

⁴⁴ “Umui be emui tamana Satani dekena amo umui mai, bona umui ura emui tamana ena ura dikadia do umui karaia. Hamatamaia nega dekena amo ia be alaia tauna, bona hereva momokani be ia badinaia lasi, badina iena lalona dekenai hereva momokani be lasi. Ia be hereva koikoi ia gwaurai, iena kara momokani be unai, badina ia be koikoi tauna, bona ia be koikoi ibounai edia tamana. ⁴⁵ Lau be hereva momokani lau gwaurai, unai dainai lau dekenai umui abidadama lasi. ⁴⁶ Umui daika kara dika lau dekenai ia davarua vadaeni? Hereva momokani lau gwaurai neganai, edena bamona umui abidadama henia lasi lau dekenai? ⁴⁷ Dirava ena natuna tauna ese Dirava ena hereva ia kamoni. Umui be umui kamoni lasi, badina umui be Dirava ena natudia lasi.”

Aberahamo ia vara lasi neganai, Iesu be ia noho

⁴⁸ Vadaeni Iuda taudia idia haere henia, idia gwau, “Aiema hereva be ia maoro lasi, a, ai gwau oi be Samaria tauna, bona lauma dika oiemu lalona dekenai ia noho?”

⁴⁹ Iesu ia haere, ia gwau, “Lauma dika be egu lalonai ia noho lasi. Lau ese egu Tamana lau matauraia, to umui ese lau umui matauraia lasi. ⁵⁰ Lau ese egu hairai lau tahua lasi. Ta ia noho, lauegu hairai ia tahua, bona ia sibona be kota ena Biaguna. ⁵¹ Momokani, momokani umui lau hamaoroa, lauegu hereva do ia badinaia tauna be do ia mase diba lasi, ela bona hanaihanai.”

⁵² Iuda taudia idia gwau, “Hari ai diba momokani vadaeni lauma dika ese oiemu lalona dekenai ia noho. Aberahamo ia mase vadaeni, peroveta taudia danu idia mase vadaeni, to oi be oi gwau, ‘Lauegu hereva do ia badinaia tauna be do ia mase diba lasi ela bona hanaihanai.’ ⁵³ Ieda tamana Aberahamo be oi ese oi hereaia, a? Ia be ia mase vadaeni, peroveta taudia danu idia mase vadaeni. Oi be daika?”

⁵⁴ Iesu ia haere, ia gwau, “Lau sibona bema lau hekokoroku, be do lau hekokoroku kava, to egu Tamana ese ladana bada ia henia lau dekenai. To umui gwau ia be umui emui Dirava. ⁵⁵ Umui be umui diba lasi ia, to lau be lau diba. Bema lau gwau lau diba lasi ia, do lau koikoi, umui hegeregerena. Lau be ia lau diba, bona iena hereva danu lau badinaia. ⁵⁶ Emui tamana Aberahamo be ia ura dikadika lauegu nega ia itaia, vadaeni ia itaia, mai moale danu.”

⁵⁷ Iuda taudia idia gwau, “Oiemu lagani be 50 do ia abia lasi, oi be Aberahamo oi itaia, a?”

⁵⁸ Iesu ia haere idia dekenai, ia gwau, “Momokani, momokani umui lau hamaoroa. Aberahamo do ia vara lasi, lau be lau noho.”

⁵⁹ Vadaeni idia ese nadi idia abia isi, idia hodoa gwaurai. To Iesu be ia hunia, vadaeni Dubu Helaga dekena amo ia raka murimuri dekenai.

9

Ia vara neganai matana ia kepulu tauna

¹ Iesu ia raka lao neganai, ia ese tau ta ia itaia, iena matana ruaosi mai keputu danu ia vara. ² Vadaeni Iesu ena diba tahua taudia ese idia nanadaia, idia gwau, “Rabi e, daika ena kara dika dainai inai tau mai matakeputu danu ia vara, ia, o iena tamana o iena sinana?”

³ Iesu ia gwau, “Lasi, iena kara dika lasi, bona ena tamana o sinana edia kara dika lasi, to Dirava ena sialu ia dekeno amo do ia hedinarai totona. ⁴ Lau ia siaia Diravana ena kara, be dina lalonai do ita karaia. Badina be hanuaboi do ia mai neganai, tau ta do ia gaukara diba lasi. ⁵ Tanobada dekenai lau noho neganai, lau be tanobada ena diari.”

⁶ Unai hereva Iesu ia gwauraia, vadaeni tano dekenai ia kanudi, iena kanudi dekenai kopukopu sisina ia karaia, vadaeni matakeputu tauna ena matana ruaosi dekenai ia dahua. ⁷ Vadaeni ia hamaoroa, ia gwau, “Oi lao, Siloama ena gohu dekenai do oi lao huria.” Siloama ena anina be “Siaia.” Unai dainai ia be ia lao, iena matana ia huria, vadaeni ia giroa mai, iena matana idia kehoa vadaeni.

⁸ Iena badibadinai taudia, bona hanaihanai ia noinoi noho neganai idia itaia taudia ese tau haida idia henanadaia, idia gwau, “Inai be vanegai ia helai noho, ia noinoi noho, tauna, ani?”

⁹ Haida idia gwau, “Tauna unai.”

Ma haida idia gwau, “Lasi, inai be ia hegeregerena.”

Ia sibona ia gwau, “Lau inai.”

¹⁰ Vadaeni idia ese idia nanadaia, idia gwau, “Oiemu matana be edena bamona idia kehoa?”

¹¹ Ia haere, ia gwau, “Tau ta, iena ladana be Iesu, ia ese kopukopu ia karaia, egu matana ruaosi dekenai ia dahua, vadaeni ia hamaoroa lau dekenai, ia gwau, ‘Oi lao, Siloama dekenai do oi lao, emu matana huria.’ Lau lao, lau huria, vadaeni egu matana idia kehoa.”

¹² Vadaeni idia ese ma idia henanadaia, idia gwau, “Inai tau be edeseni?”

Ia gwau, “Lau diba lasi.”

Farisea taudia ese Iesu ena hanamoa kara idia tahua

¹³ Idia ese iena matana idia kehoa tauna be Farisea taudia dekenai idia hakaua lao. ¹⁴ Iesu ese kopukopu ia karaia, bona unai tau ena matana ia kehoa dinana be Sabati. ¹⁵ Unai dainai, Farisea taudia danu idia nanadaia, “Oiemu matana be edena bamona idia kehoa?” Ia gwau, “Ia ese egu matana ruaosi kopukopu dekeno amo ia dahua, lau lao huria, vadaeni egu matana idia kehoa.”

¹⁶ Vadaeni Farisea taudia haida idia gwau, “Unai tau be Dirava dekeno amo ia mai lasi, badina be Sabati Dina ia badinaia lasi.”

To haida idia gwau, “Kara dika tauna ese toa unai bamodia be edena bamona do ia karaia?” Unai dekeno amo idia edia hebou ia parara vadaeni.

¹⁷ Vadaeni idia ese matakeputu tauna ma idia nanadaia lou, idia gwau, “Inai tau ese oiemu matana ruaosi ia kehoa, oi be edena bamona oi gwauraia?”

Ia haere, ia gwau, “Ia be peroveta tauna.”

¹⁸ Iuda taudia ese inai tau ena matana guna idia keputu to gabeai ma idia kehoa herevana be idia abia dae lasi. Unai dainai idia ese iena tamana bona iena sinana idia boiria.

¹⁹ Idia nanadaia idia dekenai, idia gwau, “Inai be umui emui natuna, a? Iena matana ruaosi mai kepulu danu ia vara umui gwau, a? To harihari iena matana be edena bamona idia kehoa?”

²⁰ Vadaeni iena tamana bona sinana idia gwau, “Ai diba inai be aiemai natuna, mai matakepulu danu ia vara, ²¹ to harihari iena matana edena bamona idia kehoa be ai diba lasi, iena matana ia kehoa tauna danu be ai diba lasi. To aiemai natuna do umui nanadaia, ia be tau badana vadaeni, ia sibona do ia hereva.” ²² Iena tamana bona sinana unai bamona idia hereva, badina be Iuda taudia dekenai idia gari. Badina Iuda taudia be idia hereva hebou vadaeni, tau ta bema Iesu do ia gwauraia ia be Keriso, ia be dubu dekena amo do idia lulua murimuri dekenai. ²³ Unai dainai iena tamana bona sinana idia gwau, “Ia be tau badana vadaeni, do umui nanadaia.”

²⁴ Vadaeni idia ese matakepulu tauna ma idia boiria lou, idia gwau, “Dirava do oi hanamoa, badina ai be ai diba vadaeni unai tau be kara dika tauna.”

²⁵ Ia ese ia haere, ia gwau, “Ia be kara dika tauna o lasi lau diba lasi, gau tamona sibona lau diba, guna egu matana ruaosi idia kepulu, to harihari be lau itaia noho.”

²⁶ Vadaeni idia nanadaia lou, idia gwau, “Ia ese oi dekenai be dahaka ia karaia? Oiemu matana be edena bamona ia kehoa?”

²⁷ Ia haere, ia gwau, “Be! Umui lau hamaoroa momokani vadaeni, to umui be kamonai lasi lau dekenai. Dahaka dainai umui ura be do umui kamonai lou? Umui danu iena diba tahua taudia do umui lao gwauraia?”

²⁸ Vadaeni idia hereva dika henia, idia gwau, “Oi be iena diba tahua tauna, ai be Mose ena diba tahua taudia. ²⁹ Ai be ai diba Dirava ese Mose dekenai ia hereva henia, to unai tau be edeseni dekena amo ia mai, ai be ai diba lasi.”

³⁰ Matana idia kehoa tauna ia gwau, “Ia! Lau be lau hoa, badina be umui diba lasi ia be edeseni dekena amo ia mai, to ia ese lauegu matana ia kehoa. ³¹ Ita diba Dirava ese kara dika taudia edia hereva ia kamonai henia lasi, to Dirava ese ia dekenai ia matauraia, bona iena ura ia karaia tauna ena hereva be ia kamonai henia. ³² Tanobada ia hamatamaia dekena amo, tau ta ese mai matakepulu danu ia vara tauna ta ena matana ia kehoa ena sivarai, be ta ita do kamonaia lasi. ³³ Inai tau be Dirava dekena amo bema ia mai lasi, be ia ese gau ta do ia karaia diba lasi.”

³⁴ Idia haere henia, idia gwau, “Oi be kara dika lalonai oi vara, to edena bamona ai dekenai oi hadibaia, a?” Vadaeni idia ese idia lulua murimuri dekenai.

Edia lalona be matakepulu

³⁵ Iesu be ia kamonai idia ese murimuri dekenai idia lulua, vadaeni ia davaria, ia nanadaia, ia gwau, “Taunimanima ena Natuna dekenai oi abidadama henia, a?”

³⁶ Ia be ia haere, ia gwau, “Lohiabada e, ia be daika? Mani oi hamaoroa lau dekenai, vadaeni ia dekenai do lau abidadama henia.”

³⁷ Iesu ia gwau, “Tauna oi itaia vadaeni, ia be inai harihari ia hereva henia oi dekenai.”

³⁸ Vadaeni ia gwau, “Lohiabada e, lau abidadama inai.” Vadaeni ia ese ia tomadiho henia.

³⁹ Iesu ia gwau, “Kota henia totona inai tanobada dekenai lau mai vadaeni, unai dainai matakepulu taudia be edia matana do idia kehoa, bona matana idia kehoa taudia be edia matana do idia kepulu.”

⁴⁰ Farisea taudia haida be ia dekenai idia noho, vadaeni unai hereva idia kamonai. Vadaeni idia ese idia nanadaia, idia gwau, “Ai danu aiemai matana idia kepulu, a?”

⁴¹ Iesu ia haere idia dekenai, ia gwau, “Emui matana bema idia kepulu, umui be kerere lasi danu do umui noho, to umui gwau, ‘Ai itaia diba,’ unai dainai umui emui kerere be ia noho.

10

Mamoe naria tauna namona

¹ “Momokani, momokani umui lau hamaoroa, mamoe edia magu ena iduara dekenai ia raka vareai lasi, to magu ena iduara ia noho lasi gabuna dekenai ia hanaia kava tauna be henaoo bona dadia tauna. ² To iduara dekenai amo ia raka vareai tauna be mamoe naria tauna. ³ Iduara gimaia tauna ese iduara ia kehoa unai tau ena, vadaeni mamoe ese iena gadona idia kamonai. Ia ese iena mamoe momokani edia ladana ia atoa, vadaeni ia hakaudia murimuri dekenai. ⁴ Iena mamoe momokani ibounai be murimuri dekenai ia hakaudia, edia vairana dekenai ia raka, vadaeni iena gadona idia diba dainai, iena murina dekenai idia raka. ⁵ To idau tauna ena murina dekenai do idia raka lasi, lasi momokani. Ia dekenai amo do idia heau siri, badina be idau taudia edia gadona idia diba lasi.”

⁶ Inai parabole be Iesu ese ia gwauraia idia dekenai, to iena hereva ena anina idia diba lasi.

Iesu be mamoe naria tauna namona

⁷ Iesu ma ia hereva lou idia dekenai, ia gwau, “Momokani, momokani umui lau hamaoroa, lau be mamoe edia iduara. ⁸ Guna idia mai taudia ibounai be henaoo bona dadia taudia, vadaeni mamoe ese idia hereva dekenai idia kamonai lasi. ⁹ Iduara be lau inai. Lau dekenai amo do ia raka vareai tauna be do ia mauri, ia be do ia raka vareai, do ia raka murimuri dekenai, aniani do ia davaria. ¹⁰ Henaoo tauna ena mai badina be henaoo, bona alaia, bona hadikaia ore totona. Lau mai vadaeni, mauri do idia abia, mauri mai anina momokani danu, do idia abia totona.

¹¹ “Lau be mamoe naria tauna namona inai. Mamoe naria tauna namona ese iena mauri ia atoa diho mamoe totona. ¹² Gaukara tauna mai ena davana be mamoe naria tauna lasi, bona mamoe edia biaguna lasi. Uda sisia ia itaia idia mai neganai, ia ese iena mamoe dekenai amo ia heau siri. Vadaeni uda sisia ese mamoe ia koria, bona idia heau lao gabu idauida dekenai. ¹³ Ia heau, badina ia be gaukara tauna mai ena davana, mamoe dekenai ia laloa lasi.

¹⁴ “Lau be mamoe naria tauna namona. Lauegu mamoe be lau diba. Lauegu mamoe danu idia diba lau. ¹⁵ Inai bamona danu, lauegu Tamana ia diba lau, bona lau diba ia. Egu mauri danu lau atoa diho, mamoe totona. ¹⁶ Lau be mai egu mamoe idaudia haida danu idia noho. Idia be inai magu lalonai idia noho lasi. Idia danu do lau hakaudia mai, vadaeni egu gadona do idia kamonai, vadaeni orea do ia tamona, naria tauna danu do ia tamona.

¹⁷ “Inai dainai egu Tamana ese lau ia lalokau henia, badina be egu mauri lau atoa diho, do lau abia lou totona. ¹⁸ Tau ta ese lauegu mauri ia kokia lasi, lau sibona lau atoa diho. Lau be mai siahu do lau atoa diho, bona mai egu siahu do lau abia lou. Inai bamona siahu be egu Tamana dekenai amo lau abia vadaeni.”

¹⁹ Iuda taudia ese inai hereva idia kamonai neganai, edia orea ma idia parara lou. ²⁰ Taunimanima momo idia gwau, “Ia be mai ena lauma dikana danu, ia kavakava. Dahaka dainai umui kamonai henia ia dekenai?”

²¹ Ma haida idia gwau, “Unai hereva be lauma dika ese ia abia tauna ena hereva lasi. Lauma dika ese matakepulu taudia edia matana ia kehoa diba, a?”

Iuda taudia ese Iesu dekenai idia badu henia

²² Unai neganai Dubu Helaga Hagoevaia ena aria dinana ia ginidae vadaeni Ierusalema dekenai. Unai be keru ena nega. ²³ Iesu be Dubu Helaga lalonai ia raka, Solomona ena dehe dekenai. ²⁴ Vadaeni Iuda taudia ese idia gini hagegea Iesu dekenai, idia nanadaia, idia gwau, “Oi totona do ai laloe daradara noho, ia lao bona edena negai? Oi be Keriso o lasi? Mani oi hamaoroa momokani ai dekenai.”

²⁵ Iesu ia haere idia dekenai, ia gwau, “Umui lau hamaoroa vadaeni, to egu hereva umui abidadama henia lasi. Lauegu Tamana ena ladana dekenai lau karaia gaudia ese lau idia hedinarai. ²⁶ To umui abidadama henia lasi lau dekenai, badina umui be lauegu mamoe lasi. ²⁷ Egu mamoe ese lauegu gadona idia kamonai, lau diba vadaeni idia, bona idia ese lauegu murina dekenai idia raka. ²⁸ Mauri hanaihanai danu lau henia idia dekenai, idia be do idia mase lasi, lasi bona lasi momokani. Bona tau ta ese lauegu imana dekenai amo idia do ia kokia lasi. ²⁹ Idia be lauegu Tamana ese lau dekenai ia henia vadaeni. Lauegu Tamana ena goada ese ibounai edia goada ia hereaia. Unai dainai tau ta ia hegeregere lasi idia do ia kokia lauegu Tamana dekenai amo. ³⁰ Lau bona egu Tamana, ai be tamona.”

³¹ Vadaeni Iuda taudia ese nadi idia abia isi, idia hodoa gwaurai. ³² Iesu ia gwau, “Kara namodia momo Tamana dekenai amo umui dekenai lau hedinarai vadaeni. Edena kara totona do umui hodoa lau?”

³³ Iuda taudia idia gwau, “Kara namona ta totona do ai hodoa lasi oi, to Dirava ena ladana oi hadikaia dainai, badina oi be taunimanima sibona, to oi sibona be Dirava oi halaoa!”

³⁴ Iesu ia gwau, “Umui emui taravatu dekenai inai bamona ia torea, ani: ‘Lau gwau, umui be dirava?’ ³⁵ Buka Helaga ena hereva ta be ia gwau, Dirava ena hereva idia abia dae taudia be Dirava ese ia gwaurai, idia be dirava. Inai be momokani, badina Buka Helaga ena hereva ia senisi diba lasi. ³⁶ Dirava ese lau ia abia hidi, bona lau ia siaia tanobada dekenai. Ia siaia tauna be umui gwau henia, umui gwau, ‘Oi be Dirava ena ladana oi hadikaia,’ badina be lau gwau, ‘Lau be Dirava ena Natuna,’ a? ³⁷ Bema egu Tamana ena kara lau karaia lasi, lau do umui abidadama henia lasi be namo. ³⁸ To iena kara be lau karaia noho. Bema lau umui abidadama henia lasi, namona be lau karaia gaudia do umui abidadama henia, vadaeni emui lalona be do idia kehoa, bona do umui diba lauegu Tamana be lauegu lalona dekenai ia noho, lau danu be egu Tamana ena lalona dekenai lau noho.”

³⁹ Vadaeni idia ese ma idia dogoatao lou gwaurai, to edia imana dekenai amo ia raka siri.

⁴⁰ Iesu be Ioridane Sinavai unai kahana dekenai. Unuseni ia giroa lao, gunaguna Ioane ese ia bapatiso karaia gabuna dekenai ia noho. ⁴¹ Taunimanima momo be ia dekenai idia lao. Idia gwau, “Ioane ese toa ta ia karaia lasi, to Ioane ese inai tau ia herevalaia gaudia ibounai

be momokani vadaeni.” ⁴² Vadaeni taunimanima momo ese unai gabu dekenai Iesu idia abidadama henia.

11

Iesu ese Lasaro ia hatorea isi lou

¹ Betania tauna ta, ena ladana Lasaro, ia gorere. Maria, bona iena kakana Mareta danu, edia hanua be Betania. ² Unai Maria be muramura mai ena bonana namo dekena amo Lohiabada ena aena dekenai ia bubua, vadaeni iena huina dekena amo ena aena ia dahua kaukau hahinena. Iena taihuna Lasaro ia gorere. ³ Hahine ruaosi ese Iesu dekenai hereva idia siaia, idia gwau, “Lohiabada e, oiemu lalokau tauna be ia gorere noho.”

⁴ To Iesu ia kamoni, ia gwau, “Inai gorere be mase gauna lasi, to ia be Dirava hanamo totona. Dirava ena Natuna ese hairai do ia abia inai kara dainai.”

⁵ Iesu ese Mareta mai ena tadina Maria danu, bona Lasaro danu, ia lalokau henia idia dekenai. ⁶ To Lasaro ena gorere sivaraina ia kamoni neganai, Iesu be dina rua ma unai gabu dekenai ia noho. ⁷ Gabei ia ese iena diba tahua taudia dekenai ia hamaoroa, ia gwau, “Iudea dekenai ita giroa lou.”

⁸ Diba tahua taudia idia gwau, “Rabi e, vanegai Iuda taudia ese nadi dekena amo oi idia hodoa toho, harihari unai gabu dekenai do oi giroa lou, a?”

⁹ Iesu ia haere, ia gwau, “Dina ta ena hora be 12 lasi, ani? Dina neganai ia loaloa tauna be kerere do ia davaria lasi, ani? Badina be ia ese inai tanobada ena diari ia itaia. ¹⁰ To hanuaboi neganai ia loaloa tauna be kerere ia davaria, badina iena lalona dekenai diari be lasi.” ¹¹ Unai bamona ia hereva, vadaeni idia ia hamaoroa, ia gwau, “Iseda turana Lasaro be ia mahuta noho, to lau lao, do lau hanogaia.”

¹² Iena diba tahua taudia idia gwau, “Lohiabada e, bema ia mahuta be do ia namo lou.”

¹³ Iesu ese Lasaro ena mase ia gwauraia. To idia lalao ia be laga-ani ena mahuta ia herevalaia. ¹⁴ Unai dainai Iesu ese idia dekenai ia hereva maoro, ia gwau, “Lasaro be ia mase vadaeni, ¹⁵ bona umui totona lau moale, ia dekenai lau noho lasi dainai, badina inai kara dekena amo, umui be do umui hamomokania lau dekenai. Vadaeni ita lao ia dekenai.”

¹⁶ Vadaeni Toma, iena ladana ta idia gwauraia Hekapa, ese diba tahua taudia dekenai ia hamaoroa, ia gwau, “Ita danu ita lao, ia danu do ita mase hebou.”

Mase dekena amo toreisi lou bona mauri ena badina be Iesu

¹⁷ Iesu ia ginidae, vadaeni ia kamoni Lasaro ena tauanina be dina 4 guria gabuna dekenai ia noho. ¹⁸ Betania bona Ierusalem edia padana be daudau lasi, kilomita toi bamona. ¹⁹ Unai dainai Iuda taudia momo Mareta bona Maria dekenai idia lao, edia lalona hagoadaia totona, edia taihuna ia mase dainai.

²⁰ Mareta be Iesu ia mai noho herevana ia kamoni, vadaeni Iesu danu ia hedavari totona ia lao, to Maria be ruma dekenai ia noho. ²¹ Vadaeni Mareta ese Iesu ia hereva henia, ia gwau, “Lohiabada e, bema oi noho iniseni, be lauegu taihuna ia mase lasi. ²² To lau diba vadaeni, inai harihari Dirava dekenai oi noinoi gauna, be Dirava ese do ia henia oi dekenai.”

²³ Iesu ia gwau, “Oiemu taihuna be do ia toreisi lou.”

²⁴ Mareta ia gwau, “Lau diba dina gabeai, toreisi lou dinana neganai, do ia toreisi lou.”

²⁵ Iesu ia gwau, “Toreisi lou be lau inai, mauri danu be lau. Lau dekenai ia abidadama henia tauna, ia be do ia mase, to do ia mauri lou. ²⁶ Idia mauri noho, bona idia abidadama henia lau dekenai taudia ibounai, be do idia mase lasi, lasi bona lasi momokani. Inai hereva oi abia dae, a?”

²⁷ Hahine be ia haere, ia gwau, “Lohiabada e, oibe. Lau abia dae momokani vadaeni, oi be Keriso, Dirava ena Natuna, guna idia gwauraiia tanobada dekenai do ia mai Tauna.”

Iesu ia tai

²⁸ Mareta be unai bamona ia hereva, vadaeni ia lao, iena tadina Maria dekenai ia boiboi henia, ia gwau, “Hadibaia tauna be ia mai vadaeni, ia boiria oi dekenai.” ²⁹ Maria be unai hereva ia kamoni, vadaeni ia toreisi haragaharaga, Iesu dekenai ia lao. ³⁰ Unai neganai Iesu be hanua lalonai ia do raka vareai lasi, to Mareta danu ia hedavari gabuna dekenai ia noho. ³¹ Unai dainai, Iuda taudia, Maria danu ruma lalonai idia noho edia lalona hanamoa taudia, ese Maria idia itaia neganai, idia toreisi haragaharaga, idia raka murimuri dekenai. Vadaeni idia ese iena murina dekenai idia lao, badina be idia laloa ia be guria gabuna dekenai ia lao gwauraiia, mase tauna totona do ia taitai.

³² To Maria be Iesu ia noho gabuna dekenai ia ginida, ia itaia, vadaeni ia ese Iesu ena aena badinai iena kwarana ia atoa diho, ia gwau, “Lohiabada e, iniseni bema oi noho, be egu taihuna ia mase lasi.”

³³ Maria bona inai Iuda taudia ia danu idia raka hebou, be idia taitai, vadaeni Iesu ese idia ia itaia, be iena lalona ia hisihisi bada, mamina ia abia momokani. ³⁴ Vadaeni ia henanadai, ia gwau, “Edeseni umui atoa?”

Idia haere, idia gwau, “Lohiabada e, oi mai, oi itaia.”

³⁵ Iesu ia tai. ³⁶ Vadaeni Iuda taudia idia gwau, “Umui itaia, ia ese ia lalokau henia bada.”

³⁷ To haida idia gwau, “Inai matakepulu ena matana ia kehoa tauna, be unai tau ena mase koua dalana be ia diba lasi, a?”

Iesu ese Lasaro ia hatorea isi lou

³⁸ Iesu ena lalona ma ia hisihisi lou, vadaeni ia be guria gabuna dekenai ia lao. Inai guria gabuna be kohua. Inai kohua ena iduara be nadi ta dekenai idia koua. ³⁹ Vadaeni Iesu ia gwau, “Nadi umui kokia.”

To Mareta, mase tauna ena taihuna, ia gwau, “Lohiabada e, ia bodaga vadaeni, badina be dina 4 ia mase vadaeni.”

⁴⁰ Iesu ia haere ia dekenai, ia gwau, “Edena bamona? Oi lau hamaoroa guna, ani, bema oi abidadama henia, be Dirava ena hairaina do oi itaia?”

⁴¹ Vadaeni idia ese nadi idia kokia, Iesu ese iena matana dekenai guba ia itaia, ia guriguri, ia gwau, “Egu Tamana e, lau hanamoa oi, badina be oi ese lau oi kamoni henia noho. ⁴² Lau diba oi be nega ibounai oi kamoni henia lau. Gau tamona, inai taunimanima lau dekenai idia gini hagegea lau laloa. Idia dainai lau hereva inai bamona, lau be oi ese oi siaia, do idia abia dae totona.”

⁴³ Unai bamona ia guriguri, vadaeni ia boiboi bada herea, ia gwau, “Lasaro e, oi mai murimuri dekenai.” ⁴⁴ Vadaeni mase tauna be ia raka murimuri dekenai, iena aena bona imana idia kumia dabua bona iena vairana idia kumia dabua be iena tauanina dekenai idia do noho. Iesu ia gwau, “Kumia dabua umui kokia, umui rakatania.”

Iuda edia tau badadia idia laloa tamona, Iesu do idia alaia

⁴⁵ Vadaeni Iuda taudia momo, inai Maria dekenai idia lao taudia, bona Iesu ena kara idia itaia taudia, ese Iesu idia abidadama henia. ⁴⁶ To haida be Farisea taudia dekenai idia lao, Iesu ia karaia gauna idia hamaoroa idia dekenai.

⁴⁷ Unai dainai, dubu biagudia bona Farisea taudia be kaunsolo taudia idia boiria, idia haboua, idia gwau, “Edena bamona do ita karaia, badina be unai tau ese toa kara momo ia karaia? ⁴⁸ Bema ita dogoatao lasi, taunimanima ibounai ese do idia abidadama henia, vadaeni Roma taudia do idia mai, iseda Dubu Helaga bona iseda bese do idia hadikaia ore.”

⁴⁹ Vadaeni idia edia tau ta, iena ladana be Kaiapa, unai lagani lalonai ia be Hahelagaia Tauna Badana, ia gwau henia idia dekenai, ia gwau, “Umui be gau ta umui diba lasi, ⁵⁰ umui laloa lasi, namona be taunimanima dainai tau tamona ia mase, to namo lasi iseda bese ibounai idia hadikaia ore.”

⁵¹ Ia be unai bamona ia hereva, sibona ena ura dekenai lasi, to badina be unai lagani lalonai ia be Hahelagaia Tauna Badana, unai dainai ia gwauraia guna, Iesu be Iuda bese totona do ia mase. ⁵² Bona Iuda bese sibona totona do ia mase lasi. Lasi momokani. Iena mase be, Dirava ena natuna tanobada ibounai dekenai, be orea tamona dekenai do ia haboua totona.

⁵³ Vadaeni unai dina dekena amo idia ese Iesu alaia mase totona dala idia tahua.

Eparaima dekenai Iesu ia lao

⁵⁴ Unai dainai Iesu be Iuda taudia edia huana dekenai ia loaloa hedinarai lou lasi, to unai gabu ia rakatania, taunimanima idia noho lasi tano kahirakahira ia lao, hanua ta, ladana Eparaima dekenai ia noho, iena diba tahua taudia danu.

⁵⁵ Iuda taudia edia Pasova aria negana be ia kahirakahira, vadaeni unai tano taudia momo herea Ierusalem dekenai idia daekau, aria totona idia sibona do idia hagoevaia guna gwauraia. ⁵⁶ Vadaeni idia ese Iesu idia tahua, bona Dubu Helaga lalonai idia gini noho neganai, idia sibona idia nanadaia, idia gwau, “Umui be dahaka umui gwau? Iesu be inai aria totona do ia mai o lasi?” ⁵⁷ Dubu biagudia bona Farisea taudia danu taunimanima dekenai idia hereva, bema Iesu ena noho gabuna tau ta ia diba, be do ia hamaoroa idia dekenai, vadaeni idia ese do idia dogoatao diba.

12

Maria ese dehoru ia bubua Iesu ena aena dekenai

¹ Dina 6 do idia noho ia lao bona Pasova ena aria do idia karaia, vadaeni Iesu ia lao Betania. Lasaro, vanegai Iesu ese mase dekena amo ia hatorea isi tauna, ena hanua be unai. ² Iesu ena aniani idia karaia, Mareta ese edia hesiai gaukara ia karaia, vadaeni Lasaro bona taunimanima haida be Iesu danu idia aniani hebou. ³ Maria ese dehoru mai bonana namona ia abia, davana bada gauna, ena metau be kilogram ta bamona, vadaeni ia lao, Iesu ena aena ruaosi dekenai ia bubua, vadaeni iena huina dekena amo ia dahua kaukau. Ruma be unai dehoru bonana namona dekenai ia honu. ⁴ To Iuda Iskariote, diba tahua tauna ta, Iesu ena mase dala do ia karaia tauna, ia gwau, ⁵ “Badina dahaka inai dehoru be ia hoia lasi? 300 kina do ia abia, ologami taudia dekenai do idia harihari henia.” ⁶ Unai bamona ia hereva, be ologami taudia

dekenai ia bogahisihisi lasi, badina ia be henaoa tauna, ia be moni ena maua ia naria, bona idia udaia moni be ia ese ia henaoa.

⁷ To Iesu ia gwau, “Inai hahine umui koua lasi, dehero ia abia hegaegae noho vadaeni, lau do idia guria dinana totona. ⁸ Oogami taudia be nega ibounai umui dekenai idia noho, to lau be nega ibounai umui dekenai do lau noho lasi.”

Dubu biagudia ese Lasaro idia alaia gwauraia

⁹ Iuda taudia momo herea idia kamona Iesu be unuseni, vadaeni unai gabu dekenai idia lao, Iesu sibona totona lasi, to Lasaro, Iesu ese mase dekena amo ia hatorea isi tauna, itaia totona. ¹⁰ Unai dainai dubu biagudia idia hereva hebou, Lasaro danu do idia alaia, idia gwau. ¹¹ Badina be Lasaro totona Iuda taudia momo idia raka siri, Iesu dekenai idia abidadama henia.

Iesu Ierusalem dekenai ia daekau

¹² Dabai, aria totona idia haboua Iuda taudia momo herea idia kamona vadaeni Iesu be Ierusalem dekenai do ia daekau. ¹³ Vadaeni pama au rauraudia idia abia, Iesu ena vairana dekenai idia lao, idia boiboi, idia gwau,

“Hosana!

Lohiabada ena ladana dekenai ia mai tauna ita hanamoa!
Ia be Israela ena King!”

¹⁴ Vadaeni Iesu ese doniki ena natuna ta ia davaria, bona iena doruna dekenai ia helai, Buka Helaga dekenai ia torea hegeregerena, ia gwau,

¹⁵ “Siona hanua ena natuna kekeni e, oi gari lasi.

Oi itaia, oiemu King ia mai noho.

Doniki ena natuna latanai ia helai noho.”

¹⁶ Iena diba tahu taudia be unai hereva ena anina idia diba lasi unai neganai, to Iesu ese iena hairaina ia abia murinai idia lalao vadaeni, idia gwau, “Inai bamona hereva be guna idia torea vadaeni Buka Helaga lalonai Iesu totona, bona idia vara momokani.”

¹⁷ Taunimanima momo be Iesu danu idia noho, ia ese Lasaro guria gabu dekena amo ia boiria murimuri dekenai, bona mase dekena amo ia hatorea isi neganai. Vadaeni idia ese iena sivarai idia gwauraia loalao.

¹⁸ Unai dainai taunimanima momo be Iesu ena vairana dekenai idia lao, badina be idia kamona vadaeni ia ese unai hoa kara ia karaia.

¹⁹ Vadaeni Farisea taudia idia sibona idia hereva henia, idia gwau, “Umui itaia, umui be umui lusi vadaeni, tanobada ibounai be iena murina dekenai idia raka vadaeni.”

Helene taudia haida ese Iesu idia ura itaia

²⁰ Aria neganai tomadiho totona idia daekau taudia haida be Helene taudia. ²¹ Idia be Filipino, Betesaida Galilea tauna, dekenai idia lao, idia hamaoroa, idia gwau, “Tau badana e, ai ura be Iesu ai itaia.”

²² Filipino ia lao, Andrea ia hamaoroa, vadaeni Andrea be Filipino danu idia lao, Iesu idia hamaoroa. ²³ Vadaeni Iesu ia haere idia dekenai, ia gwau, “Nega ia ginidae vadaeni, Taunimanima ena Natuna ese iena hairaina do ia abia. ²⁴ Momokani, momokani umui lau hamaoroa, bema uiti ena uhena be tano dekenai do ia moru lasi, bema ia mase lasi, ia be sibona do ia noho kava. To bema ia mase, anina momo do ia atoa. ²⁵ Iena mauri ia ura dogoatao tauna ese mauri do ia halusia, to iena mauri inai

tanobada dekenai ia laloa lasi tauna be mauri do ia abia, ia lao bona hanaihanai. ²⁶ Tau ta bema ia ura lauegu hesiai gaukara do ia karaia, ia ese lauegu murina dekenai do ia raka. Vadaeni do lau noho gabuna dekenai, egu hesiai tauna danu do ia noho. Bema tau ta ese lauegu hesiai gaukara do ia karaia, egu Tamana ese do ia hanamoa.”

Iesu ese iena mase ia herevalaia

²⁷ “Harihari lauegu kudouna ia hisihisi. Dahaka do lau gwaurai? Do lau gwau, ‘Egu Tamana e, inai harihari nega dekena amo lau oi hamauria?’ Lasi, badina be hari inai nega totona lau mai ginida vadaeni. ²⁸ Egu Tamana e, oiemu ladana oi hanamoa!”

Vadaeni gado ta guba dekena amo ia mai, ia gwau, “Lau hanamoa vadaeni, ma do lau hanamoa lou.”

²⁹ Vadaeni taunimanima momo unuseni idia gini, be hereva idia kamoni, vadaeni idia gwau, “Guba ia boiboi.”

Ma haida idia gwau, “Aneru ta ese ia hereva henia noho!”

³⁰ Iesu ese ma ia hereva henia idia dekenai, ia gwau, “Unai gado be lau totona lasi, to umui totona ia mai. ³¹ Harihari inai tanobada taudia be Dirava ese ia kota henia, harihari ia ese inai tanobada ena lohia do ia lulua murimuri dekenai. ³² Tanobada dekenai lau do idia abia isi neganai, taunimanima ibounai be lau dekenai do lau veria.” ³³ Ia be unai bamona ia hereva, iena mase dalana ia hedinarai totona.

³⁴ Vadaeni taunimanima momo idia haere ia dekenai, idia gwau, “Ai be Dirava ena taravatu hereva dekena amo ai kamoni vadaeni, Keriso be do ia noho hanaihanai. Badina dahaka oi gwau Taunimanima ena Natuna be do idia abia isi? Inai Taunimanima ena Natuna be daika?”

³⁵ Iesu ia gwau, “Nega sisina diari be do ia noho umui dekenai. Do umui raka namonamo, diari umui abia noho neganai, dibura ese umui do ia koua garina. Dibura lalonai ia raka tauna ia lao henia gabuna ia diba lasi. ³⁶ Diari umui abia noho neganai, diari dekenai do umui abidadama henia, ia ese diari taudia umui do ia halaoa totona.”

Iuda taudia momo Iesu idia abidadama henia lasi

Iesu be unai bamona ia hereva, vadaeni ia raka siri, idia dekena amo sibona ia hunia. ³⁷ Iesu ese hoa kara momo edia vairana dekenai ia karaia, to idia be idia abidadama henia lasi ia dekenai. ³⁸ Unai dainai, Isaia, peroveta tauna, ena hereva ia momokani vadaeni, ia gwau,

“Lohiabada e, daika ese aiemai hereva ia abia dae?
Bona Lohiabada ena imana be daika dekenai ia hedinarai?”

³⁹ Unai dainai idia ese idia abidadama henia lasi, badina be Isaia ma ia gwau,

⁴⁰ “Dirava ese edia matana ia hakepulua vadaeni.

Edia lalona danu ia hadiburai.

Edia matana dekena amo do idia itaia garina,

bona edia lalona dekena amo do idia diba garina,

vadaeni edia lalona do idia giroa,

bona Dirava ese idia do ia hamauria garina.”

⁴¹ Isaia be unai bamona Iesu ia herevalaia, badina be ia ese Keriso ena hairaina ia itaia guna vadaeni.

⁴² Unai neganai hanua lohia taudia momo ese idia abidadama henia Iesu, to idia gwaurai hedinarai lasi, Farisea taudia dekenai idia gari dainai, dubu dekena amo do idia luludia garina. ⁴³ Badina be taunimanima edia hanamoa dekenai idia ura henia bada, Dirava ena hanamoa dekenai idia ura henia maragi.

Iesu ena hereva ese taunimanima do idia kota henia

⁴⁴ Iesu ia boiboi, ia gwau, “Lau dekenai ia abidadama henia tauna ese lau sibona lasi, to lau ia siaia Diravana danu ia abidadama henia. ⁴⁵ Bona lau ia itaia tauna ese lau ia siaia Diravana danu ia itaia. ⁴⁶ Lau be tanobada dekenai lau mai vadaeni, diari bamona. Unai dainai lau idia abidadama henia taudia ibounai be dibura lalonai do idia noho lasi. ⁴⁷ Tau ta ese egu hereva do ia kamonai, to do ia badinaia lasi, lau be do lau kota henia lasi, badina lau be tanobada hamauria totona lau mai. ⁴⁸ Lau ia ura henia lasi, bona lauegu hereva ia abia dae lasi tauna, be mai ena kota henia tauna ia noho. Lau gwaurai herevadia ese do idia kota henia, dokona dina dekenai. ⁴⁹ Badina be lau sibona egu siahu dekenai hereva lau gwaurai lasi, to lauegu Tamana, lau ia siaia Diravana, ese ia hereva lau dekenai dahaka hereva dahaka hereva do lau gwaurai, bona edena bamona do lau hereva. ⁵⁰ Lau diba danu lauegu Tamana ena hereva ese mauri hanaihanai idia mailaia. Unai dainai, lauegu hereva, be lauegu Tamana ese ia henia lau dekenai hegeregerena, lau gwaurai noho.”

13

Iesu ese diba tahua taudia edia aena ia huria

¹ Pasova aria ena dina be ia kahirakahira, vadaeni Iesu ia diba inai tanobada do ia rakatania, iena Tamana dekenai do ia lao negana ia ginidae vadaeni. Inai tanobada dekenai, sibona ena lalokau taudia dekenai ia lalokau henidia, ia lao bona dokona.

² Aniani neganai, Satani ese Iuda Iskariote, Simona ena natuna, ena lalona ia abia momokani, Iesu ena mase dala do ia karaia. ³ Iesu danu ia diba iena Tamana ese gau ibounai iena imana dekenai ia henia vadaeni, ia diba danu Dirava dekena amo ia mai vadaeni, bona Dirava dekenai do ia lao. ⁴ Vadaeni ia ese aniani gabuna dekena amo ia toreisi, iena dabua badana ia kokia, taoele ta ia abia, ia kwatua, ⁵ disi ta dekenai ranu ia bubua, vadaeni iena diba tahua taudia edia aena ia huria hamatamaia, bona taoele ia kwatua gauna dekena amo, edia aena ia dahua kaukau.

⁶ Simona Petero dekenai ia ginidae, vadaeni ia ese Iesu ia hamaoroa, ia gwau, “Lohiabada e, oi be lauegu aena do oi huria, a?”

⁷ Iesu ia haere ia dekenai, ia gwau, “Egu kara be inai harihari oiemu lalona ia diba lasi, to gabei ena anina do oi diba.”

⁸ Petero ia gwau, “Egu aena be do oi huria lasi, lasi momokani.”

Iesu ma ia haere, ia gwau, “Bema oi lau huria lasi, oi be lau danu oi noho diba lasi.”

⁹ Simona Petero ia gwau, “Lohiabada e, lauegu aena sibona lasi, egu imana bona egu kwarana danu!”

¹⁰ Iesu ia gwau, “Ia digu vadaeni tauna be, bema ena aena sibona do lau huria, be iena tauanina ibounai ia goeva. Umui danu umui goeva, to umui ibounai lasi.” ¹¹ Badina ia be iena mase dala do ia karaia tauna be ia diba vadaeni, unai dainai ia gwau, “Umui ibounai be umui goeva lasi.”

¹² Idia edia aena Iesu ia huria ore, vadaeni ena dabua ia karaia lou, ia helai lou. Vadaeni ia ese ia nanadaia idia dekenai, ia gwau, “Umui

dekenai lau karaia gauna ena anina be umui diba, a? ¹³ Umui gwauraia lau be hadibaia tauna bona Lohiabada. Unai be umui hereva maoro, badina tauna be lau inai. ¹⁴ Unai dainai, lau inai umui emui Lohiabada bona hadibaia tauna, to emui aena lau huria, umui danu ta ta emui aena do umui huria be namo. ¹⁵ Badina be dala lau hedinarai vadaeni umui dekenai, vadaeni umui ese danu lau karaia bamona do umui karaia. ¹⁶ Momokani, momokani umui lau hamaoroa, gaukara merona ese iena biaguna ia hereaia lasi, bona hesiai tauna ese ia siaia tauna ia hereaia lasi. ¹⁷ Inai bema umui diba, bona bema umui karaia, be do umui namo.

¹⁸ “Umui ibounai lau gwauraia lasi. Lau abia hidi taudia be lau diba. To Buka Helaga dekenai ia torea herevana be do ia momokani, ia gwau: ‘Egu aniani lau danu ia ania noho tauna ese lau ia hadikaia inai.’ ¹⁹ Harihari be ia do vara lasi gauna lau hamaoroa guna umui dekenai, vadaeni do ia vara neganai, be lau do umui abidadama henia, idia gwauraia guna Tauna be lau inai. ²⁰ Momokani, momokani umui lau hamaoroa, lauegu hesiai tauna ia abia dae tauna ese lau ia abia dae, bona lau ia abia dae tauna ese lau ia siaia Diravana danu ia abia dae.”

Iuda Iskariote ese Iesu ena mase dala do ia karaia

²¹ Iesu be unai bamona ia hereva, vadaeni ena lalona ia hekwarahi, ia gwau, “Momokani umui lau hamaoroa, umui ta ese lauegu mase dala do ia karaia.”

²² Diba tahua taudia be ta ta sibona dekenai idia itaia, idia laloa daradara maragi lasi, ia be daika dekenai ia hereva. ²³ Iena diba tahua tauna ta be Iesu ena badibadinai ia aniani, ia be Iesu ena lalokau tauna. ²⁴ Simona Petero ese toana ia henia Ioane dekenai, Iesu do ia nanadaia, ia gwauraia tauna be daika.

²⁵ Vadaeni unai diba tahua tauna ese Iesu dekenai ia helai kahirakahirao, ia gwau, “Lohiabada e, oi gwauraia tauna be daika?”

²⁶ Iesu ia gwau, “Aniani sisina do lau henia tauna be unai.” Vadaeni aniani sisina ia abia, Iuda Iskariote, Simona ena natuna dekenai ia henia. ²⁷ Iuda ese ia abia, vadaeni Satani ese iena lalona ia vareai. Vadaeni Iesu ese ia hamaoroa, ia gwau, “Oi ura karaia gauna be do oi karaia haraga.” ²⁸ Idia aniani taudia be idia diba lasi dahaka dainai Iesu be unai bamona ia hereva. ²⁹ Haida be idia laloka Iuda be moni maua ia naria dainai Iesu ese ia hamaoroa, aria neganai do idia ania gaudia do ia lao hoia, o ogogami taudia dekenai do ia harihari henia.

³⁰ Unai dainai, Iuda ese aniani ia ania, vadaeni nega tamona ia toreisi, ia raka murimuri dekenai. Ia hanuaboi vadaeni.

Taravatu matamata

³¹ Iuda ia raka murimuri dekenai murinai, Iesu ia gwau, “Harihari Taunimanima ena Natuna ese hairai do ia abia, Dirava danu hairai do ia abia Taunimanima ena Natuna dainai. ³² Bema Dirava ese hairai ia abia iena Natuna dainai, vadaeni Dirava ese sibona ena hairai Natuna dekenai do ia henia, ma karaharaga do ia henia. ³³ Lauegu natudia e, nega daudau lasi umui danu do lau noho. Umui ese lau do umui tahua, to Iuda taudia dekenai lau hamaoroa hegeregereana, lau gwau, ‘Do lau lao gabuna dekenai do umui lao diba lasi,’ umui dekenai danu unai bamona lau hamaoroa. ³⁴ Taravatu matamatana lau henia umui dekenai, inai bamona: Umui ta ta dekenai umui lalokau henia. Lau ese umui dekenai lau lalokau henia hegeregereana, umui danu ta ta dekenai umui lalokau henia. ³⁵ Unai dekena amo taunimanima ibounai do idia diba umui be lauegu diba tahua taudia, ta ta dekenai do umui lalokau henia dainai.”

Petero ese iena hereva dekenamo Iesu do ia hunia

³⁶ Simona Petero ese ia nanadaia, ia gwau, “Lohiabada e, edeseni do oi lao?”

Iesu ia gwau, “Do lau lao gabuna be harihari lauegu murina dekenamo do oi lao diba lasi, to gabeai do oi lao diba.”

³⁷ Petero ese ma ia nanadaia, ia gwau, “Badina be dahaka inai harihari oiemu murina dekenamo do lau mai diba lasi? Lauegu mauri be oi totona do lau atoa diho!”

³⁸ Iesu ia gwau, “Oiemu mauri be lau totona do oi atoa diho, a? Momokani, momokani oi lau hamaoroa, ‘Kokoroku be do ia boiboilasi, oi ese nega toi emu hereva dekenai do ia hunia lau.’”

14

Tamana dekenai idia lao taudia edia dala be Iesu

¹ “Umui lalao hekwarahi lasi, to Dirava dekenai umui abidadama henia, lau dekenai danu umui abidadama henia. ² Egu Tamana ena ruma dekenai noho gabudia be momo herea, bema inai be lasi, be do lau hamaoroa umui dekenai. Badina lau be do lau lao, gabu ta do lau karaia hegaegae umui emui. ³ Bona lau lao, emui gabu ta do lau karaia hegaegae murinai, lau be do lau giroa mai, lau dekenai do lau abia dae umui, vadaeni lau noho gabuna dekenai be umui danu unuseni do umui noho. ⁴ Do lau lao gabuna ena dala danu be umui diba.”

⁵ Toma ia gwau, “Lohiabada e, do oi lao gabuna be ai diba lasi, dala be edena bamona do ai diba?”

⁶ Iesu ia haere, ia gwau, “Dala be lau, hereva momokani be lau, mauri danu lau. Tamana dekenai do idia lao taudia ibounai edia dala ta be lasi, lau sibona. ⁷ Bema lau umui diba, egu Tamana danu do umui diba. Harihari ia lao, egu Tamana umui diba vadaeni, bona umui itaia danu vadaeni.”

⁸ Filipino ese ia noia, ia gwau, “Aiemai ura tamona be inai, Tamana do oi hedinarai ai dekenai.”

⁹ Iesu ia gwau, “Filipo e, lau be nega daudau umui danu lau noho vadaeni, umui diba lasi lau, a? Lau ia itaia tauna ese egu Tamana danu ia itaia. To edena bamona, oi gwau, ‘Tamana do oi hedinarai ai dekenai?’”

¹⁰ Oi hamomokania lasi lau be egu Tamana lalonai, egu Tamana danu lauegu lalona dekenai, a? Umui dekenai lau henia herevadia ibounai be lau sibona lau gwaurai lasi, egu Tamana, lauegu lalona dekenai ia noho, be iena gaukara ia karaia noho. ¹¹ Inai egu hereva be do umui abidadama henia: Lau be egu Tamana ena lalona dekenai, egu Tamana danu be egu lalona dekenai. To bema lasi, gaukara lau karaia gaudia umui lalao. Unai gaukara dainai, lau do umui abidadama henia.

¹² “Momokani, momokani umui lau hamaoroa, lau dekenai ia abidadama henia tauna ese lau karaia karadia ibounai be do ia karaia, bona inai kara do idia hereaia karadia danu do ia karaia, badina lau be egu Tamana dekenai do lau lao. ¹³ Egu ladana dekenai do umui noia gaudia ibounai do lau karaia, vadaeni egu Tamana ese hairai do ia abia, iena Natuna dainai. ¹⁴ Bema gau ta lauegu ladana dekenai umui noia, lau be do lau karaia.

Iesu ese Lauma Helaga do ia siaia

¹⁵ “Bema lau dekenai umui lalokau henia, be lauegu taravatu do umui badinaia. ¹⁶ Vadaeni lau ese Tamana do lau noia, ia ese Durua Tauna ta do ia henia umui dekenai, umui dekenai do ia noho hanaihanai,

17 hereva momokani Laumana unai. Tanobada taudia be ia idia abia dae diba lasi, badina be ia idia itaia lasi, bona ia idia diba lasi. To umui be umui diba, badina ia be umui dekenai ia noho, bona emui lalona dekenai do ia noho.

18 “Lau be do lau rakatania lasi umui, sibona umui noho. Lau be umui dekenai do lau mai. 19 Nega daudau lasi, tanobada taudia ese lau do idia itaia lou lasi, to umui ese lau do umui itaia. Lau mauri dainai, umui danu do umui mauri. 20 Unai neganai umui be do umui diba, lau be egu Tamana lalonai, umui danu lauegu lalonai, lau danu umui emui lalona dekenai.

21 “Lauegu taravatu ia abia dae bona ia badinaia tauna, inai tau ese lau ia lalokau henia. Lau ia lalokau henia tauna, be lauegu Tamana ese ia do ia lalokau henia, lau danu do lau lalokau henia, bona ia dekenai do lau hedinarai.”

22 Iuda Iskariote lasi to Iuda ta ese Iesu ia nanadaia, ia gwau, “Lohi-abada e, badina dahaka ai dekenai do oi hedinarai, to tanobada taudia dekenai do oi hedinarai lasi?”

23 Iesu ia haere, ia gwau, “Lau ia lalokau henia tauna ese lauegu hereva do ia badinaia, vadaeni egu Tamana ese do ia lalokau henia, bona ai ruaosi be ia dekenai do ai lao, ia dekenai do ai noho. 24 To lau ia lalokau henia lasi tauna ese lauegu hereva ia badinaia diba lasi. Umui kamoni herevadia be lauegu hereva lasi, to egu Tamana, lau ia siaia Diravana, iena.

25 “Umui dekenai lau noho neganai, inai hereva lau gwauraia, 26 to Durua Tauna, Lauma Helaga be unai, Tamana ese lauegu gabuna abia totona do ia siaia. Ia ese gau ibounai do ia hadibaia umui dekenai. Hereva ibounai lau henia vadaeni umui dekenai, be ia ese umui emui lalona dekenai do ia hedinaia lou.

27 “Maino umui dekenai lau rakatania, lauegu maino lau henia umui dekenai. Tanobada ese ia henia maino bamona lasi, be lau ese lau henia umui dekenai. Umui laloka hekwarahi lasi, bona umui gari lasi. 28 Lauegu hereva umui kamoni vadaeni, lau gwau do lau lao idau gabu dekenai, bona umui dekenai ma do lau giroa mai. Bema lau umui lalokau henia, egu Tamana dekenai do lau lao herevana do umui moalelaia, badina egu Tamana ese lau ia hereaia. 29 Kara do ia vara lasi neganai, umui lau hamaoroa guna, vadaeni do ia vara neganai, lau do umui abidadama henia.

30 “Harihari ia lao, hereva momo do lau henia lasi umui dekenai, badina be tanobada ena lohia ia mai noho. Ia be lau dekenai mai ena siahu lasi. 31 To tanobada taudia do idia diba, lau ese egu Tamana lau lalokau henia, bona egu Tamana ese lau dekenai ia hereva henia hegeregerena, lau gaukara noho. Umui toreisi. Ita lao.

15

Iesu be vain korikori

1 “Lau be vain korikori, egu Tamana be vain edia uma gabu naria tauna. 2 Lauegu rigi ibounai bema huahua idia atoa lasi, be egu Tamana ese ia kokia. Mai huahua rigi ibounai be ia ese ia utua kwadogi, do idia goeva, bona huahua momo do idia atoa totona. 3 Umui be umui goeva, umui dekenai lau henia herevadia dainai. 4 Lauegu lalona dekenai do umui noho, lau danu umui emui lalona dekenai do lau noho. Rigi be sibona huahua do ia atoa lasi, to bema vain auna do ia badinaia, be

huahua do ia atoa. Vadaeni unai bamona bema umui badinaia lasi lau dekenai, umui emui huahua do ia atoa lasi.

⁵ “Vain be lau, ena rigi be umui. Lau dekenai ia badinaia, bona ia dekenai lau badinaia tauna be iena huahua momo ia atoa, badina be lau dekenai bema umui badinaia lasi, umui be gau ta do umui karaia diba lasi. ⁶ Tau ta bema lau ia badinaia lasi, be do idia nega momokani, rigi bamona, vadaeni do ia kakoro. Rigi unai bamona be do idia haboua, lahi dekenai do idia negea daekau, do idia araia ore.

⁷ “Bema lau do umui badinaia, bona egu hereva be emui lalona dekenai idia noho neganai, emui ura gaudia dekenai do umui noinoi, vadaeni unai gaudia do umui abia. ⁸ Bema huahua momo do umui atoa neganai, egu Tamana be taunimanima ese do idia hanamoa. Unai dekena amo lauegu diba tahua taudia korikori do umui lao. ⁹ Egu Tamana ese lau ia lalokau henia hegeregerena, lau danu umui lau lalokau henia. Egu lalokau dekenai do umui noho hanaihanai. ¹⁰ Bema umui ese lauegu taravatu do umui badinaia, vadaeni egu lalokau dekenai do umui noho, lau hegeregerena, egu Tamana ena taravatu lau badinaia, vadaeni iena lalokau dekenai lau noho.

¹¹ “Inai bamona lau hereva vadaeni umui dekenai, lauegu moale be umui emui lalona dekenai do ia noho totona, vadaeni umui emui moale be do ia momokani.

¹² “Lauegu taravatu be inai, umui ta ta umui lalokau henia, lau ese umui lau lalokau henia hegeregerena. ¹³ Lalokau namo herea momokani be inai, tau ta ese ena mauri do ia atoa diho, iena turana totona. ¹⁴ Lauegu taravatu do umui badinaia, unai dekena amo lauegu turana do umui lao. ¹⁵ Harihari ia lao, umui be hesiai taudia do lau gwauraia lasi, badina hesiai tauna be iena biaguna ena kara ia diba lasi. To umui be lauegu turana do lau gwauraia, badina be lauegu Tamana dekena amo lau kamona herevadia ibounai umui dekenai lau hamaoroa vadaeni.

¹⁶ “Umui ese lau umui abia hidi lasi. Lau ese umui lau abia hidi, bona emui gaukara lau henia umui dekenai, vadaeni do umui lao, emui huahua do idia atoa, do idia noho hanaihanai. Unai dekena amo lauegu ladana dekenai Tamana do umui noia gaudia ibounai, be ia ese do ia henia umui dekenai. ¹⁷ Lauegu taravatu be inai: Umui ta ta do umui lalokau henia.

Tanobada taudia ese diba tahua taudia do idia badu henia

¹⁸ “Tanobada taudia ese umui do idia badu henia, to umui diba vadaeni, idia ese lau dekenai idia badu henia guna vadaeni. ¹⁹ Bema umui be tanobada ena taudia momokani neganai, tanobada taudia ese umui do idia lalokau henia. To umui be tanobada ena lasi, lau ese tanobada dekena amo lau abia hidi umui, unai dainai tanobada ese umui do ia badu henia. ²⁰ Umui dekenai lau hamaoroa herevana do umui laloatao: Hesiai tauna ese iena biaguna ia hereaia lasi. Bema idia ese lau dekenai idia dagedage henia, umui dekenai danu do idia dagedage henia. Bema lauegu hereva idia badinaia, umui emui hereva danu do idia badinaia. ²¹ To inai kara ibounai do idia karaia umui dekenai umui be lauegu dainai, badina be lau ia siaia Diravana be idia diba lasi.

²² “Bema lau mai lasi, bona bema lau hereva henia lasi idia dekenai, idia be do idia kerere lasi, to harihari idia edia kerere be ia noho, bona idia be hereva dalana lasi. ²³ Lau dekenai ia badu henia tauna ese lauegu

Tamana dekenai danu ia badu henia. ²⁴ Tau ta ese do ia karaia guna lasi hoa karadia be idia edia huanai lau karaia vadaeni. Inai kara bema lau karaia lasi, idia be do idia kerere lasi. To momokani inai kara idia itaia, bona idia ese lau bona egu Tamana danu dekenai idia badu henia vadaeni. ²⁵ Unai dekena amo edia taravatu dekenai ia torea herevana ta ia momokani vadaeni, ia gwau, 'Idia ese lau dekenai idia badu henia vadaeni, anina ta lasi.'

²⁶ "To Durua Tauna be Tamana dekenai ia noho. Lau be do lau siaia mai umui dekenai. Hereva Momokani Laumana be unai, Tamana dekena amo do ia mai umui dekenai. Do ia mai neganai, ia ese lau do ia gwauraia hedinarai. ²⁷ Umui danu ese lau do umui gwauraia hedinarai, badina be hamatamaia nega ia mai bona hari, umui be lau dekenai umui noho vadaeni.

16

¹ "Inai hereva lau gwauraia umui dekenai, emui abidadama do umui rakatania garina. ² Dubu dekena amo umui do idia lulua murimuri dekenai. Oibe, nega do ia mai, umui do ia alaia mase tauna be do ia laloe ia be Dirava ena hesiai gaukara ia karaia. ³ Unai bamona do idia karaia, badina lauegu Tamana be idia diba lasi, bona idia diba lasi lau. ⁴ Inai hereva lau gwauraia umui dekenai, badina edia anina do ia vara neganai, do umui laloe, lau ese umui dekenai lau hamaoroa guna vadaeni.

Lauma Helaga ena gaukara

"Gunaguna neganai, inai gaudia lau hamaoroa lasi umui dekenai, badina be unai neganai lau be umui danu ita noho. ⁵ To harihari do lau lao, lau ia siaia Diravana dekenai, to umui ta ese umui nanadaia lasi lau dekenai, umui gwau lasi, 'Edeseni do oi lao?' ⁶ Inai hereva lau gwauraia vadaeni umui dekenai dainai, umui emui lalona be idia hisihisi momokani. ⁷ To inai hereva momokani lau gwauraia umui dekenai: Umui dekenai durua totona do lau rakatania umui, badina be umui bema lau rakatania lasi, Durua Tauna be umui dekenai do ia mai lasi, to do lau lao, vadaeni ia do lau siaia umui dekenai. ⁸ Ia be do ia mai, vadaeni kara dika bona kara maoromaoro, bona Dirava ena kota henia edia anina korikori, be tanobada taudia dekenai do ia hedinarai henia. ⁹ Kara dika do ia hedinarai, badina be lau dekenai idia abidadama henia lasi. ¹⁰ Kara maoromaoro do ia hedinarai, badina be egu Tamana dekenai do lau lao, vadaeni lau do umui itaia lou lasi. ¹¹ Kota henia do ia hedinarai, badina inai tanobada ena lohia be kota dekenai ia lusi momokani vadaeni.

¹² "Lauegu hereva momo idia noho, lau ura hereva henia umui dekenai, to harihari umui be inai hereva do umui abia dae diba lasi. ¹³ To Hereva Momokani Laumana do ia mai, vadaeni ia ese hereva momokani ibounai dekenai umui do ia hakaua, badina be ia sibona ena laloe do ia gwauraia lasi, to do ia kamoni herevadia ibounai do ia gwauraia, gabei do idia vara gaudia danu umui dekenai do ia hamaoroa guna. ¹⁴ Ia ese lau do ia hanamoa, badina be lau dekena amo do ia abia herevadia umui dekenai do ia hamaoroa. ¹⁵ Egu Tamana ena gau ibounai be lauegu, unai dainai lau gwau, 'Ia ese lau dekena amo do ia abia herevadia be umui dekenai do ia hamaoroa.'

¹⁶ "Nega sisina sibona lau do umui itaia lasi, ma nega sisina sibona, lau ma do umui itaia."

Lalohisihisi do idia abia, gabeai do idia moale

¹⁷Iena diba tahua taudia haida idia sibona ta ta dekenai idia nanadaia, idia gwau, “Inai be dahaka Iesu ese ia hamaoroa ita dekenai, ia gwau, ‘Nega sisina lau do umui itaia lasi, ma nega sisina lau do umui itaia,’ bona, ‘Badina be egu Tamana dekenai do lau lao?’” ¹⁸Idia sibona dekenai ma idia nanadaia lou, nanadaia lou, idia gwau, “Inai ‘nega sisina’ ia gwauraia ena anina be dahaka? Inai hereva dekenai be iseda lalona ia kehoa lasi.”

¹⁹Iesu ia diba idia be idia ura ia dekenai idia nanadaia, vadaeni ia gwau, “Lauegu hereva ena anina umui sibona dekenai umui nanadaia, lau gwau, ‘Nega sisina lau do umui itaia lasi, ma nega sisina lau do umui itaia,’ a?” ²⁰Momokani, momokani umui lau hamaoroa, umui be do umui tai mai hisihisi danu, to tanobada taudia be do idia moale. Umui be do umui lalohisihisi, to emui lalohisihisi be moale dekenai do ia lao. ²¹Hahine ta be iena natuna ia havaraia noho neganai hisihisi bada ia abia, badina be iena nega ia ginidae vadaeni, to iena natuna ia abia, vadaeni iena hisihisi be ia laloa lasi, ia moale bada, taunimanima matamata ta tanobada dekenai ia vara dainai. ²²Umui danu, inai harihari be emui lalona idia hisihisi noho, to lau be umui do lau itaia lou, vadaeni emui lalona be do idia moale, bona tau ta ese emui emui moale do ia kokia diba lasi.

²³“Unai dina neganai gau ta do umui noia lasi lau dekenai. Momokani, momokani umui lau hamaoroa, bema gau ta do umui noinoi egu Tamana dekenai, ia ese do ia henia, bema egu ladana umui gwauraia neganai. ²⁴Ia mai bona harihari, gau ta egu ladana dekenai umui do noia lasi. To hari do umui noinoi, bona do umui abia, vadaeni emui moale do ia momokani.

Iesu ese tanobada ena kara ia halusia vadaeni

²⁵“Parabole dekena amo lau hereva vadaeni umui dekenai, to nega ta ia mai noho, parabole dekenai do lau hereva lou lasi umui dekenai, to hereva maoro hedinarai dekena amo, Tamana ena sivarai umui dekenai do lau hamaoroa. ²⁶Unai dina ia ginidae neganai, lauegu ladana dekenai do umui noinoi. Lau hereva lasi lau ese Tamana do lau noia, umui do ia durua totona. Lasi. ²⁷Badina Tamana sibona ese umui ia ura henia, umui ese lau umui ura henia dainai, bona umui ese umui hamomokania vadaeni, lau be Tamana dekena amo lau mai dainai. ²⁸Lau be Tamana lau rakatania, inai tanobada dekenai lau mai, ma tanobada do lau rakatania, Tamana dekenai do lau giroa lao.”

²⁹Iena diba tahua taudia idia gwau, “Namo, harihari oi hereva hedinarai, parabole oi gwauraia lasi inai. ³⁰Harihari aiemai lalona idia kehoa vadaeni, oi be gau ibounai oi diba, anina lasi danu tau ta ese do ia hamaoroa oi dekenai. Unai dekena amo, ai abia dae vadaeni, oi be Dirava dekena amo oi mai.”

³¹Iesu ia gwau, “Harihari umui abidadama henia lau dekenai, a?” ³²Umui kamoni, negana do ia mai, oibe, ia ginidae vadaeni, umui ibounai do umui heau idau gabu idau gabu, lau do umui rakatania, umui ta ta emu gabu dekenai do umui lao. Vadaeni lau be sibona do lau noho. To lau sibona do lau noho lasi, badina Tamana be lau dekenai ia noho. ³³Inai hereva lau hamaoroa vadaeni umui dekenai, egu lalona dekenai maino do umui abia totona. Tanobada dekenai umui be hisihisi do umui abia. To, do umui goada noho, badina be lau ese tanobada lau halusia vadaeni.”

17

Iesu ena guriguri

¹ Iesu unai bamona ia hereva, vadaeni guba dekenai ia itaia, ia guriguri, ia gwau, “Egu Tamana e, negana inai, emu Natuna do oi hanamoa, vadaeni emu Natuna ese oi do ia hanamoa. ² Badina be oi ese siahu oi henia vadaeni, ia ese taunimanima ibounai do ia biagua karaia, bona oi ese ia dekenai oi henia taudia ibounai be ia ese mauri hanaihanai do ia henia idia dekenai. ³ Mauri hanaihanai be inai: Idia ese oi Dirava momokani tamona do idia diba, bona Iesu Keriso, oi ese oi siaia tauna danu do idia diba.

⁴ “Lau ese tanobada dekenai oi lau hanamoa vadaeni, lau dekenai gaukara oi henia danu be lau karaia haorea vadaeni. ⁵ Egu Tamana e, harihari oiemu hairai dekena amo do oi hanamoa lau dekenai, tanobada do ia vara lasi neganai, oiemu vairana dekenai lau abia hairaina.

⁶ “Tanobada dekenai oi henia lau dekenai taudia be oiemu ladana lau hadibaia vadaeni idia dekenai. Idia be oiemu, oi ese oi henidia lau dekenai, idia danu oiemu hereva idia badinaia vadaeni. ⁷ Harihari idia be idia diba, lau dekenai oi henia gaudia ibounai be oi dekena amo idia mai. ⁸ Badina be lau dekenai oi henia herevadia lau henia vadaeni idia dekenai, vadaeni idia ese idia abia dae, bona idia diba momokani, lau be oi dekena amo lau mai, ma idia hamomokania danu oi ese lau oi siaia.

⁹ “Idia totona lau noinoi oi dekenai, tanobada taudia totona lau noinoi lasi oi dekenai. Lau dekenai oi henia taudia totona lau noinoi oi dekenai, badina idia be oiemu. ¹⁰ Lauegu taunimanima ibounai be oiemu, oiemu taunimanima ibounai danu be lauegu. Bona idia dekena amo lauegu hairaina ia hedinarai momokani vadaeni.

¹¹ “Harihari lau be tanobada dekenai do lau noho lasi, idia be tanobada dekenai do idia noho, to lau be oi dekenai do lau mai. Egu Tamana Helaga e, lau dekenai oi henia taudia be oiemu ladana ena siahu dekena amo do oi dogoatao, vadaeni idia be do idia tamona, ita ruaosi ita tamona hegeregereana. ¹² Idia danu ai noho neganai, lau dekenai oi henia taudia lau naria, bona lau dogoatao, oiemu ladana dekenai idia noho. Lau naridia namonamo, idia ta ia boio lasi, dika ia davaria tauna sibonamo, Buka Helaga ena hereva hamomokania totona. ¹³ Harihari lau mai oi dekenai. To tanobada dekenai lau noho neganai, inai hereva lau gwauraia, lauegu moale ese edia kudoudia do ia hahonua momokani totona.

¹⁴ “Oiemu hereva lau henia vadaeni idia dekenai, bona tanobada ese ia badu henia vadaeni idia dekenai, badina idia be tanobada ena lasi, lau hegeregereana, lau be tanobada ena lasi. ¹⁵ Lau noinoi lasi tanobada dekena amo idia oi kokia totona, to lau noinoi Tau Dikana dekena amo idia do oi hamauria. ¹⁶ Idia be tanobada ena lasi, lau hegeregereana, lau be tanobada ena lasi. ¹⁷ Hereva momokani dekena amo idia do oi hahelagaia, oiemu hereva be hereva momokani. ¹⁸ Tanobada dekenai lau oi siaia vadaeni hegeregereana, lau ese danu idia lau siaia vadaeni tanobada dekenai. ¹⁹ Bona idia durua totona lau sibona egu mauri lau henia inai, oi dekenai lau helaga, idia danu be oi dekenai do idia helaga momokani totona.

²⁰ “Idia sibona totona lau noinoi lasi, to edia hereva dekena amo lau do idia abidadama henia taudia totona danu lau noinoi oi dekenai. ²¹ Egu Tamana e, lau ura idia ibounai be do idia tamona, oi be lauegu lalona dekenai oi noho, bona lau be oiemu lalona dekenai lau noho hegeregereana, idia danu iseda lalona dekenai do idia noho. Unai dekena

amo tanobada ese do ia abia dae, oi ese lau oi siaia. ²² Lau dekenai oi henia hairaina bona goada be idia dekenai danu lau henia vadaeni, unai dainai idia be do idia tamona, ita ruaosi ita tamona hegeregerena. ²³ Lau be idia edia lalona dekenai lau noho, oi danu lauegu lalona dekenai oi noho. Unai dainai lau ura idia be do idia tamona momokani. Vadaeni tanobada taudia be do idia diba, oi ese lau oi siaia vadaeni, bona oi ese idia oi ura henia, lau oi ura henia hegeregerena.

²⁴ “Lauegu Tamana e, lau ura be do lau noho gabuna dekenai, be oi henia lau dekenai taudia danu do idia noho, vadaeni lau dekenai oi henia hairaina be do idia itaia, badina be tanobada do oi karaia lasi neganai, oi ese lau dekenai oi lalokau henia. ²⁵ Egu Tamana e, kara maoromaoro Diravana, tanobada taudia be oi idia diba lasi, to lau be lau diba. Bona inai lauegu taudia idia diba vadaeni, oi ese lau oi siaia vadaeni. ²⁶ Oiemu ladana danu lau hadibaia vadaeni idia dekenai, bona do lau hadibaia noho, vadaeni lau dekenai oi henia lalokau badana, be idia edia lalona dekenai do ia noho. Bona lau danu idia edia lalona dekenai do lau noho.”

18

Iesu idia dogoatao

¹ Iesu be unai bamona ia hereva, vadaeni iena diba tahua taudia danu idia raka murimuri dekenai, Kiderona Koura unai kahana dekenai uma gabu ta dekenai idia raka vareai. ² Iuda, Iesu ena mase dala ia karaia tauna, be unai gabu danu ia diba, badina be nega momo Iesu mai ena diba tahua taudia danu unai gabu dekenai idia lao. ³ Unai dainai, Iuda ese tuari taudia, bona dubu biagudia, bona Farisea taudia edia hesiai taudia, ia hakaua, vadaeni unuseni idia lao, tosi bona lamepa bona tuari gaudia danu idia abia lao. ⁴ Iesu be ia dekenai do idia vara gaudia ibounai ia diba, unai dainai Iesu be idia edia vairana dekenai ia lao, ia gwau, “Daika umui tahua?”

⁵ Idia ese idia haere, idia gwau, “Iesu, Nasareta tauna.”

Iesu ia gwau, “Lau inai.”

Iuda danu, Iesu ena mase dala ia karaia tauna, ia danu edia huanai ia gini. ⁶ Iesu unai bamona ia hereva, vadaeni idia edia dorudia dekenai tano dekenai idia moru. ⁷ Iesu ese idia dekenai ma ia nanadaia lou, ia gwau, “Daika umui tahua?”

Ma idia gwau, “Iesu, Nasareta tauna.”

⁸ Iesu ma ia haere idia dekenai, ia gwau, “Umui lau hamaoroa vadaeni, lau inai. Umui tahua tauna be lau inai, lauegu diba tahua taudia be inai, mani do idia lao. ⁹ Unai bamona ia hereva, iena hereva hamomokania totona, ia gwau, ‘Lau dekenai oi henia taudia be ta ia boio lasi.’”

¹⁰ Simona Petero be mai ena tuari kaia, vadaeni ia veria, bona Hahelagaia Tauna Badana ena hesiai tauna ia botaia, iena taiana idiba kahana ia utua oho. Unai hesiai tauna ena ladana be Malako. ¹¹ Vadaeni Iesu ese Petero ia gwau henia, ia gwau, “Tuari kaia be udaia gabuna dekenai oi udaia. Lauegu Tamana ese lau dekenai ia henia kapusi be do lau inua lasi, a?”

Ana dekenai Iesu idia hakaua lao

¹² Vadaeni tuari taudia mai edia biaguna danu, bona Iuda taudia edia hesiai taudia ese Iesu idia dogoatao, idia kwatua. ¹³ Vadaeni Ana dekenai idia hakaua lao guna, badina ia be Kaiapa ena ravana, Kaiapa be Hahelagaia Tauna Badana unai lagani lalonai. ¹⁴ Unai Kaiapa danu ese

Iuda taudia dekenai ia hamaoroa guna vadaeni, ia gwau, “Tau tamona do ia mase taunimanima ibounai totona, umui dekenai hanamoa gauna unai.”

Petero ese iena hereva dekenai amo Iesu ia hunia

¹⁵ Simona Petero ese Iesu ena murina dekenai ia lao, diba tahua tauna ta be ia danu. Unai diba tahua tauna be Hahelagaia Tauna Badana ese ia diba momo, vadaeni inai diba tahua tauna be Iesu danu Hahelagaia Tauna Badana ena ruma magu lalonai idia raka vareai. ¹⁶ To Petero be murimuri dekenai ia gini, vadaeni inai diba tahua tauna, Hahelagaia Tauna Badana ia diba momo tauna, ia raka murimuri dekenai, magu ena iduara ia naria kekeni dekenai ia hereva henia, vadaeni ia ese Petero ia hakaua vareai. ¹⁷ Vadaeni magu ena iduara naria kekeni ese Petero dekenai ia nanadaia, ia gwau, “Oi be unai Iesu ena diba tahua tauna ta, ani?”

Petero ia haere, ia gwau, “Lau be lasi.”

¹⁸ Gima taudia bona hesiai taudia idia keru dainai lahi idia karaia, vadaeni lahi badinai idia gini, edia kopina siahua abia totona. Petero be idia danu ia gini hebou, iena kopina siahua abia totona.

Iesu idia kota henia

¹⁹ Vadaeni Hahelagaia Tauna Badana ese Iesu ia nanadaia, iena diba tahua taudia bona iena hadibaia herevadia dekenai ia nanadaia. ²⁰ Iesu ia haere ia dekenai, ia gwau, “Tanobada taudia dekenai hereva lau gwauraia hedinarai. Nega ibounai dubu lalonai bona Dubu Helaga dekenai lau hadibaia, Iuda taudia idia haboua gabudia ibounai dekenai. Laegu hereva be lau hunia lasi. ²¹ Dahaka dainai lau umui nanadaia? Egu hereva idia kamoni taudia dekenai oi nanadaia, idia be idia diba lau be edena bamona lau hadibaia.”

²² Unai bamona ia haere, vadaeni gima tauna ta ese Iesu ia botiaia, ia gwau, “Hahelagaia Tauna Badana unai bamona oi haere henia, a?”

²³ Iesu ese ia haere, ia gwau, “Bema lau hereva kerere, mani inai hereva kerere oi gwauraia hedinarai, to bema lau hereva maoro, dahaka dainai oi botiaia lau?”

²⁴ Vadaeni Ana ese mai kwatua danu Iesu ia siaia lao, Kaiapa, Hahelagaia Tauna Badana dekenai.

Petero ese iena hereva dekenai Iesu ia hunia lou

²⁵ Simona Petero be lahi badinai do ia gini noho, iena kopina siahua abia totona. Vadaeni idia ese idia nanadaia, idia gwau, “Oi danu be Iesu ena diba tahua tauna ta, ani?”

Iena hereva dekenai ma ia hunia, ia gwau, “Lau be lasi.”

²⁶ To Hahelagaia Tauna Badana ena hesiai tauna ta be Petero ese iena taiana ia utua oho tauna ena varavara, ia gwau, “Iesu danu uma gabu dekenai oi lau itaia, a?”

²⁷ Petero ese iena hereva dekenai Iesu ma ia hunia lou. Vadaeni nega tamona, kokoroku ia boiboi.

Iesu Pilato ena vairana dekenai

²⁸ Idia ese Kaiapa dekena amo Iesu ma idia hakaua, gavana ena ruma dekenai idia abia lao. Daba ia rere vadaeni. Idia be gavana ena ruma lalonai idia vareai lasi, badina idia be helaga, Pasova ena aria do idia ania dainai. ²⁹ Unai dainai, Pilato sibona idia dekenai ia raka murimuri dekenai, vadaeni ia gwau, “Dahaka dainai inai tau umui samania?”

³⁰ Idia haere henia, idia gwau, “Bema ia be mai ena kara dika lasi, ai be do ai mailaia lasi.”

³¹ Vadaeni Pilato ese ma ia hamaoroa idia dekenai, ia gwau, “Umui sibona umui abia, do umui kota henia umui emui taravatu hegeregerena.”

Iuda taudia idia gwau, “Ai be sياهو lasi tau ta do ai alaia mase.” ³² Unai dekena amo Iesu ena hereva ia momokani vadaeni, do ia mase dalana be ia ese ia gwauraia hedinarai guna.

³³ Vadaeni Pilato be ruma badana dekenai ma ia raka vareai lou, Iesu ia boiria, ia nanadaia, ia gwau, “Oi be Iuda taudia edia King, a?”

³⁴ Iesu ia haere, ia gwau, “Oi sibona unai bamona oi hereva, o haida ese unai bamona oi idia hadibaia?”

³⁵ Pilato ia gwau, “Be! Lau be Iuda tauna, a? Emu bese taudia bona dubu biagudia ese lau dekenai oi idia hakaua mai. Dahaka oi karaia vadaeni?”

³⁶ Iesu ma ia haere, ia gwau, “Lauegu Basileia be inai tanobada gauna lasi. Bema lauegu Basileia be inai tanobada gauna, egu hesiai taudia be do idia tuari, Iuda taudia edia imana dekena amo lau do idia hamauria. Gau tamona, lauegu Basileia be iniseni lasi.”

³⁷ Pilato ia gwau, “Inai dainai, oi be king ta, a?”

Iesu ia haere, ia gwau, “Inai be oi ese oi hereva lau be king. Hereva momokani gwauraia hedinarai totona lau vara, bona lau mai inai tanobada dekenai. Hereva momokani idia badinaia taudia ibounai ese lauegu hereva idia kamonaia henia.”

³⁸ Pilato ia gwau, “Hereva momokani be dahaka?”

Iesu ia mase herevana idia gwauraia

Unai bamona Pilato ia hereva, ma ia giroa lou murimuri dekenai, Iuda taudia dekenai ia hamaoroa, ia gwau, “Kerere ta ia dekenai lau davarua lasi. ³⁹ To nega ibounai iseda kara hegeregere, Pasova ena aria neganai tau ta do lau ruhaia murimuri dekenai. Umui ura Iuda taudia umui emui King do lau ruhaia murimuri dekenai, a?”

⁴⁰ Vadaeni idia ma idia boiboi, idia gwau, “Unai tau be lasi! To Baraba oi ruhaia!” Unai Baraba be henaia tauna.

19

¹ Vadaeni Pilato ese Iesu ia abia, bona iena oda dekenai tuari taudia ese Iesu idia dadabaia. ² Bona tuari taudia ese kwara gauna, ginigini dekena amo idia turia, Iesu ena kwarana dekenai idia atoa, bona dabua kakakaka idia atoa iena tauanina dekenai. ³ Vadaeni idia raka kahirakahira ia dekenai, idia gwau, “Iuda taudia edia King e, do oi mauri!” Vadaeni edia imana dekena amo idia botiaia.

⁴ Vadaeni Pilato ma ia raka murimuri dekenai, ia gwau, “Umui itaia, umui emui vairana dekenai lau hakaua murimuri dekenai. Do umui diba, iena kerere ta lau davarua lasi.” ⁵ Iesu be ia raka murimuri dekenai, kwara gauna ginigini dekena amo idia turia gauna be iena kwarana dekenai, dabua kakakaka danu iena tauanina dekenai. Vadaeni Pilato ia gwau, “Itaia! Tauna be inai!”

⁶ Dubu biagudia bona edia gima taudia ese idia itaia, vadaeni idia boiboi, idia gwau, “Oi hasatauroa! Oi hasatauroa!”

Pilato ia gwau, “Umui sibona umui abia, umui hasatauroa. Badina be lau ese iena kerere ta lau davarua lasi.”

⁷ Iuda taudia idia haere henia, idia gwau, “Ai be mai emai taravatu, vadaeni aiemai taravatu hegeregereña ia be do ia mase be ia maoro, badina be ia sibona ia gwaurai, ia gwau ia be Dirava ena Natuna.”

⁸ Pilato be unai hereva ia kamonai neganai, be ia gari dikadika. ⁹ Kota henia gabuna dekenai ma ia raka vareai lou, Iesu ia nanadaia, ia gwau, “Edeseni dekeni amo oi mai?”

To Iesu be ia haere lasi. ¹⁰ Vadaeni Pilato ia gwau, “Lau dekenai oi hereva lasi, a? Oi diba lasi lau be mai siahui oi do lau ruhaia, bona lau be mai siahui oi do lau hasatauroa, a?”

¹¹ Iesu ia gwau, “Bema atai dekenai Diravana ese siahui ia henia lasi oi dekenai, oi be siahui lasi danu do oi noho. Unai dainai, lauegu mase dala ia karaia tauna ena dika ese oiemu dika ia hanaia.”

¹² Unai hereva dainai Pilato ese Iesu ruhaia dalana ia tahua. To Iuda taudia be idia boiboi, idia gwau, “Unai tau bema oi ruhaia, oi be Kaisara ena turana lasi! Bema tau ta ia gwau ia be king, ia ese Kaisara ia hadikaia inai!”

¹³ Pilato ese unai hereva ia kamonai, vadaeni ia ese Iesu ma ia hakaua murimuri dekenai. Vadaeni ia ese kota henia gabuna dekenai ia helai diho, unai gabu ena ladana be Nadi Dehena. Heberu gado dekenai ena ladana be Gabata. ¹⁴ Unai be Pasova Aria idia karaia hegaegae ena dina, negana be dina tubua. Pilato ese Iuda taudia dekenai ia hereva, ia gwau, “Umui itaia, umui emui King be inai.”

¹⁵ Vadaeni idia boiboi, idia gwau, “Oi abia siri! Oi abia siri! Oi hasatauroa!”

Pilato ese ia nanadaia idia dekenai, ia gwau, “Umui emui King do lau hasatauroa, a?”

Dubu biagudia be idia gwau, “Ai be mai emai king ta lasi, Kaisara sibona.”

¹⁶ Vadaeni Pilato ese Iesu ia henia idia dekenai, do idia hasatauroa totona.

Iesu idia hasatauroa

¹⁷ Unai dainai Iesu idia abia, idia hakaua lao. Ia ese iena satauro ia huaia lao, gabu ta dekenai idia lao, ena ladana be Kwara Koukouna Gabuna, Heberu gado dekenai ena ladana be Gologota. ¹⁸ Unuseni Iesu idia hasatauroa, bona tau rua danu, ta be kahana, ma ta be kahana dekenai, Iesu be idia edia huanai.

¹⁹ Vadaeni Pilato ese revareva ia torea, satauro ena atai ia atoa. Ia torea hereva be inai: “Iesu, Nasareta tauna, Iuda taudia edia King.”

²⁰ Iuda taudia momo ese unai revareva idia duahia, badina be Iesu idia hasatauroa gabuna bona hanua badana ena padana be ia daudau lasi, bona unai revareva be Heberu gado dekenai bona Roma gado dekenai bona Helene gado dekenai ia torea. ²¹ Vadaeni Iuda taudia edia dubu biagudia ese Pilato idia hamaoroa, idia gwau, “Oi torea lasi ‘Iuda taudia edia King,’ to inai bamona oi torea, ‘Ia gwau, Lau be Iuda taudia edia King.’”

²² Pilato ia gwau, “Lau torea gauna be lau torea, vadaeni.”

²³ Vadaeni tuari taudia, inai Iesu idia hasatauroa taudia, ese iena dabua idia abia, idia haria kahana 4 dekenai, vadaeni idia taudia 4 ta ta edia kahana idia abia. To iena dabua ta be turia hakapua lasi gauna, dabua badana tamona sibona. ²⁴ Unai dainai, ta ta idia hereva henia, idia gwau, “Ita darea lasi, to laki gadara ita karaia, vadaeni do ita diba

daika ese do ia abia.” Unai dekena amo Buka Helaga dekenai ia torea herevana ia momokani vadaeni, ia gwau,

“Idia ese lauegu dabua idia haria karaia.
Egu dabua be laki gadara dekena amo idia abia.”

Inai tuari taudia be unai bamona idia karaia.

²⁵ Satauro ena badibadinai Iesu ena sinana bona iena sinana maragina bona Maria, Klopa ena adavana, bona Maria, Magadala hahinena, idia gini noho. ²⁶ Iesu ese iena sinana bona ia lalokau henia diba tahua tauna ia itaia, ia kahirakahira idia gini noho. Vadaeni iena sinana dekenai ia hereva henia, ia gwau, “Hahine e, oi itaia, oiemu natuna be unai.”

²⁷ Unai diba tahua tauna dekenai danu ia hereva henia, ia gwau, “Oi itaia, oiemu sinana be unai.” Unai negana ia lao, unai diba tahua tauna ese Maria ia abia dae iena ruma dekenai.

Iesu ia mase vadaeni

²⁸ Unai murinai, Iesu ia diba iena gaukara ibounai ia karaia haorea vadaeni, vadaeni Buka Helaga ena hereva hamomokania totona ia hereva, ia gwau, “Lau ranu mase.”

²⁹ Hodu ta be unusenī, uaina ena mamina ia namo lasi dekenai ia honu. Vadaeni sipanisi idia udaia, unai uaina dekena amo idia hahonua, au latana ta dekenai idia kwatua, vadaeni idia abia isi Iesu ena uduna bibina dekenai. ³⁰ Iesu ese uaina ena mamina ia namo lasi gauna ia abia, vadaeni ia gwau, “Ia ore vadaeni!” Vadaeni iena kwarana ia atoa diho, iena lauma ia henia daekau.

Iesu ena ohena tuari taudia idia gwadaia

³¹ Unai dina be Pasova aria karaia hegaegae dinana, ma kerukeru Sabati be idau, ia helaga momokani dinana ta. Unai dainai Iuda taudia idia ura lasi unai dina dekenai mase taudia idia noho satauro dekenai. Vadaeni Iuda taudia ese Pilato idia noia, unai mase taudia edia aena do ia makohia, bona edia tauanina do ia abia siri. ³² Unai dainai, tuari taudia idia lao, guna tauna ena aena idia makohia, ma tau iharuana ena aena danu, inai Iesu danu idia hasatauroa hebou taudia. ³³ Vadaeni Iesu dekenai ma idia lao, to idia itaia ia be ia mase vadaeni, unai dainai iena aena be idia makohia lasi. ³⁴ To tuari tauna ta ese Iesu ena ohena ia gwadaia io dekenai, vadaeni rara bona ranu idia diho. ³⁵ Inai kara ia itaia tauna^a ese ia gwaurai hedinarai, bona iena hereva be momokani. Ia be ia diba iena hereva be momokani, unai dainai umui danu do umui abidadama henia diba. ³⁶ Madina be unai kara ia vara, Buka Helaga ena hereva hamomokania totona, ia gwau, “Ena turiana ta idia makohia lasi.” ³⁷ Ma ta danu, Buka Helaga ia gwau, “Idia gwadaia tauna be taunimanima ese edia matana dekenai do idia itaia.”

Iesu idia guria

³⁸ Unai kara ia ore murinai, Iosepa, Arimatea tauna, ese Pilato ia noia, Iesu ena tauanina do ia abia siri. Iosepa be Iesu ena diba tahua tauna ta, to Iuda taudia dekenai ia gari dainai, iena abidadama ia hunia. Pilato ese maoro ia henia, vadaeni Iosepa ia lao, Iesu ena tauanina ia abia siri. ³⁹ Nikodemo danu, gunaguna neganai Iesu dekenai ia lao hanuaboi

^a 19:35: “Inai kara ia itaia tauna” be Ioane, Iesu ese ia lalokau henia diba tahua tauna. Badina be inai buka Ioane 19:26,27 ia gwau inai tau Ioane be satauro kahirakahira ia gini noho.

lalonai tauna ia mai. Ia ese muro bona aloe edia muramura idia mikisi gauna ia abia lao, edia metau kilogaram 50 bamona. ⁴⁰ Vadaeni idia ese Iesu ena tauanina idia abia, dabua aukana mai muramura danu dekenai idia kumia, Iuda taudia edia mase guria karana hegeregereana. ⁴¹ Iesu idia hasatauroa gabuna dekenai be uma gabu ta, bona unai uma gabu lalonai be guria gabuna matamata ta, ena lalonai mase tauna ta do idia atoa lasi. ⁴² Unai dainai, idia ese Iesu unuseni idia atoa, badina unai dina be Pasova aria karaia hegaegae dinana, bona unai guria gabuna be kahirakahira.

20

Iesu ia toreisi lou

¹ Pura ena dina ginigunana, Maria, Magadala hahinena, be daba ia diari namonamo lasi neganai, guria gabuna dekenai ia lao. Vadaeni nadi ia itaia, guria gabuna dekenai amo ia kokia vadaeni. ² Unai dainai ia heau lao, Simona Petero bona Iesu ese ia lalokau henia diba tahua tauna dekenai ia lao, ia gwau, “Idia ese Lohiabada be guria gabuna dekenai amo idia kokia vadaeni, edeseni idia atoa be ai diba lasi.”

³ Unai dainai Petero bona inai diba tahua tauna ta idia toreisi, guria gabuna dekenai idia heau lao. ⁴ Ruaosi idia heau hebou, vadaeni inai diba tahua tauna ta ese Petero ia heau hanaia, ia ese guria gabuna dekenai ia ginidae guna. ⁵ Vadaeni ia ese ia itaia lalona dekenai, dabua aukana ia itaia unuseni, to guria gabuna dekenai ia raka vareai lasi. ⁶ Simona Petero ese iena murina dekenai ia lao, maoromaoro guria gabuna lalona dekenai ia raka vareai. Vadaeni ia ese dabua aukadia ia itaia, unuseni idia noho, ⁷ bona taoele danu, Iesu ena kwarana idia kumia gauna, be dabua aukadia danu idia atoa hebou lasi, to idia lokua, ma sibona ena gabu dekenai ia noho. ⁸ Vadaeni guria gabuna dekenai ia ginidae guna diba tahua tauna danu be ia raka vareai, ia ese ia itaia, bona ia hamomokania. ⁹ Badina unai neganai idia be Buka Helaga ena hereva idia do diba lasi, ia gwau Keriso be mase dekenai amo do ia toreisi lou. ¹⁰ Vadaeni inai diba tahua taudia be edia ruma dekenai idia giroa lou.

Iesu be Maria dekenai ia hedinarai

¹¹ Maria be guria gabuna ena murimuri dekenai mai tai danu ia gini noho. Ia tai noho neganai, kwarana ia atoa diho guria gabuna lalonai ia itaia. ¹² Vadaeni ia ese aneru rua mai dabua kurokuro danu ia itaia, Iesu ena tauanina idia atoa gabuna dekenai. Ta be iena aena gabunai, ma ta be iena kwarana gabunai, idia helai noho. ¹³ Idia hereva Maria dekenai, idia gwau, “Hahine e, dahaka dainai oi tai?”

Ia haere idia dekenai, ia gwau, “Egu Lohiabada be idia abia siri vadaeni, idia atoa gabuna be lau diba lasi.”

¹⁴ Unai bamona Maria ia hereva, vadaeni iena vairana ia giroa, Iesu be ia gini noho neganai ia itaia, to ia diba lasi unai be Iesu.

¹⁵ Iesu ese ia nanadaia, ia gwau, “Hahine e, dahaka dainai oi tai? Daika oi tahua?”

Maria ia lalao ia be uma gabu naria tauna ta, vadaeni ia gwau, “Tau badana e, bema inai be oi ese idau gabu ta dekenai oi abia lao be mani gabuna oi hamaoroa lau dekenai, vadaeni do lau lao abia.”

¹⁶ Iesu ia gwau, “Maria e!”

Maria ese iena vairana ia giroa, ia gwau, “Rabouni!” Unai hereva ena anina be “Hadibaia Tauna.”

¹⁷ Iesu ese ia hamaoroa, ia gwau, “Lauegu tauanina oi dogoatao lasi, badina be Tamana dekenai lau do daekau lasi. To lauegu varavara taudia dekenai oi lao, idia do oi hamaoroa egu Tamana bona emui Tamana, egu Dirava bona emui Dirava dekenai do lau daekau.

¹⁸ Vadaeni Maria, Magadala hahinena, be ia lao, diba tahua taudia dekenai ia hamaoroa, ia gwau, “Lohiabada be lau itaia vadaeni!” Vadaeni ia dekenai Iesu ia hereva henia herevadia be ia hamaoroa idia dekenai.

Iesu be iena diba tahua taudia dekenai ia hedinarai

¹⁹ Unai pura ena dina ginigunana hanuaboi neganai, diba tahua taudia be edia ruma iduarana idia koua auka vadaeni, Iuda taudia dekenai idia gari dainai. Vadaeni Iesu be ia lao, idia edia huanai ia gini, ia gwau, “Maino umui abia.” ²⁰ Unai bamona ia hereva, vadaeni iena imana ruaosi bona iena ohena danu ia hedinarai idia itaia. Unai dainai diba tahua taudia idia moale, Lohiabada idia itaia dainai. ²¹ Iesu ma ia hereva henia lou idia dekenai, ia gwau, “Maino umui abia. Tamana ese lau ia siaia hegeregerena, lau danu umui do lau siaia.” ²² Unai bamona ia hereva, vadaeni uduna dekena amo ia hahodi henia idia dekenai, ia gwau, “Lauma Helaga umui abia. ²³ Edia dika do umui gwauatao taudia edia dika be do idia gwauatao, to edia dika do umui gwauatao lasi taudia edia dika be do idia noho.”

Toma ese Iesu ia itaia

²⁴ Toma, idia 12 tauna ta, ena ladana ta Hekapa, be idia danu ia hebou lasi, Iesu idia dekenai ia hedinarai neganai. ²⁵ Unai dainai, diba tahua taudia haida ese ia idia hamaoroa, idia gwau, “Ai be Lohiabada ai itaia vadaeni!”

To ia gwau, “Iena imana dekenai ikoko edia bero bema lau itaia lasi, egu imana kwakikwakina be ikoko idia gwadaia gabuna dekenai bema lau atoa lasi, bona iena ohena dekenai bema egu imana lau atoa vareai lasi, lau be do lau hamomokania lasi.”

²⁶ Dina 8 idia ore murinai Iesu ena diba tahua taudia be ruma lalonai ma idia hebou lou, Toma be idia danu. Iduara idia koua auka momokani, to Iesu be ia vareai lao, edia huana dekenai ma ia gini, ia gwau, “Maino umui abia.” ²⁷ Vadaeni ia ese Toma dekenai ia hereva henia, ia gwau, “Oiemu imana kwakikwakina oi atoa mai, lauegu imana do oi dogoatao, bona oiemu imana danu lauegu ohena dekenai do oi atoa vareai. Vadaeni oiemu laloa daradara oi hadokoa, bona lau dekenai oi abidadama henia.”

²⁸ Toma ese ia haere henia, ia gwau, “Egu Lohiabada! Egu Dirava!”

²⁹ Iesu ia gwau, “Lau oi itaia dainai lau dekenai oi abidadama, ani? Lau idia itaia lasi, to idia abidadama lau dekenai taudia be namo do idia davarai!”

Inai buka Ioane ia torea ena badina

³⁰ Toa momo herea Iesu ese ma ia karaia, iena diba tahua taudia edia vairana dekenai, to inai toa momo herea be inai buka lalonai idia torea haorea lasi. ³¹ To inai idia torea gaudia edia badina korikori be, umui ese do umui abia dae Iesu be Keriso, Dirava ena Natuna, vadaeni do umui abidadama henia dainai, mauri do umui abia iena ladana dekenai.

21

Iesu be diba tahua taudia 7 dekenai ia hedinarai

¹ Unai murinai, Iesu be iena diba tahua taudia dekenai ma ia hedinaraia lou, Tiberia gohu dekenai. Inai bamona ia hedinarai: ² Simona Petero, Toma, ena ladana ta Hekapa, Natanaela, Galilea tauna Kana dekena amo, Sebedeo ena natuna ruaosi, bona diba tahua taudia ma rua danu, be gabu tamona dekenai idia noho. ³ Simona Petero ese idia ia hamaoroa, ia gwau, “Lau be do lau haoda.”

Idia gwau, “Ai be oi danu ita lao.” Vadaeni idia lao, vanagi ta dekenai idia guia, to unai hanuaboi be gwarume ta idia davaria lasi.

⁴ Daba ia rere neganai, Iesu be kone dekenai ia gini, to diba tahua taudia be idia diba lasi unai be Iesu. ⁵ Vadaeni Iesu ia nanadaia idia dekenai, ia gwau, “Lauegu natuna e, umui emui aniani ia noho, a?”

Idia haere, idia gwau, “Lasi.”

⁶ Vadaeni ia ese ia hamaoroa idia dekenai, ia gwau, “Reke be vanagi ena idiba kahana dekenai umui negea diho, gwarume do umui abia.” Unai dainai idia ese idia negea diho, vadaeni reke idia abia isi gwauria, to idia be goada lasi, gwarume momo herea dainai.

⁷ Vadaeni Iesu ena lalokau diba tahua tauna ese Simona Petero ia hamaoroa, ia gwau, “Lohiabada unai.” Simona Petero be iena gaukara totona ena dabua ia kokia, to unai hereva ia kamonai neganai, iena dabua ma ia kwatua lou, vadaeni gohu dekenai ia paudobi. ⁸ To diba tahua taudia orena be vanagi dekena amo kone dekenai idia mai, unai reke danu, gwarume dekenai ia honu gauna, idia veria daekau, badina kone be ia daudau lasi, 100 mita bamona.

⁹ Idia be kone dekenai idia kamokau, vadaeni lahi be unuseni idia itaia, iena latanai be gwarume haida idia noho, bona aniani danu. ¹⁰ Iesu ese ia hamaoroa idia dekenai, ia gwau, “Harihari umui abia gwarume haida umui mailaia.”

¹¹ Unai dainai Simona Petero be vanagi dekenai ia guia, vadaeni reke be kone dekenai ia veria daekau, gwarume badadia dekenai ia honu, ibounai 153. Gwarume idia momo herea, to reke be ia makohia lasi.

¹² Iesu ese ia boiria idia dekenai, ia gwau, “Umui mai, umui aniani.”

Vadaeni diba tahua taudia edia lalona idia hegeregere lasi do idia nanadaia ia dekenai, do idia gwau, “Oi be daika?” Badina idia diba unai be Lohiabada. ¹³ Vadaeni Iesu be ia mai, paraoa ia abia, ia henia idia dekenai, bona gwarume danu.

¹⁴ Unai be nega ihatoina Iesu be iena diba tahua taudia dekenai ia hedinarai, ia toresiis lou murinai.

Lauegu mamoe oi ubua

¹⁵ Idia aniani ore, vadaeni Iesu ese Simona Petero dekenai ia nanadaia, ia gwau, “Simona, Iona ena natuna e, idia ese lau idia lalokau maragi, to oi ese lau oi lalokau henia bada, a?”

Petero ia haere, ia gwau, “Oibe, Lohiabada e, oi diba lau ura henia oi dekenai.”

Iesu ia gwau, “Lauegu mamoe do oi ubua.”

¹⁶ Ma Iesu ese ia nanadaia lou, ia gwau, “Simona Iona e, lau oi lalokau henia, a?”

Ia ese ia haere, ia gwau, “Oibe, Lohiabada e, oi diba lau ura henia oi dekenai.”

Iesu ia gwau, “Lauegu mamoe do oi naria.”

¹⁷ Iesu ese nega ihatoina ma ia nanadaia, ia gwau, “Simona Iona e, oi ura henia lau dekenai, a?”

Petero ena lalona ia hisihisi, badina be nega toi ia dekenai Iesu ia nanadaia, ia gwau, “Oi ura henia lau dekenai, a?” Unai dainai, ia ese ia haere, ia gwau, “Lohiabada e, oi be gau ibounai oi diba, oi diba vadaeni lau ura henia oi dekenai!”

Iesu ia gwau, “Egu mamoe do oi ubua. ¹⁸ Momokani, momokani oi lau hamaoroa, oi be tau matamata neganai, oi sibona oiemu dabua oi kwatua, bona oiemu ura gabuna dekenai oi lao loaloa, to do oi buruka neganai, oiemu imana do oi abia isi, vadaeni tau ta ese oiemu dabua do ia kwatua oi dekenai, vadaeni do oi ura henia lasi gabuna dekenai, oi do idia abia lao.” ¹⁹ Unai hereva dekena amo Iesu ia hedinarai edena mase dekena amo Petero ese Dirava ena hairaina do ia hedinarai. Unai bamona ia hereva, vadaeni ma Iesu ia gwau, “Egu murina dekenai oi raka mai!”

Iesu ese ia lalokau henia diba tahua tauna ena hereva

²⁰ To Petero ese iena vairana ia giroa, Iesu ena lalokau diba tahua tauna ia itaia, idia edia murina dekenai ia raka, anibou neganai Iesu ena ohena kahirakahira dekenai ia helai, ia nanadaia, ia gwau, “Lohiabada e, oiemu mase dala ia karaia tauna be daika?” Diba tahua tauna be unai. ²¹ Unai dainai, Petero ese ia itaia neganai, Iesu ia nanadaia, ia gwau, “Lohiabada e, unai tau be edena bamona do ia karaia?”

²² Iesu ese ia haere henia, ia gwau, “Bema lau ura ia be do ia noho, ela bona do lau giroa mai, unai be edena bamona oi dekenai? To oi be lauegu murina dekenai oi raka mai!”

²³ Inai hereva be Iesu ena ore a taudia edia huanai idia gwauraia loaloa, unai diba tahua tauna be do ia mase lasi, idia gwau. To Iesu be ia hereva lasi, “Ia be do ia mase lasi,” to ia gwau, “Bema lau ura ia be do ia noho ela bona do lau giroa mai, unai be edena bamona oi dekenai?”

²⁴ Iena diba tahua tauna be inai, inai hereva ia gwauraia hedinarai noho, bona ia torea vadaeni tauna. Bona ita diba, inai iena hereva be momokani.

Dokona

²⁵ Kara momo herea danu Iesu ese ma ia karaia. Ibounai bema idia torea, lau laloa tanobada ibounai ena bada be do ia hegeregere lasi, unai buka ibounai haboua totona.

APOSETOLO EDIA KARA

Iesu ia gwauhamata Lauma Helaga do ia siaia

¹ Teofilo e, lauegu buka giniginana lalonai Iesu ia karaia bona ia hadibaia gaudia ibounai lau torea vadaeni, ena gaukara ia hamatamaia nega amo, ela bona Dirava ese ia abia daekau guba dekenai. ² Guba dekenai do ia daekau lasi neganai, Iesu ese iena abia hidi aposetolo taudia ia hadibaia Lauma Helaga ena siahu dekenai, iena gaukara badana do idia karaia totona. ³ Hisihisi ia abia murinai, idia dekenai Iesu ia hedinarai mai mauri danu, toa momokani momo dekena amo. Dina 40 lalonai Iesu idia itaia nega momo, bona Dirava ena Basileia gaudia ia hadibaia idia dekenai. ⁴ Iesu danu idia noho hebou neganai taravatu ia henia idia dekenai, ia gwau, “Ierusalem a umui rakatania lasi, to egu Tamana ia gwauhamata gauna, guna lau hereva henia umui dekenai gauna, do umui naria. ⁵ Badina be Ioane be, ranu dekenai bapatiso ia karaia, to dina momo do ia ore lasi neganai, Lauma Helaga dekenai bapatiso do umui abia.”

Iesu guba dekenai ia daekau

⁶ Aposetolo be Iesu danu idia hebou neganai, idia nanadaia, idia gwau, “Lohiabada e, inai negana be, basileia do oi henia lou Israela taudia dekenai, a?”

⁷ Idia dekenai Iesu ia gwau, “Egu Tamana sibona ena siahu dekenai ia laloe dina bona nega, umui be diba lasi. ⁸ To, umui be dohore siahu umui abia, Lauma Helaga umui dekenai ia diho neganai, bona lauegu ladana do umui gwauraia hedinarai Ierusalem dekenai, Iudea ibounai, Samaria ena kahana ibounai, do ia lao bona tanobada ena kahana ibounai.” ⁹ Unai bamona ia hereva, bona idia ese edia matana dekenai Iesu idia itaia noho neganai, guba dekenai ia daekau lao. Bona ori ta ia koua, vadaeni idia itaia lou lasi.

¹⁰ Idia be matana dekenai guba idia itaia noho, Iesu ia daekau lao neganai, tau rua mai dabua kurokuro idia dekenai idia gini. ¹¹ Bona idia gwau, “Galilea taudia e, badina dahaka umui gini bona guba dekenai umui itaia noho? Inai Iesu, hari umui ia rakatania, bona guba dekenai ia daekau lao, be dohore ia giroa mai, hari umui itaia ia daekau hegeregerena.”

Aposetolo be Ierusalem dekenai idia hebou

¹² Inai murinai Ierusalem dekenai idia giroa lou, unai ororo ladana Olive dekena amo, inai Olive Ororo bona Ierusalem ena daudau be kilomita ta bamona. ¹³ Ierusalem lalonai idia raka vareai neganai, atai ai daiutu dekenai idia daekau, idia edia noho gabuna be unai. Edia ladana be inai, Petero, Ioane, Iamesi, Andrea, Filippo, Toma, Batolomeo, Mataio, Iamesi Alepeo, Simona, ia be Roma taudia lulua totona ore tauna, bona Iuda Iamesi. ¹⁴ Idia ibounai be, nega momo guriguri totona idia haboua, mai edia lalona tamona, hahine haida danu idia dekenai idia haboua, bona Maria, Iesu ena sinana, bona Iesu ena tadina taudia danu.

Iuda Iskariote ena gabu abia tauna idia abia hidi

¹⁵ Unai neganai Petero be diba tahua taudia edia vairana dekenai ia gini, inai haboua taudia be 120 bamona. ¹⁶ Ia gwau, “Lauegu varavara taudia e, Buka Helaga ena revareva ia momokani vadaeni, Lauma Helaga ese Davida ena uduna dekenai ia gwauraia herevana, Iuda ena sivaraina. Inai tau, Iuda, ese Iesu dogoatao taudia ia hakaudia lao. ¹⁷ Ia be aiemai orea tauna ta bona aiemai gaukara dekenai ia be durua tauna ta.

¹⁸ “Tena kara dika davana moni ia abia dekenai tano ta ia hoia, gabeai ia be iena kwarana dekenai ia moru, ia mase, bona iena bogana ia pou, bona iena bogana anina ia bubua murimuri dekenai. ¹⁹ Ieruselema dekenai idia noho taudia ibounai ese inai sivarai idia kamonai, bona unai tano ena ladana edia gado dekenai idia gwauraia be Akeledama, unai anina be ‘rara tano.’

²⁰ “Badina be Salamo buka lalonai be inai bamona ia torea vadaeni: ‘Tena ruma be anina lasi be ia namo. Tau ta lalona dekenai do ia noho lasi.’ Ma Salamo ta lalonai inai bamona ia torea: ‘Tena dagi danu idau tauna ese do ia abia.’

²¹ “Unai dainai Lohiabada Iesu ena toreisi lou ia gwauraia hedinarai diba tauna ta iseda orea lalonai ita abia vareai be namo. Ia be Iesu bona ita danu ia loaloa hebou tauna ta, Iesu ena bapatiso negana, ia mai bona Dirava ese guba dekenai ia abia daekau negana. ²² Unai bamona tauna, Iesu bona ita dekenai ia noho nega ibounai, ita abia hidi be namo. Ia ese ita danu Iesu ena toreisi lou do ita gwauraia hedinarai.”

²³ Unai dainai tau rua idia abia hidi, Iosepa ena ladana idia gwauraia Barasaba, ena ladana ta danu be Iusto, bona tau ta ena ladana be Mataia. ²⁴ Gabeai idia guriguri, idia gwau, “Lohiabada e, taunimanima ibounai edia lalona be oi diba, inai tau ruaosi, mani oi hedinarai daika be oi ese oi abia hidi, inai aposetolo gaukara bona hesiai gaukara do ia abia, ²⁵ badina be Iuda ese iena kara dika dainai inai gaukara ia rakatania, iena gabu korikori dekenai ia lao.” ²⁶ Vadaeni nadi rua dekena amo abia hidi laki gadara idia karaia, bona Mataia ena nadi ia uini. Unai dainai aposetolo taudia 11 ese Mataia idia abia vareai aposetolo edia orea lalonai.

2

Lauma Helaga ia diho

¹ Pentekoste ena dina ia ginidae neganai, Iesu idia abidadama henia taudia ibounai gabu tamona dekenai idia haboua. ² Vadaeni, guba dekena amo karaharaga regena ta ia diho mai, lai bada ena regena hegeregere, idia helai hebou noho ruma ena kahana ibounai ia ha-honua. ³ Bona lahi ena malana hegeregere idia hedinarai. Inai malana be idia makohia kahana ta ta, bona unai taudia ta ta edia kwarana latanai idia diho mai. ⁴ Vadaeni unai abidadama taudia ibounai be Lauma Helaga dekenai idia honu, bona gado idauidau dekenai idia hereva, Lauma Helaga ese idia dekenai ia henia hegeregere.

⁵ Unai neganai Iuda taudia Ieruselema dekenai idia noho, Dirava idia laloo momo taudia, tanobada idauidau dekena amo idia mai. ⁶ Unai sivarai idia kamonai neganai, taunimanima momo idia haboua, bona idia hoa bada, badina be idia ta ta edia gado ta ta dekenai idia kamonai. ⁷ Ibounai idia laloo momo bona idia hoa, idia gwau, “Inai herevahereva noho taudia be Galilea taudia sibona. ⁸ To edena bamona ita ibounai

be ta ta iseda gado korikori dekenai, idia hereva neganai ita kamona noho? ⁹ Ita be Patia dekena amo, Media dekena amo, Elama dekena amo, bona iseda taudia haida idia mai gabudia be: Mesopotamia, Iudea, Kapadokia, Ponto, Asia, ¹⁰ Perigia, Pamupulia, Aigupito, bona Kurene hanua dekena amo (unai be Libia ena kahana ta). Haida be vadivadi taudia Roma dekena amo, ¹¹ haida be Iuda taudia, haida be Iuda dekenai idia halaoa taudia. Haida danu Kerete taudia bona Arabia taudia. Inai taudia be Dirava ena hoa gaudia idia herevalaia ita dekenai, iseda gado korikori dekenai.” ¹² Ibounai idia hoa, bona idia daradara. Idia ta ta idia hereva, idia gwau, “Inai kara ena anina be dahaka?”

¹³ To haida be idia kirikiri unai abidadama taudia dekenai, idia gwau, “Idia be uaina matamata idia inua momo.”

Petero ena haroro

¹⁴ To Petero, aposetolo taudia 11 danu idia toreisi, iena gadona ia habadaia, ia haroro taunimanima momo dekenai, ia gwau, “Iudea taudia, bona Ierusalem dekenai umui noho taudia e, inai kara ena anina do lau hadibaia umui, laegu hereva umui kamona. ¹⁵ Inai taudia be idia kekero lasi, umui laloa bamona, badina hari negana be 9 okaloka dabai. ¹⁶ To inai be Ioela, peroveta tauna ia gwauraia guna ena hereva gauna, ia gwau:

¹⁷ “Dirava ia gwau: Inai nega do kahirakahira ia doko neganai, laegu laumana dohore lau bubua diho,

taunimanima ibounai dekenai.
Vadaeni umui emui natudia tau bona hahine,
be dohore idia peroveta karaia,
bona emui uhau taudia ese,
Dirava ena hunia gaudia do idia itaia.

Ma danu emui buruka taudia do idia nihi.

¹⁸ Inai danu, unai dinadia dekenai,
laegu hesiai taudia bona hesiai hahine dekenai,
egu Laumana do lau bubua diho,
bona dohore idia peroveta karaia.

¹⁹ Ma lau ese hoa gaudia do lau hedinaraiia guba dekenai,
bona toa gaudia tanobada dekenai:

Rara bona lahi bona kwalahu.

²⁰ Dina be dohore ia dibura,
bona hua be dohore ia kakakaka, rara bamona.

Inai bamona toa idia vara neganai do umui diba,

Lohiabada ena Dina Badana bona namo hereana be do ia kahirakahira vadaeni.

Unai Dina be mai garina momokani.

²¹ Bona Lohiabada ena ladana dekenai do idia boibo taudia ibounai be mauri do idia davarai.’

²² “Israela taudia e, inai hereva dekenai umui kamona: Iesu, Nasareta tauna, Dirava ese umui dekenai ia siaia hedinaraiia, bona siahu kara bona hoa kara bona toa kara umui emui huanai Dirava ese ia karaia iena imana dekenai, umui danu diba. ²³ Inai Iesu, be Dirava ese iena ura bona ena diba hegeregere ia laloa guna, umui emui imana dekenai do ia atoa. Vadaeni umui ese taravatu laloa lasi taudia edia imana dekena amo Iesu umui hasatauroa, bona umui hamasea. ²⁴ To Dirava ese ia hatorea isi lou, mase ena hisihisi dekena amo ia ruhaia, badina mase ese Iesu ia dogoatoo diba lasi. ²⁵ Badina Davida be inai bamona Iesu ia herevalaia, ia gwau:

‘Lohiabada be nega ibounai egu vairana dekenai lau itaia.

Ia be lau kahirakahira ia noho dainai,
gau ta ese lau ia hagaria lasi.

²⁶Unai dainai lauegu kudouna ia moale,
bona mai moale danu lau hereva noho.
Lau be taunimanima sibona,

to Dirava ese ia gwauhamata gau namodia, be lau naria noho.

²⁷Badina be mase taudia edia gabu dekenai,
lauegu lauma do oi rakatania lasi.

Bona oiemu Helaga Tauna be bodaga do ia abia lasi,

oiemu ura dainai. ²⁸Mauri dekenai ia lao dalana oi hadibaia vadaeni lau dekenai.

Lauegu moale dohore oi habadaia,

oiemu vairana dekenai lau noho dainai.’

²⁹“Lauegu varavara taudia e, iseda sene tauna Davida lau herevalaia umui dekenai be namo. Ia mase, idia guria, bona hari inai nega, iena guria gabuna ia noho ita dekenai. ³⁰To ia be peroveta tauna, bona ia diba danu, Dirava ese gwauhamata ia henia vadaeni ia dekenai, ia gwau, ‘Oiemu bese tauna ta dohore ia helai oiemu helai gabuna dekenai.’

³¹Bona Davida ese diba guna hereva ia gwauraia, Keriso dohore ia toreisi lou, ia gwau, ‘Dirava ese do ia rakatania lasi mase taudia edia gabu dekenai, bona iena tauanina ese bodaga do ia abia lasi.’

³²“Inai Iesu be Dirava ese ia hatorea isi vadaeni, ai ibounai be ai itaia, bona ai diba vadaeni. ³³Ia be Dirava ese ia abia daekau vadaeni, iena imana idibana kahana dekenai. Bona ia ese Tamana ia gwauhamata henia gauna, Lauma Helaga ia abia, bona ia bubua diho vadaeni. Harihari unai Lauma ena siahu umui itaia, bona umui kamoni danu. ³⁴Badina be Davida ia daekau lasi guba dekenai Iesu hegeregereana, to ia sibona ia gwau:

‘Lohiabada ese lauegu Lohiabada dekenai ia hamaoroa, ia gwau:

Lauegu idiba kahana dekenai oi helai,

³⁵ela bona oi dekenai idia tuari taudia,
be oiemu aena atoa gauna dohore lau halaoa.’

³⁶“Unai dainai, Israela bese taudia ibounai idia diba momokani be namo, inai Iesu, satauro dekenai umui hamasea tauna, be Dirava ese Lohiabada bona Keriso ia halaoa vadaeni.”

Taunimanima momo ese edia lalona idia giroa, bona bapatiso idia abia

³⁷Inai hereva idia kamoni neganai idia gari momo, idia ese Petero bona aposetolo taudia dekenai idia nanadaia, idia gwau, “Aiemai varavara taudia e, dahaka do ai karaia?”

³⁸Petero ia hereva idia dekenai, ia gwau, “Umui ibounai ese emui lalona umui giroa bona bapatiso umui abia, Iesu Keriso ena ladana dekenai, umui emui kara dika do idia gwauatao totona, bona Lauma Helaga do umui abia, Dirava ena harihari gauna. ³⁹Badina be gwauhamata ia noho umui dekenai, bona umui emui natudia dekenai, bona daudau idia noho taudia ibounai dekenai, io, Lohiabada iseda Dirava ia boiboi henia taudia ibounai dekenai.”

⁴⁰Hereva momo dekenai danu Petero ese idia ia sisiba henia, bona ia hereva goadagoada, ia gwau, “Inai nega noho gagevageva taudia dekena amo umui heau mauri.” ⁴¹Iena hereva idia abia dae taudia be bapatiso idia abia, bona unai dina tamona lalonai, taunimanima 3000 bamona be edia orea lalonai idia vareai.

Abidadama taudia matamata edia kara namodia

⁴² Nega ibounai idia haboua noho, aposetolo edia hadibaia herevadia idia kamonai totona, bona turana idia karaia, aniani idia ania hebou, bona idia guriguri danu. ⁴³ Bona ibounai idia gari, badina hoa kara bona toa kara momo aposetolo taudia ese idia karaia. ⁴⁴ Inai Iesu badinaia taudia ibounai idia noho hebou, bona gau ibounai idia abia hebou. ⁴⁵ Edia gau bona edia tano idia hoia, bona davana idia haria karaia, gau lasi taudia dekenai, hegeregere idia henia. ⁴⁶ Dina ibounai mai laloo tamona danu Dubu Helaga lalonai idia haboua, bona edia ruma dekenai idia aniani hebou, mai moale bona mai laloo manau danu. ⁴⁷ Idia ese Dirava idia hanamoa noho, bona taunimanima ibounai be idia dekenai idia moale. Vadaeni dina ibounai, Lohiabada ese mauri ia henia taudia, be abidadama taudia edia orea lalonai ia haboua.

3

Petero, Ioane danu ese aena ia dika tauna idia hanamoa

¹ Dina ta, 3 okaloka adorahi guriguri neganai, Petero, Ioane danu Dubu Helaga dekenai idia daekau. ² Unai gabu dekenai tau ta, aena dika ia vara, dina ibounai idia huaia lao, Dubu Helaga ena iduara, ladana “Namo Herea” dekenai idia atoa, ia helai. Bona Dubu Helaga daekau taudia, idia dekenai ia noinoi karaia. ³ Ia itaia Petero bona Ioane ruaosi idia daekau neganai, idia dekenai ia noinoi, gau ta idia henia. ⁴ Petero bona Ioane danu idia itaia goada noho, vadaeni Petero ia gwau, “Oi itaia ai.” ⁵ Unai hereva ia kamonai neganai ia laloo be gau ta do idia henia. ⁶ Petero ia gwau, “Siliva bona golo lau dekenai be lasi, to lau dekenai ia noho gauna do lau henia oi, Iesu Keriso, Nasareta tauna, ena ladana dekenai oi toreisi, oi raka.” ⁷ Petero ese unai tau ena imana idibana ia veria daekau, bona nega tamona iena aena bona iena komukomu be idia goada vadaeni. ⁸ Vadaeni ia roho, ia gini, ma ia raka lao. Bona idia danu, Dubu Helaga lalonai ia raka vareai, ia raka, ia roho, ia raka, ia roho, ma Dirava ena ladana ia hanamoa noho. ⁹ Taunimanima ibounai idia itaia, ia raka bona Dirava ia hanamoa noho. ¹⁰ Bona idia diba, ia be Dubu Helaga ena iduara ladana “Namo Herea” dekenai ia helai noho bona moni ia noinoi tauna, bona idia hoa dikadika ia dekenai ia vara gauna dainai.

Petero ma ia haroro

¹¹ Aena ia namo tauna ese Petero bona Ioane ia dogoatao noho. Taunimanima ibounai be mai hoa bada danu idia heau lao idia dekenai. Unai gabu ena ladana be “Solomona ena Dehe.” ¹² Vadaeni Petero ese idia ia itaia neganai, taunimanima dekenai ia hereva, ia gwau, “Israela taudia e, badina dahaka inai gau dekenai umui hoa bada? Badina dahaka ai umui itaia noho? Umui laloo aiemai siahu bona aiemai namo dekenai inai tauna ai hanamoa, ma ia raka, a? ¹³ Aberahamo bona Isako bona lakobo edia Dirava, bona iseda sene taudia edia Dirava ese iena hesiai tauna Iesu ia hanamoa vadaeni, to umui ese Pilato ena imana dekenai umui atoa, bona Pilato ia ura ruhaia neganai umui ura lasi ia. ¹⁴ Helaga bona Kara Maoromoaro Tauna umui ura lasi, to Pilato dekenai umui noinoi, ala-ala tauna ia ruhaia umui dekenai.

¹⁵ “Mauri ia havaraia Tauna be umui alaia ia mase, to Dirava ese mase dekena amo ia hatorea isi vadaeni, inai gaudia dekenai ai be itaia bona diba taudia. ¹⁶ Iena ladana ena siahu dekena amo inai aena dika tauna ese goada ia abia, inai tau umui itaia bona umui diba. Momokani,

abidadama Iesu dekenai ese inai tau ia hanamoa vadaeni, umui ibounai emui vairana dekenai.

¹⁷ “Lauegu varavara e, lau diba Iesu dekenai inai kara umui karaia badina be umui diba lasi dekenai. Emui lohia taudia danu be idia diba lasi. ¹⁸ To Dirava ese guna iena peroveta taudia edia uduna dekenai ia hereva Keriso ese hisihisi do ia abia, bona hari inai hereva be ia momokani vadaeni.

¹⁹ “Inai dainai umui emui lalona umui giroa, bona Dirava ese emui kara dika do ia kokia. Gabeai Lohiabada ese goada matamata do ia henia umui dekenai. ²⁰ Bona Dirava ese Keriso umui dekenai do ia siaia mai, ia ese guna umui totona ia Abia Hidi Tauna, Iesu unai. ²¹ To guba dekenai do ia noho, ela bona Dirava ese gau ibounai do ia karaia matamata, ia ese guna iena peroveta taudia helagadia edia uduna dekenai ia hereva bamona.

²² “Mose ese iseda sene taudia dekenai ia hereva, ia gwau, ‘Lohiabada emui Dirava ese peroveta tauna ta do ia siaia umui dekenai, emui varavara tauna ta, lau bamona. Ia gwaurai herevadia ibounai do umui kamonai. ²³ Bona unai peroveta tauna idia kamonai henia lasi taudia ibounai be dohore idia kokia Dirava ena bese taudia dekena amo, bona do idia mase.’ ²⁴ Momokani, bona peroveta taudia ibounai danu, Samuela dekena amo ia mai bona hari, be inai dina idia gwaurai vadaeni.

²⁵ “Dirava ena gwauhamata, iena peroveta taudia ese idia gwaurai gaudia, be umui ese do umui davaria. Ma Dirava ese emui sene taudia dekenai ia gwauhamata gauna, be umui emui danu. Gauna be, Aberahamo dekenai Dirava ia gwau, ‘Oiemu tubudia dekena amo tanobada bese ibounai do lau hanamoa.’ ²⁶ Dirava ese iena Hesiai Tauna Iesu ia abia hidi, bona ia siaia mai guna umui dekenai, namo do umui abia totona. Inai namo ena anina be, ia ese emui lalodia do ia hagiroya, vadaeni umui ta ta emui dika daladia do umui rakatania.”

4

Petero bona Ioane idia kwatua

¹ Petero bona Ioane ese taunimanima dekenai idia hereva noho negani, hahelagaia taudia bona Dubu Helaga pulisi taudia edia lohia bona Sadukea taudia be idia ruaosi dekenai idia lao. ² Idia badu inai tau ruaosi dekenai, badina be idia hadibaia taunimanima dekenai, Iesu ia toreisi lou dainai, mase taudia danu idia toreisi lou. ³ Bona idia ese aposetolo taudia idia kwatua, dibura ruma lalonai idia atodia ia lao bona dabai, badina be dina ia diho dainai. ⁴ To taunimanima momo ese Petero bona Ioane ena hereva idia kamonai dainai Iesu dekenai idia abidadama henia. Abidadama taudia ibounai be 5000 bamona.

Petero bona Ioane Kaunsolo ese ia kota henidia

⁵ Kerukeru dina dekenai hanua lohia taudia bona hanua tau badadia bona taravatu hadibaia taudia be Ierusalem dekenai idia hebou. ⁶ Ana, Hahelagaia Tauna Badana, bona Kaiapa, bona Ioane, bona Alesana, bona Hahelagaia Tauna Badana ena iduhu taudia ibounai danu be unuseni. ⁷ Idia ese Petero bona Ioane ruaosi be idia edia vairana dekenai idia haginia, idia henanadaia, idia gwau, “Edena siahu dekenai, o daika ena ladana dekenai inai kara umui karaia?”

⁸ Unai negani Petero be Lauma Helaga ese ia hahonua, bona idia ia hamaoroa, ia gwau, “Hanua lohia taudia bona Israela ena tau badadia e, ⁹ hari umui nanadaia, inai raka diba lasi tauna edena bamona ai durua,

bona edena bamona ia namo vadaeni. ¹⁰ Namu umui ibounai umui diba, bona namo Israela taudia ibounai danu idia diba, inai Iesu Keriso, Nasareta tauna, umui hasatauroa, bona Dirava ese mase dekena amo ia hatorea isi tauna, iena ladana dainai inai tau be umui emui vairana dekenai ia gini mai goada danu. ¹¹ Iesu be Buka Helaga ese ia herevalaia, inai bamona:

‘Inai nadi, umui ruma haginia taudia ese umui ura henia lasi, to hari ia be ruma ena kona nadi badana momokani ia gini noho.’

¹² Hamauria be Iesu sibona ese ia henia diba taunimanima dekenai. Badina be tanobada ibounai lalonai, ladana idauna ta Dirava ese ia henia lasi, ita do ia hamauria totona.”

¹³ Kaunsolo taudia ibounai ese Petero bona Ioane idia itaia, idia be gari lasi, ma idia itaia danu idia ruaosi be sikuli bada lasi bona aonega bada lasi taudia. Inai dekenai idia hoa, bona idia diba vadaeni idia be Iesu ena bamona taudia. ¹⁴ To inai tau idia itaia, ia namo lou, ia gini idia ruaosi danu. Inai dainai kaunsolo taudia be dala lasi hereva ta ma idia gwauraia.

¹⁵ To Petero bona Ioane dekenai idia hereva, “Inai kaunsolo ena ruma umui rakatania, umui lao murimuri.” Idia lao murimuri neganai kaunsolo taudia ma idia herevahereva. ¹⁶ Idia gwau, “Dahaka dohore ita karaia inai taudia ruaosi dekenai? Badina be idia ruaosi be toa ta idia karaia vadaeni, inai sivarai be ia hedinarai vadaeni Ierusalem noho taudia ibounai dekenai, bona ita hunia hegeregere lasi. ¹⁷ To inai be namo lasi taunimanima ma haida danu inai sivarai idia kamona. Inai dainai idia ruaosi do ita hagarai, ita taravatua, Iesu ena ladana be taunimanima ta dekenai do idia hereva lou lasi.”

¹⁸ Gabeai Petero bona Ioane dekenai idia boiboi, idia dekenai idia hamaoroa, Iesu ena ladana do idia harorolaia lou lasi, bona do idia hadibaia lou lasi, lasi momokani.

¹⁹ To Petero bona Ioane ese idia dekenai idia haere, idia gwau, “Mani umui lalao, bema Dirava ai kamona henia lasi, to umui dekenai ai kamona, inai be maoro Dirava ena vairana? ²⁰ Badina be ai itaia bona ai kamona gaudia ai hunia diba lasi, aiemai uduna ai koua diba lasi.”

²¹ Ma kaunsolo taudia ese idia ruaosi idia hagarai lou, gabeai idia siaia, idia lao. Kaunsolo be dala lasi hisihisi idia dekenai ia henia, badina be taunimanima ibounai ese Dirava idia hanamoa, hari idia vara gaudia dainai. ²² Badina be inai hoa kara ese ia hanamoa tauna ena mauri lagani be 40 mai kahana.

Abidadama taudia idia guriguri

²³ Kaunsolo ia siaidia lao murinai, Petero bona Ioane ese idia giroa lou edia turadia dekenai, bona dubu biagudia bona hanua tau badadia edia hereva idia dekenai idia hamaoroa. ²⁴ Idia kamona vadaeni, bona mai lalao tamona danu idia ibounai idia guriguri goada Dirava dekenai, idia gwau, “Lohiabada e, oi ese guba bona tanobada bona davara bona idia lalonai noho gaudia ibounai oi karaia. ²⁵ Guna Lauma Helaga dekena amo, aiemai sene tauna, oiemu hesiai tauna Davida ena uduna dekenai oi hereva, oi gwau:

Idau bese taudia badina dahaka idia badu,
bona dahaka dainai Dirava hadikaia lalao idia karaia kava noho’

²⁶ Tanobada idau idau edia king idia gini noho,

bona hanua lohia taudia idia haboua noho,
Lohiabada bona iena Keriso edia dala idia koua totona.’

²⁷ “Momokani, Heroda bona Pontio Pilato bona idau bese taudia bona Israela bese taudia idia haboua tamona inai hanua lalonai, oiemu hesiai Tauna helagana Iesu, guna oi abia hidi Tauna, do idia hadikaia totona. ²⁸ Idia ese oiemu siahu bona oiemu ura dekena amo oi laloa guna gauna ena kara ibounai idia karaia. ²⁹ Lohiabada e, edia hagaria hereva harihari do oi laloa, bona oiemu hesiai taudia dekenai goada oi henia, vadaeni ai ese oiemu hereva do ai gwauraia, gari lasi. ³⁰ Oiemu imana danu mani do oi atoa gorere taudia edia latanai, bona oi hanamodia, bona hoa bona toa karadia do oi karaia, Iesu, oiemu hesiai Tauna helagana ena ladana dekenai.”

³¹ Edia guriguri ia ore neganai, idia haboua ruma be ia mareremarere, bona Lauma Helaga ese ibounai ia hahonua, bona Dirava ena hereva idia gwauraia, mai goada danu.

Ekalesia taudia mai lalona tamona idia noho

³² Abidadama taudia ibounai mai kudouna tamona bona mai lalona tamona danu idia noho. Bona tau ta ia laloa lasi iena gau be iena sibona, to edia gau ibounai be idia haria, ibounai edia. ³³ Aposetolo taudia ese mai siahu bada danu Lohiabada Iesu ena toreisi lou idia harorolaia. Bona Dirava ena hariharibada be idia ibounai dekenai ia noho. ³⁴ Idia huanai tau ta ia ogogami lasi. Badina be mai edia tano o ruma taudia ese edia gau idia hoia, bona edia davana moni idia abia lao, aposetolo taudia edia vairana dekenai idia atoa diho. ³⁵ Bona aposetolo taudia ese ta dekenai idia henidia, edia ogogami hegeregerena.

³⁶ Tau ta, ena ladana be Iosepa, aposetolo ese iena ladana idia atoa Banaba, anina be “Goada henia tauna.” Ia be Levi iduhu tauna, bona ia vara gabuna be Kupro motumotu. ³⁷ Iena tano ta ia hoia, bona ena davana moni ia mailaia, aposetolo edia vairana dekenai ia atoa diho.

5

Anania bona Sapira

¹ To tau ta ena ladana be Anania, iena adavana Sapira danu, idia edia tano ta idia hoia. ² To Anania ese unai tano ena davana kahana ia dogoatao, iena adavana danu ia diba. Kahana sibona ia atoa diho aposetolo edia vairana dekenai. ³ To Petero ia gwau, “Anania e, badina dahaka Satani ese oiemu kudouna ia hahonua, bona oi koikoī Lauma Helaga dekenai, tano ena davana kahana oi dogoatao noho? ⁴ Oi hoia lasi neganai, inai tano be oiemu, a? Bona oi hoia neganai, ena davana be oiemu, a? Badina dahaka inai kara oi laloa oiemu kudouna dekenai? Oi ese taunimanima oi koia lasi, to Dirava oi koia.” ⁵ Anania be inai hereva ia kamona neganai, ia moru diho, ia mase momokani. Bona inai sivarai idia kamona taudia ibounai idia gari maragi lasi. ⁶ Bona uhau taudia idia toreisi, Anania ena tauanina idia kumia dabua dekenai, idia huaia lao, idia guria.

⁷ Hora toi bamona ia ore neganai, iena hahine ia raka vareai, to ia diba lasi dahaka ia vara. ⁸ Bona Petero ia nanadaia, ia gwau, “Oi hamaoroo lau dekenai, umui ruaosi ese tano umui hoia davana gauna be inai, a?”

⁹ Ia be ia haere, ia gwau, “Oibe, inai sibona.”

Bona Petero ia gwau henia, ia gwau, “Badina dahaka umui ruaosi laloa tamona dekenai Lohiabada ena Lauma umui koia? Itaita, oiemu adavana idia guria memero be idia raka mai inai, bona oi danu do idia huaia lao.” ¹⁰ Bona nega tamona Petero ena aena badinai ma ia moru diho,

ia mase momokani. Bona uhau taudia idia raka vareai, idia itaia inai hahine ia mase vadaeni. Bona idia huaia lao, idia guria iena tau ena badinai. ¹¹ Vadaeni unai neganai, ekalesia taudia ibounai, bona sivarai idia kamona taudia ibounai ese gari bada idia abia.

Toa momo herea

¹² Toa kara bona hoa kara momo aposetolo taudia idia karaia hanua taudia edia vairana dekenai, bona ibounai Dubu Helaga dekenai idia haboua noho, Solomona ena Dehe lalonai, mai edia lalona tamona danu. ¹³ To taunimanima haida idia dekenai idia haboua lasi, badina idia gari dainai. To hanua taudia ese ekalesia taudia edia kara idia hanamoa, mai moale danu. ¹⁴ Bona Lohiabada idia abidadama henia taudia momo herea, tatau bona hahine idia dekenai idia haboua lao. ¹⁵ Gorere taudia danu idia huaia lao, dala badinai idia atodia diho, gedu bona patapata latanai, Petero ia raka hanaia neganai, iena laulau be dina ese edia latanai do ia atoa totona. ¹⁶ Ierusalema kahirakahira hanua taudia momo danu idia haboua. Idia ese gorere taudia bona mai lauma dika taudia idia abia lao, bona ibounai ese mauri idia davaria.

Aneru ese dibura ruma ia kehoa

¹⁷ Bona Hahelagaia Tauna Badana mai ena bamona taudia, Sadukea edia orea taudia be idia mama bada herea. ¹⁸ Vadaeni idia ese aposetolo taudia idia dogoatao, bona dibura ruma lalonai idia koua. ¹⁹ To hanu-aboi neganai, Lohiabada ena aneru ta ese dibura ruma ena iduara ia kehoa, idia ia hakaua lao murimuri dekenai bona ia gwau, ²⁰ “Vadaeni umui lao, Dubu Helaga lalonai umui gini, bona inai mauri matamata herevana ibounai hanua taudia dekenai do umui hadibaia.” ²¹ Inai hereva idia kamona, vadaeni daba maragi neganai Dubu Helaga lalonai idia raka vareai, bona edia hadibaia gaukara idia hamatamaia.

To Hahelagaia Tauna Badana mai ena bamona taudia ese, kaunsolo taudia bona Israela ena tau badadia idia haboudia, bona hereva idia siaia dibura ruma dekenai, aposetolo taudia idia hakaua mai totona. ²² Opea taudia idia lao, to dibura ruma lalonai aposetolo taudia idia davaria lasi. Idia giroa lou bona kaunsolo dekenai idia hamaoroa, idia gwau, ²³ “Dibura ruma dekenai ai ginidae neganai iduara be koua namonamo, gima taudia danu iduara badinai idia gini, to iduara ai kehoa neganai, tau ta ai davaria lasi.”

²⁴ Dubu biagudia bona Dubu Helaga pulisi taudia edia lohia, bona dubu biagudia ese inai hereva idia kamona neganai idia daradara bada, idia diba lasi inai kara ena anina be dahaka.

Aposetolo idia hedinarai kota dekenai

²⁵ Bona tau ta idia dekenai ia lao, ia samani, ia gwau, “Dibura ruma dekenai umui koua taudia be Dubu Helaga lalonai idia gini, hanua taudia idia hadibaia noho.” ²⁶ Vadaeni Dubu Helaga pulisi taudia edia lohia bona iena hesiai taudia danu idia lao, aposetolo taudia idia hakaua mai, to idia dagedage henidia lasi, hanua taudia ese nadi dekenai idia do idia hodoa garina.

²⁷ Idia hakaudia vareai, kaunsolo taudia edia vairana dekenai idia gini, bona Hahelagaia Tauna Badana ese idia ia nanadaia. ²⁸ Ia gwau, “Ai ese taravatu ai atoa, umui hadibaia lasi inai ladana dekenai. To hari emui hadibaia hereva dekenai Ierusalema ibounai umui hahonua vadaeni, bona inai tau ena mase badina umui atoa ai dekenai.”

²⁹ To Petero bona aposetolo taudia danu idia haere, idia gwau, “Dirava ai kamona henia be namo, taunimanima ai kamona henia be dika. ³⁰ Inai Iesu, umui ese satauro dekenai umui atoa, umui alaia mase, be iseda tamadia edia Dirava ese ia hatorea isi vadaeni. ³¹ Bona Dirava ese danu Iesu ia abia daekau iena imana idibana dekenai. Dirava ese inai Iesu iseda Gunalaia Tauna bona Hamauria Tauna ia halaoa vadaeni, Israela taudia ese edia lalona do idia giroa, bona edia kara dika do ia gwauatao totona. ³² Inai gaudia dekenai ai be gwauria hedinarai taudia, Lauma Helaga ese danu inai gaudia ia gwauria hedinarai. Inai Lauma be Dirava ese ia henia iena kamona henia taudia dekenai.”

Gamaliela ia sisiba, Kaunsolo ese Aposetolo do ia hadikaia lasi

³³ Kaunsolo taudia ese unai hereva idia kamona neganai, idia badu maragi lasi, bona idia ura aposetolo idia alaia mase. ³⁴ To Farisea tauna ta, ena ladana be Gamaliela, ia toreisi kaunsolo lalonai, ia be taravatu hadibaia tauna ta, taunimanima ibounai idia matauraia. Ia hereva goada, aposetolo taudia idia siaia lao murimuri dekenai nega sisina. ³⁵ Idia siaia lao, vadaeni kaunsolo dekenai Gamaliela ia gwau, “Israela taudia e, umui naria namonamo dahaka umui karaia inai taudia dekenai. ³⁶ Guna Teuda ia toreisi. Ia gwau, ‘Lau be mai ladana.’ Bona ia dekenai taunimanima 400 bamona idia hakapua, to ia danu idia alaia mase, bona iena ore taudia ibounai be idia heau boio, bona edia gaukara be ia ore vadaeni. ³⁷ Teuda ena murinai Iuda, Galilea tauna, be taunimanima edia ladana torea nega dekenai ia toreisi, taunimanima momo ia dekenai ia veridia, to ia danu idia alaia mase, bona iena ore taudia ibounai be idia heau boio, bona edia gaukara be ia ore vadaeni. ³⁸ Inai dainai lau hamaoroa umui, inai taudia umui dogoatao lasi, umui rakatanidia. Badina be bema inai hereva bona inai kara be taunimanima dekena amo ia mai, dohore anina ia vara lasi. ³⁹ To, bema ia be Dirava dekena amo ia mai, umui be hegeregere lasi edia dala umui koua, Dirava danu umui tuari henia garina.”

Aposetolo idia moale, Keriso ena ladana dekenai hisihisi idia abia dainai

⁴⁰ Kaunsolo ese Gamaliela ena hereva idia kamona henia, vadaeni aposetolo idia boiria idia mai, bona ibounai idia dadabaia. Ma taravatu idia atoa, Iesu ena ladana dekenai idia hadibaia lou lasi, vadaeni idia ruhaia, idia siadia lao. ⁴¹ Unai neganai, aposetolo taudia ese kaunsolo idia rakatania mai moale bada danu. Edia moale badina be, Dirava ese idia ia abia hidi vadaeni Iesu ena ladana dainai hisihisi do idia abia. ⁴² Bona dina ibounai, Dubu Helaga lalonai bona ruma lalonai, taunimanima idia hadibaia noho, bona Iesu Keriso ena Sivarai Namona idia gwauria noho. Inai gaukara idia hadokoa lasi.

6

Tau 7 idia abia hidi, Aposetolo idia durua totona

¹ Unai neganai, Iesu ena diba tahua taudia idia momo daekau. Bona Helene gado idia hereva Iuda taudia, ese Heberu gado idia hereva Iuda taudia dekenai idia maumau. Idia gwau, “Dina ibounai, aniani idia haria neganai, aiemai vabu dekenai umui henia hegeregere lasi.” ² Inai dainai aposetolo ese diba tahua taudia ibounai idia boiridia hebou, idia gwau, “Ia namo lasi Dirava ena hereva haroro gaukara ita hadokoa, aniani haria gaukara karaia totona. ³ Aiemai varavara e, umui emui huanai

tatau 7 umui abia hidi, ladana namo taudia, Lauma Helaga bona aonega dekenai idia honu taudia, idia dekenai inai gaukara do ita henia. ⁴ To ai be guriguri bona haroro do ai goada karaia noho.”

⁵ Inai hereva be ibounai idia abia dae, bona haida idia abia hidi, Stefano, abidadama bada bona Lauma Helaga dekenai ia honu tauna, bona Filipino, bona Prokoro, bona Nikanoro, bona Timona, bona Pamena, bona Nikolao, ia be Antioka tauna, Iuda tauna dekenai idia halaoa. ⁶ Inai taudia idia haginia aposetolo edia vairanai, bona aposetolo idia guriguri murinai, idia edia imana idia atoa edia latanai.

⁷ Bona Dirava ena hereva ia bada daekau, bona diba tahua taudia idia momo daekau Ierusalem dekenai, bona hahelagaia taudia momo danu ese Iesu ena dala idia abia dae.

Stefano idia dogoatao

⁸ Stefano be abidadama bona siahu dekenai ia honu, bona ia ese hoa kara bona toa kara badadia taunimanima edia vairanai ia karaia. ⁹ To dubu ore a ta ena ladana be “Ruhaia Taudia,” ena taudia haida, bona Kurene bona Alesandria bona Kilikia bona Asia taudia haida, ese Stefano danu idia hepapahuahu. ¹⁰ To idia be hegeregere lasi Stefano idia koua, badina be ia hereva neganai, Lauma Helaga ese aonega bada ia henia dainai. ¹¹ Inai taudia ese haida ma idia abia, edia lalona idia ania, bona idia gwau, “Ai ese iena hereva dikana ai kamonai. Stefano ese Mose bona Dirava danu edia ladana ia hadikaia.” ¹² Inai dala dekenai idia ese hanua taudia bona tau badadia bona taravatu hadibaia taudia idia habadua, bona Stefano dekenai idia heau lao, idia dogoatao, bona kaunsolo taudia vairanai idia abia lao. ¹³ Unusenani samania koikoi taudia idia haginia, idia gwau. “Inai tau be nega ibounai iena hereva dekenai inai Dubu Helaga bona Mose ena taravatu ia hadikaia. ¹⁴ Ai danu iena hereva ai kamonai, ia gwau Iesu, Nasareta tauna ese inai Dubu Helaga do ia kokia, bona Mose ese ai dekenai ia henia karadia do ia haidaua.” ¹⁵ Bona kaunsolo lalona idia helai taudia ibounai ese Stefano ena vairana idia itaia noho neganai, iena vairana be aneru ta ena vairana hegeregere.

7

Stefano idia kota henia

¹ Hahelagaia Tauna Badana ia gwau, “Inai hereva be momokani, a?”

² Stefano ia haere, ia gwau, “Lauegu varavara bona lauegu tamana ibounai e, lauegu hereva umui kamonai. Iseda sene tauna Aberahamo ia noho Mesopotamia neganai, Harana dekenai ia noho lasi neganai, Hairai Diravana ese ia dekenai ia hedinarai. ³ Ia gwau, ‘Oiemu tano bona oiemu varavara oi rakatania, bona tano dohore lau hadibaia oi, unai tano dekenai do oi lao.’ ⁴ Inai dainai Aberahamo ese Kaledoa taudia edia tano ia rakatania, Harana dekenai ia lao, unusenani ia noho. Gabeai, iena tamana ia mase murinai, unai gabu dekena amo Dirava ese ia hakaua mai inai tano dekenai, hari umui noho gabuna. ⁵ To iena tano momokani sisina ia henia lasi Aberahamo dekenai, iena aena gini gabuna hegeregere danu ia henia lasi. To Dirava ia gwauhamata, tano do ia henia, gabeai unai tano be iena natudia bona iena iduhu taudia edia tano momokani. Inai gwauhamata ia henia neganai Aberahamo be natuna lasi. ⁶ Dirava ese ma inai bamona ia hamaoroa, ia gwau, ‘Oiemu natudia edia iduhu taudia be idau taudia edia tano dekenai do idia noho. Unai tano dekenai hesiai gaukara do idia karaia, bona

hisihi do idia abia lagani 400 lalonai.’ ⁷ Dirava ma ia gwau, ‘Unai oiemu bese idia hisihisi henia besena do lau kota henia, bona gabeai oiemu natudia, oiemu bese taudia, ese unai tano do idia rakatania, bona lau dekenai do idia tomadiho inai gabu dekenai.’ ⁸ Bona kopina utua taravatu Dirava ese ia henia Aberahamo dekenai, iena gwauhamata toana. Gabeai Aberahamo ese Isako ia havaraia, bona Isako ena kopina ia utua dina namba 8 dekenai. Isako danu Iakobo ia havaraia, bona Iakobo ese iduhu kwarana taudia 12 ia havaradia.

⁹ ‘Inai iduhu kwarana taudia ese edia tadina Iosepa dekenai idia mama, bona Aigupito dekenai idia hoia, hesiai mai gua tauna do ia lao totona. To Dirava ese Iosepa danu ia noho. ¹⁰ Bona Dirava ese Iosepa ena hisihisi ibounai dekena amo ia hamauria, bona toana namo bona aonega Iosepa dekenai ia henia, Farao, Aigupito ena king ena vairanai. Vadaeni Farao ese Iosepa dekenai siahu ia henia, ia be Aigupito ena gavana badana, bona Farao ena ruma taudia edia lohia.

¹¹ ‘To hitolo bada negana ia vara Aigupito tano ibounai bona Kanana tano ibounai dekenai, hisihisi bada danu, bona iseda sene taudia be aniani idia davaria lasi. ¹² Iakobo ia kamona Aigupito dekenai paraoa ia noho, bona ia ese iseda sene taudia ia siaidia lao nega ginigunana. ¹³ Nega iharuana dekenai Iosepa ese sibona ia hedinarai iena kakana dekenai, bona Iosepa ena bese Farao ese ia diba. ¹⁴ Bona Iosepa ese hereva ia siaia, iena tamana Iakobo mai ena varavara ibounai, taunimanima 75, ia boibo idia mai ia dekenai. ¹⁵ Vadaeni, Iakobo ia diho lao Aigupito dekenai, bona unai tano dekenai ia bona iseda sene taudia idia mase. ¹⁶ Bona edia tauanina idia huaia lao Sekema dekenai, bona gurua gabuna lalonai idia gurua. Unai gurua gabuna Aberahamo ese moni dekenai ia hoia Hamoro ena natuna dekena amo.

¹⁷ ‘Dirava ena gwauhamata Aberahamo dekenai ia hamomokania negana be kahirakahira neganai, iseda sene taudia Aigupito lalonai edia hutuma be ia bada daekau. ¹⁸ Ela bona idau king ta Aigupito ia naria, ia diba lasi Iosepa. ¹⁹ Ia ese iseda sene taudia ia koia, hisihisi ia henidia, bona taravatu ia atoa, idia edia natuna matamata ibounai idia negea murimuri dekenai, idia mase totona. ²⁰ Unai neganai Mose ia vara, toana namo merona. Hua toi iena tamana ena ruma dekenai idia ubua. ²¹ Bona idia rakatania murimuri dekenai neganai, Farao ena natuna kekeni ese ia abia, bona ia ese ia ubua bona iena natuna ia halaoa. ²² Inai dekenai Aigupito taudia edia aonega ibounai Mose dekenai idia hadibaia, unai murinai hereva bona kara dekenai ia be mai siahuna.

²³ ‘Mose ena lagani 40 neganai, laloa ta ia abia, iena varavara Israela taudia ia itaia gwauraia. ²⁴ Bona idia ta ia itaia, Aigupito tauna ese ia hadikaia noho, vadaeni ia lao, ia hadikaia tauna ia durua, Aigupito tauna ia alaia mase, davana ia henia vadaeni. ²⁵ Ia laloa iena varavara taudia be inai bamona dohore idia laloa, ‘Dirava ese Mose ena imana dekena amo ita dohore ia hamauria.’ To inai bamona idia laloa lasi. ²⁶ Kerukeru, heatu taudia, Israela taudia rua, be Mose ese ia itaia, ia ura edia heatu ia koua, bona maino karaia. Idia dekenai ia hereva, ia gwau, ‘Tatau e, umui be varavara, badina dahaka umui sibona umui hadikaia noho?’ ²⁷ To iena varavara ia hadikaia tauna ese Mose ia doria lao, ia gwau, ‘Daika ese aiemai lohia bona aiemai kota biaguna oi ia gwauraia?’ ²⁸ Oi ura lau oi alaia, varani Aigupito tauna oi alaia bamona?’ ²⁹ Inai hereva ia kamona dekenai Mose ia heau, bona Midiana tano dekenai ia noho idau tauna bamona, unuseni natuna mero rua ia havaraia.

³⁰ “Lagani 40 murinai, taunimanima lasi gabuna, Sinai Ororo dekenai, Lohiabada ena aneru ta ia hedinarai Mose dekenai, au ginigini ia arai noho gabuna lalonai. ³¹ Mose ia itaia neganai ia hoa. Ia lao kahirakahira, itaia namonamo totona. Lohiabada ena gadona ia kamonai, Lohiabada ia gwau, ³² ‘Lau be oiemu tubuna ena Dirava, Aberahamo bona Isako bona Iakobo edia Dirava.’ Mose ia heudeheude, bona ia ura lasi itaia, gari dainai. ³³ Bona Lohiabada ese ia dekenai ia gwau, ‘Oiemu tamaka oi kokia, badina oi gini noho gabuna be tano helagana. ³⁴ Lau be momokani lauegu taunimanima Aigupito dekenai edia hisihisi lau itaia vadaeni. Edia taitai lau kamoni, bona lau diho mai inai, hamauridia totona. Harihari oi toreisi, dohore lau siaia oi Aigupito dekenai.’

³⁵ “Inai Mose, guna idia negea, idia gwau, ‘Daika ese lohia bona kota biaguna tauna oi ia gwaurai?’ To inai tau Mose be Dirava ese ia siaia, lohia bona hamauria tauna ia halaoa vadaeni, au ginigini dekenai ia hedinarai aneru ena durua dainai. ³⁶ Mose ese Israela taudia Aigupito dekena amo ia hakaudia lao, hoa kara bona toa kara ia karaia Aigupito dekenai, Davara Kakakaka dekenai, bona taunimanima lasi gabuna dekenai lagani 40 lalonai. ³⁷ Inai Mose danu ese Israela taudia dekenai ia hereva, ia gwau, ‘Dirava ese umui dekenai peroveta tauna ta dohore ia haginia, umui emui varavara korikori tauna, lau bamona.’ ³⁸ Israela taudia be taunimanima lasi gabuna dekenai idia haboua, be Mose danu ia noho. Oibe, iseda sene taudia danu be Mose ia noho. Bona unai neganai danu, Sinai Ororo dekenai aneru ta ese Mose ia hereva henia. Ia ese Dirava ena mauri hereva ia abia, ita dekenai do ia henia totona.

³⁹ “To iseda sene taudia idia ura lasi iena hereva idia kamoni, idia negea, bona Aigupito idia ura henia lou. ⁴⁰ Bona Arona dekenai idia hereva idia gwau, ‘Dirava haida ita dekenai oi karaia, iseda vairana dekenai dohore idia lao, badina be inai Mose, ita ia hakaua Aigupito tano dekena amo tauna, ai diba lasi dahaka ia vara ia dekenai.’ ⁴¹ Unai neganai boromakau ena natuna laulau idia karaia, bona inai kaivakuku ena vairanai boubou gaudia danu idia atoa, bona edia imana idia karaia gaudia dekenai idia moale bada. ⁴² Inai dainai Dirava ese idia ia rakatania, guba ena hisiu do idia tomadiho henia totona, peroveta taudia edia buka lalonai ia torea bamona, ia gwau:

‘Israela taudia e,
lagani 40 taunimanima lasi gabunai boromakau umui aladia,
boromakau bona boubou gaudia lauegu vairana dekenai umui atoa, a?

⁴³ Lasi, Moloka dirava ena palai dubuna,
bona dirava ta ladana Repana ena hisiu umui huaia lao.

Laulaudia be unai,
umui ese umui karaia, tomadiho henia totona.

Bona lau ese,
Babulonia unai kahana dekenai umui do lau abia lao.’

⁴⁴ “Taunimanima lasi tano dekenai idia noho neganai, iseda sene taudia dekenai be Dirava ena Palai Dubu ia noho. Unai Dubu dekenai Dirava ese iena hereva momokani ia gwaurai hedinarai. Mose ese Palai Dubu ia karaia, Dirava ese ia hamaoroa hegeregere, bona Dirava ena palani, Mose ese ia itaia gauna hegeregere. ⁴⁵ Gabeai iseda sene taudia, Iosua danu idia mai, idau taudia edia tano abia totona. Bona Dirava ese unai idau bese taudia ia luludia iseda sene taudia edia vairana dekena amo. Unai neganai inai Palai Dubu idia huaia mai, bona

ia noho iniseni, ia mai bona Davida ena nega. ⁴⁶ Davida be toana namo tauna Dirava ena vairanai, bona ia noinoi, Iakobo ena Dirava ena ruma ta do ia haginia. ⁴⁷ To ruma haginia tauna be Solomona.

⁴⁸ “To Atai ai Momokani Dirava be taunimanima idia karaia ruma dekenai ia noho lasi, peroveta tauna ia hereva bamona, ia gwau:

⁴⁹ ‘Lohiabada ia gwau:

Guba be lauegu helai gabuna,
tanobada be lauegu aena atoa gauna.

Ruma edena bamona ta do oi haginia lau totona?

⁵⁰ Lauegu laga-ani gabuna be edena?

Inai gau ibounai be lau sibona ese lau karaia lasi, a?”

⁵¹ “Umui ura dika taudia e, umui emui kudouna bona taiana be Dirava ura henia lasi taudia edia bamona! Umui ese nega ibounai Lauma Helaga umui koua noho! Umui emui tamadia edia kara be umui danu umui karaia noho. ⁵² Daika peroveta tauna umui emui sene taudia ese idia dagedage henia lasi? Kara Maoromaoro Tauna ena mai sivaraina idia gwauraia guna taudia be idia aladia mase. Bona inai Tau be harihari umui samania, bona umui alaia mase vadaeni. ⁵³ Umui be aneru idia henia taravatuna umui abia vadaeni, to umui badinaia lasi!”

Stefano idia hodoa mase

⁵⁴ Kaunsolo taudia be inai hereva idia kamona neganai idia badu dikadika, bona edia isena idia ha-aukaia ia dekenai. ⁵⁵ To Stefano be Lauma Helaga dekenai ia honu, bona iena matana dekenai guba ia itaia noho, Dirava ena hairaina ia itaia, bona Iesu danu, Dirava ena idiba kahana dekenai ia gini noho. ⁵⁶ Bona ia gwau, “Inai, lau itaia guba ia kehoa, Taunimanima ena Natuna danu lau itaia, Dirava ena idiba kahanai ia gini noho!”

⁵⁷ To idia boibo bada herea, bona edia taiana idia koua. ⁵⁸ Vadaeni ia dekenai idia heau lao, idia veria hanua murimuri dekenai, bona nadi dekenai idia hodoa. Itaia noho taudia ese edia dabua be uhau tauna ta ladana Saulo ena aena badinai idia atoa. ⁵⁹ Idia hodoa neganai, Stefano ia guriguri, ia gwau, “Lohiabada Iesu e, lauegu laumana oi abia dae!”

⁶⁰ Bona ia tui diho, ia boibo, ia gwau, “Lohiabada e, inai kara dika ena davana oi henidia lasi!” Unai bamona ia hereva, vadaeni ia mase.

8

Iesu badinaia taudia be Saulo ese ia lulua

¹ Saulo ese Stefano ena mase ia ura henia.

Unai Stefano idia alaia dina dekenai dagedage bada ia vara hamatamaia, Ierusalem noho ekalesia taudia idia dagedage henidia, bona Keriso ena taudia idia lulua, vadaeni ibounai idia heau lao Iudea bona Samaria tano ibounai, aposetolo sibodia idia noho Ierusalem dekenai. ² Dirava dekenai idia gari henia taudia haida ese Stefano idia gurua, bona idia tai.

³ To Saulo ese ekalesia taudia ia hadikaia momokani, ruma ibounai lalonai ia raka vareai, tatau bona hahine ia veria, dibura rumadia lalonai ia koua.

Filipo ia haroro Samaria dekenai

⁴ Ia lulua taudia be gabu idau dau dekenai idia lao, Sivarai Namona idia harorolaia. ⁵ Filipo ia diho lao Samaria hanua dekenai, bona hanua taudia dekenai Keriso ena sivarai ia haroro henidia. ⁶ Taunimanima

ibounai, Filipino ena hereva gaudia idia kamoni neganai, bona iena toa ia karaia gaudia idia itaia neganai, mai lalao tamona iena hereva idia abia dae. ⁷ Taunimanima momo dekena amo lauma dikadia idia lao murimuri dekenai, mai boiboi bada danu. Bona marere diba lasi taudia, bona aena dika taudia momo ese mauri idia davaria. ⁸ Bona unai hanua lalonai moale bada ia vara.

⁹ To tau ta ena ladana be Simona, nega daudau unai hanua lalonai ia noho. Ia ese meamea kara ia karaia, bona Samaria hanua taudia be ia dekenai idia hoa. Simona sibona ia gwau ia be tau badana. ¹⁰ Taunimanima ibounai ese, badadia bona maragidia, Simona ena hereva idia kamoni momokani, idia gwau, “Inai tau be Dirava ena Sياهو, ena ladana be Sياهو Badana.” ¹¹ Iena hereva idia kamoni, badina be nega daudau iena meamea kara dekenai idia hoa bada. ¹² To Filipino ese Dirava ena Basilea Sivarai Namona, bona Iesu Keriso ena ladana ia haroro neganai, idia abidadama henia, bona bapatiso idia abia, tatau bona hahine. ¹³ Simona danu ia abidadama henia, bona bapatiso ia abia murinai, Filipino danu ia noho loalao. Bona toa bona hoa bada karadia Simona ese ia itaia neganai ia hoa bada.

Petero bona Ioane idia lao Samaria

¹⁴ Aposetolo taudia Ierusalem dekenai idia kamoni Samaria taudia ese Dirava ena hereva idia abia dae, vadaeni Petero bona Ioane idia siaia Samaria dekenai. ¹⁵ Idia ruaosi idia lao neganai, idia guriguri, Samaria taudia ese Lauma Helaga do idia abia totona. ¹⁶ Badina be Lauma be do ia diho lasi idia ta dekenai, to bapatiso sibona idia abia Lohiabada Iesu ena ladana dekenai. ¹⁷ Vadaeni idia ruaosi edia imana idia atoa idia edia latanai, bona Lauma Helaga idia abia.

¹⁸ Inai Simona ia itaia, aposetolo taudia be edia imana taunimanima edia latanai idia atoa neganai Lauma Helaga idia abia, vadaeni moni ia mailaia bona ia gwau, ¹⁹ “Inai sياهو umui henia lau dekenai, bona lauegu imana ia dekenai lau atoa tauna be Lauma Helaga do ia abia.”

²⁰ To Petero ia hereva ia dekenai, ia gwau, “Oiemu moni be ia dika oi danu, badina be oi lalao Dirava ena harihari gauna oi hoia diba moni dekenai. ²¹ Inai gaukara dekenai oi be gabu lasi, badina be oiemu kudouna be maoro lasi Dirava ena vairanai. ²² Oiemu dika dekena amo oiemu lalona oi giroa, bona Lohiabada dekenai oi guriguri, ia ese sedira oiemu kudouna ena lalao do ia huria totona. ²³ Badina be lau diba, oiemu kudouna be mama dikana dekenai ia honu, bona kara dika ese ia kwatua oi.”

²⁴ Simona ia haere henia, ia gwau, “Umui noinoi Lohiabada dekenai lau dainai, inai hari umui gwauraia gaudia idia vara lasi lau dekenai.”

²⁵ Petero bona Ioane ese Lohiabada ena hereva idia gwauraia hedinari bona idia harorolaia murinai, idia giroa lou Ierusalem dekenai. Dala idia lao neganai idia ruaosi Samaria hanua momo dekenai Sivarai Namona idia haroro henia.

Afrika tauna ese bapatiso ia abia

²⁶ Lohiabada ena aneru ta ese Filipino dekenai ia hereva, ia gwau, “Oi toreisi, henunai kahana dekenai oi lao, Ierusalem ia lao bona Gasa dalana dekenai.” Inai dala be taunimanima lasi gabuna. ²⁷ Vadaeni Filipino ia toreisi, ia lao. Etiopia tauna ta ia mai. Ia be eunuko, dagi badana tauna, Kanedake, Etiopia ena kwini hahine ena koho ia naria tauna. Guriguri totona ia lao Ierusalem dekenai, bona hari ia giroa lou

noho hanua dekenai. ²⁸ Iena kariota dekenai ia helai bona Isaia peroveta tauna ena buka ia duahia. ²⁹ Lauma ese Filipino dekenai ia gwau, “Oi lao, kariota dekenai oi guia.” ³⁰ Vadaeni Filipino ia heau lao, bona ia kamona inai Etiopia tauna ese peroveta Isaia ena buka ia duahia noho. Filipino ia gwau, “Oi diba dahaka oi duahia, a?”

³¹ Ia haere, ia gwau, “Bema hadibaia tauna lasi, edena bamona lau diba?” Bona Filipino dekenai ia noinoi, ia guia, vadaeni Filipino ia helai ia danu.

³² Buka Helaga ia duahia gabuna lalonai inai bamona ia torea: “Mamoe bamona idia hakaua lao, alaia totona, bona mamoe natuna ena huina idia utua neganai ia boiboi lasi, inai bamona ia danu be regena lasi.

³³ Idia ese hemarai idia henia, bona iena kota dala idia koua. Iena bese taudia daika ese do ia gwauraia?

Badina be iena mauri tanobada dekena amo idia kokia vadaeni.”

³⁴ Vadaeni eunuko tauna ese Filipino dekenai ia nanadaia, ia gwau, “Mani lau oi hamaoroa, edena tauna be peroveta tauna ese ia herevalaia inai bamona? Ia sibona o idau tauna ta ia herevalaia?” ³⁵ Vadaeni, Filipino ese unai duahia gabuna dekena amo ia hamatamaia, bona Iesu ena Sivarai Namona ia hadibaia. ³⁶ Idia ruaosi dala dekenai idia lao, ela bona ranu gabuna ta dekenai idia ginidae. Bona eunuko tauna ia gwau, “Oi itaia, ranu be inai. Dahaka ese egu bapatiso ia koua?”

³⁷ Filipino ia haere, ia gwau, “Bema oiemu kudouna ibounai dekenai oi abidadama henia, bapatiso oi abia be namo.” Bona ia haere, “Lau abidadama henia momokani Iesu Keriso be Dirava ena Natuna.”

³⁸ Vadaeni ia hamaoroa, kariota do ia hadokoa. Bona idia ruaosi ranu lalonai idia diho, Filipino bona eunuko tauna, bona Filipino ese ia bapatisoa.

³⁹ Idia ruaosi be ranu dekena amo idia daekau mai neganai, Lohiabada ena Lauma ese Filipino ia abia lao, bona eunuko tauna ese ia itaia lou lasi, to ena dala dekenai ia lao, mai moale danu. ⁴⁰ To Filipino be Asadoda dekenai ia ginidae. Bona ena laolao lalonai ia vareai hanua ibounai dekenai Sivarai Namona ia harorolaia, ia lao bona Kaisarea dekenai ia ginidae.

9

Saulo ese iena lalona ia giroa

¹ Saulo be Lohiabada ena diba tahua taudia hagarua bona alaia hereva momo ia gwauraia noho. Bona ia lao Hahelagaia Tauna Badana dekenai, ² ia noia, revareva do ia henia, Damaseko dubudia dekenai, revareva be inai bamona ia torea: Bema Saulo ese Iesu ena taudia ia davaria neganai, tatau o hahine do ia kwatua, bona mailaia Ierusalem dekenai. Vadaeni Hahelagaia Tauna Badana ese inai revareva Saulo dekenai ia henia.

³ Vadaeni, Saulo ia raka lao neganai, bona Damaseko kahirakahira ia abia, diari badana ta guba dekena amo ia mai haragaharaga, bona ia koua hagegea. ⁴ Vadaeni Saulo be tano dekenai ia moru, gado ta ia kamona, ia gwau, “Saulo e, Saulo e, badina dahaka lau dekenai oi dagedage noho?”

⁵ Ia haere, ia gwau, “Lohiabada e, oi be daika?”

Bona ia gwau, “Lau be Iesu, oi ese lau dekenai oi dagedage noho. ⁶ To oi toresi, hanua lalonai oi raka vareai, unuseni tau ta ese oi do ia hamaoroa dahaka do oi karaia.”

⁷ To ia danu nega tamona idia raka taudia be idia gini noho, idia hereva diba lasi, badina be gado ta idia kamona, to tau ta idia itaia lasi. ⁸ Vadaeni Saulo be tano dekena amo ia toreisi, iena matana ia kehoa, to ia itaia diba lasi. Bona iena imana dekena amo idia hakaua lao Damaseko dekenai. ⁹ Bona dina toi lalonai gau ta ia itaia lasi, aniani ia ania lasi, bona ranu ia inua lasi.

¹⁰ Diba tahua tauna ta Damaseko dekenai ia noho, ena ladana be Anania. Mata hanai dekenai Lohiabada ia hereva Anania dekenai, ia gwau, “Anania e!”

Ia haere, “Lohiabada e, lau inai.”

¹¹ Bona Lohiabada ia hamaoroa, ia gwau, “Oi toreisi, dala ladana ‘Maoro’ dekenai oi lao. Unuseni tau ta ladana Iuda ena ruma dekenai Taso tauna ladana Saulo oi tahua, badina be ia guriguri noho. ¹² Ia ese mata hanai lalonai tau ta ena ladana Anania ia itaia, ia raka vareai, iena imana ia latanai ia atoa, iena matana ia kehoa totona.”

¹³ To Anania ia haere, ia gwau, “Lohiabada e, unai tau ena sivarai lau kamona vadaeni, taunimanima momo idia gwauraia, oiemu helaga taudia Ierusalem dekenai ia hadikaia bada herea. ¹⁴ Inai gabu dekenai danu, dubu biagudia ese siahu idia henai, oiemu ladana idia gwauraia taudia ibounai kwatua totona.”

¹⁵ Bona Lohiabada ia gwau, “Oi lao, badina inai tau be lau ese lau abia hidi vadaeni, idau bese taudia bona king bona Israela taudia edia vairanai lauegu ladana do ia gwauraia. ¹⁶ Badina ia dekenai be dohore lau hadibaia, ia ese hisihisi momo lauegu ladana dainai do ia abia.”

¹⁷ Vadaeni, Anania ia lao, ruma dekenai ia raka vareai, iena imana ruaosi Saulo ena latanai ia atoa, ia gwau, “Lauegu tadina Saulo e, Lohiabada Iesu, dala oi mai neganai oi dekenai ia hedinarai tauna, ese lau ia siaia, oiemu matana do idia kehoa, bona Lauma Helaga do oi abia totona.” ¹⁸ Bona karaharaga gau haida momoru bama Saulo ena matana dekena amo idia moru, vadaeni iena matana idia kehoa. Gabeai ia toreisi, bapatiso ia abia. ¹⁹ Vadaeni ia aniani, bona iena tauanina ia goada lou.

Saulo ese Keriso ia harorolaia Damaseko dekenai

Saulo be dina haida Damaseko dekenai ia noho, diba tahua taudia danu. ²⁰ Vadaeni nega tamona, dubu lalonai ia ese Iesu ia harorolaia, ia gwau Iesu be Dirava ena Natuna.

²¹ Idia kamona taudia ibounai idia hoa, idia gwau, “Inai be Iesu ena ladana idia gwauraia taudia Ierusalem dekenai ia hadikadia tauna, o lasi? Bona iniseni dekenai ia mai danu, haida do ia kwatua bona dubu biagudia dekenai ia abidia lao totona, a?”

²² To Saulo ena siahu ia bada daekau, bona Iesu ia harorolaia noho, ia gwau ia be Keriso momokani. Inai dainai Iuda taudia Damaseko dekenai idia noho, be idia haere henai diba lasi.

Saulo ese Damaseko ia rakatania

²³ Dina momo ia lao, vadaeni Iuda taudia idia hebou, Saulo idia alaia dalana herevalaia totona. ²⁴ To Saulo be edia alaia herevana ia kamona. Idia be hanua ena ikoukou ibounai idia koua, dina bona hanuaboi, idia alaia mase totona. ²⁵ To diba tahua taudia ese hanuaboi neganai Saulo idia abia, bosea badana lalonai idia udaia, bona varo dekena amo, hanua magu ena murina kahana dekenai idia atoa diho.

Saulo Ierusalem dekenai

²⁶ Saulo be Ierusalem dekenai ia ginidae, ia ura diba tahua taudia danu do ia noho hebou. To ibounai be ia dekenai idia gari, badina be idia hamomokania lasi ia be diba tahua tauna ta. ²⁷ To Banaba ese Saulo ia durua, aposetolo dekenai ia hakaua lao, bona idia dekenai ia hamaoroo, ia gwau, “Saulo ese dala dekenai Lohiabada ia itaia, bona Lohiabada ese ia hereva ia dekenai. Gabeai Damaseko dekenai ia ese Iesu ena ladana ia harorolaia mai goada danu.” ²⁸ Vadaeni Saulo be idia danu ia noho, bona ia lao Ierusalem kahana ibounai dekenai, Lohiabada ena ladana dekenai ia haroro mai goada danu. ²⁹ Bona Saulo ese Helene gado dekenai idia hereva Iuda taudia dekenai ia hereva henia, bona idia danu ia hepapahuahu, to idia ese alaia mase dalana idia tahua. ³⁰ Abidadama taudia idia diba neganai, Saulo idia hakaua lao Kaisarea dekenai, bona gabeai idia siaia lao Taso dekenai.

Ekalesia orea idia tubu daekau

³¹ Unai neganai Iudea tano ibounai, bona Galilea bona Samaria dekenai danu, ekalesia orea ibounai ese maino idia abia vadaeni, bona idia goada daekau, bona Lohiabada dekenai idia gari noho, bona Lauma Helaga ese lalao goada idia dekenai ia henia. Vadaeni ekalesia ia bada daekau.

Petero ese Aenea ia hanamoa

³² Gabeai Petero ia laolao gabu idau idau dekenai, bona nega ta Dirava ena taudia Luda dekenai ia vadivadi henia. ³³ Unai gabu dekenai raka diba lasi tauna ta ia davaria, ladana Aenea, ia be lagani 8 ia hekure noho geda dekenai. ³⁴ Bona Petero ese ia dekenai ia hereva, ia gwau, “Aenea e, hari Iesu Keriso ia hamauria oi. Oi toresi, oiemu geda oi lokua karaia.” Vadaeni maoromaoro ia toresi. ³⁵ Luda bona Sarona taudia ibounai ese idia itaia, bona edia lalona idia giroa Lohiabada dekenai.

Petero ese Tabita mase dekena amo ia hatorea isi

³⁶ Iopa dekenai diba tahua hahine ta ia noho, iena ladana be Tabita. Helene gado dekenai iena ladana be Doreka. Ia be kara namona bona bogahisihisi kara dekenai ia goada dina ibounai. ³⁷ To unai neganai gorere ta ia davaria, ia mase. Idia ese iena tauanina idia hagoevaia, ataia daiutu ta dekenai idia atoa. ³⁸ Luda bona Iopa ena pada be daudau lasi, bona diba tahua taudia idia kamona Petero be Luda dekenai ia noho. Inai dainai idia ese tatau rua idia siaia lao ia dekenai, idia noia, idia gwau, “Oi mai ai dekenai, oi naria lasi.” ³⁹ Petero ia toresi, idia danu ia lao. Idia ginidae, vadaeni ataia daiutu dekenai idia hakaua daekau. Vabu hahine ibounai be Petero kahirakahira idia gini, idia tai noho. Bona Doreka ia mauri noho neganai ia karaia dabua ibounai, kouti bona hetaru idia hedinarai henia. ⁴⁰ To Petero ese ibounai ia siaia murimuri dekenai. Bona ia tui diho, ia guriguri. Petero ese mase hahine dekenai ia giroa, ia gwau, “Tabita e, oi toresi.” Vadaeni iena matana ia kehoa, Petero ia itaia, ia toresi, ia helai. ⁴¹ Bona Petero ese Tabita ena imana ia abia, ia haginia. Petero ese Iesu badinaia taudia, bona vabu hahine taudia dekenai ia boibo, vadaeni mai mauri danu idia dekenai Tabita ia henia. ⁴² Inai sivarai be Iopa hanua ibounai taudia idia kamona, bona idia momo ese Lohiabada idia abidadama henia. ⁴³ Vadaeni, Petero be dina momo Iopa laloni ia noho, boromakau kopina gaukara tauna ena ladana Simona danu.

10

Korenelio dekenai aneru ta ia hedinarai

¹ Tau ta ladana be Korenelio, Kaisarea hanua dekenai ia noho, ia be tuari biaguna, kapena ta, tuari ore a ladana Italia dekenai. ² Ia be Dirava badinaia tauna, ia bona iena ruma bese taudia ibounai Dirava dekenai idia gari. Ia danu Iuda ogogami taudia dekenai harihari gaudia momo ia henia, bona nega ibounai Dirava dekenai ia guriguri. ³ Adorahi ta, hora gauna 3 okaloka bamona ia mata hanai, Dirava ena aneru ia itaia, ia dekenai ia mai, bona ia gwau, “Korenelio e!”

⁴ Korenelio ese aneru ia itaia mai gari bada danu, ia gwau, “Lohiabada e, dahaka?”

Aneru ia itaia noho, ia gwau, “Oiemu guriguri bona oiemu harihari gaudia be Dirava dekenai idia daekau vadaeni, bona Dirava ese danu oi ia laloo noho. ⁵ Harihari tatau haida Iopa dekenai oi siaia lao, idia ese Simona, ena ladana ta be Petero, do idia boiria mai. ⁶ Ia be Simona, boromakau kopina ia gaukara tauna danu idia noho, ena ruma be kone dekenai.”

⁷ Ia dekenai ia hereva aneru ese ia rakatania neganai, Korenelio ese iena hesiai mero rua ia boiboi idia mai, bona tuari tauna ta danu, Dirava badinaia bona nega ibounai Korenelio ena hesiai gaukara ia karaia tauna ta. ⁸ Hereva ibounai idia toiosi dekenai Korenelio ese ia hamaoroa, gabeai ia siaia, idia lao Iopa dekenai.

Petero ia mata hanai

⁹ Kerukeru, dala dekenai idia lao, bona Iopa kahirakahira idia ginidae. Dina tubua neganai, Petero be ruma ena guhi ataiiai kahana dekenai ia daekau, guriguri totona. ¹⁰ Vadaeni, ia hitolo, bona ia ura aniani. To aniani idia karaia neganai, ia mata hanai. ¹¹ Bona ia itaia, guba ia kehoa, bona gau ta, dabua bada herea bamona, iena daiguni 4 dekena amo ia diho mai tanobada dekenai. ¹² Inai gau lalonai be mauri gaudia idauidau ibounai idia noho, raka gaudia, gaigai bamona gaudia, bona ataiiai idia roho manudia danu. ¹³ Bona gado ta ia dekenai ia hereva, ia gwau, “Petero e, oi toreisi, oi alaia oi ania.”

¹⁴ To Petero ia gwau, “Lohiabada e, lasi momokani, badina lau be miro gaudia bona mai helaga gaudia lau ania diba lasi.”

¹⁵ Gado ese ma Petero dekenai ia hereva lou, ia gwau, “Dirava ese ia hagoevaia vadaeni gaudia, oi gwauraia lasi miro.” ¹⁶ Nega toi inai bamona ia vara murinai, inai dabua badana ia daekau lou haraga, guba dekenai.

¹⁷ Bona Petero ia laloo momo inai mata hanai ena anina be dahaka. Inai bamona ia laloo noho neganai, Korenelio ena hesiai taudia idia mai, Simona ena ruma idia tahua, bona idia gini noho iduara dekenai. ¹⁸ Idia boiboi, idia gwau, “Simona, ena ladana ta be Petero ia noho iniseni o lasi?”

¹⁹ Petero be unai mata hanai dekenai ia itaia gaudia ia laloo noho nega lalonai, Lauma ese ia dekenai ia gwau, “Tatau toi idia tahua oi. ²⁰ Oi toreisi, oi diho, idia danu oi lao, oi daradara lasi, badina be lau ese idia lau siaia.”

²¹ Petero ia diho tatau toi dekenai, bona ia gwau, “Umui tahua tauna be lau, dahaka totona umui mai?”

²² Idia haere, idia gwau, “Korenelio, tuari taudia edia kapena, ia be kara maoromaoro bona Dirava dekenai gari tauna. Iuda taudia ibounai

idia gwau ia be tau namona. Aneru helagana ta ese Dirava ena hereva Korenelio dekenai ia hamaoroa, ia gwau, ‘Oi ese Petero do oi boiria mai oiemu ruma dekenai, bona iena hereva do oi kamona.’”

²³ Vadaeni, Petero ese unai tau toiosi ia hakaua vareai iena ruma lalonai, unai hanuaboi unuseri idia mahuta.

Petero be Korenelio ena ruma dekenai ia lao

Dabai Petero ia toreisi, idia danu ia lao, bona varavara haida Iopa dekena amo ia danu idia lao. ²⁴ Kerukeru Kaisarea hanua dekenai idia ginidae. Korenelio ese iena ruma dekenai Petero ena ginidae ia naria noho, bona iena varavara, bona iena turana korikori taudia ia boiria, idia hebou noho. ²⁵ Petero ia raka vareai noho neganai, Korenelio ese ia danu idia hedavari, bona Petero ena aena badinai ia moru diho, ia tomadiho henia. ²⁶ To Petero ese ia veria isi, ia gwau, “Oi toreisi, lau danu taunimanima.” ²⁷ Bona ia raka vareai, Korenelio danu ia herevahereva, bona hebou taudia momo ia davaridia.

²⁸ Vadaeni Petero ese idia dekenai ia hereva, ia gwau, “Umui diba Iuda taudia be idau bese taudia danu idia noho hebou o vadivadi hebou be mai taravatu. To Dirava ese lau dekenai ia hadibaia, tau ta lau gwauraia lasi ia be miro o dika. ²⁹ Unai dainai umui boiboi neganai, mai lalao namo lau mai, lau noho siri lasi. Bona hari lau nanadaia, badina dahaka umui boiboi lau dekenai?”

³⁰ Korenelio ia gwau, “Dina 4 ia lao vadaeni, adorahi 3 okaloka bamona egu ruma lalonai lau guriguri noho, inai hari hora bamona. Bona tau ta lauegu vairana dekenai ia gini, iena dabua be kurokuro momokani. ³¹ Ia gwau, ‘Korenelio e, oiemu guriguri be Dirava ese ia kamona vadaeni, bona oiemu harihari gaudia be Dirava ese ia lalao noho. ³² Unai dainai hereva oi siaia lao Iopa dekenai, Simona, ena ladana Petero oi boiria. Ia be Simona, boromakau kopina gaukara tauna ena ruma dekenai ia noho, kone dekenai.’ ³³ Vadaeni karaharaga hereva lau siaia oi dekenai, bona oi mai dainai lau tanikiu henia. Hari ai ibounai be Dirava ena vairanai iniseni ai hebou, gau ibounai Dirava ia hadibaia oi dekenai, do ai kamona totona.”

Petero ena hereva Korenelio ena ruma dekenai

³⁴ Vadaeni Petero ese iena hereva ia matamaia, ia gwau, “Hari lau diba momokani Dirava ese taunimanima edia toana ia lalao lasi. ³⁵ To bese ibounai lalonai, Dirava dekenai idia gari, bona kara maoromaoro idia karaia taudia, be Dirava ese do ia abia dae. ³⁶ Dirava ese iena hereva ia siaia Israela taudia dekenai umui diba vadaeni. Ia ese maino ena Sivarai Namona ia gwauraia Iesu Keriso dekena amo, taunimanima ibounai edia Lohiabada. Inai Iesu ese ita bona Dirava huanai maino dalana ia karaia vadaeni. ³⁷ Umui diba danu, unai hereva Galilea dekenai idia gwauraia hamatamaia, ia lao bona Iudea kahana ibounai, Ioane ese ia harorolaia bapatiso murinai. ³⁸ Inai hereva be Iesu, Nasareta tauna, ena hereva. Dirava ese iena Lauma Helaga dekena amo Iesu ia hasiahua, bona ia lao gabu idauidau, kara namodia ia karaia, bona ia ese Diabolo ia hadikaia taudia ibounai ia hanamodia, badina be Dirava ia noho ia dekenai. ³⁹ Vadaeni, ai be hereva gwauraia hedinarai taudia, gau ibounai ia karaia dekenai, Iudea tano ibounai dekenai, bona Ierusalem lalonai. Idia ese au ena latanai idia taua dae, idia alai mase. ⁴⁰ To Dirava ese Iesu ia hatorea isi dina ihatoina dekenai, bona taunimanima dekenai ia hedinarai. ⁴¹ Taunimanima ibounai dekenai ia hedinarai lasi, to ai sibona dekenai, badina be Dirava ese ai ia abia hidi guna,

hereva do ai gwauraia hedinarai totona. Mase dekena amo ia toreisi lou murinai, ai be Iesu danu ai aniani bona inuinu. ⁴² Ai dekenai ia hadibaia, taunimanima ibounai dekenai do ai haroro, bona do ai gwauraia hedinarai, Dirava ese inai Tau ia abia hidi vadaeni, mauri taudia bona mase taudia edia kota biaguna gaukara do ia karaia totona. ⁴³ Peroveta taudia ibounai ese Iesu idia gwauraia hedinarai vadaeni, idia gwau, 'Ia dekenai idia abidadama henia taudia ibounai edia kara dika be do idia gwauatao, iena ladana dainai.'

Idau bese taudia ese Lauma Helaga idia abia

⁴⁴ Petero ia hereva noho neganai, Lauma Helaga ese hereva idia kamoni taudia ibounai dekenai ia diho. ⁴⁵ Iuda taudia, Iesu idia abidadama henia bona Petero idia bamoa taudia, be idia hoa, badina be Lauma Helaga ese idau bese taudia dekenai ia diho dainai. ⁴⁶ Badina be, idia kamoni be, gado idau idau dekenai idia hereva, bona Dirava idia hanamoa noho. Bona Petero ia gwau, ⁴⁷ "Daika ese ranu dekenai taravatu do ia atoa, inai taudia bapatiso idia abia lasi? Lauma Helaga idia abia vadaeni, ita abia hegeregerena." ⁴⁸ Bona idia dekenai ia hereva, ia gwau, "Iesu Keriso ena ladana dekenai bapatiso do umui abia." Inai murinai idia ese Petero idia noia, idia dekenai do ia noho dina haida.

11

Ekalesia Ierusalem dekenai be Korenelio dekenai idia daradara

¹ Aposetolo bona varavara taudia Iudea dekenai idia kamoni idau bese taudia ese Dirava ena hereva idia abia dae vadaeni. ² Bona Petero be Ierusalem dekenai ia daekau lao neganai, kopina utua taravatu idia badinaia taudia ese ia dekenai idia hepapahuahu. ³ Idia gwau, "Kopina utua taravatu ura lasi taudia dekenai oi lao, bona idia danu oi aniani hebou."

⁴ Vadaeni Petero ese sivarai ibounai idia dekenai ia hadibaia, ena hamatamaia dekenai ela bona ena dokona. Ia gwau,

⁵ "Topa hanua dekenai lau noho, bona lau guriguri noho neganai, lau nihi bamona, bona egu mata hanai lalonai gau ta lau itaia, dabua bada herea bamona, iena daiguni 4 dekena amo, guba dekena amo ia diho mai lau dekenai. ⁶ Lau itaia momokani, bona mauri gaudia idau idau ibounai lau itaia, raka gaudia, dagedage gaudia, gaigai bamona gaudia bona ataiia idia roho manudia danu. ⁷ Bona gado ta lau kamoni, lau dekenai ia hereva, ia gwau, 'Petero e, oi toreisi, oi alaia bona oi ania.' ⁸ To lau gwau, 'Lohiabada e, lasi momokani, miro gaudia bona helaga gaudia lau ania lasi ia mai bona hari.' ⁹ Bona guba dekenai gado ia hereva lou, ia gwau, 'Dirava ese ia hagoevaia gaudia, oi gwauraia lasi miro.'

¹⁰ Nega toi inai bamona ia vara, gabeai gau ibounai idia abia daekau guba dekenai. ¹¹ Bona nega tamona tau toi idia ginidae egu noho ruma dekenai, Kaisarea dekena amo lau dekenai idia siaia. ¹² Bona Lauma ese lau dekenai ia hereva, lau be idia danu do lau lao, daradara lasi. Bona inai varavara 6 lau danu ai lao, bona inai tau ena ruma dekenai ai raka vareai. ¹³ Ia ese ai dekenai ia hamaoroa, ia gwau, aneru ta ia itaia, iena ruma lalonai ia gini, bona ia dekenai ia hereva, ia gwau, 'Taudia oi siaia lao Iopa dekenai, Simona, ena ladana ta be Petero, do idia hakaua mai. ¹⁴ Ia ese hereva do ia gwauraia umui dekenai, oi bona oiemu ruma bese taudia ibounai hamauria totona.' ¹⁵ Lauegu hereva lau hamatamaia neganai, Lauma Helaga be idia dekenai ia diho, guna

ita dekenai ia diho bamona. ¹⁶ Bona Lohiabada ena hereva gunana lau lalao, ia gwau, 'Ioane ese ranu dekenai ia bapatiso umui, to lau ese Lauma Helaga dekenai do lau bapatiso umui.' ¹⁷ Dirava ese iena harihari gauna idia dekenai ia henia, ita dekenai ia henia hegeregere, Lohiabada Iesu Keriso ita abidadama henia neganai. Inai dainai lau be daika Dirava ena dala do lau koua?"

¹⁸ Inai hereva idia kamoni neganai, edia hereva idia hadokoa, bona Dirava idia hanamo, idia gwau, "Namo, Dirava ese lalona giroa ia henia vadaeni idau bese taudia dekenai, mauri do idia abia totona."

Ekalesia orea ta Antioka dekenai ia vara

¹⁹ Stefano ena mase neganai dagedage ia vara, bona abidadama taudia haida idia heau lao Poinikia, bona Kupro bona Antioka dekenai. Unuseni Iuda taudia sibona dekenai Sivarai Namona idia harorolaia, idau taudia lasi. ²⁰ To inai abidadama taudia haida be Kupro bona Kurene taudia, bona Antioka dekenai idia ginidae neganai, idia ese Helene taudia dekenai Lohiabada Iesu ena Sivarai Namona idia gwauraia. ²¹ Bona Lohiabada ena siahua be idia dekenai ia noho, bona taunimanima momo ese edia hereva idia abia dae, edia lalona idia giroa, bona Lohiabada dekenai idia hakapua.

²² Ekalesia orea Ierusalem dekenai be inai sivarai idia kamoni, bona Banaba idia siaia lao Antioka dekenai. ²³ Banaba ia ginidae neganai, Dirava ena hariharibada ia itaia, bona ia moale bada, bona ibounai dekenai ia hereva goada, idia ese mai edia kudouna ibounai Lohiabada do idia badinaia. ²⁴ Badina Banaba be tau namona, Lauma Helaga bona abidadama dekenai ia honu. Unai neganai taunimanima momo be Lohiabada ena orea dekenai idia vareai.

²⁵ Vadaeni, Banaba ia toreisi, ia lao Taso, Saulo ia tahua totona. ²⁶ Saulo ia davaria neganai, Antioka dekenai ia hakaua lao. Unuseni idia ruaosi lagani ta ekalesia danu idia hebou, bona taunimanima momo idia hadibaia noho. Bona Antioka hanua dekenai Iesu diba tahua taudia be edia ladana idia atoa "Keristani." Inai be nega ginigunana inai ladana idia abia.

²⁷ Unai neganai peroveta taudia haida Ierusalem dekena amo idia lao Antioka. ²⁸ Idia ta ena ladana be Agabo. Lauma ese ia hadibaia dainai, ia toreisi bona ia gwau hitolo bada negana do ia vara tanobada kahana ibounai dekenai. Hitolo bada be king ta ena ladana Klaudio ena nega lalonai ia vara. ²⁹ Diba tahua taudia ibounai be idia ura bada Iudea noho Keristani taudia dekenai moni idia siaia lao. Inai dainai, idia ta ta edia kohu idia kohu ia hegeregere dekenai, edia harihari gauna do idia siaia lao. ³⁰ Inai bamona idia karaia, bona Banaba bona Saulo dekena amo moni idia siaia lao, ekalesia orea ena kwarana taudia Iudea dekenai idia henia.

12

Heroda ia dagedage aposetolo taudia dekenai

¹ Unai neganai King Heroda ese ekalesia taudia haida ia dogoatao, hadikaia totona. ² Iamesi, Ioane ena kakana be kaia dekenai Heroda ese ia alaia mase. ³ Ia itaia, Iuda taudia idia moale inai kara dekenai, vadaeni, unai dainai ia ese Petero danu ma ia dogoatao. Unai be Paraoa Hatubua Lasi aria idia karaia negana. ⁴ Ia dogoatao neganai, dibura ruma lalonai ia koua, bona ia henia tuari orea 4 dekenai (orea ta be tuari taudia 4), idia gimaia totona. Heroda ia lalao be Pasova murinai, Petero

be hanua taudia edia kota vairanai do ia hakaua lao. ⁵ Unai dainai, Petero be dibura ruma lalonai idia gimaia, to ekalesia taudia ese Dirava dekenai idia noinoi goadagoada Petero dainai.

Aneru ese Petero ia hamauria

⁶ Heroda ia ura kerukeru be taunimanima edia kota vairanai Petero do ia hakaua lao, vadaeni unai hanuaboi Petero be tuari taudia rua edia huanai ia mahuta noho, auri gaudia rua dekenai ia kwatua. Gima taudia danu iduara ena vairanai dibura ruma idia gimaia noho. ⁷ Bona nega tamona Lohiabada ena aneru ta Petero badinai ia gini, diari danu dibura ruma ia hadiaria. Aneru ese Petero ena kopina ia botaiia, ia hanogaia, ia gwau, “Oi toresi haraga.” Vadaeni auri kwatua gaudia be Petero ena imana dekena amo idia moru. ⁸ Ma inai aneru ese ia hadibaia, ia gwau, “Oiemu rami oi kwatua, bona oiemu tamaka oi atoa.” Unai bamona ia karaia. Aneru ma ia hereva. “Oiemu kouti oi atoa, lauegu murinai oi raka.” ⁹ Petero ia raka murimuri dekenai, aneru ena murinai ia raka, to ia diba lasi inai aneru ena kara be momokani o lasi, to ia lalao be ia nihi. ¹⁰ Idia ruaosi ese gima taudia ginigunana bona iharuana idia raka hanaia, vadaeni iduara ta, auri gauna, dekenai idia ginidae. Unai iduara be hanua lao dalana ia kehoa. Inai iduara be sibona ia kehoa idia ruaosi edia vairana dekenai. Idia raka lao murimuri, bona dala ta dekenai idia raka lao. Vadaeni nega tamona aneru ese Petero ia rakatania.

¹¹ Bona Petero ena lalona ia kehoa neganai, ia gwau, “Hari lau diba momokani, Lohiabada ese iena aneru ia siaia, Heroda ena imana dekena amo, bona Iuda taudia edia ura dika dekena amo lau ia hamauria vadaeni.”

¹² Inai gau ia lalao ore, vadaeni ia lao Maria ena ruma dekenai. Inai Maria be Ioane Mareko ena sinana. Unuseni taunimanima momo idia hebou, idia guriguri noho. ¹³ Petero ia pidipidi iduara dekenai. Bona kekeni ta, ladana Roda, iduara kehoa totona ia mai. ¹⁴ Petero ena gadona ia kamona bona ia diba, to ia moale bada herea dainai iduara ia kehoa lasi, to ia heau vareai, taunimanima dekenai ia hereva, ia gwau, “Petero be iduara dekenai ia gini noho!” ¹⁵ Ibounai ia dekenai idia hereva, “Oi be kava!” To ia hereva goada, ia gwau, “Lasi, ia momokani vadaeni.” Bona idia gwau, “Sedira inai be iena aneru.”

¹⁶ To Petero be ia pidipidi noho. Vadaeni, idia lao, iduara idia kehoa, idia itaia bona idia hoa bada. ¹⁷ Petero ese iena imana ia abia isi, edia hereva ia hadokoa. Bona Lohiabada ese dibura ruma dekena amo ia hakaua mai sivaraina idia dekenai ia gwauraia. Bona ia gwau, “Jamesi bona iseda varavara do umui hamaoroa.” Vadaeni, idia ia rakatania, idau gabu dekenai ia lao.

¹⁸ Daba rere neganai, daradara bona gari maragi lasi ia vara tuari taudia edia huanai, idia gwau, “Petero dekenai dahaka ia vara?” ¹⁹ Heroda ese Petero ia tahua, to ia davaria lasi. Bona ia ese gima taudia ia kota henia, inai murinai oda ia gwauraia, ibounai idia alaia mase.

Unai murinai Heroda ese Iudea ia rakatania, ia diho lao Kaisarea dekenai, unuseni ia noho.

Heroda ia mase

²⁰ Heroda ese Turo bona Sidono taudia dekenai ia badu dikadika. Vadaeni, idia ibounai edia lalona idia hatamonaia, bona ia dekenai idia lao. Idia ese king ena mahuta daiutu naria tauna, ladana Blasto, ena lalona idia ania guna, Heroda danu maino idia abia totona. Badina be

edia tano taudia ese king Heroda ena tano dekenamo edia aniani idia abia noho.

²¹ Vadaeni, idia abia hidi dina dekenai, Heroda ese king ena dabua ia karaia, bona kota helai gauna badana dekenai ia helai, bona idia dekenai ia haroro. ²² Bona taunimanima idia boiboibo noho, idia gwau, “Inai be dirava ta ena gadona, tau ena gadona lasi.” ²³ Vadaeni nega tamona Lohiabada ena aneru ta ese ia botaia, badina be hairai ia henia lasi Dirava dekenai. Vadaeni gaigaigaigai ese iena tauanina idia ania, vadaeni ia mase momokani.

²⁴ To Dirava ena hereva ia tubu, bona ia bada daekau, gabu momo dekenai.

²⁵ Vadaeni Banaba bona Saulo ese edia gaukara idia haorea, bona Ieruselema idia rakatania, Antioka dekenai idia giroa lou, Ioane Mareko idia danu idia hakaua lao.

13

Banaba bona Saulo ese edia laolao idia hamatamaia

¹ Ekalesia oreana Antioka dekenai be mai peroveta bona hadibaia taudia haida. Edia ladana be inai: Banaba, Simeona Nigera, Lukio, Kurene tauna, Manaena (ia be king Heroda ena turana gunana ta), bona Saulo. ² Idia ese Lohiabada dekenai idia toma diho bona aniani idia taravatua neganai, Lauma Helaga ese idia ia hamaoroa, ia gwau, “Banaba bona Saulo ruaosi umui abia siri, badina be gaukara ta lau abia hidi, idia karaia totona.”

³ Vadaeni, aniani idia taravatua, bona idia guriguri, bona edia imana idia ruaosi edia kwarana latanai idia atoa, bona ruaosi idia siaia lao.

⁴ Lauma Helaga ese idia ruaosi ia siaia lao, vadaeni idia diho lao Seleukia kone dekenai. Unuseni dekenamo idia hanaia Kupro motumotu dekenai. ⁵ Salami dekenai idia ginidae neganai, Dirava ena hereva be Iuda taudia edia dubu haida lalonai idia harorolaia. Ioane Mareko danu ese idia ruaosi ia durua.

Banaba bona Saulo Kupro dekenai

⁶ Idia ese Kupro motumotu ibounai idia hanaia, idia lao bona Papo hanua. Unuseni meamea tauna ta idia davaria, ia be Iuda edia peroveta koikoi tauna ta. Iena ladana be Bariesu. ⁷ Ia be gavana tauna, Seregio Paulo ena turana ta. Inai gavana be lalona namo tauna. Ia ese Banaba bona Saulo ia boiria idia mai ia dekenai, ia ura Dirava ena hereva idia hadibaia. ⁸ To unai meamea tauna, ena ladana be Eluma, Helene gado dekenai, be ia ura ruaosi edia dala ia koua. Ia ura be gavana ena abidadama dala ia koua. ⁹ To Saulo, iena ladana ta danu be Paulo, be Lauma Helaga ese ia hahonua, bona ia ese Eluma ia itaia goada noho, ia gwau, ¹⁰ “Oi be Diabolo ena natuna, kara maoromaoro ibounai oi ura koua. Oi be koikoi bona dika ibounai dekenai oi honu. Lohiabada ena maoro daladia hagagevaia kara edena negai do oi hadokoa, a?” ¹¹ Hari oi kamoni, Lohiabada ese iena imana oi dekenai ia atoa noho harihari, bona oiemu matana do idia kepulu, dina ena diari do oi itaia lasi ia lao bona nega ta.”

Vadaeni, nega tamona, ori bamona, bona dibura idia diho Eluma ena latanai, bona ia raka kahana kahana, durua taudia ia tahua, iena imana do idia dogoatao, bona do idia hakaua lao. ¹² Vadaeni, gavana ese inai idia vara gaudia ia itaia, bona Keriso ia abidadama henia. Badina be Lohiabada ena hadibaia hereva dekenai ia hoa bada herea.

Paulo mai ena bamona danu Asia dekenai

¹³ Paulo mai ena bamona taudia danu Papo idia rakatania, lagatoi dekenai idia lao Perega. Unai gabu be Pamupulia tano lalonai. Unuseni Ioane Mareko ese idia ia rakatania, ia giroa lou Ierusalem dekenai. ¹⁴ To idia be Perega idia rakatania, bona idia raka lao gunika kahana dekenai, ela bona Antioka dekenai idia ginidae. Inai Antioka be Pisidia tano lalonai. Sabati Dina dekenai idia be dubu lalonai idia raka vareai, idia helai diho. ¹⁵ Mose ena taravatu bona peroveta buka idia duahia murinai, dubu biagudia ese Paulo bona Banaba dekenai hereva idia siaia, idia gwau, “Aiemai varavara e, bema taunimanima hagoadaia hereva ia noho umui dekenai, umui hereva.”

¹⁶ Paulo ia toreisi, bona iena imana ia abia isi, ia gwau: “Umui Israela taudia, bona Dirava dekenai umui gari taudia e, umui kamoni. ¹⁷ Inai bese Israela ena Dirava ese iseda tamadia ia abia hidi, bona iseda bese taudia Aigupito lalonai idia noho neganai, idia dekenai bese badana ia havaraia. Gabeai iena imana ia abia isi mai sialu danu, bona unai tano dekena amo idia ia hakaua lao. ¹⁸ Lagani 40 bamona taunimanima lasi tano dekenai Dirava ia hesiku lasi, ia ese idia ia naria. ¹⁹ Kanana tano lalonai Dirava ese bese 7 ia hamakohia, bona edia tano Israela taudia dekenai ia henia, haria dala dekenai. ²⁰ Unai kara ibounai idia vara lagani 450 lalonai bamona. Israela taudia ese unai tano idia abia vadaeni murinai, Dirava ese gunalaia taudia idia dekenai ia henia, ela bona Samuela peroveta tauna ena nega. ²¹ Gabeai idia noinoi, king ta do idia abia, bona Dirava ese Saulo Kisa, Beniamina ena iduhu tauna, idia dekenai ia henia, ia be edia king lagani 40 lalonai. ²² Saulo ia kokia murinai, Dirava ese Davida ma ia haginia, ia be edia king ia lao. Taunimanima ibounai edia vairanai Dirava ese ia hereva, ia gwau, ‘Davida, Iese ena natuna lau davaria vadaeni, egu lalokau tauna, egu ura kara ibounai do ia karaia.’ ²³ Davida ena tubuna dekena amo, Dirava ese Israela edia Hamauria Tauna Iesu ia havaraia, iena gwauhamata hegeregere.

²⁴ “Iesu ia do mai lasi neganai, Ioane ese lalona giroa ena bapatiso Israela taudia ibounai edia vairanai ia harorolaia. ²⁵ Ioane ena gaukara be kahirakahira ia ore neganai ia gwau, ‘Umui be dahaka umui lalao, lau be daika? Lau be Ia lasi, to egu murinai Tau ta do ia mai. Iena tamaka varona, be lau hegeregere lasi do lau ruhaia.’

²⁶ “Lauegu varavara e, Aberahamo ena bese natudia e, bona Dirava dekenai umui gari taudia ibounai e, ita dekenai inai hamauria hereva be ia siaia mai vadaeni! ²⁷ Badina be Ierusalem noho taudia bona edia lohia idia diba lasi Iesu be Hamauria Tauna. Momokani idia ese peroveta taudia edia hereva be Sabati Dinadia ibounai idia duahia, to anina idia diba lasi. Inai dainai idia ese Iesu ena mase idia gwauraia, bona inai dala dekenai peroveta taudia edia hereva idia hamomokania. ²⁸ Hamasea badina ta idia davaria lasi, to idia ese Pilato idia noia, do ia alaia mase. ²⁹ Ia dekenai torea gaudia ibounai idia hamomokania vadaeni neganai, satauro dekena amo idia abia diho, guria gabuna lalonai idia atoa. ³⁰ To Dirava ese mase dekena amo ia hamauria. ³¹ Bona dina momo lalonai, ia danu Galilea dekena amo Ierusalem dekenai idia lao taudia ese inai Iesu idia itaia nega momo. Bona hari inai taudia ese inai Iesu idia gwauraia hedinarai noho Israela taudia dekenai.

³² “Bona hari Dirava ese iseda sene taudia ia henia gwauhamata Sivarai Namona ai ese ai harorolaia umui dekenai. ³³ Inai gwauhamata

be Dirava ese ia hamomokania vadaeni ita dekenai, idia edia tubudia. Edena bamona? Dirava ese Iesu ia hatorea isi vadaeni, Salamo iharuana lalonai ia torea bamona:

‘Oi be lauegu Natuna.
Hari dina oiemu Tamana lau lao vadaeni.’

³⁴ Dirava ese mase dekena amo ia hamauria, bona iena tauanina do ia bodaga lau lasi, badina inai hereva Dirava ese ia gwauraia:

‘Davida dekenai lau henia hanamoa gaudia,
helaga bona momokani, be dohore lau henia umui dekenai.’

³⁵ Bona Salamo lalonai ma ia hereva ia gwau:

‘Oiemu Helaga Tauna dohore oi negea kava lasi ia bodaga.’

³⁶ “Badina be Davida ese iena nega lalonai taunimanima edia huanai ia gaukara, Dirava ena ura hegeregere. Gabeai ia mase, bona iena sene taudia dekenai ia lao, bodaga ia davaria. ³⁷ To Dirava ese mase dekena amo ia hamauria Tauna be bodaga ia abia lasi. ³⁸ Inai dainai lauegu varavara taudia e, namona be umui diba, inai Iesu dainai, kara dika gwauatao ai haroro umui dekenai, bona Iesu dekenai abidadama taudia ibounai edia dika dekena amo Iesu ese idia ia ruhaia. ³⁹ Mose ena taravatu henunai emui kara dika idia kokia diba lasi, bona umui maoromaoro diba lasi. To Iesu idia abidadama henia taudia ibounai be ia ese edia dika ibounai ia kokia, bona idia be maoromaoro vadaeni. ⁴⁰ Unai dainai umui naria namonamo, namo lasi peroveta taudia idia gwauraia gaudia be umui dekenai idia vara, idia gwau:

⁴¹ ‘Ura lasi taudia e, umui itaia, umui hoa, bona umui mase. Badina be emui dina dekenai gaukara ta lau karaia. Inai gaukara be, dohore umui abia dae lasi, bema tau ta ese ia hadibaia umui.’”

⁴² Paulo bona Banaba be dubu ena murimurina dekenai idia raka neganai, taunimanima idia noinoi, idia gwau, “Vaira Sabati Dina unai hereva ma dohore umui gwauraia lou.” ⁴³ Hebou ia ore neganai, Iuda taudia momo bona idau bese taudia, Iuda edia guriguri kara idia badinaia taudia, be Paulo bona Banaba edia murinai idia raka. Ruaosi ese idia dekenai idia hereva, dohore idia goada karaia, bona Dirava ena hariharibada lalonai do idia noho.

⁴⁴ Gabeai Sabati Dina dekenai hanua taudia momo herea Dirava ena hereva kamona totona idia hebou. ⁴⁵ To Iuda taudia ese inai taunimanima momo idia itaia neganai, idia mama. Paulo ena hereva idia ura koua mai hereva dika danu. ⁴⁶ Vadaeni, Paulo bona Banaba idia hereva goada, idia gwau, “Momokani, Dirava ena hereva ai hadibaia umui Iuda taudia dekenai guna be gau badana. To umui ura lasi, bona inai dainai umui sibona umui gwauraia mauri hanaihanai dohore umui abia lasi. Inai dainai idau bese taudia dekenai do ai lao. ⁴⁷ Badina be Lohiabada ese ai dekenai ia hamaoroa vadaeni, ia gwau:

‘Lau ese umui lau atoa,
idau bese taudia edia diari do umui lao,

bona egu mauri abia ena dala tanobada taudia ibounai dekenai.’”

⁴⁸ Idu bese taudia ese inai hereva idia kamoni neganai idia moale bada, bona Lohiabada ena hereva idia hanamo. Bona Dirava ese ia abia hidi, mauri hanaihanai abia totona taudia ibounai ese abidadama taudia idia halaoa.

⁴⁹ Bona Lohiabada ena hereva ia lao unai tano ena kahana ibounai dekenai. ⁵⁰ Iuda taudia ese hahine badadia, Dirava dekenai idia gari hahine, bona hanua tau badadia danu dekenai idia hereva, Paulo bona Banaba do idia dagedage henia. Bona edia tano dekena amo idia lulua. ⁵¹ Vadaeni ruaosi ese edia aena kahu idia negea oho, unai taudia edia kara dika hedinarai totona, bona Ikonio dekenai idia lao. ⁵² To Iesu diba tahua taudia ibounai be idia moale bada, bona Lauma Helaga dekenai idia honu.

14

Paulo bona Banaba Ikonio dekenai

¹ Ikonio dekenai Paulo bona Banaba be Iuda taudia edia dubu lalonai idia raka vareai, idia haroro. Bona edia hereva siahu dainai Iuda taudia bona Helene taudia momo herea ese abidadama taudia idia halaoa. ² To Iuda taudia haida ese idia abidadama henia lasi, vadaeni idia ese idau bese taudia dekenai idia hereva, edia lalona idia ania, ela bona idia badu unai Keristani varavara dekenai. ³ To idia ruaosi be nega daudau unuseni idia noho. Idia hereva goada Lohiabada ena siahu dekenai. Bona Lohiabada ese iena hariharibada ena Sivarai Namona ia hamomokania hoa bona toa kara dekenai. Inai kara be ruaosi edia imana dekenai ia karaia. ⁴ To hanua taudia be makohia kahana kahana, haida be Iuda taudia danu lalao tamona, haida be aposetolo danu lalao tamona.

⁵ Vadaeni idau bese taudia bona Iuda taudia haida, mai edia lohia taudia danu idia toreisi, idia ura aposetolo taudia ruaosi idia hadikaia, idia ura nadi dekenai idia hodoa mase. ⁶ To ruaosi idia diba, vadaeni idia heau, Lukaonia tano idia lao, Lusitera bona Derebe hanua dekenai, bona gabu haida unai kahana dekenai. ⁷ Unuseni Sivarai Namona idia harorolaia.

Paulo bona Banaba Lusitera dekenai

⁸ Lusitera dekenai tau ta ia helai noho, iena aena be goada lasi. Ia be ena vara dinana ia mai bona hari ia raka diba lasi. ⁹ Inai tau ese Paulo ena hereva ia kamoni. Bona Paulo ese ia itaia noho, ma ia diba inai tau ena abidadama be hegeregere dainai, ia hanamo diba. ¹⁰ Vadaeni, Paulo ia hereva goada, ia gwau, “Oi toreisi, oi gini maoromaoro oiemu aena dekenai.” Vadaeni ia roho daekau, ia raka.

¹¹ Taunimanima momo ese Paulo ena kara idia itaia, bona Lukaonia gado dekenai idia boiboi, idia gwau, “Dirava be taunimanima ena toana dekenai idia diho mai ita dekenai.” ¹² Bona Banaba ena ladana idia atoa Dio, bona Paulo ena ladana idia atoa Hereme, badina ia be hereva gwauraia tauna dainai. ¹³ Dio ena dubu be hanua ena vairanai, bona unai dubu ena hahelagaia tauna ese hanua ena ikoukou dekenai ia lao, boromakau tau bona herahera ia mailaia, ia bona taunimanima danu ese boubou idia karaia aposetolo ruaosi dekenai totona.

¹⁴ To aposetolo ruaosi, Paulo bona Banaba ese idia kamoni, bona edia dabua idia darea, taunimanima edia huanai idia heau lao, idia boiboi, idia gwau, ¹⁵ “Tatau e, badina dahaka umui karaia inai bamona? Ai danu taunimanima, umui bona ai be hegeregere. Ai be Sivarai Namona

umui dekenai ai mailaia, umui be dohore inai anina lasi gaudia umui rakatania, bona do umui giroa mauri Dirava dekenai totona. Ia ese guba bona tanobada bona davara bona idia lalonai noho gaudia ibounai ia karaia. ¹⁶ Gunaguna neganai Dirava ese bese idauidau edia ura kara dalana ia koua lasi. ¹⁷ To ia ese taunimanima dekena amo ia hunia lasi. Lasi, ia ese iena noho ia hamomokania noho, iena kara nomodia dekena amo, gaudia inai: Medu ia siaia diho guba dekena amo, bona aniani haboua nega namodia ia henia umui dekenai. Boga kunu ia henia umui dekenai, bona emui kudouna dekenai moale ia havaraia.”

¹⁸ Inai bamona ruaosi idia hereva, hanua taudia idia koua gwauria, to hanua taudia idia ura bada boubou idia karaia dainai, idia ruaosi ese unai dala idia koua mai hekwarahi bada danu.

Hanua taudia ese Paulo idia hodoa

¹⁹ To Iuda taudia haida be Antioka bona Ikonio dekena amo idia mai, bona idia ese taunimanima momo edia lalona idia ania. Vadaeni taunimanima momo ese Paulo idia hodoa nadi dekenai, hanua ena murimuri dekenai idia veria, idia laloa ia mase vadaeni. ²⁰ To Iesu idia abidadama henia taudia be Paulo dekenai idia gini hagegea, vadaeni ia toreisi, hanua dekenai ia vareai lou. Kerukeru dabai ia bona Banaba danu be Derebe hanua dekenai idia lao.

Antioka dekenai idia giroa lou

²¹ Idia ruaosi be Derebe hanua dekenai Sivarai Namona idia harorolaia, bona hanua taudia momo be Iesu ena diba tahua taudia idia halaoa. Gabeai Lusitera bona Ikonio bona Antioka dekenai idia giroa lou. ²² Ruaosi ese Iesu ena diba tahua taudia edia kudouna idia hagoadaia. Idia hereva goada, idia gwau, “Abidadama umui dogoatao noho.” Bona idia gwau, “Hisihisi momo lalonai Dirava ena Basileia do ita raka vareai.” ²³ Vadaeni ekalesia orea ta ta ibounai dekenai idia ruaosi ese kwarana taudia haida idia abia hidi. Vadaeni mai aniani taravatua bona mai guriguri danu Paulo bona Banaba ese unai Keristani taudia Lohiabada ena imana dekenai idia atoa, ia dekenai idia abidadama henia dainai.

²⁴ Idia ruaosi be Pisidia tano idia raka hanaia, bona idia mai Pamupulia tano dekenai. ²⁵ Peregaha hanua dekenai hereva idia harorolaia. Gabeai idia diho lao Atalia hanua dekenai. ²⁶ Unai gabu dekena amo lagatoi ta idia guia, idia heau lao Antioka dekenai. Guna inai gabu dekenai ekalesia ese idia ruaosi Dirava ena hariharibada lalonai idia atodia, inai gaukara karaia totona. Hari inai gaukara idia haorea vadaeni.

²⁷ Idia ginidae neganai ekalesia taudia idia haboua. Bona idia amo Dirava ese ia karaia gaudia ibounai ena sivarai idia gwauria. Idia gwau, “Dirava ese abidadama ena iduara idau bese taudia dekenai ia kehoa vadaeni.” ²⁸ Bona ruaosi ese nega sisina daudau Antioka dekenai idia noho, diba tahua taudia danu.

15

Ekalesia ena hebou badana Ierusalem dekenai

¹ Tau haida Iudea dekena amo idia diho mai, varavara idia hadibaia, idia hereva, “Bema kopina utua taravatu umui naria lasi, Mose ena kara hegeregere, mauri dohore umui abia diba lasi.” ² Paulo bona Banaba be idia danu idia hepapahuahu maragi lasi, bona heai ia vara. Inai dainai idia gwau Paulo bona Banaba bona varavara haida dohore idia

lao Ierusalem. Unuseni aposetolo bona kwarana taudia dekenai inai hadibaia hereva do idia herevalaia.

³ Ekalesia ese ia siaidia lao. Bona Poinikia bona Samaria tano idia raka hanaia neganai, idau bese taudia edia lalona idia giroa ena sivarai idia gwauraia, bona unuseni idia noho varavara ibounai idia moale bada.

⁴ Ierusalem dekenai idia ginidae neganai, ekalesia bona aposetolo bona kwarana taudia ese idia abia dae. Vadaeni, Dirava ese idia dekenai ia karaia gaudia ibounai ena sivarai idia gwauraia. ⁵ To Farisea orea dekena amo Iesu idia abidadama henia taudia haida idia toresi, idia gwau, “Kopina utua taravatu idia naria be namo, bona umui hadibaia danu Mose ena taravatu ibounai do idia naria, be gau badana.”

⁶ Vadaeni aposetolo bona kwarana taudia idia hebou, inai gau idia herevalaia totona. ⁷ Hereva momo ia ore murinai Petero ia toresi, ia gwau, “Lauegu varavara e, umui diba idaunegai, Dirava ese umui emui huanai lau ia abia hidi, lauegu uduna dekena amo idau bese taudia Sivarai Namona ena hereva do idia kamoni bona idia abidadama henia. ⁸ Dirava ese taunimanima edia kudouna ia diba. Ia ese Lauma Helaga ia henia idau bese taudia dekenai, ita dekenai ia henia hegeregere. Inai dala dekena amo Dirava ese ia hedinarai, idia ia abia dae vadaeni. ⁹ Ia gwau ita bona idia be idau lasi. Edia abidadama ese edia kudouna ia huria. ¹⁰ Vadaeni, badina dahaka Dirava umui ura koia, metau gauna diba tahua taudia edia aiona dekenai umui kwatua. Iseda sene taudia bona ita danu ita huaia be hegeregere lasi. ¹¹ Lasi! Iseda kamoni gauna be ita abidadama noho, Lohiabada Iesu ena hariharibada dainai mauri do ita abia. Idia danu inai bamona.”

¹² Bona hebou taudia ibounai be regena lasi. Banaba bona Paulo edia hereva danu idia kamoni, Dirava ese toa bona hoa gaudia ia karaia idau bese taudia edia huanai, idia dekenai amo.

¹³ Idia ruaosi edia hereva ia ore neganai, Iamesi ia haere, ia gwau, “Lauegu varavara e, lauegu hereva umui kamoni. ¹⁴ Simona ese hari ita ia hamaoroa vadaeni, Dirava ese Iuda lasi bese taudia ia lalona noho. Bona hari inai nega ginigunana, Dirava ese idau bese taudia ia abia dae, bona iena bese taudia ia halaodia. ¹⁵ Inai hereva be peroveta taudia edia hereva hegeregere, inai bamona ia torea:

¹⁶ ‘Lohiabada inai bamona ia gwau:

Inai gaudia murinai dohore lau giroa mai,

Dauida ena basileia ia moru,

be do lau abia isi lou.

Iena hadikaia gabudia do lau hanamo,

bona do lau haginia lou,

¹⁷ idau bese taudia ibounai ese Lohiabada do idia tahua totona.

Lau ese lau boiria idau bese taudia ibounai,

ese lauegu ladana do idia abia.

¹⁸ Lohiabada be inai bamona ia hereva,

idaunegai momokani ia gwauraia.’

¹⁹ “Vadaeni, lau lalona, bema idau bese taudia Dirava dekenai idia mai, be edia dala do ita koua lasi. ²⁰ To namo, revareva idia dekenai ita torea, bona inai bamona do ita hamaoroa: Kaivakuku dekenai henia aniani, Dirava ena vairanai idia miro gaudia, do idia ania lasi. Heudahanai karadia do idia karaia lasi. Aiona idia gigia gaudia edia hidio, bona rana danu do idia ania lasi. ²¹ Badina be sene negana ia mai bona hari, Mose

ena taravatu be idia duahia dubu ta ta lalonai, Sabati Dinadia ibounai. Bona Mose ena hereva be hanua ibounai lalonai idia harorolaia noho.”

Idau bese Keristani taudia dekenai revareva idia siaia

²² Vadaeni, aposetolo bona kwarana taudia, ekalesia ibounai danu idia lalao hebou. Idia gwau edia orea dekena amo tau haida do idia abia hidi, Paulo bona Banaba danu do idia lao Antioka. Idia abia hidi taudia be Iuda, ena ladana ta be Barasaba, bona Sila, idia ruaosi be varavara edia huanai kwarana taudia. ²³ Inai revareva idia siaia lao idia danu:

“Ai aposetolo taudia bona ekalesia kwarana taudia be inai revareva ai torea lao umui idau bese Keristani taudia ibounai, Antioka, bona Suria bona Kilikia dekenai umui noho, ibounai umui namo, bona umui mauri. ²⁴ Ai kamona vadaeni, aiemai taudia haida be umui dekenai idia lao, bona edia hereva dekenai, daradara bona hisihisi idia havaraia umui emui huanai, to ai ese inai bamona ai hadibaia lasi. ²⁵ Inai dainai, ai ibounai aiemai lalao tamona be inai, tau haida do ai abia hidi, umui dekenai do ai siaia, aiemai lalokau taudia Banaba bona Paulo danu. ²⁶ Idia ruaosi ese edia mauri idia negea vadaeni, iseda Lohiabada Iesu Keriso ena ladana dainai. ²⁷ Inai dainai Iuda bona Sila ai siaia inai, umui dekenai. Idia ruaosi ese inai hereva hegeregere edia uduna dekenai do idia gwauraia. ²⁸ Badina be Lauma Helaga bona ai be inai bamona ai lalao. Ai be maduna metau haida ma do ai atoa lasi umui dekenai. To inai taravatu mai badina gaudia, idia sibona do umui naria: ²⁹ Kaivakuku vairana dekenai idia atoa aniani umui ania lasi, rara umui ania lasi, aiona idia gigia gaudia edia hidio umui ania lasi, bona heudahanai karadia umui karaia lasi. Bema inai gaudia umui karaia lasi, namo do umui davaria. Bamahuta.”

³⁰ Ekalesia ese inai tatau idia siaia, vadaeni idia lao Antioka. Un-useni ekalesia orea idia haboua, bona revareva idia henia. ³¹ Vadaeni revareva idia duahia, bona inai goada henia hereva namona dekenai idia moale bada. ³² Iuda bona Sila ruaosi be peroveta taudia. Inai dainai idia ese edia hereva goada dekena amo varavara idia hagoadaia. ³³ Idia ruaosi be nega sisina daudau Antioka dekenai idia noho, gabeai varavara ese idia siaia giroa, mai maino danu, aposetolo taudia dekenai. ³⁴ To Sila ia ura dainai ia noho.

³⁵ Paulo bona Banaba be Antioka dekenai idia noho. Idia ruaosi bona taudia momo danu ese hadibaia gaukara idia karaia, bona Lohiabada ena hereva idia harorolaia.

Paulo ese iena laolao iharuana ia hamatamaia

³⁶ Dina haida ia ore murinai Paulo ese Banaba ia hamaoroa, ia gwau, “Lohiabada ena hereva ita harorolaia vadaeni hanua momo dekenai. Namu ita giroa lou, varavara inai hanua ibounai dekenai ita vadivadi henia, edia noho ita itaia, idia be edena bamona.” ³⁷ Banaba ia ura Ioane Mareko be idia danu do ia lao. ³⁸ To Paulo ia lalao, ia idia abia lao be namo lasi. Badina be Pamupulia dekenai ia ese idia ia rakatania, bona gaukara dekenai idia danu ia lao lasi. ³⁹ Idia ruaosi idia hepapahu bona idia parara. Banaba ese Mareko ia abia, lagatoi dekenai idia guia, Kupro dekenai idia heau lao. ⁴⁰ To Paulo ese Sila ia abia hidi. Keristani varavara taudia idia guriguri, Dirava ena hariharibada do ia noho idia dekenai. ⁴¹ Vadaeni idia toreisi. Suria bona Kilikia tano Paulo ese ia raka hanaia, hanua ta ta lalonai idia ekalesia ia hagoadaia.

16

Lusitera dekenai

¹ Paulo be Derebe bona Lusitera dekenai ia ginidae. Inai gabu dekenai diba tahua tauna ta ia noho, ena ladana be Timoteo. Iena sinana be Iuda hahine, kamona hahine, to iena tamana be Helene tauna. ² Varavara ibounai Lusitera bona Ikonio dekenai, idia gwau Timoteo be tau namona. ³ Paulo ia ura Timoteo ia danu idia lao, inai dainai ia abia, iena kopina ia utua. Inai bamona ia karaia, badina be Iuda taudia unai gabu dekenai idia noho be idia diba Timoteo ena tamana be Helene tauna. ⁴ Hanua ibounai idia raka hanaia neganai, aposetolo bona kwarana taudia Ierusalem dekenai edia leta ena sisiba idia henia, Keristani taudia dekenai. Idia hamaoroa, do idia kamona henia noho. ⁵ Vadaeni, ekalesia taudia edia abidadama ena goada ia bada daekau, bona dina ibounai edia hutuma be ia bada daekau lao.

Paulo ia lao Troa

⁶ Vadaeni Paulo mai ena bamona taudia danu Perigia bona Galatia tano idia raka hanaia, badina be Lauma Helaga ese edia dala ia koua, ia gwau, “Asia tano dekenai Sivarai Namona umui harorolaia lasi.” ⁷ Idia be Musia ena hetoa dekenai idia ginidae, Bitunia idia lao totona, to Iesu ena Lauma ese edia dala ia koua. ⁸ Inai dainai, Musia tano ena murina kahana dekenai idia raka hanaia, idia diho lao kone, Troa hanua dekenai. ⁹ Hanuaboi lalonai Paulo ia mata hanai. Ena nihi lalonai Makedonia tauna ta ia itaia, iena vairana dekenai ia gini, bona Paulo dekenai ia noinoi, ia gwau, “Makedonia kahana dekenai oi mai, oi durua ai.”

Paulo mai ena bamona taudia danu Makedonia dekenai idia lao

¹⁰ Mata hanai Paulo ese ia abia dainai, karaharaga Makedonia lao dalana ai tahua. Ai diba Dirava be ai dekenai ia boiboi, Sivarai Namona unuseni do ai haroro henia.

Lidia be Keristani ia halaoa

¹¹ Vadaeni lagatoi dekenai Troa ai rakatania, bona ai heau maoro-maoro Samotrake dekenai. Dabai ma ai heau. Neapoli hanua ai ginidae. ¹² Unai gabu ai rakatania, ai lao Filipi, unai be Makedonia ena hanua bada herea. Roma tuari orea ta unuseni ia noho.

¹³ Sabati Dina dekenai hanua ena ikoukou murimuri kahanai ai raka, sinavai dekenai ai lao. Ai diba guriguri gabuna be unuseni. Ai helai diho, bona unuseni idia haboua hahine taudia dekenai ai hereva. ¹⁴ Hahine ta ena ladana be Lidia, ia be Dirava ia gari henia hahine. Iena hanua be Tuatira, bona ena gaukara be dabua kakakaka ia hoia. Aiemai hereva ia kamona, bona Lohiabada ese iena lalona ia kehoa, bona ia ese Paulo ia kamona henia. ¹⁵ Ia, mai ena ruma taudia danu bapatiso idia abia, gabeai ai dekenai ia noinoi, ia gwau, “Bema umui laloa lau be Lohiabada lau abidadama henia hahine, namo umui mai egu ruma, unuseni umui noho.” Ia ura bada ai noho ia dekenai.

Paulo bona Sila dibura rumai idia atodia Filipi hanua dekenai

¹⁶ Dina ta guriguri gabuna ai lao neganai, hesiai kekeni ta ia davaria ai. Unai kekeni be meamea lauma ese ia abia. Ia be vairai do idia vara gaudia ia gwauraia. Inai kekeni ena biaguna ese moni momo idia abia iena meamea kara dekena amo. ¹⁷ Inai kekeni ese Paulo bona aiemai murina ia raka, ia boiboi, ia gwau, “Inai taudia be Atai ai Momokani Dirava ena hesiai taudia. Umui hamauria totona dalana idia gwauraia

noho umui dekenai.”¹⁸ Dina momo inai bamona ia karaia. Ela bona Paulo ena lalona ia hesiku, vadaeni ia giroa, bona inai lauma dekenai ia gwau, “Iesu Keriso ena ladana dekenai lau hamaoroa oi, inai kekeni oi rakatania.” Vadaeni, nega tamona lauma ese ia rakatania.

¹⁹ To kekeni ena biaguna ese idia itaia, edia moni abia dala ia doko vadaeni. Inai dainai idia ese Paulo bona Sila idia dogoatao, bona hoihoi gabuna dekenai idia veria lao, hanua lohia taudia edia vairanai.²⁰ Kota biaguna taudia edia vairanai ruaosi idia hakaua lao, idia gwau, “Inai ruaosi be Iuda taudia, bona iseda hanua idia hadikaia noho.²¹ Bona kara haida idia gwauraia, inai kara be mai taravatu ita dekenai. Ita be Roma taudia bona unai kara ita karaia diba lasi.”²² Taunimanima momo danu idia hereva dika ruaosi dekenai. Kota biaguna taudia ese ruaosi edia dabua idia darea oho, bona hereva idia gwauraia, au dekenai idia dadabaia.²³ Idia ruaosi idia kwadia dikadika, gabei dibura ruma lalonai idia negea, bona idia hereva goada dibura gima tauna dekenai, idia do ia naria namonamo.²⁴ Gima tauna ese unai hereva goada ia kamoni neganai, idia ruaosi dibura ruma ena lalona momokani daiutu dekenai idia ia negea vareai. Idia ruaosi edia aena ia kwatua auka, au metauna rua edia huanai.

²⁵ To hanuaboi momokani neganai, Paulo bona Sila idia guriguri noho bona ane dekenai Dirava idia hanamo, dibura taudia danu idia kamoni.²⁶ Bona karaharaga tano ia marere bada dainai dibura ruma ena du idia mareremarere, iduara ibounai sibona idia kehoa, bona dibura taudia ibounai idia kwatua auri sibona idia kokia.²⁷ Gima tauna ia noga, ia toresi, ia itaia iduara ibounai idia kehoa. Ia laloo dibura taudia ibounai be idia heau vadaeni. Inai dainai iena kaia ia veria daekau, ia sibona do ia alaia gwauraia.²⁸ To Paulo ia boiboi goada, ia gwau, “Oi sibona oi hadikaia lasi, badina be ai ibounai iniseni ai noho.”

²⁹ Dibura ruma gima tauna ia boiboi lamepa idia mailaia, bona ia heau vareai haragaharaga. Mai heudeheude danu Paulo bona Sila edia aena badinai ia moru diho.³⁰ Vadaeni, idia ia hakaua lao murimuri dekenai, bona ia gwau, “Lohia taudia e, dahaka lau karaia Dirava ese lau do ia hamauria totona?”

³¹ Idia ruaosi idia gwau, “Lohiabada Iesu oi abidadama henia, bona hamauria do oi abia, oi bona oiemu ruma bese taudia danu.”³² Bona ruaosi ese Lohiabada ena hereva, ia bona iena ruma noho bese taudia ibounai dekenai idia gwauraia.³³ Vadaeni unai hora lalonai, inai gima tauna ese idia ruaosi ia hakaua lao, idia edia bero ia huria. Bona ia, mai ena ruma bese taudia ibounai danu nega tamona bapatiso idia abia.³⁴ Bona ia ese iena ruma lalonai Paulo bona Sila ia hakaua vareai, bona idia dekenai aniani ia henia. Ia, mai ena ruma bese taudia danu idia moale bada, Dirava idia abidadama henia dainai.

³⁵ Dabai, kota biagudia ese pulisi tau badadia idia siaia lao, idia gwau, “Inai taudia umui ruhaia idia lao.”

³⁶ Dibura ruma gima tauna ese Paulo ia hamaoroa, ia gwau, “Kota biaguna taudia ese hereva idia siaia vadaeni, lau ese umui do lau ruhaia. Vadaeni, umui lao, mai maino danu.”

³⁷ To Paulo ese idia dekenai ia hereva, ia gwau, “Kerere ta idia davaria lasi ai dekenai, to idia ese ai idia dadabaia kava taunimanima edia vairanai, bona ai be Roma ena basileia taudia. Dibura ruma lalonai ai idia negea, bona harihari idia ura ai ruaosi hunia bamona idia negea.

Lasi momokani. Idia sibona idia mai namo, ai idia hakaua murimuri dekenai.”

³⁸ Vadaeni pulisi tau badadia ese kota biaguna taudia dekenai inai hereva idia hamaoroa. Idia kamoni Paulo bona Sila be Roma ena basileia taudia neganai, idia gari. ³⁹ Idia lao, idia ruaosi dekenai sori hereva idia gwauraia, bona dibura ruma dekena amo idia hakaua murimuri, bona idia noinoi ruaosi ese unai hanua do idia rakatania. ⁴⁰ Idia ruaosi ese dibura ruma idia rakatania, idia lao Lidia ena ruma. Unuseni Keristani varavara taudia idia davarua, vadaeni ruaosi ese hagoadaia hereva idia dekenai idia henia. Unai murinai Filipi hanua idia rakatania.

17

Paulo bona Sila Tesalonika dekenai

¹ Idia ruaosi ese Amepipoli bona Apolonia idia raka hanaia, gabeai idia lao Tesalonika. Inai gabu dekenai Iuda taudia edia dubu ta ia noho.

² Paulo be dubu lalonai ia daekau, hanaihanai ia karaia bamona, bona Sabati Dinadi toi lalonai Buka Helaga idia danu ia herevalaia. ³ Idia ia hadibaia namonamo, Keriso ena hisihisi bona iena toresi lou be mai badina. Bona idia ia hamaoroa, ia gwau, “Inai Iesu, umui dekenai lau herevalaia tauna, ia be Keriso.” ⁴ Haida be idia abidadama henia, idia ese Paulo bona Sila danu idia hakapua. Bona Dirava dekenai idia gari henia Helene taudia momo herea, bona lohia edia hahine momo danu ese idia danu idia hakapua.

⁵ Unai dainai Iuda taudia idia mama. Vadaeni hoihoi gabu dekenai noho kava taudia dikadia haida idia abia, bona hanua taudia momo idia haboua, heai badana hanua lalonai idia havaraia. Bona Iasoni ena ruma idia hadikaia, badina Paulo bona Sila idia tahua, hanua taudia edia hebou dekenai ruaosi idia veria totona. ⁶ To idia ruaosi idia davarua lasi dainai, Iasoni mai varavara haida danu kota biaguna taudia edia vairanai idia veria. Vadaeni idia boiboi, idia gwau, “Inai taudia be gabu ibounai dekenai kerere idia havaraia, bona hari idia mai iniseni. ⁷ Inai Iasoni ese iena ruma dekenai idia ia abia dae. Idia ibounai be Kaisara ena taravatu idia makohia noho. Idia gwau, ‘King ta ma ia noho, ena ladana be Iesu.’” ⁸ Hanua taudia bona kota biaguna taudia be inai hereva idia kamoni neganai idia gari bada. ⁹ Idia ese Iasoni bona iena bamona taudia dekena amo taravatu hegeregere moni idia abia, vadaeni idia ruhaia.

Berea dekenai

¹⁰ Hanuaboi neganai Keristani varavara taudia ese Paulo bona Sila idia siaia haraga Berea dekenai. Idia ruaosi idia ginidae neganai, Iuda taudia edia dubu dekenai idia lao. ¹¹ Inai Berea taudia be namo, Tesalonika taudia bamona lasi. Paulo ena hereva idia kamoni, bona idia ura henia danu. Dina ibounai Buka Helaga idia tahua, inai hereva be ia momokani o lasi. ¹² Inai dainai, idia momo ese Iesu ena abidadama taudia idia halaoa. Ma Helene lohia taudia momo danu, tatau bona hahine, ese hereva idia abidadama henia. ¹³ To Tesalonika lalonai noho Iuda taudia idia kamoni Paulo ese Dirava ena hereva ia harorolaia Berea dekenai danu. Unai dainai idia lao, hanua taudia edia lalona idia ania, bona idia hagaria. ¹⁴ Vadaeni Keristani varavara taudia ese Paulo idia siaia haraga kone dekenai, to Sila bona Timoteo be Berea dekenai idia noho. ¹⁵ Paulo idia naria taudia ese ia idia hakaua lao Atena dekenai. Paulo ese ia hamaorodia, ia gwau, “Sila bona Timoteo umui hamaoroa,

lau dekenai do idia mai haraga.” Vadaeni idia rakatania, idia giroa lou Berea dekenai.

Atena dekenai

¹⁶ Paulo ese idia ruaosi dekenai ia naria noho Atena dekenai. Unuseni ia itaia kaivakuku ese inai hanua idia hahonua momokani, bona iena lalona ia hisihisi bada herea. ¹⁷ Inai dainai Iuda taudia edia dubu dekenai ia lao, Iuda taudia bona Dirava idia gari henia taudia danu ia herevahereva, bona hoihoi gabuna lalonai danu, dina ibounai ia lao, unuseni ia davaria taudia dekenai ia herevahereva. ¹⁸ Vadaeni Epikuro ena orea taudia bona Stoa ena orea taudia haida Paulo danu idia hepapahuahu. Haida idia gwau, “Inai hereva kava tauna be dahaka ia gwauraia noho?”

Ma haida idia gwau, “Sedira ia be idau dirava haida ia gwauraia.” Inai bamona idia hereva badina be Paulo ese Iesu ena Sivarai Namona bona iena toreisi lou ia harorolaia noho. ¹⁹ Vadaeni, idia ese Paulo idia hakaua lao Areo Ororo dekenai. Idia gwau, “Ai ura diba inai oi gwauraia hadibaia hereva matamata ena anina be dahaka. ²⁰ Oiemu hereva haida edia mamina be idau ai dekenai, inai dainai edia anina korikori ai ura diba.” ²¹ Badina be Atena taudia ibounai, bona idau gabu taudia Atena dekenai idia noho, idia edia kara be dina ibounai gau matamata idia herevalaia, bona idia kamoni.

Paulo ia haroro Atena dekenai

²² Vadaeni, Paulo ese Areo Ororo ena hebou taudia edia huanai ia gini, ia haroro, ia gwau, “Atena taudia e, lau itaia vadaeni, dirava idau idau momo umui laloa bada. ²³ Badina be umui emui hanua lalonai lau loaloa bona umui emui tomadiho henia gaudia lau itaia neganai, boubou patana ta lau davaria, iena latanai revareva inai bamona idia torea, ‘Ita diba lasi Dirava ena.’ Inai dainai umui diba lasi Diravana, to umui tomadiho henia, unai Dirava ena kara do lau hadibaia umui.

²⁴ “Tanobada bona ena lalonai noho gaudia ibounai ia karaia Diravana be guba bona tanobada ena Lohiabada. Ia be taunimanima edia imana dekenai idia karaia dubu lalonai ia noho lasi. ²⁵ Taunimanima edia imana ese iena gaukara idia karaia lasi, gau ta dekenai ia ogogami bamona, badina be ia sibona ese mauri bona laga bona gau ibounai ia henia noho taunimanima dekenai. ²⁶ Rara tamona dekenai ia ese taunimanima bese ibounai ia karaia, bona tanobada ena kahana ibounai dekenai idia noho. Ia sibona ese edia nega, bona edia tano hetoa maka ia gwauraia guna. ²⁷ Inai bamona ia karaia, Dirava do idia tahua totona, bona sedira idia tahua noho neganai do idia davaria. To momokani, Dirava be daudau lasi ita ta ta dekenai. ²⁸ Badina be: ‘Ia dainai ita mauri,

ita marere bona ita noho.’

Inai be umui emui ane karaia taudia haida idia gwauraia hegeregere, idia gwau:

‘Badina ita danu be iena natudia.’

²⁹ Vadaeni, ita be iena natuna dainai, namo lasi ita laloa Dirava be golo o siliva o nadi, diba herea bona aonega taudia edia imana dekenai idia karaia gauna bamona. ³⁰ Gunaguna taunimanima edia diba lasi be Dirava ese ia laloa lasi, to harihari ia ese taunimanima ibounai gabu ibounai dekenai ia hamaoroa, ia gwau, ‘Umui emui lalona umui giroa.’ ³¹ Badina be Dirava ese dina ta ia abia hidi vadaeni, unai dina dekenai iena abia hidi Tauna ese tanobada ibounai do ia kota henia mai maoromaoro danu. Bona inai kara Dirava ese ia hamomokania

taunimanima ibounai edia vairanai, unai Tau mase dekena amo ia hamauria dainai.”

³² Mase dekena amo toreisi lou hereva idia kamoni neganai, haida ese Paulo idia kirikirilaia. Bona haida idia gwau, “Ai ura inai oiemu hereva ma dohore ai kamoni lou.” ³³ Vadaeni, Paulo ese idia ia rakatania. ³⁴ To haida be ia dekenai idia hakaupa, bona abidadama henia taudia idia halaoa. Idia ta be Dionusio, Areo Ororo ena ore a tauna ta, bona ta be hahine, iena ladana be Damari, bona ma haida danu.

18

Paulo Korinto dekenai

¹ Inai murinai, Paulo be Atena ia rakatania, ia lao Korinto. ² Unuseni ia ese Iuda tauna ta ia davaria, Ponto bese tauna, ena ladana be Akwila. Ia be vanegai sibona, iena adavana Prisikila danu Italia dekena amo idia mai, badina be Klaudio ese Iuda taudia ibounai dekenai taravatu ia henia Roma idia rakatania. ³ Paulo ia lao idia ruaosi dekenai, bona ia ese idia danu ia noho, bona idia gaukara hebou, badina be idia edia moni davaria gaukara be tamona, palai ruma idia turia. ⁴ Sabati Dinadia ibounai Paulo be dubu lalonai ia haroro. Ia ura Iuda taudia bona Helene taudia edia lalona do ia kehoa.

Sila bona Timoteo idia ginidae

⁵ Sila bona Timoteo Makedonia dekena amo idia mai neganai, Paulo ese iena nega ibounai ia haroro goada noho. Iuda taudia dekenai ia hadibaia goada Iesu be Keriso. ⁶ To idia ese iena hereva idia koua mai hereva dikadia danu neganai, Paulo ese iena dabua ena kahu ia negea oho, bona ia gwau, “Vadaeni, umui emui kerere be emui latanai ia noho, lau be kerere lasi. Harihari lau be idau bese taudia dekenai do lau lao.” ⁷ Unai gabu ia rakatania, ia lao tau ta ladana Titio Iusto ena ruma dekenai ia noho. Unai tau be Dirava dekenai ia gari henia tauna. Iena ruma be ia gini dubu ena badinai. ⁸ Krisipo, unai dubu ena gunalaia tauna ese Lohiabada ia abidadama henia, iena ruma bese taudia ibounai danu. Korinto taudia momo danu ese Paulo ena haroro idia kamoni, idia abia dae danu, bona bapatiso idia abia.

⁹ Hanuaboi ta neganai, Lohiabada ese nihi dekenai Paulo dekenai ia hereva, ia gwau, “Oi gari lasi, oi hereva noho, oiemu hereva oi hadokoa lasi. ¹⁰ Badina lau be oi dekenai lau noho, tau ta ese oi do ia hadikaia lasi, badina be lauegu taunimanima be momo inai hanua lalonai.” ¹¹ Vadaeni, Paulo ese lagani ta bona hua 6 unuseni ia noho, Dirava ena hereva ia hadibaia noho.

Paulo be Korinto dekenai kota idia henia

¹² Galio be Akaia tano ena gavana daga ia abia neganai, Iuda taudia ese Paulo dekenai idia gagedage mai lalona tamona danu. Idia dogoatao, kota dekenai idia hakaua lao. ¹³ Idia gwau, “Inai tau ese taunimanima ia hadibaia noho, taravatu do idia utua dalana dekena amo Dirava do idia tomadiho henia.”

¹⁴ Paulo ia ura hereva, to Galio ese Iuda taudia ia hamaoroa, ia gwau, “Umui Iuda taudia e, bema inai tau ese kara dika ta o kerere badana ta ia karaia neganai, umui dekenai lau kamoni be mai badina. ¹⁵ To, inai hepapahuahu be umui emui hereva, bona ladana, bona emui taravatu gaudia sibona. Unai dainai umui sibona do umui tahua. Lau ese unai gaudia lau kota henia lasi.” ¹⁶ Bona ia ese kota gabuna dekena amo ibounai ia lulua. ¹⁷ Vadaeni Korinto taudia ese dubu gunalaia tauna

Sositene idia dogoatao, kota gabuna ena vairanai idia dadabaia. To Galio be inai kara ia lalao lasi.

Paulo ena laolao iharuana ia haorea, ia giroa lou Antioka

¹⁸ Paulo ese dina momo Korinto lalonai ia noho, gabeai Keristani taudia dekenai ia bamahuta, lagatoi ta dekenai ia guia, ia lao Suria. Prisikila bona Akwila ia danu idia lao. Lagatoi do ia guia lasi neganai, Paulo ese gwauhamata ia karaia dainai, Kenekrea dekenai iena huina ia utua. ¹⁹ Idia toiosi Efeso idia ginidae, bona unuseni Paulo ese Prisikila bona Akwila ia raketania. Ia raka vareai dubu lalonai, Iuda taudia danu ia herevahereva. ²⁰ Ia dekenai idia noinoi, nega sisina daudau ia noho idia danu, to ia ese idia edia ura ia abia dae lasi. ²¹ Ia bamahuta henia neganai ia gwau, “Bema Dirava ia ura, lau be do lau giroa mai umui dekenai.” Vadaeni, Efeso dekena amo lagatoi dekenai ia heau lao.

²² Kaisarea dekenai ia diho, gabeai ia daekau lao Ierusalem, unuseni ia ese ekalesia taudia ia hanamo. Inai murinai ia lao Antioka dekenai.

Paulo ese iena laolao ihatoina ia hamatamaia

²³ Nega sisina daudau Paulo be Antioka dekenai ia noho, vadaeni ia toreisi, ia lao Galatia bona Perigia, unuseni Iesu badinaia taudia ia hagoadaia. ²⁴ Iuda tauna ta, ena ladana be Apolo, be ia lao Efeso dekenai. Ia be Alesandria tauna, mai ena aonega, bona Buka Helaga ia diba momo. ²⁵ Inai tau Apolo be haida ese Lohiabada ena dala idia hadibaia, bona ia ese Iesu ena sivarai ia gwauraia mai siahua danu, bona iena hadibaia hereva be maoromaoro. To ia be Ioane ena bapatiso sibona ia diba. ²⁶ Iuda edia dubu lalonai hereva ia gwauraia mai goada danu, gari ta lasi. Prisikila bona Akwila ese Apolo ena haroro idia kamoni, vadaeni edia ruma dekenai idia hakaua lao, bona idia ruaosi ese Dirava ena dala ibounai idia hadibaia maoromaoro. ²⁷ Gabeai Apolo ia ura lao Akaia, inai dainai Efeso Keristani taudia ese leta ta Keristani taudia Akaia dekenai idia torea, Apolo do idia abia dae totona. Apolo ia ginidae, vadaeni Dirava ena hariharibada dainai, ia ese Iesu badinaia taudia dekenai durua bada ia henia. ²⁸ Badina be Apolo ese taunimanima edia vairanai, iena hereva goada dekena amo Iuda taudia ia halusia. Ia ese Buka Helaga dekena amo ia hedinarai momokani Iesu be Keriso.

19

Paulo Efeso dekenai

¹ Apolo ia noho Korinto neganai, Paulo be gunika kahana ia hanaia lao, bona Efeso dekenai ia ginidae. Unuseni diba tahua taudia haida ia davaria. ² Idia ia nanadaia, ia gwau, “Iesu dekenai umui abidadama henia neganai, Lauma Helaga umui abia, a?”

Idia haere henia, idia gwau, “Lasi, ai be Lauma Helaga ena hereva, ai kamoni lasi, hari sibona.”

³ Paulo ese idia ma ia nanadaia, ia gwau, “Dahaka bapatiso umui abia?” Idia gwau, “Ioane ena bapatiso.”

⁴ Paulo ia gwau, “Ioane ena bapatiso be taunimanima ese edia lalona idia giroa vadaeni ena toana, bona ia ese taunimanima ia hadibaia, ia murinai do ia mai Tauna do idia abidadama henia — Tauna be Iesu.”

⁵ Inai hereva idia kamoni neganai, Lohiabada Iesu ena ladana dekenai bapatiso idia abia. ⁶ Bona Paulo ese iena imana idia edia latanai ia atoa neganai, Lauma Helaga idia dekenai ia diho vadaeni. Bona idia be

gado idau idau dekenai idia hereva, bona peroveta hereva idia gwaurai.

⁷ Taudia ibounai be 12 bamona.

⁸ Paulo be dubu lalonai ia raka vareai hanaihanai hua toi lalonai, Dirava ena Basileia hereva ia harorolaia bona ia hadibaia goada. ⁹ To haida be lalona auka dainai, idia kamoni henia lasi, bona Lohiabada ena Dala dekenai hereva dikadia idia gwaurai hebou taudia ibounai edia vairanai. Inai dainai Paulo ese idia ia rakatania, Keristani taudia ia danu ia hakaudia lao. Bona dina ibounai Turano ena hadibaia ruma lalonai ia hadibaia noho. ¹⁰ Inai bamona ia karaia lagani rua lalonai, inai dainai Asia tano dekenai idia noho taudia, Iuda taudia bona Helene taudia, ibounai ese Lohiabada ena hereva idia kamoni.

Sikeva ena natuna memero

¹¹ Sياهو karadia idau momokani, Dirava ese Paulo ena imana dekenai ia karaia. ¹² Taunimanima ese muko bona dabua Paulo ena tauanina dekena amo idia abia lao gorere taudia dekenai. Inai bamona idia karaia, vadaeni gorere ia ore, bona lauma dikadia danu idia rakatania.

¹³ Iuda taudia haida, edia dagi be idia loaloa bona lauma dikadia idia luludia, idia be Lohiabada Iesu ena ladana idia atoa toho inai lauma dikadia ese idia abia taudia edia latanai. Lauma dikadia dekenai idia hereva, idia gwau, “Paulo ese ia harorolaia tauna Iesu ena ladana dekenai, lau hamaoroa umui.” ¹⁴ Sikeva, Iuda edia dubu biaguna ta, ena natuna memero 7 be inai bamona idia karaia.

¹⁵ To lauma dikana ese idia dekenai ia haere, ia gwau, “Iesu lau diba, Paulo danu lau diba, to umui be daika daika?”

¹⁶ Vadaeni, inai lauma dikana ese ia abia tauna ese idia ia heatu henia mai goada danu, idia ia dadabaia, ia lao bona ia ese idia ia halusia. Bona unai ruma dekena amo idia ibounai idia heau, dabua lasi bona mai edia bero danu. ¹⁷ Efeso dekenai noho taudia ibounai, Iuda bona Helene taudia danu ese inai sivarai idia kamoni, bona ibounai idia gari dikadika. Bona Lohiabada Iesu ena ladana be taunimanima ese idia hanamo bada herea. ¹⁸ Bona Iesu badinaia taudia momo idia mai, edia kara dika gunadia idia gwaurai hedinarai. ¹⁹ Bona meamea taudia momo ese edia buka idia mailaia, idia haboua, bona idia gabua taunimanima ibounai edia vairanai. Buka edia davana idia duahia, davana ibounai be kina 50,000 hegeregere. ²⁰ Inai bamona dala, mai sياهو danu, Lohiabada ena hereva ia bada daekau bona ia kwalimu.

Heai ia vara Efeso dekenai

²¹ Inai murinai Paulo ia laloo, Makedonia bona Akaia tano dekenai do ia raka hanaia, bona do ia lao Ierusalem. Ia gwau, “Unuseni do lau lao guna, gabeai Roma do lau lao itaia.” ²² Vadaeni, ia ese iena durua taudia rua, Timoteo bona Erasito, be Makedonia dekenai ia siaia lao. To ia sibona nega sisina ma Asia dekenai ia noho.

²³ Unai neganai heai bada ia vara Efeso dekenai, Lohiabada ena Dala dainai. ²⁴ Badina be inai, tau ta ena ladana Demetrio, siliva gaukara tauna ese Diana ena dubu maragidia siliva dekenai ia karaia noho. Idia be dubu korikori ena lauludia. Unai gaukara idia karaia dainai, Demetrio ena ore taudia ese moni momo idia abia noho. ²⁵ Demetrio ese idia bona unai gaukara hegeregere idia karaia taudia ia haboua, ia gwau, “Tatau e, umui diba inai gaukara dekena amo iseda moni ita abia noho. ²⁶ Bona umui itaia bona umui kamoni, inai tau Paulo ese taunimanima momo herea edia lalona ia hagiroya, bona ia ese idia ia hakaua siri, Efeso hanua dekenai sibona lasi, to Asia tano ibounai

dekenai danu. Ia gwau taunimanima edia imana dekenai idia karaia dirava be dirava korikori lasi. ²⁷ Sedira kerere bada ita davarua inai, iseda moni davarua gaukara ena ladana ia hadikaia noho. Inai sibona lasi, to sedira Diana, dirava hahine badana, ena dubu be dohore anina lasi gauna. Gabeai inai dirava, Asia bona tanobada ibounai ese idia tomadiho henia diravana, be iena siahua ibounai do ia ore.”

²⁸ Inai hereva idia kamona neganai idia badu dikadika, bona idia boiboi hamatamaia, idia gwau, “Efeso ena dirava, Diana, ia be bada herea momokani.” ²⁹ Hanua ena kahana ibounai lalonai boiboi bona regena be ia bada. Bona mai lalona tamona danu unai hanua taudia idia heau lao, taunimanima edia hebou ruma dekenai. Idia ese Gaio bona Arisitako idia dogoatao, idia veria lao. Idia ruaosi be Makedonia taudia, Paulo danu idia laolao taudia. ³⁰ Paulo ia ura be taunimanima edia huanai do ia raka vareai, to Keristani taudia ese iena dala idia koua. ³¹ Asia lohia taudia haida be Paulo ena turadia. Idia ese hereva idia siaia, Paulo idia noia, hebou ruma dekenai do ia hedinarai lasi.

³² Haida be hereva ta idia boiboi, ma haida be idau hereva idia boiboi, badina be hebou taudia idia heai noho dainai, idia momo be edia hebou badina idia diba lasi. ³³ Iuda taudia ese Alesana, taunimanima edia vairana dekenai idia doria lao, vadaeni haida idia lalao ia be inai hebou ena badina. Alesana ese iena imana ia abia isi, ia ura be taunimanima dekenai ia haere henia. ³⁴ To idia itaia, ia be Iuda tauna, vadaeni ibounai ese inai hereva tamona idia boiboi noho, hegeregere hora rua bamona, “Efeso ena dirava, Diana, ia be bada herea momokani.”

³⁵ Gabeai hanua ena hereva torea tauna ese taunimanima edia boiboi ia hadokoa, ia gwau, “Efeso taudia e, taunimanima ibounai idia diba vadaeni, Efeso hanua ese Diana badana ena dubu ia naria noho. Bona nadi helagana guba dekena amo ia moru gauna danu ia naria noho. ³⁶ Inai hereva be tau ta ese ia koua diba lasi. Inai dainai umui emui boiboi umui hadokoa, kerere ta umui karaia lasi, umui noho namonamo. ³⁷ Inai taudia umui hakaudia mai iniseni. To idia be gau idia henaoa lasi dubu dekenai. Bona iseda dirava hahine, iena ladana idia hadikaia lasi. ³⁸ Bema Demetrio bona iena gaukara taudia danu idia ura tau ta idia samania, vadaeni kota be ia kehoa noho, bona kota biaguna taudia idia noho. Namona be edia samani hereva idia hamaoromaoroa kota dekenai. ³⁹ To bema idau hereva ta ia noho, hebou korikori dekenai do idia herevalaia. ⁴⁰ Bema hari dina ena heai dainai, gavamani ese ai do idia samania, be dohore ai kerere. Badina be inai heai be badina lasi, bona badina ta ai gwauraia diba lasi.” ⁴¹ Inai bamona ia hereva, vadaeni hebou ia siaia lao.

20

Paulo ese Makedonia bona Akaia dekenai ia laolao

¹ Heai ia doko murinai, Paulo ese Iesu idia badinaia taudia ia haboua, idia ia hagoadaia, vadaeni ia bamahuta henia, bona idia ia rakatania, ia lao Makedonia. ² Makedonia kahana ibounai ia raka hanaia neganai, Keristani taudia do idia goada totona hereva momo ia henidia, gabeai ia lao Akaia. ³ Paulo be hua toi unuseni ia noho. Lagatoi dekenai ia ura lao Suria, to ia kamona Iuda taudia ese hereva idia karaia vadaeni ia do idia alai mase. Unai dainai iena lalao ia giroa, bona Makedonia dala dekenai ia giroa lou. ⁴ Asia dekenai Paulo idia bamoa taudia be inai: Sopatera Puro, Berea tauna, Arisitako bona Sekundo, Tesalonika taudia, Gaio, Derebe tauna, Timoteo, bona Tukiko bona Tropimo, Asia taudia.

⁵ Inai taudia idia lao guna, bona Troa hanua dekenai idia naria ai. ⁶ To ai be Paraoa Hatubua Lasi ena aria murinai, Filipi dekena amo ai heau. Dina 5 murinai, Troa dekenai ai ginidae, ai idia naria taudia ai davaria, bona unuseni dina 7 ai noho.

Troa dekenai Paulo ese Eutiko mase dekena amo ia hamauria lou

⁷ Pura ena dina ginigunana dekenai, anibou ania totona ai hebou. Vadaeni Paulo ese taunimanima dekenai ia haroro henia, badina be ia ura kerukeru dabai do ia heau. Unai dainai ia haroro ela bona hanuaboi momokani. ⁸ Atai ai daiutu lalonai, ai ena hebou gabunai, lamepa momo idia araia noho. ⁹ Uhau tauna ta, ena ladana Eutiko be uindo dekenai ia helai noho. Paulo ia hereva noho, hereva noho, bona Eutiko ena matana ia metau ela bona ia mahuta momokani. Vadaeni, ruma ena atai ai daiutu, sitori toi dekena amo ia moru diho. Idia abia isi neganai, idia davaria ia mase momokani vadaeni. ¹⁰ To Paulo ia diho, uhau ena latanai ia hekure, ia rosia, ia gwau, “Tai hadokoa, ia be ia mauri noho!” ¹¹ Paulo ma ia daekau lou, paraoa ia makohia, ia aniani. Idia danu ia herevahereva ela bona daba ia rere. Vadaeni, ia ese idia ia rakatania. ¹² Hebou taudia ese uhau tauna idia hakaua lao ruma, mai mauri danu, bona edia lalona be namo bada herea.

Paulo ese Troa ia rakatania, Mileto ia lao

¹³ Ai ese Paulo ai rakatania, lagatoi dekenai ai heau lao Aso dekenai. Unuseni Paulo ese danu do ia guia, ai ia hamaoroa guna bamona. Ia gwau, aena dekenai do ia lao. ¹⁴ Aso dekenai ai davaria neganai, Paulo ese ia guia, vadaeni ai heau lao Mitulene. ¹⁵ Unai gabu dekena amo ma ai heau lao, bona kerukeru Kiosa kahirakahira dekenai ai ginidae. Vaira dina dekenai Samo ai heau lao. Murina dina neganai Mileto dekenai ai heau lao. ¹⁶ Paulo ia lalao, Efeso do ia heau hanaia be namo, badina ia ura lasi nega daudau Asia dekenai ia haorea kava. Ia ura karaharaga ia lao, badina ia ura, bema dala ia davaria, Pentekoste dina be Ieruselema dekenai do ia noho.

Paulo ese Efeso taudia ia bamahuta henia

¹⁷ Mileto dekena amo Paulo ese hereva ia siaia lao, Efeso ena ekalesia kwarana taudia ia dekenai do idia mai. ¹⁸ Ia dekenai idia mai neganai, ia hereva, ia gwau,

“Lauegu kara, guna lau ginidae Asia dekenai ia mai bona hari, umui dekenai edena bamona lau noho, be umui diba. ¹⁹ Nega momo Iuda taudia idia ura lauegu dala koua totona, metau gaudia momo idia havarai lau dekenai. To mai lalona namo bona mai tai danu Lohiabada ena gaukara lau karaia noho. ²⁰ Umui diba vadaeni umui dekenai lau haroro bona hadibaia neganai, emui ruma dekenai, bona taunimanima edia vairana dekenai durua hereva ta lau hunia lasi umui dekenai. ²¹ Iuda taudia bona Helene taudia danu dekenai lau sisiba henia goada edia lalona do idia giroa Dirava dekenai, bona Lohiabada Iesu do idia abidadama henia. ²² Harihari Ieruselema dekenai do lau lao, Lauma Helaga ese lau ia hakaua goada dainai. Bona unuseni lau diba lasi dahaka do ia vara lau dekenai. ²³ Inai gau sibona lau diba, hanua hanua ibounai lalonai Lauma Helaga ese ia sisiba henia lau, ia gwau, ‘Dibura ruma bona hisihisi momo do oi davaria.’

²⁴ “To lauegu mauri lau lalao lasi, badina be lau ura lauegu heau lau haorea, bona egu gaukara, Lohiabada Iesu ese lau dekenai ia henia

gaukara do lau haorea. Inai gaukara be, Dirava ena hariharibada Sivarai Namona do lau gwauraia hedinarai.

²⁵ “Lau be umui emui huanai lau loaloa, bona Dirava ena Basileia lau harorolaia vadaeni umui ibounai dekenai, to harihari lau diba momokani, umui ese lau do umui itaia lou lasi. ²⁶ Unai dainai inai harihari lau hamaoroa umui, bema umui ta ia boio, kerere be lau lasi. ²⁷ Badina be Dirava ena ura ibounai umui dekenai lau hamaoroa, gau ta lau hunia lasi. ²⁸ Umui sibona do umui naria namonamo, bona mamoe ore a ibounai danu. Inai ore a naria taudia Lauma Helaga ese umui ia halaoa vadaeni. Dirava ena ekalesia, iena lalokau Natuna ena rarana dekena amo ia hoia ore a taudia, do umui ubua. ²⁹ Badina be lau diba, umui lau rakatania murinai, uda sisia dikadia umui emui huanai dohore idia mai, bona mamoe ore a do idia hadikaia. ³⁰ Emui huanai tatau haida do idia toreisi, hereva koikoi do idia gwauraia, bona diba tahua taudia do idia hakaua kerere. ³¹ Inai dainai, umui naria, bona umui laloatao, lau be lagani toi lalonai, dina bona hanuaboi, umui ibounai lau sisiba henia nega ibounai, mai tai momo danu.

³² “Harihari Dirava ena imana lalonai, bona iena harihari bada sivaraina lalonai, umui lau ato a. Ia be mai ena goada umui do ia haginia namonamo. Bona davana namona umui dekenai do ia henia, iena helaga taudia ibounai dekenai danu. ³³ Tau ta ena siliva o ena golo o iena dabua lau mama henia lasi. ³⁴ Umui sibona umui diba, lau sibona egu imana ruaosi dekenai lau gaukara, lau bona egu turadia aiemai ura gaudia ibounai ai abia totona. ³⁵ Inai egu kara dekena amo, umui dekenai lau hadibaia vadaeni, dala namona be, do umui gaukara goada, manoka taudia do umui durua. Bona Lohiabada Iesu ena hereva do umui laloatao, ia gwau, ‘Henia kara ena moale be bada, abia kara ena moale be maragi.’”

³⁶ Paulo ese inai hereva ia gwauraia murinai, ia tui diho, bona ibounai danu ia guriguri. ³⁷ Idia ibounai idia tai dikadika, bona Paulo idia rosia bona idia kisi henia. ³⁸ Edia lalona be hisihisi bada iena hereva dainai, badina be ia gwau, “Lauegu vairana be do umui itaia lou lasi.” Vadaeni idia hakaua lao lagatoi dekenai.

21

Paulo ia lao Ierusalem

¹ Idia dekenai bamahuta ai gwauraia, gabeai lagatoi dekenai ai heau maoromaoro Kos motumotu dekenai. Kerukeru ai heau lao, Rodo motumotu dekenai ai ginidae. Unai gabu dekena amo ai lao Patara hanua dekenai. ² Unuseni Poinikia dekenai do ia lao lagatoi ta ai davaria. Vadaeni ai guia, ai heau lao. ³ Kupro motumotu ai itaia, to iena diho kahana dekenai ai hanaia, bona ai heau lao, Suria tano dekenai ai ginidae. Turo hanua dekenai ai diho, badina be unuseni lagatoi ena kohu do idia kokia.

⁴ Iesu idia badinaia taudia ai davaria Turo dekenai, bona unuseni hanuaboi 7 ai noho. Lauma Helaga ese idia ia hadibaia dainai, unai Keristani taudia ese Paulo idia hamaoroa Ierusalem do ia lao lasi. ⁵ Aiemai nega unai gabu dekenai ia ore, vadaeni ai rakatania, ai raka lao. Unai Keristani taudia ibounai mai edia hahine bona mai edia natudia danu dala dekenai idia bamoa ai, ia lao bona hanua ai rakatania. Kone dekenai ai tui diho, ai guriguri. ⁶ Vadaeni, bamahuta ai gwauraia

murinai, lagatoi dekenai ai guia, bona idia be edia ruma dekenai idia giroa lou.

Agabo ese Paulo ia sisiba henia

⁷ Turo ai rakatania, Tolemaia hanua dekenai ai ginidae. Unuseni Keristani taudia ai hanamoa, dina tamona idia danu ai noho. ⁸ Kerukeru, idia ai rakatania, ai lao Kaisarea hanua. Unuseni Sivarai Namona ia harorolaia tauna ladana Filipino ena ruma dekenai ai daekau. Ia be ekalesia durua totona guna idia abia hidi taudia 7 tauna ta. Ia danu ai noho. ⁹ Ia be mai ena natuna 4, headava lasi kekeni, idia ese peroveta hereva idia gwauraia.

¹⁰ Dina haida unuseni ai noho neganai, peroveta tauna ta ena ladana Agabo, Iudea dekena amo ia mai. ¹¹ Ai dekenai ia ginidae, ia ese Paulo ena gaba gauna ia abia, bona unai dekena amo sibona ena aena bona imana ia kwatua, ia gwau, “Lauma Helaga be inai bamona ia hereva, ‘Inai gaba gauna ena biaguna be Iuda taudia ese Ierusalem dekenai inai bamona do idia kwatua, bona idau bese taudia dekenai do idia henia.’ ”

¹² Inai hereva ai kamoni neganai, ai bona unai gabu taudia ese Paulo ai noia, Ierusalem do ia daekau lao lasi. ¹³ To Paulo ia haere, ia gwau, “Dahaka dainai umui tai noho, bona egu lalona umui hamanokaia? Lau hegaegae vadaeni, Ierusalem dekenai lau do idia kwatua, to inai sibona lasi, to Lohiabada Iesu ena ladana dainai lau mase danu namo.”

¹⁴ Iena lalao ai haidaua diba lasi dainai, ai mai noinoi ai hadokoa, ai gwau, “Lohiabada ese iena ura sibona ia karaia namo.”

¹⁵ Dina haida idia ore neganai, emai laolao gaudia ai abia hegaegae, bona ai daekau lao Ierusalem dekenai. ¹⁶ Diba tahua taudia haida Kaisarea dekena amo idia danu ai lao, ai idia hakaua lao Nasona ena ruma dekenai. Nasona be Kupro tauna, bona ia be Iesu badinaia tauna gunana ta. Iena ruma dekenai ai noho.

Paulo ese Iamesi ia vadijadi henia

¹⁷ Ierusalem dekenai ai ginidae neganai, Keristani taudia ese ai idia abia dae mai moale danu.

¹⁸ Kerukeru, Paulo ese ai danu ia lao, Iamesi itaia totona. Ekalesia kwarana taudia ibounai idia hebou, Iamesi danu. ¹⁹ Paulo ese idia ia hanamoa, bona Dirava ese idau bese taudia edia huanai ia karaia, Paulo ena gaukara dekena amo, unai sivarai ibounai ia gwauraia.

Paulo ese Iuda Keristani taudia edia sisiba ia kamoni henia

²⁰ Kwarana taudia ese inai hereva idia kamoni neganai, ibounai ese Dirava idia hanamoa. Gabei Paulo dekenai idia hereva, idia gwau, “Emai varavara tauna e, oi itaia Iuda taudia momo herea ese Iesu idia abidadama henia noho, bona idia ibounai ese Mose ena taravatu idia badinaia namonamo noho danu. ²¹ Idia be idia kamoni vadaeni, oi ese Iuda taudia, idau bese taudia edia huanai idia noho taudia, oi hadibaia, oi gwau Mose ena taravatu idia rakatania, idia edia natudia kopina utua kara karaia lasi, bona sene edia kara danu idia karaia lasi. ²² Inai Iuda taudia ese idia kamoni vadaeni oi be Ierusalem dekenai oi mai vadaeni. Unai dainai dahaka do ita karaia? ²³ Ai lalao inai oi dekenai ai hamaoroa gauna oi karaia be namo: Ai dekenai tau 4 idia noho, gwauhamata idia karaia vadaeni, Dirava dekenai. ²⁴ Idia danu Dubu Helaga dekenai oi lao, bona hagoevaia kara do oi karaia idia danu. Idia edia davana oi karaia, vadaeni edia kwarana huina idia utua diba. Inai bamona oi karaia, vadaeni taunimanima ibounai do idia diba, inai oi

dekenai idia herevalaia sivarai be momokani lasi. Ibounai do idia diba oi be kara maoromaoro, bona Mose ena taravatu oi naria tauna. ²⁵ To idau bese taudia, Iesu dekenai idia abidadama henia vadaeni taudia dekenai aiemai laloa gauna ai torea vadaeni, revareva dekenai. Ai gwau, kaivakuku dekenai henia aniani, bona rara, bona aiona idia gigia gaudia ena hidio do idia ania lasi, bona heudahanai karadia do idia karaia lasi.”

Paulo be Dubu Helaga dekenai ia lao

²⁶ Vadaeni, Paulo be inai taudia danu ia lao. Bona kerukeru, hagoevaia ena kara ibounai ia karaia idia danu. Gabeai Dubu Helaga lalonai Paulo ia raka vareai, bona ia ese hahelagaia tauna dekenai ia gwauraia, dina hida do ia lao ela bona idia edia hagoevaia kara do ia doko. Bona Paulo ese danu ia gwauraia edena negai boubou gauna do ia henia, unai tau 4 ta ta edia latanai.

Ierusalemata taudia ese Paulo idia dogoatao

²⁷ Inai dina 7 be kahirakahira idia ore neganai, Iuda taudia haida Asia dekena amo ese Paulo idia itaia Dubu Helaga lalonai. Idia ese taunimanima idia habadua, vadaeni idia ese Paulo idia dogoatao. ²⁸ Idia boiboi, idia gwau, “Israela taudia e, umui durua ai. Inai tau ese taunimanima ibounai gabu ibounai dekenai ia hadibaia noho, iseda bese bona Mose ena taravatu bona inai Dubu Helaga do idia ura henia lasi. Bona inai danu ia karaia: Ia ese Helene taudia Dubu Helaga lalonai ia hakaua vareai, bona inai Gabu helagana ia hamiroa.” ²⁹ Inai bamona idia hereva, badina be guna idia ese Tropimo, Efeso tauna, hanua lalonai Paulo danu idia itaia. Bona idia laloa, Paulo ese Dubu Helaga lalonai Tropimo ia hakaua vareai vadaeni.

³⁰ Hanua ena kahana ibounai dekenai hoa mai badu danu ia vara, bona mai boiboi bada danu hanua taudia idia heau hebou, Paulo idia dogoatao, Dubu Helaga dekena amo idia veria lao murimuri. Vadaeni, nega tamona iduara ibounai be idia koua.

Roma tuari taudia ese Paulo idia hamauria

³¹ Idia ura Paulo idia alaia gwauraia. To Ierusalemata ibounai ia heai noho sivaraina be tuari biaguna ia kamoni. ³² Vadaeni karaharaga ia ese tuari taudia mai edia kapena taudia ia hakaua, bona idia heau diho taunimanima dekenai. Taunimanima ese tuari biaguna mai ena tuari taudia danu idia itaia neganai, Paulo dekenai dadabaia kara idia hadokoa. ³³ Tuari biaguna be Paulo dekenai ia lao, ia dogoatao, oda ia gwauraia, auri rua dekenai idia kwatua. Gabeai ia henanadaia, ia gwau, “Inai tau be daika, bona dahaka ia karaia?” ³⁴ Taunimanima lalonai haida be hereva ta, ma haida hereva ta idia boiboi. Heai dainai tuari biaguna be dahaka ia vara ena sivarai ia davaria diba lasi. Unai dainai oda ia gwauraia, Paulo be tuari rumana do idia hakaua vareai. ³⁵ Vadavada dekenai ia ginidae, vadaeni tuari taudia ese Paulo idia huaia daekau, badina taunimanima be idia dagedage maragi lasi. ³⁶ Badina ibounai be Paulo ena murinai idia raka, idia boiboi, idia gwau, “Alaia mase!”

Paulo ese Ierusalemata taudia dekenai ia haroro

³⁷ Tuari ruma kahirakahira idia hakaua vareai neganai, Paulo ese tuari biaguna badana ia noia, ia gwau, “Mani emu kara, lau ura hereva oi dekenai.”

Tuari biaguna badana ia gwau, “Helene gado oi diba, a? ³⁸ Oi be unai Aigupito tauna lasi, a? Ia be guna neganai ala-ala ia hamatamaia, bona ala-ala taudia 4000 ia hakaudia lao taunimanima noho lasi gabuna dekenai?”

³⁹ Paulo ia gwau, “Lau be Iuda tauna, egu hanua be Taso, Kilikia tano dekenai, gabu be mai ladana. Mani emu kara, lau ura taunimanima dekenai lau hereva.”

⁴⁰ Gwau maoro ia henia. Vadaeni Paulo ese vadavada ena latanai ia gini, bona iena imana ia abia isi, taunimanima edia boiboi do ia koua totona. Idia be regerege lasi neganai, Paulo ese Heberu gado dekenai idia ia hereva henia, ia gwau,

22

¹ “Lauegu varavara bona lauegu tamana e, lau ura egu sivarai umui dekenai lau hamaoroa. Mani umui kamoni.” ² Idia kamoni ia be Heberu gado dekenai ia hereva, vadaeni idia regerege lasi, bona Paulo ia gwau,

³ “Lau be Iuda tauna, Taso hanua lalonai lau vara, Kilikia tano dekenai. To lau be inai hanua Ierusalem lalonai lau bada, bona Gamaliela be lauegu hadibaia tauna. Ia ese iseda sene edia taravatu korikori lau dekenai ia hadibaia. Bona Dirava ena gaukara dekenai lau goada karaia, umui ese harihari umui goada karaia noho hegeregere. ⁴ Inai Iesu ena Dala dekenai idia raka taudia lau dagedage henia ela bona idia mase. Tatau bona hahine lau kwatua, bona dibura ruma lalonai lau ese idia lau negea vareai. ⁵ Hahelagaia Tauna Badana bona Kaunsolo tau badadia ibounai be egu hereva idia hamomokania diba. Idia ese revareva lau dekenai idia henia, iseda varavara Damaseko dekenai idia torea. Vadaeni lau lao, unai Damaseko Keristani taudia do lau kwatua totona. Lau ura Ierusalem dekenai idia do lau abia mai, auri dekenai kwatua, edia kerere davana idia abia totona.

Paulo ese iena lalona ia giroa sivaraina ia gwauraia

⁶ “To lau lao neganai, Damaseko kahirakahira, dina tubua bamona, diari badana ta guba dekena amo ia diho, lau ia koua hagegea. ⁷ Tano dekenai lau moru, bona gado ta lau kamoni, lau dekenai ia hereva, ia gwau, ‘Saulo e, Saulo e, badina dahaka lau dekenai oi dagedage noho?’ ⁸ Lau haere, lau gwau, ‘Lohiabada e, oi be daika?’ Lau dekenai ia hereva, ‘Lau be Iesu, Nasareta tauna, oi ese oi dagedage henia tauna.’ ⁹ Lau danu idia laolao taudia ese diari idia itaia, to lau dekenai ia hereva gadona idia kamoni lasi.

¹⁰ “Vadaeni lau nanadaia, lau gwau, ‘Lohiabada e, dahaka dohore lau karaia?’ Lohiabada lau dekenai ia gwau, ‘Oi toresi, Damaseko oi lao, unuseni tau ta do ia hadibaia dahaka gau ibounai do oi karaia.’ ¹¹ Unai diari badana ese egu matana ia koua, gau ta lau itaia lasi. Vadaeni, lau dekenai idia noho taudia ese egu imana idia abia, lau idia hakaua lao Damaseko dekenai.

¹² “Unuseni tau ta ia noho, ladana be Anania. Ia be Dirava dekenai gari, bona iseda taravatu laloa momo tauna. Iuda taudia ibounai Damaseko dekenai idia gwau ia be tau namona ta. ¹³ Ia be lau dekenai ia mai, lau badinai ia gini, ia gwau, ‘Egu tadina Saulo e, oiemu matana do idia kehoa lou.’ Nega tamona lau ese Anania lau itaia. ¹⁴ Vadaeni ia gwau, ‘Iseda sene edia Dirava ese oi ia abia hidi vadaeni, iena ura be do oi diba, bona Kara Maoromaoro Tauna do oi itaia, bona iena uduna ena hereva danu

do oi kamona. ¹⁵Badina be, ia dainai, oi itaia bona oi kamona gaudia do oi gwaurai hedinarai, taunimanima ibounai edia vairanai. ¹⁶Vadaeni, dahaka oi naria? Oi toresi, bapatiso oi abia, oimu kara dika ia huria totona, iena ladana dekenai oi boibo dainai.’

Dirava ese Paulo ia siaia idau bese taudia dekenai

¹⁷“Ierusalem dekenai lau giroa lou, bona Dubu Helaga lalonai lau guriguri noho neganai lau mata hanai. ¹⁸Lohiabada lau itaia. Lau dekenai ia hereva, ia gwau, ‘Kara haraga, Ierusalem oi rakatania haraga, badina be lauegu sivarai oi gwaurai neganai do idia abia dae lasi.’ ¹⁹Lau gwau, ‘Lohiabada e, idia diba lau be guna lau lao dubu ibounai, oi dekenai abidadama taudia dibura ruma lalonai lau koua bona lau dadabaia. ²⁰Oimu hereva gwaurai tauna Stefano idia alaia neganai, lau danu idia dekenai lau gini, inai ala-ala taudia edia kara lau hanamo, bona edia dabua lau naria.’ ²¹To Iesu ese lau dekenai ia hereva, ia gwau, ‘Vadaeni, oi lao. Oi do lau siaia lao, gabu daudau dekenai, idau bese taudia dekenai.’”

²²Idia ese Paulo dekenai idia kamona ela bona inai hereva, vadaeni, idia boibo, idia gwau, “Abia lao, alaia mase! Inai bamona tauna ia noho tanobada be namo lasi.” ²³Idia boibo, bona edia kouti dabua idia negea, bona kahu danu idia negea daekau.

Roma tuari taudia ese Paulo idia naria namonamo

²⁴Unai dainai tuari biaguna ese iena tuari taudia dekenai oda ia gwaurai, tuari rumana lalonai Paulo idia hakau vareai. Ia gwau Paulo do idia dadabaia, bona do idia henanadaia, Iuda taudia edia dagedage badina be dahaka.

²⁵To idia ese Paulo idia kwatua hegaegae dadabaia totona neganai, Paulo ese iena badinai ia gini kapena dekenai ia nanadaia, ia gwau, “Taravatu be ia gwau dahaka? Bema ia be kota lasi guna, Roma tauna umui dadabaia diba, o lasi?”

²⁶Kapena ese inai hereva ia kamona neganai, ia lao, tuari biaguna dekenai ia hamaoroa, ia gwau, “Dahaka oi karaia noho? Badina be inai tau be Roma tauna.”

²⁷Tuari biaguna ia lao, Paulo dekenai ia gwau, “Oi hamaoroa lau, oi be Roma tauna, a?”

Paulo ia gwau, “Oibe.”

²⁸Tuari biaguna ia gwau, “Roma tauna ena dagi be lau hoia moni badana dekenai.”

Paulo ia gwau, “To lau be inai dagi lalonai lau vara.”

²⁹Vadaeni nega tamona Paulo idia dadabaia gwaurai taudia be idia rakatania. Tuari biaguna danu ia gari, badina be hari ia diba vadaeni Paulo be Roma tauna, bona ia ese ia kwatua kava dainai.

³⁰Kerukeru dina, tuari biaguna ia ura diba momokani dahaka badina Iuda taudia ese Paulo idia samania. Unai dainai ia ese kwatua auri ia kokia, bona dubu biagudia bona Kaunsolo ibounai dekenai ia boibo, do idia hebou. Vadaeni, ia ese Paulo ia hakau diho, bona idia edia vairana dekenai ia haginia.

23

Paulo, Kaunsolo taudia vairanai

¹Paulo ese Kaunsolo taudia ia itaia goada noho, vadaeni ia gwau, “Egu varavara e, lauegu lalona be goevagoeva, bona kerere lasi danu Dirava

ena vairanai lau noho, ia mai bona hari.” ² Inai bamona ia hereva, vadaeni Hahelagaia Tauna Badana Anania ese Paulo ena badinai gini taudia dekenai ia hamaoroa, Paulo ena uduna idia botai. ³ Bona Paulo ese ia dekenai ia hereva, ia gwau, “Dirava ese oi do ia botai, oi be magu idia penia kurokuro gauna bamona. Iniseni oi helai, lau oi kota henia taravatu hegeregere, a? To taravatu oi makohia inai, oi oda idia ese lau idia botai.”

⁴ Paulo ena badinai idia gini taudia idia gwau, “Dirava ena Hahelagaia Tauna Badana oi hadikaia, a?”

⁵ Paulo ia gwau, “Egu varavara e, lau diba lasi ia be Hahelagaia Tauna Badana, badina be Buka Helaga ia gwau, ‘Oiemu bese ena lohia ena ladana oi hadikaia lasi.’”

⁶ Paulo ese Kaunsolo taudia ia itaia, haida be Sadukea taudia, ma haida be Farisea taudia. Vadaeni Kaunsolo lalonai ia boiboi, ia gwau, “Egu varavara e, lau be Farisea tauna, bona Farisea tauna ena natuna. Iniseni idia kota henia lau, badina be lau laloa momokani, mase taudia dohore idia toresi lou.”

⁷ Inai bamona ia hereva, vadaeni Farisea taudia bona Sadukea taudia idia hepapahuahu, bona hebou taudia idia parara kahana rua. ⁸ Badina be Sadukea taudia idia gwau toresi lou be lasi, aneru be lasi, lauma danu be lasi. To Farisea taudia be inai toi idia abidadama henia noho. ⁹ Vadaeni heai ia vara, bona Farisea kahana edia hadibaia taudia haida idia toresi, idia hereva goada, idia gwau, “Inai tau dekenai kerere ta ai davaria lasi, sedira aneru ta o lauma ta be ia dekenai ia hereva vadaeni.”

¹⁰ Hepapahuahu be ia bada daekau, bona tuari biaguna ia gari, Paulo do idia darea, ia mase garina. Vadaeni, ia ese iena tuari taudia dekenai ia oda, do idia diho lao, Paulo be taunimanima edia huanai dekena amo do idia dadia, bona tuari ruma lalonai do idia hakaua vareai.

¹¹ Hanuaboi lalonai Lohiabada be Paulo ena badinai ia gini, ia gwau, “Oi goada noho, badina Ieruselema dekenai lauegu hereva oi gwauraia hegeregere, Roma dekenai danu do oi gwauraia.”

Iuda taudia ese Paulo alaia mase dala idia tahua

¹² Kerukeru dabai, Iuda taudia haida idia hebou, laloa tamona danu gwauhamata idia karaia, idia aniani lasi, bona ranu inua lasi ela bona Paulo do idia alaia mase. ¹³ Inai bamona idia gwauhamata hebou taudia be ibounai 40 mai kahana. ¹⁴ Idia lao dubu biagudia bona hanua tau badadia dekenai, idia gwau, “Ai be gwauhamata metauna ai karaia vadaeni, ai be do ai aniani lasi ela bona Paulo do ai alaia mase. ¹⁵ Inai dainai, umui bona Kaunsolo taudia ese hereva umui siaia lao tuari biaguna dekenai, ia ese Paulo do ia abia mai umui dekenai. Inai bamona umui koia, umui ura iena kara gaudia umui tahua lou gwauraia. To ai be dohore ai naria noho, bona umui dekenai do ia ginidae lasi neganai, vadaeni do ai alaia mase.”

¹⁶ To Paulo ena taihuna ena natuna mero ese inai gwauhamata hereva ia kamona. Inai dainai tuari ruma dekenai ia raka vareai, Paulo dekenai ia hamaoroa. ¹⁷ Paulo ese kapena ta dekenai ia boiboi, ia gwau, “Inai mero be tuari biaguna dekenai oi hakaua lao, badina be hereva ta do ia hamaoroa.” ¹⁸ Vadaeni, ia ese ia hakaua lao tuari biaguna dekenai, ia gwau, “Unai dibura tauna Paulo ese lau dekenai ia boiboi, ia noinoi inai mero be oi dekenai do lau hakaua mai, badina be hereva ta do ia hamaoroa oi.”

¹⁹ Tuari biaguna ese mero ena imana ia abia, ia hakaua siri, ia nanadaia hunia bamona, ia gwau, “Dahaka oi ura hamaoroa lau?”

²⁰ Mero ia gwau, “Iuda taudia idia laloa tamona vadaeni, oi dekenai do idia noinoi, kerukeru Paulo do oi hakaua diho Kaunsolo dekenai, iena kara gaudia ma do idia henanadaia lou totona. ²¹ To edia noinoi oi kamona lasi, badina be tatau 40 mai kahana be gabu ta dekenai do idia hunia, bona do idia naria noho ia dekenai. Ibounai idia gwauhamata vadaeni, aniani idia ania lasi, ranu idia inua lasi ela bona Paulo idia alaia mase. Idia be harihari idia hegaegae noho, oiemu oda dekenai idia naria noho.”

²² Tuari biaguna ia gwau, “Hari oi hereva lau dekenai gaudia, tau ta dekenai oi hamaoroa lasi.” Vadaeni, mero ia siaia lao.

Roma tuari taudia ese Paulo idia hakaua lao Kaisarea dekenai

²³ Tuari biaguna ese kapena rua dekenai ia boiboio, ia gwau, “Tuari taudia 200, bona hosi dekenai idia guia taudia 70, bona io idia dogoatao taudia 200 umui abia hegaegae. Hari hanuaboi, 9 okaloka do idia lao Kaisarea. ²⁴ Hosi haida oi henia idia dekenai, idia dekenai Paulo do ia guia lao. Vadaeni, Gavana Feliki dekenai Paulo do idia abia lao, mai ena mauri danu.” ²⁵ Revareva danu ia torea, inai bamona:

²⁶ “Lau, Klaudio Lusua, ese oi Feliki, gavana tauna namo herea, lau hanamoa oi. ²⁷ Inai tau Paulo, be Iuda taudia ese idia dogoatao, do idia alaia gwauria. Lau kamona ia be Roma tauna, unai dainai lau be tuari taudia danu ai lao, ai hamauria. ²⁸ Lau ura diba badina be dahaka idia samania, unai dainai edia Kaunsolo dekenai lau hakaua diho. ²⁹ Unuseni lau davarua edia taravatu dainai Paulo idia samania, to ia hamasea badina, o dibura ruma koua badina ta lau davarua lasi. ³⁰ To lau kamona, Iuda taudia ese ia alaia mase hereva idia karaia noho. Unai dainai oi dekenai ia lau siaia mai inai, bona ia idia samania taudia lau hamaoroa, oi dekenai idia mai, bona oiemu vairana dekenai do idia kota henia.”

³¹ Vadaeni, tuari taudia ese tuari biaguna ena oda hegeregere idia karaia, Paulo idia abia, bona unai hanuaboi Anetipatiri dekenai idia hakaua lao. ³² Kerukeru, tuari ruma dekenai idia giroa lou, to hosi dekenai idia guia taudia be Paulo danu idia lao. ³³ Kaisarea dekenai idia hakaua lao, bona revareva be gavana dekenai idia henia, bona Paulo danu idia hakaua vareai gavana ena vairana. ³⁴ Gavana ese revareva ia duahia, bona Paulo dekenai ia henanadaia ia be edena gabu mai tauna. Ia kamona ia be Kilikia kahana tauna neganai ia gwau, ³⁵ “Oi idia samania taudia do idia mai neganai, oiemu hereva ibounai do lau kamona.” Vadaeni, ia ese oda ia henia, Paulo be Heroda ena kota ruma lalonai do idia koua.

24

Paulo, Feliki ena vairana

¹ Dina 5 murina Hahelagaia Tauna Badana, Anania, ia diho mai Kaisarea dekenai, Iuda edia tau badadia haida danu, bona Roma taravatu diba tauna ta ladana Teretulo. Vadaeni, gavana ena vairana dekenai idia gini, Paulo idia samania. ² Paulo dekenai idia boiboio ia mai. Vadaeni, Teretulo ese samania hereva ia hamatamaia, ia gwau,

“Feliki e, oi tau namo herea mai aonega danu, ai oi gunalaia namo herea dainai, ai be maino dekenai ai noho nega daudau. Bona oi dainai

aiemai tano ese hanamoa gaudia momo ia davaria. ³ Ai be inai dainai oi ai hanamoa, gabu ibounai dekenai, nega ibounai. Bona ai tanikiu henia oi dekenai.

⁴ “Lau ura lasi oiemu nega lau haorea kava, to mani emu kara oi bogahisihisi ai dekenai, bona aiemai hereva kwadogi oi kamona. ⁵ Inai tau Paulo ai davaria, ia be kerere havaraia tauna. Iuda taudia tanobada kahana ibounai dekenai, edia huanai heai ia havaraia noho. Bona ia be Nasareta ore edia gungalai tauna. ⁶ Ia ese Dubu Helaga ia hamiroa toho, bona ai dogoatao. Ai ura aiemai taravatu dekenai do ai kota henia. ⁷ To Lusua, tuari biaguna ia mai, bona mai dagedage danu aiemai imana dekeni amo ia dadia. ⁸ Bona Lusua ese oda ia gwauraia, Paulo idia samania taudia be oi dekenai idia mai. Mani, oi ese inai tau oi henanadaia, bona ai ese ai samania gaudia ibounai oi sibona do oi diba.”

⁹ Bona Iuda taudia danu ese iena hereva idia durua, idia gwau, “Unai hereva ibounai be momokani.”

Paulo be Feliki vairanai ia hereva

¹⁰ Gavana ese imana dekenai Paulo ia hadibaia do ia hereva, vadaeni Paulo ese ia haere, ia gwau,

“Lau diba, oi ese lagani momo inai bese dekenai kota naria gaukara oi karaia. Unai dainai mai moale danu lau sibona egu haere oi dekenai do lau henia. ¹¹ Bema oi tahua, do oi diba, dina 12 sibona ia lao vadaeni, Ierusalem dekenai lau daekau guriguri totona. ¹² Dubu Helaga lalonai tau ta danu lau hepapahuahu lasi, lau idia davaria lasi inai bamona. Bona dubu edia lalonai o hanua lalonai lau be taunimanima edia huanai heai ta lau havaraia lasi. ¹³ Lau dekenai idia samania gaudia idia hamomokania diba lasi.

¹⁴ “To inai hereva tamona lau ura gwauraia hedinarai oi dekenai: Lau ese Iesu ena Dala dekenai lau raka noho, bona inai kara dekeni amo, lau ese aiemai sene taudia edia Dirava lau tomadiho henia noho. Iuda taudia idia gwau inai Iesu ena Dala be kerere. To Mose ena taravatu bona peroveta bukadia lalonai idia torea gaudia ibounai lau abidadama henia noho.

¹⁵ “Lau be mai egu abidadama Dirava dekenai, inai lau idia samania taudia hegeregere. Aiemai abidadama be inai: Mase taudia dohore idia toresi lou, kara maoromaoro taudia, bona kara maoromaoro lasi taudia danu. ¹⁶ Inai dainai lau goada karaia noho, mai lalona maoromaoro danu lau noho Dirava ena vairana dekenai, bona taunimanima edia vairanai danu.

¹⁷ “Lagani momo idau gabudia dekenai lau noho murinai, Ierusalem dekenai giroa lou, egu bese dekenai moni henia, bona boubou gaudia do lau atoa totona. ¹⁸ Inai bamona lau karaia noho neganai, bona lau idia hagoevaia momokani murinai, Dubu Helaga lalonai idia davaria lau. Taunimanima lau danu be lasi, bona heai be lasi. ¹⁹ To Iuda taudia haida Asia kahana dekeni amo ese lau idia dogoatao unuseni. Bema lauegu kerere ta idia davaria, oiemu vairana dekenai idia mai be namo, bona idia samania lau. ²⁰ Bema lasi, iniseni idia noho taudia ese oi dekenai idia hamaoroa be namo, Kaunsolo vairanai lau gini neganai, dahaka kerere lau dekenai idia davaria. ²¹ To gauna be inai hereva tamona sibona: Idia edia huanai lau gini neganai, lau hereva goadagoda, lau gwau, ‘Mase taudia be dohore idia toresi lou mauri dekenai.’ Unai hereva dainai hari dina umui kota henia lau.”

²² Inai Iesu ena Dala ena hereva Feliki ia diba momo. Inai dainai ia ese kota ia koua. Ia gwau, “Lusia, tuari biaguna ia mai neganai, oiemu kota hereva do lau laloa.” ²³ Vadaeni Feliki ese kapena ia hamaoroa, Paulo do idia gimaia, to ia koua momokani lasi, bona bema Paulo ena turana haida idia ura gau henia ia dekenai, edia dala koua lasi.

Feliki ese Paulo ia atoa dibura ruma lalonai, lagani rua unuseni ia noho

²⁴ Dina haida murinai, Feliki mai ena adavana Drusila danu idia mai. Drusila be Iuda hahine. Feliki ese Paulo ia boiria mai, bona Paulo ena hereva haida ia kamoni. Paulo ese Keriso Iesu dekenai abidadama henia kara ia herevalaia. ²⁵ To Paulo ese kara maoromaoro, bona tauanina ena ura karaia lasi kara, bona Dirava ena kota bada dinana dahore ia mai herevana ia gwauraia neganai Feliki ia gari, ia gwau, “Harihari oi lao, nega namona lau davaria neganai, be do lau boiboi, oi mai lou.” ²⁶ Badina be ia laloa sedira Paulo ese moni haida do ia henia. Unai dainai nega momo ia boiboi ia dekenai, ia danu herevahereva totona.

²⁷ Lagani rua ia lao murinai, Porokio Festo ese Feliki ena gabu ia abia. Feliki ia ura Iuda taudia be ia dekenai do idia moale. Unai dainai Paulo ia rakatania dibura lalonai.

25

Paulo, Festo ena vairanai

¹ Festo ia ginidae, Iudea tano naria gaukara do ia karaia totona. Dina toi murinai Kaisarea ia rakatania, ia daekau Ierusalem. ² Unuseni dubu biagudia bona Iuda tau badadia ese Paulo idia samania. Festo dekenai idia noinoi goada, idia gwau, ³ “Oi durua ai, mani emu kara inai Paulo oi siaia mai Ierusalem.” Badina be idia laloa tamona, Paulo do idia alaia mase, dala dekenai ia daekau mai neganai. ⁴ To Festo ia haere, ia gwau, “Paulo be Kaisarea dibura ruma dekenai do ia noho, bona nega sisina do lau giroa lou unuseni. ⁵ Namona be emui gunalaia taudia lau danu do ai lao Kaisarea. Bona bema inai tau be mai ena kerere, idia be unuseni do idia samania.”

⁶ Festo be idia danu Ierusalem dekenai ia noho dina 8 o 10 bamona, vadaeni ia lou lao Kaisarea. Kerukeru dina dekenai, kota gabuna dekenai ia helai bona ia oda, Paulo do idia hakau vareai. ⁷ Paulo ia ginidae neganai, Ierusalem dekena amo idia mai Iuda taudia be ia dekenai idia gini hagegea. Idia be samani hereva momo Paulo ena latanai idia gwauraia, to idia hamomokania dala be lasi. ⁸ Paulo be ia haere, ia gwau, “Lau be Iuda taudia edia taravatu lau makohia lasi, Dubu Helaga lau hadikaia lasi, bona Kaisarea dekenai lau kerere lasi.”

⁹ To Festo ia ura Iuda taudia be ia dekenai do idia moale, inai dainai Paulo dekenai ia henanadaia, ia gwau, “Oi ura lao Ierusalem, unuseni inai samani hereva kota dekenai do lau kamoni?”

¹⁰ Paulo ia gwau, “Lau be Kaisara ena kota vairana dekenai lau gini noho. Inai be lauegu kota korikori. Lau be Iuda taudia dekenai kerere ta lau karaia lasi, oi danu oi diba. ¹¹ Bema taravatu lau makohia, o kara ta lau karaia, unai kara davana be mase, vadaeni, lau idia alaia mase be namo. To bema edia samani hereva be momokani lasi, tau ta be hegeregere lasi edia imana dekenai lau ia atoa. Lau be Kaisara dekenai lau noinoi. Iena kota dekenai lau lao be namo.”

¹² Vadaeni, Festo be iena sisiba henia taudia danu idia herevahereva, gabeai Paulo dekenai ia haere, ia gwau, “Oi be Kaisara dekenai oi noinoi. Vadaeni, Kaisara dekenai do oi lao.”

Agripa ia ginidae

¹³ Dina haida murinai, King Agripa mai Berenike danu idia diho mai Kaisarea, Festo hanamoa totona. ¹⁴ Dina momo unuseni idia noho murinai, Festo ese Paulo ena hereva king dekenai ia hamaoroa, ia gwau, “Tau ta iniseni ia noho, Feliki ese dibura ruma lalonai ia rakatania. ¹⁵ Jerusalema lau lao neganai, Iuda edia dubu biagudia bona tau badadia ese inai tau idia samania, bona idia ura lau kota henia. ¹⁶ To idia dekenai lau haere, lau gwau, ‘Ai Roma taudia aiemai kara be, tau ta do ai kota kava lasi. Kerere tauna be iena samania taudia edia vairanai do ia gini guna, bona ia be mai ena nega edia samani hereva dekenai do ia haere.’

¹⁷ “Vadaeni, idia ibounai iniseni idia mai neganai, lau naria lasi, to kerukeru dina kota gabuna dekenai lau helai, bona lau oda inai tau do idia hakaua mai. ¹⁸ Iena samania taudia idia toresi neganai, lau laloo kara kerere haida do idia gwauraia iena latanai, to idia gwauraia lasi. ¹⁹ Idia be edia guriguri kara sibona dekenai idia hepapahuahu. Bona tau ta, ladana Iesu idia herevalaia, ia mase vadaeni, to Paulo ia hereva goada, ia gwau inai Iesu be ia mauri noho. ²⁰ Inai hereva tahua dalana dekenai lau daradara. Inai dainai Paulo lau henanadaia, ia ura Jerusalema dekenai ia lao, inai gau kotalaia totona, o lasi. ²¹ To Paulo ese ia noinoi lau dekenai, do ita gimaia noho ela bona Augusto ese do ia kota henia. Unai dainai lau oda idia gimaia noho, ela bona Kaisara dekenai do lau siaia lao.”

²² Agripa ese Festo dekenai ia hereva, ia gwau, “Lau danu lau ura inai tau ena hereva lau kamoni.”

Festo ia gwau, “Kerukeru do oi kamoni.”

Paulo, Agripa ena vairanai

²³ Kerukeru dina dekenai, Agripa bona Berenike idia mai, king ena toana gaudia momo danu, hebou ruma lalonai idia raka vareai. Idia danu be tuari biagudia bona hanua tau badadia. Vadaeni, Festo ia oda, Paulo idia hakaua vareai. ²⁴ Festo ia gwau, “King Agripa e, bona ai danu umui hebou noho taudia e. Inai tau, Paulo, mani umui itaia. Ia totona Iuda taudia ibounai Jerusalema dekenai bona iniseni danu lau dekenai idia noinoi. Idia boibo goada, namo lasi inai Paulo ia mauri. ²⁵ Lau tahua, to ena davana be mase kara ta lau davaria lasi ia dekenai. Ma Paulo ese ia noinoi, Augusto ena vairana dekenai do ia kota. Inai dainai lau laloo do lau siaia lao. ²⁶ To Paulo totona lau be hereva maoromaoro ta lau torea diba lasi lauegu biaguna dekenai. Unai dainai lau hakaua mai vadaeni umui emui vairanai, bona oi vairanai danu, King Agripa e. Bona iena kara ita tahua nega lalonai, lau be Paulo totona hereva ta do lau davaria, vadaeni do lau torea. ²⁷ Badina lau laloo be ia maoro lasi, bema dibura tauna lau siaia lao kava, iena samani hereva be lasi neganai.”

26*Paulo be Agripa ena vairanai ia hereva*

¹ Agripa ese Paulo dekenai ia hereva, ia gwau, “Ia namo, oi sibona oi hereva.” Vadaeni, Paulo ese iena imana ia abia isi, bona ia haere, ia gwau,

² “King Agripa e, lau be moale, badina be Iuda taudia ese lau idia samania gaudia ibounai be oiemu vairanai do lau haere. ³ Badina korikori be, Iuda taudia edia kara bona edia hepapahuahu gaudia oi diba

namonamo vadaeni. Unai dainai lau noinoi, egu hereva oi kamoni, mani emu kara oi hesiku haraga lasi.

⁴ “Lauegu kara, lau uhau neganai ia mai bona hari, egu bese taudia edia huanai bona Ieruselema lalonai danu be Iuda taudia ibounai idia diba. ⁵ Idia be nega daudau idia diba, bona bema idia ura, idia gwauraia diba, guna lau be Farisea tauna. Unai orea be taravatu metaudia ibounai idia badinaia, lau danu. ⁶ Inai kota gabuna lalonai inai hari lau gini badina be Dirava ena gwauhamata gauna lau laloatao, aiemai sene taudia dekenai ia henia gwauhamata. ⁷ Aiemai iduhu 12 ese inai gwauhamata davaria totona idia naria noho. Inai dainai idia ese Dirava idia tomadiho henia, dina bona hanuaboi. King e, inai gwauhamata lau naria dainai, Iuda taudia ese idia samania lau. ⁸ Badina dahaka umui ese inai bamona umui laloa: Dirava ese mase taudia ia hatorea isi lou hereva be ita abia dae diba lasi?

⁹ “Lau danu guna lau laloa gau momo lau karaia Iesu, Nasareta tauna ena ladana hadikaia totona, be namo. ¹⁰ Inai bamona kara Ieruselema dekenai lau karaia. Dubu biagudia ese siahu lau dekenai idia henia. Bona Dirava ena taudia momo dibura ruma lalonai lau koua. Bona kota ese inai Keristani taudia alaia mase herevana idia gwauraia neganai, lau danu ese idia mase herevana lau gwauraia. ¹¹ Dubu ibounai lalonai nega momo lau ese idia lau dadabaia, lauegu ura be idia ese Iesu ena ladana do idia hadikaia. Idia dekenai lau badu dikadika dainai, lau be idau bese edia hanua dekenai lau lao, idia do lau dagedage henia totona.

Paulo ese iena lalona ia giroa sivaraina ia gwauraia

¹² “Inai gaukara karaia totona Damaseko dala dekenai lau raka lao. Dubu biagudia ese siahu bona oda lau dekenai idia henia. ¹³ Inai dala dekenai, King e, dina tubua neganai, diari ta lau itaia guba dekena amo ia tara goada, iena diari be bada, dina ena diari be maragi. ¹⁴ Ia ese lau bona lau danu idia raka taudia dekenai ia tara. Ai ibounai tano dekenai ai moru, bona lau be gado ta lau kamoni, Heberu gado dekenai ia hereva, ia gwau, ‘Saulo e, Saulo e, badina dahaka lau dekenai oi dagedage? Oi sibona ikoko matana oi moia, vadaeni oi hisihisi.’ ¹⁵ Lau haere, lau gwau, ‘Lohiabada e, oi be daika?’ Lohiabada ia hereva, ‘Lau be Iesu, oi ese lau oi dagedage henia. ¹⁶ To oi toresi, oi gini maoro. Oi dekenai lau hedinarai badina be inai: Lauegu hesiai tauna do lau halaoa oi. Oi itaia gaudia, bona oi dekenai do lau hedinarai gaudia danu be do oi gwauraia hedinarai. ¹⁷ Heberu taudia bona idau bese taudia edia siahu dekena amo do lau hamauria oi. Idia dekenai oi do lau siaia. ¹⁸ Edia matana do oi kehoa, vadaeni dibura do idia rakatania, bona mai lalona giroa danu, diari dekenai do idia mai. Vadaeni Satani ena siahu do idia rakatania, bona Dirava dekenai do idia mai. Vadaeni idia edia kara dika do idia gwauatao, lau dekenai idia abidadama henia dainai, bona Dirava ena abia hidi taudia huanai edia gabu do idia abia.’

Paulo ese iena gaukara anina ia gwauraia

¹⁹ “Unai dainai, king Agripa e, guba dekena amo lau dekenai ia hedinarai gauna ena sisiba dekenai lau kamoni henia lasi, a? Lasi momokani, ²⁰ to Damaseko taudia dekenai lau haroro guna, gabeai Ieruselema taudia, gabeai Iudea kahana ibounai, bona inai murinai idau bese taudia danu dekenai lau haroro. Egu haroro be, idia edia lalona do idia giroa, Dirava dekenai do idia mai, bona kara do idia karaia, edia lalona giroa hamomokania totona. ²¹ Inai lau karaia dainai,

Iuda taudia ese Dubu Helaga lalonai lau idia dogoatao, lau idia alaia gwauraia. ²² To Dirava dekena amo durua lau davarua, unai negana ia mai bona harihari. Bona inai dainai iniseni lau gini, taunimanima ibounai dekenai lau haroro, maragidia bona badadia. Lau be idau hereva lau gwauraia lasi, lau be peroveta taudia bona Mose, guna idia ese idia hereva gaudia sibona lau gwauraia noho. ²³ Hereva be inai: Keriso do ia hisihisi guna, bona ia be tau ginigunana mase dekena amo ia toreisi lou, hamauria kara ena diari be Iuda taudia bona idau bese taudia dekenai ia gwauraia totona.”

Paulo ese Festo ena lalona ia ania Keristani do ia halaoa totona

²⁴ Ia be inai bamona ia haere, vadaeni Festo ia boiboio bada, ia gwau, “Paulo e, oi be kavakava, oiemu aonega badana dainai oiemu lalona ia kavakava.”

²⁵ To Paulo ia haere, ia gwau, “Tau namo herea Festo e, lau be kavakava lasi, hereva momokani bona maoromaoro lau gwauraia inai. ²⁶ King Agripa e, oiemu vairanai lau hereva mai sياهو danu, badina be inai gaudia ibounai oi diba. Lau diba vadaeni inai gau ta ia hunia lasi oi dekenai, badina inai gaudia be hunia gabu dekenai idia vara lasi. ²⁷ King Agripa e, peroveta taudia edia hereva oi abia dae, a? Lau diba vadaeni oi abia dae.”

²⁸ Agripa be Paulo dekenai ia hereva, ia gwau, “Oi lalao inai nega kwadogi lalonai Keristani tauna oi halaoa lau, a?” ²⁹ Paulo ia gwau, “Nega kwadogi o daudau be herevana, to Dirava ena vairanai lauegu ura tamona be inai, oi bona egu hereva idia kamonai taudia ibounai be lau hegeregere do umui lao. To inai auri kwatua gaudia sibona lau ura lasi umui abia.”

³⁰ Vadaeni, king bona gavana bona Berenike, bona idia danu helai taudia ibounai idia toreisi. ³¹ Murimuri dekenai idia raka neganai idia herevahereva, idia gwau, “Inai tau ese mase davana kara ta o dibura ruma davana kara ta ia karaia lasi.” ³² Agripa ese Festo dekenai ia hereva, ia gwau, “Bema inai tau be Kaisara dekenai ia noinoi lasi neganai, do ita ruhaia diba.”

27

Paulo ia lao Roma

¹ Idia lalao, ai be lagatoi do ai guia, Italia dekenai ai lao. Inai dainai Paulo mai dibura taudia haida danu be tuari kapena ta dekenai idia henia, iena ladana be Iulio. Ia be Augusto ena orea tauna ta. ² Adaramuteno taudia edia lagatoi ta dekenai ai guia. Inai lagatoi be Asia ena kone gabudia do ia lao. Vadaeni ai heau lao, bona Makedonia tauna ta, Tesalonika dekena amo, ena ladana be Arisitako ai danu ia lao. ³ Kerukeru dina dekenai Sidono dekenai ai kamokau. Unuseni Iulio ia bogahisihisi Paulo dekenai. Ia ruhaia, bona iena dala ia karaia, iena turadia dekenai do ia lao, bona idia dekena amo iena ura gaudia ia abia. ⁴ Unai gabu ai rakatania, bona aiemai vairana dekenai lai ia mai dainai, Kupro ena lai bada lasi kahana dekenai ai heau. ⁵ Kilikia bona Pamupulia edia davara dekenai ai heau, bona Mura hanua dekenai, Lukia tano dekenai ai kamokau.

⁶ Unuseni, kapena ese Alesandria ena lagatoi ta ia davarua, Italia do ia lao. Unai lagatoi dekenai kapena ese ai ia udaia, ai guia.

⁷ Dina momo metairametaira ai heau, bona mai hekwarahi bada danu Kenido hanua kahirakahira ai kamokau. Unuseni lai ese aiemai dala ia koua, vadaeni Kerete ena lai bada lasi kahana dekenai ai heau, Salamone iduka henuna kahanai. ⁸ Mai hekwarahi bada danu kone kahirakahira ai heau. Vadaeni, gabu ta dekenai ai kamokau, ena ladana idia atoa Lagatoi Noho Gabu Namodia. Unai gabu bona Lasea hanua idia edia pada be daudau lasi.

⁹ Unuseni ai noho ela bona nega daudau ia ore, bona davara ia dika bona gari negana ia ginidae, badina be Iuda taudia edia aniani taravatua ena nega be ia ore. Unai dainai Paulo be idia dekenai ia sisiba, ia gwau, ¹⁰ "Tatau e, lau diba vadaeni, iseda laolao do ia dika. Gau momo do idia boio. Kohu bona lagatoi sibona lasi, to ita danu sedira do ita mase." ¹¹ To kapena ese lagatoi ena taria tauna bona lagatoi ena biaguna tauna idia edia hereva ia abia dae, Paulo ena hereva ia abia dae lasi. ¹² Unai be lagatoi kamokau gabuna namona lasi, keruma neganai. Unai dainai lagatoi taudia momo idia ura davara dekenai do ai heau. Idia ura Poinike dekenai ai kamokau, unuseni do ai noho medu ena neganai. Unai Poinike be lagatoi kamokau gabuna ta Kerete motumotu dekenai mai ena vareai gabudia, ta be diho lahara kahanai, bona ta be lahara kahanai.

Guba dikana

¹³ Lai namona diho kahana dekena amo ia toa, vadaeni idia lalao edia dala idia karaia be hegeregere, unai dainai dogo idia veria, bona Kerete ena kone kahirakahira dekenai idia heau. ¹⁴ To nega sisina murinai, guba bada herea ladana lahara ia toa, motumotu dekena amo. ¹⁵ Lai ese lagatoi ia hodaia lao. Ai ura lai ena vaira kahanai ai heau, to hegeregere lasi. Unai dainai ai karaia toho lasi, bona lai ese lagatoi ia hodaia lao sibona. ¹⁶ Motumotu maragina ta ena ladana Kauda, ena lai bada lasi kahanai ai heau. Unuseni, ai hekwarahi bada dingi hamauria totona. ¹⁷ Idia ese dingi idia veria daekau lagatoi dekenai. Bona kwanau goadadia dekena amo lagatoi ena ihuana idia kumia auka, hagoadaia totona. Idia gari badina be sedira lagatoi do ia hure lao, Afrika ena boe dekenai do ia kamokau. Unai dainai palai idia veria diho, bona lai ese ia hodaia lao. ¹⁸ Kerukeru, guba dikana ese lagatoi ia botia dikadika noho dainai, kohu be davara dekenai idia negea hamatamaia. ¹⁹ Dina ihatoina dekenai, lagatoi gaudia danu ma idia negea, edia imana dekenai. ²⁰ Dina momo, dina bona hisiu ai itaia lasi, bona guba ia toa dikadika momokani. Bona ai lalao mauri do ai davaria diba lasi momokani.

²¹ Idia be nega daudau idia aniani lasi, vadaeni Paulo ese idia edia huanai ia gini, ia gwau, "Tatau e, guna lau gwauraia hereva, Kerete ia rakatania lasi herevana, bema umui kamonai henia be namo. Bema unai bamona, inai dika bona kohu halusia be umui dekenai do ia vara lasi. ²² To harihari umui dekenai lau noinoi, umui goada karaia, badina be umui ta ena mauri do ia boio lasi. Lagatoi sibona do ia boio. ²³ Lau be Dirava ena tau, bona ia dekenai lau tomadiho henia. Varani hanuaboi aneru ta lau dekenai ia gini, ²⁴ ia gwau, 'Paulo e, oi gari lasi, Kaisara ena vairana dekenai do oi gini, bona Dirava ese oi danu idia laolao taudia edia mauri oi dekenai ia henia vadaeni.' ²⁵ Unai dainai, tatau e, umui goada karaia, badina be Dirava lau abidadama henia noho, lau ia hamaoroa gaudia hegeregere do idia vara. ²⁶ To motumotu ta dekenai do ita hure daekau."

Lagatoi ia hure daekau

²⁷ Guba ena hanuaboi namba 14 ia mai vadaeni, ai be Adaria davara badana ena huanai lai ese ai ia hodaia lao. Bona hanuaboi momokani neganai, lagatoi taudia idia laloa tano be kahirakahira. ²⁸ Vadaeni, davara ena dobu makana idia abia hahetoho gauna dekenai, ena dobu be 40 mita. Nega daudau lasi ma idia tohoa lou, 30 mita idia davaria. ²⁹ Idia gari, sedira lagatoi be nadi dekenai do ia heau daekau. Inai dainai dogo hani lagatoi ena murina kahana dekena amo idia negea diho, vadaeni idia guriguri dina do ia daekau haraga totona. ³⁰ Lagatoi taudia idia ura lagatoi idia rakatania. Vadaeni, dingi be davara dekenai idia atoa diho, to hunia bamona idia karaia, idia ura taunimanima idia laloa dogo haida ma idia negea diho lagatoi ena kwarana kahanai. ³¹ To Paulo ese kapena mai ena tuari taudia danu dekenai ia hereva, ia gwau, “Bema idia be lagatoi dekenai idia noho lasi, umui mauri diba lasi.” ³² Vadaeni tuari taudia ese dingi ena kwanau idia utua, dingi ia moru vadaeni davara dekenai.

³³ Dina be kahirakahira ia daekau neganai, Paulo ese ibounai ia hamaoroa aniani do idia ania. Ia gwau, “Dina 14 lalonai umui noho kava, umui aniani lasi. ³⁴ Unai dainai, umui dekenai lau hamaoroa, aniani umui ania namo, mauri umui davaria totona. Badina be emui kwarana ena huina ta do ia boio lasi, lasi momokani.” ³⁵ Unai bamona ia hereva, vadaeni Paulo ese paraoa sisina ia abia, idia edia vairanai Dirava ia tanikiu henia, ia makohia, ia ania. ³⁶ Vadaeni, idia edia lalona idia moale, bona idia ibounai danu aniani idia ania. ³⁷ Lagatoi dekenai idia guia taudia ibounai be 276. ³⁸ Aniani idia ania hegeregere, vadaeni paraoa be davara dekenai idia negea diho, lagatoi do ia haraga totona.

³⁹ Daba rere neganai, motumotu ta idia itaia, to ena ladana idia diba lasi. Gohu ta idia itaia, mai ena kone, bona idia laloa, bema dala idia davaria neganai lagatoi do idia abia lao unai gabu dekenai. ⁴⁰ Vadaeni, dogo ibounai ena kwanau idia utua, davara lalonai idia rakatania. Bona taria gaudia edia kwanau idia ruhaia, bona kwarana kahana ena palai idia veria daekau, lai ese lagatoi do ia hodaia lao totona. Vadaeni, kone kahana dekenai idia heau lao. ⁴¹ To lagatoi ese boe dekenai ia kamokau. Kwarana kahana ia kamokamo momokani, ia marere lasi. To murina kahana be hurehure ena goada ese ia makohia.

⁴² Tuari taudia idia laloa dibura taudia do idia alai mase, haida idia nahu lao bona idia heau garina. ⁴³ To kapena ia ura be Paulo ia hamauria dainai edia dala ia koua. Ia ese oda ia gwauraia, nahu diba taudia do idia paudobi guna, bona kone dekenai idia nahu lao. ⁴⁴ Idia murinai noho taudia be do idia diho, haida reirei latanai, ma haida lagatoi gaudia edia latanai. Inai bamona idia karaia, ela bona tano dekenai ibounai idia daekau lao mai mauri danu.

28

Paulo Melita dekenai

¹ Ai ibounai kone dekenai ai roho mauri, vadaeni ai diba inai motumotu ena ladana be Melita. ² Unai gabu taudia idia bogahisihisi ai dekenai. Lahi idia karaia bona ai idia abia dae, badina be medu bona keru ia bada. ³ Paulo ese au rakuraku lahi totona ia gogoa. Lahi dekenai ia atoa neganai, gaigai ta, siahu dainai, au dekena amo ia mai, bona Paulo ena imana ia koria. ⁴ Motumotu taudia ese inai gaigai Paulo ena imana dekenai ia koria noho idia itaia, vadaeni idia sibona

idia herevahereva, idia gwau, “Momokani inai tau be taunimanima alaia tauna. Inai be davara dekenai ia mase lasi, ia mauri, to Kara Maoromaoro ena dirava ia ura lasi ia mauri.”⁵ To Paulo ese gaigai ia negea oho lahi dekenai, dika ia davaria lasi.⁶ Idia itaia noho, idia lalao do ia gudu, o do ia moru diho haraga, bona ia mase. To nega daudau idia itaia noho, bona dika ta ia davaria lasi. Vadaeni edia lalao idia giroa, idia gwau, “Ia be dirava ta.”

⁷Unai gabu kahirakahira dekenai unai motumotu ena lohia ta, ladana Pobelio, ena tano ia noho. Ia ese ai ia abia dae, bona dina toi lalonai, ai ia naria namo herea, mai ena lalona namo danu.⁸ Pobelio ena tamana be ia hekure mai gorere danu. Iena kopina be siahu, bona rara kukuri ia abia. Paulo ese ia vadivadi henia, ia guriguri, bona iena latanai ena imana ia atoa, vadaeni ia hanamo.⁹ Inai bamona ia karaia murinai, unai motumotu ena gorere taudia ibounai idia mai, bona Paulo ese ia hanamodia.¹⁰ Vadaeni, ai hanamo totona harihari gaudia momo idia henia ai dekenai, bona ai guia lou neganai, aiemai ura gaudia lagatoi dekenai idia udaia.

Paulo ia ginidae Roma dekenai

¹¹Hua toi murinai, Alesandria ena lagatoi ta dekenai ai guia. Unai lagatoi ena ladana be Hekapa Memero. Ia be keru neganai unai motumotu dekenai ia noho.¹² Surakusa dekenai ai kamokau, dina toi unuseni ai noho.¹³ Unai gabu dekenai amo ai heau lao, bona Regio dekenai ai kamokau. Kerukeru, lai be diho kahana dekenai amo ia toa, vadaeni dina rua murinai Puteoli dekenai ai kamokau.¹⁴ Unuseni Keristani varavara haida ai davaria. Ai dekenai idia noinoi dainai dina 7 idia danu ai noho. Vadaeni, ai ese idia ai rakanania, ai raka lao, bona inai bamona ai be Roma hanua badana dekenai ai ginidae.¹⁵ Roma dekenai Keristani taudia ese ai mai noho sivarai idia kamonai. Vadaeni dala dekenai idia raka mai, bona hoihoi gabu ladana Apio bona Laga-ani Ruma Toi dekenai idia danu ai hedavari. Paulo ese idia ia itaia neganai, Dirava dekenai ia tanikiu henia, bona iena lalona dekenai goada ia abia.

Paulo Roma dekenai ia haroro

¹⁶Roma dekenai ai ginidae neganai, Roma gavamani ese Paulo ena dala ia karaia, ia sibona ena ruma dekenai ia noho, to tuari tauna ta ese ia naria.

¹⁷Dina toi murinai, Paulo ese Iuda gunalaia taudia dekenai ia boiboi, ia danu do idia hebou. Vadaeni, idia hebou neganai, idia dekenai ia gwau, “Lauegu varavara e, lau be iseda bese taudia dekenai dika ta lau karaia lasi, bona iseda sene taudia edia kara lau negea lasi. To Ierusalem dekenai lau idia kwatua, Roma taudia edia imana dekenai lau idia atoa.¹⁸ Roma taudia ese lau idia henanadaia, bona idia ura lau idia ruhaia, badina be kerere ta, mase davana gauna lau dekenai idia davaria lasi.¹⁹ To Iuda taudia idia ura lasi, unai dainai egu dala tamona be Kaisara dekenai lau noinoi. To lauegu bese taudia lau samania lasi.²⁰ Inai badina dekenai, umui lau boiboi, umui do lau itaia, bona umui dekenai lau hereva totona, badina be inai auri kwatua gauna lau dekenai idia atoa, Israela idia naria noho Tauna dainai.”

²¹Ia dekenai idia hereva, idia gwau, “Oiemu kara sivarai ena revareva ta Iudea dekenai amo ai davaria lasi. Bona aiemai varavara ta danu ia mai lasi, oiemu sivarai o oiemu kara dika ta idia gwauraia lasi.²² To ai

ura oiemu lalao do ai kamoni, badina be ai diba gabu ibounai ese inai orea totona idia hereva ia dika.”

²³ Unai dainai, idia ese dina ta idia gwauraia, vadaeni unai dina dekenai Iuda taudia momo Paulo ena ruma lalonai idia hebou. Daba dekenai ia lao bona hanuaboi neganai, Paulo ese Dirava ena Basileia ia hadibaia bona ia harorolaia. Mose ena taravatu bona peroveta taudia edia buka dekena amo ia ese Iesu ia gwauraia hedinarai, idia edia lalona idia giroa totona. ²⁴ Haida be Paulo ena hereva idia abia dae, to haida idia ura lasi. ²⁵ Idia be mai edia lalao tamona lasi dainai, inai Roma noho Iuda taudia idia toresi, do idia rakatania lao totona. To idia rakatania lao noho neganai, Paulo ese inai hereva tamona idia dekenai ia gwauraia, ia gwau, “Iseda sene taudia dekenai Lauma Helaga ese hereva momokani ia gwauraia Isaia, peroveta tauna ena uduna dekenai.

²⁶ Badina be ia gwau:

‘Oi lao inai bese taudia dekenai, oi hamaoroa:

Do umui kamoni bona kamoni,

to anina do umui diba lasi.

Do umui tahua bona tahua, to do umui itaia lasi.

²⁷ Badina be inai bese taudia edia lalona be metau.

Edia taiana idia koua,

edia matana idia hakaupua,

edia matana dekenai do idia itaia garina,

edia taiana dekenai do idia kamoni garina,

edia lalona be idia kehoa garina,

edia lalona do idia giroa,

bona lau ese idia do lau hamauria garina.’”

²⁸ Vadaeni, Paulo ia gwau, “Namo umui diba, Dirava ese iena hamauria kara be idau bese taudia dekenai ia siaia lao vadaeni, bona do idia kamoni henia.”

²⁹ Inai bamona ia hereva murinai, Iuda taudia idia rakatania, idia sibona idia hepapahuahu noho.

³⁰ Lagani rua lalonai Paulo ese sibona ena davana ia karaia ruma lalonai ia noho, bona vadivadi taudia ibounai ia abia dae. ³¹ Dirava ena Basileia ia harorolaia, bona Lohiabada Iesu Keriso ena sivarai ia hadibaia. Ia hereva mai goada danu, bona tau ta ese ia koua lasi.

PAULO ENA REVAREVA ROMA TAUDIA DEKENAI

Paulo ese aposetolo gaukara ia karaia Dirava ena boiboi dainai

¹ Lau inai Paulo, lau be Iesu Keriso ena hesiai tauna. Lau be iena aposetolo, badina be ia ese ia boiboi vadaeni lau dekenai. Ia ese lau ia abia hidi, Dirava ena Sivarai Namona do lau harorolaia hedinarai totona.

² Inai Sivarai Namona be gunaguna Dirava ese ia gwauhamata vadaeni, iena peroveta taudia edia uduna dekena amo, Buka Helaga lalonai. ³ Inai Sivarai Namona ese Dirava ena Natuna Iesu Keriso ia hedinarai, ia be tanobada dekenai ia vara Davida ena bese dekena amo. ⁴ To ia be helaga, bona Dirava dekena amo ia mai, badina be Dirava ese mase dekena amo ia hatorea isi lou. Unai dainai mai siahu danu Lauma Helaga ese ia hedinarai ia be Dirava ena Natuna, Iesu Keriso iseda Lohiabada be unai. ⁵ Ia dainai Dirava ese aposetolo dahi badina lau dekenai ia henia. Vadaeni Keriso ena ladana dainai egu gaukara be, tanobada bese ibounai do lau hakaua, abidadama bona kamoni momokani do idia abia totona. ⁶ Umui Roma taudia danu, Dirava ese umui ia boiria vadaeni, bona umui be Iesu Keriso ena.

⁷ Umui Roma dekenai noho taudia, Dirava ese umui ia lalokau henia, bona iena bese lalonai umui noho totona umui ia boiria vadaeni, umui dekenai inai revareva lau torea inai.

Lau ura be Dirava iseda Tamana bona Lohiabada Iesu Keriso ese bogahisihisi bona maino umui dekenai do idia henia.

Paulo ia ura Roma itaia gwauraia

⁸ Laegu hereva ginigunana be inai, Iesu Keriso ena ladana dainai Dirava lau hanamoia henia, badina be umui emui abidadama ena sivarai idia gwauraia loaloa tanobada ibounai dekenai. ⁹ Dirava ia diba momokani, iena gaukara lau karaia noho, mai egu lauma ena goada ibounai danu. Inai gaukara be, Dirava ena Natuna ena Sivarai Namona lau harorolaia. Dirava danu ia diba lau be hanaihanai doko lasi umui totona lau guriguri noho. ¹⁰ Nega ibounai Dirava dekenai lau noinoinoi, bema ia ura neganai, lau be do lau mai umui dekenai. ¹¹ Badina be lau ura bada umui lau itaia gwauraia, bona umui dekenai Lauma Helaga ena hanamoia do lau henia, vadaeni Lauma ena goada do umui abia. ¹² Anina be inai bamona: Lau ura umui emui abidadama ese ia durua lau, bona laegu abidadama ese ia durua umui. Inai bamona be goada ita abia nega tamona.

¹³ Laegu varavara taudia e, lau ura umui diba, nega momo umui dekenai lau mai gwauraia, to nega ibounai dala ta be lasi. Lau ura be umui emui huanai lalona giroa taudia matamata do lau davaria, Iuda lasi taudia ma haida dekena amo lalona giroa taudia lau davaria guna bamona. ¹⁴ Badina lau be taunimanima ibounai edia hesiai tauna, do lau durudia totona. Dirava ena taravatu diba taudia do lau durua, bona Dirava ena taravatu diba lasi taudia danu do lau durua. Sikuli vadaeni taudia do lau durua, sikuli lasi taudia danu do lau durua. ¹⁵ Unai dainai lau ura umui Roma noho taudia dekenai danu Sivarai Namona do lau harorolaia.

Sivarai Namona be mai ena siahu

¹⁶Lau be Sivarai Namona dekenai lau hemarai lasi momokani. Badina be Sivarai Namona be Dirava ena siahu, abidadama taudia ia hamauria, Iuda taudia guna, Iuda lasi taudia danu. ¹⁷Badina be Sivarai Namona ese ia hedinarai edena bamona Dirava ese taunimanima ia gwauraidia maoromaoro iena vairana dekenai. Inai maoromaoro be taunimanima idia abia, ena badina korikori be, edia abidadama sibona mo dainai. Badina Buka Helaga ia gwau, “Dirava ese ia gwaurai ia maoromaoro tauna, be iena abidadama dainai do ia mauri.”

Taunimanima ibounai idia kerere Dirava ena vairanai

¹⁸Dirava ena badu guba dekena amo ia diho mai noho, taunimanima edia kara dikadia bona edia kerere ibounai dainai. Edia kara dika dekena amo, idia ese Dirava ena hereva momokani taunimanima do idia diba dalana idia koua noho. ¹⁹Dirava ese edia dika davana ia henia noho, badina be iena kara be taunimanima dekena amo ia hunia lasi. Dirava sibona ese iena kara ia hedinarai vadaeni idia ibounai dekenai. ²⁰Dirava ese tanobada ia karaia negana ia mai bona harihari, taunimanima idia kamoni diba Dirava ena siahu be ia doko diba lasi, bona danu idia diba ia sibona be Dirava momokani. Inai bamona idia diba, badina be edia matana dekenai Dirava ese ia karaia gaudia ibounai idia itaia vadaeni. Inai gaudia idia itaia dainai, idia be Dirava ena hunia gaudia idia kamoni diba danu. Unai dainai idia be dala lasi edia kerere idia hunia, bona “Lau diba lasi” herevana idia gwaurai diba lasi. ²¹Idia ese Dirava idia diba vadaeni, to ia dekenai idia matauraia lasi, bona idia tanikiu henia lasi. Unai dainai edia laloa be ia kavakava vadaeni. Edia laloa be anina lasi, bona idia laloa maoro diba lasi. ²²Idia hereva koikoi, idia gwau, “Ai be mai aonega.” To idia be kavakava sibona. ²³Noho hanaihanai Diravana be idia tomadiho henia lasi, to idia ese taunimanima edia laulau, o manu, o boroma, o gaigai edia laulau dekenai idia tomadiho henia.

²⁴Inai bamona idia kavakava dainai, Dirava ese idia ia rakatania, vadaeni edia ura hegeregere, tauanina ena ura dikadia bona kara miro-dia idia karaia. Idia sibodia edia tauanina ta ta idia hadikaia, hemarai kara idauidau dekena amo. ²⁵Inai bamona taudia ese Dirava ena hereva momokani idia negea, bona hereva koikoi idia abia dae. Dirava ese ia karaia gaudia dekenai idia tomadiho henia, to inai gaudia ibounai ia karaia Diravana dekenai idia tomadiho henia lasi. Inai Dirava be gau ibounai edia badina, bona namona be ia do ita hanamoia henia noho, ela bona hanaihanai. Amen.

²⁶Taunimanima be inai bamona idia karaia dainai Dirava ese idia ia rakatania, vadaeni edia ura dikadia mai hemarai danu idia karaia. Edia hahine danu headava kara maorona idia hadikaia, vadaeni hahine ta ese ma hahine ta dekenai idia sihari henia. ²⁷Bona inai bamona danu, tatau ese hahine idia rakatania, vadaeni tatau ese ma tatau dekenai idia sihari henia. Inai bamona hemarai karadia dainai, edia dika davana idia abia noho.

²⁸Idia ura lasi Dirava idia diba, bona ia dekenai idia laloa lasi. Unai dainai Dirava ese unai taudia ia rakatania vadaeni, bona edia laloa kerere dekena amo kara kerere idia karaia noho. ²⁹Idia be dika idauidau ibounai dekenai idia honu, kara gagevageva, kara dika, taunimanima alaia, heatu, koikoi kara, taunimanima hadikaia laloa. Danu idia ese kohu momo taudia idia mama henia. Taunimanima edia dika idia kikilaia momo. ³⁰Haida idia herevalaia neganai, ta ta edia ladana idia hadikaia, Dirava dekenai idia badu henia, idia badu kava, idia

hekokoroku, bona idia laloa momo edena bamona dika ma haida do idia karaia. Edia tamana bona sinana dekenai idia kamonai henia lasi. ³¹ Idia be aonega lasi, edia gwauhamata idia badinaia lasi, idia lalokau henia lasi, taunimanima dekenai idia bogahisihisi lasi. ³² Dirava ena taravatu ia gwau inai bamona idia karaia taudia be do idia mase. Inai taudia be unai taravatu idia diba namonamo, to unai dika idia karaia noho, bona bema taunimanima haida ese unai dika idia karaia neganai, idia moalelaia.

2

Dirava ena kota ia maoromaoro momokani

¹ Oi ese taunimanima haida oi gwauraia kerere, a? Oi dekenai lau hereva, oiemu kerere oi hunia diba lasi, oi be hereva maorona ta lasi. Badina haida oi gwauraia kerere neganai, oi danu be edia kerere oi karaia noho. Unai dekena amo oi sibona oi hadikaia noho. ² Ita diba Dirava ese inai bamona idia karaia taudia edia kerere davana ia henia, bona ita diba Dirava ena kota be ia maoromaoro momokani. ³ To oi ese taunimanima haida oi gwauraia kerere, ma oi ese danu idia edia kerere oi karaia noho! Oi laloa Dirava ena Kota dekena amo do oi heau mauri diba, a? ⁴ Bona inai danu, Dirava ena kara be namo herea oi dekenai, ia badu haraga lasi, bona oiemu kara dika davana be oi dekenai ia henia haraga lasi. Inai Dirava ena kara namodia, oi laloa idia be anina lasi, a? Sedira oi diba lasi, Dirava ena bogahisihisi kara ena badina korikori be inai: Oiemu lalona do oi giroa totona? ⁵ Oiemu kudouna ia auka, bona oiemu lalona oi giroa lasi dainai, oiemu kerere davana oi habadaia noho. Vadaeni Dirava ena badu ia hedinarai Kota Dinana neganai, be inai kerere davana badana do oi abia. ⁶ Dirava ese taunimanima ta ta ibounai dekenai, edia kara hegeregere edia davana do ia henia. ⁷ Taunimanima haida ese kara namo idia karaia noho nega ibounai. Idia ese Dirava ena hairai, iena hanamo, bona iena doko diba lasi maurina idia tahua noho nega ibounai. Inai bamona taudia dekenai be Dirava ese mauri hanaihanai do ia henia. ⁸ To haida be idia sibona edia namo idia tahua, bona hereva momokani idia negea, kara kerere do idia karaia totona. Inai bamona taudia ese Dirava ena badu bona iena panisi do idia davaria. ⁹ Kara dika taudia ese kerere davana metau bona hisihisi bada do idia davaria, Iuda taudia be guna, bona Iuda lasi taudia danu. ¹⁰ To Dirava ese iena hairai, iena hanamo, bona iena maino do ia henia kara namo taudia ibounai dekenai, Iuda taudia guna, bona Iuda lasi taudia danu. ¹¹ Badina be Dirava ia laloa lasi daika be ladana bada, to maka tamona dekenai taunimanima ibounai ia kota henidia. Edia kara hegeregere, davana ia henia.

¹² Mose ena Taravatu idia diba lasi taudia be edia kara dika dainai do idia mase, to Taravatu ena siahua henunai lasi. To Taravatu idia diba vadaeni taudia edia kara dika davana do idia abia, Taravatu ena siahua henunai. ¹³ Badina be Dirava ena vairana dekenai do idia maoromaoro taudia be Taravatu idia kamonai sibona taudia lasi, to Taravatu idia badinaia taudia sibona. ¹⁴ Iuda lasi taudia be Mose ena Taravatu idia diba lasi, to idia haida ese sibodia edia laloa diari dekena amo taravatu idia badinaia. Inai taudia ese madi Taravatu idia davaria lasi, to edia laloa maoro dekena amo sibodia edia taravatu idia haginia. ¹⁵ Idia edia kara ese ia hedinarai, Dirava ena Taravatu be edia kudouna dekenai ia noho vadaeni. Idia edia kudouna ena laloa ese ia hamomokania Dirava ena Taravatu be edia kudouna lalonai ia noho. Unai dainai nega haida edia lalona dekenai idia gwau, “Egu kara ia kerere,” bona nega

haida edia lalona dekenai idia gwau, “Egu kara be ia maoro.” ¹⁶ Dina ta do ia ginidae Dirava ese Kota do ia karaia, vadaeni Iesu Keriso ese taunimanima edia hunia lalao do ia tahua. Inai be Sivarai Namona, lau ese lau harorolaia gauna ena hereva hegeregereana.

Juda taudia idia lalao Taravatu ese idia ia durua

¹⁷ To umui Iuda taudia be edena bamona umui lalao? Umui gwau umui be Iuda taudia bona Taravatu dekenai umui abidadama henia, ia ese umui do ia durua Kota Dinana dekenai. Mai hekokoroku danu, umui lalao umui sibona be Dirava ena bese. ¹⁸ Umui be Dirava ena ura umui diba. Bona iena Taravatu ese umui ia hadibaia vadaeni, inai dainai kara maoromaoro karaia dalana umui diba. ¹⁹ Umui gwau umui be matakepulu taudia edia hakaua taudia, bona dibura noho taudia edia diari. ²⁰ Umui gwau kavakava taudia umui sisiba henia diba, bona memero maragidia umui hadibaia. Taravatu umui diba dainai, umui gwau aonega ibounai bona hereva momokani ibounai umui diba vadaeni. ²¹ Oibe, taunimanima haida umui hadibaia, to dahaka dainai umui sibona umui hadibaia lasi? Umui haroro, umui gwau, “Henaoo lasi,” to umui be umui henaoo, a? ²² Umui gwau, “Heudahanai lasi,” to umui be umui heudahanai, a? Kaivakuku be umui kirikirilaia, to umui ese Dirava diba lasi taudia edia dubu gaudia umui henaoo, a? ²³ Mai hekokoroku danu umui gwau Dirava ena Taravatu umui diba, to iena Taravatu umui makohia dainai Dirava umui hadikaia inai. ²⁴ Buka Helaga be inai bamona ia gwau, “Umui be Iuda taudia dainai, Iuda lasi taudia ese Dirava ena ladana idia hadikaia.”

²⁵ Bema Taravatu umui badinaia neganai emui kopina utua kara be mai anina. To bema Taravatu umui badinaia lasi, emui kopina utua kara be anina lasi. ²⁶ Iuda lasi taudia be kopina utua kara idia abia lasi. To bema idia ese Taravatu idia badinaia neganai, Dirava ena vairanai idia be kopina utua kara taudia hegeregereana, ani? ²⁷ Momokani Taravatu umui diba vadaeni, bona kopina utua kara umui abia vadaeni. To umui ese Taravatu umui utua noho. Unai dainai inai Iuda lasi, edia kopina idia utua lasi, to Taravatu idia badinaia noho taudia ese umui Iuda taudia idia kota henia noho, ani? ²⁸ Bema tau ta ia gwau ia be Iuda tauna, kopina utua kara ia karaia sibona dainai, ia be Iuda momokani lasi, bona iena kopina utua be tauanina gauna sibona. ²⁹ To tau ta be Iuda tauna korikori bema iena lalona dekenai ia be Iuda tauna. Iena kopina utua kara korikori danu be iena kudouna lalonai ia vara gauna, kopina gauna sibona lasi. Inai be taunimanima idia torea taravatuna badinaia gauna lasi. Lasi, inai be Dirava ena Lauma ese ia havaraia gauna. Oibe, inai bamona tauna, iena kudouna be Dirava ena, bona Dirava ese ia do ia hanamoa, to taunimanima ese sedira ia do idia hanamoa lasi.

3

¹ Iuda taudia edia namo be dahaka? Idia ese Iuda lasi taudia idia hereaia, a? Kopina utua kara ena namo be dahaka? ² Oibe, momokani! Iuda taudia edia namo be momo herea. Ginigunana be inai, Dirava ese Iuda taudia dekenai iena hereva ia henia, idia naria namonamo totona. ³ Sedira idia haida ese inai hereva idia naria namonamo lasi. To edena bamona? Edia abidadama be lasi dainai Dirava ena momokani danu be lasi, a? ⁴ Lasi bona lasi momokani! Taunimanima ibounai be idia koikoi noho, to Dirava tamona be nega ibounai ia hereva momokani. Buka Helaga be inai bamona ia hereva:

“Oi Dirava ese oi hereva neganai, ibounai do idia itaia momokani, oi be maoromaoro. Bona bema oi idia kota henia neganai, do oi kwalimu momokani.”

⁵ To sedira iseda kara dika ese Dirava ena kara maoromaoro do ia hedinarai neganai, edena bamona do ita hereva? Dirava ese ita ia panisia neganai ia be do ia kerere, a? (Lau be taunimanima edia hereva kava sibona lau gwauraia.) ⁶ Lasi momokani! Bema Dirava ia maoromaoro lasi, ia be edena bamona tanobada taudia do ia kota henidia diba?

⁷ Bema egu koikoi ese Dirava ena momokani bona iena hairaina do ia habadaia, dahaka dainai ia ese dika tauna lau do ia gwauraia, bona egu kara dika davana do ia henia? ⁸ Haida be idia laloa kerere, idia gwau, “Dirava ese hairai do ia abia totona, namona be kara dika ita karaia.” Bona haida ese lau idia hadikaia, idia gwau, “Paulo be inai bamona laloa ia hadibaia noho.” Inai bamona lau idia samania koikoi taudia be Dirava ese edia kerere davana do ia henia.

Kara maoromaoro tauna be ta lasi

⁹ To edena bamona? Ai Iuda taudia be namo herea, bona Iuda lasi taudia be namo lasi, a? Lasi bona lasi momokani. Badina be lau hedinarai vadaeni, lau gwau, “Iuda taudia bona Iuda lasi taudia danu, ibounai be kara dika ena siahu henunai idia noho.” ¹⁰ Buka Helaga be inai bamona ia hereva:

“Kara maoromaoro tauna be ta lasi, lasi bona lasi momokani.

¹¹ Kara maoromaoro dalana ia diba tauna be ta lasi, bona Dirava ia tahua momokani tauna be ta lasi danu.

¹² Taunimanima ibounai be Dirava dekena amo idia raka siri, ibounai idia kerere vadaeni.

Kara namo karaia tauna be ta lasi, lasi momokani.

¹³ Edia uduna be mase guria gabuna ia kehoa bamona, bona edia malana be koikoi sibona idia gwauraia.

Edia uduna bibina dekena amo mase idia havaraia, gaigai ena poisini bamona.

¹⁴ Edia uduna be,

taunimanima hadikaia bona hereva dagedage dekenai idia honu.

¹⁵ Taunimanima alaia totona, edia aena idia heau haraga.

¹⁶ Idia lao gabuna ibounai dekenai be hisihisi idia havaraia, bona taunimanima idia hadikaia.

¹⁷ Maino ena dala be idia diba lasi momokani.

¹⁸ Dirava dekenai gari henia kara idia laloa lasi.”

¹⁹ Ita diba Taravatu ena hereva ibounai be Taravatu henunai idia noho taudia edia latanai ia noho, do idia badinaia totona. Inai Taravatu ia noho dainai tau ta be hegeregere lasi do ia gwau, “Lau be kara maoromaoro tauna vadaeni.” Oibe, inai tanobada ena taunimanima ibounai be mai edia kerere Dirava ena vairana dekenai. ²⁰ Badina be Dirava ena vairanai tau ta lasi be maoromaoro Taravatu ia badinaia dekena amo. Lasi, to Taravatu ena gaukara korikori be inai: Ia ese taunimanima dekenai ia hadibaia idia be dika vadaeni.

Keriso dekenai ia abidadama tauna be ia maoromaoro Dirava ena vairanai

²¹ Dirava ena vairanai taunimanima do idia maoromaoro dalana be harihari Dirava ese ia hedinarai vadaeni. Inai kara maoromaoro dalana be Taravatu badinaia dekena amo lasi, to ia be Taravatu

bona peroveta taudia ese idia gwauraiia hedinarai gauna dekena amo. ²² Taunimanima be maoromaoro Dirava ena vairanai bema Iesu Keriso idia abidadama henia neganai. Keriso dekenai idia abidadama taudia ibounai be Dirava ese ia gwauraidia maoro, badina taunimanima ta be ia idau lasi. ²³ Badina be ita ibounai ita kara dika vadaeni, bona Dirava ena hairaina guba dekenai ita abia be hegeregere lasi. ²⁴ To Dirava ese iena harihari gauna davana lasi ia henia ita dekenai. Iena bogahisihisi dekena amo ia ese ita ia gwauraiia maoromaoro. Inai bamona ia karaia, badina be Iesu Keriso ese ita ia hoia lou dainai. ²⁵ Dirava ese Iesu ia abia hidi, ia be do ia mase, vadaeni iena rarana ia bubua, be idia abidadama henia taudia edia dika do ia gwauatao. Dirava ese inai bamona ia karaia, iena kara maoromaoro hedinaraiia totona. Gunaguna neganai ia mai bona hari, Dirava ese taunimanima edia dika davana ia henia haraga lasi, bona edia dika ia laloaboio bamona. ²⁶ To harihari inai neganai, Dirava ese taunimanima edia dika hamaoromaoroa gaukara ia karaia noho, iena kara maoromaoro hedinaraiia totona. Inai dala dekenai, Dirava sibona ena kara maoromaoro, be taunimanima ese idia itaia noho. Bona idia diba danu, Iesu dekenai idia abidadama taudia be Dirava ese ia gwauraiia idia be maoromaoro vadaeni.

²⁷ Unai dainai ita hekokoroku diba, a? Lasi, hekokoroku ena dala ia ore vadaeni. Dahaka ese hekokoroku ia koua? Sedira Taravatu badinaia kara ese, a? Lasi momokani! Abidadama kara ese inai hekokoroku dalana ia koua. ²⁸ Unai dainai ita gwau tau ta ia maoromaoro Dirava ena vairanai, be iena abidadama sibona dekena amo, to Taravatu badinaia dekena amo lasi. ²⁹ Dirava be Iuda taudia sibona edia Dirava, a? Ia be Iuda lasi taudia edia Dirava lasi, a? Lasi, ia be bese ibounai taudia edia Dirava. ³⁰ Oibe, Dirava be tamona. Ia ese Iuda taudia ia gwauraiia maoromaoro edia abidadama dainai, bona Iuda lasi taudia danu ia gwauraiia maoromaoro edia abidadama dainai. ³¹ Inai anina be abidadama dainai Taravatu ita negea, a? Lasi momokani! Taravatu ita haginia momokani inai.

4

Aberhamo ia maoromaoro iena abidadama dainai

¹ Unai dainai aiemai tubuna Aberhamo be edena bamona do ai herevalaia? Dahaka diba ia davaria? ² Bema Aberhamo be sibona ena kara dainai Dirava ena vairanai ia maoromaoro neganai, ia be ia hekokoroku diba. To ia be Dirava ena vairanai ia hekokoroku diba lasi. ³ Buka Helaga be inai bamona ia hereva, “Aberhamo ese Dirava ia abidadama henia, bona iena abidadama dainai Dirava ia gwau ia be maoromaoro vadaeni.” ⁴ Tau ta ia gaukara neganai davana ia abia. Inai davana be harihari gauna lasi, to iena gaukara davana korikori. ⁵ To tau ta bema ia gaukara lasi, to iena abidadama be, Dirava ese dika taudia ia gwauraiia maoromaoro diba, unai tauna be abidadama tauna. Bona Dirava ia gwau, unai bamona tauna ena abidadama dainai, be ia maoromaoro vadaeni. ⁶ Oibe, taunimanima haida idia noho, Dirava ese edia kara ia laloa lasi, to ia gwau idia be maoromaoro vadaeni. Davida ese inai bamona taudia ia herevalaia, ia gwau idia be mai moale bada danu.

⁷ Davida ia gwau:

“Edia kerere Dirava ese ia gwauatao,
bona edia dika ia kokia vadaeni taudia be idia moale!

⁸ Lohiabada ese iena dika ia laloa lasi tauna,

be mai moale danu.”

⁹ Inai bamona moale be kopina utua taudia sibona idia abia, a? Lasi. Kopina utua lasi taudia danu do idia abia. Buka Helaga ena hereva mani ita laloo lou, ia gwau: “Aberahamo ese Dirava ia abidadama henia, bona iena abidadama dainai, Dirava ia gwau ia be maoromaoro vadaeni.”

¹⁰ Edena negai Dirava ese Aberahamo ia gwauraiia maoromaoro? Aberahamo ena kopina ia do utua lasi neganai, o iena kopina ia utua murinai? Lasi, kopina utua kara ia do abia lasi neganai, Dirava ese ia gwauraiia maoromaoro. ¹¹ Oibe, kopina utua kara ia do abia lasi neganai, Dirava ese Aberahamo ia gwauraiia maoromaoro, iena abidadama dainai. Inai murinai, Aberahamo ese kopina utua kara ia abia, inai be Dirava ese ia gwauraiia maoromaoro guna ena toana. Unai dainai Aberahamo be kopina idia utua lasi taudia edia tubuna, bema Dirava ese ia gwauraidia maoromaoro, ia dekenai idia abidadama henia dainai. ¹² Aberahamo danu be kopina utua kara idia abia taudia edia tubuna, edia kopina idia utua dainai sibona lasi, to badina be Dirava idia abidadama henia, Aberahamo ese ia abidadama henia bamona, kopina utua ia do abia lasi neganai.

Dirava ena gwauhamata ita abia, abidadama dainai

¹³ Dirava ese Aberahamo bona iena natudia dekenai ia gwauhamata, tanobada ibounai do ia henia idia dekenai. Inai gwauhamata ia henia, ena badina be dahaka? Aberahamo ese Taravatu ia badinaia dainai? Lasi, ia henia badina be Aberahamo ena abidadama dainai, Dirava ese ia gwauraiia maoromaoro. ¹⁴ Bema Taravatu idia badinaia taudia sibona mo ese Dirava ena gwauhamata gauna idia abia, abidadama taudia edia abidadama be anina lasi. Bona bema inai bamona neganai, Dirava ena gwauhamata be gwauhamata kava. ¹⁵ Taravatu ese Dirava ena badu ia havaraia noho. To bema Taravatu be lasi neganai, Taravatu makohia danu be lasi.

¹⁶ Unai dainai, Dirava ena gwauhamata be abidadama dainai taunimanima ese do idia abia. Iena gwauhamata be harihari gauna, Dirava ese ia henia, Aberahamo bamona idia karaia taudia ibounai dekenai. Unai be Taravatu idia badinaia taudia sibona lasi, to abidadama taudia danu. Badina be Aberahamo be ita ibounai iseda tamana. ¹⁷ Badina Buka Helaga inai bamona ia torea, ia gwau, “Bese momo edia tamana lau ese oi lau haloo vadaeni.” Inai gwauhamata be ia gini auka noho Dirava ena vairana dekenai. Bona Aberahamo ese Dirava ia abidadama henia. Inai Dirava ese mase taudia ia hamauria lou diba, bona ia ese idia do vara lasi gaudia ia havaraia diba.

¹⁸ Aberahamo ia diba lasi edena bamona Dirava ese unai iena gwauhamata gaudia do ia karaia, to ia ese Dirava dekenai ia abidadama henia momokani, daradara ta lasi. Unai dainai ia be bese momo herea edia tamana Dirava ese ia haloo. Buka Helaga ia torea bamona, ia gwau, “Oiemu bese momo herea momokani do idia vara.”

¹⁹ Aberahamo ena maurilagani be kahirakahira 100, bona iena tauanina be mase gauna bamona. Sara danu ia buruka momokani, bona natuna ia havaraia diba lasi. Aberahamo ese inai ibounai ia laloo, to iena abidadama ia goada noho. ²⁰ Dirava ese unai gwauhamata ia henia dainai, Aberahamo ia laloo daradara lasi. To iena abidadama ia bada dainai, Dirava ese siahu ia henia, unai dainai Aberahamo ese Dirava ia hanamo henia. ²¹ Ia diba momokani Dirava ese iena gwauhamata do ia hamomokania. ²² Unai dainai Dirava ese Aberahamo ia gwauraiia

maoromaoro, iena abidadama dainai. ²³ Inai Buka Helaga ena hereva, “Dirava ese Aberahamo ia gwaurai maoromaoro,” be ia sibona totona lasi. ²⁴ Inai hereva be ita totona danu ia torea, badina ita ese Dirava ita abidadama henia, ia ese iseda Lohiabada Iesu ia hatorea isi lou mase dekena amo. Bona Dirava ia gwau inai bamona abidadama taudia be maoromaoro iena vairanai. ²⁵ Dirava ese Iesu ia siaia, iseda dika dainai do ia mase totona, ma ia ese Iesu ia hatorea isi lou mauri dekenai. Inai toresi lou dekena amo, Dirava ena vairanai ita maoromaoro diba.

5

Dirava ena vairanai ita maoromaoro

¹ Iseda abidadama dainai, Dirava ese maoromaoro taudia ita ia gwaurai vadaeni. Unai dainai Dirava danu maino ita abia, Iesu Keriso iseda Lohiabada dainai. ² Keriso dekenai ita abidadama henia dainai ia ese iseda dala ia kehoa, vadaeni Dirava ena hariharibada lalonai ita vareai vadaeni. Inai hariharibada lalonai ita mauri noho hari. Unai dainai mai moale danu ita ese Dirava ena hairaina guba dekenai, Dirava danu nega tamona dohore ita abia gwauhamata gauna, ita naria noho. ³ Unai sibona lasi, to nega dikadia ita abia neganai danu ita be moale, badina ita diba hisihisi bona nega dika ese iseda haheauka idia hagoadaia diba. ⁴ Bema ita haheauka noho neganai, ita ese dibagani ita negea diba. Bona bema dibagani ita negea, ita ese Dirava ita abidadama henia diba, bona Dirava ena gwauhamata gaudia dekenai ita naria noho diba. ⁵ Inai bamona Dirava ita naria noho neganai, ita naria kava lasi, badina be Dirava ese iena Lauma Helaga ita dekenai ia henia vadaeni. Inai Lauma ese Dirava ena lalokau iseda kudouna lalonai ia atoa. Unai dainai ita ese taunimanima ita lalokau henia momokani.

⁶ Badina be ita be do manokamanoka noho neganai, Keriso ia mase, dika taudia totona, Dirava ena nega korikori dekenai. ⁷ Kara maoromaoro tauna dainai, be daika ese do ia mase? Sedira ta lasi. Sedira tau ta ese tau namona ta dainai do ia mase diba. ⁸ To Dirava ese iena lalokau badana ia hedinarai ita dekenai, badina ita be do kara dika noho taudia neganai, Keriso be ita dainai ia mase. ⁹ Iesu ena rarana dainai, Dirava ena vairanai ita be maoromaoro vadaeni, ani? Unai dainai ma gau badana ta ita diba, ani? Iesu ese ma Dirava ena badu Dinana dekena amo ita do ia hamauria. ¹⁰ Guna ita maino lasi Dirava dekenai, to iena Natuna ia mase dekena amo maino ia karaia, vadaeni Dirava bona ita be turana vadaeni. Oibe, hari ita be Dirava ena turana, unai dainai gau badana ta ita diba danu, ani? Momokani, Keriso ese ita do ia hamauria, badina be ia mauri noho! ¹¹ To inai sibona lasi, Dirava ese ita ia hamoalea vadaeni, badina be iseda Lohiabada Iesu Keriso ese Dirava ena turana ita ia halaoa vadaeni.

Adamu ese mase ia mailaia, to Keriso ese mauri ia mailaia

¹² Tau tamona dekena amo kara dika ia vareai mai tanobada dekenai, bona iena kara dika ese mase ia mailaia. Unai dainai mase be taunimanima ibounai ese idia abia, badina ibounai be mai edia kara dika. ¹³ Kara dika be ia vara guna tanobada dekenai, Mose ena Taravatu be gabeai. To, Taravatu ia noho lasi neganai, kara dika ta ta be Dirava ese ia makaia lasi. ¹⁴ Adamu ena nega, ia mai bona Mose ena nega, be mase ena siahu taunimanima ibounai edia latanai ia noho. Adamu ia mase badina ia ese Dirava ena taravatu hereva ia utua dainai. Sedira tau haida edia kara dika be Adamu ena kara dika bamona lasi, to idia danu idia mase.

Adamu be gabeai do ia mai tauna, Keriso, ena laulau bamona. ¹⁵ To idia ruaosi be hegeregere lasi, badina Adamu ena kara dika be idau, bona Dirava ena davana lasi harihari gauna danu be idau. Momokani, tau tamona, Adamu ena kara dika dainai, taunimanima momo ese mase idia davaria. To Dirava ena hariharibada ese mase ia halusia momokani, badina be tau tamona, Iesu Keriso, iena davana lasi harihari gauna dainai, taunimanima momo ese mauri idia davaria! ¹⁶ Oibe, unai tau tamona Adamu ena kara dika be idau, to Dirava ena harihari gauna danu be idau. Unai tau ena kerere tamona murinai, be Dirava ese dika davana ia henia momokani, to taunimanima momo edia kara dika momo herea murinai, be Dirava ese iena hariharibada ia henidia, ia gwau, “Emui dika davana be lasi.” ¹⁷ Momokani unai tau tamona ena kara dika dainai, mase ese taunimanima ibounai ia biagua. To ma tau tamona, Iesu Keriso ese, ia karaia gauna, be unai tau ena kara ia halusia momokani. Badina Iesu Keriso dekena amo, Dirava ena hariharibada bona iena maoromaoro idia abia dae taudia ibounai ese mauri mai kwalimu danu do idia abia, bona edia mauri do idia biagua.

¹⁸ Anina be inai: Tau tamona ena kara dika ese taunimanima ibounai ia hadikaia. Unai bamona danu, tau tamona ena kara maoromaoro ese taunimanima ibounai edia kerere davana ia kokia, vadaeni mauri idia abia. ¹⁹ Bona tau tamona ese Dirava ia kamoni henia lasi dainai, taunimanima momo be kara dika taudia idia halaoa, unai bamona danu, tau tamona ena kamoni dainai, taunimanima momo be do idia maoromaoro Dirava ena vairanai.

²⁰ Taravatu ia gini hamatamaia neganai, Taravatu utua kara be ia bada lao. Oibe, to kara dika ia bada lao neganai, Dirava ena hariharibada ia bada lao danu, bada herea. ²¹ Unai dainai ita gwau kara dika be mai ena siahu, badina be mase ia havaraia. To unai bamona danu ita gwau, Dirava ena hariharibada be mai ena siahu bada herea, badina be ia ese ita taunimanima be maoromaoro taudia ia halaoa. Ma ia ese danu mauri hanaihanai ita dekenai ia henia. Iseda Lohiabada Iesu Keriso ese inai hariharibada kara ia karaia.

6

Keriso danu ita mase

¹ Unai dainai dahaka do ita hereva? Namona be kara dika ita karaia noho, vadaeni unai dekena amo Dirava ena hariharibada do ia bada lao noho, a? ² Lasi, lasi momokani. Ita mase vadaeni dika dekenai, be edena bamona dika ita karaia noho diba iseda mauri lalonai? ³ Umui diba lasi, a? Ita bapatiso neganai, Keriso Iesu danu ita hakapua tamona, bona ita be Iesu danu ita mase. ⁴ Oibe, bapatiso ita abia neganai, ita be Iesu danu ita mase, bona ia danu ita idia guria hebou. Vadaeni Tamana ese iena siahu badana dekena amo Keriso ia hamauria lou mase dekena amo hegeregere, ita danu be mauri matamata lalonai do ita raka.

Keriso danu ita mauri lou

⁵ Bema Keriso danu ita hakapua tamona iena mase lalonai, vadaeni ia danu do ita hakapua tamona iena toreisi lou lalonai danu. ⁶ Bona ita diba iseda mauri gunana be Keriso danu satauro dekenai ia mase vadaeni, iseda kara dika ena siahu haorea totona. Unai dainai ita be kara dika ena hesiai gaukara do ita karaia lou lasi. ⁷ Badina be, tau ta ia mase neganai be kara dika ese unai tau ia guia lou diba lasi. ⁸ Oibe, bema Keriso danu ita mase neganai, ita diba Keriso danu do ita mauri danu. ⁹ Badina ita diba vadaeni, Keriso be mase dekena amo ia toreisi lou, unai dainai ia

be do ia mase lou lasi, mase be ia siahu lasi ia dekenai. ¹⁰ Oibe, iena mase be unai nega tamona sibona, bona unai mase dekena amo kara dika ena siahu ia halusia ela bona hanaihanai. To hari ia mauri noho, be Dirava dekenai ia mauri. ¹¹ Inai bamona danu umui laloa be namo; Umui mase, vadaeni kara dika be siahu lasi umui dekenai, to umui mauri noho Dirava dekenai, Keriso Iesu danu umui hakapua dainai.

¹² Unai dainai hegeregere lasi kara dika ese umui emui tauanina do ia biagua noho. Emui ura dikadia do umui karaia lou lasi. ¹³ Emui mauri kahana ta umui henia lasi kara dika dekenai, dika do ia karaia totona. Lasi, to emui tauanina bona emui kudouna Dirava dekenai do umui henia, badina umui be mase dekena amo umui mauri lou taudia bamona. Unai dainai emui mauri kahana ibounai Dirava dekenai umui henia, kara maoromaoro do umui karaia totona. ¹⁴ Kara dika ese umui do ia biagua lasi. Badina be Taravatu henunai umui noho lasi, to Dirava ena hariharibada henunai umui noho.

Kara maoromaoro karaia totona ita be hesiai taudia

¹⁵ Unai dainai dahaka ita gwau? Kara dika ita karaia be namo, a? Badina be Taravatu henunai lasi, to Dirava ena hariharibada henunai ita noho dainai? Lasi bona lasi momokani. ¹⁶ Umui diba lasi, a? Bema umui ese emui tauanina umui henia tau ta dekenai, bona iena hereva umui kamoni henia neganai, umui be iena hesiai gaukara umui karaia noho taudia. Vadaeni, bema umui be kara dika ena hesiai gaukara taudia neganai, umui be mase do umui davaria. To bema umui be Dirava umui kamoni henia neganai, Dirava ese umui do ia gwauraia maoromaoro. ¹⁷ To Dirava dekenai tanikiu ita henia. Badina be guna neganai umui be kara dika ena hesiai gaukara umui karaia, to gabeai umui ese mai emui lalona ibounai danu Dirava ena hadibaia hereva umui kamoni henia. ¹⁸ Kara dika ena siahu dekena amo Dirava ese umui ia ruhaia, vadaeni Dirava ena hesiai taudia umui lao, kara maoromaoro karaia totona. ¹⁹ Umui emui laloa ia do goada lasi dainai, lau be taunimanima edia laloa bamona lau hereva noho. Guna neganai umui ese kara dika idavidau ibounai, bona lebolebu ena hesiai gaukara umui karaia momokani. To harihari umui ese mai emui lalona ibounai danu, kara maoromaoro ena hesiai gaukara do umui karaia, bona Dirava ena taudia korikori do umui lao.

²⁰ Umui be kara dika ena hesiai gaukara taudia neganai, Dirava ena kara maoromaoro ese umui ia biagua lasi. ²¹ Bona dahaka namo umui davaria unai kara dikadia dekena amo? Gau ta lasi, ani? Bona unai dika dainai sedira hari be hemarai sibona ese ia abia umui. Bona unai karadia ese umui emui mase idia havaraia. ²² To harihari kara dika dekena amo Dirava ese umui ia ruhaia vadaeni, bona ia ese iena hesiai taudia umui ia halaoa vadaeni. Vadaeni hari be gau namona umui davaria, unai be kara helaga, bona iena dokona be mauri hanaihanai. ²³ Badina be kara dika ena davana be mase, to Dirava ena harihari gauna davana lasi be mauri hanaihanai, Iesu Keriso iseda Lohiabada lalonai ita noho dainai.

7

Iesu ese Taravatu ena siahu dekena amo ita ia ruhaia

¹ Lauegu varavara taudia e, umui be Taravatu umui diba dainai lauegu hereva ena anina do umui diba. Taunimanima idia mauri noho neganai sibona, Taravatu be mai ena siahu. ² Taravatu ia gwau hahine ta ese iena adavana dekenai do ia hakapua, iena tau ia mauri dinadia ibounai.

To iena tau ia mase neganai, unai hahine be taravatu ese ia guia noho lasi. ³ Bema iena adavana ia mauri noho neganai unai hahine ia lao tau ta dekenai, vadaeni ia be heudahanai hahinena. To adavana ia mase neganai, ia be taravatu lasi, bema ia ese tau ta ma ia adavaia neganai, ia be taravatu ia utua lasi. ⁴ Egu varavara taudia e, unai bamona dala ia vara danu umui dekenai. Iesu Keriso ia mase dainai umui danu umui mase, vadaeni Taravatu ese umui ia guia lou lasi. Bona hari umui be Keriso ena. Ia be mase dekena amo ia toreisi lou, ita be Dirava ena kara namodia do ita karaia totona. ⁵ Badina guna iseda tauanina ena dala ita badinaia noho neganai, Taravatu ese ura dikadia ia hatubua. Inai ura dikadia idia gaukara noho iseda tauanina lalona, iseda mase havaraia totona. ⁶ To ita mase vadaeni dainai, inai kara ese ita idia guia lou lasi. Bona harihari Taravatu dekena amo Dirava ese ita ia ruhaia vadaeni. Unai dainai harihari Dirava ena hesiai gaukara ita karaia Lauma Helaga ena dala matamata dekenai, Taravatu ia torea ena dala gunana bamona lasi.

Taravatu ena namo be dahaka?

⁷ Unai dainai, dahaka do ita hereva? Taravatu be ia dika, a? Lasi momokani! Bema Taravatu ese lau ia hadibaia lasi, be edena bamona kara dika ena toana do lau diba? Bona Taravatu ese bema ia hereva lasi lau dekenai inai bamona, "Oi ura dika lasi," lau be ura dika ena anina edena bamona do lau diba? ⁸ To Taravatu ena hereva goada dainai, kara dika ese dala ta ia davaria, vadaeni ura dika lauegu lalona dekenai ia havaraia. Badina be bema Taravatu be lasi neganai, kara dika be siahu lasi. ⁹ Guna neganai Taravatu be lau diba lasi. Unai neganai lau mauri noho. To gabeai Taravatu lau dekenai ia ginidae. Unai neganai kara dika lau ura henia dikadika. ¹⁰ Vadaeni lau mase. Oibe, Taravatu be Dirava ese ia henia, taunimanima do idia mauri totona. To lau dekenai be Taravatu ese mase ia mailaia. ¹¹ Taravatu ena hereva ia gaukaralaia dekena amo, kara dika ese dala ta ia davaria, vadaeni lau ia koia. Oibe, Taravatu dekena amo kara dika ese lau ia hamasea.

¹² Momokani, Taravatu be ia helaga. Bona Taravatu ena hereva ibounai danu be helaga, maoro bona namo. ¹³ To edena bamona? Gau namona ta ese lau ia hamasea, a? Lasi momokani! Kara dika sibona ese lau ia hamasea, gau namona ta, Taravatu, ia gaukaralaia dekena amo. Unai dekena amo ita itaia, kara dika be dika momokani, bona Taravatu ia noho dainai, kara dika be ia dika bada lao noho.

Taunimanima edia laloa rua

¹⁴ Ita diba vadaeni Taravatu be lauma ena, to lau be tauanina ena, kara dika ese lau ia guia, vadaeni lau be kara dika ena hesiai tauna. ¹⁵ Unai dainai lau karaia noho gaudia be lau diba lasi. Badina lau ura henia karadia be lau karaia lasi, bona lau ura lasi momokani karadia be lau karaia noho. ¹⁶ To lau ura lasi karadia lau karaia neganai, inai be lau gwauriaia Taravatu be ia maoro. ¹⁷ Unai dainai inai be lau lasi inai kara lau karaia, to egu lalona dekenai ia noho kara dika ese ia karaia. ¹⁸ Lau diba egu lalona dekenai bona egu kudouna dekenai be namo ta ia noho lasi. Badina be lau ura kara namo do lau karaia, to karaia totona be lau hegeregere lasi. ¹⁹ Kara namodia lau ura karaia neganai, be lau karaia diba lasi. Bona kara dikadia lau ura lasi karaia neganai, be lau karaia inai. ²⁰ Bema lau ura lasi gauna lau karaia noho, karaia tauna be lau lasi, to egu lalona dekenai ia noho kara dika ese ia karaia noho.

²¹ Unai dainai inai bamona kara egu lalona dekenai lau davaria: Lau ura be kara namona lau karaia, to kara dika sibona lau karaia diba. ²² Momokani, egu kudouna be Dirava ena Taravatu dekenai ia moale bada. ²³ To lau davaria, egu lalona dekenai taravatu idauna ta ia gaukara noho. Inai taravatu ese egu lalona ia ura henia Taravatuna ia tuari henia noho. Vadaeni inai taravatu, egu lalona dekenai kara dika ia havaraia gauna ese lau ia guia noho. ²⁴ Lau madi o! Lau be dika momokani inai! Lauegu tauanina ese lau ia hamasea noho, be daika ese lau do ia hamauria?

²⁵ Dirava lau tanikiu henia, ia ese lau ia hamauria, Iesu Keriso dekena amo.

Vadaeni, lau be inai bamona: Lauegu lalona sibona dekena amo Dirava ena Taravatu lau badinaia diba. To lauegu tauanina dekena amo kara dika ena taravatu lau badinaia.

8

Keriso ese kara dika ia kokia, bona Lauma Helaga ia henia

¹ Unai dainai Keriso Iesu dekenai idia hakapua bona ia lalonai idia noho taudia be Dirava ese edia kerere davana do ia gwauraia lasi. ² Badina be Lauma Helaga ena taravatu ese lau ia hakaua noho dainai, kara dika bona mase edia taravatu be siahu lasi lau dekenai. Oibe, Lauma Helaga ese mauri ia henia lau dekenai, Keriso Iesu danu lau hakapua tamona dainai. ³ Iseda tauanina ena ura dikadia ita karaia dainai, ita be manoka. Unai dainai Taravatu ese iseda mauri ia hanamoa diba lasi. To Taravatu ese ia karaia diba lasi gauna be Dirava ese ia karaia diba. Ia ese sibona ena Natuna ia siaia mai, kara dika kokia totona. Ia mai neganai, iena tauanina be ita kara dika taudia iseda tauanina hegeregere. Bona Keriso dekena amo, Dirava ese taunimanima edia kara dika ia gwauraia be dika momokani. ⁴ Dirava ese inai bamona ia karaia, ita ese Lauma Helaga ena kara do ita karaia totona, tauanina ena kara do ita karaia lasi. Unai dekena amo Taravatu ena kara maoromaoro ibounai do ita badinaia momokani. ⁵ Tauanina ena kara idia karaia noho taudia ese tauanina ena ura gaudia sibona idia lalao. To Lauma Helaga ena kara idia karaia noho taudia ese Lauma Helaga ena ura gaudia sibona idia lalao. ⁶ Tauanina dekenai oi lalao, be mase oi davaria, to Lauma Helaga dekenai oi lalao, be mauri bona maino oi davaria. ⁷ Unai dainai tauanina sibona ia lalao tauna ese Dirava dekenai ia tuari henia, badina be Dirava ena Taravatu ia badinaia lasi, bona do ia badinaia diba lasi. ⁸ Edia tauanina ena ura idia karaia taudia ese Dirava idia hamoalea diba lasi.

⁹ Bema Dirava ena Lauma be momokani emui lalona dekenai ia noho neganai, tauanina ena ura hegeregere do umui karaia lasi, to Lauma ena ura hegeregere do umui karaia. Bema Keriso ena Lauma emui lalona dekenai ia noho lasi, umui be Keriso ena lasi. ¹⁰ Momokani kara dika ese emui tauanina do ia hamasea. To bema Keriso be oiemu lalona dekenai ia noho neganai, oi be maoromaoro vadaeni Dirava ena vairanai, bona oiemu lauma ia mauri noho. ¹¹ Dirava ena Lauma ese Iesu mase dekena amo ia hatorea isi lou. Bema Dirava ena Lauma be emui lalona dekenai ia noho neganai, Keriso mase dekena amo ia hatorea isi lou Diravana ese danu umui emui tauanina, do idia mase gaudia, do ia hamauridia lou. Inai bamona do ia karaia, badina be umui emui lalona dekenai iena Lauma ia noho dainai.

Lauma Helaga ese ia hakaudia taudia be Dirava ena natuna

¹² Unai dainai, lauegu varavara taudia e, Dirava ena Lauma ese ita ia hadibaia bamona ita noho be namo, to iseda tauanina ese ita ia hadibaia bamona lasi. ¹³ Badina be bema tauanina ena ura umui karaia be do umui mase, to bema Dirava ena Lauma dekena amo tauanina ena kara umui hamasea neganai, be do umui mauri. ¹⁴ Dirava ena Lauma ese ia hakaua taudia be Dirava ena natuna. ¹⁵ Badina be Dirava ese umui ia henia Laumana ese hesiai taudia mai gari danu umui ia halaoa lasi. Lasi, to Dirava ese umui ia henia Laumana ese Dirava ena natuna umui ia halaoa vadaeni. Unai dainai Lauma ena siahu dekena amo, Dirava dekenai ita hereva henia neganai, "Tamagu e, lauegu Tamana lalokau e!" ita gwauraia diba. ¹⁶ Dirava ena Lauma, bona iseda lauma danu idia hereva hebou, idia gwauraia, ita be Dirava ena natuna. ¹⁷ Bema ita be Dirava ena natuna neganai, ita ese Dirava ena bese taudia do idia abia hanamoa gaudia be ita danu do ita abia, bona Dirava ese Keriso ia henia hanamoa gaudia do ita abia danu. Badina bema Keriso danu ita hisihisi nega tamona, be ia danu iena hairaina do ita abia nega tamona.

Gabeai hairai momokani do ita abia guba dekenai

¹⁸ Lau lalao hari inai nega ita abia noho hisihisi be bada lasi, to gabeai do ita abia Dirava dekena amo hairaina be bada herea. ¹⁹ Dirava ese dina ta iena natuna korikori taudia do ia hedinarai. Unai dainai Dirava ese ia karadia gaudia ibounai ese inai kara bamona idia karaia: Hegeregere idia be taunimanima bamona, edia matana idia negea noho, idia naria noho, unai Dirava ena natudia do idia itaia totona. ²⁰ Badina Dirava ese unai ia karadia gaudia be mauri anina lasi idia davarai, sibodia edia ura dainai lasi, to Dirava ena ura dainai. To dala namona ta Dirava ese ia lalao: ²¹ Dirava ese dina ta ia karadia gaudia be do ia ruhaia, dika ena bodaga dekena amo, vadaeni Dirava ena natuna edia hairaina bamona do idia abia, ma Dirava ese edia dala do ia kehoa, vadaeni kwalimu momokani do idia abia. ²² Badina be ita diba Dirava ese ia karadia gaudia ibounai be idia hisihisi noho, hahine ese natuna ia havaraia noho ena hisihisi bamona. Oibe, idia tai noho, guna, ia mai bona harihari. ²³ Bona idia sibona lasi, to ita danu. Momokani Dirava ena harihari gauna ginigunana, iena Lauma Helaga, be ita dekenai ia henia vadaeni. To ita danu be ita tai noho, Dirava ese iena natuna taudia ita do ia halaoa momokani totona, bona ia ese iseda tauanina do ia ruhaia totona ita naria dainai. ²⁴ Dirava ese ita ia hamauria, badina be ia dekenai ita naria, mai lalao abidadama danu. To bema ita naria totona gauna ita itaia neganai, ita be do ita naria noho lasi. Bema tau ta ese gau ta ia itaia neganai, ia ese unai gau totona do ia naria noho lasi. ²⁵ To bema ita itaia diba lasi gauna totona ita naria noho neganai, inai be mai lalao goada danu ita naria.

²⁶ Lauma Helaga danu ia mai, ita goada lasi taudia ia durua noho. Ita be guriguri dala maorona ita diba lasi. Unai dainai Lauma Helaga ese ita totona ia noinoi Dirava dekenai, mai taitai bada danu. Iena noinoi herevadia be taunimanima idia gwauraia diba lasi gaudia. ²⁷ Dirava be taunimanima edia lalona ia diba vadaeni, bona ia be Lauma Helaga ena lalao gaudia danu ia diba. Unai dainai Lauma Helaga ese iena helaga taudia totona Dirava ia noia, Dirava ena ura hegeregerena.

²⁸ Bona ita diba, Dirava idia lalokau henia taudia dekenai, dahaka dahaka idia vara gaudia ibounai ese unai taudia edia mauri do idia hanamoa. Inai taudia Dirava ese ia abia hidi iena ura gaudia do idia karaia totona. ²⁹ Dirava ese ia diba guna taudia ia abia hidi, iena Natuna

ena toana do idia abia, bona iena Natuna ena tadina do idia lao. Vadaeni Keriso be edia gunalaia tauna do ia lao. ³⁰Dirava ia abia hidi guna taudia be ia ese ia boiridia. Bona inai ia boiridia taudia be ia gwauraidia idia be maoromaoro. Inai bamona ia gwauraidia maoromaoro taudia dekenai be iena hairaina danu ia henia.

Dirava ena hariharibada ese ita do ia rakatania lasi

³¹Inai gaudia be edena bamona ma do ita herevalaia? Bema Dirava ese ita ia durua neganai, daika ese ita do ia hadikaia diba? ³²Dirava ese iena Natuna tamona sibona ia vara ia dogoatao lasi, to ita ibounai totona ia henia, boubou gauna bamona. Oibe, iena Natuna ita dekenai ia henia vadaeni. Unai dainai ita diba, gau ibounai ita dekenai do ia henia momokani, ani? ³³Dirava ese ia abia hidi taudia be daika ese do ia gwauraia diba idia be kerere? Ta lasi, badina be Dirava sibona ese ia gwauraidia maoro! ³⁴Unai dainai tau ta lasi ese edia kerere davana do ia gwauraia diba. Badina Keriso Iesu ia mase, to ma ia toreisi lou. Ia be Dirava ena imana idiba kahana dekenai ia noho, bona ita totona Dirava dekenai ia noinoi noho!

Keriso dainai do ita kwalimu

³⁵Daika ese Keriso ena lalokau ita dekena amo do ia kokia diba? Nega dika ese, a? O hisihisi ese, a? O dagedage ese? O hitolo ese? O ogogami ese? O gari bada gauna ese? O mase ese? ³⁶Buka Helaga ia torea hegeregerena, ia gwau:

“Ai be oi dainai dina ibounai idia alaia gwauraia ai, bona ai idia haboua noho, mamoe do idia haboua, alaia totona bamona.”

³⁷To inai gaudia ita laloka lasi. Badina be Keriso ese ita ia lalokau henia, bona ia dainai do ita kwalimu momokani. ³⁸Badina be lau diba momokani vadaeni, gau ta ia goada lasi, mase o mauri, o aneru, o lohia herea taudia, o guba ena sياهو gaudia, o harihari idia noho gaudia, o gabeai do idia vara gaudia, ³⁹o atai ai gaudia, o dobu gabuna gaudia, o tanobada dekenai karaia gaudia, ta ese Dirava ena lalokau, Keriso Iesu iseda Lohiabada ese ia hedinaia vadaeni gauna, dekena amo ita do ia kokia diba lasi.

9

Dirava ese ia abia hidi besena

¹Lau be Keriso ena tauna ta, unai dainai lau hereva momokani, lau hereva koikoi diba lasi. Lauma Helaga ese danu lauegu lalona dekenai ia hadibaia lau hereva koikoi lasi, bona egu hereva be inai: ²Egu lalohisihisi be bada herea, bona lau laloka momo noho, lauegu bese korikori taudia dainai. ³Sedira egu mase dekena amo Dirava ese egu bese Israela ia hanamoia diba. Bema inai bamona dala ta ia noho, egu bese do lau durudia totona, lau ura be Keriso lau noia, ia ese lau do ia negea, vadaeni lau boio momokani. ⁴Idia be Dirava ena abia hidi taudia. Dirava ese iena natuna taudia ia halaodia, bona iena hairaina idia dekenai ia hedinaia. Dirava ese idia danu maino ia karaia, bona idia dekenai iena Taravatu ia henia. Idia be Dirava tomadiho dalana korikori idia diba, bona Dirava ena gwauhamata idia abia vadaeni. ⁵Edia sene taudia be Heberu tau badadia, ma danu Keriso be idia edia huanai iena tauanina dekenai ia vara, badina ia be edia bese tauna ta.

Keriso be Dirava, bona ia be gau ibounai edia biaguna. Nega ibounai iena ladana do ita hanamoa. Amen.

⁶Lau hereva lasi Dirava ena gwauhamata hereva be anina lasi. Dirava ena gwauhamata gauna be ia vara vadaeni, badina be Dirava ia abia hidi taudia be Israela taudia sibona lasi, to taunimanima ma haida danu. ⁷Aberahamo dekenai amo idia vara taudia ibounai be Dirava ena natuna lasi. Dirava ese Aberahamo ia hamaoroa, ia gwau, “Isako ena natuna sibona be oiemu bese taudia.” ⁸Inai hereva ena anina be inai: Tauanina dekenai idia vara natudia be Dirava ena natuna lasi, to Dirava ena gwauhamata dainai idia vara natudia sibona be Dirava ena bese taudia. ⁹Badina Dirava ena gwauhamata be inai bamona: “Vaira lagani, nega inai bamona dekenai, lau be do lau giroa mai, vadaeni Sara ese natuna mero ta do ia abia.”

¹⁰Unai sibona lasi. Rebeka ena natuna memero rua edia tamana be tamona, iseda sene tauna Isako. ¹¹Bona Dirava ese Rebeka dekenai ia hereva, ia gwau, “Oiemu vara guna natuna ese gabeai ia vara natuna ena hesiai gaukara do ia karaia.” Inai bamona Dirava ia hereva, be ia hedinarai ia sibona ena ura do ia gini. ¹²Dirava ese inai bamona ia hereva unai memero idia do vara lasi neganai, bona idia be kara namo o kara dika idia do karaia lasi neganai. Unai dainai ita diba Dirava ena abia hidi dalana be edia kara totona lasi, to Dirava ena ura ta dekenai, bona iena ura lasi ma ta dekenai. ¹³Buka Helaga ia torea hegeregere, ia gwau: “Iakobo lau ura henia, to Esau be lau ura henia lasi.”

¹⁴Dahaka do ita gwau? Dirava ena kara be maoromaoro lasi, a? Lasi momokani. ¹⁵Dirava ese Mose ia hamaoroa, ia gwau, “Bema lau ura tau ta lau lalokau henia, do lau lalokau henia, bema lau ura tau ta lau bogahisihisi henia, do lau bogahisihisi henia.” ¹⁶Unai dainai Dirava ena abia hidi kara be taunimanima edia ura dainai, o edia kara dainai lasi, to inai be Dirava ena bogahisihisi dainai sibona. ¹⁷Badina Buka Helaga lalonai, Dirava ese Farao, Aigupito ena king ia hamaoroa, ia gwau, “Inai sibona totona lau haginia oi, lauegu sياهو do oi hedinarai, bona tanobada ibounai taudia ese lauegu ladana ena sivarai do idia gwaurai loaloa.” ¹⁸Unai dainai, Dirava ena ura hegeregere, haida ia bogahisihisi henia, ma haida edia lalona ia ha-aukaia.

Dirava ena badu bona iena bogahisihisi

¹⁹Sedira inai bamona do umui hereva lau dekenai, “Be, bema inai be momokani neganai, Dirava be edena bamona tau ta ia gwaurai kerere diba? Daika ese Dirava ena ura ia koua diba?” ²⁰Tau e, oi be daika, Dirava ena hereva dekenai oi badu? Uro ese karaia tauna dekenai do ia hereva henia, ia gwau, “Dahaka totona inai bamona oi karaia lau, a?” ²¹Uro karaia tauna ia sياهو lasi, a, uro karaia tano do ia gaukaralaia iena ura hegeregere? Bona bema ia ura neganai, uro rua do ia karaia raro tamona dekena amo. Uro ta be dina ibounai idia iusilaia gauna, ma ta be aria neganai sibona gauna.

²²Dirava danu ese unai bamona ia karaia vadaeni. Ia ura be iena badu bona iena sياهو do ia hedinarai. Unai dainai ia ese ia badu henia gaudia dekenai ia haheauka henia eia bona do idia mase ore. ²³Bona ia ura danu iena hairai badana do ia hedinarai. Ia ese inai hairaina haida ia henia vadaeni ita dekenai. Oibe, mai bogahisihisi danu ia ese ita ia karaia hegaegae vadaeni, iena hairaina do ita abia totona. ²⁴Badina be ia ese ita ia boiria, ai Iuda taudia sibona lasi, to umui Iuda lasi taudia danu. ²⁵Dirava be inai bamona Hosea ena Buka lalonai ia hereva, ia gwau:

“Lauegu bese lasi taudia,
 be do lau gwauraidia ‘Lauegu bese.’
 Bona lau lalokau henia lasi oreana,
 be do lau gwauraidia ‘Lauegu lalokau.’
²⁶ Dirava ese ia gwau henia idia dekenai, ia gwau,
 ‘Umui be lauegu bese taudia lasi,’
 gabuna dekenai, lau, Mauri Diravana ese lau gwau,
 ‘Lau ese egu natuna taudia, umui do lau gwaurai.’”

²⁷ Isaia danu Israela dekenai ia hereva henia, ia gwau: “Israela besena do idia momo herea, kone miri bamona, to haida sibona do idia mauri.
²⁸ Badina be Lohiabada ese karaharaga tanobada taunimanima ibounai do ia kota henidia haorea.” ²⁹ Ma inai be guna Isaia ia hereva bamona, ia gwau: “Bema Siahu Ibounai Diravana ese iseda bese haida ia hamauridia lasi neganai, ita be Sodoma bona Gomora hegeregereana do ita lao.”

Sivarai Namona be Israela taudia totona danu

³⁰ Unai dainai dahaka do ita gwau? Israela lasi bese taudia ese Dirava ena vairanai maoromaoro idia tahua lasi, to unai maoromaoro idia davaria vadaeni. Idia davaria edia abidadama dainai. ³¹ To Israela bese taudia ese Taravatu dekena amo Dirava ena vairanai maoromaoro idia tahua, to idia davaria lasi. ³² Badina dahaka idia davaria lasi? Badina be inai maoromaoro abia totona abidadama idia laloe lasi. Idia laloe gauna be, edia gaukara dekena amo inai maoromaoro do idia abia. Oibe, taunimanima edia aena dekenai idia bamepa nadina ese idia ia hamorua. ³³ Buka Helaga ia torea bamona, ia gwau: “Kamonai, Siona dekenai nadi ta lau atoa. Inai nadi ese taunimanima do ia hekwakwanai henidia, bona ia be taunimanima do ia hamorua nadina. To daika ese ia dekenai do ia abidadama henia, be hemarai do ia davaria lasi.”

10

Israela taudia ese Dirava ena vairanai maoromaoro dalana idia davaria lasi

¹ Lauegu varavara taudia e, egu lalona ibounai ia ura, bona egu noinoi Dirava dekenai danu, be Israela taudia ese mauri do idia davaria. ² Lau diba idia ese Dirava ena hesiai gaukara idia ura karaia namonamo, to karaia dalana be idia diba lasi. ³ Dirava ese taunimanima ia gwauraidia maoromaoro iena vairanai dalana be idia badinaia lasi, to idia sibona ese unai maoromaoro dalana idia tahua. Unai dainai Dirava ena dala idia abia dae lasi. ⁴ Badina be Keriso ia mai dainai, sibodia edia goada dekenai Taravatu badinaia karana dekena amo maoromaoro idia tahua dalana be ia doko. Unai Dirava ena vairanai maoromaoro be Iesu abidadama henia taudia sibona idia abia.

Dirava ia ura taunimanima ibounai ese mauri idia davaria

⁵ Dirava ena vairanai taunimanima do idia maoromaoro dalana be Mose ese inai bamona ia torea, ia gwau: “Taravatu do ia badinaia momokani tauna ese mauri do ia davaria.” ⁶ To abidadama dainai Dirava ena vairanai maoromaoro abia dalana be Buka Helaga ese inai bamona ia herevalaia, ia gwau: “Emui lalona dekenai umui hereva lasi, ‘Daika be guba dekenai do ia daekau.’” Inai be Keriso do ia abia diho totona. ⁷ “Bona umui hereva lasi danu, ‘Daika be dobu gabuna dekenai do ia diho?’” Inai be Keriso, mase taudia edia gabu dekena amo do ia abia daekau totona. ⁸ To Buka Helaga be inai bamona ia torea, ia gwau:

“Dirava ena hereva be oi dekenai, oiemu uduna dekenai, bona oiemu kudouna dekenai ia noho.” Abidadama ena hereva be inai, ai ese ai harorolaia gauna. ⁹ Bema oiemu uduna dekenai Iesu oi gwauraia ia be Lohiabada, bona bema oiemu kudouna dekenai oi hamomokania Dirava ese mase dekena amo Iesu ia hatorea isi, vadaeni do oi mauri. ¹⁰ Badina be iseda kudouna ena abidadama dekena amo Dirava ena vairanai do ita maoromaoro, bona inai abidadama be iseda uduna dekenai ita gwauraia hedinarai, be mauri do ita davarua. ¹¹ Badina Buka Helaga ia gwau: “Ia dekenai idia abidadama henia taudia ibounai be hemarai do idia davarua lasi.” ¹² Inai be tanobada bese ibounai totona, badina be Iuda tauna be idau lasi, bona Iuda lasi tauna danu idau lasi. Badina Dirava be taunimanima ibounai edia Lohiabada, bona ia dekenai idia noinoi taudia dekenai iena hanamoia ia henia. ¹³ Buka Helaga ia torea bamona, ia gwau:

“Dirava ena ladana idia noinoi henia taudia ibounai, be mauri do idia davarua.”

¹⁴ To idia abidadama henia lasi taudia be edena bamona Lohiabada do idia noinoi henia diba? Bona iena Sivarai idia kamona lasi taudia be edena bamona do idia abidadama diba? Bona bema haroro tauna be lasi neganai, edena bamona do idia kamona? ¹⁵ Bona haida bema idia siaidia lasi, haroro taudia be edena bamona do idia haroro? Buka Helaga dekenai ia torea hegeregere, ia gwau:

“Sivarai Namona ena moale idia mailaia taudia edia aena, be namo herea momokani, ani.”

¹⁶ To haida be Sivarai Namona idia kamona henia lasi. Badina Isaia ia gwau:

“Lohiabada e, daika ese aiemai hereva ia abia dae vadaeni?”

¹⁷ Unai dainai abidadama ia vara, be Sivarai Namona kamona dekena amo, bona Sivarai Namona ia mai, be Keriso ena hereva idia harorolaia dekena amo.

¹⁸ To lau henanadai, lau gwau, “Momokani inai Sivarai Namona idia kamona lasi, a? Lasi, idia kamona vadaeni, Buka Helaga ia torea bamona, ia gwau:

‘Edia gadona ena sivarai, be tanobada ibounai dekenai idia gwauraia loaloa, bona edia hereva,

be tanobada ena dokona momokani dekenai idia lao.’”

¹⁹ Ma lau gwau, “Inai be momokani Israela taudia be inai hereva idia diba lasi, a? Lasi idia kamona vadaeni, badina be guna Mose ese inai Dirava ena hereva Buka Helaga lalonai ia gwauraia, ia gwau:

‘Mai edia bese lasi taudia lau durudia dainai, do umui mama henidia.

Mai edia aonega lasi taudia lau durudia dainai, be do umui badu henidia.’”

²⁰ Bona Isaia ia hereva goadagoada, ia gwau:

‘Lau idia tahua lasi taudia ese lau idia davarua vadaeni, bona lau totona idia henanadaia lasi taudia, be idia dekenai lau hedinarai.’”

²¹ To Israela totona Isaia ma Dirava ena hereva ia gwauraia, ia gwau, “Nega daudau herea kamona lasi bona kudouna auka besena dekenai lauegu imana lau dudui henia.”

11

Dirava ese Israela taudia dekenai ia bogahisihisi henia

¹ Vadaeni lau henanadai, Dirava ese iena bese ia negea momokani vadaeni, a? Lasi momokani. Lau danu be Israela tauna, Aberahamo ena bese, Beniamina ena iduhu tauna ta. ² Iena bese, gunaguna ia abidia hidi taudia be Dirava ese ia negedia diba lasi. Buka Helaga lalonai Elia ena hereva umui diba lasi, a? Elia ese Dirava ia noia Israela taudia do ia kota henidia, ia gwau: ³ “Lohiabada e, oiemu peroveta taudia idia alaia mase vadaeni, oiemu pata helagadia idia makohia vadaeni. Lau sibona lau noho, bona lau danu idia tahua, idia ura lau idia alaia mase.” ⁴ Vadaeni Dirava be edena bamona ia haere henia? Ia gwau, “Lauegu tatau be 7000, idia ese lau idia rakatania lasi, unai dirava koikoi Bala idia tomadiho henia lasi.” ⁵ Harihari inai nega danu be hegeregere, taunimanima momo lasi ese Dirava idia badinaia noho, iena bogahisihisi dekenai ia abidia hidi taudia sibona inai. ⁶ Oibe, iena bogahisihisi dainai unai taudia ia abidia hidi, edia gaukara dainai lasi. Badina be bema edia gaukara dainai Dirava ese taunimanima ia abidia hidi, unai be, iena bogahisihisi be bogahisihisi momokani lasi.

⁷ Vadaeni edena bamona ita herevalaia? Israela taudia ese idia tahua gauna be idia davaria lasi. Dirava ese ia abia hidi orea maragina sibona mo taudia ese inai gauna idia davaria. To taunimanima orena, orea badana, be lalona auka dainai, Dirava ena boiboi idia kamona henia lasi. ⁸ Buka Helaga ia torea bamona, ia gwau:

“Dirava ese edia kudouna bona edia lalona ia hametaua, vadaeni idia be edia matana dekenai idia itaia diba lasi. Bona edia taiana dekenai idia kamona diba lasi. Inai bamona idia noho ia mai bona harihari.”

⁹ Ma Davida danu inai bamona ia hereva, ia gwau,

“Dirava lau noia,
ia ese idia aniani noho neganai do ia aladia,
haoda tauna ese gwarume ia alaia bamona.

Dirava lau noia,
ia ese do ia hamorudia, do ia panisidia.

¹⁰ Dirava be namo ia ese edia matana do ia hakaupua,
vadaeni idia itaia lou diba lasi,
bona hisihisi do ia henidia hanaihanai, edia kerere dainai.”

Dirava ese Iuda lasi taudia ia hamauria

¹¹ Unai dainai lau henanadai, lau gwau: Iuda taudia idia moru neganai, unai moru be edia dokona momokani, a? Lasi momokani. Badina be Iuda taudia idia kara dika dainai, hamauria be Iuda lasi taudia dekenai ia ginidae, vadaeni Iuda taudia ese idia mama henidia inai.

¹² Oibe, Iuda taudia edia kara dika ese hanamoa bada herea ia mailaia tanobada taudia dekenai, bona Iuda taudia be lauma ena gau dekenai idia ogoami dainai, Iuda lasi taudia ese hanamoa bada herea idia abia. To mani ita laloa, bema Iuda taudia ibounai ese Dirava ena hamauria idia abia neganai, hanamoa ita dekenai be do ia bada herea, ani?

¹³ Umui idau bese taudia, umui dekenai lau hereva. Lau be umui Iuda lasi taudia totona aposetolo gaukara lau karaia noho, bona inai dagi lalonai lau moale bada. ¹⁴ Inai dagi dekena amo, sedira mama do lau havaraia egu varavara Iuda taudia edia lalona dekenai. Vadaeni inai dekena amo haida do lau hamauridia diba. ¹⁵ Badina be ia ese Iuda taudia ia negea dainai, Dirava be tanobada bese ibounai danu ia maino karaia. Vadaeni Dirava ese Iuda taudia do ia abia lou neganai, be dahaka do ia vara? Mase dekena amo mauri do ia vara, ani?

¹⁶ Bema tau ta ese paraoa ena kahana ginigunana ia henia Dirava dekenai, orena kahana ibounai danu be Dirava ena. Bona bema tau ta ese au ta ena ramuna ia henia Dirava dekenai, unai au rigidia danu be Dirava ena. ¹⁷ To olive auna ta, idia hadoa gauna, ena rigina haida be idia utua oho, bona tubu kava olive auna ena rigi idia hakapua unai utua gabuna dekenai. Umui Iuda lasi taudia be tubu kava olive auna bamona, bona Iuda taudia edia goada bona edia mauri namona umui abia nega tamona. ¹⁸ Unai dainai, unai rigi idia utua oho bamona taudia dekenai do umui laloa lasi idia be gau anina lasi bamona. Umui hekokoroku lasi! Umui be rigi sibona, umui ese ramu umui durua lasi, to ramu ese umui ia durua noho.

¹⁹ Sedira do umui gwau, “Rigi be Dirava ese ia utua oho, edia gabu dekenai ai do ia atoa totona.” ²⁰ Inai be momokani. Idia be idia abidadama lasi dainai Dirava ese ia utudia oho, to umui be umui abidadama dainai, umui gini noho edia gabu dekenai. To do umui hekokoroku lasi, do umui gari noho. ²¹ Bema Dirava ese unai rigi korikori ia laloa momo lasi to ia utua oho, namona be do umui laloa namonamo, umui danu do ia utua oho garina. ²² Dirava ena bogahisihisi bona iena panisia kara do umui laloa. Idia moru taudia do ia panisidia, to umui dekenai do ia bogahisihisi henia, bema iena bogahisihisi umui badinaia noho neganai. To bema umui badinaia lasi, ia ese umui danu do ia utua oho momokani. ²³ To Iuda taudia bema edia abidadama lasi do idia rakatania neganai, edia gabu korikori dekenai Dirava ese ma do ia atodia lou, badina be Dirava be mai ena siahua idia do ia atoa lou. ²⁴ Umui Iuda lasi taudia be unai tubu kava olive auna ena rigi bamona. Unai rigi idia utua oho, vadaeni olive auna namona dekenai idia hakapua. Inai be umui emui au momokani lasi. To Iuda taudia be idia hadoa olive auna korikori bamona. Unai dainai Dirava ese karaharaga inai Iuda bamona rigidia do ia hakapudia lou diba, edia au korikori dekenai.

Dirava ena bogahisihisi be taunimanima ibounai dekenai ia henia

²⁵ Lauegu varavara taudia e, lau ura be inai hunia herevana do umui diba, umui sibona emui aonega do umui hekokorokulaia garina. Gauna be inai: Israela taudia edia abidadama lasi be nega ibounai do ia noho lasi. To edia abidadama lasi do ia noho, ela bona Iuda lasi taudia dekena amo Dirava ese ia abidia hidi taudia, be iena Basileia dekenai do idia vareai. ²⁶ Bona Dirava ese inai bamona dala dekenai Israela ibounai do ia hamauria, Buka Helaga ia torea hegeregerena, ia gwau:

“Hamauria Tauna Siona lalona dekena amo do ia toresi.

Ia ese Iakobo bese taudia edia kara dika do ia kokia.

²⁷ Dirava ia gwau,

‘Lau ese inai gwauhamata idia dekenai lau henia neganai,

edia kara dika ibounai do lau abia siri.’”

²⁸ Iuda taudia ese Sivarai Namona idia ura henia lasi dainai idia ese Dirava dekenai idia tuari henia noho. To inai bamona idia karaia dainai, umui Iuda lasi taudia be durua umui abia noho. To Dirava ese Iuda bese taudia ia abidia hidi, bona ia lalokau henidia. Bona Dirava ese edia sene taudia dekenai iena gwauhamata ia henia, idia be iena turana hanaihanai. ²⁹ Oibe, bema Dirava ese taunimanima haida ia lalokau henidia dainai ia hanamodia bona ia abidia hidi neganai, ia be gabeai iena laloa do ia giroa lasi. ³⁰ Umui Iuda lasi taudia ese guna Dirava dekenai umui kamonai henia lasi. To harihari Dirava ena bogahisihisi umui davarua vadaeni, Iuda taudia idia kamona henia lasi dainai. ³¹ Unai bamona

danu, Iuda taudia ese harihari Dirava idia kamonai henia lasi, be idia danu inai bogahisihisi do idia davaria, umui ese umui davaria bamona. ³² Badina be Dirava ese taunimanima ibounai kamonai lasi kara ena dibura lalonai ia koudia vadaeni, iena bogahisihisi idia dekenai do ia hedinarai totona.

Dirava ena ladana ita hanamoa bada be namo

³³ Dirava ena namo bona iena hariharibada be bada bona bada herea, ani? Iena aonega bona iena laloa do bu be edena bamona ita tahua diba? Iena dala be daika ese do ia davaria diba? ³⁴ Buka Helaga ia torea bamona, ia gwau:

“Lohiabada ena laloa be daika ia diba?
Daika ese ia sisiba henia diba?”

³⁵ Dirava be daika dekena amo do ia abiatorehai, vadaeni gabeai unai tau ese davana do ia tahua diba?”

³⁶ Badina be gau ibounai be Dirava ese ia havaraia. Gau ibounai be ia ese ia biagua, bona ia dainai idia mauri noho. Dirava do ita hanamoa hanaihanai! Amen.

12

Dirava ena hesiai gaukara ita karaia be namo

¹ Unai dainai, lauegu varavara taudia e, Dirava ena bogahisihisi bada herea dainai umui lau noia, emui tauanina umui henia Dirava dekenai. Boubou gauna bamona do umui henia, mai mauri bona mai helaga danu, Dirava umui dekenai do ia moale totona. Inai bamona tomadiho momokani Dirava dekenai umui henia be namo. ² Inai tanobada taudia edia kara bamona do umui karaia lasi, to Dirava ese emui lalona do ia hagiroya, vadaeni do umui matamata, bona idau momokani. Unai dekena amo Dirava ena ura be do umui diba momokani. Do umui diba edena kara be namo, edena kara Dirava ia ura henia, bona edena kara be goeva momokani.

³ Dirava ese iena hariharibada lau dekenai ia henia dainai, umui ta ta ibounai dekenai lau hamaoroa inai: Oi hekokoroku lasi. Oi ese oi sibona oiemu maka do oi diba, bona inai maka do oi hanaia lasi, do oi laloa lasi oi be bada momokani. Umui ibounai emui diba ena maka do umui laloa maoromaoro, Dirava ese umui ta ta dekenai abidadama ia henia hegeregere. ⁴ Umui diba, tau ta ena tauanina ena kahana be momo, to kahana ta ta be mai edia gaukara idauidau. ⁵ Unai bamona danu, ita be taunimanima momo, to Keriso lalonai ita be tauanina tamona bamona, taunimanima mai iseda gaukara idauidau, to ita gaukara hebou. Dirava ena hariharibada ese diba idauidau ita ta ta dekenai ia henia. ⁶ Unai dainai Dirava ese ita ia henia hegeregere, inai diba ita gaukaralaia be namo. Bema tau ta ena diba be haroro, Dirava ena Sivarai do ia gwauraia, iena abidadama hegeregere. ⁷ Bema tau ta ena diba be taunimanima durua, vadaeni do ia durua. Bema iena diba be hadibaia, vadaeni do ia hadibaia. ⁸ Bema iena diba be taunimanima edia lalona do ia hagoadaia, vadaeni do ia karaia namonamo. Bema gau ita henia haida dekenai, do ita henia mai moale danu. Daika ese gaukara ia naria, be iena gaukara do ia karaia mai goada danu. Bogahisihisi tauna be do ia bogahisihisi henia mai ena lalo namo danu.

⁹ Taunimanima umui lalokau henia koikoi lasi, to umui lalokau henia momokani. Dika do umui negea momokani, to namo do umui dogoatao momokani. ¹⁰ Umui ta ta do umui lalokau henia, tadikaka edia lalokau ta ta dekenai bamona. Umui ta ta dekenai danu do umui matauraia.

¹¹ Gaukara goada. Gaukara lalonai do umui lahedo lasi. Lohiabada ena gaukara do umui karaia, mai emui lalona ibounai. ¹² Lohiabada ena namo umui dekenai do umui lalao noho mai moale danu. Nega dika ia mai neganai do umui gini goada. Guriguri do umui goadalaia nega ibounai. ¹³ Bema Dirava ena taudia be mai edia gau lasi neganai, umui durudia. Bema idau taudia be umui dekenai idia mai neganai, emui ruma dekenai do umui abidia dae.

¹⁴ Umui dekenai idia dagedage taudia do umui hadikaia lasi, to Dirava umui noia, ia ese idia do ia hanamoa, do ia hadikadia lasi. ¹⁵ Idia moale taudia danu do umui moale, idia taitai taudia danu do umui tai. ¹⁶ Do umui noho hebou mai moale bona lalona tamona danu. Umui sibona do umui habadaia lasi, to manau taudia danu do umui noho hebou. Umui sibona emui aonega do umui hekokorokulaia lasi.

¹⁷ Bema tau ta ese umui dekenai ia kara dika henia neganai, iena kara dika davana do umui henia lasi, to taunimanima ibounai edia vairana dekenai kara namo sibona do umui karaia. ¹⁸ Maino karaia daladia umui tahua dala idau dau ibounai dekenai, taunimanima danu mai maino danu do umui noho totona. ¹⁹ Lauegu lalokau taudia e, dika ena davana do umui henia lasi, davana henia be, Dirava sibona. Badina be Buka Helaga ia gwau: "Lohiabada ia gwau, 'Dika ena davana be lau sibona ese do lau karaia.'" ²⁰ Buka Helaga ma ia gwau: "Unai dainai, oi dekenai badu henia tauna, bema ia hitolo, aniani do oi henia, bema ia ranu mase, ranu do oi henia. Unai bamona do umui karaia, be ia ese iena kara do ia lalao, bona do ia hemarai bada." ²¹ Namu lasi dika ese umui do ia halusia, to umui ese kara namo dekena amo dika do umui halusia.

13

Gavamani umui matauraia

¹ Taunimanima ibounai ese gavamani do idia kamoni henia. Badina be gavamani ta ia noho diba lasi bema Dirava ia ura lasi neganai. Gavamani ena siahu be Dirava ese ia henia. ² Unai dainai, gavamani ena hereva idia kamoni henia lasi taudia be Dirava danu idia kamoni henia lasi. Edia kerere davana do idia abia. ³ Badina be kara namo tauna ese gavamani dekenai ia gari lasi, to kara dika tauna sibona be ia gari. Oi ura be gavamani ena siahu dekenai do oi gari lasi, a? Be kara namo do oi karaia, vadaeni gavamani ese oi do ia hanamoa. ⁴ Gavamani be Dirava ena hesiai gaukara ia karaia, unai dainai ia ese oi do ia hanamoa bona durua. To bema kara dika oi karaia neganai, gavamani dekenai do oi gari, badina ia be mai ena siahu momokani, bona oi do ia panisia. Ia be Dirava ena hesiai tauna, ia ese kara dika tauna ena davana do ia henia. ⁵ Unai dainai, gavamani mai ena siahu taudia do umui kamoni henidia, Dirava ena badu umui lalao dainai lasi, to badina be emui lalona dekenai umui diba dala maorona be unai.

⁶ Takisi moni danu umui henia ena badina be unai. Badina be gavamani taudia ese gaukara davana idia abia be namo, Dirava ena gaukara do idia karaia diba totona. ⁷ Unai dainai ibounai ta ta dekenai edia davana do umui henidia. Takisi gogoa tauna dekenai takisi do umui henia. Kastom moni gogoa tauna dekenai kastom moni do umui henia. Idia gari henia tauna dekenai do umui gari, bona idia mataurai henia tauna dekenai do umui matauraia.

Taunimanima dekenai kara namona do umui karaia

⁸ Tau ta dekena amo umui abiatorehai lasi. To inai gau tamona umui laloka noho be namo: Ta ta dekenai do umui lalokau henia noho, badina be lalokau henia tauna ese Mose ena taravatu ibounai ia badinaia momokani vadaeni. ⁹ Momokani Taravatu ia gwau: Do umui heudahanai lasi, taunimanima do umui alaia lasi, do umui henaia lasi, bona tau ta ena kohu dainai do umui mama henia lasi. Inai ibounai, bona Taravatu oredia ibounai be inai Taravatu tamona lalonai idia haboua: Oiemu badibadinai tauna dekenai do oi lalokau henia, oi sibona oi lalokau henia bamona. ¹⁰ Daika ese iena badibadinai tauna ia lalokau henia, be do ia hadikaia diba lasi. Unai dainai bema ita lalokau henia, be Taravatu ibounai ita badinaia inai.

¹¹ Inai bamona kara ita karaia be namo, badina ita diba iseda nega be kwadogi. Mahuta dekena amo do ita toreiis negana be ia ginidae vadaeni. Badina be Lohiabada ena mai dinana be kahirakahira. Badina be ita abidadama henia hamatamaia nega dekenai iseda hamauria be do daudau, to harihari iseda hamauria be ia kahirakahira vadaeni. ¹² Hanuaboi ia ore vadaeni, daba ia kahirakahira vadaeni, unai dainai dibura ena kara do ita negea, diari do ita abia, unai be iseda kesi do ita halaoa. ¹³ Iseda kara do ita naria namonamo, iseda raka be dina dekenai do ita raka. Do ita lebulebu lasi, do ita inua kekero lasi, do ita heudahanai lasi, do ita sihiai kava lasi, do ita heai lasi, do ita mama lasi. ¹⁴ Lohiabada Iesu Keriso ena tuari dabua do umui atoa, bona emui tauanina ena ura dikadia do umui karaia lasi.

14

Keristani taudia edia mauri umui gwauraia kerere lasi

¹ Iena abidadama ia manoka tauna be do umui abia dae, bona iena kara dainai do umui hepapahuahu henia lasi. ² Ta be mai ena abidadama, vadaeni gau ibounai ia ania, bona ta ena abidadama ia manoka, vadaeni uma gaudia sibona ia ania. ³ Gau ibounai ia ania tauna ese ania lasi tauna do ia gwauraia kerere lasi, bona uma gaudia sibona ia ania tauna danu ese gau ibounai ia ania tauna do ia gwauraia kerere lasi. Badina be Dirava ese unai tau danu ia abia dae vadaeni. ⁴ Oi be daika, tau ta ena hesiai tauna do oi gwauraia kerere? Iena Biaguna sibona ese do ia gwauraia ia be maoro o kerere. Bona ia be do ia gini, badina be Lohiabada ese ia haginia diba.

⁵ Tau ta ia gwau dina ta be ia bada momokani, bona tau ta ia gwau dina ibounai be hegeregere. Tau ta ta ibounai, namona be idia diba momokani edia laloka be maoromaoro. ⁶ Dina ta ia laloka tauna, be Lohiabada totona ia laloka. Bona aniani ibounai ia ania tauna, be Lohiabada hanamoa totona ia ania, badina aniani totona ia ese Dirava ia tanikiu henia dainai. Bona aniani haida ia ania lasi tauna, ese Lohiabada hanamoa totona ia ania lasi, ia danu ese Dirava ia tanikiu henia. ⁷ Tau ta lasi ia sibona dekenai ia mauri noho, bona bema tau ta ia mase neganai, ia sibona dekenai ia mase lasi. ⁸ Bema ita mauri, be Lohiabada dekenai ita mauri, bona bema ita mase, be Lohiabada dekenai do ita mase. Unai dainai ita mauri noho o do ita mase, ita be Lohiabada ena. ⁹ Badina be Keriso ia mase bona ia mauri lou, mase taudia bona mauri taudia edia biaguna do ia lao totona. ¹⁰ To oi, dahaka dainai oiemu varavara tauna oi gwauraia kerere? Bona oi, dahaka dainai oiemu varavara oi gwauraia ia be anina lasi? Badina be ita ibounai Dirava ena Kota henia gabuna ena vairana dekenai do ita gini. ¹¹ Buka Helaga dekenai ia torea hegeregere, ia gwau:

“Lohiabada ia gwau,
 ‘Lau be mauri Diravana momokani dainai,
 tui ibounai lauegu vairana dekenai do idia tui diho,
 bona uduna ibounai ese do idia gwauraia hedinarai lau be Dirava.’”

¹² Badina be ita ibounai ta ta ese, iseda kara ena badina, be Dirava ena vairana dekenai do ita gwauraia hedinarai.

Kara ta oi karaia lasi Keristani varavara ta do ia moru totona

¹³ Unai dainai, ita ta ta dekenai do ita gwauraia kerere lasi, to iseda lalona dekenai inai bamona do ita laloo: Iseda varavara tauna ta ena dala dekenai hadikaia gauna ta do ita atoa lasi, iena kara dika havaraia garina. ¹⁴ Lohiabada Iesu danu lau hakapua dainai, lau diba momokani, gau ta be ia sibona ia miro lasi. To tau ta ese bema gau ta ia laloo ia be miro, unai gau be ia miro ia dekenai. ¹⁵ Bema oiemu aniani gauna dekena amo oiemu varavara tauna ena lalona oi hadikaia neganai, oi be lalokau dalana oi karaia lasi. Keriso be unai tau totona ia mase, vadaeni oi ese oiemu aniani gauna dekena amo do oi hamasea lasi. ¹⁶ Bema umui laloo emui kara ta be namo, umui karaia neganai do umui naria namonamo, unai emui kara be tau haida do idia herevalaia ia dika garina. ¹⁷ Badina Dirava ena Basileia be aniani gauna lasi o inuina gauna lasi, to kara maoromaoro, bona maino, bona moale, Lauma Helaga ese ia henia gaudia. ¹⁸ Bona Keriso ena hesiai gaukara inai bamona ia karaia noho tauna ese Dirava ena moale bona taunimanima edia hanamoa do ia abia.

¹⁹ Unai dainai maino daladia do ita tahua, bona ita ta ta ese iseda bamona ta ta edia abidadama do ita hagoadaia. ²⁰ Dirava ena gaukara do umui hadikaia lasi, aniani gauna totona. Momokani, gau ibounai umui ania diba, to bema tau ta ena lalona oi hakaua kerere, aniani ta oi ania dekena amo, vadaeni oi be oi kerere inai. ²¹ Dala maorona be inai, vamu do ita ania lasi, uaina do ita inua lasi, bona iseda varavara tauna ta do ita hamorua totona kara ta do ita karaia lasi, unai be ia namo. ²² Namu oi ese oiemu abidadama do oi laloo, oiemu abidadama be oi sibona bona Dirava emui huana dekenai gauna. Bema tau ta ia laloo iena kara ta be ia namo, bona iena lalona ese ia gwauraia unai kara ia kerere lasi neganai, unai tau be ia moale bada. ²³ To bema tau ta be ia ania noho gauna dekenai ia daradara neganai, Dirava ese unai tau ia gwauraia kerere vadaeni, badina iena kara be abidadama dekenai ia karaia lasi. Badina be bema kara ta abidadama dekenai ita karaia lasi neganai, unai kara be ia dika.

15

Haida do ita durua, ita sibona iseda moale do ita tahua lasi

¹ Ita abidadama goada taudia be namo manoka taudia ita durudia edia abidadama do ia gini totona. Ita sibona iseda moale do ita tahua lasi. ² Ita ibounai ta ta ese iseda badibadinai ia noho tauna do ita hamoalea, iena namo bona iena goada havaraia totona, bona iena abidadama do ia goada totona. ³ Badina be Keriso ese sibona ena namo ia tahua lasi, Buka Helaga dekenai ia torea hegeregere, ia gwau: “Edia hereva dekenai oi idia hadikaia taudia ese lau danu idia hadikaia vadaeni.” ⁴ Buka Helaga dekenai idia torea hereva be ita dekenai hadibaia totona idia torea, vadaeni do ita gini goada, bona Dirava ena namo dekenai do ita naria, mai haheauka danu. ⁵ Vadaeni Dirava, haheauka bona goada ia henia Diravana ese umui emui lalona do ia hatamonaia, Iesu Keriso ena

kara umui karaia noho dainai. ⁶ Unai neganai mai emui laloa tamona, bona mai emui hereva tamona, umui ese Dirava, iseda Lohiabada Iesu Keriso ena Tamana do umui hanamoa.

Sivarai Namona be Iuda lasi taudia totona danu

⁷ Unai dainai, umui ta ta do umui abia dae, Keriso ese umui ia abia dae hegeregere, taunimanima ese Dirava do idia hanamoa totona. ⁸ Badina be umui lau hamaoroa, Keriso be Iuda taudia durua bona hanamoa totona ia mai, bona ia mai be Dirava ena hereva momokani do ia hedinarai totona. Inai anina be, Dirava ese iena gwauhamata Iuda sene taudia dekenai ia hamomokania vadaeni. ⁹ Bona Iuda lasi bese idauidau taudia ese danu Dirava idia hanamoa diba, iena bogahisihisi dainai, Buka Helaga dekenai ia torea bamona, ia gwau: “Unai dainai Iuda lasi taudia edia huanai oi do lau hanamoa. Oiemu ladana lauegu ane dekenai do lau hanamoa.”

¹⁰ Ma ia gwau:

“Iuda lasi taudia e,
iena abia hidi besena danu do umui moale hebou.”

¹¹ Ma Buka Helaga ia gwau,

“Umui Iuda lasi taudia ibounai e,
Lohiabada do umui hanamoa.
Taunimanima ibounai e,
Lohiabada do umui hanamoa.”

¹² Ma Isaia danu ia gwau:

“Iese ena bese dekena amo tau ta do ia hedinarai,
bese idauidau edia lohia tauna do ia lao.
Iuda lasi taudia ese ia do idia abidadama henia.”

¹³ Dirava be iseda abidadama ena badina korikori dainai ia dekenai ita naria noho. Ia ese umui emui abidadama dainai, moale momokani bona maino momokani do ia henia umui dekenai. Inai dainai umui ese Dirava ena nega namona umui naria dalana, be do ia tubu daekau noho, Lauma Helaga ena siahu dekena amo.

¹⁴ Lauegu turana Keristani taudia e, lau diba umui ese kara namona umui karaia noho, bona kara maorona dalana umui diba momokani. Vadaeni umui ta ta dekenai sisiba umui henia diba. ¹⁵ To inai revareva lalonai dala haida lau hedinarai namonamo inai, do umui laloatao totona. Lau be gau ta lau hunia lasi, badina be Dirava ese gaukara idauna ta ia henia vadaeni lau dekenai. ¹⁶ Lau be Keriso Iesu ena hesiai tauna Iuda lasi taudia totona. Dirava ena Sivarai Namona lau harorolaia, Dirava ena hahelagaia tauna bamona. Inai dekena amo Iuda lasi taudia be Dirava dekenai idia mai, bona boubou gaudia bamona do idia lao. Dirava hamoalea totona, Lauma Helaga ese idia ia hahelagaia vadaeni.

¹⁷ Keriso Iesu danu lau hakaupua dainai, lau be Dirava ena gaukara lau karaia noho mai moale bona mai heagi danu. ¹⁸ Lau be idau gauna ta do lau harorolaia diba lasi. Lau be inai gau tamona do lau harorolaia: Keriso ese lau dekena amo Iuda lasi taudia Dirava dekenai ia mailaia sivaraina sibona do lau harorolaia. Lau ese inai bamona lau karaia, hereva bona kara dekena amo. ¹⁹ Toa bona hoa karadia danu lau karaia, bona Lauma Helaga ese inai gaudia ibounai ia havaraia iena siahu dekena amo. Unai dainai lau loaloa gabudia ibounai, Ierusalem ia lao bona Iluriko, Keriso ena Sivarai Namona lau harorolaia haorea momokani vadaeni. ²⁰ Lauegu ura tamona be inai: Sivarai Namona do lau harorolaia, Keriso ena ladana idia do kamoni lasi gabudia dekenai.

Badina be lau ura lasi tau ta ese ia haginia vadaeni gaukara ma do lau karaia lou. ²¹ Buka Helaga dekenai ia torea hegeregerena, ia gwau: “Iena Sivarai be tau ta ese idia dekenai ia hadibaia lasi taudia, be do idia itaia, bona iena hereva idia do kamona lasi taudia, be do idia diba.”

Paulo ia gwau ia ura Roma dekenai ia lao

²² Oibe, inai gaukara bada ese egu dala ia koua, vadaeni umui dekenai lau mai diba lasi. ²³ To harihari egu gaukara inai kahana dekenai be ia ore vadaeni. Lagani momo lalonai, lau ura bada vadaeni, umui dekenai do lau mai. ²⁴ Unai dainai Sipania do lau hanaia lao neganai, lau be do lau mai, badina lau ura umui lau itaia, umui danu do ita noho sisina. Lau ura danu umui ese lau do umui durua, egu laolao Sipania dekenai totona. ²⁵ To harihari lau be Ieruselema dekenai lau lao inai, unai taudia durua totona. ²⁶ Badina be Makedonia bona Akaia taudia ese edia harihari gaudia idia haboua vadaeni Ieruselema ekalesia ogogami taudia dekenai henia totona. ²⁷ Idia sibona edia lalokau dekenai idia henia, ta ese ia oda henidia lasi. To momokani unai ogogami taudia idia durudia be namo bona maoro. Badina korikori be, Iuda taudia ese edia lauma gau namodia idia henia vadaeni Iuda lasi bese taudia dekenai. Unai dainai inai Iuda lasi Keristani taudia ese namo edia kohu ma do idia henia Iuda Keristani taudia dekenai, durudia totona. ²⁸ Lau ura inai gaukara do lau haorea. Lau ura inai ogogami taudia totona inai idia gogoa moni ibounai do lau henia haorea. Vadaeni inai murinai umui dekenai do lau mai, ma Sipania dekenai do lau lao. ²⁹ Lau diba danu, umui dekenai lau mai neganai, Keriso ena hanamoa ibounai do lau mailaia.

³⁰ Egu varavara taudia e, umui dekenai lau noinoi, iseda Lohiabada Iesu Keriso dainai, bona Lauma Helaga ese ia henia lalokauna dainai, lau danu totona Dirava dekenai do umui guriguri goadagoada. ³¹ Dirava umui noia, ia ese Iudea dekenai kamona lasi taudia dekena amo lau do ia hamauria, bona egu gaukara Ieruselema dekenai, be Dirava ena taudia ese lau do idia abia dae, mai edia lalona namo danu. ³² Unai murinai, bema Dirava ia ura neganai, mai moale danu umui dekenai do lau mai, vadaeni umui danu laga-ani sisina do lau abia. ³³ Maino ia henia Diravana lau noia, ia ese umui dekenai do ia noho. Amen.

16

Paulo ese hanamoa hereva Roma taudia haida dekenai ia siaia

¹ Iseda taihuna Fibi ia mai noho umui dekenai, ia be Kenekrea dubu ena diakono hahine ta. ² Lohiabada dainai Fibi do umui abia dae, Dirava ena taudia ta ta dekenai edia abia dae kara hegeregerena. Iena gaukara dekenai umui durua. Badina be ia danu ese taunimanima momo ia durua vadaeni, bona lau danu ia durua vadaeni.

³ Prisikila bona Akwila dekenai lauegu hanamoa hereva lau siaia inai. Idia be lau danu ai gaukara hebou taudia Keriso Iesu ena hesiai gaukara lalonai. ⁴ Idia ese lau durua totona kahirakahira idia mase. Lau ese idia lau hanamoa bada, to lau sibona lasi, Iuda lasi ekalesia ore taudia ibounai danu. ⁵ Edia ruma lalonai idia hebou noho Keristani taudia dekenai danu egu hanamoa do umui henidia. Lau lalokau henia tauna, Epaineto dekenai danu egu hanamoa do umui henia. Ia be tau ginigunana Keriso ia abidadama henia Asia kahana dekenai.

⁶ Laegu hanamoa danu Maria dekenai umui henia. Ia be umui totona ia hekwarahi bada vadaeni. ⁷ Laegu varavara taudia Anedroniko bona Iunia danu, laegu hanamoa idia dekenai do umui henia. Idia be Iuda taudia lau hegeregere, bona idia be lau danu nega tamona dibura ruma dekenai ai noho. Edia sivarai be ia bada aposetolo taudia edia huanai. Idia danu be Keriso ena orea dekenai idia vareai guna, lau be gabeai.

⁸ Amepilia, Lohiabada dainai lau lalokau henia tauna dekenai, laegu hanamoa do umui henia. ⁹ Urebano, lau danu Keriso ena hesiai gaukara ai karaia hebou tauna, bona Sitaku, laegu lalokau tauna umui hanamodia, lau dainai. ¹⁰ Apele, Keriso totona ia gini goada momokani tauna, ia dekenai laegu hanamoa umui henia. Aristobulo ena ruma taudia ibounai dekenai laegu hanamoa lau siaia inai. ¹¹ Laegu varavara, Iuda tauna Herodiona dekenai hanamoa do umui henia, lau dekena amo. Laegu hanamoa danu Narakiso ena ruma taudia do umui henia, idia be Keriso ena orea taudia.

¹² Laegu hanamoa hereva be Trupena bona Truposa dekenai do umui henia, idia ruaosi be Lohiabada totona idia hekwarahi bada. Laegu turana lalokau Peresi dekenai danu egu hanamoa do umui henia. Gaukara bada ia karaia vadaeni Lohiabada totona. ¹³ Rupo, ia be Lohiabada ena hesiai tauna namona momokani, egu hanamoa lau siaia ia dekenai, iena sinana danu lau hanamoa, ia ese nega ibounai lau ia durua, hegeregere lau be iena natuna bamona. ¹⁴ Asunukrito bona Pelegona bona Hereme bona Pateroba bona Herema, mai edia Keristani turadia ibounai danu dekenai egu hanamoa do umui henia. ¹⁵ Pilologo, bona Iulia, bona Nerea, mai iena taihuna danu bona Olimipa, bona Dirava ena taudia ibounai idia danu idia noho, egu hanamoa mani do umui henidia.

¹⁶ Umui ta ta dekenai umui hanamoa, umui ta ta dekenai ekalesia ena lalokau kisi do umui henia. Keriso ena ekalesia orea ibounai ese umui dekenai edia hanamoa idia siaia inai.

Taunimanima haida ese ekalesia orea idia hapararaia diba

¹⁷ Laegu varavara taudia e, ekalesia orea idia hapararaia taudia bona taunimanima haida edia abidadama idia hadikaia taudia do umui naria namonamo. Ai ese umui dekenai ai henia vadaeni hadibaia hereva idia ura hamakohia gwauraia. Idia dekena amo do umui raka siri. ¹⁸ Badina be unai bamona taudia ese Keriso iseda Lohiabada ena hesiai gaukara idia karaia lasi, to edia bogana sibona idia lalao. Idia danu hereva manau koikoi bona hereva namo koikoi dekena amo, diba bada lasi taudia idia koia noho. ¹⁹ To umui ese Sivarai Namona umui badinaia namonamo noho ena kiki, be taunimanima ibounai idia kamona vadaeni. Unai dainai, lau be umui totona lau moale. Bona lau ura umui be kara namodia dekenai do umui aonega, to kara dikadia dekenai do umui aonega lasi. ²⁰ Nega sisina iseda maino ia havaraia Diravana ese Satani do ia moia diho momokani, umui emui aena henuna dekenai. Dirava lau noia, iseda Lohiabada Iesu Keriso ena hariharibada do ia hedinarai noho umui dekenai.

²¹ Timoteo, lau danu ai gaukara hebou tauna, bona laegu Iuda varavara taudia Lukio, Iasoni bona Sosipatro ese edia hanamoa idia siaia inai, umui dekenai.

²² Lau inai, Teretio, Paulo ena hereva lau torea noho inai revareva lalonai. Lau ese Lohiabada ena ladana dekenai umui lau hanamoa.

²³ Gaio ese iena hanamoa umui dekenai ia siaia. Ia ese lau ia naria namo herea iena ruma dekenai. Iena ruma lalonai danu ekalesia edia guriguri hebou idia abia noho. Erasito, hanua badana ena moni ia naria tauna, bona Koato, Keristani varavara tauna ta ese edia hanamoa idia siaia inai, umui dekenai.

²⁴ Iseda Lohiabada Iesu Keriso ena hariharibada be umui ibounai dekenai do ia noho. Amen.

Paulo ese Dirava ia hanamoa

²⁵ Dirava dekenai hairai bada ita henia be namo! Ia sibona ese mai goada danu, umui do ia haginia goada emui abidadama lalonai. Inai abidadama umui davaria, Sivarai Namona, lau ese lau harorolaia gauna dekena amo, Iesu Keriso ena Sivarai Namona be inai. Inai sivarai momokani be hunia herevadia, idaunegai ia mai bona hari be idia hunia, to harihari Dirava ese ia hedinaraiia namonamo vadaeni. ²⁶ Oibe, Dirava ena hereva momokani be harihari ia hedinaraiia namonamo, badina peroveta taudia edia toretore ese unai hereva ena anina korikori idia hedinaraiia vadaeni. Bona noho hanaihanai Diravana ena oda dainai, bese ibounai dekenai inai Sivarai ai hadibaia noho, taunimanima ibounai ese do idia abidadama henia bona kamonai henia totona.

²⁷ Aonega Dirava tamona ita hanamoa, Iesu Keriso dainai, iena hairaina do ia noho hanaihanai. Amen.

PAULO ENA REVAREVA GINIGUNANA KORINTO TAUDIA DEKENAI

¹ Lau Paulo, lau be Iesu Keriso ena aposetolo tauna, Dirava ena ura dainai. Ia ese lau ia boiria vadaeni, iena aposetolo tauna do lau lao. Lau bona iseda varavara tauna Sositene, ai ruaosi ese inai revareva ai torea, ² umui Dirava ena ekalesia taudia Korinto dekenai. Dirava ese umui ia boiria vadaeni iena helaga taudia do umui lao totona. Umui be Dirava ena, badina be Keriso Iesu danu umui hakupua dainai, umui bona Iesu Keriso ena ladana idia gwauraia taudia ibounai danu. Ia be idia edia Lohiabada, iseda Lohiabada danu nega tamona.

³ Iseda Tamana Dirava bona Lohiabada Iesu Keriso ese hariharibada bona maino umui ibounai dekenai do idia henia.

Paulo ese Dirava ia hanamoa

⁴ Keriso Iesu ena gaukara dainai, Dirava ese iena hariharibada umui dekenai ia henia vadaeni. Inai dainai nega ibounai Dirava lau tanikiu henia. ⁵ Keriso danu umui hakupua tamona dainai, Dirava ese emui mauri dalana ibounai ia hanamoa bada herea. Ia ese umui ia durua, vadaeni umui ese Iesu Keriso umui gwauraia hedinarai noho. Aonega danu umui dekenai ia henia, vadaeni Dirava ena hereva momokani umui diba. ⁶ Keriso ena sivarai, ai ese ai harorolaia gauna be umui ese umui abia dae goada, bona umui hamomokania vadaeni. ⁷ Unai dainai umui ese Lohiabada Iesu Keriso ena mai umui naria noho, bona Lauma ena harihari gauna ta dekenai umui dabu lasi. ⁸ Keriso ese umui do ia haginia goada ela bona dokona. Vadaeni Lohiabada Iesu Keriso ena mai dinana dekenai umui be kerere ta lasi. ⁹ Dirava ese umui ia boiria vadaeni, iena Natuna Iesu Keriso, iseda Lohiabada danu do umui noho hebou totona. Bona Dirava ena kara be momokani, ita abidadama henia diba.

Ekalesia ia parara

¹⁰ Lauegu varavara taudia e, iseda Lohiabada Iesu Keriso ena ladana dainai umui lau noia, umui parara lasi. Hereva tamona do umui gwauraia, bona do umui gaukara hebou mai lalona tamona danu. ¹¹ Badina be, lauegu varavara taudia e, Kiloe ena varavara taudia ese umui emui sivarai lau dekenai idia hamaoroa. Idia gwau umui heai noho, heai noho. ¹² Lau lalao umui ta ta inai bamona umui hereva noho, umui gwau, “Lau be Paulo ena,” “Lau be Apolo ena,” “Lau be Petero ena,” “Lau be Keriso ena.” ¹³ Edena bamona? Keriso ia parara vadaeni, a? Lau Paulo inai, idia ese lau idia hasatauroa, umui dainai lau mase, a? Umui ese bapatiso umui abia Paulo ena ladana dekenai, a?

¹⁴ Lau ese Dirava lau tanikiu henia, badina umui ta lau bapatiso lasi, Krisipo bona Gaio ruaosi sibona. ¹⁵ Unai dainai umui ta be inai bamona ia hereva diba lasi, “Lau be Paulo ena diba tahu tauna, badina ia ese lau ia bapatisoa.” ¹⁶ Momokani, lau be Stepana mai ena famili danu lau bapatisoa, to lau diba lasi ta danu lau bapatisoa o lasi. ¹⁷ Badina be Keriso ese taunimanima bapatisoa totona lau ia siaia lasi, to Sivarai Namona do lau harorolaia totona. Bona aonega hereva dekenai do lau haroro lasi, Keriso ena mase satauro dekenai ena siahu bada do lau hamaragia garina.

Keriso be Dirava ena siahu bona aonega

¹⁸ Momokani, mase ena dala dekenai idia raka noho taudia ese idia gwau Keriso ena mase satauro dekenai herevana be kavakava. To ita mauri ena dala dekenai ita raka noho taudia be ita diba Keriso ena satauro herevana be Dirava ena siahu. ¹⁹ Buka Helaga lalonai ia torea vadaeni, ia gwau:

“Lau ese aonega taudia edia aonega do lau haorea, bona diba bada taudia edia diba do lau negea.”

²⁰ Unai dainai, aonega taudia be edeseni? Diba bada taudia edeseni idia noho? Inai tanobada ena dala idia herevalaia diba momo taudia be edeseni? Dirava ese ia hedinarai inai tanobada ena aonega be kavakava sibona!

²¹ Oibe, Dirava ena aonega be bada herea, inai bamona: Tanobada taudia ese sibona edia aonega dekena amo Dirava idia davaria diba lasi. To ai ese ai harorolaia hereva kavakava dekena amo, abidadama henia taudia ibounai be Dirava ese do ia hamauria. ²² Iuda taudia be idia ura bada toa karadia idia itaia, bona Helene taudia idia ura bada aonega idia davaria. ²³ To ai ese Keriso idia hasatauroa ai harorolaia noho. Inai hereva ese Iuda taudia ia habadua. Bona Helene taudia idia lalao inai hereva be kavakava. ²⁴ To ita, Dirava ena boiboi ita kamoni henia taudia, Iuda taudia bona Iuda lasi taudia danu, ita diba Keriso be Dirava ena siahu, bona Dirava ena aonega. ²⁵ Oibe, Dirava ena kavakava ese taunimanima edia aonega ia hereaia noho, bona Dirava ena manoka ese taunimanima edia goada ia hereaia noho.

²⁶ Laegu varavara taudia e, Dirava ese umui ia boiria negana mani umui lalao. Unai neganai umui momo lasi be mai aonega, inai tanobada ena aonega bamona. Bona umui momo lasi be mai siahu, inai tanobada ena siahu bamona. Umui momo lasi danu be lohia taudia. ²⁷ To tanobada ena kavakava gaudia be Dirava ese ia abia hidi, aonega taudia do ia hahemaraia totona. Bona tanobada ena manoka gaudia danu Dirava ese ia abia hidi, goada taudia do ia hahemaraia totona. ²⁸ Tanobada ese ia negea gaudia, bona taunimanima idia ura lasi gaudia Dirava ese ia abia hidi. Tanobada taudia idia lalao be anina lasi gaudia Dirava ese ia abia hidi, tanobada ena gau badadia do ia haorea totona. ²⁹ Inai anina be, tau ta Dirava ena vairanai ia hekokoroku diba lasi. ³⁰ To Dirava ese Keriso danu umui ia hakapua tamona, bona Dirava ese Keriso, be iseda aonega ia halaoa vadaeni. Keriso sibona dekena amo Dirava ena vairanai ita maoromaoro diba. Keriso dainai Dirava ena helaga taudia ita lao, bona ura kwalimu ita abia. ³¹ Unai be Buka Helaga ia torea herevana bamona, ia gwau: “Daika tauna ia ura heagi, ia be Lohiabada ena kara sibona do ia heagilaia.”

2

Keriso idia hasatauroa sivaraina

¹ Laegu varavara taudia e, umui dekenai lau lao neganai, lau be hereva namo herea o aonega herea lau gwauraia lasi, to Dirava ena hereva momokani lau harorolaia. ² Umui dekenai lau noho neganai lau be idau gauna ta lau lalao diba lasi, Iesu Keriso sibona mo. Oibe, Iesu Keriso satauro dekenai ia mase sibona lau lalao. ³ Unai dainai umui emui huanai lau noho neganai lau be goada lasi. Lau gari, bona lau heudeheude momo. ⁴ Laegu hereva bona laegu haroro be taunimanima edia aonega dekenai lasi, o egu diba bada dekenai lasi. To Lauma Helaga

ena sياهو lau ese umui dekenai lau hedinarai momokani. ⁵ Unai dainai emui abidadama be taunimanima edia aonega dekena amo ia gini lasi, to Dirava ena sياهو dekena amo ia gini.

Dirava ena Lauma ese aonega ia henia

⁶ To momokani, Lauma Helaga ena diba gaudia dekenai idia goada vadaeni taudia, be lau ese aonega hereva dekena amo lau haroro henidia. To inai aonega be tanobada gunalaia taudia edia aonega lasi, edia sياهو ia doko lao noho. ⁷ Lau harorolaia aonega be Dirava ena. Inai aonega be hunia gauna, tanobada taudia idia diba lasi gauna. Tanobada ia do karaia lasi neganai, Dirava ese inai aonega dalana ia karaia hegaegae, ita ese hairai momokani dohore ita abia totona. ⁸ Inai tanobada ena gunalaia taudia be inai bamona aonega idia diba lasi momokani. Badina be bema idia diba neganai idia be Hairai ena Lohia idia hasatauroa lasi. ⁹ Buka Helaga lalonai ia torea bamona, ia gwau:

“Matana ta ia itaia lasi,
bona taiana ta ia kamona lasi gaudia,
bona tau ta ena lalona dekenai ia laloa diba lasi gaudia,
be Dirava ese ia abia hegaegae,
ia idia lalokau henia taudia edia.”

¹⁰ Inai gaudia be hunia dekenai idia noho, to Dirava ese iena Lauma dekena amo ita dekenai ia hedinarai. Oibe, Lauma Helaga ese gau ibounai ia tahua noho, Dirava ena laloa dobu gaudia danu. ¹¹ Badina be taunimanima edia laloa be taunimanima edia lauma sibona idia diba, ani? Unai bamona danu, Dirava ena gau be tau ta ia diba lasi, Dirava ena Lauma sibona ia diba. ¹² Ita be inai tanobada ena lauma ita abia lasi. To Dirava dekena amo ia mai Lauma ita abia vadaeni, Dirava ese ita dekenai ia henia harihari gaudia do ita diba namonamo totona.

¹³ Unai dainai ai be tanobada taudia edia aonega dekena amo ai hereva lasi, to Lauma Helaga ese ai dekenai ia hadibaia hereva dekena amo. Vadaeni ai ese Lauma ena hereva momokani gaudia be Lauma idia abia taudia dekenai ai hadibaia. ¹⁴ Tauanina ia abidadama henia tauna ese Dirava ena Lauma gaudia ia abia dae diba lasi, badina be ia dekenai idia be kavakava bamona. Inai Lauma ena gau namodia be Lauma Helaga sibona dekena amo ita abia diba. Vadaeni Lauma ia do diba lasi tauna be unai gaudia edia anina ia davaria diba lasi. ¹⁵ Lauma Helaga ia abia vadaeni tauna ese gau ibounai edia anina ia diba. To tau ta lasi ese Lauma Helaga ia abia tauna ena mauri ia tahua diba. ¹⁶ Buka Helaga lalonai ia torea bamona, ia gwau:

“Daika ese Lohiabada ena laloa ia diba?
Daika ese Lohiabada ia sisiba henia diba?”
To, ita be Keriso ena laloa ita abia vadaeni.

3

Ekalesia ena hesiai taudia be Dirava ena hesiai taudia

¹ Lauegu varavara taudia e, umui dekenai lau hereva lasi Lauma abia vadaeni taudia hegeregere. To tauanina umui abidadama henia taudia hegeregere umui lau hereva henia. Badina umui be do beibi bamona Keriso ena mauri dalana lalonai. ² Unai dainai rata dekenai umui lau ubua. Aniani aukadia umui dekenai lau henia lasi, badina umui be do goada lasi, harihari danu umui be do goada lasi. ³ Badina korikori be, umui be tauanina ena ura kara umui do karaia noho. Oibe, mama bona heai be umui emui huanai idia do noho. Idia do noho dainai, umui

hedinarai umui be tauanina umui abidadama henia noho, emui kara be tanobada taudia edia kara sibona. ⁴Badina be umui ta ia gwau, “Lau be Paulo ena,” bona ma ta ia gwau, “Lau be Apolo ena.” Inai anina be, umui be tanobada taudia bamona umui karaia noho, ani?

⁵Mani umui laloe. Apolo be daika? Bona Paulo be daika? Ai be Dirava ena hesiai taudia sibona. Lohiabada ese gaukara ta lau dekenai ia henia, vadaeni lau karaia. Bona ia ese gaukara ta Apolo dekenai ia henia, vadaeni ia karaia. Bona aiemai gaukara dekena amo umui be Dirava dekenai umui abidadama henia. ⁶Lau ese uhe lau hadoa. Apolo ese ranu dekenai ia dairia. To Dirava ese unai hadoa gauna ia hatubua. ⁷Hadoo tauna bona dairia tauna edia gaukara be herevana, badina Dirava sibona ese hadoa gauna ia hatubua. ⁸Hadoo tauna bona dairia tauna ruaosi be hegeregere. Dirava ese ta ta edia gaukara davana do ia henia, edia hekwarahi hegeregere. ⁹Badina ai ruaosi be Dirava ena gaukara ai karaia hebou noho. Umui be Dirava ena uma gabu, bona umui be Dirava ena ruma danu.

Ekalesia ena gaukara tauna be ruma haginia tauna bamona

¹⁰Dirava ese iena hariharibada dekena amo, ruma haginia tauna badana ena aonega lau dekenai ia henia. Vadaeni lau ese ruma ena du lau haginia vadaeni. Ma tau ta ese unai du ena latanai ruma ia haginia noho. To du latanai ruma idia haginia taudia ta ta, namona be edia gaukara dalana idia naria namonamo. ¹¹Badina be Dirava ese du korikori ia atoa vadaeni, Iesu Keriso be unai. Bona tau ta ese du idauna ta do ia atoa hegeregere lasi. ¹²Unai ruma ena du latanai haida ese golo, o siliva, o nadi namo herea, o au, o kurukuru, o biri dekena amo ruma do idia haginia. ¹³To taunimanima ta ta edia gaukara be Keriso ena Kota Badana Dinana dekenai do idia hedinarai. Badina unai Dina dekenai, lahi ese tau ibounai edia gaukara do ia hedinarai. Lahi ese ta ta edia gaukara do ia tohoa, vadaeni ibounai edia gaukara be do ita diba, namo o dika. ¹⁴Bema tau ta ese du ena latanai ia haginia gauna be lahi ese ia araiasi lasi, unai tau ese davana namona do ia abia. ¹⁵To bema tau ta ia haginia gauna be lahi ese ia araiasi, unai tau ese iena gaukara ena anina do ia halusia. Ia sibona do ia mauri, to ia be lahi lalona dekena amo ia heau mauri tauna bamona.

¹⁶Umui diba lasi, a? Umui be Dirava ena dubu helaga, bona Dirava ena Lauma be umui emui lalona dekenai ia noho! ¹⁷Bema tau ta ese Dirava ena dubu helaga ia hadikaia neganai, Dirava ese unai tau do ia hadikaia. Badina be Dirava ena dubu be helaga, bona unai dubu be umui.

¹⁸Tau ta ese sibona ia koia be namo lasi. Sedira umui emui huanai tau ta ia laloe inai tanobada ena aonega ia davaria vadaeni. Namona be unai tau ese kavakava tauna bamona do ia halaoa guna, gabeai aonega korikori do ia abia. ¹⁹Badina be inai tanobada ena aonega be kavakava, Dirava ena vairana dekenai. Buka Helaga lalonai ia torea vadaeni, ia gwau: “Aonega taudia be edia diba momo lalonai Dirava ese ia hakereredia noho.” ²⁰Bona Buka Helaga ena hereva ta ma ia gwau: “Lohiabada be aonega taudia edia laloe ia diba, idia be anina lasi.”

²¹Unai dainai, taunimanima edia kara dekenai do umui hekokoroku lasi. Badina be gau ibounai be umui emui. ²²Paulo, o Apolo, o Petero, o inai tanobada, o mauri, o mase, o harihari ia noho gaudia, o gabeai do idia vara gaudia. Inai ibounai be umui emui, ²³badina umui be Keriso ena, bona Keriso be Dirava ena.

4

Keriso ena aposetolo taudia

¹ Namona be umui lalao ai be Keriso ena hesiai taudia, bona ai ese Dirava ena hunia hereva ai naria namonamo taudia. ² Hesiai tauna ena gaukara lalonai gau badana momokani be inai: Iena biaguna ena ura do ia karaia momokani. ³ Lau be inai bamona lau lalao: Bema umui ese, o taunimanima haida ese lau umui kota henia neganai, unai be gau ta lasi. Lau sibona danu ese egu kara lau kota henia lasi. ⁴ Momokani lau diba lasi egu kerere ta ia noho o lasi. To unai dainai lau be maoromaoro momokani, a? Lasi, Lohiabada sibona ese lau do ia kota henia. ⁵ Unai dainai tau ta do umui gwaaraia kerere haraga lasi. Naria ela bona Lohiabada do ia mai. Ia ese dibura lalonai idia hunia gaudia be diari lalonai do ia hedinarai, ma ia ese taunimanima edia hunia lalao do ia hedinarai. Bona unai neganai tau ibounai ese Dirava ena hanamoa hereva do idia abia, edia kara hegeregere.

Korinto taudia edia hekokoroku kara

⁶ Lauegu varavara taudia e, umui emui lalao lau hagoadaia totona, lau ura Apolo bona lau, aiemai manau kara do umui lalao. Aiemai kara bamona do umui karaia, bona Buka Helaga ena hereva do umui utua lasi. Lau ura lasi umui hekokoroku, bona tau ta umui abia dae, to tau ma ta umui negea. ⁷ Egu turana e, edena bamona oi be hekokoroku momo? Oi davarua gaudia ibounai be Dirava ese oi dekenai ia henia vadaeni, ani? Oibe, Dirava ese inai gau oi dekenai ia henia, harihari gaudia bamona. Unai dainai, badina dahaka oi hekokoroku, inai gau sibona oiemu goada dekena amo oi abia bamona?

⁸ Harihari umui be boga kunu vadaeni, harihari umui be kohu momo taudia. Umui ese ai umui hereaia vadaeni, bona king hegeregere umui halaoa, ani? Bema umui be king momokani be namo, vadaeni ai danu king taudia do ai halaoa umui danu. ⁹ To inai be lasi, badina lau lalao inai bamona: Dirava ese ai aposetolo taudia be gabeai taudia momokani ai ia halaoa vadaeni. Ai be hegeregere taunimanima ese edia kota dekenai idia gwau ai be do ai mase. Vadaeni ai mase neganai, ibounai ese edia matana dekenai ai do idia itaia, taunimanima bona aneru danu. ¹⁰ Keriso ena ladana ai abia isi totona, ai be kavakava taudia bamona, to umui be Keriso danu umui hakaupua dainai, umui be aonega taudia. Ai be manoka, to umui be goada. Ai be idia kirikirilaia, to umui be idia hanamoa. ¹¹ Dina ibounai ia mai bona harihari ai be hitolo, ai be ranu mase, ai be dabua lasi, ai idia botai, bona ai be noho ruma ta lasi. ¹² Ai hekwarahi bada noho, aiemai imana dekenai ai gaukara noho. Ai dekenai idia hereva dika noho, to ai ese idia ai hanamoa. Ai idia dagedage henia noho, to davana ai henia lasi. ¹³ Aiemai ladana idia hadikaia noho, to idia dekenai ai hereva mai manau danu. Ai be tanobada ena kukuri, bona gau ibounai edia momoru be ai idia halaoa vadaeni, ia mai bona harihari.

Paulo ena kara bamona idia karaia be namo

¹⁴ Inai hereva lau torea lasi umui be do umui hemarai totona. Lasi, to umui be lauegu natuna, lauegu lalokau dainai, lau ura umui lau sisiba henia. ¹⁵ Umui lalao: Bema Keriso ena mauri dalana umui dekenai idia hadibaia taudia ibounai be 10,000, inai be gau ta lasi. Umui emui tamana be tamona sibona. Oibe, Keriso Iesu ena mauri dalana diba totona umui emui tamana be lau sibona. Lau ese Sivarai Namona umui dekenai lau

haroro henia dainai umui be lauegu natuna. ¹⁶ Unai dainai, umui lau noia, lauegu kara bamona do umui karaia. ¹⁷ Inai totona Timoteo lau siaia, ia lao umui dekenai. Ia be lauegu lalokau merona, mai ena kara momokani danu, Keriso ena mauri dalana lalonai. Ia ese lauegu gaukara bona lauegu kara Iesu Keriso ena mauri matamata lalonai, be umui dekenai do ia hadibaia. Ekalesia ore a ibounai dekenai lau hadibaia hereva, be ia ese umui dekenai do ia hamaoroa.

¹⁸ Umui haida umui laloa lau be umui do lau vadivadi henia lasi, vadaeni umui hekokoroku. ¹⁹ To, bema Lohiabada ia ura neganai, lau be nega sisina umui dekenai do lau mai. Vadaeni inai hekokoroku taudia do lau diba, idia be mai siahu momokani o lasi. Edia hereva be gau ta lasi, ²⁰ badina be Dirava ena Basileia be hereva gauna lasi, to ia be siahu gauna. ²¹ Umui ura edena bamona lau mai umui dekenai? Mai kwadia auna do lau mai, o mai lalokau bona manau danu?

5

Headava hadikaia karadia Korinto dekenai

¹ Sivarai idia gwauraia loaloa noho, umui emui huanai be lebulebu kara ta ia noho. Inai bamona kara be Dirava diba lasi taudia danu idia karaia lasi. Kara be inai: Tau ta ese iena tamana ena adavana danu idia heudahanai. ² To umui be umui hekokoroku noho, a? Dahaka dainai umui tai lasi? Bona dahaka dainai unai bamona ia karaia tauna be emui ore a dekena amo umui atoa siri lasi? ³ Momokani, lauegu tauanina umui dekena amo ia daudau, to lauegu lauma be umui dekenai ia noho. Oibe, lau be umui dekenai lau noho momokani bamona. Unai dainai unai kara dika ia karaia tauna lau kota henia vadaeni. ⁴ Umui lau hamaoroa inai: Lohiabada Iesu ena ladana dekenai umui ese hebou ta do umui abia, lauegu lauma be umui danu, bona iseda Lohiabada Iesu ena siahu danu be umui danu do ia noho. ⁵ Vadaeni unai tau dikana be Satani dekenai do umui henia, iena tauanina be Satani ese do ia hamasea totona. Vadaeni iena lauma ese mauri do ia davaria, Lohiabada ia mai Dinana dekenai.

Ekalesia dekena amo tau dikadia kokia

⁶ Umui emui hekokoroku be ia maoro lasi. Umui diba lasi, a, hatubua gauna sisina ese paraoa ibounai ia hatubua? ⁷ Umui be hatubua gauna ia noho lasi paraoa bamona. Unai dainai hatubua gauna gunana, kara dika unai, do umui kokia, paraoa matamata ia goeva bamona do umui noho totona. Badina be iseda Pasova aria ia hegaegae noho, iseda Pasova mamoe, Keriso, idia alaia vadaeni dainai. ⁸ Unai dainai iseda Pasova aria ita abia be namo. Mai hatubua gauna gunana paraoa do ita ania lasi, badina inai be kara dika bona kerere ena toana. To mai hatubua gauna lasi paraoa sibona do ita ania be namo. Inai bamona paraoa be laloa goevagoeva bona hereva momokani do ita karaia ena toana.

⁹ Revareva ta umui dekenai lau torea guna, lau gwau, “Heudahanai taudia danu umui turana karaia lasi.” ¹⁰ Lau hereva lasi, Dirava diba lasi taudia, idia heudahanai, idia mataganigani, idia henaia, bona kaivakuku idia tomadiho henia taudia do umui rakatania. Lau be inai bamona lau hereva lasi. Badina be bema inai bamona taudia umui rakatania, umui be inai tanobada do umui rakatania kava, durua ta do umui henia lasi. ¹¹ Lasi, lauegu hereva ena anina be inai bamona: Iseda Keristani varavara tauna ta, bema ia be heudahanai tauna, o mataganigani tauna, o kaivakuku tomadiho henia tauna, o hereva dika tauna, o kekeru tauna, o henaia tauna, umui be ia danu do umui turana karaia lasi. Bona ia danu do umui aniani hebou lasi.

¹²Badina be murimuri dekenai idia noho taudia, kota henia be lauegu gaukara lasi. Dirava sibona ese do ia kota henidia. ¹³To emui ekalesia orea lalonai idia noho taudia do umui kota henia be maoro, Buka Helaga ia hereva bamona, ia gwau: “Unai kara dika tauna be emui orea dekena amo umui atoa siri.”

6

Emui Keristani varavara tauna be do umui kota henia lasi tanobada ena kota lalonai

¹Bema umui ta ese Keristani tauna ma ta ia ura samania neganai, dahaka dainai Dirava diba lasi taudia edia kota vairanai do ia kota henia? Dirava ena ekalesia taudia edia kota sibona ese emui hepapahuahu ibounai do idia tahua, namo lasi murimuri taudia ese idia tahua. ²Umui diba lasi, a, dina ta Keriso ena taudia ese inai tanobada do idia kota henia? Tanobada dohore umui kota henia dainai, dahaka dainai emui hepapahuahu maragidia umui sibona umui hamaoromaoroa diba lasi, a? ³Umui diba lasi, a, ita ese aneru do ita kota henidia? Unai dainai ita sibona ese inai mauri ena gaudia do ita kota henia diba, ani? ⁴Umui emui orea lalonai inai mauri ena hepapahuahu gaudia idia vara neganai, badina dahaka Keristani lasi taudia edia kota vairanai umui lao? ⁵Be! Umui hemarai lasi, a? Emui huanai be aonega tauna ta lasi, a? Ia ese Keristani taudia edia huanai idia vara hepapahuahu gaudia ia hamaoromaoroa diba lasi, a? ⁶Inai bamona tauna lasi dainai, Keristani tauna ta ese iena Keristani varavara tauna ta ia kota henia Dirava diba lasi taudia edia vairanai, a?

⁷Oibe, umui emui Keristani varavara tauna inai bamona umui kota henia ena anina korikori be inai: Emui Keristani mauri ia moru momokani. Haida ese umui idia hadikaia neganai, o emui gau idia henaoga neganai, umui haheauka diba lasi, a? Hisihisi umui ania diba lasi, a? ⁸Lasi. Umui ese Keristani varavara taudia umui hadikaia noho, bona edia koku umui abia kava noho. Emui varavara korikori taudia umui hadikaia noho inai!

⁹Umui diba lasi, a, kara dika taudia be Dirava ena Basileia do idia davaria lasi? Umui sibona do umui koia lasi: Lebulebu taudia, kaivakuku idia tomadiho henia taudia, heudahanai taudia, o lebulebu hahine edia kara bamona idia karaia tatau, o tatau ese tatau danu hemarai karadia idia karaia taudia. ¹⁰O henaoga taudia, mataganigani taudia, kekero taudia, edia hereva dekenai haida idia hadikaia taudia, o haida edia gau idia dadia taudia. Inai bamona taudia ta lasi be Dirava ena Basileia do ia davaria diba. ¹¹Umui haida be guna unai bamona umui karaia. To Dirava ese umui emui kara dika ia huria goeva vadaeni, ia ese helaga taudia umui ia halaoa vadaeni. Bona hari Dirava ena vairana dekenai umui be maoromaoro, Lohiabada Iesu Keriso dainai, bona Dirava ena Lauma dainai.

Iseda tauanina be Lauma Helaga ena ruma

¹²Sedira umui ta ia gwau, “Kara ibounai be taravatu lasi lau dekenai.” Io, to inai kara haida ese sedira oi idia hadikaia diba. “Kara ibounai be taravatu lasi lau dekenai,” oi gwau, a? To namo lasi inai kara ta ese oi do ia biagua. ¹³Sedira umui ta ma ia gwau, “Aniani gaudia be bogana totona, bona bogana be aniani totona.” Io, inai be momokani, to Dirava ese idia ruaosi do ia haorea. Iseda tauanina be lebulebu bona sihari kava karadia karaia totona lasi. Lasi, iseda tauanina ta ta be Lohiabada ena. Bona Lohiabada ese ia ura iseda tauanina edia lalonai ia noho. ¹⁴Dirava

ese Lohiabada ia hatorea isi vadaeni, mase dekena amo. Bona ia ese ita danu mase dekena amo do ia hatorea isi, ia sibona ena siahu dekena amo.

¹⁵ Umui diba lasi, a, umui emui tauanina be Keriso ena tauanina ena kahana ta. Unai dainai Keriso ena tauanina kahana ta lau kokia, vadaeni matabodaga hahine ena tauanina kahana dekenai do lau hakapua, a? Lasi bona lasi momokani! ¹⁶ Umui diba lasi, a, matabodaga hahine danu ia hakapua tauna be ia danu tauanina tamona. Buka Helaga lalonai Dirava ia gwau, “Idia ruaosi be tauanina tamona do idia lao.” ¹⁷ To Lohiabada danu ia hakapua tauna be ia danu lauma tamona.

¹⁸ Heudahanai karadia umui rakatania. Kara dika ibounai taunimanima ese idia karaia be edia tauanina idia hadikaia lasi. To heudahanai karadia ia karaia tauna ese sibona ena tauanina ia hadikaia noho. ¹⁹ Umui diba lasi, a, umui emui tauanina be Lauma Helaga ena ruma. Dirava ese iena Lauma umui dekenai ia henia vadaeni, bona ia be emui lalona dekenai ia noho. Umui be umui sibona emui lasi, to Dirava ena. ²⁰ Badina be Dirava ese umui ia hoia, mai davana. Unai dainai, umui emui tauanina do umui gaukaralaia, Dirava ena hairaina totona.

7

Paulo ena sisiba hereva headava totona

¹ Umui emui revareva lalonai lau dekenai umui torea hereva edia davana be inai: Tatau idia headava lasi danu be ia namo. ² To lebulebu ia vara garina tatau ese edia adavana ta ta do idia abia be namo. Hahine taudia danu edia adavana korikori sibona do idia abia be namo. ³ Tau ese iena adavana dekenai headava kara do ia henia, hahine ese danu iena adavana dekenai headava kara do ia henia. ⁴ Hahine ese sibona ena tauanina ia biagua lasi, to tau ese ia biagua. Tau ese danu sibona ena tauanina ia biagua lasi, to hahine ese ia biagua. ⁵ Umui ta ta dekenai headava kara do umui koua lasi. To bema umui lalona tamona, headava kara karaia lasi, guriguri goadalaia totona, unai be ia namo. To nega daudau lasi, headava kara do umui karaia lou. Badina be sedira emui haheauka be hegeregere lasi, bona Satani ena dibagani ese umui do ia abia garina.

⁶ Inai sisiba be lauegu lalona sibona, ia be taravatu lasi: ⁷ Lauegu ura be umui ibounai lau bamona do umui noho, to tau ta ta dekenai Dirava ese maoro ia henia, do ia headava, o do ia headava lasi. Ta ena maoro be inai bamona, ma ta ena maoro be unai bamona.

⁸ Headava lasi taudia dekenai bona vabu dekenai inai bamona lau hereva: Lau hegeregere, headava lasi umui noho be namo. ⁹ To bema idia edia lalona ena ura, bona edia tauanina idia biagua hegeregere lasi neganai, namona be idia headava. Namoni lasi ura dikadika ese idia ia araia, lahi bamona.

¹⁰ To headava taudia totona inai taravatu lau gwauraia, hahine ese tau do ia rakatania lasi. Inai be lauegu taravatu lasi, to Lohiabada ena. ¹¹ To bema ia rakatania, ia be headava lasi do ia noho, o do ia giroa lou iena adavana dekenai. Tau danu ese iena adavana do ia rakatania lasi.

¹² Taunimanima oredia dekenai lau ura hereva. Inai hereva be Lohiabada ena lasi. Lauegu sisiba be inai: Sedira emui Keristani varavara tauna ta be mai ena adavana, abidadama lasi hahine. Bema unai hahine ia ura iena tau danu ia noho neganai, iena tau ese do ia rakatania lasi. ¹³ Bona Keristani varavara hahine ta danu sedira mai ena adavana, abidadama lasi tauna. Bema unai tau ia ura iena hahine danu ia noho neganai, iena hahine ese do ia rakatania lasi. ¹⁴ Badina be

Keristani hahine ese iena adavana, abidadama lasi tauna ia hahelagaia noho. Bona Keristani tauna ese iena adavana, abidadama lasi hahine ia hahelagaia noho. Bema lasi neganai, umui emui natudia be helaga lasi. To momokani, harihari be idia helaga noho. ¹⁵To bema abidadama lasi tauna o abidadama lasi hahine ese iena adavana, Keristani tauna o hahine ia ura rakatania neganai, iena dala koua lasi. Inai bamona ia vara neganai, Keristani tauna o hahine ese unai abidadama lasi tau o hahine idia rakatania dala do idia koua lasi, dibura lalonai idia koua bamona. Lasi momokani. Badina Dirava ese umui ia boiria, maino lalonai do umui noho totona. ¹⁶To oi Keristani hahine, sedira bema ia danu oi noho, oi ese oiemu tau do oi durua diba, vadaeni ia ese Keristani tauna do ia halaoa, ani? Bona oi Keristani tauna, sedira bema ia danu oi noho, oi ese oiemu hahine do oi durua diba, vadaeni ia ese Keristani hahine do ia halaoa, ani?

Dirava ese umui ia boiria hegeregerena do umui noho

¹⁷Lohiabada ese umui ta ta dekenai gaukara ena diba ia henia, bona Dirava ese umui ia boiria hegeregerena, unai bamona do umui mauri noho. Ekalesia orea ibounai lalonai inai bamona lau hadibaia noho. ¹⁸Sedira kopina ia utua vadaeni tauna be Dirava ese ia boiria. Vadaeni iena kopina utua toana do ia kokia gwaurai lasi. Sedira kopina utua lasi tauna be Dirava ese ia boiria. Vadaeni ia be kopina utua kara do ia tahua lasi. ¹⁹Badina be kopina utua, o utua lasi, ruaosi be anina lasi, to Dirava ena taravatu badinaia sibona be mai anina. ²⁰Dirava ia boiridia neganai idia noho hegeregerena, unai bamona do idia noho be namo.

²¹Dirava ese oi ia boiria neganai oi be hesiai tauna mai guia danu, a? Oi lalao lasi. To bema oi idia ruhaia dalana oi davarua neganai, do oi abia dae. Unai be namo. ²²Badina be hesiai tauna bema Lohiabada ese ia boiria neganai, ia be Lohiabada ena ura kwalimu tauna do ia lao. To ura kwalimu tauna bema Keriso ese ia boiria neganai ia be Keriso ena hesiai tauna. ²³Dirava ese umui ia hoia, mai davana, unai dainai taunimanima edia hesiai mai guia taudia umui lao lasi. ²⁴Lauegu varavara taudia e, umui ta ta Dirava ese umui ia boiria neganai umui noho hegeregerena, unai bamona do umui noho be namo.

Headava lasi taudia bona vabu dekenai sisiba hereva

²⁵Ma emui henanadai ta be headava lasi taudia totona, memero bona kekeni. Dirava ese taravatu ta lau dekenai ia henia lasi. To Dirava ese lau ia bogahisihisi henia dainai aonega idauna lau dekenai ia henia. Unai dainai lauegu lalao do lau gwaurai.

²⁶Lau lalao, hari inai nega be dika dainai, harihari umui noho bamona do umui noho, unai be namo. ²⁷Oi be mai oiemu hahine, a? Oi rakatania lasi. Oi headava lasi, a? Kekeni ta oi tahua lasi. ²⁸To bema oi headava, inai be kara dika lasi. Bona kekeni bema ia headava, inai danu be kara dika lasi. To lau lalao, headava taudia be inai tanobada ena metau bada do idia abia, bona lau ura lasi inai bamona metau umui dekenai idia vara.

²⁹Varavara taudia e, lauegu hereva ena anina be inai: Nega be kwadogi. Unai dainai inai nega kwadogina ia noho lalonai, tatau mai edia adavana be adavana lasi taudia bamona do idia noho be namo. ³⁰Bona taitai taudia be taitai lasi taudia bamona do idia noho be namo. Bona moale taudia be moale lasi taudia bamona do idia noho. Bona hoihoi taudia be kohu lasi taudia bamona do idia noho. ³¹Bona tanobada ena gau namodia idia abia noho taudia be do idia noho, inai gaudia be

anina lasi bamona. Badina be inai tanobada, hari ia noho toana bamona, be kahirakahira do ia ore.

³² Lau ura lasi laloea hekwarahi umui abia. Headava lasi tauna ese Lohiabada do ia hamoalea daladia ia laloea. ³³ To headava tauna ese tanobada gaudia ia laloea, badina be ia ura iena hahine do ia hamoalea.

³⁴ Unai dainai iena laloea be rua. Headava lasi hahine, bona tau ia diba lasi kekeni ese Lohiabada ena gaukara idia laloea, badina idia ura edia tauanina bona lauma be helaga. To headava hahine be tanobada gaudia ia laloea, badina be ia ura iena tau do ia hamoalea.

³⁵ Umui durua totona inai bamona lau hereva. Lau ura lasi umui emui dala do lau koua. Lau ura kara namo bona kara maoromaoro do umui karaia, bona Lohiabada ena gaukara do umui karaia momokani, mai laloea rua lasi.

³⁶ To bema tau ta ia laloea iena maoheni kekeni dekenai kara namo ia karaia noho lasi. Bema ia ura dikadika unai kekeni, bona dala ma ta ia noho lasi neganai, iena ura do ia karaia be namo, do idia headava. Inai be kara dika lasi. ³⁷ To bema tau ta ese iena lalona ia auka, bona ia laloea do ia headava lasi be namo, bona bema ia be mai ena goada iena ura do ia biagua, vadaeni ia ese unai kekeni ia adavaia lasi danu be namo. ³⁸ Unai dainai bema tau ta ese iena kekeni ia adavaia, ia be kara namo ia karaia vadaeni. To bema tau ta ese ia headava lasi, ia be kara namo herea ia karaia vadaeni.

³⁹ Hahine ese iena adavana do ia badinaia ela bona tau ena mauri dokona. To bema iena tau ia mase neganai unai hahine ese ia ura henia tauna do ia adavaia diba, taravatu lasi. To Keristani tauna sibona do ia adavaia diba. ⁴⁰ To lauegu laloea be inai: Bema ia vabu noho be iena lalona do ia namo. Bona lau laloea danu Dirava ena Lauma be egu lalona dekenai ia noho.

8

Kaivakuku dekenai henia aniani

¹ Kaivakuku dekenai vamu idia henia totona egu hereva be inai: Ita ibounai ita laloea be mai iseda diba. Diba ese hekokoroku ia havaraia noho, to lalokau ese goada ia havaraia noho. ² Tau ta bema ia laloea ia be mai ena aonega, ia be aonega korikori ia do diba lasi. ³ To tau ta ese bema Dirava ia lalokau henia, Dirava be ia diba momokani unai tau be iena.

⁴ Unai dainai kaivakuku dekenai vamu henia karana totona lauegu hereva be inai: Ita diba kaivakuku be anina lasi gauna. Ita diba Dirava be tamona sibona. ⁵ Momokani, sivarai idia gwauraia be dirava idauidau idia noho guba dekenai bona tanobada dekenai danu. Oibe, dirava bona lohiabada momo idia noho, idia gwau. ⁶ To ita be mai iseda Dirava tamona, ia be Tamana, gau ibounai ia dekena amo idia vara. Ia dainai ita mauri noho. Bona Lohiabada danu be tamona, Iesu Keriso. Ia ese gau ibounai ia karaia. Ia ese mauri ita dekenai ia henia noho.

⁷ To, taunimanima ibounai be inai bamona idia diba lasi. Haida be guna kaivakuku karadia dekenai idia manada. Unai dainai, ia mai bona harihari danu, unai aniani idia ania neganai idia laloea ia be kaivakuku ena, vadaeni idia ania. Idia edia laloea be manoka, unai dainai idia laloea unai aniani ese idia ia hamiroa vadaeni. ⁸ Mani umui laloea, unai aniani ita ania, o ita ania lasi, be Dirava ese ia laloea lasi. Ita ania lasi, be ita dika lasi. Ita ania, be namo ta do ita davaria lasi.

⁹ To umui naria namonamo, inai umui karaia diba gauna ese abidadama manoka taudia do ia hakererea garina. Kara dika lalonai do

idia moru garina, emui kara do umui naria. ¹⁰ Oi be diba bada tauna. Sedira kaivakuku ena dubu lalonai oi aniani neganai, tau manokana ta ese oi do ia itaia. Bona inai bamona do ia lalao, ani? “Lau danu kaivakuku dekenai idia henia aniani do lau ania.” Vadaeni do ia ania neganai, iena abidadama ia hakererea. ¹¹ Vadaeni oi kamoni. Inai lalona ia manoka tauna be oiemu varavara tauna ta, bona ia dainai Keriso ia mase vadaeni. To oiemu diba bada dainai unai tau madi do ia mase. ¹² Unai dainai, oiemu Keristani varavara tauna dekenai oi kara dika, bona iena lalona manoka oi habadaia neganai, oi be Keriso danu oi hadikaia. ¹³ Momokani lau gwau, bema aniani ese lauegu varavara ia hakaua kara dika lalonai, lau be vamu do lau ania lasi ela bona hanaihanai, lauegu varavara tauna do lau hadikaia garina.

9

Aposetolo taudia edia gaukara davana

¹ Lau be ura kwalimu tauna, ani? Lau be aposetolo tauna, ani? Iseda Lohiabada Iesu lau ese lau itaia vadaeni, ani? Bona umui be lauegu gaukara Lohiabada totona ena anina, ani? ² Idau taudia dekenai sedira lau be aposetolo tauna lasi, to umui dekenai lau be aposetolo tauna momokani. Badina be lauegu aposetolo daga be umui emui mauri ese idia hamomokania vadaeni, Lohiabada ena lalona dekenai umui noho dainai.

³ Haida ese lau idia gwaurai kerere neganai, lau be inai bamona lau haere henia: ⁴ Ai be mai emai maoro lasi do ai aniani bona inuina, a? ⁵ Ai be mai emai maoro lasi Keristani hahine do ai adavaia, bona aiemai laolao dekenai do ai hakaudia loalao, a? Badina be aposetolo haida, Lohiabada ena tadina taudia bona Petero ese inai bamona idia karaia vadaeni, ani? ⁶ Bona lau bona Banaba ese aiemai imana gaukara dekena amo aiemai aniani davana ai henia noho, to aposetolo haida be aniani umui henidia kava, ani? ⁷ Edena tuari tauna ese sibona ena gaukara davana ia karaia, a? Edena hadohado tauna ese sibona ia hadoa vain dekena amo vain anina do ia ania lasi, a? Daika ese mamoe do ia naria, vadaeni edia rata do ia inua lasi, a?

⁸ Lau be taunimanima edia lalao sibona lau gwaurai, a? Lasi, lauegu hereva be Dirava ena Taravatu ese ia hamomokania. ⁹ Mose ena Taravatu lalonai inai bamona ia torea, ia gwau, “Uiti ia moia noho boromakau ena uduna umui koua lasi.” Umui lalao Dirava be boromakau sibona edia namo ia lalao, a? ¹⁰ Ia ese ita danu ia lalao lasi, a? Lau diba momokani unai hereva be ita totona ia torea. Badina be Dirava ese kara inai bamona ia ura henia: Tano ia geia tauna bona aniani ia mage neganai ia utua tauna, idia ruaosi ese edia gaukara davana idia abia be namo.

¹¹ Ai ese lauma gaudia ai hadoa vadaeni umui emui huanai. Unai dainai, bema aiemai tauanina durua gauna umui henia neganai, inai be gau metauna, a? ¹² Bema haida ese inai gaudia umui dekena amo idia abia neganai, ai be do ai abia badabada be maoro herea. Momokani ai be mai emai maoro inai bamona gaudia umui dekena amo ai abia. To ai abia lasi. Lasi momokani. Badina ai ura metau ibounai lalonai ai haheauka, Keriso ena Sivarai Namona ena dala do ai koua garina. ¹³ Umui diba lasi, a, Dubu Helaga lalonai helaga gaukara idia karaia taudia ese Dubu Helaga dekena amo edia aniani idia abia? Bona boubou patana idia naria taudia ese boubou patana dekena amo aniani idia

ania. ¹⁴ Unai bamona danu, Lohiabada ese taravatu ia atoa vadaeni, Sivarai Namona idia harorolaia taudia ese edia haroro gaukara dainai edia davana idia abia be maoro.

¹⁵ To lau be inai bamona gaukara davana umui dekeno amo lau abia lasi. Bona inai hereva harihari lau torea be inai gaukara davana tahua totona lasi, lasi momokani. Lauegu gaukara davana be do lau tahua lasi ela bona lau mase. Lauegu imana gaukara dekeno amo aniani do lau abia noho, vadaeni umui emui vairanai lau heagi noho diba.

¹⁶ To gau tamona, Sivarai Namona lau harorolaia dainai lau heagi diba lasi. Badina unai bamona do lau karaia be Dirava ese ia oda vadaeni. Bema Sivarai Namona lau harorolaia lasi neganai, madi, lau be dika momokani! ¹⁷ Bema lauegu ura sibona dainai inai gaukara lau karaia neganai, davana lau abia be namo. To inai be Dirava ena oda dainai lau karaia. ¹⁸ Unai dainai lauegu gaukara davana be dahaka? Lauegu gaukara davana be inai: Moale bada lau davaria badina Sivarai Namona lau harorolaia davana lasi, bona lauegu davana maorona lau tahua lasi.

Paulo be taunimanima ibounai edia hesiai mai guia danu tauna

¹⁹ Lau be ura kwalimu tauna, lau be hesiai mai guia danu tauna lasi. To taunimanima ibounai edia hesiai mai guia danu tauna lau lao noho, momo herea do lau veria mauri totona. ²⁰ Iuda taudia danu lau noho neganai, Iuda edia kara bamona lau karaia, Iuda taudia do lau veria mauri totona. Mose ena Taravatu henunai lau noho lasi, to Taravatu henunai idia noho taudia danu lau noho neganai, lau danu Taravatu henunai tauna lau lao, unai taudia do lau veria mauri totona. ²¹ Unai bamona danu, Dirava ena Taravatu lau utua lasi, badina be Keriso ena Taravatu lau badinaia noho. To Iuda lasi taudia danu lau noho neganai, lau be Taravatu laloa lasi tauna bamona lau lao, unai Iuda lasi taudia do lau veria mauri totona. ²² Abidadama manoka taudia danu lau noho neganai, lau be abidadama manoka tauna bamona lau lao, inai abidadama manoka taudia do lau veria mauri totona. Lau ese taunimanima idauidau ibounai edia mauri dalana lau abia dae, dala idauidau ibounai dekeno amo, haida do lau veria mauri totona.

²³ Iesu ena Sivarai Namona dainai, inai kara ibounai lau karaia noho. Bona lau diba, bema inai gaukara lau karaia noho, lau danu ese Sivarai Namona ena mauri hanamoa gaudia do lau abia.

Kwalimu ahuna abia totona ita heau goada

²⁴ Umui diba, ani, heau helulu dekenai idia heau taudia ibounai idia heau noho, to tau tamona sibona ese kwalimu ahuna ia abia. Unai bamona do umui heau goadagoada, kwalimu ahuna do umui abia totona. ²⁵ Gadara helulu do idia uini totona, heau helulu taudia ese edia tauanina ena ura idia atoa diho, idia tereini goadagoada. Inai bamona idia karaia be, do ia dika haraga kwalimu ahuna abia totona. To ita ese unai bamona do ita karaia be, noho hanaihanai kwalimu ahuna do ita abia totona. ²⁶ Lau heau maoromaoro, mai laloa tamona danu, lauegu heau dokona dekenai do lau ginidae totona. Lau be boksini tauna bamona lau paisi goadagoada, do lau uini totona. Hodahoda lau paisia lasi. ²⁷ To lauegu tauanina lau botaia momokani, bona iena ura lau karaia lasi, do ia goada totona. Inai bamona lau karaia, badina be haida do lau haroro henidia, to gabeai lau sibona egu mauri do lau halusia garina.

10

Dibagani neganai do ita gini goada

¹ Lauegu varavara taudia e, iseda sene taudia dekenai dahaka kara idia vara mani umui laloo. Idia be Mose ena murinai idia raka noho neganai ori ta henunai idia noho. Bona idia ibounai Davara Kakakaka aena dekenai idia raka hanaia, mai mauri danu. ² Idia ibounai Mose ena bapatiso idia abia, ori bona davara lalonai. ³ Idia ibounai ese lauma ena aniani tamona idia ania. ⁴ Bona idia ibounai be lauma ena ranu tamona idia inua. Badina be Keriso ese ia henidia ranu idia inua. Ia be idia danu ia loloo noho lauma Nadina bamona, edia lauma durua totona. Oibe, unai Nadi be Keriso. ⁵ To idia momo edia kara be Dirava ese ia ura henia lasi, vadaeni taunimanima idia noho lasi tano dekenai idia mase ore.

⁶ Unai kara ia vara be ita dekenai toa ta bamona, gau dikadia do ita ura henia lasi, idia ese idia ura henia bamona. ⁷ Kaivakuku danu do umui tomadiho henia lasi, idia haida idia karaia bamona. Buka Helaga lalonai ia torea bamona, ia gwau, "Taunimanima idia helai diho, idia aniani, muramura kekero idia inua, vadaeni idia toreisi, idia gadara kava, bona sihari kava." ⁸ Sihari kava bona heudahanai karadia do ita karaia lasi, idia haida idia karaia bamona. Unai dina tamona lalonai ibounai 23,000 idia mase ore. ⁹ Lohiabada ena siahu do ita tohoa lasi, idia haida ese idia karaia bamona. Vadaeni gaigai ese unai taudia idia koria mase. ¹⁰ Bona Dirava dekenai do ita maumau lasi, idia haida idia karaia bamona. Vadaeni Alaia Aneruna ese idia ia alaia mase.

¹¹ Oibe, iseda sene taudia dekenai unai bamona kara idia vara, be ita dekenai toa bamona, do ita itaia mai gari danu. Edia sivarai danu Buka Helaga lalonai idia torea vadaeni, idia ese ita do idia sisiba henia totona. Badina be tanobada ena dokona be kahirakahira negana ita noho inai.

¹² Unai dainai, tau ta bema ia laloo ia gini goada, namona be ia naria namonamo, do ia moru garina. ¹³ Umui dekenai idia pidia dibagani ibounai ese taunimanima ibounai dekenai danu idia pidia noho. To Dirava be ia momokani. Ia ese umui do ia naria, emui goada ia hanaia dibagani ese umui do ia pidia garina. Bona dibagani ia mai neganai, emui dala ta do ia kehoa. Vadaeni inai dala dekena amo unai dibagani dekena amo do umui kwalimu diba.

Dirava bona lauma dikadia nega tamona umui badinaia diba lasi

¹⁴ Unai dainai, lauegu turana lalokau e, kaivakuku dekenai umui tomadiho henia lasi, umui rakatania. ¹⁵ Umui be diba taudia. Unai dainai lauegu hereva umui laloo namonamo. ¹⁶ Anibou Helaga ita ania neganai, kapusi dekena amo Dirava ita hanamoa. Bona unai kapusi dekena amo ita inua neganai, Keriso ena rarana ita inua hebou, ani? Bona paraoa ita makohia neganai, Keriso ena tauanina ita ania hebou, ani? ¹⁷ Ita be momo herea, to paraoa be tamona sibona. Unai dainai ita be tauanina tamona, badina be paraoa tamona ita ania.

¹⁸ Israela taudia edia kara mani umui laloo. Boubou yamuna idia ania taudia be Dirava danu pata helagana ena gaukara idia karaia hebou, ani? ¹⁹ Lauegu hereva ena anina be dahaka? Kaivakuku dekenai henia boubou gauna be mai anina, a? Kaivakuku danu be gau momokani, a? ²⁰ Lasi! To lauegu hereva ena anina be inai: Iuda lasi taudia edia boubou gaudia be lauma dikadia dekenai idia henia, Dirava dekenai idia henia lasi. Lau ura lasi lauma dikadia danu umui gaukara hebou. ²¹ Lohiabada ena kapusi bona lauma dikadia edia kapusi ruaosi nega tamona umui

inua diba lasi. Lohiabada ena pata dekenai noho aniani, bona lauma dikadia edia pata dekenai noho aniani ruaosi be nega tamona umui ania diba lasi. ²² Edena bamona? Umui ura Dirava umui habadua, a? Be, iseda goada ese Dirava ena goada ia hereaia diba, a?

Nega ibounai Dirava ita hanamoa be namo

²³ Momokani, gau ibounai be taravatu lasi ita dekenai, to namo lasi ita laloe gau ibounai be namo ita dekenai. Gau ibounai be taravatu lasi ita dekenai, to namo lasi ita laloe gau ibounai ese ita do idia hagoadaia. ²⁴ Tau tamona sibona ena namo do ia tahua lasi, to namona be tau haida edia namo do ia tahua.

²⁵ Hoihoi gabuna dekenai idia hoia vamu ibounai umui ania diba. Hoihoi tauna do umui nanadaia lasi, do umui laloe hekwarahi garina. ²⁶ Badina be Buka Helaga ia torea bamona, ia gwau: “Tanobada bona tanobada lalonai idia noho gaudia ibounai be Dirava ena.”

²⁷ Bema Iesu dekenai ia abidadama lasi tauna ese aniani totona umui ia boiria, bona umui ura lao neganai, ia namo, umui lao. Aniani ia henia gaudia ibounai be do umui ania, umui nanadailaia lasi, bona umui laloe momo lasi. ²⁸ To bema tau ta ese umui ia hamaoroa, ia gwau, “Inai be boubou vamuna,” vadaeni unai vamu do umui ania lasi, unai ia hereva tauna ena lalona do umui hadikaia garina. ²⁹ Lau be umui emui lalona totona lau herevalaia lasi, to unai tau ena lalona totona lau hereva, unai vamu do umui ania lasi.

Sedira umui ta ese lau ia henanadaia, ia gwau, “Dahaka dainai lauegu ura lau karaia diba lasi, tau ta do lau hadikaia garina. ³⁰ Bema Dirava lau tanikiu henia, vadaeni lau aniani neganai, dahaka dainai mai tanikiu danu lau ania gauna totona tau ta ese lau do ia gwauraia kerere?”

³¹ Egu haere be inai: Umui aniani o umui inuini, o dahaka dahaka umui karaia neganai, inai gau ibounai do umui karaia Dirava hanamoa totona. ³² Umui ibounai do umui noho namonamo, vadaeni Iuda taudia, Iuda lasi taudia, bona Dirava ena ekalesia taudia ese emui kara namo do idia itaia, be do umui hakaudia kerere lasi. ³³ Lauegu kara bamona do umui karaia. Lauegu kara ibounai be, taunimanima ibounai ese lau do idia ura henia totona lau karaia. Lauegu namo lau tahua lasi, to ibounai edia namo lau tahua noho, mauri do idia davaria totona.

11

¹ Unai dainai, lau karaia bamona do umui karaia, Keriso ena kara lau karaia bamona.

Guriguri hebou neganai Dirava dekenai matauraia kara

² Umui lau hanamoa, badina be nega ibounai lau umui laloe, bona umui lau henia hadibaia hereva umui badinaia noho. ³ To lau ura umui diba, tatau ibounai edia kwarana be Keriso, hahine edia kwarana be edia tau, bona Keriso ena kwarana be Dirava. ⁴ Unai dainai tau ta bema mai kwarana gauna danu Dirava ia guriguri henia, o Dirava ena hereva ia harorolaia neganai, ia be iena kwarana, Keriso ia hahemaraia. ⁵ Bona hahine ta bema mai kwara gauna lasi ese Dirava ia guriguri henia, o Dirava ena hereva ia harorolaia neganai, ia be iena kwarana, iena adavana ia hahemaraia. Ia be iena huina idia utua kebere hahine hegeregerena. ⁶ Bema hahine ese kwara gauna ia karaia lasi neganai, iena huina do idia utua kwadogi. To bema idia utua kwadogi o utua kebere be mai hemaraina, vadaeni guriguri gabuna lalonai kwara gauna

do ia karaia. ⁷ To tau ese iena kwarana do ia koua lasi, badina ia be Dirava ena laulauna, bona Dirava ena hairaina bamona. To hahine be tau ena hairaina.

⁸ Badina be, Dirava ese tau ia karaia lasi hahine dekena amo. Lasi, to hahine be Dirava ese tau dekena amo ia karaia. ⁹ Bona Dirava ese tau ia karaia lasi hahine durua totona. Lasi, to ia ese hahine ia karaia tau durua totona. ¹⁰ Unai dainai hahine ese iena kwarana do ia koua. Inai anina be hahine be tau henunai ia noho, bona inai be toa ta, aneru do idia itaia totona. ¹¹ To ita be Lohiabada lalonai ita noho dainai, ita diba hahine be sibona lasi, to tau danu. Bona tau be sibona lasi, to hahine danu. ¹² Badina be Dirava ese tau ena tauanina dekena amo hahine ia karaia, inai bamona danu hari ia ese hahine ena tauanina dekena amo tau ia havaraia. To Dirava ese gau ibounai ia havaraia.

¹³ Umui sibona umui laloe, bema hahine ese iena kwarana mai koua gauna lasi Dirava do ia guriguri henia taunimanima edia vairanai, unai kara be ia maoro o lasi? ¹⁴ Taunimanima edia kara ese ita ia hadibaia be, tau ena huina ia lata be hemarai gauna, ani? ¹⁵ To hahine ena huina ia lata be hairai gauna, ani? Badina be Dirava ese huina lata ia henia, iena kwarana do ia koua totona. ¹⁶ Bema tau ta ese inai hereva totona ia ura hepapahuahu neganai, lauegu haere be inai: Ai be inai kara sibona ai karaia, Dirava ena ekalesia ore ibounai ese danu idau kara idia karaia lasi.

Lohiabada ena Anibou

¹⁷ Lau ura taravatu haida ma umui dekenai do lau henia, to guna emui kara do lau herevalaia sisina. Umui emui kara tamona totona umui lau hanamoa lasi, badina be emui guriguri hebou dekena amo namo ta ia vara lasi, to dika sibona ia vara. ¹⁸ Hereva ginigunana be inai: Sivarai lau kamona vadaeni, umui emui ekalesia hebou lalonai hepapahuahu ia vara noho, hebou danu ia parara. Unai sivarai danu be lau hamomokania sisina. ¹⁹ Oibe, ekalesia hebou ia parara karena be momokani umui dekenai do idia vara. Badina be inai dala dekena amo, maoromaoro taudia do idia hedinaraia namonamo.

²⁰ Hebou umui abia neganai, Lohiabada ena Anibou umui ania momokani lasi. ²¹ Badina be umui aniani neganai, ta ta sibona ena, ta ta sibona ena, umui ania. Unai dainai haida idia hitolo, bona haida idia kekeru. ²² Edena bamona? Umui be ruma lasi, a? Unusenai umui aniani bona inuinu be namo. Dirava ena ekalesia umui ura hadikaia, bona ogogami taudia umui ura hehemaraia, a? Edena bamona umui do lau hereva henia, a? Umui do lau hanamoa, a? Lasi momokani.

Lohiabada Iesu ese Anibou ia henia

²³ Badina be Lohiabada dekena amo lau abia hadibaia hereva, bona umui dekenai lau hamaoroa dalana be inai: Hanuaboi, ia idia samania neganai, Lohiabada Iesu ese paraoa ia abia. ²⁴ Dirava ia tanikiu henia, vadaeni paraoa ia makohia, ia gwau, “Lauegu tauanina be inai, umui dainai do ia makohia. Inai bamona do umui karaia, lau do umui laloe totona.” ²⁵ Unai bamona danu, idia aniani ore murinai, ia ese kapusi ia abia, vadaeni ia gwau, “Inai kapusi be Dirava ena maino karaia dala matamatana, lauegu rarana dekena amo. Umui inua negadia ibounai, inai bamona do umui karaia, lau do umui laloe totona.”

²⁶ Inai anina be, inai paraoa umui ania, bona inai kapusi umui inua negadia ibounai, umui ese Lohiabada ena mase umui gwauria hedinarai, ela bona do ia giroa mai.

Lohiabada ena Anibou do umui ania kava lasi

²⁷Unai dainai tau ta ese bema inai paraoa do ia ania, bona inai kapusi do ia inua mai ena kerere danu, ia ese Lohiabada ena tauanina bona iena rarana do ia hadikaia. ²⁸To namona be tau ta ena lalona do ia tahua namonamo guna, vadaeni paraoa do ia ania bona kapusi do ia inua. ²⁹Badina be, bema ia ania kava bona inua kava, bona ia laloa lasi unai be Lohiabada ena tauanina, unai tau be ia kerere. Ia ese ia ania bona ia inua neganai, sibona ena kerere ia havaraia. ³⁰Unai bamona kara dainai, emui huana dekenai umui momo idia manokamanoka bona idia gorere, haida danu idia mase vadaeni. ³¹Bema ita sibona ese iseda lalona ita tahua guna, Dirava ena panisi ita dekenai do ia kamokau lasi. ³²To Dirava ese ita ia panisia neganai, ita hadikaia totona lasi, to ita hamaoromaoroa totona ia karaia. Inai bamona ia karaia, ita bona tanobada taudia do ita dika hebou garina.

³³Unai dainai, egu varavara taudia e, bema Anibou totona umui hebou neganai, umui ta ta dekenai umui naria. ³⁴Bema umui ta ia hitolo, namona be iena ruma dekenai ia aniani, umui hebou neganai Dirava ena panisi umui dekenai ia ginidae garina. Lauegu hereva haida be do idia noho, ela bona umui dekenai do lau mai. Unai neganai umui do lau hadibaia namonamo.

12

Lauma Helaga ena harihari gaudia

¹Lauegu varavara taudia e, lau ura be Lauma Helaga ena harihari gaudia umui diba. ²Umui diba, Dirava umui diba lasi neganai, haida ese kaivakuku, hereva diba lasi gaudia dekenai umui idia hakaua kerere lao. Umui ese idia murinai umui raka sibona. ³Lau ura umui diba Dirava ena Lauma ese ia hakaua tauna be inai bamona ia hereva diba lasi, “Iesu do ia dika momokani.” Bona tau ta be inai bamona ia hereva diba lasi, “Iesu be Lohiabada,” to Lauma Helaga ese ia hakaua noho tauna sibona mo.

⁴Lauma ena harihari gaudia be idauidau, to Lauma Helaga tamona sibona ese idia ia henia. ⁵Hesiai daladia be idauidau, to iena hesiai ita karaia noho Lohiabada be tamona. ⁶Gaukara danu be idauidau, to Dirava be tamona, ia ese taunimanima ibounai ta ta dekenai goada idauidau ia henia. ⁷Lauma Helaga ese taunimanima ta ta ibounai dekenai iena goada ta ia henia, bona ia hedinaraia, iena orea taudia ibounai durua totona. ⁸Badina be Lauma Helaga tamona ese, tau ta dekenai hereva mai aonega ena diba ia henia. Bona unai Lauma Helaga tamona ese, ma tau ta dekenai hereva mai diba bada ena goada ia henia. ⁹Ma unai Lauma Helaga tamona ese tau ta dekenai abidadama ia henia, ma ta be gorere hanamoa siahuna ia henia. ¹⁰Lauma Helaga danu ese tau ta dekenai hoa kara karaia siahuna ia henia, ma ta dekenai Dirava ena hereva gwauraia siahuna ia henia. Ma ta dekenai lauma momokani o lauma momokani lasi tohoa siahuna ia henia. Ma ta dekenai idau momokani gadodia hereva diba ia henia, bona ma ta unai gado anina hedinaraia siahuna ia henia. ¹¹Unai kara bona diba ibounai be Lauma Helaga tamona ese taunimanima edia lalona dekenai ia havaraia. Ia ese, iena ura hegeregerena, harihari gaudia taunimanima ta ta dekenai ia henia.

Ita be tauanina tamona ena kahana momo

¹²Keriso be tauanina tamona bamona, mai ena kahana momo. Inai tauanina ena kahana be momo, to ibounai be tauanina tamona sibona.

¹³ Oibe, ita ibounai Lauma tamona lalonai ita idia bapatisoa, vadaeni tauanina tamona ita lao vadaeni. Ita be Iuda taudia, Iuda lasi taudia, idia guia taudia, bona ura kwalimu taudia. To Dirava ese ita ibounai dekenai Lauma tamona ia henia vadaeni, ia dekena amo ita inua totona.

¹⁴ Badina be tauanina be kahana tamona lasi, to kahana momo. ¹⁵ Bema aena ia gwau, “Lau be imana lasi dainai lau be tauanina ena lasi.” Unai dainai ia be tauanina ena lasi, a? ¹⁶ Bona taiana bema ia gwau, “Lau be matana lasi dainai lau be tauanina ena lasi.” Unai dainai ia be tauanina ena lasi, a? ¹⁷ Tauanina ibounai bema ia be matana sibona edena bamona do ia kamona diba? Tauanina ibounai bema ia be taiana sibona edena bamona bonana do ia kamona diba? ¹⁸ To Dirava ese kahana ta ta tauanina lalonai ia atoa vadaeni, iena ura hegeregere. ¹⁹ Bema tauanina ena kahana ibounai be kahana tamona sibona neganai, tauanina be edena bamona do ia noho? ²⁰ To inai bamona be lasi. Kahana be idauidau momo, to tauanina be tamona sibona.

²¹ Unai dainai, matana ese imana do ia hereva henia lasi, do ia gwau lasi, “Oi be lau oi durua diba lasi.” Kwarana ese danu aena do ia hereva henia lasi, do ia gwau lasi, “Oi be lau oi durua diba lasi.” ²² Lasi, ita laloe idia goada lasi kahadia be mai edia gaukara bada herea. ²³ Bona tauanina kahadia haida ita laloe be namo bada lasi, to idia ita naria namonamo, haida bamona lasi. Bona kahadia haida edia toadia be namo lasi, to idia ita hanamoa bada herea. ²⁴ To iseda tauanina ena kahana haida be mai edia hairaina, bona idia ita hanamoa lasi. Dirava ese kahana ibounai ia haboua vadaeni, tauanina tamona idia lao, bona ia ese namo lasi kahadia dekenai matauraia bada ia henia vadaeni. ²⁵ Inai bamona ia karaia, tauanina be do ia parara lasi totona, bona kahana ibounai ese ta ta ibounai do idia naria totona. ²⁶ Vadaeni, kahana ta do ia hisihisi neganai, kahana ibounai ese unai hisihisi ena mamina do idia abia. O bema kahana ta do idia hanamoa neganai, kahana ibounai ia danu do idia moale nega tamona.

²⁷ Umui ibounai be Keriso ena tauanina, umui ta ta be iena kahana ta. ²⁸ Iena ekalesia lalonai Dirava ese ibounai dekenai edia gabu ta ta ia henia vadaeni, inai bamona: Ginigunana be aposetolo taudia, iharuana be peroveta taudia, ihatoina be hereva hadibaia taudia. Idia murinai be hoa kara karaia taudia. Ma idia murinai be gorere idia hanamoa diba taudia, bona durua taudia, taunimanima hakaua taudia, bona idau momokani gadodia idia hereva diba taudia. ²⁹ Ibounai be aposetolo taudia, a? Ibounai be peroveta taudia, a? Ibounai be hereva hadibaia taudia, a? Ibounai be hoa kara idia karaia taudia, a? ³⁰ Ibounai be gorere idia hanamoa diba, a? Ibounai be idau momokani gadodia idia hereva diba, a? Ibounai be gado edia anina idia hedinarai diba, a? ³¹ Namona be umui ese harihari gaudia herea momokani do umui ura henia bada. To dala namo herea momokani be harihari umui dekenai do lau hedinarai.

13

Harihari gauna namona momokani be lalokau

¹ Bema taunimanima edia gado idauidau lau hereva diba, aneru edia gado danu, to egu lalokau be lasi neganai, egu hereva be auri idia botai, o gaba idia toua kava bamona. ² Bema peroveta siahuna lau abia, bona Dirava ena hunia gaudia lau diba, aonega ibounai danu, bona bema

egu abidadama dekena amo ororo lau kokia diba, to egu lalokau be lasi neganai, lau be anina lasi gauna bamona. ³ Bema egu kohu ibounai ogogami taudia dekenai lau henia, bona bema egu tauanina lau henia, do idia gabua ore totona, to egu lalokau be lasi neganai, lau be namo lasi.

⁴ Lalokau be ia dekenai ia kara dika tauna davana ia laloa lasi. Lalokau be mai ena bogahisihisi, haida durua totona. Lalokau be kohu momo tauna ia mama henia lasi. Lalokau be ia heagi lasi, bona ia hekokoroku lasi. ⁵ Lalokau be haida hadikaia ia ura lasi. Lalokau be sibona ena gau ia tahua lasi, ia badu haraga lasi. Haida ese idia kara dika henia, to lalokau ese edia dika ia laloatao noho lasi. ⁶ Lalokau be taunimanima edia kara gagevageva ia moalelaia lasi. To Dirava ena kara bona iena hereva momokani ia moalelaia. ⁷ Lalokau be taunimanima durua kara dekenai ia hesiku lasi. Nega ibounai iena abidadama ia goada noho. Nega ibounai Dirava ena nega namona ia naria noho mai moale danu. Bona metau ibounai lalonai ia gini goada noho.

⁸ Lalokau be do ia noho hanaihanai doko lasi. Peroveta hereva be do idia ore. Iduu momokani gadodia danu do idia doko. Aonega danu be do ia boio. ⁹ Badina be unai peroveta bona aonega dalana be kahana sibona ita diba. ¹⁰ To gabeai diba goeva momokani ia mai neganai, unai kahana sibona ita diba gaudia be do idia ore.

¹¹ Lau mero neganai mero bamona lau hereva, mero bamona lau laloa, bona mero bamona hereva ena anina lau tahua. To hari lau be tau dainai mero ena kara lau rakatania vadaeni. ¹² Harihari ita be Dirava ena gaudia kahana sibona ita diba, bona ita itaia goeva lasi, hevarivari gunana lalonai gau ita itaia goeva lasi bamona. To nega gabeai ita ese Dirava ena vairana do ita itaia momokani. Unai neganai gau ibounai do ita diba momokani, Dirava ese hari ita ia diba momokani bamona.

¹³ Vadaeni, inai gau toi idia noho haniaa: bddm, bn iaaeang aoanranh aa oa aoa. onm ee ooaiguab aoa. ***** _%???)

14

Lauma Helaga ena harihari gauna namo herea

¹ Ia namo bada herea dainai, lalokau ena dala umui tahua goadagoada be namo. Mai emui goada danu Lauma ena harihari gaudia haida danu do umui tahua. To harihari gauna namona momokani be Dirava ena hereva gwauraiia hedinarai ena siahuna. Inai do umui abia be namo. ² Badina be idau momokani gado ta ia hereva tauna be taunimanima dekenai ia hereva lasi, to Dirava sibona dekenai ia hereva, badina be tau ta ese unai tau ena hereva anina ia diba lasi. Unai tau be Lauma ena sياهو dekena amo hunia hereva ia gwauraiia. ³ To Dirava ena hereva ia gwauraiia tauna ese taunimanima edia abidadama ia durua noho. Ia ese taunimanima kara namodia idia karaia totona, idia ia hagoadaia noho, bona edia lalona ia hanamo noho. ⁴ Iduu momokani gado ta ia hereva tauna be ia sibona ena lalona ia hagoadaia. To Dirava ena hereva ia gwauraiia tauna ese ekalesia ena taudia ibounai edia lalona ia hagoadaia.

⁵ Lau ura be umui ibounai ese idau momokani gadodia umui hereva diba, to lau ura bada umui ese Dirava ena hereva umui gwauraiia, badina be idau momokani gadodia ia hereva tauna, bema iena hereva anina ia gwauraiia lasi neganai, ekalesia ena taudia edena bamona ia durua diba? Lasi, ani? Unai dainai Dirava ena hereva ia gwauraiia tauna ena

gaukara be herea. ⁶ Lauegu varavara taudia e, umui dekenai do lau mai neganai, bema idau momokani gadodia dekenai umui dekenai lau hereva henia, to anina lau gwauraia lasi, namo do umui davaria, a? Lasi, to bema Dirava ese lau dekenai ia hedinarai gauna lau hadibaia, o diba matamata lau henia, o peroveta hereva, o hadibaia hereva lau gwauraia neganai, namo do umui davaria.

Dirava ena hereva be emui gado korikori dekenai do umui gwauraia

⁷ Miusiki gadaralala gaudia, ivilikou bona gita hegeregere mani umui lalao. Bema edia regena be idau idau lasi neganai edena bamona tiuni do ita diba? ⁸ Inai danu, tuari kibi bema idia hiriria namonamo lasi neganai, daika ese tuari totona do ia hegaegae? ⁹ Unai bamona danu, bema umui emui hereva anina be idia hedinarai lasi, daika ese hereva ena mamina do ia abia? ¹⁰ Gado idau idau momo tanobada lalonai idia noho, to ta ta ibounai be mai edia anina. ¹¹ Unai dainai, bema gado ta ena anina lau diba lasi neganai, unai gado ia hereva tauna ena vairanai lau be idau tauna bamona. Ia danu lauegu vairanai be idau tauna bamona. ¹² Unai dainai, lauma ena harihari gaudia umui ura henia bada be namo, to ekalesia ena taudia do idia hagoadaia harihari gaudia do umui tahua goadagoada, be gau badana.

¹³ Lauegu hadibaia hereva be inai: Idau momokani gadodia ia hereva tauna ese Dirava do ia noia, hereva anina hedinarai ena diba do ia henia. ¹⁴ Mani umui lalao. Bema idau momokani gado ta dekenai lau guriguri neganai, lauegu lauma sibona ia guriguri, to lauegu lalona ia noho kava. ¹⁵ Vadaeni edena bamona do lau karaia? Lau be egu lauma dekena amo, bona egu lalona dekena amo danu, ruaosi nega tamona do lau guriguri. Ane danu lau abia neganai, be egu lauma bona egu lalona dekenai danu nega tamona do lau abia. ¹⁶ Bema emui lauma sibona dekenai Dirava umui tanikiu henia neganai, hebou lalonai ia helai tauna be edena bamona “amen” do ia gwauraia diba? Badina be emui hereva ena anina ia diba lasi. ¹⁷ Momokani Dirava dekenai oi tanikiu gwauraia namo herea, to oiemu turana dekenai be durua ta oi henia lasi.

¹⁸ Dirava lau tanikiu henia, lau be idau momokani gadodia lau hereva momo, umui ibounai lau hereva vadaeni. ¹⁹ To ekalesia hebou lalonai bema hereva 5 sibona do lau gwauraia, mai edia anina, hebou taudia do lau hadibaia totona, unai be namo. To bema idau momokani gadodia dekenai hereva 10,000 lau gwauraia, unai be dika.

²⁰ Lauegu varavara taudia e, natuna maragi bamona do umui lalao lasi. Momokani, dika karaia totona natuna maragi bamona do umui lalao karaia. To inai lalao dobu gaudia totona, tau badadia bamona inai gaudia do umui lalao. ²¹ Buka Helaga lalonai inai bamona Dirava ia hereva, ia gwau:

“Idau momokani gadodia idia hereva taudia dekena amo, bona bese idau idau taudia edia uduna dekena amo, lauegu bese taudia do lau hereva henia, to lau do idia kamoni henia lasi.”

²² Unai dainai idau momokani gadodia hereva kara be toa ta, to ia ese Iesu idia abidadama henia taudia ia durua lasi. Lasi, to inai toa ese Iesu idia abidadama henia lasi taudia ia durua diba. Bona Dirava ena peroveta hereva gwauraia kara ese Iesu idia abidadama taudia ia durua noho, to Iesu idia abidadama henia lasi taudia ia durua lasi.

²³ To momokani, bema ekalesia Keristani taudia ibounai gabu ta idia hebou, bona idau momokani gadodia idia hereva noho neganai, murimuri taudia be dahaka idia lalao? Oibe, bema ekalesia dalana diba lasi, o Iesu abidadama henia lasi taudia be hebou dekenai idia raka vareai neganai, do idia gwau, “Umui be kavakava,” ani? ²⁴ To bema ibounai ese Dirava ena hereva idia gwaurai noho neganai, ekalesia dalana diba lasi, o Iesu abidadama henia lasi tauna ia raka vareai, be dahaka do ia lalao? Oibe, unai hereva ese iena kudouna do ia pidia, vadaeni do ia diba ia be mai ena kara dika danu, bona unai hereva ese do ia kota henia danu. ²⁵ Unai tau ese iena hunia lalao do ia gwaurai hedinarai, vadaeni Dirava ena vairanai do ia tomadiho, do ia gwau, “Momokani Dirava be umui emui huanai ia noho.”

Ekalesia ena gaukara karaia namonamo dalana

²⁶ Unai dainai, lauegu varavara taudia e, lauegu hereva anina be inai bamona: Umui emui guriguri hebou neganai, umui ta ta be mai emui gaukara. Ta be ane do ia abia, ta be hadibaia hereva do ia henia. Ta be Dirava ena hereva do ia gwaurai hedinarai. Ma ta be idau momokani gadodia do ia gwaurai, ta danu ese unai idau momokani gadodia edia anina do ia hedinarai. Gau badana be, unai gaukara ibounai be hebou taudia haginia bona durua totona. ²⁷ Bema haida be idau momokani gadodia idia ura gwaurai neganai, rua o toi sibona do idia karaia, toi hanaia lasi. Edia nega, edia nega dekenai do idia hereva, nega tamona lasi. Bona tau ta ese ta ta edia hereva ena anina do ia hedinarai. ²⁸ To bema idau momokani gadodia hereva anina hanaia tauna be lasi neganai, unai idau momokani gadodia hereva tauna be hebou lalonai do ia hereva lasi. Ia be iena lalona dekenai sibona do ia hereva, bona Dirava dekenai danu sibona do ia hereva henia, regena lasi. ²⁹ Dirava ena hereva gwaurai taudia rua o toi do idia hereva. Vadaeni hebou taudia oredia ese edia hereva do idia lalao karaia. ³⁰ To bema helai tauna ta dekenai Dirava ese hereva ta ia hedinarai henia neganai, ia hereva noho tauna ese iena hereva do ia hadokoa. ³¹ Umui ibounai ese Dirava ena hereva umui gwaurai diba, to ta ta ena nega, ena nega dekenai do ia hereva. Vadaeni hebou taudia ibounai ese aonega bona goada do idia davaria. ³² Dirava ena hereva ia gwaurai tauna ese iena hereva gauna do ia naria namonamo be gau badana. ³³ Badina be Dirava be ia ura lasi hereva kava bona heai, ia be maino Diravana.

³⁴ Ekalesia ena hebou lalonai hahine taudia ese hereva do idia gwaurai lasi. Ekalesia hebou ibounai lalonai Dirava ena taudia ese inai bamona idia karaia. Mose ena taravatu hegeregerena, hahine ese tau do idia biagua lasi. ³⁵ Bema gau ta idia ura diba neganai, edia ruma dekenai hahine ese edia adavana idia nanadaia be namo. Badina be hahine bema hebou lalonai ia hereva, inai be maoro lasi.

³⁶ Edena bamona? Dirava ena hereva be umui dekena amo ia mai, a? O umui sibona dekenai Dirava ena hereva ia ginidae, a? ³⁷ Bema tau ta ia lalao ia be Dirava dekena amo hereva gwaurai siahuna ia abia, o bema Lauma Helaga ese harihari gauna idauna ta ia henia neganai, namona be ia diba inai lau torea hereva be Lohiabada ena oda gauna. ³⁸ Bema tau ta ese inai hereva ia kamonai henia lasi neganai, ia be Dirava ena hereva gwaurai tauna momokani lasi.

³⁹ Unai dainai, lauegu varavara taudia e, Dirava ena hereva gwaurai diba umui tahua goadagoada, bona idau momokani gadodia hereva

kara umui taravatua lasi. ⁴⁰ Ekalesia ena gaukara ibounai umui karaia namonamo, mai dala maorona, karaia kava lasi.

15

Keriso ena toreisi lou

¹ Lauegu varavara taudia e, Sivarai Namona umui dekenai lau harolaia gauna, be umui abia dae vadaeni, bona ia lalonai umui emui abidadama ia gini goada noho. Lau ura inai Sivarai Namona umui laloe lou. ² Inai Sivarai Namona dekena amo Dirava ese umui ia hamauria, bema Sivarai Namona ena hereva umui badinaia noho neganai. To gau tamona, umui lau haroro henia Sivarai Namona do umui abidadama henia noho, umui abia dae kava garina.

³ Badina be lau davaria hereva badana umui dekenai lau hamaoroa guna: Keriso be ita dainai ia mase, Buka Helaga lalonai ia torea hegeregerena. ⁴ Idia gurua vadaeni danu, to dina toi murinai mase dekena amo ia toreisi lou, Buka Helaga lalonai ia torea hegeregerena. ⁵ Petero ese ia itaia, unai murinai aposetolo taudia 12 ese idia itaia. ⁶ Unai murinai, nega tamona dekenai, iseda Keristani varavara taudia 500 mai kahana ese Iesu idia itaia. Inai varavara taudia momo idia do mauri noho, to haida be idia mase vadaeni. ⁷ Unai murinai Iamesi ese Iesu ia itaia, bona aposetolo ibounai ese danu ma idia itaia lou.

⁸ Idia ibounai idia itaia murinai, lau danu ese Iesu lau itaia, to lau be mero ta ia vara dika bamona. ⁹ Badina be aposetolo ibounai ese lau idia hereaia, lau be namo lasi aposetolo tauna lau idia gwauraia. Badina be Dirava ena ekalesia oreana lau dagedage henia. ¹⁰ To Dirava ena hariharibada dainai, lau be harihari aposetolo dagi lau karaia noho. Bona lau dekenai ia henia hariharibada be ia henia kava lasi, badina be gaukara bada herea lau karaia vadaeni, aposetolo taudia ibounai lau hereaia vadaeni. To inai be lauegu goada dekenai lasi, Dirava ena hariharibada be lau danu ia noho, ia ese ia karaia. ¹¹ Unai dainai, bema lau haroro, o aposetolo taudia haida idia haroro, aiemai haroro hereva be tamona sibona. Bona inai hereva be umui ibounai ese umui abidadama henia vadaeni.

Iseda toreisi lou

¹² To, bema Keriso be mase dekena amo ia toreisi lou ai harorolaia noho, edena bamona umui haida umui gwau mase taudia do idia toreisi lou lasi? ¹³ Mase taudia bema idia toreisi lou lasi neganai, Keriso danu ia toreisi lou lasi. ¹⁴ Bona bema Dirava ese Keriso ia hatorea isi lou lasi, aiemai haroro be anina lasi, umui emui abidadama danu be anina lasi. ¹⁵ Ma inai danu, bema toreisi lou be lasi, ai aposetolo taudia be Dirava ena hereva ai gwauraia koikoi. Badina be ai be ai hereva badabada vadaeni Dirava ese Keriso ia hatorea isi lou. To, bema Dirava ese mase taudia ia hatorea isi lasi, vadaeni ia ese Keriso danu ia hatorea isi lasi. ¹⁶ Io, bema inai be momokani, Dirava ese mase taudia ia hatorea isi lasi neganai, vadaeni ita be inai bamona do ita hereva, “Keriso danu be Dirava ese ia hatorea isi lou lasi.” ¹⁷ Bema Dirava ese Keriso ia hatorea isi lasi neganai umui be umui abidadama kava, vadaeni umui be emui kara dika lalonai umui do noho. ¹⁸ Bona Keriso idia abidadama henia noho lalonai idia mase taudia danu be do idia boio. ¹⁹ Keriso ita abidadama henia noho, bona iena nega namo ita naria noho. To, bema inai tanobada mauri sibona lalonai Keriso ena namo ita naria noho neganai, madi ita be taunimanima ibounai edia huanai ogogami herea.

²⁰To hereva momokani be inai: Keriso be Dirava ese mase dekena amo ia hatorea isi. Unai ia karaia dainai, Keriso ese mase lalonai idia mahuta noho taudia edia toreisi lou ia hamomokania vadaeni. Toreisi lou taudia be ia ese idia ia gunalaia. ²¹Badina be tau tamona dekena amo mase ia vara, bona inai bamona danu, tau tamona dekena amo mase dekena amo toreisi lou ia vara. ²²Badina be taunimanima ibounai Adamu dainai idia mase vadaeni, unai bamona danu Keriso idia abidadama henia dainai ibounai do idia mauri. ²³To ta ta edia nega, edia nega dekenai mauri do idia abia. Keriso ia toreisi lou guna, unai murinai, ia giroa mai neganai, Keriso idia badinaia taudia ibounai danu do idia toreisi lou. ²⁴Unai murinai dokona do ia ginidae, vadaeni Keriso ese gunalaia taudia ibounai, lohia taudia ibounai, bona sياهو taudia ibounai do ia haorea. Unai neganai danu Keriso ese Dirava ena Basileia be Tamana Dirava ena imana dekenai do ia atoa. ²⁵Badina be Keriso ese gau ibounai do ia biagua, ela bona Dirava ese ia dekenai idia tuari taudia ibounai iena aena henunai do ia atodia. ²⁶Ia dekenai idia tuari taudia ibounai ia ese ia haorea murinai, Dirava ese mase danu do ia haorea. ²⁷Badina be Buka Helaga ia gwau: “Dirava ese gau ibounai iena aena henunai ia atoa.” Inai hereva ia gwau, Dirava ese gau ibounai Keriso henunai ia atoa. Unai dainai ita diba Dirava be Keriso henunai lasi. ²⁸To Dirava ese gau ibounai Keriso henunai ia atoa murinai, Natuna ese sibona Dirava ena henunai do ia atoa, Oibe, Dirava, gau ibounai Keriso henunai ia atoa Diravana, be unai neganai gau ibounai edia biaguna momokani do ia lao.

²⁹Umui haida umui gwau mase taudia idia toreisi lou lasi. Bema inai be momokani, badina dahaka haida ese bapatiso idia abia mase taudia totona? Sedira toreisi lou idia hamomokania dainai unai bamona idia karaia, ani? ³⁰Bona ai danu be edena bamona? Badina be dahaka nega ibounai mase kahirakahira ai noho? ³¹Lauegu varavara taudia e, dina ibounai lau idia alai mase gwaurai, to lau gari lasi. Inai bamona lau hereva ena badina be dahaka? Badina korikori be, umui bona lau be Keriso Iesu iseda Lohiabada lalonai ita mauri noho, bona umui lau heagilaia dainai. ³²Bema lau be uda boroma danu lau heatu Efeso dekenai inai tanobada mauri ena namo abia totona, dahaka namo lau davaria diba? Bema mase taudia Dirava ese ia hatorea isi lasi neganai, inai bamona ita hereva namo, “Laloa lasi, ita aniani bona ita inuinu, badina be kerukeru do ita mase.”

³³Umui laloa kerere lasi. Bema kara dika taudia danu umui turana karaia neganai, idia ese emui kara namona do idia hadikaia. ³⁴Umui emui laloa kavakava umui hadokoa, bona emui kara dika daladia umui rakatania. Umui kamona. Umui haida be Dirava umui diba lasi. Inai bamona lau hereva, do umui hemarai totona.

Toreisi lou neganai tauanina be idau

³⁵Sedira tau ta ia henanadai, ia gwau, “Mase taudia be edena bamona do idia toreisi? Edia tauanina be do edena bamona?” ³⁶Kava taudia e, uhe ta tano lalonai oi hadoa neganai, be do ia tubu lasi ela bona ia mase guna. ³⁷Oi hadoa gauna be gabeai ia vara anina, a? Lasi, oi hadoa gauna be uhe sibona, sedira uiti uhena o idau uhe ta. ³⁸To Dirava ese unai uhe dekenai anina ia henia, iena ura hegeregere, uhe ta ta edia anina korikori ia henia.

³⁹Tauanina danu ibounai be toana tamona lasi: Ta be taunimanima edia tauanina, ma ta be boroma edia tauanina, ma ta be manu edia tauanina, ma ta be gwarume edia tauanina.

⁴⁰ Guba taudia edia tauanina bona tanobada taudia edia tauanina danu idia noho. To guba taudia edia hairai be ta, tanobada taudia edia hairai be idau. ⁴¹ Dina ena hairai be ta, hua ena hairai be ma ta, hisiu edia hairai danu be idau. Bona hisiu ta ta edia hairai be idau.

⁴² Mase taudia edia toreisi lou danu be unai bamona. Tauanina ita gurua neganai ia be bodaga diba gauna, to ia toreisi lou neganai ia be bodaga diba lasi gauna. ⁴³ Tauanina ita gurua neganai ia be manoka bona iena toana be dika. To Dirava ese ia hatorea isi neganai, tauanina be ia goada bona mai hairaina danu. ⁴⁴ Tauanina ita gurua neganai ia be tanobada gauna. To Dirava ese ia hatorea isi neganai, ia be lauma anina gauna. Badina be taunimanima edia tauanina idia noho hegeregerena, unai bamona danu guba taudia edia lauma anina idia noho. ⁴⁵ Buka Helaga lalonai ia torea, ia gwau: "Tau ginigunana, Adamu, be Dirava ese ia karaia, taunimanima edia mauri ia abia." To Adamu dokona, gabeai ia mai Tauna be mauri hanaihanai ia henia Laumana. ⁴⁶ Lauma ena mauri be guna lasi, to tauanina ena mauri be guna. Bona lauma ena mauri be gabeai ia vara. ⁴⁷ Adamu ginigunana be tano kahuna dekena amo Dirava ese ia karaia, bona ia be tanobada dekena amo. To Adamu iharuana be guba dekena amo ia mai. ⁴⁸ Tanobada taudia be tanobada ena tano kahuna dekena amo ia mai tauna hegeregerena. Guba taudia be guba dekena amo ia mai tauna ena toana ita abia vadaeni. Unai bamona danu, guba dekena amo ia mai tauna ena toana do ita abia.

⁵⁰ To lauegu varavara taudia e, lauegu hereva ena anina be inai: Tauanina bona rara ese Dirava ena Basilea do idia abia diba lasi. Bona mase tauna danu ese mase diba lasi taudia edia mauri ia abia diba lasi.

⁵¹ Umui kamonai. Hunia hereva umui lau hamaoroa inai: Ita ibounai do ita mase lasi, to Dirava ese ita ibounai do ia senisia, do ita idau. ⁵² Inai be karaharaga momokani do ia vara, matana hakapua haraga ena nega bamona, dokona kibina do idia hiriria neganai. Oibe, kibi do idia hiriria, vadaeni mase taudia do idia toreisi lou, bona do idia mase lou diba lasi. Bona ita ibounai Dirava ese do ia senisia, do ita idau. ⁵³ Badina be do ia bodaga diba gauna ese bodaga diba lasi gauna bamona do ia halaoa. Bona do ia mase diba gauna ese mase diba lasi gauna do ia halaoa. ⁵⁴ Oibe, inai kara do ia vara: Mase diba gauna Dirava ese do ia senisia, mase diba lasi gauna do ia halaoa. Bona inai bamona ia vara neganai, Buka Helaga ena hereva ta be do ia momokani vadaeni, hereva ia gwau: "Dirava ese mase ia haorea, Dirava ena kwalimu be ia momokani vadaeni!"

⁵⁵ "Mase e, oiemu kwalimu be edeseni?"

Mase e, oiemu hisihisi ena siahu be edeseni?"

⁵⁶ Mase ese iena hisihisi siahuna be kara dika dekena amo ia abia, bona kara dika ena siahu be Taravatu dekena amo ia abia. ⁵⁷ To Dirava ita hanamo! Lohiabada Iesu Keriso ena siahu dainai Dirava ese ita ia hagoadaia, vadaeni ita kwalimu!

⁵⁸ Unai dainai, lauegu varavara taudia e, egu lalokau, do umui gini goada, do umui marere lasi. Nega ibounai Lohiabada ena gaukara do umui karaia goadagoada. Badina be umui diba Lohiabada ena gaukara lalonai, emui hekwarahi be hekwarahi kava lasi momokani.

16

Ierusalem Keristani taudia durua monina

¹ Ierusalem dekenai ekalesia orea durua totona moni lau ura herevalaia. Galatia ekalesia orea lau hamaoroa hegeregerena, umui danu lau hamaoroa, moni do umui haboua. ² Pura ena dina ginigunana ibounai umui ta ta ese emui ruma ta ta dekenai moni do umui haboua noho, ena bada be emui gaukara davana ena bada hegeregerena. Vadaeni do lau ginidae neganai, moni haboua gaukara ena hekwarahi be lasi. ³ Vadaeni umui dekenai lau ginidae neganai, umui ese umui abia hidi taudia dekenai revareva ta do lau henia. Vadaeni inai taudia mai revareva danu do lau siaia, emui harihari gauna moni, Ierusalem dekenai do idia abia lao. ⁴ To bema dala ia noho neganai, idia danu do lau lao.

Paulo ia ura loalao Korinto kahanai

⁵ Makedonia do lau raka hanaia murinai, lau be umui do lau vadivadi henia. Badina be lau lalao Makedonia do lau raka hanaia guna. ⁶ Umui dekenai do lau noho nega sisina daudau, sedira ela bona keru negana do ia ore. Unai murinai, egu laolao ma do lau hamatamaia lou neganai, umui ese egu dala do umui durua. ⁷ Badina be lau ura lasi lau hanaia lao neganai, umui lau itaia nega sisina sibona. To bema Lohiabada ia ura neganai, umui dekenai do lau noho nega daudau.

⁸ To Efeso dekenai do lau noho ela bona Pentekoste ena nega. ⁹ Badina be unai gabu dekenai iduara badana ia kehoa vadaeni, bona hari be gaukara badana bona mai anina ena nega namona. To lauegu dala idia koua gwauraia taudia be momo.

¹⁰ Timoteo bema umui dekenai ia lao neganai do umui naria namonamo, vadaeni mai gari lasi danu umui dekenai do ia noho. Badina be ia ese Lohiabada ena gaukara ia karaia noho, lau bamona. ¹¹ Unai dainai tau ta ese do ia hahemaraia lasi, o iena hereva negea lasi. To umui durua, vadaeni maino dekenai iena laolao do ia hamatamaia lou, lau dekenai do ia mai. Badina be ia, bona iseda varavara taudia haida danu, lau naria noho.

¹² Iseda varavara tauna, Apolo lau noia goadagoada, ia bona varavara taudia haida ese umui dekenai do idia vadivadi henia, lau gwau. To ia be ia ura lasi, badina ia lalao inai be Dirava ena ura lasi. To nega namona do ia davaria neganai umui dekenai do ia lao.

Hereva dokona

¹³ Umui naria namonamo, abidadama dekenai umui gini goada, metau ibounai lalonai do umui haheauka, do umui goada. ¹⁴ Umui emui gaukara ibounai be lalokau dekenai do umui karaia.

¹⁵ Umui be Stepana mai ena famili umui diba vadaeni. Idia be Keriso idia abidadama henia taudia ginigunadia Akaia dekenai. Idia ese sibodia idia henia, Dirava ena taudia edia hesiai gaukara do idia karaia totona. Lauegu varavara taudia e, umui lau noia, ¹⁶ inai bamona taudia edia hereva do umui kamoni henia. Bona inai taudia danu idia gaukara hebou bona durua taudia, idia do umui kamoni henia danu.

¹⁷ Lau moale, badina be Stepana bona Forotunato bona Akaiko be lau dekenai idia ginidae dainai. Badina be umui mai lau dekenai be dala lasi, to inai taudia ese emui gabu dekenai, durua lau dekenai idia henia noho. ¹⁸ Oibe, inai taudia ese lauegu lalona idia hanamoa bona hagoadaia, umui emui lalona idia hagoadaia guna bamona. Unai bamona taudia umui hanamoa bona matauraia be namo.

¹⁹ Ekalesia oreadia Asia dekenai ese edia hanamoa idia siaia inai. Akwila bona Prisikila, bona edia ruma dekenai idia hebou noho Keristani taudia ese umui idia hanamoa bada. ²⁰ Keristani varavara taudia ibounai inai gabu dekenai ese umui idia hanamoa noho. Umui ta ta dekenai umui hanamoa, umui ta ta dekenai ekalesia ena lalokau kisi umui henia.

²¹ Lau Paulo, lauegu imana dekenai hanamoa hereva lau torea inai bamona: “Umui ibounai lau hanamoa.”

²² Bema tau ta ese Lohiabada Iesu ia ura henia lasi, unai tau madi ia be dika momokani!

Lohiabada Iesu e, mani oi mai!

²³ Lohiabada ena hariharibada umui dekenai do ia noho.

²⁴ Lauegu lalokau be umui ibounai dekenai lau henia noho, Keriso Iesu dainai. Amen.

PAULO ENA REVAREVA IHARUANA KORINTO TAUDIA DEKENAI

¹ Lau inai Paulo, lau be Keriso Iesu ena aposetolo tauna Dirava ena ura dainai. Lau bona iseda varavara tauna Timoteo ruaosi ese inai revareva ai torea inai, Dirava ena ekalesia Korinto dekenai, bona Akaia tano ibounai lalonai Keristani taudia, umui emui.

² Lau ura Dirava iseda Tamana bona Lohiabada Iesu Keriso ese bogahisihisi bona maino umui dekenai do idia henia.

Paulo ese Dirava ia hanamoa

³ Dirava, iseda Lohiabada Iesu Keriso ena Tamana ita hanamoa. Ia be iseda Tamana, bona bogahisihisi bona durua ibounai ia henia Diravana.

⁴ Aiemai hisihisi ibounai lalonai ia ese ai ia durua noho. Unai dainai hisihisi idia abia noho taudia be ai ese ai durua diba. Dirava ese ai dekenai ia henia durua, be ai ese ma ai henia noho idia dekenai. ⁵ Badina be Keriso danu hisihisi ita abia ena bada hegeregerena, Dirava ena durua ita abia danu ia bada, Keriso dainai. ⁶ Bema hisihisi ai davarua neganai, inai be umui do ai durua, bona mauri do umui abia totona. Bona bema Dirava ese ai ia durua neganai, inai be ai ese umui do ai durua totona. Bema metau bona hisihisi lalonai umui gini goada, ai ese ai gini goada hegeregerena, Dirava ese umui do ia durua. ⁷ Unai dainai ai daradara lasi, to ai diba momokani aiemai hisihisi hegeregerena umui abia bamona, Dirava dekena amo ai abia durua, be umui danu do umui abia.

⁸ Aiemai varavara taudia e, ai ura Asia dekenai ai abia hisihisi toana do umui diba. Metau bona hisihisi ai dekenai idia henia be bada herea. Aiemai goada ia ore, bona ai laloa do ai mase. ⁹ Oibe, aiemai laloa be kota biaguna ta ese aiemai mase ia gwauria vadaeni bamona. To inai ia vara, be do ai diba aiemai goada be ia hegeregere lasi totona. Vadaeni inai bamona ai diba neganai, mase taudia ia hatorea isi Diravana sibona ai abidadama henia. ¹⁰ Bona ia ese mase dika momokani dekena amo ai ia hamauria vadaeni, bona ai do ia hamauria noho. Ai abidadama henia noho danu, vaira neganai ia ese ai do ia hamauria lou. ¹¹ To gau badana be, umui ese ai do umui durua noho emui guriguri dekena amo. Vadaeni emui guriguri momo be Dirava ese do ia kamonai, bona ia ese ai do ia hanamoa. Unai neganai taunimanima momo ese ai do idia laloa, bona ai dainai Dirava do idia hanamoa bada.

Aiemai heagi ena badina

¹² Ai be gau ta totona ai heagi noho, gauna be inai: Mai laloa namo danu ai diba momokani, aiemai kara, tanobada lalonai, bona umui emui vairanai danu, be mai momokani bona mai laloa maoromaoro danu. Tanobada taunimanima edia aonega dekena amo inai kara ai karaia lasi. To Dirava ena hariharibada ena siahue ese ai ia biagua dainai ai karaia. ¹³ Badina be aiemai revareva lalonai be hunia hereva ta lasi. To umui duahia diba, bona edia anina ibounai do umui diba namonamo gaudia sibona ai torea noho. ¹⁴ Hari be ai umui diba sisina sibona. To lau daradara lasi, gabeai ai do umui diba momokani. Vadaeni Lohiabada Iesu ena Dina neganai, umui ese ai do umui heagilaia, ai ese umui do ai heagilaia hegeregerena.

¹⁵ Umui emui abidadama lau hamomokania dainai, lauegu palani gunana be umui dekenai do lau mai, umui do lau hanamoia nega rua totona. ¹⁶ Badina be lau lalao Makedonia do lau lao neganai, umui do lau vadivadi henia, bona Makedonia dekena amo do lau giroa mai neganai danu, umui do lau vadivadi henia lou. Vadaeni lauegu lao dalana Iudea dekenai be umui ese lau do umui durua, lau lalao. ¹⁷ Unai bamona lau lalao dainai lau be daradara tauna bamona, a? O sedira lauegu lalao be tanobada tauna ena lalao bamona, lau be “oibe” bona “lasi” nega tamona lau gwaurai, a? ¹⁸ Dirava ia diba lauegu gwauhamata umui dekenai be “oibe” bona “lasi” lasi. ¹⁹ Badina be lau bona Sila bona Timoteo ese Iesu Keriso, Dirava ena Natuna umui dekenai ai harorolaia, be “oibe” bona “lasi” lasi, to ia be “oibe” sibona. ²⁰ Badina Keriso be Dirava ena gwauhamata ibounai edia “oibe.” Bona inai anina be, Dirava ita hanamoia neganai, “Amen” ita gwaurai, inai be Iesu Keriso dainai. ²¹ Dirava ese ai bona umui ia haka-pua tamona Keriso lalonai, bona ia ese ita ia haginia goada, daradara ta lasi. Bona Dirava sibona ese ita ia abia siri vadaeni, iena taudia ita lao. ²² Iena maka danu iseda latanai ia atoa vadaeni, bona iena Lauma Helaga danu iseda kudouna edia lalonai ia atoa vadaeni. Inai bamona Dirava ia karaia dainai, ita diba momokani iena gwauhamata gaudia ibounai be dohore ita abia.

Paulo ia lao lasi Korinto dekenai

²³ Dirava be lauegu lalona ia diba, bona ia diba lau hereva momokani inai: Lau be Korinto dekenai lau mai lasi badina korikori be umui lau bogahisihisi henia dainai. ²⁴ Ai ese umui emui abidadama ai biagua lasi. Ai diba umui emui abidadama lalonai umui gini goada noho. Unai dainai ai be umui danu ita gaunkara hebou, emui moale do ai havaraia totona.

2

¹ Unai dainai inai bamona lau lalao: Lau be umui dekenai do lau mai lou lasi, emui lalohisihisi ma do lau havaraia garina. ² Badina bema umui do lau hisihisi henia neganai, daika ese lau do idia hamoalea? Lau hisihisi henia taudia, umui sibona, ani? ³ Umui emui kara be, lau umui ura hamoalea, unai dainai lau ura lasi umui dekenai lau mai, lalohisihisi do umui davaria garina. Unai lau lalao dainai, unai egu revareva gunana umui dekenai lau torea. Badina be lau diba momokani, bema gau ta totona lau moale neganai, umui danu inai gau totona do umui moale. ⁴ Badina be umui dekenai unai revareva lau torea neganai, egu lalona ia hisihisi bona metau danu. Mai tai danu unai revareva lau torea, hisihisi do umui abia totona lasi, to lauegu lalokau badana umui dekenai do umui diba totona.

Kerere tauna ena dika umui gwauatao

⁵ Unai hisihisi ia havaraia tauna ese lau ia hisihisi henia lasi, to ia ese umui ibounai ia hisihisi henia sisina. “Sisina” lau gwau, badina lau ura lasi unai tau lau samania auka. ⁶ Unai tau ena kara dika davana be umui momo ese umui henia, vadaeni ia hegeregere. ⁷ Harihari iena dika do umui gwauatao, bona iena lalona do umui hagoadaia be namo, iena lalohisihisi ese iena abidadama do ia haorea garina. ⁸ Unai dainai umui lau noia, emui lalokau ia dekenai do umui hedinarai henia lou, vadaeni do ia diba umui lalokau henia momokani. ⁹ Unai revareva umui dekenai lau torea, be umui emui kara ena toana do lau diba totona. Badina lau ura diba, egu hadibaia hereva be nega ibounai umui badinaia

noho, o lasi. ¹⁰ Umui ese tau ta ena dika umui gwauatao neganai, lau danu ese iena dika do lau gwauatao. Badina be bema tau ta ena dika lau gwauatao umui dainai neganai, iena dika lau gwauatao Keriso ena vairana dekenai, ¹¹ Satani ese ita dekena amo kwalimu do ia abia garina, badina be iena koikoi ita diba vadaeni.

Troa dekenai Paulo ena lalao ia metau

¹² Lau be Troa dekenai lau lao, Sivarai Namona do lau harorolaia totona. Unuseni lau davaria, Lohiabada ese iena haroro gaukara dala namona ia kehoa lauegu. ¹³ To egu lalona ia hisihisi bada, badina be egu tadina Tito lau davaria lasi dainai. Unai dainai Troa taudia lau bamahuta henia, vadaeni Makedonia dekenai lau lao.

Keriso ena goada dainai aposetolo idia kwalimu

¹⁴ To Dirava lau tanikiu henia, ia ese nega ibounai ai ia hakaua, vadaeni Keriso lalonai ai noho dainai ia ese ai dekenai kwalimu ia henia. Aiema haroro gaukara dekena amo Dirava ese iena hereva ia hedinarai, vadaeni taunimanima ibounai be Keriso ena sivarai idia diba. Inai bamona diba be bonana namona bamona gabu ibounai dekenai ia lao noho. ¹⁵ Momokani, ai be Keriso ena bonana namona, Dirava ena vairana dekenai. Inai bonana namona be mauri dala idia raka taudia, bona mase dala idia raka taudia danu idia kamona noho. ¹⁶ Mase dala idia raka noho taudia dekenai inai bonana be mase ia havaraia gauna. To mauri dala idia raka noho taudia dekenai inai bonana be mauri ia havaraia gauna. Inai gaukara karaia totona daika ia hegeregere? ¹⁷ Umui diba vadaeni, ai be haida bamona lasi, Dirava ena hereva ai hoihoilaia lasi. Lasi momokani. Ai be lalona momokani taudia bona inai lagi Dirava dekena amo ai abia. Ai be Keriso ena hesiai taudia dainai, Dirava ena vairana dekenai ai hereva noho, mai lalao maoromaoro danu.

3

Taravatu matamata ena hesiai taudia

¹ Ai sibona aiema ladana ai hanamoa lou gwauraia, a? O sedira ai be haida bamona, ai ura umui dekenai revareva ai torea, umui emui hanamoa do ai abia totona. O sedira, haida ese ai idia hanamoa ena revareva umui dekenai do ai henia, a? Lasi momokani. ² Aiema ladana ia hanamoa ena revareva be umui sibona. Bona inai revareva ena toretore be aiema kudouna dekenai ia torea. Ibounai ese inai revareva ena anina idia diba, bona idia duahia diba danu. ³ Taunimanima ibounai idia itaia diba, umui be revareva ta Keriso dekena amo. Aiema gaukara dekena amo, Keriso ese inai revareva ia torea. Ia be ink dekenai ia torea lasi, to Mauri Diravana ena Lauma ese ia torea. Nadi latana ia torea lasi, to taunimanima edia kudouna dekenai ia torea.

⁴ Inai bamona ai hereva diba, badina be Dirava ai abidadama henia momokani, Keriso ese ai ia hakaua noho dainai. ⁵ Ai sibona inai gaukara ai karaia be ai hegeregere lasi. Unai dainai ai sibona be aonega taudia ai gwauraia diba lasi. Dirava sibona ese aonega ai dekenai ia henia, vadaeni inai gaukara ai karaia diba. ⁶ Ia sibona ese ai dekenai diba ia henia, vadaeni, taravatu matamata do ai gwauraia hedinarai. Inai taravatu matamata be buka dekenai torea gauna lasi, to ia be Lauma Helaga ese ia hadibaia gauna. Badina be taravatu ena toretore be mase ia havaraia, to Lauma Helaga ese mauri ia havaraia.

⁷ Taravatu be Dirava ese nadi palakana dekenai ia torea, bona unai ia henia neganai Dirava ena hairai diarina ia hedinarai. Inai Taravatu ena kara taunimanima edia latanai be mase ia havaraia. To Taravatu ia vara neganai, Dirava ena hairai diarina danu ia vara nega tamona. Unai neganai Mose ena vairana ia diaridiari bada herea dainai, Israela taudia ese ia idia itaia noho hegeregere lasi. To unai diaridiari ia noho daudau lasi. ⁸ Taravatu ena diaridiari be unai bamona neganai, Lauma ena diaridiari ese do ia hereaia, ani? ⁹ Badina be bema unai taravatu dala gunana, taunimanima edia mase ia gwaurai dalana be mai ena diaridiari, Dirava ena vairanai ita maoromaoro dalana ena diaridiari be namo bada herea, ani? ¹⁰ Oibe, inai taravatu dala gunana be guna neganai mai ena diaridiari, to harihari iena diaridiari be lasi bamona. Badina be inai: Inai dala matamata ena diaridiari be namo bada herea momokani! ¹¹ Badina be, bema unai dala gunana, ia noho daudau lasi gauna, be mai ena diaridiari neganai, inai dala matamata, do ia noho hanaihanai gauna, ena diaridiari be namo bada herea momokani, ani?

¹² Ai diba momokani inai diaridiari matamata be ia bada lao noho, bona ia noho hanaihanai dainai, ai be gari lasi, ai hereva goada noho. ¹³ Ai be Mose ia karaia bamona ai karaia lasi. Ia ese iena vairana be muko dekenai ia koua, Israela taudia ese do ia doko diaridiari idia itaia garina. ¹⁴ To edia laloa be idia koua noho. Unai dainai Taravatu gunana idia duahia negadia ibounai, inai muko be ia do noho, ia mai bona hari. Idia kokia diba lasi. Badina be Keriso tamona sibona dekena amo Dirava ese unai muko taunimanima dekena amo ia kokia diba. ¹⁵ Oibe, Mose ena Taravatu idia duahia negadia ibounai, muko ese edia lalona ia koua noho, ia mai bona harihari. ¹⁶ To tau ta bema Lohiabada dekenai iena lalona ia giroa neganai, Dirava ese unai muko do ia kokia. ¹⁷ Lohiabada be Lauma Helaga. Bona bema Lohiabada ena Lauma be tau ta dekenai ia noho neganai, gau ta ese unai tau ia koua diba lasi. Lasi momokani, badina ia dekenai ura kwalimu ia noho. ¹⁸ Ita Keristani taudia ibounai, iseda vairana be muko ese idia koua lasi. Unai dainai Lohiabada ena diaridiari be ita ese ita hedinarai, hevarivari bamona, taunimanima ibounai dekenai. Nega ibounai inai diaridiari ita dekenai ia bada lao noho, bona ia ese ita ia senisia noho, vadaeni iseda toana be, Lohiabada ena toana bamona do ita lao. Lohiabada be Lauma, bona ia ese inai kara do ia karaia.

4

Sivarai Namona be hunia gauna lasi

¹ Dirava ena bogahisihisi dainai inai haroro gaukara ai dekenai ia henia, unai dainai ai be hesiku lasi. ² Ai be hemarai karadia, taunimanima idia hunia gaudia, ai negea vadaeni, bona koikoi karadia be ai karaia lasi. Dirava ena hereva danu ai senisia lasi. Ai be hereva momokani ai gwaurai hedinarai noho, Dirava ena vairana dekenai. Unai dekena amo taunimanima idia diba, ai be mai momokani danu Dirava ena gaukara ai karaia noho. ³ Bema ai ese ai harorolaia Sivarai Namona be hunia gauna, unai be mase dala idia raka noho taudia sibona dekenai ia be hunia gauna. ⁴ Oibe, idia abidadama henia diba lasi, badina be inai tanobada ena dirava ese edia lalona ia koua, dibura dekena amo. Vadaeni Keriso ena hairaina bona iena Sivarai Namona ena diari idia itaia diba lasi. Keriso be Dirava ena toana momokani Tauna. ⁵ Badina be aiemai haroro ena badina be ai sibona lasi. Aiemai haroro ena badina be Keriso Iesu, ia be Lohiabada. Ai ese Iesu ena hereva ai badinaia noho,

unai dainai ai be umui emui hesiai taudia. ⁶ Guna neganai Dirava ia hereva, ia gwau, “Dibura dekena amo diari do ia hedinarai.” Unai Dirava danu ese aiemai lalona dekenai iena diari ia atoa, ai do ia hadiaria totona. Inai diari be inai bamona: Ai diba momokani Dirava ena hairai diarina be Keriso ena vairana dekenai ia hedinarai noho.

⁷ To ai, inai diari ai abia vadaeni taudia, be hodu, manoka gaudia sibona bamona do ai noho. Inai anina be taunimanima ibounai do idia diba inai siahu badana be Dirava sibona dekena amo, ai dekena amo ia mai lasi. ⁸ Kahana ibounai dekena amo, hisihisi bona metau ai dekenai idia henia noho, to ai idia hadikaia momokani lasi. Nega haida ai laloo daradara, to gaukara dekena amo ai doko lasi. ⁹ Taunimanima momo ese ai idia dagedage henia, to Dirava ese ai ia rakatania lasi. Ai idia botai, ai moru, to ai mase lasi. ¹⁰ Nega ibounai aiemai tauanina dekenai Iesu ena mase ai abia loaloo noho, Iesu ena mauri danu aiemai tauanina dekenai taunimanima do idia itaia totona. ¹¹ Aiemai mauri dinadia ibounai, Iesu ena gaukara ai karaia noho dainai, haida ese ai idia alaia gwauraia. Inai ai karaia, be Iesu ena mauri aiemai tauanina dekenai taunimanima do idia itaia totona. ¹² Unai kara dainai mase be aiemai lalona dekenai ia gaukara noho, to umui emui lalona dekenai mauri ia gaukara noho.

¹³ Buka Helaga ia torea, ia gwau: “Lau be Dirava lau abidadama henia, vadaeni hereva lau gwauraia.” Aiemai abidadama be unai ia torea hereva bamona, ai danu be ai abidadama noho, unai dainai ai danu ai hereva noho. ¹⁴ Ai diba vadaeni Lohiabada Iesu ia hatorea isi Dirava ese ai danu do ia hatorea isi, Iesu danu. Vadaeni unai neganai, ai bona umui be Dirava ena vairana dekenai do ita gini. ¹⁵ Inai kara ibounai be umui durua totona idia vara noho, bona Dirava ena hariharibada be taunimanima momo herea ese do idia davarua totona. Unai dekena amo unai taunimanima momo herea ese Dirava do idia hanamoa bada herea momokani.

Abidadama dekena amo ita mauri noho

¹⁶ Unai dainai ai be hesiku diba lasi. Aiemai tauanina be idia bodaga lao noho, to aiemai lauma be dina ibounai idia matamata lao noho. ¹⁷ Badina be hari ai abia noho hisihisi be metau lasi gaudia, bona do idia noho nega daudau lasi. Oibe, inai hisihisi maragi idia ore murinai, Dirava ese ai do ia hanamoa bada herea momokani guba dekenai, ela bona hanaihanai. ¹⁸ Unai dainai matana dekenai ita itaia lasi gaudia be do ita laloo lasi, to matana dekenai ita itaia lasi gaudia do ita laloo. Matana dekenai ita itaia gaudia be idia noho nega daudau lasi, to matana dekenai ita itaia lasi gaudia be nega hanaihanai do idia noho.

5

Tanobada gaudia bona guba gaudia

¹ Ita be inai bamona ita diba: Inai tanobada dekenai ita noho palai ruma, iseda tauanina, bema ia dika neganai, Dirava ese iena ruma ta guba dekenai be ita dekenai do ia henia. Inai ruma be taunimanima ese idia karaia lasi, to ia be noho hanaihanai gauna. ² Momokani, iniseni ia noho ruma dekenai ita noho neganai be ita tai noho, ita ura bada iseda guba ruma dekenai ita noho. ³ Vadaeni guba ruma dekenai ita noho neganai, ita be mai iseda guba tauanina. ⁴ Inai tanobada palai ruma dekenai ita noho neganai, iseda maduna metau dainai ita tai noho. Ita ura momokani lasi iseda tanobada tauanina ita kokia, to ita ura iseda guba tauanina do ita atoa, vadaeni mauri ese mase ena gabu do ia abia.

Mase be gari gauna lasi, badina Dirava danu do ita noho

⁵ Iseda mauri dekenai inai senisi do ia vara totona, Dirava ese iseda dala ia karaia hegaegae vadaeni. Bona ia ese iena Lauma Helaga ita dekenai ia henia vadaeni, momokani ena toana bamona. Inai bamona karaia ia karaia dainai, ita diba momokani iena gwauhamata gaudia ibounai dohore ita abia.

⁶ Unai dainai iseda lalona bona iseda kudouna idia goada noho nega ibounai. Io, dahaka dahaka ia vara, ita be gari ta lasi, badina ita diba Lohiabada bona iena guba dekenai ita noho diba lasi, bema inai tauanina dekenai ita do noho neganai. ⁷ Iseda abidadama dekena amo ita diba inai gaudia be momokani. Badina iseda mauri be abidadama kara dekena amo, itaia kara dekena amo lasi. ⁸ Io, iseda lalona bona kudouna idia goada noho, bona ita ura bada iseda tanobada tauanina ita rakatania, vadaeni Lohiabada dekenai do ita noho. ⁹ To iseda ura badana momokani be inai: Dirava ia ura henia karadia sibona do ita karaia, do ia moale totona. Inai bamona do ita karaia, iniseni ita noho neganai, o unuseni, guba dekenai ita noho neganai. ¹⁰ Badina ita ibounai be Keriso ena Kota gabuna dekenai dohore ita gini. Vadaeni iseda tauanina dekenai ita karaia karadia edia davana do ita abia, namo o dika.

Keriso dainai Dirava danu ita turana karaia

¹¹ Vadaeni, Lohiabada ai gari henia dainai, ai ese taunimanima ai siba henia goada, do idia abidadama henia totona. Aiema laloe ibounai be Dirava ia diba, ia diba aiema laloe be maoromaoro momokani. Lau ura bada umui danu umui diba aiema laloe be maoromaoro momokani. ¹² Inai hereva dekenai ai ura aiema ladana ai hanamoa lou gwauraia, a? Lasi, to badina korikori be, ai ura umui ese ai do umui heagilaia diba, taunimanima haida edia vairanai. Badina be taunimanima haida ese tau ta ena toana idia laloe momo, to iena lalona bona kara idia laloe lasi. Bona ai ura inai bamona laloe kerere taudia do umui haere henia diba. ¹³ Bema ai be kava, unai be Dirava ena gaukara ai karaia dainai. Bema ai laloe maoromaoro, unai be umui durua totona. ¹⁴ Keriso ena lalokau ese ai ia biagua noho, badina be hari ai diba momokani Tau tamona ese taunimanima ibounai dainai ia mase. Inai anina be ita ibounai Keriso danu ita mase hebou vadaeni. ¹⁵ Oibe, Keriso ese taunimanima ibounai dainai ia mase. Unai dainai ia dekena amo mauri ita davaria taudia, be ita sibona iseda mauri bona iseda ura do ita laloe lasi, to ita dainai ia mase, ma ia toreisi lou tauna, ena mauri bona iena ura gaudia do ita laloe bona karaia.

¹⁶ Unai dainai, hari ia lao, tau ta, iena toana sibona dekena amo do ita laloe lasi. Guna be Keriso ita laloe iena tauanina toana dekena amo, to harihari be unai dala dekena amo do ita laloe lasi. ¹⁷ Bema tau ta Keriso danu ia hakapua tamona neganai, unai tau be tau matamatana. Iena kara gunadia be idia ore, mauri matamata ia abia vadaeni inai. ¹⁸ Inai kara ibounai be Dirava ese ia karaia. Guna ita be Dirava danu ita turana lasi, to Keriso ena kara dekena amo, Dirava ese iena turana ita ia halaoa vadaeni. Bona ia ese gaukara ta ai dekenai ia henia, gauna inai: Taunimanima do ai veria, do ai haroro henia, ela bona idia danu Dirava ena turana idia lao. ¹⁹ Aiema haroro hereva be inai: Dirava be Keriso lalonai ia noho, bona ia ese Keriso dekena amo, tanobada taudia danu ia turana karaia noho. Keriso lalonai, Dirava ese edia kara dika ia laloatao lasi. Inai bamona haroro gaukara Dirava ese ai dekenai ia henia vadaeni, taunimanima be ia danu do idia turana karaia totona.

²⁰ Unai dainai ai be Keriso ena hereva gwaurai hedinarai taudia, Dirava ese aiemai uduna dekena amo umui dekenai ia noia noho. Vadaeni Keriso ena ladana dainai umui ai noia, Dirava do umui dagedage henia lou lasi, to ia danu do umui turana karaia. ²¹ Keriso be kara dika lasi momokani, to Dirava ese dika ia karaia Tauna dekenai ia halaoa vadaeni ita dainai. Vadaeni bema Keriso lalonai ita noho neganai, Dirava ena kara maoromaoro do ita abia.

6

¹ Ai be Dirava danu ai gaukara hebou dainai, umui ai noia goada inai bamona, “Umui ese Dirava ena hariharibada umui abia vadaeni, be umui negea kava lasi.” ² Badina Dirava be inai bamona ia hereva, ia gwau:

“Lauegu hariharibada henia ena dina ia ginidae neganai, umui emui taitai lau kamona.

Lau ese mauri umui do lau henia dinana ia ginidae neganai, umui dekenai durua do lau henia.”

Umui kamona! Dirava ena hariharibada ita abia ena nega namona be harihari! Hari dina hamauria ita abia dae be namo!

³ Ai ura lasi taunimanima idia gwau aiemai gaukara ia dika. Unai dainai ai ese taunimanima hadikaia kara ta ai karaia lasi, lasi momokani! ⁴ To aiemai kara ibounai dekena amo ai hedinarai ai be Dirava ena hesiai taudia. Inai bamona kara ai karaia: Metau ibounai neganai ai haheauka, hisihisi neganai ai gini goada, hekwarahi bada neganai ai gaukara noho. ⁵ Ai idia botai vadaeni, dibura ruma lalonai ai idia atoa, taunimanima momo ese ai idia dagedage henia, gaukara bada ese kahirakahira ai ia hamasea, nega momo ai be mahuta dala lasi, nega momo ai hitolo. ⁶ Ai be laloa goevagoeva karadia dekena amo, aonega karadia dekena amo, haheauka dekena amo, bogahisihisi karadia dekena amo, ai hedinarai ai be Dirava ena hesiai taudia. Lauma Helaga ese ai ia hagoadaia noho, bona lalokau momokani ai hedinarai noho danu. ⁷ Ai be hereva momokani ai harorolaia noho. Aiemai gaukara be Dirava ena sialu dekena amo ai karaia noho. Aiemai kara maoromaoro be tuari gauna emai imana ruaosi dekenai bamona, vadaeni inai bamona ai tuari auka noho, Dirava ena gaukara karaia totona. ⁸ Haida ese ai idia hanamoa, haida ese ai idia hahemaraia. Haida idia gwau aiemai kara be dika, haida idia gwau ai be kara namo taudia. Haida idia gwau ai be koikoi taudia, to hereva momokani ai gwaurai. ⁹ Idia gwau tau ta ia diba lasi ai, to taunimanima momo ai idia diba. Idia laloa ai mase vadaeni, to lasi, ai mauri noho. Ai idia dadabaia, to ai idia alaia lasi. ¹⁰ Aiemai lalona idia hisihisi, to ai laloa lasi, nega ibounai ai moale noho. Ai be ogoami taudia, to ai laloa lasi, taunimanima momo dekenai Dirava ena kohu momo ai henia. Ai be gau ta lasi taudia bamona, to ai laloa lasi, badina gau ibounai be aiemai.

¹¹ Lauegu turana lalokau taudia Korinto dekenai! Hereva momo ai gwaurai hedinarai umui dekenai, ai hunia lasi. Aiemai kudouna ai kehoa vadaeni, umui ai lalokau henia dainai. ¹² Aiemai lalokau umui dekenai be ia bada, to emui lalokau ai dekenai be ia maragi. ¹³ Umui dekenai lau hereva henia, tamana ese iena natuna ia hereva henidia bamona. Lau gwau, aiemai lalokau davana ai dekenai do umui henia, emui lalokau ai dekenai mani do umui habadaia!

Dirava diba lasi taudia edia dala dekenai do ita raka lasi

¹⁴ Dirava idia abidadama henia lasi taudia danu do umui hakapua tamona lasi. Badina be edena bamona kara maoromaoro bona kara kerere idia turana diba? Edena bamona diari bona dibura idia noho hebou diba? ¹⁵ Keriso bona Satani be edena bamona idia laloa tamona diba? Abidadama tauna bona abidadama lasi tauna ruaosi be idia hegeregere diba, a? ¹⁶ Dirava ena dubu helaga bona kaivakuku be edena bamona idia hakapua tamona diba? Badina ita be Mauri Dirava ena dubu helaga! Dirava ese inai bamona ia hereva, ia gwau:

“Lau be lauegu bese taudia danu do lau noho,
bona idia edia huanai do lau raka.
Bona lau be edia Dirava do lau lao,
bona idia be lauegu bese taudia do lau halaodia.”

¹⁷ Unai dainai Lohiabada ma ia hereva, ia gwau:

“Umui ese idia do umui rakatania,
bona idia dekena amo do umui parara.
Miro gaudia ibounai dekena amo do umui raka siri,
vadaeni umui do lau abia dae.

¹⁸ Lau be umui emui Tamana do lau noho,
bona lauegu natuna, tau bona hahine, umui do lau halaoa.
Siahu Ibounai Lohiabada ese inai bamona ia hereva.”

7

¹ Lauegu turana lalokau e, inai gwauhamata hereva ibounai be ita totona Dirava ese ia gwaurai. Unai dainai tauanina bona lauma hamiroa karadia ibounai do ita hadokoa, bona iseda mauri ita hagoevaia be namo. Vadaeni Dirava ena vairanai do ita noho namonamo, mai goeva bona mai gari danu.

Paulo ia moale, Korinto taudia edia lalona idia giroa dainai

² Umui ese ai umui lalokau henia be namo. Ai be tau ta ai hadikaia lasi, ta ai hakererea lasi, ta ena kohu ai abia koikoi lasi. ³ Umui lau gwau henia lasi. Guna lau hereva bamona, umui ai lalokau henia, vadaeni ita mauri neganai do ita noho hebou, o ita mase neganai do ita noho hebou. ⁴ Lau diba momokani umui gini goada dainai, umui totona lau heagi noho. Bona unai dainai, aiemai hisihisi ibounai lalonai lau goada noho. Lauegu moale be bada momokani.

⁵ Makedonia dekenai ai ginidae neganai, laga-ani ai abia diba lasi. Hekwarahi ese ai ia hagegea, haida ese ai idia heatu henia gwaurai, bona gari ese ai ia abia. ⁶ To Dirava, hisihisi idia abia noho taudia ia durua Diravana ese ai ia durua, badina be ai dekenai Tito ia siaia mai. ⁷ Oibe, Tito ia ginidae dainai ai moale. To inai sibona lasi dainai, ai moale bada ena badina ta danu be, Tito ia gwau umui ese ia umui abia dae namo herea. Bona Tito ese ai ia hamaoroa, umui ura bada lau do umui itaia. Lau dainai umui tai, bona lau umui lalokau noho, bona lau umui badinaia noho, inai hereva ia gwaurai neganai, lauegu moale be ia bada momokani.

⁸ Lauegu revareva gunana dainai umui emui lalona idia hisihisi, vadaeni lau daradara. To harihari lau daradara lasi, badina be lau diba unai revareva ese nega sisina sibona umui ia hisihisi henia. ⁹ Harihari lau moale noho, emui lalona idia hisihisi dainai lasi, to umui emui lalohisihisi ese lalona giroa ia havaraia dainai. Badina be emui lalohisihisi be Dirava dekena amo, unai dainai ai dekena amo dika umui davaria lasi. ¹⁰ Badina be Dirava dekena amo ia mai lalohisihisi ese lalona giroa ia havaraia, bona lalona giroa ese hamauria ia havaraia.

Io, lalona giroa ia havaraia ena lalohisihisi be gau namona, ani? To tanobada dekena amo ia mai lalohisihisi ese mase ia havaraia. ¹¹ Mani umui lalao: Inai Dirava dekena amo lalohisihisi be dahaka namo umui dekenai ia havaraia? Umui lalao namonamo, bona umui emui lalona umui hamaoromaoroa, ani? Umui lalao hekwarahi bona umui gari, ani? Lau umui lalao, bona lau umui ura henia, ani? Bona emui ore a taudia edia dika davana umui henia, ani? Umui emui kara ibounai dekena amo, umui hedinaraia momokani, unai kerere be umui ese umui hamaoromaoroa vadaeni.

¹² Unai revareva gunana umui dekenai lau torea, be unai kerere tauna dainai lasi, bona ia hakererea tauna dainai lasi. Lau torea ena badina korikori be, emui lalokau ai dekenai, be Dirava ena vairanai, bona umui dekenai, do lau hedinaraia totona. ¹³ Umui emui kara ese aiemai lalona ia hagoadaia vadaeni.

Lalona goada sibona ai abia lasi, to moale bada ai davaria danu, Tito ena moale dainai. Badina be umui ese Tito ena lalona umui hamoalea bona hanamo. ¹⁴ Oibe, guna Tito ena vairanai umui emui kara lau heagilaia, bona umui ese emui kara dekena amo lau umui hahemaraia lasi. Aiemai hereva ibounai umui dekenai be momokani vadaeni, bona Tito dekenai emui kara ai heagilaia hereva danu be momokani vadaeni. ¹⁵ Tito ese umui ia lalokau henia bada, bona iena lalokau ia bada lao noho. Badina be ia laloatao noho, umui ese iena hereva umui kamoni henia momokani. Bona umui ese ia umui abia dae, mai emui gari bona mataurai danu. ¹⁶ Lau moale bada noho, badina lau diba momokani, lau daradara sisina lasi, umui be gau ibounai umui karaia maoromaoro noho.

8

Keristani taudia ese Iudea Keristani taudia idia durua

¹ Laegu varavara taudia e, ai ura Dirava ese iena hariharibada ia henia Makedonia ekalesia oreadia dekenai, ena sivarai do umui diba. ² Hihisi bada idia davaria gaudia ese edia haheauka idia tohoa, to edia moale be ia bada herea noho. Momokani edia ogogami be ia bada, to edia durua idia henia bada herea. ³ Lau gwaurai hedinarai momokani, idia edia goada hegeregere idia henia, ma edia goada ia hanaia gauna danu. ⁴ Bona idia sibona edia ura dainai, ai dekenai idia noinoi, edia moni haida do ai abia lao, Dirava ena taudia Iudea dekenai durua totona. ⁵ Guna ai lalao bona ai hereva inai bamona: “Makedonia Keristani taudia ese moni sisina do idia henia.” To inai bamona sibona idia karaia lasi, lasi momokani. Edia kara ginigunana be idia sibona edia kudouna Lohiabada dekenai idia henia. Unai murinai idia sibona ai dekenai idia henia, Dirava ena ura hegeregere. ⁶ Unai dainai Tito ai noia, unai harihari gaudia moni gogoa gaukara do ia karaia haorea. Badina guna ia ese unai gaukara ia hamatamaia. ⁷ Umui Korinto taudia be emui dala ibounai dekenai kara namodia momokani umui karaia noho. Emui abidadama, bona hereva, bona diba, bona haheauka, bona lalokau be mai sivarai danu. Lau ura inai harihari gaudia henia kara danu dekena amo umui be mai sivaraina.

⁸ Lau ura lasi umui lau oda henia. To haida edia lalokau dekena amo harihari gaudia idia mailaia sivaraina umui dekenai lau hadibaia. Unai dekena amo umui emui lalokau do lau tohoa, ia momokani o lasi. ⁹ Badina be iseda Lohiabada Iesu Keriso ena hariharibada umui diba vadaeni. Ia be kohu momo tauna, to umui durua totona ogogami tauna

bamona ia lao, iena ogogami dekena amo umui ese kohu momo do umui abia totona.

¹⁰ Lauegu lalao be inai bamona: Inai durua gaukara, lagani gunana umui hamatamaia gaukara, umui karaia haorea be namo. Umui be inai gaukara hamatamaia taudia ginigunadia, bona umui ura bada do umui karaia. ¹¹ Vadaeni harihari umui karaia haorea be namo. Inai gaukara umui hamatamaia neganai, mai lalao haraga danu umui karaia. Vadaeni harihari mai lalao haraga danu umui karaia haorea be namo. Emui moni ena bada hegeregerena do umui henia. ¹² Bema tau ta ia ura dikadika harihari gauna do ia henia, Dirava ese inai kara do ia ura henia. Dirava ia diba unai tau ena kohu be hida, bona ia lalao karaia, unai tau ena harihari gauna be iena kohu hegeregerena o lasi. Bema tau ta madi be kohu lasi neganai, Dirava ese unai tau ena henia kara do ia lalao momo lasi.

¹³ Lau ura lasi umui be hekwarahi bada do umui abia, to idia dekenai umui henia taudia be do idia laga-ani kava sibona. ¹⁴ Lasi, to umui ibounai hegeregere umui noho be namo. Harihari umui be mai emui gau, to idia be ogogami, unai dainai idia umui durua be namo. Badina be sedira kerukeru vanegai umui be ogogami, vadaeni unai neganai idia ese umui do idia durua. Inai dala dekenai ibounai ta ta be hegeregere do idia noho. ¹⁵ Buka Helaga lalonai ia torea bamona, ia gwau:

“Mana aniani ia haboua bada tauna ena aniani,
be bada lasi ia noho,
to sisina ia haboua tauna ena aniani be hegeregere.”

Tito mai ena bamona taudia Korinto do idia lao

¹⁶ Dirava lau hanamoa, badina be ia ese Tito ena kudouna dekenai ia gaukara, vadaeni Tito ena lalao umui dekenai be lauegu lalao hegeregere. Ia danu ese umui ia lalokau henia. ¹⁷ Vadaeni aiemai noinoi ia abia dae, bona sibona ena ura dainai umui dekenai ia lao. Ia ura bada umui do ia durua. ¹⁸ Iseda varavara tauna ta ia danu umui dekenai do ai siaia. Ia be ekalesia oreia ibounai ese iena kara namona idia herevalaia. Sivarai Namona ia harorolaia goadagoada danu. ¹⁹ Unai sibona lasi, to ekalesia oreadia ese ia idia abia hidi vadaeni, ai danu do ia loalao hebou, inai harihari gaudia gaukara durua totona. Ai ese inai gaukara ai karaia Lohiabada ena ladana hanamoa bada totona, bona aiemai durua bona lalokau do ai hedinarai totona.

²⁰ Badina be ai ura lasi tau ta ese ai do ia samania, do ia gwau inai harihari gaudia gaukara ai karaia namonamo lasi. Unai dainai ai ura inai tau ese ai do ia bamoa. ²¹ Aiemai ura tamona be do ai gaukara maoromaoro, Dirava ena vairanai bona taunimanima edia vairanai danu.

²² Ma iseda varavara ta idia ruaosi danu umui dekenai ai siaia inai. Iena goada be nega momo ai tohoa vadaeni. Bona harihari ia ura umui do ia durua, mai ena goada ibounai, badina iena abidadama umui dekenai be ia bada dainai. ²³ Ma Tito lau gwauraia, ia be lau bamona tauna ta, umui totona ai ruaosi ai gaukara hebou. Ma unai iseda varavara taudia ruaosi lau gwauraia, idia be ekalesia ese idia abia hidi taudia, bona Keriso ena ladana idia hanamoa noho taudia. ²⁴ Unai dainai, emui lalokau idia dekenai do umui hedinarai, bona kara namodia idia dekenai mani do umui karaia. Vadaeni ekalesia oreia ibounai be emui kara namodia do idia diba, bona do idia diba danu umui ai heagilaia kava lasi.

9

Keristani taudia ibounai ta ta dekenai durua idia henia

¹ Umui diba vadaeni ai ese moni ai haboua noho, Dirava ena taudia Iudea dekenai durua totona. Unai dainai inai gau totona hereva momo do lau torea lasi. ² Lau diba emui kara, umui ura bada idia do umui durua, bona lau ese Makedonia taudia edia vairanai umui lau heagilaia. Lau gwau, “Akaia varavara taudia be guna lagani ia mai bona harihari edia durua henia totona idia hegaegae vadaeni.” Emui goada sivaraina idia kamoni, vadaeni Makedonia taudia momo ese idia ura durua henia danu. ³ To inai Keristani varavara taudia umui dekenai lau siaia noho, umui emui kara lau heagilaia be hereva kava garina. Inai anina be, lau ura umui emui durua moni do umui abia hegaegae, idia lau hamaoroa bamona. ⁴ To bema Makedonia taudia haida ese lau do idia bamoa, bona bema ai davaria umui be hegaegae lasi neganai, aiemai hemarai do ia bada herea, ani? Umui danu do umui hemarai, umui ai heagilaia kava dainai. ⁵ Unai dainai lau laloe iseda varavara taudia lau noia be namo, umui dekenai do idia ginidae guna. Vadaeni umui emui gwauhamata harihari gauna do idia haboua hegaegae. Bona lau ginidae neganai moni do ia noho hegaegae, bona inai kara dekenai amo do umui hedinarai, lalokau dainai umui henia, bona lauegu oda dainai lasi.

⁶ Inai hereva mani do umui laloe namonamo: Uhe momo lasi ia hadoa tauna be anina momo lasi do ia geia, to uhe momo do ia hadoa tauna be anina momo do ia geia. ⁷ Umui ta ta, sibona emui laloe, emui laloe hegeregere do umui henia, mai maumau danu henia lasi, bona oda dainai lasi. Badina be mai moale danu ia henia tauna be Dirava ese ia lalokau henia noho. ⁸ Dirava be mai ena sialu emui kohu do ia habadaia, vadaeni emui ura gaudia, ma gau haida, ia dekenai amo do umui abia. Unai dainai nega ibounai gau momo umui abia dainai, durua kara namodia do umui karaia diba. ⁹ Buka Helaga lalonai ia torea hegeregere, ia gwau:

“Ogogami taudia dekenai ia henia badabada tauna, be iena bogahisihisi kara do ia noho hanaihanai.”

¹⁰ Dirava ese taunimanima dekenai uhe ia henia, do idia hadoa totona, bona aniani ia henia, do idia ania totona. Ia ese uhe umui dekenai do ia henia, bona do ia hatubua bada. Bona ia ese emui bogahisihisi kara namodia dekenai amo huahua momo do ia havaraia. ¹¹ Oibe, Dirava ese nega ibounai emui kohu do ia habadaia, vadaeni bogahisihisi kara momo do umui karaia diba. Unai dekenai amo taunimanima momo ese Dirava do idia hanamoa, umui emui harihari gaudia dainai, ai ese idia dekenai ai abia lao gaudia be unai. ¹² Badina be emui harihari gaudia ese Dirava ena taudia idia durua bada, idia dekenai hegeregere lasi gaudia ibounai idia davaria vadaeni. To inai sibona lasi, emui harihari gaudia ese Dirava hanamoa henia kara ia habadaia noho danu. ¹³ Inai umui ese umui karaia durua gaukara ese emui abidama kara ia hedinarai. Iseda Keristani varavara taudia ibounai do idia diba umui ese Dirava ena hereva umui badinaia, bona Keriso ena Sivarai Namona umui gwauraia hedinarai. Bona emui harihari gaudia idia dekenai bona haida dekenai danu idia itaia neganai, Dirava do idia hanamoa bada. ¹⁴ Idia ese umui do idia lalokau henia, bona Dirava do idia noia, ia ese umui do ia hanamoa. Badina korikori be, Dirava ena hariharibada be umui dekenai ia noho momokani dainai. ¹⁵ Namona be Dirava ita hanamoa bada, iena hariharibada namo herea momokani dainai. Inai

hariharibada ia bada herea dainai, iena anina be, tau ta ia gwauraiia namonamo diba lasi.

10

Paulo dekenai haida idia maumau

¹ Lau Paulo lau ura Keriso ena kara do umui lalao. Keriso ena manau bona iena manada dainai umui dekenai noinoi ta do lau gwauraiia. Umui haida idia hereva, idia gwau, “Paulo be ita dekenai neganai, ia be mai manau bona mai manoka danu, to daudau ia noho neganai ai ia gwau henia.” ² Io, laugu noinoi be inai: Lau be umui dekenai do lau mai neganai, do umui noho namonamo. Lau ura lasi umui do lau gwau henia. To lau lalao haida idia gwau ai be tanobada taudia edia kara sibona ai karaia. Unai bamona idia gwau taudia do lau gwau henia. ³ Momokani ai be tanobada dekenai ai noho, to aiemai tuari be tanobada taudia edia tuari bamona lasi. ⁴ Badina be aiemai tuari gaudia be tanobada ena tuari gaudia bamona lasi. Lasi, to Dirava dekena amo ia mai siahuna ai ese ai gaukaralaia, ia ese tanobada ena siahu ia haorea diba. ⁵ Hepapahuahu hereva koikoi ai koua noho. Bona Dirava ena diari idia tahua taudia edia dala koua gwauraiia taudia danu ai koua noho. Ma inai danu, ai ese taunimanima edia lalao ai guia noho, Keriso do idia kamoni henia totona. ⁶ Ai be ai noho hegaegae bona ai naria noho. Vadaeni bema ai itaia emui kamoni ai dekenai be momokani neganai, ai ese kamoni lasi taudia ibounai edia kerere davana do ai henia.

⁷ Umui be tau ena toana sibona umui lalao, ani? Umui ta ia lalao ia be Keriso ena? Namona be ia lalao lou, bona do ia diba, ai danu be Keriso ena, ia hegeregere. ⁸ Lohiabada ese ai dekenai siahu ia henia, umui emui abidadama do ai hagoadaia totona. Inai siahu be umui hadikaia totona lasi. Bema lau ese inai aiemai gaukara totona lau heagi neganai, lau be lau hemarai lasi. ⁹ Lau ura lasi umui lalao, umui hagarai totona inai revareva lau torea inai. ¹⁰ Momokani, haida be inai bamona idia hereva, idia gwau, “Paulo ena revareva be mai metau bona mai siahu danu, to ia sibona ita dekenai ia ginidae, bona iena tauanina ita itaia neganai, ia be manoka bona iena hereva be mamina lasi.” ¹¹ Unai hereva ia gwauraiia noho tauna be namo ia lalao namonamo bona diba inai bamona: Daudau ai noho neganai hereva ai torea umui dekenai. Bona umui dekenai do ai ginidae neganai, aiemai kara be do aiemai torea gauna hegeregere, idau sisina lasi.

¹² Ai lalao lasi, ai be unai tau haida hegeregere, idia sibona idia hanamo noho. Bona ai ura lasi idia edia kara bona aiemai kara be tamona. Lasi momokani. Inai taudia be idia sibona edia kara, bona idia edia huanai idia noho taudia edia kara danu idia makaia, bona idia hahegeregere. Madi, idia be aonega lasi. ¹³ To Dirava ese ai dekenai ia henia siahu be mai ena maka, bona aiemai heagi ese inai maka do ia hanaia lasi. Oibe, Dirava ese ai dekenai ia henia gaukara sibona do ai karaia. Umui be aiemai gaukara ena maka lalonai. ¹⁴ Umui emui huanai ai gaukara bona ai hadibaia be maoro, bona ai ese aiemai siahu ena maka ai hanaia lasi. Badina be inai: Ai be tau ginigunadia Keriso ena Sivarai Namona umui dekenai ai harorolaia. ¹⁵ Haida ese umui emui huanai idia gaukara, bona unai gaukara be aiemai maka ena murimurina. Edia gaukara dainai hanamo hereva ai tahua lasi. To aiemai ura korikori be inai: Umui emui abidadama do ia tubu badabada. Vadaeni emui huanai aiemai gaukara do ai habadaia diba, to

Dirava ia atoa maka do ai hanaia lasi. ¹⁶ Unai murinai umui emui gabu ena murinai kahana tanodia dekenai Sivarai Namona do ai harorolaia. Badina ai ura lasi idau tauna ia karaia vadaeni gaukara, be ai ese do ai hekokorokulaia.

¹⁷ To Buka Helaga ese inai bamona ia torea, ia gwau:

“Tau ta bema ia ura do ia heagi,
ia ese Lohiabada sibona do ia heagilaia.”

¹⁸ Badina be bema tau ta sibona ia hanamoa neganai, inai be anina lasi Dirava ena vairanai. To bema tau ta Dirava ese ia hanamoa neganai, inai be hanamoa momokani.

11

Aposetolo koikoidia be Paulo ese edia kara ia hedinarai

¹ Mani emui kara lauegu hereva kavakava sisina do umui kamoni. Mani lauegu hereva dekenai umui hesiku lasi, umui haheauka noho.

² Badina be Dirava ena mama namona hegeregere, lau ese umui totona lau mama henia. Umui be kekeni namona, tau ia diba lasi kekenina bamona. Lau ese emui maoheni lau karaia vadaeni tau tamona dekenai, Keriso sibona. ³ To gaigai ese Heva ia koia hegeregere, lau gari inai, namo lasi laloa idau idau ese umui do idia hakau kerere, vadaeni emui lalokau goevagoeva Keriso dekenai do umui rakatania. ⁴ Badina be tau haida ese umui dekenai Iesu idauna idia harorolaia, ai ese ai harorolaia hegeregere lasi, be edia hereva umui kamoni henia noho, bona umui abia dae. Ma umui ese lauma idauna bona sivarai idauna umui abia dae, ai ese Lauma bona Sivarai Namona ai harorolaia hegeregere lasi.

⁵ Kamoni! Lau laloa inai emui “apostolo taudia namo herea” ese lau idia hereaia lasi! ⁶ Sedira lauegu hereva be mamina lasi, to egu diba be maragi lasi. Inai be diba momokani, bona nega ibounai inai diba umui dekenai ai hedinarai vadaeni.

⁷ Umui diba vadaeni, lau ese Sivarai Namona umui dekenai lau harorolaia, bona davana lau abia lasi. Lauegu kara be manau, umui do lau matauraia totona. Unai dainai lau kerere, a? ⁸ Umui emui huanai lau gaukara neganai, ekalesia orea idaudia ese lauegu davana idia henia. Idia edia kohu lau henaoa bamona, umui lau durua totona. ⁹ Bona umui dekenai lau noho neganai nega haida lau be moni hegeregere lasi, to umui dekenai lau noia lasi. Badina be lau dekenai idia hegeregere lasi gaudia be Makedonia Keristani taudia ese lau dekenai idia siaia mai. Hekwarahi o metau umui dekenai lau henia lasi, bona vaira neganai danu do lau henia lasi. ¹⁰ Keriso ena hereva momokani lauegu lalona dekenai ia noho. Inai be momokani dainai, Akai kahana ibounai dekenai egu kara do lau heagilaia noho, doko lasi. ¹¹ Inai bamona lau hereva, be umui lau lalokau henia lasi dainai, a? Lasi momokani. Dirava ia diba vadaeni, umui lau lalokau henia.

¹² To unai tau haida idia ura sibodia edia ladana idia abia isi, vadaeni taunimanima do idia laloa unai taudia edia kara be ai apostolo emui kara hegeregere. Inai taudia edia dala koua totona lau gaukara noho. Bona unai dainai egu gaukara be ma do lau karaia noho. ¹³ Unai taudia be apostolo koikoidia, gaukara koikoi taudia, Keriso ena apostolo momokani lasi. ¹⁴ To unai be hoa gauna lasi. Badina be Satani sibona ese iena kara ia senisia diba, bona ia ese diari aneruna ena kopina ia atoa diba. ¹⁵ Unai dainai Satani ena hesiai taudia, bema edia kara idia senisia, bona taunimanima edia vairanai idia be kara maoromaoro

taudia bamona, inai be hoa gauna, a? To dokona neganai, edia kara hegeregere na davana do idia abia.

Iena aposetolo dagi dainai Paulo ia hisihisi

¹⁶ Guna lau hereva bamona, ma lau hereva lou. Tau ta do ia laloe lasi lau be kavakava. To bema unai bamona umui laloe neganai, lau do umui haheauka henia, kavakava tauna umui haheauka henia bamona, vadaeni sisina do lau heagi diba. ¹⁷ Harihari umui lau hamaoroa hereva be Lohiabada dekena amo lasi. Lau be sibona lau hereva kava noho, bona lau heagi kava noho. ¹⁸ To taunimanima momo ese tanobada edia kara bamona, edia tauanina kara idia heagilaia. Vadaeni lau danu unai bamona do lau karaia. ¹⁹ Umui be aonega taudia, to kavakava taudia edia hereva umui abia dae, mai moale danu. ²⁰ Oibe, bema tau ta ese umui ia guia, iena gaukara do umui karaia totona, o bema emui aniani ia haorea, o bema umui ia koia, o bema umui dekenai ia hereva dagedage, o bema emui vairana ia botia, inai kara ibounai umui haheauka diba. ²¹ Ai hemarai noho, ai be manoka dainai unai bamona ai karaia lasi, a?

To bema tau ta ia heagi, lau danu lau heagi diba. Kavakava tauna bamona lau hereva noho. ²² Idia be Heberu taudia, a? Lau danu. Idia be Israela besena, a? Lau danu. Idia be Aberahamo ena tubuna, a? Lau danu. ²³ Idia be Keriso ena hesiai taudia, a? Lau ese idia lau hereaia noho. Lau hereva kava noho, a? Lau hekwarahi bada, idia be sisina, badina dibura ruma lalonai nega momo lau idia koua, lau idia kwadia nega momo, bona nega momo kahirakahira lau mase. ²⁴ Nega 5 Iuda taudia ese kwadi 39 dekenai lau idia kwadia. ²⁵ Nega toi au dekenai lau idia dadabaia. Nega ta nadi dekenai lau idia hodoa. Nega toi lagatoi be davara dekenai ia dika, vadaeni davara lalonai kahirakahira lau boio. Hanuaboi ta bona dina ta davara dekenai lau hure. ²⁶ Lauegu laolao be momo, ma sinavai abata edia lalonai kahirakahira lau mase. Henaoa taudia ese lau idia hadikaia. Lauegu bese taudia ese lau idia hadikaia. Idu bese taudia danu lau idia hadikaia. Hanua lalonai lau be dika, bona taunimanima idia noho lasi gabudia dekenai lau be dika. Davara bada dekenai lau dika. Bona varavara koikoi taudia ese lau idia hadikaia. ²⁷ Gaukara bada bona hekwarahi bada lau karaia vadaeni. Nega momo lau be mahuta dala lasi. Nega momo lau hitolo bona ranu mase, bona aniani ania lasi taravatu lau karaia. Nega momo keru ena mamina lau abia momokani, bona lauegu dabua be hegeregere lasi. ²⁸ Inai tauanina gaudia sibona lasi, to lauegu lalona danu dina ibounai ia hekwarahi, ekalesia orea ibounai lau naria dainai. ²⁹ Bema Keristani tauna ta ia manoka neganai, lau danu iena manoka ena mamina lau abia. Bema Keristani tauna ta idia hakaua kerere, vadaeni ia moru neganai, ia dainai egu lalona ia hekwarahi, mai siahu bada.

³⁰ Bema lau heagi neganai, lauegu manoka do lau heagilaia. ³¹ Dirava, iseda Lohiabada Iesu Keriso ena Tamana, do idia hanamoana hanaihanai Diravana, ia be ia diba lau koikoi lasi. ³² Damaseko dekenai lau noho neganai, King Areta ena gavana tauna ese Damaseko magu ena iduara dekenai gima taudia ia atoa, lau idia guia totona. ³³ To varavara taudia haida ese bosea lalonai lau idia udaia, magu ena uindo dekena amo lau idia atoa diho. Vadaeni unai gavana ena imana dekena amo lau heau mauri.

12

Mata hanai dekena amo Dirava ese Paulo ia hereva henia

¹ Heagi be namo lasi. To ma do lau heagi lou. Lau ura Lohiabada ese lau ia henia mata hanai bona lau dekenai ia hedinarai herevadia do lau herevalaia. ² Keriso ena tauna ta lau diba, lagani 14 idia lao vadaeni, ia idia abia daekau guba ena atai dekenai momokani. Lau diba lasi inai be ia vara momokani, o bema mata hanai sibona lalonai ia vara. Dirava sibona ia diba. ³ Inai tau be lau diba, Dirava ese ia abia daekau Paradaiso dekenai. ⁴ Sedira ia vara momokani o mata hanai lalonai ia itaia, lau diba lasi, Dirava sibona ia diba. Paradaiso dekenai inai tau be hunia hereva ia kamoni, taunimanima idia gwaurai diba lasi herevadia. ⁵ Unai tau lau heagilaia diba, to lau sibona do lau heagilaia lasi. Laegu manokamanoka sibona do lau heagilaia diba. ⁶ Bema lau ura heagi negani, lau be heagi kava lasi, badina be hereva momokani lau gwaurai noho. To lau be do lau heagi lasi, badina lau ura lasi tau ta ia laloa lau be namo herea momokani. Lau ura umui ese egu kara do umui itaia, bona egu hereva do umui kamoni, bona unai dekena amo, lau totona do umui laloa maoromaoro.

Ginigini ese Paulo ia hahisia

⁷ Inai hereva, Dirava ese lau dekenai ia hedinarai, be gau bada herea momokani. Inai lau itaia gaudia dainai do lau hekokoroku garina, Dirava ese ginigini ta, Satani ena hesiai tauna bamona, lau dekenai ia henia. Inai ginigini ia henia be laegu kopina do ia gwadaia totona, do lau hekokoroku garina. ⁸ Nega toi Lohiabada dekenai lau guriguri, lau noia ia ese inai hisihisi do ia kokia. ⁹ To ia ese lau ia hamaoroa, ia gwau, “Laegu hariharibada be oi dekenai ia hegeregere momokani vadaeni. Badina be laegu siahu be manokamanoka tauna lalonai ia hedinarai momokani.” Unai dainai, laegu manoka do lau heagilaia mai moale danu, vadaeni Keriso ena siahu lau dekenai do ia noho. ¹⁰ Unai dainai Keriso dainai lau gaukara lalonai, bema lau manoka, o haida ese lau idia hadikaia, o metau, o hisihisi, o dagedage, o hekwarahi lau davaria negani do lau moalelaia. Badina be lau manoka negani, unai be Dirava ena goada lau abia.

Paulo ese Korinto taudia ia laloa momo

¹¹ Lau be kava bamona lau karaia, to umui ese inai dala dekenai lau umui doria vadaeni. Badina be umui ese lau umui hanamo be maoro. To inai bamona umui karaia lasi. Momokani, lau be gau ta lasi. To unai emui “apostolo taudia namo herea” ese lau idia hereaia lasi. ¹² Umui dekenai lau noho negani, toa bona hoa karadia lau karaia gaudia ese egu apostolo lagi idia hamomokania. Mai siahu bona mai haheauka danu umui emui huanai unai kara lau karaia. ¹³ Edena gau ekalesia ore a ibounai lau henia, to umui dekenai lau henia lasi, a? Inai gau tamona sibona, ani, laegu gaukara davana lau noia lasi. Mani emui kara, inai laegu dika tamona do umui gwauatao, a?

¹⁴ Hari be nega ihatoina, lau hegaegae vadaeni, umui do lau vadivadi henia lou. Bona hekwarahi umui dekenai do lau henia lasi. Umui emui moni do lau tahua lasi, lasi momokani. Umui sibona do lau ura henia. Badina be memero maragi ese moni idia haboua lasi tamadia sinadia totona. To tamadia sinadia ese moni idia haboua edia natudia totona. ¹⁵ Lau be mai moale danu egu kohu do lau haorea, egu tauanina danu do lau haorea, umui emui laumadia do lau ubua totona. Lau ese umui lau

lalokau henia bada, unai dainai umui ese lau umui lalokau henia sisina, a?

¹⁶ To umui haida ese egu kara umui herevalaia, inai bamona: “Momokani, Paulo ese hekwarahi ita dekenai ia henia lasi. To ia be koikoi tauna, bona ita ia abia, hereva koikoi dekenai.” ¹⁷ Edena bamona? Umui dekenai lau siaia taudia dekena amo umui emui kohu haida lau abia, a? ¹⁸ Tito lau noia, vadaeni iseda varavara ta ia danu umui dekenai lau siaia lao. Be, Tito ese emui kohu ia abia, a? Tito bona lau be mai aiemai Lauma Helaga tamona. Ia ese ai ia hakaua noho, bona aiemai kara be tamona, aiemai dala danu tamona.

¹⁹ Sedira umui laloka inai revareva ai torea noho be aiemai kara do ai hamaoromaoroa totona, umui emui vairanai. Lasi, inai totona lasi! Ai be Keriso ena taudia, bona ai ese Dirava ena vairana dekenai ai hereva noho. Egu lalokau taudia e, aiemai ura tamona be umui do ai hagoadaia sibona. ²⁰ Lau be lau gari, do lau ginidae neganai, umui do lau davaria, lauegu ura hegeregerena lasi. Umui ese danu lau do umui davaria, umui emui ura hegeregerena lasi. Vadaeni heai, mama, badu, dagedage, samania koikoi, maumau, hekokoroku bona laloka tamona hadikaia kara, inai kara ibounai do idia vara garina. ²¹ Lau gari danu, lau ginidae neganai egu Dirava ese lau do ia hahemaraia umui emui vairanai. Bona kara dika taudia momo totona do lau tai, badina be edia matabodaga, edia heudahanai, edia lebulebu kara dekena amo edia lalona idia giroa lasi dainai.

13

Sisiba hereva bona hanamoa hereva

¹ Nega ihatoina be inai, umui dekenai do lau mai. Buka Helaga ese inai bamona ia hereva, ia gwau, “Samania hereva be tau rua o toi ese do idia hamomokania.” ² Kara dika umui karaia guna taudia e, bona umui ibounai danu, lauegu sisiba umui kamoni! Nega iharuana umui dekenai lau mai neganai, umui lau sisiba henia, bona hari danu daudau dekena amo ma lau sisiba henia lou inai bamona: Do lau giroa mai neganai, dika taudia do lau panisia momokani, do lau bogahisihisi lasi. ³ Do umui diba momokani, Keriso be lau dekena amo ia hereva noho. Keriso be umui dekenai do ia manoka lasi. Ia ese iena siahu do ia hedinarai, vadaeni mamina do umui abia. ⁴ Momokani, ia be manoka dainai satauro dekenai ia mase, to Dirava ena siahu dainai hari ia mauri noho. Ai be ia danu ai hapua dainai ai be manoka, to Dirava ena siahu dainai ai mauri noho Keriso danu. Bona inai siahu be umui emui huanai do ai gaukaralaia.

⁵ Umui sibona emui kara do umui tahua, bona emui mauri do umui tohoa, umui be abidadama korikori taudia o lasi. Umui diba momokani, Iesu Keriso be umui emui kudouna dekenai ia noho? Bema lasi neganai, umui be ia umui negea vadaeni taudia. ⁶ Lau ura umui diba ai be Keriso ai negea lasi taudia. ⁷ Dirava ai noia noho, ia ese umui do ia durua, vadaeni do umui kara dika lasi. Inai bamona ai ura, haida ese aiemai gaukara idia hanamoa totona, a? Lasi momokani. Badina be aiemai ura korikori be inai: Umui be kara maoromaoro taudia momokani. Bona umui be inai bamona neganai, haida ese bema ai idia gwauraia kerere, be do ai laloka lasi. ⁸ Badina ita be hegeregere lasi hereva momokani do ita hadikaia. Lasi momokani. Hereva momokani ita durua diba sibona. ⁹ Ai be manoka, bona umui be goada neganai ai be ai moale noho. Aiemai noinoi tamona be inai, do umui namo momokani. ¹⁰ Unai dainai daudau

dekena amo umui lau torea henia, vadaeni do lau ginidae neganai, umui do lau badu henia lasi. Lohiabada ese siahu lau dekenai ia henia, to lau ura lasi inai siahu ena mamina umui abia. Inai siahu lau dekenai ia henia be umui haginia totona, hadikaia totona lasi.

Bamahuta herevana

¹¹Lauegu varavara e, hereva dokona be inai: Do umui moale, do umui namo momokani, do umui goada, do umui laloa tamona, maino lalonai do umui noho. Bona lalokau bona maino ena Dirava ese umui danu do ia noho.

¹²Umui ta ta dekenai ekalesia ena lalokau kisi do umui henia.

¹³Dirava ena taudia ibounai ese edia hanamoā idia siaia inai.

¹⁴Lohiabada Iesu Keriso ena hariharibada, Dirava ena lalokau, bona Lauma Helaga ena turana kara be umui ibounai dekenai do idia noho.

PAULO ENA REVAREVA GALATIA TAUDIA DEKENAI

¹ Lau inai aposetolo tauna Paulo. Inai aposetolo dagi be taunimanima dekena amo lau abia lasi. Taunimanima ese lau dekenai inai dagi idia henia lasi. To inai dagi be Iesu Keriso bona Tamana Dirava ese lau dekenai idia henia. Dirava ese Keriso mase dekena amo ia hatorea isi lou. ² Lau bona lau dekenai iniseni idia noho varavara taudia ibounai ese umui Galatia ekalesia orea taudia dekenai aiemai hanamoa ai siaia inai.

³ Iseda Tamana Dirava bona Lohiabada Iesu Keriso ese hariharibada bona maino umui dekenai idia henia be namo.

⁴ Keriso ese iseda Tamana Dirava ena ura hegeregere ia karaia. Ia sibona ena mauri ia atoa diho iseda kara dika davana karaia totona. Keriso be inai bamona ia karaia, inai hari tanobada ena dika dekena amo ita do ia hamauria totona. ⁵ Namu be Dirava ita hanamoa hanaihanai! Amen.

Sivarai Namona tamona ia noho, haida be lasi

⁶ Umui dekenai lau hoa, badina be kerere bada umui karaia vadaeni. Dirava ia boiboi umui dekenai, Keriso ena hariharibada dekena amo, to umui ese karaharaga umui rakatania, ma sivarai idauna ta umui badinaia noho. ⁷ To sivarai idauna ta ia noho lasi. Tau haida ese emui laloe idia hadikaia gwauria, bona idia ura Keriso ena Sivarai Namona idia hagagevaia. ⁸ To bema ai ese, o guba ena aneru ta ese sivarai idauna, guna ai haroro gauna bamona lasi, ai harorolaia neganai, Dirava ese ai bona idia do ia hadikaia ore be namo. ⁹ Guna lau gwauria vadaeni, ma harihari lau gwauria lou. Bema tau ta ese sivarai idauna ta umui dekenai ia haroro henia, guna umui abia dae gauna bamona lasi, unai tau Dirava ese do ia hadikaia ore be namo.

¹⁰ Taunimanima lau dekenai idia moale totona inai bamona lau hereva, a? Lasi momokani! Lau ura gauna be Dirava ena hanamoa sibona! Lau ura be taunimanima ibounai ese lau idia ura henia, a? Lasi, bema inai bamona lau tahua, lau be Keriso ena hesiai tauna lasi.

Paulo ese aposetolo dagi ia abia dalana

¹¹ Lauegu varavara taudia e, Sivarai Namona lau harorolaia noho gauna be taunimanima ese idia havaraia lasi. ¹² Taunimanima dekena amo lau abia lasi. Taunimanima ese lau idia hadibaia lasi. To Iesu Keriso sibona ese lauegu lalona dekenai ia hedinaia.

¹³ Gunaguna Iuda taudia edia orea lalonai lau noho neganai lau karaia karadia ena sivarai umui kamona vadaeni. Dirava ena ekalesia orea lau dagedage henia, lau hadikaia mai bogahisihisi lasi. ¹⁴ Lauegu bese Iuda taudia edia huanai, lauegu mauri lagani hegeregere taudia edia huanai lau be hereadae guriguri karadia dekenai. Bona aiemai sene karadia danu lau goadalaia dikadika, tau haida bamona lasi.

¹⁵ To lau be do vara lasi neganai, Dirava ese iena hariharibada dekena amo lau ia abia hidi. Lau dekenai ia boiboi, iena hesiai gaukara do lau karaia totona. Unai boiboi ena nega ia laloe neganai, ¹⁶ Dirava ese iena Natuna lau dekenai ia hedinaia, iena Sivarai Namona Iuda lasi bese taudia dekenai do lau haroro henia totona. Momokani, iena Natuna be lau dekenai ia hedinaia neganai, lau ese tau ta ena sisiba lau tahua

lasi. ¹⁷ Bona lau idia gunalaia aposetolo taudia Ierusalem dekenai lau lao lasi. To Arabia dekenai lau lao. Unai murinai lau giroa lou Damaseko dekenai.

¹⁸ Lagani toi murinai Ierusalem dekenai lau lao, Petero danu do ai herevahereva totona. Ia danu lau noho dina 15 sibona. ¹⁹ Aposetolo haida be lau itaia lasi, Iamesi, Lohiabada ena tadina sibona lau itaia.

²⁰ Lau torea noho gauna be momokani. Dirava ia diba lau koikoi lasi.

²¹ Ierusalem lau rakatania, Suria bona Kilikia kahana dekenai lau lao. ²² To unai neganai, Keriso ena ekalesia taudia Iudea dekenai be lau danu idia hedavari lasi. ²³ Taunimanima idia gwauraia loaloa sivaraina sibona idia diba, gauna be inai, "Guna inai tau ese ita ia dagedage henia, to hari ia be Sivarai Namona ia harorolaia noho. Iseda abidadama, guna ia haorea toho gauna be hari ia ese ia harorolaia noho!" ²⁴ Idia kamoni, Dirava ese inai bamona ia karaia lau dekenai, vadaeni Dirava idia hanamoa bada.

2

Aposetolo taudia ese Paulo idia abia dae

¹ Lagani 14 ia ore murinai Ierusalem dekenai ma lau giroa lou. Banaba ese lau ia bamoa. Tito danu lau danu ai lao. ² Dirava ese lau ia hadibaia dainai lau lao. Sivarai Namona Iuda lasi bese taudia dekenai lau harorolaia gauna, be Ierusalem Keristani taudia dekenai do lau hamaorolaia gwauraia. To lau ese ekalesia gunalaia taudia sibona lau hamaorodia. Inai bamona lau karaia, lau karaia vadaeni gaukara, bona do lau karaia gaukara, be do idia koua lasi totona. ³ Egu bamona Tito be Helene tauna, to unai hebou taudia ese idia hamaoroa lasi kopina utua kara do ia abia. ⁴ Haida sibona idia ura Tito be kopina utua kara ia abia. To idia be ekalesia koikoi taudia. Hunia dekenai hebou lalonai idia vareai, aiemai mauri mai kwalimu danu, Keriso Iesu lalonai ai abia gauna, do idia itaia totona. Inai taudia idia ura Iuda edia taravatu lalonai ai idia guia lou. ⁵ To ai be ai manoka lasi, bona edia ura Tito totona ai kamoni henia lasi, lasi bona lasi momokani. Inai ai karaia, be Sivarai Namona ena momokani umui ese do umui badinaia goada noho totona.

⁶ Unai ekalesia ena gunalaia taudia badadia ese egu haroro gaukara ena sivarai idia kamoni, to dala matamata ta idia gwauraia lasi. Lasi momokani. Tau haida edia toana be gunalaia taudia, to idia lau laloa momo lasi. Edia dagi be herevana, badina be Dirava ese taunimanima edia toana ia laloa lasi. ⁷ To unai gunalaia taudia ese idia itaia momokani, Dirava ese Iuda lasi taudia dekenai haroro gaukara be lau dekenai ia henia vadaeni. Bona hegeregere danu, Dirava ese Iuda taudia dekenai haroro gaukara be Petero dekenai ia henia. ⁸ Badina Dirava ese iena sياهو dekena amo, Iuda lasi taudia edia aposetolo lau ia halaoa. Hegeregere danu, Iuda taudia edia aposetolo Petero ia halaoa. ⁹ Iamesi bona Petero bona Ioane, edia toana be ekalesia gunalaia taudia. Idia itaia momokani Dirava ese inai gaukara badana lau dekenai ia henia vadaeni. Unai dainai idia ese Banaba bona lau, aiemai imana idibana idia abia, varavara hanamoa ena toana. Vadaeni ai laloa tamona, Banaba bona lau be Iuda lasi taudia edia huanai do ai gaukara, to idia be Iuda taudia edia huanai do idia gaukara. ¹⁰ Idia be noinoi tamona idia gwauraia, idia gwau, "Umui ese aiemai orea ena ogogami taudia do umui laloa be namo." Inai noinoi mai moale danu lau abia dae, badina be hanaihanai lau laloa noho gauna be inai.

Paulo ese Petero ia gwau henia Antioka dekenai

¹¹ To Petero be Antioka dekenai ia mai neganai, lau ese Keristani taudia edia vairanai ia lau gwau henia, badina ia be kerere. ¹² Petero be Antioka hanua dekenai ia ginidae matamata neganai, ia be Iuda lasi taudia danu idia aniani hebou. To gabeai Iamesi ese iena turana haida ia siaidia unuseri. Idia ginidae neganai, Petero ese nega tamona Iuda lasi taudia dekena amo ia raka siri, bona idia danu ia aniani lasi. Petero ese unai bamona ia karaia, badina kopina utua kara idia goadalaia taudia dekenai ia gari dainai. ¹³ Iuda Keristani taudia haida danu ese Petero bamona idia karaia. Unai be Keristani koikoi edia kara. Banaba danu be edia koikoi ese iena lalona ia ania. ¹⁴ To lau ese idia lau itaia, idia raka maoromaoro lasi, bona Sivarai Namona ena momokani idia badinaia lasi. Unai neganai idia ibounai edia vairanai Petero lau gwau henia, lau gwau, “Oi be Iuda tauna, to Iuda lasi tauna bamona oi noho, Iuda tauna bamona lasi. Unai dainai edena bamona Iuda lasi taudia oi hamaorodia goada, Iuda taudia hegeregere idia noho?”

Iuda bona Iuda lasi taudia danu, be edia abidadama Iesu Keriso dekena amo mauri idia davaria

¹⁵ Momokani ita be Iuda taudia korikori iseda vara dekena amo. Ita be Iuda lasi besedia dekena amo lasi, Iuda taudia idia gwau unai be kara dika besedia. ¹⁶ To ita diba Dirava ena vairanai tau ta lasi be maoromaoro Taravatu ia badinaia dekena amo. Lasi, to Dirava ena vairanai ita maoromaoro dalana be tamona, gauna be inai: Iesu Keriso bema ita abidadama henia neganai. Ita danu ese Keriso Iesu ita abidadama henia, Dirava ena vairanai do ita maoromaoro totona. Oibe, ita abidadama henia Keriso dekenai, Taravatu badinaia kara dekenai lasi, badina be tau ta lasi be maoromaoro Dirava ena vairanai, Taravatu ia badinaia dekena amo.

¹⁷ Oibe, ita Iuda taudia be Keriso ita abidadama henia dalana dekena amo Dirava ena vairanai maoromaoro ita tahu. To bema ita be inai bamona ita maoromaoro gwauraia neganai ita ese Iuda lasi taudia bamona ita kara dika, inai anina be dahaka? Inai anina be Keriso ese kara dika ia havaraia, a? Lasi momokani! ¹⁸ Bema Taravatu dalana ta lau makohia, ma gabeai lau haginia lou gwauraia, unai be, taunimanima do idia gwau lau be Taravatu utua tauna. ¹⁹ To Taravatu ese lau ia hamasea vadaeni, unai dainai lau dekenai Taravatu ena siahu ia ore, bona egu mauri do ia biagua lou diba lasi. Inai bamona ia vara dainai lau be Dirava dekenai lau mauri. ²⁰ Lau be Keriso danu iena satauro dekenai lau mase vadaeni. To hari lau mauri noho, be lauegu mauri lasi, to Keriso be egu lalona dekenai ia mauri noho. Bona inai mauri, egu tauanina lalonai ia noho gauna, be Dirava ena Natuna lau abidadama henia dainai lau mauri noho. Ia ese lau ia lalokau henia, bona lau dainai iena mauri ia atoa diho. ²¹ Dirava ena hariharibada do lau negea lasi, lasi momokani. To bema tau ta be Taravatu ia badinaia dekena amo Dirava ena vairanai maoromaoro ia abia, inai anina be Keriso ena mase be anina lasi.

3

Taravatu do ita badinaia, o Keriso do ita abidadama henia?

¹ Galatia taudia e, kavakava taudia, lau ese Iesu Keriso umui dekenai lau hedinarai vadaeni. Unai be hegeregere emui matana dekenai Keriso ena mase satauro dekenai umui itaia bamona! To hari be daika ese iena meamea dekena amo umui ia koia? ² Lau ura gau tamona umui

lau nanadaia: Dirava ena Lauma Helaga edena bamona umui abia? Taravatu umui badinaia dainai, o Sivarai Namona umui kamoni henia bona abia dae dainai? ³ Umui be kava, a? Dirava ena Lauma dekenai gaukara umui hamatamaia, to umui ura be sibona emui goada dekenai umui karaia haorea, a? ⁴ Hisihisi momo umui abia, be umui abia kava, a? Unai hisihisi be sedira mai anina lau laloa! ⁵ Badina dahaka Dirava ese iena Lauma Helaga umui dekenai ia henia, bona hoa karadia umui emui huanai ia karaia? Taravatu umui badinaia namonamo dainai ia henia, a? O Sivarai Namona umui kamoni henia bona abia dae dainai, a?

⁶ Aberahamo ena kara mani umui laloa. Buka Helaga ia gwau, “Aberahamo ese Dirava ia abidadama henia, bona iena abidadama dainai Dirava ese maoromaoro ia gwauria vadaeni.” ⁷ Unai dainai, namona be inai gau umui diba momokani: Dirava idia abidadama henia taudia be Aberahamo ena natuna korikori. ⁸ Buka Helaga danu ia gwauria guna, Dirava ese Iuda lasi taudia edia abidadama dainai do ia gwauria maoromaoro. Unai dainai Buka Helaga lalonai inai Sivarai Namona ena hereva ia henia Aberahamo dekenai, ia gwau: “Tanobada besedia ibounai be oi dainai namo bada do idia davaria.” ⁹ Aberahamo ese iena abidadama dainai namo bada ia davaria. Unai dainai Dirava idia abidadama henia taudia ibounai ese namo bada do idia davaria, Aberahamo ia davaria bamona.

¹⁰ Haida idia laloa Taravatu idia badinaia dainai Dirava ese idia do ia gwauria maoromaoro. Inai bamona taudia be do idia dika momokani! Badina be Buka Helaga be inai bamona ia gwau: “Daika tauna Taravatu ena hereva ta ta ibounai ia badinaia lasi, be Dirava ese unai tau do ia gwauria dika momokani.” ¹¹ Hari ita diba tau ta be Dirava ena vairanai ia maoromaoro diba lasi Taravatu ia badinaia dekena amo. Badina be Buka Helaga inai bamona ia torea: “Abidadama dainai Dirava ena vairanai ia maoromaoro tauna, inai tau sibona ia mauri diba.” ¹² To Taravatu be idau, abidadama danu be idau. Badina Buka Helaga inai bamona ia torea, ia gwau: “Taravatu ena hereva ta ta ibounai ia badinaia tauna ese mauri do ia davaria.”

¹³ Taravatu ia gwau, ita ese Taravatu ena hereva ibounai ita badinaia lasi dainai, ita be kerere davana dika momokani do ita davaria. To ita hamauria totona, Keriso ese inai ladana ia abia: “dika momokani tauna”, bona inai dekena amo ia ese ita ia hoia lou. Bona Buka Helaga ia torea, ia gwau: “Au dekenai idia taua dae, idia mase taudia ibounai be Dirava ese dika momokani ia gwauria.” ¹⁴ Keriso ese inai bamona ia karaia, badina be Dirava ia ura iena gwauhamata Aberahamo dekenai do ia momokani totona. Oibe, Dirava ia gwauhamata, tanobada ena bese idau idau ibounai ese Iesu Keriso dekena amo hanamo do idia davaria. Unai hanamo be inai: Abidadama dainai Dirava ena gwauhamata Laumana do ita davaria.

Dirava ena Taravatu ese Dirava ena gwauhamata ia koua diba lasi

¹⁵ Laegu varavara taudia e, Dirava ena gwauhamata dalana be edena bamona? Ita taunimanima iseda kara bamona do lau herevalaia: Bema tatau rua ese gau ta totona idia laloa tamona, vadaeni gwauhamata ta idia sainia neganai, idia ta be gwauhamata ia makohia diba lasi. Bona ma hereva haida ia ato kau diba lasi unai gwauhamata haidau totona. ¹⁶ Dirava ese Aberahamo mai ena natuna dekenai gwauhamata ia karaia. Buka Helaga ia torea lasi “natuna momo”, to ia torea be “natuna” tamona sibona. Inai “Natuna” be Keriso. ¹⁷ Laegu hereva

ena anina be inai: Dirava ese Aberahamo dekenai gwauhamata badana ia henia, bona ia gwau, iena gwauhamata do ia badinaia momokani. Lagani 430 murinai Dirava ese Taravatu ia henia. Inai Taravatu ese Dirava ena gwauhamata badana ia makohia diba lasi. Taravatu ese Dirava ena hereva be anina lasi gauna do ia halaoa diba lasi. ¹⁸ Bema Taravatu ita badinaia dekena amo Dirava ese iena hanamoa gauna ita do ia henia neganai, ita diba gwauhamata dekena amo do ita abia diba lasi. To lasi. Gwauhamata sibona dekena amo Dirava ese inai hanamoa Aberahamo dekenai ia henia.

¹⁹ Vadaeni, Taravatu ena badina be dahaka? Ena badina be inai bamona: Dirava ia ura kara dika ena anina korikori taunimanima dekenai ia hedinarai. Unai dainai gwauhamata ia henia murinai, Dirava ese Taravatu ma ia atoa. Bona inai Taravatu do ia noho ela bona Keriso, Aberahamo ena natuna do ia ginidae. Unai Natuna dekenai be Dirava ese iena gwauhamata ia henia vadaeni. Inai Taravatu be aneru edia durua dekena amo Dirava ese huanai ia gini tauna Mose dekenai ia henia, vadaeni Mose ese unai Taravatu ia mailaia. ²⁰ To bema tau tamona sibona ia gaukara neganai, huanai ia gini tauna ena gaukara be lasi. Dirava be tamona, bona ia tamona ese Aberahamo dekenai gwauhamata ia henia.

Taravatu be naria tauna bamona, ita ia hakaua Keriso dekenai

²¹ Inai anina be, Taravatu ena hereva ese Dirava ena gwauhamata ia utua, a? Lasi momokani. Badina be bema taravatu ta ia noho, ia dekena amo taunimanima ese mauri idia davaria diba, vadaeni taunimanima ibounai be unai taravatu badinaia kara dekena amo Dirava ena vairanai do idia maoromaoro diba. ²² To Buka Helaga ia gwau taunimanima ibounai be kara dika ese ia guidia. Unai bamona ia torea, badina ita taunimanima bema Iesu Keriso ita abidadama henia neganai, Dirava ena gwauhamata harihari gauna be abidadama dainai do ita abia.

²³ Iesu abidadama henia ena nega do ginidae lasi neganai Taravatu ese ita ia guia. Oibe, ita ia guia noho ia mai bona abidadama ena nega ia hedinarai. ²⁴ Unai dainai Taravatu be iseda naria tauna bamona, ia mai bona Keriso ia ginidae. To Keriso ia ginidae neganai, abidadama dekena amo Dirava ena vairanai do ita maoromaoro diba. ²⁵ Harihari be abidadama ena nega ia ginidae vadaeni, Taravatu ese ita do ia naria lou lasi.

Abidadama dekena amo Dirava ena natuna do ita lao

²⁶ Umui ibounai be Dirava ena natuna, Keriso Iesu umui abidadama henia dainai. ²⁷ Bapatiso umui abia dainai, umui be Keriso danu umui hakapua vadaeni. Bona unai dainai Keriso ena mauri be dabua bamona umui kwatua noho. ²⁸ Unai dainai umui ta be idau lasi. Iuda taudia bona Iuda lasi taudia, idia guia hesiai taudia bona ura kwalimu taudia, tatau bona hahine, umui ibounai be tamona sibona. Keriso Iesu danu umui hakapua dainai umui ibounai be tamona. ²⁹ Bema umui be Keriso ena taudia neganai, umui be Aberahamo ena natuna, bona Dirava ena gwauhamata gauna do umui davaria.

4

Hesiai tauna be idau, natuna korikori danu be idau

¹ Ma lauegu hereva be inai: Natuna ese iena tamana ena gau dohere ia abia. Inai natuna be hegeregere unai gau ibounai edia biaguna. To ia be do mero neganai ia be hesiai tauna bamona ia noho. ² Ia be do

mero neganai, naria taudia ese ia idia naria, bona idia sisiba henia, iena kara ia namo totona, ela bona iena tamana ese ia makaia nega ia ginidae. ³ Ita danu, guna ita be maragidia bamona ita noho. Bona unai neganai ita be hesiai taudia, tanobada idia biagua laumadia edia siau henunai ita noho. ⁴ To nega korikori ia ginidae neganai, Dirava ese sibona ena Natuna ia siaia. Hahine ena bogana dekena amo ia vara, bona Iuda edia Taravatu henunai ia noho. ⁵ Ia mai be Taravatu henunai idia noho taudia hoia lou totona, Dirava ena natuna korikori do ita lao totona.

⁶ Umui be iena natuna do ia hamomokania totona, Dirava ese iena Natuna ena Lauma iseda kudouna lalonai ia atoa. Vadaeni inai Lauma ese inai bamona ia boibo, ia gwau, “Lauegu Tamana e, lauegu Tamana lalokau e!” ⁷ Unai dainai oi be hesiai tauna lou lasi. Bona oi be iena natuna dainai, Dirava ese iena gwauhamata gaudia ibounai, iena natuna ibounai do idia abia gaudia, be oi dekenai do ia henia.

Paulo ese Galatia taudia ia laloa momo

⁸ Gunaguna, umui be Dirava umui diba lasi. Unai dainai, unai neganai umui be dirava momokani lasi gaudia edia hesiai gaukara umui karaia. ⁹ To harihari Dirava umui diba vadaeni. Bona ma danu lau hereva — Dirava ese umui ia diba vadaeni. Unai dainai edena bamona tanobada idia biagua laumadia dekenai umui ura giroa lou? Idia be manoka bona anina lasi. Badina dahaka umui ura edia hesiai gaukara umui karaia lou? ¹⁰ Dina bona hua, aria negadia bona lagani matamata edia hadibaia hereva umui laloa be gau badadia. ¹¹ Lau be umui dainai lau laloa momo! Lau gari danu, umui totona lau hekwarahi kava garina!

¹² Lauegu varavara taudia e, umui dekenai lau noinoi, egu kara bamona do umui karaia, badina lau be umui bamona lau halaoa vadaeni. Guna umui ese nega ta lau umui hadikaia lasi. ¹³ Umui diba vadaeni, guna umui dekenai lau mai matamata neganai, lauegu tauanina ia gorere dainai Sivarai Namona umui dekenai lau harorolaia, ani? ¹⁴ Lauegu gorere be metau herea umui dekenai, to umui ese lau umui negea lasi, lau umui kirikirilaia lasi. Lasi momokani, to lau umui abia dae, aneru guba dekena amo do umui abia dae bamona. Lau umui abia dae, Keriso Iesu do umui abia dae bamona. ¹⁵ Unai neganai mai moale danu umui noho! To hari emui moale be edeseni? Lau diba unai neganai, bema dala ia noho, umui ese emui matana do umui kokia, lau dekenai do umui henia totona. ¹⁶ Edena bamona? Hereva momokani umui dekenai lau hamaoroa dainai, lau umui dagedage henia, a?

¹⁷ Unai taudia haida idia ura emui lalona idia ania, to edia laloa bona edia ura be maoro lasi. Idia ura lau dekena amo umui raka siri, idia dekenai do umui ura henia totona. ¹⁸ Taunimanima ese emui lalona idia ania kara be namo, inai neganai sibona: Bema emui mauri hanamoa momokani totona idia karaia. Inai be momokani nega ibounai, lau be umui dekenai lau noho neganai, bona lau noho lasi neganai danu. ¹⁹ Lauegu natuna e, lauegu lalokau! Hisihisi lau ania noho, hahine kahirakahira ia mara ena hisihisi bamona. Inai bamona do lau hisihisi, ela bona Iesu ena kara emui lalona dekenai do umui abia momokani. ²⁰ Lauegu lalona ia hisihisi, badina lau ura umui dekenai lau noho. Bema unai bamona neganai, dala idauna dekenai umui dekenai do lau hereva diba. Umui totona lau laloa bada herea!

Hagara bona Sara edia sivarai be gau badana

²¹ Taravatu henunai umui ura noho taudia e, umui be Taravatu ena hereva umui diba, a? ²² Buka Helaga inai bamona ia torea: Aberahamo

ena natuna be rua. Ta be hesiai hahine ena natuna, ta be ura kwalimu hahine ena natuna. ²³ Hesiai hahine ena natuna be tauanina ena kara dekenai ia vara. To ura kwalimu hahine ena natuna be Dirava ena gwauhamata dainai ia vara. ²⁴ Inai sivarai be parabole bamona, inai hahine ruaosi be gwauhamata taravatuna rua bamona. Ta be Sinai Ororo dekena amo. Iena natuna be hesiai memero. Inai hahine ena ladana be Hagara. ²⁵ Inai Hagara be Sinai Ororo ena ladana ta, Arabia tano dekenai. Ia be harihari ia noho Ierusalemā hanua ena toana bamona. Inai Ierusalemā bona iena taudia ibounai be hesiai mai guida danu lalonai idia noho. ²⁶ To Ierusalemā ma ta be guba dekenai ia noho, ia be ura kwalimu hanuana. Ia be iseda sinana. ²⁷ Badina Buka Helaga ia gwau:

“Natuna oi havaraia diba lasi hahine e, do oi moale!

Natuna havaraia ena hisihisi oi diba lasi hahine e,
mai moale danu do oi boibo!

Badina iena tau ese ia rakatania hahine be natuna momo do ia abia.
Idia be momo herea, to headava hahine ena natuna be momo lasi.”

²⁸ Lauegu varavara taudia e, umui be Dirava ena natuna, iena gwauhamata dainai, Isako hegeregere. ²⁹ To unai neganai, tauanina ena kara dekenai ia vara merona ese Dirava ena Lauma dekenai ia vara merona ia dagedage henai. Bona hari inai neganai danu unai bamona kara ia vara noho. ³⁰ Buka Helaga be edena bamona ia torea? Ia gwau:

“Hesiai hahine mai ena natuna danu do oi lulua,

badina be hesiai hahine ena natuna,

be iena tamana ena kohu do ia abia lasi.

Unai kohu be ura kwalimu hahine ena natuna ese do ia abia.”

³¹ Unai dainai, lauegu varavara taudia e, ita be hesiai hahine ena natuna lasi, ita be ura kwalimu hahine ena natuna.

5

Umui emui ura kwalimu umui dogoatao noho, umui rakatania lasi

¹ Keriso ese Taravatu ena metau bona ena guida dekena amo ita ia ruhāia vadaeni. Ura kwalimu ita abia vadaeni. Inai ura kwalimu do umui dogoatao noho, tau haida ese umui do idia guida lou garina.

² Umui kamonai. Lau Paulo ese umui lau hamaoroa. Bema kopina utua kara umui abia neganai, Keriso ena gaukara umui dainai be anina lasi. ³ Ma lau be umui lau sisiba henai lou, lau gwau: Bema tau ta ese kopina utua kara ia abia neganai, ia ese Taravatu ta ta ibounai do ia badinaia, mase garina. ⁴ Bema Taravatu badinaia dekena amo Dirava ena vairanai maoromaoro umui tahua neganai, umui be Keriso dekena amo umui raka siri vadaeni. Umui be Dirava ena hariharibada umui rakatania vadaeni. ⁵ To ai be mai abidadama danu Dirava ai naria noho, ia ese iena vairanai maoromaoro ai dekenai do ia henai. Inai ai naria noho, badina be Lauma Helaga ese ai ia durua dainai. ⁶ Badina be Iesu Keriso danu ai hakapua neganai, kopina utua kara bona kopina utua lasi kara ruaosi be anina lasi, to abidadama sibona. Oibe, abidadama, lalokau dekenai ia gaukara, inai sibona be mai anina.

⁷ Guna be Keriso ena dala dekenai umui raka namo herea. Daika ese emui dala ia hadikaia, vadaeni hereva momokani umui badinaia lasi, a? Edena bamona umui emui lalona ia ania? ⁸ Dirava ese inai bamona ia karaia lasi, badina be ia ese umui ia boiria vadaeni. ⁹ Aonega hereva ta be inai bamona, “Hatubua muramura sisina sibona ese paraoa ibounai do ia hatubua.” ¹⁰ Lau be Lohiabada lau abidadama henai, ia ese umui

do ia durua, vadaeni lauegu hadibaia hereva do umui rakatania lasi. Inai emui laloe ia hakererea gwauraia tauna ena ladana lau diba lasi. To Dirava ese unai tau ena kerere davana do ia henia.

¹¹ Haida idia koikoi, idia gwau lau haroro noho gauna be, kopina utua kara be maoro. Lasi momokani! Bema unai bamona, dahaka dainai lau idia alaia gwauraia? Lasi, lau idia ura alaia badina korikori be, lau haroro gauna be Keriso ena satauro sibona dekeno amo mauri ita davaria diba. ¹² Inai emui lalona idia hakererea gwauraia taudia, namona be idia sibona ese edia kopina bona edia abona idia utua oho momokani!

¹³ Lauegu varavara taudia e, ura kwalimu taudia do umui lao totona Dirava ese umui ia boiria. To namo lasi inai bamona umui laloe, "Lau be ura kwalimu tauna, lauegu tauanina ena ura gaudia sibona do lau karaia." Lasi, to lalokau dekenai umui ta ta dekenai durua do umui henia. ¹⁴ Badina be, Taravatu ibounai be hereva tamona lalonai idia noho. Hereva be inai: "Oiemu badibadinai ia noho tauna do oi lalokau henia, oi sibona oi lalokau henia bamona." ¹⁵ To lauegu sibona do umui kamona namonamo. Bema umui ta ta umui hadikaia bona heatu henia neganai, do umui naria namonamo, umui sibona do umui haorea garina.

Lauma Helaga ena kara bona tauanina ena kara

¹⁶ Lauegu hereva ena anina be inai: Lauma Helaga ese emui mauri dala ia hakaua be namo, vadaeni tauanina ena ura dikadia do umui karaia lasi. ¹⁷ Badina be iseda tauanina ena ura be idau, Lauma Helaga ena ura danu be idau. Idia ruaosi ta ta idia heatu henia. Unai dainai emui ura karadia umui karaia diba lasi. ¹⁸ To bema Lauma Helaga ese umui ia hakaua neganai, Taravatu henunai do umui noho lasi.

¹⁹ Tauanina ena kara be ita ibounai ita diba. Karadia be inai: Heudahanai, kara mirodia, matabodaga, ²⁰ kaivakuku tomadiho henia kara, meamea, heai, mama, badu, sibona ena ura tahua kara, hepapahuahu, orea hapararaia kara, ²¹ laloe dikadia, kekero, lebulebu, bona unai bamona kara ibounai. Guna umui lau hamaoroa, bona hari lau sisiba henia lou momokani, unai bamona idia karaia taudia ese Dirava ena Basileia dekenai do idia vareai diba lasi.

²² To Lauma Helaga ese inai bamona karadia ia havaraia: Lalokau, moale, maino, haheauka, bogahisihisi, kara maoromaoro, abidadama momokani kara, ²³ manau, tauanina ena ura koua karana. Inai bamona karadia idia karaia taudia be taravatu ta ese ia koudia diba lasi. ²⁴ Keriso Iesu ena murinai idia raka taudia ese edia tauanina mai edia ura dikadia bona kara dikadia idia hamasea vadaeni satauro dekenai. ²⁵ Lauma Helaga ese ita dekenai mauri ia henia vadaeni, unai dainai ia ese iseda mauri ia biagua be namo. ²⁶ Ita hekokoroku lasi, ita ta ta ita habadua lasi, bona ita ta ta dekenai kohu totona ita mama henia lasi.

6

Keristani taudia ta ta dekenai durua henia be namo

¹ Lauegu varavara taudia e, bema Keristani tauna ta ia kerere neganai, umui Lauma Helaga umui kamona henia taudia ese unai tau do umui hakaua lou, mai manau danu. To umui naria namonamo, dibagani ese umui danu do ia koia garina. ² Umui ta ta dekenai umui durua henia, emui metau do umui huaia totona. Inai dala dekenai Keriso ena taravatu do umui badinaia. ³ Bema tau ta sibona inai bamona ia laloe, "Lau be namo," to momokani ia be namo lasi neganai, ia be sibona ia koia.

⁴ Ibounai ta ta ena kara ena kara ia diba be namo. Bema iena kara be namo, ia sibona ia heagilaia diba. To bema iena kara be tau ta ena kara danu ia hahegeregereea, unai tau do ia gwauraia kerere totona, unai be namo lasi. ⁵ Badina be ibounai ta ta sibona ena metau, ena metau do idia huaia.

⁶ Dirava ena hadibaia hereva ia tahua tauna ese iena hadibaia tauna dekenai harihari gaudia do ia henia be namo, iena gaukara davana.

⁷ Umui laloa kerere lasi, Dirava ita koia diba lasi. Bema tau ta aniani uhena ia hadoa, vadaeni unai bamona aniani sibona be do ia abia.

⁸ Bema tauanina ena ura ia hadoa neganai, ia ese mase do ia abia. Bema Lauma ena gau ia hadoa neganai, ia ese mauri hanaihanai do ia abia.

⁹ Kara namodia ita karaia be namo, ita hesiku lasi. Bema ita manoka lasi, nega do ia ginidae huahua do ita abia. ¹⁰ Unai dainai, dala ita davaria neganai, taunimanima ibounai dekenai kara namodia do ita karaia. To Keriso ena abidadama henia taudia do ita durua bada herea be namo.

Paulo ese Keriso ena satauro ia heagilaia

¹¹ Mani umui itaia, inai toretore be revareva badadia egu imana dekenai umui dekenai lau torea noho. ¹² Tau haida idia hereva goada noho, umui ese kopina utua kara do umui abia. Badina dahaka inai bamona idia karaia? Badina ta be inai: Idia ura taunimanima ibounai ese idia do idia hanamo. To badina korikori be inai: Idia laloa, “Namo lasi haida idia diba ita be Keriso ena satauro ita abidadama henia, ita do idia alaia mase garina.” ¹³ Idia ese kopina utua kara idia abia, to Taravatu idia kamona henia lasi. Idia ura be kopina utua kara do umui abia, taunimanima edia hanamo bada do idia abia totona. ¹⁴ To lau be gau ta do lau heagilaia lasi, iseda Lohiabada Iesu Keriso ena satauro sibona do lau heagilaia. Badina be Iesu ena satauro dekena amo, lau dekenai tanobada gaudia idia mase, bona lau be tanobada gaudia dekenai lau mase. ¹⁵ Kopina utua kara, bona kopina utua lasi kara ruaosi be anina lasi. To gau ta be mai anina bada herea: Vara matamata, Dirava ese ita dekenai ia havaraia gauna. ¹⁶ Inai bamona laloa idia abia dae bona badinaia taudia be namo. Dirava ena maino bona bogahisihisi be idia edia latanai do ia noho, badina inai taudia be Dirava ena Israela momokani orea taudia.

¹⁷ Lauegu hereva dokona be inai: Tau ta ese lau dekenai hisihisi do ia henia lou lasi. Badina be lauegu kopina ena bero toana ese idia hedinarai lau be Iesu ena hesiai tauna mai guia danu.

¹⁸ Lauegu varavara taudia e, iseda Lohiabada Iesu Keriso ena hariharibada, be umui emui lauma dekenai do ia noho. Amen.

PAULO ENA REVAREVA EFESO TAUDIA DEKENAI

¹ Lau inai Paulo, lau be Keriso Iesu ena aposetolo tauna, Dirava ena ura dainai. Lau ese inai revareva lau torea umui Dirava ena taudia Efeso dekenai, Keriso Iesu umui abidadama henia taudia.

² Lau ura be Dirava iseda Tamana bona Lohiabada Iesu Keriso ese hariharibada bona maino umui dekenai do idia henia.

Keriso dainai Dirava ese iseda lauma ia hanamoa

³ Dirava ita tanikiu henia be namo, ia be iseda Lohiabada Iesu Keriso ena Tamana. Bona Keriso danu ita haka-pua dainai Dirava ese guba ena hanamoa gaudia ibounai ita dekenai ia henia, iseda lauma durua totona.

⁴ Tanobada ia do karaia lasi neganai, Dirava ese ita ia abia hidi, ita be iena taudia, Keriso lalonai ita noho dainai. Unai dekena amo, Dirava ena vairanai ita be helaga bona mai kerere ta lasi.

Iena lalokau dainai, ⁵ Dirava ese gunaguna ita ia makaia vadaeni iena. Iena ura be Iesu Keriso dekena amo, ia ese iena natuna ita do ia halaoa. Inai be sibona ena palani, bona sibona ena ura. ⁶ Namona be Dirava ita hanamoa, iena hariharibada namo herea momokani dainai! Inai hariharibada ita dekenai ia henia davana lasi, iena Natuna lalokau dekena amo!

⁷ Badina be Keriso ese iena mase dekena amo ita ia hoia lou vadaeni, iena rarana dainai. Iseda dika danu ia ese ia gwauatao vadaeni. Dirava ena hariharibada be bada herea momokani, ani? ⁸ Inai hariharibada ita dekenai ia henia badabada. Bona iena aonega bona diba bada hegeregerena, ⁹ Dirava ese sibona ena ura gauna, iena palani, gunaguna ia lalao, hunia gauna, ita dekenai ia hadibaia. Inai palani be Keriso dekena amo Dirava ese do ia karaia haorea. ¹⁰ Inai palani do ia haorea nega korikori ia ginidae neganai, Dirava ese do ia karaia haorea. Inai palani ena anina be, Dirava ia karaia gaudia ibounai, guba dekenai bona tanobada dekenai, be Keriso ese do ia biagua.

¹¹ Gau ibounai be Dirava ese ia karaia, iena palani hegeregerena. Bona ia ese ai Iuda taudia ia abia hidi, iena bese korikori do ai lao, bona Keriso danu do ai haka-pua. Inai be Dirava ena palani, tanobada ia karaia hamatamaia neganai ia lalao gauna. ¹² Ai Iuda taudia be Keriso ai lalao bona abidadama henia taudia ginigunadia. Unai dainai Dirava ese ai ia makaia, iena hairai diarina do ai hanamoa bada, nega ibounai.

¹³ Umui danu, Sivarai Namona, hamauria umui dekenai ia henia hereva momokani umui kamona henia neganai, Dirava ese iena bese taudia umui ia halaoa. Keriso umui abidadama henia dainai, Dirava ese iena gwauhamata toana, Lauma Helaga umui dekenai ia henia. Inai toana ese umui ia makaia, umui be Dirava ena bese taudia momokani. ¹⁴ Ita ese Lauma Helaga ita abia vadaeni, unai dainai ita diba momokani, Dirava ese ia gwauhamata iena taudia do ia henidia gaudia be dohore ita abia. Dirava ese ita ia hoia lou, bona Lauma Helaga dekena amo ita ia makaia, vadaeni ita diba momokani ita be ia dekenai dohore ita noho. Namona be iena hairai diarina ita hanamoa bada!

Paulo ia noinoi Dirava ese Efeso taudia dekenai aonega do ia henia

¹⁵ Umui emui sivarai lau kamona vadaeni, umui ese Lohiabada Iesu umui abidadama henia, bona Dirava ena taudia umui lalokau henia. ¹⁶ Unai dainai umui totona Dirava lau tanikiu henia nega ibounai, doko lasi. Bona umui dainai lau guriguri noho. ¹⁷ Iseda Lohiabada Iesu Keriso ena Dirava, ia be Tamana mai hairaina bada herea lau noia noho. Lauegu noinoi be inai: Ia ese Lauma Helaga umui dekenai do ia henia. Lauma Helaga ese aonega umui dekenai do ia henia, bona ia ese Dirava umui dekenai do ia hedinarai. Vadaeni Dirava dekenai do umui manada. ¹⁸ Ma Dirava lau noia, ia ese emui lalona do ia hadiaria, vadaeni umui ia boibo totona ahuna ena namo do umui diba momokani, bona unai ahuna do umui naria noho. Lau ura danu Dirava ese iena taudia dekenai dohore ia henia davana bada hanamoa gaudia do umui diba momokani. ¹⁹ Dirava lau noia danu iena siahu badana, ita lalonai ia gaukara noho gauna, ena bada herea do umui diba momokani. Inai siahu ita abia, iseda abidadama dainai. ²⁰ Bona inai siahu be Dirava ese ia gaukaralaia, Keriso mase dekena amo ia hatorea isi neganai. Ia gaukaralaia danu, guba dekenai Keriso ia atoa neganai, ia be Dirava ena idiba kahana dekenai ia helai. ²¹ Keriso ese guba ena lohia taudia ibounai, gunalaia taudia ibounai, gavana taudia ibounai, bona siahu taudia ibounai ia ese idia ia hereaia. Iena ladana ese danu, ladana ibounai inai tanobada mauri lalonai bona gabeai maurina lalonai danu ia hereaia momokani. ²² Dirava ese gau ibounai Keriso ena aena henunai ia atoa, bona ia ese ekalesia ena kwarana momokani Keriso ia halaoa. ²³ Ekalesia be Keriso ena tauanina. Keriso ese gau namodia ibounai dekena amo ia honu, ese gau ibounai ia hahonua noho, badina be Dirava ese gau namodia ibounai ia honu, ese Keriso ia hahonua vadaeni.

2

Ita mase taudia Dirava ese ia hamauria Keriso dainai

¹ Guna umui be emui kara dika bona kerere dainai umui mase. ² Unai neganai inai tanobada ena kara dika dalana umui raka. Umui ese lauma dikadia edia biaguna umui kamona henia. Inai lauma dika ese Dirava idia kamona henia lasi taudia edia lalona dekenai harihari ia gaukara noho. ³ Guna ita ibounai be idia bamona ita karaia. Iseda tauanina edia ura dikadia, bona iseda lalona edia ura kava sibona ita karaia. Vadaeni unai bamona ita noho dainai, iseda dika davana korikori be Dirava ena badu, taunimanima oredia ibounai hegeregere.

⁴⁻⁵ Momokani, iseda kara dika ese ita idia alaia, ita mase momokani. To Dirava ena bogahisihihi bona iena lalokau ita dekenai be bada herea momokani. Unai dainai ita mase taudia be Dirava ese ia hamauria momokani, Keriso danu. Badina be Dirava ena bogahisihihi sibona ese umui ia hamauria. ⁶ Keriso Iesu danu ita hapapua dainai, Dirava ese Keriso danu ita ia hatorea isi, vadaeni guba dekenai lohia daga do ita abia, Keriso danu. ⁷ Inai bamona ia karaia, iena hariharibada bona lalokau bada herea, be hari bona vaira neganai taunimanima ibounai do idia diba totona. Keriso Iesu dekena amo inai hariharibada bona lalokau ita dekenai ia hedinarai vadaeni. ⁸ Badina be Dirava ena hariharibada ese umui ia hamauria vadaeni abidadama dainai, umui sibona ese lasi, to Dirava ena hariharibada, davana lasi ese. ⁹ Bona inai hamauria be emui gaukara dekena amo lasi, tau ta do ia hekokoroku garina. ¹⁰ Dirava ese ita ia karaia. Bona ia ese Keriso Iesu ena siahu dekena amo tau

matamatadia ita ia halaoa, kara namodia do ita karaia totona. Dirava ese gunaguna inai bamona dala ia palani hegaegae ita totona.

Keriso ese bese rua ia hatamonaia

¹¹ Umui lalao, gunaguna umui be idau bese taudia, bona Iuda taudia ese umui idia herevalaia neganai idia gwau, “Kopina idia utua lasi taudia.” ¹² Unai neganai umui be Keriso umui diba lasi, bona Israela taudia edia vairanai umui be idau taudia momokani. Dirava ena gwauhamata danu umui be gabu lasi, bona tanobada taudia bamona umui noho dainai, umui be Dirava lasi taudia, bona gabeai mauri hanaihanai ena naria lalao namona umui diba lasi. ¹³ Oibe, gunaguna umui be murimuri taudia momokani, to hari, umui be Keriso Iesu lalonai dainai, Keriso ena rarana ese Dirava ena bese lalonai umui ia atoa vadaeni. ¹⁴ Badina be Keriso ese iseda maino ia karaia. Ia ese Iuda taudia bona Iuda lasi taudia edia dagedage ia haorea, bese tamona ia halaoa vadaeni. Oibe, Keriso ese, sibona ena tauanina dekena amo, unai bese ruaosi ia hapararaia maguna ia kokia ore momokani, bese ruaosi ia hatamonaia. ¹⁵ Keriso ese Iuda taudia edia Taravatu, mai ena oda bona torea hereva maragidia ibounai ia haorea. Inai bamona ia karaia, unai bese ruaosi dekena amo bese matamata tamona do ia havaraia totona. Oibe, inai bese ruaosi Keriso danu idia haboua tamona dainai, idia edia huanai be Keriso ese maino ia karaia vadaeni. ¹⁶ Iena mase satauro latanai dekena amo Keriso ese unai bese ruaosi ia hatamonaia, vadaeni tauanina tamona hegeregerena, Dirava dekenai maino do idia karaia. Bona Keriso ese, iena satauro dekena amo edia dagedage, bese ruaosi edia huanai gauna, ia haorea momokani.

¹⁷ Momokani, Keriso ia mai, maino ena Sivarai Namona umui ibounai dekenai ia harorolaia. Umui Iuda lasi taudia, Dirava dekena amo umui noho daudau taudia dekenai ia harorolaia. Bona umui Iuda taudia, Dirava kahirakahira umui noho taudia dekenai danu ia harorolaia. ¹⁸ Keriso dainai ita ibounai, Iuda bona Iuda lasi taudia, be Tamana ena vairanai ita gini diba, Lauma tamona ita dekenai ia henia dainai.

Ita Keristani taudia ibounai be Dirava ena ruma

¹⁹ Unai dainai umui Iuda lasi taudia, harihari umui be idau bese taudia lasi. Umui be Dirava ena taudia, bona iena hanua tamona taudia. Umui be Dirava ena bese taudia korikori. ²⁰ Umui be aposetolo taudia bona peroveta taudia idia haginia ruma, iena du latanai Dirava ese umui ia haginia noho. Inai ruma ena kona nadina be Keriso Iesu sibona. ²¹ Keriso ese inai ruma ena kahana ibounai ia hagoadaia noho, bona ia haboua tamona. Vadaeni ia ese ia haginia dainai, ruma be Lohiabada ena dubu helaga momokani do ia lao. ²² Umui be Keriso lalonai dainai, ia ese umui ia haginia noho, ekalesia orea haida danu. Umui ia haginia hebou, vadaeni Dirava ena noho rumana momokani umui lao noho, iena Lauma Helaga ia noholaia gabuna.

3

Paulo ese Iuda lasi taudia totona ia gaukara

¹ Unai dainai lau Paulo, be Keriso Iesu ese ia guia, umui Iuda lasi taudia do lau durua totona. Vadaeni umui dainai Dirava lau guriguri henia noho. ² Lau lalao umui kamonai vadaeni, Dirava ese iena hariharibada dekena amo, umui durua totona, inai gaukara badana lau dekenai ia henia vadaeni. ³ Dirava ese iena palani, hunia gauna, lau dekenai ia hedinarai. Inai palani ena anina sisina umui dekenai lau torea vadaeni

guna. ⁴ Bema inai lau torea gauna umui duahia neganai, do umui diba, lau be Keriso ena sivarai, ia hunia gauna, lau diba momokani vadaeni. ⁵ Nega gunadia lalonai Dirava ese taunimanima dekenai inai hunia hereva ia hadibaia lasi. To harihari Dirava ese iena Lauma Helaga dekena amo, iena aposetolo bona peroveta helaga taudia dekenai inai hunia hereva ia hedinarai vadaeni. ⁶ Inai hunia hereva ena anina be inai: Sivarai Namona dekena amo, Iuda lasi taudia bona Iuda taudia ese Dirava ena hanamoa tamona do idia abia. Inai orea ruaosi edia tauanina be tamona, bona idia ruaosi Dirava ena gwauhamata, Keriso Iesu dekena amo ia gwaurai gauna do idia abia hebou.

⁷ Dirava ese iena hesiai gaukara tauna lau ia halaoa, iena Sivarai Namona do lau harorolaia totona. Ia ese harihari gauna, sialu idauna ta, be lau dekenai ia henia. Iena sialu dekena amo inai harihari gauna lau dekenai ia henia, egu dagi lalonai do lau goada totona. ⁸ Dirava ena taudia ibounai edia huanai lau sibona be maragi herea momokani, to inai dagi idauna lau dekenai ia henia vadaeni. Dagi be inai: Sivarai Namona Iuda lasi taudia dekenai do lau harorolaia. Inai be Keriso ena gau namodia ena sivarai, taunimanima sibona edia aonega dekena amo idia davaria diba lasi gauna. ⁹ Dirava ese gau ibounai ia karaia, bona gunaguna iena palani, iena kara ibounai dohore ia karaia lalao gauna ia hunia, taunimanima dekena amo. Inai palani be gunaguna ia mai bona harihari ia hunia noho. To hari Dirava ese lau ia abia hidi, inai palani do lau gwaurai hedinarai totona. ¹⁰ Oibe, guna ia hunia, to hari Dirava ese gaukara badana ekalesia dekenai ia henia. Inai gaukara be, ekalesia ese Dirava ena aonega idauidau, be guba ena lohia taudia, bona guba ena sialu taudia dekenai do ia hedinarai. ¹¹ Dirava ese gunaguna inai bamona palani ia lalao karaia, bona hari iseda Lohiabada Keriso Iesu ena gaukara dekena amo, inai palani ia karaia haorea vadaeni. ¹² Keriso lalonai ita noho dainai, bona ia dekenai ita abidadama henia dainai, ita be Dirava ena vairanai ita gini diba, gari ta lasi. ¹³ Unai dainai umui lau noia, lauegu hisihisi umui dainai do umui lalao momo lasi. Badina be umui emui mauri hanamoa totona lau karaia noho.

Keriso ena lalokau bada

¹⁴ Unai dainai Tamana ena vairanai lau tui diho. ¹⁵ Iena famili ibounai, guba dekenai bona tanobada dekenai, be Tamana dekena amo edia ladana idia abia. ¹⁶ Dirava lau noia, iena hairaina bona kohu momo dekena amo, umui dekenai Lauma Helaga ena sialu do ia henia. Vadaeni umui emui lalona bona kudouna do idia goada. ¹⁷ Bona Dirava lau noia, umui ese umui abidadama henia dainai, Keriso be umui emui kudouna lalonai do ia noho. Lau noia danu lalokau ese umui emui kudouna do ia hahonua, vadaeni do umui gini goada, ramu ese au badana ia dogoatao, ia gini goada bamona. ¹⁸ Vadaeni umui, bona Dirava ena taudia ibounai, ese emui goada bona aonega dekena amo, Keriso ena lalokau ena lababa, bona ena lata, bona ena ataiiai, bona ena dobu, do umui diba momokani. ¹⁹ Oibe, lau ura Keriso ena lalokau do umui diba. Unai lalokau ese diba ibounai ia hereaia. Dirava lau noia, umui ese Keriso ena lalokau do umui diba momokani, unai neganai iena gau namodia dekenai ia honu dekena amo Dirava ese umui do ia hahonua.

²⁰ Dirava ese iena sialu be iseda lalona dekenai ia gaukaralaa noho. Inai sialu be goada momokani, bona iseda noinoi bona iseda lalao ibounai ia hereaia diba. ²¹ Vadaeni Dirava ese hairai bada herea do ia

abia, ekalesia dainai, bona Keriso Iesu dainai, nega ibounai, ela bona hanaihanai. Amen.

4

Ita Keristani taudia be tauanina tamona

¹ Unai dainai lau, Lohiabada ese iena hesiai gaukara lalonai lau ia guia tauna, umui lau sisiba henia inai: Dirava ese umui ia boiria vadaeni, unai dainai iena boiboi hegeregereana do umui noho, do umui noho maoromaoro. ² Nega ibounai do umui manau, do umui manada, bona do umui haheauka. Bema haida ese metau umui dekenai idia henia neganai, idia do umui lalokau henia noho. ³ Lauma Helaga ese umui dekenai laloa tamona ia henia vadaeni, iena maino dekenana amo. Inai maino be varo bamona umui ia guia hebou, orea tamona. Vadaeni do umui naria namonamo, inai maino do umui dogoatao noho. ⁴ Tauanina be tamona. Lauma Helaga danu be tamona. Dirava ese umui ia boiria totona ena davana namona naria kara danu be tamona. ⁵ Lohiabada be tamona, abidadama be tamona, bapatiso be tamona. ⁶ Dirava danu be tamona, ia be ita ibounai iseda Tamana. Ia be ibounai edia Lohiabada, bona ibounai edia lalona dekenai ia gaukara, bona ibounai edia lalona dekenai ia noho.

⁷ Dirava ese ita ta ta ibounai dekenai harihari gauna idauna ta ia henia. Ia henia be Keriso ena hariharibada ena bada hegeregereana. ⁸ Buka Helaga lalonai ia torea hegeregereana, ia gwau:

“Atai dekenai ia daekau lao neganai,

abia mauri mai guia taudia momo ia danu ia abia lao.

Bona harihari gaudia taunimanima dekenai ia henia.”

⁹ Inai hereva “Ia daekau lao” ena anina be inai: Guna ia diho mai tanobada dekenai, tanobada henuna kahanai. ¹⁰ Bona inai ia diho mai tauna be danu ia daekau lao. Guba ena ataiiai momokani dekenai ia lao, guba bona tanobada edia gabu idauidau ibounai do ia hahonua totona. ¹¹ Oibe, Keriso ese harihari gaudia taunimanima dekenai ia henia. Haida dekenai be aposetolo dagi ia henia, haida dekenai be peroveta dagi ia henia, haida be evanelia gaukara taudia, haida be haroro taudia, haida be hadibaia taudia. ¹² Inai bamona harihari gaudia ia henia, be Dirava ena taudia ibounai do ia durua totona. Inai be Dirava ena hesiai gaukara do idia karaia namonamo, bona Keriso ena tauanina do ia gini goada totona. ¹³ Unai dekenana amo ita ibounai iseda abidadama do ia tamona, bona iseda diba Dirava ena Natuna dekenai danu be tamona. Bona ita be tau badadia do ita halaoa, oibe, Keriso ena bada hegeregereana danu do ita abia gwaurai.

¹⁴ Vadaeni namo ita be natuna maragidia bamona ita noho lasi, hadibaia hereva idauidau ese ita do idia koia lou lasi. Badina be koikoi taudia edia hadibaia hereva ese haida idia hakaua kerere vadaeni. Idia be vanagi bamona, bona unai koikoi hereva be lai bamona, idia ia doria lao, doria mai, vadaeni idia hure kava davara dekenai bamona. ¹⁵ To idia ese ita do idia koia lasi. Lasi momokani. Ita ese taunimanima do ita lalokau henia, bona inai lalokau dekenana amo, hereva momokani do ita gwaurai. Vadaeni Keriso ena mauri dala lalonai do ita tubu daekau momokani, bona Keriso be iseda orea ena kwarana. ¹⁶ Keriso be kwarana dainai, tauanina ena kahana ibounai be ia dainai idia noho hebou bona idia gaukara hebou, bona kara ibounai be laloa tamona dekenana amo idia karaia. Ta ta edia gaukara, edia gaukara korikori idia

karaia noho. Unai dala dekenai tauanina be lalokau dekena amo ia tubu daekau noho.

Keristani taudia edia mauri be matamata

¹⁷ Unai dainai, Lohiabada ena ladana dainai umui lau sisiba henia, harihari ia lao, Dirava diba lasi taudia bamona umui noho lasi. Idia edia lalao be anina lasi. ¹⁸ Edia lalao be dibura. Dirava ena mauri be idia davaria diba lasi, badina be ia dekena amo edia lalao idia koua, bona iena dala idia diba lasi. ¹⁹ Idia be hemarai lasi momokani. Lebulebu daladia idia ura dikadika, bona matabodaga karadia idia tahua doko lasi.

²⁰ Keriso ena hadibaia hereva be unai bamona lasi, ani? ²¹ To umui ese Keriso ena gadona umui kamoni momokani, bona iena hereva momokani umui diba vadaeni. ²² Unai dainai lauegu sisiba be inai: Emui mauri gunana be dabua gunana bamona do umui kokia. Badina be iena dika bona iena koikoi dainai, ia be mase dekenai ia lao noho. ²³ Umui emui lalao bona emui kudouna do umui hamatamataia, be gau badana. ²⁴ Mauri matamata do umui atoa, dabua matamata umui atoa bamona. Inai mauri matamata dainai, emui toana be Dirava ena toana bamona, ia ese ia karaia gauna. Inai mauri matamata ena kara be maoromaoro, helaga bona momokani.

²⁵ Unai dainai hereva koikoi do umui hadokoa momokani. Umui ibounai ta ta dekenai hereva momokani do umui gwauraia, badina ita ibounai be Keriso ena tauanina tamona ena kahana taudia. ²⁶ Bema umui badu neganai, kara dika do umui karaia lasi. Bona dina do ia diho lasi neganai, emui badu do umui haorea. ²⁷ Satani ena dala do umui kehoa lasi. ²⁸ Henaoa tauna be do ia henaoa lou lasi. To gaukara namona iena imana dekena amo do ia karaia, vadaeni ia ese ogogami taudia do ia durua diba. ²⁹ Hereva mirodia do umui gwauraia lasi, hereva namodia sibona. Vadaeni emui hereva idia kamoni taudia ese durua bona namo do idia davaria, bona emui hereva dekena amo manoka taudia do umui hagoadaia. ³⁰ Bona Dirava ena Lauma Helaga ena lalona do umui hisihisi henia lasi. Badina Lauma Helaga be Dirava ena toana umui emui latanai, bona do ia noho ela bona hamauria Dinana dekenai. Inai toana ena anina be, Dirava ese iena gwauhamata gauna, emui hamauria, do ia badinaia momokani. ³¹ Heai, dagedage, bona badu do umui koua. Hereva dika, lalao dika, bona samania koikoi hereva ibounai do umui hadokoa. ³² Umui ibounai ta ta do umui durua, bona ibounai ta ta do umui bogahisihisi henia. Bona ibounai ta ta edia kara dika do umui gwauatao, Dirava ese Keriso dainai emui dika ia gwauatao hegeregrena.

5

Diari lalonai do umui noho

¹ Umui be Dirava ena natuna taudia, iena lalokau. Unai dainai, Dirava ena kara bamona do umui karaia be namo. ² Lalokau ena dala dekenai do umui mauri noho, Keriso ese ita ia lalokau henia bamona, bona ia sibona ena mauri ia atoa diho ita dainai. Iena mauri ia henia, be boubou gauna mai bonana namona Dirava ena vairanai.

³ Umui be Dirava ena taudia dainai, heudahanai, sihari kava karadia, bona matabodaga, bona kohu ura dikadika kara, be do umui karaia lasi momokani. ⁴ Lebulebu hereva, hereva kavakava, hevaseha hereva mai miro danu be namo lasi, to Dirava do umui tanikiu henia be namo. ⁵ Bona do umui diba momokani, heudahanai tauna, sihari kava kara

tauna, matabodaga tauna, bona koku ura dikadika tauna, be gabu lasi, Keriso bona Dirava edia Basileia lalonai. Koku ura dikadika kara be hegeregere kaivakuku tomadiho henia kara bamona.

⁶Umui naria namonamo, tau ta ese hereva kavakava dekena amo inai kara dikadia lalonai umui do ia veria garina. Badina be inai bamona idia karaia taudia edia latanai Dirava ena badu do ia ginidae momokani, idia kamonai henia lasi dainai. ⁷Unai dainai unai bamona idia karaia taudia danu do umui turana karaia lasi. ⁸Badina be gunaguna umui be dibura noho taudia, to harihari diari lalonai Dirava ese umui ia atoa vadaeni. Unai dainai diari taudia bamona do umui noho be namo. ⁹Badina be diari ese inai bamona gau namodia ia havaraia: Kara namodia, kara maoromaoro, bona hereva momokani. ¹⁰Lohiabada ia ura henia karadia do umui tahua. ¹¹Dibura karadia, idia be anina lasi karadia, dekena amo do umui raka siri, to unai kara idia karaia taudia do umui sisiba henia, bona edia dika do umui gwaurai hedinarai. ¹²Edia hunia kara be mai hemaraina dainai, do lau gwaurai hedinarai lasi. ¹³To bema diari ese kara ta ia hedinarai neganai, unai kara ena badina momokani be ibounai ese idia itaia diba. ¹⁴Bona diari ese ia hedinarai gaudia ibounai be diari dekenai idia halaoa diba. Unai dainai hereva ta inai bamona ia gwau:

“Mahuta tauna e, do oi noga.

Mase taudia edia huanai dekena amo do oi toreisi,

Keriso ese oi dekenai diari do ia henia.”

¹⁵Unai dainai umui emui kara do umui naria namonamo. Aonega taudia bamona do umui noho, kavakava taudia bamona lasi. ¹⁶Harihari emui nega namona ia noho Dirava ena kara do umui karaia totona. Emui nega do umui haorea kava lasi, badina hari nega be nega dikana. ¹⁷Unai dainai do umui kavakava lasi, to Lohiabada ena ura gaudia sibona do umui tahua.

¹⁸Inuinu dekena amo do umui kekero lasi, inai be emui mauri do ia hadikaia. To Lauma Helaga dekena amo do umui honu. ¹⁹Keristani varavara taudia danu do umui herevahereva, salamo dekena amo, ane dekena amo, bona lauma anedia dekena amo. Ane do umui abia, bona Lohiabada do umui hanamo emui kudouna lalonai. ²⁰Nega ibounai, gau ibounai ia henia dainai, Tamana Dirava do umui tanikiu henia, iseda Lohiabada Iesu Keriso ena ladana dainai.

Tau bona hahine edia headava mauri

²¹Keriso umui matauraia dainai, umui ibounai ta ta dekenai do umui matauraia.

²²Hahine e, emui adavana do umui kamonai henia, Lohiabada umui kamonai henia hegeregerena. ²³Badina tau be iena adavana ena kwarana, Keriso be ekalesia ena kwarana bamona. Bona Keriso be ekalesia ena Hamauria Tauna, ekalesia be iena tauanina. ²⁴Unai dainai hahine ese gau ibounai lalonai, edia adavana do idia kamonai henia, ekalesia ese Keriso ia kamonai henia bamona.

²⁵Tatau e, emui adavana do umui lalokau henia, Keriso ese ekalesia ia lalokau henia bamona. Keriso ese danu iena mauri ia atoa diho ekalesia dainai. ²⁶Keriso ia mase, ekalesia do ia hahelagaia totona. Ia ese Sivarai Namona ia gwaurai dekena amo, bona ranu lalonai ia huria dekena amo, ekalesia ia hagoevaia momokani. ²⁷Unai dainai ekalesia be Keriso ese do ia abia, iena. Ia ura iena ekalesia be iena vairanai nega ibounai, mai ena hairaina, miro lasi, makuku lasi bona bero ta lasi. Ia ura ekalesia be helaga bona goevagoeva momokani. ²⁸Unai bamona danu, namona

be tatau ese edia adavana do idia lalokau henia, idia edia tauanina idia lalokau henia hegeregereana. Adavana ia lalokau henia tauna ese sibona ia lalokau henia noho. ²⁹ Badina be tau ta ese sibona ena tauanina ia badu henia diba lasi. To ia ubua noho, bona ia naria noho, Keriso ese ekalesia ia ubua bona naria noho hegeregereana. ³⁰ Ita be Keriso ena tauanina ena kahana ta ta taudia. ³¹ Buka Helaga lalonai ia torea hegeregereana, ia gwau: “Unai dainai tau ese iena tamana bona sinana do ia rakatania, vadaeni iena adavana sibona dekenai do ia hakapua. Bona idia ruaosi be tauanina tamona do idia noho hebou.” ³² Inai hereva ena anina be hunia bamona, to ia be hereva momokani badana ta. Bona lau laloa iena anina be, Keriso bona iena ekalesia do idia noho hebou totona. ³³ To iena anina badana ta danu be inai: Tau ese iena adavana do ia lalokau henia, ia sibona ia lalokau henia hegeregereana. Hahine danu ese iena adavana do ia matauraia.

6

Natuna mai edia tamana bona sinana

¹ Memero bona kekeni e, umui emui tamana bona sinana do umui kamonai henia. Kara maorona be unai. ² “Emui tamana bona sinana do umui matauraia.” Inai be Buka Helaga ena Taravatu mai ena gwauhamata ginigunana. ³ Badina be inai bamona umui karaia neganai, gwauhamata be inai: “Mauri namona do umui abia, bona emui mauri do ia daudau tanobada dekenai.”

⁴ Tamana bona sinana e, emui natudia do umui habadua lasi, to Lohiabada ena hadibaia hereva idia dekenai do umui hadibaia.

Hesiai taudia bona biaguna taudia

⁵ Hesiai mai guia taudia e, umui emui biaguna tanobada dekenai do umui kamonai henia mai gari bona mai heudeheude danu. Edia hesiai gaukara do umui karaia mai emui lalona ibounai danu, Keriso ena hesiai gaukara umui karaia bamona. ⁶ Edia matana dekenai umui idia itaia neganai sibona umui gaukara, a? Inai bamona umui karaia koikoi, umui do idia ura henia totona, a? Inai kara do umui karaia lasi, to do umui gaukara momokani, Keriso dekenai umui gaukara bamona. Mai emui lalona ibounai Dirava ena ura do umui karaia, ⁷ Emui hesiai gaukara do umui karaia mai emui lalona namo danu, tau ta ena gaukara lasi, to Lohiabada ena gaukara umui karaia bamona. ⁸ Badina be umui diba ita ta ta ese kara namodia ita karaia neganai, Lohiabada dekena amo davana namona do ita abia. Hesiai mai guia tauna bona ura kwalimu tauna danu, edia gaukara dainai, Lohiabada ena davana be tamona.

⁹ Biaguna e, emui hesiai mai guia taudia dekenai kara namo do umui karaia, idia lau hamaoroa umui dekenai do idia kara namo bamona. Idia do umui hagaria lasi. Do umui laloaboio lasi, umui bona emui hesiai taudia danu, emui Biaguna guba dekenai be tamona. Ia ese taunimanima edia toana ia laloa lasi, to ibounai be maka tamona dekenai ia kota henidia noho.

Keristani tauna be tuari tauna bamona

¹⁰ Lauegu hereva dokona be inai: Lohiabada ena siahu dekena amo do umui siahu, bona Lohiabada ena goada dekena amo do umui goada. ¹¹ Dirava ese ia henia tuari dabua ibounai do umui kwatua, vadaeni do umui goada, Satani ena koikoi karadia do umui koua. ¹² Badina be iseda tuari be taunimanima danu lasi. Iseda tuari be lauma dikadia danu, guba dekenai idia noho. Ma danu inai tanobada ia gunalaia lauma dika

badana, mai ena sياهو taudia, bona tanobada ena dibura lohiadia, be ita ese ita tuari henidia noho. ¹³Unai dainai Dirava ese ia henia tuari dabua ibounai do umui kwatua. Vadaeni nega dikana ia ginidae neganai, do umui tuari mai goada danu. Do umui tuari noho ela bona tuari ena dokona, bona unai neganai do umui gini goada noho.

¹⁴Vadaeni do umui gini goada, emui gabana dekenai hereva momokani ena beleta dekena amo do umui hagegea. Emui kemena dekenai kara maoromaoro ena auri dabuana do umui kwatua. ¹⁵Emui aena dekenai maino ena Sivarai Namona do umui atoa, tamaka bamona. ¹⁶Nega ibounai abidadama, emui kesi bamona, do umui abia loaloa. Abidadama dekena amo, Satani ena diba bona peva, lahi gaudia, be do umui habodoa diba. ¹⁷Bona hamauria do umui abia dae, emui tuari kwara gauna bamona. Lauma Helaga ena tuari kaia danu do umui dogoatao. Ia be Dirava ena hereva.

¹⁸Nega ibounai Lauma Helaga ena sياهو dekena amo guriguri bona noinoi do umui gwauraia. Do umui hesiku lasi, to nega ibounai guriguri totona do umui noho hegaegae. Dirava ena taudia totona do umui guriguri nega ibounai. ¹⁹Lau dainai danu do umui noinoi, do lau haroro neganai, Sivarai Namona ena hunia hereva do lau hedinarai, mai maoromaoro bona mai gari lasi danu. ²⁰Inai Sivarai Namona totona lau be Dirava ena hereva gwauraia tauna. Bona inai dainai lau be dibura ruma lalonai lau noho. Lau dainai do umui noinoi, Sivarai Namona do lau herevalaia goadagoada, Dirava ena ura hegeregerena.

Bamahuta herevadia

²¹Lauegu noho, bona lauegu gaukara sivarai do umui diba totona, iseda varavara lalokauna Tukiko ese umui do ia hamaorolaia. Ia be Lohiabada ena hesiai tauna namona. ²²Ia lau siaia noho inai, umui dekenai, aiemai sivarai umui do ia hamaoroa, bona umui do ia hagoadaia totona.

²³Namona be, Tamana Dirava bona Lohiabada Iesu Keriso ese maino, lalokau bona abidadama, be Keristani varavara taudia ibounai dekenai do idia henia. ²⁴Iseda Lohiabada Iesu Keriso idia lalokau henia hanai-hanai taudia ibounai dekenai Dirava ese iena hariharibada do ia henia.

PAULO ENA REVAREVA FILIPHI TAUDIA DEKENAI

¹ Paulo bona Timoteo, ai be Keriso Iesu ena hesiai taudia, ai ruaosi inai revareva ai torea inai. Leta be umui Dirava ena taudia Filipi dekenai, umui Keriso Iesu lalonai umui noho taudia, mai emui gunalaia taudia bona durua taudia dekenai danu.

² Ai ura be Dirava iseda Tamana bona Lohiabada Iesu Keriso ese hariharibada bona maino umui dekenai do idia henia.

Paulo ese Dirava ia tanikiu henia

³ Umui lau laloe negadia ibounai Dirava lau tanikiu henia noho. ⁴ Bona umui totona lau noinoi neganai, lauegu guriguri be mai moale danu, ⁵ badina be umui ese lau umui durua noho, Sivarai Namona do lau harorolaia totona. Emui durua ia doko lasi, umui matamaia dinana ia mai bona hari. ⁶ Bona lau diba momokani, inai gaukara namona umui lalonai ia hamatamaia Diravana ese unai gaukara do ia naria noho, ela bona ia karaia haorea Keriso Iesu ia giroa mai dinana dekenai.

⁷ Umui lau lalokau henia bada, bona inai lalokau be maoro danu, badina be inai: Umui bona lau be Dirava ena hariharibada ita abia hebou vadaeni. Inai hariharibada ia noho, harihari, dibura ruma lalonai lau noho neganai. Bona guna danu, dibura ena murimuri dekenai lau noho, Sivarai Namona ena momokani lau gwauraia, bona Keriso lau harorolaia neganai, unai hariharibada ia noho. ⁸ Lau hereva momokani Dirava ena vairana dekenai, Keriso Iesu ena lalokau bada ese egu lalokau umui dekenai ia havaraia vadaeni.

⁹ Dirava lau noia noho inai bamona: Umui emui lalokau be do ia bada lao noho, mai emui laloe diari, bona mai emui aonega danu. ¹⁰ Unai dekena amo gau namodia edia toana do umui diba. Vadaeni mai goeva danu, bona kerere lasi do umui noho, ela bona Keriso do ia giroa mai dinana. ¹¹ Umui emui kara ibounai be do idia namodia momokani. Iesu Keriso sibona ese inai bamona kara ia havaraia diba, Dirava ese hanamoia bona hairai do ia abia totona.

Paulo ena noho dibura ruma dekenai, ese Sivarai Namona ia hatubua

¹² Lauegu varavara taudia e, lau ura umui diba, inai lau dekenai idia vara gaudia ese Sivarai Namona idia koua lasi. Lasi, inai lauegu hisihisi ese Sivarai Namona ia durua bona ia hatubua noho. ¹³ Badina be Kaisara ena ruma idia gimaia tuari taudia ibounai, bona iniseni idia noho taudia ibounai danu idia diba vadaeni, Keriso ena hesiai gaukara dainai lau be dibura ruma dekenai lau noho. ¹⁴ Bona Keristani varavara taudia momo ese lau idia laloe, Keriso dainai dibura lalonai lau noho. Vadaeni inai idia laloe noho dainai, edia lalona ese goada idia davarua. Edia gari idia laloe lasi, bona Sivarai Namona idia harorolaia goada noho.

¹⁵ Momokani, haida ese egu gaukara namona dainai lau idia mama henia. Idia ura lau idia halusia, vadaeni Sivarai Namona idia harorolaia noho. To haida be laloe namona dekenai idia harorolaia. ¹⁶ Inai bamona taudia idia diba vadaeni Dirava ese Sivarai Namona ena momokani do lau gwauraia dagina be lau dekenai ia henia vadaeni. Bona lau idia lalokau henia dainai idia harorolaia. ¹⁷ To haida be idia ura idia sibona edia ladana idia habadaia, unai dainai Keriso idia harorolaia. Idia laloe

be dibura ruma lalonai lau noho neganai, be lauegu hisihisi do idia habadaia.

¹⁸ Herevana! Lau be lau moale noho! Dala koikoi dekenai, o dala momokani dekenai be herevana. To gau badana korikori be inai: Keriso idia harorolaia noho, dala idauidau ibounai dekenai. Unai dainai lau be lau moale noho.

Lau mauri o lau mase be Keriso danu do lau noho

¹⁹ Badina be lau diba umui emui guriguri dainai, bona Iesu Keriso ena Lauma ena durua dekena amo, hamauria do lau abia. ²⁰ Lauegu ura badana, bona lau laloa bada noho gauna be inai: Egu gaukara do lau karaia namonamo, bona hemarai karana ta do lau karaia lasi. Lau ura harihari, bona nega ibounai, Keriso do lau gwaurai hedinarai, mai gari lasi danu, bona mai egu lalona ibounai. Unai dekena amo taunimanima do idia diba Keriso ena siahu be bada momokani. Oibe, lau mauri o lau mase, be gau ta lasi, gau badana be Keriso do lau hanamoa. ²¹ Badina be, mauri be dahaka? Lau dekenai mauri ena badina be, Keriso danu lau noho. Bona bema lau mase neganai, namo ma bada herea do lau davaria. ²² To bema egu mauri dekena amo gaukara namona ma lau karaia diba, sedira edena dala do lau abia hidi? Mase do lau abia hidi, o mauri do lau abia hidi? ²³ Egu ura be rua, lau daradara noho. Lau ura bada Keriso dekenai do lau lao. Unai be namo herea. ²⁴ To umui durua totona, namona be lau mauri noho. ²⁵ Lau diba inai be maoro, unai dainai do lau mauri noho, umui ibounai durua totona. Bona do umui tubu daekau, bona Keriso do umui abidadama henia mai moale danu, inai ia vara totona umui do lau durua noho. ²⁶ Vadaeni umui dekenai do lau giroa mai neganai, Keriso Iesu do umui hanamoa diba lau dainai, badina umui be Keriso lalonai umui noho taudia.

Namona be Filipi taudia ese Paulo idia durua iena tuari lalonai

²⁷ Gau badana be inai: Keriso ena Sivarai Namona ena dala hegeregerena do umui mauri noho. Vadaeni umui dekenai lau noho, o umui dekenai lau noho lasi neganai, do lau diba umui gini goada noho. Bona do lau diba, mai emui laloa tamona bona ura tamona, Sivarai Namona abidadama henia totona do umui tuari hebou noho. ²⁸ Bona Sivarai Namona ena tuari lalonai do umui gini goada, umui idia tuari henia taudia do umui gari henia lasi. Emui gari lasi idia itaia neganai, do idia diba momokani idia kwalimu diba lasi. Badina be Dirava ese hamauria umui dekenai do ia henia. ²⁹ Dirava ese iena hariharibada umui dekenai ia henia, Keriso dekenai do umui abidadama henia totona. To inai sibona lasi. Dirava ese danu hariharibada umui dekenai ia henia, Keriso dainai do umui hisihisi totona. ³⁰ Guna umui ese lau umui itaia, Sivarai Namona totona lau tuari, bona hari umui kamoni, lau do tuari noho. Vadaeni hari umui ese lau danu ita hisihisi noho, badina ita be tuari tamona lalonai ita tuari hebou noho.

2

Keriso be mai ena manau, bona mai ena siahu bada danu

¹ Keriso ese emui mauri ia naria dainai, goada umui abia noho, ani? Keriso ena lalokau ese lalo namo umui ia henia, ani? Keriso ena Lauma ena mauri lalonai umui noho, ani? Umui ibounai ta ta dekenai bogahisihisi bona durua umui henia noho, ani? ² Unai dainai umui lau noia, lauegu moale do umui habadaia momokani inai kara dekena amo: Emui lalona do idia tamona, emui lalokau be tamona, bona emui lauma danu tamona. ³ Umui sibona emui ladana do umui habadaia gwaurai

lasi, bona do umui hekokoroku lasi. To umui ibounai ta ta dekenai do umui manau. Umui ta ta nega ibounai inai bamona do umui lalao, “Haida be idia namo herea, to lau be namo lasi.” ⁴ Bona umui ese umui emui namo sibona do umui tahua lasi. Lasi, to umui ta ta ibounai ese haida edia namo do umui tahua, bona do umui durudia noho.

Keriso ia manau dainai Dirava ese ia abia isi

⁵ Keriso Iesu ena lalao bamona umui danu do umui lalao be namo. ⁶ Ia be nega ibounai Dirava bamona ia noho. Oibe, Keriso be Dirava danu ia hegeregere, to ia lalao lasi unai bamona do ia noho, ia sibona do ia dogoatao gauna. ⁷ Lasi, to ia ese sibona ena ura dainai, iena dagi badana ia negea, bona hesiai tauna momokani ia lao. Ia be taunimanima hegeregere ia vara, bona taunimanima edia toana ia abia. ⁸ Oibe, Keriso ese iena hairai ia lalao lasi, to ia manau momokani. Bona ia ese Dirava ia kamonai henia ela bona ia mase, oibe, satauro dekenai ia mase. ⁹ Unai dainai Dirava ese Keriso ia abia isi, gabu bada herea momokani ia henia. Bona ladana ta ia henia, inai ladana ese ladana ibounai ia hereaia. ¹⁰ Bona Iesu ena ladana hanamoia totona ibounai be dohore idia tui diho, guba taudia, tanobada taudia, bona tanobada henunai noho taudia danu. ¹¹ Bona taunimanima ibounai ese Iesu Keriso do idia gwauraia hedinarai “Lohiabada,” badina be unai dekena amo Tamana Dirava ena ladana do idia abia isi momokani.

Ita be diari bamona ita noho, taunimanima edia huanai

¹² Laegu lalokau taudia e, umui dekenai lau noho neganai lau umui kamonai henia. Vadaeni harihari umui dekenai lau noho lasi neganai danu lau do umui kamonai henia, inai be gau badana. Mai gari bona mai heudeheude danu emui hamauria do umui tahua noho. ¹³ Badina be Dirava ese umui emui lalona dekenai ia gaukara noho. Ia ese ura namodia bona goada umui dekenai ia henia noho, vadaeni iena ura karadia do umui karaia.

¹⁴ Gau ibounai umui karaia neganai, do umui maumau lasi o hepapahuahu lasi. ¹⁵ Unai dekena amo umui be kerere ta lasi, bona emui lalona dekenai dika ta do ia noho lasi, Dirava ena natuna taudia edia kara bamona. Bona umui be inai tanobada taudia mai edia dika bona mai edia kerere bada danu edia huanai umui noho. Umui ese idia edia huanai diari bamona do umui hedinarai, hisiu ese tanobada idia hadiaria bamona. ¹⁶ Mauri sivaraina be idia dekenai do umui hedinarai, vadaeni Keriso ena dinana dekenai lau be do lau moale. Do lau gwau, “Lau gaukara kava lasi, bona lau hekwarahi kava lasi.”

¹⁷ Emui abidama be boubou gauna hegeregere, umui ese Dirava dekenai umui henia. Bona bema egu mauri rarana be do idia habubua, unai emui boubou gauna do lau hahelagaia totona, lau be do lau moale, bona laegu moale dainai, umui ibounai danu do umui moale. ¹⁸ Inai bamona danu, umui ibounai emui moale dainai, lau danu be do lau moale.

Timoteo do ia lao Filipi

¹⁹ Lohiabada bema ia ura neganai, lau lalao nega daudau lasi lalonai Timoteo umui dekenai do lau siaia. Vadaeni emui sivarai do lau kamonai, bona egu lalona do ia moale. ²⁰ Badina be lau dekenai ta ia noho lasi Timoteo hegeregere, iena lalao bona laegu lalao be tamona. Bona ia ura bada umui do ia durua. ²¹ Badina be ibounai ese sibona edia gau idia tahua, to Iesu Keriso ena gau idia tahua lasi. ²² To umui be Timoteo ena kara namona umui diba. Mero ese iena tamana ia durua

bamona, ia ese lau ia durua vadaeni. Sivarai Namona dainai ai ruaosi ai gaukara hebou vadaeni. ²³ Unai dainai lau laloa nega daudau lasi lalonai umui dekenai ia do lau siaia. Oibe, lau dekenai dahaka ia vara gauna lau diba neganai, Timoteo do lau siaia maoromaoro. ²⁴ Bona Lohiabada lau abidadama henia noho, nega daudau lasi lalonai, lau danu be umui dekenai do lau mai.

Epafrodito do ia giroa lao Filipi dekenai

²⁵ Lau laloa namona be Epafrodito umui dekenai do lau siaia. Ia be iseda varavara, bona ia be lau danu ai gaukara hebou, bona ai tuari hebou, Sivarai Namona totona. Guna umui ese lau dekenai ia umui siaia, lau do ia durua totona. ²⁶ Badina be ia ese umui ia laloa bada, bona iena lalona ia hekwarahi bada noho, iena gorere sivaraina umui kamona dainai. ²⁷ Momokani gorere ia davaria, bona kahirakahira ia mase, to Dirava ese ia bogahisihisi henia. Bona ia sibona lasi, to lau danu Dirava ese ia bogahisihisi henia, lauegu lalohisihisi do ia bada herea garina. ²⁸ Unai dainai lau ura bada Epafrodito umui dekenai do lau siaia, ia do umui itaia totona. Vadaeni do umui moale, bona lau danu egu lalohisihisi do ia ore. ²⁹ Ia do umui abia dae, Lohiabada ena ladana dekenai, mai emui moale bada danu. Bona iena kara bamona idia karaia taudia ibounai do umui matauraia. ³⁰ Badina be Keriso ena gaukara totona Epafrodito kahirakahira ia mase. Iena mauri ia negea gwaurai, lau dekenai durua totona, bona umui karaia diba lasi durua gauna, be ia ese do ia karaia totona.

3

Kara maoromaoro, abidadama dekena amo ita abia gauna

¹ Vadaeni, lauegu varavara e, Lohiabada lalonai umui noho dainai, do umui moale. Inai hereva tamona umui dekenai lau torea lou, torea lou, lau hesiku lasi. Badina be inai bamona moale ese umui do ia hamauria.

² Dika bada idia karaia noho taudia, unai sisia, do umui naridia namonamo. Idia ese tauanina idia utua kava gwaurai. ³ To ita ese kopina utua kara korikori ita abia vadaeni, idia be lasi. Badina be Lauma Helaga dekena amo Dirava ita tomadiho henia noho, bona Keriso Iesu danu ita hakapua noho, bona tauanina ena toana gauna ita abidadama henia lasi. ⁴ Lau ese tauanina ena toana gaudia lau abidadama henia diba. Sedira tau haida ese tauanina ena toana idia abidadama henia, to lau ese idia lau hereaia diba. ⁵ Lau vara, vadaeni pura tamona murinai lauegu kopina idia utua. Lau be Israela besena tauna lau vara, lauegu iduhu be Beniamina. Lauegu sene taudia danu be Heberu. Iuda edia Taravatu lau badinaia momokani, badina lau be Farisea ore tauna. ⁶ Lauegu goada lau hedinarai, lau ese ekalesia lau dagedage henia. Bema tau ta ese kara maoromaoro ia davaria diba Taravatu ia badinaia dekena amo, lau be kerere ta lasi momokani. ⁷ To inai guna lau idia hanamo gaudia, be harihari Keriso dainai, lau gwau idia be dika. ⁸ Oibe, inai gaudia sibona lasi, to gau ibounai lau laloa be anina lasi gaudia, inai mai anina bada gauna do lau abia totona, gauna be inai: Keriso Iesu, lauegu Lohiabada do lau diba momokani. Ia dainai gau ibounai lau negea vadaeni. Lau laloa idia be momoru, Keriso do lau abia momokani totona. ⁹ Lau ura be Keriso danu do lau hakapua momokani. Lau sibona egu kara maoromaoro, Taravatu lau badinaia dekena amo, be hari lau dogoatao lasi. Hari lau dogoatao noho kara maoromaoro, be Keriso lau

abidadama henia dekena amo lau davaria gauna. Dirava ia henia kara maoromaoro be abidadama dekena amo. ¹⁰Lauegu ura bada be Keriso, bona iena toresi lou siahuna do lau diba. Bona lau ura ia ese ia abia hisihisi be lau danu do lau abia, iena mase dalana dekenai danu lau ura do lau mase. ¹¹Unai dala dekenai, mase dekena amo toresi lou do lau davaria.

Paulo ese iena kwalimu ahuna abia gabuna dekenai ia heau henia

¹²Lau gwau lasi lau kwalimu vadaeni, o lau goeva momokani vadaeni. Lasi, to mai egu goada ibounai kwalimu ahuna lau tahua noho, do lau dogoatao gwauria. Keriso Iesu ia ura inai bamona do lau goadalaia, bona inai totona ia ese lau ia abia, iena murinai do lau raka. ¹³Lauegu varavara taudia e, lau laloa lasi, inai kwalimu ahuna lau abia vadaeni. To kara tamona lau goadalaia noho, lauegu kara gunadia lau laloaboio, bona vaira neganai gaudia do lau goadalaia. ¹⁴Unai dainai heau helulu ena dokona gabuna dekenai maoromaoro lau heau henia, kwalimu ahuna do lau abia totona. Inai kwalimu ahuna be guba dekenai mauri matamata, Dirava ese lau ia boiria totona gauna, Keriso Iesu dainai.

¹⁵Lauma ena gaudia dekenai ita goada vadaeni taudia be inai lauegu laloa bamona do ita laloa be namo. To bema umui haida emui laloa be idau, Dirava ese emui lalona do ia hadiaria diba. ¹⁶Gau badana be inai: Guna ita abia dae hadibaia hereva ena dala do ita badinaia noho be namo.

¹⁷Lauegu varavara e, lauegu kara bamona do umui karaia. Bona aiemai kara bona hereva idia badinaia taudia do umui kamoni henidia. ¹⁸Badina be umui lau hamaoroa guna, bona hari, mai tai danu umui lau hamaoroa lou: Haida be idia raka kerere, idia ese Keriso ena mase satauro dekenai ena anina idia hadikaia noho. ¹⁹Edia dokona be hel dekenai, badina be edia dirava be edia tauanina ena ura. Edia hemarai karadia idia heagilaia, bona inai tanobada gaudia sibona idia laloa. ²⁰To iseda hanua korikori be guba. Bona iseda Hamauria Tauna, Lohiabada Iesu Keriso, ita naria noho, guba dekena amo do ia mai. ²¹Sibona ena siahu bada dekena amo, Keriso ese gau ibounai be iena henunai do ia atodia, bona do ia biagudia noho. Ma inai bamona siahu bada dekena amo, Keriso ese iseda tauanina manokadia bona dikadia do ia senisia, bona iena tauanina mai hairaina danu ena toana bamona, iseda tauanina do ia halaoa.

4

Umui laloa tamona, umui moale, umui maino

¹Unai dainai, lauegu Keristani varavara taudia e, egu lalokau taudia, umui lau laloa momo, mai bogahisihisi danu. Umui lau ura henia, bona umui dainai lau moale, badina umui be lauegu dagi ena toana. Lalokau taudia e, Lohiabada danu umui hakupua dainai, do umui gini goada noho.

²Euodia bona Sunutuke e, umui lau noia, umui be Lohiabada ena hahine taudia dainai, do umui laloa tamona be namo. ³Oi danu, lauegu durua tauna namona e, inai hahine ruaosi oi durua be namo, badina idia ese lau danu idia gaukara hebou Sivarai Namona totona. Klemento bona lau danu idia gaukara hebou taudia haida danu ese lau idia durua. Idia edia ladana be Dirava ena mauri buka lalonai idia torea vadaeni.

⁴Nega ibounai do umui moale, Lohiabada lalonai umui noho dainai. Ma lau gwau lou: Do umui moale.

⁵ Emui manau bona manada kara taunimanima ibounai edia vairanai do umui hedinarai. Lohiabada be kahirakahira do ia ginidae. ⁶ Gau ta totona do umui laloea hekwarahi lasi. To umui dekenai hegeregere lasi gaudia do umui abia totona, Dirava do umui noia. Bona umui noia negadia ibounai, mai tanikiu danu do umui guriguri henia. ⁷ Dirava ena maino ese taunimanima edia diba ia hanai momokani. Keriso Iesu umui danu ia hakapua tamona dainai, inai maino ese emui laloea gaudia, bona emui kudouna idia mamia gaudia ibounai do ia gimai namonamo.

⁸ Lauegu varavara taudia e, lauegu hereva orena be inai. Inai bamona karadia sibona do umui laloea: Kara namodia, taunimanima edia ladana idia hanamoa karadia, momokani karadia, bogahisihisi henia karadia, kara maoromaoro, kara goevagoeva, lalokau karadia, bona taunimanima namodia matauraia karadia. ⁹ Lau dekenai amo umui davarua gaudia, egu hadibaia hereva bona egu kara danu, inai sibona do umui karaia. Bona maino ia henia Dirava be umui danu do ia noho.

Filipi taudia edia harihari gauna dainai Paulo ia tanikiu henia

¹⁰ Lohiabada lalonai lau moale bada noho, badina be umui ese lau dekenai umui laloea lou dainai. Lau umui durua guna bamona, ma harihari umui durua lou. Nega sisina daudau umui ura bada lau umui durua, to umui be dala lasi ia mai bona harihari. ¹¹ Lauegu ogogami lau maumauraia lasi, badina be lau manada vadaeni. Bona lau dekenai ia noho gauna dekenai lau moale vadaeni. ¹² Ogogami dekenai lau manada vadaeni, kohu momo ena mauri dekenai danu lau manada vadaeni. Mauri mai lalo namo ena dalana lau davarua vadaeni. Unai dainai gabu ibounai, nega ibounai, lau boga kunu o lau hitolo, be lau laloea momo lasi. Bona lauegu gau be momo, o hegeregere lasi neganai, egu lalona ia namo noho. ¹³ Keriso ese lau ia hasiahua, vadaeni gau ibounai lau goodalala diba.

¹⁴ To egu hisihisi lalonai lau umui durua be namo, bona maoro danu. ¹⁵ Filipi taudia e, umui diba, Sivarai Namona gwauraia loaloea lau hamatamaia neganai, Makedonia lau rakatania murinai, ekalesia orea ta ese lau ia durua lasi, umui sibona. Oibe, umui sibona ese moni hegeregere lau dekenai umui henia. ¹⁶ Bona Tesalonika lau noho neganai, nega tamona lasi, to nega haida umui ese lau durua totona, moni umui siaia. ¹⁷ Harihari gaudia umui dekenai amo lau tahua lasi, to lau ura be inai emui kara namo dainai, Dirava ese davana namona umui dekenai do ia henia. ¹⁸ Gau momo, hegeregere momokani, ma haida danu, lau davarua vadaeni. Umui emui harihari gaudia ibounai, Epafrodito ese ia mailaia gaudia be lau davarua vadaeni. Idia be bonana namo gaudia, boubou gaudia, Dirava ese idia ia abia dae vadaeni, mai ena moale danu. ¹⁹ Egu Dirava be mai ena kohu namodia momo herea, Keriso Iesu ena hairai diarina dainai. Unai Keriso lalonai ia abia gau namodia momo dekenai amo, Dirava ese umui dekenai hegeregere lasi gaudia ibounai, be umui dekenai do ia henia, hegeregere momokani. ²⁰ Iseda Tamana Dirava ena ladana ita hanamoa bada noho hanaihanai. Amen.

Paulo ena hanamoa hereva Filipi taudia dekenai

²¹ Keriso Iesu ena taudia ibounai, Dirava ena orea lalonai umui noho, umui ibounai dekenai egu hanamoa lau siaia inai. Keristani varavara taudia, lau danu iniseni idia noho ese idia hanamoa idia siaia danu. ²² Dirava ena taudia ibounai iniseni idia noho, bona Kaisara ena ruma

lalonai idia gaukara noho Keristani taudia danu ese edia hanamoa idia siaia inai.

²³ Namona be Lohiabada Iesu Keriso ena hariharibada umui ibounai dekenai do ia noho.

PAULO ENA REVAREVA KOLOSE TAUDIA DEKENAI

¹ Lau inai Paulo, lau be Keriso Iesu ena aposetolo tauna, Dirava ena ura dainai. Lau bona iseda varavara Timoteo ese inai revareva ai torea umui Dirava ena taudia Kolose dekenai, Keriso Iesu umui abidadama henia taudia.

² Lau ura be Dirava iseda Tamana ese hariharibada bona maino umui dekenai do ia henia.

Kolose taudia mauri idia davaria dainai Paulo ese Dirava ia hanamoa

³ Umui dainai ai ruaosi ai guriguri negadia ibounai, Dirava, iseda Lohiabada Iesu Keriso ena Tamana ai tanikiu henia noho. ⁴ Badina be ai kamona vadaeni umui ese Keriso Iesu umui abidadama henia noho, Dirava ena taudia ibounai umui lalokau henia danu. ⁵ Guna, umui ese Sivarai Namona ena hereva momokani umui kamona neganai, guba ena mauri namona laloa ese umui ia hamoalea. Unai laloa namona ese emui abidadama bona lalokau ia havaraia. Bona umui diba vadaeni, guba ena davana namona dohore umui davaria. ⁶ Umui dekenai Sivarai Namona ia ginidae, tanobada ibounai dekenai ia ginidae hegeregere-ena. Bona tanobada ibounai ese Sivarai Namona ena hanamoa idia davaria, umui ese ena hanamoa umui davaria hegeregere-ena. Io, inai hanamoa umui dekenai ia noho, Keriso Iesu dekenai umui abidadama henia dinana ia mai bona harihari. Unai dainai, umui be Dirava ena hariharibada umui diba momokani. ⁷ Dirava ena hariharibada ena Sivarai namona be aiemai lalokau tauna Epafra, ese umui dekenai ia hadibaia. Ia be aiemai gaukara durua tauna ta, bona ia be Keriso ena hesiai tauna namona ta danu, ma umui totona ia gaukara noho. ⁸ Ia ese emui lalokau namona kara, be ai ruaosi dekenai ia hamaorolaia. Unai lalokau be Lauma Helaga ese umui dekenai ia henia vadaeni.

⁹ Unai dainai emui sivarai ai kamona dinana ia mai bona harihari, guriguri umui dainai ai ruaosi ese ai hadokoa lasi. Dirava ai noia, ia ese iena ura dalana umui dekenai do ia hadibaia, bona Lauma Helaga ena diba bona diari umui dekenai do ia henia. ¹⁰ Vadaeni Lohiabada ena ura hegeregere-ena do umui noho, bona nega ibounai umui ese ia do umui hamoalea. Emui mauri ese kara namodia edia anina do idia havaraia, bona Dirava ena diba bona diari ese umui do idia hatubua daekau. ¹¹ Ai ruaosi ai noinoi danu, Dirava ese umui do ia hagoadaia, vadaeni iena sياهو dekena amo, metau ibounai lalonai do umui gini goada, mai haheauka danu. Bona emui hisihisi lalonai, mai moale danu do umui noho. ¹² Tamana ita tanikiu henia be namo, badina be ia ese iseda kara ia hagoevaia. Vadaeni ita be hegeregere, Dirava ena taudia danu, ahuna do ita davaria, diari ena Basileia dekenai. ¹³ Dirava ese dibura ena sياهو dekena amo ita ia hamauria vadaeni, bona iena Natuna, iena lalokau, ena Basileia lalonai ita ia abia vareai vadaeni. ¹⁴ Dirava ena Natuna ese ita ia hoia lou, bona iseda kara dika ia gwauatao, iena rarana dekena amo.

Keriso ena sياهو bona iena gaukara

¹⁵ Dirava be ita ese ita itaia diba lasi. To Dirava ena Natuna be Dirava ena toana hegeregere-ena. Ia be vara guna Natuna, ia be Dirava ese ia karaia gaudia ibounai edia biaguna momokani. ¹⁶ Badina be ia dekena amo Dirava ese gau ibounai ia karaia, guba dekenai bona tanobada

dekenai. Ita itaia diba gaudia bona ita itaia diba lasi gaudia, siahu laumadia ibounai, king ibounai, gavana ibounai, siahu taudia ibounai be Dirava ese ia karaia Keriso dekena amo. Oibe, Dirava ese Keriso dekena amo gau ibounai ia karaia, do idia be Keriso ena totona. ¹⁷ Gau ibounai idia do noho lasi neganai Keriso be ia noho. Iena siahu dekena amo, gau ibounai be edia gabu edia gabu dekenai idia noho, ia ese idia ia naria noho. ¹⁸ Ia be ekalesia ena kwarana, bona ekalesia be iena tauanina. Ia be unai tauanina ena mauri badina. Ia be vara guna Natuna, Dirava ese mase dekena amo ia hatorea isi tau ginigunana, unai dainai ia sibona be gau ibounai edia kwarana momokani. ¹⁹ Badina be Dirava ena ura be inai: Sibona ena mauri ibounai be iena Natuna lalonai do ia noho. ²⁰ Unai dainai, iena Natuna dekena amo Dirava ese maino karaia dalana ta ia lalao. Inai maino be ia bona tanobada taudia bona guba taudia edia huanai. Keriso ena rarana satauro dekenai ia bubua dekena amo, Dirava ese ibounai danu maino ia karaia, bona ia dekenai idia mai dalana ia ese ia kehoa vadaeni. ²¹ Gunaguna, umui be daudau Dirava dekena amo, kara dikadia umui lalao bona karaia dainai. ²² To harihari, Keriso ena tauanina ia mase dekena amo, Dirava ese umui danu turana ia karaia. Ma keriso ese umui do ia hakaua vareai, vadaeni Dirava ena vairanai dohore umui gini, helaga, goevagoeva, bona kerere ta lasi. ²³ To umui ese Keriso do umui abidadama henia noho, bona do umui gini goada. Sivarai Namona ena hereva do umui dogoatao namonamo, bona iena davana namona do umui lalao bona naria, haida ese emui lalona do idia ania garina. Lau Paulo be inai Sivarai Namona ena hesiai tauna, bona ai ese tanobada ibounai dekenai ai harorolaia vadaeni.

Paulo ese Kolose taudia ia durua

²⁴ Bona harihari, mai moale danu, umui dainai hisihisi lau davarua noho. Lau ura Keriso ena ekalesia, iena tauanina, do lau durua. Keriso ena hisihisi haida, ekalesia durua totona, be idia do noho. Vadaeni lauegu tauanina ena hisihisi dekena amo Keriso ena hisihisi, ia ore lasi gauna, lau karaia haorea gwauraia. ²⁵ Dirava ese iena ekalesia ena hesiai tauna lau ia halaoa. Ia ese inai dagi lau dekenai ia henia, be umui do lau durua totona. Bona Dirava ia ura iena hereva ibounai do lau harorolaia haorea momokani. ²⁶ Gunaguna negadia ibounai inai Dirava ena hereva be hunia dekenai ia noho, taunimanima ibounai idia diba lasi. To harihari Dirava ese iena bese, iena helaga taudia dekenai unai hereva edia anina ia hedinarai. ²⁷ Dirava ena palani be inai bamona: Iena hunia hereva be iena bese taudia dekenai do ia hedinarai. Io, Dirava ia ura umui, iena bese taudia, be do umui diba, inai hunia hereva be namo herea momokani, bona mai ena diari bada. Ia be bese idaidau ibounai totona. Inai hunia hereva ena anina be inai: Keriso be umui emui kudouna edia lalonai ia noho, bona umui ese ia do umui naria noho, vadaeni ia ese umui do ia abia lao guba dekenai. Unuseni Dirava ena gau namodia, mai edia hairai danu, do umui abia momokani. ²⁸ Unai dainai Keriso ai harorolaia goada noho, bese ibounai edia taunimanima dekenai. Mai aonega idaidau dekena amo, taunimanima ai sisiba henia, ai hadibaia noho, idia ta ta ibounai ese Keriso danu do idia hakapua. Vadaeni idia be Dirava ena vairanai do idia gini goada diba, Keriso lalonai, bona namo momokani vadaeni taudia. ²⁹ Unai totona lau hekwarahi, bona egu goada ibounai lau gaukaralaia noho. Keriso ese inai goada bona siahu, be egu lalona dekenai ia havaraia noho.

2

Abidadama goada ese hadibaia hereva koikoi do ia koua

¹ Lau ura umui diba, lau hekwarahi bada herea umui dainai, bona Laodikea taudia dainai danu. Bona lau idia diba lasi taudia momo dainai danu lau gaukara momo vadaeni. ² Inai bamona lau karaia, umui emui lalona do idia goada totona, bona lalokau dekenai do umui noho hebou totona. Lau ura danu laloa diari momokani bona aonega do umui davaria, vadaeni emui abidadama do ia goada. Bona inai dekena amo Dirava ena hunia hereva ena anina do umui diba. Keriso sibona be inai hunia hereva ena anina. ³ Keriso be ki bamona, ia ese Dirava ena aonega ibounai bona diba ibounai, hunia gaudia, ia kehoa noho.

⁴ Inai bamona lau hereva, haida ese hadibaia hereva kerere dekena amo umui do idia koia garina. ⁵ Badina be lauegu tauanina be umui dekenai ia noho lasi, to lauegu laumana be umui danu ia noho. Bona lau moale danu, badina emui gaukara be maoromaoro, bona Keriso umui abidadama henia mai goada, bona mai emui lalona tamona danu.

Keriso lalonai umui noho dainai mauri momokani umui davaria

⁶ Keriso Iesu umui abia dae emui Lohiabada dainai, umui be ia lalonai umui noho vadaeni. ⁷ Umui gini goada noho, Keriso dainai, au ese ia gini goada iena ramuna dainai bamona. Bona Keriso ena latanai emui mauri do umui haginia, ruma idia haginia nadi goadana ena latanai bamona. Ai ese umui ai hadibaia Sivarai Namona do umui abidadama henia goada, bona nega ibounai Dirava do umui tanikiu henia.

⁸ Umui naria namonamo, tau ta ese taunimanima edia aonega hereva kava dekena amo umui ia koia garina. Inai bamona hereva be sene taudia edia kara, bona tanobada idia gunalaia lauma dikadia dekena amo idia mai, Keriso dekena amo lasi.

⁹ Badina be Dirava ena mauri bona kara ibounai be Keriso ena tauanina lalonai idia noho. ¹⁰ Keriso lalonai umui noho dainai, mauri momokani umui abia vadaeni. Keriso be gunalaia laumadia ibounai bona siahu taudia ibounai edia biaguna.

¹¹ Keriso lalonai umui noho dainai, kopina utua kara umui abia vadaeni, to taunimanima edia imana dekena amo kopina utua gauna lasi. Ia be tauanina gauna lasi. Lasi. To Keriso ena kopina utua kara umui abia vadaeni. Unai dainai emui mauri gunana ena siahu dekena amo Keriso ese umui ia ruhaia vadaeni. ¹² Umui emui bapatiso neganai, Keriso danu umui idia guria hebou. Bona unai bapatiso neganai, Keriso danu umui toreisi lou hebou. Inai bamona ia vara, badina be Dirava ena siahu umui abidadama henia dainai. Unai siahu ese Keriso ia hatorea isi lou mase dekena amo. ¹³ Guna umui ese kerere idauidau umui karaia, bona emui tauanina ena ura dikadia umui karaia. Umui be Iuda lasi taudia, ma Taravatu danu umui badinaia lasi. Unai bamona umui dika dainai, emui lauma idia mase. To Dirava ese umui ia hamauria lou Keriso danu. Momokani, Dirava ese unai iseda dika ibounai ia gwau-atao. ¹⁴ Taravatu momo be ita ese ita utua dainai, iseda samania hereva be momo, vadaeni iseda kerere pepa be ia noho. To Dirava ese iseda kerere pepa be satauro dekenai ia ikoko karaia, vadaeni iseda kerere be idia ore. ¹⁵ Ma unai satauro ena latanai, Keriso ese siahu laumadia bona gunalaia laumadia edia siahu ia kokia momokani, bona taunimanima edia vairanai, anina lasi gaudia ia halaodia, ia hahemaraidia.

¹⁶ Unai dainai, tau ta ese taravatu do ia gwauraia lasi emui aniani totona, o emui inuinu totona, o aria dina badana totona, hua matamata

dinana totona, o Sabati Dinana totona. ¹⁷ Unai gaudia guna be mai edia anina, to hari edia anina be bada lasi. Anina korikori gauna be Keriso sibona. ¹⁸ Bema tau ta ese mata hanai lalonai ia itaia gaudia ia herevalaia momo, bona ia ese mai manau koikoi danu aneru ia tomadiho henia, unai tau do umui naria, umui do ia koia garina. Unai bamona tauna do ia laloa ia be tau badana, bona umui emui lalona do ia ania gwauraia, iena kara bamona do umui karaia totona. Do ia gwau umui be kerere, to do umui kamoni henia lasi, badina tauanina ena laloa kavakava dainai, hekokoroku kava be unai tau ena lalonai ia vareai vadaeni. ¹⁹ Ia ese Keriso ia dogoatao noho lasi. Keriso be tauanina ena kwarana. Inai kwarana dekena amo tauanina ese goada ia abia noho, bona kwarana ese garugaru bona varovaro ia hatamonaia. Vadaeni Dirava ese ia ubua dainai, tauanina ia tubu namonamo noho.

Keriso danu ita mase hebou

²⁰ Keriso danu umui mase hebou dainai, tanobada bona guba edia sياهو laumadia edia sياهو umui dekenai be Keriso ese ia kokia vadaeni. Unai dainai, badina dahaka inai tanobada taudia bamona umui do mauri noho? Badina dahaka inai bamona taravatu umui kamoni henia noho: ²¹ “Umui dogoatao lasi,” bona “Unai aniani umui ania lasi,” bona “Imana umui atoa lasi?” ²² Inai bamona idia taravatua gaudia be, ita gaukaralala murinai, do idia ore haraga gaudia sibona. Taunimanima sibona ese inai bamona taravatu idia karaia bona hadibaia. ²³ Inai bamona taravatu edia toana be aonega hereva dainai, umui idia koia diba, badina do umui laloa idia ese emui guriguri kara do idia hagoadaia. To inai taravatu idia karaia taudia ese aneru dekenai idia tomadiho henia, idia manau koikoi, bona idia sibona ese edia tauanina idia hisihisi henia. Inai karadia be anina lasi, badina be idia ese taunimanima edia tauanina edia ura dikadia idia koua diba lasi.

3

Dirava ese Keriso danu umui ia hatorea isi vadaeni

¹ Dirava ese Keriso danu umui ia hatorea isi lou mauri dekenai. Unai dainai guba gaudia abia totona do umui gaukara noho. Unuseni Keriso be Dirava ena idiba kahanai, helai gabuna badana latanai ia helai noho. ² Nega ibounai guba gaudia do umui laloa, tanobada gaudia do umui laloa lasi. ³ Badina umui be umui mase vadaeni, bona emui mauri be Keriso danu hunia dekenai ia noho, Dirava ena. ⁴ Keriso be iseda mauri ena badina korikori. Ia be do ia hedinarai neganai, umui danu be Dirava ena hairai diarina dekenai do umui hedinarai, Keriso danu.

Mauri gunana bona mauri matamatana

⁵ Unai dainai tauanina ena ura kara, umui emui lalonai idia gaukara noho, be do umui hamasea. Gaudia be inai: Heudahanai, lebulebu, ura dikadia, matabodaga, bona kohu momo ura dikadika kara. Kohu momo ura dikadika kara be hegeregere kaivakuku tomadiho henia kara bamona. ⁶ Badina be unai bamona idia karaia taudia edia latanai Dirava ena badu do ia ginidae momokani, idia kamoni henia lasi dainai. ⁷ Gunaguna umui danu unai bamona ura dikadia umui karaia, tanobada gaudia ese umui idia biagua neganai.

⁸ To harihari inai gaudia umui negea momokani: Badu, dagedage, laloa dika. Hereva dika bona hereva mirodia do umui gwauraia lasi. ⁹ Umui ta ta dekenai do umui koikoi lasi. Badina be emui mauri gunana mai ena dika be dabua gunana bamona umui kokia vadaeni, ¹⁰ bona

mauri matamata umui kwatua vadaeni. Inai mauri matamata be Dirava ese ia havaraia. Bona ia ese nega ibounai diba matamata ia henia noho, ia lao bona Dirava ena toana momokani do umui abia. ¹¹ Inai mauri matamata umui abia neganai, umui ibounai be tamona. Umui ta be idau lasi, Iuda taudia be lasi, Iuda lasi taudia danu be lasi. Kopina utua kara be lasi, bona kopina utua lasi kara danu be lasi. Manada lasi taudia bona sikuli lasi taudia danu be lasi. Idia guia hesiai taudia bona ura kwalimu taudia danu be lasi. Keriso dainai ta be idau lasi. Keriso ese idia ibounai edia kara ia hatamonaia, bona Keriso be umui ibounai emui lalona dekenai ia noho.

¹² Umui be Dirava ena taudia, ia ese umui ia lalokau henia, bona umui ia abia hidi, iena. Unai dainai inai bamona karadia, dabua bamona do umui atoa: Bogahisihisi, durua, manau, manada bona haheauka. ¹³ Bema tau ta ese iena bamona tauna ia maumauria, ia kara dika henia dainai, namona be unai dika do ia gwauatao. Lohiabada ese umui emui dika ia gwauatao, vadaeni unai bamona do umui karaia danu. ¹⁴ To unai kara ibounai ia hereaia kara be lalokau. Do umui lalokau henia, vadaeni do umui noho hebou namo herea, mai laloka tamona danu. ¹⁵ Keriso ena maino nega ibounai do umui abia noho emui kudouna lalonai, vadaeni do umui laloka karaia neganai, be do umui laloka maoromaoro. Badina be Dirava ese inai maino umui abia totona umui ia boiria, tauanina tamona do umui lao. Bona Dirava do umui tanikiu henia. ¹⁶ Keriso ena hereva umui emui lalona dekenai ia noho momokani be namo. Inai hereva dekena amo, umui ese Keristani varavara taudia ibounai do umui hadibaia, bona hereva ena aonega dekena amo, edia laloka do umui hamaoromaoroa. Salamo bona guriguri ane, bona lauma anedia do umui abia, Dirava do umui hanamoia totona. Bona inai ane dekena amo, mai emui kudouna ibounai, Dirava do umui tanikiu henia. ¹⁷ Emui kara ibounai bona emui hereva ibounai, gau ibounai, be Lohiabada Iesu ena ladana dekenai do umui karaia. Bona Tamana Dirava do umui tanikiu henia Keriso ena ladana dainai.

Mauri matamata lalonai: Headava kara

¹⁸ Hahine taudia e, emui adavana do umui kamonaia henia. Badina inai be maoro Lohiabada ena vairana dekenai.

¹⁹ Tatau e, emui adavana do umui lalokau henia, idia do umui dagedage henia lasi.

²⁰ Memero, kekeni e, nega ibounai emui tamana bona sinana do umui kamonaia henia, badina inai kara be Dirava ia ura henia.

²¹ Tamana bona sinana, emui natudia do umui habadua kava lasi, do idia hesiku garina.

Mauri matamata lalonai: Hesiai taudia bona biaguna

²² Hesiai taudia e, nega ibounai emui biaguna tanobada dekenai do umui kamonaia henia. Edia matana ese umui idia itaia neganai sibona umui gaukara, a? Inai bamona umui karaia koikoi, idia ese umui do idia ura henia totona, a? Inai bamona do umui karaia lasi, to mai emui lalona ibounai emui biaguna ena ura do umui karaia, Lohiabada umui matauraia dainai. ²³ Emui hesiai gaukara ibounai lalonai, mai emui kudouna ibounai do umui karaia. Do umui karaia, ia be tau ta ena gaukara lasi, to Lohiabada ena gaukara umui karaia bamona. ²⁴ Badina be umui diba, umui ta ta emui kara dainai, Lohiabada ese davana namona umui dekenai do ia henia. Ia ese unai davana ia atoa hegaegae vadaeni umui totona. Badina umui be Lohiabada Keriso ena hesiai taudia. ²⁵ To kara dika taudia ese edia dika davana do idia abia.

Badina be Dirava ese taunimanima edia toana ia laloa lasi, to ibounai be maka tamona dekenai ia kota henidia noho.

4

¹ Biaguna e, emui hesiai mai guia taudia do umui kara namo henidia. Umui laloaboio lasi, umui danu be mai emui Biaguna, guba dekenai ia noho.

Umui guriguri bona umui noho namonamo

² Umui guriguri goada, do umui hesiku lasi. Umui guriguri neganai, umui gwauroaia gauna do umui laloa namonamo, bona Dirava do umui tanikiu henia. ³ Unai guriguri neganai, ai dainai danu Dirava do umui noia, ia ese dala do ia kehoa, ai ese iena hunia hereva Keriso totona do ai harorolaia. Inai bamona lau haroro dainai dibura ruma lalonai lau noho. ⁴ Unai dainai Dirava do umui noia, inai hunia hereva ena anina do lau harorolaia hedinarai momokani, Dirava ena ura hegeregereana.

⁵ Keriso idia do abidadama henia lasi taudia edia vairana dekenai, kara namodia mai aonega danu do umui karaia. Bona umui dekenai nega ia noho gauna do umui gaukaralaia namonamo. ⁶ Nega ibounai mai laloa namona bona mai gado namo do umui hereva. Bona taunimanima ta ta dekenai do umui haere henia mai maoromaoro danu.

Hanamoia hereva

⁷ Lauegu noho ena sivarai ibounai be Tukiko ese umui dekenai do ia hamaoroa. Ia be lauegu varavara, lauegu lalokau, ia danu be hesiai tauna namona ta. Ai ruaosi be Lohiabada ena hesiai gaukara ai karaia hebou noho. ⁸ Unai dainai umui dekenai ia lau siaia noho inai, aiemai kara ena sivarai umui do ia hamaoroa totona. Vadaeni unai dekena amo emui lalona dekenai goada do umui davaria. ⁹ Onesimo be Tukiko danu do lau siaia. Ia danu be iseda varavara namona ta, emui orea tauna, bona aiemai lalokau. Idia ruaosi ese iniseni idia vara karadia ibounai umui dekenai do idia hamaorolaia.

¹⁰ Arisitako, lau danu dibura ruma lalonai ai noho, ese iena hanamoia hereva ia siaia inai. Banaba ena tadina Mareko danu ese umui ia hanamoia inai. Bema Mareko be umui dekenai ia lao neganai, do umui abia dae. Ia dainai hereva lau siaia guna vadaeni. ¹¹ Bona Iesu, iena ladana ta be Iusto, ia danu ese iena hanamoia ia siaia inai. Inai tau toiosi be Iuda taudia. Iuda taudia edia huanai, inai tau toiosi sibona ese lau danu ai gaukara Dirava ena Basileia totona. Idia ese lau idia durua bada herea.

¹² Ma emui orea tauna ta Epafra, Keriso Iesu ena hesiai tauna ese umui ia hanamoia henia inai. Nega ibounai umui dainai ia guriguri goada. Dirava ia noia, do umui gini goada, Keriso do umui abidadama henia, mai maoromaoro, bona momokani danu. Bona ia noinoi, Dirava ena ura ibounai, be do umui diba namonamo, bona kamonai henia. ¹³ Umui lau hamaoroa momokani, Epafra be umui totona, Laodikea taudia totona, bona Hieropoli taudia totona danu, ia hekwarahi bada noho.

¹⁴ Lauegu lalokau Luka, dogeta tauna, bona Dema, idia ruaosi ese umui idia hanamoia noho.

¹⁵ Iseda varavara taudia Laodikea dekenai lauegu hanamoia do umui henia. Numupa, bona ekalesia orea iena ruma dekenai idia hebou noho taudia dekenai danu egu hanamoia do umui henia. ¹⁶ Inai revareva umui emui huana dekenai umui duahia murinai, Laodikea ekalesia orea dekenai do umui siaia, idia danu do idia duahia. Bona revareva ta Laodikea Keristani taudia dekenai lau siaia vadaeni. Unai revareva

danu do umui duahia. ¹⁷ Bona Akipo do umui hamaoroa, Lohiabada ese ia dekenai ia henia gaukarana be do ia karaia haorea momokani.

¹⁸ Lau Paulo, lau sibona ese egu imana dekenai laegu hanamoa hereva lau torea noho inai. Lau do umui laloa, lau be do dibura ruma lalonai lau noho.

Dirava ena hariharibada umui dekenai do ia noho.

PAULO ENA REVAREVA GINIGUNANA TESALONIKA TAUDIA DEKENAI

¹ Paulo bona Sila bona Timoteo, ai toiosi ese inai revareva ai torea Tesalonika ekalesia orea dekenai, umui be Tamana Dirava bona Lohiabada Iesu Keriso ena taudia.

Dirava ai noia, iena hariharibada bona iena maino umui dekenai do ia henia.

Tesalonika Keristani taudia ese edia mauri dalana bona edia abidadama dekena amo haida idia durudia

² Ai be nega ibounai Dirava ai tanikiu henia umui dainai. Bona aiemai guriguri lalonai umui emui ladana ai gwauraia hanaihanai.

³ Ai be Tamana Dirava ena vairanai, emui abidadama bona emui kara namodia ai herevalaia. Iesu Keriso umui lalokau henia bada dainai, umui gaukara noho mai goada danu. Mai laloa goada danu, iseda Lohiabada Iesu Keriso umui naria noho danu. ⁴ Aiemai varavara taudia e, ai diba vadaeni Dirava ese umui ia lalokau henia, bona umui be iena taudia totona, umui ia abia hidi vadaeni.

⁵ Badina be ai ese Sivarai Namona ai mailaia umui dekenai, hereva sibona dekenai lasi, to Lauma Helaga ena siahu dekenai danu. Oibe, ai diba momokani inai Sivarai Namona be hereva momokani dainai, ai gwauraia mai siahu danu. Unai dainai abidadama korikori umui davaria. Umui diba danu edena bamona ai noho umui emui huana dekenai, ai ese umui ai durua sibona.

⁶ Umui ese aiemai mauri dalana umui itaia, vadaeni aiemai mauri dala bamona umui noho, Lohiabada danu bamona umui noho. Umui ese Dirava ena hereva umui abia dae, vadaeni unai murinai taunimanima ese nega momo umui idia hisihisi henia. To Lauma Helaga ese iena moale ia henia umui dekenai. ⁷ Unai dekena amo, kara namo ena dala umui hedinarai, Makedonia bona Akaia dekenai idia noho Keristani taudia ibounai dekenai. ⁸ Oibe, Lohiabada ena hereva be umui ese umui harorolaia hedinarai vadaeni, Makedonia bona Akaia dekenai. To unai gabu sibona lasi, gabu ibounai dekenai, Dirava dekenai umui abidadama henia sivaraina, be taunimanima idia kamona vadaeni. Unai dainai ai be hereva ta ma do ai gwauraia lasi, badina sivarai be idia kamona vadaeni. ⁹ Inai taudia ese, umui dekenai gaukara ai hamatamaia ena sivarai idia herevalaia noho. Oibe, umui ese ai umui abia dae namo herea, emui kaivakuku ibounai umui rakatania, bona Dirava dekenai umui tomadiho henia. Oibe, mauri bona momokani Diravana ena hesiai gaukara taudia umui halaoa vadaeni. ¹⁰ Ma inai taudia idia gwau Dirava ena Natuna ese guba do ia rakatania, do ia giroa mai, be umui ese umui naria noho. Ia be guna ia mase, to Dirava ese ia hatorea isi lou. Iesu be inai, ia ese Dirava ena badu, gabeai do ia mai gauna, dekena amo ita ia hamauria noho.

2

Paulo ena gaukara Tesalonika dekenai

¹ Aiemai varavara taudia e, umui diba vadaeni, ai mai kava lasi umui dekenai, to aiemai vadivadi be mai anina. ² Umui diba, guna Filipi hanua dekenai ai lao neganai, be ai dekenai idia dagedage, bona ai

idia hisihisi henia. Umui dekenai ai mai neganai tau momo ese ai idia koua gwauraia. To Dirava ese ai ia hagoadaia, vadaeni Sivarai Namona, Dirava dekena amo ia mai gauna, umui dekenai ai gwauraia, mai gari lasi danu. ³ Umui dekenai ai haroro neganai, ai hereva koikoi lasi, ai laloa kerere lasi, bona tau ta ai hakaua kerere gwauraia lasi. ⁴ To ai be Dirava ena ura hegeregere ai hereva, badina be ia ese ai ia abia hidi, Sivarai Namona do ai harorolaia. Taunimanima hamoalea totona ai haroro lasi, to Dirava do ai hamoalea totona. Badina be Dirava ese ai emai laloa hunia gaudia ia diba vadaeni. ⁵ Umui diba ai be nega ta ai ese umui ai hanamoa koikoi lasi, bona Dirava danu ia diba, emui kohu do ai abia totona Sivarai Namona ai gwauraia lasi. ⁶ Ai ese hanamoa hereva ai tahua lasi, umui dekena amo, o haida dekena amo. ⁷ Ai be Keriso ena aposetolo taudia dainai, umui dekenai kohu haida ai noia diba, to umui emui huanai ai be manau, iena natuna ia ubua hahine bamona. ⁸ Umui ai lalokau henia bada dainai, ai ese Sivarai Namona umui dekenai ai henia. Bona inai sibona lasi, to ai be ai noho hegaegae, ai emai mauri umui dainai do ai atoa diho, badina be umui ai lalokau henia bada noho. ⁹ Ai emai varavara taudia e, ai emai hekwarahi bona ai emai hisihisi umui laloatao noho, ani? Ai ese Dirava ena Sivarai Namona umui dekenai ai haroro neganai, dina bona hanuaboi danu ai emai imana gaukara ai karaia, badina ai ura lasi ai emai aniani ena davana do umui karaia.

¹⁰ Umui diba, bona Dirava danu ia diba, umui emui huanai ai noho neganai, ai emai kara be goeva, maoromaoro, bona kerere lasi. ¹¹ Umui diba, ai ese umui ta ta ai durua, tamana ese iena natuna ia durudia hegeregere. ¹² Ai ura umui emui noho be Dirava ena ura hegeregere. Unai dainai ai emai hereva goada dekena amo emui laloa ai hagoadaia noho. Badina Dirava ese umui ia boiria vadaeni, iena Basilea bona iena hairaina do umui abia totona.

Tesalonika Keristani taudia idia gini goada mai abidadama danu

¹³ Nega ibounai ai ese Dirava ai hanamoa, badina be Dirava ena hereva ai mailaia neganai, umui kamoni henia, bona umui abia dae. Oibe, umui abia dae momokani. Umui dekenai ia be taunimanima edia hereva lasi, to ia be Dirava ena hereva momokani. Badina be Dirava ena hereva ese umui Keriso abidadama henia taudia emui kudouna dekenai ia gaukara noho. ¹⁴ Ai emai varavara taudia e, umui be hegeregere Dirava ena ekalesia oreadia Iudea dekenai bamona, Keriso Iesu ena orea taudia unai gabu dekenai. Badina be Iuda taudia ese unai ekalesia idia hisihisi henia hegeregere, umui emui bese taudia danu ese umui idia hisihisi henia vadaeni. ¹⁵ Unai Iuda taudia ese Lohiabada Iesu, bona peroveta taudia danu idia alaia vadaeni, bona ai danu idia hisihisi henia. Idia ese Dirava idia habadua, bona idia ese taunimanima ibounai idia dagedage henia noho. ¹⁶ Idia ese danu ai emai haroro gaukara idia koua toho. Oibe, Iuda lasi taudia do idia mauri totona ai haroro noho, be Iuda taudia ese ai emai dala idia ura koua gwauraia. Inai dala dekenai edia kara dika, nega ibounai idia karaia vadaeni gaudia, idia habadaia momokani vadaeni. Unai dainai hari Dirava ena badu idia dekenai ia ginidae momokani vadaeni.

Paulo ia ura Tesalonika taudia dekenai ia vadivadi henia lou

¹⁷ Ai emai varavara taudia e, inai nega sisina lalonai, ai be umui dekenai ai noho diba lasi, ai emai dala Iuda taudia ese idia koua dainai. Momokani umui emui vairana ai itaia diba lasi, to ai emai lalona dekenai

umui ai laloa momo. Unai dainai umui ai itaia totona, dala ai tahua goadagoada vadaeni. ¹⁸ Oibe, ai ura umui dekenai ai mai. Lau Paulo, nega momo lau mai gwauraia, to Satani ese aiemai dala ia koua. ¹⁹ Badina be iseda Lohiabada Iesu do ia giroa mai neganai, iena vairana dekenai do ita gini. Unai neganai ai be dahaka kwalimu ahuna do ai abia? Ai moalelaia gauna bona ai heagilaia gauna be dahaka? Umui sibona, ani? Haida ese umui idia hereaia lasi. ²⁰ Oibe, umui dainai moale momokani bona kwalimu namona ai abia vadaeni.

3

Paulo ese Timoteo ia siaia Tesalonika dekenai

¹ Ai be umui dekenai ai mai diba lasi. To emui sivarai kamonai totona ai naria noho diba lasi. Unai dainai ai gwau, ai ruaosi sibona Atena dekenai do ai noho, ² to aiemai tadina Timoteo, Dirava ena hesiai tauna Keriso ena Sivarai Namona harorolaia totona, umui dekenai do ai siaia lao. Ai siaia lao, badina be ia ese umui do ia hagoadaia, bona emui abidadama do ia durua totona. ³ Vadaeni haida ese umui do idia dagedage henia neganai, do umui gini goada. Badina umui diba danu inai hisihisi ita abia be Dirava ena ura dainai. ⁴ Guna ita noho hebou neganai, umui ai hamaoroa hegaegae vadaeni, dagedage do ia vara. Momokani ia vara vadaeni, ani? ⁵ Vadaeni lau naria noho diba lasi. Unai dainai Timoteo lau siaia lao umui dekenai, emui abidadama sivaraina do lau diba totona. Badina be ai laloa momo, Satani ese umui ia koia bamona, vadaeni aiemai hekwarahi ibounai be anina lasi garina.

⁶ To harihari Timoteo umui dekena amo ia giroa mai vadaeni. Umui emui abidadama bona lalokau sivaraina ia mailaia vadaeni. Ia gwau umui ese nega ibounai ai umui laloa, mai moale danu, bona umui ura ai do umui itaia, ai ura umui ai itaia hegeregerena. ⁷ Aiemai varavara taudia e, umui emui abidadama dainai, aiemai hisihisi lalonai goada ai davaria vadaeni. Oibe, aiemai laloa hekwarahi lalonai, moale ai davaria vadaeni. ⁸ Umui ese Lohiabada lalonai umui gini goada noho, bona ia danu umui hakapua dainai, ai be hari ai mauri lou bamona. ⁹ Hari Dirava ai tanikiu henia diba umui totona. Oibe, Dirava ai tanikiu henia, badina be iena vairanai, moale bada ai abia umui dainai. ¹⁰ Dina bona hanuaboi Dirava ai noia, mai aiemai lalona ibounai, umui emui vairana do ai itaia totona. Unai neganai, emui abidadama ia manoka gabudia, be do ai hagoadaia lou gwauraia.

¹¹ Namona be iseda Tamana Dirava bona iseda Lohiabada Iesu ese aiemai dala do idia kehoa, do ai mai umui dekenai. ¹² Namona be Lohiabada ese emui lalokau umui ta ta dekenai, bona taunimanima ibounai dekenai do ia habadaia, umui dekenai ai lalokau henia ena bada hegeregerena. ¹³ Inai dala dekenai Dirava ese goada umui dekenai do ia henia. Vadaeni iseda Lohiabada Iesu Keriso, mai ena helaga taudia ibounai idia mai neganai, umui be do umui goeva, bona mai helaga danu do umui gini, iseda Tamana Dirava ena vairana dekenai.

4

Dirava ia ura henia mauri dalana

¹ Aiemai varavara taudia e, edena bamona do umui mauri Dirava hamoalea totona dalana, be umui dekenai ai hadibaia vadaeni. Oibe, bona inai mauri dalana umui badinaia noho. To hari Iesu ena ladana

dainai, umui ai noia goadagoada, taunimanima edia vairanai, inai bamona mauri namona kara do umui habadaia. ² Aiemei hadibaia hereva Lohiabada Iesu ena ladanai, umui dekenai ai henia gauna, be umui diba vadaeni. ³ Dirava ena ura be inai: Do umui helaga, heudahanai bona sihari kava karadia do umui rakatania momokani. ⁴ Umui tatau e, emui adavana danu do umui noho hebou, mai helaga, bona mai maoromaoro, Dirava ena vairana dekenai. ⁵ Emui adavadia do umui ura henidia lasi mai matabodaga danu, Dirava diba lasi bese taudia bamona. ⁶ Bona umui ese inai bamona kara dika do umui karaia lasi emui Keristani varavara tauna dekenai, ia do umui koia lasi, bona iena adavana do umui abia lasi. Badina be Lohiabada ese inai bamona idia karaia taudia edia dika davana do ia henidia momokani. Inai bamona ai ese umui ai sisiba henia guna, ani? ⁷ Dirava ia boiboi ita dekenai, do ita heudahanai totona lasi, to do ita helaga totona. ⁸ Unai dainai, inai hadibaia hereva ia negea tauna, ese taunimanima ia negea lasi, to ia ese Lauma Helaga umui dekenai ia henia Tauna, Dirava, ia negea inai.

⁹ Emui varavara Keristani taudia do umui lalokau henidia totona umui dekenai leta lau torea be anina lasi. Badina be Dirava ese umui ta ta do umui lalokau henia dalana ia hadibaia vadaeni umui dekenai. ¹⁰ Momokani, umui ese emui varavara Keristani taudia ibounai Macedonia dekenai umui lalokau henidia vadaeni. To aiemei varavara taudia e, umui ai noia, unai lalokau do umui habadaia. ¹¹ Inai bamona mauri umui tahua be namo: Mai manau danu do umui noho, bona umui sibona emui gaukara do umui karaia. Emui imana gaukara dekena amo sibona emui mauri do umui naria. Guna inai dala ai hadibaia umui dekenai. ¹² Inai dala dekenai Keristani lasi taudia do idia gwau, "Inai Keristani taudia be taunimanima namodia." Bona emui aniani ia noho dainai, haida edia aniani do umui noia lasi.

Lohiabada do ia giroa mai

¹³ Aiemei varavara taudia e, ai ura lasi mase dekenai idia mahuta noho taudia totona umui lalohisihisi. Ia namo lasi umui be lalohisihisi bada, Keristani lasi taudia bamona. Idia ese Dirava idia abidadama henia lasi, bona idia ese mase amo toreisi lou mauri totona idia naria lasi. ¹⁴ Badina be ita abidadama henia gauna be inai: Iesu ia mase, ma ia toreisi lou. Unai dainai ita Keristani taudia ita mase neganai, ita danu do ita toreisi lou. Dirava ese ita do ia hamauria lou, vadaeni Iesu danu do ita noho.

¹⁵ Ai ese Lohiabada sibona ena hereva, umui dekenai ai hadibaia gauna be inai: Lohiabada do ia giroa mai neganai, ita do mauri noho taudia ese mase dekenai idia mahuta noho taudia do ita gunalaia lasi. ¹⁶ Lasi, to mai goada danu Lohiabada do ia boiboi, bona aneru badana ese do ia boiboi, Dirava ena kibi regena danu. Bona unai neganai, Lohiabada be guba dekena amo do ia diho mai. Vadaeni Iesu idia abidadama henia noho neganai idia mase vadaeni taudia be do idia toreisi lou guna. ¹⁷ Unai murinai ita mauri noho taudia, be unai mase guna taudia danu do ita daekau lao atai, guba ena ori edia latanai, Lohiabada danu do ita hedavari totona. Vadaeni Lohiabada danu do ita noho hebou ela bona hanaihanai. ¹⁸ Unai dainai, inai hereva dekena amo, umui ta ta dekenai goada do umui henia.

5

Lohiabada ena giroa mai totona umui noho hegaegae

¹ Aiemei varavara taudia e, inai kara do idia vara ena nega korikori, be umui dekenai lau torea henia lasi. ² Badina be umui danu umui

diba vadaeni, Lohiabada ena Dina be do ia mai, henaoa tauna hanuaboi neganai ia mai bamona. ³ Inai bamona hereva, “Maino bona gari lasi ita noho inai,” taunimanima idia gwauraia noho neganai, karaharaga hisihisi dika momokani bona mase do ia ginidae! Rogorogo hahine ese mara ena hisihisi ia davarua haraga bamona unai hisihisi be do ia ginidae. Bona unai taunimanima do idia roho mauri diba lasi. ⁴ To aiemai varavara taudia e, umui be dibura taudia lasi, unai dainai unai Dina ia ginidae neganai, do umui hoa lasi. Henaoa tauna ese ruma tauna ia dogoatao haraga neganai, ruma tauna do ia hoa bada, to umui be unai bamona lasi. ⁵ Umui ibounai be diari ena taudia, umui be dina ena taudia. Ita be hanuaboi ena taudia lasi, bona dibura ena taudia lasi. ⁶ Unai dainai, namo ita mahuta lasi, haida idia mahuta bamona. To namo ita noga noho, ita laloo goada noho. ⁷ Mahuta taudia be hanuaboi lalonai idia mahuta, bona inua kekero taudia be hanuaboi lalonai idia kekero. ⁸ To ita be dina ena taudia, vadaeni do ita kekero lasi. Bona gau badana be, ita ese abidadama bona lalokau do ita atoa, iseda kemena ena dabua aukana bamona. Ma ita be namo Dirava ena hamauria do ita naria, mai laloo goada danu, inai kara ita atoa, iseda tuari kwara gauna aukana bamona. ⁹ Badina be Dirava ia ura lasi ita dekenai do ia badu, to iena ura be hamauria do ita abia, iseda Lohiabada Iesu Keriso dekena amo. ¹⁰ Ia be ita dainai ia mase. Vadaeni ia giroa mai neganai, ita mauri noho, o ita mase vadaeni taudia be ia danu do ita noho hebou. ¹¹ Unai dainai umui ta ta dekenai goada do umui henia, bona durua do umui henia, harihari umui karaia noho bamona.

Dirava ese Keristani taudia do ia durua, kara namo do idia karaia

¹² Aiemai varavara taudia e, umui dekenai ai noinoi, Keriso ena dala umui dekenai idia hadibaia noho taudia, be mai mataurai danu do umui kamoni henidia. ¹³ Edia gaukara dainai do umui lalokau henidia bona mataurai henidia. Mai lalokau bona mai maino danu do umui noho hebou.

¹⁴ Aiemai varavara taudia e, umui dekenai ai hereva goada, gaukara dekenai idia lahedo taudia do umui sisiba henidia, gari taudia do umui hagoadaia, bona manoka taudia do umui durua. Bona taunimanima ibounai dekenai do umui lalo namo henidia. ¹⁵ Umui ta ta dekenai kara dika ena davana do umui henia lasi, to nega ibounai umui ta ta dekenai bona taunimanima ibounai dekenai kara namo do umui karaia.

¹⁶ Nega ibounai do umui moale. ¹⁷ Nega ibounai do umui guriguri. ¹⁸ Emui mauri lalonai idia vara gaudia ibounai dainai Dirava do umui tanikiu henia. Badina inai be Dirava ena ura umui totona, Keriso Iesu danu umui hakapua dainai.

¹⁹ Lauma Helaga do umui koua lasi. ²⁰ Bema taunimanima ese Dirava ena hereva momokani idia gwauraia neganai, umui gwau lasi ia be anina lasi. ²¹ Hereva ibounai do umui laloo namonamo, idia be Dirava dekena amo idia mai o lasi, bona hereva namodia do umui dogoatao momokani. ²² Dika ibounai do umui rakatania.

²³ Maino ena Dirava ese umui do ia hahelagaia. Emui lalona bona emui laumana bona emui tauanina be ia ese do ia naria noho. Mai kerere ta lasi danu do umui noho, ela bona iseda Lohiabada Iesu Keriso do ia giroa mai. ²⁴ Umui dekenai ia boibo Diravana be momokani, ia ese iena hereva gauna do ia karaia.

²⁵ Aiemai varavara taudia e, ai totona do umui guriguri.

²⁶ Iesu idia abidadama henia taudia ibounai ta ta do umui hanamoia, ekalesia ena lalokau kisi idia ta ta dekenai do umui henia.

²⁷ Umui dekenai lau hereva goada, Lohiabada ena ladana dainai, Keristani taudia ibounai dekenai inai revareva do umui duahia.

²⁸ Lohiabada Iesu Keriso ena hariharibada be umui dekenai do ia noho.

PAULO ENA REVAREVA IHARUANA TESALONIKA TAUDIA DEKENAI

¹ Ai tau toiosi, Paulo bona Sila bona Timoteo, ese iseda Tamana Dirava bona Lohiabada Iesu Keriso edia ekalesia orea Tesalonika dekenai, umui dekenai revareva ai torea inai.

² Iseda Tamana Dirava bona Lohiabada Iesu Keriso dekenai ai noia hariharibada bona maino umui dekenai do idia henia.

Keriso ia giroa mai neganai Dirava ese taunimanima do ia kota henia

³ Aiemei varavara taudia e, nega ibounai umui totona Dirava ai hanamo. Unai be ia maoro, badina be umui emui abidadama ia bada lao noho, bona emui lalokau umui ta ta dekenai danu ia bada lao noho.

⁴ Unai dainai ai ese Dirava ena ekalesia oreadia edia vairanai umui ai herevalaia mai heagi danu. Ai moalelaia gauna be, dagedage bona hisihisi bada umui abia noho, to umui goada noho, bona Dirava dekenai umui abidadama henia noho.

⁵ Oibe, inai umui karaia noho kara namodia ese idia hedinaraia, Dirava ena kota be maoromaoro momokani. Bona iena Basileia totona inai hisihisi umui abia noho dainai, Dirava ese davana namona umui dekenai do ia henia iena Basileia lalonai. ⁶ Dirava ese kara maoromaoro do ia karaia. Hisihisi umui dekenai idia henia taudia dekenai, be ia ese hisihisi do ia henidia. ⁷ Dirava ese umui bona ai, hisihisi ita abia noho taudia dekenai iena mauri namona do ia henia. Inai be do ia vara, Lohiabada Iesu bona iena aneru mai siahu bada danu guba dekena amo do idia mai neganai. ⁸ Mai lahi siahu bada danu, Dirava ese ia idia ura lasi taudia, bona Lohiabada Iesu ena Sivarai Namona idia abia dae lasi taudia dekenai davana metau do ia henidia. ⁹ Edia davana be inai: Idia be Lohiabada ena vairana, bona iena hairai siahuna dekena amo daudau do idia noho. Inai anina be, Dirava ese idia do ia hadikaia ore momokani, bona inai bamona do idia noho hanaihanai. ¹⁰ Oibe, Keriso do ia mai Dinana dekenai, inai taudia madi do idia dika. Unai Dina neganai Dirava ena abidadama taudia ibounai ese Keriso do idia hanamo, bona hairai bada do idia henia. Umui danu idia edia huanai do umui gini, badina be aiemei haroro umui abia dae dainai.

¹¹ Unai dainai nega ibounai umui totona ai guriguri noho. Iseda Dirava ai noia, ia ese umui do ia durua, vadaeni umui ese iena boibo ena dala do umui badinaia namonamo, iena ura hegeregereha momokani. Bona Dirava ai noia danu, ia ese iena siahu dekena amo umui do ia hagoadaia, vadaeni umui ese umui ura karaia kara namodia ibounai do umui karaia, bona emui abidadama ese umui dekenai ia havaraia gaukara ibounai, be do umui karaia haorea momokani. ¹² Inai dala dekena amo, Lohiabada Iesu ena ladana be taunimanima ese do idia hanamo umui dainai. Bona umui danu Lohiabada ese do ia hanamo, iseda Dirava, bona Lohiabada Iesu Keriso edia hariharibada dainai.

2

Tau dika rohorohona

¹ Egu varavara taudia e, iseda Lohiabada Iesu Keriso ma do ia giroa mai, bona ia danu do ita haboua lao. Unai dainai umui dekenai lau noinoi, do umui laloa daradara lasi. ² Tau haida idia gwau, Lohiabada ena Dina ia ginidae vadaeni. Sedira haida idia laloa unai bamona ai

peroveta, o unai bamona ai haroro. O sedira haida idia gwau unai bamona revareva ta ai siaia. To inai bamona hereva dekenai do umui laloa daradara lasi, bona do umui laloa kerere lasi. ³ Tau ta ese dala inai bamona dekenai do ia koikoi lasi umui dekenai. Badina Lohiabada ena Dina be do ia ginidae lasi, ela bona unai Tau Dika Rohorohona do ia hedinarai guna. Unai tau be Dirava ese do ia hadikaia momokani mase gabuna dekenai. ⁴ Unai tau ese taunimanima idia guriguri henia gaudia, dirava toana gaudia, do ia dagedage henia. Bona ia ese sibona do ia abia isi, unai tomadiho kara ibounai be ia henunai do ia atoa gwauraia. Ma danu unai Tau Dikana ese Dirava ena Dubu Helaga dekenai do ia helai diho, bona do ia gwau, “Lau sibona be Dirava.”

⁵ Guna umui dekenai lau noho neganai, inai hereva ibounai lau hadibaia. Sedira umui laloaboio, a? ⁶ Ma umui diba, ani, hari inai neganai unai Tau Dikana ena dala be gau ta ese ia koua noho. To iena nega korikori ia ginidae neganai, unai Tau Dikana do ia hedinarai. ⁷ Badina be harihari inai taravatu utua kara dika rohorohona be hunia dala dekenai ia gaukara noho, bona inai bamona hunia dekenai do gaukara noho, ela bona Dirava ese inai kara dika ia koua noho tauna do ia kokia lao. ⁸ Unai neganai unai Tau Dika Rohorohona do ia hedinarai. To Lohiabada Iesu mai diaridiari bona mai hairai bada danu do ia mai neganai, ia ese unai Tau Dikana do ia alaia mase. ⁹ Satani ena siahu dekena amo unai Tau Dikana be do ia mai, vadaeni hoa bona toa karadia idauidau momo dekena amo ia ese taunimanima momo do ia hakaua kerere. ¹⁰ Ia ese kara kerere idauidau ibounai dekena amo, mase dala dekenai idia raka noho taudia do ia koidia. Inai taudia bema hereva momokani idia abia dae, bona lalokau henia neganai, Dirava do ia hamauridia, to idia ura lasi. ¹¹ Unai dainai Dirava ese laloa kerere bada ia havaraia edia lalona dekenai, hereva koikoi do idia hamomokania totona. ¹² Inai anina be, hereva momokani do idia abia dae lasi, bona kara dika karaia totona idia moale bada. Inai taudia ibounai, be Dirava ena Kota Badana lalonai, edia kerere momokani ena davana do idia davarai.

Mauri abia totona Dirava ese umui ia abia hidi

¹³ Aiema varavara taudia e, ai be umui dainai nega ibounai Dirava ai hanamo. Badina be Dirava ese umui ia abia hidi guna, mauri umui abia totona. Bona hereva momokani umui abidadama henia dainai, Lauma Helaga ena siahu dekena amo, Dirava ese iena helaga taudia umui ia halaoa vadaeni. ¹⁴ Siyarai Namona umui dekenai ai harorolaia dekena amo, Dirava ese umui dekenai ia boiboi vadaeni. Umui dekenai ia boiboi, iseda Lohiabada Iesu Keriso ena hairaina, be umui danu do umui abia totona. ¹⁵ Unai dainai, aiema varavara taudia e, do umui gini goada, aiema haroro bona aiema revareva dekena amo ai hadibaia hereva do umui dogoatao momokani.

¹⁶ Iseda Lohiabada Iesu Keriso bona iseda Tamana Dirava ese ita idia lalokau henia noho. Edia hariharibada ese ita ta ta iseda lalona idia hagoadaia noho, bona unai dainai Dirava ena gau namodia ita naria noho, mai haheauka danu. ¹⁷ Bona idia ese umui do idia haginia auka, mai goada danu. Vadaeni nega ibounai kara namodia do umui karaia, bona hereva namodia do umui gwauraia.

3

Ai totona do umui guriguri

¹ Aiemai varavara taudia e, aiemai hereva dokona be inai: Ai totona do umui guriguri, vadaeni Lohiabada ena hereva do ia tubu haraga noho. Umui noinoi, taunimanima momo ese mai mataurai danu, Lohiabada ena hereva do idia abia dae, umui ese umui abia dae hegeregerena.

² Umui guriguri danu, Dirava ese kara dika bona kara kerere taudia dekena amo ai do ia hamauria. Badina be taunimanima haida sibona be mai edia abidadama Dirava dekenai.

³ To Lohiabada be momokani. Ia ese umui do ia haginia goada, bona Satani dekena amo umui do ia hamauria. ⁴ Ai be Lohiabada ai abidadama henia dainai, ai ese umui danu ai abidadama henia. Ai diba momokani, umui dekenai ai hadibaia hereva be umui karaia noho, bona do umui karaia noho.

⁵ Lohiabada ese umui emui lalona do ia hakaudia, vadaeni Dirava ena lalokau, bona Keriso ese ia henia haheauka, do umui diba momokani.

Gaukara be gau badana

⁶ Aiemai varavara taudia e, Lohiabada Iesu Keriso ena ladana dainai, umui dekenai ai hereva mai goada danu, inai bamona: Mai lahedo danu idia noho, bona aiemai hereva idia kamona lasi Keristani taudia, idia dekena amo do umui raka siri. ⁷ Umui diba danu aiemai kara bamona umui karaia be namo. Umui dekenai ai noho neganai be ai lahedo lasi.

⁸ Badina be ai ese tau ta ena aniani ai ania kava lasi. To dina bona hanuabo ai gaukara mai hekwarahi danu, ai dainai umui ta ese moni do ia halusia kava garina. ⁹ Ai be siahu taudia dainai, umui ese aniani ai dekenai umui henia be maoro. To ai ura lasi, badina be ai ura aiemai manau kara bamona do umui karaia. ¹⁰ Ai be umui dekenai ita noho neganai, aiemai hadibaia hereva ta be inai bamona, “Bema tau ta ese gaukara ia karaia lasi neganai, aniani ta umui henia lasi.”

¹¹ Inai bamona ai hereva, badina ai kamona umui haida be umui gaukara lasi, to haida edia gau bona edia kara umui herevalaia kava momo sibona. ¹² Lohiabada Iesu Keriso ena ladana dainai, inai bamona idia karaia noho taudia dekenai ai hereva mai goada danu, bona ai sisiba henidia, ai gwau, “Mai manau danu do umui gaukara, umui noho namonamo, bona umui sibona emui aniani do umui davarua.”

¹³ Aiemai varavara taudia e, kara namona karaia totona do umui hesiku lasi. ¹⁴ Bema tau ta ese inai revareva, ai torea gauna, ia abia dae lasi neganai, inai tauna be do umui itaia namonamo, vadaeni do umui atoa siri, do ia hemarai totona. ¹⁵ Do umui dagedage henia lasi umui tuari henia tauna bamona, to ia be emui tadina bamona do umui sisiba henia sibona.

Paulo ena hereva dokona

¹⁶ Lohiabada, iseda maino ena badina korikori, ese nega ibounai emui mauri ta ta lalonai, lalo namo do ia henia. Lohiabada be umui ibounai dekenai do ia noho.

¹⁷ Inai hanamoa hereva be lau, Paulo, egu imana dekenai lau torea noho. Lauegu revareva ibounai edia dokona kahana dekenai egu ladana lau sainia inai bamona. Inai bamona sibona lau torea.

¹⁸ Iseda Lohiabada Iesu Keriso ena hariharibada be umui ibounai dekenai do ia noho.

PAULO ENA REVAREVA GINIGUNANA TIMOTEO DEKENAI

¹ Lau inai Paulo, Keriso Iesu ena aposetolo tauna. Inai dagi lau karaia noho iseda Hamauria Diravana bona Keriso Iesu edia oda dainai. Keriso be iseda guba mauri do ita abia, ita naria noho ena lalao namona dalana. ² Timoteo e, oi be lauegu natuna korikori, Iesu oi badinaia dainai.

Inai revareva lau torea oi dekenai, bona lau ura iseda Tamana Dirava bona Keriso Iesu, iseda Lohiabada dekena amo hariharibada bona bogahisihisi, bona maino do oi abia.

Hadibaia koikoi taudia do oi naria namonamo

³ Makedonia dekenai lau lao dainai, oi lau noia, Efeso dekenai do oi lao, bona unuseni do oi noho. Tau haida unuseni ese hadibaia hereva koikoi idia gwaurai noho. Oi ese edia gaukara do oi hadokoa. ⁴ Oi ese idia do oi hamaoroa, hadibaia koikoi, gori bona sene taudia edia ladana tahu herevadia do idia hadokoa. Badina lalao inai bamona ese hepapahuahu sibona idia havaraia. To Dirava ena gaukara be abidadama dekena amo ia tubu noho. ⁵ Lauegu oda ena anina korikori be, lau ura lalokau do ia vara, lalao goevagoeva, lalao maoromaoro bona abidadama korikori dekena amo. ⁶ Haida ese inai bamona kara namodia idia rakatania vadaeni. Unai dainai hereva kavakava idia gwaurai noho. ⁷ Idia ura Dirava ena taravatu hadibaia gaukara idia karaia, to edia hereva edia anina, bona idia hereva goadagoada gaudia edia anina, idia diba lasi.

⁸ Ita diba Taravatu be namo, bema tau ta ese do ia gaukaralaa maoromaoro neganai. ⁹ To inai danu ita diba be namo: Taravatu be kara maoromaoro taudia totona lasi. Lasi, Taravatu be inai bamona taudia totona: Taravatu negea taudia, kerere taudia, Dirava gari henia lasi taudia, kara dika taudia, guriguri kara ura lasi taudia, mai edia lauma lasi taudia, tamadia o sinadia idia alaia taudia, ala-ala taudia. ¹⁰ Sihari kava taudia, tatau ese tatau danu sihari karaia taudia, taunimanima idia henaia taudia, koikoi taudia, kota lalonai hereva koikoi taudia. Oibe, Taravatu be inai bamona taudia totona, bona ekalesia ena hadibaia hereva momokani idia negea taudia danu. ¹¹ Unai hadibaia hereva momokani, be Namu Herea Momokani bona Hairai Diravana ena Sivarai Namona. Bona unai Dirava ese iena Sivarai Namona gwaurai tauna lau ia halaoa vadaeni.

Paulo ese Keriso ia tanikiu henia

¹² Iseda Lohiabada Keriso Iesu ese lau dekenai siahua ia henia, badina ia lalao lau be hegeregere iena gaukara do lau karaia. Vadaeni ia ese lau ia abia hidi, iena hesiai tauna ta. Unai dainai lau tanikiu henia. ¹³ Momokani, gunaguna lau ese Keriso lau hereva dika henia, lau dagedage henia, bona iena ladana lau hadikaia. To Dirava ese lau ia bogahisihisi henia, badina be abidadama lau do diba lasi, bona egu kara ena dika lau do diba lasi dainai. ¹⁴ Oibe, iseda Lohiabada ese iena hariharibada bada herea lau dekenai ia henia. Vadaeni abidadama bona lalokau lau davarai, Keriso Iesu lalonai ita noho neganai ita davarai gaudia be unai.

¹⁵ Inai lau gwaurai hereva be momokani herea, bona taunimanima ese idia dae bona hamomokania be namo: Keriso Iesu be tanobada

dekenai ia mai, be kara dika taudia hamauria totona. Bona kara dika tau dikana momokani be lau inai. ¹⁶ To Dirava ese lau ia bogahisihisi henia ena badina be inai: Keriso ia ura iena haheauka, be lau dekena amo do ia hedinarai namonamo, taunimanima ibounai edia vairana dekenai. Vadaeni egu kara dika bada Keriso ese ia gwauatao, be idia itaia neganai, idia danu ia do idia abidadama henia, bona iena mauri hanaihanai do idia davaria. ¹⁷ Dirava be Noho Hanaihanai King, ia mase diba lasi, matana dekenai ita itaia diba lasi, ia sibona mo be Dirava. Ia do ita matauraia, bona ia do ita hanamo bada, harihari ia lao bona hanaihanai. Amen.

Timoteo ese Lohiabada ena tuari do ia goadalaia

¹⁸ Laegu natuna Timoteo e, oda oi dekenai lau henia be inai: Dirava ena tuari lalonai do oi tuari namonamo, peroveta hereva gunana ese oi ia herevalaia hegeregereana. ¹⁹ Inai tuari lalonai, abidadama bona laloa maoromaoro do oi dogoatao auka. Haida be laloa maoromaoro dekena amo idia raka siri vadaeni. Unai dainai edia abidadama ia dika, vanagi be davara nadi dekenai ia kamokau, bona ia dika bamona. ²⁰ Inai bamona idia karaia vadaeni taudia rua be inai: Humenaio bona Alesana. Idia ruaosi be Satani ena imana dekenai lau henia, panisi do idia abia totona. Dirava ena ladana do idia hadikaia lou lasi.

2

Emui guriguri hebou edia tomadiho dalana

¹ Laegu sisiba ginigunana be, lau ura emui guriguri gaukara lalonai, taunimanima ibounai dainai do umui noinoi karaia. Umui guriguri, bona umui noinoi neganai, Dirava do umui tanikiu henia. ² King taudia totona, bona lohia taudia ibounai totona danu, Dirava dekenai do umui noinoi. Unai dekena amo, Dirava ita badinaia bona matauraia dainai, mai maino danu do ita noho namonamo. ³ Inai bamona kara be namo, badina be inai dekena amo iseda Hamauria Diravana ita hamoalea noho. ⁴ Dirava ia ura taunimanima ibounai ese mauri do idia davaria, bona hereva momokani do idia diba. ⁵ Badina be Dirava be tamona, Dirava bona taunimanima ia hakupudia tauna danu be tamona. Unai tauna be Keriso Iesu. ⁶ Keriso sibona ese iena mauri ia henia, taunimanima ibounai hamauria totona. Dirava ese nega korikori dekenai inai kara ia havaraia. Bona unai dekena amo ita diba momokani, Dirava ia ura taunimanima ibounai ese mauri do idia davaria. ⁷ Unai dainai Dirava ese iena haroro tauna bona aposetolo tauna lau ia abia hidi vadaeni. Iuda lasi bese taudia dekenai lau ia siaia, abidadama bona hereva momokani ena sivarai idia dekenai do lau harorolaia totona. Lau koiko lasi, lau hereva momokani inai.

⁸ Lau ura tatau ibounai, gabu ibounai dekenai do idia guriguri. Lau ura mai helaga danu, edia imana Dirava dekenai idia abia isi. Lau ura inai idia karaia neganai, idia be badu ta lasi, bona hepapahuahu ta lasi.

Paulo ena sisiba hahine taudia dekenai

⁹ Lau ura danu hahine taudia ese mai manau bona mai mataurai danu edia dabua do idia kwatua. Edia huina danu sitaelo sitaelo bamona do idia karaia lasi, bona golo o kavabukavabu herahera gaudia do idia atoa lasi. Davana bada dabua danu do idia abia lasi. ¹⁰ To kara namodia ibounai, be herahera bamona do idia karaia. Unai be maoro, bona Dirava idia matauraia hahine edia kara korikori. ¹¹ Hahine ese diba do idia tahua, mai edia hereva momo lasi, bona mai edia manau danu.

¹² Hahine lau taravatua inai, idia ese tatau do idia hadibaia lasi, o gunalaia lasi. Hereva momo lasi danu do idia noho. ¹³ Badina be Dirava ese Adamu ia karaia guna, Heva be gabeai. ¹⁴ Bona Satani ese Adamu ia koia lasi, to ia ese hahine sibona ia koia. Vadaeni hahine ese Dirava ena taravatu ia utua. ¹⁵ To natuna do idia havaraia dekena amo, hahine taudia ese mauri do idia davaria. Oibe, bema Keriso idia abidadama henia, Keriso lalonai idia noho helaga, bona mai lalokau danu kara namodia idia karaia neganai, hamauria do idia davaria.

3

Ekalesia gunalaia taudia

¹ Inai hereva be momokani: Bema tau ta ia ura be ekalesia ena gunalaia tauna ena dagi do ia tahua, ia be dagi namona ia ura henia inai. ² Ekalesia gunalaia tauna be kara maoromaoro tauna, kerere ta lasi. Tau ta ese iena kerere ta ia gwauraia diba lasi. Ia be hahine tamona ena adavana, inua momo lasi tauna, mai ena aonega, bona lalo namo, bona mai ena bogahisihisi kara. Ia ese idau taudia be iena ruma dekenai do ia abidia dae, bona ia be hadibaia gaukara namona do ia karaia diba tauna. ³ Ia be kekero tauna lasi, heatu tauna lasi, to mai ena manau bona maino. Ia ese moni do ia mataganigani henia lasi. ⁴ Iena ruma taudia, adavana bona iena natuna do ia biagua namonamo. Iena natuna ese ia do idia kamona henia bona matauraia. ⁵ Badina be bema tau ta ese iena ruma korikori taudia ia biagua diba lasi neganai, Dirava ena ekalesia edena bamona do ia gunalaia diba? ⁶ Keristani matamata tauna ese inai dagi do ia abia lasi, do ia hekokoroku, vadaeni Satani ena dibagani ese do ia hakererea garina. ⁷ Ekalesia gunalaia tauna ena ladana be do ia namo, ekalesia lasi taudia edia vairana dekenai. Vadaeni inai murimuri taudia ese unai ekalesia gunalaia tauna do idia matauraia, haida ese ia do idia samania, bona Satani ena koiko gabuna lalonai do ia moru garina.

Diakono taudia

⁸ Diakono taudia danu be do idia kara maoromaoro taudia, bona tau namodia momokani. Idia be inuinu momo taudia lasi, bona moni do idia mataganigani henia lasi. ⁹ Iesu Keriso abidadama henia ena sivarai momokani do idia badinaia, mai edia laloa maoromaoro danu. ¹⁰ Diakono dagi do idia abia kava lasi, to edia kara do umui tahua guna be namo. Bema ta ese edia kerere ia gwauraia diba lasi, vadaeni dagi idia abia diba. ¹¹ Edia adavana danu, be do idia kara maoromaoro hahine taudia. Do idia hereva dika lasi, do idia inuinu momo lasi, bona mai edia laloa maoromaoro danu do idia noho, edia kara ibounai lalonai. ¹² Diakono tauna be hahine tamona ena adavana, bona iena natuna bona ruma taudia do ia biagua namonamo. ¹³ Badina be diakono gaukara idia karaia namonamo taudia, be taunimanima ese do idia matauraia. Vadaeni edia ladana be namo dainai, edia abidadama Iesu Keriso dekenai, be do idia herevalaia goadagoadi diba.

Hunia hereva badana

¹⁴ Inai hereva oi dekena lau torea noho, to lau ura be nega daudau lasi lalonai oi dekenai do lau mai. ¹⁵ To bema lau mai haraga lasi neganai, inai revareva ese oi do ia hadibaia, edena kara do ita karaia Dirava ena ekalesia lalonai. Ita be Dirava ena orea taudia, bona inai orea be mauri Diravana ena ekalesia. Ekalesia be hereva momokani ena du, bona hereva momokani ia gimaia maguna.

16 Momokani, Dirava ena dala ita badinaia, be hunia gauna badana, ani? Bona Dirava ese inai hereva ena anina be ita dekenai ia hedinarai, inai bamona:

Taunimanima edia tauanina dekenai Keriso ia hedinarai,
Lauma Helaga ese iena kara maoromaoro momokani ia gwaurai.

Aneru ese ia idia itaia.

Bese ibounai edia huanai ia idia harorolaia.

Tanobada taudia ese ia idia hamomokania,

bona idia ese ia idia abidadama henia.

Guba dekenai Dirava ese ia abia daekau,

bona ia ese ladana bada momokani ia abia.

4

Hadibaia hereva koikoi taudia

¹ Lauma Helaga ese ia gwaurai hedinarai vadaeni, nega gabeai tau haida ese Iesu badinaia kara do idia rakatania, lauma koikoidia do idia kamoni henia, bona lauma dikadia edia hadibaia hereva do idia abia dae. ² Inai hadibaia hereva be koikoi taudia ese do idia gwaurai. Edia laloa maoromaoro dalana idia hamasea vadaeni, auri sialu herea ese edia lalona ia gabua dikadika bamona. ³ Idia ese taunimanima do idia taravatua, idia gwau do idia headava lasi, bona aniani haida do idia ania lasi. To unai aniani be Dirava ese ia karaia, do ita ania totona. Abidadama taudia bona hereva momokani idia diba taudia ese Dirava do idia tanikiu henia murinai, inai aniani idia ania diba. ⁴ Dirava ese ia karaia gaudia ibounai be namo, bona mai taravatu lasi. Taunimanima ese Dirava do idia tanikiu henia murinai, aniani ibounai do idia ania diba. ⁵ Badina be Dirava ena hereva, bona taunimanima edia guriguri ese ia hahelagaia vadaeni.

Keriso Iesu ena hesiai tauna namona

⁶ Inai bamona hereva bema Keristani varavara taudia dekenai oi hadibaia neganai, oi be Keriso Iesu ena hesiai tauna namona ta. Bona Iesu oi abidadama henia, bona iena hadibaia hereva oi badinaia noho dainai, oiemu lauma danu do oi ubua noho. ⁷ To gori kavakavadia do oi negea momokani, idia be anina lasi gaudia. Dirava ena ura kara do oi tahua, bona do oi badinaia noho. ⁸ Tauanina hagoadaia totona treinini bema ita karaia, inai kara ese ita do ia durua sisina. To bema Dirava totona ita treinini noho, ia ese iseda lauma do ia hagoadaia, bona inai kara ese ita do ia durua bada herea. Io, bema iseda lauma idia namo neganai, durua do ita abia inai tanobada ena mauri dekenai, bona gabeai do ita abia mauri dekenai danu. ⁹ Inai be hereva momokani, bona ita abia dae bona hamomokania be namo. ¹⁰ Oibe, inai hereva be momokani dainai, ita hekwarahi bona ita hisihisi noho. Badina be Mauri Diravana ita abidadama henia noho. Ia be taunimanima ibounai edia Hamauria Tauna, to ia be abidadama taudia edia Hamauria Tauna momokani.

Ekalesia orea naria dalana

¹¹ Inai bamona hereva do oi hadibaia goadagoada. ¹² Ibounai do idia itaia oi be tau matamata, to do oi naria, ta ese oi be anina lasi gauna do ia gwaurai garina. Lasi, to oiemu noho mauri dekenai, Keriso ena kara do oi hedinarai. Vadaeni oiemu hereva namona, kara namona, lalokau, abidadama bona laloa goevagoeva idia itaia neganai, oiemu kara bamona do idia karaia. ¹³ Buka Helaga taunimanima dekenai do oi duahia, sisiba goada do oi henidia, bona hadibaia gaukara do oi

goadalaia noho, ela bona lau ginidae. ¹⁴ Dirava ese oi dekenai ia henia harihari gauna, oiemu lauma ena diari do oi gaukaralaia goadagoada, do oi hesiku lasi. Inai siahui oi ese oi abia, peroveta hereva dainai, bona ekalesia tau badadia ese edia imana oiemu kwarana dekenai idia atoa neganai.

¹⁵ Oiemu diba bona goada do oi gaukaralaia, mai oiemu lalona ibounai. Vadaeni taunimanima ibounai ese oiemu goada do idia itaia, ia bada lao noho. ¹⁶ Oi sibona oiemu kara do oi naria namonamo, oiemu hadibaia hereva danu. Inai kara namodia do oi karaia noho, badina unai dekena amo, oi sibona ese mauri do oi davaria, bona oi dekenai idia kamona taudia danu ese mauri do idia davaria.

5

Abidadama taudia durudia dalana

¹ Tau badana do oi gwau henia lasi. To mai manau danu do oi hereva henia, ia be oiemu tamana bamona. Eregabe taudia do oi hereva henia, idia be oiemu tadikaka bamona. ² Hahine badadia do oi hereva henia, idia be oiemu sinana bamona. Kekenai taudia do oi hereva henia, oiemu taihuna do oi hereva henia bamona, mai oiemu laloa goevagoeva danu.

³ Vabu taudia do oi durua, bema idia be vabu korikori. ⁴ To vabu ta, bema ia be mai ena natuna o mai ena tubuna, idia ese edia sinana bona tubuna idia durua be namo. Badina be Dirava do ita hamaolea karana ta be, iseda ruma taudia do ita laloa bona durua. ⁵ To vabu korikori be varavara ta lasi. Ia ese Dirava ia abidadama henia noho, ia guriguri henia noho, bona Dirava ena durua ia noia noho, dina bona hanuaboi ibounai. ⁶ To tauanina ena moale ia tahua noho vabuna, ia be hegeregere ia mase vadaeni. ⁷ Unai dainai vabu do oi hamaoroa, Dirava dekenai do idia guriguri nega ibounai. Inai bamona sisiba goada idia dekenai do oi henia, vadaeni do idia noho namonamo, bona taunimanima ese edia kerere ta do idia gwauraia diba lasi. ⁸ Ma, oi kamona. Bema tau ta ese iena varavara ia naria lasi, o iena ruma taudia ia ubua lasi neganai, ia ese iena abidadama Keriso dekenai ia negea vadaeni. Iena dika ese abidadama lasi murimuri tauna ena dika ia hanaia vadaeni.

⁹ Vabu edia ladana torea pepa dekenai, be inai bamona vabu sibona edia ladana do oi torea: Vabu iena mauri lagani be 60 vadaeni, bona tau tamona ia adavaia, ¹⁰ iena kara namodia dainai be taunimanima ese idia hanamo. Ia ese iena natuna ia naridia namonamo. Ia ese idau taudia dekenai aniani ia henia. Ia ese Dirava ena taudia edia aena ia huria. Ia ese hisihisi taudia ia durua, bona kara namodia ibounai ia goadalaia. Unai bamona vabu sibona edia ladana unai pepa dekenai do oi torea.

¹¹ To vabu hahine matamata edia ladana be inai vabu edia torea pepa dekenai do oi torea lasi, badina be edia ura dikadia dainai idia ura headava lou neganai, idia ese Keriso do idia rakatania. ¹² Vadaeni panisi do idia davaria, badina be edia gwauhamata gunana Keriso dekenai idia negea dainai. ¹³ Bona lahedo karadia dekenai do idia manada, idau ruma idau ruma dekenai edia nega do idia haorea kava. Bona lahedo sibona lasi, to do idia kiki kava, udu mauri, bona idia herevalaia be maoro lasi gaudia do idia herevalaia. ¹⁴ Unai dainai lau ura vabu hahine matamata taudia be do idia headava lou, natuna do idia havaraia, bona edia ruma taudia do idia naria. Bema unai bamona neganai, iseda orea idia dagedage henia taudia be dala lasi iseda latanai hereva dikadia do idia gwauraia. ¹⁵ Badina be vabu haida ese Iesu ena dala idia rakatania

vadaeni, Satani ena murinai idia raka. ¹⁶ To bema Keristani hahine ta ena varavara haida be vabu neganai, ia ese unai vabu do ia naridia. Vadaeni ekalesia orea do ia hametaua lasi. Unai dekenai amo ekalesia orea ese vabu korikori do ia naridia diba.

¹⁷ Ekalesia gunalaia taudia, gaukara namona idia karaia taudia edia gaukara davana do umui habadaia be namo. Bona ekalesia gunalaia taudia, haroro bona hadibaia gaukara idia karaia taudia edia davana umui habadaia herea, be namo. ¹⁸ Badina be Buka Helaga lalonai inai bamona ia torea, ia gwau:

“Boromakau ese uiti ia moia neganai, iena uduna do umui koua lasi.”

Ma ia gwau:

“Gaukara tauna ese iena gaukara davana do ia abia, unai be maoro.”

¹⁹ Bema tau ta ese ekalesia gunalaia tauna ia samania neganai, iena samania hereva do oi abia dae lasi. To bema rua o toi ese inai samania hereva idia gwauraia neganai do oi kamonai henia. ²⁰ Kara dika taudia ibounai be ekalesia taudia ibounai edia vairanai do oi gwau henia, vadaeni ekalesia taudia oredia be do idia gari.

²¹ Dirava, bona Keriso Iesu, bona aneru helagadia ibounai edia vairanai, oi lau hamaoroa, inai lauegu hadibaia hereva do oi badinaia. Idia samania tauna ena kara do oi tahua neganai, iena toana o iena bese o iena sياهو do oi laloa lasi, bona oiemu kota hereva do oi gwauraia maoromaoro, do oi hagagevaia lasi. Tau haida oi habadua, bona ma haida oi hereva namo henidia, idia be oiemu turana, o varavara dainai, a? Inai bamona do oi karaia lasi, to ibounai maka tamona dekenai do oi kara henidia. ²² Lohiabada ena gaukara totona, gunalaia tauna ta do oi abia hidi haraga lasi. Haida edia kara dika do oi durua lasi. Oi sibona oi naria namonamo, do oi goevagoeva.

²³ Ranu kavakava sibona do oi inua lasi, to uaina sisina danu do oi inua, oiemu bogana hanamoia totona. Badina be oi gorere nega momo dainai.

²⁴ Tau haida edia dika idia hedinarai namonamo, ia gunalaidia bamona, ia lao bona kota gabunai. To haida edia dika ita itaia diba lasi ela bona dina ta. ²⁵ Unai bamona danu, kara namodia haida be idia hedinarai namonamo. Ma kara namodia haida idia hedinarai haraga lasi, gabeai sibona, badina be kara namodia idia hunia ela bona hanaihanai diba lasi.

6

Hesiai taudia edia durua hereva

¹ Hesiai mai guia danu taudia ese inai bamona idia laloa be namo, “Lauegu biaguna be tau namona.” Unai dekenai amo idia ese edia biaguna do idia matauraia. Bona inai bamona idia karaia neganai, tau ta ese Dirava ena ladana bona iseda Keristani hadibaia hereva do ia hadikaia diba lasi. ² Hesiai mai guia danu taudia haida edia biaguna be Keristani taudia. Vadaeni hesiai tauna inai bamona do idia laloa lasi, “Lauegu biaguna be Keristani varavara tauna sibona, unai dainai do lau matauraia lasi.” Lasi, to inai bamona ia laloa be namo, “Lauegu biaguna be Keristani tauna, vadaeni do lau lalokau henia. Do lau gaukara goada ia dekenai, ia do lau durua totona.” Inai bamona do ia laloa be namo, bona iena biaguna totona do ia gaukara namonamo momokani. Inai hereva do oi harorolaia, bona hadibaia goada danu.

Kohu momokani, bona kohu momokani lasi

³ Iseda Lohiabada Iesu Keriso ena hereva momokani ese Dirava ena kara ita dekenai ia hadibaia diba. To bema tau ta ese inai hereva momokani ia rakatania, bona hereva idauna, Iesu ena hereva hegeregere lasi do ia hadibaia neganai, ⁴ do ita diba unai tau be hekoko-roku tauna. Ia be gau ta ia diba lasi. Ia ese hepapahuahu bona heai sibona ia ura henia kava. To unai dekena amo idia vara gaudia be inai: Mama, heai, hereva dika, laloa dikadia. ⁵ Unai bamona idia karaia taudia be nega ibounai idia hepapahuahu kava, bona edia laloa be anina lasi. Idia ese hereva momokani idia rakatania vadaeni. Idia laloa Dirava badinaia kara be moni davaria dalana ta.

⁶ To momokani, Dirava ia badinaia tauna ese kohu momokani do ia davaria. Oibe, ia davaria, badina unai tau be mai ena kohu namona, gauna be, iena lalona be namo. ⁷ Badina be gau ta tanobada dekenai ita abia mai lasi, bona gau ta danu do ita abia lao lasi. ⁸ Unai dainai bema ita be mai iseda aniani bona dabua neganai, moni dekenai ita laloa momo lasi be namo. ⁹ To kohu momo idia ura henia taudia be dibagani dekenai idia moru diba. Bona boroma be tarapu dekenai ia moru bamona, ura dikadia bona ura kavakava ese unai kohu ura henia taudia do idia koia, bona hadikaia. ¹⁰ Badina be moni ura henia kara ese dika idauidau ibounai ia havaraia noho. Bona moni idia ura bada taudia haida ese Iesu abidadama henia kara idia rakatania vadaeni, bona mai lalohisihisi momo danu, edia mauri idia hadikaia ore vadaeni.

Paulo ena hadibaia hereva Timoteo dekenai

¹¹ To oi be Dirava ena tauna, oi ese inai bamona kerere dekena amo do oi raka siri. Kara maoromaoro, Dirava badinaia kara, abidadama, lalokau, haheauka, laloa manau, inai gaudia do oi tahua be namo. ¹² Keriso ia abidadama henia tauna be heau helulu lalonai ia heau tauna bamona. Vadaeni, mai oiemu goada ibounai danu abidadama ena heau helulu do oi heaulaia, bona kwalimu ahuna, mauri hanaihanai do oi davaria. Badina be inai bamona mauri totona Dirava ese oi ia boiria. Bona inai boiboi oi hamomokania vadaeni, taunimanima momo edia vairanai oiemu abidadama oi gwauraia hedinarai neganai. ¹³ Dirava ese gau ibounai dekenai mauri ia henia, bona Keriso Iesu ese uitnesi hereva momokani Pontio Pilato ena vairanai ia gwauraia. Inai Dirava bona Keriso Iesu ruaosi edia vairanai, oi lau oda henia. ¹⁴ Oi ese inai lauegu hereva ibounai do oi badinaia, bona oiemu dagi do oi karaia mai maoromaoro danu, kerere ta lasi, goevagoeva momokani, ela bona iseda Lohiabada Iesu do ia giroa mai. ¹⁵ Dirava ena nega korikori ia ginidae neganai, ia ese Keriso do ia hedinarai. Dirava sibona mo be Bada Herea Momokani, ia be king ibounai edia King, bona lohia ibounai edia Lohia. ¹⁶ Ia sibona ia mase diba lasi, ia sibona diaridiari bada dekenai ia noho, bona ia kahirakahira ita lao diba lasi. Tau ta lasi ese Dirava ia itaia vadaeni, bona ta ese vaira neganai do ia itaia diba lasi. Iena ladana badana do ita matauraia, badina iena sياهو do ia noho, ela bona hanaihanai. Amen.

Kohu momo taudia sisiba herevadia

¹⁷ Inai tanobada mauri ena kohu momo taudia do oi hamaoroa, do idia hekoko-roku lasi. Bona idia do oi hamaoroa danu inai tanobada ena kohu do idia abidadama henia lasi, to Dirava sibona do idia abidadama henia. Badina inai tanobada ena kohu do ia dika haraga, to Dirava ese ita hamoalea totona, gau momo ita dekenai ia henia davana lasi. ¹⁸ Inai kohu momo taudia do oi oda henidia danu kara namodia do idia karaia,

edia kohu do idia haria karaia, haida durua totona, bona harihari gaudia do idia henia, mai moale danu. ¹⁹ Inai dala dekenai, idia ese edia kohu korikori do idia haboua hegaegae, edia mauri gabeai do ia durua totona.

Timoteo do ia gaukara namonamo

²⁰ Timoteo e, Dirava ese oi dekenai ia henia dagi do oi naria namonamo. Hereva kavakava, Dirava ena laloa idia badinaia lasi taudia edia hepapahuahu dekena amo do oi raka siri. Inai bamona taudia edia diba be aonega koikoi sibona. ²¹ Inai aonega koikoi ese haida ia koia vadaeni. Idia gwau, "Ai ese aonega ai davarua vadaeni." Unai dainai idia moru, badina edia abidadama Iesu dekenai idia rakatania dainai.

Dirava ena hariharibada be umui ibounai dekenai do ia noho.

PAULO ENA REVAREVA IHARUANA TIMOTEO DEKENAI

¹ Lau Paulo be Keriso Iesu ena aposetolo tauna Dirava ena ura dainai. Dirava ese lau ia siaia, Keriso Iesu lalonai ia gwauhamata maurina do lau harorolaia totona. ² Timoteo e, lauegu natuna lalokau, inai revareva oi dekenai lau torea inai.

Iseda Tamana Dirava bona Keriso Iesu iseda Lohiabada dekena amo hariharibada, bogahisihisi bona maino do oi abia.

Ita be Sivarai Namona dainai ita hemarai lasi

³ Lauegu sene taudia ese Dirava idia badinaia, bona lau danu Dirava ena kara lau badinaia, mai egu laloa maoromaoro danu. Dirava lau tanikiu henia noho oi dainai. Oibe, Dirava lau guriguri henia noho negadia ibounai, dina bona hanuaboi, oi lau laloa noho. ⁴ Oiemu tai lau laloa, bona lau ura bada oi do lau itaia, do lau moale bada totona. ⁵ Oiemu abidadama lau laloa, ia be abidadama momokani. Inai bamona abidadama be oiemu tubuna hahine Loi bona oiemu sinana Eunike edia lalona dekenai ia noho. Lau diba momokani, harihari danu inai bamona abidadama be oiemu lalona dekenai ia noho. ⁶ Unai dainai lau ura oiemu harihari gauna, inai goada, Dirava ese oi dekenai ia henia gauna, be do oi laloaboio lasi. Guna lau ese egu imana oiemu kwarana dekenai lau atoa neganai, inai harihari gauna oi abia. To hari lau ura inai oiemu lalona dekenai ia noho harihari gauna do oi habadaia, hegeregere tau ta ese lahi ia hiriria neganai lahi ia habadaia bamona. ⁷ Badina be Dirava ese gari laumana ita dekenai ia henia lasi, to siahu bona lalokau bona aonega Laumana ita dekenai ia henia vadaeni.

⁸ Unai dainai, iseda Lohiabada ena sivarai do oi gwauriaia hedinarai, do oi hemarai lasi. Lau be Sivarai Namona dainai dibura ruma dekenai lau noho, ani? Lau totona do oi hemarai lasi. Lasi, to Dirava ena goada dekena amo do oi haheauka noho, bona lau danu Sivarai Namona totona do ita hisihisi hebou. ⁹ Dirava ese ita ia hamauria vadaeni, bona ita ia boiria, ita be iena bese korikori taudia totona. Inai bamona ia karaia, iseda kara namodia dainai lasi, to iena ura bona iena hariharibada dainai. Iena hariharibada be ita dekenai Dirava ese ia henia, Keriso Iesu dekena amo, nega gunaguna momokani, tanobada ia do karaia lasi neganai. ¹⁰ To harihari, iseda Hamauria Tauna Keriso Iesu ia mai dainai, inai hariharibada be ita dekenai ia hedinarai vadaeni. Keriso ese mase ena siahu ia haorea vadaeni, bona iena Sivarai Namona dekena amo mauri hanaihanai ia hedinarai vadaeni.

¹¹ Dirava ese lau ia abia hidi, iena aposetolo bona iena hadibaia tauna, Sivarai Namona do lau harorolaia totona. ¹² Bona inai lagi dainai hisihisi momo lau abia noho. To lau daradara sisina lasi, badina be lau abidadama henia Tauna lau diba momokani. Bona lau diba, lau dekenai ia henia gaukara be ia ese ia naria diba, ela bona iena Dina Badana do ia ginidae.

¹³ Hereva momokani, oi dekenai lau hadibaia gaudia do oi badinaia noho, bona idia edia murinai do oi raka. Keriso Iesu danu ita hakapua tamona dainai, ita be iena abidadama bona lalokau lalonai ita noho. Inai abidadama bona lalokau lalonai do oi gini noho. ¹⁴ Oiemu lagi, Dirava

ese oi dekenai ia henia gauna do oi dogoatao noho, Lauma Helaga ena siahu dekena amo. Inai Lauma Helaga be iseda lalona dekenai ia noho.

¹⁵ Oi diba vadaeni, ani, Asia dekenai idia noho taudia ibounai ese lau idia rakatania, Fugelo bona Heremogene danu.

¹⁶ Onesiporo mai ena ruma taudia danu, be Lohiabada ese do ia bogahisihisi henidia, badina be Onesiporo ese nega momo egu lalona ia hagoadaia, bona lau be dibura ruma lalonai lau noho, to ia be lau totona ia hemarai lasi. ¹⁷ Ia be Roma dekenai ia ginidae neganai, lau ia tahua goadagoada ia mai bona lau ia davaria. ¹⁸ Lohiabada ena bogahisihisi do ia davaria Dina Badana neganai. Efeso dekenai Onesiporo ese egu hesiai gaukara ia karaia sivaraina, be oi diba vadaeni, ani?

2

Keriso Iesu ena tuari tauna namona

¹ Lauegu natuna e, Keriso Iesu danu oi hakapua dainai, iena hari-haribada lalonai do oi goada noho. ² Lauegu hadibaia hereva, be oi ese oi kamona vadaeni, bona taunimanima momo edia vairanai lau gwauraia. Inai hadibaia hereva be abidadama goada taudia dekenai ma do oi gwauraia. Vadaeni idia ese ma taunimanima haida dekenai unai hereva do idia gwauraia lou.

³ Keriso Iesu ena tuari tauna namona ta do oi lao. Oiemu dagi ena hisihisi bona metau do oi abia, ai tuari taudia ai abia bamona. ⁴ Tuari tauna ese inai tanobada mauri ena gaukara idauidau bona tuari danu nega tamona ia karaia diba lasi. Lasi, to ia be tuari gaukara sibona do ia karaia, iena tuari biaguna do ia hamoalea totona. ⁵ Tau ta danu gadara gabuna ia goada helulu neganai, bema gadara taravatu ia badinaia lasi neganai, ia ese kwalimu ahuna ia abia diba lasi. ⁶ Biru tauna, bema ia hekwarahi bada neganai, ia sibona ese uma ena anina do ia abia guna be namo. ⁷ Lauegu hereva ena anina do oi laloa, badina be Lohiabada ese edia anina korikori oi dekenai do ia hadibaia.

⁸ Iesu Keriso do oi laloatao noho, ia be Davida ena bese tauna, mase dekena amo ia toreisi lou. Inai bamona lau gwauraia, Sivarai Namona lau harorolaia neganai. ⁹ Sivarai Namona lau harorolaia dainai, hisihisi lau abia noho, bona dibura tauna bamona auri dekena amo lau idia guia. To Dirava ena hereva idia guia diba lasi. ¹⁰ Unai dainai, hisihisi ibounai lalonai lau haheauka, Dirava ese ia abia hidi vadaeni taudia do lau durua totona. Badina be lau ura idia danu ese Keriso Iesu ia mailaia hamauria namona do idia davaria. Inai hamauria ena hairaina be do ia noho ela bona hanaihanai. ¹¹ Inai hereva be momokani:

“Bema ia danu ita mase,
vadaeni ia danu do ita mauri.

¹² Bema ita haheauka, bona ita gini goada noho,
ita be ia danu do ita lohia taudia.

To bema ita ese ia ita negea,
ia danu ese ita do ia negea.

¹³ Bema iseda gwauhamata ia dekenai ita badinaia lasi,
iena gwauhamata ita dekenai do ia badinaia noho,
badina be iena gwauhamata hereva ia senisia diba lasi,
lasi momokani.”

Dirava ena gaukara tauna namona

¹⁴ Oiemu taunimanima do oi hamaorodia, inai hadibaia hereva do idia laloaboio lasi. Bona do oi sisiba henidia, anina lasi hereva gaudia totona

do idia hepapahuahu lasi. Badina unai dekena amo namo ta do ia vara lasi, ma danu, unai hepapahuahu hereva ese, idia kamona noho taudia edia abidadama ia hadikaia diba.

¹⁵ Do oi gaukara goada, bona gaukara namona momokani tauna do oi lao, Dirava ese oi dainai do ia moale bada totona. Vadaeni oi ese hereva momokani do oi hadibaia maoromaoro, bona Dirava ena vairanai do oi hemarai lasi. ¹⁶ Hereva kavakava, Dirava ena laloo idia badinaia lasi taudia edia hepapahuahu dekena amo do oi raka siri, badina be unai kara ese taunimanima Dirava dekena amo ia luludia oho. ¹⁷ Oibe, hereva unai bamona be toto dikana bamona, ia be ia bada lao noho. Humaiaio bona Pileto be unai bamona. ¹⁸ Idia ruaosi be hereva momokani idia rakatania vadaeni, idia gwau: Mase dekena amo toreisi lou be ia ore vadaeni. Inai hereva koikoi dekena amo, haida edia abidadama ia manoka vadaeni.

¹⁹ To Dirava ese ia haginia vadaeni ruma badina ena nadi badana ia gini noho, bona tau ta ese ia hamarerea diba lasi. Inai nadi ena latanai, inai hereva idia torea vadaeni, “Lohiabada ia diba momokani, daika be iena taudia korikori.” Ma inai hereva danu idia torea, “Bema tau ta ia gwau ia be Lohiabada ena, ia ese kerere karadia do ia rakatania.”

²⁰ Ruma badadia lalonai, disi be golo bona siliva gaudia sibona lasi, to au bona raro gaudia danu. Unai disi haida be gaukara namodia totona, to disi haida be gaukara kavakava totona sibona. ²¹ Tau ta bema unai lau gwaurai kara dika dekena amo sibona ia hagevaia neganai, ia be goevagoeva do ia lao, Dirava ena vairanai, bona ia be gaukara namona disi bamona. Ia be Dirava ena tau momokani, bona ia ese iena Biaguna ia durua diba. Do ia noho hegaegae, gaukara namodia ibounai do ia karaia totona.

²² Uhau edia lebulebu karadia do oi rakatania, bona inai kara do oi badinaia: Kara maoromaoro, abidadama, lalokau, bona maino. Mai edia laloo goevagoeva, bona Lohiabada ena durua idia noia noho taudia, idia danu do oi turana karaia. ²³ To hepapahuahu kavakavadia bona anidia lasi hereva dekena amo do oi raka siri. Oi diba vadaeni, idia ese heai idia havaraia. ²⁴ Lohiabada ena hesiai tauna be do ia heai lasi, to taunimanima ibounai dekenai do ia bogahisihisi henia. Ia ese Dirava ena dala do ia hadibaia namonamo, mai ena goada bona haheauka danu. ²⁵ Ia ese, iena hereva idia utua taudia do ia sisiba henidia, mai ena manau danu. Badina be bema ia manau neganai, sedira Dirava ese idia do ia durua, vadaeni edia lalona do idia giroa, bona hereva momokani do idia davaria. ²⁶ Guna Satani ese iena koikoi dekena amo idia ia abia, vadaeni iena ura idia karaia. To bema hereva momokani idia davaria bona diba neganai, edia laloo do idia maoromaoro, vadaeni Satani ena koikoi dekena amo do idia roho mauri.

3

Nega dokodia neganai kara dika momo do idia vara

¹ To namona be oi diba, nega ena dokona dekenai, metau dikadia momo do idia vara. ² Badina taunimanima ese idia edia ura sibona do idia tahua, moni do idia mataganigani henia, do idia hekokoroku bona heagi. Do idia hereva dika, edia tamana bona sinana do idia kamona henia lasi, tanikiu henia kara do idia diba lasi, bona helaga karadia do idia negea. ³ Idia be lalokau do idia diba lasi, do idia bogahisihisi lasi, haida edia ladana do idia hadikaia kava, do idia lebulebu, do idia dagedage, kara namodia do idia ura henia lasi. ⁴ Edia turana do idia

samanya henia, do idia kara kava. Do idia gwau idia be tau badadia momokani, vadaeni lebulebu karadia idauidau do idia ura henia bada, to Dirava do idia ura henia maragi. ⁵ Dirava badinaia kara be toana sibona do idia hedinarai, to iena anina momokani do idia negea. Inai bamona taudia ibounai dekeno amo do oi raka siri.

⁶ Inai bamona taudia haida be ruma lalonai idia vareai, hahine kavakavadia edia lalona idia koia. Inai hahine be edia kara dika ese idia hametaua noho, bona edia ura dikadia ese idia hakaudia kerere. ⁷ Inai bamona hahine ese nega ibounai diba idia tahua noho, to hereva momokani idia davarai diba lasi.

⁸ Gunaguna Iane bona Iambre ese Mose ena dala idia koua gwaurai. Vadaeni inai bamona danu, hari lau herevalaia tau dikadia ese hereva momokani ena dala idia koua gwaurai. Edia laloa be dika vadaeni, bona edia abidadama be koikoi sibona. ⁹ To inai kara koikoi be do idia karaia nega daudau lasi. Badina edia kavakava be taunimanima ese do idia itaia, Iane bona Iambre edia kavakava idia itaia hegeregere.

Timoteo ese Dirava ena hereva do ia badinaia momokani

¹⁰ To oi ese lauegu hadibaia hereva oi badinaia vadaeni. Bona lauegu kara, lauegu ura namodia, lauegu abidadama, lauegu haheauka, lauegu lalokau, inai ibounai oi itaia vadaeni. Oi itaia danu, metau ibounai lalonai lau goada noho. ¹¹ Oi diba danu, dagedage bona hisihisi momo ese lau idia hadikaia, Antioka dekenai, Ikonio dekenai, bona Lusitera dekenai. Dagedage idauidau edia hisihisi lau abia, to Lohiabada ese idia ibounai dekeno amo lau ia hamauria. ¹² Oibe, Keriso Iesu danu idia hakapua dainai, Dirava badinaia idia ura taudia ibounai ese dagedage ena hisihisi do idia abia. ¹³ Kara dika taudia bona koikoi taudia ese edia kara dika bona edia koikoi do idia habadaia. Idia ese tau haida do idia koia, bona ma tau haida ese idia danu do idia koia.

¹⁴ To oi ese oi abia dae, bona oi abidadama henia hereva momokani, be do oi badinaia namonamo noho. Inai hereva momokani oi dekenai ai hadibaia taudia ibounai oi diba noho, ani? ¹⁵ Bona inai danu oi diba noho, oi be mero maragi neganai, Buka Helagadia dekenai oi manada momokani. Inai Buka Helagadia ese oi dekenai aonega idia henia noho diba, ela bona hamauria do oi davarai, Keriso Iesu oi abidadama henia dainai. ¹⁶ Buka Helaga ena hereva ibounai be Dirava ena Lauma ese ia havaraia. Bona inai hereva be mai ena sياهو, Dirava ena hereva momokani ita dekenai do ia hadibaia. Ia be mai ena sياهو danu iseda kara dika do ia hedinarai, iseda kerere do ia hamaoromaoroa, bona mauri dala maoromaorona ita dekenai do ia hadibaia. ¹⁷ Unai hereva momokani dainai, Dirava ena tau ena goada be hegeregere momokani, vadaeni kara namodia ibounai do ia karaia diba, mai kwalimu danu.

4

Timoteo ese Dirava ena hereva do ia gwaurai hedinarai

¹ Keriso Iesu ese taunimanima ibounai dohore ia kota henia, mauri noho taudia, bona idia mase vadaeni taudia danu. Unai dainai Dirava ena vairanai, bona Keriso Iesu ena vairanai danu, oi dekenai lau hereva goada henia, inai bamona: Keriso Iesu be do ia giroa mai, bona iena Basileia do ia gunalaia dainai, oi lau oda henia, ² Sivarai Namona do oi harorolaia goadagoada, nega namodia neganai, bona nega dikadia neganai danu. Taunimanima do oi sisiba henia, bona oiemu hereva dekeno amo edia kudouna do oi pidia, ela bona edia lalona idia giroa. Taunimanima edia lalona do oi hagoadaia, bona idia do oi hadibaia, mai

oiemu haheauka danu. ³ Badina be negana do ia ginidae, taunimanima be hereva maoromaoro do idia ura lasi kamoni. Lasi momokani. To edia ura sibona do idia tahuu. Idia ese idia ura henia hadibaia taudia momo do idia haboua. Vadaeni inai hadibaia taudia ese sivarai kavakava do idia gwauraia, unai taudia idia ura kamoni gaudia sibona. ⁴ Oibe, hereva momokani do idia negea, to gori kavakava do idia kamoni henia. ⁵ To oi ese nega ibounai do oi laloa maoromaoro. Hisihihi lalonai do oi haheauka. Sivarai Namona harorolaia gaukara do oi karaia, bona Dirava ena hesiai tauna ena dagi karadia ibounai do oi karaia namonamo.

Lauegu gaukara be kahirakahira ia ore

⁶ To lauegu nega be kahirakahira ia ore. Taunimanima ese uaina idia bubua, Dirava ena boubou gauna totona. Inai bamona danu, lauegu rarana be kahirakahira do ia bubua, Dirava ena boubou gauna totona. Lauegu mauri dokona be ia kahirakahira momokani. ⁷ Tuari namona lau tuarilaia vadaeni, lauegu heau helulu be ia ore vadaeni, bona lauegu abidadama lau karaia haorea vadaeni.

⁸ Harihari lauegu kwalimu ahuna, kara maoromaoro ena davana namona, be lau dekenai ia noho hegaegae. Unai Dina Badana neganai, Lohiabada, kota biaguna maoromaorona, ese unai davana namona lau dekenai do ia henia. Bona lau sibona dekenai do ia henia lasi, to mai lalokau danu iena mai dinana idia naria noho taudia ibounai dekenai danu, be ia ese unai davana namona do ia henidia.

Bamahuta herevadia

⁹ Lau dekenai do oi mai haraga be namo. Oi mai totona dala do oi tahuu goada. ¹⁰ Badina be Dema ese lau ia rakatania, inai tanobada ena mauri ia ura henia bada dainai. Ia be Tesalonika dekenai ia lao vadaeni. Kresike be Galatia dekenai ia lao, bona Tito be Dalamatia ia lao vadaeni. ¹¹ Luka sibona lau dekenai ia noho. Mareko do oi abia, bona umui ruaosi lau dekenai do umui mai, badina be ia ese egu gaukara do ia durua diba. ¹² Tukiko be lau siaia vadaeni Efeso dekenai.

¹³ Oi mai neganai, egu keru koua dabua latana do oi mailaia. Lau be Troa dekenai lau rakatania, Kapa dekenai. Lauegu buka danu do oi mailaia. Buka haida danu unuseni be boromakau kopina dekena amo idia karaia, idia danu mani oi mailaia.

¹⁴ Alesana, kapa ia gaukaralaia tauna ese lau ia hadikaia bada. Lohiabada ese iena kara davana do ia henia. ¹⁵ Ia dekenai do oi naria namonamo, badina be iseda hadibaia hereva ia dagedage henia dikadika.

¹⁶ Lauegu kota ginigunana dekenai, tau ta ese lau ia durua lasi, ibounai ese lau idia rakatania. Idia madi, Dirava ese edia kerere davana ia henia lasi be namo! ¹⁷ To Lohiabada ese lau ia durua, bona lau ia hagoadaia, vadaeni Sivarai Namona ibounai lau gwauraia, bona Iuda lasi taudia idia kamonaia. Bona laiona edia uduna dekena amo Dirava ese lau ia hamauria vadaeni. ¹⁸ Lohiabada ese dika ibounai dekena amo lau do ia hamauria, bona iena Basileia guba dekenai lau do ia abia lao. Iena ladana do ita hanamoa hanaihanai be namo. Amen.

¹⁹ Priskila bona Akwila, bona Onesiporo ena ruma taudia dekenai lauegu hanamoa do oi henia. ²⁰ Erasito be Korinto dekenai ia noho, to Tropimo be Mileto dekenai lau rakatania, mai ena gorere. ²¹ To oi karaharaga, keru negana do ia ginidae lasi neganai do oi mai. Eubulo bona Pude bona Lino bona Klaudia bona inai gabu ena Keristani varavara taudia ibounai ese oi idia hanamoa inai.

22 Lohiabada ese oiemu lauma dekenai do ia noho. Dirava ena hariharibada umui ibounai dekenai do ia noho.

PAULO ENA REVAREVA TITO DEKENAI

¹ Lau Paulo, lau be Dirava ena hesiai tauna, bona Iesu Keriso ena aporetolo tauna.

Dirava ese lau ia abia hidi bona lau ia siaia, Dirava ese ia abia hidi taudia edia abidadama do lau hagoadaia totona. Oibe, lau ia siaia, hereva momokani idia dekenai do lau hadibaia, Dirava do idia badinaia momokani totona. ² Edia abidadama lau durua, badina inai abidadama ese mauri hanaihanai ia havoraia noho. Inai mauri hanaihanai be tanobada ia do karaia lasi neganai, Dirava ese ia gwauhamatalaia, bona Dirava be koikoi diba lasi. ³ Bona harihari, iena nega korikori dekenai, Dirava ese iena gwauhamata ena anina ia hedinarai vadaeni. Inai gwauhamata gauna be iena Sivarai Namona, bona lau ese lau harorolaia, Dirava, iseda Hamauria Tauna ena oda dainai.

⁴ Tito e, lauegu natuna korikori, inai revareva oi dekenai lau torea, iseda abidadama be tamona dainai.

Lau ura be Tamana Dirava, bona Keriso Iesu, iseda Hamauria Tauna ese hariharibada bona maino oi dekenai do idia henia.

Tito ena gaukara Kerete motumotu dekenai

⁵ Kerete dekenai oi lau rakatania badina be, unai gabu dekenai idia do maoro lasi gaudia do oi hamaoromaoro totona. Bona lau ura danu hanua ta ta ibounai lalonai ekalesia gunalaia taudia do oi abia hidi. Lauegu hadibaia hereva oi laloaboio lasi, ani? ⁶ Ekalesia gunalaia tauna be kerere ta lasi tauna, bona ia be adavana tamona tauna. Iena natuna be Iesu do idia abidadama henia, idia be lebulebu lasi, bona edia tamana bona sinana do idia kamona henia. ⁷ Badina be ekalesia orea gunalaia tauna ese Dirava ena gaukara ia naria dainai, ia be kerere ta lasi tauna. Ia be hekokoroku lasi, ia be badu haraga lasi, kekeru lasi, bona moni do ia mataganigani henia lasi. ⁸ Ia ese idau taudia iena ruma dekenai do ia abia dae. Ia ese kara namodia do ia ura henia. Ia be aonega tauna, kara maoromaoro tauna, helaga tauna, bona ia sibona ena tauanina do ia naria bona biagua diba tauna. ⁹ Hereva momokani, ita abidadama henia bona ita hadibaia gauna, do ia badinaia momokani. Unai karadia dekena amo ia be hegeregere, haida do ia hagoadaia, hadibaia hereva namodia dekena amo. Danu do ia hegeregere, hereva momokani idia negea taudia do ia hamaoromaoro.

Kerete motumotu dekenai be hadibaia koikoi taudia momo

¹⁰ Badina be tau momo ese hereva momokani idia kamona henia lasi, bona hereva kavakava dekena amo haida idia hakaua kerere. Iuda taudia momo ese inai bamona idia karaia noho. ¹¹ Idia edia hadibaia hereva be iseda hereva bamona lasi, bona idia ese taunimanima haida, bona edia famili taudia ibounai dekenai, daradara idia havoraia vadaeni. Inai hadibaia koikoi idia karaia noho, moni do idia abia totona. Idia edia kara bona edia hereva do oi hadokoa. ¹² Kerete taudia edia peroveta tauna ta ese inai bamona Kerete taudia ia herevalaia, ia gwau, "Kerete taudia be nega ibounai idia koikoi noho, idia be uda boroma dikadia bamona, lahedo dikadika, bona aniani sibona idia laloa taudia." ¹³ Inai hereva be momokani. Unai dainai idia do oi gwau henia goadagoada, Sivarai

Namona do idia abidadama henia maoromaoro totona. ¹⁴Vadaeni, unai neganai Iuda taudia edia gori, bona hereva momokani idia negea taudia, be do idia kamoni henia lou lasi.

¹⁵Laloa bona kudouna goevagoeva taudia dekenai, gau ibounai be goevagoeva. To laloa miro taudia dekenai, bona Dirava idia abidadama henia lasi taudia dekenai, gau ta be ia goevagoeva lasi. Badina be unai miro ese edia laloa bona edia kudouna ia hadikaia dainai. ¹⁶Idia gwau Dirava idia diba, to edia kara dekena amo idia ese Dirava idia negea. Idia be dika bada, Dirava idia kamoni henia lasi, bona kara namona ta idia karaia diba lasi.

2

Tito ese tau bona hahine badadia dekenai do ia hadibaia hereva

¹To oi ese hadibaia hereva maoromaoro do oi gwauraia. ²Tatau badadia do oi hadibaia, do idia kekero lasi, do idia laloa maoromaoro, bona mai edia bogahisihisi karadia do idia noho. Ma abidadama dekena amo, lalokau dekena amo, bona haheauka dekena amo do idia gini goada.

³Inai bamona danu hahine badadia do oi hadibaia, do idia noho namonamo, hahine helagadia bamona. Idia ese haida edia ladana do idia hadikaia lasi, bona inuinu kekero ese idia do ia biagua lasi. Idia ese kara namo do idia hadibaia. ⁴Vadaeni edia hadibaia hereva ese hahine matamatadia do ia durua, edia adavana bona natuna do idia lalokau henia. ⁵Bona do idia laloa maoromaoro, do idia noho namonamo, mai laloa goevagoeva danu, bona edia ruma lalonai do idia gaukara. Bogahisihisi karadia do idia karaia, bona edia adavana edia hereva do idia kamoni henia. Unai dekena amo, tau ta ese Dirava ena Sivarai Namona do ia hadikaia diba lasi.

Tito ese eregabe taudia dekenai do ia hadibaia hereva

⁶Inai bamona danu, eregabe taudia do oi hadibaia goada, do idia laloa maoromaoro, bona edia tauanina do idia biagua namonamo. ⁷Bona oi sibona danu kara namodia do oi hedinarai, unai eregabe taudia ese oiemu kara bamona do idia karaia totona. Mai oiemu momokani bona laloa maoromaoro danu, hereva momokani idia dekenai do oi hadibaia. ⁸Vadaeni oiemu hereva be maoromaoro dainai, tau ta ese oi do ia gwauraia kerere diba lasi. Bona oi idia ura henia lasi taudia be do idia hemarai, badina be iseda dika ta do idia herevalaia diba lasi.

Tito ese hesiai mai guia danu taudia dekenai do ia hadibaia hereva

⁹Hesiai mai guia danu taudia dekenai inai bamona do oi hadibaia: Edia biagudia do idia kamoni henia. Gaukara namona do idia karaia nega ibounai, edia biagudia ese idia do idia ura henia totona. Edia biagudia edia hereva dekenai do idia hereva lou lasi. ¹⁰Edia biagudia edia gau do idia henaola lasi. To biagudia edia hereva do idia badinaia momokani, vadaeni edia biagudia ese edia hesiai taudia do idia abidadama henia. Vadaeni hesiai taudia edia kara namodia ese hairai bona mataurai be Sivarai Namona dekenai do idia havaraia. Inai ita hadibaia Sivarai Namona be iseda Hamauria Tauna Dirava ena.

Ita noho namonamo, Keriso ena Dina do ita naria

¹¹Ita diba, Dirava ese iena hariharibada ia hedinarai vadaeni, tau-nimanima ibounai do ia hamauria totona. ¹²Bona inai hariharibada ese ita ia hadibaia noho, Dirava negea kara bona lebulebu kara do ita rakatania. Ita ia hadibaia danu, do ita noho namonamo, do ita kara

maoromaoro, bona Dirava do ita matauraia. ¹³ Bona inai hariharibada ese danu ita ia hadibaia vadaeni, Keriso do ita abidadama henia, bona iena gwauhamata ena anina do ita naria, mai moale bada danu. Oibe, ita ese Dirava badana bona iseda Hamauria Tauna Iesu Keriso edia hairai do ia hedinarai Dinana do ita naria noho. ¹⁴ Keriso ese iena mauri ia henia ita dainai, kara dika ibounai dekena amo ita do ia hamauria totona. Badina be ia ura orea tamona ita do ia halaoa, ia sibona ena ore, do ita goevagoeva, bona iena kara namodia do ita karaia totona.

¹⁵ Inai bamona hereva do oi hadibaia noho. Bona oiemu siahu ibounai do oi gaukaralaia, taunimanima do oi hagoadaia totona, bona taunimanima do oi sisiba henia totona. Tau ta ese bema oi ia negea gwaurai, oi ese ia do oi koua.

3

Keristani kara namodia totona do ita gini goada

¹ Oiemu taudia do oi hadibaia lou, idia ese gavana bona gavamani ena siahu taudia do idia kamoni henia. Edia oda hereva do idia badinaia, bona do idia naria hegaegae kara namodia ibounai do idia karaia totona.

² Idia ese tau ta do idia gwaurai dika lasi, bona do idia heai lasi, to do idia manau. Nega ibounai taunimanima ibounai dekenai manada kara do idia karaia.

³ Badina be ita danu gunaguna ita be mai kavakava, mai kamoni lasi, bona mai kerere danu. Ura dikadia bona tauanina ena moale gaudia idauidau ese ita idia koia. Ita ese haida ita laloa dika henia, ma haida ita mama henia. Haida be ita ese ita badu henia, bona haida ese ita danu idia badu henia.

⁴ To Dirava, iseda Hamauria Tauna ese iena bogahisihisi bona iena lalokau ia hedinarai neganai, ⁵ ia ese ita ia hamauria. Iseda kara maoromaoro dainai ita ia hamauria lasi. Lasi, to iena bogahisihisi dainai ia ese ita ia hamauria, Lauma Helaga dekena amo. Ia ese vara lou ena mauri matamata ita dekenai ia henia, iseda dika ia huria ore dainai.

⁶ Iesu Keriso, iseda Hamauria Tauna ena gaukara dekena amo, Dirava ese Lauma Helaga ena siahu iseda latanai ia bubua bada herea. ⁷ Unai dainai Keriso ena hariharibada dekena amo, Dirava ena vairanai do ita maoromaoro diba. Bona Dirava ese, ita abidadama henia bona naria noho gauna, mauri hanaihanai ena gwauhamata, ita dekenai ia henia noho.

⁸ Unai hereva be momokani vadaeni, bona lau unai hereva do oi gwaurai goadagoada. Vadaeni Dirava idia abidadama henia taudia ese edia kara do idia naria namonamo. Kara namodia sibona do idia karaia, bona inai kara be do mai anina, bona taunimanima durua karadia.

⁹ To hepapahuahu kavakavadia, sene taudia edia ladana tahua, heai, bona Taravatu totona badu herevadia dekena amo do oi gini siri. Badina idia be anina lasi, bona tau ta idia durua lasi.

¹⁰ Ekalesia idia hapararaia noho tauna be nega ginigunana bona nega iharuana do oi sisiba henia. Bema oiemu hereva ia kamoni lasi neganai, unai tau do oi negea. ¹¹ Oi diba, unai bamona tauna be mai ena kerere, bona ia be dika momokani. Iena dika ese iena kerere idia hamomokania noho.

Hadibaia hereva dokodia

¹² Aretema o Tukiko bema lau siaia oi dekenai neganai, mani emu kara lau dekenai do oi mai, Nikapoli dekenai. Badina be lau laloa, keru

neganai Nikapoli dekenai do lau noho. ¹³ Sena, taravatu diba tauna, bona Apolo, edia laolao dalana mani do oi karaia hegaegae. Idia do oi durua namonamo, bona idia dekenai hegeregere lasi gaudia do oi henidia.

¹⁴ Iseda Keristani taudia ibounai, namona be kara namodia dekenai do idia manada, bona gau lasi taudia do idia durua. Namu lasi idia noho kava, to durua karadia do idia karaia noho.

¹⁵ Iniseni lau danu idia noho taudia ibounai ese edia hanamoa idia siaia inai. Iesu idia abidadama henia taudia, aiemai turadia lalokau, idia dekenai mani aiemai hanamoa do oi henia.

Dirava ena hariharibada umui ibounai dekenai do ia noho.

PAULO ENA REVAREVA FILEMONA DEKENAI

¹ Lau Paulo, Keriso Iesu dainai, dibura ruma dekenai lau noho, bona iseda varavara Timoteo ese inai revareva ai torea noho. ² Aiemai varavara bona gaukara hebou tauna Filemona, oi dekenai inai revareva ai siaia. Ma danu ekalesia oreana oiemu ruma dekenai idia hebou noho, iseda taihuna Apia bona aiemai turana namona Dirava ena tuari lalonai, Arekipo, idia danu totona inai revareva ai torea inai.

³ Ai ura iseda Tamana Dirava bona iseda Lohiabada Iesu Keriso ese hariharibada bona maino umui dekenai do idia henia.

Filemona ena lalokau bona abidadama

⁴ Filemona e, lau guriguri negadia ibounai, oiemu ladana lau gwauraia bona Dirava lau tanikiu henia. ⁵ Badina be oiemu sivarai lau kamona, oi ese Dirava ena taudia oi lalokau henia, bona oi ese Lohiabada Iesu oi abidadama henia noho. ⁶ Oi be aiemai turana, badina be iseda abidadama be tamona. Unai dainai lauegu guriguri be inai abidadama ese aonega bada oiemu lalona dekenai do ia havaraia, vadaeni do oi diba momokani dahaka gau namodia Keriso Iesu dekena amo ita davarua noho. ⁷ Oibe, lauegu tadina e, Keristani taudia ibounai oi lalokau henia bada dainai, idia edia lalona oi hagoadaia noho. Unai bamona oi karaia dainai, lau be lau moale, bona egu lalona ia namo noho.

Filemona ese Onesimo do ia abia lou be namo

⁸ Lau be inai bamona lau lalao: Oi be lauegu tadina, Keriso lalonai ita noho dainai. Unai dainai oi lau oda henia diba, kara ta do oi karaia. ⁹ To oi lau lalokau henia dainai, oi do lau oda henia lasi, to oi do lau noia sibona. Oibe, lau be Paulo, lau be tau badana, bona Keriso Iesu dainai dibura ruma dekenai lau idia koua vadaeni. ¹⁰ Lauegu noinoi be inai: Onesimo, lauegu natuna Keriso lalonai, be mani emu kara do oi bogahisihisi henia. Lau be dibura ruma lalonai lau noho neganai, ia dekenai lau hadibaia dainai, abidadama ia davarua, vadaeni lau be iena tamana, Keriso lalonai. ¹¹ Gunaguna Onesimo ena hesiai gaukara be namo lasi momokani oi dekenai, to harihari iena hesiai gaukara be namo momokani, oi dekenai, bona lau dekenai danu.

¹² Lau ese ia lau siaia lou oi dekenai inai. Mani emu kara do oi abia dae, badina be lauegu kudouna danu be ia lalonai ia noho. ¹³ Lauegu ura korikori be ia do lau dogoatao, vadaeni dibura ruma lalonai Sivarai Namona dainai lau noho neganai, ia ese lau do ia durua noho. Unai dekena amo ia ese oiemu gabu do ia abia bamona, lau durua totona. ¹⁴ To bema oiemu gwaumaoro lau abia guna lasi neganai, ia do lau dogoatao lasi. Lau ura lasi oi do lau oda henia. Lasi momokani. Lau ura be oiemu ura dainai inai kara namona do oi karaia.

¹⁵ Onesimo ese oi ia rakatania nega sisina sibona. Sedira, unai kara ia vara dainai, oi ese ia do oi abia lou, bona oi dekenai do ia noho nega ibounai. ¹⁶ Badina harihari Onesimo be hesiai mai guia danu tauna sibona lasi. Lasi, hari ia ese inai hesiai dagi ia hereaia vadaeni. Ia be varavara ta, iseda lalokau tauna, Keriso lalonai. Ia lau lalao bada. Oi danu ese ia do oi lalao bada, badina ia be oiemu hesiai tauna namona ta, bona oiemu varavara namona ta danu, Lohiabada lalonai!

¹⁷ Lau be oiemu turana oi gwau, ani? Unai dainai Onesimo mani do oi abia dae, lau do oi abia dae hegeregerena. ¹⁸ To bema gunaguna Onesimo ese oi ia hadikaia, o oi dekenai amo ia abiatorehai neganai, iena abiatorehai be lauegu ladana dekenai do oi atoa. ¹⁹ Lau Paulo ese, lau sibona egu ladana lau torea inai, unai abiatorehai ena davana ibounai oi dekenai do lau henia.

To momokani, oi be mai oiemu abiatorehai lau dekenai amo, ani? Badina be oiemu mauri be lau dainai oi davaria, ani? To unai davana be do lau tahua lasi. ²⁰ Unai dainai, lauegu tadina e, mani emu kara egu noinoi do oi abia dae, Lohiabada ena ladana dainai. Lauegu lalona do oi hamoalea, Keriso lalonai ita be tadikaka dainai.

²¹ Lau diba momokani, oi ese egu hereva do oi kamoni henia. Unai dainai inai revareva oi dekenai lau torea noho. Lau diba oiemu kara Onesimo dekenai be do ia namo, bona egu noinoi gauna do ia hereaia danu. ²² Ma egu hereva ta danu be inai: Lauegu daiutu ta do oi abia hegaegae lau totona. Badina be lau abidadama henia gauna be inai: Dirava ese umui emui guriguri do ia kamoni henia, bona umui dekenai do lau mai dalana, be ia ese do ia kehoa.

Bamahuta herevadia

²³ Lauegu bamona Epafra, Keriso Iesu dainai lau danu dibura ruma lalonai ia noho, ia ese oi ia hanamoia noho. ²⁴ Mareko bona Arisitako bona Dema bona Luka, lau danu idia gaukara hebou noho, idia ese danu oi idia hanamoia noho.

²⁵ Lohiabada Iesu Keriso ena hariharibada, be umui emui lauma dekenai do ia noho. Amen.

REVAREVA HEBERU TAUDIA DEKENAI

Dirava ena Hereva be iena Natuna dekena amo ita abia

¹ Idaunegai Dirava ese dala idauidau momo dekena amo iseda sene taudia dekenai ia hereva henidia, peroveta taudia dekena amo. ² To inai dina dokodia neganai ia ese iena Natuna dekena amo ita ia hereva henia. Iena Natuna dekena amo Dirava ese tanobada ibounai ia karaia. Bona Dirava ese iena Natuna ia abia hidi, vadaeni inai nega dokona neganai, gau ibounai be ia ese ia biagua noho. ³ Inai Natuna be Dirava ena hairaina ena diari, bona iena toana be Dirava ena toana hegeregerena momokani. Iena hereva be mai siahu bada danu. Inai siahu dekena amo, ia ese tanobada bona guba ibounai ia naria, bona ia haheaua noho. Ia ese taunimanima edia kara dika ia huria ore, vadaeni Dirava, Siahu Momokani Diravana ena idiba kahanai ia helai diho, guba dekenai.

Dirava ena Natuna ese aneru ia hereaia

⁴ Dirava ena Natuna ese aneru ia hereaia. Iena ladana ese aneru edia ladana ia hereaia bamona, iena siahu ese danu edia siahu ia hereaia. ⁵ Badina edena aneru dekenai Dirava ese inai bamona ia hereva henia, a? Dirava ia gwau:

“Oi be lauegu Natuna.

Hari dina oi lau havaraia vadaeni.”

Bona edena negai Dirava ese aneru ta inai bamona ia herevalaia, a? Ia gwau:

“Lau be iena Tamana,
bona ia be lauegu Natuna.”

⁶ To Dirava ese iena Natuna vara guna be tanobada dekenai ia mailaia neganai, ia gwau:

“Dirava ena aneru ibounai,
be lauegu Natuna dekenai do idia tomadiho.”

⁷ Dirava ese iena aneru inai bamona ia herevalaia, ia gwau:

“Dirava ese iena aneru be lai ia halaodia,
bona iena hesiai taudia be lahi siahuna ia halaodia.”

⁸ To Dirava ese iena Natuna inai bamona ia herevalaia, ia gwau:

“Dirava e, oiemu King dagina ia noho hanaihanai.
Oiemu Basileia, mai maoromaoro danu do oi biagua.

⁹ Oi ese kara maoromaoro oi ura henia,
to kara dika be oi badu henia.

Unai dainai lau Dirava, oiemu Dirava, ese oi lau abia hidi.

Oiemu kwarana dekenai moale ena dehoru lau bubua,
bona oi dekenai lau henia hanamo,

ese oiemu bamona taudia edia hanamo ia hereaia momokani.”

¹⁰ Dirava ese iena Natuna ma ia herevalaia lou, ia gwau:

“Lohiabada e,
hamatamaia neganai oi ese inai tanobada oi karaia.

Guba danu, be oiemu imana ese ia karaia.

¹¹ Guba bona tanobada be do idia dika ore vadaeni,
to oi be do oi noho hanaihanai.

Guba bona tanobada be do idia gunana lao,
dabua gunadia bamona,

¹² bona oi ese dabua bamona, idia do oi lokua.

Oibe, edia toana do idia idau, dabua idia idau bamona.

To oi be do oi idau lasi,
oiemu mauri lagani be do idia doko lasi.”

¹³ Gunaguna Dirava be inai bamona ia hereva, ia gwau:
“Lauegu idiba kahana dekenai do oi helai,
ela bona oi idia tuari henia taudia,
be oiemu aena henunai do lau atodia.”

To Dirava ese nega ta unai bamona aneru ta ia herevalaia, a? Lasi momokani.

¹⁴ Badina be aneru ibounai be Dirava ena hesiai gaukara laumadia, ani? Dirava ese idia ia siaia lao, mauri do idia abia taudia durua totona.

2

Keriso ena hamauria kara, ese aneru edia taravatu hereva gunadia ia hereaia momokani

¹ Dirava ena Natuna ena ladana ia bada momokani dainai, unai hereva momokani, ita kamona vadaeni gauna, do ita dogoatao bona badinaia be namo. Namu lasi ita manokalaia, do ita boio garina.

² Gunaguna Dirava ese iena aneru dekena amo, iena hereva ia gwauria, bona unai aneru edia hereva be mai siahu bada. Edia hereva idia utua taudia ibounai be edia kerere davana idia davarua momokani, ani?

³ Vadaeni, edena bamona ita heau mauri diba, bema Lohiabada ena hamauria ita negea neganai? Lohiabada sibona ese inai hamauria ia gwauria, bona inai iena hereva idia kamona taudia ese ita dekenai idia gwauria gauna, be ita diba ia momokani. ⁴ Dirava ese danu hoa bona toa karadia dekena amo inai hamauria ia hamomokania. Ia ese siahu karadia idau idau ia hedinarua, bona Lauma Helaga ena harihari gaudia, be idadadama taudia dekenai Dirava ese ia henia, iena ura hegeregere.

Iesu ese hamauria dekenai ita ia hakaua

⁵ Bona inai tanobada matamata, ai ese ai herevalaia gauna, be aneru ese do idia biagua lasi. ⁶ To Buka Helaga lalonai, inai bamona ia torea, ia gwau:

“Dirava e, taunimanima be dahaka,
oi ese ia dekenai oi laloa noho?
Bona taunimanima ena natuna be daika,
oi ese ia oi naria noho?”

⁷ Oi ese taunimanima oi karaia,
anaru ese nega sisina sibona ia idia hereaia sisina.

Hairai bona mataurai dekena amo ia oi hanamoa bada,

⁸ bona gau ibounai be iena aena henunai oi atoa,
vadaeni idia ibounai be ia ese ia biagua noho.”

Oibe, Dirava ese gau ibounai taunimanima edia henunai ia atoa. Inai anina be, gau ta be do ia noho kava lasi, to gau ibounai be taunimanima ese do idia biagua. To harihari ita itaia, gau ibounai be taunimanima ese idia do biagua lasi.

⁹ To harihari Iesu ita itaia, ladana bada ia abia vadaeni. Guna nega sisina sibona, ia be aneru henunai ia noho. Inai bamona kara ia vara ena badina be inai: Dirava ena hariharibada dekena amo, Iesu be taunimanima ibounai dainai do ia mase totona. Ia ese inai hisihisi bona mase ia abia dainai, Dirava ese hairai bona mataurai dekena amo Iesu ia hanamoa bada.

¹⁰ Dirava ese gau ibounai ia karaia, bona gau ibounai ia naria noho. Bona ia ura iena natuna taudia momo ese iena hairai do idia abia. Unai

dainai ia ese Iesu ia hisihisi henia, bona unai hisihisi dekena amo, Dirava ese iseda Hamauria Tauna korikori, bona gunalaia tauna momokani, Iesu ia halaoa vadaeni. Inai bamona kara Dirava ese ia karaia, be maoro momokani.

¹¹ Ita diba Iesu ese taunimanima edia kara dika dekena amo ia hageovadia. Ia bona ia hageovadia taudia ibounai be mai edia Tamana tamona. Unai dainai, mai hemarai lasi danu, Iesu ese unai ia hageovadia taudia be iena tadina ia gwauraidia. ¹² Ia be Dirava dekenai ia hereva, ia gwau,

“Oiemu kara be lauegu tadina dekenai do lau hamaorolaia, bona hebou lalonai oiemu ladana do lau hanamoa.”

¹³ Iesu ma ia gwau,

“Dirava do lau abidadama henia.”

Ma ia gwau,

“Lau be iniseni lau noho,

bona Dirava ese lau dekenai ia henia natuna taudia, be lau danu idia noho inai.”

Iesu be taunimanima korikori ia vara, ita do ia durua totona

¹⁴ Inai iena natuna taudia be taunimanima sibona, mai tauanina bona rara. Unai dainai Iesu danu ese idia edia tauanina toana ia abia, idia hegeregerena ia halaoa. Inai bamona ia karaia, do ia mase diba totona. Bona iena mase dekena amo, Iesu ese mase ia biagua tauna, Satani ena siahu ia hadikaia ore diba. ¹⁵ Bona unai dala dekena amo ia ese mase dekenai idia gari taudia edia gari ia haorea. Oibe, unai mase ena gari ese ia guidia taudia edia gari ia haorea. ¹⁶ Momokani Iesu ese aneru ia durua lasi. To, Buka Helaga ia gwauraia bamona, “Ia ese Aberahamo ena natuna ia durua noho.” ¹⁷ Unai dainai Iesu be kara ibounai dekenai, iena tadina taudia hegeregerena momokani ia lao. Badina unai dala dekena amo Iesu be Hahelagaia Tauna Badana do ia lao, bona Dirava ena hesiai gaukara, mai momokani bona mai bogahisihisi danu do ia karaia. Bona unai dala dekena amo danu, taunimanima edia kara dika be Dirava ese ia gwauatao diba. ¹⁸ Iesu ese dibagani bona hisihisi ena mamina ia abia dainai, ia ese taunimanima ia durua diba, edia dibagani neganai.

3

Iesu ena siahu ese Mose ena siahu ia hereaia

¹ Unai dainai, lauegu Keristani varavara taudia e, umui be Dirava ese ia abia hidi vadaeni. Lau ura Iesu do umui lalao, ia be Dirava ese ia siaia vadaeni, iseda abidadama ena Hahelagaia Tauna Badana do ia lao.

² Dirava ese Iesu ia abia hidi vadaeni inai dagi do ia karaia totona, bona Iesu ese Dirava ena ura ia badinaia. Mose ese Dirava ena dubu gaukara ia badinaia namonamo bamona, Iesu danu Dirava ena ura ia badinaia namonamo. ³ Dirava ese hairai badana Iesu dekenai ia henia, to Mose dekenai be hairai maragina ia henia. Badina be ruma haginia tauna be idia matauraia bada, to ia karaia rumana be idia matauraia maragi.

⁴ Momokani, ruma ibounai be mai edia karaia tauna, to gau ibounai ia karaia tauna be Dirava sibona. ⁵ Mose ese gaukara namona ia karaia, Dirava ena bese ia naria totona, to ia be hesiai tauna sibona. Ia ese danu vaira neganai Dirava do ia gwauraia gaudia ia herevalaia guna.

⁶ To Keriso be Dirava ena Natuna korikori. Unai dainai ia be Dirava ena bese ena kwarana tauna momokani. Ia ese unai bese ia naria noho, iena Tamana ena ura hegeregerena. Ita be Dirava ena bese taudia, bema

mai abidadama, moale, bona lalao goada danu Lohiabada ena mauri hanaihanai ita naria noho neganai.

Kamonai lasi taudia be laga-ani do idia abia lasi

⁷ Unai dainai Lauma Helaga ena hereva ita kamona henia be gau badana. Ia be inai bamona ia gwau:

“Hari dina bema iena gadona umui kamona,

⁸ umui emui lalona do umui koua lasi, gunaguna emui sene taudia idia karaia bamona, Dirava ena hereva idia negea neganai, taunimanima noho lasi gabuna dekenai, lau ese idia lau tohoa neganai.

⁹ Unai gabu dekenai, lagani 40 lalonai lau Dirava egu kara idia itaia, to idia ese lau idia dibagania, bona lau idia tohoa.

¹⁰ Unai dainai lau ese unai taudia lau badu henia, lau gwau, ‘Nega ibounai inai taudia, be lauegu dala dekena amo idia raka siri.

Lauegu hereva idia kamona henia lasi.’

¹¹ Vadaeni lauegu badu lalonai, gwauhamata metauna lau gwaurai, lau gwau, ‘Lauegu laga-ani gabuna dekenai do idia vareai lasi.’”

Namo lasi Dirava ena hereva ita negea, Israela taudia idia karaia bamona

¹² Lauegu varavara taudia e, do umui naria namonamo, umui ta ese ia lalao kerere, iena abidadama be lasi, vadaeni Mauri Diravana do ia rakatania garina. ¹³ Hari inai negai be Dirava ese ia herevalaia, “hari dina.” Inai “hari dina” ia do noho dainai, umui ta ta dekenai durua hereva do umui henia, emui lalona hagoadaia totona. Dina ibounai inai bamona do umui karaia, umui ta be kara dika ese ia koia garina, bona unai tau ese iena lalona be Dirava dekena amo do ia koua garina. ¹⁴ Guna Keriso ita abidadama henia. Vadaeni namona be inai abidadama do ita badinaia noho, ela bona ita mase. Bema inai bamona ita karaia neganai, ita be Keriso ena taudia korikori.

¹⁵ Buka Helaga inai bamona ia gwau: “Hari dina bema iena gadona umui kamona, umui emui lalona do umui koua lasi, gunaguna umui emui sene taudia idia karaia bamona, Dirava ena hereva idia negea neganai.”

¹⁶ Inai taudia be daika, Dirava ena gadona idia kamona, to iena hereva idia negea? Taudia be unai, Mose ese Aigupito dekena amo ia hakaudia, ani? ¹⁷ Bona lagani 40 lalonai Dirava ese ia badu henidia taudia be daika? Taudia be unai, idia kara dika, vadaeni taunimanima noho lasi gabuna dekenai idia moru, idia mase, ani? ¹⁸ Ma daika taudia be Dirava ese gwauhamata metauna ia henidia, ia gwau, “Lauegu laga-ani gabuna dekenai do umui vareai lasi?” Taudia be unai, iena hereva idia negea taudia, ani? ¹⁹ Unai dainai, ita diba vadaeni, Dirava idia abidadama henia lasi dainai, iena laga-ani gabuna dekenai idia vareai lasi.

4

Dirava ena taudia ese laga-ani do idia davarua

¹ Dirava ena gwauhamata ia do noho, gauna be inai: Ita be iena laga-ani dekenai do ita vareai. Unai dainai, namona be unai laga-ani totona do ita naria namonamo noho mai gari danu, umui ta do ia vareai hegeregere lasi garina. ² Ita ese Sivarai Namona ita kamonaia vadaeni, Israela taudia idia kamonaia bamona. Io, idia kamonaia, to namona ta idia davaria lasi. Badina be idia kamonaia kava sibona, idia abidadama henia lasi. ³ To ita be Dirava ita abidadama henia dainai, iena laga-ani gabuna do ita vareai diba. Gunaguna Dirava ese unai laga-ani ia herevalaia, ia gwau:

“Lauegu badu lalonai,
gwauhamata metauna lau gwauraia, lau gwau,
‘Lauegu laga-ani dekenai do idia vareai lasi.’”

Dirava ese iena laga-ani ia herevalaia. To idaunegai Dirava ese tanobada ia karaia, bona unai neganai iena gaukara ia haorea. ⁴ Badina be Buka Helaga ese dina namba 7 ia herevalaia, ia gwau:

“Dirava ese iena gaukara ibounai ia karaia haorea,
vadaeni dina namba 7 dekenai ia laga-ani.”

⁵ Ma Buka Helaga lalonai ia gwau:

“Lauegu laga-ani gabuna lalonai do idia vareai lasi.”

⁶ Unai Israela taudia, Sivarai Namona idia kamonaia guna taudia ese unai laga-ani idia davaria lasi, idia abidadama henia lasi dainai. To Dirava ena gwauhamata ia do noho dainai, ita diba haida be iena laga-ani lalonai do idia vareai. ⁷ Unai dainai Dirava ese dina ta ma ia abia hidi, “hari dina” ia gwauraia. Vadaeni, nega daudau ia lao murinai, Dirava ese Davida ena uduna dekena amo, unai “hari dina” ia herevalaia, ia gwau:

“Hari dina bema iena gadona umui kamonaia,
umui emui lalona do umui koua lasi.”

⁸ Bema Iosua ese unai taudia dekenai Dirava ia gwauhamatalaia laga-ani ia henidia, Dirava be dina ta ma do ia herevalaia lasi. ⁹ Unai dainai ita diba Dirava ena taudia edia laga-ani be ia do noho. Ia be Dirava ena laga-ani bamona, dina namba 7 dekenai ia laga-ani neganai. ¹⁰ Badina be Dirava ena laga-ani dekenai ia vareai tauna ese iena gaukara dekena amo ia laga-ani noho. Ia laga-ani, Dirava ese iena gaukara dekena amo ia laga-ani bamona. ¹¹ Unai dainai, mai iseda goada ibounai, Dirava ena laga-ani do ita vareai toho. Bona ita ibounai ese Dirava ena hereva do ita utua lasi, gunaguna idia utua bamona, ita ta do ia boio garina.

¹² Badina be Dirava ena hereva be ia mauri noho, bona ia be mai ena sياهو. Ia be mai ena matana momokani. Iena matana ese kaia mai ena kahana ruaosi ena matana ia hereaia momokani. Ia ese tau ta ia gwadaia neganai, unai tau ena lalona momokani dekenai ia vareai. Ia vareai ela bona lalona bona lauma ruaosi ia hapararaia. Bona ia ese iseda lalona bona iseda kudouna ena ura ibounai ia tahua diba. ¹³ Gau ta Dirava dekena amo ita hunia diba lasi. Dirava ese ia karaia gaudia ibounai nega ibounai ia itaia noho. Idia be hanaihanai iena matana edia vairanai idia noho. Bona Dirava ese danu iseda kara do ia kota henia.

Iesu be iseda Hahelagaia Tauna Badana

¹⁴ Ita be mai iseda Hahelagaia Tauna Badana, bona ia be Dirava ena vairanai, guba dekenai ia noho. Ia be Iesu, Dirava ena Natuna. Unai dainai namona be iseda abidadama ita dogoatao goada noho. Ita gwauraia noho abidadama be unai. ¹⁵ Ita be manoka dainai karadika ese

nega momo ita ia hamorua. To iseda Hahelagaia Tauna Badana ese ita ia bogahisihisi henia diba. Badina be ia danu ese dibagani ena mamina ia abia, ita ese ena mamina ita abia hegeregerena. To Iesu ese kara dika ta ia karaia lasi. ¹⁶Unai dainai mai gari lasi danu, Dirava ena bogahisihisi ia noho helai gabuna dekenai ita raka kahirakahira lao, be namo. Vadaeni ia ese ita do ia bogahisihisi henia, bona ia ese hariharibada bona durua ita dekenai do ia henia, iseda metau hegeregerena.

5

Hahelagaia Tauna Badana Iesu ese ita ia hamauria diba momokani

¹ Hahelagaia Tauna Badana idia abia hidi dalana be inai bamona: Taunimanima edia huanai dekena amo Dirava ese ia abia hidi, ia be Dirava ena hesiai tauna, taunimanima durua totona. Iena gaukara danu be, kara dika kokia totona boubou gaudia ia karaia, bona harihari gaudia ia henia. ²Ia danu be mai ena manoka dainai, ia be taunimanima edia manoka bona edia aonega lasi ia bogahisihisi henia diba. ³Bona ia be manoka dainai, ia ese boubou gaudia ia henia, taunimanima sibona totona lasi, to ia sibona totona danu.

⁴ Inai Hahelagaia Tauna Badana ena gaukara be bada herea. Tau ta ese unai gaukara ena siahu be sibona ia abia diba lasi, to Dirava ese unai tau ia boiria, vadaeni unai dagi ia henia, guna Dirava ese Arona ia boiria bamona.

⁵ Keriso danu be inai bamona. Ia sibona ese ia hanamoa, vadaeni ia sibona Hahelagaia Tauna Badana ena gaukara ia abia, a? Lasi momokani. Dirava ese unai dagi ia henia, bona Dirava ese Iesu ia herevalaia, ia gwau:

“Oi be lauegu Natuna.

Hari dina oi lau havaraia vadaeni.”

⁶ Ma gabu ta danu dekenai Dirava ese Iesu ia herevalaia lou, ia gwau:

“Oi be hahelagaia tauna ela bona hanaihanai.

Oi be Melekisedeka ena oreā tauna.”

⁷ Ia be tanobada dekenai ia noho neganai, Iesu ese Dirava ia guriguri henia, mai taitai bona mai matana ranu danu. Ia noinoi, badina ia diba Dirava ese mase dekena amo ia hamauria lou diba. Bona Dirava ese Iesu ena noinoi ia abia dae, badina Iesu be sibona ena ura gauna ia noia lasi, bona ia be Dirava henunai ia manau noho dainai. ⁸Iesu be Dirava ena Natuna, to ia ese hisihisi ia abia, bona unai hisihisi ese Dirava kamona henia dalana ia hadibaia. ⁹Ela bona ia be namo momokani vadaeni, iena namo ese ibounai edia namo ia hereaia. Unai dainai ia be hegeregere vadaeni, ia dekenai idia kamona henia taudia ibounai dekenai, be mauri hanaihanai do ia henidia. Dirava ese inai dala ia havaraia. ¹⁰Bona Dirava ese Iesu ia gwauraia Hahelagaia Tauna Badana, Melekisedeka ena oreā momokani lalona.

Beibi sibona bamona do umui noho lasi

¹¹ Melekisedeka totona hereva momo ai ura hadibaia, to umui ai hadibaia be auka, badina be umui emui lalona idia do metau dainai.

¹² Nega ia ginidae vadaeni, umui be hadibaia taudia do umui halaoa totona. To umui be do diba maragi taudia. Unai dainai tau ta ese Dirava ena hereva, diba hamatamaia gaudia umui dekenai ia hadibaia lou be namo. Badina umui be rata sibona umui inua diba, umui be do hegeregere lasi aniani korikori do umui ania. ¹³Rata ia inua tauna be do beibi bamona. Ia be maoro bona kerere edia toana ia diba lasi. ¹⁴To

aniani korikori be tau badadia idia ania diba. Idia sibona ese edia lalona idia hadibaia lou, hadibaia lou, ela bona idia manada vadaeni. Unai neganai idia be maoro bona kerere edia toana idia diba namonamo.

6

Dirava dekenai abidadama do ita dogoatao noho

¹ Unai dainai namona be Keriso ena hadibaia hereva, diba hamatamaia gaudia ita rakatania. Bona iena hereva badadia do ita tahua. Sivarai Namona ena hadibaia hereva, diba hamatamaia gaudia, hegeregere kara dika dekena amo lalona giroa, bona Dirava abidadama henia, inai gaudia sibona do ita gwauraia lou, gwauraia lou, be hegeregere lasi. ² Ma bapatiso, imana kwarana dekenai atoa, mase dekena amo toreisi lou, bona kara dika ena kota henia hanaihanai, unai be hadibaia hereva, hamatamaia gaudia sibona. ³ Namona be iseda lalona ita kehoa, hadibaia hereva badadia do ita tahua, Dirava ese gwaumaoro ita dekenai ia henia hegeregere.

⁴ Badina be edia abidadama idia rakatania taudia be edena bamona edia lalona do idia giroa diba? Gunaguna edia lalona idia diari, bona guba ena harihari gauna idia mamia toho, bona Lauma Helaga ena siahu idia abia. ⁵ Bona idia diba vadaeni, Dirava ena hereva be namo, bona guba ena mauri gabeai gauna idia diba vadaeni. ⁶ Inai bamona taudia bema edia abidadama idia rakatania neganai, idia be mai edia dala edia lalona do idia giroa lou, a? Lasi momokani. Idia ese sibodia edia kara dika dekena amo, Dirava ena Natuna satauro dekenai idia hamasea lou. Idia ese Keriso be taunimanima edia vairana dekenai idia hahemaraia lou.

⁷ Nega momo medu ia diho tano latanai, bona tano ese medu ena namo ia abia. Bema unai tano ese anina ia atoa, uhe idia hadoa taudia edia mauri hanamoa totona, Dirava ese unai tano do ia hanamoa, ani? ⁸ To bema unai tano ese ava bona ginigini ia havaraia neganai, ia be anina lasi. Vadaeni sedira Dirava ese unai tano do ia hadikaia, bona unai tano do idia gabua ore.

⁹ Aiemei turana lalokau e, ai ese inai hereva metau umui dekenai ai torea inai. To ai diba umui be dika inai bamona lasi. Ai diba Dirava ese umui do ia durua, bona umui do ia hamauria. ¹⁰ Dirava ena kara be gagevagageva lasi, ia be maoromaoro momokani. Unai dainai ia ese emui kara namodia do ia laloaboio lasi. Umui ese Dirava umui lalokau henia. Inai lalokau ese laloa namodia umui dekenai ia havaraia, vadaeni umui ese Dirava ena taudia umui durua vadaeni, bona do umui durua noho danu. ¹¹ Ai ura bada umui ta ta ese unai bamona do umui karaia goadagoada noho, ela bona emui mauri dokona. Badina be unai neganai, umui naria noho davana namona, mauri hanaihanai, do umui abia momokani. ¹² Umui lahedo lasi. To abidadama bona haheauka taudia edia kara bamona do umui karaia. Vadaeni Dirava ia gwauhamatalaia davana namona, iena natuna taudia do idia abia gauna, be umui ese do umui abia.

Dirava ena gwauhamata be momokani

¹³ Gunaguna Dirava ese Aberahamo dekenai ia gwauhamata neganai, ta ese Dirava ia hereaia lasi dainai, unai gwauhamata ia henia sibona ena ladana dekenai. ¹⁴ Ia gwau, "Lau gwauhamata inai, oi do lau hanamoa bada, bona tubuna momo herea oi dekenai do lau henia."

15 Aberahamo ese ia haheauka noho dainai, Dirava ena gwauhamata gauna ia davarua.

16 Tau ta ese gwauhamata ia gwauraia neganai, ia ese ia hereaia tauna ta ena ladana dekenai ia gwauhamata. Bona gwauhamata ese taunimanima edia hepapahuahu ibounai ia hadokoa. 17 Dirava ia ura iena natuna taudia be do idia diba momokani iena gwauhamata be do ia haidaua lasi. Unai dainai, hereva helagana ma ta, metau bada gauna, ia gwauraia, helaga bada gauna. 18 Vadaeni, inai Dirava ena hereva gaudia rua idia noho, gwauhamata bona hereva helagana, bona idia senisi diba lasi. Ita diba unai hereva ruaosi idia noho, bona ita diba Dirava ia koikoi diba lasi. Unai dainai ita be mase dekena amo ita heau, bona Dirava ena mauri ita davarua vadaeni taudia. Vadaeni inai Dirava ena hereva ruaosi ese iseda lalona idia hagoadaia noho. Bona unai dainai, iseda abidadama do ita dogoatao noho, badina be ita diba ita naria noho davana namona, mauri hanaihanai, be do ita abia momokani. 19 Inai iseda davana namona, Dirava ia gwau do ita naria noho, mai abidadama danu gauna, be iseda mauri dogoatao gauna, dogo ese vanagi ia dogoatao bamona. Ia be iseda mauri ena dogo gauna, ia be goada bona momokani, bona ia ese Dubu Helaga ena koua dabua helagana ia hanaia lao, ela bona Helaga Herea Gabuna lalonai ia vareai. 20 Iesu ese ita ia gunalaia, bona ita dainai unai Gabu dekenai ia raka vareai vadaeni. Ia be Hahelagaia Tauna Badana ia halaoa vadaeni. Ia be Melekisedeka ena orea tauna ela bona hanaihanai.

7

Melekisedeka be Hahelagaia Tauna Badana momokani

1 Inai Melekisedeka be Salema ena king, bona ia be Atai ai Momokani Diravana ena hahelagaia tauna. Gunaguna Aberahamo ese king haida ia tuari henai, ia aladia mase. Vadaeni iena hanua dekenai ia giroa lou neganai, Melekisedeka be ia danu idia hedavari. Unai neganai Melekisedeka ese Aberahamo ia hanamoa henai. 2 Unai neganai Aberahamo ese iena kohu ia haria, kahana 10, vadaeni kahana ta Melekisedeka dekenai ia henai. Melekisedeka ena ladana ena anina gunana be “Kara Maoromaoro ena King,” ma iena ladana ta be “Maino Lohiana,” badina ia be Salema ena king. Salema ena anina be “Maino.” 3 Iena tamana, iena sinana bona iena iduhu edia ladana be idia torea lasi. Iena vara dinana be lasi, bona iena mauri dokona danu be lasi. Ia be Dirava ena Natuna bamona ia noho, ia be hahelagaia tauna ela bona hanaihanai.

4 Unai tau mani umui lalao. Ia be siahu bada tauna, ani? Badina be Aberahamo, iseda sene tauna badana momokani ese kohu ia henai. Oibe, Aberahamo ese tuari lalonai ia kwalimu dainai kohu ia abia. Unai kohu ia haria kahana 10, bona kahana ta Melekisedeka dekenai ia henai. 5 Momokani, Levi ena tubuna taudia ese hahelagaia taudia edia lagi idia abia diba. Bona taravatu ia gwau Israela taudia ese edia kohu do idia haria, kahana 10, bona kahana ta be Levi hahelagaia taudia dekenai idia henai. Io, Israela taudia be Levi taudia edia varavara, badina ibounai be Aberahamo ena tubuna taudia. Io, idia be varavara, to unai kohu kahana ta, Levi taudia ese idia abia unai Israela taudia edia kohu kahana 10 dekena amo. 6 Inai Melekisedeka be Levi iduhu tauna lasi, to ia ese Aberahamo ena kohu kahana ta ia abia. Melekisedeka ese danu Aberahamo ia hanamoa henai. 7 Bona ita diba vadaeni hanamoa ia

henia tauna be bada, bona hanamoa ia abia tauna be maragi, ani? ⁸ Levi taudia ese Israela edia kohu kahana ¹⁰ ena kahana ta idia abia, to unai Levi taudia be do idia mase. Melekisedeka ese danu unai bamona ia abia, to Buka Helaga ia gwau, ia be ia mauri noho. ⁹ Bona inai bamona ita hereva diba: Momokani Levi be mai ena maoro unai kohu do ia abia. To gunaguna Melekisedeka ese Aberahamo dekena amo unai bamona kohu ia abia. Inai anina be, Melekisedeka ese Levi dekena amo kohu ia abia danu. ¹⁰ Badina be inai: Melekisedeka be Aberahamo danu idia hedavari neganai, Levi be ia do vara lasi, to tamana Aberahamo ena tauanina lalonai ia noho.

Hahelagaia tauna matamatana ese Levi taudia edia gabu ia abia

¹¹ Gunaguna Dirava ese Israela taudia dekenai Taravatu ia henia. Taravatu ia gwau Levi ena iduhu taudia ese hahelagaia gaukara do idia karaia. To bema Levi besena edia hahelagaia gaukara dekena amo taunimanima ese kara maoromaoro momokani idia davaria diba, dahaka dainai Melekisedeka ena orea dekena amo hahelagaia tauna ta ma ia toreisi? Dahaka dainai unai Arona ena orea tauna ta ese unai dagi ia abia lasi? ¹² Bema hahelagaia taudia edia orea ia senisi neganai, Taravatu danu be do ia senisi. ¹³ Bona iseda Lohiabada, ita herevalaia noho Tauna, ena orea be idau. Iena iduhu tauna ta ese nega ta hahelagaia gaukara ia karaia lasi. ¹⁴ Badina be ita diba vadaeni, iseda Lohiabada be Iuda ena iduhu dekena amo ia vara. To Mose ese inai orea ia herevalaia lasi, hahelagaia taudia ia abia hidi neganai.

Iesu be hahelagaia tauna ela bona hanaihanai, Melekisedeka hegeregere

¹⁵ Inai hereva ena anina be, hari ita itaia namonamo diba, hahelagaia tauna matamata ta ia hedinarai vadaeni, Melekisedeka ena toana hegeregere. ¹⁶ Dirava ese inai hahelagaia tauna matamata ena dagi ia henia, taunimanima edia iduhu o edia taravatu dekena amo lasi. To inai dagi ia abia, iena mauri hanaihanai siahuna dekena amo. ¹⁷ Dirava ese Buka Helaga lalonai ia hereva, ia gwau, “Oi be hahelagaia tauna ela bona hanaihanai.

Oi be Melekisedeka ena orea tauna.”

¹⁸ Dirava ese taravatu gunana ia kokia, badina unai taravatu be manokamanoka bona anina lasi. ¹⁹ Badina be Mose ena Taravatu ese tau ta ia hanamoa momokani diba lasi. To harihari Dirava ese dala matamata ia kehoa vadaeni, inai dala matamata ese taravatu gunana ia hereaia, bona inai dala dekena amo Dirava kahirakahira dekenai ita lao diba.

²⁰ Dirava ese hahelagaia tauna ena dagi Iesu dekenai ia henia kava lasi. Lasi, Dirava ese hereva helagana ia gwauria guna, vadaeni unai dagi ia henia. ²¹ Hahelagaia taudia gunadia be unai bamona lasi. Idia edia dagi abia totona, Dirava ese unai bamona hereva helagana ia gwauria lasi. To Dirava ese hereva helagana ia gwauria guna, vadaeni ia ese Iesu be hahelagaia tauna ia halaoa. Dirava ese Iesu dekenai ia hereva henia, ia gwau:

“Lohiabada ese hereva helagana ia gwauria vadaeni,

bona iena lalona do ia senisia lasi.

Ia gwau, ‘Oi be hahelagaia tauna,

ma inai dagi do oi abia noho, ela bona hanaihanai.’”

²² Unai dainai hari ita diba, inai Dirava ena gwauhamata taravatuna, Iesu ese ia hamomokania gauna, be namo momokani. Ia ese unai gwauhamata taravatuna gunana ia hereaia momokani.

²³ Gunaguna unai hahelagaia taudia momo herea idia noho, badina be idia mase bona edia gaukara dekenai amo idia doko dainai. ²⁴ To Iesu be ia noho hanaihanai, unai dainai iena hahelagaia gaukara be ia noho nega ibounai, bona ta ese iena gabu do ia abia diba lasi. ²⁵ Unai dainai Iesu be mai ena siahu, iena ladana dainai Dirava dekenai idia mai taudia do ia hamauridia. Badina be inai: Iesu ia noho hanaihanai, bona ia ese inai taudia totona Dirava ia noia noho hanaihanai.

Hahelagaia Tauna Badana Iesu ese ita ia durua diba

²⁶ Iesu, inai Hahelagaia Tauna Badana ese ita ia durua diba. Ia be helaga. Ia be kara dika lasi, kerere ta lasi. Ia be kara dika taudia bamona lasi. Ia be goeva momokani, bona guba ena atai ai momokani dekenai ia daekau vadaeni. ²⁷ Ia be Hahelagaia Taudia Badadia haida bamona lasi. Idia ese dina ibounai boubou gaudia idia henai, idia sibona edia kara dika totona guna, gabeai taunimanima edia kara dika totona. To Iesu be inai bamona ia karaia lasi. Ia ese boubou gauna tamona ia henai, nega tamona sibona. Badina be ia ese iena mauri be Dirava dekenai ia henai. ²⁸ Mose ena Taravatu ese mai edia manoka taudia ia abia hidi, Hahelagaia Tauna Badana ena dagi do idia karaia totona. To Dirava ena gwauhamata hereva helagana, Taravatu murinai ia hedinari gauna, ese Dirava ena Natuna ia abia hidi inai dagi totona. Dirava ese iena Natuna ia hanamo bada, unai dainai ia goeva momokani vadaeni, ela bona hanaihanai.

8

Taravatu Matamatana

¹ Ai ese ai gwauraia vadaeni hereva ena anina be inai: Ita be mai iseda Hahelagaia Tauna Badana. Ia be Siahu Momokani Diravana ena helai gabuna badana idiba kahanai ia helai noho, guba dekenai. ² Ia ese Hahelagaia Tauna Badana ena hesiai gaukara guba ena tomadiho dubu dekenai ia karaia noho, unai be Palai Dubu momokanina, taunimanima ese idia haginia lasi, Lohiabada sibona ese ia haginia.

³ Hahelagaia Taudia Badadia ibounai edia gaukara be harihari gaudia bona boubou gaudia Dirava dekenai idia henai. Unai dainai Keriso danu ese boubou gauna ta ia henai. ⁴ Bema Keriso be tanobada dekenai ia noho neganai, ia ese hahelagaia gaukara do ia karaia lasi. Badina be inai: Hahelagaia taudia idia noho vadaeni, bona boubou gaudia idia henai noho, Iuda edia Taravatu hegeregere. ⁵ Idia ese hahelagaia gaukara idia karaia noho, to edia dubu be guba ena dubu helaga ena toana sibona. Inai be Dirava ese Mose ia hamaorolaia bamona. Mose ese guriguri palai dubu ta ia haginia gwauraia neganai, Dirava ese ia hamaoroa, ia gwau, “Oi naria namonamo, gau ibounai do oi karaia, ororo dekenai oi dekenai lau hadibaia ena laulau hegeregere.” ⁶ To harihari, Iesu ese hahelagaia gaukara ia abia. Bona iena gaukara ese unai hahelagaia taudia gunadia edia gaukara ia hereaia. Badina be Dirava ena taravatu matamatana, Keriso ese ia havaraia gauna, ese taravatu gunana ia hereaia. Bona Dirava ena gwauhamata ese taravatu gunana ena gwauhamata danu ia hereaia.

Taravatu matamatana ese taravatu gunana ena gabu ia abia

⁷ Bema taravatu gunana be mai ena kerere lasi neganai, taravatu matamatana ta be Dirava ese do ia laloa lasi. ⁸ To Dirava ese iena taudia edia kerere ia gwauraia, ia gwau,

“Lohiabada ia hereva, ia gwau,
‘Kamonai, dina ta do ia ginidae,
lau ese taravatu matamatana do lau karaia,
Israela besena danu, bona Iuda besena danu.

⁹ Inai taravatu be,
edia sene taudia danu lau karaia gauna bamona lasi.
Idia edia imana lau abia dinana dekenai,
Aigupito tano dekena amo idia lau hakau lao neganai,
idia ese lauegu taravatu idia badinaia lasi.
Unai dainai idia lau negea.’”

Lohiabada be unai bamona ia hereva.
¹⁰ Lohiabada ma ia gwau,
“Vaira neganai lau ese taravatu ta ma,
be Israela taudia danu do lau karaia.
Lauegu taravatu be edia lalona dekenai do lau atoa,
edia kudouna dekenai do lau torea.
Unai neganai lau be idia edia Dirava,
idia danu be lauegu bese taudia.

¹¹ Idia ta ta ibounai ese,
edia gado tamona taudia do idia hadibaia lasi,
bona idia ta ta ibounai be,
edia varavara dekenai do idia hereva lasi, inai bamona,
‘Lohiabada do oi diba be namo.’
Badina idia ibounai be lau do idia diba,
tau maragidia ibounai, ia lao bona tau badadia danu.

¹² Lau ese edia kara dika do lau gwauatao,
bona edia kerere do lau laloaboio.”

¹³ Dirava ese taravatu matamatana ia herevalaia. Unai hereva dekena amo, Dirava ese unai taravatu gunana be do ia ore gauna ia halaoa vadaeni. Iena siahua ia ore gauna, gau gunana, be nega sisina sibona do ia noho, vadaeni, do ia ore momokani.

9

Gunaguna Hahelagaia Tauna Badana ese boromakau edia rarana boubou gaudia totona ia henia

¹ Taravatu gunana lalonai, Dirava ese tomadiho daladia ia gwauraia. Tomadiho dubuna, tanobada dekenai noho gauna, be Dirava ese ia gwauraia danu. ² Guriguri Palai Dubu idia haginia, iena daiutu be rua. Daiutu ginigunana lalonai be lamepa gini gauna bona pata, bona Dirava dekenai henia paraoa idia noho. Unai daiutu ena ladana be, “Helaga Gabuna.” ³ Inai daiutu ruaosi edia huanai, be koua dabua helagana ta ia noho, ena ladana be, koua dabua iharuana. Inai dabua ena murina kahanai, be daiutu iharuana ia noho, ena ladana idia gwauraia be, “Helaga Herea Gabuna.” ⁴ Inai Helaga Herea Gabuna lalonai be pata helagana ta, golo gauna, kwalahu mai bonana ia latanai do idia karaia totona. Taravatu Maua, ena kopina be golo kavakava dekena amo idia koua gauna, danu unuseni ia noho. Taravatu Maua lalonai be uro ta, golo gauna, bona uro lalonai be mana aniani ia noho. Unai Maua lalonai danu be Arona ena itotohi, ia latanai raurau idia tubu gauna. Bona inai

Maua lalonai be nadi palaka rua, edia latanai Dirava ese Taravatu ia torea gaudia. ⁵ Unai Maua ena latanai Dirava ena hairai gaudia rua, edia toana aneru bamona, ladana kerubi idia gini. Idia be Dirava ena gabu idia abia bamona, bona edia hanina ese kara dika gwauatao gabuna idia koua. To harihari inai gau ibounai do ai herevalaia lasi, aiemai nega be lasi dainai.

⁶ Gau ibounai unai bamona idia karaia, bona dina ibounai hahelagaia taudia ese daiutu ginigunana, Helaga Gabuna, dekenai idia raka vareai. Unuseni Dirava ena gaukara idia karaia. ⁷ To Hahelagaia Tauna Badana sibona ese lagani ta ta ibounai lalonai, nega tamona sibona ia ese unai daiutu iharuana, Helaga Herea Gabuna, dekenai ia raka vareai. Rara danu ia abia vareai. Inai rara dekenamo ia ese boubou gauna ia henia, sibona ena kara dika dainai, bona iena bese taudia edia kerere dainai danu. Unai kerere be, idia diba lasi dainai idia karaia gaudia. ⁸ Lauma Helaga ese ita ia hadibaia namonamo noho, ia gwau: Helaga Herea Gabuna do ita raka vareai dalana be do ia kehoa lasi, bema unai daiutu ginigunana be ia do noho neganai. ⁹ Inai guriguri Palai Dubu be laulau bamona, ia be hari inai nega dekenai dahaka ia vara noho ena toana bamona. Iena anina be, unai harihari gaudia bona boubou gaudia, boromakau rara gaudia, be Dirava dekenai idia henia, taunimanima edia dika kokia totona. To idia ibounai ese tomadiho tauna ena lalona bona ena kudouna idia hagoevaia hegeregere lasi. Lasi momokani. ¹⁰ Unai boubou karadia edia badina be, aniani gaudia bona inuina gaudia hagoevaia totona, bona taunimanima edia tauanina hagoevaia totona sibona. Taunimanima ese inai boubou karadia edia taravatu do idia badinaia noho, ia mai bona Dirava ese dala matamata do ia haginia.

Keriso ese sibona ena rarana, boubou gauna totona ia henia

¹¹ To harihari Keriso ia mai vadaeni, bona ia be Hahelagaia Tauna Badana. Harihari be dala namona ena nega ia ginidae vadaeni. Keriso ese Dirava ena hesiai gaukara be Palai Dubu ta lalonai ia karaia noho. Inai Palai Dubu be namo herea bona bada herea, taunimanima ese idia karaia lasi gauna. Bona inai Palai Dubu be tanobada gauna lasi. ¹² Keriso ese inai Palai Dubu ena lalona dekenai ia raka hanaia, bona Helaga Herea Gabuna lalonai nega tamona sibona ia raka vareai, ia karaia lou lasi. Bona unai bamona ia karaia neganai, nanigosi bona boromakau edia rarana ia abia vareai lasi boubou karaia totona. Lasi momokani. To ia ese sibona ena rarana ia abia vareai, bona unai dekenamo ia ese mauri hanaihanai ita totona ia abia. ¹³ Bema taunimanima edia tauanina idia helaga lasi neganai, nanigosi bona boromakau tau edia rarana bona boromakau natuna idia gabua ena kahu be hahelagaia tauna ese unai taudia edia latanai ia negea lao. Vadaeni unai murinai edia tauanina be helaga bona goeva Dirava ena vairanai. ¹⁴ Inai be momokani. To Keriso ena rarana ese unai bamona kara ia hereaia momokani, ani? Badina be Keriso be goevagoeva momokani, bona kerere ta lasi. Bona Lauma Helaga, noho hanaihanai Laumana, ena siahu dekenamo Keriso ese sibona ena mauri Dirava dekenai ia henia, boubou gauna goevagoeva momokani totona. Unai dainai iena rarana ese iseda lalona do ia hagoevaia anina lasi boubou karadia dekenamo. Vadaeni Mauri Diravana ena hesiai gaukara do ita karaia diba.

¹⁵ Unai dainai Keriso ese taravatu matamatana ia haginia, bona taunimanima durua totona ia be Dirava ena vairanai ia gini noho. Keriso ia

mase, taunimanima do ia hamauria totona, bona edia kerere, taravatu gunana lalonai idia karaia gaudia do ia kokia totona. Unai dainai Dirava ena boiboi idia kamona henia taudia ibounai ese, Dirava ia gwauhamatalaia mauri hanaihanai do idia abia. Inai gwauhamata ese Dirava ena natuna ibounai do ia hanamoa, ela bona hanaihanai.

¹⁶ Tau ta ia do mase lasi neganai, gwauhamata pepana ta do ia torea. Inai gwauhamata ena anina be, ia mase neganai, iena natuna ese iena kohu do ia abia. Vadaeni, gabeai iena natuna ia ura unai pepa dekenai ia gwauhamatalaia kohuna do ia abia neganai, ia ese iena tamana ena mase, be taunimanima edia vairanai do ia hamomokania guna, ani? ¹⁷ Unai gwauhamata pepana be ia siahu lasi, ela bona gwauhamata karaia tauna ia mase vadaeni. Bema tau ta ia mauri noho neganai, iena gwauhamata pepana be ia noho kava, anina lasi. ¹⁸ Taravatu gunana ena goada badina be unai, rara, ani? Boromakau edia rarana idia bubua ena anina korikori be unai, ani? ¹⁹ Guna be Mose ese Taravatu ena hereva ibounai taunimanima dekenai ia gwauraia. Unai murinai, boromakau natuna bona nanigosi edia rara bona ranu ia abia. Vadaeni unai rara, be mamoe ena huina kakakaka, bona husopo auna dekena amo taunimanima bona Taravatu Buka edia latanai ia negea lao. ²⁰ Mose ia gwau, "Inai rara ese Dirava ena gwauhamata taravatuna ia hamomokania noho. Dirava ese umui ia oda henia, iena gwauhamata taravatuna do umui kamona henia." ²¹ Unai bamona danu Mose ese rara ia negea lao guriguri Palai Dubu ena latanai, bona helaga gaudia ibounai edia latanai danu. ²² Oibe, Taravatu ena hereva hegeregerena, gau momo herea be rara ese ia hagoevaia. Bona bema rara idia bubua lasi neganai, kara dika be idia gwauatao diba lasi.

Keriso ena boubou karana ese iseda dika ia kokia

²³ Tanobada ena Palai Dubu, bona ena kara, be guba gaudia edia laulau sibona. Tanobada gaudia be Dirava ena vairanai do idia goevagoeva totona, boromakau edia rarana idia habubua. To guba gaudia korikori hagoevaia totona boubou gaudia, ese unai boromakau bouboudia idia hereaia momokani, ani? ²⁴ Ita diba, Keriso ese, taunimanima ese idia karaia Helaga Gabuna dekenai ia raka vareai lasi. Unai be guba gauna ena laulau sibona. Lasi, to Keriso ese maoromaoro guba dekenai ia raka vareai. Unusenai Dirava ena vairanai, ita durua totona ia gaukara noho.

²⁵ Nega tamona, lagani ta ta ibounai, Hahelagaia Tauna Badana ese rara ia abia, Helaga Herea Gabuna lalonai ia raka vareai, boubou gauna Dirava dekenai ia henia totona. Unai rara be ia sibona ena rarana lasi. To Keriso be unai bamona ia karaia lasi. Ia ese guba lalonai ia vareai, sibona ena mauri Dirava dekenai ia henia, boubou gauna totona. Inai kara be nega momo ia karaia lasi. ²⁶ Badina be bema nega momo ia karaia neganai, ia be hisihisi do ia abia lou, abia lou, Dirava ese tanobada ia karaia negana amo, ia mai bona hari. To unai bamona be lasi. Harihari, inai nega dokona dekenai, Keriso be tanobada dekenai ia hedinarai, nega tamona sibona. Ia sibona ena mauri, be boubou gauna Dirava dekenai ia henia, kara dika kokia totona. ²⁷ Taunimanima ibounai be nega tamona sibona do idia mase. Unai murinai Dirava ese idia do ia kota henia. ²⁸ Unai bamona danu Keriso ese nega tamona sibona iena mauri Dirava dekenai ia henia, taunimanima momo edia kara dika kokia totona. To gabeai, nega iharuana do ia mai hedinarai lou. Unai be

kara dika kokia totona do ia mai lasi, to ia idia naria noho taudia do ia hamauria totona do ia mai.

10

Boubou karadia gunadia ese kara dika do idia kokia hegeregere lasi

¹ Iuda taudia edia Taravatu be dohore idia vara gau namodia edia laulau sibona. Ia be unai gau namodia edia toana korikori lasi. Unai dainai, unai lagani lagani ibounai idia karaia boubou karadia ese unai tomadiho taudia idia hanamoa momokani diba lasi.

Lasi momokani. ² Bema unai boubou karadia ese Dirava tomadiho henia taudia idia hagoevaia momokani neganai, kara dika ena mamina be edia lalona dekenai do idia abia lou lasi. Unai bamona bema ia vara neganai, boubou karadia do idia karaia lou lasi. ³ To boubou idia karaia noho dainai, lagani ta ta ibounai taunimanima ese edia dika idia laloa lou, laloa lou. ⁴ Badina boromakau tau bona nanigosi edia rara ese kara dika idia kokia diba lasi.

⁵ Unai dainai, Keriso be tanobada dekenai ia mai gwauraia neganai, ia ese Dirava ia hereva henia, ia gwau:

“Boubou karadia bona harihari gaudia be oi ura lasi,
to oi ese lau totona tauanina ta oi abia hegaegae.

⁶ Lahi ese boromakau bona nanigosi ia gabua boubou gaudia,
be oi moalelaia lasi.

Oi ura lasi unai boubou karadia kara dika kokia totona.

⁷ Vadaeni, lau gwau, ‘Dirava e, lau inai,
oiemu ura gauna do lau karaia,

Taravatu Buka lalonai egu sivarai ia torea hegeregere.’”

⁸ Keriso ena hereva ginigunana be inai, ia gwau, “Oi ura lasi boubou karadia, bona harihari gaudia. Lahi ese boromakau bona nanigosi ia gabua boubou patana oi moalelaia lasi. Oi ura lasi unai boubou karadia, kara dika kokia totona.” Oibe, Keriso be unai bamona ia hereva, to unai boubou karadia be Taravatu hegeregere. ⁹ Unai murinai ia gwau, “Dirava e, lau inai, oiemu ura do lau karaia.” Unai dainai Dirava ese boubou karadia gunadia ia kokia, bona edia gabu dekenai Keriso ena boubou karana ia atoa. ¹⁰ Badina be, Iesu Keriso ese Dirava ena ura ia karaia dainai, ita ibounai kara dika dekena amo ita be goevagoeva vadaeni. Keriso ese inai bamona ia karaia, iena tauanina nega tamona sibona boubou gauna ia halaoa neganai.

Keriso ena boubou karana ia hegeregere momokani kara dika kokia totona

¹¹ Iuda taudia edia hahelagaia taudia ibounai ese, dina ta ta ibounai helaga karadia idia karaia, bona boubou karadia be dala tamona dekenai idia henia nega momo. To unai gaukara ese kara dika idia kokia diba lasi. ¹² To Keriso ese, kara dika kokia totona, boubou gauna tamona sibona ia henia. Inai boubou gauna be mai ena siahu ela bona hanaihanai. Keriso ese unai bamona ia karaia murinai, Dirava ena idiba kahanai ia helai diho. ¹³ Unuseni ia naria noho, ela bona Dirava ese ia idia tuari henia taudia be iena aena henunai do ia atodia. ¹⁴ Keriso ese boubou gauna tamona dekena amo iena helaga taudia ia hagoevadia momokani, ela bona hanaihanai.

¹⁵ Bona Lauma Helaga ese danu ita ia hadibaia, ia gwau:

¹⁶ “Lohiabada ia gwau,

‘Vaira neganai lau ese taravatu ta ma,

be Israela taudia danu do lau karaia.
Lauegu taravatu be edia kudouna dekenai do lau atoa,
edia lalona dekenai do lau torea.’”

¹⁷ Bona Lauma Helaga ia gwau:

“Edia kara dika bona edia kara kerere do lau laloo lou lasi.”

¹⁸ Vadaeni, bema Dirava ese unai kara dika ia gwauatao vadaeni, boubou karadia kara dika kokia totona be anina lasi.

Namona be Dirava kahirakahira ita lao, mai abidadama danu

¹⁹ Unai dainai, lauegu varavara e, Iesu ena rarana dainai, Helaga Herea Gabuna do ita raka vareai diba, gari lasi momokani. ²⁰ Iesu ese dala matamata, mauri dalana, ia kehoa vadaeni ita dekenai. Ia ese unai koua dabua helagana ia hanaia vadaeni. Unai koua dabua helagana be Keriso ena tauanina bamona. ²¹ Ita be mai iseda Hahelagaia Tauna Badana, bona ia ese Dirava ena orea ia naria noho. ²² Ia ese iena rarana iseda kudouna dekenai ia atoa, vadaeni iseda lalona idia goeva, bona kara dika ena mamina danu do ita abia lasi. Iseda tauanina danu be ranu namona dekenai amo ia ese idia ia huria goevagoeva. Unai dainai iseda lalona dekenai amo koikoi ibounai do ita negea, bona mai laloo maoromaoro danu Dirava ena vairanai do ita noho. Ma namona be ita ese Dirava do ita abidadama henia momokani, bona ia kahirakahira dekenai do ita noho. ²³ Ita diba momokani Dirava ese iena gwauhamata do ia badinaia. Unai dainai namona be iseda abidadama ita dogoatao goada noho. Ita gwauraia noho abidadama be unai. ²⁴ Umui ta ta dekenai durua henia daladia do umui laloo noho. Unai bamona lalokau dekenai amo kara namodia do umui karaia. ²⁵ Iseda guriguri hebou kara do umui hadokoa lasi, haida ese idia hadokoa bamona. To umui ta ta emui Keristani varavara taudia edia lalona do umui hagoadaia, oibe, inai kara do umui habadaia be namo. Badina be Lohiabada ena Dina be kahirakahira do ia ginidae.

Dirava ena Natuna do ita negea be hegeregere lasi

²⁶ Badina be Keriso ena hereva momokani ita diba murinai, bema iseda ura dekenai kara dika ita karaia noho, boubou gauna ta lasi ese unai dika do ia gwauatao diba. ²⁷ To iseda dokona be unai, mai gari bada danu, be Kota Badana do ita naria noho. Badina lahi sياهو bada herea ese Dirava idia negea taudia ibounai do ia gabua ore. ²⁸ Ita diba Mose ena Taravatu ia utua tauna be idia bogahisihisi henia lasi. Bema tau rua o toi ese iena kerere idia itaia, unai tau ena davana be mase. ²⁹ Edena bamona umui laloo? Dirava ena Natuna do ia negea tauna be edena bamona? Dirava ena gwauhamata taravatuna ena rarana ese unai tau ia hagoevaia vadaeni. To unai tau ese unai gwauhamata taravatu ena rarana, be anina lasi gauna bamona ia halaoa. Bona unai tau ese Dirava ena Hariharibada Laumana ia hereva dika henia. Unai bamona tauna ena kerere davana ena bada be edena bamona? ³⁰ Badina inai bamona ia hereva Diravana ita diba, ani? Ia gwau, “Dika ena davana henia gaukara be lau sibona ese do lau karaia.” Ma ia gwau, “Lohiabada ese iena bese taudia do ia kota henia.” ³¹ Mauri Dirava ena imana ese bema ita do ia panisi henia, be mai gari bada momokani.

Abidadama dekenai ita gini goada be namo

³² Nega gunana do umui laloo lou be namo. Dirava ena diari umui davarua murinai, hisihisi momo umui abia, to umui gini goada. ³³ Nega haida, taunimanima ibounai edia vairanai, umui idia dagedage henia, bona umui idia kirikirilaila. Bona nega haida, umui ese unai bamona

hisihi idia abia noho taudia umui durudia. ³⁴ Umui ese dibura ruma lalonai idia koua taudia umui bogahisihi henidia. Bona emui kohu be haida ese idia dadia neganai, edia kara umui haheaukalaia mai moale danu. Badina be umui diba, umui dekenai ia noho kohu, davana namona, be do ia noho hanaihanai gauna.

³⁵ Unai dainai emui abidadama goadana do umui rakatania lasi. Badina be iena davana be do ia bada herea. ³⁶ Metau lalonai do umui gini goada, do umui haheauka, vadaeni Dirava ena ura do umui karaia diba. Unai neganai Dirava ia gwauhamatalaia davana namona do umui abia. ³⁷ Badina be Buka Helaga ia gwau:

“Nega daudau lasi, nega sisina sibona, inai ia mai noho Tauna be do ia ginidae.

Ia be do ia naria noho lasi.

³⁸ To lauegu kara maoromaoro taudia, be edia abidadama dainai do idia mauri. Bona lauegu dala ia rakatania tauna, do lau moale lasi ia dekenai.”

³⁹ To ita be Dirava ena dala do ita rakatania lasi. Ita be boio taudia lasi. Lasi, to ita be abidadama taudia dainai, mauri do ita abia.

11

Abidadama ena anina

¹ Abidadama ena anina be inai bamona: Ita daradara lasi, to ita diba momokani, Dirava ena davana namona ita naria kava lasi. Matana dekenai ita itaia lasi, to iseda lalona ia diba momokani, inai gauna do ita abia.

² Edia abidadama dainai, Dirava ese sene taudia ia hanamoa.

³ Ita abidadama henia, vadaeni ita diba Dirava ena hereva ese tanobada bona guba ia karaia. Unai dainai itaia lasi gaudia dekena amo, Dirava ese itaia gaudia ia karaia.

Abela bona Enoka bona Noa

⁴ Abela ese Dirava ia abidadama henia, bona boubou gauna Dirava dekenai ia henia. Dirava ese Abela ena boubou gauna ia ura henia, to Kaino ena boubou gauna ia ura henia lasi. Abela ese Dirava dekenai ia abidadama henia, unai dainai Dirava ese kara maoromaoro tauna ia gwauraia. Inai be momokani, badina Dirava ese Abela ena boubou gauna ia abia dae. Vadaeni Abela ia mase, to iena abidadama dekena amo, ia do hereva noho.

⁵ Enoka ese Dirava ia abidadama henia, unai dainai Dirava ese guba dekenai ia abia daekau. Ia mase lasi. Taunimanima ibounai ese Enoka idia tahua mase, to idia davaria lasi, badina Dirava ese ia abia vadaeni. Buka Helaga ia gwau, Enoka be ia do abia daekau lasi neganai, ia ese Dirava ena ura ia badinaia momokani. ⁶ Tau ta bema Dirava ia abidadama henia lasi neganai, ia hegeregere lasi Dirava ena ura do ia badinaia. Badina be bema tau ta be Dirava kahirakahira ia ura lao neganai, ia ese Dirava do ia abidadama henia guna, Dirava be ia mauri noho. Bona unai tau ena abidadama be inai bamona: Dirava idia tahua taudia ibounai, be davana namona Dirava ese do ia henidia.

⁷ Noa ese Dirava ia abidadama henia, vadaeni Dirava ese dohore idia vara gaudia Noa dekenai ia hadibaia guna. Vadaeni Noa ese Dirava ia kamona henia, bona lagatoi badana ia karaia. Noa, mai ena hahine, bona mai edia natudia danu ese lagatoi dekenai idia mauri noho, dika idia davaria lasi. Noa ena abidadama ese tanobada taudia ibounai

ia kota henia bamona. Bona Noa ena abidadama dainai, Dirava ese kara maoromaoro tauna ia gwauraia. Ma Dirava idia abidadama henia taudia ibounai, be Dirava ese maoromaoro do ia gwauraidia.

Aberahamo

⁸ Aberahamo ese Dirava ia abidadama henia. Unai dainai Dirava ese Aberahamo ia boiria, vadaeni Aberahamo ese Dirava ena hereva ia kamona henia. Iena hanua ia rakatania, Dirava ese ia ura do ia henia tanona dekenai do ia lao totona. Aberahamo be ia lao gwauraia gabuna ia diba lasi. To ia abidadama henia, vadaeni ia lao. ⁹ Aberahamo ese Dirava ia abidadama henia dainai, Dirava ese ia gwauhamata do ia henia tano dekenai, idau bese tauna bamona ia noho. Ia be palai ruma lalonai ia noho, Isako bona Iakobo danu. Idia ruaosi danu ese unai gwauhamata be Dirava dekena amo idia abia.

¹⁰ Nega ibounai Aberahamo ese hanua badana ta totona ia naria noho, mai abidadama danu. Unai hanua be mai ena nadi badina aukana, bona mai goadana. Unai hanua be Dirava sibona ese iena palani hegeregere ia karaia, bona ia haginia danu.

¹¹ Iena abidadama dainai, Sara ese goada ia abia, vadaeni ia rogorogo. Ia buruka herea dainai, natuna ta do ia havaraia dala be lasi momokani, to Sara ese Dirava ia abidadama henia. Ia diba Dirava ese iena gwauhamata do ia badinaia. ¹² Aberahamo be buruka momokani, iena mase be kahirakahira. To unai tau tamona dekena amo, bese bada herea ia vara. Edia momo be guba ena hisiu idia momo herea hegeregere, bona kone ena miri bamona.

¹³ Edia abidadama lalonai, inai tau gunadia ibounai idia mase. Dirava ena gwauhamata ena anina idia do davaria lasi. To daudau herea dekena amo, unai gwauhamata gaudia idia itaia, bona idia moale bada, idia gwau, “Ai be gabu idau taudia bamona inai tano dekenai ai noho. Ai be inai tanobada dekenai do ai noho daudau lasi.”

¹⁴ Unai bamona idia hereva taudia edia hereva anina be ia hedinarai vadaeni. Idia ese edia tano korikori idia tahua. ¹⁵ Idia rakatania tanona idia laloo lasi. Edia giroa lou dalana ia noho, to idia ura lasi. ¹⁶ To idia ura korikori tanona sibona idia laloo, inai be guba. Unai dainai, idia ese Dirava idia gwauraia edia Dirava, bona Dirava be idia dainai ia hemarai lasi. Ia ese idia totona hanua badana ia karaia hegaege vadaeni.

¹⁷ Abidadama dainai Aberahamo ese iena natuna Isako ia abia, boubou gauna bamona Dirava dekenai ia henia. Unai be, Dirava ese Aberahamo ena abidadama ia tohoa neganai. Oibe, Aberahamo ia diba Dirava ese iena gwauhamata ia henia, to iena natuna tamona be boubou gauna bamona do ia alaia gwauraia. ¹⁸ Dirava ese guna ia hereva henia, ia gwau, “Isako dekena amo oiemu bese do ia vara.” ¹⁹ To Aberahamo ia daradara lasi, ia laloo, “Bema Isako ia mase, Dirava be mai ena siahu do ia hatorea isi lou.” To inai bamona ita herevalaia diba, ani? “Aberahamo ese Isako ia abia lou mase dekena amo.”

Isako, Iakobo bona Iosepa

²⁰ Abidadama dainai, Isako ese Iakobo bona Esau ia hanamoa, bona gabei do idia vara gaudia ia gwauraia.

²¹ Abidadama dainai, Iakobo kahirakahira ia mase neganai, Iosepa ena natuna ruaosi ia hanamoa. Iena itotohi ena kwarana latanai ia tabekau, vadaeni ia ese Dirava dekenai ia tomadiho henia.

²² Iosepa ese Dirava ia abidadama henia dainai, ia ese kahirakahira ia mase neganai, Israela besena Aigupito do idia rakatania sivaraina ia gwauraia guna. Iena turiana do idia guria dalana danu ia gwauraia.

Mose

²³ Mose ena tamana bona sinana ese Dirava idia abidadama henia dainai, Mose ia vara neganai hua toi idia hunia. Idia itaia, ia be mero namona momokani, vadaeni mai gari lasi danu, king ena oda idia kamoni henia lasi.

²⁴ Mose ese Dirava ia abidadama henia dainai, ia bada neganai, ia ura lasi ia idia gwauraia Farao natuna hahine ena natuna. ²⁵ Ia laloa Dirava ena bese taudia danu do ia hisihisi hebou be namo. Kara dika ena moale, nega daudau lasi idia noho gaudia, be ia ura lasi. ²⁶ Mose ia laloa, Keriso dainai hemarai bona hisihisi do ia abia be namo. To Aigupito ena kohu momo do ia abia be dika. Badina be Dirava do ia henia davana namona ia laloa.

²⁷ Mose ese Dirava ia abidadama henia. Unai dainai ia toreisi, Aigupito ia rakatania, king ena badu dekenai ia gari lasi. Mose ena lalona ia goada noho, ita itaia diba lasi Diravana, be Mose ese matana dekenai ia itaia bamona. ²⁸ Mose ese Dirava ia abidadama henia dainai, Pasova ia badinaia, bona iduara edia latanai rara ia atoa. Vadaeni alaia aneruna ese Israela edia vara guna memero ia alaia lasi.

Israela taudia momo ese Dirava idia abidadama henia

²⁹ Israela taudia ese Dirava idia abidadama henia dainai, Davara Kakakaka idia raka hanaia, tano kaukau dekenai idia raka bamona. To Aigupito taudia ese unai bamona idia raka toho neganai, idia maloa, idia mase.

³⁰ Israela taudia ese Dirava idia abidadama henia dainai, Ieriko hanua ena magu ia moru diho, dina 7 unai hanua idia raka hagegea murinai.

³¹ Ariara hahine Rahaba ese Dirava ia abidadama henia dainai, ia ese Israela hasinadao taudia ruaosi edia itaia hunia gaukara ia durua. Vadaeni abidadama lasi taudia danu, be Rahaba ia mase lasi.

³² Ma dahaka do lau gwauraia? Gideona bona Baraki bona Samson bona Iepeta bona Davida bona Samuela bona peroveta taudia herevalaia totona, lauegu nega be hegeregere lasi. ³³ Unai taudia ese Dirava idia abidadama henia dainai, idia ese tanobada basileia momo idia tuari henia, bona idia kwalimu. Kara maoromaoro idia karaia, bona Dirava ena gwauhamata gauna idia davaria. Idia ese laiona edia uduna idia koua. ³⁴ Lahi siahua badadia momokani idia habodoa. Tuari kaia dekena amo idia heau mauri. Edia manokamanoka idia negea, goada idia abia. Tuari lalonai idia be mai siahua. Idu bese edia tuari taudia idia halusia. ³⁵ Hahine danu ese edia mase taudia idia davaria lou, idia toreisi lou dainai. Haida be dibura ruma lalonai, vadaeni dibura ruma naria taudia ese idia dadabadia ela bona idia mase. Oibe, haida be mai edia mauri dalana bema dala maorona idia negea, to Dirava idia badinaia noho dainai, mase idia davaria. To mase idia laloa lasi, badina be idia diba, Dirava ena toreisi lou ena mauri namo herea do idia davaria.

³⁶ Ma haida be idia dagedage henidia taudia ese idia kirikirilaidia, idia kwadidia, auri dekenai idia guidia, bona dibura ruma lalonai idia koudia. ³⁷ Nadi dekenai idia hodoa, idia mase, iri dekenai idia utua kahaana rua, idia mase, tuari kaia dekena amo idia aladia mase. Idia haida madi, mamoe kopina bona nanigosi kopina, dabua bamona idia karaia, idia loaloa. Idia be ogogami, hisihisi idia abia, bona taunimanima ese idia hadikadia. ³⁸ Unai dainai taunimanima idia noho lasi gabudia bona

ororo dekenai idia loaloo. Kohua bona guri lalonai idia noho. Badina idia be taunimanima namodia, bona tanobada noho taudia edia kara be hegeregere lasi unai abidadama taudia be edia huanai do idia noho.

³⁹Oibe, inai taunimanima namodia ese Dirava idia abidadama henia, bona ladana namo herea idia abia. To Dirava ena gwauhamata gaudia be idia do davaria lasi, dohore. ⁴⁰Badina be Dirava ese inai dala namona ia laloo: Ia ura lasi idia sibona ese unai gwauhamata anina do idia davaria. To ia ura ita be idia danu nega tamona unai davana namona, mauri hanaihanai, do ita abia hebou. Vadaeni idia be ita danu idia noho dainai, idia ese unai davana namona, mai goeva momokani danu, do idia davaria.

12

Iseda matana do ita negea Iesu dekenai

¹Bona ita be edena bamona? Ita idia itaia noho taudia momo herea ese ita idia hagegea noho. Abidadama dalana ita dekenai idia ese idia hedinarai vadaeni. Unai dainai, namona be ita idia hametaua gaudia ibounai, bona ita idia guia noho kara dikadia do ita negea momokani. Vadaeni iseda vairana dekenai ia noho heau helulu, be mai haheauka danu do ita heau goada. ²Iseda matana be Iesu dekenai do ita negea lao. Ia ese iseda abidadama ia havaraia, bona ia ese iseda abidadama do ia durua, ela bona dokona. Iesu be satauro dainai ia hesiku lasi. Lasi momokani. Ia diba guba ena moale be iena vairanai ia noho dainai, ia ese satauro ena hemarai bona ena mase ia laloo lasi. Bona hari ia be Dirava ena helai gabuna badana ena idiba kahanai ia helai noho.

Dirava ese ita ia matakani henia, dala do ita raka maoromaoro totona

³Iesu ena hisihisi do umui laloo namonamo: Kara dika taudia ese mai badu danu ia idia dagedage henia. To ia goada noho. Unai dainai do umui hesiku lasi, bona do umui manoka lasi. ⁴Umui ese kara dika umui koua toho noho, umui tuari henia bamona, mai emui goada danu. To emui tuari lalonai, emui rarana be ia do bubua lasi, ani? ⁵Buka Helaga lalonai Dirava ese sisiba hereva namona ia gwauraia, umui do ia hagoadaia totona. Umui laloaboio, a? Tamana ta ese iena natuna ia sisiba henia bamona, Dirava ese umui do ia sisiba henia, ia gwau: “Lauegu natuna e,

Lohiabada ena matakani do oi negea lasi,
Ia ese oi ia sisiba henia neganai, do oi manoka lasi.

⁶Badina be Lohiabada ese ia ura henia tauna ia matakani henia.
Bona bema tau ta be,

Dirava ese iena natuna ia gwauraia neganai,
Dirava ese unai tau do ia dadabaia.”

⁷Unai dainai, namona be hisihisi umui davaria neganai, mai heheauka danu do umui abia dae, emui tamana ese umui ia matakani henia bamona. Badina inai be toana namona, ia hedinarai momokani umui be Dirava ena natuna, bona ia ese umui dekenai ia kara henia, iena natuna korikori dekenai ia kara henia hegeregerena. Badina be edena mero be iena tamana ese ia matakani henia lasi? ⁸Io, tamana ibounai ese edia natuna idia matakani henidia. Bema Tamana Dirava ese oi ia matakani henia lasi neganai, inai anina be, oi be iena natuna korikori lasi, oi be ariara merona sibona. ⁹Bona inai danu, iseda tamana inai tanobada dekenai ese ita idia matakani henia, ani? To ita ese idia ita matauraia, ani? Vadaeni, namona be iseda lauma ena Tamana do ita

matauraia, bona mauri do ita davaria. ¹⁰ Iseda tamana inai tanobada dekenai ese ita idia matakani henia, edia ura hegeregere. To Dirava ese ita ia matakani henia, be ita durua bona hanamoa totona, bona ia danu do ita helaga hebou totona. ¹¹ Tamana ese metau bona hisihisi ita dekenai ia henia neganai, iseda lalona idia hisihisi, bona ita be moale lasi. To gabeai, inai matakani ese idia ia hamaoromaoroa vadaeni taudia ese, kara maoromaoro ena davana namona, mai maino danu do idia davaria.

Umui emui lalona do umui ha-aukaia, bona do umui gini goada

¹² Vadaeni, umui emui imana idia manoka neganai, do umui abia isi, do umui ha-aukaia. Bema emui tuina idia heudeheude neganai, do umui gini goada noho. ¹³ Bona emui aena idia raka dala do umui hamaoromaoroa. Unai dekena amo, emui aena dika taudia ese edia bero do idia habadaia lasi, to do idia namo lou lao.

¹⁴ Mai maino danu taunimanima ibounai danu do umui noho, bona Dirava ena kara helagadia danu do umui karaia. Badina be kara helaga lasi tauna ese Lohiabada do ia itaia lasi. ¹⁵ Umui naria namonamo, umui ta ese Dirava ena hariharibada do ia reaia garina. Umui ta be au dikana bamona do umui tubu lasi. Badina be ia tubu neganai, iena poisini ese hisihisi bona kerere momo umui emui huanai do ia havaraia garina. ¹⁶ Bona do umui naria namonamo, umui ta ese heudahanai o sihari kava karadia do ia karaia garina. O umui ta ese Dirava ia lalona lasi garina, Esau ia karaia bamona. Ia be lauma lasi tauna dainai, iena vara guna ahuna ia negea, aniani tamona do ia hoia totona. ¹⁷ Umui diba, Esau be gabeai ia ura iena tamana ena hanamoa do ia abia, to Dirava ese iena noinoi ia abia dae lasi. Io, mai tai momo danu, Esau ese lalona giroa dalana ia tahua, to ia davaria lasi.

Ita be Siona Ororo dekenai ita gini noho vadaeni

¹⁸ Umui gini noho gabuna mani umui lalona. Israela taudia be Sinai Ororo kahirakahira idia gini bamona umui gini lasi. Umui gini noho gabuna, be emui imana ese idia dogoatao diba lasi, to Israela taudia be unai ororo kahirakahira dainai, idia ese idia dogoatao diba. Umui be lahi sياهو badana ena vairanai umui gini lasi. Dibura masemase, korema dikadika gauna, bona guba dika herea ese umui idia hagaria lasi, Israela taudia idia hagaria bamona. ¹⁹ Kibi ena regena bada, bona gado ta idia kamoni, mai gari bada. Unai gado idia kamonia neganai, idia ese Mose idia tai henia, idia noia, idia gwau, “Mani emu kara, ai ura lasi unai hereva ma ai kamoni.” ²⁰ Badina be Dirava ena hereva dekenai idia gari dikadika. Dirava ia gwau, “Bema tau ta ese iena imana dekenai unai ororo ia dogoatao neganai, unai tau do umui hodoa mase. Bona boromakau o mamoe, idia danu bema ororo idia kamokau, do umui hodoa mase.” ²¹ Israela taudia ibounai ese idia itaia gaudia dekenai idia gari bada herea. Mose danu ia hereva, ia gwau, “Lau gari momo, bona lau heudeheude dikadika noho danu.”

²² Unai bamona gari gaudia be umui dekenai idia ginidae lasi, ani? To umui be Siona Ororo kahirakahira umui ginidae vadaeni. Inai be Dirava ena hanua badana, mauri gabuna. Inai gabu ena ladana be Ierusema, guba dekenai. Inai gabu lalonai, aneru momo herea momokani idia noho hebou. ²³ Dirava ena vara guna natuna taudia edia hebou gabuna dekenai umui ginidae vadaeni. Unai natuna taudia edia ladana be guba dekenai idia torea vadaeni. Umui be Dirava dekenai umui ginidae

vadaeni. Ia be taunimanima ibounai edia Kota Biaguna Badana. Dirava ese ia gwauraidia maoromaoro taudia ibounai edia lauma danu be unai gabu dekenai idia noho, mai edia goevagoeva danu. ²⁴ Bona Iesu dekenai umui ginidae vadaeni. Ia be Dirava ena taravatu matamata ia havaraia Tauna, ia danu be unuseni ia noho. Bona Iesu ena rarana dekenai danu umui ginidae vadaeni. Unai rara be mai ena gwauhamata hereva namona ita dekenai. Oibe, Iesu ena rara sivaraina, ese Abela ena rara herevana ia hereaia momokani.

Umui naria namonamo

²⁵ Umui naria namonamo, umui dekenai ia hereva noho Diravana ena hereva do umui negea garina. Gunaguna Dirava ese Israela taudia dekenai ia hereva goada, vadaeni iena hereva idia kamona henia lasi. Unai neganai idia be dala lasi edia kara dika davana dekena amo idia heau mauri diba. Harihari Dirava be guba dekena amo ita dekenai ia hereva goada noho. Bema iena hereva ita negea, edena bamona iseda dika davana dekena amo do ita heau mauri diba, a? Lasi momokani. ²⁶ Gunaguna neganai, Dirava ena gadona ese tanobada ia hamarerea. To harihari Dirava ese ita ia gwauhamata henia, ia gwau, “Nega tamona ma, lau ese tanobada do lau hamarerea, bona tanobada sibona lasi, to guba danu do lau hamarerea.” ²⁷ Unai hereva “nega tamona ma” ena anina be, gunaguna Dirava ese ia karaia gaudia, be ia ese do ia hamarerea, vadaeni idia be do ia kokia haorea. Bona ia hamarerea diba lasi gaudia be do idia noho.

²⁸ Inai ita abia vadaeni Basileia, be tau ta ese do ia hamarerea diba lasi gauna. Unai dainai Dirava ita tanikiu henia be namo. Bona namona be Dirava do ita tomadiho henia, mai hemataurai bona mai gari danu. Namona be iena gaukara do ita karaia, iena ura dala hegeregere. ²⁹ Badina iseda Dirava be lahi badana momokani bamona. Ia ese gau ibounai ia araa haorea noho.

13

Emui Keristani varavara taudia do umui lalokau henia

¹ Umui Keristani taudia e, nega ibounai emui Keristani varavara taudia do umui lalokau henidia, be gau badana. ² Do umui laloaboio lasi, idau taudia emui ruma lalonai do umui abia dae. Badina be haida ese unai bamona idia karaia neganai, aneru idia abia dae. To idia diba lasi unai be aneru.

³ Dibura ruma lalonai idia koua taudia do umui lalao. Oibe, umui be idia danu dibura ruma dekenai umui noho bamona, do umui lalodia. Hisihisi idia abia noho taudia do umui lalao. Umui be idia danu nega tamona umui hisihisi noho bamona do umui lalodia.

⁴ Headava kara be taunimanima ibounai ese do idia matauraia be namo. Tatau mai edia hahine e, emui headava do umui naria, ia be goevagoeva Dirava ena vairana dekenai. Do ia miro lasi. Badina be Dirava ese heudahanai taudia bona headava hadikaia taudia edia kerere davana do ia henia momokani.

⁵ Moni do umui ura henia dikadika lasi. To umui dekenai ia noho gauna, be inai bamona do umui laloalala, “Lau dekenai noho gauna be namo, ia hegeregere vadaeni.” Badina be Dirava be inai bamona ia hereva, ia gwau:

“Lau ese umui do lau negea lasi,
bona umui do lau rakatania lasi
Lasi bona lasi momokani.”

6 Unai dainai, mai goada danu, inai bamona do ita hereva,
 “Lohiabada be lauegu durua Tauna,
 lau be lau gari diba lasi.

Taunimanima edena bamona lau do idia hadikaia diba?”

7 Umui emui hakaua taudia gunadia do umui laloatao. Idia ese Dirava ena hereva umui dekenai idia hadibaia. Edia mauri dalana do umui laloa lou, bona edia abidadama kara hegeregereña do umui badinaia.

8 Iesu Keriso be varani bona hari ia idau lasi. Bona do ia idau lasi, ela bona hanaihanai.

9 Do umui naria, hadibaia hereva idauidau ese dala maorona dekena amo umui idia hakaua kerere garina. To namona be, Dirava ena hariharibada dekena amo, iseda lauma ese goada idia abia. Aniani taravatu idauidau ese iseda lauma do idia hagoadaia lasi. Inai bamona taravatu idia kamoni henia taudia ese durua idia abia lasi.

Boubou gaudia, Dirava ese ia ura henia gaudia

10 Ita be mai iseda boubou patana. To Iuda taudia edia hahelagaia taudia be hegeregere lasi iseda boubou patana dekena amo aniani idia ania. 11 Iuda taudia edia Hahelagaia Tauna Badana ese boromakau bona mamoe edia rarana, be Helaga Herea Gabuna dekenai do ia abia lao, kara dika kokia boubouna do ia karaia totona. To unai boromakau o mamoe edia tauanina be kamepa ena murimurinaia idia gabua. 12 Unai bamona dainai, Iesu danu be hanua badana ena murimurinaia ia mase, iena rarana dekena amo taunimanima do ia hagoevaia totona, vadaeni do idia helaga. 13 Unai dainai, ita be namo Iesu dekenai do ita lao, hanua ena murimurinaia, bona iena hemarai danu do ita abia hebou. 14 Badina be inai tanobada dekenai iseda noho hanaihanai hanuana be lasi. To noho hanaihanai hanuana, gabeai do ia hedinarai gauna, ita tahuu noho. 15 Unai dainai namona be Dirava do ita hanamoa, Iesu ena ladana dainai. Bona inai hanamoa Dirava dekenai do ita henia nega ibounai, boubou gauna bamona. Oibe, ita ese iseda uduna bibina Iesu dekenai do ita henia, bona ia do ita gwauraia hedinarai, ia be Lohiabada. 16 Kara namodia do umui laloaboio lasi, bona kohu lasi taudia danu, umui emui kohu do umui abia hebou. Inai bamona karadia be boubou gaudia bamona, Dirava ese ia moalelaia gaudia.

17 Umui idia hakaua taudia do umui kamoni henia, bona edia hereva do umui badinaia. Badina be idia ese umui emui lauma idia naria noho, nega ibounai. Gabeai idia ese Dirava ena vairanai, edia gaukara ibounai ena anina do idia gwauraia hedinarai. Unai dainai edia hereva do umui kamoni henia, bona idia edia henunai do umui noho. Bema inai bamona umui karaia neganai, edia gaukara be mai moale danu do idia karaia, lalohisihisi ta lasi. To bema mai lalohisihisi danu umui idia naria neganai, umui ese anina namona ta do umui davarai lasi.

Emui guriguri dekena amo, ai do umui durua

18 Umui ese ai totona do umui guriguri noho, badina ai laloa aiemai kudouna ena laloa be maoromaoro, Dirava ena vairanai. Bona ai ura be nega ibounai kara maoromaoro do ai karaia. 19 Oibe, lau be umui lau noia goadagoada, Dirava do umui noia, ia ese lauegu mai dala do ia durua. Vadaeni ia ese, umui dekenai lau do ia siaia haragaharaga.

Guriguri dokona

20 Dirava be maino ena badina momokani. Ia ese iseda Lohiabada Iesu mase dekena amo ia hatorea isi lou. Iesu be Mamoe Naria Tauna Badana, badina be ia ese Dirava ena noho hanaihanai gwauhamata ia

hamomokania vadaeni. Oibe, Iesu ese unai Dirava ena gwauhamata badana ia hamomokania. Badina be inai: Ia sibona ena rarana, boubou gauna bamona, ia bubua diho dainai. ²¹ Vadaeni, inai maino Diravana ese gau namodia ibounai umui dekenai do ia henia, bona idia dekena amo umui do ia hanamoa momokani. Vadaeni umui ese iena ura do umui karaia. Bona namona be Dirava ese Iesu Keriso ena siahu dekena amo, iseda lalona dekenai do ia gaukara, vadaeni Dirava hamoalea karadia do ita havaraia. Keriso dekenai hairai bada do ia noho ela bona hanaihanai. Amen.

Hereva dokona

²² Lauegu varavara taudia e, umui lau noia goada, inai revareva, umui hagoadaia totona gauna, do umui abia dae mai haheauka danu. Badina be lau torea herevadia be lata lasi. ²³ Lau ura umui diba, iseda varavara Timoteo be dibura ruma dekena amo idia ruhaia vadaeni. Bema lau dekenai ia mai haraga neganai, ia bona lau, ai ruaosi, umui itaia totona do ai mai.

²⁴ Umui ese emui hakaua taudia bona Keristani taudia ibounai dekenai aiemai hanamoa do umui henia. Dirava ena taudia ibounai Italia dekenai ese edia hanamoa umui dekenai idia siaia inai.

²⁵ Dirava ena hariharibada umui ibounai dekenai do ia noho.

IAMESI ENA REVAREVA

¹ Lau Iamesi inai. Lau be Dirava bona Lohiabada Iesu Keriso edia hesiai tauna.

Lau ese inai revareva Iuda Keristani taudia ibounai tanobada gabu ibounai dekenai lau torea inai. Umui ese emui gabu korikori umui rakatania, tanobada idauidau dekenai umui noho. Umui lau hanamoa henia inai.

Dibagani bona hisihisi ese umui ia hagoadaia diba

² Lauegu varavara taudia e, bema dibagani idauidau ese umui dekenai ia ginidae neganai, inai bamona do umui laloe be namo: Inai be moale gauna sibona. ³ Badina be umui diba, dibagani o hisihisi ese emui abidadama idia tohoa neganai, goada bona haheauka idia havaraia noho. ⁴ Vadaeni nega ibounai metau bona hisihisi lalonai do umui haheauka noho, ela bona inai haheauka emui lalona dekenai ia goada momokani. Unai neganai emui kara be namo, bona Dirava ena dala hegeregrena do umui raka, kerere ta lasi.

Tau ta ia aonega lasi neganai do ia guriguri be namo

⁵ Bema umui ta be aonega lasi, namona be Dirava do ia noia, vadaeni Dirava ese aonega ia dekenai do ia henia. Badina be Dirava ese taunimanima ibounai dekenai gau namodia ia henia noho. Bona tau ta bema ia be gau ta lasi, vadaeni Dirava do ia noia neganai, Dirava ese do ia badu henia lasi. ⁶ To unai tau ia noinoi neganai, namona be ia abidadama sibona, bona daradara lasi. Badina be daradara tauna be davara ena hurehure bamona. Lai ese ia doria lao, doria mai, ia be gini gabuna lasi. ⁷ Bema daradara tauna ia laloe, gau ta Lohiabada dekena amo do ia abia diba, iena laloe be anina lasi. ⁸ Badina be laloe rua tauna be iena kara ibounai lalonai, ia ese dala tamona sibona ia badinaia diba lasi.

Ogogami bona kohu momo

⁹ Keristani tauna ogogamina, bema Dirava ese ia abia isi neganai, do ia moale be namo. ¹⁰ To kohu momo tauna, bema Dirava ese ogogami tauna ia halao neganai, ia danu do ia moale be namo. Badina be kohu momo tauna do ia mase, be rei ena huahua ia mase noho bamona. ¹¹ Umui diba, dina ia daekau neganai, iena siahu ese ava ia hakauka, vadaeni iena huahua ia moru diho, iena hairai be ia ore. Inai bamona danu, kohu momo tauna ese iena gaukara ia karaia noho neganai, do ia mase.

Dika ese tau do ia tohoa, bona do ia dibaganian

¹² Hisihisi bona dibagani ia abia neganai ia gini noho, mai haheauka danu tauna be namo. Badina be unai dika dekena amo ia kwalimu neganai, ia ese Dirava ia gwauhamata gauna, mauri hanaihanai, iena kwalimu ahuna, do ia davaria. Dirava ia hereva vadaeni, ia idia lalokau henia taudia ibounai ese unai mauri hanaihanai do idia davaria. ¹³ Bema tau ta ese dibagani ia davaria, o dika ta ese ia veria noho neganai, inai bamona do ia hereva lasi, “Dirava ese lau ia dibaganian noho.” Badina be kara dika ese Dirava ia dibaganian diba lasi momokani. Bona Dirava ese tau ta do ia dibaganian lasi. ¹⁴ To dibagani ena badina korikori be, tau ta sibona ena ura dainai, kara dika ta ese ia veria noho, bona ia koia noho. ¹⁵ Vadaeni iena ura dikadia be idia rogorogo bamona,

unai murinai kara dika ia havaraia. Bona kara dika ia tubu bona ia bada neganai, mase ia havaraia.

¹⁶ Lauegu varavara e, lauegu lalokau, do umui laloa kerere lasi. ¹⁷ Gau namodia ibounai, bona harihari gaudia namodia momokani ibounai, be Dirava dekena amo idia diho mai. Dirava ese diari ibounai ia karaia, bona nega haida idia ese edia toana idia senisia, nega haida mai edia dibura nega. To Dirava ese iena kara ia senisia lasi, ia diari hanaihanai, bona ia be mai ena dibura sisina lasi. ¹⁸ Ia sibona ena ura dainai, Dirava ese iena hereva momokani dekena amo, ita dekenai mauri matamata ia henia, vadaeni iena vara guna natuna taudia ita lao. Momokani, Dirava ia karaia taudia ibounai edia huanai, ita be iena vara guna natuna taudia.

Dirava ena hereva do umui badinaia, kamonai sibona lasi

¹⁹ Lauegu varavara e, egu lalokau, inai sisiba umui laloaboio lasi. Umui ta ta ibounai ese hereva dekenai do umui kamonai haraga, to hereva do umui gwauraia haraga lasi. Bona do umui badu haraga lasi. ²⁰ Badina be taunimanima edia badu ese Dirava ena kara maoromaoro ia havaraia diba lasi. ²¹ Unai dainai miro karadia ibounai, laloa dikadia, bona kara dikadia ibounai do umui rakatania. Dirava henunai do umui noho, bona iena hereva, emui lalona dekenai ia hadoa gauna, do umui abia dae, mai emui manau danu. Inai hereva ese umui ia hamauria diba.

²² To Dirava ena hereva do umui kamonai kava lasi, to umui badinaia danu. Bema umui kamonai kava, umui sibona umui koia noho. ²³ Bema tau ta be hereva ia kamonai sibona, to ia badinaia lasi, ia be sibona ena vairana ena toana hevarivari lalonai ia itaia bamona. ²⁴ Iena vairana ena toana korikori ia itaia, vadaeni ia raka siri, bona maoromaoro iena vairana ena toana ia laloaboio momokani. ²⁵ To taravatu namona bona goevagoeva momokani ia noho, ia ese kara dika ena siahu dekena amo ita ia ruhaia vadaeni. Tau ta bema inai taravatu ia itaia namonamo noho, bona ia badinaia noho, bona ia kamonai kava lasi, to ia karaia momokani neganai, unai tau be namo. Dirava ese unai tau, iena kara ibounai lalonai, do ia hanamo.

²⁶ Tau ta bema ia laloa ia be Keristani tauna namona, to iena malana ia naria diba lasi neganai, ia ese sibona ena lalona ia koia noho. Unai tau ena Keristani kara be anina lasi. ²⁷ To Keristani tauna ena kara goevagoeva bona momokani, Tamana Dirava ena vairanai be inai: Bema tamana bona sinana lasi maragidia bona vabu be mai edia hisihisi, ia ese do ia naridia. Bona tanobada ena kara mirodia dekena amo do ia raka siri.

2

Taunimanima ibounai do umui lalokau henidia, maka tamona dekenai

¹ Lauegu varavara taudia e, ita be Lohiabada Iesu Keriso ita abidadama henia noho. Ia be guba ena hairai diarina ena Lohiabada momokani. Unai dainai namo lasi umui ese toana namo o dagi bada taudia do umui laloa bada, to ogogami bona dagi lasi taudia do umui laloa maragi. Unai be maoro lasi. ² Sedira kohu momo tauna ta, mai ena imana kwakikwakina rini, golo gauna, bona mai ena dabua namodia danu emui dubu lalonai ia raka vareai. Ma ogogami tauna ta, mai ena dabua dikana, be emui dubu do ia raka vareai danu. ³ Sedira dabua namona tauna do umui hereva henia, do umui gwau, “Mani emu kara, inai helai gauna namona dekenai do oi helai.” To ogogami tauna dekenai do umui hereva henia, do umui gwau, “Unusenai do oi gini noho, o

foloa dekenai do oi helai, lauegu aena badinai.”⁴ Bema unai bamona umui karaia neganai, umui be mai emui kerere. Emui kerere be inai: Maka tamona dekenai taunimanima umui kara henidia lasi, to mai emui laloe maoromaoro lasi danu, taunimanima edia toana sibona umui itaia, bona idia edia kara umui laloe kerere, kota biaguna dikana ia karaia bamona.

⁵ Lauegu varavara taudia e, lauegu lalokau, umui kamona. Inai tanobada ena ogogami taudia be Dirava ese ia abia hidi vadaeni, iena Basileia do idia abia totona. Inai Basileia be Dirava ia gwauhamata vadaeni, ia idia lalokau henia taudia ese do idia abia. Oibe, ogogami taudia edia abidadama, be guba ena koku momo bamona, badina be Dirava ena Basileia lalonai do idia vareai.⁶ To umui ese ogogami taudia umui matauraia lasi. Daika ese umui idia dagedage henia, bona umui idia doria lao kota dekenai? Kohu momo taudia, ani? ⁷ Idia ese emui ladana namona, Dirava ese umui dekenai ia henia gauna, idia hadikaia noho, ani?

⁸ Unai dainai, namona be Basileia ena Taravatu do umui badinaia. Inai Taravatu badana be Buka Helaga lalonai ia torea, ia gwau, “Oiemu badibadinai ia noho tauna do oi lalokau henia, oi sibona oi lalokau henia bamona.” Bema inai Taravatu umui badinaia neganai, kara namo herea umui karaia noho. ⁹ To bema taunimanima edia toana dekena amo umui kara henidia, kara dika umui karaia inai. Bona inai Taravatu ese umui ia gwauraia kerere. ¹⁰ Badina be bema tau ta ese Taravatu momo herea ia badinaia, to tamona sibona ia badinaia lasi, ia be mai ena kerere, Taravatu ibounai ia utua tauna hegeregere. ¹¹ Badina be Dirava ese inai Taravatu ia gwauraia, “Do umui heudahanai lasi,” bona inai Taravatu danu ia gwauraia, “Taunimanima do umui alaia lasi.” Vadaeni, bema oi heudahanai lasi, to tau ta oi alaia, oi be Taravatu oi utua vadaeni. ¹² Umui ese inai bamona do umui laloe be namo: Vaira neganai Dirava ese umui do ia kota henia Taravatu dekena amo. Inai Taravatu ese kara dika ena siahu dekena amo ita ia ruhaia noho. Unai dainai do umui hereva namonamo, bona noho namonamo, unai Taravatu hegeregere. ¹³ Badina be bogahisihisi ia henia lasi tauna ese Dirava dekena amo bogahisihisi do ia davaria lasi. To bogahisihisi ia henia tauna ese Kota Biaguna ena bogahisihisi do ia davaria.

Abidadama mai ena kara lasi be anina lasi

¹⁴ Lauegu varavara taudia e, tau ta bema ia gwau ia be abidadama tauna, to kara namona ta ia karaia lasi, iena namo be dahaka, a? Abidadama ese ia do ia hamauria diba, a? ¹⁵ Sedira Keristani tadikaka ta o taihuna ta be dabua lasi, bona ia be aniani lasi. ¹⁶ Vadaeni umui ta ese bema ia hamaoroa, ia gwau, “Dirava ese oi do ia hanamoa, oi ese oiemu kopina do oi hasiahua, bona do oi boga kunu.” Bema unai bamona umui hamaoroa, to dabua ta o aniani ta umui henia lasi neganai, emui hereva be anina lasi. ¹⁷ Abidadama danu be inai bamona. Bema abidadama sibona ia noho, to kara be lasi, unai abidadama be anina lasi.

¹⁸ To tau ta sedira ia hereva, ia gwau, “Oi be mai oiemu abidadama, to lau be mai lauegu kara namodia.” Vadaeni, lauegu haere be inai bamona, “Tau ta mai ena abidadama, to mai ena kara lasi, unai bamona tauna ta ia noho, a? Lasi momokani. To lau ese egu abidadama do lau hamomokania egu kara namodia dekena amo.” ¹⁹ Oi ese inai oi abidadama henia: “Dirava korikori be tamona,” a? Namu, to lauma dikadia danu unai bamona idia abidadama, bona mai gari danu idia

heudeheude noho. ²⁰ Oi kavakava tauna e, bema oi abidadama, to kara namodia oi karaia lasi, vadaeni oiemu abidadama be anina lasi. Inai anina oi diba lasi, a?

²¹ Gunaguna iseda tamana Aberahamo ese iena natuna Isako be pata helagana ena latanai boubou totona ia atoa neganai, Dirava ese ia gwauraia maoromaoro. Oibe, Dirava ese Aberahamo ena kara namona ia itaia dainai, ia gwauraia maoromaoro. ²² Oi itaia, Aberahamo ena abidadama be iena kara namona danu nega tamona idia gaukara. Bona unai dainai iena kara namodia ese iena abidadama idia hamomokania vadaeni. ²³ Buka Helaga ena hereva be momokani, ani? Ia gwau, “Aberahamo ese Dirava ia abidadama henia, bona iena abidadama dainai Dirava ia gwau ia be maoromaoro vadaeni.” Unai dainai idia gwau Aberahamo be Dirava ena turana. ²⁴ Unai dainai umui itaia, kara namodia dainai, taunimanima be Dirava ena vairanai idia maoromaoro, abidadama sibona dainai lasi.

²⁵ Unai bamona danu, ariara hahine Rahaba be iena kara dainai Dirava ena vairanai ia maoromaoro. Badina be ia ese Israela ena hesiai taudia iena ruma dekenai ia abidia dae, bona dala idauna dekena amo ia siaidia lao, vadaeni idia heau mauri.

²⁶ Ita diba, tauanina bema mai ena lauma lasi, ia be mase gauna, ani? Vadaeni unai bamona danu, abidadama mai ena kara namodia lasi, be mase gauna.

3

Iseda uduna ena hereva do ita naria

¹ Laegu varavara taudia e, umui momo ese hadibaia gaukara umui abia be namo lasi. Badina be ai hadibaia taudia be Dirava ese do ia kota henia auka, haida bamona lasi. ² Ita ibounai ese nega momo kerere ita karaia. To bema tau ta ese iena hereva dekena amo kerere ta ia karaia lasi, ia be goeva bona namo momokani. Ia ese iena tauanina ibounai ia biagua bona naria diba. ³ Hosi edia uduna dekenai auri ita atoa, vadaeni inai auri ita veria, be hosi ese iseda ura do idia karaia. Hosi ena tauanina ibounai ita giroa diba, iseda ura dalana dekenai. ⁴ Lagatoi danu umui lalao, ia be bada herea, bona lai badadia ese idia hodaia. To tari maragimaragina ese ia taria noho, bona lagatoi be tari tauna ena ura gabuna dekenai ia lao noho. ⁵ Unai bamona danu mala be gau maragina, to ia be hekokoroku momo.

Lahi danu umui lalao. Lahi maragina ese uda bada herea ia araia ore diba. ⁶ Bona mala be lahi bamona. Ia be tauanina kahana ibounai edia kahana tamona, to kara dika idauidau ia havaraia diba. Ia ese iseda mauri ibounai, tauanina bona lauma ia hadikaia diba. Iseda noho dalana ibounai be mala ese ia hakererea momokani diba, badina be lahi bamona ita ia araia noho. Unai lahi be hel dekena amo ia mai. ⁷ Taunimanima ese mauri gaudia ibounai idia hamanadaia diba. Idia raka gaudia, idia roho gaudia, bona idia rau gaudia, bona davara lalonai noho gaudia danu be taunimanima ese idia hamanadaia diba. ⁸ To mala be tau ta ese ia hamanadaia diba lasi. Mai dika danu mala ese ia mareremarere noho, bona tau ta ese iena dika ia koua diba lasi. Mala be taunimanima alaia poisini dekenai ia honu masemase. ⁹ Mala dekena amo iseda Lohiabada bona Tamana ita hanamoa noho. Bona mala dekena amo danu taunimanima, Dirava ese iena toana bamona ia karaia taudia, ita hadikaia noho. ¹⁰ Uduna tamona ese hanamoa hereva bona hadikaia hereva ia gwauraia noho. Laegu varavara taudia e, inai

bamona kara ia vara be dika. ¹¹ Guri tamona dekena amo, ranu ena mamina namo bona ranu ena mamina dika ia lohilohe daekau noho, a? ¹² Lauegu varavara taudia e, fig auna ese olive huahua do ia atoa, a? O vain auna ese fig huahua do ia atoa, a? Davara ese danu ranu ena mamina namo ia havaraia lasi.

Aonega korikori be Dirava dekena amo

¹³ Sedira umui ta be mai ena aonega bona mai ena diba. Bema tau ta be inai bamona neganai, namona be iena aonega do ia hamomokania, iena mauri namona bona iena kara namodia dekena amo. Aonega tauna be do ia hekokoroku lasi, to iena diba namona ese iena aonega do ia hedinaia. ¹⁴ To umui emui lalona dekenai, bema mama, bona umui sibona habadaia kara idia noho neganai, emui aonega be momokani lasi. Unai be aonega koikoi, bona do umui heagilaia lasi, Dirava ena hereva momokani do umui hadikaia garina. ¹⁵ Unai bamona aonega be Dirava dekena amo ia diho mai lasi. Ia be tanobada gauna sibona, tauanina sibona gauna, bona Satani dekena amo ia mai. ¹⁶ Mama bona sibona habadaia kara idia noho neganai maino be lasi, bona kara dikadia ibounai danu idia noho. ¹⁷ To Dirava dekena amo aonega ia abia tauna ena kara ginigunana be inai: Ia laloa goevagoeva. Ma iena kara haida be inai: Mai ena maino, laloa manada bona gado namo. Ia be mai ena bogahisihisi, bona kara namodia momo ia havaraia noho. Ia be maka tamona dekena amo taunimanima ibounai ia kara henidia, edia toana dekena amo lasi. Ma inai tau be Keristani koikoi tauna lasi. ¹⁸ Bema maino ita karaia noho neganai, inai be uhe ita hadoa bamona. Vadaeni inai maino dekena amo, kara maoromaoro do ia vara, uhe ena anina ia tubu hegeregerena.

4

Bema tanobada ena kara ita ura henia, inai be Dirava ita ura henia lasi

¹ Heatu bona heai be edena bamona umui emui huanai idia vara noho? Edia badina korikori be inai: Emui ura dikadia, be emui lalona dekenai idia tuari noho, ani? ² Gau idauidau umui ura dikadika, to umui abia diba lasi. Unai dainai taunimanima umui alaia gwauraia. Mai mama danu gau haida umui ura abia, to umui abia diba lasi. Unai dainai umui heatu bona heai noho. Emui ura gaudia umui abia lasi, badina be Dirava umui noia lasi dainai. ³ O bema Dirava umui noia neganai, emui ura gauna umui davarialasi, badina be mai laloa kerere danu umui noia. Emui laloa be unai gauna do umui abia, bona do umui gaukaralaia emui tauanina edia ura dikadia totona. ⁴ Umui be headava kara ena taravatu umui makohia noho taudia bamona. Umui diba lasi, a, bema umui ura tanobada danu umui turana karaia neganai, inai be umui ese Dirava umui tuari henia noho? ⁵ Buka Helaga lalonai ia torea, ia gwau: “Inai lauma, Dirava ese iseda lalona dekenai ia atoa laumana, be Dirava ia ura dikadika ia sibona ese do ia abia, iena.” Inai Buka Helaga ena hereva be anina lasi, a?

⁶ To Dirava ese iena hariharibada ia henia badabada noho. Unai dainai Buka Helaga ma ia hereva, ia gwau: “Dirava ese hekokoroku taudia edia dala ia koua, to manau taudia dekenai iena hariharibada ia henia.”

⁷ Unai dainai Dirava ena ura do umui karaia. Satani do umui tuari henia, vadaeni umui dekena amo do ia heau boio. ⁸ Dirava dekenai do umui raka kahirakahira lao, vadaeni ia ese umui dekenai do ia raka

kahirakahira mai. Kara dika taudia e, emui imana do umui huria. Keristani koikoi taudia e, laloe rua dekena amo umui emui kudouna do umui hagevaia. ⁹ Do umui lalohisihisi, bona umui taitai bada be namo. Emui kiri do umui hadokoa, do umui tai sibona. Emui moale do umui koua, do umui laloe metau sibona. ¹⁰ Lohiabada ena vairanai do umui manau, vadaeni ia ese umui do ia abia isi.

Emui Keristani varavara tauna do umui gwauraia kerere lasi

¹¹ Lauegu varavara taudia e, umui ta ta do umui gwauraia kerere lasi. Tau ta ese bema iena Keristani varavara tauna ia gwauraia kerere, o ia gwauraia dika neganai, ia be maoro lasi. Badina unai kara dekena amo ia ese Taravatu ia gwauraia kerere, bona Taravatu ia gwauraia dika. Bema Taravatu oi gwauraia dika neganai, oi be Taravatu badinaia tauna lasi, to oi be Taravatu ena kota biaguna. ¹² Taravatu atoa Tauna, bona kota biaguna be tamona sibona, Dirava be unai. Ia be mai ena siahu, taunimanima do ia hamauria, bona taunimanima do ia hamasea. Vadaeni, oi be daika, oi dekenai ia noho tauna do oi gwauraia kerere?

Do ita hekokoroku lasi

¹³ Umui haida inai bamona umui hereva, umui gwau, “Hari dina o kerukeru dina unai hanua badana do ita lao, unuseni lagani ta do ita noho, do ita hoihoi, moni momo do ita abia.” ¹⁴ Umui dekenai inai bamona lau hereva: Umui diba lasi kerukeru dina dahaka do ia vara. Badina be emui mauri be dahaka? Umui be kwalahu maragina bamona, nega sisina ia hedinarai, vadaeni ia boio momokani. ¹⁵ To namona be inai bamona do umui hereva: “Bema Dirava ia ura, ita be ita mauri noho, vadaeni unai kara o inai kara do ita karaia.” ¹⁶ To umui heagi noho bona umui hekokoroku noho, bona unai bamona hekokoroku ibounai be dika.

¹⁷ Unai dainai, inai do umui laloe namonamo: Bema kara namona karaia ena dala oi diba, to oi karaia lasi, unai be oi kara dika.

5

Sisiba kohu momo taudia dekenai

¹ Kohu momo taudia e, lauegu hereva do umui kamoni henia. Do umui taitai, mai boiboio danu do umui tai, metau bona hisihisi umui dekenai do idia ginidae dainai. ² Emui kohu be dika bona bodaga vadaeni, bona emui dabua be pitopito ese idia ania ore. ³ Emui golo bona emui siliva idia raraka vadaeni, bona edia raraka ese emui dika do ia hedinarai. Inai raraka ese danu emui tauanina do ia ania, lahi bamona. Unai kohu momo umui haboua vadaeni, inai dokona dinadia lalonai. ⁴ Umui kamoni, emui uma lalonai idia gaukara taudia edia davana umui henidia lasi. Unai dainai mai boiboio danu idia maumau noho. Emui uma ena anina idia utua taudia edia taitai be Dirava, Siahu Ibounai Lohiabada ia kamoni vadaeni. ⁵ Tanobada dekenai umui noho neganai, umui ura henia karadia bona gaudia umui moalelaia, mai lebulebu danu. Bona aniani bada umui ania dainai, emui tauanina idia bada herea, boroma idia ubua digara bamona, vadaeni umui noho hegaegae ala-ala dinana totona. ⁶ Umui ese kara maoromaoro taudia umui gwauraia kerere, bona umui aladia mase. Bona idia ese unai emui dika idia koua lasi.

Mai haheauka danu Lohiabada do umui naria noho

⁷ Unai dainai, lauegu varavara taudia e, do umui haheauka noho ela bona Lohiabada do ia giroa mai. Umui laloe: Biru tauna ese iena uma

anina ia naria, mai ena haheauka danu. Oibe, ia naria ela bona medu giniginana bona medu dokona danu idia diho vadaeni. ⁸ Umui danu do umui haheauka. Bona mai abidadama ena laloa goada danu, Lohiabada do umui naria noho, badina iena mai be kahirakahira.

⁹ Lauegu varavara e, umui ta ta dekenai do umui maumau lasi, Dirava ese umui do ia kota henia garina. Kota Biaguna ia gini hegaegae noho iduara dekenai, iena mai be kahirakahira. ¹⁰ Lauegu varavara taudia e, peroveta taudia do umui laloa. Lohiabada ena ladana dekenai idia hereva neganai, hisihisi lalonai idia haheauka bona idia goada. Edia kara bamona do umui karaia be namo. ¹¹ Ita diba inai haheauka taudia ese moale idia davararia vadaeni, ani? Iobu ena haheauka sivaraina umui kamona vadaeni, bona Lohiabada ese dokona neganai Iobu ia durua bada, ani? Badina be Lohiabada be mai ena bogahisihisi, bona iena hariharibada be bada herea.

Do ita hereva metau lasi

¹² Lauegu varavara taudia e, gau bada herea be inai: Hereva metau o hereva helaga dekena amo do umui gwauhamata lasi. Guba, o tanobada, o idau gauna ta ena ladana dekenai do umui gwauhamata lasi. To bema “oibe” oi hereva gwauraia neganai, “oibe” sibona do oi gwau. Bona bema “lasi” oi hereva gwauraia neganai, “lasi” sibona do oi gwau. Hereva haida ma do umui gwauraia lasi, Dirava ena panisi do umui davararia garina.

Kara maoromaoro tauna ena guriguri be mai ena siahu

¹³ Umui emui huanai be tau ta ia hisihisi noho, a? Do ia guriguri be namo. Tau ta ia moale, a? Dirava hanamoa ane do ia abia be namo. ¹⁴ Umui ta ia gorere, a? Ia ese ekalesia gunalaia taudia do ia boiria be namo. Idia ese ia dainai do idia guriguri, bona ia dekenai dehero do idia atoa, Lohiabada ena ladana dekenai. ¹⁵ Inai guriguri mai abidadama danu ese gorere tauna do ia hanamoa. Lohiabada ese iena mauri do ia hanamoa, bona iena kara dika do ia gwauatao. ¹⁶ Unai dainai umui ta ta dekenai emui kara dikadia do umui gwauraia hedinarai, bona umui ta ta totona do umui guriguri. Vadaeni unai neganai, Dirava ese emui mauri do ia hanamoa. Kara maoromaoro tauna ena guriguri be mai ena siahu. Inai bamona guriguri ese taunimanima ia durua diba. ¹⁷ Elia be taunimanima sibona, ita bamona. To ia ese Dirava dekenai ia guriguri goadagoada, medu do ia diho lasi. Vadaeni lagani toi bona hua 6 lalonai medu ia diho lasi. ¹⁸ Ma Elia ia guriguri lou, vadaeni medu be guba dekena amo ia diho, bona tano ese iena anina ia havaraia.

Dala dekena amo tau ta ia raka siri neganai, do ita hakaua lou

¹⁹ Lauegu varavara taudia e, bema umui ta be hereva momokani ena dala dekena amo ia raka siri, bona bema ta ese ia hakaua lou, inai be namo bada. ²⁰ Inai do umui laloa namonamo: Bema tau ta ese kara dika tauna ia durua, vadaeni unai dika tauna ese iena dala dikana ia rakatania, unai durua tauna ese unai tau ena lauma be mase dekena amo do ia hamauria. Bona unai durua tauna ena kara dika momo danu, be Dirava ese do ia gwauatao.

PETERO ENA REVAREVA GINIGUNANA

¹ Lau Petero inai. Lau be Iesu Keriso ena aposetolo tauna. Inai revareva umui Dirava ena taudia dekenai lau torea. Emui gabu korikori umui rakatania, bona hari umui noho gabudia be Ponto, Galatia, Kapadokia, Asia bona Bitunia. ²Tamana Dirava ese idaunegai umui ia abia hidi, iena Lauma Helaga ese umui ia hahelagaia vadaeni, Iesu Keriso ena rarana ese umui do ia huria totona. Vadaeni Iesu Keriso do umui kamonai henia, bona do umui goevagoeva momokani.

Hariharibada bona maino umui ese do umui abia badabada be namo.

Mauri namona momokani guba dekenai do ita abia

³ Dirava, iseda Lohiabada Iesu Keriso ena Tamana do ita hanamoa bada. Iena bogahisihisi ia bada herea. Ia ese Iesu Keriso mase dekena amo ia hatorea isi lou. Bona unai dainai ita be matamata vadaeni, ita vara lou. Vadaeni mauri korikori ena ura namona laloa ese iseda lalona ia hahonua. ⁴ Dirava ese ita ia abia hidi, guba dekenai mauri do ita abia. Inai mauri ia noho hanaihanai, ia be goevagoeva, ia bodaga diba lasi. Inai mauri be guba dekenai umui totona ia noho hegaegae. ⁵ Umui ese Dirava umui abidadama henia dainai, iena siahue ese umui do ia naria noho ela bona hamauria dinana ia ginidae. Inai hamauria ia noho hegaegae, bona nega dokona dekenai do ia hedinarai momokani.

⁶ Inai mauri do umui abia dainai umui moale bada noho, to inai nega sisina lalona be sedira dibagani idauidaue ese umui do idia hisihisi henia. ⁷ Inai dibagani edia badina be inai: Dirava ese emui abidadama ena goada do ia tohoa. Umui diba, golo be ia dika lao diba, to lahi lalona idia atoa, be iena goada tohoa bona hanamoa totona. Abidadama be golo hegeregere lasi. Lasi, ia ese golo ia hereaia. Vadaeni emui abidadama ena goada idia tohoa gaudia, hegeregere hisihisi o dibagani, be namo. Badina idia ese iseda abidadama idia hanamoa bona hagoadaia noho. Bona Iesu Keriso ia hedinarai dinana dekenai mataurai bona hairai bona hanamoa do umui davaria. ⁸ Umui ese Iesu umui itaia lasi, to umui lalokau henia. Umui ese umui itaia noho lasi, to umui abidadama henia noho. Unai dainai do umui moale bada, bona emui moale ese tanobada ena moale do ia hanaia momokani. Inai emui moale be ia bada herea dainai, emui uduna dekenai do umui herevalaia diba lasi. ⁹ Inai moale ena badina korikori be inai: Emui lauma ese hamauria idia davaria. Bona inai hamauria ena badina korikori be emui abidadama.

¹⁰ Peroveta taudia ese Dirava ena hariharibada, umui dekenai do ia ginidae gauna idia herevalaia. Idia ese inai hamauria ena anina idia tahua goadagoada, bona ia totona idia henanadai momo.

¹¹ Keriso ena Lauma be unai peroveta taudia edia lalona dekenai ia noho. Lauma ese idia ia hadibaia, Keriso ese hisihisi do ia abia, gabeai hairai bada do ia abia. Bona idia ese inai henanadai idia nanadaia, idia gwau, “Keriso edena negai do ia mai?” Ma idia henanadai, idia gwau, “Keriso ena mai neganai dahaka do ia vara?” ¹² Dirava ese idia dekenai ia hedinarai, edia gaukara be idia edia namo totona idia karaia lasi. Lasi, to umui emui namo totona unai gaukara idia karaia. Oibe, idia edia hereva, be harihari Sivarai Namona ena haroro taudia ese umui dekenai idia haroro henia vadaeni. Lauma Helaga guba dekena amo Dirava ese ia siaia diho dainai, unai Sivarai Namona idia harorolaia noho. Inai kara

bona Sivarai Namona, be aneru danu idia ura dikadika do idia itaia bona diba.

Dirava ese umui ia boiria, do umui noho helaga

¹³ Unai dainai do umui laloe namonamo, bona do umui naria namonamo. Do umui noho hegaegae, bona Iesu Keriso do ia hedinarai neganai do umui abia hanamoa, be do umui naria noho. ¹⁴ Dirava do umui kamoni henia. Guna, umui be do diari umui diba lasi neganai, emui tauanina ena ura dikadia ese umui idia biagua. Unai bamona do umui karaia lou lasi. ¹⁵ To emui kara ibounai lalonai do umui helaga, umui ia boiria Diravana ese ia helaga hegeregere. ¹⁶ Badina be Buka Helaga lalonai Dirava sibona ia gwau, "Do umui helaga, badina lau be lau helaga noho."

Mai davana bada Dirava ese ita ia hamauria

¹⁷ Dirava dekenai umui guriguri henia neganai, ia be emui Tamana umui gwauraia, ani? Ia ese taunimanima edia toana ia laloe lasi, ibounai be hegeregere ia vairanai. Ia ese ita ta ta iseda kara do ia tahua. Unai dainai namona be inai tanobada dekenai umui noho neganai, Dirava ena vairanai mai gari danu do umui noho. ¹⁸ Bona namona be umui diba namonamo, guna umui ese emui sene taudia edia anina lasi karadia umui karaia. To Dirava ese inai karadia dekena amo umui ia hamauria. Umui ia hamauria ena davana be do idia dika ore gaudia, hegeregere siliva o golo, a? Lasi momokani. ¹⁹ Umui ia hamauria gauna be Keriso ena rarana. Inai rara be davana bada herea gauna. Keriso be mamoe natuna goevagoeva momokani hegeregere, ia be maka dikana ta lasi, bona toto ta lasi. ²⁰ Dirava ese tanobada ia do karaia lasi neganai, ia ese Keriso ia abia hidi, inai hamauria gaukara totona. Bona inai nega dokona lalonai, ia be umui durua totona, Dirava ese Keriso ia hedinarai. ²¹ Keriso dainai umui ese Dirava umui abidadama henia. Dirava sibona ese Keriso mase dekena amo ia hatorea isi, bona hairai bada ia henia. Unai dainai Dirava do umui abidadama henia noho, bona mai emui laloe daradara lasi, Dirava ena hanamoa do umui naria noho.

Emui Keristani varavara taudia do umui lalokau henidia

²² Umui ese hereva momokani umui badinaia dainai, umui ese sibona emui laumadia umui hagoevaia vadaeni, bona emui Keristani varavara umui lalokau henidia noho. Umui ta ta do umui lalokau henia, mai emui lalona ibounai. ²³ Umui be matamata vadaeni, umui vara lou vadaeni. Bona umui be mase diba tauna ena natuna lasi, lasi momokani. Umui emui Tamana be ia mase diba lasi. Inai emui mauri matamata, be Dirava ena hereva ese ia havaraia. Inai hereva be ia mauri noho, bona ia noho hanaihanai. ²⁴ Buka Helaga ena hereva ia gwau:

"Taunimanima ibounai be rei bamona.

Idia edia hairai be rei ena huahua bamona.

Rei do ia kaukau,

vadaeni iena huahua do ia moru diho.

²⁵ To Dirava ena hereva do ia noho ela bona hanaihanai."

Dirava ena hereva be inai Sivarai Namona, umui dekenai idia harorolaia vadaeni gauna.

2

Lohiabada be Nadi namo herea, mauri gauna

¹ Unai dainai, laloe badu ibounai, bona koikoi idaidau ibounai, dika ibounai, mama ibounai, bona taunimanima hereva dika henia kara

ibounai do umui atoa siri. ² Beibi matamata ese rata ia ura dikadika bamona, umui ese lauma ena rata goevagoeva do umui ura henia. Badina be unai rata umui inua neganai, emui lauma do idia tubu daekau, bona Dirava ena hamauria do umui davaria. ³ Buka Helaga ia hereva bamona, ia gwau, “Umui sibona ese Lohiabada ena bogahisihisi ena mamina umui abia vadaeni.”

⁴ Lohiabada dekenai do umui mai. Ia be Nadi mai mauri danu, taunimanima idia ura lasi, to Dirava ena vairanai ia be mai davana bada herea. ⁵ Umui danu be mauri nadidia bamona, bona Dirava ia ura umui do ia gaukaralaia, vadaeni Lauma Helaga ena ruma do umui lao. Vadaeni Dirava ena hesiai gaukara do umui karaia, hahelagaia taudia edia gaukara do umui karaia. Umui ese boubou gaudia bona harihari gaudia helagadia, Dirava do ia abia dae gaudia, ia dekenai do umui henia, Iesu Keriso ena ladana dainai. ⁶ Badina be Buka Helaga lalonai Dirava ena hereva ia torea, ia gwau:

“Kamonai, ruma ena kona, ena Nadi namo herea,
be lau abia hidi vadaeni,
Siona dekenai lau atoa vadaeni.
Ia dekenai do ia abidadama henia tauna,
be do ia hemarai lasi.”

⁷ Umui abidadama taudia dekenai, inai Nadi be namo bada herea. To abidadama henia lasi taudia dekenai, Buka Helaga ena hereva inai bamona ia torea vadaeni:

“Ruma haginia taudia ese idia negea Nadina be,
kona ena Nadi namo herea ia halaoa vadaeni.”

⁸ Ma ia gwau:

“Inai Nadi be taunimanima dekenai do ia bamepa,
bona do idia hekwakwanai.
Inai Nadi badana ese taunimanima do ia hamorudia.”

Idia ese Dirava ena hereva idia kamoni henia lasi dainai, idia hekwakwanai, bona idia moru. Gunaguna Dirava ia hereva unai bamona do idia karaia.

Umui be Dirava ena orea taudia

⁹ To Dirava ese umui ia abia hidi vadaeni, umui be iena bese, umui be King ena hahelagaia taudia, bese helagana, bona Dirava ena orea korikori taudia. Dirava ese umui ia abia hidi, iena hoa kara badadia do umui gwauraia hedinarai. Badina be ia ese dibura dekena amo umui ia boiria, vadaeni iena diari namo bada herea lalonai do umui noho.

¹⁰ Gunaguna umui be bese lasi taudia, to harihari umui be Dirava ena bese. Gunaguna be ta ese umui ia bogahisihisi henia lasi, to harihari Dirava ena bogahisihisi umui davaria vadaeni.

Ita be Dirava ena hesiai taudia, mai guia danu

¹¹ Lauegu lalokau taudia e, umui be inai tanobada dekenai umui noho, idau taudia bona hanua lasi taudia bamona. Unai dainai, umui lau noia, tauanina ena ura dikadia do umui karaia lasi. Inai ura dikadia ese emui lauma idia tuari henia noho. ¹² To Dirava idia diba lasi taudia edia vairanai, kara namodia do umui karaia. Momokani, hari idia ese umui idia gwauraia kerere noho. To bema emui kara namodia idia itaia neganai, idia ese Dirava do idia hanamo, Keriso do ia giroa mai dinana dekenai.

¹³ Taunimanima edia taravatu ibounai do umui badinaia, Lohiabada dainai. King do umui kamoni henia, badina ia be sياهو bada herea tauna. ¹⁴ Gavana taudia danu edia hereva do umui badinaia. Badina

be king ese idia ia abia hidi, kara dika taudia do idia panisia, to kara namo taudia do idia hanamoa totona. ¹⁵ Badina be Dirava ia ura be, emui kara namo dekenai amo, kavakava taudia edia hereva kava do umui koua. ¹⁶ Umui be ura kwalimu taudia, to inai ura kwalimu do umui gaukaralaia kerere lasi. Unai ura kwalimu lalonai umui noho neganai, hunia dekenai kara dika do umui karaia lasi, to Dirava ena hesiai taudia mai guia danu do umui noho. ¹⁷ Taunimanima ibounai do umui matauraia. Keristani taudia ibounai do umui lalokau henia. Dirava do umui gari henia. King do umui matauraia.

Keriso ena haheauka bamona, umui danu hisihisi lalonai do umui haheauka

¹⁸ Hesiai taudia e, emui biaguna do umui kamoni henia, bona do umui matauraia. Biaguna namodia, bona mai edia gado namo taudia sibona lasi, to biaguna dagedagedia danu do umui matauraia. ¹⁹ Badina bema kerere lasi tauna ta ese Dirava ia badinaia dainai hisihisi ia abia, Dirava ese unai tau do ia hanamoa. ²⁰ Bema umui kara dika, vadaeni umui idia dadabaia neganai umui haheauka, emui namo be dahaka? To bema umui kara namo, vadaeni hisihisi umui abia neganai, Dirava ena vairanai umui be namo. ²¹ Dirava ese umui ia boiria, unai bamona do umui hisihisi totona. Badina be Keriso ese umui dainai hisihisi ia abia. Vadaeni iena kara toana umui dekenai ia hedinarai, iena murinai do umui raka totona. Iena aena gabudia dekenai do umui raka. ²² Ia ese kara dika ta ia karaia lasi. Bona iena uduna dekenai amo hereva koikoi ta ia gwaurai lasi. ²³ Idia hereva dika henia, to ia hereva dika henia lou lasi. Hisihisi ia abia neganai, ia dagedage lasi. To mai abidadama danu, sibona ena mauri be Dirava ena imana dekenai ia henia. Badina Keriso ia diba Dirava be Kota Biaguna maoromaorona. ²⁴ Keriso ese sibona ena tauanina dekenai, iseda kara dika ia huaia, satauro ena latanai. Unai bamona ia karaia, kara dika dekenai do ita mase totona, bona kara maoromaoro dekenai do ita mauri totona. Keriso ena bero ese ita idia hamauria vadaeni. ²⁵ Badina be gunaguna umui be mamoe idia boio bamona, emui dala umui diba lasi. To harihari, emui lauma ia dogoatao Tauna, inai Mamoe Naria Tauna dekenai, umui giroa lou vadaeni.

3

Headava tau bona hahine dekenai sisiba hereva

¹ Hahine taudia e, emui adavana do umui kamoni henia. Badina be idia haida ese Dirava ena hereva idia badinaia lasi, to bema kara namodia umui karaia, bona umui emui hereva be momo lasi neganai, sedira do idia laloa namonamo. Vadaeni sedira edia lalona do idia giroa, bona Dirava do idia abidadama henia. ² Unai bamona do idia karaia, badina be emui kara goevagoeva, bona emui mataurai kara do idia itaia dainai. ³ Umui ese kopina dekenai herahera gaudia, hegeregere kavabukavabu do umui atoa lasi. Emui huina danu sitaelo sitaelo bamona do umui karaia lasi. Bona dabua, edia toana namo herea momokani do umui atoa lasi. Inai gaudia be emui kopina edia murimuri kahanai sibona. ⁴ To namona be emui hairai korikori be emui lalona dekenai ia noho. Herahera namodia, do idia dika diba lasi gaudia, hegeregere laloa manau, bona dagedage lasi, emui lalona dekenai do umui atoa. Idia edia hairai do ia noho hanaihanai, bona idia be namo bada herea Dirava ena vairanai. ⁵ Gunaguna, sene hahine helagadia, Dirava idia abidadama henia hahine, ese unai bamona hairai idia atoa. Vadaeni, unai dainai idia ese edia adavana idia kamoni henia. ⁶ Sara be

unai bamona ia karaia. Ia ese Aberahamo ena hereva ia kamoni henia, bona “lohia” ia gwauraia. Bema umui ese kara namo umui karaia, bona gau ta dekenai umui gari henia lasi neganai, umui be Sara ena natuna.

⁷ Tatau e, umui danu, emui adavana danu umui noho hebou ena dala do umui laloa namonamo. Hahine ena tauanina be goada herea lasi, unai dainai do umui naria namonamo, bona matauraia. Umui laloaboio lasi, umui, mai emui adavana danu, ese Dirava ena hariharibada umui abia hebou dainai, mauri hanaihanai umui davaria. Unai bamona do umui karaia neganai, emui guriguri haere dalana be gau ta ese do ia koua lasi.

Do umui laloa tamona

⁸ Egu hereva ena anina be inai: Umui ibounai mai lalona tamona danu do umui noho, umui ta ta dekenai durua do umui henia. Umui ta ta dekenai do umui lalokau henia, tadikaka bamona. Umui ta ta dekenai do umui bogahisihisi henia, do umui manau. ⁹ Tau ta bema umui dekenai ia kara dika neganai, davana do umui henia lasi. Bema umui dekenai idia hereva dika neganai, umui ese hereva dika do umui henia lou lasi. Lasi, to hanamoa hereva do umui henia lou, bona umui ese Dirava do umui noia, ia ese idia do ia hanamoa. Dirava ese umui ia boiria, inai bamona do umui karaia, iena hanamoa do umui abia totona. ¹⁰ Inai be Buka Helaga ena hereva bamona, ia gwau:

“Bema tau ta ese mauri ia ura henia,
bona nega namodia ia ura itaia neganai,
ia ese iena uduna do ia naria,
hereva dika do ia gwauraia lasi.

Bona hereva koiko do ia gwauraia lasi,

¹¹ dika do ia rakatania,

bona kara namo do ia karaia.

Maino do ia tahua,

bona maino ena dala do ia badinaia noho.

¹² Badina be Lohiabada ese,

kara maoromaoro taudia ia naridia noho,

bona edia guriguri ia kamoni henia noho.

To Lohiabada ese,

kara dika taudia edia dala ia koua noho.”

Kara namodia umui karaia dainai, hisihisi do umui abia diba

¹³ Bema kara namodia umui karaia noho mai goada danu, daika ese umui do ia hadikaia diba? Ta lasi, ani? ¹⁴ To, bema kara maoromaoro umui karaia, bona unai dainai hisihisi umui abia neganai, vadaeni do umui moale, badina Dirava ena hanamoa do umui abia. Tau ta do umui gari henia lasi, bona do umui laloa hekwarahi lasi. ¹⁵ To emui kudouna dekenai Keriso do umui abia dae, do umui matauraia, bona ia tamona emui Lohiabada do umui halaoa. Bema haida ese emui abidadama bona lalona namo totona umui idia nanadaia neganai, nega ibounai do umui naria hegaegae noho, idia do umui haere henia totona. To mai mataurai bona manau danu do umui haere. ¹⁶ Mai emui laloa maoromaoro do umui noho. Vadaeni umui dekenai idia hereva dika henia, Keriso umui badinaia dainai, unai taudia ese do idia hemarai. Edia hemarai ena badina be, emui kara namodia idia itaia dainai. ¹⁷ Bema Dirava ia ura hisihisi do umui abia, vadaeni kara namodia dainai do umui hisihisi, unai be namo do umui davaria. To bema kara dika dainai do umui hisihisi, unai neganai namo ta do umui davaria lasi.

Keriso ia mase iseda dika kokia totona

¹⁸ Badina be Keriso nega tamona ia mase, kara dika kokia totona. Ia be kara maoromaoro momokani. To ita kara gagevagageva taudia dainai ia ese ia hisihisi bada, Dirava dekenai ita do ia hakaua totona. Iena tauanina idia alaia, to Lauma dekena amo ia toreisi lou, bona ia mauri noho. ¹⁹ Bona iena Lauma dekena amo Keriso ese, dibura ruma lalonai idia noho laumadia dekenai ia lao, ia haroro henidia. ²⁰ Idia be gunaguna, Noa ena nega lalonai, Dirava ena hereva idia negea. To Dirava ese davana ia henidia haraga lasi. Lasi, to mai haheauka danu idia ia naria noho, Noa ese lagatoi ia karaia neganai. Lagatoi lalonai idia noho taudia, ibounai 8 sibona be ranu dekena amo idia mauri. ²¹ Unai ranu be bapatiso ena toana bamona, bona bapatiso ese harihari umui ia hamauria noho. Iseda tauanina ena miro be bapatiso ese ia huria lasi. Lasi, to bapatiso ena anina be, Dirava dekenai gwauhamata ita henia, mai laloa maoromaoro danu, do ita noho goeva. Dirava ese umui dekenai mauri ia henia, Iesu Keriso ese mase dekena amo ia toreisi lou dainai. ²² Bona Keriso ese guba dekenai ia vareai vadaeni, Dirava ena idiba kahanai ia helai noho. Aneru bona lohia bona siahu taudia ibounai be Keriso henunai idia noho.

4

Tauanina ena ura dikadia do umui rakatania, bona Dirava ena ura do umui karaia

¹ Keriso ese iena tauanina dekenai hisihisi ia abia dainai, umui ese iena laloa hegeregereana do umui laloa be namo. Inai bamona umui laloa neganai, goada do umui davaria. Badina be iena tauanina ia hisihisi noho tauna ese kara dika ia rakatania vadaeni. ² Unai dainai harihari ia lao bona emui mauri dokona, inai tanobada dekenai do umui noho namonamo. Emui tauanina ena ura dikadia do umui karaia lasi, to Dirava ena ura sibona do umui badinaia. ³ Badina be gunaguna umui be Dirava diba lasi taudia hegeregereana umui noho. Emui kara gunadia be inai: Matabodaga, sihari kava, kekero, lebulebu, uaina umui inua momo, bona kaivakuku dikadia umui tomadiho henia. ⁴ Harihari inai Dirava diba lasi taudia be idia hoa, badina umui ese unai bamona lebulebu karadia umui karaia lou lasi. Oibe, idia edia kara dekena amo umui raka siri vadaeni, unai dainai unai Dirava diba lasi taudia ese umui idia hereva dika henia noho. ⁵ To idia be mauri taudia bona mase taudia do ia kota henia Diravana ena vairanai dohore idia gini. Idia ese edia kara dika dainai, Dirava dekenai do idia haere henia. ⁶ Unai dainai idia mase vadaeni taudia ese idia do mase lasi neganai Sivarai Namona idia kamoni. Momokani edia tauanina idia mase, kara dika idia karaia taudia ibounai idia mase bamona. To hari idia ese mauri idia davaria diba, bona idia be lauma, Dirava bamona.

Dirava ena lalokau do umui hedinarai

⁷ Gau ibounai edia dokona ena nega be kahirakahira. Unai dainai do umui noho namonamo, mai laloa maoromaoro danu, bona do umui guriguri noho, nega ibounai. ⁸ To gau badana momokani be inai: Umui ta ta dekenai do umui lalokau henia, mai emui lalona ibounai. Badina be lalokau tauna be Dirava ese iena kara dika momo do ia gwauatao. ⁹ Umui ta ta ese emui ruma dekenai emui Keristani varavara taudia do umui abia dae, do umui maumau lasi. ¹⁰ Iena hariharibada dekena amo, Dirava ese umui ta ta ibounai dekenai harihari gaudia idavidau ia henia vadaeni. Unai dainai, umui ese inai harihari gaudia do umui

gaukaralaia, emui Keristani varavara taudia do umui durua totona. Unai dekena amo umui be Dirava ena hesiai taudia namodia, bona iena hariharibada idauidau umui hedinaraia noho. ¹¹ Bema tau ta ena diba be haroro, Dirava ena sivarai do ia gwaurai. Bema tau ta ena diba be taunimanima durua, vadaeni inai diba, Dirava ese ia henia gauna do ia gaukaralaia mai ena goada ibounai, taunimanima durua totona. Unai dala dekenai, emui kara ibounai dainai, taunimanima ese Dirava do idia hanamoa henia, Iesu Keriso dainai. Hairai bona siahua be iena, ela bona hanaihanai. Amen.

Keristani taudia do idia hisihisi

¹² Lauegu lalokau taudia e, inai hisihisi bada, umui ia hisihisi henia noho gauna, be umui tohoa totona ia vara noho. Unai dainai do umui hoia lasi, do umui lalokau lasi idau gauna ta be umui dekenai ia ginida vadaeni. ¹³ Lasi, to Keriso danu umui hisihisi hebou dainai do umui moale. Badina be gabeai, Keriso ena hairai ia hedinaraia neganai, do umui moale bada herea. ¹⁴ Umui be Keriso ena taudia dainai, do umui moale bema haida ese umui idia hereva dika henia. Badina inai anina be, Dirava ena Lauma, hairai Laumana, be umui dekenai ia noho vadaeni. ¹⁵ To ia namo lasi bema umui ta ia hisihisi, sibona ena kerere dainai. Tau ta sedira ia ala-ala, o ia henaoga, o ia kara dika, o haida edia kara ia herevalaia kerere, bona unai kara dainai ia hisihisi. Unai bamona hisihisi be mai ena hanamoa ta lasi. ¹⁶ To tau ta, bema ia be Keristani tauna dainai ia hisihisi, unai tau be do ia hemarai lasi. Lasi momokani, to ia ese Dirava do ia tanikiu henia, Keriso ena ladana ia abia dainai.

¹⁷ Dirava ena Kota Badana ena nega be ia ginida vadaeni, bona Dirava ese iena orea taudia do ia kota henidia guna. To bema ita do ia kota henia guna, Dirava ena Sivarai Namona idia abidadama henia lasi taudia edia dokona be edena bamona? ¹⁸ Bona Buka Helaga ena hereva ia gwau:

“Kara maoromaoro taudia ese mauri idia abia dalana be auka.

Unai dainai Dirava diba lasi kara dika taudia,

edena bamona do idia mauri diba?”

¹⁹ Unai dainai, Dirava ena ura dainai hisihisi idia abia taudia ese kara namodia sibona do idia karaia be namo. Ma danu, edia lauma be Dirava ena imana dekenai do idia atoa. Badina be ia ese ita ia karaia, bona ita abidadama henia diba, iena gwauhamata do ia badinaia momokani.

5

Gunalai taudia ese Dirava ena orea do idia naria namonamo, be gau badana

¹ Harihari lau ura umui ekalesia gunalaia taudia dekenai lau hereva henia. Lau danu be ekalesia gunalaia tauna ta. Lauegu matana dekena amo, Keriso ena hisihisi lau itaia, bona iena hairai do ia hedinaraia neganai, lau danu be mai lauegu davana namona. Umui lau noia,

² Dirava ese umui ia henia mamoe orea do umui naridia namonamo. Do umui gunalaia, Dirava ena ura hegeregere. Do umui maumau lasi, to mai emui ura namona inai daga do umui karaia. Ta ese umui ia oda dainai do umui karaia lasi, to sibona emui ura dainai. Kohu do umui davaria totona do umui karaia lasi. ³ Lohia mai hekokoroku danu bamona emui orea do umui gunalaia lasi, to emui kara namodia do umui hedinaraia, vadaeni emui kara bamona do idia karaia. ⁴ Vadaeni, Mamoe Naria Tauna Badana do ia hedinarai neganai, hairai ena kwara gauna, do ia dika diba lasi gauna, do umui abia.

Do umui manau, bona do umui laloa maoromaoro

⁵ Eregabe taudia e, umui ese gunalaia taudia do umui kamonaia henia. Umui ibounai do umui laloa manau, vadaeni umui ta ta dekenai durua do umui henia. Badina be Buka Helaga ia gwau: “Dirava ese hekokoroku taudia edia dala ia koua, to manau taudia dekenai iena hariharibada ia henia.” ⁶ Unai dainai Dirava ena imana goadana henunai do umui manau, vadaeni iena nega namona lalonai ia ese umui do ia abia isi. ⁷ Ia ese umui ia naria noho. Unai dainai emui laloa hekwarahi gaudia ibounai be iena imana dekenai do umui atoa.

⁸ Do umui laloa maoromaoro, bona naria namonamo. Umui dekenai ia tuari henia tauna, Satani, be laiona mai ena boiboia bada bamona. Ia ese hunia dekenai ia raka loaloa noho, do ia ania ore taudia ia tahua noho. ⁹ Emui abidadama dekenai do umui gini goada, vadaeni umui ese Satani do umui koua. Namo umui diba, emui Keristani varavara taudia tanobada kahana ibounai dekenai, be hisihisi inai bamona idia abia noho. ¹⁰ Umui be nega sisina do umui hisihisi, vadaeni gabeai, hariharibada ibounai Diravana ese umui do ia hanamoa lou momokani, umui do ia haginia goada, bona emui abidadama do ia hagoadaia. Oibe, inai Dirava ese umui ia boiria vadaeni, iena noho hanaihanai hairaina Keriso Iesu danu do umui abia hebou totona. ¹¹ Ia dekenai siahu ibounai do ia noho ela bona hanaihanai. Amen.

Hanamoa hereva dokona

¹² Inai revareva kwadogina be Sila ena imana dekena amo umui dekenai lau torea inai. Lau diba Sila be iseda Keristani varavara tauna korikori. Lau ura inai leta dekena amo umui do lau hagoadaia, bona lau gwauraia hedinarai inai: Dirava ena hariharibada korikori ena dala be inai egu hereva lalonai. Inai hariharibada lalonai do umui gini goada.

¹³ Ekalesia orea Babulonia dekenai, inai taudia danu be Dirava ese ia abia hidi. Idia ese edia hanamoa hereva umui dekenai idia siaia inai. Lauegu natuna Mareko danu ese umui ia hanamoa noho. ¹⁴ Umui ta ta dekenai do umui hanamoa, umui ta ta dekenai ekalesia ena lalokau kisi do umui henia.

Keriso lalonai umui noho taudia ibounai, maino be umui dekenai do ia noho.

PETERO ENA REVAREVA IHARUANA

¹ Lau Simona Petero inai. Lau be Iesu Keriso ena hesiai tauna, bona iena aposetolo tauna. Umui momo ese aiemai abidadama hegeregerena umui davaria vadaeni. Inai bamona taudia ibounai dekenai inai revareva lau torea. Inai abidadama ita abia be namo herea momokani, bona iseda Dirava bona Hamauria Tauna Iesu Keriso ena kara maoro-maoro dainai ita davaria vadaeni.

² Hariharibada bona maino umui abia badabada be namo. Oibe, do umui abia, badina be Dirava, bona iseda Lohiabada Iesu umui diba namonamo dainai.

Dirava ese umui ia abia hidi, iena bese

³ Dirava ese iena siahu dekena amo iseda mauri hanamo gaudia ibounai, bona ia badinaia totona goada ibounai, be ita dekenai ia henia vadaeni. Ita durua totona, Dirava ese iena diba bada ita dekenai ia harihari henia. Vadaeni, iena hairai bona iena siahu ita diba momokani. Bona ita ia abia hidi Tauna danu ita diba momokani. ⁴ Inai dala dekenai, Dirava ese iena gwauhamata namodia momokani ita dekenai ia henia vadaeni. Ura dika karadia idau dau be tanobada taudia nega ibounai idia karaia noho. Iseda mase mai bodaga danu ena badina korikori be unai. To inai gwauhamata gaudia namodia, Dirava ese ita dekenai ia henia gaudia, ese ita idia durua diba. Oibe, inai gau namodia ita abia dainai, tanobada ena mase, bona iena kara bodaga dekena amo ita heau mauri diba. Bona Dirava ena mauri bona iena kara danu ita abia diba.

⁵ Unai dainai do umui abidadama sibona lasi, to kara namodia do umui karaia danu. Ma kara namodia sibona lasi, to diba danu do umui abia. ⁶ Ma diba sibona lasi, to umui ese emui tauanina edia ura do umui biagua namonamo. Ma tauanina biagua sibona lasi, to haheauka danu do umui abia. Ma haheauka sibona lasi, to Dirava badinaia kara danu do umui abia. ⁷ Ma Dirava badinaia kara sibona lasi, to emui tadikaka dekenai bogahisihisi henia kara danu do umui karaia. Ma bogahisihisi sibona lasi, to taunimanima do umui lalokau henia danu.

Inai kara namodia, inai mai anina bada karadia do umui karaia be namo

⁸ Inai bamona kara namodia, bema umui dekenai idia noho neganai, idia ese emui lauma do idia hagoadaia. Vadaeni inai goada umui abia dainai, bona Iesu Keriso iseda Lohiabada umui diba dainai, do umui noho kava lasi, to emui kara be mai anina. ⁹ To inai kara namodia ia karaia lasi tauna be matakepulu tauna bamona. Momokani, ia laloaboio vadaeni, Dirava ese iena kara dika gunadia ia huria ore vadaeni.

¹⁰ Lauegu varavara taudia e, Dirava ese umui ia boiria, bona umui ia abia hidi vadaeni. Unai dainai do umui gaukara goada, inai boiboi, bona inai abia hidi do umui hamomokania totona. Badina unai bamona umui karaia neganai, emui abidadama dekena amo do umui moru lasi.

¹¹ Inai dala dekenai, Dirava ese gwaumaoro momokani umui dekenai do ia henia, iseda Lohiabada bona Hamauria Tauna, Iesu Keriso ena noho hanaihanai Basileia lalonai do umui vareai.

Lauegu sisiba do umui kamoni

¹² Momokani, inai gaudia umui diba vadaeni, bona Dirava ena hereva momokani lalonai umui gini goada noho. To lau laloa inai hereva umui dekenai do lau hamaoroa lou nega ibounai, do umui laloaboio garina.

¹³ Lau lalao inai bamona: Lau be do lau mauri noho neganai, inai gaudia umui dekenai do lau sisiba henia, umui hagoadaia totona. Inai be maoro. ¹⁴Badina be lau diba, inai tauanina do lau rakatania ena nega be kahirakahira vadaeni. Inai be momokani, badina iseda Lohiabada Iesu Keriso ese lau ia hamaoroa vadaeni. ¹⁵Unai dainai, mai goada danu umui do lau sisiba henia. Vadaeni lauegu mase murinai inai gaudia do umui lalao lou.

Keriso ena hairaina lau itaia

¹⁶Badina be iseda Lohiabada Iesu Keriso ena siahua, bona do ia mai sivaraina umui dekenai ai hamaoroa neganai, ai be gori kava ai gwauraiasi. Lasi momokani. Badina korikori be, aiemai matana dekena amo iena hairaina ai itaia. ¹⁷Oibe, Tamana Dirava ese Keriso ena ladana ia hanamoa bada, bona hairai ia henia neganai, ai danu be unuseni ai noho. Unai neganai, hairai bada gabuna dekena amo Dirava ia hereva, ia gwau, "Inai be lauegu Natuna, lauegu lalokau, lau ese ia lau ura henia bada." ¹⁸Inai gado guba dekena amo ia diho, be ai ese ai kamonaia. Inai kara ia vara, be Iesu danu ororo helagana dekenai ai noho neganai.

Peroveta taudia edia hereva be momokani

¹⁹Unai dainai ai daradara lasi momokani, to ai diba peroveta taudia edia hereva be momokani. Umui danu peroveta taudia edia hereva do umui badinaia be namo. Edia hereva be lamepa, dibura gabuna ia hadiaria bamona, ela bona daba ia rere, bona daba ena hisiu bada ese emui kudouna lalonai do ia toreisi. ²⁰To inai umui diba guna be namo: Tau ta ese sibona ena lalao dekena amo peroveta hereva Buka Helaga lalonai ena anina do ia gwauraiasi. ²¹Badina be peroveta hereva gunadia be tau ta ese sibona ena ura dekenai ia gwauraiasi. Lasi momokani. To Lauma Helaga ese helaga taudia ia hasiahua momokani dainai, idia ese Dirava ena hereva idia gwauraiasi.

2

Peroveta koikoi taudia, hadibaia koikoi taudia

¹Gunaguna peroveta koikoi taudia be Israela taudia edia huanai idia hedinarai. Unai bamona danu, hadibaia koikoi taudia be umui emui huanai do idia hedinarai. Hunia dekenai hereva koikoi do idia gwauraiasi, bona taunimanima momo edia abidadama do idia hadikaia. Edia Lohiabada, ia ese idia ia hamauria vadaeni, to idia ese do idia negea. Vadaeni karaharaga Dirava ese idia do ia hadikaia ore. ²Taunimanima momo ese unai koikoi taudia edia lebulebu dala dikadia do idia badinaia. Bona unai bamona idia karaia dainai, haida ese hereva momokani ena dala do idia gwauraiasi dika. ³Edia mataganigani dainai, inai hadibaia koikoi taudia ese, sivarai koikoi dekena amo umui emui lalona do idia ania, vadaeni emui moni momo do idia abia kava. To nega daudau Dirava be ia naria hegaegae vadaeni, idia do ia kota henia totona, vadaeni idia be do idia moru momokani. Oibe, Dirava ese idia do ia hadikaia ore. Dirava be ia mahuta lasi, ia noga noho.

⁴Gunaguna aneru haida ese kara dika idia karaia, to Dirava ia bogahisihisi henidia lasi. Ia ese hel ena dibura masemase gabuna dekenai idia ia negea diho. Unuseni idia ia guia. Bona unai gabu dekenai do idia noho, ela bona Kota Bada Dinana dekenai. ⁵Gunaguna, taunimanima momo ese Dirava idia kamonai henia lasi neganai, ia ese idia ia bogahisihisi henia lasi. To abata bada herea ia havaraia, vadaeni

ibounai idia mase. Noa, kara maoromaoro ia harorolaia tauna, bona taunimanima 7, idia sibona idia mauri. ⁶ Dirava ese Sodoma bona Gomora danu ia kota henia. Lahi dekena amo unai hanua ruaosi ia araia ore. Unai kara dekena amo, Dirava ese ia dekenai idia gari henia lasi taudia ia hagaridia. Badina be do idia diba, edia kerere davana be dohore unai lahi hegeregere. ⁷ Dirava ese unai kara maoromaoro tauna Lota ia hamauria. Lota be unai lebulebu taudia edia kara dainai iena lalona be ia metau. ⁸ Lota be kara maoromaoro tauna, to edia huanai ia noho dainai, dina ibounai edia dika ia itaia bona ia kamoni. Unai dainai iena lalona be ia hisihisi bada. ⁹ Bema hisihisi bona metau Dirava badinaia taudia dekenai idia noho neganai, Lohiabada ese inai hisihisi dekena amo idia ia hamauria diba. Dirava ese danu kara dika taudia ia gua diba, ela bona Kota Bada Dinana ia ginidae. ¹⁰ To taunimanima haida ese edia kerere davana dika herea do idia davaria. Idia ese edia tauanina ena ura dikadia, matabodaga karadia idia karaia noho, bona Dirava ena siahu idia laloe be anina lasi.

Inai hadibaia koikoi taudia be mai edia hekokoroku, bona idia sibona edia ura idia karaia noho. Unai dainai idia ese guba noho taudia idia hereva dika henia, idia gari henidia lasi momokani. ¹¹ Aneru edia siahu ese unai tau dikadia edia siahu ia hereaia. To aneru ese unai guba noho taudia idia samania lasi, o hereva dika henia lasi, Dirava ena vairana dekenai.

¹² Inai tau dikadia be uda boroma bamona, idia be mai edia lalona lasi. Idia ese tauanina ena ura sibona idia karaia. Unai bamona idia vara, bona unai bamona do idia mase. Idia diba lasi gaudia idia hereva dika henia. Uda boroma idia mase bamona, idia danu do idia mase ore. ¹³ Hisihisi idia henia dainai, edia davana be hisihisi do idia abia. Dina ena diari lalonai, lebulebu karadia be idia karaia noho, mai edia moale danu. Umui danu idia aniani neganai, hemarai bona laloe metau idia havaraia noho. To nega ibounai edia koikoi daladia idia moalelaia noho. ¹⁴ Idia edia matana ese nega ibounai hahine idia tahua noho. Kara dika be hanaihanai idia tahua noho, edia aniani bamona. Idia ese manoka taudia edia lalona idia ania, vadaeni kara dika ena dala dekenai idia hakaudia vareai. Idia edia kudouna be mataganigani dekenai idia manada momokani. Dirava ese inai taudia do ia hadikaia momokani!

¹⁵ Idia ese dala maoromaoro idia rakatania vadaeni, bona idia raka kerere, Balama, Beoro ena natuna bamona. Balama ese kerere ia karaia, moni do ia davaria totona, badina moni ia ura henia dikadika dainai. ¹⁶ Balama ena kara dika dainai, Dirava ese ia gwau henia. Badina be doniki, hereva diba lasi gauna ese Balama dekenai ia hereva henia, taunimanima edia gadona bamona. Unai dekena amo, doniki ese peroveta tauna Balama ena kara kava ia hadokoa.

¹⁷ Inai taudia be ranu guri, ranu ia noho lasi gauna bamona. Bona idia be ori, lai ese ia hodaia lao bamona. Dirava ese gabu ta ia karaia hegaegae idia edia, dibura masemase gabunai. ¹⁸ Mai hekokoroku danu idia hereva kava noho, bona taunimanima hakau kerere totona, tauanina ena ura dikadia, bona heudahanai kara idia herevalaia noho. Inai bamona idia karaia, be vanegai sibona dika dekena amo mauri idia davaria taudia do idia hakererea lou totona. ¹⁹ Inai tau dikadia be inai bamona idia hereva, idia gwau, "Umui emui ura karadia sibona do umui karaia, umui be ura kwalimu taudia." To unai dika taudia sibona be dika bona mase ena hesiai taudia, idia be ura kwalimu lasi taudia. Badina be bema kara dika ta ese tau ta ia gua neganai, unai tau be unai kara dika ena hesiai tauna.

²⁰ Momokani, taunimanima momo ese iseda Lohiabada bona Hamauria Tauna Iesu Keriso idia diba dainai, tanobada ena miro dekena amo idia roho mauri vadaeni. To unai taudia bema unai miro karadia dekenai ma idia giroa lou neganai, idia be edena bamona? Madi, edia dika gunana be maragi, to edia dika, gabeai gauna, be bada. ²¹ Momokani, unai taudia ese kara maoromaoro dalana ena diba idia davaria lasi guna be namo. Badina korikori be, unai dala idia davaria vadaeni, bona taravatu helagana idia diba, to idia ura lasi, bona idia negea vadaeni. ²² Inai kara idia karaia, ena anina be aonega hereva momokani rua bamona, idia gwau, “Sisia be iena mumuta dekenai ma ia giroa lao noho,” bona “Boroma be idia huria, to kopukopu dekenai ma ia giroa lou.”

3

Momokani, Lohiabada do ia giroa mai

¹ Lauegu lalokau taudia e, inai be lauegu revareva iharuana umui dekenai. Lauegu revareva ruaosi edia badina be inai: Umui emui lalodia do lau hagoadaia. Vadaeni mai emui laloe maoromaoro danu, lauegu hadibaia hereva ma do umui laloe lou. ² Peroveta helagadia gunaguna idia gwauria hereva, bona Lohiabada bona Hamauria Tauna ena taravatu, aposetolo taudia umui dekenai idia hadibaia hereva, be do umui laloatao. ³ Inai hereva do umui diba guna be namo: Nega dokona dekenai, tauanina ena ura sibona idia karaia taudia be do idia hedinarai. Dirava badinaia kara do idia kirikirilaia. ⁴ Vadaeni, umui dekenai do idia gwau, “Iesu ia gwauhamata, do ia giroa mai, a? Edeseni ia noho? Do ia mai lasi. Badina be iseda tubuna idia mase vadaeni, to tanobada ia karaia negana ia mai bona harihari gau ta be idau lasi.” ⁵ Idia ura lasi Dirava ena kara idia laloe o diba. Oibe, kara ta idia ura laloaboio, kara be inai: Dirava ese guba bona tanobada, sibona ena oda hereva dekena amo ia karaia. Tanobada be ranu dekena amo ia karaia, bona ranu ese ia hagegea. ⁶ To Dirava ese unai tanobada gunana be ranu dekena amo ia hadikaia ore, abata badana dekena amo. ⁷ To harihari idia noho guba bona tanobada be Dirava ese, iena oda hereva dekena amo ia naridia noho. Oibe, idia noho hegaegae, ela bona Kota Badana Dinana dekenai. Unai neganai, lahi badana ese tanobada bona guba do ia araia ore, bona Dirava idia negea taudia be do idia boio.

⁸ Lauegu lalokau taudia e, inai hereva tamona do umui laloaboio lasi: Lohiabada ena vairana dekenai, dina tamona be lagani 1000 bamona, bona lagani 1000 be dina tamona bamona. ⁹ Lohiabada ia gwauhamata vadaeni, kara haida do ia karaia. Ia ese iena gwauhamata badinaia totona ia hesiku lasi, haida idia laloe bamona. Lasi, to umui totona ia haheauka noho. Badina be ia ura lasi tau ta ia mase. Ia ura taunimanima ibounai ese dika dekena amo edia lalona do idia giroa.

Inai tanobada bona guba do idia ore

¹⁰ To Lohiabada ena Dina be do ia ginidae, henaia tauna ia ginidae bamona. Unai Dina dekenai, guba be nega tamona do ia ore, mai regena bada danu. Guba dekenai noho gaudia, hisiu, hua, bona dina, be lahi bada herea ese idia do ia araia ore. Tanobada danu, bona ia lalonai noho gaudia ibounai, be lahi bada ese do ia araia ore.

Do umui noho hegaegae

¹¹ Vadaeni, umui laloea: Bema inai gau ibounai unai bamona do idia boio ore, umui be edena bamona do umui noho? Umui emui kara ibounai do idia helaga be namo, bona Dirava do umui badinaia namonamo. ¹² Ma Dirava ena Dina do umui naria noho, bona do ia ginidae haraga totona do umui gaukara goada noho. Unai Dina neganai lahi ese guba do ia araia ore, bona siahu badana ese guba dekenai noho hisiu, hua bona dina do ia gabua ore. ¹³ To Dirava ese ia gwauhamata vadaeni, guba matamata bona tanobada matamata do ia havaraia. Inai totona do ita naria noho. Unai gabu dekenai be kara maoromaoro sibona do ia noho.

Sisiba hereva dokodia

¹⁴ Unai dainai, lauegu lalokau taudia e, inai gaudia umui naria noho dainai, do umui noho namonamo. Mai goevagoeva bona kerere lasi danu Dirava ena vairanai do umui noho. Bona Dirava danu mai maino danu do umui noho. ¹⁵ Do umui laloaboio lasi, Lohiabada ese umui ia naria noho, mai haheauka danu. Ia ese nega namona umui dekenai ia henia noho inai, iena hamauria do umui davaria totona. Dirava ese iseda varavara lalokau tauna Paulo dekenai aonega ia henia, vadaeni ia ese unai bamona sisiba umui dekenai ia torea vadaeni. ¹⁶ Paulo ena revareva ibounai lalonai inai gaudia ia herevalaia noho. Iena hereva haida edia anina davaria be auka. Vadaeni daradara bona diba lasi taudia haida ese unai hereva edia anina idia gwauraia kerere, Buka Helaga ena hereva haida edia anina idia gwauraia kerere bamona. Inai bamona idia karaia taudia ese sibodia idia hadikaia ore noho.

¹⁷ Lauegu lalokau taudia e, inai gaudia umui diba vadaeni. Unai dainai do umui naria namonamo, koikoi taudia ese umui do idia hakau kerere garina. Oibe, umui emui gini goada gabuna dekena amo do umui moru garina, do umui naria namonamo. ¹⁸ To iseda Lohiabada bona Hamauria Tauna Iesu Keriso ena hariharibada, bona iena diba, bona laloea diari lalonai do umui tubu daekau noho.

Hairai diarina bona mataurai bada be iena, harihari ia lao bona hanaihanai. Amen.

IOANE ENA REVAREVA GINIGUNANA

Mauri ena Hereva

¹ Mauri ena Hereva, hamatamaia nega dekena amo ia noho gauna, be umui dekenai ai ura hamaorolaia. Ai be aiemai taiana dekena amo ai kamonaia, bona aiemai matana dekena amo ai itaia. Oibe, ai itaia vadaeni, bona aiemai imana dekena amo ai dogoatao vadaeni. ² Unai mauri be taunimanima dekenai ia hedinarai neganai ai itaia, bona hari ai gwauria hedinarai noho. Umui dekenai ai hereva momokani, inai mauri be mauri hanaihanai. Gunaguna ia be Tamana danu idia noho, to hari inai neganai ai dekenai ia hedinarai. ³ Ai ese ai itaia bona ai kamonaia gaudia umui dekenai ai hamaorolaia noho, umui ese aiemai oreo tamona lalonai do umui vareai totona. Badina be ai ura Tamana bona iena Natuna Iesu Keriso danu oreo tamona taudia do ita lao. ⁴ Ai ese inai revareva umui dekenai ai torea, iseda moale do ia momokani totona.

Dirava be diari

⁵ Inai hereva be Dirava ena Natuna dekena amo ai kamonaia, bona umui dekenai ai hamaoroa: Dirava be diari, bona dibura sisina sibona ia dekenai ia noho lasi. ⁶ Bema ita gwau ita be Dirava ena oreo taudia, to dibura lalonai ita raka noho, ita koikoi noho, hereva momokani ita badinaia lasi. ⁷ To bema diari lalonai ita raka noho, Dirava hegeregere, ita be oreo tamona taudia, bona iena Natuna Iesu ena rarana ese kara dika ibounai dekena amo ita ia huria noho, vadaeni ita goeva.

⁸ Bema ita gwau ita kara dika lasi, ita sibona ita koia noho, bona hereva momokani be ita lalonai ia noho lasi. ⁹ To bema iseda kara dika Dirava dekenai ita gwauria hedinarai, ia ese ita do ia negea lasi. Lasi momokani. Ia be kara maoromaoro dainai, iena gwauhamata do ia badinaia, bona iseda dika do ia gwauatao. Bona iseda kerere ibounai be do ia huria ore momokani. ¹⁰ To bema ita gwau ita be kara dika lasi, inai be ita gwau Dirava be koikoi tauna, bona unai dainai iena hereva be iseda kudouna dekenai ia noho lasi.

2

Keriso be iseda durua Tauna

¹ Lauegu natuna e, inai hereva umui dekenai lau torea noho, be umui ese do umui kara dika lasi totona. To tau ta bema ia kara dika, ita be mai iseda durua tauna, iseda Tamana ena vairanai. Ia be Iesu Keriso, kara maoromaoro tauna. ² Bona Keriso sibona be iseda kara dika gwauatao dalana. Bona iseda dika sibona lasi, to Keriso be taunimanima ibounai edia dika gwauatao dalana.

Dirava do ita diba dalana

³ Bema Dirava ena taravatu herevadia ita kamonaia henia neganai, unai anina be Dirava ita diba momokani. ⁴ Bema tau ta ia gwau, “Dirava lau diba,” to Dirava ena hereva ia kamonaia henia lasi, vadaeni ia be koikoi tauna, bona hereva momokani ia lalona dekenai ia noho lasi. ⁵⁻⁶ To Dirava ena hereva ia badinaia tauna ese Dirava ia lalokau henia noho, mai maoromaoro bona momokani danu. Bema tau ta ia hereva, ia gwau, “Lau be Dirava ena lalona dekenai lau noho,” vadaeni unai tau ese Keriso ena mauri dalana hegeregere do ia noho be namo. Unai dala

dekena amo do ita diba namonamo ita be Keriso ena lalona dekenai ita noho.

Dibura bona diari

⁷ Lauegu lalokau taudia e, inai umui dekenai lau torea noho taravatu be matamata lasi. To ia be gunana, guna momokani umui abia gauna. Taravatu gunana be umui ese umui kamonai vadaeni. ⁸ Oibe, ia be gunana, to inai taravatu, hari umui dekenai lau torea noho gauna be ma matamata danu. Ia be matamata, badina dibura ena goada be ia ore noho, bona diari korikori be harihari ia hedinarai noho.

⁹ Bema tau ta ia gwau, “Lau be diari lalonai lau noho,” to ia ese iena tadikakana ia badu henia noho, unai tau be do dibura lalonai ia noho. ¹⁰ Tau ta bema iena tadikakana ia lalokau henia neganai, unai tau be diari lalonai ia noho. Ia be diari lalonai dainai, gau ta ese ia do ia hakaua kerere lasi. ¹¹ To tau ta bema iena tadikakana ia badu henia neganai, unai tau be dibura lalonai ia noho. Bona dibura lalonai ia raka noho dainai, ia lao noho gabuna ia diba lasi, badina be dibura ese iena matana ia hakepulua dainai.

Maragidia, tamana taudia, eregabe taudia

¹² Lauegu natuna e, umui dekenai lau torea noho, badina be emui kara dika be Keriso ena ladana dainai idia gwauatao vadaeni. ¹³ Tamana taudia e, umui dekenai lau torea inai, badina umui be Keriso umui diba momokani. Umui diba ia be hamatamaia nega dekena amo ia noho, bona harihari danu ia noho. Eregabe taudia e, umui dekenai lau torea noho, badina be Satani dekena amo umui kwalimu vadaeni. Maragidia e, umui dekenai lau torea, badina be Tamana Dirava umui diba dainai.

¹⁴ Tamana taudia e, umui dekenai lau torea inai, badina umui be Keriso umui diba momokani. Umui diba ia be hamatamaia nega dekena amo ia noho, bona harihari danu ia noho. Eregabe taudia e, umui dekenai lau torea noho, badina umui be goada noho, bona Dirava ena hereva umui emui lalona dekenai ia noho. Umui ese Satani dekena amo umui kwalimu vadaeni.

Tanobada do umui ura henia lasi

¹⁵ Tanobada do umui ura henia lasi, bona tanobada ena gaudia danu do umui ura henia lasi. Bema tanobada umui ura henia noho neganai, Tamana Dirava umui ura henia lasi inai. ¹⁶ Badina be tanobada gaudia ibounai, tauanina ena ura dikadia, matabodaga ena ura dikadia, bona hekokoroku, inai gaudia be Tamana Dirava dekena amo idia mai lasi. Idia be tanobada dekena amo idia mai noho. ¹⁷ Tanobada, mai ena gau dikadia, taunimanima idia ura dikadika gaudia, be kahirakahira do idia ore. To Dirava ena ura ia karaia noho tauna be do ia noho ela bona hanaihanai.

Keriso ia tuari henia tauna ia ginidae vadaeni

¹⁸ Lauegu natuna e, nega ena dokona be kahirakahira inai. Umui kamonai vadaeni, Keriso dekenai Tuari Henia Tauna be do ia mai. To Keriso idia tuari henia taudia momo idia mai guna vadaeni. Unai dainai ita diba inai nega ena dokona be kahirakahira. ¹⁹ Inai taudia ese iseda ore idia rakatania. To guna idia be iseda taudia korikori lasi, unai dainai ita dekena amo idia raka siri. Bema idia be iseda ore taudia korikori neganai, idia be ita danu do idia noho hebou. To idia ese ita idia rakatania, vadaeni unai dekena amo idia hedinarai, idia be iseda ore lasi taudia.

20 To umui ese Lauma Helaga umui abia vadaeni. Keriso ese umui dekenai ia henia. Unai dainai umui ibounai be hereva momokani umui diba vadaeni. ²¹ Hereva momokani umui diba lasi dainai inai revareva umui dekenai lau torea, a? Lasi momokani. To hereva momokani umui diba dainai lau torea. Bona inai danu umui diba: Koikoi be hereva momokani dekena amo ia mai diba lasi.

²² Koikoi tauna be daika? Tau ta, bema ia gwau Iesu be Keriso lasi, unai tau be koikoi tauna, ani? Unai tau be Keriso ia tuari henia noho. Ia ese Tamana bona Natuna danu ia negea noho. ²³ Natuna ia negea noho tauna ese Tamana danu ia negea noho. Bona Natuna ia abia dae tauna ese Tamana danu ia abia dae.

Lauma Helaga ese hereva momokani ita dekenai ia hadibaia noho

²⁴ Guna umui kamoni hadibaia hereva, be emui lalona dekenai do umui dogoatao noho. Bema inai hereva umui dogoatao, umui be Natuna lalonai bona Tamana lalonai danu do umui noho nega ibounai. ²⁵ Bona inai be Keriso sibona ese ita dekenai ia gwauhamata henia gauna, mauri hanaihanai.

²⁶ Inai revareva be umui dekenai lau torea, umui idia koia gwauraia taudia edia dika do lau hedinarai totona. ²⁷ To Keriso ese iena Lauma Helaga umui dekenai ia henia vadaeni. Unai dainai umui emui diba be hegeregere, badina be Lauma Helaga ena hereva be momokani, ia koikoi lasi. Iena hadibaia hereva do umui badinaia, bona Keriso lalonai do umui noho.

Dirava ena natuna taudia

²⁸ Unai dainai, lauegu natuna e, Keriso ena lalona dekenai do umui noho. Vadaeni do ia giroa mai neganai, ita be do ita gini goada, do ita daradara lasi, bona iena vairana dekenai do ita hemarai lasi. ²⁹ Umui diba Keriso be maoromaoro momokani. Unai dainai umui diba danu, kara maoromaoro taudia ibounai be Dirava ena natuna taudia.

3

Iena lalokau dainai, Dirava ese iena natuna ita ia halaoa

¹ Mani do umui laloka, iseda Tamana ese lalokau bada ita dekenai ia henia vadaeni, badina ia ese iena natuna ita ia gwauraia noho. Momokani ita be iena natuna. Unai dainai tanobada taudia be ita idia diba lasi, badina be idia diba lasi Dirava. ² Lauegu lalokau taudia e, harihari ita be Dirava ena natuna, to gabeai ita be edena bamona, be ita do diba namonamo lasi. To inai gauna ita diba namonamo: Keriso do ia hedinarai neganai, ita be iena toana bamona do ita lao, badina be iena toana korikori do ita itaia. ³ Keriso idia naria noho mai abidadama danu taudia ibounai ese idia sibodia edia lalona idia hagoevaia noho, Keriso ia goeva hegeregere.

⁴ Kara dika tauna ese Dirava ena taravatu ia utua noho, badina kara dika be taravatu utua gauna. ⁵ To umui diba, Keriso ia mai, kara dika do ia kokia totona. Bona ia lalonai be kara dika ia noho lasi. ⁶ Keriso ena lalona dekenai ia noho tauna ese kara dika ia karaia noho lasi. To kara dika ia karaia noho tauna ese Keriso nega ta ia itaia lasi, bona Keriso nega ta ia diba lasi.

Mauri dala be rua, ta Dirava ena, ta Satani ena

⁷ Lauegu natuna e, do umui naria, tau ta ese umui do ia koia garina. Kara maoromaoro ia karaia tauna be kara maoromaoro tauna, Keriso be maoromaoro bamona. ⁸ Satani ese hamatamaia nega dekena amo

ia kara dika, unai dainai kara dika ia karaia noho tauna be Satani ena tauna. Dirava ena Natuna ia hedinarai ena badina korikori be inai: Satani ena kara dika do ia haorea momokani totona.

⁹ Dirava ena natuna taudia ese kara dika do idia karaia noho lasi, badina be Dirava ena mauri be idia edia lalona dekenai ia noho. Bona unai taudia idia kara dika noho diba lasi, badina Dirava be edia Tamana dainai. ¹⁰ Dirava ena natuna taudia be idau, bona Satani ena natuna taudia be ma idau. Edia idau be inai: Kara maoromaoro ia karaia noho lasi tauna be Dirava ena natuna lasi, bona iena tadikakana ia lalokau henia lasi tauna be Dirava ena natuna lasi.

Ibounai ta ta dekenai do ita lalokau henia

¹¹ Hamatamaia nega dekena amo ia mai bona harihari umui kamonai hadibaia hereva be inai: Ibounai ta ta dekenai do ita lalokau henia. ¹² Kaino ena kara bamona do ita karaia lasi, ia be Satani ena tau, bona ia ese iena tadina Abela ia alaia mase. Badina dahaka ia alaia? Badina be Kaino sibona ena kara be kerere, to iena tadina ena kara be maoromaoro.

¹³ Unai dainai, laugu varavara taudia e, tanobada taudia ese umui do idia badu henia, be do umui hoa lasi. ¹⁴ Iseda tadikakana ita lalokau henidia dainai, ita diba mase ita rakatania, bona mauri dekenai ita hanaiia vadaeni. Tau ta bema ia ese iena tadikakana ia lalokau henia lasi, unai tau be mase lalonai ia do noho. ¹⁵ Bona iena tadikakana ia badu henia noho tauna be ala-ala tauna. Umui diba mauri hanaihanai be ala-ala tauna lalonai ia noho lasi. ¹⁶ Lalokau ena toana, be inai kara dekena amo do ita diba: Keriso ese ita dainai iena mauri ia atoa diho. Unai dainai ita ese iseda tadikakana dainai, iseda mauri ita atoa diho danu be namo. ¹⁷ To, bema tau ta be mai ena kohu momo, bona iena tadikakana ia itaia mai ena ogoami, to ia bogahisihisi henia lasi, edena bamona ia hereva, “Lau ese Dirava lau lalokau henia?”

¹⁸ Laugu natuna e, iseda lalokau be hereva gauna sibona lasi. Namu ita lalokau henia, hereva sibona dekena amo lasi, to mai kara, bona mai momokani danu.

Keristani taudia edia lalokau kara dainai, Dirava ena vairanai idia gini diba

¹⁹ Inai iseda lalokau kara dekena amo, be do ita diba ita be momokani taudia. Vadaeni unai dainai, iseda kudouna be mai maino danu, Dirava ena vairana dekenai. ²⁰ Bona bema iseda kudouna ese ita idia kota henia noho neganai, Dirava ena vairanai do ita laloka hekwarahi lasi. Badina Dirava ese gau ibounai ia diba, bona iena diba ese iseda kudouna ena diba ia hereaia momokani.

²¹ Laugu lalokau taudia e, bema iseda lalona ese ita idia kota henia lasi neganai, ita be Dirava ena vairanai do ita raka kahirakahira lao, gari ta lasi. ²² Vadaeni do ita noia gaudia ibounai be ia ese ita dekenai do ia henia. Badina be iena taravatu ita badinaia noho, bona ia do ita hamoalea karadia ita karaia noho dainai. ²³ Dirava ena taravatu ita dekenai be inai: Iena Natuna Iesu Keriso do ita abidadama henia, bona ita ta ta ibounai dekenai do ita lalokau henia. Unai taravatu be ita dekenai Keriso ese ia henia vadaeni. ²⁴ Iena taravatu ia badinaia noho tauna be Dirava ena lalona dekenai ia noho, bona Dirava danu be unai tau ena lalona dekenai ia noho. Dirava ese iena Lauma ita dekenai ia henia vadaeni, bona inai Lauma ese ita ia hadibaia noho, Dirava be iseda lalona dekenai ia noho.

4

Dirava ena Lauma bona lauma dikana

¹ Lauegu lalokau taudia e, peroveta koikoi taudia momo be tanobada kahana ibounai dekenai idia lao noho. Unai dainai, bema taunimanima idia gwau, “Lau be Lauma Helaga lau abia vadaeni,” do umui naria namonamo. Idia ibounai do umui hamomokania lasi. To unai tau do umui tohoa guna, do umui davaria, Dirava ena Lauma ia abia momokani, o lasi. ² Inai toana dekena amo Dirava ena Lauma do umui diba: Tau ta bema inai bamona ia hereva, ia gwau, “Iesu Keriso be taunimanima ena tauanina dekena amo ia mai,” vadaeni unai tau ese Dirava ena Lauma ia abia vadaeni. ³ To tau ta bema ia gwau Iesu be tauanina dekenai ia mai lasi neganai, unai tau ese Dirava ena Lauma ia abia lasi. Lasi momokani. To ia ese ia abia laumana be Keriso dekenai ia Tuari Henia Tauna ena. Umui kamona vadaeni ia be do ia mai. Bona ia be harihari tanobada dekenai ia noho.

⁴ Lauegu natuna taudia e, umui be Dirava ena bese taudia, bona umui ese peroveta koikoi taudia umui halusia vadaeni. Badina be umui emui lalona dekenai ia noho Laumana ena siahu be bada herea. Ia ese tanobada taudia edia lalona dekenai ia noho laumana ia hereaia vadaeni. ⁵ Inai peroveta koikoi taudia ese tanobada gaudia idia herevalaia, bona tanobada taudia ese edia hereva idia kamona henia, badina idia be tanobada ena. ⁶ To ita be Dirava ena, bona Dirava ia diba tauna ese ita ia kamona henia noho. To Dirava diba lasi tauna ese ita ia kamona henia lasi. Unai dekena amo hereva momokani Laumana ena toana, bona kerere laumana ena toana ita diba.

Dirava be lalokau

⁷ Lauegu lalokau taudia e, ita ta ta dekenai ita lalokau henia be namo. Badina lalokau be Dirava dekena amo. Mai ena lalokau tauna be Dirava ena natuna ta, bona ia diba Dirava. ⁸ To mai ena lalokau lasi tauna ese Dirava ia diba lasi, badina Dirava be lalokau. ⁹ Dirava ese iena lalokau ita dekenai, be inai bamona ia hedinarai: Ia ese iena Natuna tamona tanobada dekenai ia siaia, ia dekena amo mauri do ita abia totona. ¹⁰ Lalokau ena anina be inai: Ita ese Dirava ita lalokau henia lasi, to Dirava ese ita ia lalokau henia. Bona ia ese iena Natuna ia siaia, ia sibona be iseda dika gwauatao dalana totona.

¹¹ Lauegu lalokau taudia e, Dirava ese unai bamona ita ia lalokau henia dainai, namona be ita ta ta dekenai do ita lalokau henia, ani? ¹² Taunimanima ta ese Dirava ia itaia lasi. To bema ita ta ta ita lalokau henia neganai, Dirava sibona ese iseda lalona dekenai do ia noho, bona iena lalokau iseda lalona dekenai be lalokau namo herea momokani.

¹³ Inai bamona toana dekena amo, do ita diba ita be Dirava ena lalona dekenai ita noho, bona Dirava be iseda lalona dekenai ia noho: Ia ese iena Lauma ita dekenai ia henia vadaeni. ¹⁴ Ai ese ai itaia vadaeni, bona ai diba, Tamana ese iena Natuna ia siaia mai, tanobada taudia edia Hamauria Tauna do ia lao totona. ¹⁵ Bema tau ta ia gwauria Iesu be Dirava ena Natuna, Dirava be unai tau ena lalona dekenai ia noho. Unai tau danu be Dirava ena lalona dekenai ia noho. ¹⁶ Bona ita diba momokani, Dirava ese ita ia lalokau henia. Bona Dirava ena lalokau ita abidadama henia noho.

Lalokau momokani

Dirava be lalokau. Tau ta bema lalokau ena dala dekenai ia noho, ia be Dirava ena lalona dekenai ia noho. Dirava danu be unai tau ena lalona dekenai ia noho. ¹⁷ Lalokau momokani do ia vara momokani iseda mauri lalonai inai dala dekenai: Iseda noho bona iseda kara tanobada lalonai, be Keriso ena noho bona iena kara hegeregerena. Bona unai dala dekena amo, ita be Dirava ena Kota Badana Dinana dekenai do ita

gari lasi, to do ita gini, mai laloa goada danu. ¹⁸ Lalokau tauna be gari lasi tauna, badina be lalokau momokani ese gari ia lulua siri momokani. Gari ena anina be inai: Tau ta ena kara dika ena davana ia laloa momo noho. Bema tau ta ia gari neganai, ita diba lalokau be iena lalonai ia do vara momokani lasi.

¹⁹ Ita be mai iseda lalokau, bona ena badina korikori be inai: Dirava ese ita ia lalokau henia guna. ²⁰ Tau ta bema ia gwau, “Lau ese Dirava lau lalokau henia,” to ia ese iena tadikakana ia badu henia, unai tau be koikoi tauna. Badina be iena tadikakana, ia itaia diba tauna, bema ia ura henia lasi, edena bamona ia itaia diba lasi Diravana do ia ura henia diba? ²¹ Keriso ese ita dekenai ia henia taravatu be inai: Dirava ia lalokau henia tauna ese iena tadikakana danu do ia lalokau henia.

5

Tanobada dekena amo do ita kwalimu

¹ Tau ta, bema ia hamomokania Iesu be Keriso, unai tau be Dirava ena natuna ta. Bema tau ta ese tamana ta ia lalokau henia, ia ese unai tamana ena natuna do ia lalokau henia danu. ² Vadaeni, bema Dirava ita lalokau henia, bona iena taravatu ita badinaia neganai, ita diba momokani ita ese Dirava ena natuna taudia ita lalokau henia noho danu. ³ Badina be Dirava ita lalokau henia ena anina be inai: Dirava ena taravatu do ita badinaia. Iena taravatu be metau lasi.

⁴ Badina be Dirava ena natuna ibounai ese tanobada dekena amo idia kwalimu diba. Ita ese Dirava ita abidadama henia noho, bona inai abidadama dekena amo tanobada ena kara ita halusia noho. ⁵ Daika ese tanobada ena kara dekena amo do ia kwalimu diba? Tau ta ia hamomokania, Iesu be Dirava ena Natuna, unai tau sibona ese.

Dirava ese iena Natuna ia gwauraia hedinarai

⁶ Iesu Keriso be iena bapatiso ena ranu dekena amo, bona iena rarana dekena amo ia mai, unai be iena mase satauro dekenai ena rarana. Ia mai be, ranu sibona dekena amo lasi, to ranu bona rara danu dekena amo ia hedinarai mai. Lauma Helaga ese ia gwauraia hedinarai inai be momokani, bona Lauma Helaga be momokani vadaeni. ⁷ Hereva momokani ena uitnesi be toi: ⁸ Lauma Helaga, ranu, bona rara danu. Inai toi edia uitnesi hereva be tamona. ⁹ Taunimanima edia uitnesi hereva ita hamomokania noho. To Dirava ena uitnesi hereva ese taunimanima edia uitnesi hereva ia hereaia momokani. Bona Dirava ese iena Natuna ia gwauraia hedinarai vadaeni. ¹⁰ Unai dainai Dirava ena Natuna ia hamomokania noho tauna ese unai Dirava ena uitnesi hereva ia dogoatao noho, iena kudouna lalonai. To Dirava ena hereva ia hamomokania lasi tauna ese Dirava ia gwauraia be koikoi tauna. Badina be inai: Dirava ena hereva momokani iena Natuna totona be unai tau ese ia hamomokania lasi dainai. ¹¹ Unai hereva momokani be inai: Dirava ese mauri hanaihanai ita dekenai ia henia vadaeni, bona inai mauri be iena Natuna dekena amo ita davaria diba.

¹² Dirava ena Natuna ia abia vadaeni tauna ese mauri ia abia. To Dirava ena Natuna ia abia lasi tauna ese mauri ia abia lasi.

Mauri hanaihanai

¹³ Inai revareva umui dekenai lau torea badina be inai: Do umui diba mauri hanaihanai umui abia vadaeni, Dirava ena Natuna umui abidadama henia dainai.

¹⁴ Dirava ita abidadama henia dainai, ita diba momokani, bema gau ta iena ura hegeregere ita noia neganai, ia ese ita dekenai do ia kamona. ¹⁵ Bona ita diba iseda noinoi ibounai ia kamona dainai, ita diba danu ita noia gaudia do ita abia.

¹⁶ Bema tau ta ese iena Keristani varavara ta ia itaia, kara dika ia karaia noho, to lauma hamasea gauna lasi, bona ia totona Dirava ia noia, vadaeni Dirava ese unai varavara do ia hamauria. Lau herevalaia gauna be inai: Unai tau ese iena lauma do ia hamasea lasi kara dikana ta ia karaia. Badina lauma ia hamasea kara dikana ta be ia noho momokani, bona lau hereva lasi, unai bamona kara dikana totona do umui noinoi. ¹⁷ Kara kerere ibounai be kara dika, to kara dika haida ese lauma idia hamasea lasi.

¹⁸ Ita diba Dirava ena natuna taudia ibounai ese kara dika idia karaia noho lasi. Badina be Dirava ena Natuna ese idia ia naria namonamo noho, vadaeni Satani ese idia ia hadikaia diba lasi.

¹⁹ Ita diba danu, ita be Dirava ena natuna taudia, bona Satani ese tanobada taudia ibounai ia gunalaia noho.

²⁰ Ita diba danu, Dirava ena Natuna ia mai vadaeni, bona ia ese iseda lalona ia hadiaria, vadaeni ita ese Dirava Momokani ita diba. Ita be Dirava ena lalona dekenai ita noho, badina be iena Natuna Iesu Keriso danu ena lalona dekenai ita noho. Iesu Keriso be Dirava Momokani, bona ia be mauri hanaihanai.

²¹ Lauegu natuna e, do umui naria namonamo, dirava koikoidia garina.

IOANE ENA REVAREVA IHARUANA

¹ Lau ekalesia ena gunalaia tauna ese, Dirava ese ia abia hidi hahinena mai oiemu natuna taudia danu inai revareva umui dekenai lau torea inai. Lau ese umui lau lalokau henia momokani. Bona lau sibona lasi, to hereva momokani idia diba taudia ibounai ese umui idia lalokau henia. ² Inai hereva momokani iseda lalona dekenai ia noho, bona ita dekenai do ia noho ela bona hanaihanai.

³ Namona be Tamana Dirava, bona Tamana ena Natuna, Iesu Keriso ese hariharibada, bogahisihisi bona maino ita dekenai do idia henia, mai hereva momokani, bona mai lalokau danu.

Hereva momokani bona lalokau

⁴ Mai moale bada danu hereva lau kamoni, oiemu natuna haida ese hereva momokani ena dala dekenai idia raka noho. Inai bamona idia karaia be Tamana Dirava ese ita dekenai ia henia oda hegeregerena.

⁵ Hahine lohia e, oi dekenai lau noia inai, ita ese Keristani taudia ta ta ibounai do ita lalokau henia. Inai be taravatu matamata lasi oi dekenai lau henia noho. Lasi, to ia be gunana, hamatamaia nega dekena amo ita abia gauna. ⁶ Lalokau ena anina be inai: Dirava ena taravatu do ita badinaia. Inai taravatu, guna momokani umui kamoni be inai: Umui ibounai ta ta dekenai do umui lalokau henia.

Keriso ena hereva do ita dogoatao momokani

⁷ Koikoi taudia momo be tanobada gabu ibounai dekenai idia loaloa noho, idia gwau Iesu Keriso be taunimanima edia tauanina dekenai ia mai lasi. Idia be koikoi taudia, bona Keriso idia tuari henia noho. ⁸ Unai dainai, do umui naria namonamo, ita ese gaukara mai hekwarahi bada dekena amo ita davaria gauna be do ia boio garina. Namona be umui emui gaukara davana momokani do umui abia.

⁹ Tau ta bema Keriso ena hadibaia hereva ia badinaia lasi, to ia raka siri, bona hadibaia hereva idauna ta ma ia badinaia, unai tau dekenai Dirava ia noho lasi. To Keriso ena hadibaia hereva ia badinaia tauna be, Tamana bona Natuna danu, idia ruaosi be unai tau dekenai idia noho.

¹⁰ Unai dainai, bema tau ta umui dekenai ia mai, bona inai Keriso ena hadibaia hereva ia gwauria lasi neganai, emui ruma dekenai do umui abia dae lasi. Bona hanamo hereva do umui henia lasi. ¹¹ Badina be unai tau do ia hanamo tauna ese unai tau ena kara dika do ia durua.

Dokona herevadia

¹² Lau ura hereva momo umui dekenai lau hamaoroa, to lau ura lasi pepa dekenai lau torea. Lau ura umui do lau vadivadi henia, bona umui danu do ita herevahereva, iseda moale do ia momokani totona.

¹³ Oiemu tadikaka hahine, Dirava ese ia abia hidi hahinena, ena natuna ese edia hanamo oi dekenai idia siaia inai.

IOANE ENA REVAREVA IHATOINA

¹ Lau ekalesia ena gunalaia tauna ese lauegu lalokau Gaio, oi dekenai inai revareva lau torea inai. Oi lau lalokau henia mai momokani danu.

² Lauegu lalokau tauna e, Dirava lau noia, gau ibounai oi karaia ese namo do idia havaraia, bona lau noia danu, oiemu tauanina ena mauri ibounai do ia namo. Badina lau diba vadaeni oiemu lauma ia namo noho. ³ Keristani varavara taudia haida idia mai, lau idia hamaoroa oi be kara momokani tauna. Vadaeni lau moale bada, hereva momokani ena dala dekenai oi raka noho dainai. ⁴ Bema lau kamoni, egu natuna Keristani taudia ese Dirava ena hereva momokani ena dala dekenai idia raka noho, vadaeni lau moale bada herea. Moale ta ese unai moale ia hereaia diba lasi.

Gaio ena gaukara namona

⁵ Lauegu lalokau tauna e, oi ese oiemu Keristani varavara taudia oi durua noho, be gaukara namo herea oi karaia. Oibe, oiemu kara be namo bada, badina idia be idau taudia oi dekenai. ⁶ Idia ese iniseni idia noho ekalesia orea taudia idia hamaoroa vadaeni, oi ese idia oi durua noho, bona idia oi lalokau henia. Mani emu kara, idia ma do oi durua noho, vadaeni edia laolao dekenai do idia lao, Dirava ena ura dalana hegeregere. ⁷ Badina be Keriso ena ladana dainai edia hanua idia rakanania, bona edia laolao totona, durua kara ta Keristani lasi taudia dekena amo idia abia dae lasi. ⁸ Ita Keristani taudia ese inai bamona taudia ita durua be namo. Badina unai dekena amo, Dirava ena hereva momokani durua totona do ita gaukara hebou namonamo.

Diotrepe ena kara be dika

⁹ Revareva kwadogina ekalesia orea dekenai lau torea vadaeni. To Diotrepe, sibona ia gwauraia ia be gunalaia tauna, ia ese lauegu hereva ia kamoni henia lasi. ¹⁰ Unai dainai, umui dekenai do lau mai neganai, iena kara do lau laloatao. Ia ese mai hereva dika bona koikoi danu aiemai kara ia maumaurai noho. Bona inai sibona lasi, to Keristani varavara taudia idia vadivadi henia gwauraia neganai, Diotrepe ese idia ia abia dae lasi. Ma inai vadivadi taudia idia ura abia dae taudia edia dala be Diotrepe ese ia koua. Ma ia ese unai abia dae kara taudia be ekalesia dekena amo ia atodia siri gwauraia danu.

Demetrio be kara namo tauna

¹¹ Lauegu lalokau tauna e, dika tauna ena kara bamona do oi karaia lasi, to namo tauna ena kara bamona do oi karaia. Kara namo ia karaia noho tauna be Dirava ena tauna. To kara dika ia karaia noho tauna ese Dirava ia itaia lasi.

¹² Ibounai idia gwau Demetrio be kara namo tauna. Dirava ena hereva momokani ese danu ia gwauraia, ia be tau namona. Ai danu Demetrio ai gwauraia ia be namo, bona umui diba aiemai hereva be momokani.

Dokona herevadia

¹³ Lau ura hereva momo umui dekenai lau hamaoroa, to lau ura lasi pepa dekenai lau torea. ¹⁴ Nega sisina ia ore, lau ura oi dekenai do lau mai vadivadi, vadaeni ita ruaosi do ita herevahereva.

¹⁵ Lau ura maino oi dekenai do ia noho. Oiemu turana iniseni ese oi idia hanamo noho. Lauegu turana unuseni, ibounai ta ta dekenai lauegu hanamo do oi henia.

IUDA ENA REVAREVA

¹ Lau Iuda, lau be Iesu Keriso ena hesiai tauna, bona Iamesi ena tadina.

Umui, Dirava ese umui ia abia hidi taudia dekenai inai revareva lau torea. Umui be Tamana Dirava ese ia lalokau henia, bona Iesu Keriso ese umui ia naria noho. ² Dirava ese bogahisihisi bona maino bona lalokau umui dekenai do ia henia badabada.

Hadibaia koikoi taudia

³ Lauegu lalokau taudia e, iseda hamauria ena hereva totona umui dekenai do lau torea gwauraia, to hari lau laloka hereva idauna ta umui dekenai do lau torea, inai bamona: Umui ese emui abidadama lalonai do umui gini goada noho, bona Sivarai Namona idia hadikaia taudia edia hereva do umui negea. Inai abidadama be Dirava ese nega tamona sibona iena bese taudia dekenai ia henia, bona inai abidadama ena hereva be tau ta ese ia senisia diba lasi. ⁴ Badina be haida ese umui emui orea dekenai hunia dala dekenai idia vareai vadaeni. Gunaguna Buka Helaga ia gwau unai bamona taudia be Dirava ena Kota dekenai idia kerere davana do idia davarua momokani. Idia ese Dirava idia negea. Idia ese Dirava ena hariharibada idia hadibaia kerere, edia lebulebu karadia do idia karaia diba totona. Inai taudia ese iseda Lohiabada Iesu Keriso, iseda Biaguna tamona, idia negea vadaeni.

Sené taudia edia kara do umui laloka lou

⁵ Inai sivarai gunana umui diba vadaeni, to mani do umui laloka lou: Lohiabada ese Israela taudia Aigupito dekena amo ia hamauria. To gabeai Dirava ese ia dekenai idia abidadama henia lasi taudia ia alaia mase. ⁶ Aneru haida danu, edia daga korikori ena maka dekenai idia noho lasi, bona edia gabu korikori idia rakatania. Unai dainai Dirava ese hel ena dibura masemase gabuna dekenai idia ia atoa. Unuseni, noho hanaihanai auri seini dekena amo idia ia gua. Bona unai gabu dekenai do idia noho, ela bona Dirava ena Kota Bada Dinana. ⁷ Sodoma bona Gomora, bona idia kahirakahira noho hanuadia danu be unai bamona idia karaia. Unai aneru idia karaia bamona, unai hanua edia taudia ese sihari kava bona kara bodaga idauidau idia karaia momo. Unai dainai Dirava ese edia kerere davana ia henidia, noho hanaihanai lahi ena hisihisi be unai. Edia dika davana be toana ta, ia hedinarua ita dekenai, vadaeni ita ese idia bamona do ita karaia lasi.

⁸ Unai bamona danu, inai hari idia noho tau dikadia ese nihi idia abia, vadaeni sibodia edia tauanina idia hadikaia noho. Dirava ena siahu idia gwauraia be anina lasi. Idia ese danu guba noho taudia idia hereva dika henia. ⁹ Gunaguna, Mikaela, aneru badana momokani be Satani danu idia hepapahuahu. Idia ruaosi, daika ese Mose ena tauanina do ia abia, idia hepapahuahulaia. Unai neganai Mikaela ia hekokoroku lasi, ia ese Satani ia gwau henia lasi. Inai bamona sibona ia hereva, ia gwau, “Lohiabada ese oi do ia gwau henia.”

¹⁰ To inai hadibaia koikoi taudia ese idia diba lasi gaudia dekenai idia hereva dika noho. Idia be uda boroma bamona, mai edia laloka lasi. Unai dainai idia diba gaudia sibona idia karaia. Bona inai idia diba gaudia, inai kara dika ese ia hakaudia dainai, idia sibodia edia mauri idia hadikaia ore. ¹¹ Madi, dika momokani do idia davarua! Kaino ena dala hegeregere idia raka vadaeni. Balama ena kerere idia karaia vadaeni,

moni do idia davaria totona. Idia ese mai hekokoroku danu, Dirava idia kamona henia lasi, Kora ia karaia bamona. Bona Kora ese dika ia davaria bamona, idia danu ese edia dika davana, mase do idia abia.

¹² Umui emui ekalesia aniani hebou umui abia neganai, inai dika taudia ese emui turana dalana idia hadikaia noho. Idia edia ura sibona idia karaia. Mai mataurai lasi, edia bogana idia hahonua, haida dekenai aniani henia be idia laloa lasi. Idia be ori koremakorema, lai ese ia hodaia bamona, to ia ese medu ia hadihoia lasi. Idia be au dikadia bamona, edia huahua ena nega korikori be huahua idia atoa lasi. Bona idia be hegeregere au haida bamona, idia mase momokani vadaeni, bona taunimanima ese tano dekena amo edia ramu idia kokia vadaeni. ¹³ Idia ese hemarai kara idia karaia noho, bona unai hemarai be ia hedinarai, hegeregere davara hurehure bada ena gwaragwara bamona. Idia be idia moru noho hisiu bamona, dibura masemase gabuna dekenai Dirava ese do ia atodia, ela bona hanaihanai.

Edia kerere davana do idia abia

¹⁴ Enoka be tau namba 7 Adamu ena murinai ia vara. Ia ese inai tau dikadia totona peroveta hereva ia gwauraia, ia gwau, “Lohiabada do ia mai, bona iena aneru helagadia momo herea be ia danu do idia hedinarai. ¹⁵ Lohiabada ese taunimanima ibounai do ia kota henia. Ia ese Dirava idia badinaia lasi taudia edia dika davana do ia gwauraia, Dirava idia negea dainai. Ma idia momo ese Dirava idia hereva dika henia vadaeni. Idia danu be Lohiabada ese edia kerere davana do ia gwauraia.”

¹⁶ Unai dika taudia ese haida edia kara idia maumaurai noho, bona ma haida idia gwauraia kerere. Idia ese edia ura dikadia sibona idia karaia noho. Mai hekokoroku danu edia kara idia herevalaia, bona idia ese haida idia hanamo koikoi, edia ura gaudia, kohu o gau namodia, do idia davaria totona.

Emui abidadama lalonai do umui gini goada

¹⁷ Laegu lalokau taudia e, iseda Lohiabada Iesu Keriso ena aposetolo taudia ese umui idia hadibaia hereva do umui laloatao. ¹⁸ Umui dekenai idia hamaoroa, idia gwau, “Nega dokona dekenai dika taudia do idia hedinarai, emui guriguri kara do idia kirikirilaia. Idia ese Dirava do idia negea, bona sibodia edia ura dikadia do idia karaia.” ¹⁹ Inai taudia ese ekalesia oreadia do idia hapararaia. Edia tauanina edia ura dikadia ese edia mauri do idia biagua noho, bona idia ese Lauma Helaga do idia abia lasi.

²⁰ To umui, laegu lalokau taudia e, emui abidadama helagana ena latanai emui mauri do umui haginia goada. Lauma Helaga ena siahu dekena amo do umui guriguri noho. ²¹ Dirava ena lalokau lalonai do umui noho. Nega ibounai iseda Lohiabada Iesu Keriso do umui naria noho, mai abidadama danu. Badina be umui diba, ia ese iena bogahisihisi dainai, mauri hanaihanai umui dekenai do ia henia.

Daradara taudia haida do umui bogahisihisi henidia

²² Abidadama goada lasi taudia be do umui durua, mai bogahisihisi danu. ²³ Haida be lahi dekena amo karaharaga do umui veria mauri. Ma haida do umui bogahisihisi henia, to mai emui gari danu. Haida edia tauanina edia kara dikadia bona matabodaga dainai, edia dabua be idia miro vadaeni. Umui durudia noho, to edia dabua idia hamiroa karadia do umui ura henia lasi momokani.

Dirava do ita hanamoa

²⁴ Dirava ese umui ia naria diba, vadaeni do umui moru lasi. Ia ese umui ia hakaua diba, vadaeni iena gabu namo herea momokani dekenai umui do ia atoa, kerere ta lasi, bona mai emui moale bada danu.

²⁵ Dirava be tamona, bona ia ese iseda Lohiabada Iesu Keriso dainai ita ia hamauria. Ita ese Dirava ena ladana do ita hanamoa bada. Ia be King Hereadaena mai hairaina, mai siahu ibounai, ia be gau ibounai edia Biaguna. Gunaguna momokani unai bamona siahu ia abia. Ma harihari danu inai siahu ia abia noho, bona do ia abia noho ela bona hanaihanai! Amen.

APOKALUPO KERISO ESE IOANE DEKENAI IA HEDINARAIA SIVARAINA

¹ Inai buka ena hereva be Iesu Keriso ese ia hedinarai gauna. Dirava ese Iesu dekenai ia hedinarai, badina ia ura Iesu ese kahirakahira do idia vara gaudia be iena hesiai taudia dekenai do ia hedinarai. Vadaeni Keriso ese iena aneru iena hesiai tauna Ioane dekenai ia siaia, inai gaudia do ia hamaoroa totona. ² Lau inai Ioane ese lau itaia gaudia ibounai lau gwaurai hedinarai inai. Lau gwau Dirava ena hereva, bona inai Iesu Keriso ena hereva, be idia momokani vadaeni.

³ Inai buka ia duahia tauna be do ia moale. Ma danu, inai buka ena peroveta hereva idia kamoni henia, bona iena hadibaia hereva idia badinaia taudia be do idia moale. Badina inai gaudia ibounai do idia vara ena nega be ia kahirakahira vadaeni.

Ekalesia orea 7 Asia kahana dekenai

⁴ Lau Ioane ese, umui ekalesia orea 7 Asia dekenai inai hereva lau torea noho inai. Dirava be harihari ia noho, gunaguna ia noho, bona gabei danu do ia mai. Ia dekena amo hariharibada bona maino do umui abia. Dirava ena helai gabuna badana ena vairanai idia noho laumadia 7 dekena amo danu, hariharibada bona maino do umui abia, ⁵ bona Iesu Keriso dekena amo danu. Ia be Dirava ena hereva ia gwaurai maoromaoro tauna namona. Ia be mase dekena amo ia torei lou vara guna tauna. Ia be tanobada ena king ibounai edia biaguna.

Ia ese ita ia lalokau henia, bona iena rarana dekena amo iseda kara dika ia huria ore vadaeni. ⁶ Ia ese ita ia haboua, vadaeni ita be Basileia ta, bona Tamana Dirava ena hahelagaia taudia ia ese ita ia halaoa vadaeni. Iesu Keriso dekenai, be hairai bada bona siahu bada do idia noho ela bona hanaihanai. Amen.

⁷ Umui itaia, ia be ori edia latanai ia mai noho. Taunimanima ibounai be momokani do idia itaia. Bona ia idia gwadaia taudia ese danu do idia itaia. Tanobada besedia ibounai be ia dainai do idia tai. Inai be momokani! Amen.

⁸ Lohiabada Dirava, harihari ia noho, gunaguna ia noho, bona gabei do ia mai tauna, Siahu Ibounai Diravana, ia gwau, “Lau be Alepa bona Omega, Matamana bona Dokona.”

Ioane ese Keriso ia itaia

⁹ Lau be umui emui kakana Ioane. Iesu ena murinai lau raka noho dainai, lau be umui danu ita hisihisi noho mai haheauka danu. Badina be iena Basileia taudia ibounai ese hisihisi idia abia noho. Lau ese Dirava ena hereva, bona egu abidadama Iesu dekenai lau gwaurai hedinarai noho. Unai dainai, lau idia dogoatao, bona motumotu ta, ladana be Patamo, dekenai lau idia atoa, lau noho. ¹⁰ Vadaeni Lohiabada ena Dina dekenai Lauma Helaga ese lau ia abia. Unai neganai lauegu murina kahanai be gado badana ta, kibi ena regena bamona, lau kamoni. ¹¹ Ia gwau, “Inai oi itaia gaudia buka dekenai do oi torea, bona ekalesia orea 7 dekenai inai buka do oi siaia lao. Ekalesia orea be inai: Efeso, Semurana, Peregamo, Tuatira, Sadi, Piladelepa, Laodikea.”

¹² Vadaeni lauegu vairana lau giroa, lau ia hereva henia tauna lau itaia totona. Bona golo lamepa ibounai 7 lau itaia. ¹³ Lamepa edia

huanai tau ta ia gini, iena toana be Taunimanima ena Natuna bamona. Iena dabua be lata, ela bona iena aena dekenai, bona iena kemena be golo beleta ese ia hagegea. ¹⁴ Iena huina be kurokuro momokani, mamoe huina bamona, o ori kurokuro bamona. Iena matana be lahi ena hururuhururu bamona. ¹⁵ Iena aena be kapa ia diaridiari bamona, lahi dekenai idia gabua neganai. Iena gadona ena regena be bada herea, sinavai momo edia regena bamona. ¹⁶ Iena imana idibana dekenai be hisiu 7 ia dogoatao. Tuari kaia ta mai matana, isena rua gauna, be iena uduna dekena amo ia duduia maoromaoro. Iena vairana be dina tubua neganai, dina ena diaridiari bamona.

¹⁷ Lau itaia neganai, iena aena badinai lau moru diho, lau be mase tauna bamona. To ia ese iena imana idibana lau dekenai ia atoa, ia gwau, “Oi gari lasi. Lau be ginigunana momokani, bona dokona momokani. ¹⁸ Lau be lau mauri noho. Guna be lau mase vadaeni, to harihari lau mauri noho, ma do lau noho ela bona hanaihanai. Mase ena ki, bona mase taudia edia gabu ena ki, be lauegu imana dekenai ia noho. ¹⁹ Unai dainai, oi itaia gaudia do oi torea, hari idia noho gaudia, bona vaira neganai do idia vara gaudia danu. ²⁰ Hisiu 7 lauegu imana idibana dekenai oi itaia, bona golo lamepa 7 edia anina be inai: Hisiu 7 be ekalesia oreadia 7 edia aneru, bona golo lamepa 7 be ekalesia oreadia 7.”

2

Hadibaia hereva: Efeso ekalesia oreana dekenai

¹ “Efeso ekalesia oreana ena aneru dekenai inai hereva do oi torea:

“Hisiu 7 iena imana idibana dekenai ia dogoatao noho, bona golo lamepa 7 edia huanai ia raka noho tauna ese hadibaia hereva ia gwaurai inai:

² “Oiemu kara lau diba. Oiemu gaukara mai hekwarahi bada, bona oiemu haheauka lau diba vadaeni. Lau diba oi ese kara dika taudia oi negea, bona sibodia idia gwaurai aposetolo taudia oi ese oi tohoa vadaeni. Oi davaria vadaeni idia be koiko taudia. ³ Lau diba oi haheauka noho, bona lauegu ladana dainai hisihisi oi davaria vadaeni. Bona lau diba oi hesiku lasi. ⁴ To inai gau tamona dekenai oi be kerere: Guna be lau oi lalokau henia bada, to hari be lasi. ⁵ Guna be kara namodia oi karaia, to inai kara oi rakatania, bona oi moru vadaeni. Unai dainai unai kara namodia dalana do oi laloka lou, bona oiemu lalona do oi giroa, ma oiemu kara gunadia do oi karaia lou. Bema oiemu lalona oi giroa lasi neganai, lau be do lau mai, oiemu lamepa be iena gabu dekena amo do lau kokia. ⁶ To oiemu namo sisina be inai: Nikolaita taudia edia kara oi badu henia noho, lau ese lau badu henia hegeregere.

⁷ “Mai ena taiana tauna, namona be Lauma Helaga ena hereva ekalesia oreadia dekenai do ia kamoni!

“Kwalimu taudia dekenai lau ese gwaumaoro do lau henia, mauri auna ena huahua do idia ania. Inai mauri auna be Dirava ena uma gabu dekenai ia gini noho.”

Hadibaia hereva: Semurana ekalesia oreana dekenai

⁸ “Semurana ekalesia oreana ena aneru dekenai inai hereva do oi torea:

“Ginigunana momokani bona dokona momokani, ia mase ma ia mauri lou, tauna ena hadibaia hereva be inai:

⁹ “Oiemu hisihisi bona metau lau diba. Lau diba oi be ogogami, to momokani oi be kohu momo tauna. Lau diba sibodia idia gwauraiia Iuda taudia ese oi idia hereva dika henia. Idia be Iuda taudia momokani lasi. Idia be Satani ena orea taudia. ¹⁰ Hisihisi do oi abia, to do oi gari henia lasi. Kamonai! Satani ese umui haida dibura ruma dekenai do ia koua, umui do ia dibaginia, bona dina 10 lalonai do umui hisihisi. Do umui gini goada noho, bona lau do umui badinaia noho ela bona mase, vadaeni lau ese umui emui kwalimu ahuna, mauri, umui dekenai do lau henia.

¹¹ “Mai ena taiana tauna, namona be Lauma Helaga ena hereva ekalesia oreadia dekenai do ia kamonai!

“Kwalimu taudia be mase iharuana ese idia do ia hadikaia lasi.”

Hadibaia hereva: Peregamo ekalesia oreana dekenai

¹² “Peregamo ekalesia oreana ena aneru dekenai inai hereva do oi torea:

“Tuari kaia mai matana, isena rua gauna ia abia tauna ena hadibaia hereva be inai: ¹³ Oiemu noho gabuna lau diba, Satani be king unai gabu dekenai. To lau oi badinaia momokani noho, bona oiemu abidadama lau dekenai oi dogoatao noho. Oibe, unai Satani ia noho gabuna dekenai lau ia gwauraiia hedinarai momokani tauna, Anetipa idia alai mase neganai, oiemu abidadama lau dekenai oi rakatania lasi.

¹⁴ “To inai gau haida dekenai oi be kerere. Umui emui huanai taunimanima haida ese Balama ena hadibaia hereva idia badinaia noho. Balama ena hadibaia hereva dainai, Balaki ese Israela taudia ia hakaudia kerere, vadaeni idia kara dika. Unai murinai Israela taudia ese kaivakuku dekenai idia henia vamuna idia ania, bona matabodaga karadia idia karaia. ¹⁵ Inai bamona danu, umui emui huanai, haida ese Nikolaita taudia edia hadibaia hereva idia badinaia noho. ¹⁶ Emui lalona do umui giroa. Bema lasi, umui dekenai do lau mai haraga, egu uduna dekenai tuari kaia dekena amo unai dika taudia do lau tuari henidia.

¹⁷ “Mai ena taiana tauna, namona be Lauma Helaga ena hereva ekalesia oreadia dekenai do ia kamonai!

“Kwalimu taudia dekenai mana haida, guba dekena amo ia mai aniani, hunia gauna do lau henia. Bona nadi kurokurona ta idia ta ta dekenai do lau henia. Unai nadi dekenai be ladana matamata ta ia torea, tau ta ia diba lasi gauna. Abia tauna sibona do ia diba.”

Hadibaia hereva: Tuatira ekalesia oreana dekenai

¹⁸ “Tuatira ekalesia oreana ena aneru dekenai inai hereva do oi torea: “Dirava ena Natuna, iena matana be lahi ena hururuhururu bamona, iena aena be kapa idia hagoevaia, vadaeni ia diaridiari bada bamona, iena hadibaia hereva be inai:

¹⁹ “Oiemu kara, oiemu lalokau, oiemu abidadama, oiemu hesiai gaukara, bona oiemu haheauka, ibounai lau diba. Lau diba danu oiemu kara be namo, guna bamona lasi. ²⁰ To inai gauna ta dekenai oi be oi kerere: Oi ese unai hahine, ladana Iesebele, ena kara dika oi koua lasi. Ia ese sibona ia gwauraiia peroveta hahine. Lauegu hesiai taudia dekenai ia ese ia hadibaia kerere, bona ia hakaudia kerere, vadaeni matabodaga kara idia karaia, bona kaivakuku dekenai henia vamuna idia ania.

²¹ Lau ese nega lau henia vadaeni iena lalona do ia giroa totona, to iena lebulebu karadia ia ura lasi rakatania. ²² Vadaeni, kamonai! Lau ese gorere bada mai hisihisi bada danu unai hahine do lau henia, iena heudahanai geda dekenai. Bona unai taudia, unai hahine danu idia heudahanai vadaeni, bema edia lalona idia giroa lasi, idia danu do lau hisihisi henia bada herea, unai geda dekenai. ²³ Unai hahine ena

murinai idia raka taudia danu do lau alaia mase. Vadaeni ekalesia ore a taudia ibounai do idia diba, lau be taunimanima ibounai edia laloa bona edia ura lau diba. Bona umui danu ta ta emui davana do lau henia, emui kara, emui kara hegeregere.

²⁴ “To umui Tuatira taudia momo ese unai hadibaia hereva umui badinaia lasi, bona Satani ena hunia momokani gaudia umui diba lasi. Umui dekenai lau hereva inai: Metau ma ta umui emui latanai do lau atoa lasi. ²⁵ To Dirava ese umui dekenai ia henia vadaeni gauna do umui dogoatao noho, ela bona umui dekenai lau mai. ²⁶ Kwalimu taudia, egu ura idia karaia noho ela bona dokona taudia, dekenai be sياهو, egu Tamana ese lau dekenai ia henia sياهو hegeregere, do lau henidia. Idia ese tanobada besedia do idia gunalaia. ²⁷ Auri itotohi dekena amo tanobada besedia do idia biagudia. Uro idia makohia kahana maragimaragi bamona, unai tanobada besedia do idia hamakohia maragimaragi. ²⁸ Bona daba ena hisiu bada danu, be idia dekenai do lau henia.

²⁹ “Mai ena taiana tauna, namona be Lauma Helaga ena hereva ekalesia oreadia dekenai do ia kamona!”

3

Hadibaia hereva: Sadi ekalesia oreana dekenai

¹ “Sadi ekalesia oreana ena aneru dekenai inai hereva do oi torea:

“Dirava ena lauma 7 bona hisiu 7 ia abia tauna ena hadibaia hereva be inai:

“Oiemu kara lau diba. Umui idia herevalaia, idia gwau, ‘Inai ekalesia ore ia mauri noho.’ To lasi, lau diba oi mase vadaeni. ² Unai dainai, mahuta dekena amo do oi noga! Oiemu kara, do ia mase ore lasi gauna, do oi hagoadaia, do ia mase momokani garina. Oiemu kara ibounai lau itaia vadaeni, to oiemu kara maoromaoro ta lau davaria lasi, egu Dirava ena vairana dekenai. ³ Guna oi ese Sivarai Namona oi abia dae namo herea. Unai hadibaia hereva ma do oi kamona henia lou, bona oiemu kara dika dekena amo oiemu lalona do oi giroa lou. Bema oiemu mahuta dekena amo oi noga lasi, lau be henaoa tauna bamona oi dekenai do lau mai. Lauegu hedinarai negana be do oi diba lasi. ⁴ To Sadi dekenai oi be mai oiemu taudia haida, idia edia dabua idia hamiroa lasi. Idia ese dabua kurokuro idia do karaia noho. Idia be lau danu do ai raka hebou, badina edia kara be hegeregere vadaeni. ⁵ Kwalimu taudia ese dabua kurokuro unai bamona do idia karaia, bona edia ladana danu be mauri buka dekena amo do lau kokia lasi. To egu Tamana ena vairanai, bona iena aneru edia vairanai, edia ladana be do lau gwauraia.

⁶ “Mai ena taiana tauna, namona be Lauma Helaga ena hereva ekalesia oreadia dekenai do ia kamona!”

Hadibaia hereva: Piladelepi ekalesia oreana dekenai

⁷ “Piladelepi ekalesia oreana ena aneru dekenai inai hereva do oi torea:

“Helaga bona hereva momokani tauna, ia ese Davida ena ki ia abia. Ia kehoa gauna, be ta ese do ia koua diba lasi, ma ia koua gauna, be ta ese do ia kehoa diba lasi. Inai tau ena hadibaia hereva be inai:

⁸ “Oiemu kara lau diba vadaeni. Lau diba oiemu sياهو be bada lasi, to egu hadibaia hereva be oi badinaia vadaeni, bona egu ladana be oi hunia lasi. Iduara ta oiemu vairanai lau kehoa vadaeni, tau ta ese do ia koua diba lasi. ⁹ Oi kamona! Haida be idia sibodia idia gwauraia Iuda taudia, to idia be Iuda taudia momokani lasi. Idia be Satani ena

orea taudia. Lau ese idia do lau guia, idia do lau hakaua, vadaeni oiemu aena badinai do idia tui diho. Vadaeni, do idia diba lau ese oi lau lalokau henia. ¹⁰ Guna lau ese oi lau oda henia do oi haheauka, bona inai oda be oi badinaia vadaeni. Unai dainai, tanobada do lau tohoa, bona tanobada taudia ibounai hisihisi dekena amo do lau tohoa neganai, oi do lau hamauria. ¹¹ Nega daudau lasi lalonai, oi dekenai do lau mai. Vadaeni oi dekenai ia noho gauna do oi dogoatao namonamo noho, tau ta ese mauri, oiemu kwalimu ahuna, do ia dadia garina. ¹² Kwalimu tauna be lauegu Dirava ena dubu ena du ta do lau halaoa, bona unai gabu do ia rakatania lasi. Lauegu Dirava ena ladana be unai kwalimu tauna ena latanai do lau torea, egu Dirava ena hanua ladana danu ia dekenai do lau torea, Ierusalemata matamatana. Unai hanua be guba dekena amo do ia diho, lauegu Dirava dekena amo. Unai tau ena latanai danu, egu ladana matamatana do lau torea.

¹³ “Mai ena taiana tauna, namona be Lauma Helaga ena hereva ekalesia oreadia dekenai do ia kamoni!”

Hadibaia hereva: Laodikea ekalesia oreana dekenai

¹⁴ “Laodikea ekalesia oreana ena aneru dekenai inai hereva do oi torea:

“Hereva momokani tauna, bona Dirava ena hereva ia gwaurea maoromaoro tauna, ia be Dirava ia karaia gaudia ena badina momokani. Inai tau ena hadibaia hereva be inai:

¹⁵ “Lau be oiemu kara lau diba. Lau diba oi be keru lasi, bona siahua lasi. Lau ura oi be keru momokani, o siahua momokani! ¹⁶ To lasi, oi be siahua sisina sibona, siahua lasi, keru lasi. Unai dainai lauegu uduna dekena amo oi do lau kanudia. ¹⁷ Oi be inai bamona oi hereva, oi gwau, ‘Lau be mai egu moni, bona gau ibounai lau dekenai be hegeregere vadaeni.’ To lasi. Oi diba lasi, to oi be namo lasi momokani, oi be bogahisihisi gauna, oi be ogogami, matakepulu, bona kopina kavakava. ¹⁸ Vadaeni, oi lau sisiba henia inai, lau dekena amo golo do oi hoia, lahi ese ia hagevaia vadaeni gauna, kohu momo do oi davaria totona. Bona dabua kurokuroa danu do oi hoia, do oi karaia, vadaeni dabua lasi totona do oi hemarai lasi. Matana muramura danu do oi hoia, unai muramura dekenai oiemu matana do oi dahua, vadaeni gau do oi itaia diba. ¹⁹ Lau ura henia taudia ibounai, be lau ese lau sisiba henia noho, bona lau matakani henia noho. Unai dainai, oiemu kara do oi laloa namonamo, kara namo do oi karaia mai goada danu, bona oiemu lalona do oi giroa. ²⁰ Kamoni! Lau be iduara dekenai lau gini noho, lau pidipidi noho. Lauegu gadona do ia kamoni henia, bona iduara do ia kehoa tauna, be ia dekenai do lau vareai, ia danu do ai aniani hebou. ²¹ Kwalimu taudia dekenai be lau ese gwaumaoro do lau henia, vadaeni idia ese lau danu egu helai gabuna badana latanai do ai helai hebou. Unai bamona danu, guna lau be lau kwalimu, bona harihari egu Tamana danu, iena helai gabuna badana latanai ai helai hebou noho.

²² “Mai ena taiana tauna, namona be Lauma Helaga ena hereva ekalesia oreadia dekenai do ia kamoni!”

4

Tomadiho karadia guba dekenai

¹ Inai murinai, lauegu matana lau negea lao, vadaeni guba dekenai iduara ta ia kehoa noho, be lau itaia. Vadaeni gado ta, kibi ena regena bamona, guna lau kamoni gauna, ese lau dekenai ia hereva henia, ia

gwau, “Oi daekau mai iniseni, vadaeni gabeai do idia vara momokani gaudia oi dekenai do lau hedinarai.” ² Nega tamona Lauma Helaga ese lau ia abia, vadaeni guba dekenai helai gabuna badana ta lau itaia, bona ia latanai tau ta ia helai. ³ Helai gabuna badana latanai ia helai tauna ena toana be iasipa bona sadio nadi edia diaridiari toana bamona. Bona kevau ese helai gabuna badana ia hagegea, lau itaia iena toana be samaragi nadi bamona. ⁴ Helai gabudia ibounai 24 ese unai helai gabuna badana idia hagegea, bona badana taudia 24 be unai helai gabudia latanai idia helai. Dabua kurokuro idia karaia, bona edia kwaradia latanai be edia dagi toana, golo kwara gaudia, idia noho. ⁵ Helai gabuna badana dekena amo, kevaru bona gado edia regena, bona guba ena boiboi ia mai. Helai gabuna badana ena vairanai, lamepa 7 idia arai noho, mai diaridiari bada, Dirava ena lauma 7 be inai. ⁶ Unai helai gabuna badana ena vairanai danu be davara ta ia noho, galasi gauna. Unai davara ena toana be hevarivari bamona.

Mauri gaudia 4 mai edia matana momo, edia vairana kahanai bona edia murina kahanai danu, be helai gabuna badana idia hagegea noho. ⁷ Mauri gauna ginigunana ena toana be laiona bamona, iharuana be boromakau tau bamona, ihatoina ena vairana be taunimanima ta ena vairana bamona, bona mauri gauna namba 4 ena toana be ugava manu ia roho noho bamona. ⁸ Inai mauri gaudia 4 ta ta edia hanina be 6, bona inai hanina be mai edia matana momo, lalonai bona murimurina. Idia be dina bona hanuaboi idia laga-ani lasi, idia hereva noho, idia gwau, “Helaga, Helaga, Helaga.

Lohiabada Dirava be mai Siahu Ibounai.
Gunaguna ia noho, harihari ia noho,
bona gabeai danu do ia mai.”

⁹ Inai mauri gaudia 4 ese ane idia abia noho. Mauri Hanaihanai Diravana be iena helai gabuna badana latanai ia helai noho, bona unai mauri gaudia ese ane dekena amo Dirava dekenai idia hanamo bada, idia tanikiu henia, bona hairai idia henia. Inai bamona idia karaia neganai, ¹⁰ inai badana taudia 24 ese helai gabuna badana latanai ia helai Diravana ena vairanai idia tui diho, idia tomadiho henia noho. Oibe, Mauri Hanaihanai Diravana ena vairanai idia tomadiho henia, bona edia kwara gaudia be helai gabuna badana ena vairanai idia negea diho, idia gwau,

¹¹ “Aiema Lohiabada, aiema Dirava e,
oi be hegeregere momokani vadaeni,
taunimanima ibounai ese hairai bona mataurai,
be oi dekenai do idia henia,
bona oiemu siahu henunai do idia noho.
Badina gau ibounai be oi ese oi havaraia.
Oiemu ura dainai oi karadia,
bona oiemu ura dainai idia noho.”

5

Ia koua momokani bukana, be Ioane ese ia itaia

¹ Buka ta lau itaia. Ia be helai gabuna badana latanai ia helai Diravana ena imana idibana ese ia dogoatao noho. Inai buka be mai toretore lalona kahanai, bona murimuri kahanai, bona ia be koua momokani, koua toana ibounai be 7. ² Vadaeni, aneru goadana ta lau itaia, ia hereva badabada, ia gwau, “Daika be hegeregere inai buka do ia kehoa, bona

inai koua toana 7 do ia makohia?” ³ To guba dekenai, bona tanobada dekenai, bona tanobada henunai, be ta ia goada lasi unai buka do ia kehoa. Unai dainai ta lasi inai buka ena lalona do ia itaia diba. ⁴ Lau be lau tai dikadika, badina be ta ena goada be hegeregere lasi buka do ia kehoa, bona buka ena lalona be ta ese ia itaia diba lasi. ⁵ Vadaeni, badana tauna ta ese lau dekenai ia hereva henia, ia gwau, “Oi tai lasi. Oi itaia! Iuda iduhuna ena Laiona, Davida ena natuna badana, ese kwalimu ia abia vadaeni. Ia ese unai koua toana 7 ia makohia diba, bona buka ia kehoa diba.”

Mamoe ena Natuna, be Ioane ese ia itaia

⁶ Vadaeni, Mamoe ena Natuna ta lau itaia, ia gini noho, to iena toana be, haida ese idia alaia mase bamona. Ia be helai gabuna badana ena huanai momokani ia gini, mauri gaudia 4, bona badana taudia ese ia idia hagegea. Bona Mamoe ena Natuna be mai ena doana 7 bona iena matana 7. Unai matana 7 be Dirava ena lauma 7, tanobada ena kahana ibounai dekenai ia siaia gaudia be unai. ⁷ Mamoe ena Natuna ia lao, helai gabuna badana dekenai ia helai Diravana ena imana idibana dekena amo, buka ia abia. ⁸ Buka ia abia neganai, mauri gaudia 4 bona badana taudia 24 be Mamoe ena Natuna ena vairanai idia tui diho. Idia ta ta be mai edia gita, bona mai edia golo uro dia. Unai uro ta ta be mai edia bonana namo muramura, kwalahu gauna. Unai muramura ena bonana namona be Dirava ena taudia edia guriguri ena toana. ⁹ Vadaeni mauri gaudia 4, bona badana taudia 24 ese ane matamata idia abia, inai bamona:

“Oi be hegeregere momokani buka do oi abia,
bona koua toana do oi hamakohia.
Badina be oi idia alaia mase,
bona oiemu rarana dekena amo taunimanima oi hoidia,
Dirava ena taudia do idia lao totona.
Bese ibounai, gado ibounai, hanua ibounai,
bona kopina idauidau taudia ibounai oi ese oi hoidia.
¹⁰ Oi ese idia oi haboua, vadaeni idia be Basileia ta.
Bona Dirava ena hahelagaia taudia,
be oi ese idia oi halaoa vadaeni,
bona idia ese tanobada do idia gunalaia.”

Ibounai ese Mamoe ena Natuna idia hanamoa bada

¹¹ Vadaeni, egu matana lau negea, bona aneru momo herea edia gadona lau kamona. Idia ese helai gabuna badana, mauri gaudia, bona badana taudia idia gini hagegea. Edia momo be duahia diba lasi, milioni bona milioni. ¹² Idia boiboi goada, idia gwau,
“Inai Mamoe ena Natuna, guna idia alaia mase,
ia be hegeregere momokani siahua bona kohu momo do ia abia.
Ia be hegeregere momokani aonega bada, bona goada bada,
mataurai, hairai bona hanamoa bada do ia abia!”
¹³ Bona Dirava ese ia karaia gaudia ibounai, guba dekenai, tanobada dekenai, bona tanobada henunai, bona davara dekenai, inai gabudia lalonai gau ibounai edia boiboi lau kamona, idia gwau,
“Helai gabuna badana dekenai ia helai Diravana,
bona Mamoe ena Natuna be,
hanamoa, bona hairai, bona mataurai, bona siahua do idia abia,
ela bona hanaihanai.”

14 Vadaeni unai mauri gaudia 4 idia gwau, "Amen." Bona badana taudia idia tui diho, idia tomadiho henia.

6

Mamoe ena Natuna ese buka ena koua toadia 7 ia makohia

¹ Vadaeni Mamoe ena Natuna lau itaia, ia ese buka ena koua toana ginigunana ia makohia, ia kehoa. Bona mauri gaudia 4 edia huanai, idia ta, iena gadona be guba ia boiboi bamona, ia gwau, "Oi mai." ² Vadaeni hosi kurokurona ta lau itaia. Hosi dekenai ia guia tauna be mai ena peva. Unai tau dekenai kwara gauna namona idia henia, vadaeni mai goada danu ia lao, do ia kwalimu totona.

³ Unai neganai Mamoe ena Natuna ese koua toana iharuana ia makohia. Ma mauri gauna iharuana lau kamoni, ia gwau, "Oi mai." ⁴ Vadaeni hosi kakakakana ta ia mai. Ia dekenai ia guia tauna be siahu idia henia, ia ese tanobada dekena amo maino do ia kokia, taunimanima sibodia ta ta do idia alaia mase totona. Unai tau dekenai tuari kaia badana ta idia henia.

⁵ Mamoe ena Natuna ese koua toana ihatoina ia makohia. Ma mauri gauna ihatoina lau kamoni, ia gwau, "Oi mai." Vadaeni lau itaia, hosi koremana ta ia hedinarai. Ia dekenai ia guia tauna ese metau hahetohoa gauna, sikele ta, iena imana dekenai ia dogoatao. ⁶ Gado ta, mauri gaudia 4 edia huanai dekena amo lau kamoni, ia gwau, "Uiti kilogaram ta sibona be dina ta ena gaukara davana, bona bali kilogaram toi sibona be dina ta ena gaukara davana. To olive dehoru bona uaina be do umui hadikaia lasi."

⁷ Ma Mamoe ena Natuna ese koua toana namba 4 ia makohia. Bona mauri gauna namba 4 lau kamoni, ia gwau, "Oi mai." ⁸ Vadaeni hosi ta lau itaia, ena kala be labora bamona. Ia dekenai ia guia tauna ena ladana be Mase, bona Mase Gabuna, Hel, be ia murinai ia lao. Idia ruaosi ese siahu idia abia, vadaeni tanobada ena taunimanima ibounai idia haria kahana 4. Vadaeni kahana ta be idia ese idia biagua. Unai kahana ena taunimanima idia alaia mase, tuari dekena amo, hitolo dekena amo, gorere dekena amo, bona dagedage gaudia dekena amo.

⁹ Vadaeni Mamoe ena Natuna ese koua toana namba 5 ia makohia. Pata helagana henunai be mase taudia haida edia lauma idia noho. Inai taudia be guna Dirava ena hereva idia harorolaia, bona mai edia lalona ibounai, inai hereva idia gwauraia hedinarai momokani. Unai dainai haida ese idia dagedage henidia, idia alaia, idia mase. ¹⁰ Inai lauma idia boiboi goadagoada, idia gwau, "Siahu Ibounai Lohiabada, helaga bona momokani, edena negai tanobada taudia do oi kota henia, edia davana do oi henia, aiemai rarana dainai?" ¹¹ Vadaeni idia ta ta dekenai dabua kurokuro idia henia. Ma gado ta ese idia ia hamaoroa, ia gwau, "Do umui laga-ani noho nega sisina, ela bona emui bamona haida bona emui tadikakadia haida do idia alaia mase, umui mase hegeregere. Bona unai bamona idia mase taudia edia momo be hegeregere neganai, Dirava ese emui rarana ena davana do ia henia."

¹² Mamoe ena Natuna lau itaia, ia ese koua toana namba 6 ia makohia. Vadaeni tano mareremarere bada ia vara, dina danu ia dibura, dabua koremakorema bamona, bona hua be kakakaka, rara bamona. ¹³ Hisiu danu be guba dekena amo tanobada dekenai idia moru, fig huahua, mage lasi gaudia, lai bada ia toa neganai, fig auna dekena amo idia moru bamona. ¹⁴ Guba danu ia lao ore, hegeregere geda idia lokua

noho bamona. Ororo bona motumotu ibounai danu edia gabu edia gabu dekena amo idia kokia. ¹⁵ Vadaeni tanobada ena king taudia bona lohia taudia, bona tuari biagudia, bona kohu momo taudia, bona goada taudia, bona hesiai mai guia danu taudia, bona ura kwalimu taudia, ibounai be nadi ena kohua dekenai, bona nadi badadia henunai idia hunia, ororo dekenai. ¹⁶ Idia ese ororo bona nadi badadia dekenai idia boiboi, idia gwau, “Umui ese aiemei latanai do umui moru diho, ai do umui hunia, helai gabuna badana dekenai ia helai Diravana ena vairana do ai itaia garina. Ai do umui hunia, Mamoe ena Natuna ena badu ese ai do ia abia garina! ¹⁷ Badina be idia ruaosi edia badu dinana badana ia ginidae vadaeni, bona daika do ia mauri noho diba?”

7

Israela taudia 144,000 ese Dirava ena maka idia abia

¹ Vadaeni aneru 4 lau itaia, tanobada ena kona 4 dekenai idia gini. Idia ese lai 4 edia toa dalana idia koua. Vadaeni lai ta be tanobada dekenai, o davara dekenai ia toa lasi, o au ta ena rauna ia hamarerea lasi. ² Ma aneru ta lau itaia, dina ia daekau kahana dekena amo ia daekau mai, ia ese Mauri Diravana ena koua toana badana ia dogoatao noho. Ia ese unai aneru 4 ia boiboi henidia badabada. Unai aneru 4 be Dirava ese siahu ia henidia vadaeni, tanobada bona davara do idia hadikaia totona. ³ Unai aneru ia gwau, “Tanobada bona davara bona au do umui hadikaia lasi, ela bona iseda Dirava ena hesiai taudia edia baguna dekenai Dirava ena maka do ita atoa.” ⁴ Vadaeni lau kamoni, Dirava ena maka idia abia taudia edia momo be 144,000. Idia be Israela bese taudia, edia iduhu 12 dekena amo, inai bamona:

⁵ Juda ena iduhu dekena amo be 12,000,
 Rubena ena iduhu dekena amo be 12,000,
 Gado ena iduhu dekena amo, be 12,000,
⁶ Asere ena iduhu dekena amo be 12,000,
 Napatali ena iduhu dekena amo be 12,000,
 Manase ena iduhu dekena amo be 12,000,
⁷ Simeona ena iduhu dekena amo be 12,000,
 Levi ena iduhu dekena amo be 12,000,
 Isakara ena iduhu dekena amo be 12,000,
⁸ Sebuluno ena iduhu dekena amo be 12,000,
 Iosepa ena iduhu dekena amo be 12,000,
 Beniamina ena iduhu dekena amo be 12,000.

Taunimanima momo herea

⁹ Inai murinai egu matana lau negea, taunimanima momo herea lau itaia, duahia diba lasi. Idia be bese idauidau, iduhu idauidau, kopina idauidau, bona gado idauidau. Idia ibounai be helai gabuna badana ena vairanai bona Mamoe ena Natuna ena vairanai idia gini. Edia dabua be kurokuro, bona edia imana dekenai pama au rauraudia idia dogoatao. ¹⁰ Idia boiboi badabada, idia gwau, “Taunimanima hamauria siahuna be iseda Dirava ena, helai gabu badana dekenai ia helai Diravana. Inai siahu be Mamoe ena Natuna ena danu.”

¹¹ Vadaeni, helai gabuna badana, bona badana taudia, bona mauri gaudia 4 idia hagegea aneru ibounai ese helai gabuna badana ena vairanai idia tui diho, Dirava dekenai idia tomadiho henia. ¹² Idia gwau, “Momokani! Iseda Dirava ita hanamo bada, bona iena hairaina ita gwauraia hedinarai badabada be namo! Iena aonega bona iena lalao

ibounai be namo herea dainai ita tanikiu henia, bona iena ladana ita hanamoa bada! Iena siahu bona goada be bada herea! Oibe, siahu ibounai be ia sibona ena, ela bona hanaihanai! Amen.”

Inai taunimanima momo edia hisihisi ia ore vadaeni

¹³Badana tauna ta ese lau ia nanadaia, ia gwau, “Inai dabua kurokuro idia karaia taudia be daika? Bona edeseni dekena amo idia mai?”

¹⁴Vadaeni lau haere, lau gwau, “Tau badana e, oi diba, to lau diba lasi.”

Ma ia ese lau ia hamaoroa, ia gwau, “Inai taudia be dagedage taudia ese idia hisihisi henia bada herea. To unai dagedage idia hanaia vadaeni, mai mauri danu. Bona idia ese edia dabua idia huria vadaeni Mamoe ena Natuna ena rarana lalonai, vadaeni edia dabua be kurokuro bona goeva momokani. ¹⁵Unai dainai idia be Dirava ena helai gabuna badana ena vairanai idia gini noho. Dina bona hanuaboi idia ese Dirava ena hesiai gaukara idia karaia noho, iena dubu helaga lalonai. Helai gabuna badana dekenai ia helai Diravana be idia dekenai ia noho, bona ia ese idia ia naria noho. ¹⁶Idia be do idia hitolo lou lasi, do idia ranu mase lou lasi, dina, o siahu gauna ta ese idia do ia araia lasi. ¹⁷Badina be Mamoe ena Natuna, helai gabuna badana ena huanai ia noho, ese idia do ia naria. Ia ese mauri ranuna, ia lohilohi gauna, dekenai do ia hakaudia lao. Bona Dirava ese edia taitai ena ranu ibounai edia matana dekena amo do ia dahua ore.”

8

Buka koua toana namba 7 ia makohia

¹Mamoe ena Natuna ese koua toana namba 7 ia makohia, vadaeni guba dekenai be regerege ta lasi, hora ena kahana ta bamona. ²Vadaeni Dirava ena vairanai idia gini aneru 7 lau itaia, idia dekenai kibi 7 idia henia.

³Ma aneru ta ia mai, pata helagana badibadinai ia gini. Iena imana dekenai be golo uro ta. Unai uro be, ia lalonai muramura mai bonana namo, idia gabua gauna. Vadaeni idia ese muramura mai bonana namona momo unai aneru dekenai idia henia. Unai aneru ese unai muramura bona Dirava ena taudia edia guriguri be ia haboua tamona. Vadaeni inai boubou gauna tamona be Dirava dekenai ia henia. Henia gabuna be golo pata helagana latanai, Dirava ena helai gabuna badana ena vairanai. ⁴Vadaeni muramura mai bonana ena kwalahu, Dirava ena taudia edia guriguri danu, be aneru ena imana dekena amo ia daekau, Dirava ena vairanai. ⁵Vadaeni aneru ese golo uro ia abia, pata helagana ena lahi dekena amo ia hahonua, bona tanobada dekenai ia negea diho. Vadaeni guba ia boiboi ena regena, gado edia regena, kevaru, bona tano mareremarere bada idia vara.

Aneru 4 ese kibi idia hiriria

⁶Vadaeni aneru 7 idia gini hegaegae, edia kibi do idia hiriria totona.

⁷Aneru ginigunana ese iena kibi ia hiriria, vadaeni medu, aisi nadi bamona, bona lahi, rara danu idia mikisi, be tanobada dekenai idia diho. Unai neganai tanobada ena tano kahana toi dekena amo kahana ta ia araia ore, bona au ibounai edia ore toi dekena amo ore ta idia araia ore, bona tanobada ena rei kasiri ibounai ia araia ore.

⁸Aneru iharuana ese iena kibi ia hiriria. Vadaeni gau ta, iena toana be ororo bada herea mai lahi danu bamona be davara dekenai idia negea diho. Davara ena kahana toi dekena amo kahana ta be rara dekenai ia

halaoa. ⁹ Davara ena gwarume orea toi dekena amo orea ta idia mase vadaeni. Bona sisima orea toi dekena amo orea ta idia mutu vadaeni.

¹⁰ Aneru ihatoina ese iena kibi ia hiriria. Hisiu bada herea ta guba dekena amo ia moru diho, ia hururuhururu, kede badana bamona. Sinavai ibounai edia orea toi dekena amo sinavai orea ta edia latanai unai hisiu ia moru, bona lohilohe ranudia ibounai edia orea toi dekena amo orea ta edia latanai danu ia moru. ¹¹ Unai hisiu ena ladana be “Mamina Dika.” Unai ranu ibounai ena kahana toi dekena amo ranu ena kahana ta be unai mamina dika ese ia abia. Bona unai ranu idia inua dainai, taunimanima momo herea idia mase, badina iena mamina be ia dika.

¹² Aneru namba 4 ese iena kibi ia hiriria, vadaeni dina bona hua bona hisiu ibounai idia haria kahana toi. Vadaeni idia ese dina ena kahana ta, hua ena kahana ta, bona hisiu edia kahana ta idia hadikaia. Vadaeni diari ena nega idia haria kahana toi. Bona diari ena kahana ta ia dibura. Unai dainai dina ena kahana ta be ia diari lasi, bona hanuaboi danu ena kahana ta be unai bamona ma ia dibura lao.

¹³ Vadaeni ugava manu ta lau itaia, ataia momokani ia roho noho. Bona iena gadona lau kamoni. Ia boiboi badabada, ia gwau, “Tanobada taudia ibounai madi o, madi o, madi o! Badina be aneru toi, edia kibi idia do noho. Vadaeni edia kibi ena regena idia hiriria neganai, hisihisi bada tanobada taudia ese ma do idia abia.”

9

Aneru namba 5 ese kibi ia hiriria

¹ Aneru namba 5 ese iena kibi ia hiriria. Vadaeni hisiu ta lau itaia, guba dekena amo ia moru diho tanobada dekenai. Inai hisiu dekenai ki idia henai. Ki be dobu masemase gurina kehoa gauna. ² Hisiu ese dobu masemase gurina ia kehoa. Vadaeni kwalahu be guri dekena amo ia daekau, amu badana ena kwalahu bamona. Inai guri dekena amo ia daekau kwalahuna ese dina bona guba padana idia koua, vadaeni idia dibura. ³ Vadaeni kwalahu dekena amo kwadi idia diho mai tanobada dekenai. Bona idia ese tanobada doadoa edia siahu hegeregere idia abia. ⁴ Oda hereva inai bamona idia abia, “Umui ese rei do umui hadikaia lasi, tano dekenai idia tubu avadia bona au danu do umui hadikaia lasi. To umui ese Dirava ena maka edia baguna dekenai idia abia lasi taudia sibona do umui hadikaia. ⁵ Umui ese inai taudia do umui hisihisi henai ia lao bona hua 5, to umui ese idia do umui alaia lasi.” Vadaeni inai kwadi ese taunimanima idia hisihisi henai dikadika. Unai hisihisi be tanobada doadoa edia koria hisihisi bamona. ⁶ Unai hua 5 lalonai, taunimanima ese mase do idia tahua, to do idia davaria lasi. Idia be mase do idia ura dikadika, to mase ese idia dekena amo do ia heau siri bamona.

⁷ Inai kwadi edia toana be tuari hosi bamona. Edia kwarana latanai be golo kwarana gaudia bamona. Edia vairana be taunimanima edia vairana bamona. ⁸ Edia huina be hahine edia huina bamona. Edia isena be laiona edia isena bamona. ⁹ Edia kemena dekenai be palaka gaudia, auri bamona, idia noho. Edia hanina edia regena be kariota edia regena bamona, hosi momo ese idia veria gaudia, tuari dekenai idia heau vareai neganai. ¹⁰ Edia iuna be doadoa edia iuna bamona, mai ena koria gauna, doadoa bamona. Edia siahu, taunimanima do idia hisihisi henai gura 5, be edia iuna dekenai ia noho. ¹¹ Idia be mai edia king. Ia be guri dobu masemase ena aneru. Iena ladana Heberu gado dekenai be Abadoni, to

Helene gado dekenai iena ladana be Apoliona, ena anina be “Hadikaia Tauna.”

¹² Dika ta ia ore vadaeni. Rua be idia do noho.

Aneru namba 6 ese kibi ia hiriria

¹³ Aneru namba 6 ese iena kibi ia hiriria. Vadaeni gado ta lau kamona, golo pata helagana ena kona 4 dekena amo. Inai pata helagana be Dirava ena vairanai ia noho. ¹⁴ Unai gado ese aneru namba 6 ia hamaoroa, ia gwau, “Aneru 4, Euperate Sinavai badana ena isena dekenai idia guia noho, be do oi ruhaia.” ¹⁵ Vadaeni unai aneru 4 be ia ese ia ruhaia. Unai aneru 4 be idia abia hegaegae, unai hora, unai dina, unai hua, unai lagani, gaukara ta do idia karaia totona. Edia gaukara be inai: Tanobada ena taunimanima orea toi dekena amo orea ta be do idia alaia mase. ¹⁶ Idia edia tuari taudia, hosi dekenai idia guia taudia, be ibounai 200 milioni. Edia momo be gado ta ese lau ia hamaoroa.

¹⁷ Vadaeni, egu mata hanai lalonai unai hosi, mai edia guia taudia lau itaia. Unai taudia ese kemena auri edia kemena dekenai idia atoa. Unai auri edia kala be kakakaka, lahi bamona, bona bulu bona labora, salipa nadi bamona. Hosi edia kwarana be laiona edia kwarana bamona, bona edia uduna dekena amo, lahi bona kwalahu bona salipa idia negea murimuri kahana dekenai. ¹⁸ Inai dika badadia toi dainai, tanobada taudia ibounai kahana toi dekena amo, kahana ta idia mase. Inai lahi bona kwalahu, bona salipa, unai hosi ese edia uduna dekena amo idia negea gaudia, ese unai taudia idia alaia mase. ¹⁹ Hosi edia sياهو be edia uduna bona edia iuna dekenai. Edia iuna be gaigai bamona, mai edia kwarana, bona unai kwarana dekena amo taunimanima idia hisihisi henia.

²⁰ Tanobada taudia oredia, inai hisihisi ese ia hamasea lasi taudia, be edia lalona idia giroa lasi, bona edia imana idia karaia gaudia dekena amo idia raka siri lasi. Idia ese lauma dikadia tomadiho henia karana idia rakatania lasi. Golo bona siliva bona kapa bona nadi bona au dekena amo idia karaia kaivakuku tomadiho henia kara idia hadokoa lasi. Inai kaivakuku gaudia ese gau idia itaia diba lasi, idia kamona diba lasi, bona idia be raka diba lasi gaudia. ²¹ Oibe, unai dika taudia ese edia ala-ala, bona edia babalau, bona edia heudahanai, bona edia henaoa karadia danu dekena amo edia lalona idia giroa lasi.

10

Aneru ese Ioane dekenai buka ia henia, vadaeni ia ania

¹ Vadaeni aneru goadana ma ta lau itaia, guba dekena amo ia diho. Ori ta ese ia kumia, dabua bamona, bona kevau ese iena kwarana ia hagegea. Iena vairana be dina bamona, bona iena aena edia toana be du, lahi ese idia ia araia noho, mai hururuhururu bada danu. ² Aneru ena imana dekenai be buka maragina ta ia noho, ia kehoa noho. Vadaeni aneru ese iena aena idibana be davara dekenai ia atoa, bona iena aena laurina be tanobada dekenai ia atoa. ³ Ia boiboi bada herea, iena gadona be laiona edia boiboi bamona. Ia boiboi murinai, guba ena boiboi ibounai 7, mai regena bada be aneru dekenai idia haere henia. ⁴ Inai guba boiboi idia hereva neganai, lau ese edia hereva lau torea gwaurai. To gado ta guba dekena amo lau kamona, ia gwau, “Inai guba boiboi ena hereva do oi torea lasi. Do oi hunia noho.”

⁵ Vadaeni davara bona tanobada dekenai ia gini aneruna ese iena imana idibana ia duduia guba dekenai. ⁶ Ia ese ia mauri noho hanai-hanai Diravana ena ladana dekenai gwauhamata metauna ia gwauraia. Inai Dirava ese guba bona iena lalonai gaudia ibounai, bona tanobada bona iena lalonai gaudia ibounai, bona davara bona iena lalonai gaudia ibounai ia karaia. Aneru ia gwau, “Nega ena dokona be ia kahirakahira momokani. Dirava ese ma nega sisina do ia naria lasi. ⁷ Aneru namba 7 ese iena kibi do ia hiriria gwauraia neganai, Dirava ese iena palani, hunia gauna, do ia karaia haorea. Dirava ese inai palani ena anina, be guna iena hesiai taudia peroveta taudia dekenai ia hamaoroa.”

⁸ Vadaeni unai gado, guna guba dekena amo lau kamoni gauna, ese lau dekenai ia hereva henia lou, ia gwau, “Oi lao, davara bona tanobada dekenai ia gini aneru ena imana dekenai ia noho buka maragina, kehoa gauna, do oi abia.”

⁹ Unai aneru dekenai lau lao, lau gwau, “Buka maragina lau dekenai oi henia.” Vadaeni ia gwau, “Oi abia, oi ania ore, oiemu bogana dekenai iena mamina do ia dika, to oiemu uduna dekenai iena mamina be do ia namo, hani bamona.”

¹⁰ Vadaeni buka maragina aneru ena imana dekena amo lau abia, lau ania ore. Lauegu uduna dekenai ia be namo, hani bamona, to lau ania ore murinai, egu bogana ena mamina lau abia be ia dika.

¹¹ Vadaeni ia ese lau ia hamaoroa, ia gwau, “Taunimanima idauidau, bese idauidau, gado idauidau bona king idauidau danu, inai taudia ibounai dekenai do idia vara gaudia do oi gwauraia hedinarai lou.”

11

Uitnesi taudia rua

¹ Vadaeni itotohi ta, iena toana be hahetoho auna, lau dekenai idia henia, idia gwau, “Oi lao, Dirava ena dubu helaga bona pata helagana edia bada do oi hahetoho karaia. Bona dubu helaga lalonai idia tomadiho noho taudia do oi duahia. ² Dubu helaga ena ariara, murimuri magu ese ia hagegea gauna, be do oi hahetoho karaia lasi. Badina unai gabu be Dirava diba lasi taudia edia. Idia ese hanua helagana dekenai do idia mai, edia aena dekena amo do idia moia, hua 42 lalonai. ³ Lau ese egu uitnesi taudia rua dekenai siahu do lau henia. Vadaeni idia ese puse dabua do idia karaia, bona dina 1260 lalonai Dirava ena peroveta hereva do idia gwauraia hedinarai.”

⁴ Inai uitnesi taudia rua be olive audia rua bona lamepa rua, tanobada ena Lohiabada ena vairanai idia gini noho. ⁵ Tau ta bema ia ura unai uitnesi ruaosi do ia hadikaia neganai, idia ese edia uduna dekena amo lahi do idia negea, unai tau do idia arai ore. Vadaeni, bema tau ta ese unai uitnesi taudia ia alaia toho neganai, ia be do ia mase momokani. ⁶ Unai uitnesi ruaosi be mai edia siahu guba do idia koua, vadaeni edia haroro dinadia lalonai medu do ia diho lasi. Idia be mai siahu danu tanobada ena ranu be rara dekenai do idia halaoa. Mai edia siahu danu, hisihisi idauidau dekena amo tanobada taudia do idia hisihisi henia. Inai bamona idia karaia diba nega momo, edia ura hegeregerena.

⁷ Edia peroveta hereva gwauraia hedinarai gaukara ia ore neganai, unai dagedage gauna dikana, be guri dobu masemase dekena amo do ia daekau mai. Vadaeni ia ese idia ruaosi do ia tuari henia. Unai dagedage gauna be do ia kwalimu, ia ese unai uitnesi taudia ruaosi do ia aladia

mase. ⁸ Vadaeni ruaosi edia tauanidia be hanua badana ena ariara dekenai do idia hekure noho. Unai gabu be edia Lohia idia hasatauroa gabuna. Unai hanua badana ena ladana, parabole dekenai, be Sodoma, o Aigupito. ⁹ Vadaeni dina toi mai dina kahana lalonai, taunimanima idauidau momo, bese idauidau, gado idauidau, kopina idauidau taudia ese unai uitnesi ruaosi edia tauanina do idia itaia noho. Bona unai taunimanima ese haida edia dala do idia koua, vadaeni ruaosi edia tauanina idia guria diba lasi. ¹⁰ Bona tanobada taudia be idia ruaosi edia mase dainai do idia moale bada. Edia turana ta ta dekenai harihari gaudia do idia henia, edia moale hedinarai ena toana. Badina korikori be unai peroveta taudia ruaosi ese tanobada taudia idia hisihisi henia bada herea dainai.

¹¹ To dina toi mai dina kahana ta ia ore, Dirava ese mauri ena laga idia ruaosi dekenai ia siaia lao, idia lalonai inai laga ia vareai. Vadaeni ruaosi idia toreisi, idia gini. Unai kara idia itaia taudia idia gari bada herea. ¹² Unai neganai unai peroveta taudia ruaosi ese gado ta guba dekena amo idia kamonai, ia hereva badabada, idia ia boiboi henia. Ia gwau, "Umui daekau mai iniseni." Vadaeni idia ruaosi ori ta lalonai guba dekenai idia daekau. Idia badu henidia taudia ese ruaosi idia itaia, idia daekau lao noho. ¹³ Vadaeni, unai nega korikori, nega tamona, tano mareremarere badana ta ia vara. Unai hanua kahana 10 dekena amo, kahana ta ia hadikaia ore. Bona tano mareremarere dainai, taunimanima 7000 idia mase momokani. Taunimanima oredia, idia mauri noho taudia ese idia gari dikadika, bona guba ena Dirava ena siahu idia hanamo bada.

¹⁴ Dika iharuana be ia ore vadaeni. Ihatoina be kahirakahira do ia mai.

Kibi namba 7

¹⁵ Aneru namba 7 ese iena kibi ia hiriria. Vadaeni gado badadia guba dekenai idia hereva, idia gwau, "Tanobada biagua siahuna be iseda Lohiabada bona iena Keriso idia abia vadaeni. Bona Lohiabada ese tanobada do ia biagua momokani, ela bona hanaihanai." ¹⁶ Vadaeni badana taudia 24, Dirava ena vairanai edia helai gabudia dekenai idia helai taudia, ese idia tui diho, Dirava idia tomadiho henia, idia gwau, ¹⁷ "Lohiabada e, Siahu Ibounai Diravana, harihari oi noho, gunaguna oi noho.

Ai ese oi ai tanikiu henia.

Oi ese oiemu siahu bada oi gaukaralaia vadaeni, bona oiemu Basileia oi biagua hamatamaia vadaeni.

¹⁸ Dirava diba lasi taudia idia badu dikadika, badina be oiemu badu ena nega ia ginidae vadaeni.

Mase taudia edia kota henia nega danu ia ginidae vadaeni.

Oiemu hesiai taudia, peroveta taudia,

be harihari edia davana namona do oi henia.

Oi dekenai idia gari henia taudia ibounai, badadia bona maragidia,

edia davana namona do oi henia ena nega danu,

be ia ginidae vadaeni.

Harihari be tanobada idia hadikaia vadaeni taudia do oi alaia ore."

¹⁹ Vadaeni Dirava ena dubu helaga guba dekenai be ia kehoa, bona Dirava ena Taravatu Maua be dubu helaga lalonai ia hedinarai. Unai neganai kevaru, bona guba ena boiboi, bona tano mareremarere badana, bona medu, aisi nadi bamona, idia vara.

12

Hahine bona huala badana

¹ Vadaeni hoa kara badana ta guba dekenai ia hedinarai. Hahine ta, iena dabua be dina, bona hua be iena aena henunai ia noho, bona hisiu 12 ese iena kwarana idia hagegea. ² Ia be rogorogo, bona iena mara be kahirakahira, vadaeni hisihisi dainai ia tai mai boiboi bada danu.

³ Ma hoa kara badana ta guba dekenai ia hedinarai. Huala badana ta, kakakaka gauna, iena kwarana be 7, bona iena doana be 10. Iena kwara gaudia be 7, iena kwarana ta ta edia latanai. ⁴ Huala ese iena iuna dekena amo guba ena hisiu momo ia daroa, vadaeni tanobada dekenai idia moru. Hisiu ibounai orea toi dekena amo hisiu orea ta ia botai, idia moru diho. Unai huala ese, unai do ia mara hahine ena vairanai ia gini hegaegae noho. Ia naria noho, ela bona unai hahine ese mero do ia havaraia, ia ese mero do ia ania totona. ⁵ Vadaeni hahine ia mara, mero ta ia abia. Unai mero ese vaira neganai auri itotohi dekena amo bese ibounai do ia gunalaia. To hahine ia mara, be nega tamona iena mero idia abia daekau Dirava dekenai, bona Dirava ena helai gabuna badana dekenai. ⁶ Unai neganai unai hahine be taunimanima idia noho lasi gabuna dekenai ia heau lao, Dirava ese ia karaia hegaegae gabuna dekenai ia noho. Unuseni be dina 1260 lalonai unai hahine do idia ubua bona naria.

Guba dekenai tuari ia vara

⁷ Vadaeni guba dekenai tuari ia vara. Mikaela mai ena aneru momo danu ese huala idia tuari henia. Huala mai ena aneru momo danu ese Mikaela idia tuari henia. ⁸ To huala ena goada hegeregere lasi dainai ia kwalimu lasi. Unai dainai huala mai ena aneru be dala lasi guba dekenai do idia noho. ⁹ Vadaeni unai huala badana, be Dirava ena aneru ese idia negea diho. Ia be unai idaunegai gaigaina, bona iena ladana be Diabolo bona Satani. Ia be tanobada taudia ibounai ia koia noho gauna. Oibe, ia, mai ena aneru ibounai danu, be idia ese tanobada dekenai idia negea diho.

¹⁰ Unai neganai lau kamoni, gado badana guba dekenai ia boiboi, ia gwau, “Harihari iseda Dirava ena hamauria ia ginidae vadaeni. Harihari iena Keriso ese iena siahu ia hedinarai vadaeni. Badina be unai samania tauna ese Dirava ena vairanai, dina bona hanuaboi, guna ia gini, iseda varavara ia samania, be hari aneru ese idia negea vadaeni. Guba dekena amo ia idia negea diho vadaeni. ¹¹ Iseda varavara ese Mamoe ena Natuna ena rarana dainai, bona iena hereva idia gwauraia dainai, Satani dekena amo idia kwalimu. Bona edia tanobada mauri idia laloa momo lasi, to Keriso dainai edia mauri idia atoa diho. ¹² Guba e, bona guba lalonai noho taudia e! Unai kara dainai do umui moale bada! To tanobada bona davara, madi o, nega dika bada do umui davaria! Badina be Satani ese umui dekenai ia lao vadaeni, mai ena badu dikadika. Ia badu, badina ia diba iena nega be ia kwadogi sibona.”

Huala ese tanobada ia tuari henia

¹³ Huala ia diba, tanobada dekenai ia idia negea diho neganai, ia ese unai mero ia havaraia hahine ia lulua hamatamaia. ¹⁴ To ugava manu ese iena hanina rua unai hahine dekenai idia henia, vadaeni ia ese unai huala dekena amo ia roho lao taunimanima noho lasi gabuna dekenai, iena gabu korikori dekenai. Unuseni lagani toi mai kahana ta do idia ubua bona naria, bona huala ese unuseni do ia hadikaia diba lasi.

¹⁵ Vadaeni huala ese hahine ia lulua, bona iena uduna dekena amo ranu ia negea, sinavai ia abata bamona, unai abata ese hahine do ia abia, do ia haboioa ore totona. ¹⁶ To tanobada ese hahine ia durua. Tanobada ese iena uduna ia kehoa bamona, unai huala ia negea ranuna, be tanobada ese ia hadonoa ore. ¹⁷ Vadaeni huala ese unai hahine ia badu henia dainai, ia lao, hahine ena natuna oredia, idia do noho taudia, ia tuari henia. Unai taudia be inai: Idia ese Dirava ena taravatu idia badinaia momokani. Bona Iesu ena hereva momokani idia gwauraia hedinarai, ma idia badinaia danu. ¹⁸ Vadaeni huala ese davara ena kone dekenai ia gini.

13

Dagedage gauna davara dekena amo ia daekau mai

¹ Dagedage gauna ta lau itaia, davara dekena amo ia daekau, iena doana be 10, bona iena kwarana be 7. Iena doana edia duduna dekenai be kwara gaudia, dagi toana, idia noho, ibounai 10. Bona iena kwarana ta ta dekenai ladana idia torea, inai ladana ibounai edia anina be Dirava hadikaia hereva gaudia. ² Inai dagedage gauna lau itaia, iena toana be lepadi bamona, to iena aena be bea ena aena bamona. Iena uduna be laiona ena uduna bamona. Huala ese sibona ena siahu inai dagedage gauna dekenai ia henia. Ma sibona ena helai gabuna badana, bona ena goada bada herea danu ia henia. ³ Iena kwarana ta lau itaia, iena toana be idia haberoa dikadika, mase berona bamona, to unai bero be ma ia namo lou vadaeni. Tanobada taudia ibounai ese inai dagedage gauna dekenai idia hoa bada, bona iena murinai idia raka. ⁴ Bona tanobada taudia ibounai ese huala idia tomadiho henia, badina be ia ese unai dagedage gauna dekenai iena siahu ia henia dainai. Dagedage gauna danu idia tomadiho henia, idia gwau, “Daika be inai dagedage gauna hegeregerena? Daika ese ia tuari henia diba?”

⁵ Dirava ese ia koua lasi dainai, unai dagedage gauna ese iena uduna dekenai Dirava hadikaia hereva momo herea ia gwauraia. Unai bamona siahu ia abia dainai, unai dagedage gauna ese tanobada ia gunalaia hua 42 lalonai. tanobada ia gunalaia hua 42 lalonai. ⁶ Unai dagedage gauna ese iena uduna ia kehoa, Dirava ia hereva dika henia. Dirava ena ladana, bona Dirava ena noho gabuna, bona guba dekenai idia noho taudia ibounai be dagedage gauna ese ia hadikaia dikadika. ⁷ Dirava ese ia koua lasi dainai dagedage gauna ese Dirava ena taudia ia tuari henia, bona idia dekena amo ia kwalimu. Siahu danu ia abia, iduhu ibounai, bese ibounai, gado ibounai, bona kopina ibounai taudia, ia ese idia ia gunalaia. ⁸ Tanobada noho taudia ibounai, edia ladana be mauri buka dekenai idia torea lasi taudia ese, unai dagedage gauna do idia tomadiho henia. Inai mauri buka be Mamoe ena Natuna ena. Tanobada ia do karaia lasi neganai, Dirava ia diba unai Mamoe ena Natuna be do idia alaia mase.

⁹ Mai ena taiana tauna, be mani do ia kamona! ¹⁰ Bema Dirava ena ura be tau ta dibura ruma dekenai do idia atoa, ia be idia ese dibura ruma dekenai do idia atoa. Bona bema Dirava ena ura be tau ta tuari kaia dekena amo do idia alaia mase, ia be tuari kaia dekena amo do idia alaia mase. To hisihisi inai bamona ia vara neganai, Dirava ena bese taudia ese edia haheauka bona edia abidadama do idia dogoatao auka noho be namo.

Dagedage gauna ma ta tano lalona dekena amo ia daekau mai

¹¹ Vadaeni dagedage gauna ma ta lau itaia, tano ena lalona dekena amo ia daekau mai. Iena doana be rua, mamoe ena natuna ena doana toana bamona. To iena gadona be huala badana ena gadona bamona. ¹² Inai dagedage gauna iharuana ese dagedage gauna ginigunana ena siahu ibounai ia gaukaralaia, ia vairanai. Ia ese danu tanobada, bona tanobada noho taudia ibounai ia oda henidia, unai dagedage gauna ginigunana do idia tomadiho henia. Unai dagedage gauna ginigunana, be unai iena mase berona ia namo lou gauna. ¹³ Dagedage gauna iharuana ese hoa kara badadia ia karaia. Ia ese lahi, be guba dekena amo ia hadiho taunimanima ibounai edia vairanai. ¹⁴ Unai ia abia siahuna dekena amo, ia ese hoa karadia dagedage gauna ginigunana ena vairanai ia karaia. Bona unai hoa karadia dainai, ia ese tanobada taudia ibounai ia koia momokani. Ia ese tanobada taudia ia hamaoroa, unai dagedage gauna, mai ena mase berona, to ia mauri noho gauna, iena laulau do idia karaia, iena ladana hanamoa totona. ¹⁵ Bona siahu ia abia, vadaeni dagedage gauna iharuana ese unai dagedage gauna ena laulauna dekenai, mauri ena lagana ia henia, vadaeni ia hamauria, bona ia hereva diba. Siahu danu unai laulau dekenai ia henia, vadaeni laulau do idia tomadiho henia lasi taudia ibounai, be ia ese do ia aladia mase.

¹⁶ Vadaeni dagedage gauna iharuana ese, taunimanima ibounai, maragidia bona badadia, kohu momo taudia bona ogogami taudia, hesiai mai guia taudia, bona ura kwalimu taudia, maka ta idia dekenai ia atoa. Ia oda henidia, inai maka be edia imana idiba kahana dekenai, o edia baguna dekenai, do idia atoa. ¹⁷ Vadaeni bema tau ta ese inai dagedage gauna ena maka, iena ladana, o iena namba, ia abia lasi neganai, unai tau be gau ta ia hoia mai o hoia lao diba lasi.

¹⁸ Umui ese inai hereva do umui laloe namonamo. Mai ena aonega tauna ese inai dagedage gauna ena namba do ia duahia namonamo, badina inai namba be tau ta ena ladana. Iena namba be inai: 666.

14

Mamoe ena Natuna, mai ena bese taudia

¹ Ma lau itaia, Mamoe ena Natuna be Siona Ororo dekenai ia gini. Ia danu be taunimanima 144,000 idia gini, iena ladana, bona iena Tamana ena ladana be idia baguna dekenai Dirava ese ia torea. ² Vadaeni guba dekena amo gado ta lau kamoni. Inai gado be sinavai momo edia ranu idia heau haraga ena regena bamona, bona guba ena boiboio bada bamona. Unai gado danu be gita taudia momo edia gita idia gadara nega tamona bamona. ³ Inai taunimanima 144,000 ese ane matamata idia abia, Dirava ena helai gabuna badana vairanai, bona mauri gaudia 4, bona badana taudia edia vairanai. Unai ane be tau ta ia davarua diba lasi, unai taunimanima 144,000 sibona. Dirava ese unai taudia tanobada dekena amo ia hamauria. ⁴ Inai taudia be hahine danu idia sihari lasi momokani. Idia be helaga bona goevagoeva. Idia ese Mamoe ena Natuna murinai idia raka, iena loaloa gabudia ibounai. Taunimanima ibounai edia huanai dekena amo Dirava ese idia ia hoia vadaeni. Bona idia be taunimanima ginigunadia Dirava bona Mamoe ena Natuna ese idia abia, edia. ⁵ Koikoio hereva nega ta idia gwaurua lasi, idia be kerere lasi momokani.

Aneru toi ese hereva idia gwaurua

⁶ Vadaeni aneru ma ta lau itaia, guba ena atai ai ia roho lao. Iena gaukara be, noho hanaihanai Sivarai Namona do ia gwaurai hedinari. Taunimanima ibounai dekenai ia gwaurai, bese ibounai, iduhu ibounai, gado ibounai bona kopina idauidau ibounai taudia. ⁷ Ia boiboi goadagoada, ia gwau, “Dirava do umui gari henia, ia do umui hanamo bada, badina be Dirava ese taunimanima ibounai do ia kota henia ena nega ia ginidae vadaeni. Guba bona tanobada, bona davara, bona ranu guridia ibounai ia karaia Diravana do umui tomadiho henia.”

⁸ Vadaeni aneru ma ta, iharuana, be unai aneru ginigunana ena murinai ia roho mai, ia gwau, “Babulonia badana be ia moru vadaeni! Oibe, unai hanua badana ia dika vadaeni. Oibe, Babulonia ese bese ibounai dekenai iena uaina aukana ia henidia, ia hakaudia kerere, vadaeni iena heudahanai karadia idia karaia. To harihari Babulonia ia moru vadaeni, ia moru momokani!”

⁹ Ma aneru ta, ihatoina, unai aneru ruaosi edia murinai ia roho mai, ia boiboi bada, ia gwau, “Tau ta ese, bema dagedage gauna mai ena laulauna danu ia tomadiho henia, bona unai gauna ena maka be iena baguna dekenai, o iena imana dekenai do ia abia, ¹⁰ unai tau ese uaina auka herea do ia inua. Inai uaina be Dirava ena badu, bona Dirava ese ranu dekena amo iena uaina ia hamanokaia lasi. Lasi momokani. Dirava ese iena badu be kapusi dekenai ia bubua, vadaeni unai tau ese do ia inua. Oibe, unai bamona idia karaia taudia be lahi bona salipa nadina ese edia siahua dekena amo do idia hisihisi henidia bada, aneru helagadia bona Mamoe ena Natuna edia vairana dekenai. ¹¹ Idia do ia hisihisi henia lahi ena kwalahu, be ia daekau lao noho hanaihanai. Unai dagedage gauna mai ena laulauna idia tomadiho henia, bona iena maka idia abia taudia be laga-ani do idia abia lasi. Dina bona hanuaboi do idia hisihisi, doko lasi.”

¹² To inai bamona ia vara neganai, Dirava ena bese taudia do idia gini goada be namo. Dirava ena bese taudia be inai: Dirava ena taravatu idia badinaia, bona Iesu idia abidadama henia mai momokani danu.

Abidadama lalonai idia mase taudia be do idia moale

¹³ Vadaeni gado ta, guba dekena amo lau kamoni, ia gwau, “Inai hereva do oi torea: Harihari ia lao, Lohiabada idia abidadama henia noho neganai idia mase taudia be do idia moale.”

Ma Lauma Helaga danu ia hereva, ia gwau, “Oibe, idia ese edia gaukara mai hekwarahi dekena amo do idia laga-ani, bona idia be do idia laga-ani kava lasi. Badina be edia kara namodia ena sivarai, be idia danu nega tamona do ia lao noho.”

Tanobada ena anina utua negana ia ginidae vadaeni

¹⁴ Laegu matana lau negea lou, ori kurokurota ta lau itaia, bona ta, iena toana be Taunimanima ena Natuna bamona, be ori latanai ia helai. Iena kwarana dekenai be golo kwara gauna ia noho, bona iena imana dekenai be kaia badana ta mai matana ia dogoatao. ¹⁵ Vadaeni aneru ma ta dubu helaga dekena amo ia raka mai, ori latanai ia helai tauna dekenai ia boiboi badabada, ia gwau, “Oiemu kaia badana harihari do oi gaukaralaia, badina be anina utua negana be ia ginidae vadaeni, tanobada ena anina ia mage vadaeni.” ¹⁶ Unai neganai ori latanai ia helai tauna ese iena kaia badana ia gaukaralaia, tanobada ena anina ia utua haorea.

¹⁷Vadaeni aneru ma ta guba ena dubu helaga dekena amo ia raka mai. Ia danu iena imana dekenai kaia badana mai matana ia dogoatao.

¹⁸Ma aneru ta be pata helagana dekena amo ia raka mai. Unai aneru be mai ena sياهو lahi do ia gaukaralaia. Ia ese unai kaia badana mai matana ia dogoatao aneruna ia boiboi henia badabada, ia gwau, “Oiemu kaia badana harihari do oi gaukaralaia, tanobada ena vain huahua do oi utua vain dekena amo, badina idia mage vadaeni.” ¹⁹Vadaeni aneru ese iena kaia badana ia gaukaralaia tanobada dekenai. Tanobada ena vain huahua ia utua oho, bona uaina moia gabuna badana, semensi tanika bamona gauna lalonai ia negea vareai. Inai moia gabuna be Dirava ena badu, sياهو dikadika. ²⁰Unai vain huahua be moia gabuna dekenai idia moia haorea. Unai moia gabuna be hanua ena murimurinai. Vadaeni unai moia gabuna dekena amo rara ia heau lao, ela bona kilomita 300, rara ena dobu danu be mita rua hegeregerena.

15

Aneru 7 ese hisihisi 7 do idia atoa tanobada dekenai

¹Unai murinai toa gauna badana ma ta guba dekenai lau itaia, bona lau hoa bada. Aneru 7 ese hisihisi havaraia gaudia ibounai 7 idia dogoatao. Idia be hisihisi dokona gaudia. Inai idia ore neganai, hisihisi haida ma do idia vara lasi. Inai hisihisi 7 ese Dirava ena badu do idia haorea momokani.

²Bona davara ta lau itaia, hevarivari bamona, to mai ena lahi toana danu. Bona inai danu lau itaia, taunimanima ore ta unuseni idia gini. Unai davara hevarivari bamona ena badinai idia gini. Unai taudia be dagedage gauna mai ena laulauna dekena amo idia kwalimu vadaeni. Oibe, idia ese unai dagedage gauna mai ena ladana, unai namba gauna, idia halusia vadaeni. Bona Dirava ese gita idia ta ta dekenai ia henia, edia imana dekenai idia dogoatao. ³Idia ese Dirava ena hesiai tauna Mose ena ane idia abia, bona Mamoe ena Natuna ena ane danu. Inai ane be inai bamona ia gwau,

“Lohiabada Dirava e,
Sياهو Ibounai Dirava e,
oiemu gaukara be bada herea momokani.

Oiemu hoa karadia be idau momokani.

Oi be bese ibounai edia King!

Oiemu kara ibounai be maoromaoro bona momokani.

⁴Lohiabada e, daika ese oi dekenai do ia gari henia lasi?

Daika ese oiemu ladana do ia hanamoa lasi?

Badina be oi sibona be helaga.

Bese ibounai oi dekenai do idia mai,

oi dekenai do idia tomadiho henia,

badina be oiemu kara maoromaoro be ibounai idia itaia vadaeni.”

⁵Unai murinai lau itaia, guba ena dubu helaga ia kehoa. Ia lalonai ia noho palai dubu, Dirava ena Hereva Momokani gwauraia hedinari gabuna danu ia kehoa. ⁶Unai aneru 7, hisihisi havaraia gaudia 7 idia dogoatao anerudia be dubu helaga dekena amo idia raka mai. Idia ese davana bada dabua goevagoevadia, bona kurokuro momokani idia karaia. Golo beleta be edia kemena dekenai idia kwatua. ⁷Unai neganai mauri gaudia 4 edia huanai dekena amo, idia ta ese aneru 7 dekenai golo disi 7 ia henia. Inai disi be Noho Hanaihanai Diravana ena badu dekenai idia honu momokani. ⁸Vadaeni Dirava ena hairaina bona iena

siahu edia kwalahu ese unai dubu helaga ia hahonua. Bona tau ta be unai dubu helaga do ia raka vareai diba lasi. Lasi momokani. Do idia naria ela bona unai hisihisi 7, aneru 7 ese do idia havaraia gaudia, be do idia karaia haorea.

16

Disi 7, Dirava ena badu toana

¹ Vadaeni, gado badana ta lau kamoni guba ena dubu helaga dekena amo, unai aneru 7 dekenai ia hereva henia, ia gwau, “Umui lao, unai disi 7, Dirava ena badu toana, do umui bubua diho tanobada dekenai.”

² Aneru ginigunana ese ia lao, iena disi tanobada dekenai ia bubua. Dagedage gauna ena maka idia abia taudia, bona dagedage gauna ena laulauna idia tomadiho henia taudia ibounai ese toto dikadia mai hisihisi danu idia abia.

³ Aneru iharuana ese iena disi davara dekenai ia bubua. Vadaeni davara ena ranu be mase tauna ena rarana hegeregere ia lao. Bona davara lalonai idia noho gaudia ibounai idia mase vadaeni.

⁴ Aneru ihatoina ese iena disi sinavai bona ranu guri dekenai ia bubua. Vadaeni idia be rara dekenai idia lao. ⁵ Vadaeni ranu ia biagua noho aneru ena gadona lau kamoni, ia gwau,

“Helaga Diravana e, gunaguna oi noho, harihari oi noho.

Oiemu kota henia karadia be maoromaoro momokani.

⁶ Badina be taunimanima ese Dirava ena helaga taudia, bona peroveta taudia edia rarana idia habubua.

Unai dainai unai taunimanima dikadia dekenai rara oi henia, idia inua totona.

Edia kara hegeregere, mamina idia abia inai!”

⁷ Unai neganai gado ma ta pata helagana dekena amo lau kamoni, ia gwau,

“Lohiabada Dirava e, Siahu Ibounai Diravana e, momokani, oiemu kota henia kara be momokani bona maoromaoro.”

⁸ Vadaeni aneru namba 4 ese iena disi be dina ena latana ia bubua. Bona Dirava ese ia koua lasi dainai, dina ese taunimanima ia arai, lahi bamona. ⁹ Siahu bada herea ese taunimanima ia arai dikadika. Vadaeni idia ese Dirava ena ladana idia hadikaia dikadika, badina be ia be mai ena siahu unai hisihisi do ia havaraia, o do ia koua. To unai taunimanima ese edia dika dekena amo edia lalona idia giroa lasi. Bona idia ese Dirava ena ladana idia hanamoia lasi.

¹⁰ Vadaeni aneru namba 5 ese dagedage gauna ena helai gabuna badana latana iena disi ia bubua. Dibura ese unai dagedage gauna ena basileia ia koua. Bona iena taudia ese hisihisi dainai edia malana idia korua. ¹¹ Bona guba ena Dirava idia hereva dika henia, edia hisihisi bona edia toto dainai. To edia kara dikadia dekena amo edia lalona idia giroa lasi.

¹² Unai neganai aneru namba 6 ese iena disi be sinavai badana, ladana be Euperate, lalonai ia bubua. Vadaeni ranu ia ore, sinavai ia kaukau. Bona dina daekau kahana dekena amo king do idia mai dalana ia kehoa vadaeni. ¹³ Vadaeni lauma dikadia toi lau itaia, edia toana be paroparo bamona. Idia ese huala badana ena uduna dekena amo, bona dagedage gauna ena uduna dekena amo, bona peroveta koikoi tauna ena uduna dekena amo idia mai noho. ¹⁴ Idia be lauma dikadia momokani, mai edia siahu hoa kara do idia karaia. Idia be tanobada edia king ibounai dekenai idia lao. Vadaeni unai king ibounai be do idia haboua, Siahu

Ibounai Diravana ena Dina Badana neganai, be do idia tuari hebou totona.

¹⁵ “Kamonai! Lau be henaoga tauna bamona umui dekenai do lau mai. Ia noga noho, bona iena dabua ia atoa hegaegae noho tauna be namo. Ia namo lasi, mai kopina kavakava do ia loaloa, badina be unai bamona iena hemarai do ia hedinaraiia garina.”

¹⁶ Unai lauma dikadia ese king ibounai idia haboua gabu ta dekenai. Inai gabu ena ladana Heberu gado dekenai be Aramagedono.

¹⁷ Vadaeni aneru namba 7 ese iena disi be ataiai, guba ena hodahoda dekenai ia bubua. Unai neganai guba ena dubu helaga ena helai gabuna badana dekena amo gado badana ta ia hereva badabada, ia gwau, “Ia ore vadaeni.” ¹⁸ Vadaeni kevaru, bona guba boiboi ena regena bada, bona tano mareremarere bada herea momokani idia vara. Unai tano mareremarere be idau momokani, tanobada ia karaia negana ia mai bona hari, be ta unai bamona ia vara lasi. Ia sibona be dika herea. ¹⁹ Unai hanua badana, be ia parara, kahana toi, bona bese ibounai edia hanua badadia be idia makohia ore. Ma Dirava ese unai Babulonia badana ia lalao, bona iena badu toana kapusi Babulonia dekenai ia henia. Vadaeni Dirava ena badu siahu herea uaina be unai hanua dikana ese ia inua ore. ²⁰ Motumotu ibounai idia mutu ore, bona ororo ibounai danu be idia ore vadaeni. ²¹ Bona medu, aisi nadi badadia bamona idia diho. Inai aisi nadi ta ta edia metau be 50 kilogaram bamona, guba dekena amo idia moru diho, taunimanima edia latanai. Vadaeni taunimanima ese Dirava idia hereva dika henia, unai medu, aisi nadi bamona dainai. Badina unai be hisihisi dika herea momokani dainai.

17

Ariara hahine badana

¹ Unai disi 7 idia bubua aneruna ta be lau dekenai ia mai, ia gwau, “Oi mai, ariara hahine badana do idia panisia dalana oi dekenai do lau hedinaraiia. Ia be unai hanua badana, sinavai momo edia badinai idia haginia hanuana. ² Tanobada ena king ese ia danu matabodaga karadia idia karaia. Bona tanobada noho taudia ese iena matabodaga uaina idia inua, vadaeni idia kekeru.”

³ Unai neganai Lauma Helaga ese lau ia abia, bona unai aneru ese taunimanima noho lasi tano dekenai lau ia abia lao. Unusenai hahine ta, dagedage gauna kakakakana ta ena latanai ia helai, be lau itaia. Unai dagedage gauna ena kwarana be 7, bona iena doana be 10. Ia latanai be Dirava hadikaia ladana momo herea idia torea. ⁴ Unai hahine ena dabua kala be kakakaka, bona ma sisina kakakaka. Iena herahera gaudia be golo, davana bada nadidia, bona davana bada kavabukavabu. Iena imana dekenai golo kapusi ia dogoatao. Kapusi be iena matabodaga gau dika rohorohodia bona gau mirodia dekenai ia honu. ⁵ Hahine ena baguna dekenai be ladana ta ia torea. Inai ladana ena anina be hunia gauna: “Babulonia badana, ariara hahine ibounai bona tanobada ena kara mirodia ibounai edia sinana.” ⁶ Bona lau itaia, unai hahine be ia kekeru vadaeni. Momokani, ia ese Dirava ena taudia edia rarana, bona Iesu idia badinaia dainai idia alaia mase taudia edia rarana ia inua dainai, unai hahine ia kekeru.

Lau itaia neganai lau hoa dikadika. ⁷ Aneru ese lau ia nanadaia, ia gwau, “Badina dahaka oi hoa noho? Inai hahine ena sivarai, hunia gauna, bona ia latanai hahine ia helai dagedage gauna, mai ena kwarana 7 bona doana 10, inai sivarai oi dekenai do lau hamaoroa. ⁸ Inai

dagedage gauna oi itaia, be gunaguna ia noho, to harihari ia noho lasi. To nega daudau lasi, ia be guri dobu masemase gabuna dekenai amo do ia daekau, vadaeni mase hanaihanai gabuna dekenai do ia lao. Tanobada dekenai noho taunimanima, idia momo be Dirava ese edia ladana mauri buka lalonai ia torea lasi, tanobada ia karaia neganai ia mai bona hari. Inai bamona taudia ese unai dagedage gauna do idia itaia, bona do idia hoa bada. Badina be inai: Guna be ia noho, hari be ia mauri noho lasi, to gabei ma do ia hedinarai mai.

⁹ “Aonega tauna be inai gauna ena anina do ia diba: Inai kwara 7 be ororo 7, hahine be idia latanai ia helai. ¹⁰ Bona unai kwara 7 danu be king 7. Idia 5 be idia moru vadaeni. Idia ta be harihari king dagi ia dogoatao noho. To ta be king dagi ia do abia lasi. Do ia hedinarai neganai, do ia king nega sisina sibona. ¹¹ Bona inai dagedage gauna, guna be ia noho, to hari be ia noho lasi, ia be king namba 8. To ia be idia edia orea tauna ta, bona ia be mase hanaihanai gabuna dekenai do ia lao.

¹² “Iena doana 10, oi itaia gaudia, be king 10, to edia basileia idia do abia lasi. Idia ese unai dagedage gauna danu king siahuna do idia abia, hora tamona sibona. ¹³ Inai king 10 ibounai edia lalona be tamona, vadaeni edia siahu bona dagi be unai dagedage gauna dekenai do idia henia. ¹⁴ Idia ese Mamoe ena Natuna do idia tuari henia, to Mamoe ena Natuna be do ia kwalimu. Badina be inai: Ia be lohia ibounai edia Lohia, bona king ibounai edia King. Iena kwalimu, be Mamoe ena Natuna idia badinaia taudia, bona ia idia abidadama henia taudia ese danu do idia abia nega tamona, idia be ia ese ia abia hidi vadaeni taudia.”

¹⁵ Bona aneru ese lau ia hamaoroa, ia gwau, “Oi itaia ranu momo gabudia, hahine be idia dekenai ia helai gabudia. Idia be tano idauidau taudia, bese idauidau taudia, kopina idauidau taudia, bona gado idauidau taudia. ¹⁶ Bona dagedage gauna mai ena doana 10, oi itaia vadaeni gaudia, ese ariara hahine do idia badu henia. Do idia hadikaia momokani, iena dabua do idia kokia, kopina kavakava do idia rakatania. Vadaeni iena tauanina do idia ania, bona lahi dekenai do idia gabua. ¹⁷ Oibe, Dirava ese iena palani be unai king 10 edia lalona dekenai do ia atoa. Vadaeni mai edia lalona tamona idia ese edia dagi siahuna be dagedage gauna dekenai do idia henia. Unai bamona do idia karaia, ela bona Dirava ese iena hereva ibounai do ia hamomokania vadaeni.

¹⁸ “Bona hari oi itaia hahine be unai hanua badana, tanobada ena king ibounai ia ese ia biagua hanuana.”

18

Babulonia do ia moru momokani

¹ Inai murinai, aneru ma ta lau itaia, guba dekena amo ia diho mai. Ia be mai ena siahu bada herea, bona iena hairai ese tanobada ibounai ia hadiaria. ² Ia boiboi badabada, ia gwau, “Babulonia badana be ia moru vadaeni. Io, unai hanua badana be ia dika vadaeni.

Lauma dikadia edia noho gabuna dekenai ia halaoa vadaeni.

Satani ena lauma dikadia be ia lalonai idia noho.

Manu dikadia bona manu dagedagedia,

be iena ruma lalonai idia noho.

³ Badina be bese ibounai ese iena uaina idia inua vadaeni.

Unai uaina be iena matabodaga karadia.

Tanobada ena king ese,

mai matabodaga danu ia idia sihari henia vadaeni,
 bona tanobada ena hoihoi taudia ese,
 Babulonia ena lebulebu karadia dekena amo kohu momo idia davaria.”

⁴ Vadaeni gado ta guba dekena amo lau kamoni, ia gwau,
 “Lauegu orea taudia e,
 ia dekena amo do umui raka siri,
 ia danu do umui kara dika hebou garina,
 bona ia danu panisi do umui abia hebou garina!
⁵ Badina Babulonia ena kara dikadia be momo herea momokani,
 ororo bamona idia daekau lao, ela bona guba dekenai.

Bona Dirava ese,
 Babulonia ena kara dikadia do ia laloabojo lasi.
⁶ Umui ese unai hahine dikana ena kara dika do umui laloa,
 bona iena kara hegeregere, davana do umui henia.
 Iena kara dika ena davana do umui henia nega rua.
 Ia ese uaina auka momokani haida dekenai ia henia.
 Vadaeni umui ese unai uaina do umui ha-aukaia nega rua,
 bona ia dekenai do umui henia, do ia inua.

⁷ Ia ese sibona ia habadaia,
 bona lebulebu idauidau ia karaia momo.
 Vadaeni umui ese hisihisi bona tai do umui henia momo,
 iena lebulebu ia karaia momo hegeregere.
 Badina be sibona dekenai ia hereva, ia gwau,
 ‘Lau be kwini,
 bona lauegu helai gabuna badana dekenai lau helai.
 Lau be vabu lasi.
 Lau dekenai be metau ta do ia mai lasi dainai,
 lau be do lau tai lasi.’

⁸ Unai bamona ia laloa dainai,
 dina tamona lalonai,
 hisihisi idauidau ia dekenai do idia ginidae,
 gorere, lalohisihisi, bona hitolo bada.
 Lahi ese do ia araia ore,
 badina be Lohiabada Dirava,
 unai lebulebu hahine ia kota henia Diravana,
 be mai ena siahu bada.”

⁹ Tanobada ena king taudia be Babulonia danu matabodaga bona lebulebu idia karaia hebou. Vadaeni Babulonia hanua be Dirava ese ia araia, bona unai lahi ena kwalahu idia itaia neganai, unai king taudia be do idia taitai bada. ¹⁰ Iena hisihisi do idia abia garina, daudau dekena amo do idia gini. Do idia gwau,
 “Madi o, madi o, Babulonia e,
 hanua bada herea, goada hanuana,
 hora tamona lalonai, oiemu kerere davana oi abia vadaeni.”

¹¹ Tanobada ena hoihoi taudia danu be ia dainai do idia taitai, bona do idia lalohisihisi. Badina be edia kohu be tau ta ese do ia hoia lou lasi.
¹² Inai kohu be golo bona siliva, nadi namo hereadia, kavabukavabu, davana bada dabua, bona dabua kakakaka idauidau, siliki dabuadia, au namodia idauidau, elefante doana dekena amo idia karaia herahera gaudia, bona au dekena amo idia karaia korokoro gaudia, bona kapa, auri bona nadi kurokuro dekena amo idia karaia herahera gaudia. ¹³ Ma kohu haida inai bamona: Muramura namodia idauidau, kinamono, aniani mamina hanamoa muramura, kwalahu mai bonana

namona ia havaraia muramurana, muramura mai ena bonana namona, bona kopina dahua muramura namona, uaina bona olive dehoru, paraoa bona uiti, boromakau bona mamoe, hosi bona kariota, bona hesiai mai guia taudia, bona taunimanima edia lauma danu.

¹⁴ Hoihoi taudia ese Babulonia idia hamaoroa, idia gwau,
 “Kohu namodia, guna oi ura henia dikadika gaudia,
 be idia ese oi idia rakatania.

Oiemu moni, ma oiemu hairai ibounai idia ore vadaeni,
 bona idia do oi davaria lou lasi.”

¹⁵ Unai hoihoi taudia, idia ese moni momo unai hanua lalonai idia davaria. Idia be daudau dekenai do idia gini, Babulonia ena hisihisi idia danu do idia abia garina. Do idia lalohisihisi bada, bona do idia tai. ¹⁶ Do idia gwau,

“Madi o, madi o, hanua badana.

Guna ia ese davana bada dabuadia,
 bona kakakaka kala rua dabuadia ia karaia,
 golo, bona nadi namo herea,
 bona kavabukavabu herahera gau namodia ia atoa.

¹⁷ To hora tamona lalonai, iena kohu ibounai idia ore vadaeni.”

Bona bouti badadia edia kapena taudia, bona bouti badadia dekenai idia guia taudia, bona bouti badadia edia kuru taudia, bona edia moni be davara dekena amo idia davaria taudia, be daudau dekenai idia gini.

¹⁸ Lahi ese Babulonia ia araia noho idia itaia neganai, idia edia lalona idia hisihisi bona idia taitai, idia gwau,

“Tanobada lalonai hanua ta ese unai hanua ia hereaia diba, a?”

¹⁹ Vadaeni tano ena kahu be edia kwarana dekenai idia negea, idia tai, idia tai mai boiboio bada danu, idia gwau,

“Hanua badana madi o, madi o!

Iena kohu momo dekena amo,
 bouti badadia taudia ese edia moni bada idia davaria,
 to hora tamona lalonai,
 iena kohu ibounai idia boio vadaeni!

²⁰ Guba lalonai noho taudia e,
 Babulonia ena moru do umui moalelaia,
 Dirava ena helaga taudia,

bona aposetolo taudia bona peroveta taudia,
 do umui moale bada,

badina be umui dekenai Babulonia ese ia karaia hegeregereana,
 Dirava ese Babulonia ena dika davana ia henia vadaeni.”

²¹ Inai hereva ia ore murinai aneru goadana ta ese nadi badana ta, iena toana be uiti ia moia nadina bamona, ia abia. Inai nadi ia abia isi, davara dekenai ia negea diho. Vadaeni aneru ia gwau,

“Babulonia hanua badana,
 unai bamona, mai dagedage danu, oi do idia negea diho,
 vadaeni taunimanima ese oi do idia itaia lou lasi.

²² Gita idia gadaralaia, bona ane idia abia taudia,
 ivilikou idia gadaralaia, bona kibi idia hiriria taudia,
 oiemu lalona dekenai edia regena do idia kamoni lou lasi.

Gaukara idau idia diba taudia be,
 edia gaukara do idia karaia lou lasi oiemu lalona dekenai.

Uiti moia nadi ena gaukara ena regena be,
 oiemu lalona dekenai do idia kamoni lou lasi.

²³ Lamepa ena diari be,

oiemu lalona dekenai do idia hedinarai lou lasi.
 Headava matamata tauna bona hahine,
 oiemu lalona dekenai edia gadona do idia kamona lou lasi.
 Madi, oiemu hoihoi taudia,
 guna idia be tanobada ena tau badadia momokani.
 To oiemu meamea karadia ese bese ibounai idia koia.
²⁴Oibe, Babulonia be Dirava ese ia panisia,
 badina be ia ese peroveta taudia ia alaia mase.
 Ia ese Dirava ena helaga taudia edia rarana ia habubua,
 bona tanobada dekenai idia alaia mase taudia ibounai,
 edia rarana be,
 ia lalonai idia davaria vadaeni.”

19

Kwalimu ane idia abia guba dekenai

¹ Inai murinai regena ta lau kamona. Regena be taunimanima momo herea guba dekenai idia noho edia gadona. Idia boiboi, idia gwau,
 “Aleluia! Dirava ita hanamoa!
 Hamauria, bona hairai, bona siahu,
 be iseda Dirava dekenai idia noho.
² Badina be iena kota henia kara be momokani bona maoromaoro.
 Ia ese ariara hahine badana ia kota henia vadaeni.
 Unai hahine ese,
 iena matabodaga kara dekena amo tanobada ia hadikaia.
 Dirava ese ia panisia,
 badina be unai hahine ese,
 Dirava ena hesiai taudia ia alaia mase dainai.”
³ Idia boiboi lou, idia gwau,
 “Aleluia! Dirava ita hanamoa!
 Unai hanua badana ia araia lahi ena kwalahu,
 be ia daekau lao noho hanaihanai.”
⁴ Bona badana taudia 24, bona mauri gaudia 4 ese helai gabuna badana dekenai ia helai Diravana ena vairanai idia tui diho, idia tomadiho henia. Idia gwau, “Amen. Dirava ita hanamoa!”

Mamoe ena Natuna ena headava aria

⁵ Vadaeni gado ta, helai gabuna badana dekena amo ia mai, ia gwau,
 “Dirava ena hesiai taudia ibounai e,
 bona ia dekenai idia gari henia taudia badadia bona maragidia ibounai danu,
 iseda Dirava do umui hanamoa.”
⁶ Vadaeni regena ta lau kamona, taunimanima momo herea edia gado regena bamona. Edia regena be sinavai momo edia ranu idia heau haraga ena regena bamona, bona guba ena boiboi bada bamona. Unai taudia idia gwau,
 “Aleluia! Dirava ita hanamoa!
 Lohiabada iseda Dirava,
 Siahu Ibounai Diravana, ia sibona be King.
⁷ Do ita moale, do ita moale bada!
 Ia sibona do ita hanamoa!
 Badina be Mamoe ena Natuna ena headava negana,
 be ia ginidae vadaeni,
 bona iena adavana be headava totona ia hegaegae vadaeni.
⁸ Davana bada dabua kurokuro,
 namo herea momokani ia karaia vadaeni,

Dirava ese ia henia gauna.”

Inai dabua be goevagoeva bona ia diaridiari. Unai be Dirava ena helaga taudia edia kara namodia ena toana.

⁹ Vadaeni unai aneru ese lau ia hamaoroa, ia gwau, “Inai hereva do oi torea: Mamoe ena Natuna ena headava aria dekenai idia boiboi taudia be do idia moale bada.” Ma aneru ia gwau, “Inai be Dirava ena hereva momokani.”

¹⁰ Lau be iena aena badinai lau tui diho, ia do lau tomadiho henia totona. To lau dekenai ia hereva henia, ia gwau, “Unai bamona oi karaia lasi, lau danu be hesiai tauna. Lau be oiemu gaukara hebou tauna, bona oiemu varavara. Lau be Iesu ena hereva idia gwaauraia hedinarai bona badinaia taudia ibounai edia varavarana. Dirava sibona do oi tomadiho henia. Badina be hereva momokani, Iesu ia hedinaraiia gauna, ese peroveta taudia ibounai edia lauma ia hasiahua noho.”

Hosi kurokurona latanai ia guia tauna

¹¹ Vadaeni guba lau itaia ia kehoa, bona hosi kurokurona ta ia hedinarai. Hosi latanai ia guia tauna ena ladana be “Abidadama” bona “Momokani.” Ia ese taunimanima ia kota henidia, o bema tuari ia karaia neganai, ia be mai kara maoromaoro danu ia karaia noho. ¹² Iena matana be lahi ena hururuhururu bamona. Iena kwarana latanai be kwara gaudia momo. Iena kopina latanai be ladana ta ia torea, to ia torea hereva be tau ta ia diba lasi, ia sibona ia diba. ¹³ Ia ese ia karaia dabua be rara lalonai idia atoa diho vadaeni gauna. Unai tau ena ladana be “Dirava ena Hereva.” ¹⁴ Guba ena tuari oreadia be ia murinai idia lao. Hosi kurokurodia latanai idia guia, bona davana bada dabuadia, goevagoeva bona kurokuro, idia karaia. ¹⁵ Edia gungalaiia tauna ena uduna dekena amo be tuari kaia ta mai matana ia dudua maoromaoro. Inai tuari kaia dekena amo ia ese tanobada bese ibounai tuari dekenai do ia halusia. Ia ese idia do ia biagua auka herea, iena auri itotohi dekena amo. Ia ese tanika badana, vain huahua moia gabuna dekenai, uaina ena ranu do ia gigia murimuri dekenai. Inai moia gabuna be Siahu Ibounai Dirava ena badu, siahu dikadika. ¹⁶ Unai gungalaiia tauna ena dabua bona iena mamuna dekenai be iena ladana ia torea. Inai ladana be inai bamona: “King ibounai edia King, bona lohia ibounai edia Lohia.”

¹⁷ Inai murinai aneru ta lau itaia, dina ena latanai ia gini. Ia boiboi badabada, guba ena atai dekenai idia roho manudia dekenai ia boiboi, ia gwau, “Umui mai, Dirava ena aria badana dekenai do umui haboua mai. ¹⁸ King edia tauanina, bona tuari biagudia edia tauanina, bona tuari taudia edia tauanina, bona hosi edia tauanina, bona hosi dekenai idia guia taudia edia tauanina, bona taunimanima ibounai, ura kwalimu taudia, bona hesiai mai guia taudia, badadia bona maragidia, edia tauanina do umui ania.”

¹⁹ Vadaeni dagedage gauna, bona tanobada ena king taudia mai edia tuari oreadia lau itaia. Idia haboua, unai hosi kurokuro latanai ia guia tauna mai ena tuari ore do idia tuari henia totona. ²⁰ Unai neganai guba tuari oreadia ese unai dagedage gauna idia dogoatao, bona unai peroveta koikoi tauna danu idia dogoatao, idia ruaosi idia guia. Unai peroveta koikoi tauna ese guna, hoa kara momo unai dagedage gauna ena vairanai ia karaia. Unai hoa karadia dekena amo, ia ese dagedage gauna ena maka idia abia taudia ia koidia, bona dagedage gauna ena laulau dekenai idia tomadiho henia taudia danu ia koidia.

Unai dagedage gauna bona peroveta koikoi tauna ruaosi be idia do mauri noho neganai, lahi gohuna dekenai idia negea diho. Unai be salipa ia araia noho gabuna, guri badana ta. ²¹ To hosi kurokurona dekenai ia guia tauna ese iena uduna dekenai tuari kaia dekena amo dagedage gauna ena tuari taudia ibounai ia alaia mase. Bona atai dekenai idia roho manudia ibounai ese unai mase taudia edia tauanina idia ania, idia boga kunu momokani.

20

Aneru ese Satani ia guia lagani 1000

¹ Vadaeni aneru ta lau itaia, guba dekena amo ia diho. Iena imana dekenai guri dobu masemase ena ki ia dogoatao, bona auri seini badana ta danu. ² Inai aneru ese unai huala, unai idaunegai gaigaina, ma iena ladana be “Diabolo” bona “Satani,” ia dogoatao, seini dekenai ia guia. Vadaeni do ia guia noho, ela bona lagani 1,000 idia ore. ³ Aneru ese unai huala be guri dobu masemase lalonai ia negea diho. Vadaeni unai guri ia lokaia, bona koua toana ia karaia. Satani be unai bamona ia koua, tanobada bese do ia koia diba lasi totona, lagani 1000 lalonai. Unai lagani 1000 idia ore neganai idia ese Satani ma do idia ruhaia lou nega sisina sibona.

Keriso do ia lohia, lagani 1000

⁴ Inai murinai helai gabudia haida lau itaia, bona idia latanai helai taudia danu lau itaia. Unai taudia dekenai Dirava ese kota biaguna ena siahu ia henia. Bona taunimanima momo edia laumadia lau itaia. Inai taudia be edia kwaradia idia utua oho, badina be Iesu ena hereva momokani, bona Dirava ena hereva idia gwauria dainai. Idia ese dagedage gauna o iena laulauna idia tomadiho henia lasi. Bona dagedage gauna ena maka edia baguna dekenai o edia imana dekenai, idia abia lasi. Idia be mase dekena amo idia mauri lou, vadaeni Keriso danu lohia siahu idia abia, ela bona lagani 1000 idia ore. ⁵ To mase taudia oredia do idia mauri lou lasi ela bona lagani 1000 idia ore. Mase dekena amo toreisi lou ginigunana be inai. ⁶ Inai toreisi lou ginigunana dekenai idia toreisi taudia be moale bona helaga momokani. Idia be Dirava ena taudia korikori. Mase iharuana be mai ena siahu lasi unai taudia dekenai. Idia be Dirava bona Keriso edia hahelagaia taudia. Bona lagani 1000 lalonai Keriso danu do idia lohia.

Dirava ese Satani be hisihisi hanaihanai gabuna lalonai do ia negea

⁷ Lagani 1000 idia ore neganai, Satani be unai guri dobu masemase dekena amo do idia ruhaia. ⁸ Vadaeni ia ese tanobada ena gabu ibounai idia noho taudia dekenai do ia lao, idia do ia koia. Inai taudia edia bese ladana be Goga bona Magoga. Satani ese unai taudia ibounai do ia haboua tuari totona. Edia momo be bada herea momokani, kone ena miri bamona. ⁹ Idia be tanobada kahana ibounai dekenai idia raka lao, bona idia ese Dirava ena helaga taudia edia kamepa, bona Dirava ese ia lalokau henia hanuana idia hagegea. To lahi be guba dekena amo ia diho, Satani ena tuari ore ia araia ore. ¹⁰ Unai neganai Satani, idia ia koia tauna, be lahi bona salipa gohuna lalonai Dirava ese ia negea diho. Unai gabuna lalonai be guna dagedage gauna bona peroveta koikoi tauna idia negea diho vadaeni. Unuseni hisihisi do idia abia dina bona hanuaboi, ela bona hanaihanai.

Kota Badana Dinana

¹¹ Unai murinai helai gabuna badana kurokurona ta lau itaia, bona ia latanai ia helai Tauna danu. Vadaeni iena vairanai tanobada bona guba be idia heau boio, bona tau ta ese idia ia itaia lou lasi. ¹² Bona mase taudia, ladana bada taudia bona ladana maragi taudia be lau itaia, helai gabuna badana ena vairanai idia gini. Vadaeni Dirava ese buka haida ia kehoa, bona buka ma ta ia kehoa, mauri bukana. Bona mase taudia be Dirava ese ia kota henia, edia kara buka lalonai ia torea hegeregereana. ¹³ Davara lalonai idia mase vadaeni taudia be davara ese idia ia henia daekau lou. Bona Mase, bona mase taudia edia gabu ese idia lalonai idia koua noho taudia idia henia daekau lou. Vadaeni idia danu be Kota Biaguna ese edia kara hegeregereana idia ia kota henia. ¹⁴ Ia ese Mase, bona mase taudia edia gabu, be lahi gohuna lalonai ia negea diho. Inai lahi gohuna be mase iharuana. ¹⁵ Bona bema tau ta ena ladana be mauri bukana lalonai ia torea lasi neganai, Kota Biaguna ese unai tau be lahi gohuna lalonai ia negea diho.

21

Guba matamata bona tanobada matamata

¹ Vadaeni guba matamatana bona tanobada matamatana lau itaia. Badina be guba gunana bona tanobada gunana be idia lao ore vadaeni. Davara danu be ia ore vadaeni. ² Bona Hanua Helagana, Ieruselema matamatana lau itaia, guba dekena amo ia diho mai noho, Dirava dekena amo. Inai Hanua Helagana be headava matamata kekeni bama, ia herahera namo herea, dabua namona ia karaia, iena adavana totona ia hegaega vadaeni. ³ Gado ta lau kamona, helai gabuna badana dekena amo ia mai, ia hereva badabada, ia gwau, “Harihari Dirava ena noho gabuna be taunimanima edia huanai do ia noho, bona idia be iena bese taudia do idia lao. Dirava be idia danu do ia noho, bona ia be edia Dirava do ia lao. ⁴ Ia ese matana ranu ibounai edia matana dekena amo do ia dahua. Mase bona lalohisihisi, bona taitai, bona hisihisi be do idia ore momokani. Badina be gau gunadia be idia ore vadaeni.”

⁵ Vadaeni helai gabuna badana latanai ia helai Diravana ia hereva, ia gwau, “Harihari be gau ibounai lau karaia matamata inai.” Ma lau dekenai ia hereva, ia gwau, “Harihari inai hereva do oi torea, badina ia be maoromaoro bona momokani vadaeni, bona inai hereva do umui abidadama henia diba.” ⁶ Ma ia gwau, “Ia ore vadaeni! Lau be Matamana bona Dokona, lau be gau ibounai edia badina, bona egu gaukara ibounai be do lau karaia haorea. Bema tau ta ia ranu mase, lau be ranu do lau henia, davana lasi. Inai ranu be lohilohe gabuna dekena amo ia daekau noho mauri ranuna. ⁷ Kwalimu tauna ena kwalimu ahuna be inai: Lau be iena Dirava do lau lao, bona ia be lauegu natuna. ⁸ To lau badinaia totona idia gari taudia, abidadama lasi taudia, kara bodaga taudia, taunimanima idia alaia taudia, lebulebu taudia, meamea taudia, kaivakuku dekenai idia tomadiho henia taudia, bona koiko taudia ibounai, idia ibounai edia davana be dika. Idia be unai gohu, lahi bona salipa idia araia noho gabuna lalonai do idia lao. Inai be mase iharuana.”

Ieruselema Matamatana

⁹ Unai neganai aneru ta lau dekenai ia mai. Ia be unai aneru 7 oreana, edia aneru ta. Idia ese guna hisihisi idia havaraia disi idia dogoatao.

Ia ese lau ia hamaoroa, ia gwau, “Oi mai, headava matamata hahinena, Mamoe ena Natuna ena adavana oi dekenai do lau hedinaraiia.”¹⁰ Vadaeni Lauma Helaga ese lau ia abia, bona aneru ese lau ia abia lao ororo badana ta ena atai dekenai. Ia ese Ierusalem Hanua Helagana lau dekenai ia hedinaraiia, guba dekena amo ia diho mai noho, Dirava dekena amo.¹¹ Dirava ena hairaina ese unai hanua ia hadiaria, bona davana bada nadi bamona ia hururuhururu. Iena toana be iasipa nadina bamona, bona galasi bamona ia diaridiari.¹² Hanua be mai ena magu. Inai magu be bada bona iena atai be lata. Magu ena iduara ibounai be 12, bona aneru 12 be unai iduara badinai idia gini. Iduara edia latanai be Israela ena iduhu 12 edia ladana idia torea.¹³ Magu ena iduara be inai bamona: Dina ia daekau kahanai iduara be toi, mirigini kahanai iduara be toi, diho kahanai iduara be toi, bona dina ia diho kahanai iduara danu be toi.¹⁴ Bona magu ena badina nadidia be 12, bona idia latanai be Mamoe ena Natuna ena aposetolo taudia 12 edia ladana idia torea.

¹⁵ Lau dekenai ia hereva henia aneruna ena imana dekenai be hahetoho auna ta, golo dekena amo ia karaia gauna. Ia dekena amo aneru ese hanua, bona iduara, bona magu edia bada ia hahetoho karaia.¹⁶ Hanua ena kahana 4 edia bada be hegeregere. Iena lababa bona ena lata be hegeregere. Aneru ese iena hahetoho auna dekena amo hanua ena bada ia hahetoho karaia. Iena lata be 2400 kilomita, iena lababa be 2400 kilomita, bona iena atai ena lata danu be 2400 kilomita.¹⁷ Magu danu ena bada ia hahetoho karaia, bona iena atai ena lata be 60 mita. Aneru ese taunimanima edia hahetoho dalana ia gaukaralaia.

¹⁸ Hanua ena magu be iasipa nadina dekena amo idia karaia, bona hanua be golo goeva momokani dekena amo idia haginia, to ia diaridiari, galasi bamona.¹⁹ Hanua ena magu ena badina nadidia ibounai be davana bada nadidia idau dau dekena amo idia heraheralaiia. Davana bada nadi ginigunana be iasipa, iharuana be sapairo, ihatoina be kalakedo, namba 4 be samaragi,²⁰ namba 5 be sadonu, namba 6 be sadio, namba 7 be krusolito, namba 8 be berulo, namba 9 be topasio, namba 10 be krusoparaso, namba 11 be huakinto, namba 12 be ametuso.^a²¹ Iduara 12 be kavabukavabu 12. Iduara ta ta be kavabukavabu tamona dekena amo idia karaia. Hanua ena ariara ibounai be golo goeva momokani, to ia be galasi bamona ia diaridiari.

Diari bona mauri

²² Hanua lalonai dubu helaga ta lau itaia lasi. Badina be Lohiabada, Siahu Ibounai Diravana, bona Mamoe ena Natuna, be unai hanua ena dubu helaga.²³ Dina bona hua edia diari danu unai hanua dekenai be lasi. Badina be Dirava ena hairaina ese unai hanua ia hadiaria noho. Bona Mamoe ena Natuna be unai hanua ena lamepa.²⁴ Tanobada ena bese idau dau ese unai hanua ena diari lalonai do idia raka. Bona tanobada ena king ese edia kohu ia dekenai do idia mailaia vareai.²⁵ Dina lalonai unai hanua ena iduara be do idia koua lasi. Oibe, iduara be nega ta do idia koua lasi, badina hanuaboi be lasi unuseni.²⁶ Tanobada ena bese idau dau ese unai hanua dekenai edia hairai gaudia bona edia kohu do idia abia mai vareai.²⁷ To dika gauna ta be

^a 21:20: IASIPA, SAPAIRO, KALAKEDO, SAMARAGI, SADONU, SADIO, KRUSOLITO, BERULO, TOPASIO, KRUSOPARASO, HUAKINTO, AMETUSO: Inai be davana bada nadi haida, hairai bada gaudia. Hiri Motu gado dekenai mai edia ladana lasi dainai, Helene gado dekenai idia torea.

unai hanua dekenai do ia vareai diba lasi. Lebulebu idia karaia taudia, o koikoi taudia be do idia vareai lasi. Lasi momokani. Mamoe ena Natuna ena mauri bukana lalonai edia ladana idia torea taudia sibona be unai hanua dekenai do idia vareai.

22

Mauri ranuna, bona mauri auna

¹ Aneru ese mauri ranuna ena sinavai lau dekenai ia hedinarai. Ia be galasi bamona ia diaridiari, bona iena ranu be Dirava bona Mamoe ena Natuna edia helai gabuna badana dekena amo ia heau lao. ² Inai sinavai be hanua ena ariara badana ena huanai ia heau lao. Sinavai ena kahana kahana be mauri audia idia gini. Inai mauri auna ese lagani ta lalonai huahua ia atoa nega 12, hua ta ta ibounai lalonai huahua ia atoa. Inai au ena rauna ese bese idau idia hanamoa noho. ³ Unai hanua ena lalonai, Dirava ese ia gwauraia dika vadaeni gauna ta be do ia noho diba lasi.

Dirava bona Mamoe ena Natuna edia helai gabuna badana be unai hanua lalonai do ia noho. Bona Dirava ena hesiai taudia ese ia do idia tomadiho henia. ⁴ Idia ese Dirava ena vairana do idia itaia, bona iena ladana be edia baguna dekenai ia ese do ia torea. ⁵ Unai hanua dekenai be hanuaboi lasi, bona unuseni idia noho taudia ese lamepa o dina ena diari do idia ura lasi. Badina be Lohiabada Dirava ese idia dekenai diari do ia henia. Bona idia ese king hegeregerena do idia lohia noho, ela bona hanaihanai.

Iesu do ia giroa mai

⁶ Aneru ese lau ia hamaoroa, ia gwau, “Inai hereva be maoromaoro bona momokani, bona inai hereva do oi abidadama henia diba. Lohiabada Dirava ese iena Lauma Helaga iena peroveta taudia dekenai ia henia noho. Ia ese iena aneru ia siaia vadaeni, kahirakahira do idia vara gaudia, iena hesiai taudia dekenai do ia hadibaia totona.”

⁷ Iesu ia hereva, ia gwau, “Kamonai! Lau be do lau mai haraga! Inai buka ena peroveta herevadia idia kamonai henia taudia be do idia moale!”

⁸ Lau Ioane ese inai hereva ibounai lau kamonai, bona inai kara ibounai lau itaia. Bona unai gaudia lau itaia bona kamonai haorea neganai, lau dekenai unai gaudia ia hedinarai aneruna ena aena badinai lau tui diho, do lau tomadiho henia totona. ⁹ To lau dekenai ia hereva, ia gwau, “Unai bamona do oi karaia lasi. Lau be hesiai tauna, oi bamona, bona lau be oiemu varavara peroveta taudia edia gaukara hebou tauna danu. Bona lau be, inai buka ena hereva idia kamonai henia taudia ibounai edia gaukara hebou tauna danu. Dirava sibona do oi tomadiho henia.”

¹⁰ Ma lau ia hamaoroa, ia gwau, “Inai buka ena peroveta hereva do oi hunia lasi, badina be Dirava ese inai kara do ia karaia ena nega be kahirakahira. ¹¹ Vadaeni kara dika tauna, be kara dika do ia karaia noho. Lebulebu tauna, be lebulebu do ia karaia noho. Kara maoromaoro tauna, be kara maoromaoro do ia karaia noho. Bona helaga tauna, be helaga kara do ia karaia noho.”

¹² Iesu ia hereva, ia gwau, “Kamonai! Lau be karaharaga umui dekenai do lau mai! Taunimanima edia gaukara davana be lauegu imana dekenai idia noho. Taunimanima ibounai edia kara hegeregerena edia davana do lau henia. ¹³ Lau be Alepa bona Omega, giniginana bona gini gabena, matamana bona dokona.”

¹⁴ Edia dabua idia huria taudia be idia moale. Badina be inai: Idia be mai edia maoro, mauri auna ena huahua do idia ania. Bona mai edia maoro danu, hanua ena iduara do idia raka vareai. ¹⁵ To murimuri dekenai be kara bodaga taudia, bona dika bada idia karaia taudia, meamea taudia, matabodaga taudia, ala-ala taudia, kaivakuku idia tomadiho henia taudia, bona koikoi idia ura henia bona badinaia taudia idia noho.

¹⁶ “Lau Iesu ese egu aneru umui dekenai lau siaia, inai hereva be ekalesia oreadia dekenai do ia gwauraia totona. Lau be Davida ena natuna ta, Davida ena bese tauna. Lau be unai hisiu bada, daba rere neganai ia diaridiari gauna.”

¹⁷ Lauma Helaga bona Headava Matamata Hahine idia gwau, “Oi mai.” Bona inai hereva idia kamonaia taudia danu, namona be idia gwau, “Oi mai.”

Ranu mase taudia, umui mai. Bona ranu umui ura henia taudia, mauri ranuna do umui abia dae, ia be davana lasi.

Sisiba hereva dokona

¹⁸ Lau Ioane, ese inai buka ena peroveta hereva idia kamonaia noho taudia lau sisiba henia inai: Tau ta ese bema inai hereva edia latanaia hereva haida ma do ia atoa kau neganai, Dirava ese inai buka lalonai idia torea hisihisi, be unai tau ena latanaia do ia atoa kau. ¹⁹ Bona bema tau ta ese hereva ta inai peroveta bukana dekena amo do ia kokia, Dirava ese unai tau ena davana namona do ia kokia. Oibe, ia ese mauri auna ena aniani do ia ania diba lasi. Bona ia be Hanua Helagana do ia vareai diba lasi. Inai davana namodia ruaosi be inai buka ese ia herevalaia vadaeni.

²⁰ Inai hereva ibounai ia gwauraia hedinarai Tauna ia gwau, “Oibe, momokani, lau be kahirakahira do lau mai.”

Amen. Lohiabada Iesu e, oi mai.

²¹ Lohiabada Iesu ena hariharibada umui ibounai dekenai do ia noho. Amen.

SALAMO

1

Moale korikori

¹ Inai bamona taudia be idia moale momokani:
 Idia ese kara dika taudia edia sisiba,
 bona edia laloa idia abia dae lasi.
 Idia ese kerere taudia edia kara bamona idia karaia lasi,
 Bona Dirava idia ura lasi taudia danu,
 idia noho hebou lasi.
² Ma inai taudia ese,
 Lohiabada ena Taravatu dekenai idia moale,
 bona Lohiabada ena Taravatu idia laloa,
 dina bona hanuaboi ibounai lalonai.
³ Ma inai taudia be,
 sinavai badinai idia hadoa audia bamona,
 edia huahua atoa neganai,
 idia ese anina idia atoa bada herea.
 Edia raurau danu do idia kakoro lasi.
 Edia gaukara ibounai be ena anina ia vara,
 bona mai edia kwalimu danu.

⁴ Kara dika taudia be unai bamona lasi.
 Idia be uiti ena momoru bamona.
 Lai ese idia ia hodaia lao.
⁵ Kara dika taudia be Dirava ese,
 Kota Bada lalonai do ia kota henidia.
 Kerere idia karaia taudia be,
 Dirava ena taudia danu do idia noho hebou lasi.
⁶ Kara maoromaoro taudia be,
 Lohiabada ese ia hakaudia bona ia naridia,
 to kara dika taudia edia dala,
 ena dokona be mase momokani.

2

Dirava ese ia abia hidi King

¹ Badina dahaka bese idauidau ese,
 tuari daladia idia tahua?
 Badina dahaka taunimanima edia laloa be kavakava?
² Edia king taudia be tuari totona idia toreisi,
 bona edia lohia taudia ese idia haboua noho.
 Idia ura be,
 Lohiabada bona ia ese ia Abia Hidi Tauna,
 do idia dagedage henia.
³ Idia gwau,
 “Ita ura lasi Lohiabada,
 bona iena King henunai do ita noho,
 Idia ese ita idia guia vadaeni,
 be ita ese unai guia varodia do ita negea.”
⁴ Guba dekenai ia noho Dirava ese,
 idia dekenai do ia kiri.
 Ia ese edia laloa dekenai do ia hevaseha.
⁵ Ia ese idia do ia gwau henia,

mai badu danu.

Iena badu mai siahu bada ese do ia hagaridia.

⁶ Do ia gwau,

“Siona Ororo ena ataiai dekenai,
lauegu ororo helagana dekenai,
lauegu King do lau atoa.”

⁷ King do ia hereva, do ia gwau,

“Lau ese Lohiabada ena hereva do lau harorolaia,
inai bamona lau dekenai ia gwau,

‘Oi be lauegu natuna,

hari dina dekenai oi lau havaraia vadaeni.

⁸ Lau dekenai oi noinoi,

vadaeni lau ese bese idauidau ibounai,

be oi dekenai do lau henia.

Tanobada ibounai oi dekenai do lau henia, oiemu.

⁹ Oi ese idia do oi hamakohia,

auri itotohi dekena amo.

Uro bamona, idia do oi makohia maragimaragi.’”

¹⁰ Unai dainai, king taudia e,

inai sisiba do umui kamoni:

Tanobada ena lohia taudia e, do umui diba.

¹¹ Lohiabada do umui tomadiho henia,

mai emui gari danu,

Mai heudeheude danu Lohiabada do umui hanamoa.

¹² Dirava ena Natuna do umui kisi henia,

do ia badu garina,

bona do umui mase haraga garina.

Badina be iena badu be ia vara haraga diba.

To ia dekenai idia abidadama taudia be idia moale,

ia ese ia naridia dainai.

3

Daba guriguri, Davida ena

¹ Lohiabada e,

lau dekenai idia dagedage taudia be momo herea.

Lau dekenai idia tuari henia taudia,

be idia momo lao noho.

² Idia ese lau idia herevalaia noho.

Idia gwau, “Dirava ese ia do ia durua lasi.”

³ To Lohiabada e,

oi ese dika dekena amo lau oi gimaia noho.

Oi ese kwalimu lau dekenai oi henia noho.

Oi ese egu lalona oi hagoadaia lou.

⁴ Lohiabada dekenai durua totona lau boiboi noho,

bona iena ororo helagana dekena amo,

lau dekenai ia haere henia.

⁵ Lau hekure, lau mahuta, bona lau noga lou,

bona hanuaboi ena negana ibounai,

Lohiabada ese lau ia naria noho.

⁶ Taunimanima 1000, 1000 dekenai lau gari lasi.

Egu kahana kahana dekena amo,
lau dekenai idia tuari henia noho,
to lau gari henidia lasi.

⁷ Lohiabada e, lau dekenai do oi mai.
Egu Dirava e, lau do oi hamauria.
Lau dekenai idia tuari henia taudia,
edia dika davana do oi henia.
Do idia manoka lao,
vadaeni lau do idia hadikaia diba lasi.
⁸ Lohiabada e, oi sibona ese ai oi hamauria diba.
Oi ese oiemu bese taudia oi hanamo a noho.

4

Adorahi guriguri, Davida ena

¹ Egu Dirava e, oiemu kara be maoromaoro.
Oi dekenai lau boiboi neganai,
lau dekenai oi haere vadaeni.
Dika ese lau ia hadikaia vadaeni neganai,
oi ese lau oi durua.
Hari danu lau dekenai do oi bogahisihisi henia,
egu noinoi mani do oi kamona i.

² Taunimanima e, egu ladana namona,
be do umui hadikaia noho ela bona edena negai?
Hereva kavakava do umui ura henia,
bona hereva koikoi do umui tahua noho,
ela bona edena negai?

³ Do umui laloe,
Lohiabada ese kara maoromaoro taudia,
be ia abia hidi vadaeni, iena.
Bona lau ese lau boiboi henia neganai,
ia ese lau dekenai ia kamona i henia.

⁴ Emui badu ia toreisi neganai,
do umui kara dika lasi.
Emui mahuta gabunai umui noho neganai,
emui lalona do umui tahua,
bona badu ena laloe do umui koua.
⁵ Boubou maorodia Lohiabada dekenai do umui henia,
bona Lohiabada do umui abidadama henia.

⁶ Taunimanima momo ese inai bamona idia guriguri noho:
“Lohiabada e, daika ese ai do ia hanamo a diba?
Oiemu vairana ena diari,
be mani ai dekenai do oi hedinaraia.”

⁷ To oi ese moale bada,
be lau dekenai oi henia vadaeni,
bona egu moale ese,
uiti bona uaina momo idia davaria taudia,
edia moale ia hereaia momokani.

⁸ Mai egu maino danu,
lau hekure bona lau mahuta noho.

Lohiabada e, oi sibona ese lau oi naria,
bona dika dekena amo lau oi gimaia noho.

5

David a ese Lohiabada ia noia, dika dekena amo do ia naria

¹ Lohiabada e, egu hereva do oi kamona i hen ia.

Egu lalohisihisi ena regena mani do oi lal oa.

² Egu King bona egu Dirava e!

Durua totona oi dekenai lau taitai,

be mani do oi kamona i hen ia,

badina be oi dekenai lau noinoi noho.

³ Lohiabada e,

daba neganai egu gadona oi kamona i noho.

Daba neganai,

egu noinoi oi emu vairana dekenai lau atoa,

bona oi emu haere lau naria noho.

⁴ Badina oi be kara dika oi moalelaia lasi,

bona oi dekenai dika ta ia noho lasi.

⁵ Hekokoroku taudia,

be oi emu vairana dekenai idia gini diba lasi.

Kara dika taudia ibounai,

be oi ese oi badu henidia noho.

⁶ Koikoi taudia be oi ese oi hadikaia ore noho.

Lohiabada ese alaia taudia bona koikoi taudia,

ia dagedage henidia noho.

⁷ To oi emu lalokau bada dainai,

lau be oi emu Ruma dekenai lau raka vareai diba.

Oi emu Dubu Helaga lalonai,

oi dekenai lau tomadiho hen ia diba.

Oi dekenai do lau tomadiho mai mataurai danu.

⁸ Lohiabada e,

lau dekenai idia tuari hen ia taudia be momo herea.

Unai dainai oi emu kara maoromaoro dalana,

dekenai lau do oi hakaua,

bona oi emu dala be egu vairana dekenai,

do oi hedinaraia namonamo.

⁹ Lau dekenai idia dagedage taudia,

edia hereva be momokani lasi, abidadama gauna lasi.

Idia edia kudouna ena ura be,

taunimanima do idia alaia mase.

Edia gadona ena hereva be gur ia gabuna bamona,

bona edia malana be manada koikoi.

¹⁰ Dirava e, edia dika ena davana do oi hen ia.

Mani emu kara edia lal oa dikadia ese,

edia moru do idia havaraia.

Edia kara dika be momo dainai,

oi emu vairana dekena amo do oi luludia siri,

badina be idia ese oi idia dagedage hen ia noho.

¹¹ To oi dekenai idia abidadama hen ia taudia,

be do idia moale,

do idia moale momokani ela bona hanaihanai.

Oi ese oiemu ladana idia ura henia taudia ibounai,
bona oi dekenai idia moale taudia,
be do oi gimaia noho.

¹² Badina Lohiabada e,
oi ese kara maoromaoro taudia oi hanamoa noho.
Oiemu lalokau ese kesi bamona,
kara maoromaoro taudia ia gimaia noho.

6

David a ese dika ia davaria neganai, durua totona Lohiabada ia noinoi

¹ Lohiabada e, oiemu badu dekena amo,
lau do oi gwau henia lasi.

Oiemu badu siahu herea dekena amo,
lau do oi matakani henia lasi.

² Lohiabada e, mani emu kara,
lau dekenai do oi bogahisihisi henia,
badina lau be manoka vadaeni.
Lohiabada e, mani lau do oi hanamoa,
badina be egu turiana idia hisihisi noho,

³ egu lauma danu ia hisihisi bada noho.
Lohiabada e,
oiemu durua totona lau naria noho,
do lau naria ela bona edena negai?

⁴ Lohiabada e, oi mai,
bona lau do oi hamauria.
Oiemu bogahisihisi dainai,
mase dekena amo lau do oi veria mauri.

⁵ Badina be ia mase neganai,
tau ta ese oi ia laloa diba lasi.
Mase taudia edia gabu dekenai,
daika ese oi do idia hanamoa?

⁶ Lalohisihisi dainai lau manoka noho.
Hanuaboi ta ta ibounai lalonai,
egu geda dekenai lau tai noho, tai noho.
Egu mahuta geda be,
egu matana ena ranu ese ia hapariparia vadaeni.

⁷ Egu matana be idia diburadibura noho,
egu lalohisihisi dainai.
Egu matana be idia manoka noho,
tau buruka ena matana bamona,
badina lau hadikaia gwauria taudia be momo herea.

⁸ Kara dika taudia ibounai e,
lau dekena amo do umui siri!
Badina be Lohiabada ese egu taitai,
ena regena ia kamona vadaeni.

⁹ Lohiabada ese egu noinoi ia kamona noho.
Egu guriguri durua totona ia kamona henia.

¹⁰ Lau idia hadikaia gwauria taudia,
be do idia hemarai,
bona edia lalodia do idia hekwarahi.
Dirava ese idia do ia hagarai,

bona lau dekena amo do ia luludia haraga.

7

Kota maoromaoro totona Davida ia noinoi

¹ Lohiabada e, egu Dirava e,
lau ese oi dekenai lau abidadama henia noho.
Lau idia lulua noho taudia,
dekena amo lau do oi veria mauri,
lau do oi hamauria,
² idia be laiona bamona,
lau do idia darea garina,
bona lau be durua tauna lasi dainai,
lau do idia darea maragimaragi garina.

³ Lohiabada e, egu Dirava e,
bema kerere lasi tauna ta lau hadikaia,
bema lauegu imana dekenai kerere ia noho,
⁴ o bema lau ese,
egu turana dekenai kara dika lau karaia,
o bema lau dekenai ia tuari tauna,
be lau ese ia lau hadikaia kava,
⁵ unai neganai,
lau idia tuari henia taudia,
be do oi koua lasi,
vadaeni idia ese lau do idia lulua mai,
bona idia ese lau do idia dogoatao.
Idia ese lau do idia gwadaia,
lau do idia alaia,
bona lau be tano dekenai do lau moru,
do lau mase momokani.

⁶ Lohiabada e,
mai badu danu do oi toreisi,
lau do idia hamasea gwauraia taudia do oi koua!
Lau durua totona do oi toreisi!
Kota maoromaoro egu latanai do oi gwauraia.

⁷ Taunimanima ibounai do oi haboua,
idia ese oi do idia hagegea,
bona oi ese atai ai dekena amo,
do oi kota henidia.

⁸ Lohiabada e, oi be bese ibounai,
bona taunimanima ibounai edia kota biaguna.

Lohiabada e,
egu kara maoromaoro hegeregereana,
lau do oi kota henia.

Oi diba vadaeni lau be kerere lasi.

⁹ Oi be kara maoromaoro Diravana,
bona oi ese aiemai laloa,
bona aiemai ura oi tahua noho.
Kara dika taudia edia dika do oi hadokoa,
bona kara maoromaoro taudia dekenai,
ahuna namona do oi henia.

¹⁰ Dirava, Atai ai Momokani ena Dirava,

be egu kesi.

Ia dekenai idia kamonai henia taudia,
be ia ese ia hamauria noho.

¹¹ Dirava be kota biaguna namona,
mai ena laloa maoromaoro bona momokani danu.

Nega ibounai ia ese,
kara dika taudia edia davana ia henia noho.

¹² Bema tau ta ese,
iena lalona ia giroa lasi neganai,
Dirava ese iena tuari kaia do ia segea.

Iena peva danu do ia veria,
do ia karaia hegaegae noho.

¹³ Ia ese iena ala-ala gaudia,
be iena imana dekenai ia abia hegaegae,
bona iena diba be,
lahi gaudia ia halaoa vadaeni.

¹⁴ Oi itaia,
kara dika tauna ese,
dika ia havaraia noho.
Ia ese dika karaia totona,
ia laloa momo noho.
Ia ese kerere do ia karaia,
ena dala ia laloa guna.
Koikoi daladia danu ia havaraia noho.

¹⁵ To idau taudia abia totona,
ia geia vadaeni guri ena lalonai,
be unai dika tauna sibona ese do ia moru diho.

¹⁶ Unai dekena amo,
unai tau ena dika ese,
sibona do ia hadikaia.
Sibona ena dagedage ese,
unai tau ena kwarana dekenai do ia moru.

¹⁷ Lohiabada ena kara maoromaoro dainai,
ia lau tanikiu henia noho.
Lohiabada, Atai ai Momokani Dirava,
ena ladana lau hanamo a noho inai.

8

Dirava ena hairai bada, bona taunimanima edia dagi bada

¹ Lohiabada e, ai emai Lohiabada,
tanobada ena kahana ibounai lalonai,
oimu ladana be namo herea.

Oi emu hairaina,
be guba dekenai oi atoa vadaeni.

² Natudia maragidia,
rata idia inua memero,
edia uduna dekena amo,
oi idia hanamo a noho.
Oi be oi goada noho dainai,
oi dekenai idia dagedage gwauraia taudia,
be mai edia dala lasi.
Oi dekenai idia tuari gwauraia taudia,
be oi ese oi koua noho.

³ Oiemu guba lau itaia,
 oi ese oiemu imana dekenai oi karaia.
 Hua bona hisiu danu be oi ese oi atoa.
⁴ Taunimanima be dahaka,
 oi ese idia oi laloa noho?
 Taunimanima be maragi herea,
 dahaka dainai oi ese oi naridia noho?
⁵ Oi ese taunimanima oi karaia,
 be aneru sibona ese sisina idia hereaia.
 Oi ese taunimanima dekenai,
 hairai bona mataurai oi henia.
⁶ Oiemu imana ese idia karaia gaudia ibounai,
 be taunimanima dekenai oi henia,
 do idia biagudia.
 Gau ibounai be,
 taunimanima edia aena henunai,
 oi atodia vadaeni:
⁷ Mamoe bona boromakau ibounai,
 uda boroma ibounai danu.
⁸ Atai ai manudia,
 bona davara ena gwarume,
 bona davara dobu lalonai idia heau gaudia ibounai.
⁹ Lohiabada e, ai emai Lohiabada,
 tanobada ena kahana ibounai lalonai,
 oiemu ladana be ia namo herea momokani.

9

Lohiabada do ita tanikiu henia, iena kota maoromaoro karadia dainai

¹ Lohiabada e, oi do lau hanamoa,
 mai egu kudouna ibounai danu.
 Oiemu hoa karadia ibounai,
 be do lau herevalaia.
² Mai moale bada danu,
 oi do lau hanamoa noho.
 Siahu Ibounai Dirava e,
 oiemu ladana hanamoa totona,
 ane do lau abia.
³ Oi be oi hedinarai neganai,
 lau dekenai idia tuari henia taudia,
 be idia giroa lou.
 Idia moru kava,
 bona oiemu vairana dekenai idia mase.
⁴ Lohiabada e,
 oiemu kota hereva ibounai,
 be maoromaoro bona momokani,
 bona oi ese egu kara maoromaoro,
 be oi hamomokania vadaeni.
⁵ Bese idau idau be,
 oi ese oi gwau henia vadaeni,
 bona kara dika taudia be,
 oi ese oi hadikaia ore vadaeni.
 Idia edia ladana be,
 tau ta ese do ia laloa lou lasi.
⁶ Ai dekenai idia tuari henia taudia,

be do idia dika, ela bona hanaihanai.
 Idia boio vadaeni.
 Oi ese edia hanua ibounai,
 be oi hadikaia ore vadaeni,
 bona edia ladana be,
 taunimanima ese do idia laloa lou lasi.

⁷To Lohiabada ena King siahuna,
 be do ia noho ela bona hanaihanai.
 Ia ese iena terona ia haginia vadaeni,
 kota gaukara do ia naria totona.

⁸Ia ese mai maoromaoro bona momokani danu,
 tanobada do ia kota henia.
 Bese idauidau ibounai,
 be Lohiabada ese do ia kota henia,
 mai ena laloa maoromaoro danu.

⁹Tau dikadia ese idia dagedage henia taudia,
 be Lohiabada ese do ia bogahisihisi henia.
 Ia be edia heau mauri gabuna momokani,
 dika ia ginidae neganai.

¹⁰Lohiabada e,
 oiemu ladana idia diba taudia ese,
 oi do idia abidadama henia.
 Oi dekenai idia mai taudia,
 be oi ese idia do oi rakatania lasi,
 lasi momokani.

¹¹Lohiabada, Siona dekenai ia noho Dirava,
 be do umui hanamo!a!
 Iena kara be,
 bese idauidau edia huanai do umui herevalaia!

¹²Badina be rara ena davana,
 ia henia noho ena Dirava ese,
 hisihisi idia abia noho taudia ia laloa.
 Edia taitai ia laloaboio lasi,
 bona idia dekenai hisihisi idia henia taudia,
 edia kerere davana be Dirava ese do ia henia.

¹³Lohiabada e,
 lau dekenai do oi bogahisihisi henia!
 Lau idia hadikaia noho taudia dekena amo,
 lau abia hisihisi mani do oi itaia.

Lohiabada e,
 mase dekena amo lau do oi hamauria.

¹⁴Unai neganai, Ierusalem taudia,
 edia vairanai do lau gini diba,
 bona oi ese lau oi hamauria kara ibounai,
 be idia dekenai do lau hamaorolaia.
 Oi ese lau oi hamauria dainai,
 do lau moale bada herea momokani.

¹⁵Dirava diba lasi taudia ese,
 guri badana idia geia vadaeni,
 bona iena lalonai idia moru.
 Sibodia idia karaia tarapu ese,
 idia ia abia vadaeni.

¹⁶Lohiabada ese sibona ena kara,

be ia hedinaia vadaeni,
 iena kota maoromaoro dekena amo.
 Kara dika taudia be edia kara ese,
 idia ia hadikaia noho.

¹⁷ Kara dika taudia ibounai,
 edia dokona be mase.
 Dirava idia negea taudia ibounai,
 danu edia dokona be mase.

¹⁸ Gau lasi taudia,
 be Dirava ese ia laloaboio lasi.
 Ogogami taudia edia abidadama,
 be abidadama kava lasi.
 Edia abidadama ena anina,
 be do ia boio ore lasi,
 to gabeai do ia vara.

¹⁹ Lohiabada e, do oi toreisi,
 taunimanima edia hekokoroku do oi koua!
 Dirava idia ura henia lasi taudia,
 be do oi kota henia,
 bona edia dika davana do oi gwauraia.

²⁰ Lohiabada e, idia do oi hagaria,
 bona idia do oi hadibaia,
 idia be taunimanima sibona.

10

Kota maoromaoro totona guriguri ta

¹ Lohiabada e,
 badina dahaka lau dekena amo,
 oi be daudau dekenai oi gini noho?
 Badina dahaka dika negadia lalonai,
 oi be hunia dekenai oi noho?

² Kara dika taudia be mai hekokoroku danu,
 idia ese ogogami taudia,
 idia dagedage henia noho.
 Unai dika taudia sibodia edia laloa dika,
 ese idia do ia hadikaia be namo.

³ Tau dikana ese,
 iena ura dikadia dekenai ia hekokoroku noho.
 Ma gau ia ura henia momo tauna ese,
 Lohiabada ia negea,
 ma Lohiabada dekenai ia hereva dika noho danu.

⁴ Tau dikana ese Lohiabada ia tahua lasi,
 bona iena hekokoroku dainai,
 ia laloa Dirava be lasi.

⁵ Kara dika tauna be,
 iena kara ibounai dekenai ia kwalimu noho,
 Lohiabada ena kota henia kara be ataii herea,
 unai dainai ia laloa lasi Dirava dekenai.
 Tau dikana dekenai idia tuari henia taudia,
 be ia ese idia ia kirikirilaia noho.

⁶ Sibona dekenai inai bamona ia laloa:
 “Gau ta ese lau do ia hamarerea lasi.
 Lau be nega ta dika do lau davaria lasi.”

7 Kara dika tauna ia hereva negadia ibounai,
ia ese taunimanima ia hadikaia,
ia koikoi,
bona hereva dagedage ia gwaurai noho.

8 Hanua edia lalonai ia hunia noho,
kerere lasi taudia do ia alaia mase totona.
Ia ese manoka taudia ia tahua noho,
do ia hadikadia totona.

9 Iena hunia gabuna lalonai ia naria noho,
laiona ese iena guri lalonai,
boroma alaia totona ia naria bamona.
Ogogami taudia hadikaia totona ia naria noho.
Iena tarapu lalonai ia abidia noho,
bona gabu ta dekenai ia veridia lao noho.

10 Ia ese ia daredia vadaeni taudia,
be idia dika vadaeni.

Iena goada ena siahu ese,
idia ia hadikaia vadaeni.

11 Kara dika tauna ese sibona dekenai ia gwau:
“Dirava ese egu kara ia laloa lasi,
Dirava ese iena matana ia hakapua vadaeni,
bona ia ese lau do ia itaia lasi.”

12 Lohiabada e,
unai kara dika taudia,
edia davana do oi henia.
Idia hisihisi henidia noho taudia,
be mani do oi durua.

13 Kara dika tauna be edena bamona,
ia ese Dirava do oi negea diba?

Edena bamona do ia gwau,
“Dirava ese lau do ia panisia lasi?”

14 To Lohiabada e,
oi ese gau ibounai oi itaia noho,
oi ese hekwarahi bona hisihisi oi itaia noho.
Bona oi ese taunimanima durua totona,
oi gini hegaegae noho.

Manoka taudia ese,
oi dekenai idia abidadama noho,
badina be oi ese gau lasi taudia,
be nega ibounai oi durua momokani vadaeni.

15 Kara dika bona kerere taudia,
edia siahu mani do oi hamakohia.
Edia kerere dainai,
edia davana do oi henia,
ela bona do idia karaia lou lasi.

16 Lohiabada be do ia King ela bona hanaihanai.
Dirava idaudia dekenai idia tomadiho taudia,
be Dirava ena tano dekena amo do idia boio.

17 Lohiabada e,
oi ese manau taudia edia noinoi,
be do oi kamoni henia, ani?
Oi ese edia lalona do oi hagoadaia,

bona edia taitai do oi kamona.
¹⁸ Edia tamadia sinadia be lasi natudia,
 bona idia hisihisi noho taudia,
 edia tai mani do oi kamona.
 Edia kota do oi durua,
 mai oiemu lalao maoromaoro bona momokani danu.
 Unai neganai tanobada tauna ta ese,
 idia hagarua karana ta,
 be do ia karaia lou lasi.

11

David a ese Lohiabada ia abidadama henia

¹ Mauri do lau davarua momokani,
 badina be Lohiabada lau abidadama henia.
 Unai dainai,
 badina dahaka lau umui hamaoroa, umui gwau:
 “Ororo dekenai do ita heau mauri,
 manu ia heau bamona!
² Badina umui itaia,
 kara dika taudia ese,
 edia peva idia veria noho.
 Edia diba be varo dekenai idia atoa hegaegae,
 kara maoromaoro taudia do idia pidia totona.
³ Bema mauri ena badina ia makohia noho neganai,
 kara maoromaoro taudia be dahaka idia karaia diba?”

⁴ Lohiabada be iena Dubu Helaga lalonai ia noho.
 Lohiabada ena terona be guba dekenai ia noho.
 Gabu ibounai dekenai idia noho taunimanima,
 be Lohiabada ese ia itaia noho,
 bona edia kara ibounai ia diba.

⁵ Taunimanima namodia bona dikadia edia kara,
 be Dirava ese ia tahua, maka tamona dekenai.
 Taravatu utua taudia be,
 Lohiabada ese ia badu henidia noho.

⁶ Kara dika taudia edia latanai,
 Dirava ese lahi ena gida mai hururuhururu,
 bona salipa danu ia siaia diho noho.
 Ma lai dikadia momokani dekena amo,
 ia matakani henidia noho.

⁷ Lohiabada be mai ena kara maoromaoro,
 bona kara namodia ia ura henia noho.
 Unai bamona idia karaia taudia,
 be Lohiabada ena vairana dekenai do idia noho.

12

David a ese durua totona Dirava ia noia

¹ Lohiabada e, ai dekenai durua oi henia!
 Badina Dirava lalokau henia tauna,
 be ta ia noho lasi.
 Kara maoromaoro mai momokani taudia,
 be idia boio vadaeni.
² Taunimanima ibounai be,
 idia ta ta dekenai idia hereva koikoi noho.
 Idia ese hanamoia koikoi,

bona laloa rua dekena amo,
sibodia ta ta dekenai idia koia noho.

³ Lohiabada e, hanamoa koikoi taudia,
edia hereva do oi hadokoa,
bona edia malana dekena amo,
hekokoroku hereva idia gwauraia taudia,
be do oi koua.

⁴ Badina be idia gwau,
“Iseda hereva dekena amo do ita kwalimu.
Iseda uduna edia hereva,
be ita ese ita biagua noho.
Daika ese ita ia koua diba?”

⁵ To Lohiabada be ia gwau,
“Ogogami taudia be,
haida ese idia dagedage henia noho,
bona gau lasi taudia,
be hisihisi dainai idia tai noho.
Unai dainai lau be do lau toreisi,
bona idia ura henia mauri namona gabuna,
dekenai idia do lau atoa.”

⁶ Lohiabada ena gwauhamata,
be ita abidadama henia diba.
Iena gwauhamata be momokani,
siliva ia momokani bamona,
lahi dekena amo,
idia hagoevaia nega 7 siliva hegeregerena.

⁷ Lohiabada e,
oi ese ai do oi gimaia bona naria.
Dika taudia dekena amo,
ai do oi hamauria,

⁸ badina gabu ibounai dekenai,
tau dikadia idia laloa noho,
bona idia ese dika rohoroho gaudia,
idia matauraia noho.

13

David a ese durua totona Dirava ia noia

¹ Lohiabada e, lau oi laloaboio noho,
ia lao bona edena negai?

Lau do oi laloaboio noho,
ia lao bona hanaihanai, a?

Oiemu vairana,
be lau dekena amo do oi hunia noho,
ia lao bona edena negai?

² Laloa hekwarahi bada ese,
lau ia hisihisi henia noho,
ia lao bona edena negai?

Egu lalona do ia hisihisi noho,
dina ibounai, doko lasi, a?

Lau ia hadikaia gwauraia tauna,
be lau dekena amo do ia kwalimu noho,
ela bona edena negai?

³ Lohiabada e, egu Dirava e,
lau dekenai do oi laloa,
bona egu hereva dekenai do oi haere.
Lau dekenai goada do oi henia lou,
mase dekena amo lau do oi hamauria.

⁴ Lau ia hadikaia gwauraia tauna,
be inai bamona do ia hereva, do ia gwau,
“Lau halusia vadaeni.”
Unai garina, mani ia do oi koua,
vadaeni ia ese egu moru,
be do ia moalelaia diba lasi.

⁵ To lau ese oiemu lalokau momokani,
be lau abidadama henia noho,
bona oi ese lau do oi hamauria dainai,
lau be lau moale noho.

⁶ Lau ese Lohiabada dekenai,
ane do lau abia,
badina be ia ese,
iena hariharibada dekenai,
lau ia hanamoa vadaeni.

14

Taunimanima edia kara dika

¹ Kavakava taudia ese,
inai bamona idia laloa, idia gwau,
“Dirava be ia noho lasi.”
Idia ibounai be dika,
kara mirodia idia karaia vadaeni.
Kara namo karaia tauna be ta lasi.

² Lohiabada be guba dekena amo,
iena matana ia negea,
taunimanima edia kara ia itaia.
Ia ese aonega taudia ia tahua.

Ia dekenai idia tomadiho taudia ia tahua.

³ To idia ibounai ese,
kara dika idia karaia vadaeni.
Idia ibounai be mai edia kerere.
Idia ta lasi ese kara namona ia karaia.
Lasi bona lasi momokani.

⁴ Lohiabada ese ia henanadai, ia gwau:
“Inai kara dika taudia idia diba lasi, a?
Aonega do idia abia diba lasi, a?
Idia ese lauegu bese taudia idia ania noho,
beredi idia ania bamona.
Bona lau dekenai idia guriguri lasi,
lasi momokani.”

⁵ To gari bada ese idia do ia dogoatao,
badina Dirava be,
ia dekenai idia kamoni henia taudia danu ia noho.

⁶ Kara dika taudia ese,
manau taudia idia hahemaraia,
to Lohiabada ese,
unai manau taudia ia naria noho.

7 Egu noinoi be inai:

Lau ura Israela ena hamauria dalana,
be Siona dekena amo do ia mai!
Lohiabada ese iena bese taudia edia mauri,
be do ia hanamoa lou neganai,
Israela taudia be do idia moale bada herea.

15

Edena bamona kara be Dirava ese ia ura ita karaia?

¹ Lohiabada e,
daika be oiemu Dubu Helaga dekenai do ia noho?
Edena tauna be Siona,
oiemu ororo helagana dekenai,
do ia tomadiho diba?

² Tauna be inai:
Ia be nega ibounai Dirava ia kamoni henia.
Ia ese kara maoromaoro sibona ia karaia,
bona iena kudouna dekena amo,
hereva momokani ia gwauraia noho,
mai laloa maoromaoro danu.

³ Ia ese iena hereva dekenai,
haida ia hadikaia lasi,
bona iena turana dekenai,
hadikaia kara ta ia karaia lasi.
Bona iena badibadinai ia noho tauna totona,
hadikaia hereva ta ia gwauraia lasi.

⁴ Ia ese, Dirava ese ia negea tauna ia ura lasi,
to ia ese,
Dirava idia gari henia taudia ia hanamoa noho.
Sedira ia ese do ia davaria,
iena gwauhamata hereva do ia badinaia,
be auka herea,
to ia be idau lasi,
do ia badinaia noho.

⁵ Ia ese iena moni ia heniatorerhai lasi,
atoa kau davana abia totona.
Bona kerere lasi tauna hadikaia totona,
taunimanima ese moni idia henia gwauraia neganai,
unai tau ese unai moni ia abia dae lasi.

Unai bamona ia karaia tauna,
be do ia gini goada noho,
gau ta ese ia do ia hadikaia lasi.

16

Dirava dekenai ia abidadama henia tauna ena guriguri

¹ Dirava e, lau do oi hamauria,
badina be lau ese oi lau abidadama henia.

² Oi Lohiabada dekenai lau hereva,
lau gwau, "Oi be lauegu Lohiabada.
Lau dekenai idia noho gau namodia ibounai,
be oi dekena amo idia mai."

³ Lohiabada ena taudia be namo bada herea!
Lau be idia danu lau noho neganai,

lau be moale bada.

⁴Dirava idauna murinai idia heau taudia ese,
edia hisihisi idia habadaia noho.
Edia inuinu boubou gaudia be rara,
bona lau ese unai bamona boubou,
be do lau karaia lasi.
Edia dirava dekenai lau tomadiho henia lasi,
ma edia dirava ena ladana lau gwauraia lasi. ⁵Lohiabada e,
oi lau abia hidi vadaeni,
lau be mai egu dirava idauna ta lasi.
Lau dekenai hegeregere lasi gaudia ibounai,
be lau dekenai oi henia noho.
Ma lau dekenai do idia vara gaudia,
be oi ese oi naria noho.
⁶Oi ese gau namodia momo lau dekenai oi henia.
Oi dekena amo egu ahuna be namo bada herea!

⁷Lohiabada lau hanamoa noho,
badina ia ese lau ia hakaua noho dainai,
hanuaboi lalonai laloa maoro ese,
egu dala lau dekenai ia hadibaia.

⁸Nega ibounai lau diba,
Lohiabada be lau dekenai ia noho.
Ia be lau kahirakahira dainai,
gau ta ese lau ia hagaria lasi.

⁹Unai dainai, egu kudouna ia moale,
bona Lohiabada lau tanikiu henia noho.
Lauegu tauanina danu ia noho namo,

¹⁰badina oi Lohiabada ese,
lau oi rakatania lasi.
Mase taudia edia gabu dekena amo,
oi ese lau oi gimaia noho.
Bona oi ese oiemu Helaga Tauna do oi naria,
ia ese mase ena bodaga do ia davaria lasi.

¹¹Mauri dalana be,
oi ese lau dekenai oi hedinarai vadaeni.
Oiemu vairana dekenai,
lau be mai moale danu lau noho,
bona inai moale do ia noho ela bona hanaihanai.

17

Kerere lasi tauna ia guriguri

¹Lohiabada e,
kota maoromaoro totona lau noinoi inai,
mani lau dekenai do oi kamonai.
Oiemu durua totona lau noinoi noho,
egu taitai mani do oi kamonai,
badina inai guriguri lau gwauraia,
mai egu laloa maoromaoro bona momokani.

²Oi ese egu kota dekenai,
kwalimu lau dekenai do oi henia,
badina oiemu laloa bona oiemu kara,
be nega ibounai ia maoromaoro.

³ Oi ese egu kudouna oi diba.
 Oi ese hanuaboi neganai,
 lau dekenai oi vadiyadi henia.
 Oi ese egu lalona oi tahua namonamo vadaeni,
 bona ura dikana ta,
 be lau dekenai oi davaria lasi.

⁴ Taunimanima haida ese,
 hereva dika idia gwauraia noho,
 to lau be lasi momokani.
 Lau ese oiemu oda hereva,
 be lau kamoni henia vadaeni,
 bona dagedage taudia edia kara lau karaia lasi.

⁵ Lau be nega ibounai,
 oiemu dala dekenai lau raka,
 bona nega ta inai dala dekena amo,
 lau raka siri lasi.

⁶ Dirava e,
 oi dekenai lau guriguri noho,
 badina oi ese lau dekenai oi haere noho.
 Unai dainai egu hereva mani do oi kamoni.

⁷ Oiemu lalokau momokani,
 mani do oi hedinarai,
 bona ai do oi hamauria.
 Bema oi be ai dekenai oi noho,
 ai dekenai idia tuari henia taudia ese,
 ai do idia hadikaia diba lasi.

⁸ Lohiabada e, lau do oi gimaia,
 oiemu matana oi gimaia noho bamona.
 Oiemu hanina edia henunai lau do oi hunia.

⁹ Tau dikadia edia tuari,
 dekena amo lau do oi gimaia.
 Lau idia hamasea gwauraia taudia,
 ese lau idia hagegea noho.

¹⁰ Idia be mai edia bogahisihisi lasi,
 bona mai hekokoroku danu idia hereva noho.

¹¹ Idia ese lau idia lulua vadaeni,
 bona hari lau idia hagegea noho.
 Idia ese lau idia itaia noho,
 tano dekenai lau do idia veria diho totona.

¹² Idia be laiona idia hitolo bamona,
 idia naria noho,
 lau do idia darea parara totona.

¹³ Lohiabada e, oi mai,
 lau idia hadikaia gwauraia taudia do oi koua.
 Oi ese idia do oi halusia!
 Oiemu tuari kaia dekena amo,
 unai tau dikadia dekena amo,
 lau do oi hamauria.

¹⁴ Lohiabada e, oiemu imana dekena amo,
 unai taudia do oi koua,
 bona lau do oi hamauria.
 Badina inai taudia edia ura gaudia,
 bona edia ahuna danu,
 be inai tanobada sibona dekenai idia tahua noho.

Oiemu kohu momo dekena amo,
 unai taudia oi hahonudia vadaeni.
 Unai dainai idia edia natudia tau be momo herea,
 bona idia mase neganai,
 edia natudia be do mai edia kohu momo danu.

¹⁵ To lau be kara maoromaoro lau karaia dainai,
 lau ese oiemu vairana do lau itaia,
 bona do lau noga neganai,
 oiemu toana do lau itaia dainai,
 do lau moale momokani.

18

Lohiabada ese ia hamauria dainai, Davida ese tanikiu henia ane ia abia

¹ Lohiabada e,
 oi be egu goada ena badina.
 Lau ese oi lau lalokau henia noho!
² Lohiabada be egu Nadi Badana.
 Ia be egu magu, bona egu hamauria Tauna.
 Egu Dirava be egu kohoro,
 lau heau mauri gabuna.
 Ia ese lau ia gimaia noho, kesi bamona.
 Ia ese lau idia hadikaia gwauraia taudia,
 edia dala ia koua,
 vadaeni lau noho namo.
³ Lohiabada dekenai lau tai henia,
 bona lau idia tuari henia taudia dekena amo,
 Lohiabada ese lau ia hamauria noho.
 Lohiabada ita hanamoa!

⁴ Mase ena goada mai gari danu ese,
 lau ia hagegea noho,
 bona dika bada be,
 abata bamona lau ia hagaria bada noho.
⁵ Mase ena goada mai gari danu ese,
 lau ia hagegea noho,
 bona guria gabuna be,
 tarapu bamona lau ia naria hegaegae noho.

⁶ Egu hisihisi bona gari neganai,
 lau ese Lohiabada lau boiboi henia.
 Durua totona Lohiabada dekenai lau tai henia.
 Ia ese iena Dubu lalonai,
 egu gadona ia kamoni.
 Durua totona lau boiboi neganai,
 be Lohiabada ese ia kamoni.

⁷ Unai neganai tanobada be ia marere,
 ma ia heudeheude.
 Ororo edia badina nadi,
 be kahana kahana dekenai idia mareremarere,
 badina Dirava be ia badu dainai.
⁸ Iena udubaubauna dekena amo,
 kwalahu ia daekau lao.
 Lahi ena siahu,
 be iena uduna dekena amo ia mai,

lahi ena hururuhururu bada herea.

⁹ Dirava ese guba ia darea parara,
bona ia diho mai.

Ori dibura herea be iena aena henunai.

¹⁰ Kerubi aneru ena latanai ia helai, ia roho lao.

Lai ena hanina dekenai ia roho haragaharaga.

¹¹ Dibura dekena amo sibona ia koua,

ori korema momokani ese,
Lohiabada ia koua hagegea.

¹² Kevaru be iena vairana,
dekena amo ia hedinarai mai.

Medu, aisi nadi bamona,
bona lahi hururuhururu,
be ori korema dekena amo,
idia mai murimurina dekenai.

¹³ Lohiabada ese guba boiboi dekena amo ia hereva.

Atai ai Momokani Diravana ena gadona,
be guba dekena amo hereva ia gwaurai.

¹⁴ Iena diba ia pidia,
bona ia dekenai idia dagedage taudia ia luludia.
Kevaru dekena amo ia ese idia ia pidia,
ia halusidia momokani.

¹⁵ Lohiabada e,
oi dekenai idia dagedage taudia,
be oi ese oi gwau henidia neganai,
bona oi ese mai badu danu,
oi boiboi henidia neganai,
davara bada ena ranu ia heau boio,
bona ena tano be ia hedinaraia.
Vadaeni tanobada ena dobu gabudia,
be taunimanima ese idia itaia.

¹⁶ Lohiabada ese atai ai dekena amo,
lau dekenai iena imana ia atoa,
lau ia dogoatao.

Ia ese ranu dobu dekena amo lau ia veria mauri.

¹⁷ Lau dekenai idia tuari henia taudia,
edia goada dekena amo lau ia hamauria,
bona lau idia dagedage henia taudia,
idia ese egu goada idia hereaia taudia,
dekena amo, Lohiabada ese lau ia hamauria.

¹⁸ Hisihisi lau davaria neganai,
idia ese lau idia tuari henia,
to Lohiabada ese lau ia durua,
ia ese lau ia naria.

¹⁹ Dika bona gari gabuna dekena amo,
ia ese lau ia hamauria.
Lohiabada ese lau dekenai ia moale dainai,
lau ia veria mauri.

²⁰ Lohiabada ese davana namona,
be lau dekenai ia henia noho,
badina be lau kara maoromaoro noho.
Lau be kerere lasi dainai,
ia ese lau ia hanamoa noho.

21 Lohiabada ena dala ibounai,
 be lau kamoni henia vadaeni.
 Egu Dirava dekena amo lau raka siri lasi.

22 Iena taravatu ibounai,
 be lau ese lau naria vadaeni,
 bona iena oda be lau ese lau utua lasi.

23 Ia diba lau be kerere lasi,
 bona kara dika dekena amo lau raka siri vadaeni.

24 Egu kara maoromaoro hegeregere,
 Lohiabada ese lau dekenai ahuna namona ia henia,
 badina ia diba lau be kerere lasi.

25 Lohiabada e,
 oi ese bogahisihisi tauna dekenai,
 bogahisihisi oi henia noho,
 bona kara maoromaoro tauna dekenai,
 kara maoromaoro oi henia noho.

26 Laloa goevagoeva tauna dekenai,
 oiemu laloa goevagoeva oi hedinarai noho,
 to kara gagevageva tauna dekenai,
 oiemu kara danu be gagevageva.

27 Badina be manau taudia,
 hekokoroku lasi taudia,
 be oi ese oi hamauria noho,
 to hekokoroku taudia be,
 oi ese oi hamanau noho.

28 Lohiabada e,
 oi ese lau dekenai diari oi henia noho.
 Oi ese egu dibura oi hadiaria noho.

29 Oi ese goada lau dekenai oi henia noho,
 vadaeni lau idia hadikaia gwauraia taudia,
 be lau tuari henidia noho,
 bona siahua danu lau dekenai oi henia noho,
 edia magu do lau hamakohia diba.

30 Dirava ena kara be namo herea momokani.
 Iena gwauhamata be idia momokani vadaeni.
 Ia dekenai idia abidadama henia taudia,
 be Dirava ese idia ia gimaia, kesi bamona.

31 Lohiabada sibona be Dirava,
 bona Dirava sibona be iseda Nadi Badana.
 32 Dirava ese lau dekenai goada ia henia noho.

Ia ese egu raka dalana ia hanamo noho.

33 Lohiabada ese egu aena be,
 dia ena aena hegeregere ia halaoa,
 vadaeni ororo dekenai lau gini goada noho.

34 Lohiabada ese egu imana ia hadibaia noho,
 vadaeni tuari dekenai lau goada,
 bona lau ese,
 auri laboralabora peva lau veria diba.

35 Lohiabada e, oi ese lau oi gimaia,
 bona lau oi hamauria noho.
 Oiemu imana dekena amo lau oi dogoatao.
 Oiemu naria kara ese,

lauegu ladana ia habadaia vadaeni.

³⁶ Oi ese lau oi naria dainai,
tau dikadia ese lau idia abia mauri lasi,
bona lau be nega ta lau moru lasi.

³⁷ Lau dekenai idia tuari henia taudia,
be lau lulua noho,
bona lau ese idia lau dogoatao.
Lau be lau heau noho, doko lasi,
ela bona lau ese idia lau hadikaia ore.

³⁸ Lau ese idia lau gwadaia,
idia moru, idia toreisi lou lasi.
Egu vairana dekenai idia hekure noho,
idia lusi momokani.

³⁹ Lohiabada e, do lau tuari totona,
oi ese goada lau dekenai do oi henia noho.

Bona kwalimu danu,
be lau dekenai do oi henia noho,
lau idia tuari henia taudia dekena amo.

⁴⁰ Oiemu durua dainai,
lau dekenai idia tuari taudia,
be lau dekena amo idia heau,
vadaeni lau idia dagedage henia taudia,
be lau ese lau alaia ore.

⁴¹ Idia ese durua totona idia noinoi,
to tau ta ese idia ia hamauria lasi.
Lohiabada dekenai idia tai,
to ia ese idia dekenai ia haere lasi.

⁴² Lau ese idia lau botaiia patapata,
idia be tano kahu bamona idia lao,
vadaeni lai ese idia ia hodaia ore.
Ariara dekenai idia noho, kopukopu bamona,
lau ese idia do lau moia diho momokani.

⁴³ Taunimanima momo ese,
lau idia dagedage henia neganai,
oi ese lau oi hamauria,
bona bese idauidau edia gunalaia tauna,
be oi ese lau oi halaoa.
Lau diba lasi taudia ese,
egu hesiai gaukara idia karaia noho.

⁴⁴ Idau bese taudia ese,
egu vairana dekenai idia tui diho noho.
Egu hereva idia kamoni neganai,
lau dekenai idia kamoni henia.

⁴⁵ Idau bese taudia edia kudouna,
be do idia manoka lao.
Idia ese edia hunia gabudia dekena amo,
mai gari bada danu do idia raka mai.

⁴⁶ Lohiabada ia mauri noho!
Egu Nadi Badana lau hanamoia noho!
Lau ia hamauria Diravana ena ladana,
be do ita hanamoia bada!

⁴⁷ Lau dekenai idia tuari taudia dekena amo,

Dirava ese kwalimu lau dekenai ia henia noho.
 Bese idauidau taudia be egu siahu henunai,
 Dirava ese ia atodia noho.
⁴⁸ Lau dekenai idia dagedage taudia dekena amo,
 Dirava ese lau ia hamauria noho.
 Lohiabada e, momokani oi ese,
 lau idia hadikaia gwauria taudia,
 dekena amo lau dekenai kwalimu oi henia,
 bona dagedage taudia dekena amo lau oi hamauria.
⁴⁹ Inai dainai, Lohiabada e,
 bese idauidau edia huana dekenai,
 lau ese oiemu ladana do lau hanamoa.
 Ane dekena amo oiemu ladana do lau hanamoa.
⁵⁰ Dirava ese kwalimu badana,
 be iena king dekenai ia henia noho.
 Ia abia hidi tauna dekenai,
 Dirava ese iena noho hanaihanai lalokauna ia henia noho.
 Inai lalokau,
 be Davida bona iena bese taudia,
 edia latanai do ia noho,
 ela bona hanaihanai.

19

Dirava ia karaia gaudia ese iena hairaina idia hedinarai noho

¹ Guba ese Dirava ena hairaina ia hedinarai,
 bona guba dekenai noho gaudia ese,
 Dirava ia karaia gaudia idia hedinarai noho.
² Dina ta ese, ia murinai dinana dekenai,
 Dirava ia herevalaia noho.
 Hanuaboi ta ese,
 ia murinai hanuaboina dekenai,
 Dirava ena aonega ma ia herevalaia.
³ Edia gado ena regena be lasi,
 bona edia hereva be ita kamoni lasi.
⁴ To idia gwauria gaudia,
 be tanobada kahana ibounai dekenai idia lao vadaeni.
 Edia hereva be tanobada ena gabu ibounai,
 dekenai idia ginidae vadaeni.
 Dirava ese guba dekenai,
 dina ena noho gabuna ia karaia.
⁵ Daba neganai dina ia hedinarai mai,
 headava matamata tauna,
 be iena ruma dekena amo ia hedinarai bamona,
 ma heau helulu goada tauna,
 be mai moale bada danu ia heau noho bamona.
⁶ Guba ena dokona ta,
 dekena amo ia daekau noho,
 vadaeni ia hanaia noho,
 ela bona guba ena dokona ta.
 Gau ta be iena siahu dekena amo ia hunia diba lasi.

Lohiabada ena Taravatu

⁷ Lohiabada ena Taravatu be ia namo momokani.
 Ia ese taunimanima edia lauma ia hamauria lou.
 Lohiabada ena hadibaia hereva be momokani vadaeni.

Idia ese aonega lasi taudia dekenai,
aonega idia henia.

⁸ Lohiabada ena Taravatu be idia maoromaoro vadaeni.
Unai Taravatu idia badinaia taudia ese,
moale idia davaria noho.

Lohiabada ena oda be diari hegeregere.
Idia ese taunimanima edia laloe idia hadiaria.

⁹ Lohiabada dekenai idia tomadiho taudia,
ese kara namona idia karaia noho.

Bona inai bamona kara,
be nega hanaihanai do ia noho.

Lohiabada ena kota henia karana be momokani,
bona nega ibounai,

Lohiabada ena kota davana be maoromaoro.

¹⁰ Lohiabada ena hereva ese,
golo ena namo idia hereaia.

Golo namona momokani idia hereaia.
Unai hereva edia mamina namona ese,
hani namona ena mamina ia hereaia.

Unai dainai do ita ura henidia,
be gau badana momokani.

¹¹ Lohiabada e, oiemu Taravatu ese,
lau, oiemu hesiai tauna dekenai,
sisiba namona idia henia.

Lau ese idia lau badinaia neganai,
noho mauri namona momokani lau davaria.

¹² To edena tauna ese,
sibona ena kerere karadia ia diba?
Mani emu kara lauegu kara dika,
hunia gaudia, do oi gwauatao.

¹³ Bona lau do oi durua,
vadaeni egu hekokoroku dainai,
kara dika do lau karaia lasi.

Mani lau do oi naria,
vadaeni lauegu kara dika ese,
lau do idia biagua lasi.

Unai neganai lau be kerere lasi,
ma kara dika badana ta do lau karaia lasi.

¹⁴ Lohiabada e,
oi be lauegu Nadi Gini Gabuna,
bona egu Hamauria Tauna.
Mani lau do oi durua,
vadaeni lauegu uduna ena hereva,
bona lauegu kudouna ena laloe,
be do idia namo, oiemu vairana dekenai.

20

King do ia kwalimu totona Davida ese Dirava ia noia

¹ Oiemu nega dika bona hisihisi neganai,
Lohiabada ese oi dekenai durua do ia henia.
Iakobo ena Dirava ese oi do ia gimaia.

² Iena helaga gabuna dekena amo,
iena durua do ia siaia mai.

Siona Ororo dekena amo,
goada oi dekenai do ia henia.

³ Oiemu boubou gaudia ibounai do ia lalao,
bona oiemu gabua boubou gaudia,
be do ia abia dae.

⁴ Oiemu kudouna ena ura,
be oi dekenai do ia henia,
bona oiemu palani ibounai,
edia anina do ia havaraia.

⁵ Oiemu kwalimu dainai,
ai be mai moale bada danu do ai boiboi,
bona Dirava ena ladana dainai,
aiemai pepe do ai abia isi.

Lohiabada ese oiemu noinoi ibounai,
edia anina be oi dekenai do ia havaraia.

⁶ Harihari lau diba vadaeni,
Lohiabada ese ia abia hidi tauna ia durua noho.
Iena gabu helagana dekena amo,
egu noinoi ia haere henia noho,
bona iena siahu badana dekena amo,
kwalimu badadia ia henia noho.

⁷ Taunimanima haida ese tuari totona,
kariota idia abidadama henia noho,
ma haida ese hosi idia abidadama henia noho.

To ai ese Lohiabada,
aiemai Dirava ai abidadama henia noho.

⁸ Unai taudia be do idia hekwakwanai,
bona do idia moru diho.
To ai be do ai toreisi,
bona do ai gini goada.

⁹ Lohiabada e, king do oi hamauria!
Oi dekenai ai boiboi neganai,
mani ai dekenai do oi haere henia.

21

Ia kwalimu dainai Davida ese Dirava ia hanamoa

¹ Lohiabada e,
oiemu goada dainai,
king be ia moale bada noho.

Kwalimu oi henia dainai ia moale bada noho.
² Oi ese iena kudouna ena ura oi henia vadaeni.
Iena noinoi gauna,

be oi ese oi henia vadaeni.

³ Oi ese king oi abia dae neganai,
hanamoa bada ia dekenai oi henia,
bona iena kwarana dekenai korona,
golo gauna oi atoa.

⁴ Ia ese oi dekenai mauri ia noia,
bona oi ese ia dekenai oi henia.
Iena mauri dinadia,
be oi ese do oi halataia,
ela bona hanaihanai.

⁵ Kwalimu momo ia dekenai oi henia dainai,

taunimanima momo ese,
king ena ladana idia hanamoa noho.
Iena sivarai idia gwauraia loaloa noho,
bona iena king siahuna be ia bada noho.

⁶ Momokani, Lohiabada e,
oi ese king oi hanamoa bada vadaeni,
bona inai hanamoa,
be do idia noho ela bona hanaihanai.
Oi be ia dekenai oi noho dainai,
ia moale bada noho.

⁷ King ese Siahu Ibounai Lohiabada,
ia abidadama henia noho.
Bona oi Lohiabada,
oiemu noho hanaihanai lalokauna dainai,
king be do ia gini goada noho.

⁸ King ese ia dekenai idia tuari taudia ibounai,
be do ia abia mauri.
Ia dekenai idia dagedage noho taudia,
be king ese do ia dogoatao.

⁹ King be do ia hedinarai mai neganai,
ia ese unai taudia do ia hadikaia ore,
lahi bada ese gau ibounai ia araia ore bamona.

Lohiabada ese mai badu danu idia do ia alaia ore.
Lahi ese idia do ia gabua ore.

¹⁰ Oi ese edia bese taudia,
be tanobada dekena amo do oi kokia ore.
Idia edia natudia ibounai,
be king ese do ia alaia ore.

¹¹ King idia hadikaia dalana,
be idia tahua noho.
Palani dikana ta idia laloa hegaegae noho.
To idia hageregere lasi king do idia halusia,

¹² badina king ese iena peva dekena amo,
idia dekenai diba do ia pidia,
bona idia be do idia heau boio.

¹³ Lohiabada e,
oiemu goada be ai ese do ai hanamoa!
Ai ese ane do ai abia,
bona oiemu siahu badana do ai hanamoa momokani!

22

David a ese lalo hisihisi bada dainai Dirava dekenai ia taitai, unai murinai Dirava hanamoa ane ia abia

¹ Egu Dirava e, egu Dirava e,
badina dahaka lau oi rakatania vadaeni?
Badina dahaka oiemu durua,
be daudau herea ia noho.
Badina dahaka egu taitai,
be oi kamonai henia lasi.

² Lauegu Dirava e,
dina neganai oi dekenai lau tai,

to lau dekenai oi kamonai lasi.
 Hanuaboi neganai danu,
 to laga-ani lau davarua lasi.

³ To oi be Helaga Dirava,
 terona dekenai oi helai.
 Oi be Israela taudia ese idia hanamoa noho.
⁴ Aiema sene taudia ese,
 oi dekenai idia abidadama henia,
 Oi dekenai idia abidadama,
 vadaeni oi ese idia oi hamauria.
⁵ Oi dekenai idia taitai,
 vadaeni mauri idia davarua.
 Idia ese oi idia abidadama henia,
 vadaeni idia dika lasi.

⁶ To lau be biluga sibona,
 lau be tau lasi.
 Taunimanima ibounai ese lau idia ura lasi,
 lau idia negea vadaeni.

⁷ Lau idia itaia taudia ibounai ese,
 lau dekenai idia kirikiri,
 Lau dekenai idia hereva dika.
 Edia malana idia atoa murimuri dekenai,
 bona edia kwarana idia giroagiroa,

⁸ idia gwau,
 “Oi ese Lohiabada dekenai oi abidadama,
 badina dahaka ia ese oi ia hamauria lasi?
 Bema Lohiabada ese oi ia ura henia neganai,
 badina dahaka ia ese oi ia durua lasi?”

⁹ To Lohiabada e,
 oi ese lauegu sinana ena bogana,
 dekena amo lau oi abia mai,
 bona lau be egu sinana ena ratana dekenai neganai,
 oi ese lau oi naria noho.

¹⁰ Lauegu vara dinana dekena amo,
 oi dekenai lau abidadama,
 bona egu sinana ena bogana dekena amo,
 oi be lauegu Dirava.

¹¹ Lau dekena amo do oi noho daudau lasi,
 badina nega dikana ia kahirakahira,
 bona lau be durua tauna ta lasi.

¹² Lau idia hadikaia gwauraia taudia momo ese,
 lau idia hagegea noho.
 Idia be Basana tano ena boromakau tau dagedagedia bamona.

¹³ Idia ese edia uduna idia kehoa.
 Idia be laiona hegeregere,
 mai dagedage danu idia boiboi noho,
 bona lau idia korua noho.

¹⁴ Lauegu goada ia ore vadaeni,
 ranu be tano dekenai idia bubua kava bamona.
 Lauegu turiana ibounai be idia dika.
 Lauegu kudouna be kandolo bamona,

egu kemena dekenai ia veve ore.

¹⁵ Lauegu goada be ia kaukau noho, kahu bamona,
bona egu malana be egu uduna dekenai ia kamokamo.

Mase ena kahu dekenai,
oi ese lau oi rakatania vadaeni.

¹⁶ Kara dika taudia ore a ta ese lau idia hagegea.

Idia be sisia bamona lau idia koua noho,
egu imana bona aena idia koria noho.

¹⁷ Egu turiana ibounai be idia hedinarai noho.

Taunimanima ese lau idia itaia noho,
bona lau dekenai idia kirikirilaia.

¹⁸ Lauegu dabua idia haria noho.

Egu dabua be laki dekenai idia haria.

¹⁹ To oi, Lohiabada e,
lau dekena amo do oi noho daudau lasi.

Lauegu goada ena badina e,
oi mai haraga, lau do oi durua.

²⁰ Tuari kaia dekena amo lau do oi hamauria.

Unai sisia edia sياهو dekena amo,
lauegu mauri do oi hamauria.

²¹ Unai laiona edia uduna dekena amo,

lau do oi hamauria.

Uda boromakau tau edia doana dekena amo,
lau do oi veria mauri.

²² Lauegu bese taudia dekenai,

oiemu kara do lau hadibaia.

Oiemu ladana be,

hebou taudia edia vairanai do lau hanamoa.

²³ Lohiabada dekenai umui gari taudia e,
ia do umui hanamoa.

Iakobo ena natuna taudia ibounai e,

Lohiabada do umui hanamoa.

Israela ena bese taudia ibounai e,

Lohiabada do umui matauraia.

²⁴ Badina be ia ese hisihisi ia abia noho tauna,
dekena amo ia raka siri lasi,

to ia laloa noho,

bona ia dekenai ia taitai neganai,

durua ia henia noho.

²⁵ Hebou badana lalonai,

lau ese oi do lau hanamoa,

oiemu kara namodia dainai.

Oi dekenai idia gari taudia edia vairanai,

lauegu gwauhamata ena anina do lau karaia.

²⁶ Oogami taudia be do idia aniani,

edia bogana do idia kunu.

Lohiabada idia tahua noho taudia ese,

iena ladana do idia hanamoa.

Namona be idia noho namonamo ela bona hanaihanai!

²⁷ Tanobada ena bese ibounai taudia ese,

Lohiabada do idia laloa,

bona ia dekenai edia lalona do idia giroa.

Bese idaidau ibounai edia iduhu ibounai ese,
Lohiabada dekenai do idia tomadiho.

²⁸ Badina Lohiabada be King,

ia be bese ibounai edia Lohia.

²⁹ Momokani tanobada ena hekokoroku taudia ibounai,

ese Lohiabada dekenai dohore idia tomadiho.

Bona mauri idia dogoatao diba lasi taudia ibounai,

kahu dekenai idia lao noho taudia unai,

ese Lohiabada ena vairanai do idia tui diho.

³⁰ Iseda natudia bona tubudia ese,

Lohiabada ena hesiai gaukara do idia karaia,

bona vairai nega taunimanima dekenai,

Lohiabada ena sivarai do idia hadibaia.

³¹ Do idia vara lasi taudia dekenai,

inai bamona hereva do idia gwaauria:

“Lohiabada ese iena bese taudia ia hamauria.”

23

Lohiabada be iseda naria tauna, mamoe naria tauna bamona

¹ Lohiabada ese lau ia naria noho,

mamoe naria tauna ese,

iena mamoe ia naria bamona.

Unai dainai gau ta do lau dabu lasi.

² Rei namona gabuna dekenai lau ia hakaua,

unuseni lau laga-ani totona.

Ranu namona gabuna dekenai danu,

ia ese lau ia hakaua noho.

³ Lauegu lauma be ia ese ia hagoadaia lou.

Kara maoromaoro daladia dekenai,

ia ese lau ia hakaua noho,

iena gwauhamata hegeregere.

⁴ Oibe, lau be mase ena dibura koura gabuna,

dekenai do lau raka lao,

to dika ta dekenai do lau gari lasi,

badina be, Lohiabada e,

oi be lau danu oi noho.

Oiemu mamoe hakaua itotohi,

bona oiemu botaia auna ese,

lau idia gimaia noho.

⁵ Lauegu aniani be oi ese oi abia hegaegae noho,

lau idia dagedage henia taudia edia vairana dekenai.

Oiemu aria dekenai lau oi abia dae,

mai mataurai danu.

Lauegu kapusi be oi ese oi hahonua noho.

⁶ Momokani, oiemu kara namo bona bogahisihisi,

be lau dekenai do idia noho,

egu mauri dinadia ibounai lalonai.

Bona Lohiabada ena Ruma dekenai do lau noho,

ela bona hanaihanai.

24

Dirava be King Badana

¹ Tanobada bona ia lalonai noho gaudia ibounai,

be Lohiabada ena.
 Tanobada bona ia lalonai noho taunimanima,
 ibounai be Lohiabada ena.
²Badina be ia sibona ese tanobada ia haginia,
 tano henunai ia noho ranu dobudia edia latanai.
 Ia ese tanobada ena badina,
 be davara ena dobu gabudia dekenai ia atoa.

³Daika ese Lohiabada ena ororo,
 dekenai do ia daekau lao?
 Daika ese iena gabu helagana lalonai do ia gini?

⁴Kara goevagoeva,
 bona laloa goevagoeva taudia sibona ese.
 Dirava koikoi idia tomadiho henia lasi,
 bona idia gwauhamata koikoi lasi taudia ese.

⁵Lohiabada ese,
 unai bamona taudia do ia hanamoa bona hamauria,
 Lohiabada ese idia do ia gwauraia,
 idia be kerere lasi.

⁶Unai bamona taudia ese Dirava idia tahua noho,
 idia ura Iakobo ena Dirava ena vairanai idia gini.

⁷Ikoukou do umui kehoa namonamo,
 bona idaunegai iduara danu do umui kehoa.
 Vadaeni King Badana do ia raka vareai.

⁸Inai King Badana be daika?
 Ia be Lohiabada, mai ena goada,
 bona mai ena sياهو danu.
 Ia be Lohiabada,
 tuari dekenai ia kwalimu noho.

⁹Ikoukou do umui kehoa namonamo,
 bona idaunegai iduara danu do umui kehoa bada,
 vadaeni King Badana be do ia raka vareai.

¹⁰Inai King Badana be daika?
 Sياهو Ibounai Lohiabada,
 ia be King Badana momokani.

25

David a ese Lohiabada ia noia do ia hakaua bona naria

¹Lohiabada e,
 oi dekenai egu lauma lau abia isi inai.

²Egu Dirava e,
 oi dekenai lau abidadama henia noho.
 Lau do oi durua,
 vadaeni hemarai do lau davaria lasi.
 Lau do oi durua,
 vadaeni lau idia hadikaia gwauraia taudia ese,
 lau do idia kirikirilaia lasi!

³Badina oi dekenai idia abidadama taudia,
 be do idia moru lasi,
 to edia abidadama idia rakatania kava taudia,
 be moru ena hemarai do idia abia.

⁴Lohiabada e,

oiemu kara lau dekenai do oi hadibaia.
 Oiemu dala lau dekenai do oi hedinarai.
⁵ Oiemu hereva momokani ena dala dekenai,
 lau do oi hakaua,
 bona inai hereva momokani,
 be lau dekenai do oi hadibaia.
 Badina oi be egu Dirava,
 oi ese lau oi hamauria noho.
 Nega ibounai oi dekenai lau abidadama henia noho.

⁶ Lohiabada e, oiemu bogahisihisi,
 bona oiemu noho hanaihanai lalokauna,
 be do oi laloa noho,
 badina oi ese idaunegai ia mai bona hari,
 inai kara taunimanima dekenai oi karaia.

⁷ Lau uhau neganai kara dika lau karaia gaudia,
 bona egu kerere danu,
 be mani do oi gwauatao.
 Lohiabada e,
 oiemu noho hanaihanai lalokauna dainai,
 lau dekenai do oi laloa namo,
 badina oiemu kara be namo.

⁸ Lohiabada be namo bona maoromaoro.
 Unai dainai ia ese kara dika taudia dekenai,
 iena dala ia hadibaia noho.

⁹ Ia ese hekokoroku lasi taudia,
 be dala maoromaoro dekenai ia hakaudia noho.
 Ia ese manau taudia dekenai,
 iena dala ia hadibaia noho.

¹⁰ Iena taravatu bona iena hadibaia hereva,
 idia badinaia bona kamoni henia taudia,
 be Lohiabada ese,
 mai lalokau bona mai momokani danu,
 do ia hakaudia lao noho.

¹¹ Lohiabada e, oiemu ladana dainai,
 egu kara dika do oi gwauatao,
 badina egu kara dika be bada.

¹² Edena tau ese Lohiabada ia gari henia noho?
 Lohiabada ese unai tau dekenai,
 iena raka dala maorona do ia hadibaia.

¹³ Unai tau ese kohu momo do ia abia,
 bona iena natuna ese,
 tano do idia abia, edia tano.

¹⁴ Lohiabada idia gari henia taudia,
 be Lohiabada ese idia dekenai,
 iena hunia gaudia ia hadibaia noho.
 Lohiabada ese danu idia dekenai,
 iena gwauhamata taravatuna ena anina ia hadibaia noho.

¹⁵ Nega ibounai,
 Lohiabada dekenai egu matana lau negea noho,
 lau do ia durua totona,
 bona ia ese mase bona gari gaudia dekena amo,
 lau ia hamauria noho.

¹⁶ Lohiabada e,

lau dekenai do oi laloa,
 lau dekenai do oi bogahisihisi,
 badina lau be sibona lau noho,
 bona lau manoka noho.

¹⁷ Lauegu lalohisihisi do oi hadokoa,
 bona egu hisihisi dekena amo lau do oi hamauria.

¹⁸ Egu laloa hekwarahi bona egu laloa metau do oi laloa,
 bona egu kara dika ibounai mani do oi gwauatao.

¹⁹ Do oi laloa,
 lau idia hadikaia gwauraia taudia,
 be idia momo herea,
 bona edia badu be auka herea lau dekenai.

²⁰ Egu mauri do oi gimaia,
 bona lau do oi hamauria.
 Lau do oi durua,
 vadaeni hemarai do lau davaria lasi,
 badina egu heau mauri gabuna be oi.

²¹ Lohiabada e,
 egu kara momokani bona kara maoromaoro dainai,
 lau do oi gimaia,
 badina oi dekenai lau abidadama noho.

²² Dirava e, edia hisihisi ibounai dekena amo,
 oiemu bese Israela taudia do oi hamauria.

26

Tau namona ta ena guriguri

¹ Lohiabada e,
 lau do oi gwauraia kerere lasi,
 badina be lau ese kara maoromaoro lau karaia vadaeni,
 bona lau ese oi dekenai,
 lau abidadama henia momokani vadaeni.

² Lohiabada e,
 lau do oi tahua bona tohoa,
 bona egu kara do oi itaia.
 Egu ura bona egu laloa danu do oi tahua.

³ Badina be oiemu noho hanaihanai lalokauna,
 be egu vairana dekenai lau itaia noho,
 bona oi dekenai abidadama henia kara ena dala dekenai,
 lau raka noho nega ibounai.

⁴ Koikoi taudia danu lau helai noho lasi,
 bona kara maoromaoro koikoi taudia danu,
 be lau haboua tamona lasi.

⁵ Kara dika taudia edia hereva hebou,
 be lau ura lasi momokani,
 bona kerere taudia dekena amo lau noho siri.

⁶ Lohiabada e,
 egu imana lau huria noho,
 egu maoromaoro bona kerere lasi do lau hedinarai totona,
 bona oiemu boubou patana lau raka hagegea noho.

⁷ Unai neganai oi hanamoa totona ane lau abia,
 bona oiemu kara badadia,
 lau gwauraia hedinarai noho.

⁸ Lohiabada e, oi noho Ruma,
be lau ura henia noho.
Oiemu hairaina ia noho gabuna,
be lau lalokau henia noho.

⁹ Kara dika taudia danu nega tamona,
be egu lauma do oi hadikaia ore lasi.

Ala-ala taudia danu be lau do oi hamasea lasi.

¹⁰ Idia be kara dika idia karaia noho nega ibounai,
bona nega ibounai gagevagateva karadia idia karaia noho,
moni do idia davaria totona.

¹¹ To lau be kara maoromaoro lau karaia noho.
Lau dekenai do oi bogahisihisi henia,
bona lau do oi hamauria.

¹² Lau gini goada noho,
bona lau hadikaia totona gauna ta ia noho lasi.
Lohiabada e, oiemu bese taudia,
edia hebou badana lalonai,
lau ese oi do lau hanamoa bada.

27

Dirava hanamoa ena guriguri

¹ Lohiabada be laegu diari,
ma ia ese lau ia hamauria noho.
Daika dekenai do lau gari?
Lohiabada ese mase gaudia ibounai dekena amo,
lau ia gimaia noho.

Daika garina do lau gari?.

² Bema kara dika taudia ese lau idia heatu henia,
lau do idia alaia gwauraia,
unai neganai do idia hekwakwanai,
bona do idia moru diho.

³ Sedira tuari taudia momo ese lau do idia hagegea,
to lau be lau gari lasi.

Bema tuari bada be lau dekenai ia kamokau neganai,
lau ese Dirava do lau abidadama henia.

⁴ Gau tamona sibona Lohiabada dekena amo do lau noinoi,
unai gau sibona do lau tahua.

Lau ura Lohiabada ena Dubu lalonai do lau noho,
egu mauri dinadia ibounai.

Vadaeni Lohiabada ena namo do lau lalao,
bona iena aonega do lau tahua.

⁵ Nega dika be lau dekenai ia ginidae neganai,
Lohiabada ese lau do ia durua.

Iena Dubu Helaga lalonai lau do ia hunia.

Ataiai nadi badana latanai ia ese lau do ia atoa.

⁶ Unai dainai lau idia dagedage henia taudia,
be do lau halusidia.

Vadaeni Lohiabada ena Dubu Helaga lalonai,
boubou do lau henia, mai moale danu,
bona ane do lau abia,
Lohiabada hanamoa anedia.

7 Lohiabada e,
 oi dekenai lau boiboi neganai,
 mani do oi kamoni!
 Lau dekenai do oi bogahisihisi,
 lau dekenai do oi haere!
 8 Oi ese lau oi hamaoroa, oi gwau,
 “Lau dekenai do oi tomadiho.”
 Vadaeni lau haere, lau gwau,
 “Lohiabada e, lau mai inai,
 9 oiemu vairana lau dekena amo mani oi hunia lasi.”

Lau dekenai do oi badu lasi.
 Lau, oiemu hesiai tauna, do oi lulua lao lasi.
 Guna oi ese lau oi durua vadaeni.
 Lauegu hamauria Diravana e,
 lau do oi negea lasi,
 lau do oi rakatania lasi.
 10 Badina be egu tamana bona sinana,
 ese lau idia rakatania,
 to Lohiabada ese lau do ia abia dae.
 11 Lohiabada e,
 oiemu kara be lau dekenai do oi hadibaia.
 Dala maoromaoro dekenai lau do oi hakaua,
 badina lau idia dagedage henia taudia be momo.
 12 Lau idia dagedage henia taudia edia siahu henunai,
 lau do oi rakatania lasi.
 Idia ese lau hagaraia bona hadikaia totona,
 hereva koikoi idia gwauraia noho.
 13 Lau diba momokani,
 lau ese inai mauri lalonai,
 Lohiabada ena kara namo do lau itaia.
 14 Lohiabada dekenai do umui abidadama henia.
 Do umui lalao goada, daradara lasi.
 Lohiabada dekenai do umui abidadama henia.

28

Durua totona ena guriguri

1 Lohiabada e, egu Nadi Badana,
 oi dekenai lau boiboi noho.
 Lau dekena amo oiemu taiana do oi koua lasi.
 Bema lau dekenai oi haere lasi neganai,
 lau be mase gabuna dekenai idia diho lao taudia,
 danu do ai diho lao.
 2 Durua totona lau noinoi neganai,
 egu hereva do oi kamoni henia.
 Bema egu imana lau abia isi,
 oiemu Duba Helaga ia noho kahana dekenai lau duduia,
 unai neganai lau dekenai mani do oi lalao.

3 Kara dika taudia danu nega tamona,
 lau do oi panisia lasi.
 Kara kerere taudia danu,
 lau do oi hadikaia ore lasi.
 Idia ese maino hereva idia gwauraia noho,

to edia kudoudia lalonai be badu ia noho.

⁴Edia kerere ena davana do oi henidia.

Edia kara dika hegeregereana,
davana idia dekenai do oi henia.

Edia dika ibounai dainai do oi matakani henidia,
bona edia dika davana korikori do oi henia momokani.

⁵Idia ese Lohiabada ena gaukara idia matauraia lasi.

Lohiabada ena kara badadia idia laloa lasi.
Unai dainai ia ese idia do ia veria diho momokani,
bona do ia haginidia lou lasi.

⁶Lohiabada do ita hanamoa!

Ia ese egu noinoi durua totona ia kamoni henia vadaeni.

⁷Lohiabada be egu goada bona egu kesi.

Lau ese ia lau abidadama henia noho.

Ia ese lau ia durua noho,
bona egu kudouna ia hamoalea noho.

Mai moale danu,
ane dekena amo Lohiabada do lau hanamoa.

⁸Lohiabada ese iena bese taudia ia gimaia noho.

Ia ese ia abia hidi king ia naria,

bona ia hamauria noho.

⁹Lohiabada e,

oitemu bese taudia do oi hamauria.

Oitemu natuna korikori taudia do oi hanamoa.

Mamoe naria tauna bamona,

oi ese idia do oi naria.

Bona nega ibounai, doko lasi,

idia do oi naria namonamo noho.

29

Lai dika bada lalonai Dirava ena gadona ia hereva

¹Guba ena siahua taudia e,

Lohiabada do umui hanamoa.

Iena hairaina bona iena siahua do umui hanamoa.

²Lohiabada ena ladana ena hairaina do umui hanamoa.

Helaga Bada Lohiabada ia hedinaraia neganai,
do umui tomadiho henia.

³Lohiabada ena gadona,

be davara ena latanai idia kamonaia noho.

Hairai ena Dirava ese,

guba boiboi lalonai ia hereva noho.

Lohiabada ena gadona be davara badana ena latanai.

⁴Lohiabada ena gadona be mai ena siahua.

Lohiabada ena gadona be King Badana ena gadona.

⁵Lohiabada ena gadona ese,

sida audia ia makohia noho.

Lohiabada ese Lebanona ena sida audia ia makohia noho.

⁶Ia ese Lebanona ena ororo ia hamarerea,

idia be boromakau natudia bamona idia roho noho.

Heremona Ororo danu,

be Lohiabada ese ia hamarerea,

ia be uda boromakau natuna tau bamona ia roho noho.

⁷Lohiabada ena gadona ese kevaru,

lahi bamona ia havaraia noho.

⁸Lohiabada ena gadona ese,
tano kaukau gabudia ia hamarerea noho.
Kadesi ena tano kaukau ia hamarerea noho.

⁹Lohiabada ena gadona ese,
dia hahine edia mara ia havaraia noho.
Lohiabada ena gadona ese au ena raurau ia hodaia,
ia kokidia momokani.

Bona iena Dubu Helaga lalonai,
taunimanima ibounai idia boiboi,
idia gwau, “Lohiabada ita hanamoa!”

¹⁰Lohiabada ese ranu dobu abata badana ia biagua noho.
Lohiabada be iena terona dekenai ia helai noho,
bona do ia King ela bona hanaihanai.

¹¹Lohiabada ese iena bese taudia dekenai goada ia henia noho,
bona ia ese iena ore a taudia,
be maino dekena amo ia hanamodia noho.

30

David a ese Lohiabada ia tanikiu henia

¹Lohiabada e,
oi ese lau oi hamauria dainai lau tanikiu henia.
Oi ese lau oi durua dainai,
lau idia tuari henia taudia,
ese lau idia kirikirilaia lasi.

²Lohiabada, egu Dirava e,
durua totona oi dekenai lau tai henia,
bona oi ese lau oi hanamoa.

³Oi ese guria gabuna dekena amo lau oi veria mauri.
Lau be mase taudia edia gabu, kahirakahira lau ginidae,
to oi ese lau oi hamauria lou.

⁴Lohiabada ena vairanai umui kara maoromaoro taudia e,
Lohiabada dekenai ane do umui abia.
Iena ladana helagana do umui hanamoa.

⁵Badina iena badu be ia ore haraga,
to iena hanamoa be do ia noho,
ela bona mauri ena dokona.
Taitai be sedira hanuaboi ena hora ibounai do ia noho,
to dabai be moale ma do ia vara lou.

⁶Lauegu noho be namo neganai lau hereva, lau gwau,
“Lau be nega ta do lau moru diba lasi.”

⁷Lohiabada e, oi ese lau oi hanamoa neganai,
lau gini goada noho,
ororo aukana bamona.
To oi ese,
lau dekena amo oiemu vairana oi hunia neganai,
lau be lau gari bada herea.

⁸Lohiabada e,
lau ese oi dekenai lau tai henia.
Durua totona oi dekenai lau noinoi, lau gwau,

⁹“Mase gabuna dekenai bema lau lao,

egu mase ena namo be dahaka?
 Tano ena kahu ese oi Lohiabada do ia hanamoa diba, a?
 Tano ena kahu ese,
 oiemu kara namona do ia gwauraia diba, a?
¹⁰ Lohiabada e, oi kamona,
 bona lau dekenai do oi bogahisihisi henia!
 Lohiabada e, lau do oi durua!”

¹¹ Lohiabada e, oi ese egu lalohisihisi oi hadokoa vadaeni,
 bona mavaru mai moale danu dekenai oi halaoa vadaeni.
 Egu laloa metau oi kokia,
 bona moale bada be iena gabu dekenai oi atoa vadaeni.

¹² Unai dainai egu lauma ese,
 oi do ia hanamoa noho,
 egu uduna do lau hakaupua lasi.
 Badina Lohiabada e, oi be egu Dirava,
 bona lau ese oi do lau tanikiu henia noho, ela bona hanaihanai.

31

Dirava dekenai ia abidadama henia tauna ena guriguri

¹ Lohiabada e, lau ese oi lau abidadama henia noho.

Unai dainai lau do oi durua,
 vadaeni lau idia hadikaia gwauraia taudia,
 ese lau do idia hamorua lasi.

Lohiabada e,
 oi be kara maoromaoro Diravana.
 Unai dainai oi ese lau do oi hamauria.

² Lohiabada e,
 lau dekenai do oi kamona.
 Oi mai haraga, lau do oi hamauria!
 Egu Nadi Badana do oi lao momokani.

Egu kohoro danu do oi lao,
 lau do oi hamauria totona.
³ Oi be egu Nadi Badana bona egu kohoro dainai,
 oi ese lau do oi hakaua, bona gimaia,
 oiemu gwauhamata hegeregerena.

⁴ Tau haida ese lau abia totona,
 tarapu idia atoa hegaegae vadaeni.

Inai tarapu dekena amo,
 lau do oi kokia,
 badina oi be egu hunia gabu aukana.
⁵ Egu lauma be oiemu imana dekenai lau atoa inai.

Lohiabada e, oi ese lau do oi hamauria,
 badina oi be kara momokani ena Dirava.

⁶ Dirava koikoi edia laulau idia tomadiho henia taudia,
 be oi ese oi badu henia noho,
 to lau ese oi lau abidadama henia noho.

⁷ Do lau moale bada,
 oiemu noho hanaihanai lalokauna dainai do lau moale,
 badina oi ese egu laloa hekwarahi oi itaia,
 bona egu lauma ena hisihisi oi diba.

⁸ Oi ese lau idia hadikaia gwauraia taudia,

edia siahu henunai lau oi atoa lasi,
bona oi ese egu ura dala oi kehoa vadaeni.

⁹ Lohiabada e, lau dekenai do oi bogahisihisi henia,
badina hisihisi ese lau ia abia noho.
Taitai ese egu matana ia hadikaia noho.

Egu laumana bona tauanina idia dika vadaeni.

¹⁰ Lalohisihisi dainai egu goada ia ore,
bona taitai ese egu mauri ia hakwadogia vadaeni.

Egu hisihisi dainai lau manoka lao noho.

Egu turiana be idia maragi lao noho.

¹¹ Lau idia hadikaia gwauraia taudia ibounai,

bona egu badibadinai noho taudia ese,

lau idia ura henia lasi,

lasi momokani.

Egu turana ese lau dekenai idia gari henia noho.

Idia ese ariara dekenai lau idia itaia neganai,

lau dekena amo idia heau siri.

¹² Taunimanima ibounai ese lau idia laloaboio vadaeni,

mase tauna idia laloaboio bamona.

Lau be uro, idia hamakohia gauna ta bamona.

¹³ Lau idia hadikaia gwauraia taudia momo,

edia hereva maragi lau kamoni noho.

Kahana ibounai dekena amo,

idia ese lau idia hagaria gwauraia,

vadaeni idia herevahereva noho,

lau do idia hadikaia totona.

Egu mauri do idia hadokoa dalana,

be idia laloa karaia noho.

¹⁴ To Lohiabada e,

egu abidadama be oi dekenai lau atoa noho.

Oi be egu Dirava.

¹⁵ Nega ibounai egu mauri be oi ese oi naria noho.

Lau idia hadikaia gwauraia taudia dekena amo,

lau do oi hamauria.

Lau idia dagedage henia noho taudia dekena amo,

lau do oi hamauria.

¹⁶ Lau, oiemu hesiai tauna,

be mai emu bogahisihisi danu do oi itaia noho.

Oiemu noho hanaihanai laloauna dainai,

lau do oi hamauria.

¹⁷ Lohiabada e, lau ese oi dekenai lau boiboio noho.

Mani emu kara lau do oi durua,

vadaeni lau idia hadikaia gwauraia taudia ese,

lau do idia halusia lasi.

Mani emu kara, kara dika taudia do oi hadikaia,

vadaeni mai regena ta lasi,

mase taudia edia gabu dekenai do idia diho lao.

¹⁸ Koikoi taudia,

be mani emu kara edia hereva do oi koua momokani.

Hekokoroku taudia,

bona edia hereva dekena amo,

kara maoromaoro taudia idia hadikaia noho taudia,

mani emu kara edia ududia do oi hakaupua momokani.

¹⁹ Oi dekenai idia gari henia taudia,

be oi ese hanamoā bada herea idia dekenai oi henia.

Taunimanima ibounai be inai oiemu kara namona idia diba.

Bona oi dekenai idia abidadama taudia,

be oi ese oi naridia namonamo,

inai danu taunimanima idia diba.

²⁰ Oi ese oiemu vairana dekenai,

mauri gabuna dekenai,

inai abidadama taudia oi hunidia noho.

Taunimanima edia koikoi karadia dekena amo,

oi hunidia noho.

Oiemu ruma namona lalonai oi hunidia noho.

Idia badu henidia taudia dekena amo oi gimadia noho.

²¹ Lohiabada do lau hanamoā noho!

Badina lau idia alaia gwauraia taudia ese lau idia hagegea,

bona lau idia heatu henia neganai,

ia ese mai hoa kara danu,

iena lalokau be lau dekenai ia hedinarai vadaeni.

²² Lau be lau gari, bona lau laloa,

“Lohiabada ese iena vairana dekena amo lau ia lulua vadaeni.”

To lau ese durua totona lau tai henia neganai,

Lohiabada ese egu noinoi ia kamoni henia.

²³ Lohiabada dekenai umui abidadama henia taudia ibounai e,

Lohiabada do umui lalokau henia.

Lohiabada ese abidadama taudia ia gimaia noho,

to hekokoroku taudia dekenai,

edia kerere davana ia henia noho momokani.

²⁴ Lohiabada ena nega namona umui naria noho taudia ibounai e,

do umui goada, do umui boga auka.

32

Kara dika gwauraia hedinarai, vadaeni emui dika do idia gwauatao

¹ Bema Dirava ese tau ta ena kara dika ia gwauatao neganai,

unai tau be ia namo.

Bema iena kerere be Dirava ese ia gwauatao,

unai tau be ia moale.

² Bema Lohiabada ese tau ta kerere totona ia samania lasi,

bona unai tau ena lauma lalonai koikoi sisina ia noho lasi,

unai tau be mai moale danu.

³ Bema egu kara dika lau gwauraia hedinarai lasi neganai,

lauegu tauanina ia maragi lao,

dina ibounai lau taitai dainai.

⁴ Badina be dina bona hanuaboi ibounai,

oi Lohiabada ese lau oi matakani henia noho.

Lauegu goada be ia ore ia lao,

siahu neganai ranu be ia kororo lao bamona.

⁵ Unai neganai lauegu kara dika,

be oi dekenai lau gwauraia hedinarai.

Lauegu kerere lau hunia lasi.

Lau gwau, “Lauegu kerere,

be Lohiabada ena vairanai do lau gwauraia hedinarai,”

vadaeni oi ese lauegu kara dika oi gwauatao.

⁶Unai dainai nega dikadia neganai,
Dirava ena taudia ese,
oi dekenai do idia guriguri be namo.
Vadaeni hisihisi be abata bamona do idia torei,
to oi dekenai idia abidadama taudia dekenai,
unai dika do ia ginidae lasi.

⁷Oi be lauegu hunia gabuna,
Oï ese dika dekena amo lau do oi hamauria.
Oiemu hamauria dainai ane dekenai oi do lau hanamoa,
badina be oi ese lau oi gimaia noho.

⁸Lohiabada ia gwau,
“Lau ese oiemu raka dalana oi dekenai do lau hadibaia.
Lau ese oi do lau hakau,
bona sisiba oi dekenai do lau henia.

⁹Hosi o doniki edia kara bamona do umui karaia lasi.
Idia be mai edia diba lasi,
to taunimanima ese edia uduna dekenai auri idia atoa,
do idia manada totona,
taunimanima edia ura do idia karaia lasi garina.”

¹⁰Kara dika taudia edia hisihisi be momo,
to Lohiabada dekenai idia abidadama taudia,
be Dirava ena lalokau,
ia doko lasi lalokauna ese,
idia do ia gimaia bona naria noho.

¹¹Kara maoromaoro taudia e, do umui moale!
Lohiabada ena kara dainai do umui moale!
Lohiabada umui kamoni henia taudia e,
mai moale bada danu do umui boibo.

33

Dirava hanamoa ane

¹Kara namo taudia e,
Lohiabada ena vairanai do umui moale bada.
Dirava idia kamoni henia taudia ese,
ia dekenai idia hanamoa be namo.

²Iukelele miusiki dekenai Lohiabada do umui tanikiu henia,
bona ia do umui hanamoa, gita badana,
varo 10 gauna dekena amo.

³Ane matamata, Lohiabada hanamoa totona do umui abia.
Gita do umui gadaralaia namonamo,
miusiki namo herea do umui karaia,
bona ane do umui abia mai goada danu.

⁴Badina be Lohiabada ena hereva be maoromaoro.
Iena gaukara ibounai danu,
be mai edia momokani danu.

⁵Lohiabada ese kara maoromaoro,
bona kota maorona ia ura henia noho.
Lohiabada ena bogahisihisi be tanobada kahana ibounai dekenai.

⁶Lohiabada ese iena hereva dekena amo guba ia karaia.
Dina, hua bona hisiu,

be iena uduna ena hereva dekena amo ia karaia.

⁷Lohiabada ese davara ena ranu,
ia haboua gabu tamona dekenai,
hegeregere tau ta ese hodu tamona,
be ranu dekenai ia hahonua bamona.
Lohiabada ese davara badana ia naria,
vadaeni iena gabu korikori dekenai ia noho.

⁸Tanobada taudia ibounai be Lohiabada dekenai idia gari be namo.
Tanobada dekenai noho taudia ibounai ese,
Lohiabada idia matauraia be namo.

⁹Badina be ia hereva sibona,
vadaeni inai tanobada ia vara.
Ia ese ia oda,

vadaeni gau ibounai idia hedinarai.

¹⁰Lohiabada ese bese idauidau taudia edia palani ia koua.
Ia ese idia karaia gwauria gaudia ia hadokoa.

¹¹Lohiabada ena palani,
be do ia gini goada hanaihanai,
bona ia karaia gwauria gaudia,
be hanaihanai do idia noho.

¹²Bema bese ta ena Dirava be Lohiabada neganai,
unai bese be do ia namo.

Lohiabada ese ia abia hidi,
iena bese korikori do idia lao taudia be do idia moale!

¹³Lohiabada ese guba dekena amo iena matana ia negea,
taunimanima ibounai ia itaia noho.

¹⁴Iena terona dekenai ia helai gabuna dekena amo,
Lohiabada ese iena matana ia negea,
tanobada taudia ibounai ia itaia noho.

¹⁵Ia ese idia ibounai edia laloa ia havaraia,
bona edia kara ibounai ia diba.

¹⁶King be iena tuari taudia momo dainai ia kwalimu, a?
Lasi.

Tuari tauna be iena goada sibona dainai ia kwalimu, a?

Lasi.

¹⁷Tuari hosi ese tuari ena kwalimu do idia havaraia lasi.
Edia goada badana ese taunimanima idia hamauria diba lasi.

¹⁸To Lohiabada ese ia dekenai idia gari taudia ia itaia noho.
Bona Lohiabada ena bogahisihisi idia abidadama henia taudia,
be ia ese ia naridia noho.

¹⁹Ia ese mase dekena amo ia hamauridia noho,
bona hitolo bada neganai,

Lohiabada ese idia dekenai mauri ia henia noho.

²⁰Ita ese Lohiabada ena durua ita naria noho.
Ia be iseda durua Tauna bona iseda kesi.

²¹Lohiabada ena ladana dainai ita moale noho.
Iena ladana helagana dekenai ita abidadama henia.

²²Lohiabada e,
mani emu kara oiemu bogahisihisi,
be nega ibounai ai dekenai ia noho,
badina ai ese oi dekenai ai naria,
bona oi dekenai ai abidadama henia noho.

34

Lohiabada ena kara namo dainai ita hanamoa

¹ Nega ibounai Lohiabada do lau hanamoa.

Ia do lau tanikiu henia ela bona hanaihanai.

² Dirava ena durua lau dekenai lau laloa neganai, ia lau hanamoa bada.

Hisihisi idia abia noho taudia ese, inai egu hereva do idia kamonai, vadaeni do idia moale be namo.

³ Lau danu Lohiabada do ita hanamoa. Iena ladana do ita hanamoa hebou!

⁴ Lohiabada dekenai lau guriguri, bona ia ese lau dekenai ia haere. Ia ese egu gari ibounai dekena amo, lau ia hamauria.

⁵ Hisihisi idia abia noho taudia ese, edia matana Lohiabada dekenai idia negea, vadaeni idia moale. Unai dainai edia abidadama do ia dika lasi.

⁶ Lau be durua tauna ta lasi neganai, Lohiabada dekenai lau taitai, vadaeni ia ese lau dekenai ia haere, bona egu hekwarahi ibounai dekena amo lau ia hamauria.

⁷ Lohiabada ena aneru ese, Dirava dekenai idia gari taudia ia naridia noho, bona dika dekena amo ia hamauridia noho.

⁸ Lohiabada ena kara do umui tahua namonamo, iena dala do umui tohoa namonamo, vadaeni do umui diba momokani, Lohiabada be namo momokani. Lohiabada dekenai idia abidadama taudia ese, moale do idia davaria.

⁹ Lohiabada ena taudia e, ia dekenai do umui gari, badina be ia dekenai idia gari taudia, be gau ta do idia dabu lasi.

¹⁰ Laiona be mai aniani lasi dainai, nega haida idia hitolo noho, to Lohiabada idia kamonai henia taudia, be gau namona ta idia dabu lasi.

¹¹ Memero bona kekeni e, umui mai, lau dekenai do umui kamonai. Lohiabada dekenai do umui gari dalana do lau hadibaia.

¹² Edena bamona?

Umui ura do umui mauri noho namonamo, a?

Umui ura danu emui mauri dinadia do idia momo, a?

¹³ Vadaeni umui emui malana do umui naria, hereva dika do umui gwauraia lasi, bona do umui hereva koikoi lasi.

¹⁴ Dika do umui rakatania, kara namo do umui karaia.

Maino do umui tahua, bona maino kara do umui karaia noho.

15 Lohiabada ese kara maoromaoro taudia ia naria noho.
Edia taitai be ia ese ia kamonai henia noho.

16 To Lohiabada ese kara dika taudia ia ura henia lasi,
bona ia ese idia do ia alaia mase,
vadaeni taunimanima ese idia do idia laloe lou lasi.

17 Kara maoromaoro taudia idia boiboi neganai,
Lohiabada ese idia dekenai ia kamonai,
bona edia hekwarahi ibounai dekena amo ia hamauridia noho.

18 Lohiabada be lalohisihisi taudia kahirakahira ia noho,
bona ia ese edia lalona ia ore taudia ia hamauria noho.

19 Kara maoromaoro tauna ena hisihisi be momo,
to Lohiabada ese unai tau do ia durua,
vadaeni unai hisihisi do ia ore.

20 Lohiabada ese unai tau do ia naria namonamo,
vadaeni iena turiana ibounai do idia namo,
ta do idia makohia lasi.

21 Kara dika taudia be dika ese do ia aladia mase,
bona bema tau ta ese,
kara maoromaoro taudia ia badu henia neganai,
unai tau be Lohiabada ese do ia kota henia.

22 Lohiabada ese iena hesiai taudia do ia hamauria.
Lohiabada dekenai ia abidadama tauna ta be do ia mase lasi.

35

Durua totona ena guriguri

1 Lohiabada e,
lau dekenai idia heai noho taudia,
be oi ese do oi heai henidia,
bona lau dekenai idia tuari henia noho taudia,
be do oi tuari henidia.
2 Oiemu kesi bona oiemu kemena auri dabua do oi abia,
do oi toreisi, bona lau do oi durua.

3 Lau idia lulua noho,
lau dekenai tuari henia totona taudia dekenai,
be oiemu io bona oiemu ira do oi abia hegaegae.
Lau dekenai mani do oi hereva, do oi gwau,
“Lau ese oi do lau hamauria.”

4 Egu mauri idia hadokoa gwauraia taudia do oi halusia,
bona idia do oi hahemaraia!
Egu mase dalana idia tahua taudia,
be do oi hagirola lou,
bona idia dekenai daradara do oi havoraia!

5 Idia do oi hadikaia,
vadaeni idia be uiti ena momoru,
lai ese ia hodaia ore gaudia bamona do idia lao,
bona Lohiabada ena aneru ese,
idia do ia lulua lao ore.

6 Edia raka dala do oi hadikaia,
vadaeni do ia dibura momokani,
bona mai kopukopu danu.

Bona unai neganai Lohiabada ena aneru ese idia do ia alaia ore!

7 Badina be lau do idia abia totona,

tarapu idia atoa, badina ta lasi,
 bona guri badana idia geia,
 lau do idia hamorua totona,
 badina ta lasi.

⁸To mase ese, hoa kara bamona, do ia abidia haraga.

Idia sibodia edia tarapu lalonai do idia moru,
 bona unai tarapu lalonai do idia mase!

⁹Unai neganai Lohiabada dainai do lau moale,
 bona ia ese lau ia hamauria dainai do lau moale bada.

¹⁰Egu kudouna ibounai dekena amo,
 lau ese Lohiabada do lau hamaoroa, do lau gwau,
 “Lohiabada e, oi hegeregerena ta ia noho lasi.

Oi ese manoka taudia oi durua noho,
 vadaeni goada taudia ese idia hadikadia diba lasi.

Oi ese dagedage taudia dekena amo ogogami taudia oi hamauria noho.”

¹¹Samania koikoi taudia idia toreisi noho,
 lau karaia lasi kerere totona,
 lau idia samania noho.

¹²Lau ese idia dekenai kara namo lau karaia,
 to ena davana be lau dekenai kara dika idia karaia,
 vadaeni egu lauma be ia hisihisi noho.

¹³Guna unai taudia idia gorere neganai, puse dabua lau atoa,
 egu lalohisihisi ena toana,
 bona aniani lau ania lasi.
 Ma egu kwarana lau atoa diho,
 idia totona lau guriguri.

¹⁴Mai bogahisihisi danu lau guriguri,
 egu turana o egu tadikakana totona do lau guriguri hegeregerena.
 Mai lalohisihisi danu egu kwarana lau atoa diho,
 iena sinana totona ia taitai tauna bamona.
 Lau loaloa kahana kahana dekenai,
 lau tai noho, tai noho.

¹⁵To lau ese hisihisi lau davarua neganai,
 idia ibounai idia moale hebou,
 bona lau do idia hadikaia totona idia haboua.
 Idu taudia, lau diba lasi taudia,
 ese lau idia hereva dika henia.
 Egu ladana hadikaia hereva idia hadokoa lasi.

¹⁶Aena ia dika tauna idia kirikirilaia taudia edia kara bamona,
 idia ese mai badu danu,
 lau dekenai edia isena idia koria auka masemase.

¹⁷Lohiabada e,
 edia kara do oi itaia noho sibona ela bona edena negai?
 Unai tau dikadia edia kara dika dekena amo lau do oi hamauria.
 Inai laiona dekena amo,
 lau do oi veria mauri.

¹⁸Unai neganai hebou badana lalonai,
 oi do lau tanikiu henia.
 Taunimanima momo edia vairana dekenai oi do lau hanamoada bada.

¹⁹Lau do oi durua,
 vadaeni lau idia hadikaia gwauraia taudia,
 unai koikoi taudia ese,

lau do idia kirikirilaia lasi,
 bona lau idia badu henia kava taudia ese,
 egu lalohisihisi dekenai do idia hevaseha lasi.
²⁰Badina be maino hereva idia gwauraia lasi,
 to maino dekenai idia noho taudia namodia,
 edia latanai be koikoi herevadia idia gwauraia noho.
²¹Idia ese danu lau idia samania noho,
 idia boiboi, idia gwau,
 “Ai ese oiemu kara ai itaia vadaeni.”

²²Lohiabada e, oi ese inai edia kara oi itaia vadaeni.
 Unai dainai oiemu uduna do oi hakapua lasi.
 Lohiabada e, gabu daudau dekenai do oi noho lasi!

²³Do oi noga,
 bona kota maoromaoro lau dekenai do oi henia.
 Egu Dirava, egu Lohiabada e,
 do oi toreisi, bona egu kara maoromaoro do oi gwauraia.

²⁴Lohiabada e,
 oi be maoromaoro momokani,
 unai dainai lau do oi gwauraia kerere lasi!
 Lau idia hadikaia gwauraia taudia do oi koua,
 vadaeni lau do idia kirikirilaia lasi.
²⁵Vadaeni idia be inai bamona do idia herevahereva lasi,
 do idia gwau lasi,
 “Namo bada herea, iseda ura ita abia vadaeni!
 Ita ese unai tau ita hadikaia ore vadaeni!”

²⁶Lohiabada e, mani emu kara,
 egu hisihisi dekenai idia moale taudia be do oi halusia momokani,
 bona unai taudia dekenai daradara do oi havaraia momokani.
 Mani emu kara,
 idia ese lau idia hereaia idia gwau taudia,
 be do oi hahemaraia, bona do oi negea momokani.

²⁷To lau idia gwauraia maoro,
 bona idia ura kota do lau uini taudia,
 be mani emu kara,
 mai moale bada danu do idia boiboi,
 do idia gwauraia lou, gwauraia lou,
 “Lohiabada be namo bada herea momokani,
 ia ese iena hesiai tauna ia hanamoa noho,
 mai ena moale bada danu!”

²⁸Unai neganai lau ese oiemu kara maoromaoro,
 be do lau gwauraia hedinarai.
 Dina ena hora ibounai lau ese oi do lau hanamoa noho.

36

Taunimanima edia kara dika

¹Kerere ese kara dika tauna dekenai ia hereva henia noho.
 Iena kudouna lalonai dika ese,
 unai tau dekenai ia hereva henia noho.
 Unai tau ese Dirava dekenai ia gari henia lasi momokani.
²Badina unai tau be sibona ia laloa ia be tau namona.
 Unai dainai ia laloa,
 Dirava ese iena kara dika do ia itaia lasi,

bona ia laloa,
 Dirava ese unai dika dekenai do ia badu lasi.
³ Unai tau ena hereva be dika,
 bona mai ena koikoi bada danu.
 Ia ese aonega kara bona kara namo ia hadokoa vadaeni.
⁴ Iena geda dekenai ia hekure neganai,
 kara dikadia do ia karaia edia dalana ia laloa noho.
 Kara dika ena dala ia abia hidi vadaeni.
 Kara kerere dalana dekena amo,
 be nega ta ia raka siri lasi.

Dirava ena kara namona

⁵ Lohiabada e,
 oiemu noho hanaihanai lalokauna,
 ia bada herea dainai, ia be guba dekenai ia daekau lao noho.
 Oiemu kara momokani ese,
 ori dekenai ia ginidae vadaeni.
⁶ Oiemu kara maoromaoro be atai ai momokani,
 Dirava ena ororo edia atai ai bamona,
 bona oiemu kota ena maoromaoro,
 be davara bada ena dobu bamona.
 Lohiabada e, taunimanima bona mauri gaudia danu,
 be oi ese oi naria noho.
⁷ Lohiabada e,
 oiemu noho hanaihanai lalokauna,
 be namo herea momokani!
 Ai ese oiemu hanina henunai ai hunia diba.
⁸ Oi ese aniani bada ai dekenai oi henia,
 be ai ania noho.
 Bona oi ese oiemu namo ibounai,
 sinavai ena ranu bamona ai dekenai oi henia,
 ai inua noho.
⁹ Badina oi be mauri ibounai ena badina,
 bona oiemu diari dainai,
 ai ese diari ai itaia noho.
¹⁰ Oiemu lalokau be oi dekenai idia manada taudia dekenai,
 do oi henia noho,
 bona kara maoromaoro taudia dekenai,
 do oi kara namo henia noho.
¹¹ Hekokoroku taudia do oi koua,
 idia ese lau do idia heatu henia lasi.
 Kara kerere taudia do oi koua,
 idia ese lau do idia lulua lao lasi.
¹² Kara dika taudia be idia moru diho momokani vadaeni.
 Unuseni idia hekure noho,
 idia toreisi diba lasi.

37

Tau namodia bona tau dikadia dekenai dahaka do ia vara?

¹ Do umui laloa hekwarahi lasi kara dika taudia dainai.
 Kara kerere taudia dainai do umui mama lasi.
² Badina be nega daudau lasi lalonai,
 tau dikadia be do idia dika,
 rei kaukau ia dika bamona,
 bona au edia raurau idia kakoro bamona.

³ Lohiabada dekenai do oi abidadama,
 bona kara namo do oi karaia,
 vadaeni tano dekenai do oi noho namo,
 mai maino danu.

⁴ Oiemu moale be Lohiabada dekena amo do oi tahua,
 vadaeni ia ese,
 oi ura henia gaudia oi dekenai do ia henia.

⁵ Oiemu mauri be Lohiabada ena imana dekenai do oi atoa.
 Ia dekenai do oi abidadama,
 vadaeni ia ese oi do ia durua.

⁶ Oiemu kara namona be Lohiabada ese do ia hedinarai,
 dina ena diari bamona.
 Ia ese oiemu kara maoromaoro,
 be taunimanima edia vairanai do ia hedinarai,
 dina tubua bamona.

⁷ Lohiabada ena vairanai do oi laga-ani.
 Iena vairanai do oi helai,
 oi naria ela bona ia ese oi do ia durua.
 Edia gaukara dekena amo, kohu momo idia davaria taudia,
 be idia dainai do oi mama lasi.
 Ma palani dikadia idia karaia,
 bona unai palani ena anina idia davaria taudia,
 idia totona do oi laloe hekwarahi lasi.

⁸ Do oi badu lasi, do oi dagedage lasi.
 Do oi laloe hekwarahi o laloe badu lasi,
 badina unai bamona laloe ese kara dika ia havaraia noho.

⁹ Badina kara dika taudia be,
 dika momokani do idia davaria,
 to Lohiabada idia abidadama henia taudia ese,
 edia tano dekenai do idia noho, mai namo danu.

¹⁰ Nega daudau lasi lalonai kara dika taudia do idia ore.
 Edia gabu do umui tahua,
 to do umui davaria lasi.

¹¹ To manau taudia ese noho gabuna tano do idia abia,
 do idia helai namonamo, mai moale bona mai maino danu.

¹² Kara dika taudia ese,
 kara maoromaoro taudia hadikaia daladia idia laloe noho,
 bona idia badu henidia dainai,
 edia isena idia koria auka masemase.

¹³ To Lohiabada ese,
 kara dika taudia ia kirikirilaia noho,
 badina ia diba, dina do ia ginidae,
 idia be do idia lusi momokani.

¹⁴ Kara dika taudia ese edia tuari kaia idia veria,
 bona edia peva danu idia veria noho,
 ogogami taudia bona gau lasi taudia do idia pidia totona,
 bona kara maoromaoro taudia alai mase totona.

¹⁵ To edia tuari kaia be,
 idia sibona edia kudouna dekenai do idia gwadaia,
 bona edia peva be do idia makohia.

16 Kara maoromaoro tauna be sedira ia be ogogami,
to unai ogogami ese,
kara dika taudia momo edia kohu bada ia hereaia noho.

17 Badina be kara dika taudia edia siahu,
be Lohiabada ese do ia haorea,
bona Lohiabada ese,
kara maoromaoro taudia do ia durua momokani.

18 Lohiabada ese mai edia kerere lasi taudia ia naria noho,
bona Dirava ese idia dekenai ia henia gau namodia,
be do idia dogoatao ela bona hanaihanai.

19 Nega dika neganai,
unai bamona taudia be do idia lalohisihisi lasi,
bona hitolo bada neganai,
idia be mai edia aniani hegeregere.

20 To kara dika taudia be do idia mase ore.
Lohiabada dekenai idia dagedage henia taudia,
be do idia kwalimu lasi.
Idia be rei gabudia dekenai idia noho herahera bamona.
Do idia boio haraga,
kwalahu ia boio haraga bamona.

21 Kara dika taudia ese idia abiatorehai,
to idia henia lou lasi.
To kara maoromaoro taudia be,
mai hariharibada danu, durua bona moni idia henia.

22 Badina be Lohiabada ese ia hanamoa taudia ese,
tano dekenai do idia noho,
mai noho namo danu.
To Lohiabada ese ia hadikaia taudia,
be dika momokani do idia davaria.

23 Tau namona ena raka dalana,
be Lohiabada ese ia hakaua noho,
bona unai tau ena kara ia ura henia dainai,
Lohiabada ese do ia naria noho.

24 Unai tau be do ia moru,
to do ia diho momokani lasi,
badina be Lohiabada ese,
iena imana dekena amo do ia haginia lou.

25 Gunaguna lau be mero,
harihari lau be buruka,
to nega ta kara maoromaoro tauna ta be Dirava ese ia rakatania, a?
Lasi momokani, nega ta lau itaia lasi.
Bona tau namona ena natuna be nega ta idia hitolo, a?
O iena natuna ese aniani totona taunimanima idia noia, a?
Lasi, nega ta lau itaia lasi.
Lasi momokani.

26 Kara maoromaoro taudia ese,
nega ibounai haida dekenai idia bogahisihisi,
bona idia heniatorehai,
bona edia natudia ese Dirava ena hanamoa idia davaria.

27 Kara dika do oi rakatania,
kara namo do oi karaia,
vadaeni tano dekenai do oi noho namo hanaihanai.

28 Badina be Lohiabada ese,
kara maoromaoro ia ura henia noho.
Iena abidadama taudia,
be ia ese do ia rakatania lasi.
Kara maoromaoro taudia be,
Lohiabada ese do ia naridia namonamo ela bona hanaihanai,
to kara dika taudia edia natudia ese,
dika do idia davaria.

29 Kara maoromaoro taudia ese,
Dirava ia henidia tano dekenai do idia noho ela bona hanaihanai.

30 Kara maoromaoro tauna be mai ena diba,
bona iena hereva be mai aonega danu.
Mai maoromaoro bona momokani danu do ia hereva.

31 Iena Dirava ena taravatu,
be iena kudouna lalonai ia dogoatao noho,
bona ia ese Lohiabada ena taravatu ia rakatania lasi momokani.

32 Kara dika tauna ese,
kara maoromaoro tauna ia itaia noho,
bona ia alaia totona dala ia tahua noho.
33 To Lohiabada ese kara namo tauna do ia rakatania lasi,
vadaeni tau dikana ena sياهو henunai do ia noho lasi.
Bona Lohiabada ese kara maoromaoro tauna do ia durua,
vadaeni kota dekenai idia samania neganai,
dika do ia davaria lasi.

34 Lohiabada dekenai do oi naria,
iena dala dekenai do oi raka.
Unai neganai ia ese oi dekenai ia henia tano,
be do oi dogoatao diba,
bona Lohiabada ese tau dikadia do ia hadikaia ore neganai,
oi ese inai kara do oi itaia.

35 Kara dika tauna ta lau itaia vadaeni,
iena noho be namo herea.
Ia be ia tubu badabada,
Lebanona ena sida audia bamona.

36 To gabeai lau raka hanaia,
unai tau be ia noho lasi.
Lau tahua, to lau davaria lasi.

37 Mai ena kerere lasi tauna do oi laloa.
Kara maoromaoro tauna do oi itaia noho.
Unai bamona tauna be mai maino danu do ia noho,
bona ia ese natuna bona tubuna do ia abia.

38 To kara dika tauna,
be Lohiabada ese do ia hadikaia ore.
Kara dika taudia edia natudia bona tubudia,
ese dika do idia davaria.

39 Kara maoromaoro taudia,
be Lohiabada ese do ia hamauria,
vadaeni hekwarahi o nega dika neganai,
Lohiabada dekenai idia lao diba,

badina ia be edia mauri davaria gabuna.

⁴⁰ Lohiabada ese tau namodia ia durua noho,

bona idia ia veria mauri noho.

Lohiabada ese tau dikadia dekena amo tau namodia ia hamauria noho,
badina idia ese Lohiabada dekenai idia abidadama henia noho.

38

Hisihisi ia abia noho tauna ena guriguri

¹ Lohiabada e, oiemu badu dekenai,

lau do oi matakani henia lasi.

Oiemu badu mai siahu danu dekenai,

lau do oi hisihisi henia lasi.

² Badina oi ese oiemu peva ena diba,

dekena amo lau oi haberoa vadaeni.

Oi ese lau oi botaiia,

lau moru vadaeni.

³ Oiemu badu dainai,

lau hisihisi bada noho.

Egu kara dika dainai egu tauanina ibounai ia gorere noho.

⁴ Egu kerere bada ese,

egu kwarana idia koua vadaeni,

abata ese taunimanima ia koua bamona.

Egu kerere ena metau be bada herea,

lau huaia diba lasi.

⁵ Egu kara dika bona egu kavakava dainai,

egu bero edia bonana ia daekau,

idia bodaga dainai.

⁶ Egu kwarana lau atoa diho,

bona lau moru diho noho.

Dina ena hora ibounai lalonai lau tai noho, tai noho.

⁷ Egu kopina be ia siahu noho,

bona egu tauanina be ia goada lasi.

⁸ Lau be lau manoka vadaeni,

badina haida ese lau idia botaiia patapata.

Egu kudouna ia hisihisi noho,

bona hisihisi dainai lau tai noho.

⁹ Lohiabada e, egu ura ibounai oi diba.

Egu taitai, be oi dekena amo ia hunia lasi.

¹⁰ Egu kudouna be ia gaukara haragaharaga noho,

egu goada ia ore,

bona egu matana ena diari ese,

lau ia rakatania vadaeni.

¹¹ Egu toto dainai, egu turana bona egu bamona taudia,

ese lau idia vadivadi henia lasi.

Egu bese taudia danu be lau dekena amo idia noho siri.

¹² Lau idia alaia gwauraia taudia ese,

lau abia totona tarapu idia atoa vadaeni,

bona lau idia hadikaia gwauraia taudia ese,

hadikaia hereva dekena amo lau idia hagaria noho.

Dina ibounai doko lasi, idia ese lau hadikaia totona,

dala idia tahua noho.

13 Lau be taia kudima tauna bamona, lau kamonaï diba lasi.
Lau be hereva diba lasi tauna bamona,
egu uduna lau kehoa diba lasi.

14 Io, lau be kamonaï diba lasi tauna bamona.

Lau be lau haere lasi,
badina lau be hereva lau kamonaï lasi tauna bamona.

15 To Lohiabada e, lau ese oi lau abidadama henia noho,
bona oi be Lohiabada,
lauegu Dirava dainai,
oi ese lau do oi haere henia.

16 Mani emu kara,
lau idia hadikaia gwauraia taudia do oi koua,
vadaeni idia ese egu hisihisi do idia kirikirilaia lasi.
Egu moru dekenai, mani emu kara do idia hevaseha lasi.

17 Badina lau be kahirakahira lau moru diho noho inai,
bona egu hisihisi, be nega ibounai ena mamina lau abia noho.

18 Egu kara dika be lau gwauraia hedinarai noho inai,
bona egu kerere dekena amo,
egu lalona lau giroa inai.

19 Lau idia hadikaia gwauraia taudia,
be mai edia goada danu.
Idia momo ese lau idia badu henia noho,
to mai badina ta lasi.

20 Lau ese idia dekenai kara namo lau karaia,
ena davana be kara dika lau dekenai idia karaia noho.
Idia ese lau idia badu henia noho,
badina kara maoromaoro lau karaia noho.

21 Lohiabada e,
lau do oi rakatania lasi.
Egu Dirava e, lau dekena amo do oi siri lasi.

22 Lohiabada e,
oi be egu hamauria Tauna.
Mani do oi mai haraga,
lau do oi durua totona.

39

Hisihisi ia abia noho tauna ena hereva

1 Lau gwau,
“Lau ese egu mauri dalana do lau naria namonamo,
bona egu uduna ena hereva danu do lau naria,
kara dika do lau karaia lasi totona.
Bona tau dikadia be lau kahirakahira idia noho neganai,
hereva ta do lau gwauraia lasi.”

2 Lau ese regena lasi lau noho,
hereva ta lasi.
Hereva namona ta danu lau gwauraia lasi.
To egu hisihisi be ia bada lao,

3 bona egu laloa hekwarahi ia bada lao.

Lau laloa momo noho neganai,
egu laloa metau ia bada lao,
ela bona egu malana dekenai lau hereva, lau gwau:

4 “Lohiabada e,
 egu mauri dinadia hida do noho?
 Edena negai do lau mase?
 Egu mauri ena dokona negana,
 be mani lau dekenai do oi hedinaraia.
 5 Lohiabada e, egu mauri dinadia,
 be kwadogi herea sibona oi ese oi karadia.
 Oiemu vairana dekenai,
 egu mauri dinadia be gau ta lasi bamona.
 Momokani, taunimanima ibounai edia mauri,
 be hahodi tamona sibona bamona.
 6 Taunimanima idia loaloa noho,
 dina ena laulau sibona bamona.
 Edia hekwarahi bona edia gaukara be anina lasi.
 Idia ese kohu idia haboua,
 to idia diba lasi taudia ese unai kohu do idia abia.

7 “Lohiabada e, dahaka gau namona totona do lau naria?
 Oi sibona Lohiabada e,
 oi sibona dekenai do lau naria be namo.
 8 Egu kara dika ibounai dekena amo,
 lau do oi hamauria,
 bona kavakava taudia do oi koua,
 vadaeni idia ese lau do idia kirikirilaia lasi.
 9 Lau be regena ta lasi do lau noho,
 egu uduna do lau kehoa lasi,
 badina be oi ese inai hisihisi oi havaraia.
 10 Mani emu kara inai matakani,
 be lau dekena amo do oi kokia,
 badina oiemu dadabaia dekena amo kahirakahira lau mase.
 11 Oi ese taunimanima oi gwau henidia,
 bona oi matakani henidia edia kara dika dainai.
 Unai neganai edia hairaina ia ore haraga,
 kaubebe ena hairaina ia ore haraga bamona.
 Momokani taunimanima ibounai edia mauri,
 be hahodi tamona sibona bamona.

12 “Lohiabada e,
 egu guriguri mani do oi kamoni.
 Egu taitai do oi kamoni henia.
 Egu matana ranu do oi itaia neganai lau do oi durua.
 Badina lau be oiemu vadivadi tauna,
 nega sisina sibona lau noho.
 Lau be idau tauna bamona,
 egu sene taudia ibounai hegeregereana.
 13 Mani emu kara oiemu matakani,
 be lau dekena amo do oi kokia,
 vadaeni moale do lau davaria lou.
 Badina egu mase dinana,
 be nega daudau lasi lalonai do ia ginidae.”

40

Dirava hanamoa ane

1 Lohiabada totona lau naria mai haheauka danu.

Ia ese lau dekenai ia bogahisihisi,
bona egu taitai ia kamona.

² Ia ese guri dikana dekena amo lau ia veria mauri.
Kopukopu gabuna dekena amo lau ia abia isi.
Lauegu aena be nadi badana latanai ia atodia.
Lauegu raka be ia ese ia naria namonamo.

³ Lohiabada ese ane matamata lau dekenai ia hadibaia.
Inai be Dirava hanamo ana.
Taunimanima momo ese inai kara do idia itaia,
vadaeni do idia gari,
bona Lohiabada dekenai do idia abidadama.

⁴ Lohiabada ia abidadama henia tauna be namo.
Unai bamona tauna ese,
hekokoroku taudia ia matauraia lasi,
bona ia ese Lohiabada do ia rakatania lasi,
dirava koikoi dekenai do ia lao totona.

⁵ Lohiabada e, lauegu Dirava,
oiemu durua karadia ai dekenai be momo herea.
Tau ta be oiemu kara bamona ia karaia diba lasi.
Lau ese oiemu kara,
bona oiemu laloa,
be taunimanima dekenai lau ura gwauraia,
to lau be hegeregere lasi momokani.
Badina oiemu kara bona laloa be momo herea,
duahia diba lasi.

⁶ Oi ese vamu alaia boubou gaudia,
bona boromakau alaia, bona gabua ore gaudia oi ura lasi.
Unai bamona boubou gaudia,
kara dika kokia totona oi ura lasi.
To oi ese taiana lau dekenai oi henia,
vadaeni oi dekenai lau ura kamona.

⁷ Vadaeni lau gwau,
“Lohiabada e, oi itaia, lau mai inai.
Oiemu Buka ese lau ia hadibaia dahaka do lau karaia.

⁸ Lauegu Dirava e,
lau ura dikadika oiemu ura do lau karaia.
Oiemu taravatu be lauegu kudouna lalonai ia noho.”

⁹ Lohiabada e,
lau ese oiemu taudia momo edia vairanai,
hamauria sivaraina lau gwauraia hedinarai.
Lohiabada e, oi diba vadaeni,
lau ese inai Sivarai Namona,
be nega ibounai do lau gwauraia.
Lauegu udu bibina do lau koua lasi.

¹⁰ Oi ese lau oi hamauria vadaeni,
bona inai Sivarai be lau ese lau hunia lasi.
Oiemu abidadama namona bona oiemu durua,
be nega ibounai lau ese lau gwauraia hedinarai vadaeni.
Oiemu taudia edia hebou badana lalonai,
lau ese oiemu lalokau badana,
bona oiemu hereva momokani lau hunia lasi.

11 Lohiabada e, oiemu bogahisihisi,
 be lau dekena amo do oi kokia lasi,
 vadaeni oiemu lalokau bona oiemu hereva momokani,
 oi ese oi badinaia noho gaudia,
 ese lau do idia naria nega ibounai.

David a ese Lohiabada ena durua totona ia noinoi henia

12 Dika momo herea be lau dekenai idia ginidae vadaeni,
 duahia diba lasi.

Lauegu kara dika ese unai dika idia havaraia vadaeni.
 Unai dainai lauegu matana ese,
 gau idia itaia namonamo lasi.

Unai dika be momo herea,
 lauegu kwarana ena huina edia momo idia hanaia.
 Lauegu kudouna ia manoka lao noho,
 bona egu goada ia ore.

13 Lohiabada e, mani emu kara lau do oi hamauria.
 Lohiabada e, lau do oi durua haraga.

14 Lauegu mauri hadokoa daladia idia tahua taudia,
 be do oi hahemaraia, bona laloa daradara do oi henidia.
 Lau idia hisihisi henia taudia,
 be mani do oi luludia lou,
 mai hemarai danu.

15 Tau haida ese lau dekenai idia hereva dika,
 mai hevaseha danu.
 Mani do oi hagaridia,
 vadaeni do idia hemarai bada.

16 To oi dekenai idia mai taudia ibounai be do oi durua,
 vadaeni idia ese oiemu moale do idia aia.
 Lau ura oiemu hamauria idia ura henia taudia ibounai ese,
 nega ibounai inai bamona do idia hereva:
 “Lohiabada be namo herea momokani!”

17 Lohiabada e, lau be lau ogoami bona manoka,
 to oi ese lau oi laloaboio lasi.
 Oi be lauegu hamauria Tauna bona lauegu Dirava.
 Lau durua totona do oi mai haraga!

41

Gorere tauna ta ena guriguri

1 Ogoami taudia ia laloa tauna be namo.

Lohiabada ese ia do ia durua,
 bema hisihisi ia davarua neganai.

2 Lohiabada ese unai tau do ia gimaia,
 bona iena mauri do ia naria.
 Lohiabada ese iena tano dekenai unai tau do ia hamoalea.
 Bona Lohiabada ese unai tau do ia naria,
 vadaeni ia idia hadikaia gwauraia taudia,
 edia siahu henunai do ia moru lasi.

3 Bona unai tau,
 ogoami taudia ia laloa tauna, ia gorere neganai,
 be Lohiabada ese do ia durua.
 Lohiabada ese unai tau ena gorere,
 be do ia hanamoala lou momokani.

⁴ Lau ese inai bamona lau gwau,
 “Lohiabada e,
 lau dekenai do oi bogahisihisi,
 bona egu gorere mani do oi hanamoa,
 badina lau ese oi dekenai lau kara dika vadaeni.”

⁵ Lau idia hadikaia gwauraia taudia ese,
 lau totona idia hereva badubadu, idia gwau,
 “Edena negai do ia mase,
 bona edena negai iena ladana do ita laloaboio?”

⁶ Lau dekenai idia vadivadi taudia ese,
 lau idia hanamoa koikoi noho,
 bona idia ese lau totona,
 sivarai dikana idia tahua noho,
 vadaeni murimurinau idia raka lao neganai,
 lau hadikaia totona, unai sivarai idia gwauraia loaloa.

⁷ Lau idia badu henia taudia ibounai,
 ese hereva maragi dekena amo lau idia herevalaia noho.
 Lau hadikaia dalana idia tahua noho.

⁸ Idia gwau, “Gorere dikana ese ia abia vadaeni.
 Iena hekure gabuna dekena amo do ia toreisi lou lasi.”

⁹ Egu turana lalokau danu,
 lau abidadama henia tauna,
 egu aniani ia ania noho tauna,
 ia ese danu lau ia hadikaia noho.

¹⁰ Lohiabada e, oi ese lau dekenai do oi bogahisihisi.

Lau do oi abia isi,
 vadaeni lau ese unai taudia dekenai davana do lau henia.

¹¹ To idia ese lau idia halusia lasi,
 unai dainai lau diba oi ese lau dekenai oi laloa namo noho.

¹² Oi ese lau do oi durua,
 badina be lau ese kara maoromaoro lau karaia noho.
 Oiemu vairana dekenai,
 oi ese lau do oi haginia noho, ela bona hanaihanai.

¹³ Lohiabada, Israela ena Dirava be do ita hanamoa!

Ia do ita hanamoa,
 harihari ia lao bona hanaihanai.
 Amen bona Amen!

42

Iena gabu korikori dekena amo ia noho daudau tauna ena guriguri

¹ Dirava e,
 dia ese sinavai ranu ia ura henia bada bamona,
 unai bamona lau ese oi lau ura henia noho.

² Dirava e,
 oi be mauri ena Dirava,
 bona oi lau ura henia noho,
 ranu mase neganai, ranu lau ura henia bamona.
 Dirava e,

edena negai oiemu vairana dekenai oi do lau tomadiho?

³ Nega ibounai taunimanima ese lau idia nanadaia,

idia gwau, “Oiemu Dirava be edeseni ia noho?”
 Unai dainai dina bona hanuaboi lau taitai noho,
 vadaeni egu matana ena ranu,
 be egu aniani gauna nega ibounai.

⁴ Guna neganai,
 nega namona lau abia dinadia,
 be lau laloa lou,
 vadaeni lalohisihisi dainai egu kudouna ia makohia bamona.
 Guna be taunimanima momo danu lau raka lao,
 Dirava ena Ruma lalonai lau hakaudia vareai.
 Ai ese mai moale bada bona boiboi danu,
 Dirava hanamoa ane ai abia.
 Unai bamona ai ese Lohiabada ena aria ai karaia.

⁵ Dirava e,
 badina dahaka lauegu lalona ia hisihisi bada noho?
 Badina dahaka lauegu kudouna ia metau noho?
 Lau ese Dirava do lau abidadama henia,
 bona iena durua totona do lau naria noho,
 badina ia be lauegu hamauria Tauna bona egu Dirava.
 Unai dainai lau ese iena ladana do lau hanamoa lou.

⁶ Egu lauma be egu lalona dekenai ia metau noho.
 Unai dainai Lohiabada dekenai lau laloa noho.
 Lau be inai gabudia dekenai lau noho: Ioridane tano, Heremona tano,
 bona Misara Ororo dekenai.

⁷ Ranu ia dobu gabuna ta ese,
 ranu dobu gabuna ma ta dekenai ia boiboi noho.
 Inai be sinavai ese nadi gabuna dekenai ia heau,
 vadaeni unai sinavai ena ranu be ataiai gabu dekena amo,
 ia moru diho daudau herea,
 bona henunai nadi gabuna dekenai ia bamepa, ma ia heau,
 mai ena regena bada danu.

Lohiabada e,
 oi ese lalohisihisi momo lau dekenai oi siaia,
 bona hurehure bona abata bamona,
 inai lalohisihisi ese lau idia koua, lau diho.

⁸ To dina ta ta neganai,
 Lohiabada ese iena bogahisihisi lau dekenai ia hedinarai,
 bona hanuaboi neganai,
 lau ese ane dekena amo ia lau tanikiu henia.
 Lau ese Dirava lau hanamoa noho egu guriguri dekena amo,
 badina ia ese lau dekenai mauri ia henia noho.

⁹ Dirava ese goada lau dekenai ia henia noho,
 vadaeni ia dekenai lau hereva, lau gwau,
 “Badina dahaka lau oi laloaboio vadaeni?
 Badina dahaka lau idia dagedage henia taudia ese,
 lau idia hisihisi henia noho,
 bona oi ese idia oi koua lasi?”

¹⁰ Nega ibounai idia ese lau dekenai idia hereva dika,
 idia gwau,
 “Oiemu Dirava be edeseni ia noho?”
 Inai bamona hereva be hegeregere io bamona,
 lau ia gwadaia,

bona kahirakahira lau mase.

¹¹ Badina dahaka lauegu lalona ia hisihisi bada noho?
 Badina dahaka lauegu kudouna ia metau noho?
 Lau ese Dirava do lau abidadama henia,
 bona iena durua do lau naria,
 badina ia be lauegu hamauria Tauna bona lauegu Dirava.
 Unai dainai lau ese iena ladana do lau hanamoia lou.

43

Iena gabu dekena amo ia noho daudau tauna ena guriguri

¹ Dirava e, oi idia matauraia lasi bese taudia ese,
 lau idia hadikaia gwauraia.
 Mani emu kara lau oi durua,
 bona edia hereva dika do oi koua.
 Mani idia dekenai do oi hedinaraiia,
 lau be kara maoromaoro tauna.
 Unai taudia ese hereva koikoi idia gwauraia,
 bona edia kara be maoro lasi.
 Mani oi ese edia imana dekena amo,
 lau do oi hamauria.
² Oi sibona be lauegu Dirava.
 Oi dekenai lau lao diba,
 vadaeni oi ese tau dikadia dekena amo lau oi gimaia momokani.
 To Lohiabada e,
 badina dahaka oi ese lau oi laloaboio vadaeni?
 Badina dahaka lau dekenai idia dagedage taudia ese,
 lau idia hadikaia,
 bona lau hisihisi noho?
³ Oiemu diari bona oiemu hereva momokani,
 be mani oi siaia mai,
 idia ese dala maorona lau dekenai do idia hedinaraiia.
 Vadaeni inai diari ese maoromaoro oiemu ororo helagana,
 Siona dekenai lau do idia hakaua.
 Unai be oiemu Dubu Helaga, oi noho gabuna.
⁴ Unai neganai Dirava ena boubou patana dekenai do lau lao,
 badina oi ese egu moale bona laloa namo oi havaraia noho.
 Oi be lauegu Dirava momokani.
 Lau ese gita dekena amo oi do lau hanamoia,
 mai ane namona dekenai danu.

⁵ Badina dahaka lauegu lalona ia hisihisi noho?
 Badina dahaka lauegu kudouna ia metau noho?
 Lau ese Dirava do lau abidadama henia,
 bona iena durua totona do lau naria,
 badina ia be lauegu Dirava.
 Unai dainai lau ese iena ladana do lau hanamoia lou.

44

Tuari idia lusi dainai, Israela taudia ese durua totona Dirava idia noia

¹ Dirava e,
 ai be aiemai taiana dekena amo sivarai ai kamoni.
 Aiemai tamadia ese ai idia hamaoroa vadaeni.
 Idia edia nega dekenai dahaka dahaka oi karaia,

be ai dekenai idia gwaurai.

² Nega gunadia dekenai oi sibona oiemu imana dekena amo, bese idauidau oi lulua lao ore, bona aiemai tamadia be edia gabu dekenai oi atodia.

Oi ese bese idauidau oi hisihisi henidia, to aiemai tamadia be oi ese oi hanamoa bada.

³ Aiemai tamadia, oiemu bese ese, edia tuari kaia dekena amo tano idia abia lasi, bona sibodia edia goada dekena amo tano idia abia lasi. To oiemu siahu bona oiemu goada dekena amo idia abia, bona oiemu vairana ena diari dekena amo idia abia. Badina be unai diari dekena amo, oiemu lalokau be idia dekenai oi hedinarai namo herea.

⁴ Lohiabada e,

oi be egu King bona egu Dirava.

Oi ese oiemu bese Iakobo dekenai kwalimu oi henia noho.

⁵ Oiemu durua dainai ai dekenai idia tuari henia taudia, be ai ese ai lulua lao.

Oiemu ladana dainai, ai idia hadikaia gwaurai taudia ai moia diho.

⁶ Egu peva dekenai lau abidadama henia lasi.

Egu tuari kaia danu ese lau ia hamauria diba lasi.

⁷ To oi ese ai idia tuari henia taudia dekena amo, ai oi hamauria vadaeni,

bona ai dekenai idia badu henia taudia, be oi ese oi halusia vadaeni.

⁸ Ai ese nega ibounai oi do ai hanamoa,

bona oi do ai tanikiu henia ela bona hanaihanai.

⁹ To oi ese ai oi nega vadaeni,

ma oi ese ai oi hahemaraia vadaeni.

Oi ese harihari aiemai tuari ore ai gunalaia lasi, guna oi karaia bamona.

¹⁰ Oi ese ai idia tuari henia taudia oi koua lasi,

vadaeni idia ese ai idia lulua lao,

bona idia ese aiemai kohu idia abia, edia ura hegeregere.

¹¹ Oi ese idia oi koua lasi,

vadaeni idia ese ai idia alaia,

mamoe idia alaia bamona.

Oi ese bese idauidau taudia edia tano dekenai, ai oi lulua lao,

bona ai be idia edia huanai ai noho.

¹² Oi ese oiemu bese taudia oi hoia lao,

davana maragi dekenai oi hoia.

Idia be oi dekenai davana maragi gaudia bamona oi hoidia lao.

¹³ Aiemai badibadinai noho taudia ese,

oiemu kara ai dekenai idia itaia,

bona ai dekenai idia hevaseha,

bona ai idia kirikirilaia noho.

¹⁴ Oi ese ai oi hadikaia,

vadaeni bese idauidau edia huanai aiemai sivarai be dika.

Idia ese edia kwaradia kahana kahana dekenai idia giroagiroa,

ai dekenai idia ura lasi ena toana.

¹⁵ Lau be nega ibounai lau hemarai noho.

Hemarai ese lau ia koua momokani,
 16 badina be lau idia badu henia taudia,
 bona lau idia hadikaia gwauraia taudia ese,
 lau dekenai idia hereva dika,
 bona edia badu hereva lau kamona noho.
 17 Ai ese oi dekenai ai laloaboio lasi,
 bona oiemu gwauhamata taravatuna,
 be ai utua lasi,
 to inai dika ibounai be ai dekenai idia vara vadaeni.
 18 Ai ese oi dekenai koikoi karana ta ai karaia lasi,
 bona ai ese oiemu oda hereva ta ai negea lasi,
 19 to oi ese ai oi hadikaia,
 bona uda sisia edia gabu dekenai ai oi rakatania.
 Dibura masemase ese ai ia koua momokani.

20 Bema oi, aiemai Dirava dekenai,
 tomadiho henia kara ai rakatania,
 bona bema dirava idauna ta dekenai ai guriguri henia neganai,
 21 oi ese inai kerere do oi itaia lasi, a?
 Badina be oi, Dirava, ese aiemai laloa gaudia,
 hunia gaudia ibounai oi diba noho.
 22 To oiemu ladana dainai,
 nega ibounai idia ese ai idia alaia mase noho.
 Mamoe idia haboua,
 do idia alaia totona bamona,
 idia ese ai idia haboua,
 bona ai idia alaia noho.

23 Do oi noga!
 Lohiabada e, badina dahaka oi mahuta noho?
 Do oi toreisi!
 Ai do oi negea ela bona hanaihanai, a?
 24 Badina dahaka ai dekena amo oi hunia noho?
 Aiemai hekwarahi bona aiemai hisihisi be,
 badina dahaka oi laloaboio?
 25 Ai ese tano dekenai ai moru diho.
 Aiemai tauanidia be tano ena kahu dekenai idia diho noho.
 26 Do oi toreisi,
 ai durua totona do oi mai!
 Oiemu noho hanaihanai lalokauna dainai ai do oi hamauria.

45

King ia headava neganai ena ane

1 Hereva namo herea be egu lalona idia hahonua noho,
 badina lau ese king totona inai ane lau karaia.
 Egu malana ese ane namona ia abia noho,
 sivarai torea dekenai ia manada herea tauna ena peni,
 ese ia karaia bamona.
 2 King e, oiemu hairaina ese,
 taunimanima ibounai edia hairaina ia hereaia noho.
 Oiemu hereva be hariharibada dekena amo idia honu momokani,
 badina be Dirava ese,
 oi do ia hanamoia noho ela bona hanaihanai.
 3 King mai goadana e,

oiemu tuari kaia be gaba gauna dekenai do oi kwatua.

Oi be mai hairaina, bona mai oiemu king siahuna danu.

⁴ Oiemu hosi dekenai do oi guia,

bona mai king siahuna danu do oi lao, do oi kwalimu.

Hereva momokani bona kara maoromaoro gimaia totona,
do oi tuari lao.

Oiemu goada ese,

hoa karadia mai garidia danu do ia hedinarai.

⁵ Oiemu peva ena diba be mai edia matana,

idia ese king idia hadikaia gwaurai taudia,

edia kudouna do idia gwadaia.

Bese idauidau taudia be oiemu aena henunai do idia moru.

⁶ Oiemu basileia, Dirava ese oi dekenai ia henia basileia,

be do ia noho ela bona hanaihanai.

Oiemu basileia taudia,

be mai kota maoromaoro danu do oi biagua noho.

⁷ Kara maoromaoro oi ura henia noho,

bona kara dika oi badu henia noho.

Unai dainai Dirava, oiemu Dirava, ese oi ia abia hidi vadaeni,

bona ia ese moale bada,

be oi dekenai ia henia vadaeni.

Inai moale ese king haida edia moale ia hereaia noho.

⁸ Oiemu dabua dekena amo muro bona aloe bona kasia muramura,

edia bonana ia daekau noho.

Oiemu ruma badana, aivori ese ia hanamoa rumana lalonai,

miusiki taudia ese oi do idia hamoalea.

⁹ King haida edia natudia hahine,

be oiemu ruma hahine edia huanai idia noho,

bona oiemu terona ena idiba kahana dekenai,

kwini ia gini noho.

Kwini ena herahera be golo namo herea gaudia.

¹⁰ King ena headava matamata kekeni e, mani oi laloa,

bona egu hereva do oi kamoni.

Oiemu bese taudia bona oiemu tamana ena ruma do oi laloaboio,

¹¹ vadaeni king ese oiemu hairaina do ia ura henia.

Ia be oiemu lohia tauna dainai,

ia dekenai do oi kamoni henia.

¹² Turo taudia ese,

oi dekenai harihari gaudia do idia mailaia,

bona kohu momo taudia ese,

oiemu laloa namo totona, oi dekenai do idia noinoi.

¹³ King ena kekeni be mai hairaina,

iena daiutu lalonai ia noho.

Iena dabua be golo varo dekena amo idia hatua karaia.

¹⁴ King ena kekeni ese,

dabua namo herea ia karaia noho,

be king ena vairana dekenai idia hakaua vareai.

Iena durua kekeni taudia danu,

be iena murinai idia raka noho,

king ena vairanai.

¹⁵ Mai moale bada danu idia ese,

king ena ruma dekenai idia raka vareai noho.

16 Egu king e,
 oi ese natuna tau momo do oi abia.
 Idia ese oiemu tamana bona tubuna edia king dagi,
 be do idia abia,
 bona tanobada kahana ibounai dekenai,
 king taudia do oi halaodia.
 17 Egu ane ese oiemu ladana do ia habadaia momokani,
 ela bona nega ibounai,
 bona taunimanima ibounai ese,
 oi do idia hanamoa ela bona hanaihanai.

46

Dirava be ita dekenai ia noho

1 Dirava be iseda heau mauri gabuna,
 bona ia ese ita dekenai goada ia henia.
 Iseda nega dika negadia ibounai ita dekenai ia noho,
 ita do ia durua totona.
 2 Unai dainai ita be do ita gari lasi, dika ia vara neganai.
 Tano be sedira do ia mareremarere bada,
 bona ororo be do idia kokia,
 davara lalonai do idia moru,
 to ita be do ita gari lasi.
 3 Sedira davara ranu be do ia hurehure bada,
 bona regena bada do ia karaia.
 Bona unai davara ena hurehure dainai, ororo do idia heudeheude,
 to ita be do ita gari lasi.
 4 Dirava ena hanua be Siahu Ibounai Dirava ena gabu helagana.
 Sinavai badana ta be unai hanua ena huanai ia heau noho.
 Bona unuseni idia noho taudia ese,
 unai sinavai idia moalelaia.
 5 Dirava be unai hanua lalonai ia noho,
 unai dainai unai hanua be idia makohia diba lasi.
 Dirava ese daba maragi neganai unai hanua do ia durua.
 6 Tanobada ena bese taudia idauidau,
 be idia heai noho bona heatu noho.
 Bese ta ta edia king bona edia taunimanima idia moru.
 Dirava be iena guba boiboi dekena amo iena gadona ia abia isi,
 vadaeni tano be ia veve,
 ranu bamona ia lao.
 7 Siahu Ibounai Lohiabada be ita dekenai ia noho.
 Iakobo ena Dirava be iseda heau mauri gabuna.

8 Umui mai!
 Lohiabada ena gaukara do umui itaia.
 Tanobada dekenai hadikaia karadia momo ia karaia vadaeni.
 9 Tuari be Dirava ese ia hadokoa noho,
 tanobada kahana ibounai dekenai.
 Ia ese peva ia makohia noho,
 bona io be ia ese ia hakwaidua noho.
 Kariota be ia ese lahi dekenai ia gabua noho.
 10 Lohiabada be inai bamona ia hereva, ia gwau,
 “Tuari do umui hadokoa,
 bona do umui diba momokani lau be Dirava.
 Bese idauidau ibounai ese lau do idia hanamoa.

Tanobada taudia ibounai ese,
lau do idia gwauraia King Badana momokani.”

¹¹ Siahu Ibounai Dirava be ita dekenai ia noho.
Iakobo ena Dirava be iseda heau mauri gabuna.

47

Dirava be tanobada taudia ibounai edia King Badana

¹ Bese idaidau taudia ibounai e,
mai hanamoa danu emui imana do umui patapataia.

Dirava do umui hanamoa,
mai ane bona boiboi danu.

² Badina Lohiabada be Siahu Ibounai Dirava,
ia be mai garina.

Ia be King Badana momokani.

Tanobada taudia ibounai,
be ia ese ia biagua noho.

³ Ia ese ita dekenai kwalimu ia henia,
bona bese idaidau be iseda aena henunai ia atodia.
Orea idaidau be Lohiabada ese ia hamanadaia,
ita henunai ia atodia.

⁴ Dirava ese tano ta ia abia hidi,
bona ita dekenai ia henia.

Ita be Iakobo ena tubuna,
Dirava ese ita ia lalokau henia.
Inai tano be iseda tano dainai,
iniseni do ita noho, mai moale danu.

⁵ Dirava be guba dekenai ia daekau lao.

Lohiabada ia daekau neganai,
taunimanima be mai moale bada danu idia boiboi,
bona kibi idia hiriria.

⁶ Dirava do umui hanamoa,
ane do umui abia, ia dekenai hanamoa totona.
Iseda King Badana do umui hanamoa ane dekenai,

⁷ badina Dirava be tanobada ibounai edia King.
Ane dekenai do ita hanamoa!

⁸ Dirava be iena terona helagana dekenai ia helai noho.
Ia ese tanobada bese ibounai ia biagua noho.

⁹ Bese idaidau edia lohia taudia idia haboua noho.
Idia ese Aberahamo ena Dirava ena bese taudia danu,
do idia haboua tamona lao,

badina be tanobada taudia edia king ibounai,
be Dirava ena henunai idia noho.
Ia ese king ibounai bona taunimanima ibounai ia biagua noho.

48

Siona, Dirava ena hanua

¹ Lohiabada be ia bada,
bona taunimanima ese ia do idia hanamoa bada be namo,
iseda Dirava ena hanua,
iena ororo helagana dekenai.

² Siona, Dirava ena Ororo,
be atai ai bona mai ena hairaina danu.

King Badana ena hanua ese,
tanobada taunimanima ibounai ia hamoalea noho.
³ Dirava ese ia hedinarai vadaeni,
ia dekenai noho taudia be do idia mauri,
Siona hanua ena kohoro lalonai.

⁴ King taudia haida idia haboua,
bona Siona Ororo tuari henia totona idia mai.
⁵ To idia ese Siona idia itaia neganai idia hoa bada,
idia gari bada,
bona idia heau bojo.
⁶ Unuseni gari bada ese ia abidia,
hisihisi bada danu,
hahine ese kahirakahira natuna ia havaraia ena hisihisi bamona.
⁷ Lohiabada ese idia ia hadikaia ore,
lagatoi be lai guba bada ese ia hadikaia ore bamona.

⁸ Dirava ena kara sivaraina ita kamoni vadaeni hegeregere,
be hari ita itaia vadaeni danu,
iseda Dirava ena hanua lalonai.
Siahu Ibounai Lohiabada ese inai hanua do ia naria.
Do ia gimaia ela bona hanaihanai.

⁹ Dirava e,
oiemu Dubu Helaga lalonai,
ai ese oiemu noho hanaihanai lalokauna ai laloa noho.
¹⁰ Dirava e,
tanobada kahana ibounai dekenai noho taunimanima ese,
oiemu ladana idia hanamoana noho.
Oiemu sivarai,
be gabu ibounai dekenai idia gwaurai laloa noho.
Mai maoromaoro danu oi ese taunimanima oi biagua noho.
¹¹ Siona dekenai noho taudia do idia moale!
Kota maoromaoro oi karaia noho.
Iuda ena hanua ibounai lalonai,
edia taunimanima be do idia moale bada!
¹² Dirava ena taudia e,
Siona ena kahana ibounai do umui raka lao,
bona iena kohoro ibounai do umui duahia.
¹³ Siona ena magu do umui itaia,
bona iena ruma aukadia do umui itaia laloa.
Vadaeni Siona ena namo,
be gabeai idia vara uru taudia do umui hamaoroa.
¹⁴ Inai Dirava be iseda Dirava ela bona hanaihanai.
Ia ese nega ibounai doko lasi ita do ia hakaua noho.

49

Tau ta, bema moni bona kohu sibona ia laloa, unai tau be kavakava

¹ Bese idau dau taudia ibounai e, umui kamoni.
Tanobada dekenai noho taudia ibounai e,
egu hereva do umui kamoni henia.
² Ladana bada taudia bona ladana maragi taudia,
kohu momo taudia bona ogogami taudia danu.
Inai hereva do umui kamoni!
³ Lauegu uduna ese aonega do ia gwaurai,

bona egu kudouna ena laloa ese,
diba bada do ia hedinarai umui dekenai.

⁴ Aonega hereva be do lau laloa,
bona edia anina be do lau gwauraia hedinarai,
mai gita ena regena danu.

⁵ Nega dikadia, o dagedage taudia,
be lau dekenai idia ginidae neganai lau gari lasi.

⁶ Tau dikadia idia laloa moni ese goada do ia henidia,
bona edia kohu momo idia hekokorokulaia,
to idia dekenai lau gari lasi.

⁷ Momokani, tau ta ese sibona ena mauri,
be moni dekena amo ia hoia diba lasi.
Ia be hegeregere lasi,
Dirava dekenai moni do ia henia, iena mauri davaria totona.
Lasi momokani.

⁸ Badina be iena mauri ena davana be bada herea,
bona tau ta ena moni be hegeregere lasi.

⁹ Unai dainai tau ta ese,
Dirava ena lalona ia veria diba lasi, iena mauri hadaudaua totona.
Ia be dala lasi mase ena bodaga bona guria gabuna,
dekena amo do ia heau.

¹⁰ Ita ibounai ita itaia noho,
aonega taudia danu idia mase noho.
Kava taudia bona laloa maragi taudia danu idia mase noho,
bona edia kohu bona moni idia rakatania,
to tau ma haida ese unai moni idia abia noho.

¹¹ Guna idia be mai edia tano momo,
to harihari guria gabuna sibona be edia noho gabuna.
Unuseni do idia noho ela bona hanaihanai.

¹² Tau ta ena ladana bada ese,
iena mase ia koua diba lasi.
Ia be do ia mase,
boroma ia mase bamona.

¹³ Edia goada dekenai bona edia kohu,
dekenai idia abidadama taudia edia mase be unai bamona.
Unai taudia edia hereva idia badinaia taudia danu,
edia dokona be unai bamona.

¹⁴ Edia davana be, mamoe bamona idia mase.
Mase vadaeni taudia edia gabu dekenai idia lao,
bona Mase ese edia naria tauna ia lao.
Kara maoromaoro taudia be idia dekena amo do idia kwalimu,
to unai dika taudia be mase gabunai,
edia tauanina idia bodaga lao noho,
bona hari edia ruma namodia be lasi.

¹⁵ To Dirava ese lau do ia hamauria,
bona mase taudia edia gabu ese lau do ia dogoatao diba lasi.

¹⁶ Bema tau ta be mai ena kohu bona moni momo,
bona iena ruma bona kohu ia habadaia momokani neganai,
do oi hoa lasi bona mama henia lasi.

¹⁷ Badina be do ia mase neganai,

gau ta do ia abia lao lasi.

Iena ruma bona kohu namona,
be ia danu do idia diho lasi.

¹⁸ Momokani iena mauri dinadia lalonai unai gaudia ia moalelaia.

Ia gaukara auka bona gau momo ia abia,
bona taunimanima idia gwau,

“Ia be tau namona.”

¹⁹ To ia mase neganai,

ia be iena sene taudia danu mase gabuna dekenai do ia haboua,
unuseni dina ena diari do ia itaia lou lasi.

²⁰ Tau ta ena ladana bada ese,

iena mase ia koua diba lasi.

Ia be do ia mase,

boroma ia mase bamona.

50

Tomadiho kara korikori

¹ Sياهو Ibounai Dirava,

iseda Lohiabada ia hereva vadaeni.

Ia ese taunimanima ibounai ia boiria,

dina ia daekau kahana gabudia dekena amo,

ela bona dina ia diho kahana gabudia danu.

Tanobada taudia ibounai ia boiria.

² Dirava be Siona dekenai ia noho.

Siona be hairai herea gabuna,

bona inai gabu namo herea,

dekena amo Dirava ena diari ia hedinarai noho.

³ Iseda Dirava ia mai noho, bona mai regena danu do ia mai.

Iena vairana dekenai lahi ena hururuhururu do ia noho,

bona lai guba badana ese,

Dirava do ia hagegea noho.

⁴ Dirava ese guba ena atai dekenai ia boiboi,

tanobada danu dekenai ia boiboi.

Idia ruaosi be kota lalonai do idia hedinarai,

Dirava ese iena orea taudia do ia kota henidia neganai.

⁵ Dirava ia gwau,

“Lau dekenai idia abidadama henia taudia,

be lau dekenai do umui haboua mai,

badina idia ese boubou gauna idia henia,

bona lau danu gwauhamata taravatuna idia karaia.”

⁶ Guba ese Dirava ena kara maoromaoro idia gwauraia noho,

bona idia gwau ia sibona be kota biaguna badana.

⁷ “Egu bese taudia e, do umui kamonai,

bona do lau hereva.

Israela e, lau ese oi do lau samania.

Lau be Dirava, emui Dirava.

⁸ Emui boubou gaudia dainai umui lau gwau henia lasi.

Emui gabua boubou gaudia,

be nega ibounai egu vairana dekenai idia noho.

⁹ Lau ese emui tano ena boromakau,

bona emui nanigosi lau ura henia, a?

Egu boromakau bona nanigosi idia noho lasi, a?

10 Badina uda dekenai noho mauri gaudia ibounai be lauegu,
bona egu ororo ibounai dekenai idia noho boromakau,
momo herea, duahia diba lasi,
danu be lauegu.

11 Atai ai manudia ibounai danu be lauegu,
bona hanua ena murimurina i idia noho mauri gaudia ibounai danu.

12 Bema lau hitolo neganai,
lau ese umui lau hamaoroa lasi,
badina tanobada mai ena anina ibounai danu be lauegu.

13 Boromakau tau edia vamu lau ania noho, a?
Nanigosi tau edia rarana lau inua noho, a?
Lasi momokani!

14 To lau ura momokani gauna be emui tanikiu,
emui boubou gauna korikori be unai.
Lau, Sياهو Ibounai Dirava dekenai umui karaia vadaeni gwauhamata,
edia anina ibounai do umui henia haorea.

15 Hisihisi bona hekwarahi idia ginidae neganai,
lau dekenai do umui boiboi,
bona lau ese umui do lau hamauria,
vadaeni umui ese lau do umui hanamoa bada.”

16 To kara dika taudia dekenai,
Dirava ese inai bamona ia hamaoroa, ia gwau:
“Badina dahaka egu taravatu umui gwauraia noho?
Badina dahaka egu gwauhamata herevadia be umui herevalaia noho?”

17 Umui ese egu matakani umui ura lasi,
bona egu taravatu umui utua bona umui negea noho.

18 Henaoa tauna umui itaia neganai,
umui be ia danu umui turana karaia,
bona heudahanai taudia danu umui haboua noho.

19 Hereva dikadia be nega ibounai umui gwauraia noho,
bona emui malana ese,
hereva koikoi idia gwauraia noho.

20 Umui ese emui tadikakadia umui samania noho.
Emui sinadia edia natudia tau umui samania koikoi noho.

21 Inai dika ibounai umui karaia vadaeni,
bona lau ese hereva ta lau gwauraia lasi.
Unai dainai umui laloa lau be umui hegeregerena sibona.
To harihari lau ese umui lau gwau henia noho.

Lau ese umui lau samania noho momokani.

22 Lau umui laloaboio taudia e,
egu hereva do umui kamona i,
lau ese umui do lau hadikaia ore garina,
badina be tau ta ese umui do ia hamauria diba lasi.

23 Bema tau ta ese,
lau dekenai iena tanikiu ia henia,
unai tau ese boubou gauna momokani ia henia unai.
Lau ia hanamoa noho boubouna be unai,
bona lau dekenai idia kamona i henia taudia ibounai,
be lau ese do lau hamauridia.”

51

Iena kara dika do ia gwauatao totona, Davida ese Dirava ia noia

- ¹ Dirava e,
mani oi bogahisihisi lau dekenai.
Oiemu lalokau badana dainai,
bona oiemu bogahisihisi bada herea dainai,
egu kara dika do oi kokia ore.
- ² Egu dika mani do oi huria ore,
bona egu kerere dekena amo lau do oi hagoevaia.
- ³ Badina be egu kara dika be lau diba momokani.
Lauegu kerere be egu vairana dekenai ia noho nega ibounai.
- ⁴ Lau ese oi sibona dekenai lau kara dika vadaeni.
Lau be oiemu vairana dekenai kerere lau karaia.
Unai dainai oi ese lau oi kota henia be maoro,
bona oi ese egu dika ena davana oi henia danu be maoro.
- ⁵ Momokani, lau be kara dika lalonai lau vara,
bona kara dika lalonai egu sinana ese lau ia havaraia.
- ⁶ Oiemu ura be,
egu kudouna dekenai laloa maoromaoro bona momokani idia noho.
Unai dainai, mani emu kara,
lauegu lalona be oiemu aonega dekenai do oi hahonua.
- ⁷ Lauegu kara dika do oi kokia,
vadaeni do lau goeva.
Mani oi ese lau do oi huria,
vadaeni lau be kurokuro,
sinou ena kurokuro do lau hereaia.
- ⁸ Moale bona laloa namo,
lau dekenai mani do oi henia lou.
Momokani oi ese lau oi atoa diho vadaeni,
bona egu dika ena davana lau dekenai oi henia,
to hari lau ura moale do lau davaria lou.
- ⁹ Mani emu kara,
egu kara dika dekenai oiemu matana do oi hakaupua,
bona egu kerere bada ibounai do oi kokia ore.
- ¹⁰ Dirava e,
lauegu kudouna lalonai laloa goevagoeva do oi havaraia,
bona lauma matamatana bona maoromaorona,
be egu lalona dekenai do oi atoa.
- ¹¹ Oiemu vairana dekena amo lau do oi lulua lao lasi,
bona oiemu Lauma Helaga,
be lau dekena amo do oi kokia lasi.
- ¹² Guna be lau moale bada,
oi ese lau oi hamauria dainai.
Harihari lau ura inai oiemu hamauria ena moale,
be lau dekenai do oi henia lou.
Bona ura namodia,
bona lauma namona,
lau dekenai do oi henia,
vadaeni oiemu hereva do lau kamonaia henia.
- ¹³ Unai neganai lau ese,
oiemu dala be kerere taudia dekenai do lau hadibaia.
Bona kara dika taudia ese,
oi dekenai do idia giroa lou.

14 Dirava e,
oi be lau oi hamauria Diravana,
Rara bubua ena kerere,
dekena amo lau do oi hamauria.
Unai neganai lau ese ane momo do lau abia,
oiemu kara maoromaoro do lau gwauraia totona.

15 Lohiabada e,
oi ese lau do oi durua,
do lau hereva goada,
bona oiemu ladana do lau habadaia momokani.

16 Oi ese boubou karadia dekenai oi moale lasi.
Sedira boromakau do lau alaia,
boubou totona do lau gabua,
to oi be do oi moalelaia lasi.

17 Unai dainai Dirava e,
lau ese sibona do lau atoa diho,
bona oiemu vairana dekenai do lau manau.
Inai bamona kara be lauegu boubou gauna oi dekenai.
Lau diba momokani, Dirava e,
bema tau ta be iena kara dika dainai ia lalohisihisi momokani,
bona ia manau momokani neganai,
oi ese ia do oi negea diba lasi.

18 Dirava e,
Siona taudia dekenai do oi bogahisihisi,
bona oi ese idia do oi durua.
Ierusalem hana ena magu do oi haginia lou.

19 Unai neganai oiemu taudia ese,
boubou gaudia korikori bona maoromaoro do idia henia,
bona do oi moalelaia momokani.
Lahi dekenai idia gabua bouboudia bona boromakau tau,
be oiemu boubou patana dekenai do ai atoa.

52

Dirava ena kota henia kara bona iena hariharibada

1 Goada herea tauna e,
badina dahaka oiemu kara dika dekenai oi hekokoroku noho?
Oi ese nega ibounai,

Dirava ena taudia do oi hadikaia dalana oi tahua noho.

2 Hereva koikoi tauna e,
oiemu malana be kaia mai matana bamona.
bona dika ia havaraia noho.

3 Dika be oi ura henia bada,
namo oi ura henia maragi.

Hereva koikoi oi ura henia bada,
hereva momokani oi ura henia maragi.

4 Oiemu malana be koikoi gauna momokani.
Taunimanima hadikaia hereva ibounai oi ura henia momokani.

5 To Dirava ese oi do ia hadikaia ela bona hanaihanai.
Ia ese oi do ia dogoatao,

bona oiemu ruma dekena amo oi do ia kokia lao.
Ia ese mauri taudia edia gabu dekena amo,
oi do ia kokia momokani.

6 Kara maoromaoro taudia ese inai kara do idia itaia,

bona do idia gari.

Idia ese unai dika tauna do idia kirikirilaia,
do idia gwau,

⁷ “Inai tau,

ia ese iena mauri totona Dirava ia abidadama henia lasi,
to ia ese iena kohu momo ia abidadama henia,
bona kara dikadia dekena amo mauri namona ia tahua.”

⁸ To lau be olive auna,

Dirava ena Ruma lalonai lau vara noho bamona.

Dirava ena noho hanaihanai lalokauna,
be do lau abidadama henia noho ela bona hanaihanai.

⁹ Dirava e, oi ese oi karaia vadaeni gaudia dainai,

lau ese oi do lau hanamoa ela bona hanaihanai.

Oiemu ladana be namo herea momokani.

Dirava ena taudia edia vairana dekenai,

oiemu kara namona do lau gwauraia hedinarai.

53

Taunimanima edia kara dika

¹ Kavakava taudia ese inai bamona idia laloa, idia gwau,

“Dirava be ia noho lasi.”

Idia ibounai be dika,

kara mirodia idia karaia vadaeni.

Kara namo karaia tauna be ta lasi.

² Lohiabada be guba dekena amo iena matana ia negea,

taunimanima edia kara ia itaia noho.

Ia ese aonega taudia ia tahua noho.

Ia dekenai idia tomadiho taudia danu ia tahua noho.

³ To idia ibounai ese kara dika idia karaia vadaeni.

Idia ibounai be mai edia kerere.

Idia ta lasi ese kara namona ia karaia.

Lasi bona lasi momokani.

⁴ Dirava ese ia henanadai, ia gwau,

“Inai kara dika taudia idia diba lasi, a?

Aonega do idia abia diba lasi, a?

Idia ese egu bese taudia idia ania noho, beredi idia ania bamona,

bona lau dekenai idia guriguri lasi, lasi momokani.”

⁵ To gari ese idia do ia dogoatao,

gari idauna momokani,

nega ta unai bamona ia vara lasi gauna.

Badina be Dirava ese,

iena bese taudia idia hadikaia gwauraia taudia edia turia,

be do ia negedia lao.

Dirava ese unai tau dikadia ia ura lasi momokani.

Unai dainai Israela ese do ia halusidia momokani.

⁶ Egu noinoi badana be inai:

Lau ura Israela ena hamauria,

be Siona dekena amo do ia mai!

Dirava ese iena bese taudia edia mauri do ia hanamoa lou neganai,

Israela taudia be do idia moale bada herea.

54

Dirava be egu durua Tauna

¹ Dirava e, oiemu ladana ena siahu dekena amo,
lau do oi hamauria.

Oiemu goada dekena amo lau do oi gwauraia maoro.

² Dirava e, egu noinoi do oi kamoni.

Egu uduna ena hereva do oi laloa.

³ Hekokoroku taudia ese lau hadikaia totona idia mai noho.

Dagedage taudia ese lau alaia dalana idia tahua noho.

Idia be Dirava idia laloa lasi taudia.

⁴ To Dirava be lauegu durua Tauna.

Lohiabada ese egu mauri do ia gimaia.

⁵ Dirava ese lau idia hadikaia gwauraia taudia do ia hadikaia,

vadaeni sibodia edia dika ese idia do ia hadikaia.

Oi ese idia do oi alaia ore,

badina oi be kara momokani Diravana.

⁶ Lau ese laloa namo boubou gauna,

oi dekenai do lau henia.

Lohiabada e,

oiemu ladana do lau hanamoa, badina oiemu ladana be namo.

⁷ Badina be oi ese egu hisihisi ibounai dekena amo,

lau oi hamauria vadaeni,

bona lau idia ura hadikaia taudia be tuari idia lusi neganai,

lau ese edia moru do lau itaia.

55

Iena turana ese ia koia neganai, Davida ese Dirava dekenai ia guriguri

¹ Dirava e,

egu guriguri do oi kamoni.

Egu noinoi do oi negea lasi.

² Lau dekenai do oi kamoni,

bona lau dekenai do oi haere.

Egu laloa hekwarahi dainai lau manoka vadaeni.

³ Lau idia hadikaia gwauraia taudia edia hereva dekenai,

lau gari bada herea noho.

Kara dika taudia edia dagedage ese,

lau idia hadikaia noho.

Idia ese lau dekenai hisihisi idia havaraia noho.

Idia ese lau idia badu henia noho.

⁴ Egu kudouna be gari dainai ia hisihisi noho.

Mase ena gari be egu latanai ia ginidae vadaeni.

⁵ Gari bona heudeheude ese lau ia dogoatao noho.

Egu lauma be ia gari bona ia hoa dainai,

egu goada ia ore.

⁶ Lau gwau,

“Bema lau be mai egu hanina, pune manu bamona,

lau be do lau roho lao,

bona gabu ta dekenai do lau laga-ani.

⁷ Gabu daudau dekenai do lau roho lao,

bona taunimanima idia noho lasi gabuna dekenai do lau noho.

⁸ Do lau roho lao haraga,

lai guba, bona medu bada ia diho lasi gabuna do lau tahua.
Unuseni do lau noho namonamo.”

⁹ Lohiabada e, lau dekenai idia kara dika taudia,
be mani do oi hadikaia,
vadaeni edia herevahereva dekena amo,
daradara do idia davarua.
Badina be ala-ala bona heatu,
be hanua badana lalonai lau itaia noho.
¹⁰ Dina lalonai bona hanuaboi lalonai danu,
dika taudia ese hanua ena magu idia raka hagegea noho.
Hanua ena lalonai danu,
be kara dikadia bona laloa hekwarahi momo.
¹¹ Hanua ena lalonai,
be ala-ala bona henaoa karadia momo idia vara noho.
Hanua ena ariara dekenai,
koikoi karadia bona taunimanima hagarua hereva,
be idia vara noho, doko lasi.

¹² Bema lau ia hadikaia gwaurua tauna ese,
lau ia kirikirilaia neganai,
lau ese unai kara dekenai lau haheauka diba.
Bema lau ia tuari henia tauna ese,
lau dekenai hekokoroku hereva ia gwaurua neganai,
lau ese ia dekena amo do lau hunia diba.
¹³ To tauna be oi, lau bamona tauna.
Oi be lauegu turana korikori,
lau dekenai noho hebou tauna.
¹⁴ Guna ita herevahereva mai moale danu,
bona Dubu Helaga lalonai Dirava ita tomadiho henia hebou.

¹⁵ Lau idia hadikaia gwaurua taudia dekenai,
mase do ia ginidae haraga be namo.
Idia ese do mai mauri danu, mase taudia edia gabu dekenai,
do idia diho lao be namo!
Badina dika be edia kudoudia lalonai,
bona edia rumadia lalonai danu dika ia noho.

¹⁶ To lau be durua totona,

Lohiabada dekenai do lau boiboi henia.

Lohiabada ese lau do ia hamauria.

¹⁷ Adorahi neganai, daba neganai,

bona dina tubua neganai,

lau ese Lohiabada dekenai lau taitai henia,
bona ia ese egu gadona do ia kamonai henia.

¹⁸ Lohiabada ese lau do ia naria namonamo,
vadaeni lau dekenai idia tuari henia taudia momo,
do lau tuari henidia murinai,

Lohiabada ese,

mai mauri danu egu ruma dekenai lau do ia hakaua mai lou.

¹⁹ Dirava,

gunaguna momokani ia mai bona hari ia noho Diravana ese,
egu noinoi do ia kamonai.

Ia ese lau idia tuari henia taudia do ia halusia,
badina be iena taravatu idia kamonai henia lasi,
bona idia ese Dirava idia gari henia lasi.

²⁰ Egu turana ese iena gwauhamata ia makohia.

Ia ese iena turana ia heatu henia.

²¹ Iena hereva be manadamanada,
bata ena manadamanada bamona,
to iena kudouna lalonai tuari ia noho.
Iena hereva be manokamanoka,
olive dehero ena manokamanoka bamona,
to unai hereva be tuari kaia mai matana momokani.

²² Oiemu laloa hekwarahi be Lohiabada dekenai do oi henia,
bona ia ese idia dekena amo oi do ia durua.

Ia ese kara maoromaoro taudia ia durua noho.

Idia be do idia moru lasi,
lasi momokani.

²³ To Lohiabada e,
oi ese unai ala-ala bona koikoi taudia do oi siaia diho,
henunai momokani guri dekenai do idia lao.
Unai bamona dika taudia ese,
edia mauri dinadia kahana sibona idia ore neganai,
do idia mase,
to lau ese oi dekenai do lau abidadama henia noho.

56

David a ese Dirava ia abidadama henia

¹ Dirava e,
lau dekenai do oi bogahisihisi henia,
badina be taunimanima ese lau idia lulua noho.
Dina ena nega ibounai,
idia ese lau idia tuari henia noho.

² Lau idia hadikaia gwaurai taudia ese lau idia lulua noho.
Idia momo herea ese lau idia dagedage henia noho.

³ Siahu Ibounai Lohiabada,
lau be lau gari neganai oi dekenai do lau abidadama henia.

⁴ Dirava dekenai lau abidadama henia neganai lau gari lasi.
Iena gwauhamata gaudia dainai,
lau ese ia lau hanamo a noho.

Taunimanima sibona be edena bamona lau idia hadikaia diba?

⁵ Dina ibounai idia ese egu hereva idia hagagevaia noho.
Nega ibounai lau hadikaia dalana idia laloa noho.

⁶ Idia be hunia gabudia dekenai idia haboua noho.
Egu kara ibounai idia itaia noho,
lau idia alaia totona ena dala idia tahua noho.

⁷ Dirava e, edia kerere davana do oi henidia.
Mai oiemu badu danu unai taudia do oi halusia.

⁸ Lohiabada e, egu laloa hekwarahi oi diba.
Egu matana ena ranu be oiemu kavabu dekenai do oi udaia.
Oiemu buka lalonai idia torea vadaeni, ani?

⁹ Oi dekenai lau boiboi dinana dekenai,
lau idia badu henia taudia do oi lulua lou.
Lau diba inai be momokani,
badina Dirava be lau dekenai ia noho.

¹⁰ Ia be Lohiabada,
iena gwauhamata herevadia lau hanamoa Diravana.

¹¹ Ia sibona lau abidadama henia,
vadaeni do lau gari lasi.
Taunimanima sibona be edena bamona lau idia hadikaia diba?

¹² Dirava e, oi dekenai lau gwauhamata gauna,
ena anina be do lau karaia.
Lau ese oi dekenai,
egu tanikiu boubou gauna do lau henia,

¹³ badina be oi ese egu lauma,
be mase dekena amo oi hamauria vadaeni.
Oi ese danu egu aena oi naria,
vadaeni lau moru lasi.
Unai dainai lau be Dirava ena vairanai lau raka diba,
mauri taudia edia diari lalonai.

57

David a ese durua totona Lohiabada ia noia

¹ Dirava e, lau dekenai do oi bogahisihisi,
lau dekenai do oi bogahisihisi henia,
badina be mauri abia totona,
oi dekenai egu lauma ia hunia noho gwauraia.
Oiemu hanina edia henunai be egu hunia gabuna,
ela bona inai nega dika be do ia ore.

² Atai ai Herea Diravana dekenai lau tai henia noho,
lau davaria diba lasi gaudia ibounai,
ia ese ia henia noho Diravana be unai.

³ Ia ese guba dekena amo durua do ia siaia,
bona lau do ia hamauria.
Ia ese lau idia dagedage henia taudia do ia halusia.
Dirava ese iena noho hanaihanai lalokauna,
bona iena momokani, lau dekenai do ia hedinarai henia.

⁴ Dagedage taudia ese lau idia hagegea noho.
Idia be taunimanima idia ania noho, laiona bamona.
Edia isena be io bona diba bamona,
bona edia maladia,
be tuari kaia mai edia matadia bamona.

⁵ Dirava e, guba lalonai oiemu siahu do oi hedinarai,
bona tanobada ena kahana ibounai dekenai,
oiemu hairaina do oi hedinarai.

⁶ Lau idia hadikaia gwauraia taudia ese,
lau do idia abia totona tarapu idia atoa vadaeni.
Lau be laloa hekwarahi dainai egu goada ia ore.
Egu dala dekenai guri badana idia geia,
to idia sibodia unai guri lalonai idia moru.

⁷ Dirava e, egu kudouna lalonai,
egu abidadama ia goada momokani.
Egu abidadama ia goada momokani oi dekenai.
Oi hanamoa totona ane do lau abia,
ane namona do lau abia.

⁸ Egu lauma e, do oi noga!
Egu gita badana,

bona gita maragina e, do umui noga!

Lau ese daba rere do lau hanogaia.

⁹ Lohiabada e,

bese idauidau edia huanai lau ese oi do lau hanamoa.

Taunimanima ibounai edia huanai,

lau ese oi hanamoa totona ane do lau abia,

¹⁰ badina oiemu noho hanaihanai lalokauna be bada herea.

Ia daekau lao ela bona guba dekenai.

Oiemu hereva oi badinaia momokani kara be bada,

bona ia daekau lao ela bona ori dekenai.

¹¹ Dirava e,

oiemu siahu badana be guba dekenai do oi hedinarai,

bona oiemu hairaina be,

tanobada ena kahana ibounai dekenai danu do oi hedinarai.

58

David a ese Dirava ia noia, kara dika taudia edia dika davana do ia henidia

¹ Umui lohia taudia e,

umui ese nega ta kota maoromaoro do umui gwaurai, a?

Umui ese taunimanima ibounai,

be maka tamona dekenai umui kota henidia, a?

² Lasi, to emui lalona dekenai,

kerere karadia umui laloa noho.

Umui ese dagedage karadia tanobada dekenai umui karaia noho.

³ Kara dika taudia be,

edia sinadia edia bogana dekena amo idia mai neganai,

kerere dalana idia karaia hamatamaia.

Edia vara dinadia dekena amo idia kerere vadaeni,

koikoi hereva idia gwaurai noho.

⁴ Idia be poisini dekenai idia honu,

gaigai ena poisini bamona.

Idia be taia kudima gaigaina bamona.

Inai gaigai ese iena taiana ia koua noho,

⁵ meamea tauna ena gadona do ia kamoni lasi totona,

meamea tauna mai aonega danu,

ena gadona do ia kamoni lasi totona.

⁶ Dirava e,

edia isena do oi hamakohia edia ududia dekenai.

Lohiabada e,

inai laiona edia isena badadia do oi kokia momokani.

⁷ Ia heau lao ranu ia boio haraga bamona,

inai laiona danu mani do idia boio haraga.

Mani emu kara,

oi ese idia do oi moia patapata,

ava idia moia patapata bamona.

⁸ Kone ena bisisi be kopukopu lalonai ia diho lao,

ia boio bamona,

mani emu kara idia ese danu do idia boio.

Bona mani emu kara,

ia vara dika merona ia mase,

bona dina ia itaia lasi bamona,

idia danu unai bamona do oi hamasedia.

⁹ Mamina idia do abia lasi neganai,
oi ese idia do oi kokia lao,
ava ginigini idia kokia lao hegeregerena.

Idia do oi kokia momokani,
lai goadana ese ava dikadia ia kokia ore bamona.

¹⁰ Kara maoromaoro taudia ese,
dika taudia edia davana henia idia itaia neganai do idia moale.
Idia ese kara dika taudia edia rarana lalonai,
edia aena do idia huria.

¹¹ Vadaeni taunimanima do idia gwau,
“Momokani kara maoromaoro taudia be mai edia davana namona.
Momokani tanobada ia kota henia Diravana be ia noho.”

59

David a ese Dirava ia noia, do ia hamauria

¹ Egu Dirava e,
lau idia hadikaia gwauraia taudia dekena amo lau do oi hamauria.
Lau dekenai idia tuari henia noho taudia dekena amo,
lau do oi gimaia.

² Kara dika taudia dekena amo lau do oi hamauria.
Ala-ala taudia dekena amo lau do oi durua, do lau mauri noho.

³ Oi itaia,
idia be lau alaia totona idia hunia noho.
Dagedage taudia be lau hadikaia totona idia haboua noho.

⁴ To Lohiabada e,
inai be lauegu kara dika o lauegu kerere dainai lasi.
Lau be mai egu kerere ta lasi,
to idia heau mai, bona lau alaia totona idia hegaegae noho.
Do oi noga,

lau durua totona do oi mai.
Lau do oi itaia!

⁵ Lohiabada, Siahu Ibounai Dirava,
Israela ena Dirava,
mani do oi toreisi,
bona Dirava idia ura lasi taudia edia dika davana do oi henia.
Kara dika karaia totona,
hunia dekenai idia laloa hebou taudia,
be do oi alaia mase,
do oi bogahisihisi henidia lasi.

⁶ Adorahi ibounai idia giroa mai noho,
bona sisia bamona idia boiboi noho,
hanua lalonai idia raka loaloa neganai.

⁷ Edia uduna dekena amo hereva dika,
bona hereva badu idia mai,
mumuta bamona.

Edia malana be tuari kaia bamona.
To idia laloa, idia gwau,

“Daika ese ai dekenai ia kamonai diba?”

⁸ To Lohiabada e, oi ese idia dekenai oi kiri noho.
Oi ese Dirava ura lasi taudia ibounai dekenai,
oi kirikirilaia noho.

⁹ Lohiabada e,
oiemu goada dainai oi dekenai lau abidadama henia noho.
Oi be lauegu kohoro,
egu hunia gabuna.

¹⁰ Egu Dirava ese lau ia lalokau henia noho,
bona ia be egu vairana dekenai do ia lao,
lau dekenai idia tuari henia taudia ia ese do ia halusia.
¹¹ To Lohiabada e,
unai lau idia hadikaia gwauraia taudia be do oi alaia lasi,
egu bese taudia ese,
unai taudia edia matakani do idia laloaboio garina.
Mani emu kara oiemu siahu bada dekena amo idia do oi lulua,
vadaeni do idia loaloa kava lao, bona do oi hadikadia.
Lohiabada e, oi be aiemai gima Tauna, aiemai kesi.

¹² Edia ududia be dika,
edia hereva ibounai be mai kara dika danu.
Unai dainai Lohiabada e,
sibodia edia hekokoroku dekena amo do oi hadikadia.
Badina be idia ese,
taunimanima hamasea hereva bona koikoi hereva idia gwauraia noho.
¹³ Oiemu badu dekena amo do oi hadikadia ore.
Do oi hadikadia ela bona idia boio momokani.
Unai dekena amo,
taunimanima do idia diba Dirava ese Israela ia biagua noho.
Bona do idia diba danu,
Dirava be tanobada ibounai ena biaguna badana.

¹⁴ Lau idia hadikaia gwauraia taudia,
be adorahi neganai idia giroa mai noho,
sisia bamona idia boiboi noho,
hanua lalonai idia raka loaloa neganai.

¹⁵ Idia be sisia bamona aniani idia tahua loaloa,
bona bema idia davaria lasi neganai, idia boiboi mai badu danu.

¹⁶ To lau ese ane dekena amo,
oiemu goada do lau hanamoa.
Daba ibounai, ane dekena amo,
oiemu noho hanaihanai lalokauna do lau hanamoa,
badina oi be lauegu kohoro,
bona egu heau mauri gabuna,
nega dika ia vara neganai.

¹⁷ Lohiabada e,
oi sibona be egu goada ena badina.
Oi hanamoa totona ane do lau abia.
Oi Dirava be egu kohoro.
Oi be lau oi lalokau henia noho Diravana.

60

David a ese durua totona Dirava ia noia

¹ Dirava e,
oi ese ai oi negea vadaeni,
oi ese ai oi halusia vadaeni.
Oi ese ai dekenai oi badu vadaeni,
to hari mani emu kara ai do oi abia dae lou.

² Oi ese tano oi hamarerea vadaeni,
 bona oi ese tano oi hapararaia vadaeni.
 To hari do oi haginia lou,
 badina be ia goada lasi noho.

³ Oi ese oiemu bese taudia oi hisihisi henidia bada vadaeni.
 Ai ese uaina momo ai inua vadaeni bamona,
 ai raka kerere noho.

⁴ Oi ese oi dekenai idia gari taudia dekenai,
 heau mauri gabuna do oi henia,
 idia ese unuseni do idia heau lao,
 peva ena diba idia dika momokani neganai.
⁵ Oiemu goada dekena amo ai do oi hamauria.
 Aiema noinoi mani do oi kamona,
 vadaeni ai, oi lalokau henia taudia,
 be oi ese do oi hamauria.

⁶ Iena gabu helagana dekena amo Dirava ia hereva, ia gwau,
 “Mai kwalimu danu lau ese Sekema tano do lau hapararaia,
 bona Sukoto Koura,
 be egu bese dekenai do lau haria.

⁷ Gileada be egu tano,
 Manase danu be lauegu.
 Eparaima be egu tuari kwara gauna,
 bona Iuda be egu dagi toana auna.

⁸ To lau ese Moaba do lau abia,
 egu aena huria disi bamona,
 bona Edoma ena latanai egu tamaka do lau negea lao,
 lau ese lau biagua ena toana.
 Pilstia tano danu do lau abia,
 mai kwalimu ena boibo danu.”

⁹ To Dirava e,
 daika ese hanua mai maguna danu dekenai be lau do ia hakaua vareai?
 Daika ese Edoma dekenai lau do ia hakaua lao?

¹⁰ Dirava e,
 oi ese ai oi negea momokani vadaeni, a?
 Dirava e,
 aiema tuari taudia danu,
 idia durua totona do oi raka mai lou lasi, a?

¹¹ Dirava e, ai do oi durua,
 ai idia tuari henia taudia be ai ese do ai halusia totona,
 badina be taunimanima edia durua be anina lasi.

¹² Bema Dirava be iseda kahana dekenai ia noho neganai,
 ita be do ita kwalimu.
 Dirava ese ita dekenai idia tuari henia taudia do ia halusia.

61

David a ese Dirava ia noia do ia gimai a

¹ Dirava e,
 egu taitai do oi kamona.
 Egu guriguri mani do oi abia dae.

² Egu kudouna ena goada ia ore,

bona lau be egu gabu korikori dekena amo daudau lau noho.

Unai dainai oi dekenai lau boiboi noho inai!

Mani emu kara, heau mauri gabu namona,
egu goada ia hereaia Nadi Badana dekenai,
lau do oi hakaua lao.

³Badina Lohiabada e,
oi be egu heau mauri gabuna.

Oi be lauegu kohoro,
bona oi ese lau idia hadikaia gwauraia taudia oi koua noho.

⁴Oiemu Ruma lalonai do lau noho ela bona hanaihanai.
Lohiabada e,

mani emu kara oiemu hanina edia henunai lau do oi hunia,
do lau mauri totona.

⁵Badina be Dirava e,
egu gwauhamata be oi ese oi kamoni vadaeni,
bona oi ese,

oiemu ladana idia matauraia taudia edia davana namona,
be lau dekenai oi henia vadaeni.

⁶Dirava e, king ena mauri lagani do oi halataia.

Iena mauri do oi hanamoa,
vadaeni lagani momo do ia mauri noho.

⁷Dirava e,
mani emu kara king ese,
oiemu vairana dekenai do ia lohia karaia noho.
Oi ese oiemu noho hanaihanai lalokauna,
bona oiemu momokani dekena amo, king do oi gimai noho.

⁸Unai dainai lau ese ane dekenai,
oiemu ladana do lau hanamoa,
bona dina ta ta ibounai,
egu gwauhamata gaudia oi dekenai, be do lau karaia momokani.

62

David a ese Dirava ia abidadama henia

¹Momokani, egu lauma ese,
Dirava sibona dekena amo laga-ani ia abia.
Egu hamauria dalana be Dirava sibona ese ia karaia noho.

²Ia sibona be egu Nadi Badana,
bona egu mauri davarua dalana.

Ia be egu kohoro,
bona lau be nega ta do lau mareremarere lasi.

³Umui ibounai ese tau tamona do umui heatu henia noho,
ela bona edena negai?

Ia be goada lasi, ia makohia vadaeni magu sibona bamona,
to umui ese umui heatu henia noho, a?

⁴Umui ura iena dagi dekena amo do umui doria diho, ani?
Bona umui ese hereva koikoi umui gwauraia noho,
badina hanamoa hereva ia dekenai umui gwauraia noho,
to emui kudouna lalonai umui hadikaia noho.

⁵Lau ese Dirava sibona lau abidadama henia noho.
Lau ese ia sibona mai abidadama danu lau naria noho,
ia ese lau do ia hanamoa totona.

⁶Dirava sibona be egu Nadi Badana,

bona egu mauri davaria dalana.
 Ia be egu kohoro,
 bona lau be nega ta do lau mareremarere lasi.
⁷ Egu mauri bona egu kwalimu,
 be Dirava sibona ese ia henia noho.
 Ia sibona be egu Nadi Badana momokani,
 bona egu mauri davaria dalana.

⁸ Taunimanima e,
 nega ibounai Dirava do umui abidadama henia.
 Emui kudouna edia ura gaudia,
 be ia dekenai do umui hamaoroa,
 badina Dirava be iseda heau mauri gabuna momokani.

⁹ Dagi maragi taudia be hahodi ta sibona bamona,
 ma dagi bada taudia be anina lasi.
 Metau tohoa sikele dekenai idia be metau lasi momokani.
 Edia metau,
 be hahodi tamona ena metau hegeregerena sibona.

¹⁰ Dagedage karadia dekenai do umui abidadama henia lasi.
 Henaoa kara danu dekenai do umui hekokoroku lasi.
 Bema emui kohu idia momo daekau lao neganai,
 do umui lalokau henidia lasi.

¹¹ Nega ta Dirava ia hereva vadaeni,
 bona nega rua be inai hereva lau kamoni vadaeni,
 gauna be inai:
 Dirava e,
 oi be mai siahu bada danu.

¹² Bona Dirava e,
 oi be mai oiemu lalokau momokani danu.
 Momokani oi ese,
 taunimanima ta ta edia gaukara, edia gaukara hegeregerena,
 edia davana do oi henia.

63

David a ena guriguri, ia ura Dirava be ia dekenai do ia noho

¹ Dirava e,
 oi be lauegu Dirava,
 lau ese oi lau tahua noho.
 Lauegu lauma ia ura bada oi dekenai ia noho.
 Egu tauanina be ia ura momokani oi dekenai ia noho,
 hegeregere tau ta tano kaukau dekenai ranu ia ura dikadika bamona.

² Lau ura oi do lau itaia, oiemu gabu helaga lalonai.
 Lau ura oi ese oiemu goada bona oiemu hairaina,
 be lau dekenai do oi hedinarai.

³ Badina be oiemu bogahisihisi bona oiemu lalokau ese,
 inai tanobada ena mauri idia hereaia.
 Unai dainai egu udu bibina ese oi do idia hanamo a bada.

⁴ Egu mauri dinadia ibounai lalonai oi do lau hanamo a.
 Egu imana do lau abia isi, bona oi dekenai do lau guriguri.

⁵ Egu lauma be do ia noho namo herea,
 hegeregere tau ta ese,

aniani namona ia ania murinai ia boga kunu bamona.
 Lau ese ane do lau abia,
 oi do lau hanamoa bada totona.
⁶ Lau be gedda dekenai lau hekure neganai,
 oi dekenai lau laloa noho.
 Hanuaboi lalonai lau ese oi sibona dekenai lau laloa,
⁷ badina oi ese lau oi durua vadaeni.
 Lau be oi kahirakahira lau noho,
 hegeregere kokoroku ena natuna ese,
 iena sinana ena hanina henunai ia noho bamona,
 bona ane lau abia, mai moale danu.
⁸ Lau ese oi lau dogoatao noho,
 bona oiemu imana idibana ese lau ia hagoadaia noho.
⁹ Tau haida ese lau idia alaia dalana idia tahua noho.
 Unai taudia be mase taudia edia gabu dekenai do idia diho lao.
¹⁰ Idia be tuari lalonai do idia mase,
 bona edia tauanina be uda sisia ese do idia ania.
¹¹ To lau, king, ese oi Dirava do lau moalelaia bada.
 Dirava ena ladana dekenai idia gwauhamata taudia ibounai,
 ese Lohiabada do idia hanamoa,
 to koikoi idia gwauraia taudia,
 be Dirava ese edia uduna do ia koua.

64

David a ese Dirava ia noia do ia gimaia

¹ Dirava e,
 lau be mai laloa hekwarahi danu.
 Egu noinoi mani do oi kamoni henia.
 Lau idia hadikaia gwauraia taudia dekenai lau gari noho.
 Egu mauri mani do oi gimaia.
² Kara dika taudia ese lau alaia totona dala idia tahua noho,
 be mani emu kara idia dekena amo lau do oi hunia.
³ Idia edia malana,
 be tuari kaia bamona idia segea noho,
 bona dagedage herevadia lau dekenai idia pidia,
 peva dekena amo diba do idia pidia bamona.
⁴ Idia ese hunia gabuna dekena amo,
 kerere lasi tauna idia pidia noho.
 Idia ese unai tau idia pidia haraga noho,
 tau ta ese do ia itaia lasi totona.
⁵ Idia edia ura dikadia karaia totona,
 idia sibodia ta ta dekenai idia goada henia noho.
 Edia tarapu do idia hunia daladia idia herevalaia hebou noho.
 Idia gwau, "Daika ese ita do ia itaia diba?"
⁶ Idia ese dika do idia karaia ena palani idia karaia noho,
 bona idia gwau,
 "Ita ese kerere karana namona momokani ena palani,
 be ita karaia vadaeni!"
 Momokani taunimanima edia lalona bona edia kudouna,
 be mai kerere ena aonega bada danu.

⁷ To Dirava ese iena diba dekena amo idia do ia pidia,
bona idia be bero do idia davarua haraga.

⁸ Badina be edia malana edia dika dainai,
idia sibodia ese edia dika do idia havaraia.
Bona do idia itadia taudia ibounai ese,
edia kwaradia do idia giroagiroa,
bona unai dika taudia do idia kirikirilaia.

⁹ Vadaeni taunimanima ibounai do idia gari,
bona Dirava ena kara do idia laloa,
ma idia ese Dirava ena gaukara do idia gwauraia hedinarai.

¹⁰ Kara maoromaoro taudia ese,
Lohiabada dainai do idia moale bada,
bona idia ese Lohiabada dekenai do idia heau mauri.
Kudoudia idia maoromaoro taudia ibounai ese,
Lohiabada do idia hanamoa bada.

65

Dirava ita hanamoa bona tanikiu henia

¹ Dirava e, Siona dekenai do ai lao,
ai ese oi do ai hanamoa,
bona aiemai gwauhamata edia anina oi dekenai do ai henia,

² badina be oi ese aiemai guriguri oi kamoni.
Taunimanima ibounai be oi dekenai do idia mai,
³ edia dika do oi gwauatao totona.

Aiemai kerere ese ai idia halusia neganai,
oi ese unai dika oi gwauatao noho.

⁴ Oi ese oi abia hidi taudia,
bona oi ese oiemu gabu helagana dekenai oi mailaidia taudia,
be idia moale bada.

Inai oiemu Ruma ena lalonai,
gau namodia momo idia noho.
Unai dainai oiemu Dubu Helaga ai noho neganai,
aiemai lalona idia namo momokani.

⁵ Dirava e,
oi sibona ese ai oi hamauria,
bona noho namona ai dekenai oi henia.
Oi ese aiemai guriguri oi kamoni henia vadaeni.
Hoa kara badadia oi ese oi karaia vadaeni,
ai do oi hamauria totona.
Taunimanima tanobada kahana kahana ibounai dekena amo,
ese oi dekenai idia abidadama.
Davara daudau herea idia hanaia gabudia taudia danu,
ese oi idia abidadama henia noho.

⁶ Oi ese oiemu goada dekena amo ororo, edia gabu dekenai oi haginia.
Oiemu sياهو bada oi hedinarai unai.

⁷ Oi ese davara bada ena dika bona hurehure bada,
be oi hamanadaia noho.
Taunimanima edia huanai tuari,
be oi ese oi hadokoa noho.

⁸ Unai dainai tanobada taudia ibounai ese,
oiemu hoa karadia dekenai idia gari.
Oiemu kara badadia dainai taunimanima ibounai,
dina daekau kahana dekena amo,

bona dina diho kahana dekena amo,
ese mai boiboi danu oi dekenai idia hanamoa,
mai edia moale bada herea.

⁹ Oi ese medu oi siaia noho.
Inai kara dekena amo oi hedinarai,
oi ese tanobada oi naria namonamo noho.
Oi ese tano oi hanamoa noho,
muramura namona ia dekenai oi atoa,
vadaeni aniani ia tubu namonamo noho.
Dirava e,
oi ese sinavai ibounai be ranu dekenai oi hahonua,
bona uma ena anina oi atoa noho.

¹⁰ Oi ese medu momo oi siaia diho,
ia ese idia geia hegaegae tanona ia hapariparia momokani,
vadaeni ranu be tano lalonai ia noho.
Oi ese medu dekena amo tano oi hamanokaia.
Unai dainai uma ena aniani avadia idia tubu namonamo diba.

¹¹ Oi ese aniani utua negana oi hanamoa noho,
anina momo idia haboua.
Oi lao gabudia ibounai dekenai aniani namona momo ia noho.

¹² Rei ia noho gabudia ibounai dekenai,
be mamoe bona boromakau momo idia noho,
bona ororo gabudia ibounai dekenai uma gabudia momo idia noho.

¹³ Rei gabudia dekenai mamoe momo idia noho,
bona koura gabudia dekenai uiti momo idia tubu noho.
Unuseni idia noho gaudia ibounai idia moale,
mai boiboi, bona mai ane danu.

66

Dirava hanamoa bona tanikiu henia ane ta

¹ Tanobada taudia ibounai,
Dirava dekenai do umui boiboi henia mai moale bada danu.

² Iena ladana hanamoa totona ane do umui abia,
ia dekenai hairai bona hanamoa do umui henia.

³ Dirava dekenai do umui gwau,
“Oiemu kara be mai gari danu gaudia.

Oiemu siahu ia bada herea dainai,
oi dekenai idia tuari henia taudia,
be oiemu vairana dekenai mai gari danu,
oiemu siahu henunai sibodia idia atoa.

⁴ Tanobada taudia ibounai ese oi dekenai idia tomadiho henia noho.
Oi hanamoa totona ane idia abia noho.
Oiemu ladana hanamoa totona ane idia abia noho.”

⁵ Umui mai,
Dirava ena kara do umui itaia.
Iena kara taunimanima edia huanai be mai garina karadia.

⁶ Davara be tano kaukauna dekenai ia halaoa.
Ma aiemai sene taudia ese aena dekena amo sinavai idia raka hanaia.
Unai Dirava ese ia karaia gaudia dainai ita moale bada noho.

⁷ Dirava ese iena siahu dekena amo do ia King hanaihanai.
Iena matana ese bese idauidau ibounai idia itaia noho.
Dirava e, oi dekenai idia dagedage taudia,
be do oi koua,

vadaeni do idia hekokoroku lasi.

⁸ Bese idauidau taudia e,
iseda Dirava do umui hanamoa.
Ane do umui abia goada,

Dirava umui hanamoa badabada, taunimanima do idia kamoni totona.

⁹ Ia ese iseda mauri ia naria vadaeni.
Ia ese iseda aena ia naria,
vadaeni ita moru lasi.

¹⁰ Dirava e,
oi ese ai oi tohoa vadaeni.
Siliva idia tohoa noho bamona,
be oi ese ai oi tohoa vadaeni.

¹¹ Tarapu dekena amo oi ese ai oi abia,
bona maduna metaudia aiemai dorudia dekenai oi atoa vadaeni.

¹² Ai dekenai idia tuari taudia,
be oi ese oi koua lasi dainai idia ese ai idia hadikaia.
Ai be lahi ai raka hanaia,
bona ranu danu,

to hari be mauri gabuna dekenai oi ese ai oi hakaua mai vadaeni.

¹³ Lau ese gabua boubou gaudia,
be oiemu Dubu Helaga lalonai do lau mailaia,
bona oi dekenai lau gwauhamata do lau henia gauna,
ena anina do lau karaia.

¹⁴ Hisihisi lau dekenai ia vara neganai,
gwauhamata oi dekenai lau gwauraia gauna,
be do lau karaia momokani.

¹⁵ Ubua gaudia namodia oi dekenai do lau henia,
boubou patana dekenai do idia gabudia ore totona.
Mamoe tau haida danu do lau gabua ore.
Boromakau tau bona nanigosi tau danu,
edia kwalahu be guba dekenai do ia daekau lao.

¹⁶ Dirava dekenai umui gari taudia ibounai e,
umui mai, umui kamoni.

Dirava ese lau dekenai ia karaia gaudia,
be umui dekenai do lau gwauraia hedinarai.

¹⁷ Lau ese Dirava dekenai lau boiboi henia,
bona ane dekena amo lau hanamoa bada.

¹⁸ Bema kara dika be egu kudouna dekenai lau hunia neganai,
Lohiabada ese egu noinoi do ia kamoni henia lasi.

¹⁹ To momokani Dirava ese ia kamoni vadaeni.
Ia ese egu noinoi hereva ia abia dae vadaeni.

²⁰ Dirava do lau hanamoa, badina egu noinoi ia negea lasi.
Iena noho hanaihanai lalokauna,
be lau dekena amo ia kokia lasi.

67

Dirava hanamoa ane ta

¹ Dirava e,
ai dekenai do oi bogahisihisi,
bona oi ese ai do oi hanamoa.
Mani ai dekenai do oi lalokauna,

bona ai do oi durua.

² Unai dekena amo tanobada taudia ibounai ese,
oiemu dala do idia diba,
bona oiemu hamauria kara,
be bese ibounai taudia danu do idia diba.

³ Dirava e,

lau ura bese ibounai ese oi do idia hanamoa.
Lau ura bese idauidau ese oiemu ladana do idia abia isi.

⁴ Bese idauidau taudia ibounai ese,
mai moale danu ane idia abia be namo.
Badina be oi ese tanobada taudia oi kota henia noho,
mai maoromaoro bona momokani danu,
bona bese ibounai be oi ese oi hakaua noho.

⁵ Dirava e, lau ura bese ibounai ese oi do idia hanamoa,
bona oiemu ladana idia abia isi.

⁶ Tano ena anina idia vara namonamo, badina be,
Dirava, iseda Dirava ese ita ia hanamoa vadaeni.

⁷ Momokani, Dirava ese ita ia hanamoa vadaeni.
Tanobada taudia ibounai ese,
Dirava do idia matauraia be namo.

68

Dirava be tuari dekenai ia kwalimu

¹ Dirava be do ia toresi,
ia dekenai idia tuari henia gwauraia taudia do ia lulua ore.

Dirava dekenai idia dagedage taudia,
be iena vairana dekena amo do idia heau.

² Lai ese kwalahu ia hodaia ore hegeregereana,
unai bamona danu Dirava ese idia do ia hodaia ore.
Kandolo be lahi ena vairanai ia veve ore bamona,
kara dika taudia be unai bamona do idia mase,
Dirava ena vairana dekenai,

³ to kara maoromaoro taudia be do idia moale,
Dirava ena vairana dekenai do idia moale bada.
Mai boiboio danu edia moale do idia hedinarai.

⁴ Dirava dekenai ane do umui abia,
iena ladana be ane dekenai do umui hanamoa.

Ori dekenai ia guia noho Diravana,
be ane dekenai do umui hanamoa bada.

Iena ladana be Lohiabada,
bona iena vairana dekenai do umui moale.

⁵ Dirava, iena noho gabuna helagana dekenai ia noho Diravana,
ese ogoami taudia ia naria noho,

bona vabu taudia danu ia gimaia noho.

⁶ Dirava ese mai edia turana lasi taudia dekenai,
bese taudia ia henidia,

bona dibura ruma noho taudia,
be dibura dekena amo ia kokia ruhaia,
mauri namona idia dekenai ia henia noho.
To ia dekenai idia dagedage taudia,
be tano kaukau dekenai do idia noho.

⁷ Dirava e, oiemu bese taudia oi hakaudia neganai,
oi ese taunimanima noho lasi tano oi raka hanaia neganai,

⁸ tano be ia mareremarere,
bona guba ese medu bada ia siaia diho,
Sinai Ororo ena Dirava ia mai noho dainai,
Israela ena Dirava ia mai noho dainai.

⁹ Dirava e, momokani oi ese medu bada herea oi siaia diho,
bona oiemu tano kaukau oi hanamoa lou.

¹⁰ Vadaeni oiemu bese taudia be unai tano dekenai,
edia noho gabuna idia davarua,
bona oiemu hariharibada dainai,
ogogami taudia dekenai aniani bona gau oi henidia.

¹¹ Lohiabada ese iena oda ia gwauraia,

vadaeni taunimanima momo ese,
unai hereva idia gwauraia hedinarai, idia gwau,

¹² “King taudia bona edia tuari taudia idia heau lao noho!”

Ruma dekenai idia noho hahine ese,
edia bese tuari taudia ese idia abia kohu idia haria.

¹³ Pune manu laulau gaudia,
edia hanina be siliva dekena amo idia koua,
bona pune manu hanina edia huina be golo namo herea,
ia diaridiari gauna,
dekena amo idia koua.

To umui haida, badina dahaka tuari dinana dekenai,
mamoe edia magu murinai umui hunia?

¹⁴ Sياهو Ibounai Dirava ese,
Salamona Ororo dekenai king taudia ia lulua lao ore neganai,
ia ese sinou unuseni ia siaia diho.

¹⁵ Basana Ororo be ororo badana momokani.

Basana Ororo be mai ena dorina momo.

¹⁶ Dorina momo ena ororo e,
badina dahaka mai mama danu,
Dirava ia ura do ia noholaia Ororo umui itaia noho?
Lohiabada be unuseni do ia noho ela bona hanaihanai.

¹⁷ Lohiabada be Sinai Ororo dekena amo,
iena helaga gabuna dekenai ia mai,
mai ena kariota goadadia momo herea danu.

¹⁸ Iena ororo badadia dekenai ia daekau lao,
bona ia ese ia abia mauri tuari taudia momo ia hakaudia daekau.
Dagedage taudia momo dekena amo harihari gaudia ia abia noho.
Unai ororo dekenai Lohiabada Dirava be do ia noho.

¹⁹ Lohiabada do ita hanamoa.
Ia ese dina ibounai iseda maduna metaudia ia huaia noho.
Ia ese ita ia hamauria noho.

²⁰ Iseda Dirava be taunimanima ia hamauria Diravana.
Ia be Lohiabada, iseda Dirava,
bona ia ese mase dekena amo ita ia hamauria noho.

²¹ Dirava ese ia dekenai idia dagedage taudia,
edia kwaradia do ia hamakohia.
Edia kara dika daladia idia karaia noho taudia,
be Dirava ese edia kwaradia,

mai huida bada danu do ia hamakohia momokani.

²² Lohiabada ia hereva vadaeni, ia gwau,

“Oi dekenai idia tuari henia taudia,

be Basana dekena amo do lau mailaidia lou.

Davara dobu gabudia dekena amo do lau mailaidia lou.

²³ Vadaeni emui aedia be rara dekena amo do umui hadigua,

bona emui sisia ese edia maladia dekena amo,

umui idia tuari henia taudia edia rarana do idia ania.

²⁴ Dirava e,

mai oiemu hairaina danu oi raka hanaia noho,

be ibounai ese oi idia itaia.

Egu Dirava, egu King, mai ena orea,

be gabu helagana dekenai idia raka vareai noho,

mai edia hairaina danu.

²⁵ Ane idia abia taudia be orea ena vairana dekenai idia raka noho.

Idia edia murinai be miusiki idia gadaralaia noho taudia.

Bona idia edia huanai,

be kekeni ese tareko idia botai noho.

²⁶ Iena bese taudia edia hebou badana lalonai,

Dirava do ita hanamoa.

Israela besena taudia ibounai e,

Lohiabada do umui hanamoa.

²⁷ Beniamina iduhu,

iduhu maragina momokani,

ese idia ia gunalaia.

Idia edia murinai be Iuda iduhu lohia taudia,

mai edia orea taudia momo herea.

Idia edia murinai be Sebuluno bona Napatali edia lohia taudia.

²⁸ Dirava e, oiemu siah do oi hedinarai.

Oiemu goada be ai dekenai do oi hedinarai,

gunaguna ai durua totona oi hedinarai goada bamona.

²⁹ Vadaeni oiemu Dubu Helaga Ierusalem dekenai dainai,

king taudia ese harihari gaudia oi dekenai do idia mailaia.

³⁰ Aigupito, unai siriho dekenai ia noho uda boroma,

be do oi gwau henia.

Bese idauidau, unai boromakau tau oreadia,

mai edia boromakau natudia danu do oi gwau henia,

ela bona oi dekenai do idia tomadiho henia,

bona edia siliya be oi dekenai do idia henia.

Tuari dekenai idia moale bada bese taudia,

be do oi lulua lao ore.

³¹ King taudia ese oi dekenai harihari gaudia do idia henia.

Aigupito dekena amo auri laboralabora do idia mailaia.

Etiopia taudia ese imadia do idia abia isi,

bona Dirava dekenai do idia guriguri.

³² Tanobada basileia ibounai e,

Dirava hanamoa totona ane do umui abia.

Lohiabada dekenai hanamoa ane do umui abia.

³³ Badina ia be guba dekenai ia guia loaloa noho,

gunaguna momokani ia noho guba be unai.

Do umui kamoni,

Dirava ena gadona be guba dekena amo ia boiboi noho.

34 Taunimanima ibounai e,
 Dirava ena King siahuna do umui gwauraia.
 Ia be Israela ena King,
 mai ena siahu danu.
 Iena siahu danu be guba edia lalonai.
 35 Dirava be iena helaga gabuna lalonai.
 Ita ese ia dekenai ita gari bona matauraia be namo.
 Ia be Israela ena Dirava.
 Ia ese siahu bona goada,
 iena bese taudia dekenai ia henia noho.
 Dirava do ita hanamoa!

69

David a ese Dirava dekenai ia noinoi, do ia durua totona

1 Dirava e, lau do oi veria mauri,
 badina abata be ia daekau,
 ia mai bona egu aiona dekenai.
 2 Lau be lau diho lao kopukopu lalonai,
 bona egu aena be gini gabuna ta lasi.
 Lau be ranu dobu lalonai lau noho,
 bona abata ese kahirakahira lau idia maloa.
 3 Lau be lau tai dikadika,
 bona egu gadona be ia kaukau noho.
 Lauegu matana idia hisihisi bada,
 oi dekenai lau tahua noho dainai.
 4 Lau dekenai idia badu henia kava taudia be momo herea.
 Edia namba be,
 egu kwarana ena huina edia namba idia hanaia.
 Lau idia dagedage henia taudia,
 ese hereva koikoi dekenai lau idia hadikaia noho.
 Inai taudia be goada herea,
 bona idia ura lau idia alaia mase.
 Lau ese idia dekena amo gau ta lau henaoa lasi,
 to idia ese lau idia samania goada dainai,
 lau ese egu gau korikori haida idia dekenai lau henia.
 5 Dirava e, egu kara dika be oi dekena amo lau hunia diba lasi,
 bona egu kavakava ibounai, be oi diba vadaeni.
 6 Lohiabada e, oi be Siahu Ibounai Diravana.
 Mani lau do oi durua,
 vadaeni oi dekenai idia abidadama taudia,
 be do idia hemarai lasi lau totona.
 Israela ena Dirava e, lau do oi durua,
 vadaeni kara dikana ta do lau karaia lasi.
 Vadaeni tau dikadia ese, oi dekenai idia tomadiho taudia,
 be do idia hadikaia lasi hereva dika dekena amo.
 7 Lau ese oi lau badinaia dainai,
 haida ese lau dekenai idia hereva dika,
 bona hemarai ese egu vairana ia koua noho.
 8 Lauegu tadikaka dekenai lau be idau tauna bamona,
 bona egu famili dekenai,
 lau be gabu daudau dekena amo lau mai tauna bamona.
 9 Oiemu Dubu Helaga lau ura henia dikadika,
 bona inai ura ese lahi bamona lau ia gabua noho,

bona haida ese oi dekenai idia hereva dika neganai,
inai hereva ese lau ia hadikaia noho.

¹⁰ Lau be lau aniani lasi,
oiemu vairana dekenai do lau manau totona,
to taunimanima be lau dekenai idia hereva dika noho.

¹¹ Lau ese mase ena lalohisihisi dabua lau atoa,
to taunimanima ese lau idia kirikirilaia noho.

¹² Hanua ena ariara dekenai idia haboua,
bona lau idia herevalaia dika noho.
Inua kekero taudia ese,
edia ane dekenai lau idia herevalaia noho.

¹³ To Lohiabada e,
lau be oi dekenai do lau guriguri noho.

Dirava e,
oiemu nega namona dekenai lau do oi haere henia.
Oiemu lalokau bona bogahisihisi bada dainai,
lau dekenai do oi haere,
badina be oi ese oi gwauhamata vadaeni lau do oi hamauria,
bona oi be oi koikoi diba lasi, lasi momokani.

¹⁴ Kopukopu dekena amo lau do oi veria mauri.
Lau idia dagedage henia taudia,
dekena amo lau do oi hamauria,
bona ranu dobu dekena amo danu.

¹⁵ Lau do oi durua,
abata ese lau do ia maloa lasi.
Lau do oi durua,
ranu dobu lalonai do lau mase lasi,
o guria gabuna dekenai do lau diho lasi.

¹⁶ Lohiabada e,
lau dekenai do oi haere,
badina be oiemu noho hanaihanai lalokauna be ia namo herea.
Oiemu bogahisihisi bada herea dainai, lau do oi durua.

¹⁷ Lau be oiemu hesiai tauna, unai dainai oiemu vairana,
be lau dekena amo do oi hunia lasi.
Lauegu hisihisi be bada herea,
unai dainai lau dekenai do oi haere haraga.

¹⁸ Lau kahirakahira do oi mai, bona lau do oi hamauria.
Lau dekenai idia dagedage taudia dekena amo lau do oi hamauria.

¹⁹ Oi diba vadaeni,
taunimanima ese lau dekenai idia hereva dika noho,
bona oi diba danu lauegu hemarai,
bona unai taudia edia hereva koikoi dekena amo,
idia ese egu ladana idia hadikaia noho.
Lau dekenai idia badu taudia ibounai be oi ese oi itaia noho.

²⁰ Inai hereva dika ese egu kudouna idia makohia vadaeni,
bona durua ta be lasi dainai lauegu laloka ia ore.
Taunimanima edia bogahisihisi be lau tahua, to ta lasi.
Hereva namona lau do idia henia taudia lau tahua,
to ta lau davaria lasi.

²¹ Lau be hitolo neganai,
mase havaraia muramura lau dekenai idia henia.
Lau ranu mase neganai,
vinega sibona lau dekenai idia henia.

22 Vadaeni, gabeai aniani bada ena aria do idia karaia neganai,
 lau ura inai aria ese idia do ia hadikaia ore.
 Bona aria helagana idia karaia neganai,
 lau ura inai kara ese,
 idia do ia hamorua momokani.

23 Edia matana do oi hakepulua!

Edia doruna danu do oi hamanokaia hanaihanai.

24 Idia dekenai do oi badu!

Oiemu badu mai siahu danu idia edia latanai do oi hadihoia,
 vadaeni dika do idia davaria.

25 Edia kamepa do oi hadikaia,

vadaeni edia palai rumadia lalonai,

tau ta do ia noho lasi.

26 Badina be oi ese oi panisia vadaeni tauna,

be idia ese ma idia dagedage henia noho.

Bona oi ese oi haberoa tauna,

be idia ese ma idia hisihisi henia noho.

27 Unai taudia edia kara dika do oi laloa boio lasi,

bona oiemu hamauria idia dekenai do oi henia lasi.

28 Edia ladana be mauri taudia edia buka,

dekena amo do oi kokia,

bona edia ladana be,

kara maoromaoro taudia edia ladana danu do oi haboua lasi.

29 Lau be mai hisihisi bada bona durua ta lasi,

unai dainai egu laloa ia ore.

Dirava e, lau ura oi ese lau do oi abia isi,

bona lau do oi hamauria.

30 Lau ese ane dekena amo Dirava do lau hanamoa.

Dirava ena ladana do lau habadaia,

bona ia do lau tanikiu henia.

31 Inai kara ese Lohiabada do ia hamoalea bada,

to boromakau boubouna ese Lohiabada do ia hamoalea maragi.

Boromakau tau mai ena doana bona mai ena aena,

unai boubou ese Lohiabada do ia hamoalea sisina sibona.

32 Inai kara be ogogami taudia do idia itaia neganai,

do idia moale.

Dirava ena dala idia tahua noho taudia ibounai ese,

goada matamata do idia davaria.

33 Badina be Lohiabada ese,

gau lasi taudia edia noinoi ia kamonai henia noho,

bona dibura ruma lalonai idia noho taudia,

be ia laloaboio lasi.

34 Guba bona tanobada e, Lohiabada do umui hanamoa.

Davara, bona davara dekenai idia noho mauri gaudia ibounai e,

Dirava do umui hanamoa.

35 Badina be Dirava ese Siona do ia hamauria,

bona ia ese Iuda ena hanua ibounai do ia haginia lou.

Lohiabada ena bese taudia,

be unai gabudia dekenai do idia noho,

bona unai tano ibounai do idia abia, edia tano.

36 Dirava ena hesiai taudia edia natudia bona tubudia,

be unai tano do idia abia,

bona Lohiabada ena ladana idia lalokau henia taudia,

be unai tano dekenai do idia noho.

70

David a ese durua totona Dirava ia noia

¹ Dirava e, mani lau do oi hamauria.

Lohiabada e, lau do oi durua haraga.

² Egu mauri hadokoa dalana idia tahua noho taudia dekenai, hemarai bona daradara do oi havaraia.

Idia ura lau idia hadikaia ore gwauraia taudia,

be do oi siaidia lou mai hemarai bada danu.

³ Lau idia hereva dika henia noho taudia idia gwau,

“Aha, aha,”

Unai taudia be do oi halusidia,

mai hemarai bada danu.

⁴ To oi idia tahua noho taudia ibounai, be do oi durua,

vadaeni oi dainai do idia moale bada noho.

Bona oi ese mauri oi henidia dainai idia tanikiu noho taudia, do oi durua,

vadaeni nega ibounai inai bamona do idia gwau,

“Dirava be ia bada momokani!”

⁵ To lau be lau ogogami noho,

bona mai egu gau ta lasi danu.

Dirava e, lau dekenai do oi mai haraga.

Oi be lauegu durua Tauna,

bona egu hamauria Tauna danu.

Lohiabada e, lau durua totona do oi mai haraga.

71

Tau burukana ta ena guriguri

¹ Lohiabada e, oi sibona lau abidadama henia noho.

Lau do oi durua,

vadaeni nega ta hemarai ese lau do ia abia lasi.

² Oi be maoromaoro momokani dainai,

oi ese lau do oi durua bona lau do oi hamauria.

Lau dekenai do oi kamona,

bona lau do oi hamauria.

³ Lau ura oi be egu heau mauri Nadi Badana.

Lau ura oi be egu kohoro aukana,

vadaeni nega ibounai oi dekenai do lau lao,

lau do oi hamauria totona.

Badina oi be egu Nadi Badana bona gabu aukana,

bona oi ese lau oi gimaia noho.

⁴ Egu Dirava e,

kara dika taudia dekena amo lau do oi hamauria.

Kara gagevageva, bona dagedage taudia, edia sياهو dekena amo,

lau do oi hamauria.

⁵ Badina be, Lohiabada Dirava e,

oi be egu mauri namona abia dalana.

Lohiabada e, egu uhau dinadia ia mai bona hari,

lau ese oi lau abidadama henia vadaeni.

⁶ Egu vara dinana dekena amo,

oi ese lau oi naria noho vadaeni.

Egu sinana ena bogana lau rakatania neganai ia mai bona hari,
oi ese lau oi gimaia vadaeni.

Lau ese nega ibounai oi do lau hanamoa noho.

⁷ Oi ese lau oi gimaia vadaeni dainai,
egu mauri ena kara ese,
taunimanima momo, be dala maoromaoro dekenai ia hakaudia
vadaeni.

⁸ Dina ena nega ibounai, lau ese oi lau hanamoa noho.
Oiemu hairaina lau gwauraia hedinarai noho.

⁹ Laegu buruka dinadia neganai lau do oi rakatania lasi.

Egu goada be ia ore lao neganai,
lau dekena amo do oi siri lasi.

¹⁰ Lau idia hadikaia gwauraia taudia ese,
lau idia alaia dalana idia tahua noho.
Idia haboua noho,

bona lau do idia alaia dalana idia herevalaia noho.

¹¹ Idia gwau, "Dirava ese inai tau ia rakatania vadaeni.

Do ita lulua, do ita dogoatao,
badina be tau ta ese ia do ia hamauria lasi."

¹² Dirava e, lau dekena amo do oi noho daudau lasi.
Egu Dirava e,

lau do oi durua haraga.

¹³ Lau idia heatu henia taudia,
be do oi halusia bona hadikaia ore.

Lau idia hadikaia gwauraia taudia be do oi hahemaraia momokani.

¹⁴ To lau ese oiemu durua lau naria noho,
mai egu abidadama danu.

Bona oi do lau hanamoa noho,
bona inai hanamoa ma do lau habadaia.

¹⁵ Egu uduna ese oiemu kara maoromaoro do ia herevalaia,
bona oiemu hamauria kara danu,
be nega ibounai do lau gwauraia hedinarai.

To emu namo edia bada lau diba lasi,
idia be duahia diba lasi.

¹⁶ Dirava Lohiabada e, oiemu sياهو karadia do lau hanamoa.
Oiemu kara maoromaoro,

bona oi sibona oi karaia kara namodia, do lau gwauraia.

¹⁷ Dirava e, lau be mero negana dekena amo,
oi ese lau oi hadibaia vadaeni,

bona unai negana ia mai bona hari,
lau ese oiemu hoa karadia lau gwauraia vadaeni,
bona do lau gwauraia noho.

¹⁸ Momokani hari lau be buruka,
bona egu huina idia kurokuro vadaeni.

To Dirava e, lau do oi rakatania lasi.

Lau ese oiemu sياهو lau herevalaia noho neganai,
lau dekenai do oi noho,
bona oiemu goada be gabeai do idia vara besedia,
dekenai do lau gwauraia hedinarai.

¹⁹ Dirava e,

oiemu kara maoromaoro be idia daekau lao ela bona guba dekenai.

Oi ese kara badadia oi karaia vadaeni.

Tau ta oi hegeregerena ia noho lasi.

²⁰ Oi ese hisihisi dikadia bona laloa hekwarahi dekena amo, lau oi hisihisi henia vadaeni, to oi ese goada be lau dekenai do oi henia lou.

Oi ese mase ena guri dekena amo lau do oi hamauria.

²¹ Oi ese egu ladana do oi habadaia momokani, guna bamona lasi, bona egu lalona do oi hagoadaia lou.

²² Lau ese gita badana dekena amo, oi do lau hanamoa.

Dirava e,

oiemu maoromaoro bona oiemu momokani do lau hanamoa.

Israela ena Helaga Diravana e,

gita badana dekena amo oi do lau hanamoa.

²³ Oi do lau hanamoa totona ane lau abia neganai, mai moale danu do lau boiboi.

Mai egu laumana bona kudouna ibounai danu,

guriguri ane do lau abia,

oi ese lau oi hamauria dainai.

²⁴ Dina ena nega ibounai,

egu malana ese oiemu kara maoromaoro do ia herevalaia,

badina be lau idia hadikaia dalana idia tahua taudia,

be oi ese idia dekenai hemarai bona daradara oi havaraia vadaeni.

72

David a ese Dirava ia noia, king Solomona do ia durua

¹ Dirava e, mani emu kara,

king dekenai oiemu kara maoromaoro do oi hadibaia,

vadaeni ia ese taunimanima ia kota henia neganai,

mai maoromaoro bona momokani danu do ia karaia.

² Bona do oi durua,

ia ese oiemu bese taudia do ia biagua mai ena maoromaoro danu.

Ia ese oiemu taudia, hisihisi idia abia noho taudia danu,

be do ia naridia, mai ena momokani danu.

³ Tano do oi hanamoa,

vadaeni taunimanima do idia noho namo,

edia gaukara ena anina do idia abia.

Kara maoromaoro danu,

be taunimanima edia lalona dekenai do oi havaraia.

⁴ King do oi durua, ia ese,

ogogami taudia maka tamona dekenai do ia kota henidia,

bona ia ese gau lasi taudia edia natudia do ia durua.

Ma haida idia dagedage henidia taudia,

be king ese idia do ia atoa diho.

⁵ Lau ura oiemu bese taudia,

be oi dekenai do idia tomadiho nega ibounai.

Dina bona hua idia do diari noho negadia ibounai,

oiemu bese oi dekenai do idia tomadiho.

⁶ Oi ese king do oi durua,

vadaeni ia be tau namona do ia lao.
Iena kara be medu bamona,
uma dekenai ia diho, bona aniani ia tubu namo herea.

⁷ Lau ura king ena mauri dinadia ibounai lalonai,
iena bese taudia ese kara maoromaoro do idia karaia,
bona edia noho be namo,
bona edia gaukara ena anina do idia abia,
hua ese iena diari ia henia dinadia ibounai.

⁸ King ena basileia be mani do ia bada,
davara ta dekenai amo ela bona ma davara ta,
Euperate Sinavai dekenai amo ela bona tanobada ena dokona dekenai.

⁹ Etiopia taudia ese king ena vairanai do idia tui diho,
bona king dekenai idia dagedage taudia ese,
iena vairanai do idia moru diho,
edia kwaradia be tano dekenai do idia atoa.

¹⁰ Tarasisi ena king, bona motumotu edia king ese,
edia harihari gaudia be ia dekenai do idia mailaia.
Sieba bona Seba edia king danu ese,
edia takisi moni do idia mailaia ia dekenai.

¹¹ King ibounai be iena vairanai do idia tui diho,
bona bese ibounai taudia ese,
iena hesiai gaukara do idia karaia.

¹² Ogogami taudia be ia dekenai idia boiboi neganai,
ia ese do ia durua.
Edia gau be lasi, bona edia durua be lasi taudia,
be king ese do ia hamauria.

¹³ Ia ese manoka taudia,
bona ogogami taudia dekenai do ia bogahisihisi,
bona gau lasi taudia be mase dekenai amo,
ia ese do ia hamauria.

¹⁴ Bema unai ogogami taudia,
be haida ese idia dagedage henia neganai,
king ese unai ogogami taudia do ia hamauria.
Ia ese edia mauri do ia naria namonamo noho,
badina edia mauri be gau namo herea ia dekenai.

¹⁵ King ena mauri do ia daudau be namo!
Sieba ena golo be king dekenai idia henia be namo.
Namona be iena bese taudia ese,
king dainai Dirava do idia noia,
vadaeni Dirava ese king do ia durua,
bona do ia hanamo, nega ibounai.

¹⁶ Namona be koni momo herea,
be tano dekenai do ia vara namonamo.
Namona be ororo gabudia danu dekenai,
uiti bona aniani avadia do idia tubu namonamo,
Lebanona dekenai idia tubu namonamo bamona.
Namona be hanua ibounai dekenai taunimanima momo do idia noho,
uma tano dekenai rei momo idia noho bamona.

¹⁷ Lau ura king ena ladana do idia laloaboio lasi.
Lau ura iena sivarai be do ia noho daudau,
dina do ia noho daudau bamona.

Ia dainai bese idauidau ibounai ese hanamoa do idia davaria,
 bona idia ese Dirava do idia noia,
 ia ese idia do ia hanamoa,
 king ia hanamoa hegeregerena.

¹⁸ Lohiabada, Israela ena Dirava, do ita hanamoa.

Ia sibona ese hoa karadia ia karaia noho.

¹⁹ Lohiabada ena ladana namo herea do ita hanamoa hanaihanai.

Iena hairai namona ese tanobada ibounai do ia hahonua.

Amen bona Amen.

²⁰ Davida Iese ena guriguri be iniseni ia doko.

73

Dirava ese tau dikadia edia kerere davana do ia henia

¹ Momokani, Dirava ena kara be namo, Israela taudia dekenai.

Edia lalona idia goevagoeva taudia dekenai,

Dirava ena kara be namo.

² To egu aena be kahirakahira ia dedi.

Lauegu kamoni be ia manoka lao,

bona egu abidadama be kahirakahira ia ore.

³ Badina be lau itaia,

tau dikadia ese moni bona kohu momo idia abia,

bona hekokoroku taudia idia kwalimu,

vadaeni lau mama henidia.

⁴ Idia be mai edia hisihisi lasi,

bona edia tauanina be goada, bona mai edia dika ta lasi.

⁵ Idia be hisihisi lasi, haida bamona lasi,

bona gorere idia davaria lasi,

taunimanima haida idia davaria bamona.

⁶ Unai dainai hekokoroku idia atoa,

ageva idia atoa bamona,

bona dagedage idia karaia noho,

dabua idia karaia bamona.

⁷ Edia kudouna bona edia laloa dekena amo,

dika idia havaraia noho,

edia ura dikadia dainai.

⁸ Idia ese tau haida idia kirikirilaia mai hevaseha danu,

badu herevadia danu idia gwauraia noho.

Idia be hekokoroku,

bona dala idia tahua noho,

tau haida do idia hadikaia totona.

⁹ Idia ese guba dekenai ia noho Dirava idia hereva dika henia.

Mai hekokoroku danu,

idia ese taunimanima idia oda henidia.

¹⁰ Unai dainai Dirava ena taudia haida ese,

idia dekenai idia kamoni henia,

bona edia hereva kerere idia abidadama henia.

¹¹ Unai tau dikadia be inai bamona idia hereva, idia gwau,

“Dirava be edena bamona do ia diba?

Siahu Ibounai Diravana dekenai be aonega ia noho, a?”

¹² Tau dikadia edia kara be unai bamona.

Idia be mai edia kohu momo,

bona nega ibounai kohu ma haida idia abia noho.

13 Lau ese lau kara kava, a?

Nega ibounai lauegu lalona lau hagoevaia,
bona kara dika ta lau karaia lasi.

Inai kara dekena amo namo ta lau davaria, a?

14 Badina be dina ibounai lau hisihisi noho,
bona daba ibounai, matakani lau davaria noho.

15 Bema lau ese,

tau dikadia edia hereva bamona hereva lau gwauraia neganai,
lau ese oiemu taudia edia mauri do lau hadikaia,

bona edia laloe do lau hakererea.

16 Lau ese unai tau dikadia edia kara bona kwalimu,
dekenai lau laloe momo,

to ia auka dainai,

lau be hegeregere lasi laloe maoro do lau davaria,

17 ela bona Dirava ena Dubu Helaga dekenai lau vareai lao.

Unai neganai tau dikadia edia dokona lau diba.

18 Momokani oi ese dedidedi gabudia dekenai idia do oi atoa,
bona mase gabuna dekenai idia do oi hamorua.

19 Oi ese do oi hamasedia haraga,

bona inai mase be do ia dika momokani.

20 Idia be hegeregere tau ta ia nihi,

bona dabai ia noga neganai nihi be ia ore kava.

Lohiabada e, do oi toreisi neganai,

unai taudia be do idia boio momokani.

21 Lohiabada e, lauegu laloe be dika momokani neganai,

bona lalohisihisi ena mamina lau abia momokani neganai,

22 lauegu laloe be kavakava,

boroma edia laloe bamona oiemu vairana dekenai,

bona oiemu dala ena diba lau davaria diba lasi.

23 To lau be nega ibounai oi kahirakahira lau noho,
bona oi ese egu imana oi dogoatao noho.

24 Oi ese oiemu sisiba dekena amo lau oi hakaua noho.

Dokona neganai oi ese lau do oi abia dae,

guba ena hairai dekenai.

25 Guba dekenai dahaka do lau davaria?

Oi sibona, ani?

Unai dainai tanobada dekenai,

gau ta lau ura henia lasi, oi sibona.

26 Egu tauanina bona egu lalona be sedira do idia manoka,

to Dirava be lauegu goada.

Bema Dirava be lau dekenai ia noho neganai,

lau be hegeregere momokani ela bona hanaihanai.

27 Dirava e, oi idia rakatania taudia,

be momokani do idia mase ore.

Bona oi dekenai idia abidadama,

to edia abidadama idia rakatania taudia, be oi ese do oi hamasedia.

28 To lau be Dirava badibadinai lau noho.

Inai be namo herea momokani.

Siahu Ibounai Lohiabada e,

oi be lauegu magu momokani.

Hari lau ura oiemu kara ibounai do lau gwauraia hedinarai.

74

Idau bese taudia ese Israela idia hadikaia dainai, Dirava dekenai tau ta ia noinoi

¹ Dirava e,
badina dahaka oi ese inai bamona ai oi rakatania vadaeni?
Oi ese oiemu bese taudia do oi badu henia noho,
ela bona edena negai?

² Oiemu orea, idaunegai oi abia hidi,
oi sibona oiemu bese,
be mani do oi laloatao.
Oi ese hesiai mai guia danu dekena amo inai bese oi hamauria,
oiemu bese korikori do oi halaoa totona.
Siona Ororo, guna oi noho gabuna, mani do oi lalao.

³ Ai idia tuari henia taudia ese,
idia hadikaia ore vadaeni gaudia be do oi raka hanaia.
Idia ese Dubu Helaga lalonai idia noho kohu ibounai,
be idia hadikaia ore.

⁴ Oi dekenai idia tuari henia taudia ese,
oiemu Dubu Helaga lalonai idia boiboio bada vadaeni,
idia kwalimu dainai.
Idia edia pepe be Dubu Helaga lalonai idia atoa,
edia kwalimu toana.

⁵ Idia edia kara be au utua taudia bamona,
edia ira dekena amo au idia utua diho bamona.

⁶ Idia ese Dubu Helaga ena au namodia,
koroa vadaeni gaudia,
be edia ira bona hama dekena amo idia hamakohia.

⁷ Oiemu Dubu Helaga idia hadikaia,
bona idia gabua ore.
Oiemu ladana ia noho gabuna be idia hamiroa vadaeni.

⁸ Idia ese sibodia ta ta dekenai idia hereva, idia gwau,
“Ita ese idia do ita halusia momokani.”
Idia ese Dirava ena helaga gabudia ibounai idia gabua ore,
tano ena kahana ibounai dekenai.

⁹ Aiemaia toa helagadia be idia boio vadaeni.
Aiemaia peroveta tauna ta be lasi,
bona inai nega dika ena daudau be tau ta ia diba lasi.

¹⁰ Dirava e, oi dekenai idia tuari henia taudia ese,
oi dekenai do idia kirikiri ela bona edena negai?
Idia ese oiemu ladana do idia hadikaia hanaihanai, a?

¹¹ Badina dahaka ai durua totona kara ta oi karaia lasi?
Badina dahaka oiemu imana,
be oiemu dabua lalonai oi hunia noho?

¹² To Dirava e, idaunegai ia mai bona hari oi be aiemaia King.
Oi ese nega momo ai oi hamauria vadaeni.

¹³ Oiemu sياهو bona goada dekena amo davara oi hapararaia,
bona davara ena gwarume badadia momokani edia kwaradia,
be oi ese oi hamakohia.

¹⁴ Oi ese unai huala badana,
ladana Leviatano ena kwarana momo oi hamakohia,
bona iena tauanina,

be tano kaukau idia noho taudia dekenai oi henia, edia aniani.

¹⁵ Oi ese tano oi hapararaia,
ranu do ia lohiloahi, bona do ia heau lao totona,
bona nega daudau idia heau vadaeni sinavai,
be oi ese oi hakaukaua.

¹⁶ Oi ese dina bona hanuaboi oi karaia.

Oi ese dina bona hua,
be edia gabu dekenai oi atodia.

¹⁷ Oi ese tano edia hetoa ibounai oi karaia.
Oi ese lahara ena nega, bona laurabada ena nega danu oi karaia.

¹⁸ To Lohiabada e, oi dekenai idia tuari noho taudia ese,
oi dekenai idia kirikiri be mani do oi lalao.

Oi dekenai idia gari lasi bese taudia ese,
oitemu ladana idia hadikaia noho.

¹⁹ Mani emu kara, oitemu bese taudia do oi rakatania lasi.

Dagedage taudia ese ai idia hadikaia noho,
be do oi laloaboio lasi.

²⁰ Oitemu gwauhamata taravatuna,
ai danu oi karaia gauna do oi laloatao noho.

Badina be inai tano ena dibura gabudia ibounai dekenai,
dagedage karadia idia vara noho.

²¹ Idia dagedage henidia vadaeni taudia mani do oi durua,
hemarai do idia abia lasi.

Do oi durudia,
vadaeni ogogami taudia bona mai edia gau lasi taudia,
ese oitemu ladana do idia hanamoa.

²² Dirava e, oi toreisi,
oitemu kara maoromaoro dainai, unai tau dikadia do oi kota henidia.

Dina ena nega ibounai oi dekenai idia matauraia lasi,
bona oi dekenai idia kiri taudia be do oi laloatao.

²³ Oi dekenai idia tuari henia taudia edia boiboio,
be do oi laloaboio lasi.

Oi dekenai idia dagedage taudia edia regena,
be nega ibounai idia karaia noho.

75

Dirava be Kota Biaguna Badana

¹ Dirava e,
ai ese oi dekenai tanikiu ai henia noho,
oi dekenai ai hanamoa noho.
Oitemu ladana badana ai gwauraia hedinarai noho.
Ai ese oitemu hoa karadia ai herevalaia noho.

² Dirava ia gwau,
“Lau ese kota henia dinana lau gwauraia vadaeni,
bona unai dina do ia ginidae neganai,
lau ese mai maoromaoro danu kota hereva do lau gwauraia.
³ Tanobada bona ia dekenai noho taudia be do idia heudeheude,
to lau ese tanobada ena badina nadidia do lau hagoadaia noho.

⁴ Lau ese hekokoroku taudia lau hamaoroa noho, lau gwau,
‘Do umui hekokoroku lou lasi.’
Bona kara dika taudia lau hamaoroa noho, lau gwau,
‘Do umui dagedage lasi.’

⁵ Guba taudia dekenai do umui dagedage lasi.
Emui hekokoroku do umui hadokoa.’”

⁶ Dina daekau kahana,
dina diho kahana, o tano kaukau,
o tanobada ena kahana ta ese,
tau ta ena mauri ia hanamoa diba, a?
Lasi momokani!

⁷ Dirava sibona be Kota Biaguna momokani.

Ia sibona ese tau ta ia atoa diho noho,
ma ia ese tau ta ia abia isi noho.

⁸ Badina be Lohiabada ese,
kapusi ta iena imana dekenai ia dogoatao noho.

Unai kapusi lalonai,
be Lohiabada ena badu ena uaina aukana ia noho.
Ia ese uaina ia bubua noho,
bona tanobada ena kara dika taudia ibounai ese do idia inua ore.

⁹ To lau ese Dirava do lau hanamoa ela bona hanaihanai.
Iakobo ena Dirava hanamoa anedia,
be do lau abia nega ibounai.

¹⁰ Kara dika taudia ibounai edia sياهو bona goada,
be Dirava ese do ia hamakohia.
To kara maoromaoro taudia edia sياهو bona edia goada,
be Dirava ese do ia habadaia.

76

Israela ena Dirava ena ladana be bada

¹ Juda dekenai noho taudia be Dirava idia diba.

Dirava ena ladana be bada Israela dekenai.

² Iena noho gabuna be Ierusalem dekenai.

Siona Ororo dekenai iena Ruma ia haginia vadaeni.

³ Unuseni ia ese ia dekenai idia tuari henia taudia,
edia peva bona diba ia hamakohia.

Edia kesi bona tuari kaia,
edia tuari gaudia ibounai danu,
be Dirava ese ia makohia.

⁴ Dirava e, oi be namo herea momokani.

Oiemu hairaina ese,
noho hanaihanai ororo edia hairaina ia hereaia noho.

⁵ Goado taudia ese edia tuari dekena amo idia abia kohu,
be haida ese idia abia,
bona unai goada taudia,

be mase ena mahuta ese ia abidia vadaeni.
Idia edia sياهو be anina lasi, bona edia goada be ia ore vadaeni.

⁶ Iakobo ena Dirava e,
oi ese oi gwau henidia neganai,
hosi mai edia guia taudia danu idia mase ore.

⁷ To taunimanima ibounai ese oi idia gari henia noho.

Oi be oi badu momokani neganai,
daika ese oiemu vairana dekenai do ia gini diba?

⁸ Guba dekena amo oiemu kota hereva oi gwaurai,
vadaeni tanobada taudia be idia gari bada,

bona mai regena ta lasi oiemu vairana dekenai idia gini noho.

⁹ Unai neganai Dirava ia toreisi,
kota hereva do ia gwauraiia totona,
bona tanobada dekenai idia hisihisi noho taudia ibounai,
be do ia hamauria totona.

¹⁰ Momokani taunimanima edia badu ese oi ia hanamoa noho,
bona oiemu badu ia ore murinai do mauri noho taudia ese,
oi do idia tomadiho henia.

¹¹ Emui Dirava, Lohiabada, dekenai gwauhamata do umui henia,
bona gwauhamata ena anina do umui karaia.
Dirava umui hagegea noho taudia ibounai ese,
ia dekenai harihari gaudia do umui henia be namo,
badina ia dekenai taunimanima idia gari noho.

¹² Dirava ese,
lohia taudia edia hekokoroku bona dagedage ia hadokoa noho,
bona tanobada ena king taudia ese,
Dirava dekenai idia gari henia noho.

77

Dirava ese Israela ia durua dainai ia ese lauegu hisihisi do ia hanamoa

¹ Dirava dekenai lau tai,
ia ese lau do ia durua totona.

Dirava dekenai lau tai,
mai boibo danu,
bona ia ese lau dekenai ia kamonai.

² Egu hekwarahi neganai lau ese Lohiabada dekenai lau guriguri.
Hanuaboi ena hora ibounai,
lau ese egu imana lau abia isi, lau guriguri noho,
egu lauma ese laga-ani ia ura lasi.

³ Dirava e,
oi lau laloe neganai lalohisihisi dainai lau hahodi haraga lasi.
Egu hisihisi lau laloe noho neganai,
egu lauma be goada ia davaria lasi.

⁴ Dirava e,
oi ese egu mahuta dalana oi koua.
Egu laloe hekwarahi be bada dainai lau hereva diba lasi.

⁵ Dina gunadia lau laloe,
bona lagani, idia ore gaudia,
be lau laloatao.

⁶ Hanuaboi neganai egu lalona lau tahua.
Lau laloe namonamo,
bona egu lauma lau tahua.

⁷ Lau sibona dekenai lau nanadaia, lau gwau,
“Lohiabada ese nega ibounai ita do ia negea noho, a?
Ia ese nega ta ma,
be ita dekenai do ia laloe namo lou, a?”

⁸ Iena noho hanaihanai lalokauna,
be ita dekena amo ia hadokoa, a?
Iena gwauhamata be ia gini noho lasi, a?

⁹ Dirava ese iena bogahisihisi ia laloaboi vadaeni, a?
Iena badu ese iena lalokau ena gabu ia abia vadaeni, a?”

10 Unai neganai lau gwau,

“Egu lalohisihisi ena anina korikori be inai:
Dirava ena siahu be ia ore vadaeni, a?”

11 To Lohiabada e,

lau ese oiemu kara do lau laloa noho.
Oiemu hoa karadia gunadia do lau laloa lou.

12 Oiemu gaukara ibounai do lau laloa noho,
bona oiemu siahu karadia danu do lau laloa.

13 Dirava e, oiemu kara ibounai be helaga.

Edena dirava ena goada be oiemu goada hegeregereena?

14 Hoa karadia ia karaia diba Diravana be oi.

Oi ese oiemu siahu,

be bese idauidau edia huanai oi hedinarai vadaeni.

15 Oiemu siahu dekena amo oiemu bese taudia oi hamauria.

Idia be Iakobo bona Iosepa edia bese taudia.

16 Dirava e,

ranu gabudia ese oi idia itaia neganai idia gari,

bona davara dobu gabudia idia heudeheude.

17 Ori ese medu idia siaia diho.

Guba danu ia boiboi,

bona oiemu kevaru be kahana ibounai dekena amo ia diari.

18 Oi ese guba ena boiboi oi havaraia haraga koehirihiri lalonai,

bona kevaru ese tanobada ia hadiaria.

Tanobada ia mareremarere bona ia heudeheude.

19 Oi ese davara ena hurehure edia huana dekenai oi raka.

Oi ese davara dobu oi raka hanaia,

to oiemu aena gabudia,

be tau ta ese ia itaia lasi.

20 Oi ese mamoe naria tauna bamona oiemu bese taudia oi hakaua.

Mose bona Arona edia imadia dekena amo,

oi ese oiemu bese taudia oi hakaua.

78

Dirava ese iena bese Israela ia durua

1 Egu bese taudia e, egu hadibaia hereva do umui kamoni.

Egu uduna ena hereva do umui kamoni.

2 Aonega herevadia do lau gwauraia,

bona sene taudia edia hunia herevadia edia anina,

be do lau gwauraia hedinarai.

3 Ai ese ai kamoni bona diba,

aiemai tamadia ese ai dekenai idia hamaoroa gaudia,

be do lau gwauraia.

4 Aiemai natudia dekena amo inai sivarai ai hunia lasi,

to Lohiabada ena siahu karadia bona iena hoa karadia,

be gabeai idia vara bese taudia dekenai do ai hamaoroa.

5 Dirava ese Israela taudia dekenai taravatu ia henia,

bona oda danu,

be Iakobo ena bese taudia dekenai ia henia.

Ia ese iseda sene taudia ia hamaoroa,

iena taravatu be edia natudia dekenai do idia hadibaia.

6 Unai dekena amo gabeai do idia vara bese taudia ese,

inai taravatu do idia diba,

bona idia ese edia natudia dekenai ma do idia hadibaia.

7 Bona unai dala dekenai,
 edia natudia ese Dirava do idia abidadama henia,
 bona iena kara do idia laloaboio lasi,
 to iena taravatu do idia kamoni henia nega ibounai.

8 Unai dekena amo danu edia tamadia,
 unai laloa auka bona kamoni lasi taudia,
 edia kara hegeregere do idia karaia lasi.
 Unai edia tamadia edia abidadama be goada momokani lasi,
 bona idia ese Dirava idia badinaia momokani lasi.

9 Eparaima taudia, be mai edia peva bona diba edia imadia dekenai,
 to idia be tuari dinana dekenai idia heau lou.

10 Idia ese Dirava ena gwauhamata idia badinaia lasi,
 bona iena taravatu kamoni henia kara idia negea.

11 Dirava ena kara be idia laloaboio,
 bona iena hoa karadia ia hedinaia gaudia danu,
 be idia laloaboio.

12 Edia sene taudia be,
 edia matadia dekenai unai hoa karadia idia itaia,
 Aigupito tano dekenai bona Soana tano palaka dekenai danu.

13 Dirava ese danu davara ia hapararaia,
 bona idia ese idia raka hanaia.
 Ia ese ranu ia haginia, magu ruaosi bamona.

14 Dina dekenai ia ese ori korema dekena amo ia hakaudia,
 bona hanuaboi ena nega ibounai,
 be lahi ena diari dekena amo ia hakaudia.

15 Taunimanima idia noho lasi tano dekenai,
 Dirava ese nadi ia hapararaia,
 bona inua ranu be idia dekenai ia henia,
 dobu gabudia dekena amo.

16 Dirava ese danu nadi dekena amo ranu ia mailaia.
 Inai ranu be ia heau lao, sinavai bamona.

17 To idia ese edia kara dika Dirava dekenai idia karaia noho.
 Tano kaukau dekenai,
 Atai Herea Dirava dekenai idia dagedage henia.

18 Idia ese Dirava idia tohoa.
 Idia ese idia ura aniani be Dirava dekena amo idia gwauraia.

19 Idia ese Dirava idia hereva dika henia, idia gwau,
 “Dirava ese tano kaukau dekenai,
 aniani patana ia abia hegaegae diba, a?”

20 Idia gwau, “Momokani, nadi ia botai neganai,
 ranu ia bubua diho bada herea,
 to Dirava ese aniani do ia henia diba,
 bona iena bese taudia dekenai vamu do ia henia diba, a?”

21 Lohiabada ese edia hereva badubadu ia kamoni neganai ia badu.
 Ia ese iena bese taudia lahi dekena amo ia hadikadia.

Iena badu be Israela taudia dekenai ia bada lao,
 22 badina idia ese ia dekenai idia abidadama henia lasi,
 bona idia ese Dirava ena hamauria siahuna idia hamomokania lasi.

23 To Dirava ese guba atai dekenai ia hereva henia,
 ia ese guba ena iduara ia kehoa.

24 Bona ia ese mana aniani,
 be guba dekena amo ia siaia diho.

Ia ese guba ena aniani iena bese taudia dekenai ia henia,
do idia ania totona.

²⁵ Vadaeni idia ese aneru ena aniani idia ania.

Bona Dirava ese aniani bada ia siaia,
edia ura hegeregere na momokani.

²⁶ Dirava ese danu,

dina ia daekau kahana dekena amo lai ia havaraia,
bona iena siahu dekena amo,

diho kahana dekena amo ma lai ta ia havaraia,

²⁷ bona iena bese taudia dekenai roho manudia ia siaia diho,
momo herea, kone ena miri bamona.

²⁸ Edia kamepa ena huana dekenai idia moru diho,
edia noho palai rumadia idia hagegea.

²⁹ Unai dainai taunimanima idia aniani,
bona edia bogadia idia kunu.

Dirava ese idia ura gaudia ia henidia.

³⁰ To idia ura dikadika aniani idia do ania noho neganai,
aniani be do ududia edia lalonai,

³¹ be Dirava ese idia dekenai ia badu,

bona edia goada herea taudia be ia ese ia alaia mase.

Israela ena eregabe taudia,

tau namo hereadia be Lohiabada ese ia hamasea.

³² Inai matakani be Dirava ese ia henidia,

to idia be idia kara dika noho.

Hoa karadia momo Dirava ese ia karaia,

to idia ese ia dekenai idia abidadama henia lasi.

³³ Unai dainai ia ese edia mauri ia hadokoa,

hahodi tamona bamona.

Edia mauri lagani,

mai gari bada danu ia haorea haraga momokani.

³⁴ Dirava ese idia haida ia alaia mase neganai,

oredia ese ia dekenai idia giroa lou.

Idia ese edia lalona idia giroa,

bona ia dekenai idia giroa momokani.

³⁵ Idia laloa lou,

Dirava be idia edia Nadi Badana.

Bona idia laloa lou,

Siahu Ibounai Dirava be edia hamauria Tauna.

³⁶ To edia hereva ibounai be koikoi sibona.

Idia ese Dirava idia hanamo a koikoi.

³⁷ Idia be Dirava dekenai idia giroa momokani lasi,

bona edia gwauhamata ena anina ia dekenai idia karaia lasi.

³⁸ To Dirava ese,

iena bese taudia dekenai ia bogahisihisi henia.

Idia edia kara dika ia gwauatao,

bona ia ese idia ia hadikaia ore lasi.

Nega momo ia ese iena badu ia hakerua,

bona iena badu ena siahu momokani ia havaraia lasi.

³⁹ Ia laloatao, idia be taunimanima sibona.

Idia be lai bamona,

nega tamona sibona ia toa,

bona ia toa lou lasi.

40 Nega momo, taunimanima idia noho lasi tano dekenai, iena bese taudia ese Dirava idia kamonai henia lasi, mai dagedage danu.

Io, nega momo tano kaukau dekenai, idia ese Dirava ena lalona idia hisihisi henia.

41 Dirava ena bogahisihisi idia tohoa lou, tohoa lou, bona idia ese Israela edia Helaga Dirava idia habadua.

42 Iena siahua bada herea be idia laloaboio. Dirava ese dagedage taudia dekena amo ia hamauridia dinana, be idia ese idia laloaboio.

43 Unai dina dekenai, Dirava ese Aigupito dekenai kara badadia ia karaia, bona hoa karadia danu Soana tano palaka dekenai ia karaia.

44 Aigupito edia sinavai be rara dekenai ia halaoa, bona Aigupito taudia,

be sinavai edia ranu idia inua diba lasi.

45 Dirava ese lao momo herea idia edia huanai ia siaia, bona idia hisihisi henidia.

Paroparo danu be ia ese ia siaia, edia tano idia hadikaia.

46 Dirava ese danu kwadi momo herea ia siaia, edia uma edia anina idia ania ore.

47 Edia vain huahua be medu, aisi nadi bamona, dekena amo ia hadikaia ore, bona edia fig audia be keru dekena amo idia mase ore.

48 Edia boromakau be medu, aisi nadi bamona, dekena amo ia aladia ore, bona edia mamoe danu, be kevaru dekena amo ia aladia ore.

49 Ia ese iena badu bona iena dagedage, be idia edia latanai ia bubua diho.

Ia ese idia ia hisihisi henidia momokani. Iena mase havaraia aneru orea ta idia dekenai ia siaia.

50 Iena badu be ia ese ia hakerua lasi. Mase dekena amo ia hamauridia lasi. To ia ese hanaia gorere dikana dekena amo ia aladia mase.

51 Aigupito taudia edia vara guna natudia tau ibounai, be Dirava ese ia aladia mase,

Hamo bese ena vara guna natudia tau ibounai.

52 Unai neganai Dirava ese iena bese taudia ia hakaua mai, mamoe naria tauna ese iena mamoe ia hakaua bamona. Ia ese taunimanima idia noho lasi tano kaukau dekenai, ia hakaudia, idia raka hanaia.

53 Dala namona dekenai ia hakaudia, vadaeni idia gari lasi.

To idia dekenai idia tuari henia taudia, be Dirava ese davara ena lalonai ia hamasedia.

54 Dirava ese iena bese taudia ia hakaua, ela bona iena tano helagana dekenai idia ginidae.

Unai ororo be ia sibona ese, tuari ena kwalimu dekena amo ia abia guna vadaeni.

55 Iena bese taudia idia raka hanaia neganai, unai tano noho taudia be Dirava ese ia luludia ore, bona edia tano be Israela iduhu ta ta edia huanai ia haria. Edia ruma be Israela taudia dekenai ia henia.

56 To Israela taudia ese Sياهو Iboundai Dirava idia tohoa,
bona idia kamonai henia lasi.

Idia ese iena taravatu idia utua.

57 Mai hekokoroku danu Dirava ena hereva idia utua,
edia tamadia hegeregerena.

Idia edia kara be gagevageveva, peva gagevagevama bamona.

58 Idia ese dirava koikoidia dekenai boubou patadia idia haginia,
ma unai dainai Dirava ia badu.

Bona idia ese idia koroa kaivakuku gaudia dekena amo,
Dirava idia habadua.

59 Inai bamona idia karaia,

be Dirava ese ia itaia neganai, ia badu mai sياهو danu.

Unai dainai ia ese Israela taudia ia negea momokani.

60 Vadaeni Dirava ese iena Palai Dubu,
Silo dekenai ia noho gauna ia rakatania.

Unai Silo Palai Dubu,

be taunimanima edia huanai Dirava ia noho guna gauna.

61 Bona Dirava ese,

Israela taudia dekenai idia tuari henia taudia ia koua lasi,
unai dainai idia ese Taravatu Maua idia abia.

Inai Taravatu Maua,

be Dirava ena sياهو bona iena hairaina ena toana.

62 Io, Dirava ese iena bese korikori taudia dekenai ia badu,

bona idia dekenai idia tuari henia taudia ia koua lasi,

unai dainai Israela taudia momo idia mase.

63 Tuari dekenai Israela uhau taudia momo idia mase,

bona edia kekeni be mai edia headava dalana lasi,

uhau taudia lasi dainai.

64 Unai idau bese tuari taudia ese,

Israela hahelagaia taudia idia alaia mase,

bona edia vabu idia taravatua,

edia tau totona do idia taitai lasi.

65 Vadaeni Lohiabada be mahuta dekena amo ia noga,

goada tauna uaina ia inua dainai ia boiboi bamona.

66 Ia ese ia dekenai idia tuari henia taudia ia tuari henidia,

ia ese idia ia lulua ore.

Ia luludia ore, ia halusidia momokani,

mai edia hemarai danu.

67 To ia ese Iosepa ena bese taudia ia ura lasi, ia negea,

bona Eparaima iduhu danu ia abia hidi lasi.

68 To ia ese Iuda iduhu ia abia hidi, sibona ena,

bona Siona Ororo,

ia ura henia bada gabuna,

danu ia abia hidi.

69 Unuseni iena Dubu Helaga ia haginia, iena ruma,

guba dekenai ia noho ena toana bamona.

Ia ese inai Dubu Helaga ia haginia goada,

do ia noho hanaihanai totona,

tanobada ena goada bamona.

70 Bona Dirava ese iena hesiai tauna Davida ia abia hidi.

Ia ese mamoe edia magudia dekena amo Davida ia abia.

71 Unuseni Davida ese mamoe naria gaukara ia karaia.

Bona Dirava ese Israela taudia edia king dagi,

be Davida dekenai ia henia.
 Vadaeni Davida be Dirava ena bese taudia, iena mamoe,
 edia naria tauna ia lao.
⁷² Davida ese idia ia naria namonamo,
 mai laloa maoromaoro, bona lalokau korikori danu.
 Bona mai aonega momokani danu,
 Davida ese Israela taudia ia hakaudia.

79

Jerusalema idia hadikaia murinai, tau ta ese ia guriguri, mai ena lalohisihisi danu

¹ Dirava e,
 idau bese taudia ese oiemu tano idia tuari henia vadaeni.
 Oiemu Dubu Helaga idia hamiroa vadaeni.
 Jerusalema idia hadikaia momokani.
² Oiemu bese taudia edia mase tauanidia,
 be atai ai manudia dekenai idia henia vadaeni, idia ania totona,
 bona oiemu hesiai taudia edia hidiona,
 be uda boromadia edia aniani totona idia negea vadaeni.
³ Oiemu bese taudia edia rarana,
 be Jerusalema ena kahana ibounai dekenai idia bubua vadaeni,
 ranu hegeregerena,
 bona mase taudia guria totona tau ta ia noho lasi.
⁴ Ai idia hagegea noho idau bese taudia,
 ese ai idia hereva dika henia noho.
 Ai dekenai idia kirikiri,
 bona ai dekenai idia hevaseha noho.

⁵ Lohiabada e,
 oi ese ai do oi badu henia noho,
 ela bona edena negai?
 Oiemu badu be lahi bamona,
 ai do ia gabua noho hanaihanai, a?
⁶ Mani emu kara idau bese taudia,
 oi idia tomadiho henia lasi besedia,
 edia latanai oiemu badu do oi atoa.
 Oi dekenai idia guriguri henia lasi taudia edia latanai,
 be oiemu badu do oi bubua.
⁷ Badina be idia ese,
 Iakobo ena bese taudia idia ania ore,
 bona Iakobo ena noho gabuna idia hadikaia ore.
⁸ Aiema i sene taudia edia kara dika ena davana,
 be mani emu kara ai dekenai do oi henia lasi.
 Oiemu bogahisihisi, mani emu kara,
 be ai dekenai do oi henia haraga,
 badina ai be ai dika momokani vadaeni.

⁹ Dirava e, mani ai do oi durua,
 ai do oi hamauria.
 Oiemu ladana ena hairaina dainai,
 ai do oi hamauria, bona aiema i kara dika do oi gwauatao.
¹⁰ Badina dahaka idau bese taudia,
 be inai bamona idia hereva diba, idia gwau,
 “Edia Dirava be edeseni?”
 Mani emu kara,

oiemu hesiai taudia idia alaia noho idau bese taudia,
 edia kerere davana do oi henia.
 Aiemaï vairana dekenai,
 oiemu hesiai taudia edia rarana ena davana mani do oi henia.
¹¹ Idia guia vadaeni taudia edia taitai mani do oi kamonaï,
 bona oiemu sياهو badana dekena amo,
 kota dainai mase totona idia naria noho taudia,
 mani do oi hamauridia.

¹² Lohiabada badana e,
 unai idau bese taudia ese oi dekenai idia hereva dika.
 Edia dika davana be nega 7 idia dekenai do oi henia lou.
¹³ Unai neganaï, ai, oiemu bese taudia, oiemu mamoe,
 ese oi do ai hanamoa hanaihanai.
 Ai ese uru ta ela bona ma uru ta, oi do ai hanamoa,
 bona oi do ai tanikiu henia noho.

80

Israëla taudia be Dirava idia noia, ia ese Israëla do ia haginia lou

¹ Israëla ena Naria Tauna e,
 do oi kamonaï.
 Oi ese Israëla taudia oi hakaua noho,
 mamoe naria tauna ese iena mamoe ia hakaua bamona.
 Aiemaï noinoï mani do oi kamonaï.
 Oi be oiemu terona dekenai oi helai noho,
 aneru edia ataiaï dekenai.
² Eparaima, Beniamina bona Manase iduhu dekenai do oi hedinarai,
 bona oiemu goada do oi hedinarai.
 Ai hamauria totona do oi mai.
³ Dirava e, ai do oi abia dae lou!
 Ai dekenai do oi bogahisihisi,
 bona ai do oi durua,
 vadaeni mauri do ai abia.
⁴ Sياهو Ibounai Diravana e,
 oiemu bese taudia edia guriguri dekenai,
 be do oi badu ela bona edena negai?
⁵ Oi ese aiemaï taitai oi havaraia,
 bona aiemaï matana ranu,
 be aniani bona inuinu gauna hegeregerena ai dekenai.
⁶ Oi ese idau bese taudia oi koua lasi,
 vadaeni idia ese tuari idia karaia noho,
 aiemaï tano do idia abia totona,
 bona ai dekenai idia tuari taudia ese,
 ai dekenai idia hereva dika henia noho.

⁷ Sياهو Ibounai Dirava e,
 ai do oi abia dae lou!
 Ai dekenai do oi bogahisihisi,
 bona ai do oi durua,
 vadaeni mauri do ai davaria!

⁸ Gunaguna oi ese vain ta Aigupito dekena amo oi mailaia,
 bona idau bese taudia be inai tano dekena amo oi lulua.
 Vadaeni inai vain be oi ese inai edia tano dekenai oi hadoa.
⁹ Tano oi geia hegaegae, vadaeni vain oi hadoa.

Iena ramuna be idia diho dobu,
bona vain ese tano ibounai ia koua.

¹⁰ Inai vain ese danu,
ororo gabudia be iena kerumakeruma dekena amo ia koua.

Iena rigi be bada,
idia ese sida audia badadia edia rigi idia koua.

¹¹ Inai vain ena rigina be lata herea idia lao,
ela bona davara badana,
ma ela bona Euperate Sinavai dekenai.

¹² To badina dahaka oi ese vain uma ena magu oi makohia?
Harihari raka hanaia taudia ibounai ese,
vain ena huahua idia henaia noho,

¹³ bona uda boroma ese vain auna idia makohia noho.
Uda ena mauri gaudia ibounai be vain ese ia ubudia noho.

¹⁴ Siahu Ibounai Dirava e, mani emu kara ai dekenai do oi lalao.
Oi be guba dekenai oi noho,

mani oi emu matana ese ai do idia itaia.

Mani oi diho mai,
oi emu bese do oi hamauria.

¹⁵ Mani oi mai, inai vain, oi ese oi hadoa gauna do oi hamauria.

Inai vain matamatana,
oi ese oi hagoadaia herea gauna mani do oi durua.

¹⁶ Ai idia tuari henia taudia ese,
inai vain be lahi dekenai idia gabua, bona idia utua diho.

Mani idia dekenai do oi badu,
bona oi ese idia do oi hadikaia ore.

¹⁷ Oi ese ai oi abia hidi vadaeni, oi emu bese korikori.
Oi ese ai oi habadaia, bona oi ese ai oi hagoadaia momokani.

Mani emu kara ai do oi naria,
bona ai do oi durua.

¹⁸ Unai bamona oi karaia neganai,
ai ese oi do ai rakatania lou lasi.
Mauri ai dekenai do oi henia,
vadaeni ai ese oi emu ladana do ai hanamoa bada.

¹⁹ Lohiabada e,
Siahu Ibounai Diravana e, oi ese ai do oi hakaua lou.

Ai dekenai oi emu bogahisihisi do oi hedinaraia,
oi ese ai do oi hamauria.

81

Dirava ese Israela ia sisiba henia

¹ Dirava, iseda goada ena badina,
ia hanamoa totona ane do ita abia,
mai moale bona mai boiboio danu.
Iakobo ena Dirava hanamoa totona ane do ita abia!

² Ane ena tiuni do umui hamatamaia,
bona tareko do umui botaia.
Miusiki namona gita badadia bona gita maragidia dekenai,
do umui gadaralaia.

³ Hua matamata bona hua ia bada ena aria totona,
kibi do umui hiriria.

⁴ Inai be Israela taudia edia taravatu,

Iakobo ena Dirava ese ita dekenai ia henia.

⁵ Gunaguna Dirava ese Aigupito ia tuari henia neganai, ia ese inai taravatu Israela taudia dekenai ia henia.

⁶ Lau ese gadona ta lau kamona, to lau diba lasi daika ena.

Ia ese inai bamona ia hereva, ia gwau,

“Lau ese maduna metauna emui pagana dekena amo lau kokia, biriki nadi bosea umui huaia gaukara dekena amo,

lau ese emui imana lau ruhaia,

vadaeni bosea be tano dekenai umui atodia.

⁷ Hisihisi umui abia neganai lau dekenai umui boiboi,

bona lau ese umui lau hamauria.

Lau be guba ia boiboi ena hunia gabuna dekena amo,

umui emui noinoi lau kamona henia.

Ma unai neganai danu Meriba ena ranu gabudia dekenai,

umui emui abidadama lau tohoa.

⁸ “Egu bese taudia e, umui kamona:

Lau ura umui do lau sisiba henia.

Israela taudia e, lau ura bada egu hereva do umui kamona.

⁹ Umui ese idau bese taudia edia dirava koikoidia,

do umui tomadiho henia lasi.

Umui ese dirava idauna ta do umui badinaia lasi.

¹⁰ Lau sibona be Lohiabada, emui Dirava.

Aigupito dekena amo umui lau hakaua mai.

Umui ese emui uduna do umui kehoa,

bona lau ese umui do lau ubua.

¹¹ “To egu bese taudia ese lau dekenai idia kamona lasi.

Israela taudia ese lau idia kamona henia lasi.

¹² Unai dainai lau ese idia lau negea,

idia sibona edia hekokoroku daladia do idia raka noho,

bona idia sibona edia ura karadia do idia karaia.

¹³ “Egu ura bada be,

egu bese taudia ese lau dekenai do idia kamona,

bona Israela taudia ese lau idia kamona henia neganai,

¹⁴ Lau ese idia dekenai idia tuari henia taudia,

do lau halusia haraga.

Idia ese idia tuari henia taudia,

be lau danu ese do lau tuari henia,

¹⁵ bona lau dekenai idia badu taudia,

be egu vairana dekenai do idia tomadiho.

Ma edia matakani be do ia noho ela bona hanaihanai.

¹⁶ To uiti namo herea dekena amo umui do lau ubua,

bona hani namona,

nadi badana dekena amo gauna,

umui dekenai do lau henia,

do umui boga kunu.”

82

Dirava be King Badana momokani, ta ese ia hereaia lasi

¹ Dirava ese guba ena kota hebou gabuna lalonai, iena gabu dekenai ia gini noho.

Guba ena lohia taudia idia haboua,
bona Dirava ese iena kota hereva ia gwauraia noho.

² Ia gwau,

“Umui ese kota hereva do umui hagagevaia noho ela bona edena negai?
Umui ese kara dika taudia do umui durua noho ela bona edena negai?”

³ Umui ese manoka taudia,

bona edia tamadia sinadia be lasi maragidia do umui durua.
Ogogami, bona dagedage taudia ese idia hisihisi henidia taudia,
edia dala maorona, be kota dekenai do umui gwauraia.

⁴ Goada lasi taudia bona mai edia gau lasi taudia,
be do umui hamauria,

bona tau dikadia dekena amo do umui veridia mauri.

⁵ To umui be gau ta umui diba lasi,

umui be gau ta ena anina umui davaria lasi.
Umui be dibura dekenai umui loaloa kava noho.
Unai dainai taunimanima ese,
kara maoromaoro dalana idia badinaia lasi.

⁶ “Lau gwau, ‘Umui be dirava.

Umui ibounai be Sياهو Ibounai Dirava ena natuna,’

⁷ To umui ibounai be taunimanima hegeregere do umui mase.

Emui mauri be do idia ore,
king ena natuna ena mauri do ia ore hegeregere.”

⁸ Dirava e, do oi toreisi,

tanobada do oi kota henia,
badina tanobada ena bese ibounai,
be oi sibona ese oi biagua noho.

83

Guriguri ta, Israela dekenai idia tuari henia taudia be Dirava ese do ia halusia

¹ Dirava e, do oi laga-ani lasi.

Dirava e, oiemu hereva do oi koua lasi,
bona do oi helai kava lasi.

² Oi itaia, oi dekenai idia tuari henia gwauraia taudia,
ese tuari totona idia toreisi noho.

Oi idia badu henia taudia be idia dagedage noho.

³ Oiemu bese taudia hadikaia totona,
idia ese dala idia tahua noho.

Oi ese oi naria noho taudia hadikaia totona,
inai tau dikadia ese idia haboua noho.

⁴ Idia ese inai bamona idia hereva noho, idia gwau,

“Umui mai, unai bese do ita hadikaia ore,
vadaeni Israela ena ladana be,
taunimanima ese do idia laloaboio ela bona hanaihanai.”

⁵ Idia ese mai laloa tamona edia palani idia karaia,

bona oi hadikaia totona,
idia ese ta ta ibounai dekenai gwauhamata idia henia.

⁶ Unai besedia be inai:

Edoma bona Isamaela bese taudia ibounai,

bona Moaba taudia,
 bona Hagara bese taudia danu,
 7 Gebala, bona Amono bona Amaleka,
 bona Pilistia, bona Turo taudia danu.

8 Asuria danu be idia danu ia haboua vadaeni.
 Idia be Lota ena bese taudia idia durua noho.

9 Midiana taudia dekenai oi karaia hegeregerena,
 be Asuria taudia dekenai danu do oi karaia.
 Sisera bona Iabina dekenai,
 Kisona Sinavai dekenai oi karaia hegeregerena,
 unai Asuria taudia mani do oi halusia.
 10 Ene Doro dekenai oi ese idia oi hadikaia ore,
 bona edia mase tauanidia be tano dekenai idia bodaga lao.

11 Asuria ena tuari biagudia,
 be Oreba bona Sebe hegeregerena do oi halaoa.
 Idia edia lohia taudia ibounai do oi halusia,
 Sebaha bona Salamuna oi halusia bamona.
 12 Unai taudia idia gwau,
 “Dirava ena rei gabudia be do ita abia, iseda tano.”

13 Egu Dirava e,
 tano ena kahu bamona,
 unai taudia do oi negea kahana kahana dekenai,
 uiti ena momoru be lai ese ia hodaia ore,
 unai hegeregerena do oi siaidia lao ore.

14 Lahi ese uda ia gabua ore bamona,
 bona lahi ena hururu ese,
 ororo edia uda gabudia ia gabua ore bamona,
 15 oiemu lai badana dekena amo idia do oi lulua.
 Bona oiemu lai guba badana dekena amo idia do oi hagaria.

16 Lohiabada e,
 hemarai dekena amo edia vairadia do oi koua.
 Unai bamona do oi karaia,
 taunimanima ese oiemu ladana do idia tahua totona.

17 Lau ura idia be do idia hemarai,
 bona do idia gari noho ela bona hanaihanai.
 Oi ese idia do oi alaia mase,
 mai edia hemarai danu.

18 Lau ura inai bamona do oi karaia,
 vadaeni idia be do idia diba oiemu ladana be Iehova.
 Bona oi sibona,
 Atai ai Momokani Diravana,
 ese tanobada oi biagua noho.

84

Tau ta ese Dirava ena Dubu Helaga ia ura henia bada

1 Siahu Ibounai Dirava e,
 lau ese oiemu Dubu Helaga lau ura henia bada!

2 Lau ura bada unuseni do lau noho.
 Egu lalona ibounai ese,
 Lohiabada ena Dubu Helaga ia ura henia noho.
 Egu tauanina bona egu kudouna dekena amo,

Mauri Diravana dekenai ane lau abia noho,
mai moale ena boiboio danu.

³ Sياهو Ibounai Dirava e, oi be lauegu King bona lauegu Dirava.

Manu maragidia ese edia ruma,
be oiemu boubou patana ena badinai idia karaia.

Unuseni edia natudia idia naria noho.

⁴ Oiemu Dubu Helaga lalonai idia noho taudia,

be mai moale bada danu.

Idia ese oi hanamoa totona,
ane idia abia noho nega ibounai,

⁵ Edia goada oi dekena amo idia abia taudia,

be mai edia moale danu.

Idia ura bada idia raka lao Siona Ororo dekenai,
bona mai moale danu idia lao.

⁶ Baka Koura gabuna idia raka hanaia neganai,
ranu lohilohe gabudia idia davaria.

Medu be daba neganai ia diho,

bona unai ranu gabudia be ranu ese ia hahonua.

⁷ Unai taudia idia raka noho neganai,

edia goada be ia bada lao noho,

ela bona idia ta ta ese Dirava,
be Siona Ororo dekenai do idia itaia.

⁸ Sياهو Ibounai Dirava e,

lauegu guriguri do oi kamoni.

Iakobo ena Dirava e,

lau dekenai do oi kamoni.

⁹ Dirava e, aiemai king do oi hanamoa.

Oi sibona ese oi abia hidi king,

be do oi laloa namo henia.

¹⁰ Lohiabada e,

bema dina tamona sibona Dubu Helaga lalonai lau noho,

unai dina ese,

dina 1000 idau gabu dekenai ia hereaia noho.

Momokani, lauegu Dirava ena Ruma ena iduara badinai,

do lau gini be namo herea,

to kara kerere taudia edia ruma lalonai lau noho be dika.

¹¹ Badina be Lohiabada ese ita ia gimaia noho.

Ia be iseda King, mai ena hairaina danu.

Ia ese bogahisihisi bona mataurai,

be ai dekenai ia henia noho.

Bema tau ta ese kara maoromaoro ia karaia neganai,

Lohiabada ese gau namona ta unai tau dekena amo do ia koua lasi.

¹² Sياهو Ibounai Diravana e,

oi dekenai idia abidadama taudia ibounai,

be do idia moale bada noho.

85

Tau ta ia guriguri, Dirava ese Israela do ia hanamoa totona

¹ Lohiabada e,

oi ese oiemu tano dekenai oi bogahisihisi henia vadaeni.

Oi ese Israela ena noho oi hanamoa lou vadaeni.

² Oi ese oiemu bese taudia edia kara dika oi gwauatao vadaeni, bona edia kerere oi laloaboio vadaeni.

³ Guna ai dekenai oi badu, to hari oiemu badu oi hakerua vadaeni. Oiemu badu mai siahu bada, be oi ese oi hadokoa vadaeni.

⁴ Dirava e, aiemai Hamauria Tauna, mani emu kara ai do oi haginia lou, bona mani do oi badu lou lasi ai dekenai.

⁵ Ai dekenai do oi badu ela bona hanaihanai, a? Oiemu badu be nega ta do ia doko lasi, a?

⁶ Goadai dekenai do oi henia lou, bona ai, oiemu bese taudia ese oi do ai hanamoa.

⁷ Lohiabada e, oiemu noho hanaihanai lalokauna, be ai dekenai do oi hedinarai, bona oiemu hamauria ena durua be ai dekenai do oi henia.

⁸ Lohiabada Dirava ena hereva lau kamoni noho. Ia gwau ia ese maino be ai dekenai, iena bese korikori taudia dekenai, do ia henia, bema ai ese guna ai karaia kavakava karadia, be do ai karaia lou lasi.

⁹ Momokani, ia ese ia dekenai idia gari taudia ia hamauria noho. Ia ese ai do ia hamauria, bona ai danu do ia noho, aiemai tano lalonai.

¹⁰ Unai neganai Israela taudia ese, ta ta ibounai dekenai do idia lalokau henia, bona kara namodia be idia ta ta dekenai do idia karaia, vadaeni idia ibounai be, kara maoromaoro bona maino dekenai do idia noho hebou.

¹¹ Lohiabada dekenai abidadama kara, be Israela tano dekenai do ia tubu, bona Dirava, guba dekenai ia noho, ese kara maoromaoro, emai bese edia huanai do ia havaraia.

¹² Momokani, Lohiabada ese gau namodia ai dekenai do ia henia. Aiemai noho do ia hanamoa, bona aiemai tano ese ena anina do ia havaraia bada herea.

¹³ Lohiabada ese taunimanima do ia durua, bona kara maoromaoro taudia do ia halaodia, bona inai kara ese, Lohiabada ena mai dalana do ia karaia hegaegae.

86

Davidai ese durua totona Dirava ia noia

¹ Lohiabada e, egu noinoi do oi kamoni, lau dekenai do oi haere, badina lau be manoka, bona tau ta ese lau ia durua lasi.

² Mase dekena amo lau do oi hamauria, badina lau ese oi lau badinaia noho, mai momokani danu. Mani emu kara, lau do oi hamauria, badina lau be oiemu hesiai tauna,

bona lau ese oi lau abidadama henia noho.

³Oi be egu Dirava.

Mani emu kara lau dekenai do oi bogahisihisi henia,
badina dina ena nega ibounai,
lau ese oi dekenai lau tai henia noho.

⁴Lohiabada e, lau,

oiemu hesiai tauna, egu lauma mani do oi hamoalea,
badina be egu lauma ese oi ia tahua noho.

⁵Lohiabada e,

oi be mai oiemu bogahisihisi,
bona kara dika oi gwauatao noho.

Oi dekenai idia guriguri noho taudia dekenai,
oiemu noho hanaihanai lalokauna oi henia noho.

⁶Lohiabada e,

egu guriguri mani do oi kamoni.

Oiemu durua totona lau noinoi inai.

Mani emu kara egu noinoi do oi abia dae.

⁷Egu hekwarahi neganai, lau ese oi dekenai lau tai henia noho,
badina oi ese lau dekenai oi haere henia noho.

⁸Lohiabada e,

dirava ta oi hegeregere be lasi momokani.

Idia ta ese oiemu kara hegeregere idia karaia diba lasi.

⁹Lohiabada e, oi ese oi karaia besedia ibounai be do idia mai,
oiemu vairana dekenai do idia tomadiho.

Oiemu ladana be idia ese idia hanamoa bona matauraia,

¹⁰badina oi be bada,

bona oi ese hoa karadia oi karaia noho.

Oi sibona be Dirava.

¹¹Lohiabada e, oiemu dala lau dekenai do oi hadibaia,

bona lau be oiemu momokani lalonai do lau raka.

Lauegu lalona do oi hatamonaia momokani,

vadaeni lau ese oiemu ladana do lau matauraia bona gari henia.

¹²Lohiabada Dirava e,

lau ese oi do lau hanamoa,

mai egu kudouna ibounai danu.

Lau ese oiemu ladana,

be do lau hanamoa bada ela bona hanaihanai,

¹³badina oiemu lalokau lau dekenai be bada herea.

Oi ese mase taudia edia guri dobu gabuna dekena amo,

egu lauma oi hamauria vadaeni.

¹⁴Dirava e,

hekokoroku taudia ese lau idia tuari henia noho.

Dagedage taudia ese egu mauri hadokoa dalana idia tahua noho.

Unai taudia ese oi dekenai idia laloka lasi.

¹⁵To Lohiabada e,

oi be bogahisihisi bona hariharibada Diravana.

Oiemu badu be haraga lasi,

to oiemu lalokau bona maoromaoro be bada herea momokani.

¹⁶Lau dekenai do oi laloka,

bona lau dekenai do oi bogahisihisi henia.

Lau do oi hagoadaia,

bona lau do oi hamauria.
 Badina be lau ese oiemu hesiai gaukara lau karaia noho,
 egu sinana ese ia karaia guna bamona.
¹⁷Oiemu kara namona ena toana ta,
 be lau dekenai do oi hedinarai,
 vadaeni lau idia hadikaia gwauraia taudia ese do idia itaia,
 bona do idia hemarai.
 Badina be, Lohiabada e,
 do idia itaia, oi ese lau oi durua vadaeni,
 bona oi ese lau oi hagoadaia vadaeni.

87

Ierusalemahanua idia hanamoa

¹Lohiabada ese iena hanua,
 be ororo helagana dekenai ia haginia.
²Lohiabada ese Israela ena gabu ibounai ia ura henia noho,
 to ia ese Ierusalemahanua ia ura henia bada momokani.
³Dirava ena hanua dekenai noho taudia e, do umui kamona.
 Dirava ese emui hanua ena hairaina ia herevalaia noho.
⁴Dirava be inai bamona ia hereva, ia gwau,
 “Dohore egu hereva idia kamona henia bese taudia lau duahia neganai,
 Aigupito bona Babulonia danu do lau haboua.
 Ma danu do lau gwau, Pilistia bona Turo bona Etiopia taudia,
 be Ierusalemahanua noho taudia danu do lau haboua.”
⁵Ma Dirava ese Siona do idia herevalaia,
 do ia gwau,
 “Siona be bese idau idau ibounai taudia edia gabuna.”
 Badina be Siahu Ibounai Diravana ese,
 Ierusalemahanua do ia haginia bona hagoadaia.
⁶Lohiabada ese bese momo taudia edia ladana do ia torea,
 bona ia ese Ierusalemahanua noho taudia danu do ia haboudia,
 badina do ia gwau, “Idia be Siona dekenai idia vara.”
⁷Unai neganai Ierusalemahanua noho taudia do idia mavaru mai ane danu.
 Do idia gwau,
 “Ierusalemahanua e, ai be oiemu taudia korikori,
 bona oi be hanamoa ibounai ena badina.”

88

Tau ta ese Dirava dekenai ia tai, do ia durua totona

¹Lohiabada, lau oi hamauria noho Diravana e,
 dina lalonai oi dekenai lau boibo noho,
 lau do oi durua totona.
 Hanuaboi lalonai danu oi dekenai lau tai henia noho.
²Egu guriguri mani do oi kamona.
 Oiemu durua lau noia neganai,
 mani lau dekenai do oi kamona henia.
³Badina be egu lauma be mai ena hekwarahi bada,
 bona egu mauri,
 be mase gabuna dekenai kahirakahira do ia vareai lao.
⁴Kahirakahira do idia mase taudia, be lau danu idia haboua tamona,
 mase gabuna dekenai do ai diho hebou totona,

bona egu goada be ia ore vadaeni.

⁵ Mase taudia edia huanai lau idia rakatania vadaeni.

Lau be idia alaia vadaeni tauna bamona,
mase ena guri dekenai lau noho.

Lau be, oi ese oi laloaboio momokani vadaeni tauna bamona,
lau be, oi ese do oi durua lou lasi tauna bamona.

⁶ Oi ese mase guria gabuna dobu herea dekenai,

lau oi atoa vadaeni,

dibura masemase bona dobu masemase gabuna dekenai.

⁷ Oiemu badu be metau herea lauegu latanai.

Oiemu hurehure ibounai ese lau idia koua momokani.

⁸ Oi ese egu turana taudia oi hamaoroa,

vadaeni idia ese lau idia rakatania.

Oi ese lau oi hadikaia dainai,

idia dekenai lau be gari gauna bamona.

Lau be hegeregere dibura dekenai lau noho,

bona lau heau mauri diba lasi.

⁹ Egu lalohisihisi dainai,

egu matana ese gau idia itaia namonamo lasi.

Lohiabada e, dina ibounai oi dekenai lau boiboio noho.

Egu imana be oi dekenai lau abia isi noho.

¹⁰ Hoa karadia,

be mase taudia edia vairanai oi karaia noho, a?

O sedira mase taudia edia laulaudia,

ese oi hanamoia totona idia toreisi noho, a?

¹¹ Mase guria gabuna dekenai,

be oiemu lalokau idia gwauraia noho, a?

O dobu masemase gabuna dekenai,

oiemu gwauhamata hamomokania karadia idia gwauraia noho, a?

¹² Dibura sibona ia noho gabuna dekenai,

oiemu hoa karadia idia diba, a?

Idia laloaboio vadaeni mase taudia idia noho gabuna,

unuseni be oiemu kara namodia do idia lalao, a?

¹³ To Lohiabada e,

lau ese oiemu durua totona lau tai henia noho.

Daba neganai egu noinoi be oi dekenai lau gwauraia noho.

¹⁴ Lohiabada e, badina dahaka lau oi negea noho?

Badina dahaka oiemu vairana be lau dekena amo oi hunia noho?

¹⁵ Lau be mero negana dekena amo, mai hisihisi danu lau noho,

bona kahirakahira lau mase.

Oiemu matakani ese lau ia hagaria, vadaeni lau be dika,

bona durua do lau abia dalana be lasi.

¹⁶ Oiemu badu ese lau ia koua momokani vadaeni,

bona oiemu gari karadia ese,

lau idia hadikaia ore.

¹⁷ Abata ranu bamona,

idia ese lau idia koua hagegea dina ena hora ibounai lalonai.

Idia ese lau idia koua momokani vadaeni.

¹⁸ Oi ese egu turana bona egu lalokau taudia danu,

be lau dekena amo oi atodia siri,

bona dibura sibona be egu turana tamona bamona.

89

Nega dika be edia tano dekenai ia vara neganai inai ane idia abia

¹ Lohiabada e,
oiemu lalokau bada dainai ane do lau abia nega ibounai.
Lau ese oiemu maoromaoro bona momokani do lau gwauraia hanai-
hanai.

² Lau diba oiemu lalokau,
be do ia noho ela bona hanaihanai.
Oiemu kara be maoromaoro bona momokani, do ia idau lasi.
Ia be ia noho goada nega ibounai,
guba ia noho goada bamona.

³ Oi ese oi gwau vadaeni,
“Lau ese lau abia hidi tauna danu gwauhamata taravatuna ai karaia.
Egu hesiai tauna Davida dekenai lau gwauhamata, lau gwau,

⁴ ‘Oiemu natuna bona tubuna ta,
be nega ibounai do ia king.
Lau ese oiemu king siahuna,
be do lau haginia ela bona hanaihanai.’ ”

⁵ Lohiabada e,
guba noho aneru taudia ese,
oiemu hoa karadia be ane dekenai do idia hanamoa.
Idia ese oiemu maoromaoro bona momokani dainai ane idia abia,
oiemu ladana hanamoa totona.

⁶ Badina be Lohiabada e,
guba dekenai, daika be oi hegeregere?
Edena aneru be Lohiabada hegeregere?

⁷ Aneru badadia edia hebou lalonai,
idia ibounai be oi dekenai idia gari noho,
bona aneru ibounai, oi Lohiabada idia hagegea aneru ibounai ese,
oi idia gari henia noho.

⁸ Lohiabada, Siahu Ibounai Dirava e,
daika ena siahu be oiemu siahu hegeregere?
Oiemu kara ibounai dekenai oiemu gwauhamata bona oiemu hereva,
be oi badinaia noho.

⁹ Lohiabada e, oi ese davara badana oi biagua noho.
Oi ese davara ena hurehure bada oi hamanadaia noho.

¹⁰ Oi ese Aigupito oi hamakohia,
bona oi hadikaia ore,
bona oiemu goada badana dekena amo,
oi dekenai idia tuari taudia oi halusia.

¹¹ Guba be oiemu, tano danu be oiemu.
Tanobada bona ia lalonai gaudia ibounai be oi ese oi karaia.
¹² Mirigini kahana bona diho kahana be oi ese oi karaia.
Taboro Ororo bona Heremona Ororo ese,
oiemu ladana idia hanamoa noho,
mai edia moale anedia danu.

¹³ Momokani, oiemu siahu be bada herea,
bona oiemu goada be bada momokani.

¹⁴ Oiemu basileia be kara maoromaoro bona kota maorona,
dekenai ia gini noho.
Oi ese oiemu basileia taudia oi lalokau henia,

bona mai maoromaoro bona momokani danu oi durudia noho.
Oiemu kara be namo nega ibounai, oi haidaua lasi.

15 Ane dekena amo oi idia tomadiho henia taudia,
be mai edia moale momokani danu.

Lohiabada e,

idia be oiemu bogahisihisi ena diari lalonai idia mauri noho.

16 Oi dainai idia be dina ibounai idia moale bada noho,
bona oiemu kara namo dainai oi idia hanamoia noho.

17 Oi ese ai dekenai kwalimu bada oi henia noho.

Oiemu lalokau bona bogahisihisi dainai,

tuari lalonai kwalimu ai dekenai oi henia noho.

18 Lohiabada e, oi ese aiemai king oi abia hidi vadaeni.

Oi, Israela ena Dirava Helagana ese,

aiemai king be ai dekenai oi henia vadaeni.

Dirava ena gwauhamata Davida dekenai

19 Gunaguna momokani neganai,

oi ese oiemu hesiai taudia korikori dekenai nihi oi siaia,

bona idia dekenai oi hamaoroa, oi gwau,

“Lau ese tuari tauna namona ta lau abia hidi vadaeni,

bona lau ese king dagi ia dekenai lau henia.

Lau ese hanua taudia edia huanai ia lau abia hidi,

ia be king.

20 Lau ese lauegu hesiai tauna Davida lau abia hidi,

bona king ena dagi lalonai lau hasiahua,

dehoro helagana dekena amo.

21 Lauegu goada be nega ibounai ia dekenai do ia noho.

Lauegu siahu ese do ia hagoadaia.

22 Ia dekenai do idia tuari taudia ese ia do idia halusia diba lasi,

bona kara dika taudia ese ia dekena amo do idia kwalimu diba lasi.

23 Ia dekenai idia dagedage taudia,

be lau ese do lau hadikaia ore,

bona ia idia badu henia taudia,

be do lau alaia mase.

24 Lau ese ia do lau lalokau henia,

bona ia do lau durua momokani.

Do ia tuari negadia ibounai kwalimu do lau henia.

25 Iena basileia be do lau habadaia,

bona iena tano be davara badana dekena amo,

ela bona Euperate Sinavai.

26 Ia ese lau dekenai do ia gwau,

‘Oi be lauegu Tamana bona lauegu Dirava.

Oi be egu Nadi Badana, lau oi hamauria noho Diravana.’

27 Lau Lohiabada ese egu vara guna natuna ia do lau halaoa,

bona ia be king badana momokani do ia lao,

king ibounai ia ese do ai hereaia.

28 Egu bogahisihisi ia dekenai do lau henia nega ibounai,

bona egu gwauhamata taravatuna ia danu be do ia noho,

ela bona hanaihanai.

29 Iena natuna bona tubuna ese,

king dagi do idia dogoatao noho ela bona hanaihanai.

Iena king siahuna be nega ibounai do ia noho,

guba do ia noho dinadia hegeregere.

30 “To bema iena natuna o tubuna ese egu taravatu idia utua,
bona egu oda hegeregere idia noho lasi,

31 o bema egu hadibaia hereva idia badinaia lasi,
bona egu taravatu idia kamonai henia lasi neganai,

32 lau ese idia do lau panisia,
bona edia kerere davana do lau henia, hisihisi dekena amo.

33 To lau ese egu lalokau Davida dekenai do lau hadokoa lasi,
bona egu gwauhamata ia dekenai do lau makohia lasi.

34 Egu gwauhamata taravatuna Davida dekenai,
be do lau utua lasi momokani.
Lauegu hereva ta do lau haidaua lasi, lasi momokani.

35 “Lauegu ladana helagana dekena amo lau gwauhamata vadaeni,
lau gwau, ‘Davida be do lau koia lasi.

36 Davida ena tubuna be do idia vara noho hanaihanai,
do idia doko lasi,

bona Davida ena basileia be do lau naria noho,
ela bona dina ena noho dinadia ibounai.

37 Davida ena king siahuna be do ia gini hanaihanai,
hua be guba dekenai ia noho hegeregere,
bona hua ese taunimanima dekenai do ia hedinarai,
lauegu hereva be momokani.’”

Tuari taudia ese, edia king idia halusia dainai, idia taitai noho

38 To harihari oi ese oi abia hidi king tauna,
be oi badu henia noho.

Oi ese ia oi rakatania,
bona ia oi negea vadaeni.

39 Oiemu gwauhamata taravatuna, oiemu hesiai tauna danu oi karaia
gauna,

be oi ese oi makohia vadaeni.

Bona iena king toana, korona,
be oi ese oi negea vadaeni kopukopu dekenai.

40 Oi ese iena hanua badana ena magu oi veria diho vadaeni,
bona magu ena gabu aukana danu,

be oi ese oi hamakohia ore.

41 Raka hanaia taudia ibounai ese king ena kohu idia henaia noho,
bona iena badibadinai idia noho taudia ese,

ia dekenai idia kirikiri noho.

42 Oi ese king Davida dekenai idia tuari henia taudia,
dekenai kwalimu oi henidia,

vadaeni oi ese idia ibounai oi hamoalea vadaeni.

43 Oi ese king ena tuari kaia oi hadikaia, ia be matana lasi,
bona iena tuari taudia dekenai goada oi henidia lasi.

44 Oi ese iena king siahuna ia dekena amo oi kokia,

bona iena helai gauna, terona,
be oi ese tano dekenai oi negea diho vadaeni.

45 King oi durua lasi dainai,
iena buruka dinadia idia ginidae haraga.

Oi ese oi hahemaraia vadaeni.

Dirava idia noia, do ia hamauridia

46 Lohiabada e, oi sibona do oi hunia noho ela bona edena negai?
Ela bona hanaihanai a?

Oiemu badu do ia siahu, lahi bamona, ela bona edena negai?

⁴⁷ Lohiabada e, mani oi lalao,
aiemai mauri dinadia be daudau lasi.

Oi ese ai oi karaia, madi, ai be goada lasi do ai noho daudau,
ai be mase do ai davarua haraga.

⁴⁸ Edena tau ese iena mauri ia halataia diba?

Daika ese gurua gabuna ena siahu dekena amo ia heau mauri diba?

⁴⁹ Lohiabada e, oiemu lalokau badana,
guna ia noho lalokauna,

be edeseni ia noho hari?

Oi ese Davida dekenai guna oi karaia gwauhamatana be edeseni?

⁵⁰ Lohiabada e,

lau be oiemu hesiai tauna,

lau dekenai mani oi lalao.

Taunimanima idia hereva dika lau dekenai.

Dirava diba lasi taudia ese,

lau hadikaia totona badu hereva idia gwauraia noho.

⁵¹ Lohiabada e,

oi dekenai idia tuari gwauraia taudia ese,

oi abia hidi king idia hereva dika henia noho.

Oiemu abia hidi king ia lao gabudia ibounai dekenai,

unai taudia ese ia dekenai idia hereva dika henia noho.

⁵² Ita ese Lohiabada do ita hanamoa ela bona hanaihanai. Amen bona
Amen.

90

Dirava ena kara, bona taunimanima edia kara

¹ Lohiabada e,

oi sibona be aiemai noho gabuna,

gunaguna ia mai bona harihari.

² Oi be nega ibounai, hanaihanai, Dirava oi noho,
idaunegai bona gabeai danu.

Ororo do oi karaia lasi neganai,

tanobada bona motumotu oi do karaia lasi neganai,

oi be unai bamona,

bona unai bamona do oi noho ela bona hanaihanai.

³ Oi ese taunimanima oi hamasea,

bona oi ese kahu dekenai idia oi halaoa lou.

Bona oi ese oi hereva, oi gwau,

“Umui be kahu ena taudia,

do umui mase, bona kahu dekenai umui giroa lou.”

⁴ Lagani 1000 oiemu vairana dekenai be dina tamona sibona bamona.

Idia ore haraga, varani bamona.

Idia ore lao, hanuaboi ena hora tamona bamona.

⁵ Oi ese taunimanima oi kokia lao,

abata ese ia kokidia lao bamona,

vadaeni idia mase.

Taunimanima be nega kwadogina sibona idia noho, nihi bamona.

Idia be hegeregere ava,

daba neganai idia tubu matamata bamona,

⁶ bona idia bada lao,

herahera idia atoa,

to adorahi neganai idia kakoro bona idia mase.

⁷ Oiemu badu ese ai ia hadikaia ore.
Oiemu dagedage ese ai ia hagaria dikadika.

⁸ Oi ese aiemai kara dika oi itaia noho,
bona hunia dekenai ai kara dika neganai,
oi ese oiemu vairana dekenai oi atodia,
bona oi dekenai idia hedinarai namonamo.

⁹ Oiemu badu ese aiemai tanobada maurina ia hakwadogia noho.
Momokani, aiemai mauri ia doko haraga, hahodi tamona bamona.

¹⁰ Aiemai mauri lagani be 70 sibona.
Bema ai be goada neganai sedira lagani 80 do ai abia,
to inai lagani ibounai lalonai,
hekwarahi bona lalohisihisi ai abia noho.
Aiemai mauri be idia ore haraga, vadaeni ai boio.

¹¹ Oiemu badu ena siahu momokani ena mamina be daika ia diba?
Oiemu dagedage bada ena gari be daika ia diba namonamo?

¹² Aiemai mauri ena kwadogi mani ai dekenai do oi hadibaia,
bona unai dekena amo aonega do ai davaria.

¹³ Oiemu badu be do ia noho ela bona edena negai?
Mani emu kara, ai, oiemu hesiai taudia dekenai do oi bogahisihisi.

¹⁴ Daba daba ibounai oiemu lalokau badana dekena amo,
ai do oi hahonua,
vadaeni aiemai mauri dinadia ibounai lalonai,
mai moale danu do ai noho.

¹⁵ Guna oi ese lalohisihisi ai dekenai oi henia.
Vadaeni harihari mani emu kara,
inai lalohisihisi ena bada hegeregere,
moale do oi henia ai dekenai.
Momokani lagani momo aiemai noho be dika,
to harihari ai do oi hamoalea,
unai lagani dikadia edia daudau hegeregere.

¹⁶ Oiemu kara badadia be ai,
oiemu hesiai taudia dekenai do oi hedinarai,
bona oiemu siahu bada mai hairaina danu,
be aiemai tubudia dekenai do oi hedinarai.

¹⁷ Lohiabada e, oi be aiemai Dirava.
Ai ura oiemu bogahisihisi bona hanamo,
be ai dekenai do idia noho,
vadaeni aiemai kara ibounai lalonai,
aiemai gaukara ena anina do ai davaria, kwalimu danu do ai abia!

91

Dirava be iseda Naria Tauna

¹ Bema tau ta ese Atai ai Momokani Lohiabada dekenai ia lao,
Lohiabada ese mase dekena amo do ia naria totona,
bona bema unai tau be,
Siahu Ibounai Dirava kahirakahira ia noho neganai.
Dirava ese do ia naria bona durua.

² Unai tau ese Dirava dekenai do ia hereva, do ia gwau,
“Lohiabada e, oi be egu gima Tauna bona egu naria Tauna,

Oi be egu Dirava, oi dekenai lau abidadama noho.”

³ Momokani Dirava ese oi do ia durua,
bona hunia dekenai idia noho dika gaudia,
be hegeregere lasi oi do idia hadikaia,
bona gorere dikadia, mase gaudia,
be hegeregere lasi oi emu mauri do idia abia.

⁴ Lohiabada ese iena hanina dekena amo oi do ia koua,
vadaeni iena naria dainai oi be do oi mauri.
Iena kara be maoromaoro bona momokani dainai,
iena gima kara bona naria kara be momokani.

⁵ Hanuaboi neganai idia mai dika gaudia, be do oi gari henia lasi,
bona dina neganai karaharaga idia ginidae gau dikadia danu,
be do oi gari henidia lasi.

⁶ Dibura neganai idia vara gorere dikadia danu,
be hegeregere lasi oi do idia hagaria.
Dina neganai idia toreisi haraga dika badadia dekenai danu,
be do oi gari lasi.

⁷ Sedira oi kahirakahira be taunimanima 1000 idia mase,
bona oi emu imana idibana kahana dekenai,
sedira taunimanima 10,000 idia mase,
to unai dika be do oi davaria lasi.

⁸ Oi ese Dirava ena kara do oi itaia:
Ia ese tau dikadia edia kerere davana do ia henia momokani,
be do oi itaia.

⁹ Bema egu naria Tauna,
Siahu Ibounai Diravana,
be oi emu gima Tauna, oi emu kohoro oi halaoa,

¹⁰ unai neganai dika ta ese oi dekenai do ia kamokau lasi.
Oi do ia hadikaia gauna ta,
be oi emu ruma dekenai do ia ginidae lasi.

¹¹ Dirava ese iena aneru oi dekenai do ia siaia,
idia ese oi do idia naria, oi emu loaloa gabudia ibounai dekenai.

¹² Idia ese edia imana dekena amo oi do idia dogoatao,
vadaeni oi emu aena be nadi dekenai bero do idia davaria lasi.

¹³ Oi ese laiona bona gaigai, bona laiona dagedagedia,
bona gaigai badadia danu, do oi moia diho.

¹⁴ Dirava ia gwau, “Lau idia lalokau henia taudia,
be lau ese do lau hamauria.
Bona lau idia diba,
bona edia Lohiabada dekenai lau idia abia dae taudia,
be do lau naridia namonamo.

¹⁵ Bema idia ese lau idia boiboio henia neganai,
lau ese idia dekenai do lau haere.

Hisihisi idia davaria neganai,
lau ese idia dekenai do lau noho.

Lau ese idia do lau hamauria,
bona taunimanima edia mataurai idia dekenai do lau henia.

¹⁶ Lau ese mauri daudau idia dekenai do lau henia,
edia davana namona.
Lau ese idia do lau hamauria momokani.”

92

Dirava hanamoa totona ane ta

¹ Lohiabada e,

oi be Atai ai Momokani Diravana,
ai tanikiu henia be namo.

Ane dekena amo oiemu ladana do ai abia isi be namo.

² Daba ibounai neganai,

oiemu noho hanaihanai lalokauna do ai gwauraia.

Hanuaboi ibounai neganai danu,

oiemu kara momokanidia do ai gwauraia.

³ Gita badadia bona miusiki gaudia haida dekena amo,

oiemu ladana do ai hanamoa.

⁴ Badina be, Lohiabada e,

oi ese oi karaia kara badadia ese lau idia hamoalea.

Oiemu gaukara badadia dainai,

mai moale bada danu ane lau abia noho.

⁵ Lohiabada e,

oi ese oi karaia gaukara be bada herea momokani,

bona oiemu laloa be dobu herea momokani.

⁶ Mai ena lalona lasi tauna be do ia diba lasi,

kavakava tauna danu ese,

inai gau ena anina ia davaria diba lasi:

⁷ Kara dika taudia be do idia tubu daekau,

ava idia tubu daekau bamona.

Bona kerere idia karaia taudia,

be kohu momo bona noho namo idia abia diba,

to oi ese idia do oi hadikaia ore.

⁸ Badina oi, Lohiabada,

be King Badana do oi noho ela bona hanaihanai.

⁹ Lohiabada e, ai diba oi dekenai idia tuari henia taudia,

be do idia mase,

bona kara dika taudia ibounai be oi ese do oi halusia.

¹⁰ Oi ese lau dekenai goada oi henia vadaeni,

uda boromakau tau ena goada hegeregerena.

Oi ese lau oi hanamoa,

vadaeni moale lau davaria.

¹¹ Lau itaia vadaeni, lau idia hadikaia gwauraia taudia,

be oi ese oi halusia vadaeni,

bona lau kamoni vadaeni danu,

lau dekenai idia kara dika taudia, edia taitai.

¹² Kara maoromaoro taudia,

be do idia tubu daekau namo herea momokani,

huahua namodia ia atoa au namona bamona.

Do idia tubu daekau,

Lebanona sida auna ia tubu hegeregerena.

¹³ Kara maoromaoro taudia,

be Lohiabada ena Ruma dekenai idia hadoa audia bamona.

Iseda Dirava ena Ruma lalonai,

be do idia tubu daekau namo herea momokani.

¹⁴ Idia buruka momokani neganai,

idia ese huahua do idia atoa noho.

Idia be nega ibounai idia goada noho,
 au raurau matamata idia atoa,
 bona idia be do idia kakoro diba lasi.
¹⁵ Inai edia kara ese ia hedinaraia noho, Lohiabada be ia maoromaoro.
 Lohiabada be egu Nadi Badana,
 bona iena lalonai be kara dika ta ia noho lasi.

93

Dirava be King

¹ Lohiabada be King.

Ia be mai ena ladana bada momokani.
 Ia be mai ena goada badana.

Ia ese inai tanobada ia karaia goada,
 bona haida ese idia hamarerea diba lasi.

² Lohiabada e,

gabu ibounai, taunimanima ibounai, bona gau ibounai,
 be idia do vara lasi neganai, oi be oi noho.

Oi be oi noho hanaihanai,

bona oi be do oi King ela bona hanaihanai.

³ Lohiabada e,

davara bada ena dobu gabudia ese edia gadodia idia habadaia.

Edia gadodia idia habadaia, bona idia boiboi bada noho,

⁴ Lohiabada e, oi be guba ena King momokani,

bona oiemu sياهو ese davara bada ena boiboi ia hereaia.

Ma oiemu goada ese davara ena hurehure bada ia hereaia.

⁵ Lohiabada e, oiemu taravatu be idia noho hanaihanai.

Momokani, oiemu Dubu Helaga be helaga momokani,

ela bona hanaihanai.

94

Dirava be taunimanima ibounai edia Kota Biaguna

¹ Lohiabada e, oi be dika ena davana oi henia Diravana.

Dika davana henia Diravana e,

oiemu diari do oi hedinaraia.

² Tanobada oi kota henia Diravana e, do oi toreisi,

hekokoroku taudia edia dika davana do oi henia.

³ Lohiabada e, kara dika taudia ese,

edia kara dikadia dekenai do idia moale noho, a?

Dika taudia do idia moale bada noho ela bona edena negai?

⁴ Inai kara dika taudia ibounai ese,

mai hekokoroku danu edia dika idia herevalaia,

be do idia hekokoroku noho ela bona edena negai?

⁵ Lohiabada e,

idia ese oiemu bese taudia idia moia diho noho.

Idia ese oiemu bese korikori taudia idia dagedage henia noho.

⁶ Idia ese vabu bona tamana sinana lasi maragidia idia alaia noho,

bona aiemai tano dekenai noho idau taudia idia alaia mase noho.

⁷ Idia gwau, "Lohiabada ese iseda kara ia itaia lasi,

Iakobo ena Dirava ese iseda kara ia laloa lasi."

⁸ Egu bese taudia e,

badina dahaka inai bamona umui be umui kavakava noho?
Kavakava taudia e, edena negai aonega do umui davarua?

⁹ Dirava ese iseda taiana ia karaia,
be Dirava ese ia kamoni diba lasi, a?

Dirava ese iseda matana ia karaia,
be Dirava ese ia itaia diba lasi, a?

¹⁰ Dirava ese bese idauidau ibounai ia biagua noho,
be ia ese edia dika davana do ia henia lasi, a?

Dirava be taunimanima ibounai edia hadibaia Tauna,
vadaeni ia be aonega lasi, a?

¹¹ Lohiabada ese taunimanima ibounai edia laloa ia diba.
Ia diba edia laloa be anina lasi.

¹² Lohiabada e, bema tau ta oi matakani henia neganai,
unai tau be do ia namo.

Oiemu taravatu ia dekenai oi hadibaia tauna danu,
be do ia namo, badina be,

¹³ iena hekwarahi dekena amo oi ese laga-ani oi henia noho.
To nega do ia ginidae, kara dika taudia hadikaia ore totona,
oi Dirava ese mase ena guri do oi geia.

¹⁴ Badina be Lohiabada ese iena bese taudia do ia rakatania lasi.
Iena abia hidi besena do ia rakatania lasi.

¹⁵ Badina kota biagudia ese mai maoromaoro bona momokani sibona,
kota hereva do idia gwauraia,
bona kara maoromaoro taudia ibounai ese,
inai kota maoromaorona do idia durua.

¹⁶ Daika ese do ia toreisi, lau do ia durua,
vadaeni kara dika taudia do ita koua?
Daika do ia toreisi, lauegu kahana dekenai do ia gini,
vadaeni kerere taudia do ita koua?

¹⁷ Bema Lohiabada ese lau ia durua lasi neganai,
lau be mai regerege lasi danu,
mase ena guri lalonai karaharaga do lau lao.

¹⁸ Lau gwau, "Lau be lau moru noho."

Unai neganai Lohiabada e,
oiemu lalokau bada ese lau ia abia isi lou.

¹⁹ Egu lalona ia hekwarahi momo neganai,
oi ese lau oi hagoadaia,
bona egu lauma oi hamoalea noho.

²⁰ Lohia dikadia be oi danu idia gaukara hebou diba, a?
Lasi momokani!

Idia ese taravatu idia atoa, inai taravatu ia gwau,
taunimanima ese kara dika idia karaia be namo.

²¹ Ma inai lohia dikadia ese,
tau namodia hadikaia totona idia laloa hebou noho,
bona kerere lasi taudia edia latanai,
kota hereva be mase idia gwauraia noho.

²² To Lohiabada be lauegu kohoro,
iena goada ese lau ia naria noho.

Egu Dirava ese lau ia gimaia noho.

²³ Dirava ese unai tau dikadia edia kerere davana,

be do ia henidia.
Edia dika dainai do ia hadikadia ore.
Lohiabada, iseda Dirava, ese idia do ia hadikaia ore momokani.

95

Dirava hanamoa ena ane

¹Umui mai! Lohiabada hanamoa totona, ane do ita abia.

Mai moale ena boiboi danu,
ita ia hamauria Nadi Badana do ita hanamoa!

²Lohiabada ena vairanai do ita haboua mai.
Ia hanamoa totona ane do ita abia, mai moale bada danu.

³Badina ia sibona be Dirava mai siahu badana.

Ia be King goadana,
bona dirava ibounai be ia ese ia hereaia.

⁴Ia ese tanobada ibounai ia biagua noho.
Tano lalonai idia noho guri dobudia bona nadi kohua badadia,
bona ororo badadia momokani danu,
be Lohiabada ena imana lalonai idia noho.

⁵Lohiabada ese davara, ia ese ia karaia gauna ia biagua noho,
tano gabudia ibounai danu ia ese ia biagua noho.
Ia ese unai gabudia danu ia karadia.

⁶Umui mai, iseda kwarana do ita atoa diho,

Lohiabada do ita tomadiho henia.
Lohiabada ena vairanai do ita tui diho.

Ia ese ita ia karaia vadaeni.

⁷Ia be iseda Dirava.
Ia ese ita ia naria namonamo,
ita be iena mamoe bamona,
bona ia ese ita dekenai aniani ia henia noho.

Hari dina iena hereva do umui kamona.

⁸Lohiabada ia gwau, "Oiemu lalona do oi ha-aukaia lasi,
oiemu sene taudia idia karaia bamona Meriba dekenai,
bona Masa ena taunimanima noho lasi gabuna dekenai danu.

⁹Unuseni idia ese lau idia dibagania,
lau dekenai idia abidadama lasi.
Idia ese lauegu kara badadia,
idia dekenai lau karaia gaudia idia itaia,
to lau dekenai idia abidadama lasi.

¹⁰Lagani 40 lalonai unai taudia ese lau idia habadua.

Lau gwau,
'Idia be abidadama diba lasi, idia be hekokoroku momokani,
bona egu hereva idia ura lasi idia kamona henia.'

¹¹Unai dainai lau be badu, bona lau hereva, lau gwau,
'Momokani, umui be tano namona dekenai do umui vareai lasi.
Lau ura unai gabu dekenai laga-ani umui do lau henia,
to umui be hegeregere lasi.'"

96

Dirava be King Badana momokani

¹Lohiabada dekenai ane matamatana do umui abia.

Tanobada dekenai noho taudia ibounai e,
Lohiabada dekenai ane do umui abia.

² Lohiabada dekenai ane do umui abia.

Iena ladana do umui abia isi!

Ia ese ita ia hamauria vadaeni!

Dina ibounai lalonai inai sivarai namona,

be taunimanima dekenai do ita gwauraia.

³ Lohiabada ena hairaina be bese idauidau ibounai dekenai,

do umui gwauraia hedinarai.

Iena kara badadia be idia ibounai dekenai do umui hadibaia.

⁴ Lohiabada be mai ena ladana badana,

inai ladana badana do ita abia isi noho be namo.

Ita ese taunimanima edia dirava idauidau do ita gari henia lasi.

Lohiabada sibona do ita gari henia bona matauraia.

⁵ Badina be tanobada bese idauidau edia dirava,

be dirava koikoi gaudia sibona.

To Lohiabada ese guba bona guba noho gaudia ia karaia vadaeni.

⁶ Lohiabada be mai ena hairaina,

bona mai King Badana ena siahu danu.

Iena Dubu Helaga lalonai,

iena siahu bona hairaina idia hedinarai noho.

⁷ Tanobada ena bese taudia ibounai e,

Lohiabada do umui hanamoa.

Iena hairaina bona iena goada badana do umui hanamoa.

⁸ Lohiabada ena ladana badana do umui abia isi,

bona boubou gauna do umui mailaia,

iena Dubu Helaga dekenai do umui henia.

⁹ Umui ese mai dabua namodia danu,

Lohiabada do umui tomadiho henia.

Iena vairana dekenai do umui tui diho mai gari danu.

¹⁰ Bese idauidau dekenai inai bamona do umui hereva,

do umui gwau, "Lohiabada be King!

Ia ese tanobada ia karaia goada,

bona tanobada do ia noho namonamo, do ia marere diba lasi.

Gabeai Lohiabada ese taunimanima ibounai do ia kota henia.

Iena kota be maoromaoro,

taunimanima be idauidau, badadia bona maragidia,

to maka tamona dekenai do ia kota henidia."

¹¹ Guba bona tanobada e, do umui moale!

Davara e, oi bona oi dekenai idia noho gaudia ibounai ese,

do umui toreisi, do umui boiboi.

¹² Uma gabudia ibounai e,

umui, bona umui dekenai idia noho aniani gaudia ibounai ese,

Lohiabada dainai do umui moale.

Iena vairana dekenai,

uda dekenai idia noho audia ibounai ese,

mai moale danu ane do idia abia.

¹³ Badina be, Lohiabada be do ia mai,

tanobada taudia do ia kota henia.

Ia ese tanobada taudia,

mai maoromaoro bona momokani danu do ia kota henidia.

Maka tamona dekenai do ia kota henidia.

97

Dirava be King Badana, ta ia hegeregerena be lasi

¹ Lohiabada be King! Tanobada, do oi moale!

Bona umui davara ena motumotu ibounai do umui moale bada!

² Ori bona dibura ese,

Lohiabada ena noho gabuna idia hunia noho.

Lohiabada ese taunimanima,

be mai maoromaoro bona momokani danu ia biagudia noho.

³ Lahi be Lohiabada ena vairana dekenai ia daekau lao noho,

bona ia dekenai idia tuari henia taudia,

idia hagegea noho taudia,

be unai lahi ese ia gabudia ore noho.

⁴ Lohiabada ena kevaru ese tanobada ia hadiaria noho.

Tanobada taudia idia itaia neganai idia heudeheude noho.

⁵ Ororo be kandolo bamona idia veve noho,

Lohiabada ena vairana dekenai,

badina ia be tanobada ena kahana ibounai ena Lohia Badana.

⁶ Guba ese Lohiabada ena kara maoromaoro ia gwauraia hedinarai noho.

Bese idauidau ibounai ese iena hairaina idia itaia noho.

⁷ Kaivakuku idia tomadiho henia taudia ibounai be do idia hemarai,

badina dirava ibounai,

be Lohiabada ena vairana dekenai do idia tomadiho.

⁸ Lohiabada e,

Siona dekenai noho taudia bona Iuda hanua taudia,

be oiemu kota hereva maoromaorodia dainai idia moale bada noho.

⁹ Badina Lohiabada e, oi be Atai ai Momokani Diravana,

tanobada kahana ibounai edia latanai.

Oi ese dirava ibounai oi hereaia noho momokani.

¹⁰ Lohiabada ese kara dika idia ura henia lasi taudia,

ia lalokau henidia noho.

Ia ese iena bese taudia, ia idia abidadama henia taudia,

edia mauri ia gimaia noho,

bona kara dika taudia edia siahu dekena amo,

ia ese iena taudia ia hamauria noho.

¹¹ Kara maoromaoro taudia dekenai,

Dirava ese diari ia henia noho,

bona taunimanima namodia dekenai,

ia ese iena moale ia henia noho.

¹² Kara maoromaoro taudia ibounai e,

Lohiabada ese ia karaia vadaeni karadia dainai do umui moale!

Dirava helagana ena kara do umui laloatao,

bona do umui tanikiu henia.

98

Dirava be tanobada ena biaguna

¹ Lohiabada hanamoia totona ane matamata do umui abia.

Ia ese hoa karadia ia karaia vadaeni.

Ia sibona ena siahu bona iena goada helagana dekena amo,

kwalimu ia abia vadaeni, iena.

² Lohiabada ese iena kwalimu ia gwauraia vadaeni.

Ia ese Israela ia hamauria neganai,

iena siahu ia hedinarai momokani bese idauidau dekenai.

³ Lohiabada ese Israela taudia dekenai iena gwauhamata ia hamomokania.

Ia ese Israela taudia ia lalokau henia noho,
bona ia ese idia ia rakatania lasi.
Tanobada bese idauidau ibounai ese,
iseda Dirava ena kwalimu idia itaia vadaeni.

⁴ Tanobada taudia ibounai e,
mai moale bada danu ane do umui abia Lohiabada dekenai!
Mai moale danu Lohiabada do umui hanamoa,
mai boiboi, bona mai ane abia danu.

⁵ Lohiabada do umui hanamoa ane dekenai!
Gita badadia dekenai miusiki do umui gadaralaia.

⁶ Kibi badadia bona kibi maragidia do umui hiriria.
Regena mai moale danu, iseda King, Lohiabada,
hanamoa totona do umui karaia.

⁷ Davara e, oi bona oiemu lalonai gwarume gaudia ibounai e,
do umui boiboi bada herea.
Bona tanobada, oi bona oi dekenai idia noho taudia ibounai e,
ane do umui abia goada herea.

⁸ Sinavai ibounai e, emui imana do umui patapataia,
bona ororo ibounai e,
umui ese ane do umui abia hebou mai moale danu,
Lohiabada ena vairana dekenai.

⁹ Badina Lohiabada be ia mai noho,
tanobada do ia biagua momokani totona.

Ia ese tanobada do ia kota henia mai maoromaoro danu,
bona tanobada ena bese idauidau edia ahuna korikori,
idia dekenai do ia henia.

99

Dirava be King Badana momokani

¹ Lohiabada be King!

Tanobada ena bese idauidau idia heudeheude noho.
Lohiabada be iena terona dekenai ia helai noho, kerubi edia huanai.
Tanobada ia mareremarere noho.

² Lohiabada be Siona lalonai, bona iena siahu be bada herea,
ma Lohiabada ese bese idauidau ia biagua noho.

³ Taunimanima ibounai ese,
Lohiabada ena ladana badana bona mai garina, be do idia hanamoa.
Lohiabada be helaga!

⁴ Siahu Bada ena King e,
oi ese kota maoromaorona oi ura henia noho.
Oi ese taunimanima edia ahuna korikori,
be idia dekenai oi henia noho.
Oi ese kota maoromaoro Israela dekenai oi haginia vadaeni.
Oi ese kara maoromaoro bona kara namona oi karaia noho.

⁵ Lohiabada, iseda Dirava do umui hanamoa.
Iena terona ena vairana dekenai do umui tomadiho henia.
Lohiabada be helaga!

⁶ Mose bona Arona ruaosi be iena hahelagaia taudia.
Samuela danu be Lohiabada ena ladana ia gwauraia tauna ta.
Idia ese Lohiabada dekenai idia boiboi,

bona ia ese idia dekenai ia haere.

⁷ Ori badana dekena amo ia ese idia dekenai ia hereva.
Idia ese iena oda idia badinaia,
bona ia henidia taravatu danu idia badinaia.

⁸ Lohiabada e, aiemai Dirava, oi ese idia dekenai oi haere.
Oiemu bese taudia dekenai, oi be dika gwauatao Diravana,
to oi be edia dika davana henia Diravana danu.

⁹ Lohiabada, iseda Dirava do umui hanamoa.
Iena ororo helagana dekenai do umui tomadiho,
badina be Lohiabada, iseda Dirava, be helaga.

100

Lohiabada ena ladana abia isi ena ane

¹ Tanobada taudia ibounai e,
umui ese Lohiabada hanamoa totona ane do umui abia!
² Lohiabada do umui tomadiho henia,
mai emui moale danu.
Lohiabada ena vairana dekenai umui mai, mai moale anedia danu.
³ Do umui diba momokani, Lohiabada sibona be Dirava.
Ia sibona ese ita ia karaia, bona ita be iena.
Ita be iena bese taudia,
ita be iena mamoe, ia ubua gaudia.

⁴ Lohiabada ena Dubu Helaga lalonai do ita raka vareai,
mai tanikiu danu.
Iena Ruma lalonai Lohiabada ena ladana do ita abia isi,
Lohiabada do ita tanikiu henia.
Iena ladana do ita hanamoa bada,
⁵ badina be Lohiabada ena kara be namo.
Iena lalokau bona bogahisihisi,
be do idia noho ela bona hanaihanai.
Ia ese iena hereva bona iena kara,
be do ia haidaua lasi ela bona hanaihanai.

101

King ena gwauhamata

¹ Lohiabada e, ane ta lau abia inai,
abidadama kara bona kota maoromaoro kara lau herevalaia inai.
Lohiabada e,
oi dekenai inai ane lau abia,
oi do lau hanamoa totona.
² Lau ese kara maoromaoro dalana sibona do lau badinaia.
Lohiabada e,
edena negai lau dekenai do oi mai?

Egu ruma dekenai do lau noho namonamo, mai egu kerere ta lasi.
³ Lau ese kara dika ta do lau ura henia lasi, lasi momokani.

Dirava idia ura lasi taudia edia kara,
be lau ura lasi momokani.
Idia danu do lau noho lasi, lasi momokani.
⁴ Lau ese koikoi karadia do lau karaia lasi,
bona kara dika ta do lau laloa lasi momokani.

⁵ Bema tau ta ese ma tau ta hunia dekenai ia samania neganai,
lau ese unai samania hereva ia gwauraia tauna,
be do lau alaia mase.
Lau ese hekokoroku taudia danu do lau noho lasi.

⁶ Dirava idia abidadama henia taudia,
be be mai laloa namo danu do lau abia dae.
Idia be lau dekenai do idia noho.
Kerere lasi taudia sibona,
be lauegu hesiai gaukara do idia karaia.

⁷ Koikoi karadia idia karaia noho taudia,
be egu ruma dekenai do idia noho lasi.
Koikoi hereva ia gwauraia noho tauna ta,
be egu vairana dekenai do ia gini noho lasi.

⁸ Dina ta ta dekena amo, lau ese kara dika taudia ibounai,
be inai tano dekenai do lau alaia mase.
Dika taudia ibounai be,
Dirava ena hanua dekena amo do lau lulua ore.

102

Mai ena hisihisi eregabe tauna ta ena guriguri

¹ Lohiabada e, egu guriguri do oi kamonai.

Lau do oi durua totona,
egu noinoi mani do oi kamonai henia.

² Egu hisihisi dinana dekenai,
oiemu vairana be lau dekena amo mani do oi hunia lasi.
Egu hereva mani do oi kamonai,
bona lau boiboi neganai,
mani emu kara lau dekenai do oi haere haraga.

³ Badina be egu mauri dinadia be idia ore haraga,
kwalahu ia ore haraga bamona,
bona egu kopina be ia siahu bada,
lahi ese ia gabua noho bamona.

⁴ Egu kudouna be ia manoka,
taunimanima ese idia moia patapata rei bamona.

Lau be aniani ania lau ura lasi.

⁵ Mai boiboi danu lau tai noho,
bona egu tauanina be ia maragi lao noho.

⁶ Lau be manu ta,
tano kaukau dekenai sibona ia noho gauna bamona.

Lau be baimumu manu bamona,
ia dika vadaeni taunimanima noho lasi gabuna dekenai lau noho.

⁷ Mahuta patana dekenai lau hekure noho,
to lau noga noho ela bona dabai.

Lau be ruma ena guhi dekenai sibona ia noho manu bamona.

⁸ Dina bona hanuaboi,
lau idia hadikaia gwauraia taudia ese lau idia kirikirilaia noho.

Lau idia kirikirilaia taudia ese,
egu ladana be hadikaia gauna idia halaoa noho.

⁹ Badina lau ese aniani totona lahi ena kahu lau ania noho,

bona egu matana ena ranu,
be egu inua ranu kapusi lalonai ia diho, lau inua noho.

¹⁰ Inai be oiemu badu bona dagedage dainai,
badina be oi ese lau oi abia isi,
bona lau oi negea siri vadaeni.

¹¹ Egu mauri dinadia be nega kwadogina sibona,
hegeregere dina be adorahi neganai ia diho bamona.
Lau be rei ia kakoro haraga bamona.

¹² To Lohiabada e, oi be King, ia lao bona hanaihanai.
Gabei do idia vara bese ibounai taudia ese,
oiemu ladana do idia laloa noho.

¹³ Oi be do oi toresi, Siona do oi bogahisihisi henia.
Nega ia ginidae vadaeni,

oi ese Siona dekenai do oi laloa namo henia.
Oi gwauraia guna ena nega ia ginidae vadaeni.

¹⁴ Badina be oiemu hesiai taudia ese,
Siona ena nadi ibounai idia ura henia noho,
bona Siona ena tano kahuna idia lalokau henia noho.

¹⁵ Bese idauidau ese Lohiabada ena ladana do idia gari henia.
Tanobada ena king taudia ibounai ese,
oiemu hairaina do idia matauraia.

¹⁶ Badina be Lohiabada ese Siona do ia haginia lou,
bona ia ese iena siau badana do ia hedinaraia.

¹⁷ Ia ese iena bese ena ogogami taudia edia guriguri,
be do ia kamoni,
bona edia noinoi do ia laloa.

¹⁸ Inai kara, Lohiabada ese ia karaia vadaeni gaudia,
be do umui torea,
gabeai do idia vara bese taudia do idia diba totona,
bona idia do vara lasi taudia ese,
unai neganai Lohiabada do idia hanamoa.

¹⁹ Lohiabada ese iena gabu helagana dekena amo,
iena matana ia negea.

Guba dekena amo Lohiabada ese tanobada ia itaia.

²⁰ Dibura ruma dekenai idia noho taudia edia taitai ia kamoni,
bona kota hereva ia gwau do idia mase taudia,
be Lohiabada ese dibura dekena amo ia kokia ruhaia.

²¹ Unai dainai Lohiabada ena ladana,
be Siona taudia ese do idia abia isi,
bona Ieruselema dekenai Lohiabada do idia hanamoa.

²² Unai neganai bese idauidau bona basileia idauidau,
be do idia haboua,
idia ese Lohiabada do idia tomadiho henia.

²³ Lau be uhau sibona neganai,
Lohiabada ese egu goada ia hamaragia.
Ia ese egu mauri dinadia ia hakwadogia,
vadaeni do lau mauri daudau lasi.

²⁴ Unai dainai lau gwau:

Egu Dirava e, oi noho hanaihanai.
Mani emu kara egu mauri dinadia do oi utua haraga lasi!
Lau be buruka lasi,

lau be do uhau sibona!

²⁵ Oi ese gunaguna tanobada oi karaia,
bona oiemu imana dekena amo guba danu oi karaia.

²⁶ Idia be do idia ore,
to oi be do oi noho.
Idia be do idia dika lao,
dabua idia dika lao bamona.
Bona oi ese idia do oi negea,
dabua gunadia idia negea bamona,
ma do idia boio momokani.

²⁷ To Lohiabada e,
oi be do oi idau lasi,
bona oiemu mauri lagani do idia doko lasi.

²⁸ Ai, oiemu hesiai taudia,
aiemai natudia be oi ese do oi naridia dainai,
do idia noho namonamo,
bona edia bese taudia danu,
be oiemu vairana dekenai do idia noho namonamo nega ibounai.

103

Dirava ena lalokau

¹ Lauegu lauma e,
Lohiabada do oi hanamoa.
Lauegu lalona e,
Lohiabada ena ladana helagana do oi hanamoa.

² Lauegu lauma e,
Lohiabada do oi hanamoa.
Iena hariharibada ibounai do oi laloaboio lasi.

³ Ia ese egu kara dika ibounai ia gwauatao noho.
Ia ese egu gorere ibounai dekena amo lau ia hamauria noho.

⁴ Lauegu mauri be mase ena guri dekena amo,
Lohiabada ese ia hamauria noho.
Ia ese lalokau bona bogahisihisi lau dekenai ia henia noho.

⁵ Lauegu mauri be gau namodia dekena amo ia ubua noho.
Unai dainai egu eregabe be ia matamata lou,
ugava manu ena goada bamona.

⁶ Dagedage taudia ese idia hadikaia taudia,
be Dirava ese ia durudia noho,
bona mai kara maoromaoro bona laloa maoromaoro danu,
ia ese edia kota do ia karaia.

⁷ Lohiabada ese iena dala Mose dekenai ia hadibaia,
bona iena kara danu,

be Lohiabada ese Israela taudia dekenai ia hedinarai.
⁸ Lohiabada be mai ena bogahisihisi, bona mai ena hariharibada.

Ia ese iena badu ia hakerua noho.
Iena lalokau bona bogahisihisi be bada herea.

⁹ Ia ese ita do ia gwau henia hanaihanai lasi.

Iena badu be hanaihanai do ia noho lasi.

¹⁰ Iseda kara dika ena bada hegeregere davana ia henia lasi.

Ita ese kara dika momo ita karaia vadaeni,
bona Dirava ese kerere davana bada herea ia henia diba,
to unai bamona ia karaia lasi.

¹¹ Dirava ese ia dekenai idia gari taudia,

be ia lalokau henia momokani.

Iena lalokau idia dekenai be bada herea,
hegeregere guba be tanobada ena ataiai daudau herea ia noho bamona.

¹² Dina ia daekau kahana,

bona dina ia diho kahana be daudau herea.

Unai daudauna hegeregere be Dirava ese,

iseda kara dika ita dekena amo ia kokidia lao vadaeni.

¹³ Tamana taudia be edia natuna dekenai idia bogahisihisi noho.

Inai bamona danu Lohiabada ese,

ia dekenai idia gari taudia ia bogahisihisi henidia noho.

¹⁴ Dirava ia diba,

ita be tanobada ena kahu dekena amo ita ia karaia.

Bona ita dekenai ia laloa noho, ita be kahu sibona.

¹⁵ Iseda mauri tanobada dekenai be kwadogi momokani,

rei bamona.

Ita be au ena herahera bamona nega sisina sibona ita noho,

vadaeni ita mase.

¹⁶ Lai ese unai herahera ia hodaia lao,

vadaeni ia boio,

bona taunimanima idia itaia lou lasi.

¹⁷ To Lohiabada idia gari henia taudia,

be Lohiabada ese do ia bogahisihisi henidia hanaihanai,

bona ia dekenai idia gari taudia edia natudia bona tubudia,

be Lohiabada ese do ia hanamodia momokani.

¹⁸ Bona bema Lohiabada ena gwauhamata taravatuna,

be idia badinaia bona matauraia,

bona iena taravatu ibounai bema idia kamoni henia,

mai edia momokani danu,

ia ese idia do ia gwauraia maoromaoro taudia.

¹⁹ Lohiabada be guba ena King momokani,

bona ia be taunimanima, aneru, bona gau ibounai edia biaguna.

²⁰ Lohiabada ena aneru ibounai e,

umui be mai emui goada badana.

Umui ese Lohiabada ena hereva umui badinaia noho,

bona emui taiana umui kehoa noho Lohiabada ena hereva dekenai.

Lohiabada ena ladana do umui hanamoa bada.

²¹ Lohiabada ena hesiai taudia,

guba dekenai umui noho, bona Lohiabada ena ura umui karaia noho.

Umui ese Lohiabada ena ladana do umui abia isi.

²² Lohiabada ese ia karaia gaudia ibounai,

ia ese ia biagua gabu ibounai dekenai umui noho,

Lohiabada ena ladana do umui hanamoa bada.

Egu lauma e,

Lohiabada do oi hanamoa bada!

104

Dirava ese gau ibounai ia karaia. Ita ese ia do ita hanamoa

¹ Lauegu lauma e,

Lohiabada do oi hanamoa.

Lohiabada e, oi be lauegu Dirava,

oiemu siahua be bada herea momokani.

Oi be King hereadaena,

oiemu hairaina be namo herea momokani.

² Oi sibona dekenai diari oi atoa, dabua bamona.

Oi ese guba bona hisiu oi karaia,
tau ta ese palai ruma ia haginia bamona,

³ bona oi ese oiemu ruma,
be ranu ena latanai oi haginia, guba dekenai.

Ori be oiemu kariota bamona,
bona lai ese oi ia hodaia, oi heau lao.

⁴ Oi ese lai oi siaia lao,
idia ese oiemu hesiai gaukara idia karaia noho.
Kevaru danu ese oiemu gaukara ia karaia noho.

⁵ Oi ese inai tanobada oi karaia goada,
ena gabu korikori dekenai,
bona inai tanobada ia goada noho,
ia marere sisina diba lasi, lasi momokani.

⁶ Oi ese davara oi karaia,
ia ese tano ia koua noho.
Ena ranu ese danu ororo ibounai ia koua.

⁷ Oi ese unai ranu oi gwau henia neganai,
ia heau lou, ia giroa lou.
Davara bona ranu ese,
oiemu oda mai boiboio danu idia kamonai neganai,
idia heau lou momokani.

⁸ Ranu ese ororo ibounai idia rakatania,
bona koura gabudia dekenai idia diho lao.
Oi ese maka oi atoa unai ranu do ia noho totona.

⁹ Oi ese maka oi atoa,
vadaeni ranu ese unai maka do ia hanaia diba lasi,
vadaeni unai tano do ia koua lou diba lasi.

¹⁰ Oi ese koura gabudia dekenai,
guri dekena amo ranu oi abia daekau,
bona sinavai oi siaia,
idia ese ororo edia huanai dekenai idia heau lao.

¹¹ Uda boroma idauidau ese unai ranu idia inua noho,
bona uda doniki danu ese idia inua,
vadaeni edia ranu mase ia ore.

¹² Atai ai dekenai idia roho manudia edia ruma,
be unai sinavai badinai audia lalonai idia karaia.
Idia be unai gabudia lalonai idia helai,
ane idia abia noho.

¹³ Lohiabada e, oiemu gabu, guba dekenai oi noho.
Oi ese medu oi siaia diho, ororo edia latanai ia moru,
bona tano be oiemu hanamoa gaudia dekenai ia honu.

¹⁴ Oi ese rei oi hatubua,
boromakau do idia ania totona.
Oi dainai, ai taunimanima ese,
aniani avadia idauidau ai hadoa diba, aiemai aniani totona:

¹⁵ Ai ese vain ai hadoa diba,
bona uaina ai karaia,
aiemai lalona do idia moale totona.
Bona ai ese olive ai havaraia diba,
olive ena dehoru ese aiemai kopina do ia hanamoa totona.
Bona oi dainai ai ese uiti uhena ai hadoa diba,
bona uiti dekena amo beredi ai karaia,

aiemai tauanina do idia goada totona.

¹⁶ Lebanona ena sida audia idia noho gabuna dekenai,
be medu momo ia diho.

Inai audia be Lohiabada sibona ena,
ia ese idia ia hadoa.

¹⁷ Unai sida audia lalonai,
ataiai manudia ese edia ruma idia karaia.

To aiona lata manudia,
be au idauidau lalonai edia ruma idia karaia.

¹⁸ Uda nanigosi be ororo badadia lalonai idia noho,
bona magani ese,
ororo ena nadi badadia henunai idia hunia noho.

¹⁹ Lohiabada e,
oi ese hua oi karaia,
bona ia ese aiemai lagani ena hua ta ta ibounai ia makaia noho.
Bona dina danu oi karaia,
ia be ena diho negana ia diba.

²⁰ Oi ese dibura oi karaia vadaeni,
hanuaboi ena nega be unai.

Uda boroma idauidau be hanuaboi lalonai idia raka loaloa noho.

²¹ Laiona be idia labana neganai idia boiboibo noho.

Idia ese Dirava ia henia aniani idia tahua noho.

²² Dina ia daekau neganai,
idia ese edia noho gabudia dekenai idia giroa lou, idia hekure.

²³ Bona taunimanima idia toreisi,
edia gaukara idia karaia noho, ela bona dina ia diho.

²⁴ Lohiabada e, oi ese gau ibounai oi karaia vadaeni.

Mai oiemu aonega bada danu idia ibounai oi karaia.

Inai oi ese oi karaia gaudia ibounai ese,
inai tanobada idia hahonua momokani.

²⁵ Davara be ia bada herea momokani,
bona mauri gaudia momo,

badadia bona maragidia,
be davara lalonai idia noho,

duahia diba lasi.

²⁶ Sisima idauidau ese davara dekenai idia heau noho,
bona dagedage gauna badana momokani,

ladana Leviatano be davara lalonai ia gadara noho.

Oi ese gunaguna unai dagedage gauna badana oi karaia.

²⁷ Idia ibounai be oi dekenai idia naria noho,

badina oi ese edia aniani oi henia.

Idia hitolo neganai aniani oi henidia.

²⁸ Oi ese aniani idia dekenai oi henia, bona idia ania.

Oi sibona ese oi henia,
bona edia bogana idia kunu.

²⁹ Bema oi ese idia dekena amo oi raka siri sisina,
unai neganai idia be idia gari.

Bona bema oi ese edia lagana oi hadokoa neganai,
idia be idia mase,

bona kahu dekenai ma idia giroa lou,

kahu ma idia do oi halaoa lou.

³⁰ To bema laga oi henidia neganai,

idia be mauri idia davaria.
Oī ese gau ibounai oī karaia matamata diba tanobada dekenai.

³¹ Lau ura Lohiabada ena ladana bada bona iena hairaina,
be hanaihanai do ia noho!
Lau ura ia ese ia karaia vadaeni gaudia dainai,
be do ia moale.

³² Lohiabada ese tano ia itaia neganai,
unai tano be ia heudeheude.
Ia ese ororo dekenai iena imana ia atoa neganai,
kwalahu be unai ororo dekenai ia daekau.

³³ Lauegu mauri dinadia idia do noho neganai,
lau ese Lohiabada dekenai ane do lau abia.
Lau ese ane dekenai Lohiabada do lau hanamoa noho,
ela bona lau mase.

³⁴ Lau ura egu ane dekenai Lohiabada do ia moale,
badina be egu moale, be ia dekena amo lau abia vadaeni.

³⁵ Lohiabada e,
oī ese kara dika taudia tanobada dekena amo do oī lulua,
do oī hadikadia ore.
Kara kerere taudia do oī haorea momokani.

Lauegu lauma e,
Lohiabada do oī hanamoa bada,
Lohiabada do oī hanamoa.

105

Dirava, bona iena bese taudia

¹ Lohiabada do ita tanikiu henia,
bona iena ladana badana do ita gwauraia hedinarai.
Tanobada ena bese idauidau ibounai dekenai,
Lohiabada ena kara badadia do ita hamaoroa.

² Ane do ita abia,
bona Lohiabada ena ladana do ita abia isi.
Iena kara badadia bona namodia,
ia ese ia karaia gaudia do ita gwauraia hedinarai.

³ Ita be Lohiabada ena, unai dainai do ita moale bada noho.
Lohiabada idia tahua taudia edia lalona be do idia moale.

⁴ Durua totona Lohiabada dekenai ita lao be namo,
bona Lohiabada kahirakahira do ita noho nega ibounai be namo.

⁵⁻⁶ Umui be Aberahamo, Lohiabada ena hesiai tauna ena tubuna.
Umui be Iakobo, Lohiabada ese ia abia hidi tauna,
ena tubuna taudia danu.

Dirava ese ia karaia kara badadia do umui lalao,
bona tau dikadia edia kerere davana be Dirava ese ia henia,
be unai danu do umui lalao.

⁷ Lohiabada be iseda Dirava.
Iena taravatu be inai tanobada taudia ibounai totona,
ia ese ia karadia.

⁸ Lohiabada ese ia karaia gwauhamata taravatuna,
be hanaihanai do ia badinaia.
Iena gwauhamata danu be do ia lalao noho uru ibounai 1000.

⁹ Aberahamo danu Lohiabada ese ia karaia gwauhamata taravatuna,
be ia ese do ia badinaia,

Isako dekenai ia karaia gwauhamata danu do ia hamomokania.

¹⁰ Lohiabada ese Iakobo danu gwauhamata taravatuna ia karaia.

Inai be ia noho hanaihanai gauna.

Ia ese inai gwauhamata taravatuna Israela ena bese danu ia karaia, bona inai be do ia doko diba lasi gauna.

¹¹ Lohiabada ese Iakobo dekenai ia hereva inai bamona:

“Lau ese Kanana tano oi dekenai do lau henia, bona inai tano be oi bona oiemu tubuna ese do umui biagua.”

¹² Dirava ena bese taudia be momo lasi,

bona idia be idau taudia bamona Kanana dekenai idia noho.

¹³ Tano dekenai idia noho namonamo lasi,

to tano kahana dekena amo idia loaloa, ela bona tano kahana dekenai.

King ta ena tano dekenai nega sisina idia noho,

vadaeni ma idia toreisi,

king ma ta ena tano dekenai idia lao.

¹⁴ To Lohiabada ese Israela besena ia naria,

dagedage bona dika momokani dekena amo ia ese ia gimadia.

Bona Lohiabada ese king haida ia sisiba henidia,

Israela taudia do idia hadikaia lasi totona.

¹⁵ Lohiabada ia gwau,

“Lau ese lau abia hidi bese taudia,

be do umui hisihisi henidia lasi.

Lauegu peroveta taudia do umui hadikaia lasi.”

¹⁶ Lohiabada ese hitolo bada edia tano dekenai ia havaraia.

Edia aniani ibounai idia dekena amo ia kokia.

¹⁷ To Lohiabada ese Iosepa ia siaia guna,

Aigupito dekenai ia noho guna.

Idia hoia, hesiai tauna mai guia danu idia halaoa.

¹⁸ Iena aena be seini dekena amo idia kwatua,

unai be mai hisihisi,

bona iena aiona dekenai auri dekena amo idia guia.

¹⁹ Unai bamona ia noho,

ela bona ia ese ia gwauraia guna hereva be idia vara.

Lohiabada ena hereva ese,

ia hedinaraia Iosepa ena hereva be maoro.

²⁰ Unai neganai Aigupito ena king ese,

dibura ruma dekena amo Iosepa ia ruhaia.

Unai idau bese ena king ese,

Iosepa ena hisihisi dibura ruma lalonai ia haorea.

²¹ King ese Iosepa dekenai gaukara badana ia henia,

ia ese iena gavamani ena gunalaia tauna ia halaoa.

Vadaeni Iosepa be Aigupito ena gavana badana ia lao.

²² Ia ese king ena opesa taudia ia biagua,

bona ia ese,

king idia sisiba henia taudia ia hadibaia dahaka do idia gwau.

²³ Gabeai Iakobo be Aigupito dekenai ia lao,

Aigupito dekenai ia noho.

²⁴ Lohiabada ese,

natuna bona tubuna momo herea Iakobo dekenai ia henia,

bona idia edia goada ese,

idia dagedage henidia taudia edia goada ia hereaia.

25 Vadaeni Lohiabada ese Aigupito taudia edia laloa ia haidaua.
 Idia ese Israela taudia idia badu henia,
 bona idia ese edia hesiai taudia, Israela taudia,
 idia koia noho.

26 Lohiabada ese Mose ia siaia,
 Arona danu, ia abia hidi tauna, be Lohiabada ese ia siaia.

27 Idia ese Dirava ena kara badadia idia karaia,
 Aigupito dekenai hoa karadia idia karaia.

28 Dirava ese Aigupito dekenai dibura ia siaia,
 tano ibounai ia dibura.

To Aigupito taudia ese iena oda hereva idia kamona henia lasi.

29 Aigupito taudia edia ranu gabudia,
 be rara dekenai Dirava ese ia halaoa,
 bona edia gwarume ibounai idia mase.

30 Edia tano be Lohiabada ese paroparo dekena amo ia hahonua.
 Edia king ena ruma dekenai danu paroparo idia noho.

31 Dirava ese ia oda,
 vadaeni lao momo idia mai,
 bona nemo momo danu ese edia tano ibounai idia hahonua.

32 Dirava ese medu momokani ia siaia diho lasi,
 to aisi nadi bamona ia siaia diho,
 bona kevaru danu Aigupito tano dekenai ia havaraia.

33 Aigupito taudia edia vain audia,
 bona edia fig audia Dirava ese ia hadikaia ore,
 bona au ibounai danu ia hamakohia ore.

34 Lohiabada ia hereva sibona,
 vadaeni kwadi momo herea idia hedinarai.
 Idia be momo herea, duahia diba lasi.

35 Kwadi ese tano ena ava bona au edia raudia idia ania ore.
 Uiti bona koni ibounai danu idia ania ore.

36 Bona Dirava ese Aigupito edia famili ibounai,
 edia vara guna natuna tau ia alaia mase.

37 Unai neganai Dirava ese Israela taudia ibounai,
 be Aigupito dekena amo ia hakaua.

Idia ese siliva bona golo idia huaia mai,
 bona idia ibounai be mai edia mauri namo,
 bona mai edia goada danu.

38 Aigupito taudia be Israela taudia dainai idia gari.
 Vadaeni Israela taudia idia toreisi, idia raka siri neganai,
 Aigupito taudia idia moale.

39 Dirava ese iena bese taudia,
 be ori dekena amo ia koudia,
 bona hanuaboi lalonai ia ese lahi badana ia atoa,
 diari do idia abia totona.

40 Idia be aniani totona idia noinoi,
 vadaeni Dirava ese kibi manudia ia siaia diho,
 bona aniani momo be guba dekena amo ia siaia, ia henidia.

41 Nadi badana be Dirava ese ia kehoa,
 bona ranu be ia heau lao.
 Tano kaukau dekenai ia heau, sinavai bamona.

42 Badina be Dirava ese iena gwauhamata helagana ia laloa noho,
 iena hesiai tauna Aberahamo dekenai ia henia gauna.

⁴³ Unai bamona be Dirava ese,
 iena abia hidi bese taudia ia hakaudia mai.
 Idia ese mai ane bona mai moale bada danu idia raka lao.

⁴⁴ Bese idau idia edia tano be Dirava ese ia henidia,
 vadaeni idia ese unai bese taudia edia tano ena anina,
 be idia abia.

⁴⁵ Lohiabada ese unai bamona ia karaia,
 Israela taudia ese iena oda hereva ibounai,
 bona iena taravatu ibounai,
 do idia kamonai henia totona.
 Lohiabada do ita hanamoa bada!

106

Lohiabada ese iena bese taudia ia naria namonamo

¹ Lohiabada do umui hanamoa!

Lohiabada do umui tanikiu henia, badina ia be namo.

Iena lalokau bona bogahisihisi do idia noho ela bona hanaihanai.

² Daika ese Lohiabada ena siahu karadia ia herevalaia diba?

Daika ese Lohiabada do ia hanamoa haorea momokani diba?

³ Mai edia laloa maoromaoro bona edia momokani taudia be namo.

Nega ibounai kara maoromaoro idia karaia taudia danu be namo.

⁴ Lohiabada e, oiemu ore a taudia do oi hanamoa neganai,

lau danu do oi laloa.

Oiemu bese taudia oi hamauria neganai,

lau danu do oi durua.

⁵ Unai neganai lau ese,

oiemu abia hidi taudia edia noho namo do lau itaia,

bona edia moale be do lau moalelaia.

Ai be do ai moale,

badina ai be oiemu bese korikori taudia.

⁶ Ai ese ai kara dika, aiemai tamadia idia kara dika bamona.

Ai ese ai kara kerere,

bona dika ai karaia vadaeni.

⁷ Aiemai sene taudia be Aigupito dekenai idia noho neganai,

idia ese oiemu hoa karadia idia laloa lasi.

Oiemu lalokau nega momo oi hedinarai, to idia laloatao lasi.

Bona idia ese Siahu Ibounai Dirava dekenai idia dagedage,

Davara Kakakaka dekenai.

⁸ To iena gwauhamata dainai, ia ese idia ia hamauria,

iena siahu badana do ia hedinarai totona.

⁹ Davara Kakakaka be ia ese ia gwau henia,

vadaeni ia kaukau lao.

Ia ese dobu gabuna dekena amo iena bese ia hakaudia,

tano kaukau dekena amo do ia hakaudia hegeregerena.

¹⁰ Unai kara dekena amo Dirava ese Israela taudia ia hamauria,

idia badu henidia taudia dekena amo.

Idia hadikaia ore gwaurai taudia dekena amo,

Dirava ese ia hakaudia mauri.

¹¹ Davara ese Israela idia badu henia taudia ia koua momokani,

bona idia ta ia heau mauri lasi.

¹² Unai neganai,

Israela taudia ese Lohiabada ena gwauhamata idia hamomokania,

bona ia hanamoa totona ane idia abia.

¹³ To idia ese Lohiabada ena kara idia laloaboio haraga.

Iena sisiba kamona totona idia naria lasi.

¹⁴ Tano kaukau dekenai Israela taudia idia ura kava, ura kava noho, bona unuseni idia ese Dirava idia tohoa.

¹⁵ Vadaeni ia ese edia ura gauna ia henidia, to gorere dikana ia siaia, idia edia tauanidia ia hadikaia.

¹⁶ Idia edia kamepa dekenai idia ese Mose bona Arona, Lohiabada ena helaga taudia idia mama henia.

¹⁷ Unai neganai tano ese iena uduna ia kehoa, guri badana ia vara, bona Datana be unai guri lalonai ia moru, tano ese ia koua, ia mase.

Inai guri ese Abirama ena ore taudia danu ia hadonoa, ibounai be tano ese ia koudia, idia mase.

¹⁸ Lahi danu be edia ore taudia edia latanai ia diho, bona unai tau dikadia ia gabudia ore.

¹⁹ Sinai Ororo dekenai Israela taudia ese, boromakau ena natuna ena laulauna idia karaia. Idia ese unai golo kaivakuku dekenai idia tomadiho henia.

²⁰ Idia ese Dirava ena hairaina idia rakatania, bona boromakau tau, rei ia ania gauna ena laulau, be Dirava ena gabu dekenai idia atoa.

²¹ Idia ese Dirava, edia hamauria Diravana, Aigupito dekenai kara badadia ia karaia Diravana idia laloaboio.

²² Ia ese Hamo ena tano dekenai hoa karadia ia karaia, bona Davara Kakakaka ena isena dekenai, gari bada karadia ia karaia, ani?

²³ Vadaeni Dirava ia gwau iena bese taudia do ia hadikaia ore, to ia ese ia abia hidi tauna Mose, be unai bese taudia bona Dirava edia huanai ia gini. Mose ese Dirava ena badu ia hakerua, ia ese iena bese taudia do ia alaia ore garina.

²⁴ Unai murinai idia ese, Dirava ia herevalaia tano namona idia ura lasi. Idia ese Dirava ena gwauhamata idia abidadama henia lasi.

²⁵ Edia palai rumadia dekenai idia hereva badubadu, bona Lohiabada ena hereva idia kamona henia lasi.

²⁶ Unai dainai ia ese sisiba metauna idia dekenai ia henia. Ia gwau tano kaukau dekenai ia ese idia do ia hamasea,

²⁷ bona ia ese edia natudia, be bese idau idau edia huanai do ia luludia lao, vadaeni idau bese taudia edia tanodia dekenai do idia mase.

²⁸ Bona Peoro dekenai, Dirava ena bese taudia ese Bala dirava idia tomadiho henia, unai mauri lasi dirava dekenai idia henia boubou vamu idia ania.

²⁹ Inai kara dekena amo idia ese Lohiabada idia habadua, vadaeni hanaia gorere dikana be idia dekenai ia vara.

³⁰ To Pineha ese ia toreisi,

bona kerere taudia edia dika davana ia henia,
vadaeni unai gorere dikana be Dirava ese ia hadokoa.

³¹ Unai negana ia mai bona hari,
Pineha ena kara ai gwauraia be maoromaoro.
Bona gabeai do idia vara taunimanima danu ese,
Pineha ena kara maoromaoro do idia herevalaia noho,
ela bona nega ibounai.

³² Meriba ranu gabudia dekenai,
Israela taudia ese Lohiabada idia habadua,
bona Mose ese hisihisi ia davaria idia dainai.
³³ Badina be idia ese Mose ena lauma idia habadua,
bona unai dainai ia ese hereva maoromaoro ia gwauraia lasi.

³⁴ Lohiabada ese Israela taudia ia oda henidia,
idau bese taudia do idia alaia mase,
to idia ese idia karaia lasi.
³⁵ Bona idia ese unai idau bese taudia danu idia headava hanai,
vadaeni unai idau bese taudia edia mauri dala dikadia,
be Israela taudia idia abia dae.
³⁶ Ma Dirava ena bese taudia ese,
unai taudia edia kaivakuku idia tomadiho henia,
bona inai kara ese Dirava ia habadua, vadaeni ia hadikadia.
³⁷ Idia ese edia natudia tau bona hahine,
be boubou gaudia totona lauma dikadia dekenai idia henia.
³⁸ Idia ese Kanana taudia edia kaivakuku dekenai boubou idia henia.
Unai bamona idia karaia neganai,
edia natudia tau bona natudia hahine idia alaia mase,
edia boubou gaudia totona.
Kerere lasi taudia edia rarana idia habubua.
Inai rara ese tano ibounai ia hadikaia.
³⁹ Inai karadia dekena amo Israela taudia be idia miro lao,
bona idia ese edia abidadama Dirava dekenai idia makohia.

⁴⁰ Unai dainai Lohiabada ese,
iena bese taudia ia badu henidia momokani.
Ia ese idia ia ura henia lasi.
⁴¹ Ia ese bese idau idau taudia edia siahu henunai ia atodia.
Vadaeni Israela dekenai idia tuari henia taudia ese,
Israela taudia idia biagua.
⁴² Unai idau bese taudia ese Israela taudia idia dagedage henia,
bona edia siahu henunai Israela taudia idia noho momokani,
mai guia danu.
⁴³ Nega momo Lohiabada ese,
iena bese taudia ia durua bona ia hamauria,
to idia ese ia dekenai idia kamona henia lasi,
bona edia kara dika ese idia ia hadikaia.

⁴⁴ To Lohiabada ese edia taitai ia kamona neganai,
ia ese edia hisihisi ia laloa,
⁴⁵ bona idia dekenai ia karaia gwauhamata taravatuna ia laloatao.
Iena bogahisihisi bada herea dainai edia dika ia gwauatao.
⁴⁶ Ia ese idia dagedage henidia taudia edia lalodia dekenai,
bogahisihisi kara ia havaraia,
vadaeni unai Israela taudia idia guia vadaeni taudia ese,

Israela taudia dekenai idia bogahisihisi henia.

⁴⁷ Lohiabada, aiemai Dirava e,
mani ai do oi hamauria.
Bese idauidau edia huanai dekena amo ai do oi haboua,
vadaeni ai ese oiemu ladana helagana do ai hanamoa,
mai tanikiu momokani danu.

⁴⁸ Lohiabada, Israela ena Dirava, do umui hanamoa.
Hari inai dina dekena amo ela bona hanaihanai,
taunimanima ibounai be do idia gwau,
“Amen.”
Lohiabada do umui hanamoa!

107

Lohiabada ena kara namodia do ita hanamoa

¹ “Lohiabada do umui hanamoa, badina ia be namo.
Iena bogahisihisi bona lalokau be hanaihanai do idia noho.”

² Lohiabada ese umui ia hamauria taudia ibounai e,
unai bamona hanamoa hereva do umui gwauraia lou, gwauraia lou,
badina umui dekenai idia dagedage taudia dekena amo,
Lohiabada ese umui ia hamauria vadaeni.

³ Lohiabada ese idau bese taudia edia tano dekena amo,
umui ia mailaia vadaeni,
laurabada dekena amo bona lahara dekena amo,
mirigini dekena amo, bona diho kahana dekena amo.

⁴ Haida be taunimanima idia noho lasi tano dekenai idia loaloa,
bona hanua ta idia davaria lasi do idia noholoia totona.

⁵ Idia be mai hitolo bona mai ranu mase danu,
bona idia laloa idia be dika vadaeni.

⁶ To edia hisihisi lalonai Lohiabada dekenai idia noinoi,
bona edia hisihisi dekena amo ia ese ia hamauridia.

⁷ Lohiabada ese dala maoromaoro dekena amo idia ia hakaua,
vadaeni idia noholoia diba hanua ta dekenai ia hakaudia.

⁸ Idia ese Lohiabada do idia tanikiu henia be namo,
iena lalokau badana dainai.

badina be ia ese kara namodia momokani idia dekenai ia karaia.

⁹ Ranu mase taudia be Lohiabada ese ranu ia henidia noho,
bona hitolo taudia,

be Lohiabada ese aniani ia henidia noho, idia bogakunu.

¹⁰ Haida be diari lasi lalonai idia noho,
dibura gabuna dekenai.

Idia be dibura noho taudia,
mai edia hisihisi, seini dekenai idia guidia dainai.

¹¹ Unai bamona idia noho,
badina be idia ese Siahu Ibounai Dirava ena hereva,
be idia kamona henia lasi,
bona iena hadibaia hereva idia ura lasi idia badinaia.

¹² Idia be gaukara auka herea momokani dainai idia manoka vadaeni,
bona edia goada ia ore dainai tano dekenai idia moru,
to tau ta ese ia durudia lasi.

¹³ Idia edia hisihisi lalonai,
idia ese Lohiabada dekenai idia boiboio,
bona ia ese edia hisihisi dekena amo idia ia hamauria.

14 Lohiabada ese edia diari lasi gabuna,
bona edia dibura gabuna dekena amo ia abidia mai.
Ia ese edia seini ia hamakohia maragimaragi.

15 Vadaeni idia ese Lohiabada do idia hanamoa be namo,
iena lalokau badana dainai.
Iena hoa karadia bona kara namodia, idia totona ia karaia dainai,
Lohiabada do idia tanikiu henia be namo.
16 Auri labora dekena amo idia karaia iduara,
be Lohiabada ese ia hamakohia.
Ia ese dibura ruma edia magu auridia ia makohia maragimaragi.

17 Unai taudia haida ese,
sibodia edia kara dika dainai gorere idia abia.
Idia ese kerere idia karaia dainai hisihisi idia davaria.

18 Idia ese aniani idia ura lasi,
unai dainai kahirakahira idia mase.
19 To idia edia hisihisi lalonai,
idia ese Lohiabada dekenai idia boiboio,
bona ia ese edia hisihisi dekena amo idia ia hamauria.
20 Lohiabada ese oda ia gwauraia,
vadaeni idia gorere idia ore.

Ia ese mase ena guri dekena amo idia ia hamauria.
21 Idia ese Lohiabada do idia tanikiu henia be namo,
iena lalokau badana dainai.
Iena kara badadia bona namodia,
idia dekenai ia karaia gaudia dainai,
Lohiabada do idia hanamoa be namo.
22 Boubou gaudia dekena amo,
Lohiabada do idia tanikiu henia be namo.
Mai ane bona mai moale danu,
taunimanima dekenai Lohiabada ena kara namodia do idia gwauraia,
be namo.

23 Idia haida be lagatoi dekenai,
davara badana idia heau hanaia.
Idia edia lagatoi dekena amo,
hoihoi gaukara idia karaia moni davana.

24 Idia ese Lohiabada ena siahu karadia idia itaia.
Davara badana dekenai,
Lohiabada ese ia karaia gau badadia idia itaia momokani.

25 Badina be Lohiabada ese ia hereva,
vadaeni lai badana ia toreisi,
davara ena hurehure be bada herea idia lao.

26 Hurehure be guba dekenai idia daekau,
bona dobu gabudia dekenai idia diho,
bona kuru taudia idia hekwarahi bada dainai edia haheauka ia ore.

27 Idia edia matana idia giroagihoa,
bona idia raka mai hekwarahi danu, kekeru taudia bamona.
Edia gari dainai edia lalao be ia ore.

28 Vadaeni idia hekwarahi lalonai Lohiabada dekenai idia taitai,
bona ia ese edia hisihisi dekena amo idia ia hamauria.

29 Lohiabada ese lai ia gwauatao,
vadaeni lai ia doko,
bona davara ena hurehure idia diho.

30 Unai neganai kuru taudia idia moale, laga-ani idia davaria dainai,

bona Lohiabada ese edia ura gabuna,
hurehure lasi gabuna dekenai ia hakaudia vareai.

³¹ Lohiabada dekenai edia tanikiu idia henia be namo,
ia ese iena lalokau bona bogahisihisi bona hoa karadia,
taunimanima dekenai ia hedinarai dainai.

³² Namona be edia guriguri hebou dekenai ia do idia hanamoa bada,
bona hanua tau badadia edia hebou dekenai danu,
idia ese Lohiabada do idia tanikiu henia be namo.

³³ Lohiabada ese sinavai be tano kaukau dekenai ia halaoa,
bona ranu lohilohe gabudia be ia ese ia koua,
ranu lasi gabudia idia lao.

³⁴ Lohiabada ese tano mai ena anina,
be tano anina lasi gabuna dekenai ia halaoa.
Unai bamona ia karaia,
be unai gabu taudia edia kara dika dainai.

³⁵ Bona tano kaukau gabuna, be gohu namona Lohiabada ese ia halaoa.
Tano kaukau be ranu lohilohe gabunia dekenai danu ia halaoa.

³⁶ Lohiabada ese unai gabudia dekenai,
hitolo taudia ia atoa, idia noholaia,
vadaeni idia ese hanua ta idia haginia, unuseni idia noho.

³⁷ Unai taudia ese uma idia karaia,
bona vain umadia danu idia karaia,
vadaeni tano ena anina bada idia davaria.

³⁸ Lohiabada ese ia hanamodia dainai,
unai taudia be bese badana momokani idia lao,
bona edia boromakau bona mamoe idia momo herea lao danu.

³⁹ Gabeai dagedage, o hekwarahi, o hisihisi idia dekenai ia vara,
vadaeni idia momo idia mase ore, ore maragina idia lao.

⁴⁰ Unai neganai Lohiabada ese,
lohia taudia edia hekokoruku ia hadokoa momokani.
Unai lohia taudia ia siaidia lao,
taunimanima noho lasi tano dekenai do idia loalao.

⁴¹ To ogogami taudia edia hisihisi dekena amo,
Lohiabada ese ia durudia,
bona idia dekenai natuna bona tubuna momo ia henia,
mamoe edia ore badana bamona.

⁴² Kara maoromaoro taudia ese inai kara idia itaia,
vadaeni idia moale.
to dika taudia be idia hereva lasi, edia uduna idia koua sibona.

⁴³ Daika be mai ena aonega?
Ia ese inai karadia do ia lalao.
Namona be umui ese Lohiabada ena lalokau badana,
noho hanaihanai lalokauna,
be taunimanima dekenai do umui gwaurai hedinarai.

108

David a ese Dirava ia noia do ia durua

¹ Dirava e,
egu kudouna lalonai,
egu abidadama ia goada momokani.
Egu abidadama ia goada momokani oi dekenai.

Oi hanamoa totona ane do lau abia,
ane namona do lau abia.
Egu lauma e, do oi noga!

² Egu gita badana bona gita maragina e, do umui noga!
Lau ese daba rere do lau hanogaia.

³ Lohiabada e,
bese idauidau edia huanai lau ese oi do lau hanamoa.
Taunimanima ibounai edia huanai,
lau ese oi hanamoa totona ane do lau abia.

⁴ Badina oiemu noho hanaihanai lalokauna be bada herea,
ia daekau lao ela bona guba dekenai.
Oiemu hereva oi badinaia momokani kara be bada,
ia daekau lao ela bona ori dekenai.

⁵ Dirava e,
oiemu siahu badana be guba dekenai do oi hedinarai,
bona oiemu hairaina be,
tanobada ena kahana ibounai dekenai danu do oi hedinarai.

⁶ Oiemu goada dekena amo ai do oi hamauria.
Aiemai noinoi mani do oi kamoni,
vadaeni ai, oi ese oi lalokau henia taudia, do oi hamauria.

⁷ Iena helaga gabuna dekena amo Dirava ia hereva, ia gwau,
“Mai kwalimu danu lau ese Sekema tano do lau hapararaia,
bona Sukoto Koura,
be egu bese taudia edia huanai do lau haria.

⁸ Gileada be egu tano,
Manase danu be lauegu.
Eparaima be egu tuari kwara gauna,
bona Iuda be egu King dagi ena toana auna.

⁹ To lau ese Moaba do lau abia, egu aena huria disi bamona,
bona lau ese Edoma ena latanai egu tamaka do lau negea lao,
lau ese lau biagua ena toana.
Pilistia tano danu do lau abia,
mai kwalimu ena boiboi danu.

¹⁰ To Dirava e, daika ese hanua mai maguna danu dekenai,
be lau do ia hakaua vareai?
Daika ese Edoma dekenai lau do ia hakaua lao?

¹¹ Dirava e, oi ese ai oi negea momokani vadaeni, a?
Dirava e, aiemai tuari taudia danu,
idia durua totona, do oi raka mai lou lasi, a?

¹² Dirava e, ai do oi durua,
ai dekenai idia tuari henia taudia,
be ai ese do ai halusia,
badina be taunimanima edia durua be anina lasi.

¹³ Bema Dirava be iseda kahana dekenai ia noho neganai,
ita be do ita kwalimu.
Dirava ese ita dekenai idia tuari henia taudia do ia halusia.

109

David a ia noinoi Dirava ese dika taudia edia davana do ia henia

¹ Dirava e, oi lau hanamoa noho,

egu guriguri mani do oi haere henia.

²Badina be dika bona koikoi taudia ese,
lau hadikaia totona hereva dika idia gwauraia noho.

Lau dekenai samania koikoi hereva idia gwauraia noho.

³Badu hereva dekena amo lau idia koua hagegea vadaeni,
bona lau dekenai idia heai noho,
to mai badina lasi.

⁴Idia dekenai lau turana karaia,
to idia ese lau idia badu henia noho.
To lau ese idia totona lau guriguri vadaeni.

⁵Lau dekenai idia kara dika, egu kara namo ena davana,
bona idia ese lau idia hadikaia noho,
egu lalokau ena davana.

⁶Kara dika kota biaguna ta mani do oi abia hidi,
ia ese lau ia hadikaia noho tauna do ia hadikaia.
Ia dekenai ia badu momokani tauna ta do oi haginia,
ia ese lau ia hadikaia tauna do ia samania.

⁷Idia kota henia neganai,
mani iena kerere do oi hamomokania.
Iena guriguri danu mani be kara dikana do oi halaoa.

⁸Mani emu kara unai tau ena mauri do ia ore haraga,
bona tau ta ese iena dagi do ia abia.

⁹Lau ura inai tau be do ia mase,
bona iena natuna be mai edia tamana lasi.
Lau ura iena adavana be vabu do ia lao.

¹⁰Lau ura iena natuna be ruma lasi,
vadaeni do idia loaloa kava,
aniani totona do idia noinoi noho.
Bona edia noho gabu dikana dekena amo,
taunimanima ese do idia luludia ore.

¹¹Lau ura inai lau ia hadikaia noho tauna,
be ia dekenai ia heniatorehai tauna ese,
iena kohu ibounai do ia abia kava,
bona idau taudia ese,
iena gaukara ena anina do idia henaoa ore.

¹²Lau ura tau ta ese ia dekenai do ia bogahisihisi lasi,
bona ia mase murinai,
lau ura iena natuna be tau ta ese do ia naridia lasi.

¹³Lau ura iena bese taudia,
ia dekena amo idia vara taudia,
be do idia mase,
bona gabeai do idia vara bese taudia ese,
iena ladana be do idia laloaboio.

¹⁴Lau ura Lohiabada ese,
iena sene taudia edia dika do ia laloatao,
bona iena sinana ena kara dika,
be Lohiabada ese do ia gwauatao lasi.

¹⁵Lau ura edia kara dika be Lohiabada do ia laloatao noho,
to lau ura taunimanima ese,
unai tau do idia laloaboio momokani.

¹⁶Unai lau ia hadikaia gwauraia tauna ese,
nega ta bogahisihisi kara ta ia karaia lasi.

Ia ese ogogami taudia,
 bona gau lasi taudia,
 bona haida ese idia durua lasi taudia,
 ia dagedage henia bona ia aladia mase.

¹⁷ Guna ia ese taunimanima hadikaia hereva ia ura bada gwauraia,
 unai dainai harihari,
 namona be ia sibona ese dika do ia davarial
 Guna ia ura lasi hanamoa hereva ta do ia gwauraia.

Mani emu kara, tau ta ese do ia hanamoa lasi!

¹⁸ Nega ibounai ia ese,
 taunimanima hadikaia hereva ia gwauraia lou, gwauraia lou,
 dabua ia atoa lou, atoa lou bamona.
 Mani emu kara iena hadikaia hereva,
 be ia sibona dekenai do oi siaia lou,
 iena tauanina lalonai do idia vareai, ranu bamona,
 bona iena turiana dekenai do idia vareai, digara bamona.

¹⁹ Bona lau ura inai hadikaia hereva ese,
 unai tau do idia koua, dabua bamona.
 Nega ibounai iena bogana do idia hagegea, gaba gauna bamona.

²⁰ Lohiabada e, lau idia hadikaia gwauraia taudia,
 be unai bamona edia dika davana do oi henia.
 Lau idia samania noho taudia edia dika davana,
 be do oi henidia.

²¹ To Lohiabada, egu Dirava e,
 oiemu gwauhamata hegeregerena lau do oi durua,
 bona oiemu lalokau ena namo dainai lau do oi hamauria.

²² Lau be lau ogogami noho, bona mai egu gau lasi.
 Egu lalona ia hisihisi bada noho.

²³ Adorahi ena dina laulauna ia boio haraga bamona,
 lau danu lau boio noho.
 Lai bada ese kwadi ta ia kokia haraga bamona,
 lau be do idia kokia haraga.

²⁴ Egu tuina be ia manoka vadaeni, aniani lau ania lasi dainai.
 Egu tauanina be ia maragi lao noho.

²⁵ Taunimanima ese lau idia itaia neganai,
 edia kwaradia idia girogiroa, lau idia kirikirilaia noho.

²⁶ Lohiabada e, egu Dirava,
 oiemu bogahisihisi dainai lau do oi hamauria.

²⁷ Lau idia hadikaia noho taudia do oi hadibaia,
 oi be lau oi hamauria noho Diravana.

²⁸ Idia ese edia hereva dekenai lau idia hadikaia,
 to oi ese lau do oi hanamoa.
 Lau idia dagedage henia taudia mani do oi halusia,
 vadaeni lau, oiemu hesiai tauna,
 be do lau moale.

²⁹ Lau idia samania noho taudia be do oi koua,
 vadaeni hemarai do idia davarial momokani.
 Inai hemarai be dabua bamona do idia karaia.

³⁰ Egu uduna dekena amo, Lohiabada do lau hanamoa.
 Taunimanima momo edia huanai, Lohiabada do lau hanamoa,

³¹ badina be ia ese ogogami taudia ia gimaia noho,
 bona haida ese,
 unai ogogami taudia do idia alaia gwauraia neganai,
 Lohiabada ese ia hamauridia noho.

110

Lohiabada ese iena King ia abia hidi

¹ Lohiabada ese egu Lohiabada dekenai ia hamaoroa, ia gwau,
 “Lauegu idiba kahana dekenai do oi helai,
 ela bona oi dekenai idia tuari henia taudia,
 be oiemu aena atoa gauna dohore lau halaoa.”

² Siona dekena amo Lohiabada ese,
 oiemu King siahuna do ia habadaia,
 Lohiabada ese oi ia hamaoroa, ia gwau,
 “Oi dekenai idia tuari henia taudia do oi biagua.”

³ Oi ese oi dekenai idia dagedage taudia,
 be do oi tuari henidia dinana dekenai,
 oiemu ore a taudia ese oi dekenai do idia haboua,
 bona mai edia ura kwalimu danu oi do idia durua.
 Daba maragi neganai paripari ia hedinarai bamona,
 oiemu durua taudia be oi dekenai do idia haboua,
 ororo helagana dekenai.

⁴ Lohiabada ese gwauhamata metau momokani ia karaia vadaeni,
 bona do ia haidaua lasi, ia gwau,
 “Oi be hahelagaia tauna, Melekisedeka hegeregereana do oi lao,
 bona inai dagi do oi dogoatao ela bona hanaihanai.”

⁵ Lohiabada be oiemu imana idibana kahana dekenai,
 ia ese oi ia hagoadaia noho.
 Iena badu dinana dekenai,
 ia ese king taudia do ia halusia.

⁶ Ia ese bese idauidau taudia do ia kota henia,
 bona edia gabu be mase tauanina dekena amo do ia hahonua.
 Ia ese tanobada kahanakahana ibounai dekenai,
 king taudia do ia halusia.

⁷ King ese dala badinai ia noho sinavai maragina dekenai,
 ranu do ia inua,
 vadaeni goada do ia abia,
 bona tuari lalonai do ia kwalimu.

111

Lohiabada do ita hanamoa

¹ Lohiabada do umui hanamoa.
 Iena kara maoromaoro taudia edia hebou badana lalonai,
 lau ese Lohiabada do lau hanamoa, mai egu kudouna ibounai danu.

² Lohiabada ena kara be badadia momokani.

Iena kara idia moalelaia taudia ese,
 unai kara edia anina idia tahua noho.

³ Lohiabada ena kara be mai edia hairaina,
 bona idia ese iena King siahuna idia hedinarai.
 Lohiabada ena kara maoromaoro,

be do ia noho ela bona hanaihanai.

⁴ Iena hoa karadia ia karaia vadaeni,
taunimanima ese unai kara do idia laloatao totona.
Lohiabada be mai ena hariharibada bona mai ena bogahisihisi.

⁵ Ia dekenai idia gari taudia dekenai,
be Lohiabada ese edia aniani ia henia.
Iena gwauhamata taravatuna be,
ia ese ia laloa noho nega ibounai, doko lasi.

⁶ Ia ese bese idauidau taudia edia tano,
be iena bese taudia dekenai ia henia.
Unai kara dekena amo,
ia ese iena bese taudia dekenai,
iena siahu ena bada ia hedinararaia vadaeni.

⁷ Lohiabada ena kara ibounai,
be mai momokani bona mai maoromaoro danu.
Iena taravatu ibounai ita abidadama henia diba.

⁸ Idia be do idia gini noho ela bona hanaihanai.
Dirava ese mai ena laloa maoromaoro bona momokani danu,
inai taravatu ia karaia.

⁹ Lohiabada ese iena bese taudia ia hoia lou,
bona ia ese idia danu gwauhamata taravatuna ia karaia.
Inai gwauhamata taravatuna do ia noho ela bona hanaihanai.
Lohiabada ena ladana be helaga,
bona mai garina danu.

¹⁰ Lohiabada gari henia kara be aonega hamatamaia ena dala.
Lohiabada ena hereva idia badinaia taudia ibounai ese,
diba namona idia abia noho.
Lohiabada do ita hanamoa noho ela bona hanaihanai.

112

Tau namona ena moale

¹ Lohiabada do umui hanamoa.

Lohiabada dekenai ia gari tauna be namo.
Lohiabada ena taravatu ia moalelaia noho tauna danu be namo.

² Inai bamona tau namona ena natuna,
be do idia goada edia tano lalonai.
Iena bese taudia,
gabeai do idia vara taudia,
ese Dirava ena hanamoa do idia davaria.

³ Iena famili taudia,
be do mai edia moni bona kohu momo,
bona iena kara maoromaoro,
be do ia noho ela bona hanaihanai.

⁴ Momokani dibura ia noho,
to tau namona durua totona diari be ia diari noho,
vadaeni ia be mai ena hariharibada,
bona mai ena bogahisihisi,

bona mai ena kara maoromaoro danu.
⁵ Haida dekenai harihari gaudia ia henia,
bona mai laloa namona danu haida dekenai ia heniatorehai.
Iena gaukara be, mai ena maoromaoro danu ia karaia.

Unai bamona tauna be do ia moale noho.
⁶ Tau namona be nega ta do idia hamorua lasi.

Taunimanima ese ia do idia laloatao hanaihanai.

⁷ Dika bada ia vara ena sivarai ia kamona neganai,
unai tau be do ia gari lasi,

badina ia ese Lohiabada dekenai ia abidadama henia goada noho.

⁸ Ia be ia laloa hekwarahi lasi,

bona ia gari lasi,

badina ia diba momokani,

ia idia hadikaia gwauraia taudia be,

ia ese mai kwalimu danu edia moru do ia itaia.

⁹ Mai edia gau lasi taudia dekenai,

harihari gaudia ia henia vadaeni.

Iena kara maoromaoro be do ia noho ela bona hanaihanai.

Ia ese siahu bona goada do ia abia,

bona taunimanima ese ia do idia matauraia.

¹⁰ Kara dika taudia ese inai iena goada idia itaia noho,

bona idia badu noho.

Idia ese unai tau namona do idia badu henia,

bona do idia boio momokani.

Kara dika tauna ena ura gauna ena anina, be do ia vara lasi.

113

Lohiabada ena siahu bona iena namo

¹ Lohiabada do umui hanamoa.

Lohiabada ena hesiai taudia e,

Lohiabada ena ladana do umui hanamoa.

² Lohiabada ena ladana do ita hanamoa noho,

hari ela bona hanaihanai.

³ Dina daekau kahana ela bona dina diho kahana dekenai,

Lohiabada ena ladana do ita hanamoa be namo.

⁴ Lohiabada be ataiai, bese ibounai be ia ese ia biagua noho.

Iena hairaina be guba ena ataiai danu ia noho.

⁵ Daika be Lohiabada iseda Dirava hegeregereena?

Lohiabada be guba ena ataiai ia helai noho,

⁶ to ia ese iena kwarana ia atoa diho,

iena matana ia negea, guba bona tanobada ia itaia noho.

⁷ Ia ese ogoami taudia,

be tano ena kahu dekena amo ia abia isi noho,

bona mai edia gau lasi taudia,

be edia hisihisi dekena amo durua ia henidia noho.

⁸ Lohiabada ese unai ogoami taudia ia abia isi noho,

bona ia ese iena bese taudia edia gunalaia taudia dagi,

be idia dekenai ia henia noho.

⁹ Lohiabada ese natuna ia havaraia diba lasi hahine dekenai,
noho gabuna ia henia noho.

Ia ese unai hahine ia hanamoa noho,

vadaeni memero bona kekeni momo ia havaraia,

bona inai hahine be do ia moale bada noho.

Lohiabada do umui hanamoa!

114

Pasova ena ane

¹ Israela taudia be Aigupito idia rakatania.

Iakobo ena besena,

be gado idau taudia edia tano idia rakatania.

² Unai neganai Iuda be Lohiabada ena helaga taudia,

bona Israela danu be Lohiabada ena basileia korikori.

³ Davara Kakakaka ese gau ta ia itaia, vadaeni ia heau!

Ioridane Sinavai ese iena ranu ena heau ia hadokoa,
ena ranu ia gini noho!

⁴ Ororo badadia be nanigosi bamona idia roho lao, roho lao noho!

Bona ororo maragidia,

be mamoe natudia bamona idia roho lao, roho lao noho!

⁵ Davara e,

dahaka ia vara, vadaeni oi heau?

Bona Ioridane Sinavai e,

badina dahaka oiemu ranu ena heau oi hadokoa?

⁶ Ororo badadia e,

badina dahaka nanigosi bamona umui roho lao?

Ororo maragidia e,

badina dahaka mamoe natudia bamona umui roho lao?

⁷ Tanobada e,

Lohiabada ena vairanai do oi heudeheude,

Iakobo ena Dirava ena vairanai.

⁸ Ia ese nadi badana be ranu gabuna ia halaoa,

bona ia ese ororo ena nadi be ranu ia lohilohe gabuna ia halaoa.

115

Lohiabada sibona be Dirava momokani

¹ Lohiabada e,

oi dekenai hairai bada ia noho,

momokani, oi dekenai hairai bada ia noho,

ai dekenai be lasi.

Badina oiemu lalokau bona bogahisihisi be bada,

bona oiemu gwauhamata badinaia kara be momokani.

² Badina dahaka idau bese taudia ese ai idia nanadaia,
idia gwau,

“Umui emui Dirava be edeseni ia noho?”

³ Iseda Dirava be guba dekenai ia noho.

Bema ia ura kara ta ia karaia,

unai kara sibona do ia karaia.

⁴ Unai idau bese taudia edia dirava,

be siliva bona golo dekenai idia karaia,

idia sibona edia imana dekenai idia karaia gaudia.

⁵ Unai dirava koikoidia be mai edia uduna,

to idia hereva diba lasi,

bona mai edia matana,

to idia itaia diba lasi.

⁶ Idia be mai edia taiana,

to idia kamonai diba lasi,

bona mai edia udu baubauna,

to bonana idia kamonaí diba lasi.

⁷Idia be mai edia imana,
to gau ta idia dogoatao diba lasi,
bona mai edia aena,
to idia raka diba lasi.
Regerege ta idia karaia diba lasi.

⁸Unai bamona dirava koikoi idia karaia taudia be dika.
Namona be idia karaia gaudia hegeregere do idia lao.
Bona unai dirava koikoi idia abidadama henia taudia danu,
namona be do idia dika,
unai dirava koikoi hegeregere.

⁹Umui Israela taudia ibounai e,
Lohiabada dekenai do umui abidadama henia.
Ia ese umui ia durua noho,
ma ia ese umui ia naria noho.

¹⁰Umui Dirava ena hahelagaia taudia e,
Lohiabada do umui abidadama henia.
Ia ese umui ia durua noho,
ia ese umui ia naria noho.

¹¹Dirava garina umui gari taudia ibounai e,
Lohiabada do umui abidadama henia.
Ia ese umui ia durua noho,
ia ese umui ia naria noho.

¹²Lohiabada ese nega ibounai ita ia laloa noho,
bona ia ese ita do ia hanamoa.
Ia ese Israela bese taudia,
bona Dirava ena hahelagaia taudia do ia hanamoa.
¹³Lohiabada ese ia dekenai idia matauraia taudia ibounai,
be do ia hanamoa,
ladana bada bona ladana maragi taudia danu.

¹⁴Lau ura Lohiabada ese natudia momo umui dekenai do ia henia,
bona emui natudia dekenai danu.
¹⁵Lohiabada ese guba bona tanobada ia karaia vadaeni.
Lau ura ia ese umui do ia hanamoa.

¹⁶Guba be Lohiabada sibona ese ia biagua noho,
to tanobada be Lohiabada ese taunimanima dekenai ia henia.
¹⁷Mase taudia be mase taudia edia gabu dekenai idia lao noho.
Idia ese Lohiabada ena ladana idia hanamoa diba lasi.
¹⁸To ita be ita mauri noho dainai Lohiabada do ita tanikiu henia.

Lohiabada ena ladana do ita hanamoa!

116

Dirava ese tau ta ia hamauria, vadaeni ia tanikiu henia

¹Lohiabada ese egu guriguri bona egu noinoi ia kamonaí noho,
unai dainai ia dekenai lau lalokau henia.

²Lau be Lohiabada dekenai lau boiboi negadia ibounai,
ia ese lau dekenai ia kamonaí.

³Mase ese lau ia guia,
varo badana ese lau ia guia bamona.
Mase ena guria gabuna ena gari bada ese lau ia dogoatao.

Gari bona laloa hekwarahi ese lau ia dogoatao momokani.

⁴Unai neganai Lohiabada dekenai lau boiboi, lau gwau,
“Lohiabada e,
oi dekenai lau noinoi inai,
mani lau oi hamauria.”

⁵Lohiabada be mai ena hariharibada,
bona mai ena kara maoromaoro danu.
Iseda Dirava be mai ena bogahisihisi.

⁶Lohiabada ese sibodia idia naria diba lasi taudia ia naria noho.
Mase be lau kahirakahira ia noho neganai,
Lohiabada ese lau ia hamauria.

⁷Hari egu lauma ese laga-ani ia abia lou,
badina Lohiabada ese iena durua,
be lau dekenai ia henia vadaeni.

⁸Lohiabada e, oi ese mase dekena amo lau oi hamauria,
bona egu matana ena ranu oi dahua ore vadaeni.
Ma oi ese lau oi durua dainai, do lau moru lasi.

⁹Unai dainai lau be Lohiabada ena vairanai do lau raka,
egu mauri dinadia ibounai lalonai.

¹⁰Hisihisi bada herea lau dekenai ia vara neganai,
lau ese egu abidadama Dirava dekenai lau rakatania lasi,
lau dogoatao noho.

¹¹Bona gari bada ese lau ia hagaria neganai, lau gwau,
“Tau ta lau abidadama henia diba lasi.”
To unai neganai danu lau ese Dirava lau abidadama henia.

¹²Lohiabada dekenai dahaka do lau henia,
iena hariharibada ibounai lau dekenai ena davana?

¹³Lau ese uaina ena kapusi ta, Lohiabada dekenai do lau henia,
Ia ese lau ia hamauria dainai,
lau ese Lohiabada do lau hanamo.

¹⁴Egu gwauhamata ena anina do lau karaia,
Lohiabada dekenai do lau henia,
iena bese taudia ibounai edia hebou lalonai,
idia edia vairana dekenai.

¹⁵Lohiabada ese iena ore taudia ta ta ibounai,
be ia lalokau henidia bada herea momokani.
Unai dainai, bema idia ta ia mase neganai,
Lohiabada ese ia laloa bada noho.

¹⁶Lohiabada e, lau be oiemu hesiai tauna.
Lau ese oiemu gaukara lau karaia noho,
egu sinana ese guna ia karaia bamona.
Oi ese mase ena seini dekena amo lau oi ruhaia.

¹⁷Egu boubou gauna Lohiabada dekenai,
be egu tanikiu ia dekenai,
bona iena ladana dekenai do lau guriguri.

¹⁸Egu gwauhamata ena anina be Lohiabada dekenai do lau henia,
iena ore taudia edia vairanai.

¹⁹Lohiabada e, oiemu Dubu Helaga, Ierusalem dekenai,
oi dekenai lau gwauhamata vadaeni gauna do lau henia.

Lohiabada do ita hanamoa!

117

Lohiabada ena ladana hanamoa ane ta

¹ Bese idauidau ibounai e,

Lohiabada do umui hanamoa.

Taunimanima ibounai e, Lohiabada ena ladana do umui abia isi,

² badina iena lalokau ita dekenai be ia bada herea.

Lohiabada ese iena hereva ia badinaia noho nega ibounai,
bona ia ese ita do ia rakatania lasi, ela bona hanaihanai.

Lohiabada do umui hanamoa!

118

Kwalimu idia abia dainai Dirava idia tanikiu henia

¹ Lohiabada do ita tanikiu henia,

badina ita dekenai kara namo ia karaia.

Iena lalokau bona bogahisihisi be do idia noho hanaihanai.

² Israela taudia inai bamona do idia hereva be namo:

“Lohiabada ena lalokau bona bogahisihisi do idia noho hanaihanai.”

³ Dirava ena hahelagaia taudia be namo do idia gwau:

“Lohiabada ena lalokau bona bogahisihisi do idia noho hanaihanai.”

⁴ Lohiabada dekenai idia gari taudia ibounai namo do idia gwau:

“Lohiabada ena lalokau bona bogahisihisi do idia noho hanaihanai.”

⁵ Egu hisihisi lalonai, lau be Lohiabada dekenai lau boiboi,

vadaeni ia ese lau dekenai ia haere henia,

bona unai hisihisi be ia ese ia kokia.

⁶ Lohiabada be lau dekenai ia noho, vadaeni lau gari lasi.

Taunimanima be edena bamona lau do idia hadikaia diba?

⁷ Lohiabada sibona ese lau ia durua noho.

Unai dainai lau idia hadikaia gwaurai taudia do lau itaia,

be Lohiabada ese do ia halusidia.

⁸ Namona be Lohiabada dekenai do ita abidadama henia,

to taunimanima dekenai do ita abidadama henia lasi.

⁹ Namona be Lohiabada dekenai do ita abidadama henia,
to tanobada gunalaia taudia dekenai do ita abidadama henia lasi.

¹⁰ Tuari totona idau bese taudia ese lau idia hagegea,

to Lohiabada ena ladana dekenai lau ese idia lau halusia.

¹¹ Lau idia hagegea, kahana kahana ibounai dekena amo,

to Lohiabada ena siahu dekenai lau ese idia lau halusia.

¹² Idia ese nanigo bamona lau idia hagegea,

to idia mase haraga,

kurukuru kakoro dekenai lahi ia mase haraga bamona.

Lohiabada ena siahu dekena amo lau ese idia lau halusia.

¹³ Idia ese lau idia tuari henia goadagoada,

bona kahirakahira lau moru,

to Lohiabada ese lau ia durua.

¹⁴ Lohiabada be egu goada bona egu ane.

Ia ese lau ia hamauria vadaeni.

¹⁵ Kamonai!

Dirava ena bese taudia ese,
 edia palai rumadia lalonai,
 idia boiboi noho mai moale danu, idia kwalimu dainai,
 idia gwau,
 “Lohiabada ena goada badana ese inai kara ia karaia!
 16 Lohiabada ena siahu ese kwalimu ita dekenai ia henia!
 Tuari lalonai iena imana idibana be goada momokani!”

17 Lau be do lau mase lasi,
 do lau mauri noho,
 bona Lohiabada ena kara do lau gwaauraia noho.
 18 Lohiabada ese lau ia panisia vadaeni, matakani auka dekena amo,
 to ia ese mase dekenai lau ia negea lasi.

19 Dubu Helaga ena iduara lau totona do umui kehoa,
 vadaeni do lau raka vareai,
 Lohiabada do lau tanikiu henia!
 20 Inai iduara be Lohiabada ena,
 kara maoromaoro taudia sibona idia raka vareai diba.
 21 Lohiabada e, oi ese egu guriguri oi kamona vadaeni,
 bona oi ese kwalimu lau dekenai oi henia.
 Unai dainai oiemu ladana lau abia isi inai.

22 Inai nadi,
 ruma haginia taudia ese idia ura henia lasi,
 to hari ia be ruma ena kona nadi badana momokani ia gini noho.
 23 Inai be Lohiabada ena kara,
 ita itaia noho,
 bona ita hoa noho.
 24 Lohiabada ese inai dina,
 iena kwalimu dinana ia karaia vadaeni.
 Inai dina ita hanamo, a,
 bona ita moalelaia be namo.

25 Lohiabada e,
 oi dekenai ai noinoi noho,
 mani ai do oi hamauria.
 Lohiabada e,
 mani emu kara kwalimu ai dekenai do oi henia.
 26 Dirava ese, Lohiabada ena ladana dainai ia mai noho tauna,
 be do ia hanamo.
 Lohiabada ena Dubu Helaga lalonai,
 ai ese umui ai hanamo noho.
 27 Lohiabada sibona be Dirava momokani.
 Ia ese iena laloka diari ita dekenai ia henia vadaeni.
 Au edia rigi bona herahera danu do umui dogoatao,
 bona boubou patana do umui raka hagegea lao.
 28 Oi be egu Dirava, bona lau ura tanikiu henia oi dekenai.
 Oi be egu Dirava, bona lau ura oiemu ladana do lau abia isi.
 29 Lohiabada do umui tanikiu henia momokani,
 badina ia be namo momokani.
 Iena lalokau bona bogahisihisi do idia noho ela bona hanaihanai.

¹ Mai edia kerere lasi dekenai idia noho taudia,
bona Lohiabada ena taravatu hegeregerena idia noho taudia,
be do idia moale noho.

² Dirava ena hadibaia hereva idia kamoni henia momokani taudia,
bona mai edia kudouna ibounai Lohiabada idia tahua taudia,
be do idia moale noho.

³ Idia be kara dika idia karaia lasi,
to Lohiabada ena dala dekenai idia raka noho.

⁴ Lohiabada e,
oi ese hadibaia hereva ai dekenai oi henia,
bona oi gwau,

ai ese unai oiemu hadibaia hereva,
be do ai kamoni henia momokani.

⁵ Lau ura bada oiemu hereva do lau badinaia,
mai maoromaoro bona momokani danu, nega ibounai.

⁶ Bema oiemu taravatu ibounai sibona lau laloa noho neganai,
tau ta ese lau do ia hahemaraia diba lasi.

⁷ Oiemu taravatu maoromaorodia lau tahua bona lau diba neganai,
lau ese oi do lau hanamoa,
mai egu laloa maoromaoro danu.

⁸ Lau ura oiemu taravatu do lau badinaia namonamo.
Unai neganai oi ese lau do oi rakatania lasi.

Lohiabada ena taravatu badinaia kara

⁹ Uhu tauna be edena bamona mai goevagoeva danu do ia noho?
Ia ese oiemu taravatu do ia kamoni henia.

¹⁰ Lohiabada e,
mai egu kudouna ibounai danu lau ese oi lau tahua noho.
Mani lau do oi durua,

vadaeni oiemu hadibaia hereva do lau rakatania lasi.

¹¹ Oiemu hereva be egu kudouna lalonai lau hunia noho,
oi dekenai do lau kara dika lasi totona.

¹² Lohiabada e, lau ese oi lau hanamoa noho.
Oiemu taravatu lau dekenai do oi hadibaia.

¹³ Egu uduna dekena amo oiemu taravatu,
ai dekenai oi henia gaudia,
be taunimanima dekenai lau gwauriaia hedinarai noho.

¹⁴ Oiemu hadibaia hereva edia dala lau moalelaia bada noho,
to kuhu bona moni dekenai lau moale bada lasi.

¹⁵ Oiemu hadibaia hereva edia anina lau laloa namonamo noho.
Oiemu oda hereva edia anina lau tahua noho.

¹⁶ Oiemu taravatu lau moalelaia noho,
bona oiemu oda hereva be do lau laloaboio lasi.

Lohiabada ena taravatu ese moale ia havaraia

¹⁷ Lohiabada e,
lau dekenai kara namo do oi karaia,
badina lau be oiemu hesiai tauna.
Unai neganai lau be do lau mauri noho,
bona oiemu hadibaia hereva do lau kamoni henia.

¹⁸ Lau egu matana do oi kehoa,
vadaeni oiemu taravatu dekenai hoa gaudia do lau itaia namonamo.

¹⁹ Lau be nega daudau lasi inai tanobada dekenai do lau noho,
unai dainai oiemu taravatu lau dekena amo do oi hunia lasi.

²⁰ Egu kudouna ia hisihisi noho, badina be,
nega ibounai lau ura dikadika oiemu taravatu ena kara maoromaoro.

21 Oi ese hekokoroku taudia oi gwau henia noho,
dika momokani do idia davaria,
badina be oiemu taravatu idia rakatania taudia ese,
dika do idia davaria.

22 Idia ese lau dekenai idia hereva dika,
bona lau dekenai idia kirikiri noho,
badina be oiemu taravatu lau badinaia noho.
Mani emu kara inai edia kara do oi koua.

23 Lohia taudia ese lau hadikaia totona idia haboua noho,
to lau ese oiemu hadibaia hereva do lau tahua noho.

24 Oiemu hadibaia hereva ese lau idia hamoalea noho.
Idia ese lau idia hakaua noho.

Hisihisi neganai lau ese Lohiabada ena taravatu lau badinaia noho

25 Lau moru diho,
bona egu vairana be tano ena kahu lalonai.

Lohiabada e,
oiemu gwauhamata hegeregereana lau do oi hamauria.

26 Egu kara ibounai oi dekenai lau gwauria hedinarai,
bona oi ese lau oi haere henia.

Oiemu hadibaia hereva mani lau dekenai do oi hadibaia.

27 Oiemu taravatu edia anina mani lau dekenai do oi hadibaia,
vadaeni oiemu hoa karadia do lau lalao.

28 Egu lalohisihisi ese egu goada ia haorea.

Mani lau do oi hagoadaia, oiemu gwauhamata hegeregereana.

29 Lau do oi naria,
vadaeni koikoi karadia do lau karaia lasi.

Mani emu kara oiemu hariharibada dainai,
oiemu taravatu lau dekenai do oi hadibaia.

30 Lau ese abidadama ena dala lau abia hidi vadaeni,
bona oiemu taravatu,

be egu kudouna dekenai lau lalao noho, lalao noho.

31 Lohiabada e,
oiemu hadibaia hereva lau badinaia noho.

Mani lau do oi durua,
vadaeni hemarai do lau davaria lasi.

32 Oi ese egu lalona do oi hadiarua dainai,

lau ese oiemu oda hereva,
be do lau kamonaia henia, mai egu lalao haraga danu.

Aonega totona lau noinoi

33 Lohiabada e, oiemu taravatu edia anina,
be mani lau dekenai do oi hadibaia,
bona lau ese nega ibounai idia do lau kamonaia henia.

34 Egu lalona do oi kehoa,
bona lau ese oiemu taravatu do lau badinaia.

Lau ese mai egu kudouna ibounai danu,
oiemu taravatu do lau naria.

35 Oiemu oda hereva edia dala dekenai lau do oi hakaua lao,
badina be unai dala dekenai moale lau davaria noho.

36 Egu kudouna do oi hamanadaia,
vadaeni do lau ura oiemu taravatu do lau kamonaia henia.
Bona unai neganai lau ese kohu bona moni do lau lalao momo lasi.

37 Mani lau do oi durua,
lau ese anina lasi gaudia do lau tahua lasi,
to oiemu dala dekenai lau raka dainai,

egu mauri do oi hamatamataia.

³⁸ Lau, oiemu hesiai tauna dekenai,
mani oiemu gwauhamata do oi hamomokania.

Inai gwauhamata be,
oi dekenai idia gari taudia ibounai dekenai oi henia noho.

³⁹ Lau ese hereva dika dekenai lau gari noho.

Mani emu kara lau do oi durua,
vadaeni inai hereva dikadia ese lau do idia hadikaia lasi,
badina oiemu kota hereva be namo momokani!

⁴⁰ Lau ese oiemu hadibaia hereva lau ura momokani do lau badinaia.
Mauri matamata lau dekenai do oi henia,
badina oiemu kara be maoromaoro.

Lohiabada ena taravatu dekenai abidadama kara

⁴¹ Lohiabada e,
oiemu noho hanaihanai lalokauna lau dekenai do oi hedinarai,
bona lau do oi hamauria,
oiemu gwauhamata hegeregerena.

⁴² Unai neganai lau ese lau idia hereva dika henia taudia,
be do lau haere henia diba,
badina be lau ese oiemu hereva lau abidadama henia noho.

⁴³ Mani lau do oi durua,
vadaeni nega ibounai hereva momokani do lau gwaurai,
badina be oiemu kota hereva lau abidadama henia noho.
⁴⁴ Lau ese nega ibounai oiemu taravatu do lau kamoni henia noho,
ela bona hanaihanai.

⁴⁵ Lau ese oiemu hadibaia hereva lau tahua momokani dainai,
gau ta ese egu dala do ia koua diba lasi, lasi momokani.

⁴⁶ Oiemu taravatu be king taudia dekenai do lau gwaurai,
bona inai kara dekenai lau be do lau hemarai lasi.

⁴⁷ Oiemu oda hereva lau kamoni henia noho,
mai egu moale bada danu,
badina be oiemu oda lau ura henia noho.

⁴⁸ Oiemu oda hereva be lau ese lau matauraia,
bona lau ura henia danu.
Oiemu hadibaia hereva be do lau laloa noho.

Lohiabada ena taravatu be hereva momokani

⁴⁹ Lohiabada e,
lau, oiemu hesiai tauna dekenai oi henia gwauhamata,
be mani do oi laloatao.
Inai gwauhamata lau abidadama henia dainai,
egu lalona ia moale.

⁵⁰ Hisihisi ese lau ia abia neganai goada lau davaria lou,
badina oiemu gwauhamata ese,
mauri matamata lau dekenai ia henia.

⁵¹ Hekokoroku taudia be,
nega ibounai lau dekenai idia hereva dika henia,
to lau ese oiemu taravatu lau rakatania lasi.

⁵² Lohiabada e, oiemu oda hereva gunadia lau laloatao,
bona idia ese lau idia hagoadaia.

⁵³ Lau ese dika taudia lau itaia,
idia ese oiemu taravatu idia utua noho.
Unai lau itaia neganai egu lalona ia badu momokani.

⁵⁴ Edena gabu, edena gabu dekenai lau noho,
oiemu taravatu be egu ane edia anina.

55 Lohiabada e,
hanuaboi lalonai lau ese oi lau laloatao noho,
bona oiemu taravatu lau laloa noho.

56 Lau ese oiemu oda hereva lau badinaia noho,
bona inai kara ese lau ia hamoalea momokani.

Lohiabada ena taravatu ura henia kara

57 Lohiabada e, oi sibona lau ura henia noho.
Lau ese lau gwauhamata vadaeni,
oiemu taravatu do lau kamonaia henia.

58 Mai egu kudouna ibounai danu oi dekenai lau noinoi inai,
lau do oi hanamoa.
Lau do oi bogahisihisi henia, oiemu gwauhamata hegeregereana.

59 Lau ese egu mauri ena dala lau tahua,
bona lau laloa momo vadaeni,
bona unai negadia ibounai,
oiemu hadibaia hereva dekenai lau giroa lou.

60 Lau naria kava lasi,
to karaharaga oiemu oda hereva lau kamonaia henia.

61 Kara dika taudia ese lau idia veria toho,
edia kara be lau danu do lau karaia totona.
To lau ese oiemu taravatu lau laloaboio lasi.

62 Hanuaboi momokani neganai lau toresi noho,
oi do lau hanamoa totona,
badina oi ese kota hereva maoromaoro oi gwauraia noho.

63 Oi dekenai idia gari taudia,
bona oiemu taravatu idia badinaia taudia ibounai be egu turana taudia.

64 Lohiabada e,
tanobada be oiemu noho hanaihanai lalokauna dekenai ia honu noho.
Oiemu taravatu lau dekenai mani do oi hadibaia.

Lohiabada ena taravatu ese ita ia durua noho

65 Lohiabada e,
lau, oiemu hesiai tauna dekenai kara namo oi karaia vadaeni.
Oi ese oiemu gwauhamata oi hamomokania vadaeni.

66 Aonega bona lalona kehoa be lau dekenai do oi hadibaia,
badina be oiemu taravatu lau abidadama henia noho.

67 Matakani ena hisihisi lau do abia lasi neganai,
lau ese oiemu dala dekena amo lau raka siri,
to harihari oiemu hereva lau kamonaia henia noho.

68 Oi be namo,
bona oiemu kara danu be namo.
Oiemu taravatu mani lau dekenai do oi hadibaia.

69 Hekokoroku taudia ese,
hereva koikoi dekena amo lau idia hadikaia noho,
to lau ese oiemu hadibaia hereva lau kamonaia henia,
mai egu kudouna ibounai danu.

70 Inai taudia edia kudoudia be auka,
bona mai edia lalona kehoa lasi,
to lau ese oiemu taravatu lau moalelaia noho.

71 Oiemu matakani ena hisihisi lau abia,
be lau dekenai ia namo bada,
badina be unai matakani dainai oiemu taravatu lau tahua,
bona ena namo lau davaria.

72 Oiemu uduna hereva ena taravatu be namo herea lau dekenai.
Golo bona siliva momo herea,

be oiemu taravatu ese ia hereaia momokani.

Lohiabada ena taravatu ena maoromaoro bona momokani

⁷³ Lohiabada e, oiemu imana ese lau idia karaia,
bona oi ese lau oi naria noho.

Mani emu kara lalona kehoa lau dekenai do oi henia,
vadaeni oiemu taravatu edia anina do lau davaria.

⁷⁴ Vadaeni oi dekenai idia gari noho taudia ese,
lau idia itaia neganai do idia moale,

badina be oiemu hereva lau abidadama henia noho momokani.

⁷⁵ Lohiabada e, lau diba oiemu taravatu be maoromaoro.

Bona lau diba oi ura lau do oi hamaoromaoroa dainai,
oi ese matakani ena hisihisi lau dekenai oi siaia,

badina oiemu taudia oi naria kara,
be mai maoromaoro, bona momokani danu,
bona nega ibounai oiemu kara be idau lasi.

⁷⁶ Mani emu kara oiemu noho hanaihanai lalokauna dekena amo,
lau do oi hagoadaia,

badina be lau, oiemu hesiai tauna dekenai,
oi ese unai bamona oi gwauhamata vadaeni.

⁷⁷ Lau dekenai oiemu bogahisihisi do oi henia,
vadaeni do lau mauri noho,

badina be oiemu taravatu dekenai lau moale noho.

⁷⁸ Hekokoroku taudia ese lau idia samania koikoi noho.

Mani emu kara oi ese idia do oi koua,
vadaeni do idia hemarai momokani.

To lau ese oiemu hadibaia hereva do lau laloa noho.

⁷⁹ Dirava dekenai idia gari,

bona oiemu taravatu ena anina idia diba taudia,
be mani lau dekenai do idia mai.

⁸⁰ Lohiabada e,
mani emu kara lau do oi durua,
oiemu taravatu do lau naria namonamo momokani, kerere ta lasi,
vadaeni hemarai be do lau abia diba lasi.

Dirava ese lau do ia hamauria totona lau guriguri

⁸¹ Lohiabada e,
egu lauma ese oiemu hamauria ia ura henia bada herea noho,
bona egu goada be ia ore momokani.

To lau ese oiemu hereva lau abidadama henia noho.

⁸² Oiemu gwauhamata lau naria noho dainai,
egu matana idia manoka lao noho,

bona lau tai noho, lau gwau,
“Edena negai oi ese lau do oi durua?”

⁸³ Lau be dika vadaeni,
uaina udaia nanigosi kopina,
ia makohia dainai idia negea ore gauna bamona,
to lau ese oiemu taravatu lau laloaboio lasi.

⁸⁴ Lohiabada e, lau, oiemu hesiai tauna,
be do lau naria noho ela bona edena negai?

Edena negai lau idia dagedage henia taudia edia dika davana,
be do oi henia?

⁸⁵ Hekokoroku taudia,
oiemu taravatu idia kamona henia lasi taudia,
ese hunia dekenai lau hadikaia totona dalana idia karaia noho.

⁸⁶ Lohiabada e,

oiemu taravatu ibounai be ai abidadama henia diba.
 Mani lau do oi durua,
 badina tau haida ese,
 lau hadikaia totona hereva koikoi idia gwauraia noho.
⁸⁷ Idia ese kahirakahira lau idia alaia,
 to lau ese oiemu taravatu lau rakatania lasi.
⁸⁸ Oiemu noho hanaihanai lalokauna dainai,
 mani lau do oi naria namonamo.
 Unai neganai lau ese oiemu taravatu do lau kamoni henia.

Lohiabada ena taravatu dekenai abidadama henia kara

⁸⁹ Lohiabada e,
 oiemu hereva be do ia noho ela bona hanaihanai.
 Ia be guba dekenai ia gini goada noho.
⁹⁰ Oiemu hereva be mai maoromaoro bona momokani danu oi badinaia,
 bona do oi badinaia noho ela bona hanaihanai.
 Oi ese tanobada oi karaia, bona ia gini goada noho.
⁹¹ Oi sibona oi hereva,
 vadaeni gau ibounai idia noho, ia mai bona hari danu,
 badina be gau ibounai bona taunimani ibounai ese,
 oiemu gaukara idia karaia noho.
⁹² Bema oiemu taravatu lau moalelaia lasi neganai,
 egu hisihisi ese lau do ia hamasea momokani.
⁹³ Lau ese oiemu taravatu do lau rakatania lasi,
 badina idia dekena amo oi ese lau oi hamauria.
⁹⁴ Lohiabada e, lau be oiemu,
 mani lau do oi hamauria,
 badina lau ese oiemu hadibaia hereva lau tahua namonamo vadaeni.
⁹⁵ Kara dika taudia be hunia dekenai lau idia naria noho,
 lau do idia alaia gwauraia,
 to lau ese oiemu oda hereva lau lalao noho.
⁹⁶ Lau be hari lau diba, tanobada dekenai ia noho gauna ta,
 be ia namo momokani diba lasi,
 to oiemu taravatu sibona be ia namo herea momokani.

Tau ta ese Dirava ena taravatu ia ura henia momokani

⁹⁷ Lohiabada e,
 oiemu taravatu lau ura henia.
 Dina ena hora ibounai lalonai,
 oiemu taravatu lau lalao noho.
⁹⁸ Oiemu taravatu be lau dekenai ia noho nega ibounai,
 bona ia ese aonega lau dekenai ia henia noho.
 Inai aonega ese,
 lau dekenai idia tuari taudia edia aonega ia hereaia.
⁹⁹ Lauegu diba ese,
 egu hadibaia taudia ibounai edia diba ia hereaia noho,
 badina be lau ese Dirava ena hadibaia hereva lau lalao noho,
 ma lau lalao noho.
¹⁰⁰ Bona egu aonega ese tau buruka edia aonega ia hereaia noho,
 badina be oi Dirava, oiemu oda hereva lau badinaia noho.
¹⁰¹ Lau ese kara dikadia dekena amo lau raka siri noho,
 badina be lau ura Dirava ena hereva do lau kamoni henia.
¹⁰² Lohiabada e,
 oiemu hadibaia hereva dekena amo lau raka siri lasi,
 badina be oi sibona ese,
 oiemu hereva lau dekenai oi hadibaia noho.

103 Lauegu uduna dekenai hani ena mamina be namo momokani,
to Dirava e,
oimu hereva ena mamina ese hani ena mamina ia hereaia noho.
104 Lohiabada e,
oimu taravatu ese ura namodia lau dekenai ia henia noho.
Unai dainai kara dikadia ibounai lau ura henia lasi.

Dirava ena taravatu dekena amo diari ita abia

105 Lohiabada e,
oimu hereva be lamepa bamona,
lau ia hakaua noho, vadaeni lau raka maoromaoro diba.
Oimu hereva be diari,
ia ese egu dala ia hadiaria noho.
106 Lau ese lau gwauhamata vadaeni,
oimu hadibaia hereva maoromaorona do lau badinaia,
vadaeni inai gwauhamata do lau makohia lasi momokani.
107 Lohiabada e,
egu hisihisi be dika momokani.
Oimu gwauhamata hegeregereana oi ese lau do oi hamauria.
108 Lohiabada e, lau be oi dekenai lau guriguri,
bona oi dekenai lau tanikiu henia.
Lauegu tanikiu mani oi abia dae,
bona oimu oda hereva lau dekenai do oi hadibaia.
109 Nega ibounai mase be kahirakahira lau dekenai,
to lau ese oimu taravatu hereva lau laloaboio lasi.
110 Kara dika taudia ese tarapu idia atoa,
lau do idia hadikaia totona,
to lau ese oimu hadibaia hereva lau rakatania lasi.
111 Oimu oda hereva be nega ibounai lau dogoatao noho,
badina inai hereva be egu kudouna ena moale gauna.
112 Lau ese lau gwauhamata vadaeni,
oimu taravatu do lau kamoni henia noho,
ela bona do lau mase.

Lohiabada ena taravatu ese iseda mauri ia naria noho diba

113 Lohiabada e,
oimu murina dekenai idia raka koikoi taudia,
be lau ura henidia lasi,
to lau ese oimu taravatu lau ura henia noho.
114 Oi sibona ese egu mauri oi naria bona gimaia noho.
Lau ese oimu hereva lau hamomokania,
bona lau abidadama henia noho.
115 Umui kara dika taudia e,
lau dekena amo do umui raka siri,
badina lau ese Dirava ena taravatu lau ura badinaia.
116 Lohiabada e, oi gwauhamata vadaeni,
goada lau dekenai do oi henia.
Inai goada do oi henia,
vadaeni do lau mauri noho.
117 Lohiabada e,
oi ese lau do oi dogoatao,
vadaeni mauri do lau abia,
bona lau ese oimu oda hereva do lau badinaia nega ibounai.
118 Oimu taravatu idia kamoni henia lasi taudia,
be oi ese oi negea.

Idia edia koikoi karadia be anina lasi.

¹¹⁹ Oi ese kara dika taudia oi laloa be momoru sibona.

Unai dainai lau ese oiemu hadibaia hereva lau ura henia noho.

¹²⁰ Lohiabada e, oi garina lau gari noho.

Oiemu kota henia karadia lau laloa neganai, lau gari.

Lohiabada ena taravatu kamonai henia kara

¹²¹ Lau ese kara maoromaoro bona kara namo lau karaia vadaeni, unai dainai mani emu kara lau do oi naria, lau idia alaia gwauraia taudia ese lau do idia hadikaia lasi.

¹²² Lau, oiemu hesiai tauna, egu mauri mani do oi hamauria.

Lau do oi naria,

vadaeni hekokoroku taudia ese lau do idia hisihisi henia lasi.

¹²³ Egu matana idia dibura-dibura,

oiemu hamauria lau tahua dainai,

bona oiemu gwauhamata maoromaorona lau naria noho dainai.

¹²⁴ Oiemu noho hanaihanai lalokauna hegeregere,

mani lau do oi durua,

bona oiemu taravatu ena anina lau dekenai do oi hadibaia.

¹²⁵ Lau be oiemu hesiai tauna dainai,

lau dekenai oiemu aonega do oi henia,

vadaeni oiemu hadibaia hereva be do lau diba.

¹²⁶ Lohiabada e,

taunimanima ese oiemu taravatu idia utua noho.

Edia kerere davana do oi henia ena nega ia ginidae vadaeni.

¹²⁷ Oiemu oda hereva lau lalokau henia bada,

to golo lau ura henia sisina.

Io, oiemu oda edia namo ese golo namo herea ia hereaia.

¹²⁸ Unai dainai oiemu oda ibounai lau gwauraia be maoro.

Dala koikoi ibounai be lau ura lasi momokani.

Tau ta ia ura Dirava ena taravatu do ia kamonai henia momokani

¹²⁹ Lohiabada e,

oiemu hadibaia hereva be namo herea momokani.

Unai dainai mai egu kudouna ibounai danu,

idia dekenai lau kamonai henia noho.

¹³⁰ Oiemu hereva hadibaia kara ese diari ia havaraia noho,

bona oiemu hereva dekena amo,

diba lasi taudia ese aonega idia davaria.

¹³¹ Lohiabada e, oiemu hereva lau ura henia dikadika noho.

Unai dainai egu kudouna ia toreisi,

oiemu hereva do lau badinaia totona.

¹³² Lau dekenai do oi laloa,

bona lau dekenai do oi bogahisihisi henia,

badina oi ese inai bamona oi karaia noho,

oi idia lalokau henia taudia ibounai dekenai.

¹³³ Oiemu gwauhamata hegeregere, lau do oi naria,

vadaeni kara dika dekenai do lau moru lasi.

Oi durua lau,

vadaeni dika ese lau do ia halusia lasi.

¹³⁴ Tau haida ese lau idia hadikaia gwauraia noho.

Idia dekena amo lau do oi hamauria.

Unai neganai lau ese oiemu oda hereva,

be do lau kamonai henia diba.

¹³⁵ Lohiabada e,

mani lau kahirakahira do oi noho.
 Oiemu taravatu lau dekenai do oi hadibaia,
 bona oi ese lau do oi hanamoa.

¹³⁶ Lauegu matana ena ranu be sinavai ranu bamona ia diho,
 badina be taunimanima momo ese,
 oiemu taravatu idia kamonaia henia lasi noho.

Lohiabada ena taravatu be maoromaoro

¹³⁷ Lohiabada e, oiemu kara be maoromaoro bona momokani,
 bona oiemu taravatu danu be maoromaoro bona momokani.

¹³⁸ Oi ese oi atoa taravatu ibounai,
 be namo bona maoromaoro.

¹³⁹ Lau idia hadikaia gwauraia taudia ese,
 oiemu taravatu idia laloe lasi.

Unai dainai egu lalona ia badu,
 lahi ena sialu bamona.

¹⁴⁰ Oiemu gwauhamata ibounai be mai momokani danu,
 bona lau, oiemu hesiai tauna ese, idia lau ura henia noho.

¹⁴¹ Lau be anina lasi tauna,
 bona taunimanima ese lau idia hereva dika henia,

to oiemu taravatu hereva,
 be lau ese lau rakatania lasi.

¹⁴² Oiemu kara maoromaoro be do ia noho hanaihanai,
 bona oiemu taravatu be nega ibounai do ia momokani.

¹⁴³ Hisihisi bona laloe hekwarahi momo ese lau idia hadikaia noho,
 to oiemu taravatu ese lau idia hamoalea noho.

¹⁴⁴ Oiemu hadibaia hereva be nega ibounai idia maoromaoro.
 Mani emu kara oiemu hereva dekena amo,

diba bona aonega lau dekenai do oi henia,
 vadaeni mauri do lau davaria.

Dirava ena hamauria totona guriguri ta

¹⁴⁵ Lohiabada e,
 mai egu kudouna ibounai danu oi dekenai lau boiboi.

Lau dekenai mani do oi haere,
 bona lau ese oiemu taravatu do lau kamonaia henia.

¹⁴⁶ Lohiabada e,
 oi dekenai lau boiboi noho,
 be mani lau do oi hamauria,
 vadaeni oiemu hadibaia hereva do lau badinaia.

¹⁴⁷ Daba rere do lasi neganai,
 oiemu durua totona oi dekenai lau tai henia.
 Oiemu hereva dekenai lau abidadama henia noho.

¹⁴⁸ Hanuaboi ena nega ibounai lalonai lau noga noho,
 lau mahuta lasi,

badina oiemu hadibaia hereva lau laloe noho.
¹⁴⁹ Oiemu lalokau be ia noho hanaihanai dainai,

Lohiabada e, mani lau do oi kamonaia henia.
 Oiemu bogahisihisi mani do oi hedinaia,

bona egu mauri do oi hamauria.

¹⁵⁰ Lau dekenai idia badu henia,
 bona lau dekenai idia dagedage henia taudia,
 be lau dekenai kahirakahira idia raka mai noho.

Idia ese oiemu taravatu idia badinaia lasi momokani.

¹⁵¹ To oi Lohiabada, oi be lau kahirakahira oi noho,
 bona oiemu taravatu ibounai be momokani.

¹⁵² Nega daudau ia lao vadaeni,

lau ese oiemu hadibaia hereva lau tahua bona lau diba.
 Oi ese idia oi haginia, bona do idia noho hanaihanai.

Duraa totona guriguri ta

153 Lohiabada e,

egu hisihisi do oi itaia,

bona lau do oi hamauria,

badina be oiemu taravatu lau laloaboio lasi.

154 Taunimanima edia vairana dekenai,

egu hereva mani do oi durua,

bona lau do oi hamauria.

Lau dekenai mauri do oi henia, oiemu gwauhamata hegeregerena.

155 Kara dika taudia,

be oiemu hamauria do idia davaria lasi,

badina oiemu taravatu idia kamoni henia lasi.

156 To Lohiabada e, oiemu bogahisihisi be bada herea.

Oiemu bogahisihisi mani do oi hedinaraia,

bona lau do oi hamauria.

157 Lau idia hadikaia bona dagedage henia gwauria taudia be momo,

to oiemu taravatu badinaia kara dekena amo lau raka siri lasi.

158 Edia abidadama idia rakatania taudia lau itaia neganai,

lau ura henidia lasi momokani,

badina be oiemu taravatu idia kamoni henia lasi.

159 Lohiabada e, do oi laloa,

lau ese oiemu hadibaia hereva lau ura henia bada noho.

Oiemu lalokau be ia idau diba lasi dainai,

mani lau do oi hamauria.

160 Oiemu hereva ibounai edia anina be momokani,

bona oiemu kota hereva ibounai be maoromaoro,

ela bona hanaihanai.

Lohiabada ena taravatu ura henia momokani kara

161 Lohia taudia ese lau idia dagedage henia noho,

badina ta lasi,

to oiemu taravatu lau matauraia noho.

162 Oiemu gwauhamata dainai lau be moale bada.

Egu moale be moni bada ia davaria tauna ena moale hegeregerena.

163 Lau ese koikoi lau ura henia lasi momokani,

mai egu badu danu,

to oiemu taravatu lau lalokau henia noho.

164 Dina ta ta lalonai,

nega 7 lau ese oiemu ladana lau hanamo noho,

oiemu kota maoromaoro dainai.

165 Lohiabada e,

oiemu taravatu idia ura henia noho taudia ese,

maino namo herea idia abia noho,

bona gau ta ese do ia hamorudia diba lasi.

166 Lohiabada e,

oiemu hamauria totona oi dekenai lau naria noho,

mai egu abidadama danu,

bona oiemu oda lau badinaia noho.

167 Oiemu hadibaia hereva lau kamoni henia noho,

badina mai egu kudouna ibounai idia lau lalokau henia bada noho.

168 Oiemu oda bona oiemu hadibaia hereva lau kamoni henia noho,

badina be oi ese egu kara ibounai oi itaia noho.

Duraa totona ena guriguri

¹⁶⁹ Lohiabada e,

mani egu taitai oi dekenai do oi abia dae.

Laloa kehoa lau dekenai do oi henia,

oiemu gwauhamata hegeregerena.

¹⁷⁰ Egu noinoi mani do oi kamonai henia,

bona lau do oi hamauria,

oiemu gwauhamata hegeregerena.

¹⁷¹ Lau ese oi do lau hanamoa noho hanaihanai,

badina be oi ese oiemu taravatu lau dekenai oi hadibaia noho.

¹⁷² Oiemu taravatu dainai ane do lau abia,

badina be oiemu oda herevadia be maoromaoro.

¹⁷³ Mani lau durua totona do oi noho hegaegae nega ibounai,

badina oiemu taravatu edia dala dekenai lau raka noho.

¹⁷⁴ Lohiabada e,

oiemu hamauria ena durua totona oi dekenai lau laloa noho,

mai egu lalokau bada danu.

Oiemu taravatu dekena amo moale lau davaria noho.

¹⁷⁵ Lau dekenai mauri do oi henia,

oi do lau hanamoa noho diba totona.

Oiemu hadibaia hereva dekena amo lau do oi durua.

¹⁷⁶ Lau be lau loaloa kava noho,

ia boio vadaeni mamoe bamona.

Unai dainai mani emu kara lau,

oiemu hesiai tauna, do oi tahua,

badina be oiemu taravatu lau laloaboio lasi.

120*Idau tano dekenai ia noho tauna ena guriguri*

¹ Egu lalona ia hisihisi neganai,

lau ese Lohiabada dekenai lau tai henia,

bona ia ese lau dekenai ia haere henia.

² Lau gwau,

“Lohiabada e,

koikoi taudia dekena amo,

bona samania koikoi taudia dekena amo lau do oi hamauria.”

³ Koikoi tauna e, Lohiabada ese oi dekenai dahaka do ia karaia?

Oiemu kerere davana be edena dala dekenai do ia henia?

⁴ Ia ese tuari tauna ena diba mai edia matana,

dekena amo oi do ia pidia,

bona ia ese lahi gidadia,

siahu herea gaudia oiemu latanai do ia bubua.

⁵ Lau be umui dika taudia emui huanai lau noho,

bona egu noho be dika,

Meseka o Kedara dekenai lau noho ena dika bamona.

⁶ Maino idia ura henia lasi taudia edia huanai,

be lau noho nega daudau momokani.

⁷ Lau be maino lau ura,

to lau be inai bamona lau hereva neganai,

idia be tuari idia ura.

121

Lohiabada be iseda naria bona gimaia tauna

¹ Lau ese ororo dekenai egu matana do lau negea,
to lau do ia durua tauna be edeseni do lau davaria?

² Lohiabada be egu durua Tauna.

Ia ese guba bona tanobada ia karaia.

³ Lohiabada ese oi do ia dogoatao,
vadaeni oiemu aena do ia dedi lasi.

Ia ese oi do ia naria,
ia be ia mahuta lasi.

⁴ Kamonai!

Lohiabada ese Israela ia naria noho.

Ia be nega ta ia mahuta lasi,
lasi momokani.

⁵ Lohiabada ese oi do ia gimaia.

Ia be oiemu badibadinai ia noho,
oi ia naria noho.

⁶ Dina neganai, dina ena siahu ese oi do ia hagorerea lasi,
bona hanuaboi neganai hua ese oi do ia hadikaia lasi.

⁷ Lohiabada ese dika ibounai dekena amo oi ia naria noho.
Ia ese oiemu mauri do ia gimaia.

⁸ Oiemu ruma oi rakatania neganai,

Lohiabada ese oi do ia naria,
bona oi giroa mai neganai danu,
ia ese oi do ia gimaia,
harahari ia lao bona hanaihanai.

122

Ierusalemia idia hanamoa ane

¹ Lau dekenai idia hereva, idia gwau,
“Lohiabada ena Ruma dekenai do ita lao.”

Inai bamona idia hereva neganai,
lau be mai moale bada danu.

² Vadaeni harahari ita be Ierusalemia dekenai ita noho,
Ierusalemia ena magu ikoukou edia lalonai ita gini noho.

³ Ierusalemia be idia ese idia haginia lou, hanua badana.

Iena toana be namo,
badina be idia haginia namonamo vadaeni.

⁴ Israela ena iduhu taudia ibounai be iniseni idia mai noho.

Lohiabada do idia tanikiu henia totona,
iena oda hereva gunana hegeregerena.

⁵ Inai Ierusalemia dekenai be Israela ena king taudia ese,
edia bese taudia idia kota henia.

⁶ Ierusalemia ena maino totona do umui guriguri.

Lau ura Ierusalemia idia ura henia taudia,
be do idia noho mai maino danu.

⁷ Lau ura maino be Ierusalemia ena magu lalonai do ia noho,
bona lau ura Ierusalemia ena kohoro lalonai,
taunimanima ese mauri do idia davaria.

⁸ Lau ese egu turana bona egu varavara lau laloa noho,
 bona Ierusalem dekenai lau hereva, lau gwau,
 “Maino be oiemu lalona dekenai do ia noho be namo.”
⁹ Lau be Lohiabada, iseda Dirava ena Ruma lau laloa noho.
 Unai dainai Dirava lau noia noho,
 ia ese Ierusalem do ia hanamo bada.

123

Bogahisihisi totona guriguri ta

¹ Lohiabada e, egu matana be oi dekenai lau negea noho.
 Oi be guba dekenai oi helai noho,
 guba ena King.
² Hesiai tauna ese iena biaguna ia abidadama henia noho,
 bona hesiai kekeni ese,
 iena biaguna hahine ia abidadama henia noho hegeregere,
 ai ese unai bamona oi dekenai do ai abidadama henia noho,
 ela bona oi ese ai dekenai oi bogahisihisi henia.
³ Lohiabada e, ai dekenai do oi bogahisihisi,
 badina be taunimanima ese ai idia kirikirilaia bada vadaeni.
⁴ Nega daudau herea,
 be noho kava bona mai edia hekwarahi lasi taudia ese,
 ai idia hevaseha henia,
 bona hekokoroku taudia be mai dagedage danu,
 ai dekenai idia hereva dika vadaeni.

124

Dirava be iena bese taudia edia Hamauria Tauna

¹ Bema Lohiabada ese ita ia durua lasi neganai,
 ita be edena bamona do ita karaia?
 Israela taudia ese inai henanadai idia haere henia be namo.
² Ita dekenai idia dagedage taudia ese ita idia tuari henia,
 bona bema Lohiabada ese ita ia durua lasi neganai,
³ unai dagedage taudia ese ita do idia hadikaia ore,
 idia edia badu mai siahu bada dekena amo.
⁴ Unai neganai abata ese ita do ia abia lao,
 bona ranu bada ese ita do ia koua momokani.
⁵ Hurehure badana ese ita do ia koua,
 vadaeni ita be do ita mase ore,
 to inai bamona ia vara lasi.
⁶ Ita ese Lohiabada do ita tanikiu henia be namo,
 Ia ese ita idia hadikaia gwauraia taudia ia koua.
⁷ Ita ese idia dekena amo ita heau mauri,
 manu ese labana tauna ena tarapu dekena amo ia heau mauri bamona.
 Tarapu ia makohia vadaeni,
 bona ita heau mauri vadaeni.
⁸ Lohiabada ese ita ia durua noho.
 Ia ese guba bona tanobada ia karaia.

125

Dirava ese iena bese taudia dekenai noho mauri namona ia henia

¹ Lohiabada idia abidadama henia taudia be Siona Ororo bamona.
 Inai Ororo be ia marere diba lasi,
 ia be do ia gini goada noho hanaihanai.

² Ororo ese Ieruselema idia koua hagegea noho hegeregerena,
Lohiabada ese iena bese taudia unai bamona ia koua hagegea noho,
hari inai neganai, ia lao bona hanaihanai.

³ Kara dika taudia ese nega ibounai,
Dirava ena bese taudia edia tano do idia biagua lasi,
badina bema unai bamona neganai,
sedira Dirava ena bese taudia danu ese kara dika do idia karaia.

⁴ Lohiabada e,
kara namo taudia do oi hanamoa.
Oiemu taravatu idia kamoni henia noho taudia do oi hanamoa.
⁵ To oi ese kara dika taudia edia dika davana oi henia neganai,
mani emu kara,
oiemu dala idia rakatania taudia danu edia dika davana do oi henia.

Israela dekenai maino ia noho, be namo!

126

Israela taudia ese Dirava idia noia do ia hamauridia

¹ Lohiabada ese ita ia abia mai lou Siona dekenai neganai,
ita be nihi ita abia noho taudia bamona.

² Unai neganai ita kiri bada,
bona mai moale bada danu ane ita abia!
Bona idau bese taudia ese ita idia herevalaia, idia gwau,
“Lohiabada ese kara badadia idia totona ia karaia vadaeni.”

³ Momokani!
Ia ese kara badadia momokani ita totona ia karaia.
Unai dainai ita be mai moale bada danu.

⁴ Lohiabada e, mani emu kara,
ai do oi hakaua lou aiemai tano dekenai.
Ai do oi mailaia lou,
medu ese sinavai kaukau dekenai ranu ia mailaia lou bamona.

⁵ Idia hadohado neganai,
madi edia matana ena ranu ia diho taudia,
be gabeai mai edia moale danu,
anina do idia gogoa.

⁶ Io, momokani,
uhe idia abia lao neganai idia tai noho taudia,
be mai moale danu do idia giroa mai,
bona anina idia mailaia neganai ane do idia abia.

127

Dirava ena kara namo ita dekenai dainai iena ladana do ita hanamoa

¹ Bema Lohiabada ese ruma ia haginia lasi neganai,
unai ruma idia haginia taudia idia hekwarahi kava noho.
Bema Lohiabada ese hanua ta ia naria lasi neganai,
hanua gimaia taudia ese idia gimaia kava.

² Ita ese daba maragi neganai ita toreisi,
bona ita gaukara auka ela bona hanuaboi momokani,
moni bona aniani gaudia do ita davaria totona.
To inai bamona ita karaia kava,
badina be Lohiabada ese ia lalokau henidia taudia dekenai,

aniani bona kohu ia henidia,
bona idia mahuta namonamo.

³ Kamonai!

Iseda natudia be Dirava ena harihari gauna ita dekenai.

Dirava ese ita dekenai ia henidia,
bona idia ese ita idia hanamoa noho.

⁴ Eregabe tauna ena natuna taudia be,
tuari tauna ena imana dekenai peva ena diba bamona.

⁵ Bema tau ta be mai ena natuna momo, ia be do ia moale.

Idia ese ia do idia durua, vadaeni do ia kwalimu,
bona inai tau idia hadikaia gwauraia taudia idia kota henia neganai,
ia be kota do ia lusi lasi.

128

Lohiabada kamonai henia kara ena davana namona

¹ Lohiabada dekenai idia gari noho taudia ibounai be namo,
badina iena dala dekenai idia raka noho.

² Oiemu gaukara ena davana do oi davaria.

Do oi moale, bona oiemu noho do ia namo.

³ Oiemu ruma dekenai oiemu adavana,
be vain auna mai ena huahua momo bamona.
Oiemu natuna memero be olive au matamatadia bamona,
oiemu aniani patana do idia helai hagegea noho.

⁴ Momokani, tau ta bema Lohiabada ia kamonai henia neganai,
ia ese hanamoa inai bamona do ia davaria.

⁵ Siona dekena amo Lohiabada ese oi do ia hanamoa!
Bona oiemu mauri dinadia ibounai lalonai, do oi itaia,
Jerusalema ena noho be namo herea.

⁶ Lau ura oiemu mauri dinadia be momo,
vadaeni oiemu tubuna do oi itadia!

Israela dekenai maino ia noho, be namo!

129

Israela dekenai idia tuari henia taudia be Dirava ese do ia hadikaia

¹ Israela e, ai dekenai oiemu sivarai do oi hadibaia,
oi dekenai idia tuari henia taudia ese,
nega daudau oi idia hadikaia vadaeni.

Oi be mero neganai ia mai bona harihari,
unai bamona idia karaia.

² Israela ese ia haere, ia gwau,
“Io, lau be mero neganai ia mai bona hari,
lau idia hadikaia gwauraia taudia ese,
lau idia dagedage henia dikadika,
to idia ese lau idia halusia lasi.

³ Idia ese lau idia kwadia,
kwadi gauna ese egu doruna ena kopina ia utua dobu.

Egu doruna ena berona toana,
be uma gabuna ena dadaira latadia momo bamona.

⁴ To Lohiabada ena kara be maoromaoro.
Ia ese hesiai mai guia danu edia seini,
dekena amo lau ia kokia ruhaia vadaeni.”

⁵ Lau ura Siona idia badu henia taudia ibounai,
 be tuari dekenai do idia lusi,
 bona mai hemarai danu do idia heau lou.
⁶ Namona idia be ruma ena guhi dekenai idia tubu rei bamona,
 do idia huahua lasi neganai do idia kaukau.
⁷ Rei utua tauna ese,
 unai rei be iena imana dekenai do ia abia lasi,
 bona rei guia tauna,
 be iena kemena dekenai do ia haboua lasi.
⁸ Vadaeni raka hanaia taudia ese,
 inai taudia do idia herevalaia lasi, do idia gwau lasi,
 “Lohiabada ese umui do ia hanamoa!
 Lohiabada ena ladana dainai ai ese umui ai hanamoa noho!”

130

Tau ta ese Dirava ia noia, do ia durua

¹ Lohiabada e, egu lalona ia metau momokani dainai,
 oi dekenai lau tai noho!
² Lohiabada e,
 egu taitai mani do oi kamonai!
 Durua totona lau noinoi noho,
 be mani do oi kamonai!

³ Bema oi ese aiemai kara dika ibounai oi duahia neganai,
 daika ese oiemu kota lalonai ia kwalimu diba?
⁴ To oi ese aiemai dika oi gwauatao noho,
 unai dainai ai ese oi dekenai ai gari henia be namo.

⁵ Lau ura dikadika Lohiabada ese lau do ia durua,
 bona iena hereva lau abidadama henia noho.
⁶ Lau ese Lohiabada totona lau naria noho,
 lau ura bada ia ese lau do ia durua.
 Bona inai Lohiabada dekenai lau naria kara ese,
 hanua idia gimaia taudia edia naria kara ia hereaia noho,
 idia ese daba rere totona idia naria neganai.

⁷ Israela taudia e,
 Lohiabada do umui abidadama henia,
 badina iena lalokau bona bogahisihisi idia noho hanaihanai,
 bona nega ibounai ia ura taunimanima do ia hamauridia.
⁸ Lohiabada ese iena bese, Israela taudia,
 edia kara dika ibounai dekena amo do ia hamauridia.

131

Abidadama tauna ta ena guriguri

¹ Lohiabada e, egu hekokoroku be lau rakatania vadaeni.
 Egu ladana lau habadaia karana be lau hadokoa vadaeni.
 Gau bada herea, bona hoa gaudia,
 egu aonega idia hanaia gaudia dekenai lau laloa lasi.
² Lasi momokani, to lauegu lauma be lau ese lau hamanaua,
 bona lau hamanauaia,
 mero maragina be sinana ena kemena dekenai ia manau noho bamona.
 Egu lauma be unai bamona ia manau noho.

³ Israela taudia e,
umui ese Lohiabada do umui abidadama henia,
hari inai negana dekenai amo ia lao bona hanaihanai.

132

Dubu Helaga do ita hanamoa

¹ Lohiabada e,
Davida do oi laloaboio lasi.
Hisihihi momo be ia ese ia abia,
mai haheauka danu, mani do oi laloa.

² Ia ese oi Lohiabada dekenai ia gwauhamata.
Iakobo ena Dirava dekenai ia gwauhamata,
³ ia gwau: “Lauegu ruma lalonai do lau raka vareai lasi,
egu mahuta patana dekenai do lau hekure lasi,
⁴ ma egu matana do lau koua lasi,
⁵ ela bona Lohiabada ena gabu ta do lau abia hegaegae,
Iakobo ena Sياهو Ibounai Dirava ena noho gabuna ta be unai.”

⁶ Betelehema dekenai sivarai ita kamoni,
Lohiabada ena Taravatu Maua ena herevana ita kamoni,
bona ita ese Iara ena uma gabuna dekenai ita davaria.

⁷ Vadaeni ita gwau,
“Lohiabada ena Ruma dekenai do ita lao.
Iena terona ena vairana dekenai do ita tomadiho be namo.”

⁸ Lohiabada e, do oi toresi,
oiemu laga-ani gabuna dekenai do oi mai,
bona oi ese oiemu Taravatu Maua do oi mailaia.
Inai Maua be oiemu sياهو ena toana.

⁹ Oiemu hahelagaia taudia ese,
kara maoromaoro sibona nega ibounai do idia karaia be namo.
Bona oiemu bese taudia,
be mai moale bada danu do idia boiboi be namo.

¹⁰ Oi ese oiemu hesiai tauna Davida dekenai oi gwauhamata vadaeni.
Lohiabada e,
oi ese oi abia hidi king do oi rakatania lasi.

¹¹ Oi ese gwauhamata metauna Davida dekenai oi karaia vadaeni,
bona inai gwauhamata be do oi utua lasi.
Oi gwau,

“Lau ese oiemu natuna ta dekenai king dagi do lau henia,
bona ia ese oiemu gabu dekenai king sياهو do ia abia.

¹² Bema oiemu natuna tau ese,
egu gwauhamata taravatuna idia badinaia,
bona idia dekenai lau henia taravatu do idia kamoni henia neganai,
idia edia natudia danu ese,
oiemu king dagina do idia abia noho, nega hanaihanai.”

¹³ Lohiabada ese Siona ia abia hidi vadaeni.
Ia ura Siona be iena hanua do ia halaoa.

¹⁴ Ia gwau,
“Inai hanua dekenai do lau noho ela bona hanaihanai,

badina be inai gabu lau ura henia momokani.

¹⁵ Lau ese gau ibounai Siona dekenai do lau atoa,
iena taudia edia ura gaudia ibounai.
Bona iena ologami taudia dekenai,
aniani momo do lau henia,
idia boga kunu totona.

¹⁶ Lau ese Siona ena hahelagaia taudia do lau hanamoa,
edia kara ibounai dekenai.
Idia ese hamauria hereva do idia harorolaia,
bona Siona ena taudia ese ane do idia abia,
mai edia moale danu.

¹⁷ “Siona dekenai Davida ena tubuna ta,
be king badana momokani do lau halaoa.
Siona dekenai, lau ese lau abia hidi king ena king siahuna,
be do ia noho ela bona hanaihanai.
¹⁸ Ia do idia hadikaia gwauraia taudia be do lau hahemaraidia,
to iena basileia taudia be do idia noho,
mai namo bona mai goada danu.”

133

Dirava ena taudia ese idia ta ta dekenai idia lalokau henia

¹ Bema Dirava ena taudia do idia noho hebou,
mai edia laloa tamona neganai,
unai kara be namo, bona mai ena moale danu.

² Unai be dehoru namo herea,
Arona ena kwarana dekenai idia bubua bamona,
Arona ena auki huina dekenai ia bubua diho noho,
iena kouti dabua ena aiona gabuna dekenai danu.

³ Unai lalokau hebou,
be Heremona Ororo ena hanuaboi ranu bamona.
Inai hanuaboi ranu,
be Siona Ororo ena latanai danu ia moru noho.
Inai gabu dekenai be Lohiabada ese ia gwauhamata vadaeni,
iena hanamoa do ia atoa.
Iena hanamoa be inai: Mauri hanaihanai.

134

Dirava do ita hanamoa

¹ Umui Lohiabada ena hesiai gaukara karaia noho taudia ibounai e,
umui mai,
Lohiabada do umui hanamoa.

Umui be hanuaboi neganai iena Dubu Helaga lalonai umui gini noho.

² Dubu Helaga lalonai emui imana do umui abia isi,
do umui guriguri,

bona Lohiabada do umui hanamoa.

³ Lohiabada, guba bona tanobada ia karaia ena Dirava,
ese Siona dekena amo umui do ia hanamoa!

135

Dirava hanamoa ane ta

¹ Dirava do umui hanamoa!

Lohiabada ena gaukara umui karaia taudia e,
Lohiabada ena ladana do umui hanamoa.

² Lohiabada ena Ruma helagana lalonai umui gini noho,
iseda Dirava ena Dubu Helaga lalonai.

³ Lohiabada do umui hanamoa,
badina Lohiabada be ia namo.
Ane dekenai iena ladana do umui hanamoa,
badina ia be mai ena bogahisihisi.

⁴ Badina be Lohiabada ese Iakobo ia abia hidi vadaeni,
ia sibona ena.
Israela taudia ia abia hidi,
iena bese korikori.

⁵ Lau diba Lohiabada be ia bada.
Ia ese dirava ibounai ia hereaia momokani.
⁶ Badina Lohiabada ese sibona ena ura ia karaia noho,
guba dekenai bona tanobada dekenai danu,
davara dekenai bona davara ena dobu gabudia danu.

⁷ Ia ese tanobada ena kahana ibounai dekenai,
medu ena ori ia havaraia noho.
Ia ese iena medu ia siaia neganai,
kevaru danu ia havaraia noho.
Bona lai danu ia mailaia,
ia haboua gabuna, guba dekena amo.

⁸ Aigupito dekenai Lohiabada ese vara guna natudia ia alaia mase,
taunimanima edia vara guna natudia,
bona edia ubua gaudia edia vara guna natudia danu.

⁹ Aigupito dekenai Lohiabada ese,
hoa karadia bona toa karadia ia karaia,
Aigupito ena king,
bona iena hesiai taudia ibounai do ia hadikaia totona.

¹⁰ Lohiabada ese bese momo ia hadikaia ore,
bona ia ese, mai edia siahu bada king taudia ia alaia mase:

¹¹ Sihona, Amoro taudia edia king, Oga, Basana tano ena king,
bona Kanana taudia edia king ibounai.

¹² Inai king edia tano,
be Lohiabada ese iena bese taudia dekenai ia henia.
Israela besena dekenai edia tano ia henia.

¹³ Lohiabada e,
oiemu ladana be taunimanima ese do idia gwauria hanaihanai,
bona gabeai do idia vara bese taudia ese oi do idia laloatao.

¹⁴ Lohiabada ese iena bese taudia do ia gwauraidia maoro.
Ia ese iena hesiai taudia dekenai do ia bogahisihisi henia.

¹⁵ Bese idauidau edia dirava,
be siliva bona golo dekena amo idia karaia noho.
Taunimanima ese edia imadia dekena amo dirava idia karadia noho.

¹⁶ Idia be mai ududia,
to idia hereva diba lasi.
Idia be mai edia matadia,
to idia itaia diba lasi.

¹⁷ Idia be mai taiadia,
to idia kamonai diba lasi.
Idia hahodi diba lasi danu.

18 Lau ura inai kaivakuku idia karaia,
bona idia dekenai idia abidadama henia taudia ibounai,
be unai kaivakuku hegeregereana, Lohiabada ese idia do ia halaoa.

19 Israela taudia e,
Lohiabada do umui hanamoa.
Arona ena iduhu taudia ibounai e,
Lohiabada do umui hanamoa.

20 Umui Levi taudia e,
Lohiabada do umui hanamoa.
Lohiabada dekenai umui gari henia taudia ibounai e,
ia do umui hanamoa.

21 Siona dekenai umui noho taudia e, Lohiabada do umui hanamoa.
Inai be Ierusalem, Lohiabada ena noho gabuna momokani.

Lohiabada do umui hanamoa!

136

Dirava tanikiu henia ane ta

1 Lohiabada do ita tanikiu henia,
badina ia be namo.
Iena lalokau bona bogahisihisi do idia noho hanaihanai.

2 Ia be dirava ibounai ia hereaia Diravana,
bona do ita tanikiu henia.
Iena lalokau bona bogahisihisi do idia noho hanaihanai.

3 Ia be lohia ibounai ia hereaia Lohiana,
bona do ita tanikiu henia.
Iena lalokau bona bogahisihisi do idia noho hanaihanai.

4 Lohiabada sibona ese hoa kara badadia ia karaia noho.
Iena lalokau bona bogahisihisi do idia noho hanaihanai.

5 Iena aonega dekena amo guba ia karaia.
Iena lalokau bona bogahisihisi do idia noho hanaihanai.

6 Ia ese tanobada be davara ena latanai ia haginia.
Iena lalokau bona bogahisihisi do idia noho hanaihanai.

7 Dina, hua bona hisiu, be ia ese ia karaia.
Iena lalokau bona bogahisihisi do idia noho hanaihanai.

8 Dina ena diari ese dina ia biagua noho.
Iena lalokau bona bogahisihisi do idia noho hanaihanai.

9 Hua bona hisiu ese hanuaboi idia biagua noho.
Iena lalokau bona bogahisihisi do idia noho hanaihanai.

10 Aigupito dekenai vara guna natudia ia alaia mase Diravana,
be do ita tanikiu henia,
Iena lalokau bona bogahisihisi do idia noho hanaihanai.

11 Ia ese Aigupito dekena amo Israela taudia ia hakaua mai.
Iena lalokau bona bogahisihisi do idia noho hanaihanai.

12 Iena imana mai ena goada, bona mai ena siahu bada dekena amo.
Iena lalokau bona bogahisihisi do idia noho hanaihanai.

13 Ia ese Davara Kakakaka ia hapararaia.
Iena lalokau bona bogahisihisi do idia noho hanaihanai.

14 Ia ese davara ena huanai iena bese taudia ia hakaudia mauri.
Iena lalokau bona bogahisihisi do idia noho hanaihanai.

15 To ia ese Aigupito ena king bona iena tuari orea,

be Davara Kakakaka dekenai ia aladia mase.
Iena lalokau bona bogahisihisi do idia noho hanaihanai.

- 16 Lohiabada ese iena bese taudia,
tano kaukau dekenai ia hakaudia hanaia.
Iena lalokau bona bogahisihisi do idia noho hanaihanai.
17 Ia ese, mai edia siahu bada king taudia ia alaia mase.
Iena lalokau bona bogahisihisi do idia noho hanaihanai.
18 Ia ese mai edia sivarai badadia king taudia ia alaia mase.
Iena lalokau bona bogahisihisi do idia noho hanaihanai.
19 Sihona, Amoro taudia edia king.
Iena lalokau bona bogahisihisi do idia noho hanaihanai.
20 Oga, Basana taudia edia king.
Iena lalokau bona bogahisihisi do idia noho hanaihanai.
21 Edia tano be iena bese taudia dekenai ia henia.
Iena lalokau bona bogahisihisi do idia noho hanaihanai.
22 Inai tano be Israela, iena hesiai tauna dekenai ia henia.
Iena lalokau bona bogahisihisi do idia noho hanaihanai.
23 Tuari ita lusi neganai Lohiabada ese ita ia laloaboio lasi.
Iena lalokau bona bogahisihisi do idia noho hanaihanai.
24 Ita idia hadikaia gwauraia taudia dekena amo,
Dirava ese ita ia hamauria.
Iena lalokau bona bogahisihisi do idia noho hanaihanai.
25 Ia ese mauri gaudia ibounai dekenai aniani ia henia noho.
Iena lalokau bona bogahisihisi do idia noho hanaihanai.
- 26 Guba ena Dirava do ita tanikiu henia be namo.
Iena lalokau bona bogahisihisi do idia noho hanaihanai.

137

Israela taudia be Babulonia dekenai idia lalohisihisi ena ane

- 1 Babulonia ena sinavai badibadinai ai helai,
bona unuseni Siona ai laloa neganai ai tai.
2 Sinavai badinai idia gini noho audia edia rigi dekenai,
aiemai gita ai taua dae.
3 Ai idia abia mauri taudia ese,
ai idia oda henia ane do ai abia,
idia do ai hamoalea totona.
Idia gwau,
“Siona ena ane ta do umui abia.”
- 4 To idau tano dekenai,
Lohiabada ena ane be edena bamona do ai abia diba?
5 Ierusalema e, bema lau ese oi lau laloaboio neganai,
namona be egu imana do ia dika,
vadaeni gita do lau botaia lou diba lasi.
6 Bema oi lau laloaboio neganai,
bona oi be egu moale gauna momokani do lau halaoa lasi neganai,
namona be egu malana do ia dika,
vadaeni ane do lau abia lou lasi.
- 7 Lohiabada e,
Edoma taudia edia kara mani oi laloa noho,

Ierusalemia idia tuari henia, bona idia abia neganai,
edia hereva mani oi laloa lou, idia gwau,
“Ierusalemia hanua do ita makohia, do ia diho momokani.”

⁸ Babulonia e, kamona!

Oi be do idia hadikaia ore momokani.

Ai dekenai kara dika oi karaia vadaeni,

ena davana oi dekenai do ia karaia tauna be do ia moale,

⁹ bona oiemu natuna maragidia do ia abia,

nadi badana dekenai do ia negedia diho, ia hamasedia ore,

unai tauna be do ia moale.

138

Dirava do ita tanikiu henia

¹ Lohiabada e,

mai egu kudouna ibounai danu lau ese oi do lau tanikiu henia,

ma idau dirava edia vairana dekenai,

oi do lau hanamoa egu ane dekena amo.

² Oiemu Dubu Helaga ena vairana dekenai do lau tui diho,

bona oiemu ladana do lau hanamoa,

oiemu noho hanaihanai lalokauna,

bona oiemu abidadama kara ai dekenai dainai.

Badina be oi ese oi hedinarai vadaeni,

oiemu ladana bona oiemu hereva be namo herea,

idia ese gau ibounai edia namo idia hereaia noho.

³ Lau ese oi dekenai lau boiboi neganai,

egu noinoi oi kamona henia,

bona oiemu goada dekena amo lau oi hagoadaia momokani vadaeni.

⁴ Lohiabada e,

tanobada ena king ibounai ese oi do idia hanamoa,

badina be oiemu gwauhamata hereva idia kamona vadaeni.

⁵ Lohiabada ena kara badadia do idia hanamoa, edia ane dekenai,

badina be oi Lohiabada, oiemu hairaina be bada herea.

⁶ Lohiabada e,

oi be atai momokani oi noho,

to oi ese manau taudia oi laloa noho,

bona hekokoroku taudia ese,

oi dekena amo idia hunia diba lasi.

⁷ Hekwarahi bona hisihisi momo lau dekenai idia vara neganai,

oi ese egu mauri oi naria noho.

Lau idia hadikaia gwauraia taudia,

be oi ese edia badu oi koua noho,

bona oiemu sياهو dekena amo lau oi hamauria noho.

⁸ Lohiabada e,

lau diba oi ese lau dekenai oi gwauhamata gaudia ibounai,

be do oi karaia momokani.

Lohiabada e,

oiemu lalokau bona bogahisihisi do idia noho hanaihanai.

Oi ese oi hamatamaia vadaeni gaukara,

be mani do oi rakatania lasi.

139

Dirava ese ita ia diba momokani, bona ia ese ita ia naria noho

¹ Lohiabada e,

oi ese egu lalona oi tahua vadaeni,

lau oi diba momokani vadaeni.

² Egu kara ibounai oi diba vadaeni.

Oi be daudau herea dekena amo egu lalona ibounai oi diba.

³ Oi ese egu gaukara, bona egu laga-ani oi itaia namonamo noho.

Lauegu kara ibounai oi diba.

⁴ Do lau hereva lasi neganai,

oi ese egu hereva be oi diba guna vadaeni.

⁵ Oi ese egu kahana kahana dekenai oi noho.

Oiemu siahua dekena amo lau oi naria noho.

⁶ Oiemu diba egu kara dekenai be ia bada herea momokani.

Inai bamona diba be lau davaria diba lasi.

⁷ Oiemu Lauma dekena amo edeseni do lau lao diba?

Oiemu vairana dekena amo edena bamona do lau heau boio?

⁸ Guba dekenai bema lau daekau gwauraia, oi be unuseni oi noho.

Mase taudia edia gabu dekenai bema lau hekure gwauraia,

oi be unuseni oi noho danu.

⁹ Bema dina ia daekau kahana dekenai lau roho lao neganai,

o dina ia diho kahana,

ena daudau momokani gabuna dekenai lau noho neganai,

¹⁰ oi be unuseni oi noho, lau do oi hakaua totona,

bona lau do oi durua totona.

¹¹ Sedira lau ese dibura do lau noia, ia ese lau do ia hunia,

o diari do lau noia,

lau ia hagegea noho diari, be do ia dibura,

¹² to dibura be ia dibura lasi oi dekenai,

bona oi dekenai hanuaboi be ia diari, dina bamona.

Dibura bona diari ruaosi be idia hegeregere oi dekenai.

¹³ Oi ese egu tauanina ena kahana ibounai oi karaia.

Lauegu sinana ena bogana dekenai lau oi atoa vadaeni.

¹⁴ Oi lau tanikiu henia,

badina mai hoa danu lau oi karaia.

Oiemu kara ibounai be mai hoa bona gari danu.

Lauegu kudouna dekenai,

inai bamona lau diba momokani.

¹⁵ Lauegu turiana be,

egu sinana ena bogana lalonai idia vara hamatamaia noho neganai,

lau be unai hunia gabuna dekenai lau noho neganai,

oi be oi diba lau be unuseni.

¹⁶ Lau be do lau vara lasi neganai,

oi ese lau oi itaia.

Lau be do lau vara lasi neganai,

oi ese egu mauri dinadia oi torea vadaeni oiemu buka dekenai,

unai dinadia be do idia hamatamaia lasi neganai.

¹⁷ Dirava e,

oiemu lalona be lau dekenai idia dobu bona namo herea momokani.

Oiemu lalao be momo herea momokani.
¹⁸ Bema idia lau duahia neganai,
 idia be kone miri idia momo herea bamona.
 Lau noga neganai,
 lau be oi danu lau do noho.

¹⁹ Dirava e,
 lau ura be kara dika taudia oi ese oi alaia mase!
 Lau ura dagedage taudia ese lau do idia rakatania!
²⁰ Idia ese oi idia hereva dika henia.
 Oiemu ladana hadikaia hereva idia gwauraia noho.

²¹ Lohiabada e,
 oi dekenai idia badu noho taudia,
 be lau ese lau badu henidia noho!
 Oi dekenai idia dagedage henia taudia be lau ura henidia lasi.
²² Lau ese lau badu henidia momokani,
 bona lau lalao idia be lau idia tuari henia taudia bamona.

²³ Dirava e,
 egu kudouna do oi tahua,
 ena dala ibounai do oi diba.
 Egu lalona danu do oi tohoa,
 bona egu lalao gaudia do oi davaria.
²⁴ Do oi itaia, bema egu lalona dekenai dika ta ia noho,
 bona noho hanaihanai dalana dekenai mani lau do oi hakaua.

140

Dirava ese do ia gimaia totona Davida ia noia

¹ Lohiabada e,
 kara dika taudia dekena amo lau do oi hamauria.
 Dagedage taudia dekena amo lau do oi naria.
² Idia ese nega ibounai,
 kara dika karaia daladia idia lalao noho,
 bona nega ibounai heai idia havaraia noho.
³ Edia maladia be mai matadia,
 gaigai edia isena bamona,
 bona edia bibina dekenai,
 be koria gaigai ena mase muramurana ia noho.

⁴ Lohiabada e,
 kara dika taudia dekena amo lau do oi gimaia.
 Dagedage taudia dekena amo lau do oi naria.
 Idia ese lau do idia hadikaia dalana idia tahua noho.
⁵ Hekokoroku taudia ese tarapu ta idia hunia vadaeni,
 lau do idia abia totona.
 Dika taudia ese edia reke ena varo idia karaia hegaegae,
 bona egu raka dala dekenai inai tarapu idia atoa vadaeni,
 lau do idia dogoatao totona.

⁶ Lau ese Lohiabada lau hamaoroa,
 lau gwau,
 “Oi be lauegu Dirava.”
 Lohiabada e, lau do oi durua!
 Egu boiboio mani do oi kamoni!

7 Lohiabada e, oi be egu Dirava,
oi be egu hamauria Tauna goadana.
Oi ese tuari lalonai lau oi naria vadaeni.
8 Lohiabada e, kara dika taudia edia ura do oi henia lasi.
Edia palani dikana do oi durua lasi.

9 Lau idia hadikaia gwauraia taudia dekenai,
kwalimu do oi henia lasi.
Lau dekenai idia hereva dika vadaeni,
lau do idia haorea totona.
To inai dika, lau dekenai do idia karaia gwauraia gauna,
be idia sibodia dekenai do oi havaraia,
inai dika ese idia do ia hadikaia momokani.
10 Lahi gidadia be edia kwaradia edia latanai do oi hamorua,
bona guri badana lalonai idia do oi negea diho,
vadaeni unai guri dekena amo do idia toreisi lou lasi.
11 Taunimanima idia samania koikoi taudia dekenai,
kwalimu do oi henia lasi.
Bona dagedage taudia dekenai dika do oi havaraia,
vadaeni oi ese idia do oi haorea momokani.

12 Lohiabada e,
lau diba ogoami taudia,
bona gau lasi taudia,
be tau dikadia ese idia dagedage henidia neganai,
oi ese mai maoromaoro danu,
unai hisihisi abia taudia oi durua noho.

13 Momokani,
kara maoromaoro taudia ese oiemu ladana do idia hanamoa.
Kara maoromaoro taudia be oiemu vairana dekenai do idia noho.

141

Adorahi ena guriguri ta

1 Lohiabada e,
oi dekenai lau noinoi noho,
lau do oi durua haraga.
Oi dekenai lau boibo noho,
mani lau dekenai do oi kamona.
2 Lau ura egu guriguri do oi abia dae,
bona ena mamina oi dekenai be namo,
muramura mai bonana namona bamona.
Bona lau ura egu imana lau abia isi kara ena namo,
be adorahi boubouna ena namo hegeregere, oiemu vairana dekenai.

3 Lohiabada e, egu uduna do oi gimaia,
egu bibina ena hereva do oi biagua.

4 Lau do oi durua,
vadaeni do lau ura lasi kara dika do lau karaia,
bona lau do oi naria,
vadaeni kara dika taudia danu do lau haboua lasi,
kara dika karaia totona.
Edia aniani pata dekena amo lau do oi hakaua siri.

5 Tau namona ese,

iena bogahisihisi dekena amo, lau do ia dadabaia,
 o lau dekenai do ia gwau henia, be namo.
 To lau ese kara dika taudia danu do lau turana karaia lasi,
 badina be nega ibounai,
 edia kara dika koua totona lau guriguri noho.
⁶ Unai dika taudia be tau haida ese do idia dogoatao,
 bona nadi hagahaga gabuna dekena amo do idia negea diho,
 do idia mase.
 Unai neganai taunimanima do idia diba,
 Lohiabada ena hereva be momokani.
⁷ Edia turiadia be tau haida ese,
 guria gabuna ena isena kahirakahira do idia negea.
 Edia toana be hegeregere tau ese au ta ia siria,
 ia utua maragimaragi, bona unai gaudia ia negea kava bamona.

⁸ To Dirava Lohiabada e,
 lau be oi dekenai lau abidadama noho.
 Oi ese lau oi naria namonamo noho,
 vadaeni lau mauri noho.
 Mase dekena amo lau do oi gimaia noho.
⁹ Lau do idia abia totona,
 tarapu, idia atoa hegaegae gaudia,
 dekena amo mani lau do oi hamauria.
 Kara dika taudia edia tarapu dekena amo lau do oi gimaia.
¹⁰ Kara dika taudia mani do oi hadikaia,
 vadaeni idia sibodia idia karaia tarapu ese idia do ia abia,
 to lau ese do lau heau mauri.

142

David a ese durua totona Lohiabada ia noia

¹ Durua totona lau ese Lohiabada dekenai lau boiboi.
 Ia dekenai lau noinoi goada,
 lau do ia durua totona.
² Egu lalohisihisi bona hekwarahi gaudia,
 be iena vairana dekenai lau gwauraia noho.
³ Egu lalona ia metau momokani,
 bona lau laloa be dika do lau davaria neganai,
 Lohiabada be ia diba edena kara ese egu dala do ia hanamoa.
 Lau raka noho dalana dekenai,
 lau idia hadikaia gwauraia taudia ese tarapu idia hunia vadaeni.
⁴ Lau dekenai durua totona tauna ta lau tahua,
 to egu durua tauna ta lau davaria lasi.
 Lau do ia gimaia tauna ta be lasi,
 bona tau ta ese egu mauri ia laloa lasi.
⁵ Lohiabada e, oi dekenai lau tai henia noho.
 Lau gwau,
 “Lohiabada e, oi sibona ese lau oi naria noho.
 Egu mauri dinadia ibounai lalonai,
 lau ura oi sibona lau dekenai do oi noho.
⁶ Egu noinoi mani do oi kamoni,
 badina be egu lalona ia hisihisi,

ia dika momokani, mai gari danu.
 Lau idia lulua noho taudia dekena amo lau do oi hamauria,
 badina idia edia goada ese,
 egu goada idia hereaia momokani.
⁷Lohiabada e,
 egu dibura ruma dekena amo lau do oi kokia ruhaia.
 Unai neganai oiemu bese taudia edia hebou lalonai,
 lau ese oiemu ladana do lau hanamoia,
 oiemu kara namo lau dekenai dainai.”

143

David a ese durua totona Lohiabada ia noia

¹Lohiabada e,
 egu guriguri do oi kamona! Oiemu kara maoromaoro dainai,
 egu noinoi do oi kamona henia.
 Oiemu abidadama bona kara momokanidia dainai,
 egu noinoi do oi haere henia.
²Lau, oiemu hesiai tauna do oi kota henia lasi,
 badina be idia mauri noho taudia ibounai edia huanai,
 ta be ia maoromaoro lasi oiemu vairana dekenai.
³Lau ia hadikaia gwauraia tauna ese lau ia lulua,
 bona ia ese lau ia halusia momokani vadaeni.
 Ia ese dibura ruma lalonai lau ia koua vadaeni,
 bona egu noho be idaunegai idia mase vadaeni taudia bamona.
⁴Unai dainai egu lalona ia metau dainai,
 lau ese laloe dika lau davarua vadaeni.
 Egu lalona ia hisihisi, dika momokani, mai gari danu.
⁵Dina gunadia lau laloe noho.
 Oiemu kara gunadia ibounai lau laloe noho.
 Oiemu imana edia kara badadia ibounai lau laloatao noho.
⁶Unai neganai egu imana lau abia isi,
 oi dekenai lau guriguri.
 Egu lauma be oi totona ia ranu mase,
 tano kaukau be medu totona ia ranu mase bamona.
⁷Lohiabada e,
 lau dekenai do oi haere haraga,
 badina be egu lauma ia manoka momokani, mase bamona.
 Oiemu vairana be lau dekena amo do oi hunia lasi.
 Bema unai bamona oi karaia,
 lau be mase gabuna idia lao noho taudia danu do ai diho lao.
⁸Lohiabada e, lau ese oi lau abidadama henia noho.
 Unai dainai daba ibounai lau do oi durua,
 vadaeni oiemu noho hanaihanai lalokauna do lau laloe noho.
 Guriguri dekena amo egu lauma oi dekenai lau abia isi noho.
 Unai dainai egu lao dala namona,
 mani lau dekenai do oi hedinarua.
⁹Lohiabada e,
 lau idia hadikaia gwauraia taudia dekena amo lau do oi hamauria,
 badina oi sibona be egu hunia gabuna.
¹⁰Oi be lauegu Dirava.

Unai dainai oiemu ura ena kara,
 be lau dekenai mani do oi hadibaia.
 Lau ura oiemu Lauma ese lau do ia hakaua,
 vadaeni dala namona,
 bona mai maurina dekenai do lau raka.

¹¹ Lohiabada e,
 oiemu gwauhamata hegeregereua lau do oi hamauria.
 Oiemu kara maoromaoro dainai,
 egu hisihisi dekena amo lau do oi hanamoa lou.

¹² Oiemu noho hanaihanai lalokauna dainai,
 lau idia hadikaia gwauraia taudia do oi alaia ore,
 bona lau dekenai idia dagedage noho taudia do oi hadikaia ore,
 badina lau be oiemu hesiai tauna.

144

David a ena kwalimu dainai ia ese Dirava ia hanamoa

¹ Lohiabada lau hanamoa noho,
 badina ia be egu Nadi Badana.
 Ia ese tuari totona egu imana ia hadibaia noho,
 bona heatu totona,
 ia ese egu ima kwakikwakina ia hadibaia noho.

² Ia ese lau ia lalokau henia noho,
 bona ia be egu hunia gabu namona.
 Ia be egu kohoro,
 bona ia be egu hamauria Tauna.
 Egu mauri do ia naria totona,
 lau ese ia lau abidadama henia noho.
 Bona ia ese bese idauida taudia,
 be egu siahu henunai ia atoa.

³ Lohiabada e,
 ai taunimanima be dahaka,
 oi ese oi laloa noho ai dekenai?
 Ai be gau ta lasi bamona,
 anina lasi, to edena bamona oi ese ai oi naria noho?

⁴ Ai taunimanima be hahodi tamona sibona bamona,
 bona aiemai mauri dinadia be daudau lasi,
 dina ena laulau ia hanaia haraga bamona.

⁵ Lohiabada e,
 namona be oi ese guba do oi kehoa,
 bona do oi diho mai.
 Oiemu imana be ororo dekenai do oi atoa,
 vadaeni kwalahu badana do ia vara.

⁶ Kevaru do oi siaia mai,
 oi dekenai idia tuari henia taudia do oi lulua lao.
 Oiemu diba be idia dekenai do oi pidia, bona do oi halusidia.

⁷ Lau hamauria totona,
 oiemu imana be atai ai dekena amo do oi atoa diho,
 bona ranu dobu dekena amo lau do oi veria mauri.
 Idu bese taudia edia siahu dekena amo danu,
 lau do oi hamauria.

⁸ Edia ududia ese hereva momokani idia gwauraia lasi.

Idia ese Dirava dekenai idia gwauhamata henia noho,
 idia gwau edia hereva be momokani,
 to gauna be koikoi sibona.

⁹ Dirava e,
 lau ese ane matamatana oi dekenai do lau abia.
 Varo ibounai 10 gita dekena amo,
 oi dekenai miusiki do lau gadaralaia.
¹⁰ Oi ese king taudia oi durua,
 vadaeni tuari dekenai idia kwalimu.
 Oi ese lau, oiemu hesiai tauna Davida oi hamauria noho.

¹¹ Tuari ena dagedage dekena amo lau do oi hamauria,
 bona idau bese taudia edia siahu dekena amo,
 lau do oi veria mauri.
 Edia ududia ese hereva momokani idia gwauraia lasi.
 Idia ese Dirava dekenai idia gwauhamata henia noho,
 idia gwau edia hereva be momokani,
 to gauna be koikoi sibona.

¹² Lohiabada e,
 ai ura aiemai natudia tau be maragidia dekena amo,
 do idia tubu daekau mai goada danu,
 au badadia idia tubu bamona.
 Bona ai ura aiemai natudia hahine,
 be hegeregere du namodia bamona,
 king ena ruma ena kona ta ta dekenai haginia gaudia,
 toana namo gaudia.

¹³ Ai ura aiemai aniani sitoa rumadia be do idia honu momokani,
 aniani gaudia idauidau dekena amo.
 Ai ura aiemai mamoe ese,
 natudia momo do idia havaraia,
 bona aiemai rei gabudia,
 be mamoe dekenai idia honu momokani.

¹⁴ Ai ura danu aiemai boromakau,
 be natudia momo do idia havaraia,
 bona edia natudia ta do ia vara dika lasi, o do ia mase lasi.
 Ai ura danu aiemai hanua edia ariara dekenai,
 lalohisihisi ena taitai do ia vara lasi.

¹⁵ Inai bamona hanamoa idia davaria bese taudia,
 be do idia moale noho.
 Edia Dirava be Lohiabada, ena bese taudia be idia moale noho.

145

Dirava hanamoa ane

¹ Lauegu Dirava bona lauegu King,
 oi do lau hanamoa noho,
 bona oiemu ladana badana do lau abia isi noho,
 ela bona hanaihanai.

² Dina ibounai lau ese oi do lau tanikiu henia,
 ma oi do lau hanamoa ela bona hanaihanai.

³ Lohiabada ena ladana be bada herea,

bona ita ese iena ladana do ita abia isi.
Iena kara badadia do ita tahua diba lasi,
iseda laloa be kwadogi dainai.

⁴ Lohiabada e,
oiemu kara badadia be inai nega taudia,
bona gabeai negadia taudia danu ese do idia hanamoa.
Idia ese oiemu kara badadia ibounai do idia gwauraia noho.

⁵ Idia ese oiemu hairaina bona oiemu king siahuna,
do idia herevalaia,
bona lau ese oiemu hoa karadia do lau laloa noho.

⁶ Taunimanima ese oiemu kara badadia do idia herevalaia,
bona lau ese oiemu ladana ena bada do lau gwauraia.

⁷ Ma idia ese oiemu kara namodia ena sivarai do idia gwauraia,
bona oiemu bogahisihisi, be edia ane dekenai do idia herevalaia.

⁸ Lohiabada be mai ena lalokau bona mai ena bogahisihisi.
Ia be badu haraga lasi,

bona ia ese ita ia lalokau henia nega ibounai.

⁹ Lohiabada ena kara be namo,
taunimanima ibounai dekenai.
Ia karaia gaudia ibounai dekenai iena bogahisihisi ia henia.

¹⁰ Lohiabada e, oi ese oi karaia gaudia ibounai ese,
oiemu ladana do idia abia isi,
bona oiemu bese taudia ese oi do idia hanamoa bada.

¹¹ Idia ese oiemu King siahuna ena hairaina do idia herevalaia,
bona oiemu goada badana do idia gwauraia.

¹² Vadaeni taunimanima ibounai ese,
oiemu kara badadia ena sivarai do idia diba.
Oiemu basileia ena goada bona hairaina danu do idia diba.

¹³ Oiemu King siahuna be do ia noho hanaihanai.

bona oiemu King dagi be do ia doko diba lasi.

Lohiabada ena gwauhamata be ia ese ia badinaia noho,
bona iena kara ibounai be namo.

¹⁴ Hisihisi idia abia noho taudia,
be Lohiabada ese ia durua noho,
bona dagedage taudia ese tau haida idia hahisia neganai,
Lohiabada ese unai hisihisi taudia ia abia isi noho.

¹⁵ Lohiabada e,
idia mauri noho gaudia ibounai ese oi dekenai idia itaia noho,
badina oi ese edia aniani oi henidia noho, idia hitolo neganai.

¹⁶ Oi ese aniani hegeregere oi henidia,
bona idia boga kunu noho.

¹⁷ Lohiabada ena kara ibounai be maoromaoro,
bona ia ese taunimanima ibounai dekenai ia bogahisihisi henia noho.

¹⁸ Lohiabada be ia dekenai idia boiboi taudia dekenai ia noho.
Idia boiboi henia mai edia momokani danu taudia dekenai,
Lohiabada be idia kahirakahira ia noho.

¹⁹ Ia dekenai idia gari taudia dekenai,
idia ura henia gaudia ia henia noho.

Edia taitai ia kamonai,
bona ia ese idia ia hamauria noho.

²⁰ Ia idia lalokau henia taudia,

be Lohiabada ese ia naridia namonamo,
to ia ese kara dika taudia do ia hadikaia ore.

²¹ Lau ese nega ibounai Lohiabada do lau hanamoa.
Namona be taunimanima ibounai ese,
iena ladana helagana do idia hanamoa ela bona hanaihanai.

146

Dirava be Hamauria Tauna

¹ Lohiabada do umui hanamoa!

Egu lauma e,

Lohiabada do oi hanamoa!

² Egu mauri dinadia ibounai lalonai,

lau ese Lohiabada do lau hanamoa.

Ane dekenai,

Lohiabada do lau hanamoa egu mauri dinadia ibounai lalonai.

³ King taudia do umui abidadama henia lasi,
badina taunimanima ese umui do idia hamauria diba lasi.

⁴ Idia mase neganai tano ena kahu dekenai idia giroa lou.

Edia mase dina dekenai,

idia ura do idia karaia gaudia be do idia doko.

⁵ Iakobo ena Dirava ese ia durua noho taudia,
be idia moale noho.

⁶ Lohiabada ese guba bona tanobada bona davara,

bona idia lalonai gaudia ibounai ia karaia.

Lohiabada ena abidadama kara bona ena momokani kara,

be do ia karaia noho hanaihanai.

⁷ Haida ese idia hadikaia taudia,

be Lohiabada ese kota dekenai ia durudia noho,

bona ogogami taudia dekenai aniani ia henia noho.

Lohiabada ese dibura ruma taudia ia kokia ruhaia noho.

⁸ Lohiabada ese matakepulu taudia edia matadia ia kehoa noho.

Idia moru vadaeni taudia be Lohiabada ese ia abia isi noho.

Iena kara maoromaoro taudia ia lalokau henidia noho.

⁹ Lohiabada ese,

iseda tano dekenai idia noho idau bese taudia ia gimaia noho.

Lohiabada ese,

vabu bona tamana sinana lasi maragidia ia naria noho,

to kara dika taudia edia dala ia hadikaia noho.

¹⁰ Lohiabada be King do ia noho, ela bona hanaihanai.

Siona taudia e,

Lohiabada be emui Dirava do ia noho,

ela bona nega ibounai.

Lohiabada do umui hanamoa!

147

Siahu Ibounai Dirava do ita hanamoa

¹ Lohiabada do umui hanamoa!

Ane dekenai Dirava do ita hanamoa be namo.

Lohiabada do ita hanamoa be kara namona bona kara maorona.

² Lohiabada ese Ierusalemia ia haginia lou noho.
 Israela taudia be guna mai guia danu idia noho,
 idau bese taudia edia gabu dekenai,
 to Lohiabada ese hari ia mailaidia lou noho.

³ Edia kudoudia idia makohia taudia,
 be Lohiabada ese ia hagoadaia lou noho,
 bona edia bero ia kumia noho.

⁴ Lohiabada ese hisiu edia namba ia gwauraia vadaeni,
 bona ia ese idia ibounai edia ladana ia atoa.

⁵ Iseda Lohiabada be bada, bona mai siahu danu.
 Iena aonega be mai ena hetoana lasi.

⁶ Lohiabada ese manau taudia ia abia isi noho,
 to kara dika taudia be tano dekenai ia negedia diho noho.

⁷ Mai ane danu Lohiabada do umui tanikiu henia.
 Gita dekena amo,
 iseda Dirava hanamoa totona miusiki do umui gadaralaia.

⁸ Guba dekenai ori momo ia atodia noho,
 bona tano hanamoa totona medu ia havaraia noho.
 Ororo dekenai rei ia hatubua noho.

⁹ Boroma idaudau dekenai aniani ia henia noho,
 bona galo manudia idia boiboi neganai,
 aniani idia dekenai ia siaia noho.

¹⁰ Hosi ena goada be Dirava ese ia moalelaia lasi,
 bona tau ena aena danu ia moalelaia lasi.

¹¹ To Lohiabada ese,
 ia dekenai idia gari henia taudia ia moalelaia noho.
 Iena noho hanaihanai lalokauna dainai,
 ia idia abidadama henia taudia,
 be Lohiabada ese ia moalelaia noho.

¹² Ierusalemia taudia e,
 Lohiabada do umui hanamoa bada.
 Siona taudia e,
 emui Dirava do umui hanamoa.

¹³ Ia ese Ierusalemia ena magu iduara auridia ia hagoadaia noho,
 bona ia ese Ierusalemia idia noho taudia ia hanamoa noho.

¹⁴ Emui tano hetoadia dekenai Dirava ese maino ia karaia noho,
 bona uiti namo herea emui uma dekenai ia hatubua noho.
 Unai dekena amo umui boga kunu noho.

¹⁵ Tanobada dekenai oda ia siaia lao,
 bona iena hereva gauna be idia karaia haraga noho.

¹⁶ Ia ese sinou ia siaia,
 tano ia koua noho, bilankesi bamona,
 bona ia ese hanuaboi ranu ia hakerua, aisi bamona ia lao.
 Bona unai aisi ia negea kava,
 tano ena kahū bamona.

¹⁷ Medu, aisi bamona gauna,
 be tano dekenai ia siaia diho noho, aisi nadi bamona,
 bona iena lai ena keru dekenai daika ia gini diba?

¹⁸ Ia ese iena oda hereva ia siaia,
 vadaeni aisi ia veve noho.

Ia ese lai ia havaraia,
vadaeni ranu ia heau diho noho.

¹⁹ Iena hereva be Iakobo dekenai ia hedinaia vadaeni.
Iena taravatu bona iena oda,
be Israela dekenai ia henia vadaeni.

²⁰ Bese haida dekenai unai bamona ia karaia lasi.
Unai idau bese taudia ese iena taravatu idia diba lasi.

Lohiabada do umui hanamoa!

148

Tanobada bona guba dekenai idia noho gaudia ibounai ese Dirava idia hanamoa be namo

¹ Lohiabada ena ladana do umui hanamoa!
Guba dekenai, atai ai dekenai umui noho taudia ibounai e,
Lohiabada do umui hanamoa.

² Lohiabada ena aneru ibounai e,
Lohiabada ena ladana do umui abia isi,
Lohiabada ena tuari taudia,
guba dekenai umui noho,
Lohiabada ena ladana do umui abia isi.

³ Dina bona hua e,
Lohiabada do umui hanamoa.
Hisiu mai emui diaridiari e,
Lohiabada do umui hanamoa.

⁴ Guba atai ai momokani,
Lohiabada ena ladana do umui abia isi.
Guba ena atai ai dekenai ia noho ranu e,
Lohiabada ena ladana do umui hanamoa.

⁵ Inai gaudia ibounai ese Lohiabada ena ladana idia abia isi be namo,
badina Lohiabada ese ia oda dainai, idia be idia vara.

⁶ Lohiabada ena hereva dekena amo,
ia ese edia gabu korikori dekenai idia ia atoa,
idia noho hanaihanai.
Lohiabada ese noho hanaihanai taravatu ia atoa,
ta ese ia koua diba lasi gauna.

⁷ Tanobada dekenai noho gaudia ese Lohiabada do idia hanamoa.
Davara dekenai idia noho mauri gaudia badadia,
dohu momokani gabudia dekenai gaudia ibounai danu.

⁸ Kevaru bona aisi ena medu, sinou bona ori,
lai goadadia,
iena oda idia kamoni henia gaudia ibounai,
ese Lohiabada do idia hanamoa.

⁹ Ororo badadia bona maragidia ibounai,
huahua audia bona sida audia ibounai.

¹⁰ Uda boroma ibounai,
bona boromakau ibounai,
gaigai bona huala gaudia,
bona atai ai manudia ibounai,
Lohiabada ena ladana do umui hanamoa.

¹¹ King ibounai,
bona bese ibounai,
king ena natuna taudia,
bona lohia taudia idau idau ibounai.

¹² Ulato bona uhau,
 buruka taudia,
 bona natuna maragidia danu,
¹³ namona be idia ibounai ese,
 Lohiabada ena ladana do idia hanamoa bada!
 Iena ladana badana ese,
 taunimanima ibounai edia ladana badana ia hereaia noho.
 Iena hairaina be atai ai momokani,
 ia ese tanobada bona guba ia hereaia noho.
¹⁴ Lohiabada ese Israela taudia ia lalokau henia momokani,
 vadaeni ia ese idia ia hagoadaia momokani.
 Unai dainai iena bese taudia ese iena ladana idia abia isi noho.
 Lohiabada ena ladana do umui hanamoa!

149

Dirava hanamoa ane ta

¹ Lohiabada do umui hanamoa!

Lohiabada dekenai ane matamatana do umui abia.
 Lohiabada idia abidadama henia taudia edia hebou dekenai,
 ia do umui hanamoa.

² Israela taudia ese, idia ia karaia Diravana do idia moalelaia.
 Siona taudia ese edia King do idia moalelaia be namo.

³ Iena ladana do idia hanamoa mai edia mavaru danu.
 Tareko bona gita ena regena dekena amo,

Lohiabada do idia hanamoa,

⁴ badina be Lohiabada ese,
 iena bese taudia ia moalelaia noho momokani.
 Ia ese manau taudia dekenai kwalimu ia henia noho.

⁵ Dirava ena taudia ese,
 edia kwalimu dainai do idia moale noho be namo.
 Hanuaboi ena hora ibounai lalonai,
 ane do idia abia be namo.

⁶ Namona be mai boiboi bada danu Dirava do idia hanamoa.
 Bona matadia rua tuari kaia,
 be edia imadia dekenai do idia dogoatao noho,

⁷ idia ese bese idauidau do idia halusia totona,
 ma bese idauidau taudia do idia matakani henia totona.

⁸ Unai bese king taudia be auri dekena amo do idia guia,
 bona edia lohia taudia be auri seini dekena amo do idia guia.

⁹ Io, iena bese taudia dekena amo,
 Dirava ese ia gwauraia vadaeni kerere davana,
 be unai bese idauidau dekenai do ia henia.
 Dirava idia abidadama henia taudia ibounai,
 be inai bamona do idia kwalimu.

Lohiabada do umui hanamoa!

150

Lohiabada do ita hanamoa

¹ Lohiabada do umui hanamoa!

Iena Dubu Helaga lalonai Dirava do umui hanamoa!

Guba, iena siahu bada herea gabuna dekenai danu,
be Lohiabada do umui hanamoa!

²Ia ese kara badadia ia karaia dainai do umui hanamoa.

Iena siahu bada herea momokani do umui hanamoa.

³Kibi ena regena dekena amo do umui hanamoa.

Gita badadia bona maragidia dekena amo ia do umui hanamoa.

⁴Gaba bona mavaru dekena amo,

gita bona ivilikou dekena amo, Lohiabada do umui hanamoa.

⁵Botaia auri ena regena dekena amo ia do umui hanamoa.

Auri do umui botaia goadagoda,

bona Lohiabada ena ladana do umui abia isi.

⁶Umui mauri noho gaudia ibounai e,

Lohiabada ena ladana do umui hanamoa!

Lohiabada do umui hanamoa!